

প্রথম প্রকাশ : ১৩৬৭ ভাদ্র । সেপ্টেম্বর ১৯৬০
পুনর্মুদ্রণ : ১৩৯৭ অগ্রহায়ণ । নভেম্বর ১৯৯০
প্রচ্ছদ : দেবব্রত ঘোষ

একশো টাকা

সুবচনের পক্ষে শ্রীমতি রীনা কুমার কর্তৃক
২ গণেশ্বর মিত্র লেন কলকাতা ৭০০ ০০৯ থেকে প্রকাশিত
ও ফ্রেন্ডস গ্রাফিক ১১/বি বিড়ল রোড কর্তৃক মুদ্রিত

সূচিপত্র

প্রথম খণ্ড

পরিচ্ছেদ	১ বেলা পাঁচটার গাড়ি	৩
	২ ভিন্ন জগতের একটি মেয়ে	১৮
	৩ স্ভেনটিটস্কিদের বাড়িতে ক্রিসমাস উৎসব	৫১
	৪ অনিবার্যের আবির্ভাব	৭৩
	৫ বিদায়, অতীত	১০২
	৬ মস্কোতে রাত্রিবাস	১২৯
	৭ যাত্রা	১৬৩

দ্বিতীয় খণ্ড

পরিচ্ছেদ	৮ আগমন	২০৩
	৯ ভারিকিনো	২২৩
	১০ রাজপথ	২৪৮
	১১ আরণ্যক প্রান্তর	২৬৮
	১২ বরফ-দেওয়া জামফল	২৮৭
	১৩ কুন্তলভবনের উপেটা দিকে	৩০৭
	১৪ আবাস ভারিকিনো	৩৪০
	১৫ উপসংহার	৩৭৬
	১৬ পরিশিষ্ট	৪০৫

জিভাগোর কবিতা ৪১৯

অনুবাদ : বুদ্ধদেব বসু

উপন্যাসের প্রধান চরিত্রাবলী

পদবী	নাম এবং পিতৃকুলের উপাধি	সংক্ষেপে	
জিভাগো	ইউরি আশ্বেইয়েভিচ (আশ্বেইয়েভিচ)	ইউরা, ইউরোচকা	
ভের্ডেনযাপিন	নিকোলে নিকোলেভিচ	কোলিয়া	ইউরি জিভাগোর মামা
ডুডোরভ		নিকি	ইউরি জিভাগোর বন্ধু
গর্ডন		মিশা	
গ্রোমেকো	আলেকজাণ্ডার আলেকজাণ্ড্রোভিচ		
গ্রোমেকো (বিবাহ-পূর্বে ক্রোগার)	আনা ইভানোভনা		আলেকজাণ্ডার গ্রোমেকোর স্ত্রী
গ্রোমেকো	অনটনিনা আলেকজাণ্ড্রোভনা	টোনিয়া	আলেকজাণ্ডার গ্রোমেকোর কন্যা
গুইশার	আমালিয়া কালোভনা		আমালিয়া
গুইশার	লারিসা ফিফোডোরোভনা	লারা	গুইশারের কন্যা
গুইশাব	রডিয়ন ফিফোডোরোভিচ	রডিয়া	গুইশারের পুত্র
কমারোভস্কি	ভিক্টর ইগ্নলিটোভিচ		
আন্টিপভ	পাভেল পাভলোভিচ	পাশেঙ্কা, পাশা	
গালিউলিন	গিমা, ৬৭দিন		
গালিউলিনা	ফার্মা		গালিউলিনের স্ত্রী
গালিউলিন	ইউসুফ গিমা, ৬৭দিনোভিচ	ইউসুপকা	গিমা, ৬৭দিন গালিউলিনের পুত্র
টিভেরজিনা	মারফ গাভ্রিলোভনা		
টিভেরজিন	কুপ্রিয়ান সাভেলিযেভিচ	কুপ্রক	মারফা টিভেরজিনের পুত্র
টিয়াগুনোভা	পেলাগিয়া	পোলিয়া-মাসি	
সামডেভইয়াটভ	আনফিম ইয়েফিমোভিচ		
মিকুলিৎসিন	আভেরসিয়াস		
মিকুলিৎসিনা	হেলেন		আভেরসিয়াস মিকুলিৎসিনের স্ত্রী
মিকুলিৎসিন	লিভেরিয়ুস আভেরসিএভিচ		আভেরসিয়াস মিকুলিৎসিনের পুত্র
টুন্টসেভা	গ্রাফিরা	গ্রাশা	লিভেরিয়ুস
টুন্টসেভা	সেরাফিমা	সিমা	মিকুলিৎসিনের মাসি

সম্পাদকের নিবেদন

“ডাক্তার জিভাগো”-র এই বাংলা অনুবাদ কী-ভাবে সম্পন্ন হয়েছে, এবং আমার এতে কতটুকু অংশ ছিলো, সে-বিষয়ে দু-এক কথা বলতে চাই।

দু-জন অনুবাদকের পাণ্ডুলিপি আমি পরিশোধন করেছি; চেষ্টা করিছি ভাষার ভঙ্গি, বানান ও যতিচিহ্নের ব্যবহারে সমতা রক্ষা করতে, যাতে পাঠকের মনে হয় বাংলা পুস্তকটি একই হাতের রচনা। যাকে আক্ষরিকতা বলে অনুবাদে তা অসম্ভব বলে জেনে, আমি লক্ষ্য রেখেছি অনুবাদটি যাতে সুখপাঠ্য হয়, অন্ততপক্ষে পাঠযোগ্য; কিন্তু জ্ঞানত একটি শব্দও বর্জন করিনি, জটিলকে সরল ও বন্ধুরকে সমতল করে দিয়ে অলীক প্রাঞ্জলতা সৃষ্টি করিনি। আশা করি বাংলা ভাষার পাঠক এই পুস্তক অনায়াসে পড়ে উঠতে পাববেন—কিংবা যেটুকু আয়াস তাঁকে করতে হবে তা পাষ্টেরনাকের বৈশিষ্ট্যের প্রভাবে, অনুবাদের অপটুতার জন্য নয়।

হয়তো বলা বাহুল্য, এই অনুবাদ “ডাক্তার জিভাগো”-র ইংরেজ সংস্করণ থেকে রচিত হয়েছে; এর সঙ্গে সম্পৃক্ত ব্যক্তিদের রুশীয় সাহিত্য ও ইতিহাস বিষয়ে অল্প-বিস্তর অভিজ্ঞতা থাকলেও রুশ ভাষায় বর্ণপরিচয় নেই। আমাদের এই অক্ষমতা সত্ত্বেও এ-কাজে আমরা অগ্রসর হয়েছি দুটি কথা ভেবে: প্রথমত, অনুবাদের অনুবাদও অবস্থাবিশেষে প্রভাবশীল হতে পারে এবং হয়েছে; দ্বিতীয়ত, রুশ ভাষায় জ্ঞান, সাহিত্য রসবোধ ও বাংলা ভাষায় রচনাশক্তি, এই তিন গুণের সন্নিপাত আমাদের দেশের পক্ষে এমনই বিরল যে তার কোনো সম্ভাবনা অদূর ভবিষ্যতে দেখা যাচ্ছে না। যদি কখনো সেই ‘আদর্শ অনুবাদক’ দেখা দেন, আমরা তাঁকে অভ্যর্থনা জানাতে প্রস্তুত থাকবো, কিন্তু ইতিমধ্যে একটি পূর্ণাঙ্গ সমকালীন যোরোপীয় উপন্যাসের সঙ্গে পরিচয় ঘটলে বাংলা ভাষার পাঠক ও বাংলা সাহিত্য লাভবান হবে বলে বিশ্বাস করি।

রুশীয় নামগুলির প্রতিলিখনে মোটামুটি জার্মান ভাষার উচ্চারণ-পদ্ধতি অবলম্বন করিছি; যদিও কোনো-কোনো ক্ষেত্রে আমাদের ইংরেজি অভ্যাস প্রশ্রয় পায়নি তাও নয়। এই বিষয়ে সঠিক বা যথাযথ স্বর দাবি আমরা করছি না; কোনোরকম ‘পণ্ডিত্যানা’ সতর্কভাবে এড়িয়ে গিয়েছি। ইংরেজি সংস্করণের পাদটীকাগুলি সবই রক্ষিত হয়েছে; উপরন্তু, বাঙালি পাঠকের সুবিধের জন্য, অনেক নতুন পাদটীকা যোগ করেছি—সেগুলো ‘অনুবাদের টীকা’ বলে উল্লিখিত হ’লো।

পাঠক লক্ষ্য করবেন যে এই গ্রন্থে ইংরেজি ‘z’ ব্যঞ্জননের স্থলে ‘জ’ ও ফরাসি ‘j’ বা রুশীয় ‘zh’-এর স্থলে ‘জ্জ’ অক্ষর ব্যবহার করা হয়েছে। ‘জ্জ’ শব্দের উচ্চারণ ইংরেজি ‘Pleasure’ বা ‘measure’ শব্দে ‘s’-এর মতো; বাংলা ভাষায় এই ব্যঞ্জন নেই, কিন্তু আমাদের পক্ষে তা সহজেই উচ্চার্য।

এই সম্পাদনা-কর্মে আমাকে প্রভূতভাবে সাহায্য করেছেন শ্রীসুবীর রায়চৌধুরী; তাঁকে আমার কৃতজ্ঞতা জানাই। খৃষ্টীয় ধর্মসংক্রান্ত পরিভাষার অনুবাদে ফাদার পিয়ের ক্লার্ক, এস. জে.-প্রণীত ‘A Glossary of Bengali Religious Terms’ নামক পুস্তিকার সাহায্য পেয়েছি। যথাসাধ্য মনোনিবেশ সত্ত্বেও হয়তো স্থলে-স্থলে ত্রুটি বা অসংগতি থেকে গেলো; কোনো সহৃদয় পাঠক সে-বিষয়ে আমাকে জানালে পরবর্তী সংস্করণে সংশোধনের চেষ্টা করবো।

বু.ব.

ପ୍ରଥମ ଧଞ୍ଡ

পরিচ্ছেদ ১

বেলা পাঁচটার গাড়ি

১

‘শাস্ত্রত স্মৃতি’ গান গাইতে-গাইতে তারা চলেছে। মাঝে-মাঝে গান থামে; আর যখনই থামে, তাদের পায়ের শব্দ, হাওয়ার ঝাপটা আর ঘোড়াগুলো মিলে যেন সেই গানকে এগিয়ে নিয়ে যায়।

এই মিছিলটিকে এগুতে দেবার জন্য রাস্তার লোকেরা স’রে দাঁড়াচ্ছে, কেউ-কেউ ফুলের মালাগুলোকে গুনছে, কেউ বা ক্রুশচিহ্ন আঁকছে নিজের বুকে। ক্রীতহীনী কয়েকজন এগিয়ে এসে জিজ্ঞেস করলে, ‘কে? কাকে কবর দেওয়া হচ্ছে?’ ‘জিভাগো,’ কেউ হয়তো জবাব দেয়। ‘ও, তাই!’ সঙ্গে-সঙ্গে আর একজন বলে ওঠে: ‘না, না, জিভাগো নন; তার স্ত্রী।’ ‘ঐ একই হ’লো।’ অস্ত্রোষ্টির আয়োজন চমৎকার হয়েছে। ঈশ্বর মৃতের আত্মাকে শাস্তি দিন।

শেষ মুহূর্তগুলি ঝলক তুলে মিলিয়ে গেলো। তাদের যেন গোনা যায়—আর কখনো তারা ফিরে আসবে না। ‘হে পরম প্রভু, তোমার এই প্রাণীসমাকীর্ণ, ঐশ্বর্যময়ী ধরণী, এই দীন প্রাণী ও তোমাব।’ পুরোহিত মারিয়া নিকোলাএভনার শবদেহের ওপর মাটি ছিটিয়ে-ছিটিয়ে ক্রুশচিহ্ন একে দিলেন। ‘সজ্জানের আত্মা’ গান গাওয়া হ’লো। তারপর শুরু হ’য়ে গেলো এক ভীষণ ব্যস্ততা। কফিনের মুখে আঁটা হ’লো পেরেক, নাবানো হ’লো কবরের ভিতর। চারটে কোদাল দ্রুতবেগে ভরিয়ে তুললো কবর, আর সঙ্গে-সঙ্গে ফোঁটা-ফোঁটা বৃষ্টির মতো ঝড়ি-ঝড়ি মাটি কফিনের ঢাকনার উপর মৃদু শব্দে ঝ’রে পড়তে লাগলো। কবরের উপর উঁচু হ’য়ে উঠলো মাটির ঢিপি, একটি দশ বছরের ছেলে সেই ঢিপি বেয়ে উঠে দাঁড়ালো।

যে-কোনো বঁড়ো অস্ত্রোষ্টিক্রিয়ার সমাপ্তির পর লোকেরা কেমন নির্বোধ ও নিঃসাড় হ’য়ে পড়ে। সেইজন্য অনেকে ভাবলে ছেলেটি বুঝি তার মৃত মায়ের বিষয়ে কিছু বলতে চাইছে।

কিন্তু ছেলেটি সেই উঁচু জায়গা থেকে মাথা তুলে হেমন্তের রিক্ত প্রকৃতির উপর চোখ বুলিয়ে নিলো: তারপর তাকালো মঠের চূড়োগুলির দিকে কেমন এক উন্মত্ত দৃষ্টিতে। তাব চ্যাপ্টা মুখ আর ঝোঁচা নাক বিকৃত হ’য়ে উঠলো; লম্বা ক’রে বাড়িয়ে দিলে গলা। যদি সে নেকড়ে-শিশু হ’তো তাহ’লে কাউকে বলে দিতে হ’তো না যে সে এখনই আত্ননাশ ক’রে উঠবে। দুই হাতের পাতায় মুখ ঢেকে ফুঁপিয়ে কেঁদে উঠলো ছেলেটি। বাতাস নোমে এলো তার ওপর, ঝাপটে-ঝাপটে হিম বৃষ্টি ছিটিয়ে চাবুক মারলে তার মুখে আর হাতের পাতায়। ঈর্ষা, আন্তিন ওলা কালো রঙের পোশাক পরা এক ভদ্রলোক ধীরে কবরের উপর উঠে এলেন। ইনি মারিয়া নিকোলাএভনার ভাই; এই শোকার্ত ছেলেটির মামা। এর নাম নিকোলে নিকোলেভিচ ভোডেনিয়াপিন। আগে ইনি ছিলেন পুরোহিত, সম্প্রতি স্বেচ্ছায় সেই আলখান্না পরিত্যাগ করেছেন।

তিনি এগিয়ে এলেন ছেলেটির কাছে, তারপর তাকে নিয়ে কবরখানা থেকে বেরিয়ে পড়লেন।

সে-রাত মঠে কাটালো তারা। পুরোনো দিনের খাতিরে কোলিয়া-মামাকে সেখানে একটি ঘর ছেড়ে দেওয়া হয়েছিলো। সেদিন ছিলো পুণ্যময়ী কুমারীর বরদানের পার্বণ। কালই তাদের চ'লে যাবার কথা দক্ষিণে, ভলগার তীরের এক মফস্বল শহরে—যেখানে কোলিয়া-মামা এক প্রকাশকের আপিশে কাজ করেন। প্রকাশকটি স্থানীয় প্রগতিশীল খবর-কাগজের মালিক। টিকিট কাটা হ'য়ে গেছে, শুছোনো মালপত্রও মঠের কুঠুরিতে তৈরি। কাছেই রেল-লাইন। শান্টিং চলাছে, ইঞ্জিনের করুণ হুইসিলের আওয়াজ দূর থেকে ভেসে আসে বাতাসে।

সন্কেবেলা খুব ঠাণ্ডা পড়লো। কুঠুরির জানলা দুটি মেঝে পর্যন্ত নামানো। বাইরে দেখা যায় রান্নাঘরের পেছনে অবহেলিত ছোট্ট সন্ডি খেত, তারপর একফালি সদর রাস্তা, যেখানে গর্তগুলিতে জল জ'মে বরফ হ'য়ে আছে—আর তারপর সেই কবরখানার একটি অংশ যেখানে আজই কিছুক্ষণ আগে মারিয়া নিকোলো-এভনাকে কবর দেওয়া হয়েছিলো। রান্নাঘরের সন্ডি খেতে বিশেষ-কিছু নেই, শুধু দেয়াল ঘেঁষে একেশিয়ার ঝোপ আর কয়েক সার বাঁধাকপি, শীতে নীল আর কঁকড়ানো। এক-একবার হাওয়া দেয় আর পাতা-হারা একেশিয়াগুলি নাচতে শুরু করে যেন তাদের দানোয় পেয়েছে। নুয়ে প'ড়ে পথের সঙ্গে চেপ্টে যায় তারা।

রাত্রে সেই ছেলোটি, ইউরা, জানলায় যেন কার হাতের টোকা শুনে জেগে উঠেছিলো। কুঠুরির মধ্যে কাঁপছে এক শুভ্রতা, বহস্যময় অন্ধকার আলো হ'য়ে উঠেছে। সেই শীতে, গায়ে তার শাট ছাড়া কিছু নেই, সে ছুটে জানলার ধারে গিয়ে ঠাণ্ডা কাচের উপর তার মুখ চেপে ধরলো।

বাইরে রাস্তার কোনো চিহ্ন নেই, সন্ডি খেত আর কবরখানা মিলিয়ে গেছে, আছে শুধু তুষারের ঝড় আর বরফের ধোয়ার মতো বাতাস। সেই তুষার-ঝড় প্রায় যেন ইউরাকে দেখতে পেয়েছে, জেনেছে তার ভয় দেখাবার শক্তি কতোখানি। আর তাই যেন এতো গর্জন তার, এতো তীব্র চিৎকার: ইউরাকে বশ করার জন্য চেষ্টার কোনোই ক্রটি করলে না, হাতে-হাতে ফল পেয়ে উল্লাসে মেতে উঠলো। আকাশে পাক খেয়ে ঘুরে-ঘুরে শুভ্রতার লম্বা-লম্বা বিরাট ফালি পৃথিবীতে ঝ'রে-ঝ'বে মাটিকে যেন কাফুনে ঢেকে দিলে। এই তুষার-ঝড় জগতে আজ একা, তার কোনো প্রতিদ্বন্দ্বী নেই।

জানলার তাক থেকে নেমে এসে ইউরার প্রথম ঝোঁক হ'লো কাপড় প'রে নিষে বাইরে যায়, কিছু-একটা করতে আরম্ভ করে। তার ভয় হ'লো পাছে ঐ বাঁধাকপির খেতটুকু বরফের তলায় ডুবে যায়—কেউ আর খুঁড়ে না তোলে। ভয় হ'লো পাছে তার মা, খোলা মাঠে কবরে শুয়ে-শুয়ে অসহায় ভাবে মাটির গভীরে ডুবে যান—আরো গভীরে, তাঁর কাছ থেকে অনেক দূরে।

আরো একবার কান্নায় শেষ হ'লো তার ভাবনা। মামা জেগে উঠলেন, যীশুর কথা ব'লে চেষ্টা করলেন তাকে সাশ্বনা দিতে। তারপর হাই তুলে চিহ্নিতভাবে জানলার কাছে গিয়ে দাঁড়ালেন। তারা কাপড় পরতে শুরু করলে। ভোর হ'য়ে এলো।

মা যাতোদিন বেঁচে ছিলেন ইউরা জানতে পারেনি যে তার বাবা বহুপূর্বেই তাদের তাগ ক'রে কখনো সাইবেরিয়া, কখনো অন্য কোথাও ঘুরে-ঘুরে তাদের বিপুল বিত্ত মদ আর স্ট্রোলোকের পিছনে উড়িয়ে দিচ্ছেন। তার মা তাকে বাবার কথা বলতেন, সে জানতো বাবসার খাতিরে

বাবাকে অন্যত্র বাস করতে হয়—তিনি কখনো থাকেন পিটার্সবার্গে, কখনো বা তাঁকে যেতে হয় বডো-বডো মেলাব কোনো একটিতে, সাধারণত ইরবিট শহরে।

মা তেমন সবল ছিলেন না কোনো দিনই, কিন্তু যখন তাঁকে যক্ষ্মায় ধরলো, তখন থেকে চিকিৎসার জন্য দক্ষিণ ফ্রান্স বা ইটালির উত্তরে যেতেন মাঝে-মাঝে। ইউরা দু'বার তাঁর সঙ্গে গিয়েছিলো। কতো সময় অচেনা লোকদের সঙ্গে থাকতে হয়েছে তাঁকে, বদলি হ'তে হয়েছে এক থেকে অন্য কোনো সংসর্গে। এই সব বদলে তার অভ্যাস হ'য়ে গিয়েছিলো; আর এই অপরিচ্ছন্ন পটভূমিকায়, অন্তহীন রহস্যের পরিবেশে, তার বাবার অনুপস্থিতিও তার মনে কোনো প্রশ্ন তোলেনি।

তার আবছা মনে পড়ে তার খুব ছেলেবেলার কথা, যখন তারই পদবির সঙ্গে কতো অসংখ্য জিনিসের নামই না সে যুক্ত হ'তে দেখেছে। জিঁভাগো-কাবখানা, জিঁভাগো-ব্যাঙ্ক, জিঁভাগো-টাইপিন, জিঁভাগো-ভবন—এমন কি একটা জিঁভাগো-কেকও ছিলো, এখনো মনে আছে। 'জিঁভাগোব বাড়ি! মস্কোব কোনো স্নেজওলাকে এটুকুর বেশি বলতে হ'তো না; যেন বলা হয়েছে—'টিঙ্কটুতে নিয়ে চলো।' তক্ষুনি সেই স্নেজ-গাড়ি আপনাকে নিয়ে চ'লে যেতো পৃথিবীর প্রান্তে এক মায়াময় রাজত্বে। গ্রামের মতো শান্ত সেই বাড়ির বাগান ঘিরে ফেলতো আপনাকে; ফার গাছগুলোর ভাবি-ভারি ডালে বসতে গিয়ে কাকেরা তুষারকণা ছিটিয়ে দিতো, তাদের ডাক প্রতিধ্বনি তুলতো চুল্লিতে কাঠ পোড়ার মতো শব্দ ক'রে, অভিজাত কুকুরের পাল রাস্তা পার হ'য়ে ছুটে আসতো সেই পরিষ্কার জায়গাটুকু থেকে, যেখানে বাড়ি তৈরি হচ্ছে আর আলো জ্বলছে ঘন-হ'য়ে-আসা সন্ধ্যায়। হঠাৎ মিলিয়ে গেলো সব। তারা গরিব হ'য়ে পড়লো।

8

১৯০৩ সালের এক গ্রীষ্মের সকাল। মায়ের মৃত্যুর ঠিক দু-বছর পাবে ইউরা তার মামাব সঙ্গে ঘোড়ায় টানা এক খোলা গাড়ি চ'ড়ে মাঠের মধ্য দিয়ে যাচ্ছিলো। ইভান ইভানোভিচ ভস্কোবর্যনিকভের সঙ্গে দেখা করতে চলেছে তারা। ইনি একজন শিক্ষক, এর লেখা পাঠ্যবইগুলি খুব কাটতি; থাকেন ডপ্লিয়ানকাতে। কলৌগ্রিভভ, এক রেশম-বাবসায়ী আর শিল্পকলাব পৃষ্ঠপোষক, তাঁরই জমিদারি এই গ্রাম।

কাজানব দিবাকুমারীর স্মৃতিবার্ষিকী আজ। ধান কাটার মরসুম চলছে এখন, কিন্তু পরবের জন্য, কি হয়তো দুপুরবেলাব বিশ্রামের জন্য, কাউকে কোথাও দেখা যাচ্ছে না। অর্ধেক-নিডোনো খেতগুলি রোদুরে বলসে যাচ্ছে, জেলখানার কয়েদির আধখানা-কামানো মাথার মতো। মাথাব উপর গোল হ'য়ে উড়ে বেড়াচ্ছে পাখিরা। আর পাকা গমের শিষগুলি খাড়া হ'য়ে দাঁড়িয়ে একেবারে স্তম্ভ। সদর রাস্তা থেকে একটু দূরে কাটা শসোব স্তূপের পেছন থেকে হঠাৎ কয়েকটি লম্বা শিষ মাথা উচু ক'রে দাঁড়িয়ে ওঠে, বেশিক্ষণ তাকিয়ে থাকলে মনে হ'তে পারে ওরা যেন ধীরে নড়ছে, জমির ঠিকদার যেন ওরা, কোথায় কী কাজ হচ্ছে তদারকি করতে-করতে সদুর দিগন্তে হেঁটে বেড়ায়।

'এই সব জমি জমিদারের, না চাষিদের নিজের?' নিকোলে নিকোলেভিচ পাভেলকে জিজ্ঞাসা করলেন। পাভেল সেই প্রকাশকের কাছে ফাইফরমাস খাটার কাজ করে। এখনি সে গাড়ি চালাচ্ছে। কাধ উচু ক'রে, ঘাড় কঁজো ক'রে, অদ্ভুত ভঙ্গিতে এক পায়ের উপর আরেক পা দিয়ে ব'সে যতোটা সম্ভব বুঝিয়ে দিচ্ছে যে গাড়ি চালানো আসলে মোটেও তার কাজ নয়।

'মালিকের।' পাইপে আগুন ধরিয়ে পাভেল তাতে টান দিলে। অনেকক্ষণ চুপচাপ। ঘোড়ার পিঠে চাবুক পড়লো, গাড়ির মুখ অন্যদিকে ঘুরতেই পাভেল বললে, আর এই সব জমি আমাদের—। আরে ধূশ শালা—' ঘোড়াগুলিকে গাল দিয়ে উঠলো সে। এঞ্জিনচালক যে-ভাবে

তার কলকজার দিকে দৃষ্টি রাখে ঘোড়াগুলির লাজ আর কাঁধের উপর সে ঠিক সেইভাবে নজর রেখেছে। কিন্তু পৃথিবীর অন্য যে-কোনো ঘোড়ার যা স্বভাব, এই ঘোড়া দুটোরও তা-ই, সামান্যই অতিশয় সরল হৃদয় শান্ত চিন্তে গাড়ি টানছে^১; আর পেছনের ঘোড়াটা রাজহাসের মতো এমনভাবে ঘাড় বঁকিয়ে আছে যে অনভিজ্ঞের মনে হ'তে পারে সে একেবারে কুঁড়ের বাদশা—ঘণ্টার আওয়াজের তাল দিয়ে লাফানো ছাড়া যার আর কোনো কাজ নেই।

ভাস্কোবয়নিকভের লেখা জমি ও কৃষি বিষয়ে একটি বইয়ের প্রুফ নিয়ে চলেছিলেন নিকোলে নিকোলেভিচ। এদিকে আবার সেন্সর ক্রমশ কড়া হচ্ছে: প্রকাশক লেখককে বলেছেন বইটা আব-একবার আগাগোড়া প'ড়ে দিতে।

'এদিককার লোকেরা যা-সব শুরু করেছে', পাভেলকে লক্ষ্য করে মামা বললেন, 'এই তো সেদিন এক ব্যবসাদারের গলা কাটলো, আবার শুনিছ জেমস্কি^২র আস্তাবলটা পুড়িয়ে দিয়েছে। কী মনে হয় তোমার? তোমাদের গায়ের লোকেরা সব বলছে কী?'

কিন্তু পাভেলের মত, স্পষ্ট বোঝা গেলো, এ-বিষয়ে বড় কড়া—যে সেন্সরের ইচ্ছা-অনুসারে কৃষি-সমস্যা বিষয়ে ভাস্কোবয়নিকভ-এর তীব্র মতামতগুলোকে নরম করার দরকার হচ্ছে—এব চেয়েও কড়া। 'কী আশা করেন ওদের কাছ থেকে? নাগালের বাইরে চলে গেছে ওরা। বড় বেশি ভালো ব্যবহার করা হয়েছে ওদের সঙ্গে—আব আমাদের জাতের লোকের সঙ্গে কি এ-রকম ব্যবহার করতে আছে? একবার লাই দিয়ে দেখুন না ওই চাষাদের, প্রত্যেকে প্রত্যেকের উপর ঝাপিয়ে প'ড়ে টুটি চেপে ধরবে—আরে চল ব্যাটা, চল।'

ইউরা মামার সঙ্গে আরো একবার ডুপ্লিয়ানকাতে এসেছিলো। তার ধারণা ছিলো সে বাস্তা চেনে—তাই যখনই দেখেছে পথের দু-পাশে, সামনে পেছনে, এলোমেলো কিছু গাছ নিয়ে ছোটো-ছোটো বন—চেনা লেগেছে তার, আশা করেছে এইবাব বাস্তা ডাইনে বৈকলে, আব সে দূরে দেখতে পাবে অস্পষ্ট ছবির মতো কলাগ্রভভের জমিদারির দশ মাইল জোড়া উন্মুক্ত পল্লী-প্রকৃতি—দূরে নদীর জল রোদে কেমন ঝকঝকে, আব সেই নদীর পেছনে বেল-লাইন। কিন্তু প্রত্যেকবারই ভুল করেছে। মাঠের পর মাঠ, আর মাঠকে গ্রাস করে বন। ক্রমান্বয়ে উন্মোচিত এই বিশাল প্রকৃতির দৃশ্যাবলী যাত্রীদের মনে এক বিপুল ব্যাপ্তি অনুভূতি জাগিয়ে তোলে—তাদের ভাবায়, স্বপ্ন দেখায় ভবিষ্যতের।

পরে যে-সব বই লিখে নিকোলে নিকোলেভিচ বিখ্যাত হয়েছিলেন একটাও এই সময়ে লেখা হয়নি, কিন্তু তার ধ্যান-ধারণাগুলি সম্পূর্ণ আকার নিয়ে নিয়েছে। কিন্তু তবু, তিনি নিজে জানতে পারেন নি যে তাঁর সময় আসন্ন।

শিগগিরই তাঁর সমসাময়িক লেখক, বিশ্ববিদ্যালয়ের শিক্ষক আর বিপ্লবী আন্দোলনের সঙ্গে যুক্ত দার্শনিকদের মধ্যে তিনিও গণ্য হবেন, এমন একজন বলে স্বীকৃত হবেন যিনি ওদের সকলের সঙ্গে একই চিন্তায় অংশ নিয়েও শুধুমাত্র সেই চিন্তার ভাষা ছাড়া অন্য সকল বিষয়ে ভিন্ন। এরা প্রত্যেকে ব্যতিক্রমহীনভাবে একটা-না-একটা বুলি আকড়ে থাকেন, সঙ্কট থাকেন কথা আর বাইরের খোলসটা নিয়ে; কিন্তু তিনি, সম্যাসী নিকোলে, ধর্মযাজক নিকোলে, যিনি একই সঙ্গে টলস্টয়ের শিষ্য আর আদর্শবাদী বিপ্লবী, এখনো তাঁর প্রব্রজ্যা শেষ হয়নি। তাঁর আকৃতি এমন এক নীতির জন্য, আরেগে যার জন্ম, অথচ মৃত্যু যার অবয়ব, যা পথ নির্দেশ করে, এই পৃথিবীকে বদলে দেবে, ডেকে আনবে মঙ্গলকে; এমন এক চিন্তা যা এমনকি শিশুর কাছে অথবা মুর্থ বোকার কাছেও বিদ্যুতের মতো, বজ্রের মতো স্পষ্ট। তাঁর আকৃতি নতনের জন্য।

১ গাড়িটা টুকা জাতীয়, কিন্তু এক ঘোড়ার বদলে দুই ঘোড়ার টানছে।

২ জেমস্কি (zemsky) গ্রামীণ বিষয়ে ভাষ্যগ্রন্থ সরকারি চাকুরে।

মামার কাছে থাকতে ভালো লাগতো ইউরার। মায়ের মতোই তাঁব মুক্ত মন আর অপরিচিতকে গ্রহণ করার উন্মুখতা। সমস্ত প্রাণীর প্রতি তাঁর অভিজাত সমতারোধ; তিনিও এক পলাকে সব-কিছু বুঝে ফেলেন। যে-কোনো ভাবনার উন্মেষের সঙ্গে-সঙ্গে তাঁর অর্থ ও প্রাণ হারিয়ে যাবার আগেই তিনি তা প্রকাশ করতে পারেন।

মামা যে তাকে ডপ্লিয়ানকাতে নিয়ে যাচ্ছেন ইউরা তাতে খুশি হয়েছে। সুন্দর গ্রাম ডপ্লিয়ানকা। এই গ্রামও তাঁর মাকে মনে পড়িয়ে দেয়—মা প্রকৃতি ভালোবাসতেন, ইউরাকে প্রায়ই গ্রামে হাটতে নিয়ে যেতেন।

নিকি ডুডোরভের সঙ্গে দেখা করার জন্যও উদগ্রীব হ'য়ে আছে সে, যদিও নিকি ইউরার চাইতে বয়সে দু-বছরের বড়ো ব'লে তাকে খুব সম্ভব অবজ্ঞার চোখেই দেখে। নিকি ইঙ্কলের ছাত্র, ভাস্কোবয়নিকভের বাড়িতে থাকে। ইউরার সঙ্গে হাত ঝাঁকাবার সময় শরীরের সব শক্তি খাটিয়ে এমনভাবে হাতটাকে নিজের দিকে ঝাঁকায় আর মাথাটা এতো নিচু করে যে কপালের উপর চুল এসে প'ড়ে আধখানা মুখই ঢেকে দেয় তার।

৫

'দারিদ্র্য-সমস্যার স্নায়ুতন্ত্র হ'লো—' নিকোলে নিকোলোভিচ পরিমার্জিত পাণ্ডুলিপি থেকে পড়লেন।

'"নির্যাস" আরো ভালো হবে—' এই ব'লে ইভান ইভানোভিচ গেলিগ্রুফে সংশোধন করলেন।

ঢাকা বারান্দার আধো-অন্ধকারে ব'সে কাজ করছিলেন দুজনে। চারপাশে এলোমেলোভাবে ছড়িয়ে আছে ফুল গাছে জল দেবার ঝারি, খুরপি আর কোদাল, একটা ভাঙা চেয়ারের পিঠের উপর একটা বর্ষাতি রাখা, মস্ত ভাবি-ভারি গলেশগুলো^১ কর্দমাক্ত অবস্থায় এক কোণে দাঁড়িয়ে আছে, মাথাগুলো বেঁকে পড়েছে মেঝের উপর।

'অপর পক্ষে, জন্ম ও মৃত্যুর হার প্রমাণ করে—' নিকোলে নিকোলোভিচ প'ড়ে শোনালেন।

'"এ-বছরের" কথাটা যোগ ক'রে দাও,' ব'লে ইভান ইভানোভিচ নিজেও কাগজে কথাটা লিখে রাখলেন। কিছু নতুন খসড়া আবার তৈরি হ'লো। গ্রানাইটের টুকরোগুলি কাগজ-চাপার কাজ করছে।

কাজ শেষ হবার সঙ্গে-সঙ্গে নিকোলে নিকোলোভিচ বিদায় নিতে চাইলেন।

'ঝড় আসছে। এখন যেতে হয়।'

'না, না, যাবে কোথায়? তোমাকে যেতে দিচ্ছি না এখন। এসো, একটু চা খাওয়া যাক এবার।'

'কিন্তু সন্দের আগেই যে আমার শহরে পৌঁছনো দরকার।'

'ও-সব বাজে কথা ব'লে লাভ নেই। আমি শুনবো না।'

বাগানে চা দেওয়া হ'লো। তামাক আর সূর্যমুখী ফুলের মেশানো গন্ধ ডুবিয়ে দিয়ে সান্নাভার থেকে হঠাৎ কাঠকয়লার ধোয়া পৌঁচিয়ে-পৌঁচিয়ে বেরিয়ে এলো। একটু দাসী ট্রে-তে সাজিয়ে নিয়ে এলো ঘন ক্রীম, জাম-ফল, আর পনিরের পিঠে। পাভেল নাকি নদীতে স্নান করতে গেছে, ঘোড়া দুটোকেও নিয়ে গেছে সঙ্গে। নিকোলে নিকোলোভিচ সূতরাং অপেক্ষা করতে বাধ্য হলেন।

^১ গলেশ : বাঁট ও বরকে ব্যবহারের জন্য রাখার জুতো।

‘চলো না, চা হ’তে-হ’তে নদীর ধার থেকে ঘুরে আসি’, ইভান ইভানোভিচ বললেন।

কলোগ্রিভভের সঙ্গে বন্ধুতার খাতিরে স্বয়ং নায়েব-মশাইয়ের বাড়ির দুটো ঘর ব্যবহার করার অধিকার পেয়েছেন তিনি। সামনে নিজস্ব এক টুকরো বাগান নিয়ে বাড়ি, পার্কের অবহেলিত ও এক কোণ ঘেঁষে। লম্বা রাস্তাব পাশেই সাবেক কালের গাড়ি আসবাব রাস্তা, এখন ঘন ঘাসে আচ্ছন্ন। জঙ্গল জমা করাব নালার দিকে গাড়ি চলে এই পথ দিয়ে, তা ছাড়া অন্য কোনো কাজের জন্য আর আজকাল কেউ ব্যবহার করে না। কোটিপতি কলোগ্রিভভ মানুষটি প্রগতিশীল, আজকের এই বিপ্লবের জন্য দরদ আছে তাঁর প্রাণে—সত্বীক তিনি বাইরে থাকেন। এখানে আছে কেবল তাঁর দুই মেয়ে, নাভিয়া আব লিপা; তাঁদের সঙ্গে থাকেন তাদের শিক্ষয়িত্রী, আব পরিচারকবন্দ।

নকল হুদ আর ছাঁটা ঘাসের জমি দিয়ে ঘেরা নায়েব-মশাইয়ের বাড়ি আর বাগান। পুরু মেহেদির বেডায় পার্ক থেকে আলাদা হ’য়ে আছে। সেই বেডার ধার ঘেঁষে দু’জনে হাঁটতে লাগলেন আর একটুক্ষণ পরপর ঝোপ থেকে বেরিয়ে এসে ছোটো-ছোটো চড়ুইয়ের দল ডানা ঝাপটে উড়ে যেতে লাগলো তাদের সামনে দিয়ে। মৌচাকে মৌমাছির মতো মেহেদির ঝোপে বাসা পেতেছে এই পাখিরা, পরস্পরের কানে কতো কথাই না বলে, সরু নালার মধ্য দিয়ে জল ব’য়ে চলার মতো শব্দে ওদের কিচিরমিচির ঝোপগুলিকে ভ’রে রেখেছে।

গাছপালার ঘর, মালির ঘর, ভাঙা পাথরের স্তূপ— কে জানে কোন আমাদের—ছাড়িয়ে গেলেন দু’জনে। সাহিত্য ও চিন্তাব জগতে নতুন কোনো প্রতিভার স্বাক্ষর পড়েছে কিনা এই নিয়ে কথা বলছেন তারা।

‘প্রতিভাবান কেউ নেই, এ-কথা বলা যায় না,’ নিকোলে নিকোলেভিচ বললেন, ‘তবে তারা বড়ো নিঃসঙ্গ। এখন তো আবার “দলে”র হুজুগ উঠেছে, সাধারণ লোকের প্রধান লক্ষণই হ’লো এই যে তারা দল বেঁধে থাকে, তাদের গুরু সলোভিনেভ, কাস্ট বা মার্জ, যে-ই হোক না। কিন্তু সত্যি যাবা খোজে তারা একাই খোজে, এবং এই সত্যকে যারা যথেষ্ট ভালোবাসে না তাদের সঙ্গে এই প্রকৃত সত্যকামীদের সংযোগ বিচ্ছিন্ন হ’য়ে যায়। ক’টা জিনিসই বা আছে, বলো, এই পৃথিবীতে, যার আনুগত্য আমরা মনে-প্রাণে স্বীকার করতে পারি? সত্যিই খুব কম। এইজন্য আমার মাঝে মাঝে মনে হয় শরীর ক্ষয়শীল, কিন্তু আত্মা যে অমর এ-কথা বিশ্বাস না-করলে বাঁচা যায় না—কারণ অমরত্ব মানেই তো জীবন, অমরত্ব জীবনের আরো অর্থপূর্ণ এক নাম। আত্মার প্রতি, খৃষ্টের প্রতি আস্থা না-থাকলে সত্যকে জানা যায় না।—কিন্তু তুমি বিরক্ত হচ্ছে। একটা বর্ণও তোমার মাথায় ঢোকেনি—জানি আমি।’

‘হু, ইভান ইভানোভিচ জবাব দিলেন: রোগা চেহারা, সোনারি রঙের চুল, স্টল মাছের মতো অস্থির স্বভাব, আর থুৎনিতে ছোট্ট একটু দুটু দাড়ি থাকায় তাঁকে দেখতে হয়েছে লিঙ্কনের সমসাময়িক কোনো আমেরিকান ভদ্রলোকের মতো। একটি হাত সর্বদাই নাস্ত আছে সেই দাড়ির ডগায়। কেবলই সেই দাড়ি হাতে পাকিয়ে তার ডগাটা কামড়াতে থাকেন। ‘আমার কিছুই বলবার নেই অবশ্য। তুমি তো জানো, এ-বিষয়ে আমার মত তোমার থেকে ভিন্ন। কিন্তু তুমি যখন ঐ দলের কথা তুললেই তখন জিজ্ঞেস করি, পুরুষ্ঠাকুরের আলখাল্লা ছাড়বার নয় কেমন লেগেছিল তোমার? অন্তত তখনকার মতো ভয় যে পেয়েছিলে এ-কথা আমি বাজি রেখে বলতে পারি। ওরা খুব শাপ-শাপাস্ত করেনি তোমাকে?’

‘তুমি প্রসঙ্গটা বদলাতে চাইছো। তা যাই হোক—না, আমাকে শাপ-শাপাস্ত করেনি ওরা, ও-সব আর হয় না আজকাল। তা খানিকটা বিশ্রী লেগেছিল বইকি, কিছু-কিছু ফলও ভুগতে হয়েছে। যেমন ধরো, অনেকদিন পর্যন্ত আমাকে আর সরকারি চাকরি দেবে না, মস্কো বা পিটার্সবার্গে আমার যাওয়া বারণ। কিন্তু এ-সব খুব ছোটো কথাই। আমি একটু আগে বলছিলাম—যীশুর প্রতি আস্থা রাখতে হবে আমাদের। বুঝিয়ে বলছি কথাটা। এ-কথাটা তুমি

বুঝতে পারছে না যে আমি নাস্তিক হ'তে পারি, কিন্তু যে আছেন বা কেন তাঁকে থাকতে হবে তা না-জানতে পারি—আর তবু পারি বিশ্বাস করতে যে মানুষের বাসা প্রকৃতির মধ্যে নয়, ইতিহাসের মধ্যে, আর ইতিহাস বলতে আমরা যা বুঝি তাব আবহাওয়া শুভে, তাঁর বাণীর উপর তিনি তাকে প্রতিষ্ঠা করে গেছেন। এখন—ইতিহাস কী, বেলা তো? ইতিহাস সেই কাজেরই আরম্ভের নাম, মানুষ অনেক, অনেক শতাব্দী ধরে ধারাবাহিক ভাবে যা করে যাচ্ছে—যাও লক্ষ্য হ'লো মৃত্যুর হৈয়ালিব সমাধান করা, যাতে কিনা মৃত্যুকেও শেষ পর্যন্ত জয় করা যায়। সেইজন্যই মানুষ সিঁফনি বচনা করে, আবিষ্কার করে ইলেকট্রো-ম্যাগনেটিক তরঙ্গ আর গণিতের অসীম। কিন্তু আত্মার জাগরণ ভিন্ন এ-ভাবে এগুলো সম্ভব নয়। আধ্যাত্মিক ক্ষমতা না থাকলে এই আবিষ্কার করতে পারবে না তুমি, আর তাঁর জন্য যা-কিছু প্রয়োজন সব আমরা পাবো যৌশুর বাণীতে। সেটা কী? প্রথমত, জীবনের পবন নির্যাস আপন প্রতিবেশীর জন্য প্রেম। এই প্রেম যদি একবার আমাদের হৃদয় ভরে গেলে তাহলে তাকে উপচে পড়ে নিঃশেষিত করে ফেলতে হয় নিজেকে। আর দ্বিতীয়ত, যে-দুটি দাবী আধুনিক মানুষের প্রধান আশ্রয় বলা চলে—যা ছাড়া আধুনিক মানুষকে কল্পনা করা যায় না—বাক্তির সত্তাকে স্বাধীন ও জীবনকে আত্মত্যাগ রূপে দেখা।—মনে বেখো, এই সমস্ত চিন্তা এখনো নতুন। প্রাচীন জগতে এই অর্থে কোনো ইতিহাসের চেতনা ছিলো না। তৎকালীন বহুপাত আর পাশবিকতা, নিষ্ঠুরতা আর বিষাক্ত কালিগুলাদের মধ্যে আমরা এমন ধারণার আঁচটুকু পাই না যে যে-কেউ অপরকে দাসে পরিণত করে সে নিজেই অধম। সেকালের ব্রোনজ ও মর্মরের স্তম্ভগুলির অমরত্বকে মনে হয় মৃত ও দাস্তিক। তবু মাত্র খৃষ্টের জন্মের পবই মানুষ ও মহাকাল সহজে নিশ্বাস ফেলতে শুরু কবলো। শুধুমাত্র তাঁর আবির্ভাবের পবই মানুষ ভবিষ্যতে বাস করতে শিখেছে। কুকুরের মতো গর্তে প'ড়ে আর তারা মরবে না, বরং তাদের মৃত্যু আসবে নিজের বাড়িতে, ইতিহাসের পাতায়। যখন তারা সেই মৃত্যুরই বিজয়ে রত—সেই লক্ষ্যের কাছেই নিজেদের তারা উৎসর্গ করেছে। উঃ, আমি শুযোরের মতো ঘামছি। এ তো প্রায় একটা বোবা দেয়ালের দিকে তাকিয়ে কথা বলার মতো।

‘তোমার ওই দূরদর্শন তবু থেকে আমাকে রেহাই দাও—ডাক্তারের বারণ আছে—আমার ধাতে সয় না।’

‘নাঃ, তুমি একটা অপদার্থ। আচ্ছা, থাক এ-সব কথা। আরে— কী অপরূপ দৃশ্য! ভাগ্যানান বটে তুমি—অবশ্য যদিও এখানেই থাকো, কখনো বোধ হয় চোখ তুলেও তাকাও না।’

সূর্যের আলোয় নদীটা যেন জ্বলছে, এতো উজ্জ্বল যে চোখে আঘাত করে। কেপে-কেপে বৈকে-বৈকে চলেছে যেন কোনো ধাতব পদার্থ। হঠাৎ ভাঁজের পর ভাঁজ পড়লো জলের বুকে একটি ফেরি-স্টীমার গাড়ি, ঘোড়া আর একদল চাষি নিয়ে এপার থেকে ওপারে পাড়ি দিচ্ছে।

‘আরে, মাত্র পাঁচটা বাজলো নাকি এতোক্ষণে! সিজরান থেকে ট্রেন আসে—ঠিক পাঁচটা বেজে পাঁচ মিনিটে।’

অনেক দূরে সমতল জমির উপরে হলুদ আর নীলে মেশানো পরিচ্ছন্ন একটি বেলগাড়ি দেখা যাচ্ছে, ডানদিক থেকে বাঁ দিকে চলেছে, দূর থেকে কতো ছোটো মনে হয়। হঠাৎ তাঁরা দেখলেন, গাড়ি থেমে গেলো। এঞ্জিনের মুখ থেকে শাদা বাষ্প বেরুতে লাগলো, পরমুহুর্তেই শুনতে পেলেন বিপদসূচক বাঁশি বাজছে।

আশ্চর্য ব্যাপার। ভস্কোবয়নিকভ বললেন, ‘কিছু-একটা হয়েছে মনে হচ্ছে। এই জলার ধারে গাড়িটা দাঁড়িয়ে পড়লো কোন কর্মে? নিশ্চয়ই কিছু একটা ঘটেছে। চলো, চা খাওয়া যাক।’

বার্ভিতে বা বাগানে— কোথাও খুঁজে পাওয়া গেলো না নিকিকে। মামা আর ইভান ইভানোভিচ যত্নাঙ্কণ বারান্দায় ব'সে কাজ কবছিলেন, ইউরা নিরুদ্দেশভাবে ঘুরতে-ঘুরতে আদ্যাক করলো, অতিথিদের এড়াবার জন্যই গা ঢাকা দিয়েছে নিকি—আর তাছাড়া ইউবাকে তো সে নিজের সমকক্ষ বলেও ভাবে না।

আশ্চর্য জায়গাটি। এক মিনিট পর-পর ডেকে উঠছে হলুদ রঙের গ্রাশ পাখি, তিন সুরের ডাক তার, তার পরেই একটু থামে, যেন সময় নেয় সেই স্বচ্ছ, ভেজা-ভেজা, বাশির মতো তাঁর মধুর স্ববকে প্রকৃতির সঙ্গে মিলিয়ে দেবার জন্য। বন্ধ বাতাসে মুহূর্তমান ফুলের গন্ধ যেন সূর্যের প্রবল তেজে মস্তমুগ্ধের মতো; আটকে গেছে শুধু মাত্র নিজেদের সীমাবদ্ধ এলাকাটুকতে। আ—এরা তাকে মনে করিয়ে দেয় আন্টিবেস আব বর্ডিয়েরার কথা। ডাইনে থেকে বায়ে, বা থেকে ডাইনে বেকে-বেকে ঘুরে বেড়ালো ইউরা। তার মায়ের গলার স্বর তাকে মায়ের মতো ঘিরে ধরলো, কলে-ছাঁটা ঘাসের জমিতে, মৌমাছির গুঞ্জে, গানের মতো মধুর পাখির ডাকে, তার মার গলা শুনতে পেলো সে। মা তাকে কাছে ডাকছেন, কখনো এখানে কখনো ওখানে দাঁড়িয়ে মা তার উত্তরের জন্য প্রতীক্ষা করছেন— এই মোহে ইউরার সমস্ত শরীর রোমাঞ্চিত হ'লো।

ইউরা খালের দিকে এগিয়ে গেলো। খাল-পাড়ের ছোটো-ছোটো গাছে সাজানো নকল পথ বেয়ে নিচে ঘনবদ্ধ অলডার ঝোপের কাছে এসে দাঁড়ালো সে। গাছের ছোটো ডালপালা ভেঙে পড়ে স্তপাকৃতি হয়েছে সেখানে, কী অন্ধকার আর কী স্নাতসেতে জায়গাটি। ফুল খুব কম, মোরগঝুটি ফুলের লম্বা ডাঁটিগুলিকে দেখাচ্ছে যেন সচিত্র বাইবেলের পাতা থেকে এইমাত্র উঠে-আসা কোনো মিশরসম্রাট।

ইউবা বিষন্ন থেকে বিষন্নতর হ'লো। কান্দতে ইচ্ছে করছে তার। দুই হাটু মুড়ে ব'সে কান্নায় ভেঙে পড়লো সে।

'হে ঈশ্বরের দূত, তুমি আমাকে সর্বদা ঘিরে থাকো,' ইউবা প্রার্থনা কবলে, 'সত্যপথ তুমি আমাকে চিনিয়ে দাও; আর আমার মাকে জানিয়ে আমি ভালো আছি, তিনি যেন আমার জন্য চিন্তা না করেন। মৃত্যুর পরপারে যদি অন্য জীবন থেকে থাকে, হে পরম প্রভু, তাহ'লে তোমার স্বর্গীয় ভবনে, যেখানে সশু আর সৎমানুষের মুখগুলি লগনের আলোর মতো জ্বলে— সেখানে আমার মাকে তুমি আশ্রয় দিয়ো। কতো ভালো ছিলেন আমার মা, তিনি তো কখনো কোনো পাপ করেননি। তাকে তুমি দয়া করো, হে ভগবান, আমার মাকে যেন কখনো কোনো দুঃখ পেতে না হয়। মা—মা গো!' বুক-ভেঙে দেওয়া যন্ত্রণার চাপে সে চাইলো স্বর্গ থেকে তার মাকে ডেকে আনতে—যেন তার মা সদ্য সন্ত হয়েছেন—তারপর হঠাৎ আর সহ্য কবতে না-পেরে মুছিত হ'য়ে পড়ে গেল।

বেশিক্ষণ অচেতন হ'য়ে রইলো না। যখন জ্ঞান হ'লো শুনতে পেলো মামা ওপর থেকে তাকে ডাকছেন। সাড়া দিয়ে সে খালের পাড় বেয়ে ওপরে উঠতে শুরু করলো। হঠাৎ তার মনে পড়লো তার হারিয়ে-যাওয়া বাবাব জন্য সে আজ প্রার্থনা করতে ভুলে গেছে— তার মা তাকে শিখিয়েছেন রোজ বাবার জন্য প্রার্থনা করতে।

কিন্তু সাময়িক জ্ঞানহীনতা এমন নতুন এক আনন্দ আর হালকা ফুর্তির আমেজ এনে দিয়েছে তার শরীরে, যে আবার প্রার্থনা করতে তার ভয় হ'লো, পাছে এই ভালো-লাগাটুকু হারিয়ে যায়। তাই মনে-মনে ভাবলো, আরেক সময় বাবার জন্য প্রার্থনা করলে ক্ষতি কী? বাবা অপেক্ষা কবতে পারেন,' বৃথি এমন কথাও মনে হ'লো তার। বাবাকে ইউরার এতটুকুও মনে নেই।

৭

নদীর ধারের সেই মাঠে যে-গাড়ি হঠাৎ থেমে গিয়েছিলো, তারই দ্বিতীয় শ্রেণীর একটি কামরায় মিশা গর্ভন বসে ছিলো। তার বাবার সঙ্গে ভ্রমণ করছে সে—তিনি একজন ওরেনবার্গ-নিবাসী আইন-বাবসায়ী। এগারো বছরের বালক মিশা, ভাবুকের মতো মুখ তার, গভীর কালো তার চোখ। স্কুলে ষষ্ঠ শ্রেণীর ছাত্র—তার বাবা, গ্রিগরি ওসিপোভিচ গর্ভন সম্প্রতি মস্কোতে এক নতুন পদে বহাল হয়েছেন। নতুন সংসার গুছিয়ে নিতে মেয়েদের নিয়ে তার মা তাদের আগেই মস্কো চলে গেছেন।

আজ তিন দিন হ'লো মিশা বাবার সঙ্গে বেরিয়েছে।

মাঠ, উপত্যকা, গ্রাম আর শহর নিয়ে রাশিয়া তাদের চোখের ওপর দিয়ে উড়ে চলেছে, সূর্যের আলোয় তার বং খড়ির মতো শাদা, উত্তপ্ত ধুলো মেঘের মতো ঢেকে রেখেছে।

পাথে দেখা যায় সাব-বাধা গাড়ি-ঘোড়া। ঘুষ্টিঘরের কাছে এলোমেলোভাবে ঘেঁষাঘেঁষি ক'রে দাঁড়িয়ে অপেক্ষা করছে গাড়িগুলো। দূরন্তগতি রেলগাড়ি থেকে মনে হয় যেন গাড়িগুলো অচল হ'য়ে আছে আব ঘোড়াগুলো দাঁড়িয়ে-দাঁড়িয়ে পা নাড়ছে।

বড়ো-বড়ো ইন্স্টেশনে গাড়ি থামলেই যাত্রীরা ব্যুপব্যুপ নেমে এলোমেলোভাবে ছুটোছুটি ক'রে কোনো-না-কোনো খাবার দোকানে ঢুকে পড়ে। সূর্য তখন ইন্স্টেশনের বাগানের পেছনে অস্ত যায়, লাল বগুে ছুপিয়ে দেয় যাত্রীদের পা, রেলগাড়ির চাকাগুলিকে।

জগতে যতো বকম গতি আছে, তাদের আলাদা ক'রে দেখলে মনে হয় আত্মস্থ ও সূচিস্থিত, কিন্তু একসঙ্গে দেখলে সেগুলো হ'য়ে ওঠে সুখের ঘোরে মাতাল—জীবনের যে-শ্রোত সেগুলোকে এক ক'বে দিয়ে চলে এগিয়ে নিচ্ছে, তাব নেশায় মাতাল। সবাই খাটে, সংগ্রাম করে, ব্যক্তিগত স্বার্থ আর উদ্বেগ তাদের টেনে নিয়ে যায়, কিন্তু তাদের সকল কর্মের এই উৎসগুলি শেষ ক'রে দিতো, থামিয়ে দিতো এই যন্ত্র, যদি না সর্বব্যাপী এক গভীর নিরাসক্তিব অনর্ভূতি বাধা দিতো তাদের। আর এই নিরাসক্তির কারণ এক সাত্বনাজনক বিশ্বাস যে তাদের স্ততন্ত্র জীবনগুলি এক স্ত্রে বাধা, এক আনন্দময় আশ্বাস যে, এই পৃথিবীতে যা-কিছু ঘটে তা শুধু এই মর্ত্তভূমিতেই ঘটে না—যার মাটিতে কবর দেওয়া হয় মৃতদের—সব ঘটছে—অন্য এক জগতেও, যে-জগতেব নাম কারো কাছে ঈশ্বরের দেশ, কারো কাছে ইতিহাস, কারো কাছে না অন্য কিছু।

কিন্তু মিশার মনে হয় যে তার তিক্ত দুর্ভাগ্যবশত সে এই সাধারণ নিয়মের ব্যতিক্রম। এক অশান্ত উদ্বেগ এই বালক দার্শনিককে প্রায়ই আচ্ছন্ন ক'রে রাখে, এ-পৃথিবীর অন্য সকলে যে-নিরাসক্তি ভোগ করে তা তাকে স্বস্তি দেয় না, মহিমাম্বিত করে না। উত্তরাধিকারসূত্রে প্রাপ্ত তার চরিত্রলক্ষণ বিষয়ে সে সচেতন; অসুস্থ এক আত্মচেতনার সঙ্গে নিজের চরিত্রের এই ব্যতিক্রমকে সে লক্ষ করে। তার নিজের স্বভাব তাকে যন্ত্রণা দেয়, নিজেকে ছোটো মনে হয় মিশার।

তার এমন সময় মনে পড়ে না যখন এই চিন্তা তাকে বিব্রত করেনি যে পৃথিবীর আর পাচজন মানুষের মতোই হাত পা, ভাষা আর জীবনযাত্রার পদ্ধতি নিয়ে কী ক'রে সে এতো ভিন্ন হ'তে পারলো—এমন একজন হ'তে পারলো যাকে এতো কম লোকে পছন্দ করে, যাকে কেউ ভালোবাসে না? সে বুঝতে পারে না, একবার অন্য সকলের চাইতে খারাপ হ'লে আর কেন শত চেষ্টাতেও নিজেকে উন্নত করা যায় না। ইহুদি হওয়ার মানোটা কী? উদ্দেশ্য কী? অস্ত্রবিহীন এই প্রতিদ্বন্দ্বিতার পুরস্কার কী, যুক্তি কী—এর জন্য কেবলমাত্র শোক ছাড়া অন্য কিছুই তো তারা পায় না।

সে তার সমস্যাটি তার বাবার কাছে উপস্থিত করেছিলো। তিনি জানালেন যে তার প্রতিপাদগুলি অবাস্তব, সে যেন তার মনে এমন তর্কের স্থান আর না দেয়, কিন্তু এমন কোনো সমাধান বাবা বলতে পারলেন না যার গভীরতা তাকে আকৃষ্ট করতে পারে, অথবা অনিবার্যকে নিঃশব্দে মেনে নেবার ক্ষমতা দেয়।

ক্রমে, নিজের মা-বাবা বাদে অন্য সব পরিণতবয়স্ক ব্যক্তির প্রতি অবজ্ঞায় তার মন ভ'রে উঠলো—সমস্যার এই জট গুঁরাই তো পাকিয়েছেন, অথচ খুলতে পারেন না—এতোই অক্ষম। সে নিশ্চিত জানে বড়ো হ'য়ে সব সমস্যার সমাধান করবে সে।

বড়োদের অক্ষমতার উদাহরণও সে দিতে পারে। ঐ উদ্ভাদ লোকটি যখন হঠাৎ রেলের কামরা থেকে ছুটে বারান্দায় বেরিয়ে গেলো, তখন বাবার যে তার পেছনে ছোট্টাটা উচিত হয়নি সে-কথাটাও তো ওরা কেউ ব'লে দিতে পারতো? লোকটি ধাক্কা দিয়ে বাবাকে সরিয়ে দিলো, বিদ্যাহের গতিতে চলন্ত গাড়ির দরজা খুলে বাইরে লাফিয়ে পড়লো—প্রথমে বাড়িয়ে দিয়েছিলো তার মাথাটা, দেখে মনে হ'তে পারতো এক সাঁতারু তার সাঁতারের পাটাতন থেকে ঝাপ দিচ্ছে। বাবা চেন টেনে তক্ষুনি গাড়ি থামালেন—তখনো তো বড়োরা কেউ বারণ করতে পারতো বাবাকে?

অথচ এখন—যেহেতু গাড়িটা একযুগ ধ'রে থেমেই আছে, এবং যেহেতু গাড়ির সমস্ত যাত্রীর মধ্যে একমাত্র গ্রেগরি অসিপোভিচ-ই শেকল টেনেছিলেন, সকলের ভাবটা এই রকম যেন গর্ডন-পরিবারই এই বিরক্তিকর ঘটনার জন্য দায়ী।

এই দীর্ঘ বিলম্বের সঠিক কারণ কেউই বুঝতে পারছিলো না। কেউ বললে যে হঠাৎ ঝাকুনি খেয়ে থামার ফলে গাড়ির ব্রেকটা নষ্ট হ'য়ে গেছে, কেউ বললে, খাড়াই পাথরের উপর থেমেছে ব'লে আবার চলবার মতো বেগ সংগ্রহ করতে পারছে না গাড়িটা। তৃতীয় মতটি হ'লো, যে যিনি আত্মহত্যা করলেন তিনি নার্ভাস এক খ্যাতনামা ব্যক্তি; তাঁর উকিল, যিনি তাঁর সঙ্গে চলেছিলেন, জেদ ধরেছেন সবচেয়ে কাছের স্টেশন, কলোগ্রিভভকায় খবর পাঠানোর জন্য—সেখান থেকে লোকজন আসুক, যথাবিহিত একটা বিবৃতি লেখা হোক। এঞ্জিন-ড্রাইভারের সহকারী সেইজন্য টেলিগ্রাফ পোলের উপর উঠে গেলো: কলোগ্রিভভকা থেকে গুঁরা এতোকক্ষণে রওনাও হ'য়ে পড়েছেন হয়তো।

রেল-কামরার বাথরুম থেকে একটা ক্ষীণ দুর্গন্ধ ভেসে আসছিলো; ও-ডি-কোলনের সুগন্ধ তাকে ঢাকতে পারেনি—আর সেইসঙ্গে ভাজা মুরগির গন্ধ, একটু বাসি মাংসটা, নোংরা চর্বিতে মাখামাখি এক টুকরো কাগজে জড়ানো। পিটার্সবার্গ থেকে আগত কয়েকটি মহিলা—যাঁদের চুলে পাক ধরেছে, কথা বলতে গলা কাঁপে আর সর্দি-বসা বুক থেকে ঘড়ঘড় আওয়াজ বেরোয়, এবং যাঁদের এখন ট্রেনের কয়লার কালি আর মুখের উগ্র রঙের মিশ্রণে জিপসিদের মতো দেখাচ্ছে—যেন কিছু হয়নি এমনভাবে মুখে পাউডার ঘষছেন আর রুমালে আঙুল মুচছেন। যেন ট্রেনের বারান্দার সংকীর্ণতার জন্যই, চপল ভঙ্গিতে কাঁধ মোচড়াতে-মোচড়াতে তাঁরা যখন গর্ডনদের কামরার সামনে দিয়ে যাচ্ছিলেন, মিশার মনে হচ্ছিলো 'পাপা ঠোঁটের ফাঁক দিয়ে ওরা যেন ফোঁশফোঁশ করছেন: 'দ্যাখো না! কী সব লজ্জাবতী লতা রে! নিজেদের কী আশ্চর্য জীবই না জানি ভাবে ওরা। বুদ্ধিজীবী! এ-সব আবার ওদের সহ্য হয় না!'

আত্মহত্যাকারীর দেহটি নদীর তীরে ঘাসের উপর শোয়ানো আছে। ফাটা কপাল বেয়ে রক্ত বেরিয়ে এসে সারা মুখে অসংখ্য উন্মিষ্ট ঝুঁকছে। শুকনো সেই রক্ত দেখে ঐ ব্যক্তিরই দেহের অংশ ব'লে এখন আর মনে হয় না, বাসি রক্তটা এখন তার থেকে বিচ্ছিন্ন অন্য কোনো পদার্থ হ'য়ে গেছে, স্টিকিং প্লাস্টারের মতো, কাদার মতো, ভেজা বার্চপাতার মতো। জনতার কৌতূহলী আর সমবেদনাশীল দল সারাক্ষণ ঘিরে আছে মৃতদেহটিকে। আর মৃত ব্যক্তির ভ্রমণের সঙ্গী ও বন্ধু—সেই হাটপুট রুমক উকিল মশাই ভাবলেশহীন মুখ নিয়ে বিরক্তভাবে

দাড়িয়ে আছেন,—তাকে দেখাচ্ছে যেন ঘামে ভেজা শার্ট গায়ে একটি সুসভ্য জানোয়ার। গরমে ম'রে যাচ্ছিলেন ভদ্রলোক, টুপি খুলে হাওয়া করছেন নিজেকে। সব প্রশ্নের উত্তরেই কাঁধ ঝেঁকে একবারও ফিরে না-তাকিয়ে রাগি আওয়াজে বলছেন, 'মাতাল ছিলো। এ ছাড়া আর অন্য কী আশা করা যায় এদের কাছে? ডিলিরাম ট্রিম্প—আবার কী?'

উলের পোশাক পবা লেসের কমল জডানো, রোগা বৃদ্ধা দু'একবার মৃতদেহটার কাছে গিয়ে দাঁড়ালো। বিধবা সে, টিভেরজিনা তার নাম। তার দুই ছেলে রেলের ড্রাইভার, তাই পাশ পেয়ে তৃতীয় শ্রেণীতে দুই ছেলের বৌকে নিয়ে সে চলেছে। গুরু-মার পেছন-পেছন সন্ন্যাসিনীদের মতো শাস্ত ভঙ্গিতে তার দুই বৌও তার পেছন-পেছন মৃতের কাছে এলো, গায়ের কাপড় ঘোমটার মতো ক'রে তাদের মাথার উপর গুটোনো। ভিড় স'রে দাঁড়িয়ে তাদের জন্য জায়গা ক'রে দিলো।

রেলেরই এক দুর্ঘটনায় টিভেরজিনার স্বামী আগুনে পুড়ে মাঝা গিয়েছিলো। মৃতের একটু দূরে এমন জায়গায় সে দাঁড়ালো, ভিড় সঙ্কেও যেখান থেকে দেহটি দেখা যায়। যেন অন্য মৃত্যুটির সঙ্গে এই মৃত্যুর তুলনা ক'রে দীর্ঘশ্বাস পড়লো: 'যার যেমন কপাল', মনে-মনে সে এই কথাই যেন বললে: 'কেউ মরে ভগবানের ইচ্ছায়, কিন্তু দ্যাখো না কাণ্ড! এই তো একজন বিলাস-ভোগে ডুবে মাথা-খারাপ হ'য়ে মরলো।'

সব যাত্রীই বেরিয়ে এসেছে শবদেহটি দেখতে। কামরায় ফিরছে শুধুমাত্র মাল চুরি যাবার ভয়ে।

রেল-লাইনের উপর লাফিয়ে নামছে তারা। ফুল তুলতে-তুলতে, অথবা পায়ের জড়তা কাটাবার জন্য পায়চারি করতে-করতে তারা অনুভব করছিলো যেন গাড়ি থেমেছে ব'লেই জায়গাটার সৃষ্টি হয়েছে: যেন দুর্ঘটনাটি না-ঘটলে এই পচা জলাভূমি অথবা বিকৃত নদী, ঐ অট্টালিকা এবং ও-দিকের খাজা পাড়ের গির্জাটার অস্তিত্ব থাকতো না।

এমনকি সূর্যও, আত্মহত্যার এই দৃশ্যের উপর সন্ধ্যার আলো ফেলতে-ফেলতে যখন গোয়াল থেকে বেরিয়ে-আসা শাস্ত্র লাজুক গোরুর মতো ভিড়ের মধ্য দিয়ে উকি দিলো তখন তাকে মনে হ'লো যেন রক্তমণ্ডলের পটে আঁকা, নিতান্তই এক স্থানীয় উদ্ভাস।

এই ঘটনা মিশাকে এমন গভীরভাবে নাড়া দিলো যে আকস্মিক আঘাতে ও সমবেদনায় সে প্রথমটায় কেঁদে ফেললে। তাদের এই দীর্ঘ রেল-পথে অনেকবার তাদের কামরায় এসে ঘটনার পর ঘটনা মিশার বাবার সঙ্গে আলাপ ক'রে গেছেন ঐ মানুষটি—এখন যিনি ম'রে প'ড়ে আছেন। বলেছিলেন, মিশার বাবার নৈতিক সূরুচি, তাঁর জীবনের শাস্তি, আর তাঁর বুদ্ধি তাঁকে স্বস্তির আশ্বাদ দিয়েছে।

হুতি, সম্পত্তি বানোবস্তের দলিল, জোজুরি, দেউলে হ'লে কী করতে হয়—এই সব আইন সম্বন্ধে খুঁটে-খুঁটে কতো প্রশ্নই না বাবাকে উনি করছিলেন। 'আমি বিশ্বাস করি না।' গর্ডনের জবাব শুনতে-শুনতে চৈতন্যে উঠেছেন ভদ্রলোক, 'আইনেরও তা'হলে দয়া আছে? আমার উকিলের কথা শুনে তো বড্ড মন-খারাপ হ'য়ে যায়।'

এই অস্থির অসুস্থ ব্যক্তির স্নায়ু যতোবারই শাস্ত হ'য়ে এসেছে, প্রথম শ্রেণীর কামরা থেকে বেরিয়ে তার ভ্রমণ-সঙ্গী তাকে খ'রে প্রায় টানতে-টানতে নিয়ে গেছে খাবার কামরায় শ্যাম্পেনের সন্ধান। সেই সঙ্গীটিই হুটপুট, অভদ্র, নিখুঁতভাবে দাড়ি কামানো, শার্ট পোশাক পরিহিত ঐ উকিল—কোনো ঘটনাতেই অবাক হবে না এমন চেহারা নিয়ে যে এখন মৃতকে আগলে দাঁড়িয়ে আছে। কী জানি কেন, তাকে দেখেই একথা মনে হয় যে তার মক্কেলের অন্তহীন উত্তেজনা তার কিছু সুবিধে ক'রে দিয়েছে।

বাবা মিশাকে বললেন যে আত্মঘাতী ব্যক্তিটি হলেন বিখ্যাত, সদাশয় অথচ অত্যাধিক

অমিতচারী এক কোটিপতি—তার নাম জিভাগো—প্রায় অর্ধ-ঊষাদ অবস্থায় দিন-যাপন করছিলেন ইনি। মিশার উপস্থিতি হঠাৎ এক অসংযম এনেছিলো তাঁর মনে, ভদ্রলোক তাঁর মৃত স্ত্রী আর মিশার সমবয়স্ক ছেলের কথা তাদের বলেছিলেন; তাঁর দ্বিতীয় সংসারের কথাও বলেছিলেন—প্রথমটির মতো সে-সংসারও তিনি পরিত্যাগ করেছেন। একথা বলতে-বলতে অন্য কী কথা তাঁর মনে পড়ে গেছে, কী এক অজ্ঞাত ভয়ে ফ্যাকাসে হয়ে গেছে তাঁর মুখ, কথার খেই হারিয়ে তোলাতে শুরু করেছেন।

মিশার প্রতি অদ্ভুত তাঁর স্নেহ—তার অর্থ বোঝা যায় না—মনে হচ্ছিলো অন্য কারুর প্রাপ্যটা তাকে দিয়ে স্নেহাতুর হৃদয়কে শাস্ত করবার চেষ্টা করছিলেন। বড়ো-বড়ো স্টেশনে, যেখানে প্রথম শ্রেণীর বিশ্রামাগারের বইয়ের দোকানে নানা রকমের খেলনা আর স্থানীয় জিনিসপত্র বিক্রি করে, গাড়ি থামলেই নেমে গিয়ে অজস্র উপহার কিনে এনে আছেন ক'রে দিচ্ছিলেন মিশাকে।

অবিশ্রান্ত মদ খেলেন ভদ্রলোক, অভিযোগ করলেন যে আজ তিন মাস ঘুম হয় না তাঁর; আর বললেন যে যদি কখনো একটু বা শান্ত হ'তে পারেন যে-অসহ্য যন্ত্রণা তাঁকে ভোগ করতে হয় তা অন্য কারো পক্ষে অকল্পনীয়।

শেষবার ঝড়ের মতো তাদের কামরায় এলেন তিনি, গর্ভনের হাত সজোরে চেপে ধ'রে কী যেন বলতে চাইলেন, কিন্তু নিজেই বুঝলেন যে সে-কথা বলতে পারবেন না; তারপর ছিটকে বেরিয়ে বারান্দায় চ'লে গেলেন, চলন্ত ট্রেন থেকে ঝাঁপিয়ে পড়লেন বাইরে।

মিশা ব'সে-ব'সে জিভাগোর শেষ উপহার, উরালের ধাতু ভর্তি ছোট্টো কাঠের বাস্কাটি ঘুরিয়ে-ফিরিয়ে দেখতে লাগলো। হঠাৎ বাইরে বাস্তুতা জেগে উঠেছে। উল্টোদিকের সমান্তর লাইনের উপর একটা ট্রলি গড়াতে-গড়াতে এসে দাঁড়ালো। লাফিয়ে নামলেন একজন ডাক্তার, দু'জন পুলিশ ও চিহ্নিত টুশি মাথায় হাকিম-সাহেব। নিরুত্তাপ কেজো গলায় প্রশ্ন ক'রে জ্ঞাতব্য বিষয়গুলি টুকে নিলেন ওঁরা। পুলিশ আর রেলের গার্ড বালির উপর নেমে অনভ্যস্ত ভঙ্গিতে এগোলো, ছেঁচড়ে সেই শব্দেই তারা টেনে তুললো। এক চাষির বৌ সজোরে কেঁদে উঠলো। যাত্রীদের অনুরোধ করা হ'লো নিজের-নিজের জায়গায় ফিরে যেতে। গার্ড ঝাঁপি বাজালো, গাড়ি চললো।

৮

‘নীতিবাগীশ বড়ো এসেছে—’ হিংস্রভাবে নিকি ভাবলো। চারদিকে চেয়ে দেখলো পাল্লাবার পথ সব বন্ধ। দরজার বাইরে অতিথিদের গলার আওয়াজ, আজ আর তাঁরা যাবেন না। ঘরে দুটি খাট, একটি নিকির নিজের, অন্যটি ভাস্কোবয়নিকভের। মুহূর্তমাত্র দ্বিধা ক'রে নিকি নিজের খাটের তলায় ঢুকে পড়লো।

খাটের তলা থেকে সে টের পেলো তার অনুপস্থিতিতে অবাক হ'য়ে সবাই তার খোঁজ করছে। ঝুঁজতে-ঝুঁজতে শেষ পর্যন্ত শোবার ঘরেই এলো সবাই।

‘যাক—কী আর করা যাবে,’ নিকোলে নিকোলেভিচ বললেন। ‘ইউরো, তুমি যাও। একটু পরেই হয়তো তোমার বন্ধুকে পাওয়া যাবে, তখন তার সঙ্গে খেলা করো।’ ওঁরা ঘরেই বসলেন; পিটার্সবার্গ আর মস্কো ছাত্র-আন্দোলন নিয়ে আলোচনা করতে-করতে জানতেও পারলেন না আশঘটনাক্রমে কী এক অস্বাভাবিক আর লজ্জাকর অবস্থায় তাঁরা নিকিকে আটক থাকতে বাধ্য করছেন। অবশেষে বারান্দায় বেরিয়ে গেলেন ওঁরা। সন্তর্পণে ঘরের জানলা খুলে বাইরে লাফিয়ে পড়ে নিকি বাগানে চ'লে এলো। গত রাতে একেবারে ঘুম হয়নি তার, কিছুই যেন ভালো লাগছিলো না। বয়স তার চোদ্দ, বিস্কুক হৃদয়, বালকত্ব মনে হয় অনন্ত ও

ক্রান্তিকর। সারা রাত নির্ঘুম কাটিয়ে ভোর না-হ'তেই বাইরে চ'লে এসেছিলো আজ। ঘাসের উপর ভেজা গাছগুলির ছায়ার রং তখনো কালো হয়নি—ঘন ছাইরং সেই ছায়ার, ভেজা পশমের জামার মতো। কেন জানি মনে হয়, সকালের এই মোহন গন্ধ, আলোর জাফরিকটা ঐ ছায়ার ভিজে শরীর থেকে উঠে আসছে। হঠাৎ কে যেন এক জ্যোতির্ময় পারদবিন্দু ঘাসের উপর গড়িয়ে দিলে। ধারার মতো ব'য়ে গেলো সেই আলোর রেখা, মাটিতে উবে গেলো না। তারপর আচমকা এক বিদ্যুৎভঙ্গিতে একপাশে স'রে গিয়ে অন্তর্হিত হ'লো। সাপ! নিকি কৈপে উঠলো।

তার অদ্ভুত এক অভ্যাস আছে। উত্তেজিত হ'লেই সে নিজের মনে চৈতন্যে কথা বলতে শুরু করে। তার মাকে নকল ক'রে বড়ো-বড়ো উন্নত বিষয় বেছে নেয়, আর নিজেই নিজের প্রতিবাদ করতে ভালোবাসে।

'বেঁচে থাকাটা খুবই আশ্চর্য, কিন্তু এতো যন্ত্রণা কি পেতেই হবে? স্বপ্ন আরছেন—নিশ্চয়ই। কিন্তু যদি সত্যিই তিনি থাকেন তাহ'লে আমিই তিনি।' ঐ ব'লে নিকি সামনের আসপেন গাছটির দিকে চোখ তুলে তাকাতে। থরথর ক'রে কাঁপছে সেই গাছ, ভেজা পাতাগুলি টিনের পাতের মতো চকচকে।

'ওকে আমি থামতে বলবো।' এক উন্মাদ আবেগে মনে-মনে সে ইচ্ছে করলে, তার সমগ্র সত্তা দিয়ে, রক্তমাংসের প্রতিটি বিন্দু দিয়ে ইচ্ছে করলে, যে গাছটা তার কাঁপুনি থামাক। 'থামো, বলছি!' আর তক্কুনি গাছটি তার বাধ্য হ'য়ে যেন নিশ্চলতায় জ'মে গেলো। আনন্দে হেসে উঠলো নিকি, খুব খুশি হ'য়ে নদীতে ছুটলো স্নান করতে।

নিকির বাবা হলেন একজন সম্ভ্রাসবাদী, নাম ডেমেস্ট্রি ডুডেরভ। প্রথমে মৃত্যুদণ্ড হয় তাঁর—তারপর জার স্বয়ং সেই দণ্ড প্রত্যাহার ক'রে তাঁকে নির্বাসন দিয়েছেন। নিকির মা এরিস্টভ বংশজাত জর্জীয় রাজকন্যা, অপরিমিত প্রশ্রয়ে স্বেচ্ছাচারী, সুন্দরী এবং এখনো যুবতী। কোনো-না-কোনো হুজুগ নিয়ে মেতে থাকেন তিনি—কতো রকম আন্দোলন, বিদ্রোহ আর বিদ্রোহী, কতো চরম মতবাদ, বিখ্যাত জনপ্রিয় অথবা দুঃখী অসার্থক অভিনেতা—তাঁর উৎসাহের তালিকা থেকে কিছুই বাদ পড়ে না।

ছেলেকেও খুব ভালোবাসেন। তার আসল নাম যদিও ইনোকেস্টী, আদর ক'রে হাজার রকম আজগুবি সব নামে তাকে ডাকেন তিনি—কখনো হয়তো ইনোচেক, কখনো নচেনকা। টফ্লিসে, তাঁর পিত্রালয়ে ছেলেকে নিয়ে গিয়ে সগর্বে দেখিয়ে এনেছেন। সেখানে নিকিকে সবচেয়ে আকৃষ্ট করেছিলো বাড়ির উঠানের নিঃসঙ্গ গাছটি। গাছটি এক গরম দেশের দানব, দেখতে খাপছাড়া, হাতির কানের মতো বড়ো-বড়ো পাতাগুলো দক্ষিণের তপ্ত আকাশ থেকে উঠোনটিকে আশ্রয় দিয়েছে। ওটা যে গাছ, কোনো জন্তু নয়—ঐ ধারণাটি নিকি কখনো মেনে নেতে পারেনি।

বিপ্লবী পিতার পদবি গ্রহণ করা নিকির পক্ষে বিপজ্জনক ছিলো। ইভান ইভানোভিচের ইচ্ছে ছিলো সে তার মাতুলকুলের পদবি নেয়। নিকির মারও তাতে অমত ছিলো না। ইভান ইভানোভিচ জারের কাছে ঐ মর্মে আবেদন করতে চান। খাটের তলায় ব'সে নিকি যখন সমস্ত বংশক্রমের উপর বিরক্ত হ'য়ে উঠেছিলো, তখন ঐ ব্যাপারটা নিয়েও চিন্তা করেছিলো সে। ইভান ইভানোভিচ কোন অধিকারে তার ব্যাপারে এমন অপমানজনকভাবে মাথা গলগতে আসেন? নিকি তাঁকে মজা টের পাইয়ে দেবে।

আর ঐ এক নাড়িয়া! মাত্র পনেরো বছর বয়েস হয়েছে ব'লেই কি ও-রকম নাক উচু ক'রে থাকবার অধিকার জন্মেছে তার? এমন বিতর্কিতভাবে কথা বলে যেন নিকি এখনো সেই কচি খাকাটি আছে। ওকেও সে দেখে নেবে। 'ওকে আমি ঘৃণা করি,' কয়েকবার মনে-মনে বললো নিকি। 'আমি ওকে খুন করবো। নৌকো ক'রে নদীতে নিয়ে গিয়ে ওকে ডুবিয়ে মারবো আমি।'

মা-ও একই রকম। নিশ্চয়ই এখান থেকে যাবার সময় তাকে আর ভল্কেবয়নিকভকে যা-যা ব'লে গেছেন সব মিথো। ককেসাসে গেছেন না ছাই, তাদের দেখিয়ে-দেখিয়ে গাড়িতে উঠে, গেছেন তো নেমে পরের স্টেশনে, ফিরে গেছেন হয়তো পিটার্সবার্গে: ছাত্রদের দলে ভিড়ে কোথাও হয়তো দাঙ্গা বাধিয়েছেন পুলিশের সঙ্গে,—ফুর্তিতে আছেন আর কি! এদিকে নিকি এই পাচা আন্তাকুডে দম আটকে মরছে। কিন্তু ওকে সবাই যতো বোকা ভাবে ততো বোকা সে নয়। নাড়িয়াকে সে খুন করবেই, ইস্কুল থেকে নাম কাটিয়ে নেবে, তারপর সাইবেরিয়া চ'লে যাবে তাব বাবার কাছে—দু'জনে মিলে নতুন এক বিপ্লব শুরু ক'রে দেবে।

৯

দিঘির কিনার ঘেষে শালুক ফুটেছে। ফুলের বোঁটা কেটে-কেটে তাদের নৌকো চলেছে, শব্দ হচ্ছে খসখস, ফুলগুলি স'বে স'বে যাচ্ছে জলের বুকে ত্রিভুজ একে। ফুলের ফাঁক দিয়ে কালো জল দেখে মনে হয় ফালি-কাটা তরমুজের রস।

নিকি আর নাড়িয়া শালুক ফুল তুলছিলো। একই ফুলের শব্দ পিছল বোঁটা ধরলো দু'জনে। এমনভাবে তারা দু'জনেই একসঙ্গে সেই বোঁটার টান দিলো যে মাথা ঠুকে গেলো তাদের, আর নৌকা এমনভাবে পারের দিকে ঘুরে গেলো যে মনে হ'লো যেন কাছি দিয়ে কেউ টানছে। সেখানে বোঁটাগুলি আরো ছোটো আর জড়ানো; শাদা-শাদা ফুলগুলি, ভেতরে রক্তের রেখা-আঁকা হলুদ ডিমের কুসুমের মতো তাদের রং, ডুব দিয়ে-দিয়ে ভেসে উঠতে লাগলো সারা শরীরে জল মেখে। নৌকার একধারে ঝুকে প'ড়ে বাচ্চারা এমনভাবে ফুল ছিঁড়ে চললো যে নৌকো ক্রমেই হেলে পড়তে লাগলো একপাশে।

'স্কুলে যেতে অসহ্য লাগে আমাব,' বললে নিকি, 'এবার আমার নতুন জীবন শুরু করার সময় হয়েছে—নিজের পায়ে দাঁড়াতে হবে আমাকে এখন।'

'ও মা—আর আমি যে তোমাব কাছে বর্গমূলের অঙ্কটা বুঝে নেবো ভেবেছিলাম। আলজেরায় আমি এতো খারাপ যে এবার আব-একটু হ'লেই ফেল করতাম।'

নিকি বুঝলো যে তাকে ঠাট্টা করা হচ্ছে। বর্গমূলের কথা ব'লে বুঝিয়ে দিচ্ছে যে আমি কতো ছেলেমানুষ—এখনো আলজেরার অঙ্কই শুরু করিনি।

কিন্তু আহত হয়েছে এমন ভাব সে দেখালো না। মুখে নিম্পহ এক ভঙ্গি ফোটার চেষ্টা ক'রে—চেষ্টা করতে-করতেই অবশ্য বুঝছিলো কী বোকামি—জিজ্ঞেস করলো, 'বডো হ'য়ে তুমি কাকে বিয়ে করবে?'

'সে অনেক পরের কথা। করবোই না হয়তো কাউকে। এখনো ও-বিষয়টা নিয়ে চিন্তা করিনি আমি।'

'ওঃ—তুমি বঝি ভাবলে আমার কোনো কৌতুহল আছে তোমার বিয়ের খবর জানতে?'

'তা না-থাকলে জিজ্ঞেস করতে এলে কেন?'

'তুমি একটা হাবা।'

দু'জনের বগড়া শুরু হ'য়ে গেলো। সকালবেলায় নারীবিদ্বেষের কথা স্মরণ ক'রে নিকি নাড়িয়াকে ভয় দেখালো যে এই মুহূর্তে চুপ না-করলে সে তাকে জলে ডুবিয়ে মারবে। 'চেষ্টা ক'রেই দ্যাখো না,' নাড়িয়া জবাব দিলো। অমনি নিকি নাড়িয়ার কোমর আঁকড়ে ধ'রে তাকে জলে ফেলে দেবার চেষ্টা করতে লাগলো। মারামারি করতে-করতে টাল সামলাতে না-পেরে তাবা দু'জনেই জলে প'ড়ে গেলো।

দু'জনেই সাঁতার জানে, কিন্তু শালুক হাত-পা জড়িয়ে গিয়ে দম আটকে এলো তাদের। অবশেষে এক সময় পায়ের নিচে কাদা ঠেকলো। পাড় বেয়ে যখন ডাঙায় উঠে এলো তখন

জামা-জুতো থেকে খবনার ধাবার মতো জল বেরুচ্ছে। নাড়িয়ার চাইতেও নিকি বেশি ক্লান্ত হ'য়ে পড়েছে।

এমনকি গত বসন্তেও যদি এমন কাণ্ড ঘটতো, তাহ'লে এই উদ্বেজনা প্রশমিত হ'বার পরেই তাবা নিশ্চয়ই চাঁৎকাব ক'রে গাল পাড়তো দু'জনে দু'জনকে, আর তাবপবই হয়তো ভেজা গায়ে পাশাপাশি এলিয়ে প'ড়ে হাসতে শুরু ক'রে দিতো।

কিন্তু আজ তারা ব'সে থাকলো—পাশাপাশি, একটাও কথা না-ব'লে। সমস্ত ঘটনাটাব অস্বাভাবিকত্ব মনে ক'রে তাদের নিশ্বাস পড়ছে না। নীবব বিবজ্জিতে নাড়িয়া যেন ভেতরে-ভেতরে টগবগ ক'রে ফুটছে, আর নিকির সমস্ত শবীর যন্ত্রণায় অবশ, তাব মনে হচ্ছে হাত-পা বুঝি কালো আর নীল হ'য়ে গেছে ব্যাথায়, আব তাব পাজর ভেঙে গেছে টুকরো-টুকরো হ'য়ে।

শেষ পর্যন্ত নাড়িয়াই প্রথম কথা বললো। বয়স্কদেব মতো শান্ত গলায় সে বললে, 'তুমি সত্যি একটা পাগল।' 'আমি অত্যন্ত দুঃখিত।'—ঠিক সেই একই রকম বয়স্ক ভঙ্গিতে নিকি জবাব দিলো।

জলের গাড়ির মতো রাস্তা ভিজিয়ে বাড়ি ফিরলো দু'জনে। পাথে সেই ধূলিধূসরিত সপসংকুল ঢালু জমিটা তাদের পার হতে হ'লো, যেখানে ভোরবেলা নিকি সাপ দেখেছিলো।

নিকিব মনে পড়লো তাব গত রাত্রের উদ্বেজনার কথা। মনে পড়লো ভোরে সে ছিলো প্রাকামোর অধিকারী, তখন সে আদেশ করেছিলো প্রকৃতিকে। এখন কী আদেশ দেবো আমি—নিকি ভাবলে। সবচেয়ে বড়ো কামনা আমার এখন কী? হঠাৎ বুঝতে পারলো নাড়িয়ার সঙ্গে আবার সে জলে পড়তে চায়; এই মুহূর্তে শুধু এই তার পরম বাঞ্ছনীয়। আবার কবে এমন ঘটনা ঘটবে? উত্তরটা জানবার জন্য কী না করতে পারে সে!

পরিচ্ছেদ ২

ভিন্ন জগতের একটি মেয়ে

১

জাপানের সঙ্গে যুদ্ধ শেষ হবার আগেই হঠাৎ অন্য-এক ঘটনার ছায়া পড়লো রাশিয়ার উপর। বিদ্রোহের ঢেউ ছড়িয়ে পড়লো এক প্রান্ত থেকে আরেক প্রান্তে, প্রত্যেক ঢেউ আগেরটির চাইতে শক্তিশালী, অসাধারণ।

এই সময় এক বেলজীয় এঞ্জিনিয়ারের বিধবা স্ত্রী আমালিয়া কার্লোভনা গুইশার তার ছেলে রডিয়ন আর মেয়ে লারিসাকে নিয়ে উরাল থেকে মস্কোতে এলেন। ভদ্রমহিলা আসলে ফরাশি, এখন রুশ ব'নে গেছেন। মস্কোতে এসে সামরিক বিদ্যালয়ে ছেলেকে ভর্তি ক'রে দিলেন, লারা ভর্তি হ'লো মেয়েদের হাইস্কুলে। এই একই স্কুলে আর একই ক্লাশে নাভিয়া কলোগ্রিভভও পড়তো।

শ্রীমতী গুইশায়ের স্বামী তাঁর জন্য রেখে গেছেন কিছু কোম্পানির কাগজ, যার দর একসময় চড়া ছিলো, এখন পড়তে শুরু করেছে। হাতের টাকা খরচ হ'য়ে যাবার ভয়েও বটে, একটা-কিছু করতে হবে ব'লেও বটে, শ্রীমতী গুইশার 'জয়ন্তস্তের' কাছে লেভিটস্কায়ার দরজির দোকানটা কিনে ফেললেন। লেভিটস্কায়ার উত্তরাধিকারীদের কাছ থেকে দোকানের সঙ্গে দোকানের সুনাম, পুরোনো খদ্দের, দরজি ও অন্য কর্মনবিশদেরও পেয়ে গেলেন তিনি।

এই ব্যাবসা তিনি ফেঁদেছিলেন কমারোভস্কি নামে এক আইনব্যবসায়ীর পরামর্শে। ভদ্রলোক ছিলেন তাঁর স্বামীর বন্ধু এবং বর্তমানে তাঁর প্রধান সহায়। জাত-ব্যাবসাদার এই ভদ্রলোক, পুরো রাশিয়ার ব্যবসার জগৎ এর হাতের তালুতে। এরই সঙ্গে চিঠিতে যোগাযোগ ক'রে মস্কোতে এসেছিলেন শ্রীমতী গুইশার; ইনি স্টেশনে অপেক্ষা করেছেন, গাড়ি ভাড়া ক'রে মস্কোর আরেক সীমায় অরুজাইনি^১ স্ট্রীটে, মন্টেনিগ্রো হোটেলে আগে থেকে ভাড়া-ক'রে-রাখা ঘরে পৌঁছে দিয়ে গেছেন; ইনিই শ্রীমতী গুইশারকে বুঝিয়ে-সুঝিয়ে রডিয়াকে সামরিক বিদ্যালয়ে আর লারাকে তাঁর নিজের পছন্দসই ইস্কুলে ভর্তি করিয়েছিলেন। রডিয়ার সঙ্গে আলগোছে হাসি-মস্করা করেন তিনি, আর লারার দিকে এমনভাবে তাকিয়ে থাকেন যাতে সে লাল হ'য়ে ওঠে।

২

দোকানের কাছাকাছি ছোটো তিন-কামরার একটি ফ্ল্যাটে উঠে যাবার আগে প্রায় একমাস মন্টেনিগ্রোতেই থাকলো তারা।

১ একটি গরিব পাড়া।

২ অরুজাইনি : অস্ত্রাগার সড়ক।

মস্তকের সবচেয়ে কদর্য পাড়া সেটা। বস্তি, সন্দেহজনক গলিঘুজি, লিখাচিদের^১ আড্ডা—পুরো তল্লাটটি পাশাপাশি।

ঘরের ময়লা, বিছানার ছারপোকা, আসবাবপত্রের দীনতা—কোনো কিছু দেখেই ছেলেমেয়েরা মন-খারাপ করলো না। তাদের বাবার মৃত্যুর পর থেকে মা পথে বসার ভয়ে সর্বদাই কাঁটা হ'য়ে আছেন। তারা সর্বনাশের মুখে দাঁড়িয়ে আছে, রডিয়া আর লারা একথা শুনতে অভ্যস্ত হ'য়ে গিয়েছিলো। রাস্তার ছেলেপুলেদের থেকে তারা আলাদা, একথা বুঝলেও অনাথ-আশ্রমে পালিত শিশুদের মতো বড়লোকদের বিষয়ে আতঙ্ক তাদের মজ্জায়-মজ্জায় মিশে গিয়েছিলো।

তাদের মা ছিলেন এই আতঙ্কের একটি জীবন্ত প্রতিমূর্তি। ষয়তিরিশ বছরের গোলগাল সোনালি চুলের মহিলা তিনি। মাঝে-মাঝে হৃদরোগে ভোগেন, আর তা যখন ভোগেন না তখন তাঁকে ন্যাকামিতে ধরে। ভিতুর চূড়ান্ত, আর সবচেয়ে বোধহয় বেশি ভয় পান পুরুষমানুষকে। আর এরই জন্য, শুধুমাত্র আতঙ্ক আর বিহ্বলতাব ফলে, তিনি সর্বদাই এক প্রেমিকের আলিঙ্গন থেকে অন্য প্রেমিকের আলিঙ্গনে ছিটকে ছিটকে পড়তেন।

মর্শেনিগ্রো হোটেলে ওরা ছিলেন তেইশ নম্বর ঘরে। এই হোটেলের পত্তনের সময় থেকে চব্বিশ নম্বর ঘরে বাস করছেন চেলো-বাদক টিশকেভিচ, তাঁর ঢাক-পড়া মাথা পরচুলায় ঢাকা, শরীর ঘর্মসিক্ত, কাউকে কিছু বুঝিয়ে বলতে হ'লেই ভদ্রলোক প্রার্থনার ভঙ্গিতে হাত জোড় ক'রে বুকে ঠেকান। ফ্যানবেল কনসার্ট-হলে বাজান ইনি, বাজাবার সময় আবেগে তাঁর মাথা পেছন দিকে হেলে পড়ে, চোখ গোল হ'য়ে ঘুরতে থাকে। ঘরে খুব কম সময়ই থাকেন ভদ্রলোক, তাঁর অধিকাংশ সময় কাটে বলশই থিয়েটার আর নাচগানের ইন্ধুলে। প্রতিবেশী হিসাবে তাঁরা পরস্পরকে সাহায্য করতে-করতে ঘনিষ্ঠ হয়েছিলেন।

কমারোভস্কি এলে ছেলেমেয়ের সামনে শ্রীমতী গুইশার একটু বিব্রত বোধ করতেন ব'লে টিশকেভিচ তাঁকে তাঁর ঘরের চাবি দিয়ে যেতেন যাতে তিনি সেটা ব্যবহার করতে পারে। তাঁর এই পরহিতৈষণার উপর নির্ভর ক'রে-ক'রে শ্রীমতী গুইশার এমন অভ্যস্ত হ'য়ে গিয়েছিলেন যে অনেক সময় তিনি তাঁর দরজায় টোকা দিয়ে সাক্ষরিত্রে পৃষ্ঠপোষকের হাত থেকে রক্ষা পাবার জন্য অনুরোধ জানাতেও ছাড়েননি।

৩

ভেরস্কায়া স্ট্রীটের এক কোনায়, যেখানে ব্রেস্ট রেলওয়ে এঞ্জিনের ডিপো, গুদোম আর কেরানিদের কোয়াটার বসিয়ে আস্তানা গেড়েছে, সেখানে একটি একতলা বাড়িতে শ্রীমতী গুইশারের শেলাইয়ের কারখানা।

রেলওয়ে কোয়ার্টারের একটিতে থাকতো ওলিয়া ডেমিনা, তাঁর অধীনস্থ একটি চালাকচতুর মেয়ে, তার কাকা রেলগুদোমের কেরানি। মেয়েটি খুব তাড়াতাড়ি উন্নতি করেছিলো। দোকানের পুরোনো মালিক একে নেকনজরে দেখতেন, নতুন মালিকেরও পক্ষপাত জন্মাচ্ছে। লারা গুইশারকে খুব পছন্দ করতো ওলিয়া।

লেভিটস্কায়ার আমলের পর দোকানের কিছুই বদল হয়নি। শেলাইয়ের কলগুলি মেয়েদের ক্লাস্ত পায়ের চাপে অথবা অশান্ত হাতের ঘর্নিতে উদ্গাদের মতো শব্দ করে। এখানে-ওখানে টেবিলের ধারে ব'সে মেয়েরা শেলাই ক'রে চলে, লম্বা সুতো-পরানো ছুঁচটা টেনে তোলার সময় অনেক উচুতে হাত উঠে যায় তাদের। টুকরো কাপড়ে ভর্তি মেঝে। শেলাই-কলের ঘড়ঘড় শব্দ

^১ লিখাচি : শৌখিন গাড়ির চালক, এদের বন্দনাম ছিলো বেশ্যাদের সঙ্গে যোগাযোগ আছে ব'লে।

আর জানলার ধারে খাঁচায় পোষা ক্যানারির (তার নাম কিরিল মডেস্টোভিচ) ঝাঁপির মতো গান ছাপিয়ে কথা বলতে হ'লে তারস্বরে চ্যাচানো ছাড়া উপায় নেই। পাখির পূর্বতন মনিব তার এই অবিশ্বাস নামের গোপন রহস্য কাউকে না-জানিয়ে সমাধিস্থ হয়েছেন।

বসবার ঘরের টেবিলে ফ্যাশান-পত্রিকাগুলো স্তূপ করা থাকে, তার চারধারে জড়ো হন দলবদ্ধ মহিলারা। কেউ দাঁড়িয়ে, কেউ ব'সে, কেউ বা পত্রিকার ছবির ভঙ্গিতে অর্ধশায়িত হ'য়ে মডেল আর জামার হাঁট নিয়ে আলোচনা করেন। অন্য একটি টেবিলে ম্যানেজারের চেয়ারে ব'সে থাকে ফায়িনা সিলাস্টিএভনা ফেটিসভা, শক্তপোক্ত গড়ন, গালের মোটা চামড়ার ভাঁজে-ভাঁজে আঁচিল—সে হ'লো প্রধান দরজি এবং শ্রীমতী গুইশারের সহকারিণী।

হাড়ের তৈরি একটি সিগারেট-হোল্ডার তার হলদেটে দাঁতের ঝাঁকে আটকে থাকে, নাক-মুখ থেকে নির্গত হলুদ ধোয়ার কুণ্ডলির আড়ালে তার চোখের হলুদ তারা দুটি ঘুরিয়ে-ঘুরিয়ে সে খাতায় লিখে রাখে গায়ের মাপ, অর্ডার আর খদ্দেরদের ঠিকানা।

দোকান চালাবার মতো কোনো অভিজ্ঞতাই শ্রীমতী গুইশারের ছিলো না। তিনি নিজেই বুঝতেন মালিক-জনোচিত ধরনধারণ তাঁর আসে না, কিন্তু কর্মচারীরা সৎ আর ফেটিসভা খুবই নির্ভরযোগ্য। কিন্তু তা হ'লেও এখন দিনকাল সুবিধের নয়, আর ভবিষ্যতের কথা ভাবলেই হিম হ'য়ে যান তিনি; কোনো-কোনো সময় হতাশা তাঁকে অবশ ক'রে ফেলে।

কমারোভস্কি প্রায়ই আসে দেখাশুনো করতে। শ্রীমতী গুইশারের ফ্ল্যাটে যাবার পথে সে যখন দোকানের মধ্য দিয়ে যায় কেতাদুরস্ত মহিলারা পোশাক ঠিক করা ছেড়ে লাজুকভাবে পর্দার ওপিঠে স'রে গিয়ে তার রসিকতা এড়ান। মেয়ে-দরজিরা অপছন্দ করে, আবার মজাও পায়; আপন মনে তারা বিড়বিড় করে, 'এই আসছেন নবাবজাদা,' 'এমিলিয়ার প্রাণনাথ এলেন,' 'বুড়ো ছাগল,' 'রসের নাগর'। এমনকি কমারোভস্কির চেয়েও তারা আরো বেশি ঘৃণা করতো তার কুকুরটাকে—একটা বুলডগ, নাম জ্যাক, মাঝে-মাঝে মনিবের সঙ্গে শেকল বাঁধা হয়ে বেড়াতে আসে; এমন সর্বনেশে ঝাঁকুনি দিতে-দিতে এগোয় যে কমারোভস্কি ট'লে-ট'লে হোঁচট খায়; দুই হাত সামনের দিকে বাড়িয়ে দিয়ে কোনোমতে যখন টাল সামলায় সে, তখন মনে হয় অন্ধ চলেছে তার পথপ্রদর্শককে অনুসরণ ক'রে।

এক বসন্তের দিনে লারার পায়ে কামড় বসিয়ে জ্যাক তার মোজা টুকরো ক'রে ছিঁড়ে দিলে।

'আপদটাকে শেষ করবো আমি,' ওলিয়া কর্কশ কণ্ঠে লারার কানে ফিস্‌ফিস্‌ করলো।

'হ্যাঁ, কুকুরটা সত্যি বদ; কিন্তু কী ক'রে শেষ করবে শুনি, বোকারাম?'

'শশ—চেষ্টা না, আমি বলছি কী ক'বে। তোমার মাব দেৱাজে ইস্টারের জন্য কতোগুলো পাথরের ডিম তোলা আছে না—'

'হ্যাঁ, আছে, স্ফটিক আর ষেতপাথরের তৈরি ওগুলো।'

'ঠিক, ঠিক। মাথাটা নিচু করো না, কানে-কানে বলছি শোনো। ওগুলো নিয়ে খুব ক'রে চর্বিতে ডুবিয়ে দিয়ো—নোংরা জানোয়ারটা তখন গবগবিয়ে খাবে আর দম আটকে মরবে শয়তানটা। মরবে ওটা—এইভাবে মরবে—'

লারা হাসে, ওলিয়াকে হিংসে হয় তার। ও খেটে খায়, দারিদ্র্যের মধ্যে বাস করে। এই সব ছেলেমেয়েরা সাধারণত খুব অকালপক্ক হয়। কিন্তু, ভগবান, কী নিষ্পাপ আর শিশুসুলভ স্বভাব ওর! জ্যাক, ডিম—এইসব ভাবনা ওর মাথায় ঢুকলো কী ক'রে? 'আর এমন ভাগ্য আমার হ'লো,' লারা ভাবে, 'যে সব-কিছু আমাকে দেখতে হয়, সবই কেন এমন গভীরভাবে দাগ কাটে আমার মনে?'

৪

‘মা হ’লেন ঠুঁর...কী যেন কথাটা?... উনি হলেন মার...!’ না, ও-সব খারাপ কথা, আমি বলবো না। কিন্তু তাহ’লে ও-রকম ভাবে আমার দিকে তাকান কেন উনি? হাজার হোক—আমি মারই মেয়ে তো!’

ষোলো বছর সবে ছাড়িয়েছে লারা, কিন্তু তার দেহটি পুরোপুরি ভ’রে গেছে। লোকে ভাবে তার আঠারো কি তারও বেশি। স্বচ্ছ মন তার, সরল স্বভাব; দেখতে সে খুবই সুন্দর।

সে আর রডিয়া, দুজনেই বুঝে নিয়েছিলো যে তাদের জীবনে কিছুই সহজে আসবে না। অলস আর অকর্মণ্য শিশুদের মতো অকালপক্ক চিন্তা বা বয়সের পক্ষে অপ্রয়োজনীয় কৌতূহলে সময় নষ্ট করার মতো অবসর ছিলো না তাদের। শুধু তা-ই নোংরা যা বাহ্যিক। লারা জগতের পবিত্রতম মেয়ে।

ছোটো-ছোটো দাক্ষিণ্যে কৃতজ্ঞ বোধ করতো তারা দুই ভাইবোনে। তাবা তো জানে জিনিসপত্রের কী দাম, আর এ পর্যন্ত তারা যা পেয়েছে তার মূল্য কতোখানি। জীবনের পথে চলতে হ’লে লোকে যাতে ভালো ভাবে তার জন্যে চেষ্টা করতে হয়। স্কুলেব পড়ায় লারা যে ভালো করতো তার কারণ এ নয় যে পড়াশুনোর প্রতি তার বিশুদ্ধ ভালোবাসা আছে—তার কারণ সবচেয়ে ভালো ছাত্রীদের মাইনে কম দিতে হয়। ঠিক সেই একই কারণে সে বাসন ধোয় আর মায়ের ফরমাশ খাটে। নিঃশব্দ এক লাভণ্য ছিলো তার—তার ভঙ্গি, গলার স্বর, দেহের গড়ন, তার ছাইরঙের চোখ, আর বকঝকে চুল—সব ছিলো সুসমঞ্জস, এক সুরে বাঁধা।

সেদিন ছিলো মধ্য-জুলাইয়ের এক রবিবার। ছুটির দিনে একটু বেশিক্ষণ বিছানায় প’ড়ে থাকলে ক্ষতি নেই। সে শুয়ে ছিলো চিৎ হ’য়ে, মাথার তলায় দুই হাত রেখে।

দোকান-ঘর থেকে কোনো শব্দ আসছিলো না। রাস্তার দিকের জানলাটি খোলা। দূরে একটা ছাকরা-গাড়ি, পাথরের রাস্তায় চাকার শব্দ তুলে গড়িয়ে-গড়িয়ে গিয়ে ট্রাম-লাইনের খাজে কেমন মসৃণ একটা নিঃশব্দতায় ডুবে গেলো। ‘আর একটু ঘুমোই,’ সে ভাবলে। শহরের বিচিত্র কলরোল যেন ঘুমপাড়ানি গানের মতো তাকে তন্দ্রাতুর ক’রে তুলছিলো।

ঝাঁ কাঁধ আর ডান পায়ের বুড়ো আঙুলের সঙ্গে বিছানার চাদরের স্পর্শ অনুভব ক’রে শয্যার কতোটা অংশ সে জুড়ে আছে, তা লারা বুঝতে পারছিলো। তার কাঁধ থেকে পায়ের পাতার মধ্যস্থলটি পর্যন্ত সবটুকু যেন অস্পষ্টভাবে তার নিজের, আর তার আত্মা অথবা তাব সত্তা নিপুণভাবে তার দেহের মধ্যে ঐটে গেছে। অশৈথিল্যের তার সত্তা আপ্রাণ চেষ্টা করছে ভবিষ্যতের জন্য।

লারা ভাবলো, ‘আমাকে এখন ঘুমোতেই হবে,’ আর কল্পনায় এই মুহূর্তের সূর্যালোকে উজ্জ্বল করেটনি রো-এর দিকে তাকাবার চেষ্টা করলো—বিরট গাড়িগুলিকে মিস্ত্রিদের ছাউনিতে পরিচ্ছন্ন ক’রে ধোয়া-মোছা মেঝের উপর দেখানোর জন্য রাখা হয়েছে, কাটা কাচের লণ্ঠন আর খড়ের তৈরি ভালুক, প্রাচুর্যে ভরা জীবন। সেই রাস্তাতেই আর কয়েক পা এগিয়ে জনামেনস্কি ব্যারাকের উঠানে অশ্বারোহী সৈন্যরা ব্যায়াম করে, লাফিয়ে উঠে ঘোড়া চালিয়ে দেয়, কখনো আস্তে, কখনো দ্রুততর গতিতে, কখনো বা কদমচালে,—আর বাইরে দাঁই আর স্তন্যদায়ী ধাত্রীদের হাত ধ’রে সার বেঁধে দাঁড়িয়ে বাচ্চারা হাঁ ক’রে রেলিঙের ফাঁক দিয়ে তাদের দ্যাখে।

আরো একটু দূরে, লারা মনে-মনে ভাবলো, পেট্রভকা স্ট্রীট। ‘ওঃ হো, লারা, ভালো কথা মনে পড়েছে। আমার ভয়ানক ইচ্ছে ছিলো তোমাকে আমার ফ্ল্যাটটা দেখাবো। খুবই তো কাছে—’

কমারোভস্কির এক বন্ধু, কারেটনি রোতে থাকেন তিনি, তাঁর ছোট্ট মেয়ে অলগার নামকরণ

দিবস ছিলো সেদিন। এই উপলক্ষে নাচ আর শ্যাম্পেনের ব্যবস্থা হয়েছিলো। উনি মাকে নিমন্ত্রণ করেছিলেন, কিন্তু মার শরীর ভালো ছিলো না বলে যেতে পারলেন না। মা বলেছিলেন, 'লারাকে নিয়ে যাও। আমাকে তো সব সময় বলো ওর দেখাশোনা করতে, এবার তুমি একটু দেখাশোনা করো তো। আর তাকে দেখাশোনাই সে করলো—সেটাই হ'লো প্রহসন।

ঐ ওঅল্‌জ নাচ থেকেই সব-কিছুর শুরু। নিছক পাগলামি এই ওঅল্‌জ তাছাড়া আর-কিছু না। কিছুই না-ভেবে অকারণে তুমি ঘুরতে থাকবে। যতক্ষণ বাজনা বাজে, ততক্ষণে যেন অনন্ত যুগ উপন্যাসের জীবনের মতো পার হ'য়ে গিয়েছিলো। কিন্তু যেই থামলো, চমকে উঠতে হ'লো—যেন এক বালতি ঠাণ্ডা জল গায়ে ঢেলে দিয়েছে কেউ, কিংবা তোমাকে নগ্নদেহে কেউ দেখে ফেলেছে। অবশ্য কাউকে অতোটা ঘনিষ্ঠ হবার সুযোগ যে সে দিয়েছিলো তার একটা কারণ হচ্ছে দেখানোপনা—দেখানো যে তুমি কতো বড়ো হ'য়ে গেছো।

উনি যে এতো ভালো নাচতে পারেন তা সে কখনো কল্পনাও করতে পারতো না। কী চতুর ওর হাত, কোমর জড়িয়ে ধরায় কী আশ্চর্য দৃঢ়তা। কিন্তু আর কখনো সে কাউকে ও-রকম ভাবে তাকে চুমু খেতে দেবে না। সে কি স্বপ্নেও ভেবেছিলো নিজের ঠোঁটের ওপর অন্য একজনের ঠোঁট অতো দীর্ঘ সময়ের জন্য চেপে থাকলে তার মধ্যে অতোখানি নির্লজ্জ আশ্পর্শা ঝুঁজে পাওয়া যায়?

এ-সব বাজে ব্যাপার তাকে বন্ধ করতেই হবে চিরদিনের মতো। ঐ লাজুক-লাজুক ভাব, ন্যাকামি আর চোখ নিচু করা—সব বন্ধ করতে হবে—তা না-হ'লে সর্বনাশ হবে তার। এক ভয়ংকর সীমানার প্রান্তদেশে এটা। আর এক পা বাড়ালেই মহাশূন্যে গড়িয়ে পড়তে হবে। নাচের কথা আর কখনো চিন্তাও করবে না সে। ঐ নাচই তো সব মন্দের মূল। খুব জোরের সঙ্গে ফিরিয়ে দিতে হবে তাকে—ডান করবে যেন সে কখনো নাচতে শেখনি, কিংবা তার পা ভেঙে গেছে।

৫

সেই হেমন্তে মস্কোর রেলকর্মচারীদের মধ্যে দারুণ বিক্ষোভ শুরু হলো। মস্কো-কাজান লাইনের কর্মচারীরা ধর্মঘট করলো, মস্কো-ব্রেস্ট লাইনের লোকেরাও সম্ভবত তাদের সঙ্গে যোগ দেবার জন্য প্রস্তুত। ধর্মঘটের সিদ্ধান্ত তারা গ্রহণ করেছে, তবে ধর্মঘট-পরিষদের মধ্যে তারিখ নিয়ে তর্ক চলছে এখনো। রেলওয়ের লোকেরা সবাই জেনে গেছে যে ধর্মঘট হবে, শুধু একটা ছুতো পেলেই হয়।

অক্টোবরের শুরু; মেঘে ঢাকা হিম এক সকাল—আজ মাইনের তারিখ। অনেকক্ষণ অ্যাকাউন্টেন্টের সাদাশব্দ মিললো না; তারপর একটি ছেলে মাইনের হিশেব আর মাইনে থেকে কেটে নেবার জন্য স্তূপীকৃত জরিমানার খাতা নিয়ে আপিশে এলো। খাজাঞ্চি মাইনের বাণিলগ্নলো যার-যার হাতে দিয়ে দিতে শুরু করলো। অন্তহীন এক সারিতে দাঁড়িয়ে আছে গার্ড, সুইচম্যান, মিস্ত্রি, আর ফায়ারম্যান, আর ঝাড়ুলররা দাঁড়িয়ে আছে কাঠের তৈরি রেলের আপিশঘর আর কারখানা, গুদাম, এঞ্জিনের ছাউনি আর রেললাইন-ওলা ইন্সটেশনের মাঝখানকার পোড়ো জমিতে।

বাতাসে শীতের শুরুর আভাস। দলিত মেপ্ল পাতা, গ'লে-যাওয়া বরফ, এঞ্জিনের উষ্ণ ধোঁয়ায় কয়লার টুকরো আর এইমাত্র উনুন থেকে নামানো গরম যবের রুটির মিলিত গন্ধ ভাসছে বাতাসে (স্টেশনের খাবার দোকানের রোয়াকেই রুটি সেকা হয়)। ট্রেন আসে আর যায়, শাণ্ডিং হয়, নিশেনের ওড়া, না-ওড়া, গুটোনো আর খোলার সঙ্গে এক গাড়ি আরেক গাড়ির সঙ্গে যুক্ত অথবা বিচ্ছিন্ন হয়। এঞ্জিনের ডেপু গার্ডন ক'রে ওঠে, গার্ড আর স্টেশন-মাস্টারদের

হর্ন আর হুইসিল কম্পিত আর্তস্বর বের করে। অসুস্থহীন এক ধোয়ার সিঁড়ি আকাশে উঠে যায়, হুশ হুশ শব্দে এঞ্জিন তার ফুটন্ত বাষ্পের মেঘ ঝুঁড়ে-ঝুঁড়ে শীতের ঠাণ্ডা মেঘকে আঘাত করে।

বিভাগীয় পরিচালক ফুফ্লিগিন ও এই অঞ্চলের রেললাইন-পরিদর্শক পাতেল ফেরাপণ্ডিভিট আন্টিপভ পাকা সড়কের ধার ঘেঁষে পায়চারি করছিলেন। আন্টিপভ এতোক্ষণ কারখানাগুলোতে ঘুরছিলেন; লাইনের মোরামতের জন্য যে-সব বাড়তি অংশ আছে সেগুলো মজবুত কিনা দেখে নেবার জন্য মিস্ত্রিদের ওপর জোর-জবরদস্তি করছিলেন সে। ইম্পাতটা যথেষ্ট শক্ত নয় ব'লে রেল-লাইন অধিক ভার বহন করতে তো পারবেই না, এমনকি, আন্টিপভের ধারণা, শীত শুরু হ'লেই লাইনগুলি ফেটে যাবে। তাঁর অভিযোগে ব্যবস্থাপকেরা কান দিচ্ছেন না। বোঝা শক্ত নয়, ঠিকেদাররা প্রচুর টাকা করছে।

ফুফ্লিগিন পরেছে দামি ফারের বর্ডার-দেয়া কোট, রেল-ইউনিফর্মের চিহ্ন তার ওপর শেলাই ক'রে দেওয়া হয়েছে; বোতাম খোলা, ফাঁক দিয়ে তার নতুন অ-সামরিক সার্জেন স্যুট দেখা যাচ্ছে। লাইনের ধারে উঁচু পাড় দিয়ে সতর্ক পদক্ষেপ করতে-করতে প্রভূত তৃপ্তির সঙ্গে তাকাচ্ছে নিজের কোটের বুক, পাংলুনের কড়া ইট্রি আর ছিমছাম জুতো জোড়াটির দিকে। আন্টিপভের কথা তার এক কান দিয়ে ঢুকে অন্য কান দিয়ে বেরিয়ে যাচ্ছিলো। ফুফ্লিগিন নিজের ভাবনাতে মশগুল; ঘড়ি বের ক'রে ঘন-ঘন সময় দেখছিলেন; চ'লে যাবার জন্য ব্যস্ত সে।

‘ঠিক বলেছো হে, একেবারে ঠিক কথা’, অধীরভাবে ব'লে উঠলো সে। ‘কিন্তু এ-সব কথা ওঠে মেন-লাইন অথবা খুব বেশি গাড়ি যাতায়াত করে এমন লাইনের বেলায়। কিন্তু এখানে কী-ই বা আছে? একটা সাইডিং মাত্র, লাইন তো এখানেই শেষ হয়েছে, আছে শুধু ঝোপঝাড় বনবাদাড়। আর গাড়ি? গাড়ি বলতে তো খুব বেশি হ'লে পুরোনো শাণ্ডিং এঞ্জিন আসে খালি বগি বাছাই করবার জন্য। আর কী চাও তুমি? তোমার কি মাথা-খারাপ হয়েছে? ইম্পাত কী বলছো! কাঠের রেল হ'লেও দিবা চ'লে যাবে এখানে।’

ফুফ্লিগিন ঘড়ির দিকে তাকালো, ঝপ ক'রে ডালা বন্ধ ক'রে দিয়ে দূরে তাকিয়ে রইলো রেলপথের দিকে এগিয়ে-আসা রাস্তার দিকে। রাস্তার মোড়ে একটা গাড়ি দেখা যাচ্ছে। এইবার ফুফ্লিগিনের পালা এসে গেছে। তার স্ত্রী নিতে এসেছে তাকে। কোচোয়ান রেলওয়ের ঝাধানো সড়কের প্রায় ওপরে ঘোড়াগুলিকে টেনে নিয়ে এলো—তীক্ষ্ণ মেয়েলি গলায় তাদের সঙ্গে কথা বলছিলেন সে, দাইরা যেমন ভক্তিতে অবাধ্য বাচ্চাদের বকে। ট্রেন দেখে ঘোড়াগুলি ভয় পেয়েছে। গাড়ির এক কোনায় গদিতে হেলান দিয়ে নৈর্ব্যক্তিক ভক্তিতে একজন সুন্দরী মহিলা ব'সে আছেন।

‘আচ্ছা ভাই, আবার দেখা হবে’, এমন ভক্তিতে হাত নাড়লেন বিভাগীয় পরিচালকমশাই যেন বলতে চাইছেন, ‘এই তুচ্ছ রেল ছাড়াও আরো অনেক দরকারি বিষয়ে চিন্তা করতে হয় আমার।’ দম্পতি গাড়ি ছুটিয়ে চ'লে গেলেন।

৬

তিন-চার ঘণ্টা পরে, তখন প্রায় স'ঞ্জে হয়ে এসেছে, রেল-লাইনের একটু দূরের যে-মাঠটি এতোক্ষণ জনপ্রাণীহীন ছিলো, সেখান থেকে দুটি মানবদেহ যেন মাটি ফুঁড়ে উঠে দাঁড়ালো। তারপর পেছন ফিরে তাকাতে-তাকাতে ক্ষিপ্ত গতিতে হেঁটে চ'লে গেলো।

‘আর-একটু জোরে হাঁটা যাক’, টিভেরজিন বললে, ‘পুলিশ এসে পড়তে পারে ভেবে আমার ভাবনা হচ্ছে না, কিন্তু ভিত্তর দল যে শেষ হ'তে-না হ'তে মাটির তলা থেকে বেরিয়ে এসে আমাদের ধ'রে ফেলবে। ওদের অসহ্য লাগে আমার। এ-ভাবেই স্বর্গ ত্রোরা চলবি তাহ'লে কমিটি গঠন করার অথটা কী? —আগুন নিয়ে একবার খেলতে নামলে কি পালানো চলে? আর তুমিও বেশ লোক—ঐ দলেই তো লেগে আছো।’

‘আমার ডাবিয়াব টাইফাস হয়েছে। ওকে হাসপাতালে নিয়ে যেতে হবে। তাব আগে কোনো কাজেই মন দিতে পারছি না।’

‘আজ নাকি মাইনে দিচ্ছে শুনলাম। একবার আপিশটা ঘুরে যাই। আজকে মাইনের দিন, নয়তো ঈশ্বরের দিবা বলছি, তোমাদের সব-কটাকে দূর করে দিতাম—আব নিজের হাতে সব-কিছু শেষ করতাম আমি, এক মুহূর্তও অপেক্ষা করতাম না।’

‘কী ক’রে করতে, জিজ্ঞেস কবতে পারি কি?’

‘কিছুই না। বয়লার-ঘরে নেমে যেতাম, হুইসিলটা বাজাতাম—বাস, হ’য়ে গেলো।’

পরস্পরকে বিদায় জানিয়ে তারা দু’জনে দু’দিকে চ’লে গেলো।

বেল-লাইন ধ’রে টিভেরজিন শহবেব দিকে এগোলো। আপিশ থেকে টাকা নিয়ে ফিবছে সবাই—হাদের মধ্যে ঢুকে গেলো সে। অনেকেই ছিলো সেখানে। তাদের দেখেই সে বুঝতে পারলো যে অধিকাংশ কর্মচারীরা আজ মাইনে পেয়ে গেছে।

অঙ্ককার হ’য়ে আসছে, আপিশ-ঘরে আলো জ্বলছিলো। আপিশের বাইরের চাতালে অলস শ্রমিকদের জটলা। সেই চাতালে ঢোকার মুখেই দাঁড়িয়ে আছে ফুফ্রিগিনের গাড়ি, আর গাড়ির ভেতরে তাঁর স্ত্রী ব’সে আছেন—এখনো সেই একই ভঙ্গিতে, যেন সকাল থেকে একবারের জন্যও নড়েননি। স্বামী ভেতরে গেছেন টাকা আনতে, তাঁর জন্য অপেক্ষা করছেন।

বৃষ্টির সঙ্গে বরফের কুচি পড়তে শুরু করলো। কোচোয়ান বাস্স থেকে চামডার ঝাপটা টেনে দিলো গাড়ির উপর। সে যতক্ষণ গাড়ির পেছনে হেলান দিয়ে এক পা পাদানিতে রেখে চিকগুলোকে আটকে দেবার জন্য টানাটানি করছিলো, ততক্ষণ শ্রীমতী ফুফ্রিগিন ব’সে-ব’সে আপিশের আলোয় রূপোর ফোঁটার মতো চিকচিকে বরফের কুচি মুগ্ধ চোখে দেখছিলেন, তাঁর পলকহীন স্বপ্নালু দৃষ্টি শ্রমিকদের মাথার উপর দিয়ে চ’লে গিয়ে একটি স্থির বিন্দুতে স্তব্ধ হ’য়ে ছিলো—দেখে মনে হয় দরকার মতো তাঁর দৃষ্টি তাদের ভেদ ক’রে চ’লে যেতে পারে। তারাও যেন বরফের আস্তরণ বা কুয়াশা ছাড়া আর-কিছুই না।

তাঁর এই ভাব লক্ষ ক’রে টিভেরজিন অস্বস্তি বোধ করলেন। কোনোরকম সম্ভাষণ না-জানিয়ে সেখান থেকে চ’লে যেতে-যেতে সে ঠিক করলো পরে এসে মাইনে নেবে, নয়তো আপিশে এ ভদ্রমহিলার স্বামীর সঙ্গে দেখা হ’য়ে যাবে তার। সে চ’লে গেলো চাতালের অঙ্ককার অংশটায়, এঞ্জিন ঘোরাবার মাচার কালো আকারটার দিকে, যেখান থেকে গোল হ’য়ে বেরিয়ে রেল-লাইনগুলি ডিপোর দিকে চ’লে গেছে।

‘টিভেরজিন! কুপ্রিক!’ অঙ্ককার ভেদ ক’রে কয়েকটি গলা ডেকে উঠলো। কারখানার বাইরে অনেক লোক দাঁড়িয়ে আছে। ভেতরে কে যেন কাৎরাচ্ছে, একটা বাচ্চা কাঁদছে। ‘লক্ষ্মীটি, ভেতরে যাও—ছেলেটাকে একটু দ্যাখো।’ ভিড়ের মধ্যে থেকে একজন স্ত্রীলোক ব’লে উঠলো।

চিরাচরিতভাবে ফোরম্যান পিয়টর খুডলেয়েভ শিক্ষানবিশ ইউসুপকাকে ‘ধ’রে পেঁটাচ্ছিলো।

খুডলেয়েভ অবশ্য চিরকালই শিক্ষানবিশদের উপর এই অত্যাচার চালাতো না, এই রকম বেহেড মাতালও ছিলো না। এমন এক দিন গেছে যখন এক উৎসাহী ছোকরা-শ্রমিক চাকুরে হিসেবে সে মস্কোর শহরতলিগুলির বাণিজ্যক্ষেত্রে ব্যবসায়ী আর পুরোহিত-কন্যাদের মুগ্ধ দৃষ্টি আকর্ষণ করতো। কিন্তু মারফা—সে ডায়োসেশন কনভেন্ট স্কুল থেকে গ্র্যাজুয়েট হ’য়ে বেরিয়ে খুডলেয়েভকে উপেক্ষা ক’রে তারই সহকর্মী এঞ্জিনচালক, সাভেলী নিকিটিচকে বিয়ে ক’রে ফেললো। এই সাভেলীই টিভেরজিনের বাবা।

মাভেলী'র ভয়াবহ মৃত্যুর পাঁচ বছর পর (১৮৮৩ সালের রোমহর্ষক রেল-দুর্ঘটনায় পুড়ে মাঝা যায় সে) খুডলেয়েভ পুনর্বীর মারফার পাণিপ্রার্থী হ'য়ে প্রত্যাখ্যাত হ'লো। সুতরাং যে-পৃথিবী তার মতে তার সকল দুর্ভাগ্যের জন্য দায়ী সেখানে টিকে থাকার জন্য সে মাংল্যমি আব গুণামি'র আশ্রয় নিলো।

টিভেরজিনের সঙ্গে একই ফ্ল্যাট বাড়িতে থাকে। রেল-মুটে গিমাভেৎদিন^১, ইউসুপকা তারই ছেলে। টিভেরজিন এই ছেলেটিকে নিজের পক্ষপুটে আশ্রয় দিয়েছে, সেটাই হ'লো খুডলেয়েভের ওর প্রতি বিতৃষ্ণার অন্যতম কারণ।

'ঐ ভাবে উঠো ধরতে হয়, টারা ছোকবা?' ইউসুপকার ঘাড় আঁকড়ে ধ'রে চুল টানতে-টানতে সে গর্জন ক'রে ওঠে, 'ঐ ভাবে ছাঁচ বাব করছো। তুমি—টেরা-চোখে তাতাবের ছা?'

'আউ, আর কখনো কববো না গো, আউ, আর কখনো করবো না, আউ, আমার লাগছে যে গো।'

'এক কথা হাজার বাব বলতে হবে তোমাকে, না? প্রথমে মাভেলটা আটো করবি, তারপর চাকটা বসাবি, কিন্তু ও কি শোনার পাত্র? না, ঠিক নিজের মতো হাসিল ক'রে যাবে। আমার তকলিটা প্রায় ভেঙে দিয়েছিলো আরকি, বেজম্মা ভূত।'

'আমি তকলিটা ধরিনি বাব, সত্যি বলছি, আমি ধরিনি।'

'ওর পেছনে লেগেছো কেন? কনুই দিয়ে ভিড ঠেলতে-ঠেলতে টিভেরজিন এগিয়ে এলো।

'তা দিয়ে তো তোমার কোনো দরকার নেই,' খুডলেয়েভ দপ ক'রে উঠলো।

'আমি জিজ্ঞেস করছি তুমি ওর পেছনে লেগেছো কেন?'

'আর আমি ব'লে দিচ্ছি ঝামেলা বাধার আগেই সরে পড়ো তুমি, যতো সব সোশ্যালিস্টের দল—সব ব্যাপারে নাক গলানো চাই। ওকে খুন করলেও যথেষ্ট সাজা হয় না, কুস্তির বাচ্চা আমার তকলিটা প্রায় ভেঙেছিলো আরকি। টারাটা, শয়তানটা—এখনো যে ও বেঁচে আছে এই জন্য ভাগ্যকে ধন্যবাদ দিক। শুধু একটু কান ম'লে চুল টেনে আজ ছেড়ে দিলাম ব'লে।'

'ও, তুমি তাহ'লে মনে করো এই অপরাধের জন্য মাথা কাটা যাওয়া উচিত ছিলো ওর? খুডলেয়েভ, তোমার মতো পুরোনো ফোরম্যানের এ-রকম ব্যবহার কবতে লজ্জা পাওয়া উচিত। চুলই খালি পেকেছে তোমার, বুদ্ধি পাকেনি।'

'ভাগো। ভাগো এখান থেকে, এখনো আস্ত আছো, মানে-মানে কেটে পড়ো। মারের চোটে তোমার ওস্তাদি বের ক'রে দেবো—আমাকে উপদেশ দিতে এসেছো! কুস্তাব পাছা কাঁহাকার। তোর বাপের নাকের তলায় এই রেল-লাইনে তুই তৈরি হয়েছিলি জানিস, মেরুদণ্ডহীন জেলিমাছ কোথাকান তুই! জানি না তোর মাকে, বেশ্যা, কুঁচকোনো শায়ার তলায় ঘেয়ো বেড়ানি।'

তারপর ঘটনা এক মুহূর্তে শেষ হ'য়ে গেলো।

সামনেই লেদ-বেঞ্চের ওপর ভারি-ভারি যন্ত্র আর লোহার তাল প'ড়ে ছিলো; দুজনেই হাতের কাছে যেটো পেলো তুলে নিলে, ভিডের লোক তাদের মধ্যে প'ড়ে দুজনকে ছাড়িয়ে না দিলে পরস্পরকে খুন ক'রে ফেলতো তারা। খুডলেয়েভ আব টিভেরজিন দাঁড়িয়ে আছে মাথা নিচু ক'রে, এতো কাছাকাছি যে তাদের কপালে-কপালে প্রায় ঝুঁয়ে যাচ্ছে, ফ্যাকাশে মুখ, রক্ত-চক্ষু। রাগে তাদের গলা দিয়ে শব্দ বেরুচ্ছে না। শব্দ ক'রে ধ'রে রাখা হয়েছে তাদের, দু'জনের হাতই পেছন থেকে চেপে ধরা। বার দুই তারা সমস্ত শরীর ঝাঁকিয়ে হাত ছাড়াবার

^১ মুসলমান নাম গোমাল-এৎ-দিনের রুশ সংস্করণ (গিমাভেৎদিন একজন তাতার)।

চেষ্টা করেছে—সহকর্মীদের মধ্যে যারা ধঁরে রেখেছিলো তাদের হিচড়ে টেনে নিয়ে কাবু ক'রে ফেললেছে। ছিড়ে গেছে জামার হুক আর বোতাম—কোর্তা আর শাট খুলে গিয়ে কাঁধ বেরিয়ে পড়েছে দুজনকে। দুজনকে ঘিরে এক অসুস্থহীন কলরব।

‘ছেঁনি! ছেঁনিটা সরিয়ে নাও ওর হাতের কাছ থেকে, মাথাটা যে একেবারে ঠুড়িয়ে দেবে ওটা দিয়ে। ওহে বড়ো পিয়টার, খামো না তুমি, তোমার হাতটা যে ও ভেঙে দেবে তা না হ'লে। আর ওদের খামকা ঘিরে থাকার মানেটা কী? হিচড়ে টেনে নাও, তারপর দুজনকে তালা দিয়ে বন্ধ ক'রে বাখো—বাস সব ঠাণ্ডা হ'য়ে যাবে।’

হঠাৎ এক অমানুষিক প্রচেষ্টায় টিভেরজিন সবাইকে ঠেলে সরিয়ে নিজেকে ছাড়িয়ে নিলে, তারপর ছুটলো দরজার দিকে: পেছনে ছুটতে গিয়ে সবাই বুঝলো সে মংলব বদলেছে, তাই তাকে একাই ছেড়ে দিলো, সে বেরিয়ে গেলো, দড়াম ক'রে বন্ধ করলো দরজাটা, একবারও ঘুরে না-তাকিয়ে ইনহন ক'রে হাটতে শুরু করলো। অন্ধকার স্নাতসৈতে হেমন্তের রাত্রি লুফে নিলো তাকে। ‘ওদেব ভালো করতে গেলে ছুরি নিয়ে তাড়া করবে’। কোথায় চলেছে না-জেনে হাটতে হাটতে আপন মনে বিড়বিড় করলে সে।

মিথ্যায় আর প্রতারণায় নিমজ্জিত এই জগৎ, যেখানে অতিভোজনপুষ্ট এক মহিলা কুলি-মজুরদের ভিড় ভিড় ক'রে একদৃষ্টিতে তাকিয়ে থাকবার স্পর্ধা রাখেন, আর মদে বেইশ একটা জন্তু তাব নিজেরই জাতের অসহায় এক বালকের উপর অত্যাচার ক'রে আনন্দ পায়, সেই জগৎ টিভেরজিনের কাছে এমন ঘৃণ্য আর কখনো মনে হয়নি। জোরে পা চালালো সে, যেন তার দ্রুত গতি সেই সময়কেও এগিয়ে নিয়ে আসবে যখন পৃথিবীর বৃকে সমস্ত কিছুই তার এখনকার উত্তপ্ত মস্তিষ্কে অভ্যন্তরের মতোই যুক্তিযুক্ত আর সুসমঞ্জস রূপ নেবে। সে তো জানে, তাদের গত কয়েকদিনের প্রচেষ্টা—লাইনের গণ্ডগোল, সভাসমিতিতে বক্তৃতা, ধর্মঘটের সিদ্ধান্ত গ্রহণ সব পালন করা গা-হ'লেও কাজ বন্ধ হয়নি—এ সব-কিছুই তাদের সম্মুখবর্তী মহৎ পথে পৌছবার জন্য ছোট-ছোটো আলাদা-আলাদা ধাপ।

কিন্তু এই মুহূর্তে সে এতো উত্তেজিত যে ছুটতে ইচ্ছে করছে তার—দমটুকু নেবারও সবার সহিছে না। সে সচেতনভাবে বুঝে দ্যাখেনি লম্বা-লম্বা পা ফেলে কোথায় চলেছে, কিন্তু তার পা দুটি ভালোই জানে কোথায় তাকে নিয়ে যেতে হবে।

এ-কথা জানতে টিভেরজিনের অনেক দেরি হ'য়ে গেলো যে সে আন্টিপভের মাটির তলার ঘর থেকে বেরিয়ে আসার পর সেই বাত্রে ধর্মঘট শুরু করার সিদ্ধান্ত গ্রহণ করা হয়েছিলো। কাকে কোথায় যেতে হবে, আর কাকে কাকে ডাকা হবে, তখন-তখনই স্থির করা হ'য়ে গেছে।

একজন সারাবার কাবখানায় গিয়ে বাশি বাজালো টিভেরজিন, সে-বাশির কর্কশ ধ্বনি ভেঙে পড়লো যেন তার হৃদয়ের তলদেশ থেকে উথিত হ'য়ে; কিছুক্ষণ পরে বাশির শব্দ স্বাভাবিকতায় নেমে এলো। দলে-দলে লোক ইতিমধ্যেই ডিপো আর মালের উঠোন থেকে বেরিয়ে আসছে। টিভেরজিনের সিগনালে হাতের যন্ত্র নামিয়ে রেখে বয়লার-ঘরে কর্মচারীরা একটু পরেই এসে যুক্ত হ'লো তাদের সঙ্গে।

বহু বছর ধ'রে টিভেরজিন ভেবেছে যে সেই রাত্রে সে-ই রেলের সব কাজ, আর লাইনে গাড়ির যাতায়াত বন্ধ ক'রে দিয়েছিলো। সত্যটা সে জেনেছিলো অনেক পরে, যখন মামলার শুনারিতে সে অভিযুক্ত হয়েছিলো উদ্যোক্তা ব'লে নয়, শুধু ধর্মঘটের একজন সাহায্যকারী হিসেবে। ছুটে-ছুটে বেরিয়ে আসছে লোকজন, প্রশ্ন করছে: ‘কোথায় যাচ্ছে সবাই? ছইসিল বাজলো কেন?’ —‘আপনি তো কালা নন, মশাই’, অন্ধকারের মধ্যে থেকে কথা ভেসে আসে। ‘আগুন লেগেছে। অ্যালার্ম বাজানো হচ্ছে। আগুন নেবাতে যেতে হবে আমাদের।’ —‘কোথায় আগুন?’ —‘নিশ্চয় আছে কোথাও, তা না-হ'লে অ্যালার্ম বাজানো হ'তো না।’

দড়াম-দড়াম ক'রে খুলে যেতে লাগলো সব কপাট, আরো লোক বেরিয়ে আসছে। অন্য অনেক গলার দর শোনা গেলো— 'আগুন না ছাই। মুখ্য ছোড়াটার কথা শোনো একবার। আরে এ হ'লো ধর্মঘট, ধর্মঘট। ভাই সব, হাতের যন্ত্র নামিয়ে বাখো। ওদের নোংরা কাজ চালাবার জন্য অন্য সব বোকাদের খুঁজে আনুক না ওরা! যাও, সব বাড়ি চ'লে যাও, ছেলেরা।'

আরো লোক এসে ভিড়ের সঙ্গে জুটে গেলো, আরো। ধর্মঘট করলো রেলের কর্মচারীরা।

৭

দুদিন পরে বাড়ি ফিরলো টিভেরজিন, ঘুমের অভাবে ক্লান্ত, হাড় পর্যন্ত জ'মে গেছে শীতে। গত রাত থেকে হঠাৎ নিতান্ত অসময়ে হিম পড়া শুরু হয়েছে, টিভেরজিনের পবনে শীতের পোশাক কিছুই ছিলো না। সেই রেল-মুটে গিমাজেৎদিনের সঙ্গে দরজার মুখে দেখা হ'লো তার।

'অনেক ধন্যবাদ, কর্তা—' ভাঙা-ভাঙা রুশ ভাষায় সে বললে, 'আপনার জন্যই ইউসুপকা বৈচে গেলো। আপনার মঙ্গলের জন্য আমি সর্বদা প্রার্থনা করবো।'

'মাথা-খরাপ হয়েছে নাকি তোমার, গিমাজেৎদিন, কর্তা বলছো কাকে? ও-সব ছাড়ো, দোহাই তোমার, যা বলবার তাড়াতাড়ি ব'লে ফেলো, দেখছো কী গাণ্ডা।'

'আপনি কেন ঠাণ্ডায় কষ্ট পাবেন, কুপ্রিয়ান সাভেলিচ? আপনি এখনি গরম হ'য়ে যাবেন। আমি আর আপনার মা—মার্যা গাব্রিলোভনা—দুজনে গতকাল মালের স্টেশন থেকে এক শেড ভর্তি কাঠ নিয়ে এসেছি—সব বাঁচ গাছের ডাল—ভালো, শুকনো কাঠ।'

'ধন্যবাদ, গিমাজেৎদিন। আর-কিছু বলবার থাকলে চটপট ব'লে ফেলো। এদিকে যে জ'মে যাচ্ছি একেবারে।'

'রাতটা যাতে বাড়িতে না কাটান—সেই কথা বলতে চেয়েছিলাম আরকি। গা ঢাকা দিতেই হবে আপনাকে। পুলিশ এসেছিলো, জিজ্ঞেস করলো, কে কে আসে এখানে—না তো, কেউ আসে না তো—আমি বললাম, কেবল ডিউটি বদলির লোক আসে, আমি বললাম, শুধু রেলের লোকেরাই আসে কিন্তু বাইরের কেউ আসে না, আমি বললাম, দিবা গেলো বললাম সে-কথা।'

টিভেরজিন বিয়ে করেনি, মা আর বিবাহিত ছোটো ভাইয়ের সঙ্গে থাকে। পাশের হোলি ট্রিনিটি গির্জের সম্পত্তি তাদের বাড়িটা। ভাড়াটেকার মধ্যে জনকয়েক পুরোহিত আছেন, আর আছে রাস্তার ফেরিওলাদের দুটি আটেলি—একটি কসাইদের, অন্যটি সজ্জি-বিক্রেতাদের। এ ছাড়া বেশির ভাগই মস্কো-ব্রেস্ট রেল-আপিশের ছোটোখাটো কেরানি।

পাথরের তৈরি চকমিলানো বাড়ি, মাঝখানে নোংরা আ-বাঁধানো এক উঠোন। ঢাকা কাঠের সিঁড়ি উঠানের দিকে মুখ ক'রে বাইরের দেয়াল বেয়ে উঠে গেছে; নোংরা, পিছল ধাপগুলিতে বেড়ালের আর টক-দিয়ে-রাঁধা বাধাকপির গন্ধ; সিঁড়ির চত্বরে পায়খানা আর তালা-বন্ধ ভাঁড়ার।

জাপানের সঙ্গে যুদ্ধের সময়ে টিভেরজিনের ভাইকে সেপাই ক'রে ধ'রে নিয়ে গিয়েছিলো, আহত অবস্থায় সে এখন আছে ক্রাসনোইয়ারসকে সামরিক হাসপাতালে; দুই মেয়ে নিয়ে তার স্ত্রী তাকে দেখতে গেছে—বাড়িতে নিয়ে আসবে স্বামীকে (বংশানুক্রমে রেলের কর্মচারী টিভেরজিনেরা সমস্ত রাশিয়া বিনা ভাড়াই ভ্রমণের সুযোগ পায়)। তাদের ফ্যাটিটি এখন চুপচাপ আর ফাঁকা, কেবল টিভেরজিন আছে, আর তার মা।

তারা থাকে ভেতলায়। দরজার বাইরে সিঁড়ির চত্বরে একটা পিপে থাকে, ভিস্তিওলা মালি নিয়মিত এসে জল দিয়ে যায়। উপরে এসে টিভেরজিন লক্ষ করল পিপের ডালাটা খোলা,

টিনের মগটা জ'মে-যাওয়া জলের গায়ে আটকে আছে। 'প্রভ এসেছিল নিশ্চয়ই,' ভেবে সে হাসলো, 'কেমন জল খায় লোকটা, পেটের নাড়িভুড়িতে আগুন জ্বলে ওব।' প্রভ মানে প্রভ আফানাসিয়েভিচ সকলভ, গির্জের স্তোত্রপাঠক, টিভেরজিনেব মায়েব এক আত্মীয়।

বরফের মধ্য থেকে ঝাঁকুনি দিয়ে মগটা বের ক'রে নিলো টিভেরজিন, তাবপর দবজায় ঘৃষ্টি বাজালো। বামার সৌরভের সঙ্গে একটি উষ্ণ ঘরোয়া গন্ধের ডেউ অভ্যর্থনা জানালো তাকে।

কী, মা, আগুন জ্বালিয়েছো তো, আঃ, বেশ লাগছে, কী গরম এখানে।'

ছেলেকে জাপটে ধ'রে তার গলা জড়িয়ে কান্নায় ভেঙে পড়লেন মা। মার মাথায় হাত বোলালো টিভেরজিন, আর, একটু পরে আস্তে সবিয়ে দিলো তাকে।

'কষ্ট না-করলে কেউ মেনে না, মা,' নরম গলায় সে বললে, 'মস্কো থেকে ওয়ারস পর্যন্ত ট্রেন বন্ধ।'

'জানি—সেইজন্মেই তো কাঁদছি। কুপ্রিন্স্কা, তোর পেছনে ওরা ঘুরবে যে। এখান থেকে পালাতে হবে তোকে।'

'তোমার চমৎকার প্রেমিকটি তো এদিকে আমার মাথা গুড়িয়ে দিয়েছিলো প্রায়,' মাকে হাসাবাব চেষ্টা করলো টিভেরজিন, কিন্তু মা গম্ভীরভাবে জবাব দিলেন, 'ওকে নিয়ে হাসিস না, কুপ্রিন্স্কা, তাতে তোর পাপ হবে। ওব জন্য কষ্ট হয় না তোর—বেচারি বড়ো দুর্ভাগা।'

আন্টিপভকে গ্রেপ্তার করেছে। রাএ এসে সব-কিছু ওলোটাপালট ক'রে ওর ঘর তল্লাস করেছে: সকালে ধ'রে নিয়ে গেলো। এদিকে ডাবিয়া আবার হাসপাতালে, টাইফস হয়েছে। আন ওদের বাচ্চাটি, পাশা—সেকেণ্ডারি স্কুলে পড়ে—কাল পিসির সঙ্গে সারা বাড়িতে একা সে। ওদের ও তাড়িয়ে দেবে। আমি ভাবছিলাম বাচ্চাটা আমাদের সঙ্গে এসে থাকলে কেমন হয়—প্রভ কী বলে?'

'কী ক'রে জানলি ও এসেছিলো?'

'জলের পিপের মুখটা খোলা প'ড়ে ছিলো, মগটা বরফের উপর দাঁড় করানো—দেখেই মনে-মনে বললাম, প্রভ জল খেয়েছে—তাই এই অবস্থা।'

'তোর বুদ্ধি তো খুব, কুপ্রিন্স্কা। হ্যাঁ—সে এসেছিলো। প্রভ—প্রভ আফানাসিয়েভিচ। এসেছিলো জ্বালানি কাঠ ধার করতে—দিলাম কিছু। কিন্তু কী যে সব বলাছি বোকার মতো। প্রভ যে-খবর এনেছিলো সেটাই বলতে ভুলে গিয়েছিলাম এতোক্ষণ। ভাবতে পারিস, কুপ্রিন্স্কা! জার স্বয়ং এক ইস্তাহারে নাম সই করেছেন—সব-কিছু ওলোটাপালোট হ'য়ে যাবে। সকলে উচিত ব্যবহার পাবে, চাষারা জমি পাবে, আর আমবা সবাই ভদ্রলোকদের সঙ্গে সমান-সমান হ'য়ে যাবো। সত্যিই নাকি সই করা হ'য়ে গেছে, এখন শুধু প্রচার করা বাকি। ধর্মসংসদ থেকে গির্জাতে খবর এসেছে উপাসনার সময় জারকে যেন ধন্যবাদ দেয়া হয়, না কি তাঁর জন্য প্রার্থনা করতে—কী যেন বলেছিলো আমাকে, ভুলে গেছি।'

৮

পাশা আন্টিপভ, যার বাবা ধর্মঘটের একজন উদ্যোক্তা হিশেবে হাজতে গেছে, টিভেরজিনদের সঙ্গে থাকতে এলো। ভারি পরিষ্কার পরিচ্ছন্ন ছেলেটি, কাটা নাক-চোখ, লাল চুলের মাঝখান দিয়ে সিঁথি কাটা; সর্বদাই সে হয় বুরুশ দিয়ে চুল পাট করছে, জামা টান ক'রে রাখছে, নয়তো স্কুলের বকলশ আটকে রাখছে বেপ্টে। খুব রসিক, আর অসাধারণ তার লক্ষ করবার ক্ষমতা। যা দেখতো এবং শুনতো তা সে এমন অদ্ভুতভাবে নকল করতো যে হাসির চোটে নিজের সঙ্গে-সঙ্গে অন্যকেও মতিয়ে রাখতো।

১৭ ই অক্টোবর ইস্তাহার বেরুবার পর এক বিরাট মিছিল বেরুলো; ৭ভের দরওয়াজা থেকে রওনা হ'য়ে মস্কোর অপর প্রান্তে কালুগা-দরওয়াজা পর্যন্ত যাবে সেই মিছিল। কিন্তু অধিক সমাদর্শিতো গাজন নষ্ট—একথা নিতান্তই সত্য। কয়েকটি বিদ্রোহী দল পরামর্শ ক'রে ঠিক করেছিলো এটা, তারপর ঋগড়া-ঝাঁটি ক'রে ব্যাপারটা সেখানেই চুকিয়ে দিয়েছে। কিন্তু ৩৫সপ্তেও নির্দিষ্ট দিনে যখন লোকজন বেরিয়ে আসতে লাগলো, তাড়াহুড়া ক'রে কোনোমতে যে যার প্রতিনিধি পাঠিয়ে দিলে শোভাযাত্রায় অধিনায়কত্ব করার জন্য।

টিভেরজিনেব অনেক বারণ সত্ত্বেও তার মা মিছিলে যোগ দিতে গেলেন, আর পাশা, সদা-প্রফুল্ল আব সাহায্য করার জন্য চির-উৎসুক পাশা—সেও গেলো তাঁর সঙ্গে।

ফোঁটা-ফোঁটা বরফ-পড়া শুকনো নভেম্বরের দিন, শুষ্ক, যেন সিসের পাতে মোড়া আকাশ, একের পর এক বরফের কুচি খ'সে খ'সে পড়ছে। ছাউরঙের ফোলা ধুলোর মতো হ'য়ে তারা পাক খেয়ে-খেয়ে মাটিতে পড়তে লাগলো।

রাস্তায় জনতা বন্য়ার মতো ভেসে আসছে—মুখ, মুখ, মুখ, তুলো-ভরা শীতের কামিজ আর ভেড়ার চামড়ার টুপি, পুরুষ আর স্ত্রীলোক, ছাত্র, বৃদ্ধ, শিশু, ইউনিফর্ম-পরা রেলওয়ের লোক, হাঁটু-পর্যন্ত ঢাকা জুতো আর চামড়ার জামা গায়ে ট্রাম-ডিপো ও টেলিফোন এক্সচেঞ্জের কর্মচারী, মেয়েরা, আর স্কুলের ছেলের দল।

প্রথমে কিছুক্ষণ লা মার্সাই, 'ওয়ারস' আর 'শহীদ হ'য়ে করলে বরণ মৃত্যু' গাইলে সবাই। মিছিলের মাথায় পেছন ফিরে হাঁটছিলো একজন, হাতের টুপিটা বেটনের মতো ধ'রে তাল বোঝাচ্ছে আর গান গাইছে সে, এবারে মাথায় টুপি প'রে নিয়ে ফিরে দাঁড়িয়ে অন্য নেতাদের কথা শুনতে লাগলো। গোলমালের মধ্যে গান থেমে গেলো। জ'মে-যাওয়া পথে এখন তবু অগণিত পদশব্দ শোনা যাচ্ছে।

সমর্থকদের কাছ থেকে খবর পেয়েছেন যে কসাকরা^১ গা-ঢাকা দিয়ে আছে, মিছিল আরো কিছু দূর গেলেই ঝাঁপিয়ে পড়বে। এই অঞ্চলের এক রাসায়নিকের কাছে ফোন ক'রে তাই তাদের সতর্ক ক'রে দেয়া হয়েছে।

'কী হয়েছে তাতে?' দলের মাতব্বরেরা বললেন, 'আমাদের উত্তেজিত হ'লে চলবে না, মাথা ঠাণ্ডা রাখতে হবে—সেটাই হ'লো আসল কথা। পথে যে-কোনো একটা সরকারি বাড়িতে ঢুকে পড়তে হবে আমাদের, সবাইকে সাবধান ক'রে দিয়ে ছড়িয়ে পড়বো।'

তখন তর্ক শুরু হ'লো কোন বাড়িতে ঢোকা উচিত হবে তাই নিয়ে। কেউ বললে দোকানি-সজ্জের আপিস, কেউ বললে হাতের কাজের স্কুল-বাড়িতে, আর কেউ-কেউ আবার বৈদেশিক বাণিজ্য-বার্তা শিক্ষালয়ের নাম করলে।

তর্ক করতে-করতেই একটা স্কুল-বাড়ির উচ্চ দালানের কোনায় পৌঁছে গেলো তারা; তারা যা-যা সুবিধে চায় সবই জুটবে এই সুবহুং দালানে।

ঢোকবার দরজার কাছাকাছি পৌঁছেই নেতারা এক পাশে স'রে গিয়ে সিঁড়ি বেয়ে অর্ধচন্দ্রাকৃতি ঢাকা বারান্দায় উঠে দাঁড়ালেন; মিছিলের মাথায় যে ছিলো তাকে ইঙ্গিত করলেন আর যাতে না এগোয়, কিন্তু তাঁদের ইঙ্গিতের ভুল মানে বুঝলো সবাই। খুলে গেলো একাধিক দরজা, আর কোটে-কোটে টুপিতে-টুপিতে ঠেসাঠেসি ক'রে লোক ঘরের ভেতর ঢুকতে লাগলো, সিঁড়ি বেয়ে উঠে গেলো ওপরে।

'লোকচার-হলে চলো, লোকচার-হলে,' ভিড়ের পেছন থেকে কয়েকটি গলা চৈঁচিয়ে উঠলো,

^১ এই ধরনের কাজ যারা করে তারা আসলে অশ্বারোহী সৈন্য, কসাক নয়, কিন্তু অশিক্ষিত লোকেরা যে-কোনো খোড়সওয়ারকেই কসাক বলতো।

কিন্তু অন্য সবাই এগিয়েই চললো—বারান্দা আর ক্লাশ-ঘরে ছড়িয়ে-ছিটিয়ে। অবশেষে এক সময় নেতারা কোনোমতে সবাইকে জমায়েৎ করতে পারলেন লেকচার হলে, অতর্কিত আক্রমণের জন্য ফাঁদ পাতা হয়েছে এই ব'লে সাবধান ক'রে দেবার চেষ্টা করলেন কয়েকবার, কেউ শুনলো না। হঠাৎ থেমে প'ড়ে একটা বাড়িতে ঢুকে প'ড়ে তখন-তখনই এক সভা আহ্বান করার ইচ্ছে জেগেছে তাদের, আর সত্যিই সভা শুরু হ'তে খুব বেশি দেরিও হ'লো না।

এতক্ষণ ধ'রে হেঁটে আর গান গেয়ে সবাই কিছুক্ষণের জন্য চুপচাপ ব'সে থাকতে হবে ভেবে খুশিই হ'লো—অন্যেরা এবার কিছু করুক তাদের হ'য়ে, চেষ্টায়ে গলা ফাটাক। বক্তারা, প্রায় সকল বিষয়েই একমত তাঁরা, সবাই যেন এক কথাই বললেন মনে হ'লো: বক্তব্যের কোনো তফাৎ যদি থেকেও থাকে, বসতে পারার, একটু বিশ্রাম পাওয়ার, স্বস্তিতে কেউ তা লক্ষ করলো না। নিকট বক্তাটি সর্বশেষে বললেন, এবং সবচেয়ে বেশি উৎসাহে ভরা অভ্যর্থনা লাভ করলেন শ্রোতাদের কাছ থেকে। তিনি কী বলছেন তা বোঝবার চেষ্টা করলো না কেউ, শুধু প্রতি শব্দের শেষেই চীৎকার ক'রে সম্মতি জানাতে লাগলো, এই ভাবে বাধা দেয়াতে কেউ কিছু মনে করলো না, আর প্রত্যেকেই কেবলমাত্র ধৈর্য হারিয়ে বক্তাটির সঙ্গে সর্ব বিষয়ে একমত হ'য়ে গেলো। 'ছি-ছি' রব উঠলো মাঝে-মাঝে; প্রতিবাদ জানিয়ে টেলিগ্রামের খসড়া প্রস্তুত হ'লো; তারপর এক সময়, বক্তার একঘেয়ে গলার শব্দে ক্লান্ত হ'য়ে একযোগে উঠে দাঁড়ালো যেন একটিমাত্র মানুষ, তারপর তাঁকে সম্পূর্ণ বিস্মৃত হ'য়ে দলে-দলে বেরিয়ে গেলো—গায়ে গা ঠেকিয়ে—নামলো সিঁড়ি বেয়ে, তারপর বাইরে রাস্তায়। মিছিল আবার এগিয়ে চললো।

ভেতরে যখন সভা হচ্ছে বাইরে তখন বরফ পড়তে শুরু করেছে। রাস্তা এখন শাদা। বরফের আস্তরণ ক্রমেই পুরু হচ্ছে।

ঘোড়সওয়ারেরা যখন গুলি ছুঁড়লো, মিছিলের শেষে যারা ছিলো তারা অনেকেই প্রথমটায় কিছু বুঝতে পারেনি। কলরোরের এক ঢেউ গড়িয়ে গেলো তাদের দিকে, বিপুল ভিড় যেন 'হরে!' ব'লে চেষ্টায়ে উঠলো, কাদের আর্তস্বর উঠলো, 'বাঁচাও!' 'মেরে ফেললো!'—ডুবে গেলো তুমুল সেই কোলাহলে। আর সঙ্গে-সঙ্গেই যেন শব্দের সেই ঢেউয়ে ভেসে এগিয়ে এলো সৈন্যদল, ভিড় দু'ভাগ হ'য়ে সরু রাস্তা তৈরি ক'রে দিলে তাদের, সেখানে দেখা গেলো তাদের মাথা, ঘোড়ার অগ্রভাগ, আর ভিড়ের ওপর নিঃশব্দ ও দ্রুত তরবারির সম্মালন।

সৈন্যদের অর্ধেক অংশ ভিড়ের মধ্যে ঢুকে পড়লো, ঘুরে দাঁড়িয়ে জনতাকে ঘিরে ফেললো, মিছিলের পেছন দিকটা ভেঙে দিলো, হত্যাকাণ্ড শুরু হয়েছে।

কয়েক মিনিটের মধ্যেই ফাঁকা হ'য়ে গেলো রাস্তা। অলিতে-গলিতে ছড়িয়ে-ছিটিয়ে পড়লো সবাই। বরফের চাপ একটু কমেছে। শুকনো সন্ধ্যাটাকে কেউ যেন কাঠকয়লার টুকরো দিয়ে ঐকে রেখেছে। বাড়িগুলির পেছন দিয়ে ডুবে যেতে-যেতে সূর্য তার আঙুল বাড়িয়ে রাস্তার সব লাল রং কুড়িয়ে নিলে—ঘোড়সওয়ারদের টুপি লাল ডগা, মাটিতে লুটিয়ে-থাকা একটি লাল পতাকা, আর বরফের উপর সূতোর মতো লম্বা রক্তের রেখা, লাল-লাল ফোঁটায়।

ফাঁটা মাথা নিয়ে গোঙাতে-গোঙাতে একটি লোক হামাগুড়ি দিয়ে ফুটপাথের ধারে এগিয়ে আসছিলো। জনতাকে তাড়া করতে-করতে রাস্তার সুদূর প্রান্তে যারা চ'লে গিয়েছিলো সেইসব অস্বাভাবিক দীর্ঘ গতিতে এদিকে চ'লে আসছে। প্রায় তাদের ঘোড়ার পায়ের তলায় পড়লো টিভেরজিনা,^১ মাথার পেছনে লেপটে আছে তার গায়ের শাল, এদিক থেকে ওদিকে ছুটতে-ছুটতে উন্মত্তের মতো আর্তস্বরে চীৎকার করছে: 'পাশা! পাশা!'

পাশা সারাক্ষণ তার সঙ্গে-সঙ্গেই ছিলো, সভার শেষ বক্তাকে নকল ক'রে তাকে কতো

হাসিয়েছে, কিন্তু ঘোড়সওয়ারদের আক্রমণের সময় গণ্ডগোলের মধ্যে হঠাৎ কোথায় মিলিয়ে গেলো।

একজন ঘোড়সওয়ারের চাবুকের বাড়ি এসে টিভেরজিনার পিঠে পড়েছিলো, পুরু জামার আবরণ ভেদ ক'রে সেই কশাঘাত তার শরীরে গিয়ে লাগেনি অবশ্য, তবু টিভেরজিনা ঘোড়সওয়ারের পিঠ লক্ষ্য ক'রে ঘুবি পাকালো, গাল পাড়লো—অত্যন্ত রাগ হ'লো তার যে তার মতো এক বৃদ্ধার গায়ে আঘাত করতে সাহস পায় ওরা—আর তাও প্রকাশ্যে—সকলের চোখের সামনে।^১

উদ্বিগ্ন হ'য়ে এধার-ওধার খুঁজতে-খুঁজতে অবশেষে ভাগ্যক্রমে রাস্তার উল্টো দিকে পাশাকে দেখতে পেলো। একটা পাথরের বাড়ির গাড়ি-বারান্দা আর এক মুদি-দোকানের মধ্যবর্তী ফাঁকা জায়গাটুকতে পাশা দাঁড়িয়ে ছিলো। একদল পথচারী সেখানে ন যথৌ ন তস্থৌ অবস্থায় স্তব্ধ হ'য়ে আছে। একজন ঘোড়সওয়ার উঠে গেছে একেবারে ফুটপাথের ওপর। তাদের ভয় দেখে মজা পেয়ে অশ্চালনার নানান কায়দা দেখাচ্ছে সে, ভিড় ঠেলে-ঠেলে পেছনে হ'টে চলে যাচ্ছে তার ঘোড়া, কখনো বা গোল হ'য়ে পাক খেয়ে ধীরে-ধীরে শূন্য দুই পা তুলে সার্কাসের ঘোড়ার মতো দাঁড়িয়ে পড়ছে। হঠাৎ ঘোড়সওয়ারের খেয়াল হ'লো তার সঙ্গীরা সবাই ফিরে যাচ্ছে, দ্রুত গতিতে ঘুরে দাঁড়িয়ে সে কয়েক লাফে ওদের ধ'রে ফেললে।

ভিড় ভেঙে গেলো, আর পাশা ছুটে এলো বৃদ্ধার কাছে, এতো ভয় পেয়েছে যে গলা দিয়ে আওয়াজ বের করতে পারছে না।

বাড়ি ফেরার পথে টিভেরজিনা সারাক্ষণ গজগজ করলো। 'নোংরা খুনের দল! জার আমাদের স্বাধীনতা দিয়েছেন, আমরা সুখী হয়েছি—বদ খুনেগুলোর তা সইছে না। ওরা শুধু চায় সব ভণ্ডুল করতে, সব কথার মানে বদলে দেবে ওরা।'

ঘোড়সওয়ারদের ওপর সাংঘাতিক চটেছিলো সে, সমস্ত পৃথিবীর ওপরই চটেছিলো, সেই মুহূর্তে এমন কি নিজের ছেলের ওপরেও। মেজাজ খারাপ হ'লেই তার কেবল মনে হ'তে থাকে যে কুপ্রিয়াকার—তার ভাষায়—'অকেজো অকর্মণ্য দলটিই' সব নষ্টের গোড়া।

'কী চায় ওরা, ঐ হাবারা? কালসাপগুলো, কুকর্ম পেলে নিজেকেই ক'থা ভুলে যায়। ঐ যে ঐ বাকাবাগীশটার মতোই—পাশা, বাবা, আর-একবার দেখা তো কী ভাবে ওটা বজ্রতা করেছিলো, দেখা, সোনা আমার। ওঃ, হাসতে-হাসতে পেট যে ফেটে যাচ্ছে। একেবারে হবহ নকল করেছিস।'

বাড়ি ফিরেই সে ছেলেকে বকতে শুরু করলে। ঝাঁকড়া মাথার একটা ভূত ঘোড়ার পিঠে ব'সে-ব'সে তাকে চাবুক মারতে পারে এমন বয়স কি সে পার-হ'য়ে আসেনি?

'সত্যি মা, তুমি আমাকে কী পেয়েছো বলো তো? তোমার কথা শুনে মনে হচ্ছে আমিই সেই কসাক কাপ্তান নয়তো পুলিশের বড়ো কর্তা।'

৯

জানলা দিয়ে বাইরে তাকিয়ে 'নিকোলে নিকোলেভিচ ছত্রভঙ্গ আন্দোলনকারীদের দেখতে পেলেন। তারা কারা, তা চিনতে দেরি হ'লো না তাঁর, ইউরোপ এদের মধ্যে আছে কিনা দেখবার জন্য ভালো ক'রে তাকালেন। কিন্তু তাঁর বন্ধুবান্ধবদের মধ্যে কেউই ছিলো না, যদিও

^১ Safe Conduct—আত্মরক্ষার পত্র। এই বইটিতে লেখক এই রকম ঘটনার কথা বলেছেন। ১৯০৫ সালে এই আন্দোলনে যোগ দিয়ে তিনি ঠিক এইভাবে চাবুকের বাড়ি খেয়েছিলেন।

ডুডোরভের ছেলেকে যেন একবার দেখলেন মনে হ'লো—নামটা ঠিক মনে পড়ছিলো না—মাথা-পাগলা ছেলোটো, এই তো ক'দিন আগেই ওর কাধ থেকে বন্দকের গুলি বার করা হ'লো, আবার ফিরে এসেছে, আর এসেই যেখানে-যেখানে ওর কোনো কাজ থাকার কথা নয়, ঠিক সেখানে-সেখানে ঘোরাঘুরি শুরু করেছে।

নিকোলে নিকোলেভিচ সম্প্রতি পিটার্সবার্গ থেকে এসেছেন। মস্কোতে কোনো ফ্লাট নেই ওর আর হোটেল থাকতেও অনিচ্ছা—সুতরাং দূর সম্পর্কের আত্মীয় সভেন্টিটিস্কদের কাছে উঠেছেন। দেড়তলায় কোনার দিকে একটি ঘর তাঁকে ছেড়ে দিয়েছেন ওঁরা।

সভেন্টিটিস্ক নিঃসন্তান; তাঁর পরলোকগত পিতা প্রায় প্রাগৈতিহাসিক আমলে কুমার-বাহাদুর ডলগোরুকির এই দোতলা বাড়িটি ভাড়া নিয়েছিলেন, বাড়িটি তাঁদের পক্ষে খুবই বড়ো। সরু-সরু অলিগলি দিয়ে ঘেরা তিন-দিক খোলা জমির ওপর তিনটি উঠোন ও একটি বাগানকে ঘিরে অপরিচ্ছন্ন, গায়ে-গায়ে-ঘেঁষা বিভিন্ন ঢঙের কতোগুলি বাড়ি ডলগোরুকিদের সম্পত্তির অংশে পড়ে। এই বাড়িটি তাবই একটি। নামটি সেই আদিকালের—মুচনয় গরোডক।^১

চারটি জানলা সন্দেশ পড়ার ঘরটি অন্ধকার। সারা ঘরে বই, কাগজ, ছবি আর কস্মলের স্তুপ। বাড়ির কোণের দিকে, এই ঘরের সামনে অর্ধচন্দ্রাকৃতি একটি বারান্দা। শীতের জন্য বারান্দার কাচের কপাটগুলি বন্ধ।

দরজাগুলি আর দুটি জানলার মুখ এক সরু গলির দিকে। ভাঙাচোরা ছোটো-ছোটো বাড়ি, বেড়া, আর স্নেজগাড়ির চাকার দাগ বুকে নিয়ে রাস্তাটি বহুদূর চ'লে গেছে।

বাগানের বেগনি আভা ঘরে এসে পড়ে। কড়া হিমে আচ্ছন্ন গাছগুলির ডালপালা যেন ধোয়াটে মোমের ঝাড়: এমনভাবে উঁকি দেয় যে মনে হয় ওরা পড়ার ঘরে মেঝের ওপর বোঝা নামিয়ে বিশ্রাম করতে চাইছে।

দূরের দিকে তাকিয়ে দাঁড়িয়ে রইলেন নিকোলে নিকোলেভিচ। পিটার্সবার্গে গত শীতের কথা মনে পড়ছিলো—গাপোন,^২ গোর্কি, দ্বিটের^৩ সঙ্গে দেখা, আধুনিক, কেতাদুরস্ত লেখকেরা। সেই পাগলা-গারদ থেকে প্রাচীন রাজধানীর শান্তি ও নীরবতায় পালিয়ে তিনি তাঁর বইটি লিখে ফেলতে চেয়েছিলেন, কিন্তু লাভ হ'লো না কিছু—প্রতিদিন বক্তৃতা—মহিলাদের উচ্চতর শিক্ষার ব্যবস্থা,^৪ ধর্মীয় দার্শনিক সমাজ, রেড ক্রস, ধর্মঘটের জন্য অর্থ সংগ্রহ, সত্যিকার চিন্তা করার জন্য এক মুহূর্তও হাতে থাকে না। তপ্ত কড়াই থেকে পালিয়ে তিনি যেন সরাসরি আগুনেই ঝাপ দিয়েছেন। আসলে তাঁর প্রয়োজন কোথাও চ'লে যাওয়া—সুইৎজারল্যান্ডে, কোনো সুদূর প্রদেশে, হুদ, পাহাড়, আকাশ, আর উৎসুক প্রতিধ্বনিময় হাওয়ার শান্তিতে।

নিকোলে নিকোলেভিচ জানলা থেকে স'রে এলেন। ইচ্ছে করছিলো একটু বেড়িয়ে আসতে, দেখা করতে কারো সঙ্গে, কিংবা এমনই একটু রাস্তায়-রাস্তায় ঘুরে আসতে, কিন্তু মনে প'ড়ে গেলো যে টলস্টয়-ভক্ত ভিভোলোচনভ আজ কী-একটা দরকারে তাঁর সঙ্গে দেখা করতে আসছেন। ঘরের এ-মাথা ও-মাথা পায়চারি করতে লাগলেন তিনি, ভাগনেকে নিয়ে ভাবনা শুরু হ'লো।

ভল্গাভীরের ব্যস্ত জীবন পরিত্যাগ ক'রে পিটার্সবার্গে যাবার আগে ইউরাকে মস্কোতে রেখে

১ মুচনয় গরোডক : ময়দা-শহর।

২ গাপোন: একজন পুরোহিত ও বিপ্লবী নেতা, যিনি Winter Palace Square-এ ১৯০৫ সালে আন্দোলন করেছিলেন। সেই আন্দোলন পরে 'রক্তাক্ত রবিবার' নামে বিখ্যাত হয়েছিলো। গুলুচর সন্দেশ ক'রে পরে বিপ্লবীরা ঐকে হত্যা করে।

৩ দ্বিটে (Witte) : ১৯০৫-এ ইনি প্রধানমন্ত্রী ছিলেন।

৪ বিশ্ববিদ্যালয়ে যে-সব মহিলা নিয়মমাফিক ভর্তি হতেন না তাঁদের জন্য বিশ্ববিদ্যালয়েই স্বতন্ত্র শিক্ষাদানের ব্যবস্থা ছিলো।

গিয়েছিলেন—মস্কোতে তাঁর অনেক আত্মীয়স্বজন—ভেডেনিয়াপিন, অস্ট্রোমিসলেনস্কি, সেলিয়াভিন, মিখাইলিস, স্ভেনট্টিঙ্কি আর গ্রোমেকো—এরা সবাই-ই আছে। প্রথমে ইউরাকে ঢিলে স্বভাবের বুড়ো বাক্যবাগীশ অস্ট্রোমিসলেনস্কির ঘাড়েই চাপানো হয়েছিলো—আত্মীয়মহলে সে ফ্রেডি নামে পরিচিত। ফ্রেডি ব্যভিচারী, তার আশ্রিত মেয়ে মোতিয়ার সঙ্গে সহবাস করে, তাই সে নিজেকে মনে করে প্রাচীন বিধানের শত্রু, নতুন চিন্তার ধ্বজাবাহক; তার প্রতি তার আত্মীয়ের বিশ্বাসের কোনোই মূল্য না-দিয়ে ইউরার জন্য পাঠানো টাকা সে নিজেই খরচ করতো। ইউরাকে বদলি করা হ'লো বিদগ্ধ গ্রোমেকো-পরিবারে, এখনো সে তাঁদের সঙ্গেই আছে।

গ্রোমেকো বাড়ির আবহাওয়া ইউরার পক্ষে খুবই উপযোগী, নিকোলে নিকোলেভিচ ভাবলেন। ওদের মেয়ে টোনিয়া ইউরার সমবয়সী, আর ইউরার বন্ধু ও সহপাঠী মিশা গার্ডন তো অধিকাংশ সময় ওদের সঙ্গেই কাটায়।

‘এই তিনের জোটটি বেশ মজার’, নিকোলে নিকোলেভিচ মনে-মনে বললেন। তিনজনে একেবারে ডুবে আছে ‘The Meaning of Love’ আর ‘The Kreutzer Sonata’ নিয়ে, কৌমার্যপ্রচার এক বাতীক হয়েছে ওদের। বয়ঃসন্ধির এই সময়টায় পবিত্রতার দিকে একটা অন্ধ ঝোক আসা অবশ্য ভালোই, তবে ওরা একটু বাড়াবাড়ি করছে, মাত্রা ছাড়িয়ে যাচ্ছে।

ছেলেমানুষ! আর কী পাগল! ‘যৌন’ শব্দটা আচ্ছন্ন ক’রে রেখেছে ওদের, তাই যা-কিছু যৌন ব্যাপারের সঙ্গে যুক্ত তার গায়েই ‘অশ্লীল’ মার্কী মেয়ে দিচ্ছে, আর শব্দটা ব্যবহার ক’রে যাচ্ছে যতক্ষণ না গা-ঘিনঘিন করে—বলতে-বলতে কখনো লাল কখনো বা ফ্যাকাশে হ’য়ে যাচ্ছে। স্বাভাবিক প্রবৃত্তি থেকে শুরু ক’রে কাম-সাহিত্য, বেশ্যাবৃত্তি—আর বলতে গেলে সমস্ত শারীরিক জগৎটাই অশ্লীল ওদের কাছে।

‘আমি যদি মস্কোতে থাকতাম’, নিকোলে নিকোলেভিচ ভাবলেন, ‘এতোদূর গড়াতে দিতাম না। লজ্জারও দরকার আছে বই কি, কিন্তু একটা সীমা থাকা চাই তো... এই যে, নিল ফেওকটিসোভিচ, এসো এসো।’ অতিথির আগমনে তাঁর চিন্তা ঐখানেই থেমে গেলো।

১০

মোটাসোটা এক ভদ্রলোক ভেতরে এলেন। পরনে ছাইরঙের টলস্টয় ঢঙের শার্ট, চওড়া চামড়ার বেস্ট, ফেণ্টের জুতো, পাংলুনটা হাঁটুর কাছে ঢলঢল করছে। দেখলে মনে হয় এমন একজন ভালোমানুষ যার মাথাটা একেবারে কল্পনার আকাশে গিয়ে ঠেকেছে, কিন্তু মোটা কালো ফিতের সঙ্গে ঝাঝা চশমা নাকের ওপর ঝুলে থাকায় রাগি-রাগি দেখায়। হলঘরে ওভারকোট রেখে এসেছেন, কিন্তু গলাবন্ধ খোলেননি, আর ঘরে যখন ঢুকলেন সেই গলাবন্ধের প্রান্ত তখন মেঝেয় লুটোচ্ছে আর গোল ফেস্ট টুপিটা তখনো মাথাতেই শোভা পাচ্ছে। এই সব অসুবিধে সামলাতে গিয়ে বন্ধুর সঙ্গে হাত ঝাকানো, এমন কি ‘কেমন আছোঁ’টুকু বলা থেকেও বিরত হ’তে বাধ্য হ’লেন তিনি।

‘উম্-ম্-ম্’ ঘরের চারপাশে তাকাতে-তাকাতে নিতান্ত অসহায় এক স্বর বেরুলো ভদ্রলোকের গলা দিয়ে।

‘যেখানে হোক ঝুলে রাখো ওগুলো,’ ব’লে নিকোলে নিকোলেভিচ ভিভোলোচনভের আশ্বস্ততা ও বাকশক্তি ফিরিয়ে আনলেন।

ইনি হলেন টলস্টয়ের সেই সব শিষ্যদের মধ্যে একজন, যাদের মনে শুরুর শান্তিহীন চিন্তাগুলি এমন অগভীর হ’য়ে গিয়েছে যে আর তাদের ঝাঝানো যাবে না, দীর্ঘ, নির্মেষ বিশ্রাম ছাড়া আর তাদের গতি নেই। রাজনৈতিক বন্দীদের সাহায্যার্থে একটি সভা হচ্ছে কোনো-এক

স্কুল বাড়িতে, সেখানে নিকোলে নিকোলেভিচকে বঙ্কতা করবার জন্য অনুরোধ করতে এসেছেন ইনি।

‘আমি তো ঐ স্কুলে বলেছি এর আগে।’

‘রাজনৈতিক বন্দীদের সাহায্যের জন্য?’

‘হ্যাঁ।’

‘আবার বলতে হবে তোমাকে।’

একটু তা-না-না করলেন নিকোলে নিকোলেভিচ, তারপর রাজি হ’য়ে গেলেন।

কাজের কথা হ’য়ে যাওয়ার পর নিকোলে নিকোলেভিচ অতিথিকে আটকে রাখার চেষ্টা করলেন না। ভদ্রলোক তক্ষুনি চ’লে যেতে পারতেন, কিন্তু ভাবলেন সেটা ভালো দেখাবে না, তাই চিন্তা করতে লাগলেন বিদায় নেবার সময় কী বললে স্বতঃস্ফূর্ত আর স্বাভাবিক শোনাবে। ঠেকে-ঠেকে কথোপকথন চলতে লাগলো, দু’জনেরই খারাপ লাগছিলো।

‘তুমি তাহ’লে এখন ডেকাডেন্ট? মিষ্টিক হ’য়ে পড়ছো নাকি?’

‘তুমি কী বলতে চাইছো ঠিক বুঝতে পারলাম না।’

‘কোনো কাজে লাগে না, বুঝেছো। আমাদের গ্রাম-পঞ্চায়েতের কথা মনে আছে?’

‘নিশ্চয়ই। আমরা এক সঙ্গে প্রচার-কার্য করিনি বুঝি।’

‘স্কুল আর শিক্ষকদের কলেজের জন্য আন্দোলন ক’রে কী খেটেছিলাম। মনে পড়ে?’

‘নিশ্চয়ই। সে এক আশ্চর্য লড়াই হয়েছিলো।’

‘সাধারণের স্বাস্থ্যমোয়নের জন্যও তো তুমি পরে কিছু কাজ করেছিলে?’

‘হ্যাঁ, কিছুদিনের জন্য।’

‘হুম-ম। আর এখন সব উচকপালে ব্যাপার—কিম্বার আর নীলোৎপল আর ছেলেছোকরার দল আর “আমরা সূর্যের মতো হবো”।’^১ আমি বিশ্বাস করতে পারি না—হা ঈশ্বর—কিছুতেই বিশ্বাস করতে পারি না যে তোমার মতো একজন বুদ্ধিমান ও রসজ্ঞ লোক—জনসাধারণ সম্বন্ধে যার এমন জ্ঞান—নাও, বলো। কিন্তু তোমার মণিকোঠায় উকি দিচ্ছি না তো?’

‘কথা বলার জন্য কথা বলছো কেন? কী নিয়ে আমাদের তর্ক? আমার মতামত তো তুমি জানো না।’

‘রাশিয়ার দরকার স্কুলের, হাসপাতালের—কিম্বার আর নীলোৎপলের দিন ফুরিয়েছে।’

‘সে-কথা কেউ অস্বীকার করে না?’

‘চাষিদের পরনে ছেঁড়া কাপড়, পেটে খাবার নেই...’

এই ভাবে ঝেঁকে-ঝেঁকে কথা চললো দু’জনের। অর্থহীন জেনেও নিকোলে নিকোলেভিচ বোঝাবার চেষ্টা করলেন, কেন প্রতীকী গোষ্ঠীর কয়েকজন লেখককে তাঁর ভালো লাগে। তারপর কথার মোড় টলস্টয়ের বাণীর দিকে ঘুরিয়ে নিয়ে গিয়ে বললেন, ‘কিছুদূর পর্যন্ত আমি তোমার সঙ্গে একমত, কিন্তু টলস্টয় যে বলেছেন আমরা যতোই “সুন্দর”র উপাসনা করি, “শিবের” কাছ থেকে ততোই দূরে স’রে আসি—’

‘আর তুমি ঠিক তার উল্টো কথাটা মানো—“সুন্দর”ই এই পৃথিবীকে বাঁচাবে—তাই নয় কি? ডস্টয়েভস্কি, রজানভ^২ রহস্যনাটিকা—আর না কী?’

১ কে. ডি. বালমন্টের লেখা একটি কবিতার বইয়ের নাম।

২ ডি. রজানভ, ১৮৫৬-১৯১৯, ধীর ঐতিহাসিক ধর্মশাস্ত্রি হক্কা এবং শিটার্শবার্গের কিছু বুদ্ধিজীবীদের প্রভাবিত করেছিলেন। টলস্টয়ের ভক্তদের কাছে এর মত গ্রহণযোগ্য ব’লে বোধ হয় নি।

‘দাঁড়াও, আমার মতটা আমাকেই বলতে দাও। প্রত্যেক মানুষের ভেতর লুকিয়ে-থাকা জন্তকে যদি ভয় দেখিয়ে ঘুম পাড়াতে চাও—কারাগারেরই হোক পরলোকেরই হোক, তাহ’লে মানবতার সব চাইতে বড়ো আদর্শ হয়ে দাঁড়াবে আত্মত্যাগী প্রচারক নয়, চাবুক হাতে সার্কাসের সিংহ-শিক্ষক। কিন্তু এই সহজ সত্যটা তোমরা দেখতে পাও না যে যুগ-যুগ ধ’রে মানুষকে জন্ত থেকে পৃথক হবার প্রেরণা দিয়েছে লাঠি নয়, তার নিজের মধ্যে নিহিত এক গান: অন্তর্হীন সত্যের অনিবার্য ক্ষমতা, তার উদাহরণের তীব্র আকর্ষণ। একথা ধ’রেই নেওয়া হয়েছে যে যীশুর বাণীর প্রধান অংশ নৈতিক উপদেশ ও আদেশ। কিন্তু আমার কাছে সব চেয়ে বড়ো কথা এই যে খৃষ্ট আমাদের প্রতিদিনের জীবন থেকে সত্য আহরণ ক’রে তাঁর বাণী দিয়ে গেছেন; সত্যকে তিনি দৈনন্দিন জীবনের পরিপ্রেক্ষিতে ব্যাখ্যা করেছেন। তাঁর সমস্ত বাণীর মধ্যে অন্তর্নিহিত হ’য়ে একটি কথাই শুধু আছে: মরণশীল প্রাণীদের মধ্যে যে-সংযোগ তা অমর, আর সমস্ত জীবনই প্রতীক মাত্র, কারণ জীবনের সব-কিছুই অর্থপূর্ণ।’

‘এক বর্ণও বুঝলাম না। এ-বিষয়ে একটা বই লেখা উচিত তোমার।’

অবশেষে ভিভোলোচনভ উঠলেন। নিকোলে নিকোলেভিচের মেজাজ অসম্ভব খারাপ হ’য়ে গেলো। নিজের উপর এক হিংস্র রাগ হ’লো তাঁর— একটা গর্দভের কাছে নিজের অন্তরঙ্গতম চিন্তাগুলি মেলে ধরেছিলেন তিনি—ওর মনে কোনো ছাপই তো পড়লো না। তারপর, মাঝে-মাঝেই যা হ’য়ে থাকে, তাঁর রাগ অন্য একটা বিষয়ের উপর গিয়ে পড়লো। বিরক্তির আর একটা কারণ মনে প’ড়ে গেলো তাঁর, ভিভোলোচনভকে সম্পূর্ণভাবে ভুলে গেলেন।

ডায়েরি লেখার অভ্যাস তাঁর নেই, বছরে একবার কি দু’বার মোটা একটা নোটখাতায় তাঁকে বিশেষভাবে ধাক্কা দেয় এমন চিন্তাগুলি তিনি লিখে রাখেন। আজ সেই খাতাটা বের করলেন, বড়ো স্পষ্ট অক্ষরে তাতে লেখা শুরু করলেন। লিখলেন:

‘ন্যাকা শ্রেজ্জিংগার গিম্মির কৃপায় সারাদিন বিত্রী কেটেছে। সকালবেলায় এসে উপস্থিত, দুপুরের খাবার সময় পর্যন্ত বসে রইলেন, পাক্কা দু’ ঘণ্টা ধ’রে কী-সব ছাইপাশ শুনিয়ে ক্লাস্ত ক’রে দিলেন। তথাকথিত প্রতীকী কবি ক-এর লেখা পদাবলি থেকে শুরু ক’রে সুরকার ‘খ’ এর বিশ্বব্যাপী সুরঝংকার, গ্রন্থনক্ষত্রের আত্মা, পদার্থসমূহের কণ্ঠস্বর, ইত্যাদি ইত্যাদিতে কণ্টকিত।

‘হঠাৎ বুঝলাম এই ঢংটি এতো মারাত্মক, এতো অসহ্য, আর কৃত্রিম কেন—এমনকি ফাউস্টেও। সবটাই হ’লো ভান, কারোই এ-বিষয়ে কোনো সত্যিকার আগ্রহ নেই। আধুনিক মানুষের জীবনে এর কোনো প্রয়োজন নেই আর। প্রকৃতির রহস্য যখন তাঁকে উতলা ক’রে তোলে, তখন সে পদার্থবিদ্যার চর্চা করে, হেসিয়ডের ষট্‌মাত্রায় লেখা কবিতা পড়ে না।

‘ব্যাপারটা শুধু এই নয় যে রূপকল্পটি এ-যুগে অচল, কিংবা শুধু এও নয় যে বিজ্ঞান যাকে স্বচ্ছ ক’রে দিয়েছে তাকে আবার ঝাপসা ক’রে দেয় এই বায়ু আর ভুলোকের দেবতারা। পুরো ঢংটাই আধুনিক শিল্পকলার বিরোধী। প্রাচীন জগতের উপযোগী ছিলো এই বিশ্বদর্শন। তখন মানুষেরা সংখ্যায় কম ছিলো, প্রকৃতি তাদের বশীভূত হয়নি; পৃথিবীর বৃকে দানবেরা তখনো বিচরণ করতো; মানুষের মনে জাগ্রত ছিলো ড্রাগন আর ডিনসরের স্মৃতি। স্পষ্টভাবে নিষ্ঠুরের মতো চোখে আঙুল দিয়ে ঘাড়ে ধাক্কা দিয়ে প্রকৃতি যেন গলায় গামছা দিয়ে টেনে ধ’রে নিজেকে প্রত্যক্ষ করাতো, যেন তখনো এই প্রকৃতিতে দেবতারা বাস করেন। মানব-ইতিহাসের প্রথম কয়েক পাতা মাত্র, সেই সবে শুরু।

‘এই প্রাচীন জগতের অবসান হ’লো রোমে, জনসংখ্যার বৃদ্ধি এর ধ্বংসের কারণ হ’লো।

‘রোম ছিলো এক চোরাই মালের মাছিতে ঘিনঘিনে বাজার, বিজিত জাতি আর ধার-করা ঠাকুর-দেবতার হাত-বদল হ’তো সেখানে; যেন এক দাগি মাল বেচার দোতলা দোকান। মর্তা আর স্বর্গ—ক্রীতদাস একদিকে, অপার দিকে দেবতা। ডেসীয় জাতি, হেরুলীয়, স্কিনীয়,

সারমেশীয় আর হাইপারবোরীয়। ভারি নিরেট চাকা^১, চর্বিতে লুপ্ত চোখ, পাশবিকতার ভাঁজে-ভাঁজে গলকম্বলের খলি, নিরক্ষর সম্রাটগণ, পণ্ডিত ক্রীতদাসের মাংসে পুষ্ট মাছেরা, নাড়িভুঁড়ির মতো তিন পাকে জড়ানো পাশবিকতা। পৃথিবীতে তখন যত মানুষ ছিলো তত মানুষ পরে আর দেখা যায় নি, কিন্তু সকলেই তারা অতি দুঃখী, আর সকলকেই ঠেসে দেওয়া হয়েছে কলোসিয়মের অলিতে-গলিতে।

‘আর তারপর সেই কুৎসিত স্বর্ণ আর মর্মরের স্তূপের মধ্য থেকে তিনি এলেন লঘু পদক্ষেপে: সেই জ্যোতির্ময় পুরুষ মানবতার স্বরূপ নিয়ে। তাঁর স্বেচ্ছাবৃত গ্যালিলীয় প্রাদেশিকতা নিয়ে যে-মুহূর্তে তিনি আবির্ভূত হলেন সেই মুহূর্ত থেকে লুপ্ত হ’লো দেবতা আর মানুষের ভেদ—শুধু রইলো মানুষ—যে-মানুষ ছুতোর, যে-মানুষ চাষা, যে-মানুষ রাখাল, গোখুলিতে মেষপাল নিয়ে যে ঘরে ফেরে। যে-‘মানুষ’ নামের মধ্যে গরিমার ধ্বনি নেই^২, কিন্তু যাকে নিয়ে গাওয়া হয় ঘুম-পাড়ানি গান আর ছবি ঝোলানো থাকে সারা জগতের চিত্রশালায়।’

১১

পোট্রোভকা যেন পিটার্সবার্গেরই অংশ আসলে, ভুল ক’রে মস্কোতে ছিটকে পড়েছে। রাস্তার দুই পাশে একই ঢাঙের বাড়ি, বহির্ভাগের একই শাস্ত্র অলংকরণ, বইয়ের দোকান, গ্রন্থাগার, মানচিত্রকর, ভালো তামাকের দোকান, ভালো-ভালো রেস্তোরা—তাদের দরজার দুদিকে ভারি-ভারি হাতলে ঝোলানো গ্যাসের বাতি—সব মিলিয়ে রীতিমতো চমক লাগে।

শীতকালে পথঘাট যেন নিষেধের ভঙ্গিতে গনগন ক’রে তাকিয়ে থাকে। এখানকার বাসিন্দারা সবাই পদস্থ, আত্মসম্মানসম্পন্ন, সচ্ছল অবস্থার বুদ্ধিজীবী।

এখানেই ভিক্টর ইগ্নোলিটোভিচ কমারোভস্কির চারতলার ওপরে জমকালো ফ্ল্যাট। পুরু কাঠের রেলিং-দেওয়া চওড়া সিঁড়ি। অদৃশ্য ও অশ্রুত এমা এর্নেস্টোভনা তাঁর এই শাস্ত্র নীড়টির পরিচালনা করেন। সাংসারিক বিষয়ে যেমন তাঁর যোগ্যতা, তেমনি সুবুদ্ধি, পুরো সংসার তাঁর নখদর্পণে—কমারোভস্কির ব্যক্তিগত জীবনের বৃত্তান্তে কখনো নাক গলাতে যান না। আর কমারোভস্কিও—তাঁর মতো ভদ্রলোকের কাছে যেমন আশা করা যায়—রাজন্যশোভন সুকৃতির দ্বারা এর প্রতিদান দেন। বাড়িতে স্ত্রী বা পুরুষ এমন কাউকে ডাকেন না যার উপস্থিতিতে এই শাস্ত্র চিরকুমারীর জগৎ বিস্কৃত হ’তে পারে। মঠের মতো এক শাস্ত্র বিয়াজ করে ফ্ল্যাটটিতে—জানালার ঝড়ঝড়ি নামানো থাকে, এককণা ধুলো নেই, অস্ত্রোপচারের ঘরের মতো পরিচ্ছন্ন। রবিবার সকালে ভিক্টর ইগ্নোলিটোভিচ তার বুলডগটির সঙ্গে পেট্রোভকা ছাড়িয়ে কুজনেটস্কি মোস্ট ধ’রে হাওয়া খেতে বেরোয়। অভিনেতা এবং জুয়াড়ি কলটানটিন ইলারিনোভিচ সাটানিডি তাদের সঙ্গ নেয় মাঝপথে।

একসঙ্গে হাঁটতে-হাঁটতে যে-সমস্ত ঘটনার প্রতি উল্লেখ করতো তারা, যে-সমস্ত মন্তব্য করতো, তা এতো কাটাছাঁটা পারম্পর্যহীন, জগৎ সম্বন্ধে এমনই অবজ্ঞায় পরিপূর্ণ যে জন্তুর গর্জনের মতো একটা আওয়াজ ব্যবহার করলেও কিছু ক্ষতি ছিলো না—যদি শুধু সেই আওয়াজ হ’তো তাদের কণ্ঠস্বরের মতোই প্রবল, গভীর, নির্লজ্জভাবে নিশ্চিস্ত, যেন নিজের স্পন্দনে নিজেরই দম আটকে যাচ্ছে—যাতে কিনা রাস্তার এ-প্রান্ত থেকে ও-প্রান্ত পর্যন্ত ভরপুর হ’য়ে যায়।

১ ওখনো চাকার শলা আবির্ভূত হয়নি।—অনুবাদের টীকা।

২ গোষ্ঠীর বিখ্যাত উক্তির প্রতি উল্লেখ রয়েছে: ‘মানুষ, যার নামের লক্ষ্য এমন গরীবান।’

১২

আবহাওয়াটা নিতান্তই অস্বাভাবিক। জলের ফোটাগুলি নর্দমার পাইপ আর কার্নিশের উপর টপটপ শব্দে পড়ে চলেছে, ছাদ থেকে ছাদে টরে-টকায় বার্তা যাচ্ছে—যেন বসন্ত এলো। বরফ গলতে শুরু করেছে।

এক মূহুর্ত ঘোরে লারা সমস্ত পথ হেঁটে এলো; বাড়ি পৌছে যেন প্রথম উপলব্ধি করলো তার কী হয়েছে।

সবাই ঘুমিয়ে পড়েছে। আবার এক ঘোরের মধ্যে লারা ডুবে গেলো, আর সেই মগ্ন অবস্থায় সে ব'সে রইলো মায়ের ড্রেসিং টেবিলের সামনে; তখনো সে প'রে আছে তার হালকা-বেগনি, প্রায় শাদা রঙের লেসের ঝালর-দেওয়া জামা, আজকের সন্ধ্যার জন্য দোকান থেকে ভাড়া-করা লম্বা ওড়না—এ যেন তার ছদ্মবেশ। দুটি হাত মুঠো ক'রে টেবিলের ওপর রেখে আয়নায় নিজের প্রতিচ্ছবির মুখোমুখি সে ব'সে আছে, কিন্তু কিছুই দেখছে না। একটু পরে হাতের পাতায় মুখ গুঁজলো সে।

মা জানতে পারলে তাকে খুন ক'রে ফেলবেন। প্রথমে তাকে খুন করবেন, তারপর নিজেকে।

কী ক'রে এমন হ'লো? কী ক'রে সম্ভব হলো? এখন অনেক দেরি হয়ে গেছে—এ-কথা আরো আগে ভাবা উচিত ছিলো তার।

এখন সে—কী যেন বলে?—সে পতিতা। ফরাসী উপন্যাসের পাতা থেকে উঠে-আসা একজন স্ত্রীলোক সে, যদিও কাল সে স্কুলে যাবে, সেই সব মেয়ের পাশে বসবে তার তুলনায় নিতান্তই শিশু যারা। হা ভগবান, হা ভগবান, কী ক'রে এমন হ'লো?

কোনোদিন, অনেক, অনেক বছর পরে, যখন সম্ভব হবে, লারা ওলিয়া ডেমিনাকে সব কথা বলবে, আর ওলিয়া জড়িয়ে ধ'রে ভেঙে পড়বে কান্নায়।

জানলার বাইরে জলের বিন্দুগুলি যেন কিছু বলতে গিয়ে তোংলাচ্ছে, গ'লে-যাওয়া বরফ বিভূবিভূ ক'রে উচ্চারণ করছে তার মায়াবী মন্ত্র। নিচে রাস্তায় কে যেন তার প্রতিবেশীর দরজায় সজোরে ঘা দিয়ে চলেছে। লারা ব'সে রইলো, নিচু তার মাথা, কৈপে-কৈপে উঠছে তার দুই কাঁধ, ফুঁপিয়ে-ফুঁপিয়ে সে কাঁদছে।

১৩

'বাজে, সব বাজে, এমা এর্নেস্টোভনা। আমি বিরক্ত, ক্লান্ত হ'য়ে পড়েছি।' কমারোভস্কি দেবরাজটা একবার খুলতে একবার বন্ধ করতে লাগলো, টেনে-টেনে বের করলো ভেতরের জিনিস, কার্পেটের ওপর, সোফার ওপর ছড়িয়ে পড়লো কাফ আর কলার, কী সে চায় নিজেও বুঝতে পারছে না।

সে এখন মরীয়া হ'য়ে লারাকে চায়, কিন্তু এই রবিবারে তার সঙ্গে দেখা হবার কোনো সম্ভাবনা নেই। খাঁচায় পোরা জন্তুর মতো ঘরের এ-মাথা থেকে ও-মাথায় সে পায়চারি করতে লাগলো।

লারা তার কাছে অনন্য এক বৈদেহী আকর্ষণের প্রতিভা। তার দুটি হাত মহান এক চিন্তার মতো তাকে বিস্মিত করে। হোটেলের দেয়ালে লারার দেহের ছায়া যেন পবিত্রতার রেখাচিত্র। বুকের ওপর অটিকে থাকে তার অন্তর্ভাস, এমব্রয়ডারির ফ্রেমে-আঁটা কাপড়ের টুকরোর মতো সহজে টান হ'য়ে।

নিচে অ্যাসফল্টের রাস্তায় ব্যস্ততাহীন ঘোড়ার খুরের শব্দের সঙ্গে তাল রেখে জানলার কাছে

আঙুল ঠুকলো কমারোভস্কি। ‘লারা,’ চোখ বুজে ফিসফিস ক’রে ডাকলে সে। কল্পনায় দেখলো তারই হাতের ওপর ন্যস্ত লারার মাথাটি; লারার দুই চোখ বুজে আছে, সে ঘুমিয়ে পড়েছে, জানতেও পারছে না ঘণ্টার পর ঘণ্টা না-ঘুমিয়ে কমারোভস্কি দু’চোখ ভ’রে তাকে দেখছে। ছড়িয়ে আছে তার কালো চুল, সেই অপরূপ কেশরাশি ধোয়ার কুণ্ডলীর মতো কমারোভস্কির দুই চোখে জ্বালা ধরিয়ে দেয়, কুরে-কুরে খায় তার হৃদয়।

রবিবারের ভ্রমণটা সফল হ’লো না আজ। জ্যাককে নিয়ে কয়েক পা গেলো সে, কুজনেটস্কি মোস্টের কথা, সাটানিডির রসিকতার কথা, অগণিত পরিচিতদের কথা ভাববার চেষ্টা করলো—না, সে পারে না, আর সে সইতে পারে না। ফেরার পথ নিলো সে, চমকে উঠে কুকুরটা মাটি থেকে চোখ তুলে অসম্মতির দৃষ্টিতে তার দিকে তাকালো, তারপর বিরক্ত হ’য়ে পেছন-পেছন চলতে লাগলো।

‘এর মানে কী, এর মানে কী?’ কমারোভস্কি ভাবে, ‘এ কোন শয়তানের জালে জড়িয়ে গেলাম?’ এ কি তার বিবেক, করুণা, না কি অনুতাপ? না কি লারার জন্য সে উদ্বিগ্ন? না, সে জানে লারা নিরাপদে আছে, বাড়িতে আছে। তাহ’লে লারাকে ভুলে থাকতে পারছে না কেন?

বাড়ি ফিরে গেলো কমারোভস্কি। সিঁড়ির প্রথম ধাপে জানলার কোনার বিচিত্র অলংকরণ তার পায়ের কাছে রঙিন আলোর ছোপ ফেললো। দোতলার সিঁড়ির অর্ধেকটা উঠে ইঠাৎ দাঁড়িয়ে পড়লো সে।

এই শ্রান্তিকর, একঘেয়ে, উদ্বিগ্ন মানসিক অবস্থাকে আর প্রশ্রয় দেওয়া চলবে না। আর যা-ই হোক, সে তো স্কুলের ছেলে নয়। তার তো বোঝা উচিত যে নিতান্তই শিশু, তার মৃত বন্ধুর কন্যা এই মেয়ে তার হাতে নিছক খেলার পুতুল হ’য়ে না-থেকে যদি তাকে এমনভাবে মোহগ্রস্ত করে তাহ’লে তার ফল কী হবে। নিজেকে সামলে নিতে হবে তার। নিজের প্রতি অবিশ্বাসী হবে না সে, নিজের সব অভ্যাস ঠিক-ঠিক বজায় রাখবে, তা না-হ’লে তার সব-কিছু লীন হ’য়ে যাবে ধোয়ায়।

যতোক্শণ না হাত ব্যাখায় টনটন ক’রে উঠলো, ওক কাঠের রেলিংটা কমারোভস্কি সজোরে চেপে রইলো, এক মুহূর্তের জন্য সে চোখ বুজলো, তারপর দৃঢ়ভাবে ঘুরে দাঁড়িয়ে নেমে গেলো নিচে। সেই রঙিন আলোর ছায়া-পড়া সিঁড়ির ধাপে কুকুরটা তার জন্য অপেক্ষা করছে। সমস্ত মুখ-ভরা লালা আর খুলে-পড়া চোয়াল নিয়ে যেন এক বামন অসীম ভক্তিতে মাথা তুলে তাকালো।

কুকুরটার প্রচণ্ড বিদ্রোহ লারার উপর, ঘেউ ঘেউ করে, দাঁত খিচিয়ে ওর মোজা ছিঁড়ে দেয়। হিংসে করে ওকে, যেন ভয় পায় লারার সংস্পর্শে তার প্রভুর মনুষ্যত্ব জেগে উঠবে।

‘ও, তাহ’লে তোমার ইচ্ছে আগের মতোই চলুক সব—সাটানিডি, মজার-মজার গল্প, আর নোংরা চালাকি?—বেশ, তাহ’লে এই নাও, আর এই, আর এই!’ লাঠি দিয়ে কুকুরটার পিঠে ঘা লাগালো কমারোভস্কি, লাঠি দিয়ে তাকে ছিটকে দিলো দূরে। জ্যাক ঝুঁইঝুঁই করলো, ঘেউ-ঘেউ করলো, তারপর পেছনটা ঝাঁকিয়ে-ঝাঁকিয়ে সিঁড়ি বেয়ে উঠে গিয়ে দরজায় আঁচড়াতে লাগলো—এমা এর্নেস্টোভনার কাছে নালিশ জানাবে সে।

দিন যায়, সপ্তাহ যায়।

এ যেন ডাইনির চক্রান্ত! তার জীবনে কমারোভস্কির আগমন যদি লারাকে শুধু মাত্র বিভ্রমায় ভরে তুলতো তাহ’লে সে কি বিদ্রোহ ক’রে সব সম্পর্ক ছিন্ন ক’রে ফেলতে পারতো না? কিন্তু ব্যাপারটা মোটেও অতো সহজ নয়।

একথা ভেবে গর্ব হয় বইকি তার। এমন একজন সুপুরুষ, যার চুল পেকে আসছে, প্রায় বাপের বয়সী। সভা-সমিতিতে যে উচ্ছ্বসিত হাততালি পায়, খবর-কাগজে যার নাম বেরোয়—সে তার জন্য এতো অর্থ আর সময় ব্যয় করছে। তাকে নিয়ে যায় গান-বাজনার আসরে, তাকে বলে সে স্বর্গের দেবীর মতো দেখতে, আর, কী বলে গিয়ে—তার মানসিক উন্নতির চেষ্টা করে।

হাজার হোক, সে তো এখনো স্কুলেরই ছাত্রী, ব্রাউন রঙের ইউনিফর্ম তাকে পরতে হয়, এখনো স্কুলে ছোটোখাটো দুট্টমিতে আমোদ পায়। খোলা গাড়িতে কোচোয়ানের পেছনে অথবা সমস্ত দর্শকের চোখের সামনে অপেরার বক্সে ব'সে কমারোভস্কির লাম্পটো সে খুশিও হয়, আবার ক্ষুব্ধও হয়; ব্যাপারটার গোপনতা আর দুঃসাহস তাকে যেন প্রতিযোগিতায় আহ্বান করে।

কিন্তু এই ছেলমানুষি রোমাঞ্চের মুহূর্তগুলি ক্ষণিক। ভয়াবহ এক আত্মগ্লানি তার ভগ্ন হৃদয়ে শিকড় ছড়িয়ে দিচ্ছে। নিজের পড়াশুনো আর বিনিদ্র রাত্রির সঙ্গে ক্রমাশয়ে যুদ্ধ ক'রে-ক'রে সে ক্লান্ত, চোখের জল শুকোতে পায় না, মাথা ধরা কখনো ছাড়ে না। সারাদিন সে ঘুমের ভারে অবসাদগ্রস্ত হয়ে থাকে।

১৫

ওকে ঘেঁষা করে সে, তার জীবনে ও অভিশাপ। রোজ একবার ক'রে এই কথা ভাবে লারা।

আজীবনের জন্য লারা ওর বন্দী। কী ক'রে ঝাড়া পড়লো? কেন লারা এমনভাবে মাথা নিচু করলো ওর ইচ্ছের কাছে, কেন ওর প্রয়োজন মেটাতে লারা এমন সব কাজ করলো যাতে পরে নিজেকেই লজ্জা পেতে হয়? ওর কিসের জোর তার উপর? বয়সের? না কি ওর টাকার ওপর তার মায়ের নির্ভরতা? সেইজন্য কি লারা কলীভূত হয়েছিলো বা ভয় পেয়েছিলো? না, হাজার বার না। বাজে—ও-সব বাজে কথা!

ওর না, বরং লারারই জোর ওর ওপর। সে কি জানে না ওর কতো প্রয়োজন তাকে? ভয় পাবার কিছু নেই, তার নিজের বিবেক তো পরিষ্কার। লজ্জা, ভয়, ওরই পাওয়া উচিত, পাছে লারা ওর হাটে হাঁড়ি ভেঙে দেয় সে-কথা ভেবে আতঙ্কে থাকা উচিত। কিন্তু লারা যে কখনো তা করবে না। দুর্বল আর অধীন মানুষদের সঙ্গে ব্যবহারে কমারোভস্কির যেটা প্রধান অস্ত্র, সেই বিশ্বাসঘাতকতা লারার জানা নেই।

এখানেই তাদের তফাৎ। আর এই কারণেই লারার সমস্ত জীবন এমন ভয়াবহ হ'য়ে উঠেছে। বিদ্যুতে বা বজ্রপাতে যা হয় না, সেই সর্বনাশ ডেকে আনে চোরা চাউনি আর ফিসফিস কুৎসা। প্রতারণা আর দ্ব্যর্থকতায় ভরা এই জীবন। জীবনের যে-কোনো বন্ধন মাকড়সার জালের মতো সূক্ষ্ম, কিন্তু সেই জাল থেকে নিজেকে ছাড়বার চেষ্টা ক'রে দ্যাখো,—আরো জোরে আঁকড়ে ধরবে তোমাকে।

এমনকি শক্তিমানেরাও দুর্বল আর বিশ্বাসঘাতকের শাসনের অধীন।

১৬

কুয়ুক্তি দিয়ে নিজেকে বোঝাবার চেষ্টা করলো লারা। যদি সে বিবাহিত হ'তো, নিজেকে সে প্রণয় করে, কী তফাৎ হ'তো তাহ'লে? কিন্তু মাঝে-মাঝে এক আশাহীন যন্ত্রণা তাকে অভিভূত করে।

লোকটার কি লজ্জা নেই? কী ক'রে ও লারার পায়ে ও-ভাবে লুটিয়ে প'ড়ে অনুনয় করতে পারে?—এ-ভাবে আমরা আর চলতে পারি না। ভেবে দ্যাখো, তোমাকে আমি কী না করেছি! সর্বনাশের পথে এগিয়ে চলেছো তুমি। তোমার মাকে সব খুলে বলতে হবে, তারপর আমি বিয়ে

করবো তোমাকে।' কান্দতে থাকে লোকটা, আর এমনভাবে জোর করে যেন লারা তর্ক করেছে বা প্রতিবাদ করেছে। সে জানে এ-সব আসলে বাজে কথা, তাই কানে তোলে না।

আর কমারোভিঞ্চি ওড়না-টানা লারাকে জঘন্য সব রেষ্টোরার ভেতরকার ঘরে নিয়ে যেতে থাকে; খানসামা আর অন্য খদ্দেররা সেখানে চোখ দিয়ে বিবস্ত্র করে তাকে; আর লারা শুধু নিজেকে নিজে প্রবল করে, 'ও যদি সত্যিই ভালবাসতো তাহলে কি এ-ভাবে অপমান করতে পারতো আমাকে?'

একদিন সে এক স্বপ্ন দেখেছিলো। মাটির ভেতর কবর দেওয়া হয়েছে তাকে, তার দেহের বাম অংশ ও ডান পা ছাড়া আর কিছুই যেন বাইরে নেই। তার বাম স্তনের বোঁটা থেকে একটি ঘাসের পল্লব গজিয়ে উঠলো, আর মাটির উপর দাঁড়িয়ে লোকেরা যেন গান গাইছে: 'কালো চোখ, শাদা স্তন', আর গাইছে, 'মাশা নদী পার হবে না, হবে না।'

১৭

লারা ধর্মবিশ্বাসী নয়। আচার-অনুষ্ঠানে সে বিশ্বাস করে না। কিন্তু কখনো-কখনো নিজের জীবনকে সহ্য করার মতো শক্তি সঞ্চয় করার জন্য তার প্রয়োজন হ'তো কোনো অন্তর্নিহিত সুর, যা নিজে তৈরি ক'রে নেওয়া সব সময় সম্ভব হ'তো না তার পক্ষে। তাকে সে-সুর এনে দিতো ঈশ্বরের সুসমাচার; লারা গির্জায় যেতো শুধু ঐ সমাচার শুনে কান্দবার জন্য।

ডিসেম্বরের শুরুতে একদিন লারার নিজেকে মনে হচ্ছিলো 'ঝড়' নাটকের কাটেরিনা চরিত্রের মতো: হৃদয়ে এমন এক ভার নিয়ে সে প্রার্থনা করতে গেলো যে প্রতি মুহূর্তে মনে হ'তে লাগলো তার পায়ের তলার মাটি বৃষ্টি স'রে যাবে, ভেঙে পড়বে গির্জের গম্বুজাকৃতি ছাদ। তার উচিত শাস্তি হবে তাহলে: যাবে, সব শেষ হ'য়ে যাবে। শুধু এই ভেবে লারার মন-খারাপ হচ্ছিলো যে ঐ বাচাল মেয়ে ওলিয়া ডেমিনাকে সঙ্গে এনেছে।

'ঐ যে প্রভ আফানাসিয়েভিচ,' ফিসফিস করলো ওলিয়া।

'শ' শ—শ, অতো বিরক্ত কোরো না। কোন প্রভ আফানাসিয়েভিচ?'

'প্রভ আফানাসিয়েভিচ সকোলভ। ঐ যে একজন পড়ছে না—সে। সম্পর্কে আমাদের জ্ঞাতিভাই।'

'ও, সেই স্তোত্রপাঠক। টিভেরজিনের আত্মীয়। দয়া ক'রে তুমি চুপ করবে?'

তারা এসেছে উপাসনা শুরু হবার সঙ্গে-সঙ্গে। তখন পড়া হচ্ছিলো: 'আমার আত্মা পূজা করুক প্রভুকে, আমাকে বেষ্টন ক'রে যা-কিছু আছে তাঁর পুণ্য নামকে পবিত্র করুক।'

উপাসনারত ব্যক্তির ভিড় ক'রে দাঁড়িয়ে ছিলো অর্ধ-শূন্য, প্রতিধ্বনিতে গমগমে গির্জের এক প্রান্তে বেদীর কাছে। গির্জের বাড়িটি নতুন। মসণ কাচের জানলা বাইরের ধূসর বরফে আচ্ছন্ন কর্মবাস্ত রাস্তার কোনো ছবি তুলে ধরে না। জানলার সামনেই গির্জের মালি উপাসনার দিকে বিন্দুমাত্র মনোযোগ না-দিয়ে সরবে এক কালা, হাবা ভিখারিনীকে গাল পাড়ছে, তার গলার স্বর জানলা আর রাস্তার মতোই নির্বোধ আর সাধারণ।

লারা হাতের মুঠোয় পয়সা নিয়ে উপাসনারত ব্যক্তিদের যাতে ব্যাঘাত না হয় এমনভাবে পাশ কাটিয়ে গিয়ে দরজার কাছ থেকে নিজের এবং ওলিয়ার জন্য দুটো মোমবাতি কিনে নিয়ে এলো; প্রভ আফানাসিয়েভিচ ঐ সময়টুকুর মধ্যেই সেই নয় প্রকার মোক্ষের মন্ত্র এমন গড়গড় ক'রে ব'লে গেলেন যেন সকলে সেগুলি এত ভালোভাবে জানে যে তাঁর সাহায্যের আর দরকার নেই।

‘খন্য তারা যারা দীনাঙ্ঘ...খন্য তারা যারা শোকাতুর...খন্য তারা যারা সত্যের জন্য তৃষ্ণার্ত ও বুভুক্ষু’...

লারা শিউরে উঠে থমকে দাঁড়ালো।

তার...তার জন্য বলা হচ্ছে কথাগুলো। প্রভ বলছে: তারাই সুখী, যারা পদদলিত। নিজের কথা কিছু বলার আছে তাদের। সব আছে তাদের সামনে। এই ছিলো তাঁর বাণী। এই হ’লো খ্রীষ্টের মত।

১৮

তখন প্রেসনিয়ায় বিপ্লব শুরু হয়েছে। গুইশারদের ফ্ল্যাটটি বিদ্রোহীদের এলাকায়। তাদের বাড়ি থেকে মাত্র কয়েক গজ দূরে ঞ্ভের স্ট্রীটে এক ব্যারিকেড তৈরি করা হয়েছে। তাদেরই উঠোন থেকে বালতি-বালতি জল নিয়ে লোকেরা পাথর আর ভাঙা লোহার তাল বরফ দিয়ে জোড়া লাগাচ্ছে।

পাশের মাঠে বিদ্রোহীরা জড়ো হয়, সেটা তাদের রেড ক্রসের ঘাঁটি, লগুৎখানাও।

লারার চেনা দুটি ছেলে এই দলে গেছে। একজন হ’লো নিকি ডুডোরভ, তার সহপাঠী নাভিয়ার বন্ধু। ছেলেটি দাঙ্গিক, স্বল্পভাষী ও ঋজু স্বভাবের—সব মিলিয়ে এত বেশি লারার মতো যে লারার ওর প্রতি কোনো আগ্রহ নেই।

আরেকজন হ’লো পাশা আন্টিপভ—ছেলেটি হাই স্কুলে পড়ে, থাকে ওলিয়ার ঠাকুমা বুডি টিভেরজিনার সঙ্গে। টিভেরজিনের বাড়িতে যখনই দেখা হয়েছে তখনই তাকে দেখে ছেলেটির অবস্থা লক্ষ্য না-ক’রে পারেনি। শিশুর মতো সরল এই বালক তার আনন্দ গোপন করার কথা ভাবেনি, তার কাছে লারা যেন এক ছুটির দিনের ভৃদৃশ্য, ঘাসে আর মেঘে আর বার্চগাছের সারিতে সাজানো, যা দেখে খুশি হ’লে লোকের চোখে হাস্যকর হবার ভয় থাকে না।

পাশার ওপর তার প্রভাব আছে, তা বোঝামাত্র লারা অচেতনভাবেই তা ব্যবহার করতে শুরু ক’রে দিয়েছিলো, যদিও পাশার নমনীয়, খোলামেলা চরিত্রটিকে সত্যি-সত্যি হাতে নিয়েছিলো অনেক বছর পরে, তাদের সম্বন্ধের এক পরিণত অধ্যায়ে। ততোদিনে পাশাও জানতে পেরেছে যে লারার প্রেমে সে আকর্ষিত হবে আছে, জেনেছে সারা জীবনের জন্য সে এখন লারার কাছে সমর্পিত।

এই দুই বালক বয়স্কদের ভীষণতম খেলায় মেতেছে, যুদ্ধ যার নাম। আর এই বিশেষ ধরনের যুদ্ধে সাধারণ লড়াইয়ের সমস্ত বিপদের আশঙ্কা ছাড়াও আরো অনেক ভয় আছে—নির্বাসনের, মৃত্যুদণ্ডের ভয়। অথচ তারা যে-ভঙ্গিতে মাথার পেছনে উলের টুপিটাকে আটকে রেখেছে তা দেখেই মনে হয় এরা এখনো শৈশব পেরোয়নি—এখনো মা-বাবার সতর্ক দৃষ্টির আড়াল থেকে বেরিয়ে আসার সময় হয়নি এদের। লারা ওদের শিশু ছাড়া অন্য কিছু ভাবতেই পারে না। এক নিষ্পাপ উদ্ভাস ওদের এই বিপজ্জনক আমোদের মধ্যেও লেগে আছে—ওরা তা সংক্রমিত করেছে সব-কিছুতে—এই সন্ধ্যায় যা হিমে এমন কলঙ্কিত শাদার চেয়ে বেশি কালো দেখাচ্ছে, উঠানের ঘন নীল ছায়ায়, রাস্তার ওপারের বাড়িটিতে—ছেলেরা যেখানে গা ঢাকা দিয়ে আছে, আর সর্বোপরি ঐ বাড়ির ভেতর থেকে ভেসে-আসা রিভলভারের শব্দে। ‘ছেলেরা গুলি ছুঁড়ছে,’ ভাবতে গিয়ে লারার মনে হ’লো নিকি ছাড়া, পাশা ছাড়া, আরো অন্য অনেকের কথা, সারা মস্কো ভ’রে যারা গুলি ছুঁড়ছে। ‘কী ভালো, কী চমৎকার ছেলে ওরা,’ সে ভাবে, ‘ভালো ব’লেই তো গুলি ছুঁড়ছে।’

শোনা গেলো ব্যারিকেডটা বোমা মেরে উড়িয়ে দেওয়া হ'তে পারে। তাদের বাড়ির অবস্থা তাহ'লে বিপজ্জনক হবে। মস্তোকর অন্য কোনো অংশে কোনো বন্ধুবান্ধবের বাড়ি গিয়ে ওঠার সময় আর এখন নেই, পুরো অঞ্চলটা ঘিরে ফেলা হয়েছে: কাছাকাছি আশ্রয় নিতে হবে কোথাও। মস্টেনিগ্রোর কথাই মনে হ'লো তাদের।

দেখা গেলো তাদের মতো অবস্থায় পড়েছে এমন বহু লোকই ঐ একই জায়গার কথা ভেবেছে। হোটেল একেবারে ভরা, কিন্তু পুরানো দিনের খাতিরে চাদর রাখার ঘরে কোনোমতে একটু ঠাই পাবার আশ্বাস পেলে তারা।

বাক্স-প্যাটরা নিলে পাছে নজরে প'ড়ে যায় সেই ভয়ে তারা নিতান্ত প্রয়োজনীয় জিনিসপত্রগুলি তিনটি ষ্টুটিতে বেঁধে নিলে; তারপর যাবার দিন রোজ পেছোতে লাগলো।

দোকানের হালচাল এমনিই সনাতন যে সাধারণ ধর্মঘট শুরু হবার পরেও বহুদিন পর্যন্ত দোকান খোলা ছিলো। কিন্তু ঠাণ্ডা, মন-মরা এক বিকেলে দরজায় ঘৃষ্টি বাজলো। কে যেন অভিযোগ নিয়ে এসেছে, আলাপ-আলোচনা করতে চায়। মালিকের খোঁজ করলে। মালিকের বদলে ফেটিসভাই গেলো ঘোলা জলে তেল ঢালতে। একটু পরে সমস্ত মেয়ে-দরজিদের হলঘরে ডেকে নিয়ে আগন্তুকের সঙ্গে আলাপ করিয়ে দিলো সে। আগন্তুক অনিপুণ ভঙ্গিতে আবেগের সঙ্গে সকলের কর্মদর্শন ক'রে যখন চ'লে গেলো তখন মনে হ'লো ফেটিসভার সঙ্গে তার কোনো-একটা চুক্তি হয়েছে।

মেয়েরা সব শেলাইয়ের ঘরে ফিরে এসে যে যার শাল বেঁধে নিলে, তাদের ময়লা শীতের কোটগুলি তুলে নিতে লাগলো হাতে।

‘কী হয়েছে?’ সবগে ঘরে ঢুকে শ্রীমতী গুইশার প্রশ্ন করলেন।

‘আমাদের ওরা বের ক'রে দিচ্ছে, মাদাম, আমরাও ধর্মঘট করছি।’

‘কিন্তু আমি কিছুই বুঝতে পারছি না... তোমাদের কী ক্ষতি আমি করেছি?’ শ্রীমতী গুইশার কৈদে ফেললেন।

‘আপনি অমন ব্যাকুল হবেন না, আমালিয়া কার্লোভনা। আপনার বিরুদ্ধে আমাদের কোনো অভিযোগ নেই। কতো কৃতজ্ঞ আমরা আপনার কাছে। কিন্তু এ তো শুধু আপনাকে আমাকে নিয়ে কথা নয়। সবাই এই করছে, সারা জগৎ এই করছে। সকলের বিরুদ্ধে কি ষাওয়া যায়, আপনিই বলুন?’

ওরা সবাই চ'লে গেলো, ওলিয়া ডেমিন' পর্যন্ত, এমনকি ফেটিসভাইও; সে অবশ্য বিদায় নেবার সময় ফিসফিস ক'রে শ্রীমতী গুইশারকে ব'লে গেলো যে দোকানের মালিকের এবং দোকানের মঙ্গলের জন্যই ধর্মঘটের অভিনয় করছে সে। কিন্তু শ্রীমতী গুইশারকে প্রবোধ দেয়া অসম্ভব।

‘কী ভীষণ অকৃতজ্ঞতা! উঃ! ভাবতেও কেমন লাগে যে এই সব লোককে আমি এমন ভুল বুঝেছিলাম। কী প্রশ্রয়ই না দিয়েছি ওই ছুঁড়িটাকে! আচ্ছা, ওর না-হয় কৈফিয়ৎ আছে—বাচ্চা মেয়ে, কিন্তু ঐ বুড়ি ডাইনিটা?’

‘শুধু তোমার জন্য তো আর আলাদা ব্যবস্থা করতে পারে না ওরা—বোঝো না কেন, মা?’ লারা তাঁকে শাস্ত করার চেষ্টা করে। ‘তোমার প্রতি কারো কোনো বিদ্বেষ নেই। বরং ঠিক তার উল্টো। এখন যা-কিছুই করা হচ্ছে, সবই মনুষ্যত্বের খাতিরে, দুর্বলকে রক্ষার্থে, মেয়েদের আর শিশুদের মঙ্গলের জন্য। হ্যাঁ, তা-ই। মাথা নেড়ো না। তুমি দেখো, এরই ফলে একদিন তুমি-আমি অনেক ভালোভাবে ঝাঁচার সুযোগ পাবো।’

কিন্তু তার মার মাথায় কিছুই ঢুকলো না। ‘সব সময় এই হয়,’ ফোঁপাতে-ফোঁপাতে তিনি

ব'লে চলেন, 'যখনই আমি ঠিকমতো কোনো ব্যাপার বুঝতে পারি না, তুই এমন সব কথা বলতে শুরু করিস যাতে আমি স্তম্ভিত হ'য়ে যাই। আমার সঙ্গে এমন একটা জঘনা চালাকি করলো সবাই, আর তুই কিনা বলছিস তা আমারই ভালোর জন্য? না, সত্যি আমি পাগল হ'য়ে যাবো।'

রডিয়া স্কুলে ছিলো। লারা মায়ের সঙ্গে শূন্য বাড়িতে ঘুরে-ঘুরে বেড়ালো। আলো-না-জ্বলা রাস্তা শূন্য দৃষ্টিতে তাকিয়ে রইলো তাদের ঘরের দিকে, আর ঠিক সেই একই দৃষ্টি ঘরগুলিও ফিরিয়ে দিলো।

'অঙ্ককার হবার আগেই চলো আমরা হোটেল চ'লে যাই, মা,' লারা মিনতি করলো। 'চলো না, মা। আর দিন পেছিয়ে না, এখনই চলো।'

'ফিলাট, ফিলাট,' তারা দরোয়ানকে ডাকলে। 'ফিলাট, লক্ষ্মী, মন্টেনিগ্রো হোটেল নিয়ে চলো আমাদের।'

'ঠিক আছে মাদাম।'

'এই গুলিগুলো নিয়ে যাও। আর ফিলাট, যতোদিন না আবার সব ঠিকঠাক হয় বাড়িটার ওপর একটু নজর রেখো। কিরিল মডেস্টোভিচকে দানা দিতে ভুলো না, মনে ক'রে জল বদলে দিয়ে। এই যে চাবি। আচ্ছা, আর-কিছু বলার নেই—আমাদের দেখতে যেয়ো কিন্তু মাঝে-মাঝে।'

'আচ্ছা, মাদাম।'

'ধন্যবাদ, ফিলাট। ভগবান তোমার মঙ্গল করুন। আচ্ছা, এবার একটু বসা যাক।' তারপর আমাদের রওনা হ'তে হবে।'

দীর্ঘ অসুস্থতার পর খোলা হাওয়াকে যেমন অপরিচিত লাগে তেমনি লাগলো তাদের রাস্তায় বেরিয়ে। পথের সুগোল শব্দগুলি মৃদু আওয়াজে মুড়মুড়ে, হিমেল, পরিচ্ছন্ন শূন্য এমনভাবে প্রতিধ্বনিত হচ্ছিলো যেন চুমকুড়ি। আর কামানের গোলা ধপ ক'রে মাটিতে প'ড়ে সশব্দে ফেটে পড়ছে, দিগন্ত চেপটে যাচ্ছে ডালপুরির মতো।

ফিলাট যতোই উন্টো বোঝাবার চেষ্টা করুক, লারা আর আমালিয়া জেদ ক'রে বলতে লাগলো যে ওগুলো সবই ফাঁকা আওয়াজ।

'বোকার মতো কথা বলো না, ফিলাট। নিজেই ভেবে দ্যাখো না। কাউকে দেখছো গুলি ছুঁড়তে? ফাঁকা আওয়াজ ছাড়া অন্য কিছু কী ক'রে হয়? কে গুলি ছুঁড়ছে তাহ'লে—যীশুর আত্মা নেমে এসেছেন নাকি? ও-সব ফাঁকা আওয়াজ—তাছাড়া আর কিছু না।'

এক রাস্তার মোড়ে কতোগুলো কসাক পাহারাওলা তাদের থামিয়ে দিলো। দাঁত বের ক'রে হাসতে-হাসতে অসভ্যের মতো তাদের মাথা থেকে পা পর্যন্ত হাত বুলিয়ে-বুলিয়ে সার্চ করলো তারা। চোয়ালের ওপর দিয়ে স্ট্র্যাপ-বাঁধা তাদের মাথার চ্যাটা টুপি এক কানের উপর হেলে পড়েছে; দেখে হঠাৎ ওদের একচোখো ব'লে মনে হয়।

'চমৎকার হ'লো,' হাঁটতে হাঁটতে লারা ভাবলে। শহর থেকে এই অঞ্চলটা যতোদিন বিচ্ছিন্ন হ'য়ে থাকবে ততোদিন কমারোভস্কিকে আর দেখতে হবে না তাকে। মার জনাই ওর সংস্রব পরিত্যাগ করা অসম্ভব হ'য়ে পড়েছে। সে তো আর বলতে পারে না 'মা, ওর সঙ্গে দেখাশুনা করা বন্ধ ক'রে দাও।' বললেই তো সব কথা ফাঁস হ'য়ে যাবে।

কী হবে তাহ'লে? এতো ভয় কেন তার? হা ভগবান! যা-কিছু—যা-কিছু হোক, শুধু যদি এই ব্যাপারের শেষ হয়।

ঈশ্বর! ঈশ্বর! দারুণ বিতৃষ্ণায় তার মনে হয় সে অজ্ঞান হ'য়ে যাবে। কী যেন মনে পড়ছিলো তার একটু আগে? সেই ভয়াবহ ছবিটার নাম যেন কী? এক স্থলকায় রোমক শোভা পাচ্ছে তাতে। ঐ গোপন ঘরগুলির প্রথমটায়, যেখানে এই সব-কিছুর শুরু, টাঙানো ছিলো ছবিটা। ছবির নাম 'কামিনী না পাত্র?' ইয়া, ঠিক! তা-ই তো। বিখ্যাত নাকি ছবিটা। স্থলকায় রোমানটি একজন খ্রীলোক আর একটা পাত্রের মধ্যে কোনটা গ্রহণ করবে মনস্থির করতে পারছে না। প্রথম যখন ছবিটা দেখেছিলো তখনো সে সম্পূর্ণ খ্রীলোক হয়নি। মূল্যবান শিল্পকর্মের সঙ্গে তার তুলনা চলে না। সেটা পরে হ'লো। রাজকীয় কায়দায় ভোজের জন্য টেবিল সাজানো হয়েছিলো।

'অমন উর্ধ্বশ্বাসে কোথায় ছুটে চলেছিস? আমি তোর সঙ্গে তাল রাখতে পারি না বাপু,' খ্রীমতী গুইশার হাঁপাচ্ছিলেন। দ্রুত হাঁটছিলো লারা। কী এক অজানা শক্তি তার ওপর ভর করেছে, সে যেন হেঁটে চলেছে বাতাসের ওপর দিয়ে, গর্বিত এক বেগবান আকর্ষণে সে চালিত হচ্ছে।

'চমৎকার!' বন্দুকের শব্দ শুনতে-শুনতে সে ভাবলে। 'খন্য তারা যারা পদদলিত। খন্য তারা যারা বঞ্চিত। ঈশ্বর ঐ বুলেটের বেগ বৃদ্ধি করুন। আমি আর ওরা এক সূত্রে বাঁধা।'

২০

সিভৎসেভ ব্রাজেক' ও আরেকটি ছোটো রাস্তার কোণ ঘেঁষে গ্রোমেকো ভাইদের বাড়ি। আলেকজাণ্ডার আলেকজানড্রোভিচ ও নিকোলে আলেকজানড্রোভিচ গ্রোমেকো দুজনেই রসায়নশাস্ত্রের অধ্যাপক, একজন পেট্রভ গ্র্যাকাডেমিতে আছেন, অন্যজন বিশ্ববিদ্যালয়ে। নিকোলে বিয়ে করেননি। আলেকজাণ্ডারের স্ত্রীর নাম আনা, বিয়ের আগের পদবী ক্রুগার। তাঁর বাবা ছিলেন লোহার খনির মালিক; ইউরিয়াটিনের কাছে উরালে তাঁর বিশাল জমিদারিতে কয়েকটি পরিত্যক্ত অকেজো খনি ছিলো।

গ্রোমেকোদের বাড়িটি দোতলা। ওপর তলায় শোবার ঘর, স্থলঘর, আলেকজাণ্ডার আলেকজানড্রোভিচের পড়ার ঘর এবং টোনিয়া ও ইউরার ঘর; এদিকটা হ'লো নিজেরা বাস করার জন্য। একতলাটি অতিথিদের জন্য। পেস্তা রঙের পর্দা, জলপাই রঙের আসবাবের ঢাকনা, সামুদ্রিক গাছ-গাছড়ার টব—সব নিয়ে একতলার ঘরটিকে সবুজ তন্দ্রাতুর সমুদ্রের তলদেশের মতো দেখায়।

গ্রোমেকোরা রুচিবান, অতিথিবৎসল, শিল্পের সমজদার, সংগীতপ্রেমিক। প্রায়ই লোকজন ডাকেন তাঁরা, কোনো সঙ্ঘায় ঘরোয়া গানবাজনার আসর বসে, চারটি তারের যন্ত্র ও তিনজন পিয়ানোবাদকের মিলিত অবদান পরিবেশন করা হয়।

১৯০৬ সালের জানুয়ারি মাসে সেইরকম এক সঙ্ঘ আসর বসার কথা ছিলো। টানিয়েভের ছাত্র, এক নবীন সুরকার এই প্রথম আত্মপ্রকাশ করবেন। বেহালায় সনাতা বাজাবেন তিনি, আর তিনজন বাদক বাজাবেন চাইকভস্কির একটি তিন যন্ত্রের রচনা।

ব্যবস্থা শুরু হলো আগের দিন থেকে। বসবার ঘরে আসবাবের জায়গা বদল হ'লো। কোনায় ব'সে পিয়ানোর মিস্ত্রি একই সুর বার-বার বাজাতে লাগলো, মুঠি-মুঠি পুঁতির মতো টুকরো হ'য়ে ছড়িয়ে পড়লো সবগুলি। রান্নাঘরে মুর্গির ছাল ছাড়ানো হচ্ছে, সবজি ধোয়া হচ্ছে, জলপাই-তেলের সঙ্গে মিশিয়ে তৈরি হচ্ছে স্যালাডের মশলা।

আনার প্রাণের বন্ধু, যাকে তিনি সব মনের কথা বলেন, সেই শুরা জেজিঙ্গের ভোর না-হ'তে হাজির হ'য়ে জ্বালাতন ক'রে মারছেন।

লম্বা, রোগা চেহারা শুরার, কাটা-কাটা নাক-চোখ, মুখের ভাব কিছুটা পুরুখালি, দেখলে হঠাৎ সম্রাটের^১ কথা মনে প'ড়ে যায়—বিশেষত যখন উনি ছাইরঙের আঙ্গীখান টুপিটি মাথার একপাশে হেলিয়ে বসিয়ে রাখেন। বাড়িতেও ঐ টুপি তাঁর মাথায় থাকে, শুধু টুপির সঙ্গে আটকানো ওড়নাটা সামান্য একটু সরিয়ে রাখেন।

দুঃখ অথবা উদ্বেগের সময় দুই বন্ধু পরস্পরের ভার লাঘব করেন। ভার লাঘব করার একমাত্র উপায় হ'লো অপরকে ক্রমাগতভাবে উত্তেজিত করা; দু'জনের কথপোকথন জ্বালাময় হ'য়ে উঠতে-উঠতে অবশেষে আবেগের আতিশয্যে ক্রন্দনে পর্যবসিত হয়, তারপর পুনর্মিলন।

রক্তের চাপ বৃদ্ধি পেলে যেমন জোঁকের কামড়ে উপকার পাওয়া যায়, তেমনি এই নাটুকেপনার পর দু'জনের মনেই শান্তি নামে।

বেশ কয়েকবার বিয়ে করেছেন শুরা জেজিঙ্গের, কিন্তু বিবাহবিচ্ছেদের সঙ্গে-সঙ্গে স্বামীদের ভুলে যান তিনি; বিয়েটা ঐর কাছে এতো নগণ্য একটা ঘটনা যে তাঁর ব্যবহারে একক মহিলাদের মতোই নিরুত্তাপ অস্থিরতা দেখা যায়। শুরা ছিলেন থিওজফিস্ট; কিন্তু তা সত্ত্বেও রুশ চার্চের যাবতীয় আচার অনুষ্ঠান তাঁর নখদর্পণে, এমন কি পরম পুলকের তুরীয় অবস্থাতেও পুরোহিতকে নির্দেশ না-দিয়ে পারতেন না। 'হে প্রভু, শ্রবণ করো,' 'এখন এবং চিরকাল এইরূপে হবে,' 'মহিমাম্বিত দেবদূত,' তাঁর কর্কশ, রুক্ষ কণ্ঠস্বরে অন্তহীনভাবে বিড়বিড় ক'রে যেতেন তিনি।

শুরা গণিত জানতেন, ছোটো-ছোটো ভারতীয় ধর্মসম্প্রদায়ের তত্ত্বকথা জানতেন, জানতেন মস্কোর সংগীতবিদ্যালয়ের সেরা শিক্ষকদের ঠিকানা, আর কে কার সঙ্গে বাস করে—কী যে জানতেন আর কী যে জানতেন না তা ভগবান ছাড়া কেউ বলতে পারে না। সেইজন্য বাড়ির সব বিশেষ ব্যাপারে তাঁর ডাক পড়ে, মধ্যস্থতা এবং ব্যবস্থাপনার ভার নেবার জন্য।

নির্দিষ্ট সময়ে অতিথিরা আসতে শুরু করলেন। বরফ পড়ছিলো, বাইরের দরজা খোলায় সঙ্গে-সঙ্গে দমকা বাতাস ব'য়ে যাচ্ছে। চঞ্চল তুষারের সহস্র পাকে সে-বাতাস জড়ানো। সেই শীতের মধ্য থেকে লম্বা বেটপ বরফের জুতো পায়ে পুরুষেরা উঠে আসছেন, ব্যতিক্রমহীনভাবে তাঁরা প্রত্যেকে যেন সচেতন হয়েছেন নিজেদের গৈয়ো বাঙালের মতো চেহারা করার জন্য, কিন্তু অপরপক্ষে তাদের স্ত্রীরা—হিমের জন্য লাল আভায়ে উজ্জ্বল তাঁদের মুখ, কোটের বোতাম খোলা, পেছনে ঠেলে-দেওয়া শাল, চুলে তুষারকণার চুমকি বসানো—চতুর প্রণয়ে লীলাময়ী তাঁরা যেন বিশ্বাসঘাতকতার প্রতিমূর্তি। 'কুই-র' ভাইপো,^২ নবীন সুরকারের প্রবেশের সঙ্গে সঙ্গে ফিসফিস গুঞ্জন ছড়িয়ে পড়লো।

নাচঘরের খোলা দরজার ওপিঠে ঝকঝক করছে খাবার টেবিল, শীতের রাস্তার মতো শাদা, লম্বা। চোখ ধাঁধিয়ে দেয় লাল রোয়ানবেরি-ভদকার জ'মে-খাওয়া বোতলের ওপর আলোর খেলা, রূপোর দানিতে স্ফটিকের পাত্র, সাজানো পাখীর মাংস আর অর্দভের^৩র পাত্র মন ভোলায়, আর খিদে জাগিয়ে তোলে শক্ত পিরামিড-আকৃতিতে ভাঁজ-করা ন্যাপকিন, বাদামের গন্ধভরা বেতের ঝুড়িতে বেগনি সিনেরারিয়া^৪।

১ তৎকালীন জারের কথা বলা হচ্ছে।—অনুবাসকের টীকা।

২ Cui : এক বিখ্যাত রুশ সাংগীতিক : ১৮৩৫-১৯১৮

৩ Hors-d' oeuvres : গাঠা মাংস, মাছ ইত্যাদি নানা প্রকার ছোটো-ছোটো খাবার।

৪ একরকম ফুলের গাছ, ঘরের মধ্যে কাচের পাত্রেই বাড়ে।

এই পার্শ্ব খাদ্য গ্রহণ করার সুখকে যথাশীঘ্র অনুভব করতে পারার ইচ্ছেতে সকলে তাদের অপার্শ্ব খাদ্যগ্রহণের কাজে ত্বরান্বিত হ'লো। সার বেঁধে বসলো সবাই। 'কিউ-র ভাইপো,' বাদক পিয়ানোর সামনে তাঁর আসন গ্রহণ করতেই আবার ফিসফিস করলো লোকেরা। বাজনা শুরু হ'লো।

সকলেই আশঙ্কা করছিলো যে সন্যাটটি যথোচিত মাত্রায় শুষ্ক, চেষ্টাকৃত এবং একঘেয়ে হবে, ভয়ানক দীর্ঘ হ'য়ে সন্যাটা তাদের সেই ভয় সার্থক করলো।

বিরতির সময় সমালোচক কেরিস্বেকভ আর আলেকজাণ্ডার গ্রোমেকোর মধ্যে তর্ক বেধে গেলো, কেরিস্বেকভ নিন্দে করছিলেন সন্যাটটির—গ্রোমেকো সপক্ষে যুক্তি দেখাচ্ছিলেন, আর লোকজনেরা ধূমপান করছিলো, কথা বলছিলো, বসছিলো চেয়ার সরিয়ে-সরিয়ে; তারপর পাশের ঘরের ঝকঝকে টেবিলের চাদর তাদের দৃষ্টি আকর্ষণ করলো আর তক্ষুনি বাজনা শুরু ক'রে দেওয়া ঠিক ক'রে ফেললো সকলে।

পিয়ানোবাদক তাঁর সহকারীদের ইঙ্গিত করলেন; বেহালাবাদক ও টিশকেভিচ সাড়ম্বরে অভিবাদন করলেন, বাজনার করুণ বিলাপ শুরু হ'লো।

ইউরা, টোনিয়া আর মিশা গর্জন—সে অর্ধেক সময় গ্রোমেকো-বাড়িতেই কাটাতো—তৃতীয় সারিতে ব'সেছিলো।

'ইয়েগোরোভনা আপনাকে ডাকছে', সামনে ব'সে-থাকা আলেকজাণ্ডার আলেকজাণ্ডোভিচের কানে ইউরা ফিসফিস করলো।

'ইয়েগোরোভনা গ্রোমেকোদের শাদা চুলের বৃদ্ধা দাসী, দরজার সামনে দাঁড়িয়ে ভয়ানক উত্তেজিতভাবে ইউরার দিকে তাকিয়ে আলেকজাণ্ডার আলেকজানড্রোভিচকে লক্ষ্য ক'রে মাথা ঝাকালছিলো—ইউরাকে বোঝাতে চায় যে তাঁর সঙ্গে এক্ষুনি কথা বলার তার ভয়ানক দরকার। আলেকজাণ্ডার আলেকজাণ্ডোভিচ ফিরে তাকিয়ে চোখ দিয়ে তাকে তিরস্কার ক'রে কাঁধ ঝাকালেন, কিন্তু সে দাঁড়িয়েই রইলো। কিছুক্ষণ পরে দেখা গেলো ঘরের এদিক থেকে ওদিকে ইঙ্গিতে কথাবার্তা চলছে, যেন দু'জন বোবা কালার আলাপ। সবাই ঘুরে-ঘুরে দেখছিলেন। আনা স্বামীর দিকে ত্রুজু দৃষ্টি হানলেন। আলেকজাণ্ডার লাল হ'য়ে গিয়ে উঠে পড়লেন, পা টিপে-টিপে ঘরের অপর প্রান্তে চ'লে গেলেন তিনি।

'তোমার লজ্জা করা উচিত, ইয়েগোরোভনা! সত্যি—এতো তাড়াই বা কিসের? কী, হয়েছে কী?'

ইয়েগোরোভনা তাঁর কানের কাছে বিড়বিড় করলো।

'কোন মণ্টেনেগ্রো?'

'হোটেল।'

'তা হয়েছে কী?'

'এক্ষুনি যেতে বলছে তাঁকে। ঠর কে যেন মারা যাচ্ছে সেখানে।'

'হ্যাঁ—এখন মারা যাচ্ছে। ভাবো একবার...। এখন হবে না, ইয়েগোরোভনা। এই বাজনাটা শেষ হ'লে বলবো। তার আগে পারবো না।'

'এক ওয়েটারকে গাড়ি দিয়ে পাঠিয়েছে ওরা, ঠকে নিয়ে যাবার জন্য। একজন মারা যাচ্ছেন, বলছি না, বঝতে পারছেন না? মহিলা—ভদ্রমহিলা একজন।'

'আর আমি বলছি না, যে এখন অসম্ভব। দু'এক মিনিটে কী ক্ষতিটা হবে শুনি?' চিন্তিত ভঙ্গিতে ভুরু কঁচকে, নাক ঘষতে-ঘষতে তিনি পা টিপে-টিপে নিজের জায়গায় এসে বসলেন।

বাজনার প্রথম অংশটা শেষ হ'লে, প্রশংসাসূচক আওয়াজ মিলিয়ে যাবার আগেই, তিনি বাদকদের কাছে উঠে গিয়ে টিশকেভিচকে বললেন তাঁর বাড়ি থেকে ডাক এসেছে, কোনো

একটা দুর্ঘটনা ঘটেছে সেখানে, বাজনা বন্ধ করতে হবে তাঁদের। তারপর দর্শকদের দিকে ফিরে হাত তুলে তাদের চুপ করতে অনুরোধ জানানেন :

‘ভদ্রমহিলা ও ভদ্রমহোদয়গণ, তিন যন্ত্রের সুরটি আর সম্ভব হবে না। শ্রীযুক্ত টিশকেভিচের বাড়ি থেকে দৃঃসংবাদ এসেছে। আমরা সকলে তাঁকে আমাদের সমবেদনা জানাচ্ছি। তাঁকে আমাদের ছেড়ে চ’লে যেতে হবে। এই রকম একটা সময়ে তাঁকে আমি একা যেতে দিতে চাই না, আমিও তাঁর সঙ্গে যাচ্ছি—যদি কোনো কাজে লাগতে পারি। ইউরা, বাবা, সিমুনকে গিয়ে বলো তো গাড়ি বের করতে, গাড়ি আগেই প্রস্তুত ক’রে রেখেছে সে। ভদ্রমহিলা ও ভদ্রমহোদয়গণ, আমি বিদায় নেবো না—আপনাদের সকলকে থাকবার জন্য অনুনয় করছি আমি—আমার ফিরতে দেরি হবে না।’

হিমেল রাত্রে গাড়ি ক’রে বেড়াবার জন্য ছেলেরাও তাঁর সঙ্গে নিলো।

২১

ডিসেম্বর মাস থেকে যদিও জীবনযাত্রা স্বাভাবিক হ’য়ে গিয়েছিলো, তবু তখনো মাঝে-মাঝেই এখানে ওখানে গুলি গোলা চলছে, আর নতুন কোনো আগুন—হামেসাই যা দেখা যায়—দেখলেই মনে হয় ডিসেম্বরের আগুন এখনো বুঝি নেভেনি।

এতোটা রাস্তা ছেলেরা আগে কখনো গাড়িতে যায়নি। আসলে অবশ্য মস্টেনেগ্রো কাছেই—স্মলেনস্কি বুলভা ছাড়িয়ে নভিনস্কি ধ’রে সাদোভায়া স্ট্রীটের অর্ধেকটা গেলেই হ’লো। কিন্তু এই বুনো ভূষার আর কুয়াশা যেন দূরত্বকে স্থানচ্যুত ক’রে দুই টুকরোয় ছিঁড়ে ফেলেছে, যেন পৃথিবীর সর্বত্র দূরত্বের মাপ আর এক নেই। রাস্তায় আগুনের ‘রোমশ, অপরিচ্ছন্ন ধোঁয়া, পায়ের শব্দ, স্নেজ গাড়ির করুণ আর্তনাদ—সব মিলিয়ে মনে হচ্ছিলো যেন অনন্তকাল ধ’রে তারা চলেছে, আর চলেছে কোনো এক ভয়ংকর রকম দূর স্থানে।

হোটেলের প্রবেশপথের বাইরে সফ, কায়দাদুরন্ত এক স্নেজ দাঁড়িয়ে ছিলো; ঘোড়াটা কাপড় দিয়ে ঢাকা, হাঁটুর কাছে ব্যাগুজ-করা। যাত্রীর আসনে কুঁজো হ’য়ে বসে চালক নিজেকে গরম রাখার চেষ্টা করছে, দস্তানা-পরা বিশাল হাতের থাবায় কাপড়ে ঝাঁপ মাথাটা ডোবানো।

হোটেলের বসবার ঘরটি বেশ গরম, জামা-কাপড় ছাড়বার ঘরের কাউন্টারের পেছনে ব’সে দরোয়ানটি ঢুলছিলো; ঘুলঘুলির মধ্য দিয়ে ভেসে-আসা শব্দ, জলন্ত স্টোভ আর ফুটন্ত সামোভারের আওয়াজ তার ঘুম-পাড়ানি গানের কাজ করছে, আর মাঝে-মাঝে নিজের কোনো এক নাসিকাগর্জনে চমকে উঠছে সে।

একতাল ময়দার মতো মুখে কড়া ক’রে রং মাখা একটি স্ত্রীলোক ঠা দিকে আয়নার সামনে দাঁড়িয়েছিলো। এই আবহাওয়ার পক্ষে তার পশমের জামাটি মোটেও যথেষ্ট গরম নয়। কারুর নেমে আসার জন্য অপেক্ষা করছিলো সে; আয়নার দিকে পেছন ফিরে দাঁড়িয়ে একবার কাঁধের ওপর দিয়ে মাথা ঘুরিয়ে-ঘুরিয়ে আয়নায় দেখে নিচ্ছিলো তার পেছন দিকটা ঠিক আছে কিনা।

সেই জ’মে-মাওয়া চালকটি ভেতরে ঢুকলো। তার প্রায় ফেটে-পড়া বেটপ কোটের জন্য তাঁকে রুটির দোকানের সাইনবোর্ডের বান্-রুটির মতো দেখাচ্ছে, তার চারপাশ থেকে বাষ্প বেরুচ্ছিলো—মিলটা তাতে আরো স্পষ্ট হয়ে উঠেছে। ‘আর কতোক্ষণ, দিদিমণি?’ আয়নার ধারের সেই স্ত্রীলোকটিকে সে প্রশ্ন করলো। আপনাদের সঙ্গে কেন যে নিজেকে জড়িয়ে ছিলাম জানি না। ঘোড়াটা জ’মে ম’রে যাক তা তো আর চাই ‘না।’

হোটেলের কর্মচারীরা পাগলের মতো হ'য়ে আছে: ২৩ নম্বর ঘরের ব্যাপারটা তাদের দৈনন্দিন বিবক্তিতে আরো একটি বিশ্রী সংযোজন মাত্র। মুহুর্তে-মুহুর্তে ঘণ্টার তীক্ষ্ণ শব্দ বেজে উঠছে, দেয়ালের ওপরকার লম্বা বাস্ত্রের সারির পেছনে নম্বরগুলি লাফিয়ে উঠে জানান দিচ্ছে কোন ঘরের খন্দের এবার খেপে গেছে, অথবা দাসীকে কী চায় তা না জেনে জ্বালাতন ক'রে মারাচ্ছে।

ডাক্তার তখন ঐ নেকি বৃড়ি গুইশারোভাকে বমির ওষুধ দিয়ে পেট ধুয়ে দিচ্ছিলেন। ঝি গ্রাশা একবার মেঝে ধুয়ে, একবার নোংরা জিনিশের বালতি নিয়ে গিয়ে পরিষ্কার বালতি নিয়ে আসছে। কিন্তু চাকরদের দিকে ঝড় শুরু হয়েছে এই গুণ্ডগোলটা বাধার অনেক আগে ঘরের টিরাশকাকে তখনো গাড়ি দিয়ে পাঠানো হয় নি ডাক্তার আর ঐ বিচ্ছিরি বেহালাবাদককে নিয়ে আসার জন্য, কমারোভস্কিও আর্সেনি তখন, আর ২৩ নম্বর ঘরের দরজার সামনের কারিডোরে এতো লোক ভিড় করে নি।

ঝামেলা শুরু হয়েছে সেই বিকেল থেকে: ভাঁড়ার ঘর থেকে সিঁড়ির চত্বরে যে-সকল গলিটা চ'লে গেছে সেখান দিয়ে ডান হাতে ভরা-ট্রের ভার সামলাতে গিয়ে কঁজো হ'য়ে সিসয় বেয়ারা আসছিলো ছুটে-ছুটে, এমন সময় কে যেন বিতর্কিচ্ছিরিভাবে তাকে এক ধাক্কা লাগিয়ে দেয় যার ফলে ট্রেটা ছাঁড়িয়ে পড়লো মাটির ওপর, স্যুপ উপচে গেলো, গুঁড়ো-গুঁড়ো হ'য়ে গেলো দুটো স্যুপ-প্লেট আর একটা মাংসের প্লেট।

সিসয় জোর দিয়ে বলতে লাগলো যে এর জন্য ঝি-ই দায়ী, ক্ষতিপূরণ তাকেই দিতে হবে। তখন প্রায় এগারোটা বাজে—অর্ধেক লোকের ছুটি হ'য়ে যাবার সময় হয়ে গেছে, কিন্তু ঝগড়া তখনো মিটছে না।

'কাপুনি রোগ আছে ওর, হাত-পা স্থির রাখতে পারে না। পারতো কেবল বোতল নিয়ে ব'সে থাকতে, মেয়েমানুষের বাড়ি, মশলা মাখানো হোঁরিং মাছের মতো লাল হ'য়ে যায়, আর তারপর বলে কে ওকে তেলে দিলো, কে ওর স্যুপ উল্টে দিলো, কে ওর বাসন ভাঙলো। কে তোকে ধাক্কা মেরেছে শুনি, শয়তান, আত্মাখানি জেঁক, নির্লজ্জ জানোয়ার কাঁহাকার?'

'তোমাকে আগেই ব'লে দিয়েছি, মাট্রিওনা স্টেপানোভনা, ভালোভাবে কথা বলবে।'

'আর এই সব ঝামেলাটা হচ্ছে কাকে নিয়ে, জিজ্ঞেস করতে পারি কি? ইস, কী আমার বাসন ভাঙবার যোগ্য লোক রে! এ তো বেবুশোটা, রাস্তাওয়ালি, ভাবদেনেওয়ালি, একসঙ্গে পাঁচ খন্দের জোড়ায় ঐ ধূর্ত মগি—আর্সেনিক গিলে ভালোই তো করেছিলো। ওঃ, ঠাকুরনের আবার মনটেনেগ্ৰোতে থাকা হয়, গলির একটা হলো বেড়ালকে দেখলে বোধ হয় চিনতেও পারবে না।'

শ্রীমতী গুইশারের ঘরের সামনের কারিডোরে পায়চারি করছিলো ইউরা আর গর্ডন। আলেকজান্ডার আলেকজান্ড্রোভিচ এ-রকম ব্যাপার কখনোই কল্পনা করেন নি। ভেবেছিলেন সাংগীতিকের জীবনের এক পরিচ্ছন্ন ভদ্র দুঃখ। কিন্তু এ কী বিশ্রী ব্যাপার। নোংরা এক কেলেঙ্কারি, বাচ্চাদের যোগ্য তো মোটেও নয়।

গলিতে ছেলেদের হাঁটা ধীর হ'য়ে এলো।

'মা-ঠাকুরনের কাছে যান না, দাদাবাবুরা,' ভ্যালেন্ট টি দ্বিতীয় বার তাদের কাছে এসে নরম ধীর গলায় বলতে লাগলো। 'ভেতরে যান, চিন্তার কিছু নেই। মা-ঠাকুরন ভালো আছেন, ভয় পাবেন না। অনেকটা সেরে উঠেছেন এখন। এখানে দাঁড়িয়ে থাকতে পারবেন না। আজ বিকেলেই একটা কাণ্ড ঘটে গেছে, দামি-দামি সব চিনেমাটির বাসন ভেঙে গেছে। খাবার নিয়ে

ছুটে-ছুটে যাওয়া-আসা করতে হয় আমাদের এখান দিয়ে, একটু সরু তো রাস্তাটা। আপনারা ভেতরে যান।’

ছেলেরা তা-ই করলে।

ঘরের ভেতরে সাধারণত টেবিলের ওপর একটা কেরোসিনের বাতি জ্বলতো, সেটাকে এখন বাতিদান থেকে তুলে কাঠের পাটিশনের ওপারে ঘুমোবার অংশে নিয়ে যাওয়া হয়েছে। ছারপোকার গন্ধে ভরা সেই অংশটা একটা ধূলিমলিন পর্দা দিয়ে আসল ঘর থেকে আড়াল করা। কিন্তু গণ্ডগোলের সময় পর্দাটা সরিয়ে দেওয়া হয়েছিলো, টেনে দেবার খেয়াল আর হয়নি কারো। একটা নিচু চোকির ওপর আলোটা বসানো, পাদপ্রদীপের বাতির মতো কটকটে আলোয় ঘরটা আলোকিত।

ঝি ভেবেছিলো আর্সেনিক, কিন্তু শ্রীমতি গুইশার আইওডিন খেয়ে আত্মহত্যা করার চেষ্টা করেছিলেন। কাঁচা আখরোটের খোসা যখন এতো নরম থাকে যে ঝুলেই কালো হ’য়ে তখন যে কটু, গম্বুধ-গম্বুধ গন্ধ থাকে আখরোটে, সেই গন্ধে ঘরটা ভ’রে আছে।

পাটিশনের ওপারে ঝি ঘর মুছছিলো, আর বিছানার ওপরে শুয়ে ছিলো একটি অর্ধ-উল্লঙ্ঘ স্ত্রীলোক; চোখের জল, জল আর ঘামে তার শরীর ভিজ়ে গেছে, লেপ্টে গেছে চুল, বালতির ওপর মাথাটা ঝুলিয়ে রেখে সে চীৎকার ক’রে কাঁদছে।

ছেলেরা তক্ষুনি চোখ ফিরিয়ে নিলো, সেদিকে তাকানোটা এতোই লজ্জাজনক ও অভব্য ব’লে মনে হ’লো তাদের। কিন্তু ঐটুকু দেখেই ইউরা উপলব্ধি করলো যে কোনো-কোনো বিস্ময়, উদ্বেজিত অবস্থায়, শ্রান্তি বা পরিশ্রমের মুহূর্তে স্ত্রীলোক আর সেই স্ত্রীলোক থাকে না, যাকে দেখা যায় ভাস্করের গড়া মূর্তিতে, বরং তার সঙ্গে তখন কোনো কৃষ্টিগিরের বেশি মিল, ফুলে-গুঠা মাংসপেশী নিয়ে, ল্যাঙ্স্ট প’রে যে আসন্ন লড়াই জন্য প্রস্তুত হয়েছে।

অবশেষে সেই পর্দাটা টেনে দেবার খেয়াল হ’লো কারো।

‘মিসিয় টিশকেভিচ, ওগো, তোমার হাত কই; তোমার হাত আমাকে দাও,’ কান্না আর বমির বেগে গলা আটকে আসছিলো স্ত্রীলোকটির। ‘ওঃ, কী ভয়ানক সময়ের মধ্যে দিয়েই না আমি গেছি। সাংঘাতিক সন্দেহই যে হয়েছিলো...মিসিয় টিশকেভিচ, আমি ভেবেছিলাম...কিন্তু স্মৃতির বিষয় সব বাজে, আমার আবোল-ভাবোল কল্পনা।...ভাবো একবার, কী শান্তি। আর এখন...এই তো...এই তো আমি...আমি বেঁচে আছি.....’

শান্ত হোন, আমেলিয়া কার্লোভনা, আমি মিনতি করছি—কী অস্বস্তিকর ব্যাপার, উঃ, কী অস্বস্তি!’

‘এবার বাড়ি যাবো,’ একটু রুদ্ধভাবে আলেকজান্ডার আলেকজান্ড্রোভিচ বাচ্চাদের বললেন। যন্ত্রণাদায়ক অস্বস্তি নিয়ে তারা প্রবেশপথের গলির দরজার সামনে দাঁড়িয়েছিলো, আর কোনদিকে তাকাতে ঠিক করতে না পেয়ে তাকিয়েছিলো সোজা সামনের দিকে, বড়ো ঘরের অঙ্ককার গভীরে।

দেয়ালে ফোটোগ্রাফ ঝুলছে, স্বরলিপি-ভরা একটি বইয়ের তাক, ‘ব্যাগান আম ফ্যাশন-পত্রিকার স্তূপ নিয়ে একটি লেখার টেবিল, আর ক্রুশের কাজ-করা ঢাকনা-দেওয়া গ্লোল টেবিলের ওপিঠে, একটা আরামকেদারায় শুয়ে আছে একটি মেয়ে, একটি হাত তুলে দিয়েছে পিঠের দিকে, কুশানের ওপর চেপে রেখেছে তার মুখ। ভয়ানক ক্লান্ত নিশ্চয়ই মেয়েটি, নয়তো এই কলরব আর উদ্বেজনার মধ্যে সে ঘুমোলো কী ক’রে?’

‘এবার আমরা যাবো,’ আলেকজান্ডার আলেকজান্ড্রোভিচ আবার বললেন। তাঁদের আসার কোনোই দরকার ছিলো না, আর বেশিক্ষণ থাকাটাও ভালো দেখাবে না।

‘টিশকেভিচ মশাই এলেই তাঁর কাছে বিদায় নিতে হবে।’

কিন্তু পাটিশনের ওদিক থেকে যে বেরিয়ে এলো সে টিশকেভিচ নয়, একজন ভারি-সারি, স্থূলকায়, আত্মবিশ্বাস সম্পন্ন ভদ্রলোক। মাথার ওপর দিয়ে বাতিটা ধ'রে সে টেবিলের কাছে এগিয়ে গিয়ে টেবিলের ওপর সেটা রাখলো। আলোয় মেয়েটি জেগে গেলো। লোকটির দিকে তাকিয়ে সে একটু হাসলো, চোখ ঘুরিয়ে আড়মোড়া ভাঙলো।

লোকটিকে দেখেই মিশা চমকে উঠলো, এমন ভাবে তাকিয়ে রইলো যেন চোখ ফেরাতে পারছে না। ইউরার জামার হাতা ধ'রে টেনে তার কানে কানে কী যেন ফিসফিস করার চেষ্টা করলে সে। কিন্তু ইউরা কিছুতেই শুনবে না।—‘লোকজনের সামনে ফিসফিস করো না—কী ভাববে তোমাকে?’

এদিকে সেই মেয়ে ও পুরুষটি এক মুক দৃশ্যের অভিনয় শুরু করেছেন তখন—কেউ কোনো কথা বলছে না, চেয়ে আছে এ ওর চোখের দিকে।

দু'জনের গোপন বোঝাপড়া যেন ডাইনির জাদুর মতো, লোকটি যেন এক পুতুল নাচের ওস্তাদ, আর মেয়েটি তার হাতে একটি বাধ্য পুতুল, অসুলিহেলনে ওঠে বসে।

ক্লাস্ত হাসিতে চোখ ভ'রে উঠলো তার, দুই চোঁট ঈষৎ ফাঁক হ'লো, কিন্তু লোকটির খুশি-খুশি দৃষ্টির উত্তরে ধৃত ভঙ্গিতে ষড়যন্ত্রকারীর মতো চোখ টিপলো সে। তারা দু'জনেই খুশি—সব ভালো যার শেষ ভালো—তাদের গোপন খবর এখনো নিরাপদ, এবং শ্রীমতী গুইশারের আত্মহত্যার প্রচেষ্টা ব্যর্থ হয়েছে।

ইউরা তার চোখ দিয়ে ওদের যেন গিলে খেতে লাগলো। গলির আধো অন্ধকারে সকলের দৃষ্টির অন্তরালে দাঁড়িয়ে সে পলকহীন দৃষ্টিতে সেই আলোর গতির দিকে তাকিয়ে রইলো। বন্দিনী কন্যার সঙ্গে তার প্রভুর আচরণের দৃশ্যটি একাধারে অবর্ণনীয়ভাবে রহস্যময় আর লজ্জাজনকভাবে স্পষ্ট। সম্পূর্ণ নতুন এক অনুভব, অজস্র বিপরীত অনুভূতি ভিড় ক'রে এসে ইউরার হৃদয় যন্ত্রণায় ভারি ক'রে দিলো।

এই ভোঁ এখানে ঠিক সেই ব্যাপার ঘটছে যা নিয়ে সে, মিশা আর টোনিয়া অন্তর্দীপ্তভাবে আলোচনা করেছে, ‘অল্লীল’ আখ্যায় ভূষিত করেছে, এরই প্রবল শক্তি এমন ভয় দেখিয়েছে আর আকর্ষণ করেছে তাদের যে নিরাপদ দূরত্বে থেকে শুধুমাত্র মুখের কথা দিয়ে এড়িয়ে গেছে একে। আর এখন, সেই শক্তি তার নিজের চোখের সামনে উপস্থিত, জ্যাস্ত সত্য, কিন্তু তবু কেমন গোলমালে, স্বপ্নের মতো আবরিত, নির্দয়ভাবে ধ্বংসকারী, অভিযোগকারী, অসহায়—কোথায়, ইউরার শিশুসুলভ দর্শন কোথায় গেলো, কী করবে সে এখন?

‘ঐ লোকটি কে জানো?’ রাস্তায় বেরিয়ে মিশা বললে। ইউরা, নিজের চিন্তা নিয়ে ব্যস্ত, কোনো জবাব দিলে না।

‘ঐ লোকটিই তোমার বাবাকে মদ খাওয়াতো জোর ক'রে, তোমার বাবার মৃত্যুর কারণ ও। সেই যে উকিল ওঁর সঙ্গে টেনে যাচ্ছিলো—মনে আছে, তোমাকে বলেছিলাম আমি?’

ইউরা তখন ভাবছে সেই মেয়েটির কথা, ভবিষ্যতের কথা, বাবার কথা না, অতীতের কথা না। মিশা কী বলছে সে অনুধাবন পর্যন্ত করতে পারলো না প্রথমটায়, আর তাছাড়া এতো ঠাণ্ডা যে কথা বলাও অসম্ভব।

‘জ'মে গেছো তো, সাইমন?’ আলেকজান্ডার আলেকজান্ড্রোভিচ গাডোমানের উদ্দেশে বললেন। বাড়ির দিকে রওনা হলো তারা।

পরিচ্ছেদ ৩

স্ভেনটিটস্কিদের বাড়িতে ক্রিসমাস উৎসব

১

এক শীতে আলেকজান্ডার আলেকজান্ড্রোভিচ আনাকে এক পুরোনো কাজ-করা আলমারি উপহার দিলেন। হঠাৎ সুবিধের দরে পেয়ে গিয়েছিলেন সেটি। আবলুশ কাঠে তৈরি, আকারে এত বড়ো যে বাড়ির কোনো দরজা দিয়েই পুরো আলমারিটি ঢোকানো গেলো না। অংশগুলি আলাদা-আলাদা ক'রে খুলে নিয়ে আসা হ'লো; তারপর সমস্যা দিলো ওটাকে রাখবার জায়গা নিয়ে; জিনিসটার যা কাজ তাতে বসবার ঘরে রাখা শোভা পায় না, আবার যা আকৃতি তাতে শোবার ঘরে ধরানো শক্ত। শেষ পর্যন্ত সবচেয়ে ভালো শোবার ঘরটির সামনে, সিঁড়ির চত্বরের একটি অংশ আলমারির জন্য পরিষ্কার করা হ'লো।

মার্কেল মিস্ত্রি এলো খোলা অংশগুলি জুড়ে দেবার জন্য। তার মেয়ে মারিকাকে সঙ্গে এনেছে; ছয় বছরের বাচ্চা। তার হাতে মিষ্টি দেওয়া হ'লো। চিটচিটে আঙুলে মিষ্টিটা ঝাঁকড়ে ধ'রে চুষতে-চুষতে বাবার কাজ দেখতে লাগলো সে।

প্রথমটায় কোনো গোলমাল হয়নি। কাবার্ডটা গ'ড়ে উঠলো আনার চোখের সামনে; যখন শেষ হ'য়ে এসেছে প্রায়—কেবল মাথাটা তখনো জোড়া হয়নি হঠাৎ তাঁর মাথায় মার্কেলকে সাহায্য করার খেয়াল চাপলো। আলমারিটার মধ্যে একেবারে ঢুকে গিয়ে একটা তাকের উপর দাঁড়ালেন আনা, পা পিছলে গেলো, হুমড়ি খেয়ে পড়লেন আলমারির গায়ে। আলগা কাঠের আলের ওপর দাঁড় করানো ছিলো আলমারিটা, মার্কেল দড়ি দিয়ে ঢিলেঢোলা ক'রে জড়িয়ে রেখেছিলেন—বাঁধ গেলো ছিঁড়ে। তাকগুলো মাটিতে প'ড়ে চারপাশে ছড়িয়ে গেলো, সেই সঙ্গে আনাও পড়লেন—মেঝের উপর একেবারে চিং হ'য়ে। সাংঘাতিক চোট পেলেন তিনি।

‘ও ঠাকুরন, ও মা,’ মার্কেল সবেগে ছুটে এলো। ‘কেন এ-কাজ করতে এলেন গো মা। হাড়-টাড় ভাঙেনি তো? দেখুন ন'ড়ে-চ'ড়ে দেখুন। হাড়ই হ'লো আসল, গায়ের নরম অংশে লাগলে কোনো ক্ষতি নেই। ঠাকুরের দয়ায় মাংসে আপনিই জোড়া লাগে—আর ঐ যে বলে না গায়ের মাংস তো শুধু মজা লোটবার জন্যই।—চূপ, জানোয়ার কাঁহাকার।’ ক্রন্দনরত মারিকার দিকে ফিরে সে ঝামটা মারলে। ‘নাক পরিষ্কার কর, মুখটা মুছে ফ্যাল।—মা-ঠাকুরন, আমাকে সাহায্য করার কোনো দরকার ছিলো না, আমি তো একাই কাজ শেষ ক'রে ফেলতাম, এটুকু ভরসা করতে পারলেন না আমার ওপর? হ্যাঁ এটা অবশ্য ঠিক কথা যে আমাকে দেখে হতভাগা এক মিস্ত্রি ছাড়া আর-কিছুই মনে হয় না, কিন্তু সত্যি কথা বলতে কী জানেন, আমার আসল ব্যবসা হ'লো গিয়ে ছুতোরগিরি। সেই পেশা নিয়েই তো ব্যবসা শুরু করেছিলাম। বললে বিশ্বাস যাবেন না কতো আসবাবই না আমার হাত দিয়ে গেছে, এই বলতে গেলে ধরুন গিয়ে—কাবার্ড, সাইডবোর্ড, গালায় কাজ, আখরোট কাঠের কাজ, মেহগনি। আর কতো সব বড়োলোকের বাড়ির বৌ-কিরা আমাকে দিয়ে কাজ করিয়েছে—এখন বললে বিশ্বাস করছে কে বলুন? আর

বলতে কী আমার নাকের তলা দিয়ে মিলিয়ে গেলো সব। কেন গেলো জানেন মা-ঠাকুরন? নেশা, কড়া নেশা গিলে-গিলেই আমার সব গেলো।'

একটা আরাম-কেন্দ্রা ঠেলতে-ঠেলতে নিয়ে এলো সে, আর ব্যথার ওপর হাত ঘষতে-ঘষতে আনা তাকে ধরে গোঙাতে-গোঙাতে চেয়ারের মধ্যে ডুবে গেলেন। মার্কেল ব্যাপৃত হ'লো আলমারির পুনরুদ্ধারের চেষ্টায়। মাথাটা বসানো হ'লে সে বললো, 'এইবার পান্না—ব্যস, তারপরই একেবারে এগজিবিশনে দেবার মতো চেহারা খুলবে।'

আলমারিটা পছন্দ হয়নি আনার। ওটার আকৃতি এবং আকার নাকি রাজকীয় কফিনের বেদী বা সমাধির কথা মনে করিয়ে দেয়। কুসংস্কারাচ্ছন্ন এক ভীতি তাঁকে পেয়ে বসেছিলো। আলমারিটার নাম দিয়েছিলো আঙ্কশ্দের কবর^১; আসলে বোঝাতে চেয়েছিলেন কুমার ওলেগ-এর^২ সেই ঘোড়াকে—নিজের প্রভুর মৃত্যুর কারণ যে হয়েছিলো। ধারাবাহিকভাবে পড়াশুনো না-করার দরুন আনার চিন্তাগুলি অসংলগ্ন হ'তো।

এই দুর্ঘটনার পর থেকে আনার ফুসফুস দুর্বল হ'য়ে গেলো।

২

১৯১১ সালের পুরো নভেম্বর মাসটা ফুসফুসের অসুখে শয়্যাগত হ'য়ে রইলেন আনা।

ইউরা, মিশা গর্ডন আর টোনিয়া—তিনজনেরই তার পরের বছর স্নাতক পরীক্ষা দেবার কথা; ইউরা ডাক্তারিতে, টোনিয়া আইনে, আর মিশা দর্শনে।

ইউরার মনের ধ্যানধারণাগুলি মিলে-মিশে এলোমেলো হ'য়ে ছড়িয়ে আছে—তার সব-কিছু, তার মতামত, তার অভ্যাস, তার অভিরুচি একান্তভাবে তার নিজের। মনে খুব সহজে ছাপ পড়ে তার, তার সজাগ ও অভিনব দৃষ্টিভঙ্গি রীতিমতো উল্লেখযোগ্য।

যদিও শিল্পকলা ও ইতিহাস তাকে আকর্ষণ করে, জীবনের পন্থা ভেবে নিতে ইতস্তত করেনি সে। ফুর্তি অথবা বিষন্নতা যেমন পেশা হ'তে পারে না, তেমনি শিল্পকলাও জীবিকার উপায় হ'তে পারে না। পদার্থবিদ্যা এবং প্রাকৃত বিজ্ঞানের দিকে ঝোঁক ছিলো তার, ব্যবহারিক জীবনে প্রয়োজন লাগে এমন কোনো কাজ লোকের বেছে নেওয়া উচিত এই ছিলো তার বিশ্বাস। সে চিকিৎসাবিদ্যা বেছে নিলে।

চার বছরের কোর্স ইউরার, প্রথম বছরে ছ'মাস সে শবব্যবচ্ছেদের ঘরে কাটালে। বিশ্ববিদ্যালয়ের বাড়ির নিচে, মাটির তলায় সেই ঘর। নেমে যেতে হয় আকাঁঝা সিঁড়ি বেয়ে। সব সময় ছাত্রদের এলোমেলো ভিড় সেই ঘরে, হাড়ের টুকরো দিয়ে ঘেরা পাঠ্য বই ছড়িয়ে কেউ গভীর মনোনিবেশ সহকারে পড়াশুনো করছে, যে যার নিজের জায়গায় দাঁড়িয়ে কেউ-কেউ আপন মনে শবব্যবচ্ছেদ ক'রে চলে, কেউ বা অকাজে ঘোরাফেরা ক'রে বেড়ায়, রসিকতা করে, ঘরের পাথরের মেঝের ওপর দিয়ে পদ্মপালের মতো ঘোরাফেরা করে ইদুর—কেউ বা তাদের তাড়া ক'রে সময় কাটায়। শবাধারে আধো অন্ধকারে শাদা ফসফরাসের মতো জ্বলজ্বল করে জলে-ডোবা রমণী আর আত্মহত্যাকারী যুবকদের সুরক্ষিত নগ্ন দেহগুলি, এখনো তারা নষ্ট হ'য়ে যায়নি। ফিটকিরি-নুনের ইনজেকশন নবজীবন দান করেছে এই দেহগুলিকে, এনে দিয়েছে প্রতারক এক সুগোল আকৃতি। শব কেটে ফেলা হয়, অংশগুলি বিচ্ছিন্ন ক'রে প্রস্তুত করা হয়, কিন্তু তবু মানবদেহের ক্ষুদ্রাতিক্ষুদ্র অংশও আপন সৌন্দর্য ধরে

১ আঙ্কশ হলেন রুশ রাষ্ট্রের প্রতিষ্ঠাতাদের অন্যতম; কিয়েভ রাজ্য পরিচালনা করতেন তিনি, সেখানেই তাকে সমাধি করা হয়েছিলো।

২ কিয়েভের রাজকুমার। তাঁর প্রিয় অশ্বের মাথার খুলি থেকে বেরিয়েছিলো যে-সাপ, তার দংশনেই তাঁর মৃত্যু হয়।

রাখে: দস্তার টেবিলের ওপর পাশবিক ভঙ্গিতে ছুড়ে-দেওয়া একটি মেয়ের সম্পূর্ণ দেহের দিকে তাকিয়ে ইউরা যতোটা বিষ্ময় অনুভব করে, ঠিক ততোটাই করে তার বিচ্ছিন্ন হাত অথবা হাতের পাতার দিকে তাকিয়ে। নিচের তলাকার সেই ঘরে কার্বলিক আর ফর্মান্ডেহাইডের গন্ধ, রহস্যে আচ্ছন্ন সেই ঘর—এই উলঙ্গ মৃতদের অজানা জীবনের, জীবন আর মৃত্যুর রহস্য; কী অন্তরঙ্গ এখানে মৃত্যু—মাটির তলার এই ঘরে যেন মৃত্যুর আবাস, কিংবা এই ঘর যেন তার প্রধান কর্মস্থল।

রহস্যের এই স্বর অন্য সব-কিছু ডুবিয়ে দিয়ে শব্দব্যবচ্ছেদে ব্যস্ত ইউরাকে অনামনস্ক করে তোলে। কিন্তু এ-জীবনের কতো বিচিত্র বস্তুই না বিক্ষিপ্ত করে তার মনোযোগ। এই চিস্তাবিক্ষেপ তার অভ্যাস হ'য়ে গেছে, তাকে আর দমাতে পারে না।

ইউরার বেশ চিন্তাশক্তি আছে, রচনাশক্তি আরো ভালো। গদ্যে একটি বই লিখবে—স্কুল-জীবন থেকে এই স্বপ্ন দেখেছে সে; বই লিখবে জীবনের অসংখ্য ছবি নিয়ে, তাতে সে লুকিয়ে রাখবে, গোপন ডিনামাইটের মতো, এ পর্যন্ত সে যা কিছু দেখেছে আর ভেবেছে তার সারাংশ। এখনো এই বই লেখার বয়সে সে পৌছয়নি; তাই সে কবিতা লেখে। যেন এক চিত্রকর সে, যার মনের তলায় আছে এক বড়ো ছবির ভাবনা, আর তারই জন্য ছোটো-ছোটো স্কেচ করে জীবন কাটিয়ে দিচ্ছে।

ইউরা ভাবে, পাপে জন্ম তার কবিতার, কিন্তু তবু তাদের দৃষ্টি আর স্বকীয়তা দেখে নিজেকে ক্ষমা না-ক'রেও সে পারে না। তার বিশ্বাস দৃষ্টি আর স্বকীয়তাই শিল্পকলাকে বাস্তবতা দিতে পারে, এই দুই গুণ ছাড়া শিল্প সম্পূর্ণ অর্থহীন, বাহুল্য, সময়ের অপব্যয় মাত্র।

তার চরিত্র গঠনে মামার প্রভাব যে কতো বেশি ইউরা তা উপলব্ধি করলো।

নিকোলে নিকোলেভিচ এখন লোজান-এ আছেন, সেখানে তাঁর কয়েকটি বই রুশ এবং অন্য কয়েকটি ভাষায় প্রকাশিত হয়েছে। এই বইগুলিতে তিনি ইতিহাসকে দেখেছেন এক পৃথক বিশ্বরূপে, এই বিশ্ব সৃষ্টি করেছে মানুষ নিজে, সময় এবং স্মৃতির সাহায্যে, মৃত্যুর বিরুদ্ধে দাঁড়িয়ে।

রচনাগুলি খৃষ্টধর্মের এক নতুন ব্যাখ্যায় অনুপ্রাণিত, তাই শিল্প সম্বন্ধে সম্পূর্ণ নতুন এক আলোকপাত করে।

এই মতগুলি মিশা গার্ডনের মনে এমনকি ইউরার চাইতেও বেশি ছাপ ফেললে। এই মতের প্রভাবেই দর্শনকে নিজের বিষয় হিসেবে বেছে নিলে সে; ধর্মশাস্ত্র বিষয়ে বক্তৃতায় সে উপস্থিত থাকে, এবং মাঝে-মাঝে এও ভাবে যে বিষয় বদলে ধর্মতত্ত্বের ক্লাশে যোগ দেবে।

মাতুলের প্রভাবে ইউরা এগিয়ে গেলো, পরিণত হ'লো; অপরপক্ষে মিশাকে কেমন যেন চেষ্টে রাখলো এই প্রভাব। ইউরা বোঝে যে মিশার চরম মতামতের কারণ অনেকটাই তার জাতিগত বৈশিষ্ট্য, আর বোঝে ব'লেই মিশার অদ্ভুত পরিকল্পনাগুলিকে ভেঙে দেবার চেষ্টা থেকে সাবধানে নিরস্ত করে নিজে; তবু মাঝে-মাঝে, এমন ইচ্ছেও ইউরার মনে জাগে বইকি যে মিশা আর-একটু অভিজ্ঞতানির্ভর হোক, আর-একটু জীবনের সঙ্গে ঘনিষ্ঠ।

৩

তখন নভেম্বরের শেষ; কলেজ থেকে বাড়ি ফিরতে একদিন খুব দেরি হ'য়ে গেলো ইউরার। ক্লাস্ত লাগছিলো, সারাদিন কিছু খায়নি। শুনলো বাড়িতে নাকি সবাই এক ট্রাসে কাটিয়েছে সেদিন বিকেলে। আনার অবস্থা খুব খারাপ হয়েছিলো। একাধিক চিকিৎসক এসেছিলেন তাঁকে পরীক্ষা করতে; এবং এক সময়ে তাঁরা আলেকজান্ডার আলেকজান্ড্রোভিচকে এমন কি পুরোহিত ডেকে পাঠাবার জন্য বলেছিলেন, পরে অবশ্য মত বদল করেন। এখন একটু ভালোর দিকে:

জ্ঞান ফিরে এসেছে, বলেছেন ইউরা বাড়ি ফেরামাত্র যেন তাকে তাঁর কাছে পাঠিয়ে দেওয়া হয়।

সারা ঘরে দেখা যাচ্ছে সে-দিনের হলুতুলের চিহ্ন। রাত-টেবিলে জিনিস-পত্র ছড়িয়ে রাখছিলো নার্স। সৈক দেবার জন্য যে-তোয়ালে আর ন্যাপকিনগুলি ব্যবহৃত হয়েছিলো, ভেজা আর কঁচকঁশা অবস্থায় তারা তখনো ঘরময় ছড়িয়ে আছে। কানির সঙ্গে বেরিয়ে-আসা রক্তে গামলার ভাল গোলাপি, ইঞ্জেকশনের ভাঙা শিশির টুকরো আর ভেজা তুলো ভসছে সেই জলে।

আনা শুয়ে আছেন, ঘামে ভেজা তাঁর শরীর, দুই চোঁট শুকনো। সেদিন সকাল থেকেই তাঁর মুখ বিবর্ণ।

‘ভুল চিকিৎসা হচ্ছে না তো?’ ইউরার হঠাৎ মনে হ’লো। ‘নিউমোনিয়ার সব লক্ষণই তো মিলে যাচ্ছে—একেবারে শেষ অবস্থায় সর্বদা যা-যা হয় সবই হয়েছে দেখছি।’ আনাকে সন্তাষণ জানিয়ে এই অবস্থায় সর্বদা যে-সব স্তোকবাক্য বলা হ’য়ে থাকে সব ব’লে নিলে ইউরা। তারপর নার্সকে ঘরের বাইরে পাঠিয়ে আনার নাড়ি টিপে ধ’রে স্টেথিস্কোপের জন্য কোটের পকেটে হাত ঢোকালো। আনা মাথা নাড়লেন, যেন বোঝাতে চাইলেন, আর-কোনো দরকার নেই, সব প্রয়োজন শেষ হ’য়ে গেছে। ইউরা বুঝলো অন্য কী যেন চাইছেন উনি। অনেক কষ্টে আনা কথা বললেন।

‘ওরা বলছিলো...শেষ প্রার্থনা...মৃত্যু আমার শিয়রে এসে দাঁড়িয়েছে...যে-কোনো মুহূর্তে...একটা দাঁত তুলতেও ব্যথার ভয়ে কাতর হয় লোকে, নিজেকে প্রস্তুত করে...কিন্তু এ তো শুধু দাঁত নয়...তোমার সর্বস্ব, সমস্ত জীবন...তুলে নেওয়া হবে...আর তার মানে কী? জানে না, কেউ জানে না...আর আমি বড়ো দুর্বল হ’য়ে পড়ছি, আতঙ্ক হচ্ছে আমার।’

চূপ ক’রে গেলেন। গাল বেয়ে চোখের জল গড়িয়ে পড়লো। ইউরা কিছু বললে না। একটু পরে আনাই আবার শুরু করলেন।

‘তুমি বুদ্ধিমান, প্রতিভাবান...সেজন্য অন্য সকলের চেয়ে তুমি আলাদা...আমাকে কিছু বলো...আমার মনকে শান্ত ক’রে দাও।’

‘আমি কি বলবো,’ ইউরা জবাব দিলে। চেয়ারে ব’সে হটফট করতে লাগলো সে, একবার উঠে দাঁড়ালো, পায়চারি ক’রে বেড়ালো, তারপর ব’সে পড়লো আবার। ‘প্রথমত, কাল আপনি অনেকটা সেরে উঠবেন, আমি লক্ষণ চিনি, কথা দিতে পারি আপনাকে। আর তারপর মৃত্যু, মৃত্যুর পরেও চৈতন্য থাকে কিনা, পুনরুত্থান...আপনি কি বৈজ্ঞানিক হিসেবে আমার মত জানতে চান? অন্য এক সময়ে বললে হয় না?—না?—একুনি?—বেশ, আপনার যা ইচ্ছে। কিন্তু জানেন, না-ভেবে-চিন্তে এ-সব কথা এমনভাবে বলা বড়ো কঠিন!’ বললে বটে, কিন্তু তখনই, সেই অপ্রস্তুত অবস্থায় ইউরা যে-বক্তৃতাটি দিলে তা তাকেও তাক লাগালো।

‘পুনরুত্থান...যে-স্থল উপায়ে দুর্বলকে সান্ত্বনা দেবার জন্য এই ধারণার প্রচার করা হয় আমাকে তা আকর্ষণ করে না। মৃত ও জীবিতের বিষয়ে খুঁটের খাণী আমি সর্বদাই অন্য ভাবে নিয়েছি। হাজার-হাজার বছর ধ’রে যে-অসংখ্য মানুষ আসছে এই পৃথিবীতে তাদের সকলের জন্য যথেষ্ট জায়গা কোথায়? পৃথিবী তো অতো বিপুল নয়—ওই ভিড়ে হারিয়ে যাবেন ঈশ্বর, হারিয়ে যাবে যা-কিছু ভালো, যা-কিছু অর্থময়। লোভাভুর ঐ প্রাণীকুলের সমাবেশে চাশা প’ড়ে যাবে সব।

‘কিন্তু জীবন এক এবং একক, কোনো সময়েই সে তার সন্তাকে হারিয়ে ফেলছে না, প্রতি মুহূর্তে সমন্বয় এবং রূপান্তরের মধ্য দিয়ে পূর্ণ করছে বিশ্বকে, নতুন ক’রে তুলছে নিজেকে। আপনি এই কথা জানতে উদ্বিগ্ন যে মৃত্যুর পর অন্য জীবন পারেন কি পারেন না, কিন্তু আপনি তো আগেই পেয়ে গেছেন সেই অন্য জীবন—জন্মের কণ্ঠে মৃত্যুর শয্যা থেকে জেসে

উঠেছিলেন আপনি, লক্ষ্যও করেন নি। ব্যথার কথা বলছিলেন—আমাদের শরীরের তন্তুগুলি কি বুঝতে পারে কখন তারা পরস্পরের কাছ থেকে বিচ্ছিন্ন হয়? এক কথায়, প্রশ্ন হচ্ছে আপনার চেতনার পরিণতি কী? কিন্তু চেতনা কাকে বলে দেখা যাক। সচেতনভাবে ঘুমের চেট্টা করা মানেই অনিদ্রারোগ ডেকে আনা, নিজের পরিপাকশক্তি সম্বন্ধে সচেতন হওয়ার অর্থই হ'লো হজমের গোলমাল বাধানো। চেতনাকে নিজের ওপর যখন প্রয়োগ করি চেতনা তখন তা এক রকম বিষ মাত্র। চেতনা হ'লো এমন এক আলোর রশ্মি, যা ধাবিত হয় কেবলমাত্র বাইরের দিকে, আমাদের সামনের পথ আলোকিত করে যাতে আমরা হোচট না খাই। রেল-এঞ্জিনের মুখের সামনে বাতির মতো এই আমাদের চেতনা—তার রেখা যদি ভিতরের দিকে ঘোরানো হয় সর্বনাশ হবে তাহ'লে।

'এখন—আপনার এই চেতনার পরিণতি কী তাহ'লে? আপনার চেতনা, শুধু আপনার, অন্য কারো নয়। আচ্ছা, আপনি আসলে কী? সেই জ্ঞানই হ'ল সার বিদ্যা। সেটা অনুসন্ধান করা যাক। নিজের মধ্যে আপনার কোন বস্তুকে সর্বদা আপনি "আমি" বলে জেনেছেন? আপনার মধ্যে কী আছে যার বিষয় আপনি সর্বদা সচেতন? আপনার বুদ্ধ? আপনার যকুৎ? আপনার রক্তবাহ?—না। স্মৃতির পথ বেয়ে যতো দূর পারেন তাকান, দেখবেন আপনি নিজেকে চিনছেন আপনার কোনো-না-কোনো বাহ্যিক, সক্ষম আত্মপ্রকাশের ভেতর দিয়ে—নিজের হাতের কোনো কাজের ভেতর, নিজের পরিবার, অন্যান্য মানুষের সঙ্গে মধ্য দিয়ে। আর তারপর দেখুন। অন্যদের মধ্যেই আপনি "আপনি" হ'য়ে ওঠেন, খুঁজে পান আপন আত্মাকে। এই হলেন আপনি। এই হলেন সেই আপনি যাকে নিশ্বাসে-প্রশ্বাসে গ্রহণ করেছে আপনার চেতনা, যা নিয়ে সে বেঁচে আছে, আর জীবন ভ'রে যাকে উপভোগ করেছে।—আপনার আত্মা, আপনার অমরতা, আপনাব জীবন—সব অন্যের মধ্যে। আর এখন? অন্যের মধ্যে আপনি জীবিত ছিলেন, অন্যের মধ্যে আপনি জীবিত থাকবেন। কী এসে যায় যদি তাকে পরে আপনার স্মৃতি বলা হয়? তাও তো আপনি—সেই মানুষই তো ভবিষ্যতে প্রবিস্ট হ'য়ে রূপান্তরিত হয় ভবিষ্যতেরই এক অংশে।

'এবার শেষ কথাটি বলি। দৃষ্টিস্তা করার কিছু নেই। মৃত্যু নেই। আমাদের চিন্তনীয় নয় মৃত্যু। কিন্তু আপনি প্রতিভার উল্লেখ করেছিলেন। সে তো আলাদা, সে তো একান্তভাবে আমাদের অধীন। মহত্তম, বৃহত্তম অর্থে কোনো বিশেষ ক্ষমতার অধিকারী হওয়ার অর্থ জীবনধারণের ক্ষমতার অধিকারী হওয়া।

'মৃত্যু থাকবে না, সমুদ্র ইয়ন বলেছেন, কী আশ্চর্য সরল তাঁর যুক্তি। মৃত্যু থাকবে না কেননা অতীত শেষ হ'য়ে গেছে। যেন বলা হ'লো যে মৃত্যু নেই কেননা মৃত্যু ফুরিয়ে গেছে, মৃত্যু পুরাতন, তাকে নিয়ে আমরা এখন ক্লাস্ত। আমাদের এখন এমন-কিছুর প্রয়োজন যা নতুন, সেই নতুনত্বই হ'লো শাস্বত জীবন।'

কথা বলতে-বলতে ঘরের মধ্যে হেঁটে বেড়াচ্ছিল ইউরা। 'এবার ঘুমোন,' সে বললে, বিছানার কাছে গিয়ে হাত রাখলে আনার কপালে। একটু পরেই ধীরে-ধীরে ঘুমিয়ে পড়লেন আনা।

আন্তে ঘর থেকে বেরিয়ে-এসে ইউরা ইয়োগোরোভনাকে বললে নার্সকে ডেকে দিতে 'উঃ, কী সাংঘাতিক,' সে ভাবলে; 'কী-রকম হাড়ুড়ে স্বভাব হ'য়ে যাচ্ছে আমার!' মন্ত্র পড়া, মাথায় হাত রাখা....'

পরের দিন আনার অবস্থা ভালোর দিকে ফিরলো।

আনা ক্রমেই সেরে উঠছিলেন। ডিসেম্বরের মাঝামাঝি বিছানা ছাড়ার চেষ্টা করলেন, কিন্তু তখনো তিনি খুবই দুর্বল। ডাক্তাররা নির্দেশ দিলেন শুয়ে থাকতে, সত্যিকার বিশ্রাম নিতে।

প্রায়ই ইউরা আর টোনিয়াকে ডেকে পাঠিয়ে আনা উরালে নিজের ছেলেবেলার গল্প বলেন। রিনভা নদীর ধারে তাঁর পিতার জমিদারি ভারিকিনোতে আনা বড়ো হয়েছেন। ইউরা বা টোনিয়া কেউই সেখানে যায় নি, কিন্তু আনার কথা শুনতে-শুনতে ইউরা সহজেই কল্পনা করতে পারতো, রাত্রির মতো কালো বারো হাজার একর বিস্তৃত দুর্ভেদ্য অনাবাদি বন-জঙ্গলের ভিতর দিয়ে ছুরির ফলার মতো তীক্ষ্ণ আকাবাঁকা রেখা, ক্ষিপ্ত ঝরনার জলে পাথরের বিছানা, ক্রুয়েগারের দিকে ঢালু পাহাড়।

জীবনে এই প্রথম ইউরা আর টোনিয়ার জন্য সাক্ষ্য পোশাক তৈরি করা হচ্ছিলো; ইউরার জন্য ডিনার-জ্যাকেট, আর টোনিয়ার জন্য হাক্সা সাটিনের শুধু গলাটুকু খোলা সাক্ষ্য-বস্ত্র।

স্ভেনটিক্সিদের বাড়িতে সাতাশ তারিখে চিরাচরিত বড়োদিন-উৎসবে তারা এই পোশাক প'রে যাবে। স্যুট আর গাউন একই দিনে এসে গেলো। ইউরা আর টোনিয়া প'রে দেখলো, খুশি হ'লো খুব, আনা যখন ইয়েগোরোভনাকে পাঠালেন তাদের ডাকতে তখনো পোশাক খুললো না তারা।

ওরা যেতে আনা কনুইয়ের ওপর ভর দিয়ে একটু উঠে বসলেন, তাকিয়ে-তাকিয়ে দেখে ঘুরে দাঁড়াতে বললেন ওদের।

'খুব সুন্দর,' বললেন তিনি, 'চমৎকার হয়েছে। জানতামই না যে তৈরি হ'য়ে গেছে। আমাদের আরেকবার ভালো ক'রে দেখতে দে, টোনিয়া। না, এই ঠিক আছে, আমার যেন মনে হচ্ছিলো যে কোমরের কাছে একটু কঁচকে আছে।—তোমাদের ডেকেছি কেন, জানো?—কিন্তু তার আগে তোমার সঙ্গে একটা কথা বলতে চাই, ইউরা।'

'জানি, আনা ইভানোভনা। আমি জানি আপনি চিঠিটা পড়েছেন, আমি নিজেই আপনাকে পাঠিয়ে দিয়েছিলাম। এও জানি যে নিকোলে নিকোলোভিচের সঙ্গে আপনি একমত। আপনারা দু'জনেই মনে করেন যে আমার উত্তরাধিকার প্রত্যাখ্যান করা উচিত হয়নি। একটু অপেক্ষা করুন। বেশি কথা বলা আপনার পক্ষে ভালো না। আমাকে বুঝিয়ে বলতে দিন—যদিও আমি যা বলবো তার অধিকাংশই আপনার জানা কথা।

'প্রথম কথা: উকিলদের পক্ষে জিভাগো-মামলা লড়তে চাওয়া খুবই স্বাভাবিক, কারণ আমার পিতার জমিদারিতে মামলার খরচ চালানো এবং ঋণ মেটাবার মতো যথেষ্ট অর্থ আছে। কিন্তু আসলে উত্তরাধিকার বলতে সত্যি কিছু নেই—দেনা, ঋণ, আর ঘরের কেলেঙ্কারি ছাড়া। সত্যিই যদি কিছু থাকতো যা থেকে অর্থলাভ হয়, তাহ'লে কি আপনি মনে করেন নিজে না-নিয়ে আদালতকে উপহার দিতাম আমি? কিন্তু আসল কথাটা কী জানেন—সব ব্যাপারটাই ভুলো। কাজে-কাজেই নোংরা খেঁটে হাত ময়লা করার চাইতে অস্তিত্ববিহীন এই সম্পত্তির ওপর দাবি তাগ করাই তো ভালো; যে-সব ভুঁইফোড় প্রতিযোগী আর ভণ্ডদের দল এর পেছনে লেগেছে তাদের হাতেই বরং সম্প্রতি যাক।

'আপনি জানেন, একজন দাবিদার হলেন কোনো-এক শ্রীমতী আলিস, নামের সঙ্গে যিনি জিভাগো পদবী ব্যবহার করেন, ছেলেপুলে নিয়ে থাকেন প্যারিসে—এর কথা অনেকদিন ধ'রেই শুনে আসছি। কিন্তু এখন আবার আরো বহু দাবিদারের উদ্ভব হয়েছে—আপনার কথা জানিনে, আমি খুবই সম্প্রতি তাদের নাম শুনেছি।

'মনে হয়, মা বেঁচে থাকতেই বাবা এক খেয়ালি রাজকুমারী—স্টলবানোভা এনারিসের দ্বারা আকৃষ্ট হয়েছিলেন। একটা সম্ভান হয় তাঁদের, ইয়েভগ্রাফ তার নাম, এখন তার দশ বছর বয়স।

‘এই রাজকুমারী নির্জনে বাস করেন। ওম্‌স্ক-এর ঠিক বাইরে একটি বাড়ি আছে তাঁর। সেখানেই থাকেন, কখনো কোথাও বেরোন না। তাঁর অর্থাগম কী ভাবে হয় জানা যায় না। বাড়িটার ফোটো দেখেছি আমি। পাঁচটি ফরাসি জানলা আর সিমেন্টের ওপর চিত্র-বিচিত্র করা কার্নিশ নিয়ে ভারি সুন্দর বাড়িটি।

‘সম্প্রতি কিছুদিন হ’লো আমার সব সময় কেমন একটা অনুভূতি হ’তো যে বাড়িটা তার পাঁচ-পাঁচটা জানলা দিয়ে লোংরা চোখে তাকিয়ে আছে আমার দিকে, উরাল আর মস্কোর হাজার মাইল দূরত্ব ডিঙিয়ে কখনো-না-কখনো সেই শয়তান-দৃষ্টি হানা দেবে আমাকে।

‘তাই বলছিলাম, এ-সব দিয়ে আমার কী হবে—এই কাল্পনিক বিস্ত, ভূয়ো দাবিদার, স্বেষ আর ঈর্ষা, আর ঐ সব উকিলদের দিয়ে?’

‘কিন্তু তবু বলবো ছেড়ে দেওয়াটা ঠিক হ’লো না,’ আনা বললেন। ‘তোমাদের কেন ডেকেছিলাম, জানো? আরো একবার প্রশ্ন ক’রে আনা আগের দিন যেখানে থেমেছিলেন সেখান থেকে কথা শুরু করলেন। ‘ওর নাম মনে রেখেছি আমি।—গতকাল যে-বনরক্ষীর কথা বলছিলাম তাকে মনে আছে তো? তার নাম ছিলো ব্যাকাস’। অসাধারণ নাম—নয় কি? সত্যিই ভয়ংকর ছিলো সে, শয়তানের মতো কালো, চোখের ভুরু অবধি দাড়িতে ঢাকা—ব্যাকাস নামে নিজের পরিচয় দেয়। কেমন যেন ভয়ানক তার মুখ, একবার এক ভালুকের আলিঙ্গনে ধরা পড়েছিলো সে, যুদ্ধ ক’রে বেঁচেছে। ওখানে সবাই ঐ রকম। ঐ রকমই নাম সকলের—অথহীন, সুগোল, সুখশ্রাব্য। ব্যাকাস, লুপাস, ফস্টাস। যখন-তখন এসে উপস্থিত হ’তো এই রকম কোনো লোক—হয়তো অস্টাস তার নাম —ঠাকুরদার আমলের দোনলা বন্দুকের গুলির মতো বেরিয়ে-আসা নাম—আর আমরাও তক্ষুনি নার্সারি থেকে দল বেঁধে বেরিয়ে চ’লে যেতাম রান্নাঘরে। সেখানে—তোমরা ভাবতেও পারো না কী সেই রোমাঞ্চ—না জানি কে এসেছে। কে জানে হয়তো কাঠকয়লাওলাই এসেছে জ্যাস্ত এক ভালুকছানা সঙ্গে ক’রে, কিংবা হয়তো এক দালাল এসেছে জমিদারির সুদূর প্রাপ্ত থেকে কোনো খনিজ দ্রব্যের নমুনা নিয়ে। ঠাকুরদা সর্বদা তাদের চিরকুট দিয়ে দিতেন দপ্তরে দেবার জন্য। কাউকে টাকা দেওয়া হ’তো, কেউ বা পেতো গম, কেউ বন্দুকের কার্তিজ। বন চলে এসেছে ঘরের জানলায়। আর তুষার, সেই তুষার। ছাদের চেয়েও উঁচু।’ আনার কাশি শুরু হ’লো।

‘অনেক হয়েছে, শরীর খারাপ হবে আপনার।’ ইউরা আর টোনিয়া জোর করে।

‘বাজে বোকা না, আমি খুব ভালো আছি। হ্যাঁ, ভালো কথা। ইয়েগোরোভনা আমাকে বলছিলো তোমরা পরশু নিমন্ত্রণে যাবে কি যাবে না ঠিক করতে পারছে না। এ-সব বোকামির খবর যেন আর আমার কানে না আসে, লজ্জা করা উচিত তোমাদের। নিজেকে তুমি না ডাক্তার মনে করো, ইউরা? —তা হ’লে এই ঠিক রইলো—তোমরা যাবে এবং এ-কথার কোনো নড়চড় হবে না। ব্যাকাসের কথায় ফিরে আসা যাক। অল্প বয়সে কামারের কাজ করতো সে। কার সঙ্গে মারামারি ক’রে ভেতরে-ভেতরে জখম হয়। তাই লোহা দিয়ে নতুন নাড়িভুঁড়ি তৈরি ক’রে নিয়েছিলো সে।— ইউরা, বোকামি করো না। তা যে করা যায় না তা আমিও জানি, কিন্তু সবই কি আক্ষরিক অর্থে মেনে নিতে হবে? তবে ওখানে সবাই এ-সব কথা বলতো।’

আরেকটি কাশির বেগ এসে কথায় বাধা দিলো, এবার আগের চাইতে অনেক বেশি দীর্ঘস্থায়ী। কাশি হ’তেই লাগলো, দম বন্ধ হ’য়ে এলো আনার।

ছুটে এগিয়ে এলো ইউরা আর টোনিয়া। কাঁখে কাঁধ ঠেকিয়ে তাঁর বিছানার পাশে দাঁড়িয়ে রইলো তারা। পরস্পরের হাতে হোঁয়া লাগল। কাশতে-কাশতেই আনা তাদের দুজনের হাত

নিজের হাতের মুঠোয় একসঙ্গে কিছুক্ষণ আঁকড়ে রাখলেন। স্বপ্ন কথা বলার ক্ষমতা ফিরে এলো, বললেন, ‘যদি আমি মরি, তোমরা একসঙ্গে থেকো। তোমরা দু’জনে দু’জনের জন্য তৈরি হয়েছো। বিয়ে কোন্সে। আমি তোমাদের বিয়ে ঠিক ক’রে দিলাম।’ এই ব’লে আনা কঁদে ফেললেন।

৫

১৯০৬ সালের বসন্ত আসতে-আসতে কমারোভস্কির সঙ্গে তার ছয় মাসের অবৈধ প্রণয় লারার সহ্যের সীমা অতিক্রম করলো—তখনো স্কুলের উচ্চতম শ্রেণীতে ওঠেনি সে। ধৃত কমারোভস্কি তার এই প্রানিকর অবস্থার সুযোগ নিতে কসুর করতো না, আর যখনই সুযোগ পেতো তখনই—যেন না বুঝে—লারার জীবন যে লজ্জার একথা মনে করিয়ে দিতো তাকে। এই ইঙ্গিতগুলি ঠিক ততোখানি অস্থির অবিন্যস্ত অবস্থায় এনে ফেলতো লারাকে, যতোখানি ইন্দ্রিয়লোলুপ কোনো লোকের একজন স্ত্রীলোককে নিচে টেনে আনার জন্য প্রয়োজন হয়—মেয়েটি অসহায় বোধ করে তার কান্নাতুর দুঃস্বপ্নের সামনে, সেই স্বপ্নের ঘোর কাটিয়ে ওঠার সঙ্গে-সঙ্গে আতঙ্কে হিম হ’য়ে যায় সে। পরস্পরবিরোধী যে-উন্মাদ জগতে লারা সারা রাত কাটায় সে-জগৎ ডাইনির জাদুর মতো অবোধ। সে-জগতের সবকিছু এলোমেলো, যুক্তিতর্কের বাইরে; তীব্র বেদনা সে-জগতে নিজেকে প্রকাশ করে রূপোলি হাসির ছটায়, সেখানে বাধা আর প্রত্যাখানের অর্থ সম্মতি, সেখানে অত্যাচারীর হাত আচ্ছাদিত হয় কৃতজ্ঞ চুষনে।

মনে হয়েছিলো এর বৃষ্টি শেষ নেই; কিন্তু সেই বসন্তে স্কুলের টার্ম শেষ হওয়ার মুখে একদিন ইতিহাসের পড়া তৈরি করতে-করতে সে আগামী ছুটির কথা ভাবছিলো, যখন এমনকি স্কুল আর বাড়ির পড়াও তার আর কমারোভস্কির মধ্যে বাধা সৃষ্টি করতে পারবে না, তখন ইঠাৎ সে এমন এক সিদ্ধান্ত নিয়ে ফেললে যা তার সারা জীবনের গতি বদলে দিলে।

খুব গরম ছিলো সেদিন সকালবেলা, ঝোড়ো বাতাস বইছিলো। ক্লাশ-ঘরের খোলা জানলা দিয়ে মৌচাকের গুঞ্জনব মতো একঘেয়ে শহরের কলরব দূর থেকে ভেসে আসছে, উঠোনে বাচ্চারা খেলছে—শোনা যাচ্ছে তাদের চীৎকার। শ্রোভ’-পরবে খুব বেশি ভডকা আর প্যানকেক খাবার পর যেমন মাথা ধ’রে যায়, তেমনি কিম ধরিয়ে দিচ্ছে মাটির আর কচি পাতাব ঘাসের মতো সৌরভ।

নেপোলিয়নের মিশর-বিজয় পড়ানো হচ্ছিলো। শিক্ষক সবে ফ্রেজুস-যুদ্ধের কাহিনী পর্যন্ত এসেছেন এমন সময় অন্ধকার ক’রে এলো, বিদ্যতে বজ্র চিরে গেলো, ফেটে গেলো আকাশ, ধুলো আর বালির ডেউ বৃষ্টির গন্ধ নিয়ে ক্লাশ-ঘরের মধ্যে ভেসে এলো। স্কুলের দু’জন অনুগত মেয়ে কৃতার্থ ভঙ্গিতে দরোয়ানকে ডাকতে গেলো জানলা-দরজা বন্ধ করবার জন্য, আর তারা দরজা খোলার সঙ্গে-সঙ্গে বাতাসের ঝাপটায় সব ক’টা ব্রটিং-কাগজ উড়ে গেলো ডেস্কের ওপর থেকে।

জানলা বন্ধ ক’রে দেওয়া হ’লো। অবিরল ধারায় বৃষ্টি পড়ছে বাইরে, ধুলোয়-ধুলোয় নোংরা। লারা তার খাতার একটা পাতা ছিড়ে নিলে, পাশেই ব’সে ছিলো নাড়িয়া কলোগ্রিভা, তাকে লিখলে:

১ Shrovetide- ইস্টার-এর আগে চল্লিশ-দিন-ব্যাপী Lent-এর উপবাসের নিয়ম আছে; Lent-এর প্রথম দিন হলো Ash Wednesday, তার আগের দিনটি Shrove Tuesday। শ্রোভ-মঙ্গলবার ও তার পূর্ববর্তী দিনগুলিকে শ্রোভটাইড বলা হয়, ঐ সব দিনে পুরোহিতের কাছে নিজের পাপাচরণ স্বীকার করা বিশেষ। পাঠকের স্মরণ্য যে রশিয়া গ্রীক (বা Orthodox) চার্চের গ্রীক, রোমান ক্যাথলিক বা প্রটেস্ট্যান্ট আচাৰ্যে অনুষ্ঠানের সঙ্গে তার সর্বাংগে মেলে না।—অনুবাদের টিকা।

‘নাডিয়া, আমি মার কাছ থেকে চ’লে গিয়ে আলাদা থাকতে চাই। যথাসম্ভব বেশি মাইনেতে কোনো পড়ানোর কাজ খুঁজে দিবি আমাকে? বড়োলোকদের মধ্যে তোর চেনাশোনা তো অনেক।’

নাডিয়া জবাব দিলে:

‘মা-বাবা লিপার জন্য একজন গভর্নিস খুঁজছেন। তুই আমাদের কাছেই আয় না কেন? —অশ্চর্য ভালো হয় তা হ’লে। জানিসই তো ওঁরা তোকে কত ভালোবাসেন।’

৬

কলোগ্রিভভদের কাছে তিন বছর কাটালো লারা, যেন দুর্গে বাস করছে এমন নিরাপদে। কেউ তাকে বিরক্ত করতে আসে না, এমন কি তার ভাই আর মা-ও সে আলাদা হ’য়ে আসার পর থেকে তাকে আর খাঁটিতে আসে না।

কলোগ্রিভভ একজন নতুন ধরনের তুখোড় ব্যবসায়ী। খুবই নিচু থেকে উন্নতির চরম শিখরে উঠেছেন, এখন তিনি এতোটাই ধনী যে রাজকোষের সঙ্গেও প্রতিযোগিতা চালাতে পারেন। ‘ক’য়ে-আসা সমাজ-ব্যবস্থাকে তাঁর জীবনের দুই পরিপ্রেক্ষিতে দেখে অবজ্ঞা আর ঘৃণা করেন তিনি; রাজনৈতিক বন্দীদের নিজের বাড়িতে আশ্রয় দিয়ে তাদের পক্ষে লড়বার জন্য উকিল নিযুক্ত করেন ভদ্রলোক; একটা ঠাট্টাও প্রচলিত আছে তাঁর সম্বন্ধে—বিপ্লবকে দমন করবার জন্য তিনি নাকি এতোই ব্যস্ত যে নিজেই নিজের কারখানাতে ধর্মঘটের ইন্ধন জোগান। শিকার করতে ভালোবাসেন তিনি, তাকও খুব ভালো—১৯০৫ সালের শীতে ছুটির দিনে সম্ভ্রাসবাদীদের রাইফেল ছোঁড়া শেখাতেন সেরেব্রিয়ানের বনে।

কলোগ্রিভভ যেমন তাঁর নিজস্ব ধরনে বিশিষ্ট ব্যক্তিত্বসম্পন্ন, তাঁর স্ত্রী সেরাফিমাও তাই। দু’জনকেই খুব ভালোবেসেছিলো লারা, আর ওঁদের সমস্ত পরিবারও তাকে একেবারে আপন ক’রে নিয়েছিলো।

তিন বছর নিশ্চিন্ত জীবন যাপন করার পর একদিন তার ভাই রডিয়া একটা দরকারে তার সঙ্গে দেখা করতে এলো। লম্বা-লম্বা তার দুই পায়ের ওপর দাঁড়িয়ে অত্যন্ত সচেতনভাবে সামনে পিছনে দুলাছিলো রডিয়া, আর নাটকীয়রকম জোর দেবার জন্য কথা বলছিলো নাকি সুরে। সে বললে যে সেই বছরের ক্যাডেটরা^১ পরিষদ-প্রধানের বিদায় উপলক্ষে কিছু টাকা তুলেছিলো; সেই টাকায় পছন্দসই কোনো উপহার কেনার জন্য তারা রডিয়ার ওপর ভার দেয়। দুদিন আগে টাকাটা সে জুয়ো খেলে উড়িয়ে দিয়েছে—শেষ কপর্দক অবধি। লারাকে সব-কিছু খুলে বলবার পর রডিয়া ধপ ক’রে একটা আরাম-কেন্দারায় ব’সে পড়লো, তারপর ভেঙে পড়লো কান্নায়।

বিত্তীষিকায় যেন জ’মে গিয়ে লারা ব’সে রইলো। ফোপাতে-ফোপাতে ব’লে চললো রডিয়া।

‘কাল রাতে আমি ভিষ্টর ইপলিটোভিচের কাছে গিয়েছিলাম। এ নিয়ে আমার সঙ্গে কোনো কথা বলতেই উনি রাজি হ’লেন না, কিন্তু বললেন যদি তুমি চাও যে উনি...উনি বললেন যে যদিও তুমি আজকাল আমাদের কাউকেই আর ভালোবাসো না, তবু ওঁর ওপর তোমার ক্ষমতা এখনো এতো বেশি...লারা, লক্ষ্মীটি...শুধু তোমার মুখের একটি কথাই যথেষ্ট...দুখতে পারছো না এর ফলে আমার কী হ’তে পারে, কী ভয়ানক লজ্জা, ক্যাডেট হিসেবে আমার সব মান-সম্মান যে এরই ওপর নির্ভর করছে...ওঁর কাছে একবার যাও, ক্ষতিটা কী তাতে...তুমি কি চাও আমার সমস্ত জীবনটা এইভাবে নষ্ট হ’য়ে যায়?’

‘তোমার জীবন...ক্যাডেট হিসেবে তোমার মান-সম্মান,’ রাগে বিরক্তিতে ঘরময় পায়চারি

^১ Cadet: সামরিক বিদ্যালয়ের ছাত্র।—অনুবাদের টীকা।

করতে লাগলো লারা। ‘কিন্তু আমি তো ক্যাডেট নই। আমার তো মান-সম্মান নেই। আমাকে নিয়ে যা খুশি তাই করতে পারো তোমরা। তুমি যা বলছো তার মানে কি তুমি জানো? তুমি কি বুঝতে পারছো তোমাকে দিয়ে ও কী করিয়ে নিচ্ছে? বছরের পর বছর কেটে গেছে দাসীবৃত্তি ক’রে, আর তারপর এখন কোথা থেকে এসে উপস্থিত হ’লে তুমি, এতোদিন ধ’রে যা-কিছু আমি গ’ড়ে তুলেছি তা যদি হাওয়ায় উড়ে যায় তাতে তোমার কিছুই এসে যায় না। জাহান্নামে যাও! যাও, গুলি ছুঁড়ে আত্মহত্যা করো। আমার কী এসে যায়? কতো টাকা দরকার তোমার?’

‘ছ’শো রুবলের কিছু বেশি।—এই সাতশোই ধরো সবসুদ্ধ।’ একটু ইতস্তত ক’রে রডিয়া কথাটা যোগ করলো।

‘রডিয়া! তুমি পাগল হ’লে! কী বলছো তা জানো? সাতশো রুবল তুমি জুয়ো খেলে উড়িয়েছো? জানো, আমার মতো একজন সাধারণ লোকের সং উপায়ে এই টাকাটা উপার্জন করতে কতো দিন লাগে?’

হঠাৎ থেমে গেলো লারা: কিছুক্ষণ চুপ ক’রে থেকে যেন নিতান্ত বাইরের কোনো লোককে বলছে এমন নিরুত্তাপ গলায় বললো, ‘ঠিক আছে। আমি চেষ্টা করবো। কাল এসো। আর তোমার রিভলভারটা এনো—যেটা দিয়ে আত্মহত্যা করবে ঠিক করেছিলো। ওটা তুমি দিয়ে দেবে আমাকে। বেশি ক’রে গুলি ভরে এনো, ভুলো না।’

টাকাটা লারা কলোগ্রিভভের কাছে থেকে নিলো।

৭

কলোগ্রিভভদের কাছে কাজ করলেও স্কুল-জীবন শেষ ক’রে বিশ্ববিদ্যালয়ের পড়া শুরু করতে কোনো অসুবিধে হয়নি লারার। পড়াশুনোয় সে ভালো করছিলো, পরের বছর, ১৯১২-তে সে স্নাতক পরীক্ষা দেবে।

১৯১১ সালের বসন্তে লারার ছাত্রী লিপা স্কুলের গণ্ডি পেরোলো। ফ্রীজেনডাঙ্ক নামে এক তরুণ এঞ্জিনিয়ারের সঙ্গে ইতিমধ্যেই বাগদত্তা হয়েছে সে। অবস্থা ভালো ছেলেটির, বড়ো বংশ। লিপার মা-বাবার পছন্দ হয়েছিলো তাকে, কিন্তু এতো অল্প বয়সে মেয়ের বিয়ে দেবার তাঁদের ইচ্ছে নেই। লিপা অতিরিক্ত প্রশ্রয়ে নষ্ট, এ-বাঁড়ির খেয়ালি আত্মাদি মেয়ে, অনেক হলুস্কুল করে এ নিয়ে, সরবে ঝগড়া করে মা-বাবার সঙ্গে, মেঝেতে দুমদাম পা ঠোকে।

এই ধনী গৃহে লারাকে পরিবারেরই একজন ব’লে ধ’রে নেওয়া হয়েছিলো; তাকে তার ঋণের কথা কখনো কেউ মনে করিয়ে দিতো না—কিংবা সত্যি বলতে কারোর হয়তো মনেই ছিলো না কথাটা। টাকাটা অনেক আগেই শোধ ক’রে দিতো সে, পারেনি তার গোপন খরচের জন্য।

পাশার অজান্তে সে তার বাবাকে সাইবেরিয়ায় টাকা পাঠাতো, তার নিত্য-অভিযোগপরায়ণ, বিলাপকারিণী মা-কে সাহায্য করতো, আর পাশার বাড়িওয়ালির হাতে তার থাকা-খাওয়ার জন্য ধার্য টাকার কিছু অংশ তুলে দিতো—পাশার যাতে কম খরচ করতে হয়। কামেরগেব স্ট্রাটে আর্টস থিয়েটারের কাছে লারাই পাশাকে ঘর ঝুঁজে দিয়েছে।

তার চেয়ে বয়সে অল্প ছোটো পাশা, সে উদ্বাদ আবেগ নিয়ে লারাকে ভালোবাসে, তার সামান্যতম ইচ্ছাও পালন করে। স্কুলে সে বিজ্ঞান পড়েছে, কিন্তু এখন লারার পরামর্শে গ্রীক ও ল্যাটিন শিখছে আর্টস ডিগ্রি নেবে ব’লে। লারার স্বপ্ন যে সামনের বছর দু’জনেই গ্র্যাজুয়েট হ’য়ে তারা বিয়ে করবে, তারপর উরালের কোনো প্রাদেশিক রাজধানীতে চ’লে যাবে স্কুল-শিক্ষকের কাজ নিয়ে।

১৯১১-র গ্রীষ্মে লারা শেষ বারের জন্য কলোগ্রিভভদের সঙ্গে ডুল্লিয়াস্কাতে গেলো। জায়গাটার প্রতি তার সুগভীর অনুরাগ, যাদের দেশ তাদের চাইতেও বেশি ভালোবাসে সে

ডুমিয়াঙ্কাকে। ওঁরা সেটা বুঝতেন ব'লে একটা নিয়ম আপনা থেকেই প্রচলিত হ'য়ে গিয়েছিলো। নোংরা আর গরম ট্রেন থেকে স্টেশনে নামার পর ঠেলাগাড়িতে মাল তোলা হ'লো, পরিবারের অন্য সকলে গাড়িতে উঠে বসলেন, লাল জামা আর হাত-কাটা কোট পরা ডুমিয়াঙ্কার গাড়োয়ান সে-বছরের সব স্থানীয় খবর বলতে শুরু করলো,—তখন লারা, প্রকৃতির অসীমতায় মুগ্ধ চৈতন্যহীন লারা, গ্রামের নিঃশব্দতা নিঃশ্বাসে-প্রশ্বাসে গ্রহণ করতে-করতে পায়ে হেঁটে বাড়ির পথ ধরলো।

পাখি আর তীর্থযাত্রীদের পায়ে-হাঁটা পথ রেল-লাইনের পাশ দিয়ে যেতে-যেতে এক জায়গায় মাঠের দিকে বেকেছে। সেখানে দাঁড়ালো লারা, চোখ বুজে বিপুল পল্লীপ্রকৃতির বিচিত্র গন্ধে মদिर-হওয়া বাতাস প্রাণ ভরে নিঃশ্বাসের সঙ্গে টেনে নিলো। এ তার আত্মীয়ের চেয়ে প্রিয়, প্রেমিকের চেয়ে ভালো, বইয়ের চেয়ে বিস্তারিত। এক মুহূর্তের জন্য সে আবার জীবনের মানে খুঁজে পেলো। এই মাটিতে সে জন্মেছে, প্রকৃতির এই বন্য আকর্ষণকে অর্থময় করবার জন্য, প্রত্যেক জিনিসকে সঠিক নামে ডাকবার জন্য, আর যদি সে নিজে অক্ষম হয় তাহ'লে এই জীবনকে ভালোবেসে তার উত্তরাধিকারীদের ডেকে আনবে সে, তার বদলে তারাই নেবে এই দায়িত্বের ভার।

সেই গ্রীষ্মে অনেক কর্তব্যের চাপে শ্রান্ত হ'য়ে সেখানে গিয়েছিলো সে। অল্পেই ভেঙে পড়ে, মেজাজ বিটখিটে, আর তুচ্ছতম ব্যাপারেও অপমানিত বোধ করার জন্য যেন প্রস্তুত হ'য়েই থাকে। অত্যন্ত উদার ছিলো তার স্বভাব, অত্যন্ত বুদ্ধিমতী মেয়ে সে—এই ধরনের স্পর্শকাতরতা তার পক্ষে নিতান্তই নতুন এবং স্বভাববিরোধী।

কলোগ্রিভভরা আগের মতোই ভালোবাসেন তাকে; তাঁদের ইচ্ছে সে তাঁদের সঙ্গেই থাকে। কিন্তু লিপা এখন বড়ো হ'য়ে গেছে—লারার তাই ধারণা এ-বাড়িতে আজকাল সে নিতান্তই বাড়তি। মাইনে নিতে চায়নি, ওঁদের জোর-জবরদস্তি করতে হ'লো। এদিকে টাকাটার দরকার ছিলো তার, আর এছাড়া টাকা পাবার অন্য কোনো উপায়ও ছিলো না—কারণ তাঁদেরই অতিথি হ'য়ে বাস করতে-করতে স্বাধীনভাবে রোজগার করাটা অস্বস্তিকর তো বটেই—সত্যি বলতে কী, অসম্ভব।

নিজের অবস্থাটা তার মনে হচ্ছিলো অসহ্যকর কপট, সে ভাবতো সকলেই বুঝি তাকে একটা বোঝা ব'লে মনে করছে, শুধু বাইরে ভদ্রতার মুখোশ এঁটে রেখেছে। নিজের কাছে সে নিজেই গলগ্রহস্বরূপ, সে পালাতে চায়—নিজের কাছ থেকেও, কলোগ্রিভভদের কাছ থেকেও, পারলে ছুটে পালিয়ে যায় যত দ্রুত সে ছুটেতে পারে। কিন্তু তার বুদ্ধি তাকে বলছে যে প্রথমে যে-টাকা সে ধার নিয়েছিলো তা তাকে শোধ করতে হবে, অথচ সেই মুহূর্তে শোধ করার কোনো উপায়ই তার ছিলো না। তার মনে হ'তো সে যেন জামিন হ'য়ে রয়েছে—শুধু রডিয়ার বোকাটির জন্য তার এই দশা—এক নিরুপায় হতাশা লারার হৃদয়কে কুরে-কুরে খাচ্ছিলো। তার স্নায়ু যেন ছিড়ে যাচ্ছে, পদে-পদে তার সন্দেহ হয় তাকে বুঝি অপমান করা হচ্ছে। কলোগ্রিভভদের বন্ধুবান্ধবেরা যদি-তার প্রতি মনোযোগ দেয় তা হ'লে লারার ধারণা হয় যে তারা তাকে গোবেচারার গোছের কোনো 'আশ্রিত' এবং অতিশয় সুলভ শিকার ব'লে ধরে নিয়েছে, আর যদি তাকে লক্ষ্য না করে তাহ'লে ভাবে তাদের কাছে তার অস্তিত্বই নেই।

তার এই বিষণ্ণ বিকারের মধ্যেও অবশ্য কলোগ্রিভভদের সব আমোদ-প্রমোদে সাগ্রহের সঙ্গেই অংশ গ্রহণ করতো লারা। সারা গ্রীষ্ম ভরে বিরাট সব পাটি হচ্ছিলো বাড়িতে, অন্য সকলের সঙ্গে সেও যেতো স্নান করতে, নৌকো বাইতে, নদীর ধারে মাঝরাতে চড়ুইভাতিতে, নাচতো, বাজি পোড়াতো। শৌখিন নাটকে অভিনয় করতো, আর তার চেয়েও বেশি উৎসাহের

সঙ্গে যোগ দিতো বন্দুক-ছোড়ার প্রতিযোগিতায়। ছোট্টো মাউজার^১ বন্দুক ব্যবহার করা হ'তো এই প্রতিযোগিতাগুলিতে। তার লক্ষ খুব ভালো, যদিও টিপ অড্রাস করার জন্য সে রডিয়ার হালকা রিভলভারেই সুবিধে বোধ করতো। 'কী আপদ যে মেয়ে হ'রে জয়েছি,' মনে-মনে সে হাসতো, 'নয়তো ডুয়েল-লড়িয়ে হিসেবে নাম রাখতে পারতাম।' কিন্তু নিজেকে তুলিয়ে রাখার জন্য যতোই সে চেষ্টা করে ততোই যেন বুঝতে পারে না আসলে সে কী চায়, আর ততোই যন্ত্রণা তার বেড়ে চলে।

ছুটির পরে শহর ফিরে এসে আগের চেয়েও খারাপ লাগলো তার, অন্য অনেক কষ্টের সঙ্গে নতুন আরো একটি যুক্ত হ'লো: পাশার সঙ্গে মনান্তর (যাতে পাশার সঙ্গে সত্যি-সত্যি বাগড়া না হয় সে বিষয়ে সে অত্যন্ত সচেতন ছিলো; পাশাকে সে মনে করতো তার শেষ আশ্রয়)। পাশার মধ্যে এক ধরনের আত্মবিশ্বাস দেখা দিচ্ছিলো; একটু উপদেশাত্মক কথাবার্তা বলতে শুরু করেছে সে, লারা তাতে মজাও পায় আবার সেই সঙ্গে যেন বিরক্তও বোধ করে।

পাশা, লিপা, কলোগ্রিভডেরা, আর তার দেনার টাকা—কতো দুর্ভাবনাই না তার মাথার মধ্যে ঘোরে। জীবন নিয়ে সে অতিষ্ঠ, বীতশ্রু হ'য়ে উঠেছে। এই জীবন উন্মাদ ক'রে তুলছে তাকে। ইচ্ছে করে এ পর্যন্ত সে যা-কিছু জেনেছে, যতো অভিজ্ঞতা সঞ্চয় করেছে, সব ভুলে যায়, সম্পূর্ণ নতুন আর অজানা এক জীবন শুরু করে। মনের এই রকম অবস্থায়, ১৯১১ সালের ক্রিসমাসের সময় সে বড়ো ভয়ানক এক সিদ্ধান্তে পৌঁছলো। কলোগ্রিভডের সে ছেড়ে যাবে এবার, একুনি, নিজে বাসা নেবে, আর তার জন্য সে টাকা নেবে কমারোভস্কির কাছ থেকে। তাদের দু'জনের মধ্যে আগে যা-কিছু ঘ'টে গেছে, আর তারপর তার এই ক'বছরের স্বাধীন জীবন—এরপর, তার মনে হ'লো, কমারোভস্কির তাকে সসন্ত্রমে সাহায্য করা উচিত, বিনা দাবিতে, বিনা শর্তে, কোনো কৈফিয়ৎ না-চেয়ে।

এই মতলব মাথায় নিয়ে সাতাশ তারিখ রাতে সে পেট্রোভস্কা স্কিটের উদ্দেশে রওনা হ'লো। মাফের তলায় নিলো রডিয়ার রিভলভারটি, গুলি ভ'রে সেফটি-ক্যাচ খুলে রেখে। কমারোভস্কি যদি তাকে ফিরিয়ে দেয় কিংবা কোনোরকম অপমান করে, তা হ'লে সে গুলি করবে তাকে।

রাস্তাগুলি উৎসবমুখর, কিন্তু লারা তার তীব্র উত্তেজনায় কিছুই চোখে দেখলো না, বন্দুকের গুলি ছাড়া অন্য সব বিষয়ে অচেতন থেকে হাঁটতে লাগলো। যেন ঐ গুলি এখনই তার বুকের মধ্যে ঢুকে গেছে, কাকে তাক ক'রে তা ছোঁড়া হ'লো তাতে আর কী এসে যায়। পেট্রোভস্কা স্কিটের দিকে এগোতে-এগোতে সারা পথ সে গুলির শব্দ শুনলো, সেই গুলি ছোঁড়া হচ্ছে শুধু কমারোভস্কিকে নয়, তার নিজেরও উদ্দেশে, তার ভাগ্যের উদ্দেশে, আর ডুমিয়াস্কার ঘাসের জমিতে ওক গাছটিকে লক্ষ্য ক'রে।

৮

'আমার মাফ ছোঁবেন না!'

এমা এর্নেস্টোভনা হাত বাড়িয়েছিলেন তাকে কোট খোলার সাহায্য করার জন্য; 'ওঃ', 'আঃ' ইত্যাদি শব্দ সহকারে তাকে অভ্যর্থনা জানিয়ে তিনি বললেন যে ভিক্টর ইপলিটোভিচ বাইরে গেছেন, কিন্তু লারা যেন চ'লে না যায়। তাকে অপেক্ষা করতেই হবে।

'না, পারবো না। আমার তাড়া আছে। কোথায় গেছেন?'

১ Mauser: জার্মানিতে উদ্ভাবিত সামরিক রাইফেল।—অনুবাদের টীকা।

২ Muff: হাত গরম রাখার জন্য ব্যবহার্য পশমের নতুনাবিশেষ।—অনুবাদের টীকা।

এক ক্রিসমাসের উৎসবে গেছেন উনি। ঠিকানা-লেখা চিরকুটটা হাতের মুঠোয় নিয়ে লারা তার পরিচিত নিরানন্দ রত্নিন কাচের নকশা দিয়ে সাজানো সিঁড়ি দিয়ে দ্রুত নেমে এসে মুচনয় গর্দকে সভেনটিট্‌স্কিদের বাড়ির দিকে রওনা হ'লো।

দ্বিতীয়বার পথে বেরিয়ে সে প্রথম নিজের চারপাশে চোখ মেলে শহরের দিকে, শীতের রাত্রির দিকে তাকালো।

বরফের মতো ঠাণ্ডা পড়েছে। বিয়ারের ভাঙা বোতলের তলাকর টুকরোর মতো পুরু, কালো বরফের কুচিতে পথ ছেয়ে আছে। ঐ বাতাসে নিশ্বাস নিতে কষ্ট হচ্ছিলো তার। ধূসর হিমবিন্দুতে ভারি হ'য়ে আছে বাতাস, তার মুখে খোঁচা দিয়ে-দিয়ে তাকে যেন সুড়সুড়ি দিচ্ছে, তার ছাইরঙা ফার-কোটের জ'মে-যাওয়া রৌয়ার মতো। শূন্য পথ দিয়ে দুকদুক বুকে এগিয়ে চললো সে, শস্তা সরাইখানার রায়ার-ধোয়া-ওঠা দরজাগুলিকে পাশ কাটিয়ে। কুয়াশার মধ্য থেকে হঠাৎ বেরিয়ে আসে সসেজের মতো লাল রঙের মুখ। ঘোড়া আর কুকুরের মাথা—জ'মে যাওয়া বরফ তাদের মুখে যেন দাড়ি গজিয়ে দিয়েছে। বরফে আর তুষারে আচ্ছাদিত বাড়িঘরের জানলাগুলি খড়ির মতো শাদা, আলো-জ্বলা ক্রিসমাস-গাছের^১ রত্নিন প্রতিচ্ছবি আর উৎসবকারীদের ছায়া জানলার অসচ্ছ কাচে ভেসে বেড়াচ্ছে, যেন ম্যাজিক লন্টনের খেলা বসেছে রাস্তায়।

কামেরগের স্ট্রিটে পাশা বে-বাড়িতে থাকে তার সামনে দিয়ে যেতে-যেতে লারা থামলো, প্রায় ভেঙে পড়লো সে। 'আর পারি না। আর সহ্য হয় না,' প্রায় শব্দ ক'রে ব'লে উঠলো সে। 'আমি যাবো, ওকে গিয়ে সব খুলে বলবো আমি।' নিজেকে সামলে নিয়ে জমকালো প্রবেশপথের ভারি দরজা দিয়ে সে ভেতরে ঢুকলো।

৯

পাশা, তার মুখ টুকটেকে লাল, জিভ প্রায় বেরিয়ে আছে, আয়নার সামনে দাঁড়িয়ে কলার, হাতার বোতাম আর কড়া-ইত্রি-করা শার্টের বোতামের ঘরের সঙ্গে যুদ্ধ করছিলো। এক পাটিতে যাচ্ছে সে। এমন ছেলেমানুষ যে দরজায় টোকা না-দিয়ে ঘরে ঢুকে লারা তাকে তার অর্ধসমাপ্ত পোশাকে দেখে ফেলায় নিভাছই বিব্রত বোধ করলো পাশা। কিন্তু তখনুনি লারার উত্তেজনা লক্ষ্য করলো। ভালো ক'রে দাঁড়িয়েও থাকতে পারছিলো না লারা। প্রতি পদক্ষেপে ঘাঘরার প্রান্ত ঠেলে-ঠেলে এমনভাবে এগিয়ে এলো যেন সাবধানে কোনো নালা পার হচ্ছে।

পাশা ছুটে গেলো তার কাছে। 'কী ব্যাপার? কী হয়েছে?'

'আমার পাশে বোসো। বোসো না, এখন না-হয় পোশাক নিয়ে মাথা না-ই ঘামালে। আমার তাড়া আছে, এক মিনিটের মধ্যেই চ'লে যেতে হবে আমাকে। আমার দস্তানায় হাত দিয়ে না। দাঁড়াও, একটুকণের জন্য এদিকে না-তাকিয়ে একটু ঘুরে দাঁড়াও তো।'

পাশা তা-ই করলো। লারা প'রে-ছিলো দরজির তৈরি সুট, জ্যাকেট খুলে বুলিয়ে রাখলো, রিভলভারটা তার পকেটে পুরে নিলে। তারপর সোফায় ফিরে গেলো।

'এবার তাকাতে পারো। একটা মোমবাতি জ্বলে ইলেকট্রিক আলো নিবিয়ে দাও।'

অঙ্ককারে, মোমের আলোয় কথা বলতে ভালোবাসে লারা, পাশা স্নেহজন্য সর্বদাই ঝাড়তি মোম রাখে কাছে। মোমদানিতে নতুন বাতি বসিয়ে জানলার তাকে রেখে জ্বলে দিলে। একটু দপদপ করলো আগুনের শিখা, ছোটো-ছোটো আলোর ফুলকি ছিটোলো, তারপর জ্বলতে

১ Christmas tree: ক্রিসমাসের সময় প্রতি বাড়িতে ঢেরা কাঠ আর রত্নিন কাগজের সাহায্যে গাছ তৈরি করা হয়, তাতে ফুলিয়ে দেওয়া হয় নানা রঙের আলো আর বাড়ির লোকদের জন্য উপহার।—অনুবাদের টীকা।

লাগলো তীরের মতো তীক্ষ্ণ আর সোজা হ'য়ে। ঘর ভ'ঙ্গে গেলো নরম আলোয়। আগুনের তাপে জানলার কাচের ঐ অংশটুকুতে বরফ গ'লে গিয়ে ছোটো, কালো, উকি দেবার মতো একটা ফুটো তৈরি হ'লো।

‘শোনো পাশা,’ লারা বললে, ‘আমি বড়ো বিপদে পড়েছি, তোমার সাহায্য চাই। ভয় পেয়ো না—কিছু জিজ্ঞেসও কোরো না। কখনো ভেবো না আমরা অন্য সকলের মতো হ'তে পারি। আমার কথা উড়িয়ে দিলে চলবে না। আমি সর্বদা এক বিপদের মুখে আছি। যদি আমাকে ভালোবাসো, যদি আমার সর্বনাশ না চাও, তা হ'লে আমাদের বিয়ে আর পেঁছিয়ে দিয়ে না।

‘কিন্তু আমি তো বরাবরই তা-ই চেয়ে আসছি,’ পাশা ব'লে উঠলো। ‘যেদিন বলবে সেদিনই আমি তোমাকে বিয়ে করবো। কিন্তু কিসের জন্য এই অশান্তি তোমার—আমাকে বলো। ঋণায় রেখে আর আমায় ধ্বংসা দিয়ো না।’

কিন্তু লারা তার প্রশ্নটা এড়িয়ে গিয়ে অন্য প্রশ্ন তুললো। অনেকক্ষণ ধ'রে কথা বললে তারা, কিন্তু যে-সব বিষয়ে কথা বললে তার সঙ্গে লারার বিপদের কোনোই যোগ রইলো না।

১০

সে-বছর শীতে বিশ্ববিদ্যালয়ের স্বর্ণপদক-প্রতিযোগিতার জন্য ইউরা চোখের স্বায়ত্ত্ব বিষয়ে এক প্রবন্ধ তৈরি করছিলেন। সাধারণ ডাক্তারি পড়লেও চোখের গঠনতন্ত্র বিষয়ে তার জ্ঞান প্রায় বিশেষজ্ঞের মতো।

সৃষ্টিপ্রতিভা, শিল্পে প্রতীক এবং ভাবের যুক্তিনির্ভরতার পারস্পরিক সম্পর্ক বিষয়ে আগ্রহের মতো এ-বিষয়েও তার সহজাত কৌতূহল ছিলো।

কিন্তু তার চরিত্রের অন্যান্য লক্ষণের সঙ্গে এই আগ্রহের সামঞ্জস্য ছিলো। সৃষ্টিশীলতা, শিল্পকলার চিত্রকল্প আর ধারণার যুক্তিনির্ভর গঠনের মধ্যে সম্বন্ধ কী, তার এই চিন্তা থেকেই দৃষ্টিতন্ত্র বিষয়ে উৎসাহ জেগেছিলো তার। সে-মুহূর্তে সে আর টোনিয়া ভাড়া-করা স্ট্রেজ ক'রে স্ভেনটিটস্কিদের বাড়ি চলেছে।

এক সঙ্গে একই বাড়িতে শৈশব আর বয়ঃসন্ধির ছ'বছর কাটবার পর পরম্পরের বিষয়ে কিছুই তাদের জানতে বাকি নেই। অভ্যাস, ধরনধারণ, একের রসিকতায় অন্যের শব্দ ক'রে হেসে ওঠা, সঙ্গময় নীরবতার মুহূর্তগুলি—সবই বলতে গেলে মুষ্কল। এখনো তারা প্রায় নিঃশব্দেই গাড়িতে চলেছে, যে যার ভাবনায় মগ্ন। ঠাণ্ডার জন্য দু'জনেরই ট্রোট এঁটে বন্ধ হ'য়ে আছে।

ইউরা ভাবছিলো তার প্রতিযোগিতার তারিখের কথা, ভাবছিলো লেখাটার জন্য আরো ষাটতে হবে। তারপর বর্ষশেষের উৎসবমুখরিত রাস্তার কলরোলে অন্যমনস্ক হ'য়ে গেলো সে, অন্য অনেক কথা মনে পড়লো। পড়নের কাছে প্রতিশ্রুত আছে তার সম্পাদিত ছাত্রদের সাইক্লোস্টাইল-করা পত্রিকায় ব্লকের^১ উপর একটা লেখা দেবে; দুই রাজধানীতেই তরুণের দল সব ব্লককে নিয়ে পাগল, বিশেষত ইউরা আর গর্ডন। কিন্তু এই চিন্তাও আজ বেশিক্ষণ ইউরার মনকে ধ'রে রাখতে পারলো না। জামার গলার সঙ্গে থুতনি ঠেকিয়ে, জ'য়ে-যাওয়া কান ঘষে-ঘষতে তারা চলেছে। যে যার ভাবনায় মগ্ন, কিন্তু একটি কথা তাদের দু'জনেরই মনে ভ'রে রেখেছে।

^১ ব্লক (Alexander Blok, ১৮৮০-১৯২১): রুশ কবি, রুশীয় কাব্যে প্রতীকিতার অন্যতম প্রবর্তক। ঐর প্রথম কাব্যগ্রন্থ প্রকাশিত হয়, ১৯০৪ সালে; ঐর প্রসিদ্ধতম কবিতা, 'The Twelve'।—অনুবাদের টীকা।

আনার শয্যাপার্শ্বের দৃশ্য তাদের দু'জনের চোখে পরস্পরের এমন রূপান্তর ঘটিয়েছে যেন এই প্রথম তারা উপহার পেয়েছে দৃষ্টিশক্তি।

ইউরার কাছে তার পুরোনো বন্ধু টোনিয়া, যাকে সে এতোদিন পর্যন্ত তার জীবনের এক অংশ বলে ধরে নিয়েছে, যার বিষয়ে কখনো কোনো ব্যাখ্যা খোঁজেনি, ইঠাৎ সে আজ তার ধরা-ছোয়ার বাইরে এক জটিলতম সত্তা হ'য়ে উঠেছে। সে আজ রূপান্তরিত হয়েছে নারীতে। নিজেকে ইউরা সম্রাটরূপে, বীররূপে, যুগাবতার, দিগ্বিজয়ী রূপে কল্পনা করতে পারে, কিন্তু নারীরূপে কিছুতেই পারে না।

সেই চরম, সেই কঠিনতম দায়িত্বের ভার টোনিয়া তার ক্ষীণ, দুর্বল কাঁধে নিয়েছে ভাবতে (টোনিয়ার স্বাস্থ্য অবশ্য খুবই ভালো, কিন্তু ইউরার কাছে সে এখন ক্ষীণ এবং দুর্বল) ইউরার মন সুগভীর সহানুভূতিতে আর সলজ্জ বিষয়ে ভ'রে গেলো—জন্ম নিলো প্রণয়ের প্রথম আবেগ।

ইউরার প্রতি টোনিয়ার মনোভাবের পরিবর্তনও ঠিক এমনি গভীর।

ইউবার মনে হ'লো তাদের বেরুনো বোধ হয় উচিত হয়নি। আনার জন্য উদ্বেগ বোধ করছিলো সে। ঠিক যখন রওনা হচ্ছে তখন শুনলো আনা আর অতোটা সুস্থবোধ করছেন না; তাবা আনার কাছে গেলো, কিন্তু আগের মতোই তাঁর কড়া হুকুম পাটিতে যেতেই হবে। বাইরে আবহাওয়া এখন কী রকম?—আনা জিজ্ঞেস করেছিলেন, বাইরের দিকে তাকাবার জন্য তাবা জানলাব ধারে গেলো, ফিরে আসার সময় নেটের পর্দা টোনিয়ার নতুন পোশাকের সঙ্গে আটকে গেলো, পেছনে ঝুলে রইলো বিয়ের ওড়নার মতো। মিলটা এতো স্পষ্ট যে সবাই হেসেছিলো।

ঘুরে তাকিয়ে ইউরা এখন তা-ই দেখলে, একটু আগে লারা যা দেখে গেছে। জ'মে-যাওয়া রাস্তার ওপর স্নেজ-গাড়িগুলো অস্বাভাবিক তীব্র আর্তনাদ করছে, তার অস্বাভাবিক দীর্ঘ প্রতিধ্বনি উঠছে রাস্তা আব পার্কের বরফে-ঘেরা গাছের গায়ে-গায়ে। কুয়াশায় আচ্ছন্ন জানালাগুলির মধ্য দিয়ে ভেতরে আলো দেখা যাচ্ছে, সেই আলোতে বাড়িগুলিকে মনে হচ্ছে ধোয়াটে স্ফটিক দিয়ে তৈরি মহামূল্যবান বাস্ম। তার ভেতরে জ্বলজ্বল করছে মন্সোর ক্রিসমাস-কালীন জীবন. গাছে-গাছে জ্বলছে মোমের আলো, নানারকম ফ্যান্সি-ড্রেসে সেজে অতিথিরা। ছেলেমানুষি ফুর্তিতে ম'জে আছে, খেলা হচ্ছে লুকোচুরি, কানামাছি, আরো কত কী।

ইউবার মনে হ'লো আধুনিক রাশিয়ার জীবন এবং শিল্পকলায় ক্রিসমাসেব প্রকাশ হয়েছে ব্লকের মধ্যে—এই উত্তর-দেশের জীবনের ক্রিসমাস, তারা-ভরা আকাশের তলায় তার আধুনিক পথঘাট, তার বিশ-শতকী বসবার ঘরের আলোকিত গাছগুলিকে^১ ঘিরে যে-জীবন, সেই জীবনের ক্রিসমাস। ইউরা ভাবলে যে ব্লকের ওপর কোনো প্রবন্ধ লেখার দরকারই নেই, তিন প্রাচ্য জ্ঞানীর যীশুদর্শনের ওলন্দাজ চিত্রের একটি রুশীয় প্রকরণ রচনা করলেই চলবে; সে-ছবিতে থাকবে তুষার, নেকড়ে বাঘ আর ফার গাছের অঙ্ককার বন।

কামেরগের স্ট্রীট দিয়ে যেতে-যেতে ইউরা লক্ষ করলে এক বাড়ির জানলার কাছে বরফের আন্তরণের এক অংশ মোমের আগুনে গ'লে গেছে। তার আলো এসে রাস্তায় পড়েছে, যেন কোনো চোখের দৃষ্টির মতো ইচ্ছাকৃত ভাবে আগুনের ঐ শিখা যেন পথের যানবাহনের ওপর লক্ষ রাখছে, আর অপেক্ষা করছে কারো জন্য।

'টেবিলে জ্বলছিলো একটি মোমবাতি, জ্বলছিলো.....' ফিসফিস ক'রে নিজের মনে বললে সে। একটা কবিতার আরম্ভ—অস্পষ্ট, আকারহীন; কিন্তু কোনো-এক দিন রূপ নেবে হয়তো, যদিও তখন আর-কিছুই মনে এলো না।

^১ Christmass tree-এর কথা বলা হচ্ছে:—অনুবাদকেব টীকা।

সভেনটিট্‌স্কিদের বাড়ির ক্রিসমাসের উৎসবে এক প্রাক্-পুরাণিক প্রথা পালন করা হয়। দশটির সময়, বাচ্চাকাচ্চারা বাড়ি চ'লে গেলে, তরুণ-তরুণী ও বয়স্কদের জন্য দ্বিতীয়বার আলো জ্বালা হয় ক্রিসমাস-গাছে, তারপর উৎসব চলে ভোর পর্যন্ত। ব্রোনজের আংটায় কোলানো পর্দা দিয়ে নাচঘর থেকে আলাদা-করা 'পশ্চিমী' ড্রয়িংরুমে ব'সে সারারাত ধ'রে বয়স্করা ভাস খেলেন। ভোর হ'লে এক সঙ্গে প্রাতঃরাশ করে সকলে।

'এতো দেরি হ'লো কেন?' সভেনটিট্‌স্কির ভাইপো জর্জ হলঘর দিয়ে ফ্ল্যাটের পেছনে তার কাকা-কাকিমার মহলের দিকে ছুটতে-ছুটতে জিজ্ঞেস করলো। ইউরা আর টোনিয়া ওভারকোট আর টুপি খুলে নিয়ে তাদের নিমন্ত্রণকর্তার সঙ্গে দেখা করতে যাবার আগে নাচঘরের দিকে তাকালো একবার।

যারা নাচছে না, তারা পোশাকের খসখস শব্দ ক'রে, একে অন্যের পায়ের বুড়ো আঙুল মাড়িয়ে দিচ্ছে; দেখলে মনে হচ্ছে যেন স্তরে-স্তরে আলো দিয়ে সাজানো উষ্ণ-নিশ্চিসিত ক্রিসমাস-গাছের পাশে-পাশে একটা কালো দেয়ালের মতো তারা ন'ড়ে-চ'ড়ে বেড়াচ্ছে আর কথা বলছে।

ঘরের মাঝখানে টলতে-টলতে ঘুরপাক খাচ্ছে নাচিয়েরা। তাদের জুড়ি মেলানো বা লাইন সাজানোর ভার নিয়েছে তরুণ কোকা কর্নাকভ—আইনের ছাত্র সে, তার বাবা পাব্লিক প্রসিকিউটর-এর সহকারী। নাচের আসরে সে-ই নায়কত্ব করছে। গলার স্বর সপ্তমে তুলে ঘরের এ-মাথা থেকে ও-মাথা পর্যন্ত চীৎকার করছে সে: 'মহামণ্ডল!' চীনে শেকল!'^১ আর অন্য সবাই তার নির্দেশ পালন করছে। 'এবার ওঅল্‌জ হোক!'—পিয়ানো-বাদকের উদ্দেশ্যে সে চীৎকার করলে। শুরু হ'লো ওঅল্‌জ; নাচের গতি ক্রমশ ধীর ক'রে এনে সঙ্গিনীকে ক্ষুদ্র থেকে ক্ষুদ্রতর বৃত্তের আকারে ঘোরাতে-ঘোরাতে নাচতে লাগলো কোকা, শেষ পর্যন্ত মনে হ'লো যে ওঅল্‌জের মিলিয়ে-যাওয়া প্রতিধ্বনির সঙ্গে তারা কোনোরকমে ভাল মিলিয়ে চলছে কি চলছে না। সবাই হাততালি দিলে; আইসক্রীম আর নানা রকম ঠাণ্ডা পানীয় পরিবেশন করা হ'লো সেই মুখর, সচল, অস্থির ভিড়ের মধ্যে।

উত্তেজিত তরুণ-তরুণীরা, ঠাণ্ডা টকজামের রস^২ আর লেমনেডে চুমুক দিতে-দিতেও এক মুহূর্তের জন্য চীৎকার আর হাসি থামাচ্ছে না, অথচ ট্রে-র ওপর গ্লাস নামিয়ে রাখার সঙ্গে-সঙ্গেই আগের চাইতে আরো দশগুণ বেশি জোরে গোলমাল শুরু ক'রে দিচ্ছে, যেন তারা এমন-কিছু খেয়েছে যাতে তাদের ফুটি আরো উদ্বেল হ'য়ে উঠলো।

নাচঘরে না-থেমে ইউরা আর টোনিয়া তাদের নিমন্ত্রণকর্তার ঘরগুলির ভেতর দিয়ে ফ্ল্যাটের অন্য প্রান্তের দিকে এগিয়ে গেলো।

নাচঘর আব বসবার ঘর থেকে যে-সব আসবাব সরিয়ে দেওয়া হয়েছে বাড়ির পেছন দিকের ঘরগুলি তাতে ঠাসা। সেখানে সভেনটিট্‌স্কিরা তাঁদের বড়োদিনের কারখানা, তাঁদের মায়ারী পাকশালা সাজিয়েছেন। ঘরভরা রঙের আর গাঁদের গন্ধ, রঙিন কাগজের মোড়ক, কাগজের টুপি, আর বাড়তি মোমবাতি প্রত্যেকটি চেয়ারের ওপর স্থপীকৃত হ'য়ে আছে।

^১ বি'তর নাচের ফরাসী নাম।—ঐনুবাদকের টীকা।

^২ Cranberry, ছোটো ঘন-লাল রঙের একরকম জাম। উত্তর য়োৰ্কাণ্ডে জন্মায়।—ঐনুবাদকের টীকা।

স্ভেনটিটস্কিরা স্বামী-স্ত্রীতে ব'সে উপহারের কার্ডে সাপার-টেবিলের আসন আর লটারির টিকিটের নম্বর লিখছিলেন। জর্জ তাঁদের সাহায্য করছিলেন; কিন্তু অনবরত ভুল শুনে সব-কিছু গুলিয়ে ফেলছিলেন ব'লে বিরক্তিতে গজগজ করছিলেন তাঁরা। টোনিয়া আর ইউরার আসাতে দারুণ খুশি হ'লেন ওঁরা, বাচ্চা অবস্থায় তাদের দেখেছেন—ভূমিকা না-ক'রে কাজে লাগিয়ে দিলেন।

'ফেলিটসাটা সেমিওভনা বোঝে না যে উৎসবের মাঝখানে, অতিথিরা যখন সব এসে গেছে তখন না-ক'রে এ-সব অনেক আগেই ক'রে রাখা উচিত ছিলো। —জর্জ কী করলে দ্যাখো—মিষ্টির খালি বাস্তুগুলো থাকবে সোফায় আর চিনির শিরেয় ডোবানো বাদামভাজা থাকবে টেবিলে—তুমি ঠিক উন্টেটাটা করলে।'

'খুব খুশি হয়েছি আনেট ভালো আছে শুনে। পিয়ের আর আমি বড্ড ভাবনায় ছিলাম।'

'তা ঠিক, তবে কী জানো, আনেটের শরীর আরো খারাপ। ভালো নয়, বুঝেছো তো, আরো খারাপ। আগু-পিছু গুলিয়ে ফেলো তুমি।'

শেষ পর্যন্ত ইউরা আর টোনিয়াকে অর্ধেকটা সন্ধ্যাই জর্জ আর স্ভেনটিটস্কিদের সঙ্গে নেপথ্যে কাটাতে হ'লো।

১৩

এতোক্ষণ লারা ছিলো নাচঘরে। তার পরনে সাদা পোশাক নেই, এখানে কাউকে সে চেনে না, তবু থেকে গেলো, স্বপ্নচাষীরা মতো ওঅলজ নাচলে কোকার সঙ্গে, কখনো বা নিরুদ্দেশভাবে ঘরের মধ্যে ঘুরে বেড়ালো।

দু'একবার থমকে দাঁড়িয়ে বসবার ঘরের সামনে সে ইউঁস্তত করেছে, আশা করেছে কমারোভস্কি যখন দরজার দিকে মুখ ক'রে ব'সে আছে তাকে হয়তো দেখতে পাবে। কিন্তু কমারোভস্কি বা হাতে তাসগুলি ঢালের মতো ক'রে ধ'রে নিজের মুখ আড়াল ক'রে বেখেছে, হয়তো সে তাকে সত্যিই দেখতে পায়নি, কিংবা হয়তো দেখেও না-দেখার ভান করেছে। আশ্চর্যান্বিত লারার দম আটকে আসছিলো। নাচঘর থেকে একটি মেয়ে—লারা তাকে চেনে না—ভেতরে গেলো, আর কমারোভস্কি যে-ভঙ্গিতে তার দিকে তাকালো সে-ভঙ্গি লারা চেনে। স্তাবকতায় খুশি হ'য়ে হাসলো মেয়েটি, তার গাল লাল হ'য়ে উঠলো, লজ্জায় লাল হ'য়ে গেলো লারা, প্রায় আত্ননাদ বেরিয়ে এলো তার গলা চিহ্নে। 'নতুন শিকার', মনে-মনে বললে লারা, সেই মেয়েটি যেন আরশি, তার মধ্যে নিজেকে সে! দেখতে পেলে। কমারোভস্কির সঙ্গে কথা বলার সংকল্প তখনো সে ত্যাগ করলো না, তবে ঠিক করলো যে পরে আরো সুবিধেমতো সময়ে বলবে। জোর ক'রে নিজেকে শান্ত ক'রে লারা নাচঘরে ফিরে গেলো।

আরো তিনজনের সঙ্গে তাস খেলতে বসেছিলো কমারোভস্কি, তার বা পাশে যিনি বসেছিলেন তিনি হলেন কর্নাকভ—কোকা, অর্থাৎ যে-কেতাদুরন্ত তরুণটির সঙ্গে লারা আবার নাচছিলো, তার বাবা। ছেলেটির সঙ্গে দু'একটা কথাবার্তা বলবার পরেই এই খবর সে সংগ্রহ করতে পেরেছে। ওর মা হলেন কালো পোশাক-পরা ঐ লম্বা শ্যামলা রঙের মহিলাটি, যিনি দু'টি জ্বলজ্বলে চোখ আর বিস্ত্রী সাপের মতো গলা নিয়ে ক্রমাগত নাচঘর আর বসার ঘরে যাওয়া-আসা করতে-করতে লম্বা রাখছেন নতুনতর পুত্র এবং তাসে মগ্ন স্বামীর ওপর। এবং অবশেষে লারা জানলো যে-মেয়েটি তার মনে এমন জটিল অনুভূতি জাগিয়েছিলো সে কোকার বোন, আর তার সন্দেহ সম্পূর্ণ ভিত্তিহীন।

কোকা প্রথম যখন নিজের নাম বলেছিলো তখন তার পদবীর প্রতি মনোযোগ দেয়নি লারা, কিন্তু ওঅলজ নাচের শেষ চেউয়ে ভাসিয়ে লারাকে একটা চেয়ারের কাছে নিয়ে যেতে-যেতে

সে অভিবাদন ক'রে আবার নিজের পদবী বললে। 'কর্নাকভ, কর্নাকভ।' কী যেন মনে করিয়ে দিলো তাকে। কোনো অগ্রীতিকর ঘটনা। —হ্যাঁ, তাই তো, এইবার তার মনে পড়েছে। মন্সো আদালতে যখন রেল-কর্মচারীদের বিচার হ'লো—টিভেরজিনও তাদের মধ্যে ছিলো—সহকারী পাবলিক প্রসিকিউটর কর্নাকভ তখন এক রক্ষণশীল বক্তৃতা দেন। লারার অনুরোধে কলোগ্রিভভ তাঁকে বোঝাতে গিয়েছিলেন, কিন্তু লাভ হয়নি কিছু। ও, তাই—বেশ, বেশ, বেশ, কী অদ্ভুত.... কর্নাকভ।

১৪

রাত প্রায় দুটো। ইউরার কান ঝা-ঝা করছে। মাঝে একটু বিশ্রাম গেছে, ছোটো-ছোটো কেক বিস্কুট সহযোগে চা-পানের পর নাচ শুরু হয়েছে আবার। গাছের ওপর মোমগুলি গ'লে যাচ্ছে, কিন্তু বদলাবার কথা কেউ আর ভাবছে না।

নাচঘরের মাঝখানে অনামনস্বভাবে দাঁড়িয়ে টোনিয়াকে দেখছিলেন: এক অপরিচিত ব্যক্তির সঙ্গে সে নাচছে। টেউয়ের মতো টোনিয়া একবার তার কাছে চ'লে এলো, তার সাটিনের ঘাঘরার ঝালর মাছের মতো লাফিয়ে উঠলো, তারপর টোনিয়া আবার অদৃশ্য হ'লো।

নিদারুণ উত্তেজিত হ'য়ে আছে টোনিয়া। বিশ্রামের সময় চায়ের বদলে অন্তনিত কমলালেবু খেয়ে সে তেঁটা মিটিয়েছে, একের পর এক কোয়া খুলেছে, আঙুল আর ঠোঁটের কোনো মুখে চলেছে ফলের মঞ্জরীর মতো আকারের এক রুমাল দিয়ে। অনর্গল কথা বলেছে আর হেসেছে, হাতের রুমালটা কখনো বের করেছে, কখনো কোমরে ঝুঁজেছে, কখনো ঢুকিয়েছে জামার হাতায়, কখনো গলার ঝালরের তলায়।

এইমাত্র, তার অচেনা সঙ্গীর সঙ্গে ঘুরপাক খেতে-খেতে সে যখন ইউরার গা ঘেঁষে চ'লে গেলো, হাত বাড়িয়ে ইউরার হাতের ওপর চাপ দিয়ে মৃদু হেসেছিলো টোনিয়া। তার হাতের রুমালটা ইউরার আঙুলের ফাঁকে আটকে রইলো। রুমালটা ঠোঁটে চেপে ধ'রে ইউরা চোখ বুজলো। রুমালে কমলালেবুর আর টোনিয়ার হাতের গন্ধ—ইউরাকে একই রকম মুগ্ধ করলো। ইউরার জীবনে এ একেবারে নতুন, এমন অনুভূতি আগে কখনো হয়নি তার, এতো তীব্র, এতো তীক্ষ্ণ, যেন মাথা থেকে পায়ের গোড়ালি পর্যন্ত তাকে দীর্ঘ ক'রে দিচ্ছে। এই সুবাস যেন শিশুর মতো সরল, অঙ্ককারে ফিসফিস ক'রে একটি কথা বলা হ'লো যেন—বুদ্ধি ও বহুতায় ভরপুর। রুমালটা সে বারবার তার চোখে আর ঠোঁটে চেপে ধরলে, তার কোমল গন্ধে হারিয়ে ফেললে নিজেকে। ঠিক সেই মুহূর্তে বাড়ির মধ্যে থেকে বন্দুকের গুলির শব্দ শোনা গেলো।

সকলে ঘুরে দাঁড়িয়ে বসার ঘর আর নাচঘরের মাঝখানের পরদার দিকে তাকালো। মুহূর্তমাত্রের নিস্তব্ধতা, তারপরই কলরব শুরু হ'য়ে গেলো! হৈ-চৈ ক'রে ছুটোছুটি করতে লাগলো কেউ-কেউ, কেউ বা কোকার পেছনে-পেছন ছুটলো বসার ঘরের দিকে, কারণ সেখান থেকেই গুলির আওয়াজ এসেছে, এবং আরো অনেকে বেরিয়ে আসতে লাগলো সে-ঘর থেকে, তারা ফুঁপিয়ে কাঁদছে, তর্ক করছে, আর সকলে এক সঙ্গে কথা বলছে।

'এ ও কী করলো, এ ও কী করলো?' কমারোভস্কি মরীয়ার মতো ব'লে চলেছে।

'বোরিয়া, বোরিয়া, বলো, তুমি বেঁচে আছো, বলো।' শ্রীমতী কর্নাকভ বিকারগ্রস্তের মতো চীৎকার করছিলেন। 'ডাক্তার ড্রকভ কোথায়—উনি নাকি এখানে ছিলেন শুনলাম।—ওঃ, কিন্তু কোথায়, কোথায়? কোথায় তিনি?—কী ক'রে, কী ক'রে বলতে পারলে যে তোমার কিছু হয়নি, একটু ছ'ড়ে গেছে কেবল? আমি যে ঠিক কথাই বলেছিলাম এই হ'লো তার প্রমাণ। ও-সব গুণাগুণের কীর্তি উনি ফাঁস ক'রে দিয়েছিলেন! এখন দ্যাখো, কী রকম লোক ওরা।

ওগো, তুমি যে তোমার সত্যের জন্য শহীদ হ'তে চলেছো!—ঐ যে নোংরা মাগিটা, ঐ যে! তোর চোখ গেলে দেবো আমি বেবুশ্যে কাঁহাকার, দেখি তুই কী ক'রে পালাস। কী বললেন, কমারোভস্কি মশাই? আপনি? আপনাকে লক্ষ ক'রে গুলি ছুঁড়েছিলো? না, না, এ আমি আর সহ্য করতে পারছি না, এযে আমার সর্বনাশের সময়, কমারোভস্কি, আপনার ঠাট্টায় কান দেবার সময় এখন আমার নেই।—কোকা, কোকা, সোনা আমার, বিশ্বাস করতে পারিস? ও তোর বাবাকে খুন করার চেষ্টা করেছিলো...হ্যাঁ...কিন্তু...ঈশ্বর আছেন! কোকা! কোকা!'

ভিড বসবার ঘর থেকে নাচঘরে গড়িয়ে এলো। কর্নাকভ সকলের সামনে; বাঁ হাতের আঁচড়ের ওপর একটা ন্যাপকিন জড়াতে-জড়াতে হাসিমুখে তিনি সকলকে আশ্বাস দিচ্ছিলেন যে তাঁর কিছু হয় নি। এদের ঠিক পেছন-পেছন আর-একটি দল এলো, তারা যেন লারাকে হাতে ধ'রে হিচড়ে টেনে নিয়ে আসছে।

ইউরা স্তম্ভিত হ'য়ে গেলো।—আবার এই মেয়ে। আবারও এমন এক অসাধারণ পরিবেশ! আর আবার তার কাছাকাছি সেই পাকা-চুলওলা ভদ্রলোক। কিন্তু এখন ইউরা লোকটিকে চেনে। এ হ'লো সেই নাম-ডাক-ওলা উকিলটি, তার বাবার সম্পত্তির সঙ্গে যে কী ভাবে যেন জড়িত। অভিবাদন করার অবশ্য কোনো দরকার নেই। তারা দু'জনে দু'জনকে না-চেনার ভান করে। আর এই মেয়েটি...তাহ'লে এই মেয়েটিই গুলি ছুঁড়েছিলো? প্রসিকিউটর মশাইকে লক্ষ্য ক'রে? নিশ্চয়ই কোনো রাজনৈতিক কারণে! আহা, বেচারী। এবার দুর্ভোগ আছে ওর কপালে। কী গর্বিত ওর রূপ! আর ঐ ছোকরাগুলো ওকে টেনে আনছে, এমনভাবে হাত মুচড়ে দিচ্ছে যেন চোর ধরেছে।

কিন্তু তক্ষুনি বুঝলো যে সে ভুল করেছে। লারা অজ্ঞান হ'য়ে যাচ্ছিলো, ওরা ধ'রে রেখেছে তাকে। প্রায় কোলে তুলে নিয়ে যাওয়া হ'লো সব চেয়ে কাছের আরাম কেরারায়, সেখানে পৌছেই অজ্ঞান হ'য়ে গেলো সে।

ইউরা তাকে ধ'রে নিয়ে আসতে সাহায্য করবার জন্য এগিয়ে যাচ্ছিলো, কিন্তু ভাবলো যাকে গুলি ছোঁড়া হয়েছে তার দিকে প্রথমে নজর না-দিলে ভালো দেখায় না।

'আমি কি কোনো সাহায্য করতে পারি? আমি ডাক্তার,' কর্নাকভকে বললে সে। 'আপনার হাতটা দেখান তো আমাকে। যাক আপনার ভাগ্য আছে বলতে হবে। এমন কি ব্যাণ্ডেজ বাঁধারও দরকার নেই। একটু আইওডিন লাগালে অবশ্য কোনো ক্ষতি নেই।—ঐ যে ফেলিটসাটা সেমিওনোভনা, ওঁর কাছে আইওডিন আছে নিশ্চয়ই।'

ফেলিটসাটা আর টোনিয়া তার দিকেই আসছিলো। ফ্যাকাশে, স্তম্ভিত দেখাচ্ছে তাদের দু'জনকে। ইউরাকে বললে সব ছেড়ে তক্ষুনি কোট প'রে নিতে। বাড়ি থেকে খবর এসেছে, এক্ষুনি যেতে হবে তাদের।

সব চেয়ে খারাপ যা হ'তে পারে তাই আশঙ্কা করলো ইউরা; সব ভুলে সে তার টুপি আর কোট নিয়ে আসতে ছুটলো।

আনাকে তারা আর জীবিত দেখলে না। সিড়ি বেয়ে ছুটতে-ছুটতে উঠে তারা যখন তাঁর ঘরে গিয়ে দাঁড়ালো তার দশ মিনিট আগে আনা মারা গেছেন। ফুসফুসে খুব বেশি জল জ'মে তা থেকে ইপানির টান ওঠে—সেটাই মৃত্যুর কারণ হ'লো। অসুখটা ঠিক সময়ে ধরা পড়েনি। প্রথম কয়েক ঘণ্টা টোনিয়া চীৎকার করলো, মেঝেতে মাথা ঠুকলো, কাউকে চিনলো না। পরদিন একটু শান্ত হ'লো বটে, কিন্তু তার বাবা অথবা ইউরা কিছু বললে জবাবে মাথা নাড়া

ছাড়া আর-কিছু পারে না তখনো; মুখ খুলতে গেলেই তার শোক তাকে অভিভূত ক'রে ফেলে, এমন চীৎকার ক'রে ওঠে যেন তাকে ভূতে পেয়েছে।

আত্মার সদগতির জন্য যে-সব প্রার্থনা করা হয়, তার ঝাঁকে-ঝাঁকে টোনিয়া ঘণ্টার পর ঘণ্টা মৃত্যুর পাশে ব'সে থেকেছে নতজানু হ'য়ে; তার বড়ো বড়ো সুন্দর হাতে ফুলের তোড়া দিয়ে ঢাকা উচুতে রাখা কফিনের একটি কোনা মুঠো ক'রে ধ'রে রেখেছে। তার চার পাশে কাউকেই সে লক্ষ্য করছিলো না; কিন্তু যখন কোনো আপনজনের চোখে তার চোখ প'ড়ে গেছে, দ্রুত উঠে দাঁড়িয়েছে সে, ঘরের বাইরে চ'লে গিয়েছে, কোনোরকমে কান্না চাপতে-চাপতে ওপরে উঠে গিয়ে বিছানার ওপর আছড়ে প'ড়ে বালিসে মুখ ঠুজে তার ঝোড়ো শোক দমন করেছে।

মনের কষ্টে, ঘণ্টার পর ঘণ্টা দাঁড়িয়ে থাকার শ্রমে, ঘুমের অভাবে, প্রার্থনার গভীর সুরে, দিনে-রাত্রে চোখ-ঝলসানো মোমের আলোতে, তার ওপর সদির প্রকাশে, ইউরা যেন ঘুমে, স্বর্গীয় আনন্দে, শোকে আর কোমল বিহ্বলতায় স্তম্ভিত হ'য়ে ছিলো।

দশ বছর আগে তার মা যখন মারা যান তখন সে শিশু ছিলো। এখনো মনে আছে, তার সেই ভয় আর শোকের সাক্ষ্যনাহীন কান্না। তখন তার কাছে নিজের অস্তিত্বের কোনো মূল্য ছিলো না। এমন কি এ-কথাটাও যেন উপলব্ধি করতে পারতো না যে ইউরা নামে কোনো স্বতন্ত্র সত্তার অস্তিত্ব আছে, কোনো মূল্য বা আকর্ষণ আছে তার। তখন যা-কিছু মূল্যবান ব'লে বোধ হ'তো সবই তার বাইরে, তার আশে-পাশে। চারপাশ থেকে এসে তার চৈতন্যে হানা দিতো সেই ঘন, অনবীকার্য বহির্জগৎ, অরণ্যের মতো স্পর্শময়, মা মারা যাবার পর তাই সে অত বিচলিত হয়েছিলো, মনে হয়েছিলো তাঁর পাশে চলতে-চলতে বনের মধ্যে কখন যেন নিজেকে হারিয়ে ফেলেছে, হঠাৎ তাকিয়ে দ্যাখে মা নেই, সে একা। এই পৃথিবীর প্রতিটি বস্তু দিয়ে তৈরি হয়েছে ঐ বন; যা-কিছু তার পরিচিত, সব আছে সেখানে—মেঘ আর দোকানের সাইনবোর্ড, গির্জার ঘণ্টার সোনালি চূড়ো, আর সেই সব অশ্বারোহীরা যারা পুণ্যময়ী চিরকুমারীর গাড়ির আগে-আগে চলে, পবিত্র মূর্তির^১ প্রতি সম্মান দেখিয়ে টুপির বদলে কান-ঢাকা প'রে। সেই বনে আছে দোকানের সাইনবোর্ড, ঢাকা বারান্দা, অগম্য তারা-ভরা রাত্রির আকাশ আর মঙ্গলময় ঈশ্বর আর সাধু-সন্তরা।

নার্স যখন তাকে ভগবানের কথা শোনাতো তখন সেই উচু ও অগম্য স্বর্গ অনেক নিচে নেমে এসে যেন ঘিরে থাকতো নার্সের জামার প্রান্তভাগ। স্বর্গ তখন খুব কাছে, হাত বাড়িয়ে তাকে ছোঁয়া যায়, খাড়ির ধারের হেজেল-ঝাড়ের মাথার মতো, যার ডালপালা টেনে সবাই বাদাম পাড়ে। স্বর্গ যেন মুখ ডোবাতে তার সোনালি রঙের ফুল-আঁকা নার্সারির মুখ ধোবার লাল গামলায়, আর সেই আগুন আর সোনা রঙে স্নান ক'রে নিজেকে রূপান্তরিত করতো গির্জার উপাসনায়—সেই গিলির ছোট গির্জা যেখানে সে যেতো তার নার্সের সঙ্গে। সেখানে স্বর্গের তারারা রূপান্তরিত হ'তো প্রতিমার সামনেকার আলোয়, মঙ্গলময় ঈশ্বর রূপ নিতেন মঙ্গলময় পিতার, আর সকলেই নিজ-নিজ কর্তব্য আশ্রয় পালন করছে। কিন্তু সবচেয়ে গভীরভাবে যা অরণ্যের মতো অন্ধকারে তাকে ঘিরে থাকতো, তা হ'লো বয়স্কদের জগৎ, নগরের জগৎ, আর সে, তার অর্ধ-জান্তব আস্থা নিয়ে, যিনি সেই বনের রক্ষক সেই ঈশ্বরে বিশ্বাস করতো।

এখন সবই বদলে গেছে। স্কুল আর কলেজের এই বারো বছরে পুরাণ, ধর্মগ্রন্থ, উপকথা, আর কবিতা, ইতিহাস আর প্রকৃতিবিজ্ঞান এমনভাবে পড়েছে যেন এ-সব তার বংশের ঠিকুজি। এখন কিছুতেই আর ভয় নেই তার, জীবনের ভয় নেই, মৃত্যুর ভয় নেই; তার অভিযানে এ-পৃথিবীতে যা-কিছু আছে সব-কিছুর, প্রতি বস্তুর নাম লেখা হ'য়ে গেছে। ইউরার মনে হয় এই

^১ ইভেংকায়ার কুমারীর মূর্তিকে জাগ্রত ব'লে মনে হ'তো; গাড়িতে ক'রে অসুস্থ ও মৃতকল্পদের কাছে এই মূর্তি বহন ক'রে নেওয়া হ'তো।

বিশ্ব-ব্রহ্মাণ্ডের সে সমপদস্থ, তাই মায়ের জন্য প্রার্থনা শিশুকালে যে-ভাবে তার কানে বেজেছিলো, আনার জন্য প্রার্থনা আজ আর সে-ভাবে বাজলো না। তখন বিহ্বলতায়, ভয়ে যন্ত্রণায় সে প্রার্থনা করেছিলো। এখন সে এমনভাবে উপাসনা শোনে যেন এ তার ব্যক্তিগত বার্তা, তার ওপর প্রত্যক্ষ এর প্রভাব। প্রতিটি শব্দ মন দিয়ে শোনে সে, আশা করে অন্য যে-কোনো গভীর আলোচনার মতো এদেরও স্পষ্ট অর্থ থাকবে। আকাশের তেজ, মস্তিকার শক্তি—এদের বিষয়ে তার যা অনুভূতি, তার সঙ্গে তার ধর্মচেতনার আর যোগ নেই, কেননা সেগুলিকে সে এখন শ্রদ্ধা করে নিতান্তই তার পূর্বপুরুষ হিসেবে।

১৬

‘হে পবিত্র ঈশ্বর, হে পবিত্র ও শক্তিমান, হে পবিত্র ও চিরন্তন, আমাদের ওপর তোমার করুণা বর্ষিত হোক!’ কী হচ্ছে? সে কোথায়? কফিন নিয়ে যাওয়া হচ্ছে। তাকে এখন জাগতেই হবে। ভোর ছাঁটার সময় সেই জামাকাপড়েই চেয়ারে ব’সে-ব’সে ঘুমিয়ে পড়ছিলো সে। নির্ঘাৎ জ্বর হয়েছে তার। এখন সারা বাড়িতে তাকে খুঁজে বেড়াচ্ছে সবাই, কিন্তু লাইব্রেরির এই কোনায় বইয়ের তাকের পেছনে খোঁজ করবার কথা কেউ ভাবছেও না।

‘ইউরা! ইউরা!’ মার্কেল ডাকছিলো তাকে। কফিন বের করা হচ্ছে এখন। মার্কেলকে যেতে হবে ফুল নিয়ে, ইউরাকে খুঁজছে সাহায্যের জন্য, কিন্তু কোথায় সে? আরো গোল বাধলো: শোবার ঘরে ফুলের মালাগুলি স্তূপাকার ক’রে রাখা ছিলো, আনতে গিয়ে মার্কেল আটকা প’ড়ে গেলো সে-ঘরে, কেননা সিঁড়ির চত্বরে সেই আলমাবিটার কপাট খুলে গিয়ে শোবার ঘরের দরজাটিকে বাইরে থেকে আটকে দিয়েছে।

‘মার্কেল! মার্কেল! ইউরা!’ একতলা থেকে চীৎকার করছিলো সবাই। দরজায় এক লাথি মেরে মার্কেল বাধা ডিঙালো, কিছু ফুলের মালা নিয়ে দৌড়ালো সে।

‘হে পবিত্র ঈশ্বর, হে পবিত্র ও শক্তিমান, হে পবিত্র ও চিরন্তন,’ শব্দগুলি ধীরে-ধীরে রাস্তার ওপর দিয়ে ব’য়ে চলেছে, সহজে মিলিয়ে যাচ্ছে না। একটি পালক যেন নরম হাত বুলিয়ে গেলো বাতাসের গায়ে, সব যেন দুলছে—ফুলের মালা, পথচারী, ও ঘোড়াদের কেশরওলা মাথা, পুরোহিতের হাতের ধুনুচি, আর তাদের সবার পায়ের তলায় শাদা মাটি।

‘ইউরা! হা ভগবান। যাক, শেষ পর্যন্ত পাওয়া গেলো তোমাকে,’ শুরা শ্লেজিস্কের তার কাঁধ ঝাকালেন। ‘কী হয়েছে তোমার? কফিন নিয়ে যাবে এবার। তুমি আমাদের সঙ্গে আসছো তো?’

‘হ্যাঁ, নিশ্চয়ই।’

১৭

অন্ত্যেষ্টি হ’য়ে গেলো। ঠাণ্ডায় পা ঘষতে-ঘষতে এগিয়ে এলো ভিখারির দল, দুই সারে দাঁড়ালো। কফিনের গাড়ি, ঘোড়ার গাড়ি ভরা ফুলের মালা, আর ক্রুগেরদের গাড়ি আস্তে নড়লো, অল্প দূরে উঠলো। গির্জার আরো কাছে গাড়িগুলিকে নিয়ে এলো কোচোয়ানেরা। শুরা শ্লেজিস্কের চোখের জলে ভেজা মুখ নিয়ে গাড়ি থেকে নামলেন। মাথার স্যাংসেতে ওড়না-নতুলে অনুসন্ধানী দৃষ্টিতে গাড়ির সারের দিকে তাকালেন তিনি; শবাবাহীরা যেখানে অপেক্ষা করছিলো সেই গাড়ির দিকে নজর পড়তে মাথা নেড়ে ডেকে নিলেন তাদের, তারপর তাদের সঙ্গে গির্জার ভেতর মিলিয়ে গেলেন। ক্রমেই লোক বেড়ে চলেছে।

‘তা—আনা ইভানোভনা তাই’লে গেলেন। আমাদের মধ্যে আর নেই তিনি—এর চেয়ে ভালো জায়গায় চ’লে গেলেন—বেচারী!’

‘হ্যাঁ, তাঁর জীবন তো বেঁচে নিলেন তিনি। এবার বিশ্রাম।’

‘সঙ্গে গাড়ি আছে তোমার, না কি এগারো নম্বর ধরবে?’

‘এতোকণ দাঁড়িয়ে থেকে পায়ে ঝি-ঝি ধ’রে গেছে। একটু পা টান ক’রে বস। যাক, তারপর একটা গাড়ি নিয়ে নেবো।’

‘দেখেছিলে—ফুৎফুত কেমন ভেঙে পড়েছিলো? আনার দিকে তাকিয়ে থাকতে-থাকতে দরদর ক’রে জল পড়ছিলো ওর গাল বেয়ে, বার-বার নাক ঝাড়ছে—আর একদৃষ্টে তাকিয়ে আছে। আবার আনার স্বামীর ঠিক পাশেই দাঁড়িয়েছিলো।’

‘আরে বরাবরই তো আনার দিকে ওর নজর।’

এমন ক’রে শহরের অপর প্রান্তে কবরখানার দিকে এগিয়ে চললো তারা। শক্ত-বরফ গলতে শুরু করেছে আজ। ভারি, শুদ্ধ এক দিন, বরফের শেষ, জীবনের সমাপ্তির এক দিন—এই দিন যেন অস্ত্যোষ্টির জনাই চিহ্নিত। কবরখানার রেলিঙের ফাঁক দিয়ে নোংরা বরফের স্তূপগুলিকে দেখা যাচ্ছে—ফুটকোনা কাপড় আর পশামের ফাঁক দিয়ে উঁকি দিচ্ছে যেন, গলানো রূপোর মতো ভেজু আর কালো বরফ যেন শোকের পোশাক প’রে আছে।

এই গির্জের কবরখানাতেই ইউরার মাকে কবর দেওয়া হয়েছিলো। সম্প্রতি ইউরার তাঁর কবরে আসেনি। সেদিকে তাকিয়ে ইউরার মদুস্বরে ডাকলো, ‘মা!’ প্রায় তেমনি ক’রে ডাকলো যেমন ডেকেছিলো অনেক বছর আগে।

গম্ভীর ছবির মতো কয়েকটি দলে ভাগ হ’য়ে-হ’য়ে সবাই ফিরে আসতে লাগলো; পরিষ্কার ক’রে ঝাঁট-দেওয়া পথের ফাঁকগুলি যেন শোকার্ত লোকদের মাপা ও ব্যথিত পদক্ষেপের সঙ্গে খাপ খায় না। টোনিয়া হাঁটছিলো তার বাবার হাতে হাত রেখে। তাদের পেছনে আসছে ক্রুগেররা। কালো পোশাকে ভালো দেখাচ্ছে টোনিয়াকে।

আলগা মাটির মতো আঁশওলা বরফ যেন হঠাৎ গজিয়ে উঠেছে মঠের গোলাপি দেয়ালের গায়ে, গির্জের চূড়ায় ক্রুশের শেকলে। মঠের উঠানের দূর কোণে দেয়াল থেকে দেয়াল পর্যন্ত কাচা কাপড় ঝুলছে—ভারি, ভেজা শার্ট, চাদর, পীচ-রঙা টেবিলের কাপড়। ইউরার চিনতে পারলে, গির্জের মঠের এই সেই অংশ যেখানে সেই রাত্রে তুষারের ঝড় তাণ্ডব করেছিলো—নতুন-নতুন বাড়িঘর উঠে, চেহারা একেবারে বদলে গেছে।

একা হেঁটে চলেছে ইউরার, অন্য সকলের আগে-আগে; মাঝে-মাঝে থেমে প’ড়ে অন্যদের এগিয়ে আসার জন্য অপেক্ষা করছে। তার পেছন-পেছন যারা ধীরে-ধীরে এগিয়ে আসছে সেই ক্ষুদ্র গোষ্ঠীকে মৃত্যু যে-নিঃসঙ্গতার প্রতিযোগিতায় ডেকে নিয়েছে তার উত্তরে ইউরার—জল যেমন অনিবার্য গতিতে নিচের দিকে গড়িয়ে যায় তেমনি অনিবার্যভাবে আকর্ষিত হচ্ছে, তাকে টানছে তার স্বপ্ন, তার চিন্তা, নতুন সৃষ্টির, নতুন সৌন্দর্যের জন্ম দেবার প্রেরণা। সে উপলব্ধি করেছে—এমনভাবে এর আগে কখনো করেনি—যে শিল্পের স্থির ও অন্তহীন ভাবনা হ’লো দুটি: শিল্প অনবরত ধ্যান করছে মৃত্যুর, আর তারই মধ্য দিয়ে সৃষ্টি করছে জীবন। সে অনুভব করলে যে যে-কোনো মহৎ ও খাঁটি শিল্প সম্বন্ধে একথা সত্য; একথা সত্য সেই শিল্পকর্মটিরও বিষয়ে যার নাম সন্ত ইয়নের দিব্যদর্শন, আর সেটিকে অন্য যে-সব শিল্পকর্ম যুগ-যুগ ধ’রে শেষ ক’রে চলেছে, তাদের বিষয়েও একথা সত্য।

আনার স্মৃতিতে একটি কবিতা লেখার জন্য দু’এক দিন সে একলা কাটাবে, বিশ্ববিদ্যালয় থেকে, বাড়ি থেকে, দূরে স’রে থাকবে, সানন্দ প্রত্যাশায় ইউরার সেই দু’একটি দিনের কথা ভাবলে। জীবন তাকে হঠাৎ যে-সব খাপছাড়া উপহার দিয়েছে তাদের কথা থাকবে সেই কবিতায়—আনার চরিত্রের শ্রেষ্ঠ লক্ষণগুলির বর্ণনা; শোকের পোশাকে টোনিয়া; অস্ত্যোষ্টির পর ফেরার পথে রাস্তার ঘটনা; আর মঠের ঐ অংশে ঝুলে-থাকা ভেজা কাপড়—যেখানে শিশু ইউরার ফুঁপিয়ে-ফুঁপিয়ে কেঁদেছিলো, আর তাণ্ডব তুলছিলো তুষারের ঝড়।

পরিচ্ছেদ ৪

অনিবার্যের আবির্ভাব

১

জ্বরের ঘোরে অর্ধচেতন লারা, ফেলিটসটি সেমিওনোভনার বিছানায় প'ড়ে ছিলো। তাকে ঘিরে ফিসফিস ক'রে কথা বলছিলো চাকর-বাকররা আর ডাক্তার ডুকভ।

বাড়ির বাকি অংশ ফাঁকা, অন্ধকার। কেবল বসবার ঘরের দেয়ালে একটি আলো জ্বলছে, তার মৃদু আভা ছড়িয়ে পড়েছে পরস্পর-সংযুক্ত লম্বা একসারি ঘরের এ-মাথা থেকে ও-মাথা পর্যন্ত।

এই গলিতে ক্রুদ্ধ পদক্ষেপে পায়চারি করছে কমারোভস্কি—ভঙ্গিটা এমন যেন এটা তারই বাড়ি, এখানে সে অতিথি নয়। এক-একবার খবরের জন্য শোবার ঘরে যায়, আর ছিটকে চ'লে আসে ফ্ল্যাটের অপর প্রান্তে—সেই রূপোলি বুদ্ধদে ভরা গাছের পাশ কাটিয়ে, খাবার ঘর পার হ'য়ে—যেখানে টেবিল-ভরা অভুক্ত খাদ্য প'ড়ে আছে, আর যখনই জানলা ঘেঁসে গাড়ি যাচ্ছে, কিংবা ইদুর খেলে বেড়াচ্ছে বাসনের ওপর দিয়ে, সবুজ স্ফটিকের পান্যধারগুলি তখনই বেজে উঠছে টুংটাং ক'রে।

চিন্তার ঝড় উঠেছে কমারোভস্কির বুকে। কী কলেঙ্কারী! কী লজ্জা! রাগে সে যেন টগবগ ক'রে ফুটতে লাগলো। এই ঘটনায় তার মান-সম্মান, নাম-ডাক সব যেতে বসেছে। যে-ক'রে হোক লোকের মুখ বন্ধ করতে হবে, আর যদি ইতিমধ্যে জানাজানি হ'য়ে গিয়ে থাকে তাহ'লে থামাতে হবে গুজব, জন্মের মুহূর্তে সেই গুজবকে সে গলা টিপে মারবে।

কমারোভস্কির উদ্বেজনার আরেকটি কারণ হ'লো এই যে বুনো, বেপরোয়া এই মেয়েটার জন্য আবার এক অদম্য আকর্ষণ সে অনুভব করছে। লারা যে অন্য সবার চাইতে আলাদা তা সে বরাবর জানতো। কী যেন এক অনন্য গুণ ওর মধ্যে আছে! কিন্তু কী গভীর, কী যন্ত্রণাময়, কী অপূরণীয়ভাবেই না সে আহত করেছে ওকে, ছত্রখান ক'রে দিয়েছে ওর জীবন, এবং কী অস্থির আর উদ্দাম জেদ নিয়েই না ও চেয়েছে নিজের ভাগ্যকে নতুন ক'রে গড়তে, শুরু করতে চেয়েছে নতুন জীবন।

এ-কথা সব দিক থেকেই স্পষ্ট যে লারাকে তার সাহায্য করতেই হবে—একটা ঘর ভাড়া করা যায়—কিন্তু কোনো অবস্থাতেই ওর কাছে আসা চলবে না; বরং এড়িয়ে চলতে হবে, স'রে দাঁড়াতে হবে যাতে কোন্‌না মতেই তার আঁচটুকুও ওর গায়ে না লাগে, তা না হ'লে ঐ বুনো মেয়ে যে কখন কী ক'রে বসবে তার ঠিক নেই।

ইশ—কী ঝঞ্জাট এখনো তার সামনে! এ-সব ব্যাপারের ফল কখনো শুভ হয় না। আইন তো ছেড়ে কথা কইবে না। এই তো, এখনো ভোর হয়নি, আর দু'ঘন্টাও হয়নি ব্যাপারটা ঘটেছে, ইতিমধ্যেই দু' দূবার পুলিশ হানা দিয়ে গেছে; আর সে, কমারোভস্কি—তাকে যেতে হয়েছে রাস্তাঘরে, দারোগার সঙ্গে দেখা ক'রে নরমে-গরমে বোঝাতে হয়েছে।

যতো সময় যাবে গোলামাল ততোই বাড়বে। তাদের প্রমাণ করতে হবে যে লারা,

কর্নাকভকে নয়, তাকে লক্ষ্য ক'রে গুলি ঝুড়েছিলো। কিন্তু তাতেও শেষ হবে না; লারা অভিযোগ থেকে আংশিকভাবে মুক্তি পাবে ঠিকই, কিন্তু অন্য কারণগুলি তার হাজত-বাসের সপক্ষেই রায় দেবে।

সেটা বন্ধ করার জন্য যা-কিছু করা দরকার কমারোভস্কিকে তা করতেই হবে। ব্যাপারটা যদি আদালত পর্যন্ত গড়ায় তাহ'লে এই মর্মে সে কোনো মনস্তাত্ত্বিকের অভিমত জোগাড় করবে যে গুলি ছোড়ার সময় নিজের কাজের দায়িত্ব নেবার মতো অবস্থা লারার ছিলো না। মামলা যদি আদালতে ওঠেই, তাহ'লে ওখানেই শেষ হ'য়ে যাওয়া চাই।

এই সব চিন্তা করছে-করতে একটু শান্ত হ'তে শুরু করলো কমারোভস্কি। রাত শেষ হ'লো। লম্বা-লম্বা আলোর রেখা ছড়িয়ে পড়লো ঘর থেকে ঘরে, চেয়ার-টেবিলের তলায় ঢুকে পড়লো চোরের মতো,—না কি নায়েবের মতো?

লারার অবস্থা পূর্ববৎ—শোবার ঘরে শেষ বার গিয়ে এই খবর জেনে কমারোভস্কি বেবিয়ে পড়লো; তার এক বন্ধু, রুফিনা অনিসিমোভনা ভয়েট-ভয়েটকভস্কির সঙ্গে দেখা করতে। মহিলাটি ওকালতি করেন, এক দেশত্যাগী রাজনৈতিকের স্ত্রী। আট-ঘর-ওলা ফ্ল্যাটটি এখন ভদ্রমহিলাব পক্ষে বড় বড়ো, ভাড়া টানতে না-পেরে দুটো ঘর তিনি ভাড়া দিয়ে দিয়েছেন। একটা ঘর সম্প্রতি খালি হয়েছে, কমারোভস্কি সে-ঘরখানা লাবার জন্য নিয়ে নিলে। সেই ঘরে কয়েক ঘণ্টা পরে জুরবিকারে অচেতন লারাকে নিয়ে আসা হ'লো।

২

রুফিনা অনিসিমোভনা হলেন প্রগতিশীলা, কুসংস্কারের চিরশত্রু তিনি, আর যা-কিছু তাঁর মতে 'জীবন্ত এবং দৃঢ়' তারই তিনি সপক্ষে।

ভদ্রমহিলা তাঁর আলমারির দেবাজে সর্বদাই এহরফুট^১ পরিকল্পনার কপি রাখেন—লেখকের স্বহস্তে সই করা। ঘরের দেয়ালে ফোটোগ্রাফগুলির মধ্যে একটিতে দেখা যাচ্ছে তাঁর স্বামীকে—‘তার লক্ষ্মী ভয়েট’-কে—সুইৎসারল্যান্ড বেড়াতে গিয়ে চকচকে রেশমি জ্যাকেট আর পানামা টুপি প'রে প্লেখানভের^২ সঙ্গে দাঁড়িয়ে আছেন।

তাঁর অসম্ভব ভাড়াটেকে দেখেই অপছন্দ হ'লো রুফিনা অনিসিমোভনার। তাঁর মতে লারা হ'লো অসহ্য এক প্রতারক, তার এই জ্বরের প্রকোপ ভান ছাড়া কিছু না। তিনি হলফ ক'রে বলতে পারেন যে লারা নিজেকে কল্পনা ক'রে নিয়েছে এক অপ্রকৃতিস্থ গ্রেচেন^৩ ব'লে, এক গণিক পাতাল-দুর্গে তাকে বন্দী করা হয়েছে।

খুব একটা হালকা সজীবতার সঙ্গে তাঁর অবজ্ঞা প্রকাশ করতেন তিনি: দডাম-দডাম ক'রে দরজা বন্ধ কবতেন, উচু গলায় গান গাইতেন, ফ্ল্যাটে তাঁর নিজের অংশে চলতেন যেন তৃফানের বেগে, আর জানলা খুলে রাখতেন সারাদিন।

ফ্ল্যাটটি ছিলো আর্বার্টের^৪ ওপর এক বাড়ির সবচেয়ে ওপর তলায়। সূর্যের উত্তরায়ণ শুরু হবার পর থেকে আকাশ তার বিপুল বিস্তার নিয়ে জানলা ভ'রে রাখতো—নদীর মতো আকাশ, যে-নদীতে বান ডেকেছে। শীতকালে অর্ধেকটা সময়ই আগামী বসন্তের বার্তায় ভ'রে থাকতো ফ্ল্যাটটি।

১ ১৮৯১ সালে জার্মান সোশ্যাল ডেমক্র্যাটিক পার্টির কংগ্রেসে এই পরিকল্পনা গৃহীত হয়।

২ রুশ মাস্ট্রীয় দার্শনিক, সুইৎসারল্যান্ডে অধিকাংশ জীবন কাটিয়েছিলেন।

৩ গ্রেচেন (Gretchen): গ্রোটের 'ফাউস্ট'-এর নায়িকা।—অনুবাদকের টীকা।

৪ খুব চওড়া এই রাস্তায় একটি বাজার আছে।

দক্ষিণের উষ্ণ বাতাস চাতাল দিয়ে ঘরে এসে ঢোকে। দূরে স্টেশনের এঞ্জিনের শব্দ ভেসে আসে যেন সিল্কঘোটকের গর্জন। অসুস্থ লাভা বিছানায় শুয়ে স্মৃতি নিয়ে অবসর যাপন করে।

প্রায়ই সেই দিনটির কথা তার মনে পড়ে, উবাল থেকে যেদিন তারা মস্কোতে এলো, সাত-আট বছর আগেকার সেই সন্ধ্যা, সেই অবিস্মরণীয় শৈশব।

স্টেশন থেকে শহরের অপর প্রান্তে তাদের হোটেলে যাচ্ছিলো তারা ভাড়া-গাড়িতে, নিরানন্দ অলিগলি পার হ'য়ে। রাস্তার বাতিতে দেয়ালে-দেয়ালে একের পর এক কুঁজো ছায়া পড়ছিলো তাদের গাড়োয়ানেব; বড়ো হ'তে-হ'তে দানবীয় হ'য়ে উঠছিলো সেই ছায়া, বাড়ির ছাদ ছাড়িয়ে যাচ্ছিলো; তারপর সে-ছায়া মিলিয়ে যেতে-যেতেই আবার নতুন ছায়াপাত।

সেই অন্ধকার সন্ধ্যায় মস্কো নগরীর দেড় হাজার ঘণ্টা বাজছিলো, রাস্তা দিয়ে ছুটতে-ছুটতে টং-টং করছিলো ট্রামের ঘুটি, কিন্তু শুধু সেজন্যই নয়, আলো, দোকানের সামনের চাতাল, সব যেন বধির ক'রে দিয়েছিলো লারাকে, তারাও যেন চাকার মতো, ঘণ্টার মতো সবব।

তাদের হোটেলের ঘরে ঢুকে অবিশ্বাস্য আকারের এক তরমুজ দেখে সে হকচকিয়ে গিয়েছিলো। গৃহপ্রবেশ উপলক্ষে কমারোভস্কির এই উপহার যেন তার ক্ষমতা আর বিশ্বের প্রতীক ব'লে মনে হয়েছিলো লারার। সেই অনবদ্য ঘন-সবুজ সুগোল শরীরে ছুরি বসিয়ে কমারোভস্কি যখন দুটুকরো ক'রে ফেললো, শীতল, মধুর তার হৃদয় যখন খুলে গেলো তাদের চোখের সামনে, তখন আতঙ্কে লারার দম বন্ধ হ'য়ে এসেছিলো কিন্তু তবু 'খাবো না' বলার সাহস হয় নি। অস্বাচ্ছন্দ্যে সেই সুবাসিত গোলাপি ফলের টুকরো তার গলায় আটকে গিয়েছিলো, তবু জোর ক'রে গিলে ফেলেছে।

সেই বায়ুসাপেক্ষ খাদ্য, রাজধানীর সেই নৈশ জীবন যেমন তাকে আচ্ছন্ন ক'রে ফেলেছিলো তখন, ঠিক তেমনি ভাবেই পরে কমারোভস্কি স্বয়ং তাকে আচ্ছন্ন করলে—সমস্ত কিছুই এই হ'লো আসল ব্যাখ্যা।

কিন্তু এখন কমারোভস্কি এমন বদলে গেছে যে চেনা যায় না। তাব ওপর কোনো দাবি করেনি সে, কখনো অতীতের কথা মনে করিয়ে দেয় নি, আর কখনো, এমন কি, দেখতেও আসেনি তাকে; নিজের দূরত্ব বজায় রেখে লারাকে সে কী ভদ্রভাবেই না এই আশ্বাস দিচ্ছে যে তাকে সাহায্য করতে সে সর্বদাই প্রস্তুত।

তার সঙ্গে দেখা করতে এসে কলোগ্রিভভ সম্পূর্ণ ভিন্ন ব্যবহার করেছিলেন। তিনি আসাতে খুশি হ'য়ে উঠেছিলো লারা। তাঁর দেহের উচ্চতা আর রূপ দিয়ে, ততোটা নয়, যতোটা তাঁর সমস্ত অস্তিত্ব থেকে বিচ্ছুরিত প্রাণশক্তি আর আনন্দিত দীপ্ত হাসি দিয়ে তার এই অতিথি ঘরের অর্ধেকটাই ভ'রে ফেলেছিলেন।

লারার বিছানার পাশে ব'সে চিন্তিতভাবে হাত ঘষলেন কলোগ্রিভভ। পিটার্সবার্গে মট্রীসভায় যখন তাঁর ডাক পড়ে তখন খেতাবধারী বয়স্ক ব্যক্তিদের সঙ্গে তিনি এমনভাবে কথা বলেন যেন তাঁরা স্কুলের দুটু ছেলে; কিন্তু এখন তাঁর সামনে যে-মেয়েটি শুয়ে আছে সে কিছুদিন আগে পর্যন্তও তাঁর পরিবারভূক্ত ছিলো, এ তাঁর নিজের মেয়ের মতো। বাড়ির অন্য সকলের মতো এর সঙ্গেও একটা-দুটোর বেশি কথা বলেন নি, পাশ দিয়ে যাবার সময় কখনো হয়তো তাকিয়েছেন চোখ তুলে; তাঁর এই সংক্ষিপ্ত আচরণের উত্তাপ ও মাধুর্য সকলেই উপলব্ধি করে। বয়স্ক ব্যক্তির মতো নিষ্পৃহ আচরণ কলোগ্রিভভ লারার সঙ্গে করতে পারলেন না। কী ভাবে কথা শুরু করলে লারা ব্যথিত হবে না ঠিক করতে না-পেরে কলোগ্রিভভ মৃদু হেসে যেন শিশুর সঙ্গে কথা বলছেন এমন ভঙ্গিতে বললেন, 'কী, মংলবটা কী তোমার? এমন নাটকেপনার অর্থ কী বলা তো?'

একটু থামলেন কলোগ্রিভভ, নোনা-ধরা দেয়াল আর কড়িকাঠের দিকে তাকিয়ে অনুযোগের ভঙ্গিতে মাথা নাড়লেন।

‘ডুসেলডর্ফে একটা আন্তর্জাতিক প্রদর্শনী হচ্ছে—ছবি, মূর্তি, ফুল। আমি যাচ্ছি। এ-ঘরটা স্যাৎসেতে—বুঝলে! আর একটা নির্দিষ্ট বাসস্থান বিনা এ-ভাবে এখান থেকে ওখানে ক’দিন ঘুরে বেড়াবে? আর এই ভয়েট স্ত্রীলোকটি, তোমাকে চুপিচুপি বলি,—ইনি বড্ড বদখদ ব্যাপার। আমি চিনি ঐকে। অন্য কোথাও চ’লে যাও না। অনেকদিন তো অসুস্থ হ’য়ে শুয়ে থাকলে। এবার উঠে পড়ার সময় হয়েছে। ঘরটা বদলাও, কিছু-একটা করো, পড়াশুনোটা শেষ ক’রে ফেলো। এক ছবি-আঁকিয়ে বন্ধু আছে আমার, দু’বছরের জন্য তুর্কিস্থানে যাচ্ছে সে। বেশ পাটিশন-করা এক স্টুডিও আছে তার—ছোটখাটো ফ্ল্যাটের মতো। আমার মনে হয় আসবাবপত্র সুন্দর স্টুডিওটা সে এমন কাউকে দিয়ে যাবে যে দেখাশুনো ক’রে রাখবে। ঠিক করবো নাকি? আর-এক কথা। অনেকদিন থেকেই ভাবছি এ-কথা...এটা আমার নিত্য কৰ্তব্য...কারণ লিপা...তোমার জন্য এখানে অল্প কিছু টাকা আছে, লিপার পাশ করার জন্য তোমার বোনাস। না, লক্ষ্মী তো...আমি অনুরোধ করছি, জেদ কোরো না,...না, সত্যি, তোমাকে নিতেই হবে...’

লারার প্রতিবাদ, চোখের জল আর জবরদস্তি সত্ত্বেও কলোগ্রিভভ যাবার আগে দশ হাজার রুবলের একটা চেক তাকে গ্রহণ করতে বাধ্য করলেন।

সেরে উঠে, স্মলেনস্কি বাজারের কাছে কলোগ্রিভভের অনুমোদিত সেই বাড়িতে উঠে গেলো লারা। বুড়োটে চেহারা এক দোতলা বাড়ির দোতলার ফ্ল্যাট। অন্য অংশে গাভোয়ানেরা থাকে, একতলায় গুদোম। নুডি-ছড়ানো উঠানে সর্বদাই বুটের খোসা আর খড়ের টুকরো ছড়ানো-ছিটানো। বক-বকম করতে-করতে পায়রা ঘুরে বেড়ায়, সশব্দে উড়ে আসে লারার জানলার পাশে; মাঝে-মাঝে পাথরের নালা বেয়ে উঠে আসে ইদুরের দল।

৩

লারাকে নিয়ে খুবই উদ্বিগ্ন হ’য়ে আছে পাশা। ওর অসুখ যতো দিন বেশি ছিলো তাকে দেখা করতে দেওয়া হয়নি, কেমন লেগেছে তাঁর? লারা একজনকে খুন করতে চেষ্টা করেছিলো, এমন একজনকে যে তার সামান্য পরিচিত মাত্র, অথচ লারা যাকে মারতে চেয়েছিলো সে-ই কিনা পরে তাকে রক্ষা করলে! যে-শান্তি লারার মাথার ওপর ঝুলছিলো তা থেকে তাকে বাঁচালে! তারই জন্য আবার লারা পড়াশুনো শুরু করতে পেরেছে, নিরাপদে, কোনো বিপদে না-প’ড়ে। ধাধা লাগে পাশার, যন্ত্রণা পায় সে।

ভালো হ’য়ে উঠে পাশাকে ডেকে পাঠিয়ে লারা বলেছিলো, ‘আমি খারাপ মেয়ে। আমাকে তুমি চেনো না, তুমি জানো না আমার আসল রূপ কী। কোনো একদিন তোমাকে সব বলবো। এঙ্কুনি ও-বিষয়ে কথা বলতে পারবো না; তুমি তো দেখতেই পাও, যখনই বলবার চেষ্টা করি আমার কান্না এসে যায়। কিন্তু তোমাকে ছেড়ে দিতে হবে আমাকে, আমাকে তুমি ভুলে যাও। আমি তোমার যোগ্য নই।’

এ-সব কথার পরে ভয়ংকর সব দৃশ্য একের পর এক ষ’টে গেছে, প্রত্যেকটি আগেরটির চাইতে আরও অসহনীয়, মর্মবিদারক। লারা তখনো আর্বাট স্ট্রীটে ছিলো; ভয়েটকভস্কায়া যখনই গলিতে পাশার চোখের জলে ভেজা মুখ দেখতে পেতেন, ছুটে ঘরে গিয়ে সোফায় ব’সে পড়ে হাসতে থাকতেন যতোকণ না পেটে খিল ধ’রে যেতো তাঁর; ‘ওঃ, আর পারিনি, আর পারিনি, এ যে বড্ডো বাড়াবাড়ি হ’য়ে যাচ্ছে,’ চীৎকার করতেন তিনি, ‘হায়, বলবান নিঃশব্দ পুরুষ। হায় স্যামসন!’

এই আসক্তি—যা পাশাকে কলুষিত করবে—তার এই প্রেমকে সমূলে উচ্ছিন্ন আর তার

৪ ক্রম বিবাহের এটি একটি আচার।—অনুবাদকের টীকা।

দিন প্রেম ও সমন্বয়' এই পদটির পুনরাবৃত্তি করলেন বার-বার; আরো একটি গান গাইলেন, তার আবৃত্তি এই রকম 'খোলো কবরী, দাও ছড়িয়ে সোনালি কেশ।'

সবাই চ'লে যাওয়ার পর তারা যখন একা হ'লো সেই আকস্মিক নীরবতায় অস্বস্তি বোধ করতে লাগলো পাশা। রাত্তার ওপারে একটি বাতি জ্বলছিলো; পাশা যতো ভালো ক'রেই পদা টানুক না কেন আলোর সূক্ষ্মতম একটি রেখা তবুও এসে পড়ে ঘরের মধ্যে। সেই আলোর জন্য স্বস্তি পাচ্ছিলো না পাশা, তার বার-বার মনে হচ্ছিলো যেন কেউ তাদের লক্ষ্য করছে। শিহরিত হ'য়ে পাশা উপলব্ধি করলে যে ঐ আলোর কথা সে লারার চাইতে, তার নিজের চাইতে, লারার জন্য তার প্রেমের চাইতেও বেশি ক'রে ভাবছে।

সেই রাতে, যে-রাত্রিকে তার মনে হয়েছিলো চিরন্তন, আন্টিপড ('স্টেফানি' বা 'রূপসী কুমারী' এই নামে তার সহপাঠীরা ডাকতো তাকে।) একই সঙ্গে আনন্দের শিখরে আর হতাশার নিম্নতম গহ্বরে পৌঁচেছিলো। তার সন্দেহ আর অনুমানের সঙ্গে বদলে-বদলে চললো লারার স্বীকারোক্তি। লারাকে প্রশ্ন করলে সে, আর তার প্রত্যেকটি জবাবে এমন বিমর্ষ হ'য়ে যেতে লাগলো যে মনে হ'লো খাড়াই এক পাহাড় বেয়ে গড়াতে-গড়াতে সে প'ড়ে যাচ্ছে। তার আহত কল্পনা তাল রাখতে পারলে না লারার স্বীকারোক্তির সঙ্গে।

ভোর পর্যন্ত কথা বললে তারা। সেই এক রাতে পাশার জীবনে যে-সুস্পষ্ট আর আকস্মিক এক পরিবর্তন এলো, তার সমস্ত জীবনে আর কখনো তা ঘটে নি। নতুন মানুষ হ'য়ে জেগে উঠলো সে, এখনো তার নাম পাশা আন্টিপডই আছে ভাবতে প্রায় অবাধ লাগলো তার।

৪

ন'দিন পরে বন্ধু-বান্ধবেরা মিলে সেই একই ঘরে তাদের জন্য এক বিদায়-সংবর্ধনার আয়োজন করলে। পাশা আর লারা দু'জনেই পরীক্ষায় পাশ কবেছে, খুব ভালো ফল হয়েছে দু'জনেরই, আর দু'জনেই চাকরি পেয়েছে উরালের এক শহরে; পরের দিন তারা রওনা হবে।

আবার তারা মদ খেলো, গান গাইলো আর হল্পা করলো, কিন্তু এবারে সবাই তারা বয়সে তরুণ।

যে-পাটিশন বসবাসের অংশটিকে স্টুডিও থেকে পৃথক ক'রে রেখেছে তার ওপিঠে রয়েছে একটা বড়ো বাস্ক, একটা তার চেয়ে ছোটো বাস্ক—সেটা লারার, একটা স্যুটকেস, এক বাস্ক বাসন-পত্র, আর অনেকগুলো বস্তু। মাল অনেক। কিছু মালগাড়িতে পাঠিয়ে দেওয়া হচ্ছে। প্রায় সবই ঝাঝাড়া হ'য়ে গেছে। সঙ্গে নেবে ব'লে ঠিক করেছিলো এমন কিছু-একটা জিনিসের কথা প্রতি মুহূর্তেই লারার মনে প'ড়ে যাচ্ছে, কোনো-একটা বুড়িতে ভরা হচ্ছে সেটা, আর ওপরটা আবার গুছোতে হচ্ছে সমান করার জন্য।

লারা যতোক্ষণে কলেজের আপিশ থেকে তার জন্ম-পত্রিকা আর অন্যান্য দরকারি কাগজপত্র নিয়ে ফিরলো, ততোক্ষণে পাশা বাড়িতে অতিথিদের আপ্যায়ন করছে; লারার পেছন-পেছন চট আর শক্ত দড়ি নিয়ে এলো এক কুলি, যে-সব জিনিস মালগাড়িতে যাবে তা ঝাঝা হবে। কুলিকে বিদায় দিয়ে অতিথিদের সঙ্গে দেখা করলে লারা, কাকুর সঙ্গে হাত ঝাকালে, কাউকে চুমু খেলে, তারপর শোবার ঘরে গেলো পোশাক বদলাতে। সে ফিরে আসতে হাততালি দিয়ে উঠলো সবাই, ব'সে পড়লো, আর তারপর সেই রকম তুমুল কলরব শুরু হ'লো যেমন হয়েছিলো কয়েকদিন আগে তাদের বিয়ের প্রাতরাশে। আরো যারা উৎসাহী তারা অন্যদের জন্য ভদকা ঢেলে দিলে; টেবিলে তাদের হাত মিলে-মিশে গেলো ছুরি-কাঁটার সঙ্গে, রুটি, নানা রকম অর্দভ আর আরো অনেক রান্না-করা খাবার সেখানে সাজানো; বক্তৃতা দিলে তারা, মদের গেলাশ শেষ

হ'লেই অসন্তোষ প্রকাশ করলে, আর রসিকতার ঢেউ ব'য়ে চললো সাগরক্ষেণ, নেশা ধরলে সকলের।

'অসম্ভব ক্রান্ত,' স্বামীর পাশে ব'সে প'ড়ে লারা বললে, 'সব গুঁহিয়ে নিতে পেরেছিলে প' 'হ্যাঁ।'

'কিন্তু তবু আশ্চর্য ভালো লাগছে। আমি সুখী, সুখী; আর তুমি প'

'নিশ্চয়ই। কিন্তু ও-কথা এখন থাক।'

যদিও কমারোভস্কি তরুণ নয়, তবু এই তরুণদের উৎসবে তাকে যোগ দিতে দেওয়া হয়েছে। সন্ধ্যার শেষের দিকে সে বলতে শুরু করলে তার এই দুই নবীন বন্ধু মস্তো ছেড়ে গেলে তার কতো নিঃসঙ্গ লাগবে, শহরটাকে তার মনে হবে মরুভূমির মতো, যেন সাহারা; কিন্তু বলতে গিয়ে এতোই ভাব জেগে গেলো তার যে ফুঁপিয়ে-ফুঁপিয়ে কাদতেই শুরু ক'রে দিলে সে, তারপর আবার গোড়া থেকে বলতে শুরু করলে।

আন্টিপভের কাছে চিঠি লেখার এবং এই বিচ্ছেদ অসহনীয়-বোধে তাদের সঙ্গে দেখা করতে উরালে যাবার অনুমতি প্রার্থনা করলে কমারোভস্কি।

'কোনো দরকার নেই,' উচু গলায়, অনামনস্কভাবে লারা ব'লে উঠলো। 'এসবেব কোনোই মানে হয় না—এই চিঠি লেখা, সাহারা—এ-সব। আর ওখানে যাবার কথা মনেও আনবেন না। আমরা এমন-কিছু দুর্লভ নই, ভগবানের দয়ায় আমাদের ছাড়া দিবি্য দিন কাটবে আপনার। পাশা, তোমারও কি তা-ই মনে হয় না? আরো অনেক নবীন বন্ধু ভাগ্যে জুটবে আপনার।'

তারপর হঠাৎ, কী বলছিলো সম্পূর্ণ ভুলে গিয়ে সে উঠে প'ড়ে বামাঘরে ছুটলো। কাবাব তৈরির পাট্টা আলাদা-আলাদা অংশে খুলে নিয়ে খড় দিয়ে মুড়ে বাসনের বাস্কেব এক কোনায় ভ'রে দিলে। এ-সব করতে গিয়ে বাস্কের কোনায় খোঁচা খেয়ে হাত ছ'ড়ে গেলো তার, তারপর ধারালো কাঠের একটা টুকরোয় হাতটা ফুটো হ'তে-হ'তে বেঁচে গেলো।

কাজে নিমগ্ন হ'য়ে লারা তার অতিথিদের কলরব আর শুনছিলো না, হঠাৎ একটা উচ্চহাসির দমক তাকে যেন তাদের কথা মনে করিয়ে দিলে। তার মনে হ'লো নেশা হ'লেই লোকেরা মাতালকে নকল করে; যতো বেশি নেশা হয় ততো বেশি চেষ্টা আর অতি-অভিনয় শুরু হ'য়ে যায়।

সেই মুহূর্তে উঠোন থেকে একটা শব্দ ভেসে এলো; পর্দা সবিয়ে লারা ঝুঁকে পড়লো।

একটা খোঁড়া ঘোড়া তার খোঁড়া পায়ের ছোটো-ছোটো লাফে উঠানে ঘুরে বেড়াচ্ছে। কার ঘোড়া, উঠানেই বা কী ক'রে এলো তা বুঝতে পারলো না সে। ঘুমন্ত শহর মৃতের মতো প'ড়ে আছে। প্রথম প্রহরের ধূসর-নীল শীতলতায় সে যেন স্নান ক'রে উঠলো। সেই অন্য সমস্ত শব্দের থেকে আলাদা, সোড়ার অস্থচ্ছন্দ খুরের আওয়াজে কে জানে কোন জগতের গভীরে চ'লে গিয়ে, কোন আনন্দে লারা চোখ বুজলো।

দরজায় ঘুন্টি বাজলো, কে যেন উঠে গিয়ে দরজা খুলে দিলে। কান খাড়া করলো লারা। নাড়িয়া এসেছে। লারা ছুটলো। ট্রেন থেকে নেমে সোজা চ'লে এসেছে, এতো তাজা, এমন মনোহারিণী যে মনে হ'লো ডুশিয়ানকার উপত্যকায় ফোটা লিলিফুলের সুবাস যেন তার শরীরে বহন ক'রে নিয়ে এসেছে সে। মুখোমুখি দাঁড়িয়ে রইলো দুই বন্ধু, আবেগের আতিশয্যে তাদের মুখে কথা ফুটলো না, শুধু কাদতে পারলো পরস্পরকে জড়িয়ে ধ'রে।

লারার জন্য নাড়িয়া এনেছে সমস্ত পরিবারের অভিনন্দন এবং শুভকামনা, আর এনেছে তার মা-বাবার দেওয়া উপহার। হাতব্যাগের ভেতর থেকে একটা গয়নার বাস্ক বের ক'রে ঝপ ক'রে তার ডালা খুলে খুব সুন্দর একটা গলার মালা তুলে ধরলো নাড়িয়া।

আনন্দ আর বিশ্বয়ের পালা শুরু হ'লো। মাত্রাল হয়েছিলেন, এখন নেশার ঘোর একটু কাটিয়ে উঠেছেন, এমন একজন অতিথি বললেন:

‘এগুলো হচ্ছে গোলাপি জ্যাসিন্থ। ইয়া, ইয়া, গোলাপি, বিশ্বাস করো আর না-ই করো। এ ছাড়া আর কিছু হ'তেই পারে না। হীরের মতো মূল্যবান এই পাথর।’

কিন্তু নাড়িয়া বললে ‘পাথরগুলো হলুদ নীলা’।

টেবিলে নিজের পাশে বসিয়ে লারা নাড়িয়াকে ঝাওয়ালো। গলার মালাটা তার প্লেটের পাশেই রাখা, বার-বার সেদিকে না-তাকিয়ে থাকতে পারছিলো না লারা। গয়নার বাজের বেগনি রঙের মখমলের গর্তে ডুবে আছে পাথরগুলি, কখনো মনে হচ্ছে শিশিরের ফোঁটা যেন তারা, কখনো মনে হচ্ছে এক থোকা আঙুরফল।

যাদের নেশার ঘোর একটু কেটেছিলো নাড়িয়াকে সঙ্গদান করার জন্য তারা আবার পান করতে লাগলো। নাড়িয়ারও ঘোর লাগলো একটু পরেই।

কিছুক্ষণের মধ্যেই সবাই ঘুমিয়ে পড়লো। বেশির ভাগই লারা আর পাশার সঙ্গে স্টেশনে যাবে কাল সকালে, তাই রাতে থেকে গেলো। অনেকে নাড়িয়া আসার আগে থেকেই নাক ডাকাচ্ছে আর লারা তো বুঝতেই পারেনি সম্পূর্ণ সুসজ্জিত অবস্থায় কখন ইরা লাগোড়িনার পাশে সোফায় শুয়ে পড়েছিলো সে।

উঠানে গলার শব্দে রাতে ঘুম ভেঙে গেলো তার; ঘোড়ার মালিকেরা ঘোড়াটাকে নিয়ে যেতে এসেছে। চোখ খুলে লারা আপন মনে বললো: ‘ঘরের মাঝখানে অমনভাবে ঘুরছে কেন পাশা, কী করছে?’ কিন্তু যাকে পাশা ভাবছিলো সে যখন মুখ ঘোরালো তখন দেখলো একটা ভূত, বসন্তের দাগ সারা মুখে, ভুরু থেকে থুতনি অবধি কাটা দাগে ভরা। বুঝলো চোর, চ্যাচাতে চাইলো, কিন্তু টু শব্দও বের করতে পারলো না গলা দিয়ে।

গলার মালাটার কথা মনে প'ড়ে গেলো তার, কনুইয়ে ভর দিয়ে খুব সাবধানে একটু উঁচু হ'য়ে সে টেবিলে যেখানে মালাটা রেখেছিলো সেদিকে তাকালো। রুটির টুকরো আর চকোলেটের খালি কাগজের মাঝখানে এখনো প'ড়ে আছে মালাটা; বোকা চোরটা দেখতে পায়নি। ও শুধু লারার অতো যত্নে গুছোনো স্যুটকেসটা খাঁটছে—লারার এতো পরিশ্রম মাটি ক'রে দিচ্ছে লোকটা; এই কথা ছাড়া অন্য কিছুই লারা যেন ভাবতে পারলে না।

তখনো ঘুমে তার চোখ জড়ানো, নেশার ঘোর কাটেনি। আরো একবার চ্যাচাবার চেষ্টা করলো, কিন্তু পারলো না। শেষে ইরার পেটে হাঁটু দিয়ে গুতো মারলো সে, আর ইরা যন্ত্রণায় চীৎকার ক'রে ওঠার সঙ্গে-সঙ্গে তারও স্বরও ফুটলো। চোরটা সব কিছু ফেলে দিয়ে ছুটে পালালো। ছেলেরা কয়েকজন উঠে ব'সে ব্যাপারটা না-বুঝেই তাকে তাড়া করবার চেষ্টা করলে, কিন্তু তারা বাইরে যাবার আগেই চোর হাওয়া হ'য়ে গেছে।

এই গোলমালে সকলেই জেগে গেলো, লারা আর ঘুমোতে দিলো না কাউকে। কফি তৈরি ক'রে সকলকে খাইয়ে বাড়ি পাঠিয়ে দিলো সে, স্টেশনে যাবার সময় হ'লে আবার আসবে।

তারপর সে কাজে লেগে গেলো। যেন জ্বরের ঘোবে বাজ্ঞে-বাজ্ঞে বিছানা চাদর ঠাসলো, মাল বাঁধলো, আর পাশা আর কুলিটির বৌকে বলতে লাগলো তারা যেন তাকে সাহায্য করার নামে তার কাজের ব্যাঘাত না ঘটায়।

সব সময়মতো গুছোনো হ'য়ে গেলো। আন্টিপড-দম্পতি ট্রেন ফেল করলো না। ধীরে চলছে তাদের গাড়ি, যেন তাদের বন্ধুরা যে-টুপি নাড়ছিলো তার হাওয়াতে ভেসে-ভেসে। টুপি নাড়া বন্ধ ক'রে যখন তারা কী ব'লে যেন তিনবার চীৎকার করলে,—হয়তো ‘হরে’। ট্রেনের গতি তখন দ্রুত হয়েছে।

৫

আজ তিনদিন হ'লো এই বিত্ৰী আবহাওয়া চলছে, যুদ্ধ বাধার পর এই দ্বিতীয় শরৎ। প্রথম বছরের সাফল্যের পর দ্বিতীয় বছর নৈরাশ্যের বার্তা নিয়ে এলো। ব্রুসিলভের অষ্টম বাহিনী ঘাটি গেড়েছিলো কার্পাথীয় পর্বতমালায়, প্রস্তুত হ'য়ে ছিলো ঢল বেয়ে হাঙ্গেরির ওপর গড়িয়ে পড়ার জন্য। কিন্তু সাধারণ পশ্চাদপসরণের ভীতির টানে তাদেরও পিছু হটতে হ'লো।

ডাক্তার ক্লিভাগো, এতোদিন পর্যন্ত যিনি ইউরো নামেই পরিচিত ছিলেন, সম্প্রতি অধিকাংশ সময়েই ইউরি আক্সিয়েভিচ ব'লে অভিহিত হন, হাসপাতালের মেয়েদের অংশে প্রসূতি বিভাগের দরজার সামনে দাঁড়িয়ে ছিলেন—তার স্ত্রী টোনিয়াকে তিনি এইমাত্র সেখানে নিয়ে এসেছেন। স্ত্রীর কাছে বিদায় নিয়ে এসে ধাত্রীর সঙ্গে দেখা করার জন্য অপেক্ষা করছেন তিনি, এমন একটা ব্যবস্থা করতে চান যাতে ঠিকমতো খবর পাওয়া যায় এবং দরকার হ'লেই ডাকা হয় তাঁকে।

নিজের হাসপাতালে ফিরে যাবার তাড়া ছিলো ইউরির। যাবার পথে আবার দু'জন রোগী দেখে যেতে হবে, আর সে কিনা তার মহামূল্য সময় এইভাবে নষ্ট ক'রে জানলা দিয়ে বাইরে তাকিয়ে আছে—দেখছে, ঝড়ে যেমন শস্যক্ষেত্র ছত্রখান হ'য়ে যায়, হেমন্তের বাতাসের ঝাপটায় বৃষ্টির ঝাঁক রেখাগুলি তেমনই এলোমেলো হ'য়ে যাচ্ছে।

এখনো তেমন অঙ্ককার ক'রে আসেনি। হাসপাতালের পেছনের অংশটা দেখতে পাচ্ছিলো সে, পার্কের বাসাবাড়িগুলির কাছে-ঢাকা বারান্দা আর হাসপাতালের এক অংশে পৌছবার জন্য ট্রামের শাখা-লাইন।

একষেয়েভাবে বৃষ্টি প'ড়ে চলেছে, জোরেও হচ্ছে না, কমছেও না, জল যেন তার এই নিষ্পৃহ ভঙ্গি দিয়ে রাগিয়ে দিয়েছে বাতাসকে, এক বাড়ির লতাগাছটিকে তাই সে এমনভাবে ঝাঁকছে যেন উপড়ে আনবে গোড়াসুঁছু, শূন্যে দোলালো তাকে, তারপর অবজ্ঞায় ছুঁড়ে ফেলে দিলো ছেঁড়া ন্যাকড়ার মতো।

দুই গাড়ির একটি ট্রাম বারান্দা পার হ'য়ে হাসপাতালে ঢোকবার মুখে এসে দাঁড়ালো। আহতদের নিয়ে আসা হয়েছে।

মস্কোর হাসপাতালগুলি সাংঘাতিকভাবে ঠাসা, বিশেষত লুটস্কের যুদ্ধের পর থেকে। আহত ব্যক্তির গলিতে, সিঁড়ির চাতালে শুয়ে থাকে। এই ভিড়ের জন্য মেয়েদের বিভাগেও অসুবিধে হচ্ছে আজকাল।

অবসাদে হাই উঠলো ইউরির, জানলার ধার থেকে স'রে এলো সে। কিছু যেন ভাববার নেই তার। হঠাৎ যেখানে সে কাজ করে সেই হোলি ক্রস হাসপাতালের একটা ঘটনা মনে প'ড়ে গেলো তার। সার্জিকাল ওয়ার্ডে একটি স্ত্রীলোক মাঝে গিয়েছিলো কয়েকদিন আগে। ইউরি রোগনির্ণয় করেছিলো লিভারের একিনোকক্কাস ব'লে, কিন্তু সবাই বললে অসুখটা তা নয়। আজ শব্দব্যবচ্ছেদ করার কথা ছিলো, কিন্তু ভারপ্রাপ্ত আবাসিক ছাত্রটি হ'লো পাঁড় মাতাল, ভগবান জানেন সে কী করতে কী করবে।

হঠাৎ রাত নেমে এলো। বাইরে কিছুই আর দেখা যাচ্ছে না। জানলায়-জানলায় আলো ফুটে উঠলো যেন জাদুকঠির ছোঁয়ায়।

স্ত্রীরোগের প্রধান ডাক্তার টোনিয়ার ওয়ার্ড থেকে সেই ওয়ার্ড আর করিডরের মাঝখানকাব সৰু লবি দিয়ে বেরিয়ে এলেন। স্ত্রী-রোগের চিকিৎসার পক্ষে ইনি এক পৌরাণিক হস্তীবিশেষ, যখনই তাঁকে কোনো প্রশ্ন করা হয় এমনভাবে কাঁধ ঝাঁকান আর চোখ ঘোরান যেন বলতে চাইছেন যে বিজ্ঞান যতোই অগ্রসর হোক না কেন, 'there are more things in heaven and earth. Horatio...'

ইউরির পাশ দিয়ে যেতে-যেতে মথা নেড়ে একটু হাসলেন তিনি, মোটা-মোটা হাতের পাতার ভঙ্গিতে বুঝিয়ে দিলেন ধৈর্য অবলম্বন করা ছাড়া উপায় নেই, তারপর ধূমপান করার জন্য করিডর দিয়ে এগিয়ে গেলেন ওয়েটিং রুমের দিকে।

তার পেছন-পেছন এলেন তাঁর সহকারিণী। একজন যতাই কঠোরপ্রকৃতি অন্যজন আবার ততোই বাচাল।

‘আমি হ’লে কিন্তু চ’লে যেতাম,’ নার্সটি ইউরিকে বললে। ‘আমি বরং কাল আপনাকে হোলি ক্রসে ফোন করবো। এক্ষুনি কিছু হবে ব’লে তো মনে হচ্ছে না। স্বাভাবিকভাবেই প্রসব হবে আশা করা যাচ্ছে, ছুরি-কাঁচি চালাবার আর দরকার হবে না। তবে সুরু পেলভিস, বাচ্চার মাথা পেছন দিকে হেলে আছে, ব্যথা নেই, তেমন খিটুনি হচ্ছে না। ভাবনাটা সেই জন্যই। যাই হোক, এখনো কিছুই বলা যায় না। প্রসব-যন্ত্রণা ওঠার পর ব্যথাটা কী ভাবে থাকে তার ওপরেই সব নির্ভর করে। কী হবে আর না হবে তা তখন বোঝা যাবে।’

পরদিন ইউরির ফোন ধরলে হাসপাতালের দারোয়ান, তাকে অপেক্ষা করতে ব’লে সেই যে খোঁজ নিতে গেলো সে, ফিরে এলো ইউরিকে প্রায় দশ মিনিট মর্মান্তিক যন্ত্রণায় ফেলে রাখার পর; এই স্বল্প এবং নিষ্ঠুর বার্তা নিয়ে এলো সে: ‘ওঁরা বললেন আপনার স্ত্রীকে অনেক আগে নিয়ে এসেছেন, এখন ফিরিয়ে নিয়ে যেতে বলছেন।’

ইউরা তাকে হিংস্রভাবে বললে আরো দায়িত্বসম্পন্ন কাউকে ডেকে দিতে। অবশেষে যে-নার্সটি সাড়া দিলে সে জানালো যে লক্ষণগুলি ভুল ছিলো, দু’একদিনের দেরি হ’তে পারে, তবে ডাক্তার যেন সেজন্য চিন্তা না করেন।

তৃতীয় দিনে শুনলো যে গত রাত থেকে যন্ত্রণা শুরু হয়েছে, জল ভাঙছে, ভোর পর্যন্ত ব্যথা এসেছে ঢেউ ভেঙে-ভেঙে।

সে তক্ষুনি হাসপাতালে ছুটলো। দরজাটা ভুলে অর্ধেক ভেজানো ছিলো, গলি দিয়ে সেদিকে এগোতে-এগোতে টোনিয়ার মর্মবিদারক চীৎকার ইউরির কানে এলো; কোনো দুর্ঘটনায় ট্রেনের চাকার তলায় যে পিষ্ট হয়েছে তাকে যদি হিচড়ে টেনে নিয়ে যাওয়া হয় তাহ’লে সে যেমন আতর্জন করবে তেমনি চীৎকার করছে টোনিয়া।

টোনিয়ার সঙ্গে তাকে দেখা করতে দেওয়া হ’লো না। নিজের হাতের মুঠি কামড়ে রক্ত বের করে ফেললো ইউরি, জানলার ধারে গিয়ে দাঁড়ালো; গত দু’দিনের মতো আজও বৃষ্টি প’ড়ে চ’লেছে ঝাঁকা রেখায়।

একজন দাই বেরিয়ে এলো, আর ইউরি শুনলো নবজাত শিশুর চীৎকার। ‘টোনিয়া ভালো আছে, টোনিয়া ভালো আছে,’ আনন্দে ইউরি নিজের মনে ব’লে উঠলো।

‘ছেলে হয়েছে। ছোট্ট এক ছেলে। নিরাপদ প্রসবের জন্য আমার অভিনন্দন জানাই।’ গানের মতো গলায় দাই বললে। ‘এখনো ভেতরে যেতে পারবেন না আপনি। সব হ’য়ে গেলেই আপনাকে ডাকবো। তারপর স্ত্রীকে নিয়ে অনেক ঝামেলা করতে হবে আপনাকে। খুব কষ্ট পেয়েছে। এই প্রথমবার কিনা। প্রথমবার সব সময়ই একটু বেশি কষ্ট হয়।’

‘টোনিয়া ভালো আছে, টোনিয়া ভালো আছে,’ এই চিন্তায় সুখী ইউরির কানে দাইয়ের কথা ঢুকছিলো না, সে যেন শুনছিলোই না যে দাইটি তাকে এমনভাবে অভিনন্দন জানাচ্ছে যেন সে-কিছু অংশ নিয়েছে এই ব্যাপারে। —কিন্তু সত্যি, এই ব্যাপারের সঙ্গে তার কী সম্বন্ধ? পিতা-পুত্র; বিনা পরিশ্রমে পাওয়া এই পিতৃত্বে সে গর্ব করার কিছু পেলে না, যে-পিতৃত্বের উপহার আকাশ থেকে ঝরে পড়লো তার মাথায়, তাতে নতুন কোনো অনুভূতি জন্ম নিলো না তাব মনে। এ-সব তার চেতনার বাইরে। আসল যা তা হ’লো টোনিয়া, টোনিয়া—যে মৃত্যুর দরজা থেকে নিরাপদে ফিরে এসেছে।

হাসপাতালের কাছেই তার এক রোগীর বাড়ি। তাকে দেখে আধ ঘণ্টার মধ্যে ইউরি ফিরে এলো। লবি আর ঘরের দরজা আবার খুলে দেওয়া হয়েছে। কী করছে না-জেনেই ইউরি লবির দিকে ছুটলো।

শাদা পোশাক-পরা সেই হস্তী-ডাক্তার যেন মাটি ফুঁড়ে উঠে এসে তার পথ আটকে দাঁড়ালেন।

‘কী, করছেন কী আপনি?’ রোগিণী যাতে শুনতে না পায় সেজন্য দম আটকে ফিসফিসে গলায় তিনি বললেন। ‘মাথা-থারাপ হ’য়ে গেছে নাকি আপনার? কাঁটা ছেঁড়া, রক্ত, সেপিসিসের ভয়, আর মানসিক আঘাতের কথা ছেড়েই দিলাম। বাঃ, ডাক্তারের পক্ষে এমন ব্যবহার সত্যিই চমৎকার!’

‘আমি তো...আমি সে-রকম কিছু করতে চাইনি...। দয়া ক’রে আমাকে একবার শুধু দেখতে দিন। এখান থেকে, এই ফাটলটুকু দিয়ে।’

‘সে আলাদা কথা। আচ্ছা বেশ, যদি নেহাৎই দেখতে চান। কিন্তু আমি যেন আর না দেখি...আপনার স্ত্রীর যদি চোখে প’ড়ে যান তাহ’লে আমি আপনার গলা ছিঁড়ে ফেলবো, খুন-খারাপি হ’য়ে যাবে একেবারে।’

ঘরের ভেতরে শাদা পোশাক-পরা দু-জন স্ত্রীলোক দাঁড়িয়ে আছে দরজার দিকে পেছন ফিরে; ধাত্রী আর নার্স। নার্সের হাতের পাতার ওপর নড়ছে আর চি-চি আওয়াজ করছে এক মানব-সন্তান, ঘন-লাল রঙের এক টুকরো রবারের মতো সে, একবার টান করছে নিজেকে, আবার গুটিয়ে নিচ্ছে। নাড়ি কাটার আগে নাভির ওপর কাপড় বেঁধে দিচ্ছে ধাত্রী। ঘরের মাঝখানে এক চাকাওলা সার্জিকাল খাটে টোনিয়া শুয়ে আছে। বেশ উচু খাট। উদ্বেজনায সব-কিছুই ইউরি বাড়িয়ে-বাড়িয়ে দেখছিলো, তার কাছে খাটটাকে মনে হ’লো দাঁড়িয়ে-লেখার টেবিলের সমান উচু।

অনেক উচুতে উঠে গিয়ে, সাধারণ মানুষের পক্ষে ঘরের ছাদের অনেক বেশি কাছাকাছি পৌঁছে, তার অবসিত ব্যথার ঘোরে আচ্ছন্ন হ’য়ে টোনিয়া শুয়ে আছে। এক ভেলা যেন টোনিয়া, ইউরির মনে হ’লো, মৃত্যুর নদীর ওপর দিয়ে এক অজানা দেশ থেকে জীবনের মহাদেশে দেশান্তরী আত্মা বহন ক’রে নিয়ে এসে বন্দরে বিশ্রাম নিচ্ছে। এইমাত্র নামলো সেই আত্মাদের একজন; শূন্যগর্ভ জাহাজ নোঙর বেঁধে বিশ্রাম নিচ্ছে। তার পরিশ্রান্ত মাঙ্গল আর গলুই, তার সমস্ত সন্তা এখন বিশ্রান্ত, আর তার স্মৃতি থেকে সম্পূর্ণভাবে মুছে গেছে সেই অন্য তীরের দর্প, সে ভুলে গেছে তার নদী পার হওয়া, তার তীরে এসে নোঙর ঝাঁকান কথা।

যে-দেশে তার পতাকা সে উড়িয়ে এলো সে-দেশে আর কেউ যায় নি, তাই এখন তার সঙ্গে কথা বলার ভাষা কেউ জানে না।

ইউরির হাসপাতালে সবাই তাকে অভিনন্দন জানালো। কী দ্রুত গতিতে খবর ছড়ায় ভেবে অবাক লাগলো ইউরির।

স্টাক-ক্রম—যেটা আবর্জনার গুদোম ব’লে পরিচিত—সেখানে চ’লে এলো সে। ভারাক্রান্ত হাসপাতালে এতো স্থানান্তর যে ওটাকেই ক্রোক-ক্রম হিসেবে ব্যবহার করা হচ্ছে। লোকেরা এ-ঘরে বাইরে থেকে ঢোকে গলোশ পায়ে, ভুলে ফেলে যায় সঙ্গের জিনিসপত্র, আর ঘরের মেঝে ভ’রে ফেলে কাগজের কুচিতে, সিগারেটের টুকরোয়।

জানলার ধারে দাঁড়িয়ে একজন মোটোসোটা বয়স্ক আবাসিক ভারপ্রাপ্ত ছাত্র একটা পাত্রে আলোয় তুলে ধ’রে চশমার মধ্যে দিয়ে ভালো ক’রে দেখছিলো, অনচ্ছ কিছু তরল পদার্থ সেই পাত্রের মধ্যে ভরা।

‘আমার অভিনন্দন জানাচ্ছি,’ ঘুরে না-তাকিয়ে সে বললে।

‘ধন্যবাদ।’

‘আমাকে ধন্যবাদ দেওয়ার কোনো মানে হয় না। আমার সঙ্গে তো এ ব্যাপারটার কোনো যোগই ছিলো না। পিচুজকিন পোস্ট-মর্টেম করেছে। খুব চমকেছে কিন্তু সবাই—অসুখটা একিনোককাসই ছিলো। একেই ব’লে আসল রোগনির্ণয়—সবাই বলছে এ-কথা। এ ছাড়া আর অন্য কথা নেই কারো মুখে।

ঠিক তক্ষুনি প্রধান চিকিৎসক ঘরে ঢুকলেন; তাদের দু’জনকে অভিবাদন জানিয়ে বললেন: ‘উঃ, এ কী নরককুণ্ড হ’য়ে আছে এখানে। কী আবর্জনা! হ্যাঁ, ভালো কথা, জিভাগো, একিনোককাস-ই ছিলো অসুখটা; ভাবো একবার, আমরা সবাই ভুল করেছিলাম। আমার অভিনন্দন জানাচ্ছি তোমাকে। হ্যাঁ, আর-এক কথা। খুব বিস্ত্রী একটা ব্যাপার হয়েছে। তোমাদের ওপর আবার নজর পড়েছে। এবার আর ঠেকাতে পারলাম না। ডাক্তারের দারুণ অভাব যে ওদের। শিগগিরই তোমাকে বাকুদের গঙ্গের মধ্যে গিয়ে পড়তে হবে।’

৬

ইউরিয়্যাটিনে আন্টিপভরা বেশ তাড়াতাড়িই গুছিয়ে বসলো। গুইশারদের ভালোবেসে মনে রেখেছে অনেকেই, তাই নতুন জায়গায় সংসার পাতার নানান ঝামেলা সহজেই মেটাতে পারলে লারা। চার বছর এখানে কেটে গেলো তাদের।

হাতভরা কাজ লারার, বহু ভাবনা। ঘরের কাজ দেখতে হয় তাকে, তা ছাড়া দেখতে হয় তিন বছরের মেয়ে কাটিয়াকে।—মাফুটকা, তাদের লালচুলের দাসীটি, যথাসাধ্য চেষ্টা করে বটে, কিন্তু সব কাজ সেয়ে উঠতে পারে না।—তার ওপর, পাশার ইচ্ছে এবং আগ্রহের অংশ নেয় লারা, আর মেয়েদের হাইস্কুলে পড়ায়। অন্তহীন কাজ করে সে, তাতেই সে সুখী। এই জীবনের স্বপ্নই সে দেখেছিলো।

ইউরিয়্যাটিন ভালো লাগে তার। এখানেই সে জন্মেছে। মন্ত নদী বিনভার তীরে এই জায়গা, উরালের এক রেল-লাইন তাকে ছুঁয়ে গেছে। নদীটি নাব্য, যদিও অনেকদূর উজিয়ে গেলে আর নৌকো চলে না।

ইউরিয়্যাটিনে আসন্ন শীতের একটি লক্ষণ হ’লো এই যে লোকেরা তখন নদী থেকে নৌকো তুলে নেয়; গাড়ি বোঝাই ক’রে নৌকোগুলি শহরে নিয়ে এসে ফেলে রাখে খিড়কির উঠানে। খোলা ব্যতাসে প’ড়ে থাকে নৌকোগুলি, অপেক্ষা করে বসন্তের জন্য। অন্যান্য অঞ্চলে, সারস পাখির অন্যত্র উড়ে যাওয়া, বা প্রথম তুষারপাতের যা অর্থ, এখানে উঠানের ছায়ায় উপড় হ’য়ে প’ড়ে-থাকা নৌকো দেখে লোকে ঠিক তা-ই বোঝে। আন্টিপভরা যে-বাড়িটা ভাড়া নিয়েছিলো তার উঠানেও এরকম একটা নৌকো প’ড়েছিলো; তার শাদা মাস্তুলের তলাটা হ’লো কাটিয়ার গ্রীষ্মাবাস, সেখানে ব’সে সে খেলা করে।

ইউরিয়্যাটিনের মফস্বলি ধরনধারণ ভালো লাগে লারার, ভালো লাগে উত্তর-প্রদেশীয় টানে লম্বা স্বরবর্ণের উচ্চারণ, আর ফেব্রুয়ারি জুতো আর ছাইরঙা ফ্ল্যানেলের হাত-কাটা জামা-পরা সরল বিশ্বাসপরায়ণ বুদ্ধিজীবীদের।

আশ্চর্যের বিষয় পাশা, যে নাকি মস্কো-রেলওয়ে-কর্মচারীর ছেলে, দেখা গেলো অসংশোধনীয়ভাবে সে শহুরে। লারার চাইতে ঢের বেশি কঠোরভাবে ইউরিয়্যাটিন-বাসীদের বিচার করে সে। তার কাছে ওরা হ’লো মূর্থ এবং বুনা; অসহ্য লাগে তার।

পাশার এক অসাধারণ ক্ষমতা এখন আবিষ্কৃত হ’লো: যেমন দ্রুতবেগে সে পড়ে, তেমনি নির্ভুলভাবে সংগৃহীত সংবাদগুলি মনে রাখে। আগে বিস্তর পড়েছিলো সে—লারাকেই অবশ্য

অনেকখানি ধন্যবাদ দিতে হয় সৈজন্না। এই মফস্বলের নির্জন বিশ্রামে সে এখন এতোই পড়াশুনো করতে লাগলো যে এমনি কি লারাও অমর যথেষ্ট জানে বলে তার মনে হ'লো না। আর স্কুলের অন্যান্য শিক্ষকদের ছাড়িয়ে সে অবশ্য অনেক উচ্চতে উঠে গেছে; এখানে তার দম আটকে আসছে, এই তার নালিশ। এখন এই যুদ্ধের সময়ে মফস্বলের বাঁধা-ধরা সাধারণ দেশপ্রেমের সঙ্গে কিছুই মেলে না পাশার; স্বদেশের বিষয়ে তার অনুভূতি আরো অনেক জটিল।

কলেজে পাশার বিষয় ছিলো প্রাচীন সাহিত্য, এখানে সে ল্যাটিন ও প্রাচীন ইতিহাস পড়ায়। কিন্তু স্কুল থেকেই বিজ্ঞানের দিকেও একটা আবেগ সঞ্চিত আছে তার মনে—পদার্থবিদ্যা আর গণিত—তার সেই প্রায়-বিশ্মৃত আবেগ এখন আবার সজীবিত হ'লো। এই বিষয়গুলির ওপর বাড়িতে যা পড়াশুনো করেছে তাতে বিশ্ববিদ্যালয়ের স্তরে উঠে গেছে সে; তার স্বপ্ন, বিজ্ঞানের কোনো বিষয় নিয়ে পরীক্ষা দেয়, তারপর সপরিবারে চ'লে যায় পিটার্সবার্গে। রাত জেগে প'ড়ে-প'ড়ে শরীর খারাপ হ'য়ে যেতে লাগলো তার। অনিদ্রারোগে ধরলো।

স্ত্রীর সঙ্গে তার সম্পর্ক সুন্দর, কিন্তু যথেষ্ট সরল নয়। তার প্রতি তার স্ত্রীর কোমলতা, তাকে নিয়ে তার বাড়াবাড়ি—এ-সবের ভায় হাঁপ ধ'রে আসে, কিন্তু কিছু বলতে ভয় পায় সে, পাছে একটা নির্দোষ কথাও অভিযোগ ব'লে মনে হয় লারার—পাছে সে ভাবে যে পাশা তাকে এই কথায় মনে ক'রিয়ে দিচ্ছে যে তার রক্ত পাশার চাইতে অভিজাত, কিংবা সে যে এক সময় অন্যের প্রণয়িনী ছিলো সেইদিকে ইঙ্গিত করছে। পাশার ভয় ছিলো পাছে লারা এমন সন্দেহ করে যে তার সম্বন্ধে পাশার হাস্যকর এবং অসংগত কোনো ধারণা আছে, আর এই ভয়ই বাধা সৃষ্টি করেছিলো তাদের দু'জনের মধ্যে স্বাভাবিকতায়। প্রত্যেকে তারা চেষ্টা করে অন্যজনের চাইতে উদার ব্যবহার করতে, আর তাইতে ব্যাপারটা আরো গোলমেলে হয়ে ওঠে।

সেদিন রাতে তাদের বাড়িভেঁদে কয়েকজন অতিথি আসছিলেন—লারার স্কুলের প্রধান শিক্ষয়িত্রী, পাশার কয়েকজন সহ-শিক্ষক, এক সলিশি আদালতের একজন সভা—সেখানে পাশাকেও ডাকা হয়েছিলো সম্প্রতি—এবং আরো কয়েকজন। এরা সকলেই, পাশার মতে, বোকার চূড়ান্ত। লারা ওদের সঙ্গে কী ক'রে অতো ভালো ব্যবহার করতে পারে তা ভেবে পাশা অবাক হয়, সে কিছুতেই ক্রকথা বিশ্বাস করতে পারবে না যে ওদের মধ্যে একজনকেও লারা সত্যি-সত্যি পছন্দ করে।

ওরা চ'লে যাবার পর ঘরদোর পরিষ্কার করতে, গুছোতে, রান্নাঘরে মাফটিকার সঙ্গে বাসন মাজতে, অনেক সময় নিলে লারা। তারপর, কাটিয়ার গায়ে ভালো ক'রে চাপা দেওয়া আছে কিনা, পাশা ঘুমিয়েছে কিনা, এই সব দেখে-শুনে, সে তাড়াতাড়ি পোশাক ছেড়ে আলো নিবিয়ে স্বামীর পাশে শুয়ে পড়লো—যে-ভাবে শিশু তার মায়ের পাশে শোয় তেমন সহজ তার ভঙ্গি।

কিন্তু পাশা ভান করছিলো; আসলে সে ঘুমোয়নি। আজকাল প্রায়ই তার যা হয়, ঘুম আসছিলো না। ঘণ্টার পর ঘণ্টা জেগে-জেগে শুয়ে কাটাতে হবে বুঝে সে উঠে পড়লো, রাত-কাপড়ের ওপরেই চাপিয়ে নিলে পশমের কোট আর টুপি, তারপর বাইরে বেরুলো।

পরিষ্কার, শিশিরে ধোয়া রাত। বরফের পাংলা টুকরোগুলি তার পায়ের চাপে গুঁড়িয়ে যেতে লাগলো। জ'মে-যাওয়া মাটির টুকরোতে আচ্ছন্ন ঘন কালো পৃথিবীর ওপর তারায় উজ্জ্বল আকাশ থেকে ন্নান নীল আলোর শিখা এসে পড়েছে—মেথিলেটেড স্পিরিটের আগুনের মতো তার রং।

সেই শহরের এক প্রান্তে বাসা নিয়েছিলো আন্টিপভরা; অন্য প্রান্তে নদীর বন্দর। রাস্তার একেবারে শেষের বাড়িটি তাদের, বাড়ির পেছনে মাঠ, সেই মাঠ দিয়ে চ'লে গেছে রেলের লাইন, লেভেল ক্রসিং আছে সেখানে, আর আছে সিগনালের ঘর।

উপড় ক'রে রাখা সেই নৌফোর ওপর ব'সে আকাশের তারার দিকে তাকালো পাশা। গত

কয়েক বছর ধরে যে-চিন্তাগুলি তার সঙ্গী, তারা নাড়া দিচ্ছে মনের মধ্যে, অশান্তি বোধ করছে সে। কখনো-না-কখনো, সে ভাবলে, এদের সমাধান তাকে খুঁজে নিতে হবে; আর তা-ই যদি হয়, তাহলে এখনই বা নয় কেন?

এ-ভাবে চলতে পারে না, পাশা ভাবলে। তাদের বিয়ের অনেক আগেই এ-কথা তার উপলব্ধি করা উচিত ছিলো। কেন লারা তাকে শিশুর মতো প্রভ্রম দিয়েছে, প্রশ্ন ভরে অমনভাবে তাকাতে দিয়েছে তার দিকে? তখনো তো লারা তাকে দিয়ে যা ইচ্ছে তা-ই করাতে পারতো। সময়মতো ব্যাপারটা চুকিয়ে ফেলার মতো বুদ্ধি কেন হয়নি তার, লারা নিজেই তো জোর করেছিলো সব শেষ ক'রে দেবার জন্য? এ-কথা কি নিতান্তই স্পষ্ট নয় যে লারা যাকে ভালোবাসে সে পাশা নয়, সে হ'লো সেই কর্তব্য, যার দায় সে এমন সূচারূপে পালন করছে? লারা যা ভালোবাসে তা হ'লো তার নিজের মহত্বের প্রতিচ্ছবি। কিন্তু তার এই কর্তব্য, যতোই প্রশংসনীয়, যতোই মহৎ হোক না কেন, পারিবারিক জীবনের সঙ্গে তার যোগ কোথায়? আর সবচেয়ে যা খারাপ তা হ'লো এই যে পাশা তাকে আগের মতোই ভালোবাসে। লারার মাধুর্য যেন উপচে পড়ে। কিন্তু তবু—পাশা কি নিশ্চিত জানে যে তার দিক থেকেও প্রেম সত্যিই আছে? না কি তার প্রেমও আসলে এক অবোধ্য কৃতজ্ঞতা—লারার মধুরতা আর উদারতার জন্য? কোনটা সত্য তা কে বলি দেবে?

তাহলে সে করবে কী? এই জীবন থেকে মুক্তি দেবে স্ত্রী ও কন্যাকে? তার নিজের মুক্তির চাইতেও সেটা দরকারি। হ্যাঁ, কিন্তু কী ক'রে? বিবাহবিচ্ছেদ? জলে ডুবে আত্মহত্যা? 'কী অসহ্য বাজে!' বিবর্তিতে পাশা নিজেই প্রতিবাদ করলে। 'যেন ও-সব কিছু সত্যিই কখনো করতে পারবে! তাহলে আর মনে-মনে এ-সব নাটকেপনার মহড়া দিয়ে লাভ কী?'

আকাশে তারাদের দিকে চোখ তুলে যেন উপদেশ চাইলো সে। দপদপ করতে থাকলো তারা, ছোটো আর বড়ো, একা কোনোটা, কোথাও বা একসঙ্গে অনেকে, কেউ নীল, কাকুর গায়ে রামধনু-রং। হঠাৎ মিলিয়ে গেলো সেই সব; আর দ্রুত, কর্কশ এক আলোয় স্পষ্ট হ'য়ে ফুটে উঠলো বড়ি, উঠোন, আর নৌকোর ওপর উপবিষ্ট পাশা। কেউ যেন খোলা টর্চ দোলাতে-দোলাতে মাঠ থেকে গেটের দিকে ছুটেছে। আঙুনের ফুলকি-ছিটোনো হলুদ ঝোয়ার মেঘ আকাশে ছড়াত-ছড়াত সৈন্য-বোঝাই একটা ট্রেন লেভেল ক্রসিং পার হ'য়ে পশ্চিম দিকে চলেছে; গত এক বছর ধরে যে-অসংখ্য ট্রেন দিনরাত ছুটে চলেছে তাদের মধ্যে এও এক।

মৃদু হাসলো পাশা, উঠে প'ড়ে শুতে গেলো। তার প্রশ্নের জবাব মিলেছে।

৭

পাশার সিদ্ধান্ত জেনে স্তম্ভিত হ'য়ে গেলো লারা, প্রথমে যেন নিজের কানকে বিশ্বাস করতে পারলো না সে। 'নিছক পাগলামি।' সে ভাবলে—'ও প্রলাপ বকছে। আমি যদি গ্রাহ্য না করি তাহলেই ভুলে যাবে।'

কিন্তু দেখা গেলো গত পনেরো দিন ধরে পাশা প্রস্তুত হচ্ছে। রিক্রুটিং আশির্শে কাগজপত্র দাখিল করেছে, স্কুলে পাশার জায়গায় আরেকজন এসেছেন, আর পাশা ছুكم পেয়েছে ওম্বল-এ সামরিক শিক্ষাকেন্দ্রে চ'লে যাবার জন্য।

চাষার মেয়ের মতো চ্যাচাতে শুরু করলো লারা, পাশার হাত আঁকড়ে ধরলো, পায়ের তলায় গড়ালো। 'পাশা, পাশা' আতনাদ বেরুলো তার গলা চিরে, 'আমাদের ছেড়ে যেয়ো না। এমন কাজ কোরো না তুমি, কোরো না, এখনো সময় আছে। আমি সব ব্যাবস্থা ক'রে নেবো। ভালো ক'রে স্বাস্থ্য পরীক্ষা করা হয় নি তোমার, আর তোমার ঐ হাট... মত বদলাতে কি লজ্জা করছে তোমার? আর তোমার এই পাগলামির কাছে তোমার পরিবারকে জলাঞ্জলি দিতে লজ্জা করছে

না? তুমি হবে স্বেচ্ছাসেবক! আজীবন বড়িয়াকে চাট্টা ক'রে এখন কি তাকেই ঈর্ষা করছো তুমি? অফিসারের পোশাক প'রে তোমাকেও কাপ্তানি ক'রে বেড়াতে হবে, তুমিও অন্য সকলের মতো কথায়-কথায় তলোয়ার নাচাবে! পাশা, কী হয়েছে তোমার? তুমি তো সেই আগের তুমি নও, আমি যে তোমাকে চিনতে পারছি না! কী তোমাকে এমনভাবে বদলে দিলো? সত্যি ক'রে বলো, হাঁ শুভ দোহাই, বড়ো-বড়ো কথা বাদ দিয়ে আমাকে শুধু বর্ণিয়ে নাও, বর্ণিয়া সত্যিই এই চায়?'

হঠাৎ সে উপলব্ধি করলো যে ব্যাপারটা আসলে তা নয়। সবটা বুঝতে না-পারলেও আসল কথাটা সে ধরতে পারলে। পাশা তার সঙ্গে লারার আচরণকে ভুল বুঝেছে। চিরদিনই পাশার প্রতি তার আসক্তি অংশত মায়ের মমতা দিয়ে ভরা, পাশা সেই মমতাব বিরুদ্ধে বিদ্রোহ করেছে, বোঝে নি যে স্ত্রী-পুরুষের সাধারণ অনুভূতির চাইতে লারাব এই ভালোবাসা কম নয়, বরং আরো বেশি।

চৌট কামডালো লারা, যেন মার খেয়ে কঁকড়ে গেলো সে, কান্না গিলে ফেলে নিঃশব্দে জিনিসপত্র গোছাতে শুরু করলো।

পাশা চ'লে যাবার পর লারার মনে হ'লো সমস্ত শহর যেন স্তব্ধ হ'য়ে গেছে, এমনকি আকাশেও অনেক কম কাক উড়ে বেড়াচ্ছে। 'মা ঠাকরন, মা ঠাকরন,' মার্ফটকা তার সংবিৎ ফিরিয়ে আনার চেষ্টা করলো। 'মা, মা,' কাটিয়া তার জমার হাতা ধ'বে টোনেই চললো।—এ তার জীবনের সবচেয়ে বড়ো পবাজয়। তার সর্বশ্রেষ্ঠ, তার উজ্জ্বলতম আশাগুলি শেষ হ'য়ে গেলো।

সাইবেরিয়া থেকে পাশা যে-সব চিঠি লিখলে তাতে তার মনোভাব জানতে পারলো লারা। স্ত্রী ও মেয়ের অভাব তীব্রভাবে অনুভব করেছে সে। কিন্তু কয়েক মাসের মধ্যেই পাশা এনসাইনের পদ পেলো, আর সেই রকমই আকস্মিকভাবে প্রেরিত হ'লো যুদ্ধক্ষেত্রে। যাবার পথে কাছাকাছি কোথাও ইউরিয়্যাটিন পড়লো না, আর মস্কোতেও কারো সঙ্গে দেখা করার সময় হ'লো না তার।

যুদ্ধক্ষেত্র থেকে যখন সে চিঠি লিখলো তখন মনে হ'লো তার মনের ভার আগের চাইতে হালকা হয়েছে। নিজেকে অন্য সকলের থেকে আলাদা করতে চায় সে, যাতে কোনো সামান্য আঘাতের ফলে অথবা তার পুরস্কারস্বরূপ ছুটি নিয়ে বাড়ি গিয়ে তার পরিবারের সঙ্গে সে দেখা করতে পারে। শিগগিরই সুযোগ পেলো। ব্রুসিলভের সেনাবাহিনী শত্রুপক্ষের ব্যাং ভেদ ক'রে আক্রমণ শুরু করলো। পাশার চিঠি আসা বন্ধ হ'য়ে গেলো। প্রথমে লারা উদ্বিগ্ন বোধ করেনি। পাশার নীরবতার কারণ সামরিক অভিযান ব'লেই মনে করেছিলো—তার রেজিমেন্ট যাত্রা শুরু করতে সে চিঠি লিখতে পারছে না। হেমন্তকালে অগ্রগতি ধীর হ'য়ে এলো; সৈন্যদল পরিখাখনন শুরু করলে, কিন্তু তবু পাশার কাছ থেকে কোনো চিঠি এলো না। এবার লারা উদ্বিগ্ন বোধ করতে লাগলো, নানারকম খোজ-খবর নিতে শুরু করলে সে, প্রথমে স্থানীয় ভাবে ইউরিয়্যাটিনে, তারপর চিঠিতে মস্কোতে, আর পাশার পুরোনো বন্ধুদের কাছে। কিন্তু কোনো জবাব মিললো না, মনে হ'লো কেউ কিছু খোজ জানে না।

স্থানীয় কয়েকজন মহিলার সঙ্গে লারাও শহরের হাসপাতালের মিলিটারি বিভাগে কিছু-কিছু কাজ করতে শুরু করেছিলো। এবার সে সত্যি সত্যি কাজ শিখতে লাগলো, নার্স হবার যোগ্যতা অর্জন ক'রে স্কুল থেকে ছ'মাসের ছুটি নিলো সে; তারপর মার্ফটকার ওপর বাড়ি ব'লে দিয়ে, কাটিয়াকে নিয়ে মস্কোতে গেলো। মেয়েকে লিপার কাছে রাখলে সে, লিপা একাই বাস করেছে তখন, কারণ তার স্বামী জার্মান নাগরিক ব'লে অন্যান্য শত্রুপক্ষীয় অসামরিক ব্যক্তিদের মতো উফাতে অন্তরীণ ছিলেন।

অন্য কোনো উপায়ে পাশার খোঁজ করা অর্থহীন জেনে লারা নিজেই তার খোঁজ নেবে ঠিক করেছে। এই উদ্দেশ্য মনে রেখে, হাঙ্গেরির সীমান্তগামী এক হাসপাতাল-গাড়িতে নার্সের চাকরি নিলো সে, পাশা তার শেষ ঠিকানা দিয়েছিলো লিঙ্গির, এই ট্রেন লিঙ্গি হ'য়ে যাবে।

৮

একটি রেড ক্রস ট্রেন, টাটিয়ানা কমিটির^১ সংগৃহীত আহতদের জন্য স্বতঃপ্রণোদিতভাবে দেওয়া নানারকম সাহায্য নিয়ে আঞ্চলিক হেডকোয়ার্টারে এসে পৌঁছলো। লম্বা গাড়ি, অধিকাংশই কদাকার মালের বগি; একটিমাত্র প্রথম শ্রেণীর কামরায় মস্তোর বিশিষ্ট নাগরিকেরা এসেছেন সৈন্যদের জন্য উপহার নিয়ে। তাদের মধ্যে একজন হ'লো গর্ডন। সে জানত যে তার ছেলেবেলার বন্ধু জিভাগো আঞ্চলিক হাসপাতালের সঙ্গে সংশ্লিষ্ট আছে; শুনলো হাসপাতালটা কাছেই এক গ্রামে, লাইনের ঠিক ওপারে যাবার জন্য অনুমতি আদায় করলো গর্ডন, একটা ঘোড়ার গাড়ি যাচ্ছিলো গ্রামে, তাতে চ'ড়ে বসলো।

গাড়ির চালকটি বিয়েলোরুশ—অর্থাৎ লিথুয়েনীয়, ভাঙা-ভাঙা রুশ বলে। গুপ্তচরের হুজুগটা এখন খুব চলতি ব'লে নিরুত্তাপ আর কেজো কথোপকথন চালালো লোকটি; তার সুদৃঢ় দেশভক্তির দাপটে নিরুদয় হ'য়ে গর্ডন বেশির ভাগ পথ মুখ বুজে কাটালো।

প্রধান কার্যালয়ে— যেখানে সৈন্যদলের ঘাটি সরিয়ে-সরিয়ে সবাই এমন অভ্যস্ত যে একশো মাইলের কমে দূরত্ব মাপে না—গর্ডন শুনেছিলো যে গ্রামটি বেশ কাছে, খুব বেশি হ'লে পনেরো মাইল দূর ওখান থেকে; আসলে পঞ্চাশ মাইলের কাছাকাছি।

সমস্ত পথ ঠাঁ দিকের সুদূর দিগন্ত থেকে গুমরোনো গর্জন ভেসে এসেছে। ভূমিকম্পের কোনো অভিজ্ঞতা নেই গর্ডনের, তবু উপলব্ধি করলো যে আগ্নেয়গিরির গর্জন আর আকস্মিকতার সবচেয়ে ভালো তুলনা শত্রুপক্ষের কামানের আওয়াজ—রাগি, দূর-থেকে-ভেসে-আসা, ঠিকমতো চেনা যাচ্ছে না যেন। সন্ধ্যার সময় সেই দিকের আকাশে গোলাপি রঙের আভা ছড়িয়ে পড়লো, ধিকিধিকি জ্বললো ভোর অবধি।

পথে অনেক গ্রামের ধ্বংসাবশেষ চোখে পড়লো। কোনো গ্রাম সম্পূর্ণ জনশূন্য, কোথাও-কোথাও মাটির তলায় ঘরে বাস করছে লোকেরা। যেখানে এক সময়ে ঘর-বাড়ি ছিলো, সেখানে বাড়িঘরের জায়গায় প'ড়ে আছে ধুলো আর চুন-সুরকির স্তুপ। বন্ধা পতিত জমির মতো আগুনে পোড়া এই জনবসতির দিকে এক পলক তাকিয়েই সমস্তটা দেখে নেওয়া যায়। যার-যার বাড়ির ভগ্নস্তূপের মধ্যে ব'সে বন্ধারা ছাই আঁচড়ে চলেছে, ঝুঁড়ে-ঝুঁড়ে কিছু-একটা তুলে নিয়ে সরিয়ে রাখছে এক পাশে, বুঝি তারা ভাবছে যে দেয়ালগুলি এখনো বাইরের লোকের চোখ থেকে তাদের আড়াল ক'রে দাঁড়িয়ে আছে। গর্ডন যখন তাদের পাশ দিয়ে যাচ্ছে, চোখ তুলে তার দিকে এমনভাবে তাকাচ্ছিলো যেন জিজ্ঞাসা করছে কবে আবার এই পৃথিবী প্রকৃতিস্থ হবে, শান্তি নামবে, শৃঙ্খলা ফিরে আসবে তাদের জীবনে।

অন্ধকার নামলে পরে তাদের গাড়িটা একদল সৈন্যের মধ্যে গিয়ে পড়লো, বড়ো রাস্তা ছেড়ে দেবার হুকুম হ'লো তাদের ওপর। গাড়ির চালক ঘোড়ার গাড়ি চলবার নতুন রাস্তা চেনে না। বেশ কয়েক ঘণ্টা বৃত্তাকারে ঘুরে বেড়ালো তারা, কোথাও পৌঁছলো না। ভোরবেলা তারা যে-গ্রামটিতে পৌঁছলো তার নাম এবং তারা যে-গ্রাম ঝুঁজছে তার নাম এক, কিন্তু হাসপাতালের খোঁজ কেউ জানে না সেখানে। জানা গেলো একই নামে দুটি গ্রাম আছে। অবশেষে,

^১ জার-কন্যা ডাচেস টাটিয়ানার নেতৃত্বাধীন একটি কমিটি।

সকালবেলায়, ঠিক গ্রামটি ঝুঞ্জে পেলে তারা। ক্যামোমিল^১ আব আইওডোফর্মের গন্ধে ভরা গ্রামের পথ দিয়ে যেতে-যেতে গর্ডন ঠিক করলে রাতে এখানে থাকবে না, দিনটা জিঁভাগোর সঙ্গে কাটিয়ে সেই সন্ধ্যাতেই রেল-স্টেশনে, যেখানে তাঁর অন্যান্য বন্ধুদের বেখে এসেছে, ফিরে যাবে। কিন্তু পাকচক্র তাকে এক সপ্তাহের ওপর থেকে যেতে হ'লো।

সেনাবাহিনীর অগ্রভাগ এগোতে শুরু করলো। সেই জেলার দক্ষিণ অংশে, যেখানে গর্ডন গিয়ে উপস্থিত হ'লো, আমাদের সৈন্যদল শত্রুপক্ষের ব্যুহে ভেদ করতে সক্ষম হয়েছিলো। শত্রুপক্ষের ব্যুহে যে-ফাঁক তারা সৃষ্টি করেছে তা আবো বড়ো ক'রে তুলে পশ্চাদবক্ষী সৈন্যরাও অগ্রসর হয়েছিলো; কিন্তু পেছিয়ে পড়লো তারা, অগ্রবর্তী বাহিনী তাদের থেকে বিচ্ছিন্ন হ'য়ে প'ড়ে শত্রুপক্ষের হাতে ধরা প'ড়ে গেলো। বন্দীদের মধ্যে একজন হলেন লেফটেন্যান্ট আশ্টিপভ, তাঁর বাহিনী আত্মসমর্পণ করাতে তিনি ধরা দিতে বাধ্য হলেন।

সকলের ধারণা তিনি হয় বোমায় নিহত হয়েছেন, নয়তো কোনো বিশেষারণের ফলে মাটি-চাপা পড়েছেন। এই সংবাদ ছড়িয়েছে তাঁরই একজন বন্ধু, এনসাইন গালিউলিন, আশ্টিপভ যখন অভিযানের নেতৃত্ব করছিলেন তখন পর্যবেক্ষণ-মঞ্চ থেকে দূরবীন দিয়ে দেখছিলো সে।

গালিউলিন যা দেখেছে তা আক্রমণকারী সৈন্যদলের চিরাচরিত ছবি। দ্রুত গতিতে এগিয়ে যাচ্ছে সবাই, প্রায় দৌড়ে পার হচ্ছে দুই পক্ষের মাঝখানকার অনধিকৃত জমিটুকু—হেমস্তের সেই মাঠে বাতাসে দুলছে শুকনো কাশ, আর স্তব্ধ হ'য়ে দাঁড়িয়ে আছে খোঁচা-খোঁচা গর্সের^২ ঝোপ। উদ্দেশ্য হ'লো অস্ত্রিয়ানদের ট্রেঞ্চ থেকে বের ক'রে এনে মুখোমুখি যুদ্ধ করা, অথবা হাত-বোমা ব্যবহার ক'রে তাদের শেষ ক'রে ফেলা। যারা ছুটছিলো মাঠটা তাদের কাছে মনে হচ্ছিলো অন্তহীন, তাদের পায়ের তলার মাটি চোরাবালির মতো স'রে-স'রে যাচ্ছে। তাদের এনসাইন ছুটছেন, প্রথমে তাদের আগে-আগে, তারপর পাশে-পাশে, রিভলভারটা মাথার ওপর দোলাচ্ছেন, 'ছুরে' বলতে-বলতে তাঁর মুখ কান থেকে কান পর্যন্ত ফেটে যাচ্ছে, কিন্তু সে আওয়াজ তিনি বা তাঁর সৈন্যরা কেউই শুনতে পাচ্ছে না। মাঝে-মাঝে মাটির ওপর শুয়ে পড়ছিলো সকলে, একসঙ্গে উঠে প'ড়ে আবার ছুটতে শুরু করছিলো চীৎকার করতে-করতে। আর প্রত্যেকবার, একজন কি দুজন, গুলিবিদ্ধ হ'য়ে অন্যদের সঙ্গেই পড়ছিলো মাটির ওপর, কিন্তু অন্যভাবে—বনের মধ্যে কেটে-ফেলা গাছের মতো ট'লে পড়ছিলো তারা, আর উঠছিলো না।

'লক্ষ্যের বাইরে গুলি ছুঁড়ছে ওরা, গোলন্দাজদের খবর দাও,' উদ্বিগ্নভাবে গালিউলিন তার পাশে দাঁড়ানো গোলন্দাজ বাহিনীর সেনাপতিকে বললে।—'না, দাঁড়াও, ঠিক আছে।'

আক্রমণকারীরা শত্রুপক্ষের প্রায় মুখোমুখি দাঁড়িয়েছে, এমন সময় গোলাবর্ষণ বন্ধ হ'য়ে গেলো। সেই আকস্মিক স্তব্ধতায় নিরীক্ষণকারীরা তাদের নিজেদের হৃৎস্পন্দন শুনতে পাচ্ছিলো, আশ্টিপভের মতো তারাও যেন তাদের সৈন্যদলকে শত্রুপক্ষের ট্রেঞ্চের ধারে এনে দাঁড় করিয়েছে, পরবর্তী কয়েক মুহূর্তের মধ্যে তাদেরও যেন প্রত্যাৎপন্নমতিত্ব আর বীরত্ব দেখিয়ে আশ্চর্য কিছু ঘটিয়ে ফেলতে হবে। ঠিক ঐসেই মুহূর্তে তারা দেখলো দুটো বোলো ইঞ্চির জার্মান কামান থেকে আক্রমণকারীদের ওপর গোলাবর্ষণ হ'লো। ধুলোর কালো মেঘে আর ধোঁয়ায় এর

^১ সুরভি লতাশিষ্য, তার রস ভেসজ হিসেবে ব্যবহৃত হয়।—অনুবাদের টীকা।

^২ Gorse: হলুদ ফুলে ভরা একরকম ঝোপ।—অনুবাদের টীকা।

পরে কী হ'লো আর দেখা গেলো না। 'ইয়া আল্লা! শেষ! ওদের হ'য়ে গেলো,' শাদা-ঠোটে ফিসফিস করলো গালিউলিন, তার ধারণা হ'লো এনসাইন এবং তাঁর দলের সকলেই নিহত হয়েছে। নিরীক্ষণ-মঞ্চের খুব কাছ ঘেঁষে আরো একটি গোলা চ'লে গেলো। দ্বিগুণ নিচু হ'য়ে, নিরীক্ষণকারীরা দ্রুত নিরাপদ দূরত্বে পালালো।

গালিউলিন ছিলো আন্টিপভের সঙ্গে একই গর্তে। আন্টিপভ মারা গেছেন, এ-কথা সবাই মেনে নেওয়ার পর, তাঁর বন্ধুরা গালিউলিনকে আন্টিপভের জিনিসপত্রের ভার নিয়ে তাঁর বিধবা স্ত্রীর জন্য রেখে দিতে বললো; আন্টিপভের জিনিসপত্রের মধ্যে তাঁর স্ত্রীর অনেকগুলি ফোটোগ্রাফ ছিলো।

গালিউলিন, যার জাত-ব্যবসা হ'লো মিস্ত্রিগিরি, সম্প্রতি নতুন পদে উন্নীত হয়েছে। টিভেরজিনের ফ্ল্যাট-বাড়ির ভাড়াটে গিমাঞ্চেদিনের ছেলে গালিউলিন—সেই ইউসুপকা, যাকে সুদূর অতীতে ফোরম্যান খুডলেয়েভ শিক্ষানবিশ হিসেবে পেয়ে ধ'রে পেটাতো। তার সেই অতীত আক্রমণকারীর কাছেই এখন সে তার বর্তমান উন্নতির জন্য ঋণী।

যুদ্ধের চাকরিতে এসে, নিজের ইচ্ছের বিরুদ্ধে এবং নিতান্ত অকারণে, গালিউলিন নিজেকে আবিষ্কার করেছিলো পশ্চাদভাগের এক ছোটো শহরের ঘাঁটিরক্ষকের মতো এক আয়েসি চাকরিতে। আধা-অসমর্থ কিছু লোক নিয়ে তৈরি হয়েছে সেই ঘাঁটি; প্রত্যেকদিন সকালে তাদের প্রায় তাদের মতোই বন্ধ নির্দেশকের কাছে ড্রিল করতে হয়, যে-ড্রিল তাদের নির্দেশক এবং তারা—সকলেই ভুলে গেছে। গালিউলিনকে সেই ড্রিলের দেখাশোনা করতে হ'তো, আর লক্ষ্য রাখতে হ'তো এ্যাডজুটেন্টের আপিশের সামনে পাহারাদারের বদলের ওপর। আর কোনো কাজ আশা করা হ'তো না তার কাছ থেকে। জগতে তার কোনো দুঃখ নেই, এমন সময় মস্কো থেকে যে-সমস্ত নতুন লোককে তার অধীনে পাঠানো হ'লো দেখা গেলো তাদের মধ্যে তার অতি পরিচিত একটি চেহারা—'পিয়টর' খুডলেয়েভ।

'বেশ, বেশ, আমার পুরোনো বন্ধু,' তিস্ত হাসলো গালিউলিন।

'আজ্ঞে হ্যাঁ,' সেলাম ক'রে, অ্যাটেনশন হ'য়ে দাঁড়িয়ে খুডলেয়েভ জবাব দিলে।

ব্যাপারটার ওখানেই শেষ হওয়া অসম্ভব। ড্রিলের সময় সেপাইটির একটা ভুল দেখামাত্র লেফটেন্যান্ট হুংকার দিয়ে উঠলেন, আর যেই তাঁর মনে হ'লো যে লোকটি তাঁর চোখের দিকে সোজা না-তাকিয়ে একটা পাশের দিকে তাকিয়ে আছে, অমনি তিনি তার চোয়ালে ঘৃষি চালিয়ে দিলেন, তারপর দু'দিন তাকে কয়েদ ক'রে রাখলেন শুধু রুটি আর জল খাইয়ে।

এরপর থেকে গালিউলিনের প্রতি পদক্ষেপে যেন প্রতিহিংসা ব'রে পড়তে লাগলো। কিন্তু তাদের দু'জনের পদের এমনিই তফাৎ, রাষ্ট্র তাদের দু'জনের সম্পর্ক এমনভাবে বেঁধে দিয়েছে যে এই খেলা অত্যন্ত অসংগত হ'য়ে উঠলো; নিতান্ত দুষ্টিকটু হ'লো ব্যাপারটা। কী করা যায়? তারা দু'জনে এক জায়গায় থাকতে পারে না। কিন্তু অধীনস্থ দলের মধ্যে একজনকে বদলি করার কী অজুহাত একজন অফিসার দিতে পারেন? অপর পক্ষে, নিজের বদলির জন্য আবেদন করতে হ'লেও কী কারণ দেখাবে গালিউলিন? অবশেষে ঘাঁটিরক্ষকের কাজের অর্থহীনতা এবং একঘেয়েমি বজ্রহাতে গালিউলিন যুদ্ধক্ষেত্রে যাবার জন্য অনুরোধ জানালো। এতে প্রশংসাই হ'লো তার, আর যখন প্রথম নতুন পদে বহাল হ'য়েই সে তার অন্যান্য গুণগণনা প্রদর্শন করলো তখন দেখা গেলো এক চমৎকার অফিসার হবার মতো ক্ষমতা আছে তার, এবং শিগগিরই লেফটেন্যান্টের পদে উন্নীত হ'লো সে।

টিভেরজিনদের আমল থেকেই আন্টিপভকে চিনতো গালিউলিন: ১৯০৫ সালে সে যখন টিভেরজিনের সঙ্গে ছ'মাস কাটিয়েছিলো তখন রোববারে-রোববারে ইউসুপকা তার সঙ্গে খেলতে আসতো। সেখানে দু'একবার লারার সঙ্গেও দেখা হয়েছে তার। তারপর থেকে তাদের

দু'জনের কোনো খবরই সে রাখেনি। ইউরিয়্যাটিন থেকে এসে আশ্চিপভ যখন রেজিমেণ্টে যোগ দিলো, তার সেই পুরোনো বন্ধুর পরিবর্তনে চমকে গিয়েছিলো গালিউলিন। যাকে সে লাজুক, দুষ্টু আর মেয়েলি বলে জানতো, সে এখন উদ্ধত, পণ্ডিত এক রোগবিলাসীতে পরিণত হয়েছে। বুদ্ধিমান, সাহসী, গম্ভীর পাশা বিদ্রূপে ছাড়া কথা বলে না। কখনো-কখনো তার চোখের বিপন্ন দৃষ্টির দিকে তাকিয়ে গালিউলিন শপথ করে বলতে পারতো যে সেই দৃষ্টি যেন জানলা, তার মধ্য দিয়ে অন্য কিছু সে দেখতো, হয়তো এমন কোনো-এক ধারণা যা তাকে পেয়ে বসেছিলো, হয়তো স্ত্রী-কন্যার জন্য আকাঙ্ক্ষা। গালিউলিনের মনে হতো আশ্চিপভ যেন এক বহুকল্পী, রূপকথার নায়কের মতো মোহগ্রস্ত। আর এখন আশ্চিপভ উধাও, গালিউলিনের হাতে এসে পড়েছে তার কাগজপত্র, তার ফোটোগ্রাফগুলি, আর তার রূপান্তরের রহস্য।

লারা যে তার স্বামীর খোঁজ করছে সে-সংবাদ গালিউলিনের কাছে পৌঁছলো। কোনো-না-কোনো সময়ে পৌঁছতোই অবশ্য। তাকে চিঠি লিখবে ঠিক করলো সে, কিন্তু এতো ব্যস্ত ছিলো যে ঠিকমতো গুছিয়ে চিঠি লেখার মতো সময় পাচ্ছিলো না, লারাকে সে আশ্বাসেব জন্য প্রস্তুত হবার সুযোগ দিতে চাইছিলো। আজ-কাল করে দিন পেছিয়েই চলছিলো সে, ইঠাৎ শুনলো লারা নিজেই যুদ্ধক্ষেত্রে এসেছে নার্স হিসেবে, কিন্তু কোন ঠিকানায় তাকে চিঠি লিখবে বুঝতে পারলো না।

১০

‘আজ ঘোড়া মিলবে?’ দুপুরবেলা জিঁভাগো বাড়িতে খেতে এলেই গর্ডন জিজ্ঞেস করতো। তারা বাস করছে এক গ্যালিসীয় কৃষকের কুটিরে।

‘কোনো আশা নেই। কিন্তু সে যাই হোক, কোথায় যাবে তুমি? ভাইনে বাঁয়ে কোথাও নড়ার উপায় নেই এখন। ভীষণ গোলমাল চলছে চারদিকে। কেউ কিছু ঠিক কবতে পারছে না। দক্ষিণে কোথাও-কোথাও জার্মানদের পাশ কাটিয়ে এগিয়ে গেছে আমাদের সৈন্য, কোথাও বা ব্যুহ ভেদ করেছে, শুনছি অতি উৎসাহী কয়েকটি বাহিনী ধরা পড়েছে। উত্তরে, জার্মানরা সন্ডেভা নদীর যে-অংশ পার হয়েছে সেটা এতোদিন অনতিক্রম্য বলে জানা ছিলো; একদল অশ্বারোহীর কীর্তি এটা। রেলপথ উড়িয়ে দিচ্ছে, নষ্ট করছে রসদের গুদোম, আর আমার নিজের ধারণা হ'লো ওরা ঘিরে ফেলছে আমাদের। এই তো অবস্থা, আর তুমি কিনা ঘোড়ার খোঁজ করছো। —‘কী হে কাপেস্কো,’ ইউরা তার আদালির দিকে ফিরলো, ‘একটু নড়ো এবার, টেবিল লাগাও। কী খাবার আছে আজ? বাছুরের ঠ্যাং? চমৎকার।’

হাসপাতাল ও অন্য়ান্য ব্যবস্থা নিয়ে চিকিৎসা-কেন্দ্রটি সারা গ্রাম ভরে ছড়িয়ে আছে, কোনো দৈব কারণে গ্রামটি এখনো নিরাপদ। দেয়াল-জোড়া পাশ্চাত্য কায়দায় জাফরি-কাটা জানলা নিয়ে বকবকে বাড়িগুলি দাঁড়িয়ে আছে, একটা কাচও এমনকি ভাঙেনি।

উষ্ণ সোনালি এক হেমন্ত ঋতুর অবসান ইণ্ডিয়ান সামারে' রূপ নিয়েছে। দিনের বেলায় ডাক্তার আর অফিসাররা জানলা খুলে রাখে, জানলার তাক আর নিচু শাদা সীলিঙের ওপর থিকথিকে হ'য়ে বসে-থাকা মাছি মারে, ওপরের জামার বোতাম খুলে ঘামতে-ঘামতে চুমুক দেয় ফুটন্ত গরম বাঁধাকপির সুপে, কিংবা চায়ে।

রাত্রে ভেজা কাঠ দিয়ে জ্বালানো আগুনের সামনে ব'সে তাস পেটে তারা, ধোঁয়ায় চোখ

১ উত্তর গ্রোরোপ ও আমেরিকায় হেমন্তের শেষে কয়েকটা দিন রৌদ্রময় হয়ে ওঠে, আবহাওয়া থাকে শুকনো; এই সময়টাকে ‘ইণ্ডিয়ান সামার’ বলা হয়।—অনুবাদের টীকা।

জ্বালা করে আর কেমন ক'রে আগুন ধরাতে হয় তা না-জানার জন্য শ্মশ-শাপাশু করে আদালিদেব।

রাত্রিটি নিন্তক। গর্ডন আর জিভাগো মুখোমুখি দুই কাঠের মাচার শুয়ে ছিলেন। তাদের মাঝখানে খাবার টেবিল আর দেয়াল-জোড়া লম্বা জানলার সারি। জানলার কাচগুলি খামে ভিজে উঠেছে: ঘরটা গরম, তামাকের গন্ধে ভরা। হেমন্ত রাত্রির টাটকা বাতাসের জন্য তারা কোনার দিকের জানলার দুটো পাট খুলে রেখেছিলো। তাদের অভ্যেসমতো কথা বলছে তারা, আর চিরাচরিতভাবে, যে-দিকে যুদ্ধের ফ্রন্ট-লাইন সেই দিকের গোলাপি আভা জ্বলজ্বল করছে। বন্দকের গুলির অন্তহীন শব্দকে ধামিয়ে দিয়ে মাঝে-মাঝে ভেসে আসছে এক গভীর আওয়াজ, একটা ভারি শেকলে-বাধা ট্রাককে যেন মেকের রং চাট্টে দিয়ে হিচড়ে টেনে নিয়ে যাওয়া হচ্ছে, সেই গভীর আওয়াজে কঁপে-কঁপে উঠছে মাটি। সেই আওয়াজকে সম্মান দেখিয়ে খেমে যাচ্ছিলো জিভাগো। 'ওটা হ'লো বেটা, জার্মানদের কোলো-ইঞ্চি কামান। কোমটা ছোট্টোই বলতে পারো—ঘাট পুড' ওজন।' তারা যখন আবার কথা বলতে শুরু করলো তখন আগে কী বলছিলো তা আর জিভাগোর মনে পড়লো না।

'সারা গ্রামে কিসের গন্ধ বলো তো?' গর্ডন জিজ্ঞেস করলো, 'এখানে আসার সঙ্গে সঙ্গে আমি লক্ষ্য করেছি। অতিষ্ঠ ক'রে তোলা মিষ্টি গা-বমি-বমি-করা একটা গন্ধ, অনেকটা ইদুরের গায়ের গন্ধের মতো।'

'কী বলছো বুঝতে পারছি। ওটা হ'লো শন—এখানে প্রচুর জন্মায়। ওই গাছটার নিজেরই একটা একঘেয়ে লেগে-থাকা পচা মড়ার মতো গন্ধ আছে। তারপর যে-সব জায়গায় লড়াই হয়েছে, সেখানে অনেক মৃতদেহ শনক্ষেতের মধ্যে অদৃশ্য হ'য়ে প'ড়ে থাকে—পচতে শুরু করার আগে কেউ জানতে পায় না। অবশ্য মৃতদেহের গন্ধ এখন সর্বত্র। সেটাই তো স্বাভাবিক।—শুনছো? আবার ঐ বেটার গর্জন।'

গত কয়েকদিন ধ'রে তারা এই জগজগতের যাবতীয় বিষয় নিয়ে কথা বলেছে। যুদ্ধ এবং যুদ্ধধর্মের ওপর বন্ধুর মতামতের কথা জেনেছে গর্ডন। জিভাগো তাকে বলেছে তার পক্ষে কত শক্তি হ'য়ে উঠছে এই সব মনে নেয়া—এই পরস্পরকে নিশ্চিহ্ন ক'রে দেওয়ার নিষ্ঠুর যুক্তি, আহতদের দৃশ্য, আজকাল যে-বিশেষ ধরনের আঘাত দেয়া হচ্ছে তার ভয়াবহতা, আর আধুনিক যুদ্ধের কলাকৌশলে শুধুমাত্র ছিন্ন মাংসপিণ্ডে পরিণত হ'য়েও যারা বেঁচে থাকে তাদের অস্তিত্ব।

তার সঙ্গে ঘুরতে-ঘুরতে কিছু বীভৎস দৃশ্য গর্ডনও দেখেছে। মনে হয়েছে, যখন অন্যেরা অসম সাহসে কষ্ট সহ্য করছে তখন অলসভাবে তাদের মৃত্যুভয় জয় করার জন্য অমানুষিক চেষ্টাকে লক্ষ্য করা, কিসের বিনিময়ে কী বিপদ তারা বরণ ক'রে নিচ্ছে—তা তাকিয়ে দেখা রীতিমতো দুর্নীতি। কিন্তু তাদের জন্য বিলাপ করাটাও কম দুর্নীতি ব'লে তার মনে হয় না। জীবন যখন যে-অবস্থায় থাকে কেবল সে-অনুযায়ী সরল এবং সৎ ব্যবহারের পক্ষপাতী সে।

যুদ্ধক্ষেত্রের ঠিক পেছনে সাম্যমাণ রেডক্রস-কেন্দ্রের প্রাথমিক চিকিৎসা-বিভাগে গিয়ে তার যে-অভিজ্ঞতা হয়েছে তা থেকে সে একথা জেনেছে যে আহতদের চোখে দেখেই অজ্ঞান হ'য়ে যাওয়া সম্ভব।

গোলাবর্ষণে বনের মধ্যে নষ্ট হ'য়ে গেছে, এমন একটি পরিষ্কার অংশে গিয়েছিলো তারা। দোমডানো কামান-গাড়িগুলি ভাঙাচোরা পিষ্ট-হ'য়ে-যাওয়া ছোট্টো-ছোট্টো গাছপালার মধ্যে উল্টে প'ড়ে আছে। একটা যুদ্ধের ঘোড়া গাছে বাধা, বনের ঠিক ভেতরে বনবিভাগের একটি

বাড়ি ছিলো: তার অর্ধেকটা ছাদ উড়ে গেছে। বনবিভাগের দপ্তর এখন প্রাথমিক চিকিৎসার কেন্দ্র হিসেবে ব্যবহৃত হয়; দুটো বড়ো ছাইরঙের ঊবুও ফেলা হয়েছে, যে-রাস্তা দিয়ে বনে আসতে হয় তার ওপারে।

‘তোমাকে অনা উচিত হয় নি,’ জিভাগো বললো। ‘দু-এক মাইলের মধ্যেই ট্রেন্স, আর আমাদের কামানের সারি, ঠিক ওখানেই, বনের পেছনে। সেখানে কী হচ্ছে এখন থেকে শোনাও যাবে না। কাজেই বীরত্ব দেখাতে যেনো না। তুমি বীরত্ব দেখালেও বিশ্বাস করবো না আমি। অতঃপর জ’মে যেতে তুমি বাধ্য, সেটাই স্বাভাবিক। যে-কোনো মুহূর্তে অবস্থা বদলে যেতে পারে, ওরা হয়তো আমাদের দিকে গুলি ছুঁড়তে শুরু করবে।’

ক্রান্ত, তরুণ সৈন্যরা, প্রকাশে জুতো পায়ে, ঘামে কালো হ’য়ে গেছে তাদের টিউনিকের কাঁধ আর বুক, রাস্তার ধারে গড়াচ্ছে, কেউ চিং হ’য়ে কেউ বা উপড় হয়ে। চারদিন ভয়ানক যুদ্ধের পর সৈন্যদের মধ্যে যারা বেঁচেছে তাদের পশ্চাদভাগকে শহরে পাঠানো হয়েছে কিছুদিনের বিশ্রামের জন্য। পাথরের মূর্তির মতো প’ড়ে আছে তারা, হাসবার বা গাল পাড়বার কিছুই অবশিষ্ট নেই তাদের, রাস্তা দিয়ে যখন কয়েকটা গাড়ি দ্রুতগতিতে গড়িয়ে এলো, তখন তারা মাথাও ঘোরালো না। গুলিগোলায় গাড়ি সেগুলো, স্প্রিং নেই, আহতদের গাদা ক’বে নিয়ে আসছে এখন, প্রাথমিক চিকিৎসাকেন্দ্রের দিকে এগোবার সময় গাড়ির ঝাকুনিতে তাদের হাড় ভেঙে যাচ্ছিলো, পাক যাচ্ছিলো পেটের অস্ত্রী-তস্ত্রী। সেখানে তাড়াতাড়ি ব্যাণ্ডেজ ক’রে দেওয়া হবে তাদের, তেমন-তেমন জরুরি ক্ষেত্রে অস্ত্রোপচার করা হবে। আধ ঘণ্টা আগে যখন গোলাবর্ষণে সামান্য বিরতি ঘটেছিলো তখন ট্রেন্সের সামনে থেকে তোলা হয়েছে তাদের, সংখ্যায় তারা ভয়াবহ। তাদের মধ্যে অর্ধেকের বেশিই অচৈতন্য।

আপিশের বারান্দার সামনে গাড়িগুলো থামলে পরে স্টেচার নিয়ে সিঁড়ি দিয়ে নেমে এলো আর্দালিবা। একজন নার্স একটা তাঁবুর দরজা তুলে দাঁড়িয়ে সেদিকে তাকিয়ে বইলো: এখন তার ডিউটি নেই। দু’জন লোক এতোক্ষণ তাঁবুর পেছনে বনেন মধ্যে চীৎকার ক’রে তর্ক করছিলেন, কথা বোঝা যাচ্ছিলো না, শুধু লম্বা-লম্বা তরুণ গাছগুলির মধ্যে জেগে উঠছিলো প্রতিধ্বনি,—তাবা বেবিয় এসে রাস্তা ধ’রে আপিশের দিকে এগোলো। তাদের মধ্যে একজন, উদ্বেজিত এক যুবক-লেফটেন্যান্ট, অপরজনকে গাল দিচ্ছিলো— ভ্রাম্যমাণ চিকিৎসা-কেন্দ্রের মেডিকেল অফিসার সে: বনের পবিত্রতার অংশে কামান বসানো হয়েছিলো, লেফটেন্যান্ট জানতে চাইছিলেন কামানটা কোথায়। ডাক্তার জানতেন না, তাঁর জানার কথা নয়: তিনি লেফটেন্যান্টকে অনুরোধ করছিলেন চীৎকার থামিয়ে চ’লে যেতে—বলছিলেন, তিনি বাস্তব, আহতরা এসে পড়েছে: কিন্তু অফিসারটি রেডক্রসকে, গোলন্দাজদের, সমস্ত পৃথিবীকেই শাপশাপাস্ত ক’রে চললো। জিভাগো ডাক্তারের কাছে এগিয়ে গেলো, পরস্পরকে সম্ভাষণ ক’রে আপিশের ভেতর ঢুকে গেলো তারা। লেফটেন্যান্ট উচ্চ তাতার-ঘেঁষা উচ্চারণে গাল পাড়তে-পাড়তেই ঘোড়ার জিনে চড়ে ব’সে রাস্তা ধ’রে বনের দিকে চ’লে গেলেন। সেই নার্সটি তখনো তাকিয়ে আছে।

হঠাৎ তার মুখের ভাব ভয়ানক হ’য়ে উঠলো। ‘কী, করছো কী? মমতা-খারাপ হ’য়ে গেছে তোমাদের?’ অল্প আহত দু’জন সৈন্য বিনা সাহায্যে স্টেচারের মাঝখান দিয়ে হাঁটছিলেন, তাদের উদ্দেশ্যে নার্সটি বললে। তাদের কাছে ছুটে এগিয়ে গেলো সে।

আর্দালি যে-লোকটিকে বহন ক’রে আনছিলো বিশেষরকম বীভৎসভাবে তার দেহ আহত হয়েছে। একটা বোমার টুকরো খেঁচলে দিয়েছে তার মুখ, জিভ আর ঠোঁট পরিণত হয়েছে লাল ঝোলে, লোকটিকে প্রাণে মারে নি, কিন্তু কেটে-যাওয়া গালের স্থান পূর্ণ ক’বে বোমার টুকরোটা আটকে আছে তার চোয়ালের হাড়ে। ক্ষীণ, অমানুষিক স্বরে অল্প-অল্প কাঁদছে সে, মৃত্যুকে ভরস্বিত ক’রে এই অকল্পনীয় যন্ত্রণার সমাপ্তি ঘটানোর জন্য কাতর আবেদন ছাড়া সেই শব্দ শুনে অনা কিছু মনে হয় না।

নার্সের মনে হ'লো যে-দু'জন সৈন্য তাদের আঘাত অল্প ব'লে স্ট্রচারের পাশে-পাশে হেঁটে আসছে তারা এতো বিচলিত যে খালি হাত দিয়ে ঐ লোহার টুকরোটা তুলে আনতে যাচ্ছে।

'কক্ষনো ও-কাজ কোরো না। সার্জন করবেন, তাঁর আলাদা যন্ত্র আছে... যদি করতেই হয়।' (ভগবান, হে ভগবান, ওকে তুমি নাও, তোমার অস্তিত্বে সন্দেহ করতে দিয়ে না আমাকে!)

পরমুহূর্তে যখন তাকে সিঁড়ি দিয়ে নিয়ে যাওয়া হচ্ছে, লোকটি চীৎকার ক'রে উঠলো, সারা শরীরে কঁপে উঠলো; সে, তারপর শেষ।

এই যে লোকটি মারা গেলো সে হ'লো প্রাইভেট গিমাঙ্কেডিন; বনের মধ্যে চীৎকার করছিলেন যে-উদ্বেজিত অফিসার তিনি তার ছেলে, লেফটেন্যান্ট গালিউলিন; নার্সটি হ'লো লারা, গর্ডন এবং জিভাগো সাক্ষী। এরা সকলে সেই এক জায়গাতেই ছিলো, একই সঙ্গে। কিন্তু তাদের মধ্যে কেউ-কেউ পরস্পরকে কোনোদিন চিনতো না, আর কেউ পরস্পরকে চিনতে পারলো না। তাদের বিষয়ে কোনো-কোনো তথ্য কোনোদিনই সঠিকভাবে জানা যাবে না, আর অনাগুলি আত্মপ্রকাশের এক সুযোগের জন্য অপেক্ষমাণ।

১১

এই অঞ্চলে গ্রামগুলি যেন দৈব দয়ায় বেঁচে গেছে। ধ্বংসের সাগরে এই অংশটি যেন এক দুর্য্যোগ নিরাপত্তার দ্বীপ। এক সন্ধ্যায় গর্ডন আর জিভাগো গাড়ি ক'রে বাড়ি ফিরছিলেন। একটি গ্রামে দেখলেন এক তরুণ কসাককে ঘিরে ফুর্তিবাজ ভিড়; কসাকটি একটা তাম্রমুদ্রা শুনো ছুঁড়ে দিচ্ছে, শাদা দাড়ি, লম্বা কোট-পরা এক বৃদ্ধ ইহুদিকে সেটা লুফে নিতে হবে। বৃদ্ধটি কোনোবারই ধরতে পারছে না। তার করুণভাবে বাড়িয়ে-দেওয়া দুই হাতের নাগালের বাইরে চ'লে গিয়ে মুদ্রাটি কাদায় প'ড়ে যাচ্ছে। বৃদ্ধটি সেটা কুড়োবার জন্য নিচু হচ্ছে, কসাকটি চড় মারছে তার পেছনে, আর দর্শকরা পেট চেপে ধ'রে লুটোপুটি খাচ্ছে হাসতে-হাসতে। ওতেই তাদের আমোদ। এই মুহূর্তে এটা কিছু ক্ষতিকর হচ্ছে না, কিন্তু এ থেকে কোনো গোলযোগ যে দেখা দেবে না তা নিশ্চয় ক'রে বলতে পারে না কেউ। কয়েক মিনিট পর-পর বাস্তার ওপালে তার ঝুঁড়ের থেকে বেরিয়ে আসছে বৃদ্ধটির স্ত্রী, হাত বাড়িয়ে দিয়ে চীৎকার করছে সে, আবার ছুটে ভেতরে ঢুকে যাচ্ছে ভয় পেয়ে। দুটি ছোট্ট মেয়ে কুড়ের জানলা দিয়ে তাদের ঠাকুদাকে দেখছে আর কাঁদছে।

ড্রাইভারের মনে হ'লো ব্যাপারটা খুবই কৌতুকজনক, তাই গাড়ির গতি ধীর ক'রে দিলো যাতে যাত্রীরা দেখতে পান। কিন্তু জিভাগো কসাকটিকে ডেকে ক'রে গাল দিলে, বৃদ্ধটিকে ও-ভাবে খেলাতে বারণ ক'রে দিলো।

'আচ্ছা সার,' তৎক্ষণাৎ জবাব দিলো লোকটি। 'আমরা জানতাম না কিনা, এই একটু মজা করছিলাম আব কি।'

নিজেদের গ্রামের কাছাকাছি না-পৌছনো পর্যন্ত জিভাগো বা গর্ডন কেউ কোনো কথা বললো না।

'সাংঘাতিক,' ইউবি বললে। 'এই যুদ্ধের মধ্যে হতভাগা ইহুদিদের যে কী সহ্য করতে হচ্ছে তা তুমি কল্পনাও করতে পারবে না। যুদ্ধটা আবার ওদেরই অঞ্চলে^১ হচ্ছে। শায়েস্তা-কর, ওদের সব সম্পত্তি নষ্ট করা, আর অন্যান্য দুঃখকষ্টও যেন যথেষ্ট নয়, এখন ওদের সহ্য করতে হবে পগরম^২ অপমান, আর এই অভিযোগ যে তারা যথেষ্ট স্বদেশপ্রেমিক নয়। তারা

১ পশ্চিম বাশিয়ার একটি অংশে অধিকাংশ রুশ ইহুদি বাস করতো।

২ Pogrom-স্বপ্নবিকল্পিতভাবে কোনো সম্পূর্ণ গোষ্ঠী বা সম্প্রদায়ের উচ্ছেদসাধন। শব্দটি রুশ, কিন্তু ইংরেজিতেও চ'লে গেছে।--অনুবাদের টীকা।

স্বদেশপ্রেমিক হবেই বা কেন, এখন শত্রুরা তাদের সমান-সমান অধিকার দিতে চাইছে এবং আমবা অত্যাচার ছাড়া অন্য কিছুই কবছি না? ওদের প্রতি আমাদের ঘণা সেগুলো সহনভর্তি কখনও হওয়া উচিত ছিলো—ওদের দারিদ্র্য, অত্যধিক জনসংখ্যা ওদের দুর্বলতা, আমাদের সঙ্গে সমানে-সমানে যুদ্ধ করার অক্ষমতা। বুঝতে পারি না আমি! ভাগ্যের দোষ—তাড়া ডা এবং কী গর্ভন কোনো জবাব দিলে না।

আবার তাবা শুয়ে আছে, লম্বা, নিচু জানলাব দুই পাশেব দুই মাচায়; বাত নোমে এসেছে, কথা বলছে তারা।

জিভাগো গর্ভনের কাছে গল্প কবছে, যুদ্ধক্ষেত্রে একবার কেমনভাবে জারকে দেখেছিলো।

যুদ্ধে ইউরির সেই প্রথম বসন্ত। যে-বাহিনীর সঙ্গে সে যুদ্ধ ছিলো সেটা কাপেথায় পর্বতের এক উপত্যাকার মুখে হাঙ্গেরীয়দের পথ বন্ধ করে খাটি গেড়েছে তখন। বাহিনীর প্রধান কার্যালয় ছিলো সেই উপত্যাকায়।

উপত্যাকাটির নিচের দিকে স্টেশন। সেই জায়গার বর্ণনা দিলে জিভাগো, ফাব এবং পাইনেব বন বৃকে নিয়ে পাহাড়, মাথায় মেঘ জ'মে আছে, ছাইবঙা স্মেট এবং গ্রাফাইট পাথরের খাড়া চূড়াগুলি জঙ্গলের ফাঁক দিয়ে ফারের মাথায় টাকেব মতো দেখায়। স্যাৎসেতে, অঙ্ককার এপ্রিলের এক সকাল ছিলো সেদিন, স্মেটের মতো কালো রঙের আকাশ চারপাশের পাহাড়ের মাঝখানে অটিকে আছে, শুষ্ক, হাওয়া নেই একটুও। উপত্যাকার মাথার ওপর কুয়াশা জ'মে আছে, ওপরের দিকে ধোয়ার মতো বাষ্প উঠছে সব-কিছু থেকে—ধোয়া ছাডছে বেল-স্টেশনের এঞ্জিন, মাঠ থেকে উঠছে ধূসর হিম—আর আছে ধূসব পাহাড়, অঙ্ককার বন এবং অঙ্ককার মেঘ।

সম্রাট তখন বেরিয়েছিলেন গালিসিয়ায় এক পরিদর্শন-সফরে, ইঠাৎ শোনা গেলো তিনি যে-বিভাগের অবৈতনিক কর্নেল, সেটি তিনি পরিদর্শন করতে আসছেন। যে-কোনো মুহূর্তে এসে পড়তে পারেন তিনি। স্টেশনের প্ল্যাটফর্মে গার্ড অফ অনারের ব্যবস্থা হ'লো। কয়েক ঘণ্টার প্রতীক্ষা আর সংশয়ের পর বাজকীয় পারিষদদের নিয়ে দুটো ট্রেন দ্রুত পার হ'য়ে গেলো, আর তার একটু পরেই জারের গাড়ি এসে ঢুকলো প্ল্যাটফর্মে।

সঙ্গে ডিউক নিকোলাসকে নিয়ে জার গ্রেনেডিয়ারদের পরিদর্শন করলেন। তাঁব শাস্ত্র অভিবাদনের প্রত্যেকটি শব্দের উত্তরে বালতি থেকে জল উপচে পড়ার মতো শব্দে উচ্ছ্বসিত, সজোরে 'হুরে'-ধ্বনি প্রতিধ্বনি তুলতে লাগলো।

মৃদু হাসি লোগে ছিলো জারের ঠোটে, অস্বস্তি বোধ করছিলেন তিনি—মুদ্রা আর মেডেলের ওপর তাঁর যে-প্রতিকৃতি থাকে তার চাইতে বড়ো আর ক্লাস্ত দেখাচ্ছিলো তাঁকে। সামান্য ঝুলে-পড়া মুখের ভাবটা কেমন উদাসীন। বার-বার ক্ষমাপ্রার্থীর ভঙ্গিতে গ্র্যাণ্ড ডিউকের দিকে তাকাছিলেন, বুঝতে পারছিলেন না কখন তাঁর কাছে কী আশা করা হবে, আর গ্র্যাণ্ড ডিউক সসম্মানে নিচু হ'য়ে তাঁকে বিপদ থেকে উদ্ধার করছিলেন, কথা দিয়ে ততোটা নয়, যতোটা ভ্রুভঙ্গি আর কাঁধের ঝাঁকুনি দিয়ে।

সেই উষ্ম ধূসব পাহাড়ি সকালে তাঁকে দেখতে-দেখতে ইউরির কষ্ট হয়েছিলো জারের জন্য, এবং একথা ভেবে শিহরিত হয়েছিলো যে ঐ আত্মপ্রত্যয়হীন সংঘম আর লজ্জাই হ'লো অত্যাচারীর গুণ, এই দুর্বলতাবই অধিকার আছে নিধন করার, কি ক্ষমা করার, বন্দী করার, কি মুক্তি দেবার।

‘একটা বক্তৃতা দেওয়া উচিত ছিলো তাঁর—“আমি, আমার তরবারি, আমার জাতি—” ছিলহেলমের’ মতো। অস্তুত “জাতি”র বিষয় কিছু—সেটা তো নিতান্ত প্রয়োজন। কিন্তু, জানো, স্বাভাবিক রুশ-রীতি অনুযায়ী ব্যবহার করেছিলেন উনি, এই সব আজো-বাজে কথার একেবারে উর্ধ্বে ছিলেন। আর তাছাড়া রুশদেশে এই ধরনের অভিনয় ভাবা যায় না, তাই নয় কি?—কারণ অভিনয় অভিনয়ই। এ-কথা মানতে পারি যে রোমান সম্রাটদের আমলে “জাতি”র অস্তিত্ব ছিলো—গল, সীদীয়, ইলিরীয়—এ ছাড়াও আরো অনেক। কিন্তু তারপর থেকে এই ধারণটাই একটা গল্পকথা হ’য়ে দাঁড়িয়েছে, জার আর রাজারাজডা আর রাজনৈতিকদের বক্তৃতার বুলি: “জাতি, আমার জাতি।”

‘যুদ্ধক্ষেত্র তো এখন ছেয়ে গেছে সংবাদদাতা আর সাংবাদিকে। তাবা “লক্ষ্য করে,” লৌকিক জ্ঞান-রত্ন সংগ্রহ করে, আহতদের দেখতে যায়, আর লোক-মানস সম্বন্ধে নতুন-নতুন সব প্রতিপাদ্য তৈরি করে। ডাহল^১-এর এক নতুন প্রকরণ আর কি, ঠিক তেমনি বাজে—ভাষার অসংযম, ভাষাতত্ত্বের পাগলামি। এই এক ধরন—আরেকটা হ’লো কাটা-কাটা কথা, “ছবি আর দৃশ্য”, অবিশ্বাস আর মানববিদ্বেষ। এ-রকম একটা লেখা সেদিন পড়ছিলাম। এখনো আমার কাছে আছে, এই রকম—“ধূসর দিন, কালকেব মতো। সকাল থেকে বৃষ্টি, কাদা। জানলা দিয়ে বাইরে তাকিয়ে আছি, রাস্তা দেখছি। কয়েদিদের অস্ত্রহীন সারি। সারি-সারি আহত। গুলির শব্দ। আজ গুলিবর্ষণ হচ্ছে গত কালের মতো, আসছে কাল আজকের মতো, প্রতিদিন, প্রতি ঘণ্টা।” চালাক-চালাক, সূক্ষ্ম—নয় কি? কিন্তু বন্দুকের বিরুদ্ধে গর আপত্তিটা কী? বন্দুকের কাছ থেকে বৈচিত্র্য আশা করাটা বড়ো অস্তুত। নিজের দিকে তাকায় না কেন, দিনের পর দিন একই বাকা, কমা, তথ্যের তালিকা, এক ঝাঁক পোকের মতো দ্রুতগতিতে সাংবাদিকসুলভ মানবহিতৈষণার প্লাবন বইয়ে চলেছে? এ-কথাটা মাথায় ঢোকে না কেন যে পুনরাবৃত্তির অভ্যাস তাকেই ছাড়তে হবে, বন্দুককে নয়—নেট্‌বই থেকে আজো-বাজে কথা নিয়ে হিজিবিজি কাটলে, যতই লেখো না কেন সবটাই অর্থহীন হয়, কারণ যতক্ষণ না মানুষ নিজে কিছু দেয় ততক্ষণ তথ্যের কোনো অস্তিত্ব থাকে না, কিছু ষেয়াল, মানুষের প্রতিভা—রূপকথার, পুরাণের কিছু অংশ।’

‘একেবারে ঠিক কথা বলেছো,’ গর্ডন ব’লে উঠলেন। ‘এবার আমি তোমাকে বলি আজ আমরা যে-ঘটনাটি দেখলাম সে-বিষয়ে আমার কী মনে হয়। ঐ কসাকটি—যে হতভাগ্য বৃদ্ধটিকে বোকা বানাচ্ছিলো—এছাড়াও আরো হাজার-হাজার ঠিক এই রকমই ঘটনা—এ নিয়ে কোনো আলোচনা করে লাভ নেই। এ নিয়ে ভাবতে হয় না, শুধু কারো মুখের ওপর ঘৃণি চালিয়ে দিতে হয়। কিন্তু যখন ইহুদিদের সমস্যা’র কথা ওঠে তখন দর্শন এসে পড়ে বৈকি। এমন নয় যে আমি কোনো নতুন কথা বলছি তোমাকে, আমরা দু’জনেই তোমার মামার শিক্ষায় আমাদের মতামত গঠন করেছি।

‘তুমি বলছিলে, জাতি কী?...আর এই জাতির জন্য কে বেশি করে, যে তাদের মাথায় তুলে নাচে, না কি যে তাদের সর্বতোভাবে ভুলে থেকেও শুধুমাত্র তার সুকীর্তি দিয়ে একটি জাতিকে সার্বিক করে, অমর করে।—অবশ্য এ নিয়ে কোনো তর্ক থাকতে পারে না।...

‘আমরা আজকাল, এই ষ্টের শতাব্দীতে, যে-সব জাতি নিয়ে কথা বলি, সেগুলো কী? তারা তো কেবল জাতি নয়—তারা দীক্ষিত, রূপান্তরিত, ব্যক্তিসত্তা দিয়ে গঠিত।—প্রাচীন প্রথার প্রতি আনুগত্য নয়, তাদের রূপান্তরই হ’লো আসল কথা।

‘বাইবেল এ-বিষয়ে কী বলে?—প্রথমত, বাইবেল কোনো আইন প্রণয়ন করেনি—জোর

১ জমির কাইজারের কথা বলা হচ্ছে।—অনুবাদের টীকা।

২ Dahl: একটি বিখ্যাত ও কিছুটা অস্তুত ধরনের রুশ অভিধানের প্রণেতা।

দিয়ে কখনো বলেনি: “এটা এই রকম, আর ঐ রকম।” যীশুর বাণী শুধু একটা ইঙ্গিত, সবল, অনিশ্চিত ইঙ্গিত: “সম্পূর্ণ নতুনভাবে বাঁচতে চাও তোমরা? আত্মিক মোক্ষলাভ করতে চাও?” সবাই আনন্দিত হয়েছিলো, সবাই গ্রহণ করেছিলো, হাজার-হাজার বছর ধরে এই বাণী তাদের আকর্ষণ করেছে।

‘বাইবেলো যখন বলা হয় যে ঈশ্বরের রাজত্বে ইহুদি নেই, জেন্টিল’ নেই, তাহা মানে কি শুধুমাত্র এই যে ঈশ্বরের চোখে সবাই সমান? অর্থাৎ বিশ্বাস করি না যে ও-কথা শুধু এই অর্থটুকুই বহন করছে—এ তো আগেই জানা ছিলো—গ্রীক দার্শনিক, রোমক নীতিবিদ, হিব্রু প্রবক্তা সবাই একথা জানতো। বাইবেল বলছেন যে সেই নতুন জীবনে ঈশ্বরের সঙ্গে নতুন সম্বন্ধে—যার নাম স্বর্গরাজ্য—সেখানে কোনো জাতি নেই, আছে শুধু ব্যক্তি।

‘তুমি বলছিলে যে যতোক্ষণ না তাদের অর্থবহ করা হচ্ছে ততোক্ষণ নিছক তথ্যের কোনো অর্থ নেই। তথ্যকে মানুষের প্রয়োজনীয় করতে হ’লে যে-অর্থ তোমাকে তাতে যোগ করতে হবে তা হ’লো এই খৃষ্টধর্ম, ব্যক্তিত্বের রহস্য...

‘তারপর আমরা কথা বলছিলাম সাধারণ বাজনৈতিকদের নিয়ে, যারা সমগ্রভাবে জীবন বা জগৎ সম্পর্কে উৎসাহী নয়, সেই ধরনের মানুষ, যারা সংকীর্ণকে সংকীর্ণ বলেই ভালোবাসে।—বেশ ছোটোখাটো একটা নির্দিষ্ট বিষয়ে সকলকে ভাবাতে এবং আলোচনা করতে পারলে আল্লাহে গদগদ হয়ে যায় তারা—যতো সংকীর্ণ ততোই ভালো। কোনো-এক জাতি, বিশেষত আকারে যদি ছোটো হয়, আর সবচেয়ে ভালো যদি দুর্দশায় প’ড়ে থাকে, তাহ’লে তারা বেশ বিচার করতে পারে, ওজন করতে পারে, স্থির ক’রে দিতে পারে, সমাধান করতে পারে সমস্যার, তাদের করুণাকেও মুনামার কাজে খাটাতে পারে। এই ধরনের মনোভাবের পক্ষে ইহুদির চাইতে ভালো শিকার আর কী পেতে পারো? ওদের জাতীয় চিন্তাধারাই ওদের জোর ক’রে একটা জাতি ক’রে রেখেছে, জাতি ছাড়া অন্য কিছু ওরা হ’তে পারে নি—আর সবচেয়ে অদ্ভুত হ’লো এই যে এই ভয়বহ কর্তব্যের শৃঙ্খলে শতাব্দীর পর শতাব্দী নিজেদের বেঁধে রেখেছে ওরা। যখন সমগ্র পাখবী ওদেরই মধ্য থেকে জেগে-ওঠা এক নতুন শক্তির প্রেরণায় অনুপ্রাণিত হয়েছে। অসাধারণ—নয় কি? এর কাবণ কী? ভাবো একবার!—মধ্যবিস্তৃতা থেকে, দৈনন্দিন জীবনের শুদ্ধতা, একঘেয়েমি থেকে সেই সর্গোৎপন্ন মুক্তি, তাদেরই মাটিতে প্রথম অঙ্কুরিত হ’লো, তাদেরই ভাষায় ঘোষণা করলো নিজে, একান্তভাবে ওদের গোষ্ঠীর মধ্যে জন্ম নিলো। আর ওরা সত্যিই দেখলো, শুনলো আর ছেড়ে দিলো তাকে। কী ক’রে পারলো?—কী ক’রে তারা সেই অন্তহীন শক্তি আর সুন্দরের আত্মাকে তাদের ছেড়ে চ’লে যেতে দিতে পারলো, যার ফলে, গৌরবের সিংহাসনে সেই শক্তি যখন সমাসীন হ’লো তখন ফেলে-দেওয়া শূন্য চামড়ার মতো পেছনে পড়ে রইলো তারা?—কার জন্য এই ইচ্ছাকৃত আত্মদান? এতে কার কী স্বার্থসিদ্ধি হয়েছিলো যার ফলে যুগযুগান্তর ধরে এই সব নিষ্পাপ বন্ধু আর স্ত্রীলোক আর শিশুরা, এই সব বুদ্ধিমান, দয়ালু, কোমল মানুষগুলিকে বিদূষ আর অত্যাচার সহ্য করতে হচ্ছে। “জাতি”ব বন্ধু, জাতীয় সমস্যা নিয়ে যারা নিবন্ধ রচনা করেন সেই সব লেখকদের, যে-কোনো দেশেই, কল্পনাশক্তির আর ক্ষমতার অভাব এমন থাকে কেন বলতে পারো? ইহুদিদের বুদ্ধিজীবী নেতারা বা কেন কখনো শব্দ “বিশ্ববিবাদ” আর ব্যঙ্গের বাইরে এগোয় না? কেন—যদি কর্তব্যের চাপে বয়লারের মতো ফেটে মরতেও হয় তাদের—তবু কেন তারা অজানা কারণে যে-সৈন্যদল প্রতিনিয়ত যুদ্ধ ক’রে-ক’রে বিনষ্ট হ’য়ে যাচ্ছে তাদের মুক্তি দেয় না? কেন তারা বলে না তাদের “অনেক তো হ’লো, এবার থামো। নিজের পরিচয়পত্রটিকে আঁকড়ে থেকো না, ভিড়ের মধ্যে মিশে যেয়ো না সকলে। জড়িয়ে

পত্নী: অন্য সকলের সঙ্গে এক হ'য়ে যাও। এই মর্ত্যভূমিতে তোমারাই প্রথম এবং শ্রেষ্ঠ খৃষ্টান। তোমরা তা-ই, তোমাদের মধ্যে যারা নিকট আর দূরল তারা যার নিকটে নিয়ে গেছে তোমাদের।'

১৩

পরদিন বাড়িতে খেতে এসে জিভাগো বললে, 'কী—যাবার জন্য তো খুব বাস্ত ছিলে তুমি, এবার আমরা সবাই চ'লে যাচ্ছি। "তোমার ভাগ্যই হ'লো", এ-কথা বলবো না, কারণ আমরা যে আবার হেরে যাচ্ছি এটা মোটেও ভাগ্যের কথা নয়। পূর্বের রাস্তা খোলা আছে এখন, চাপটা আসছে পশ্চিম থেকে। পুরো চিকিৎসা-দপ্তরই স'রে যাবার হুকুম পেয়েছে। কাল বা পরশু আমবা যাচ্ছি। কোথায়, তা জানিনে।—কার্পেক্সো, গার্ডন-সাহেবের জামাকাপড় কাচা হয়েছে নিশ্চয়ই? সব সময়েই ঐ এক জবাব—কার্পেক্সো তোমাকে বলবে যে ওর বৌকে কাচতে দিয়েছে, কিন্তু বৌ কে, বা কোথায় জিজ্ঞেস করো, তা ও জানে না, গাধা একটা।'

কার্পেক্সোর মিথো অজহাত বা গৃহস্বামীর জামাকাপড় ধার নেওয়ার জন্য গার্ডনের ক্ষমাপ্রার্থনা কোনোটা ব দিকেই মন দিলো না জিভাগো।

'এই হ'লো যুদ্ধের জীবন,' সে ব'লে চললো। 'একটা জায়গায় স্থির হ'য়ে বসাব সঙ্গে-সঙ্গেই অন্য জায়গায় চ'লে যেতে হয়। যখন এসেছিলাম, এখানকার কিছুই যেন ভালো লাগেনি। নোংরা, দম-আটকানো, স্টোভটা ভুল জায়গায়, সীলিংটা বড্ড নিচু। আর এখন? যেখান থেকে এসেছিলাম সে-জায়গাটা কেমন জিজ্ঞেস করলেও বোধ হয় মনে করতে পারবো না কিছু। এখন মনে হয় সারা জীবন বোধ হয় কাটিয়ে দিতে পারি এখানে, ঐ স্টোভের কোনার দিকে তাকিয়ে, টালির ওপরে বোদের আলোয় গাছের ছায়ার নাচ দেখে-দেখে।'

তাড়াহুড়ো না-ক'রে বাঁধাছাদা করলো তারা।

চীৎকার, বন্দুকের শব্দ আর দ্রুত পদক্ষেপের আওয়াজে তারা রাত্রে জেগে গেলো। রাগি, লাল আভা সারা গ্রামে ছড়িয়ে পড়েছে। জানলার পাশ ঘেঁষে চ'লে যাচ্ছে ছায়ার পর ছায়া। পাটিশনের ওপিঠে বাড়িওলা ও তার স্ত্রী উঠে পড়ছে। ব্যাপারটা কী জানবাব জন্য ইউরি তার আদালিকে পাঠালো।

শুনলো, জার্মানরা আক্রমণ করেছে। ইউরি হাসপাতালে ছুটলো, খবরটা সত্যি ব'লেই জানা গেলো। সারা গ্রামে আগুন। ছেড়ে যাবার হুকুমের জন্য অপেক্ষা না-ক'রেই হাসপাতাল সরিয়ে নেয়া হচ্ছে এক্ষুনি।

'ভোরের আগেই চ'লে যাবো আমরা,' ইউরি গার্ডনকে বললে। 'প্রথম দলের সঙ্গে তুমি চ'লে যাও, ঘোড়ার গাড়ি তৈরিই আছে, আমি তোমার জন্য অপেক্ষা করতে ব'লে এসেছি। আচ্ছা!—ভালো থেকে। তোমাকে তুলে দিই চলো, বসার জায়গা যাতে পাও তার ব্যবস্থাটাও ক'বে দিতে হবে।'

দ্বিগুণ নিচু হ'য়ে, বাড়ির পাঁচিল ধ'বে-ধ'রে গ্রামের পথ দিয়ে তারা ছুটলো। সশব্দ, দ্রুত বন্দুকের গুলি চ'লে গেলো তাদের পাশ দিয়ে, আর চৌরাস্তা থেকে তারা দেখলো আগুনের ছাতার মতো বোমা ফেটে পড়ছে মাঠের ওপরে।

'তুমি কী করবে?' ছুটতে-ছুটতে গার্ডন জিভাগোকে জিজ্ঞেস করলে।

'দ্বিতীয় দলের সঙ্গে যাবো আমি। এখন ফিরে গিয়ে আমার জিনিসপত্র গুছিয়ে নিতে হবে।'

গ্রামের প্রান্তে এসে তারা বিদায় নিলো। ঘোড়ার গাড়ি আর কয়েকটা ঠেলাগাড়ি, এই হ'লো যানবাহন; একটা অন্যের ঘাড়ের ওপর লাফিয়ে প'ড়ে ন'ড়ে উঠলো গাড়িগুলো, তারপর রওনা

হ'লো। বন্ধুকে উদ্দেশ্য করে হাত নাড়তে থাকলো ইউরি, আগুনে পুড়তে-থাকা গোলাঘরের আলোয় গর্জন তাকে আরো কিছু বেশি সময়ের জন্য দেখতে পেল।

আবার বাড়ির পাঁচিল ঘেঁষে দ্রুত এগোলো ইউরি। তার বাড়ির কয়েক গজ দূরে, একটা বোমার বিস্ফোরণে ঘুরে পড়লো সে, বোমার একটা টুকরো ছুটে এসে তার গায়ে বিধলো। রক্তাক্ত, অচৈতন্য হ'য়ে সে রাস্তার মাঝখানে প'ড়ে গেলো।

৭

১৪

যে-হাসপাতালে অফিসার-বিভাগে ইউরি আরোগ্য লাভ করছিলো সেটা জেনারেল হেডকোয়ার্টার্সের কাছেই রেল লাইনের ধারে এক ছোটো শহরে। এর বাড়ির বাসিন্দাদের সবিয়ে দিয়ে হাসপাতাল বাসানো হয়েছিলো। ফেব্রুয়ারির শেষাংশে, গরম পড়েছে সেদিন। তাব বিছানার কাছেই খোলা জানলার পাট খোলা ছিলো।

ডিনারের আগে রোগীরা কোনোরকমে সময় কাটাচ্ছে। শোনা যাচ্ছে একজন নতুন নার্স হাসপাতালে যোগ দিয়েছে, সেদিনই তার কাজ শুরু হবে। ইউরির উন্টো দিকেব বিছানায় ব'সে গালিউলিন তক্ষুনি-এসে-পৌছনো খবরের কাগজে চোখ বুলাতে-বুলাতে সেক্সরের বাদ-দেয়া অংশগুলির উদ্দেশ্যে বিরক্তি জানিয়ে চলেছে। সেদিনের ডাকে একসঙ্গে এক গোছা চিঠি এসেছে টোনিয়ার—ইউরি সেগুলো পড়ছিলো। বাতাসে চিঠি আর কাগজ উড়ে-উড়ে যাচ্ছে। হালকা পায়ের আওয়াজে চোখ তুলে তাকালো সে। ভেতরে ঢুকলো লারা।

ইউরি ও গালিউলিন দু-জনেই তাকে চিনতে পারলো, যদিও কেউ আন্দাজ কবতে পারলো না যে অন্যজন চেনে, আর লারা তাদের কাউকেই চিনলো না। সে বললে: 'কেমন আছেন? জানলাটা খোলা কেন? ঠাণ্ডা লাগছে না?' গালিউলিনের কাছে গিয়ে জিজ্ঞেস করলে, 'কেমন বোধ কবছে সে, নাড়ি দেখার জন্য তার কজ্জিটা নিজের হাতে তুলে নিলো, আব নিয়েই নামিয়ে রাখলো, ব'সে পড়লো তার বিছানায়, সংশায়চ্ছন্ন দৃষ্টিতে তাকালো তার দিকে।

'একেবারে আশাতীত ঘটনা এটা, লারিসা ফিয়োডোরোভনা,' গালিউলিন বললে। 'আমি আপনার স্বামীকে চিনতাম। একই রেজিমেন্টে ছিলাম আমরা। তার জিনিসপত্র আমি আপনার জন্য রেখে দিয়েছি।'

'অসম্ভব,' লারা ব'লে উঠলো, 'এ যে অসম্ভব। আপনি তাকে চিনতেন।' তাঁর হাস্যময় যোগাযোগ! দয়া ক'রে শিগগির বলুন আমাকে, কেমন ক'বে হলো। বোমায় মারা গিয়েছেন উনি। তাই নয় কি, বিস্ফোরণে চাপা পড়েছেন। দেখছেন তো আমি জানি, আমাকে সব খুলে বলতে ভয় পাবেন না।'

কিন্তু গালিউলিনের সাহস হ'লো না। সাহসানাদায়ক এক মিথ্যা বলাই স্থির কবলো সে। 'অস্টিপভ বন্দী হয়েছেন। বাহিনী নিয়ে খুব বেশি এগিয়ে গিয়েছিলেন উনি। চাবপাশ থেকে ঘিরে ধ'রে তাদের বিচ্ছিন্ন ক'রে দেয়া উনি আত্মসমর্পণ কবতে বাধ্য হন।'

কিন্তু লারা তার কথা বিশ্বাস করলো না। এ-রকম আশাতীতভাবে গালিউলিনের সঙ্গে দেখা হয়ে বিচলিত হয়ে পড়লো, অন্যের সামনে ভেঙে পড়ার ভয়ে তাড়াতাড়ি করিডোর চ'লে গেলো সে।

একটু পবে, আপাত-শান্ত ভাবে সে ফিরে এলো: গালিউলিনের সঙ্গে কথা বললে পাশে জিজ্ঞেস কবতে ইচ্ছে ক'রে তার দিকে না-তাকিয়ে ইউরিব কাছে এগিয়ে গেলো। 'কেমন আছেন? কেমন বোধ করছেন?' নিশ্চিন্ত গলায় জিজ্ঞেস কবলো সে।

তার উত্তেজনা আর চোখের জল লক্ষ্য করেছিলো ইউরি। কেন সে এতো নিশ্চিন্ত বোধ

করাচ্ছে জিজ্ঞেস করতে ইচ্ছে করলো ইউরির, আর বলতে ইচ্ছে করলো আগে আরো দু'বার সে তাকে দেখেছে, একবার যখন সে স্কুলের ছেলে, আর একবার যখন সে কলেজের ছাত্র, কিন্তু বললো না এই ভয়ে যে হয়তো তার ব্যক্তিগত জীবনে হস্তক্ষেপ করা হবে আর সে হয়তো ভুল বুঝতে পারে তাকে। তারপর হঠাৎ তার মনে প'ড়ে গেলো কতো বছর আগের সেই ক্রিসমাসের কথা, আনার কফিন, আর টোনিয়ার চীৎকার। সে বললে:

'ধন্যবাদ। আমি একজন ডাক্তার। আমি নিজেই নিজেকে দেখছি। আমাব কিছুরই দরকার নেই।'

'আমার কথা শুনে যেন অপমানিত হয়েছেন মনে হ'লো?' লাবা অবাক হ'লো। চ্যাপ্টা নাক, নিতান্ত সাধারণ মুখের অপরিচিত লোকটির দিকে বিস্মিত দৃষ্টিতে তাকালো সে।

কয়েকদিন আবহাওয়াটা খুব খাবাপ ছিলো: আনাশ্চত বেলা, রাতে উষ্ণ মুখর বাতাসে ভেজা মাটির গন্ধ।

এই ক'দিন ধ'রে যুদ্ধক্ষেত্র সম্পর্কে ভীতিপ্রদ সব গুজব উড়ে আসছিলো জেনারেল হেডকোয়ার্টার্স থেকে। পিটার্সবার্গের সঙ্গে টেলিগ্রাফের যোগ ছিড়ে দেওয়া হচ্ছিলো বার-বার। সর্বত্র, প্রতি কোনায়-কোনায় লোকের মুখে রাজনীতি।

নার্স আন্টিপভা সকাল-বিকেল ডিউটিতে বেবিয়ে প্রত্যেকটি রোগীর সঙ্গে একটা-দুটো বাক্য বিনিময় করে, গালিউলিন আর ইউবিকেও বাদ দেয় না। 'লোকটি কী অদ্ভুত,' ইউরির বিষয়ে সে ভাবতো। 'অল্পবয়স, রুক্ষভাষী। বোচা নাক—সুন্দর কিছুতেই বলা যায় না। কিন্তু সত্যিকার বুদ্ধিমান, সজীব, এর মনটিকে মনোহর মনে হয়। তা যাকগে, অস্মার তাতে কী। আমার এখন কাজ হ'লো যতো শিগগির সম্ভব এখানকার চাকরি শেষ ক'রে মস্কোতে কাটিয়ার কাছে ফিরে যাওয়া, তা'পর নার্সিঙের চাকরি থেকে বরখাস্ত হবার আবেদন জানিয়ে ইউরিয়্যাটিন, আবার স্কুল। পাশাব কী হয়েছিলো স্পষ্ট বোঝা গেছে, আব-কোনো আশা নেই, এখন যতো তাড়াতাড়ি শির ললনাব অভিনয় ছাড়া যায় ততোই ভালো। পাশার জন্য খোজ কবতে না-হ'লে এখানে কখনোই আসতাম নাকি আমি।'

কাটিয়া কেমন আছে সেখানে, পিতৃহীন কাটিয়া—যেচারা! লারা ভাবে আর কাঁদে।

সম্প্রতি নিজের মতো একটা মস্ত বড়ো বদল লক্ষ্য করেছে লারা। আগে নানারকম দায়িত্ব বোধ করতো সে, পবিত্র কর্তব্য—দেশের প্রতি, সেনাবাহিনীর প্রতি, সমাজের প্রতি কর্তব্য। কিন্তু এখন যুদ্ধ ছেড়ে গিয়ে (এই দুর্ভাগ্যই তো সব দুঃখের মূল) সবই যেন নষ্ট মনে হয়, কিছুই আর পবিত্র নেই।

সব যেন হঠাৎ বদলে গেছে—মনের ভাব, নৈতিক আবহাওয়া: কেউ যেন জানে না কী ভাবের, কী শুনার। সবার জীবন ভাবে কেউ যেন শিশুর মতো তোমাকে হাতে ধ'রে নিয়ে বেড়ালো, তা'পর হঠাৎ কে যেন নিজের পায়ে নিজে দাঁড় করিয়ে দিলো তোমাকে, এখন সব নিজের জ্ঞানতে হবে, চলতে হবে নিজে। কাছাকাছি এমন কোনো পরিবার, কোনো মানুষ নেই যার মতামত কৃমি শ্রদ্ধা করো। এই বকম অবস্থায় কোনো পরম উদ্দেশ্যের কাছে নিজেকে ধ'রে দেবার বাসনা জাগে—মানুষের তৈরি আইন যখন ভেঙে পড়লো, তখন জীবন অথবা সত্য অথবা সুন্দরের দ্বারা শাসিত হওয়া ছাড়া উপায় কী! সেই আগের জীবনে, চেনা, পুরানো শান্তিভরা যে-জীবন এখন চিরতরে বিলুপ্ত, সেখানে যে-ভাবে নিজেকে সমর্পণ করেছো, তার চেয়ে অনেক বেশি একান্তভাবে এখন দিতে হবে নিজেকে।—কিন্তু তার বেলায়, লাবা নিজেকে মনন করিয়ে দেয়, কাটিয়াকে দিয়েই তাকে পূরণ করতে হবে এই শর্তহীনের প্রয়োজন, কাটিয়াই হবে তার দৈন্য থাকার উদ্দেশ্য। পাশাকে সে হারিয়েছে, এখন আর মা ছাড়া লারা অন্য কিছু হ'তে পারবে না, তার হৃদয়ভাগ্য অন্যতম মৃত্যুকে নিজের সমস্ত শক্তি উজাড় ক'রে দেবে সে।

ইউরি মস্কো থেকে খবর পেলো গর্ডন আর ডুডোরভ তাব বিনা অনুমতিতেই তাব বইটা প্রকাশ করেছে, প্রশংসা হয়েছে নাকি, মহৎ শিল্প-প্রতিভার বীজ আছে নাকি সে-বইয়ে: আরো খবর পেলো মস্কোতে ভয়ানক গোলমাল, খুব উত্তেজনা চলছে, কিছু-একটা ঘটবে শিগগিরই; জনসাধারণের মধ্যে অসন্তোষ বেড়ে চলেছে, নিদারুণ কোনো রাজনৈতিক ঘটনা ঘটলো ব'লে।

রাত গভীর হ'য়ে এসেছে। বজ্র ঘুম পেয়েছে ইউরির। মাঝে-মাঝে ঢলে পড়ছে সে, আব ভাবছে যে গত কয়েকদিনের উত্তেজনা তাকে জাগিয়ে রাখছে। তন্দ্রাচ্ছন্ন ঘুমে ভবা নিশ্বাস ছড়াত-ছড়াত জানলার বাইবে বাতাস হাই তুলতে-তুলতে ব'য়ে যাচ্ছে: চাঁৎকার ক'রে অভিযোগ করছে সেই বাতাস, টোনিয়া, সাশা, তোমাদের অভাব বোধ করছি আমি, বাড়ি যেতে চাই আমি, আমি আমার কাজে ফিরে যেতে চাই। বাতাসের সেই আওয়াজের সঙ্গে-সঙ্গে একবার ঘুমোলো আর একবার জাগলো ইউরি, আনন্দ আর যন্ত্রণা পালা ক'রে আচ্ছন্ন ক'বে থাকলো তাকে—এই অস্থির বাত্রি আর পরিবর্তনশীল আবহাওয়ার মতোই সেও যেন অশান্ত আর উত্তাল।

লারার মনে হ'লো, পাশাব স্মৃতির প্রতি গালিউলিন যে অত শ্রদ্ধা দেখিয়েছে, তার জিনিসপত্র যত্ন ক'রে রেখেছে, তার বদলে সে কিনা এমনকি এটুকুও তাকে জিজ্ঞেস করেনি যে সে কে, বা কোথেকে এসেছে। নিজের ওপব বিরক্ত বোধ করলো লারা।

ভুল শোধবাবাব জন্য, অকৃতজ্ঞ ব'লে প্রমাণিত না-হবার জন্য, লাভা পরদিন সকালে গালিউলিনের বিষয়ে যাবতীয় খোঁজ নিলে।

'হা ঈশ্বর,' গালিউলিনের পরিচয় পেয়ে সে ব'লে উঠলো। 'আটাশ নম্বর ব্রেস্ট স্ট্রিট, টিভেরজিনেবা, ১৯০৫-এর বিপ্লব, সেই শীত! ইউসুপকা? না, তাকে দেখেছে ব'লে তো মনে পড়ে না, গালিউলিন যেন কিছু না মনে করে: কিন্তু সেই বছর, সেই বছর, আর সেই বাড়ি! সত্যিই কখনো সেইদিন ছিলো, অস্তিত্ব ছিলো সেই বাড়ির? কী স্পষ্ট মনে পড়ছে সব-কিছু! সেই গুলিবর্ষণ আর—কী যেন তখন বলতো সে—'খুষ্টের অভিমত!' কী প্রবল শৈশবেব প্রথম অনুভূতির অভিজ্ঞতাগুলি—কী সূতীক্ষ্ণ! 'মাপ করুন, আমাকে মাপ করুন, লেফটেন্যান্ট, আপনার নামটা আর পদবিটা যেন কী বললেন? হ্যাঁ, হ্যাঁ, আগে একবার বলেছিলেন আমাকে। ধন্যবাদ, অসিপ গিমাভেৎদিনোভিচ, আমাকে সব কথা মনে করিয়ে দেবার জন্য ধন্যবাদ। সেই দিনগুলি আমার মনে ফিরিয়ে আনার জন্য আপনাকে ধন্যবাদ দিয়ে কখনো শেষ করতে পারবো না।'

সাবা দিন 'সেই বাড়ি'র কথা ভাবলে সে, মাঝে-মাঝে নিজের মনে প্রায় শব্দ ক'রে কথা বলে উঠলো।

ভাবো একবার, ব্রেস্ট স্ট্রিট, ২৮ নম্বর! আর এখনো ওরা গুলি ছুঁড়ছে, কিন্তু এবার আরো কতো ভয়াবহ হ'য়ে উঠেছে ব্যাপারটা। এখন আর বলা যায় না, 'এবার বাচ্চারা গুলি ছুঁড়ছে।' সেই বাচ্চারা বড়ো হ'য়ে গেছে, সেই সব ছেলেরা সবাই এখানে, এই সৈন্যদলেই ছিলো, সেই সব সরল লোকগুলি, যারা সেই বাড়িতে বাস করতো, সেই রকম আরো অনেক বাড়ি, অনেক গ্রামে বাস করতো যারা, সবাই এখানে। কী আশ্চর্য, কী ভয়ানক আশ্চর্য!

শয্যাশায়ী নয় এমন রোগীরা সবাই ছুটে এলো অন্যান্য ঘর থেকে, খোঁড়া পায়ে টলতে-টলতে এলো কেউ, কেউ দৌড়তে-দৌড়তে, কেউবা লাঠিতে ভর দিয়ে হাঁটতে-হাঁটতে এলো, সবাই চীৎকার করছে:

'পিটার্সবার্গের বাস্তায় দাঙ্গা হয়েছে! পিটার্সবার্গের সেনাবাহিনী বিদ্রোহীদের সঙ্গে যোগ দিয়েছে! বিপ্লব!'

পরিচ্ছেদ ৫

বিদায়, অতীত

১

মেলিউজেইয়েভো নামে এক ছোট্ট শহরে হাসপাতাল স্থানান্তরিত হ'লো। উর্বর কালো মাটির দেশে অবস্থিত এই শহর। পঙ্গপালের মেঘের মতো কালোরঙের ধুলোতে সারা শহর ছেয়ে আছে। পল্টন আর কনভয় শহরের মধ্যে দিয়ে যাবার সময় ধুলো উড়িয়ে যায়; দুই দিকেই যাতায়াত চলে, একদল সামনের দিকে এগোয়, আর একদল সেদিক থেকে আসে, দেখে বলা মুস্কিল যুদ্ধ তখনো চলছে, না কি থেমে গেছে ইতিমধ্যে।

জিভাগো, নার্স আন্টিপভা আর গালিউলিন দেখলে যে প্রতিদিন নতুন নতুন কাজের দায় গজিয়ে উঠছে ব্যাণ্ডের ছাতার মতো। যে-কোনো কাজেই ডাক পড়ে তাদের—আর পড়ে এমন দু-চার জনের, নতুন মহানগর থেকে এসেছে বলে যাদের অভিজ্ঞ আর ওয়াকিবহাল ব'লে ধরে নেয়া হয়।

সেনা ও স্বাস্থ্য বিভাগে, পৌর প্রতিষ্ঠানে, আর সৈন্যদের রসদের দপ্তরে গৌণ কমিসার হিসেবে কাজ করছিলো তারা, এই একের পর এক দায়িত্বকে বৈচিত্র্য ব'লেই মনে হ'তো তাদের, যেন খেলা মাঠে কোনো খেলা হচ্ছে, বা যেন লুকোচুরি খেলা। কিন্তু তার চেয়ে অনেক বেশি ক'রে মনে হয় যে খেলা ভাঙার সময় হয়েছে—নিজের কাজে, নিজের ঘরে ফেরার দিন এসেছে তাদের।

তাদের কাজের ব্যাপারে ইউরি আর আন্টিপভা প্রায়ই একত্র হয়।

২

বৃষ্টিতে কালো ধুলো কফিরঙের কাদার রূপ নেয় আর সারা রাস্তায় ছড়িয়ে থাকে সেই কাদা, কেননা পথঘাট অধিকাংশই কাঁচা।

শহরটি খুবই ছোটো। প্রায় প্রতি রাস্তার শেষেই দেখা যায় বিবর্ণ ভূগভূমি আর অন্ধকার আকাশ, বিপ্লবে আর যুদ্ধে ভরা বিপুল পল্লীপ্রকৃতি যেন ক্রুদ্ধ দৃষ্টি মেলে তাকিয়ে আছে।

ইউরি তার স্ত্রীকে লিখলো:

'আশে-পাশের কয়েকটি সেনাবাহিনীর ঘাঁটি দেখতে গিয়েছিলাম। শৃঙ্খলা আনার যতোই চেষ্টা হোক, যতোই চেষ্টা হোক লোকের মনে ভরসা জাগাবার, অরাজকতা বেড়েই চলেছে।

'পুনশ্চ দিয়ে বলি (যদিও আমি আগেই হয়তো কথাটা জানিয়েছি) আন্টিপভা নামে এক মহিলার সঙ্গে আমাকে একত্রে অনেক কাজ করতে হয়, ভদ্রমহিলা নার্স, উরালে জন্মেছেন। এসেছেন মস্কো থেকে।

‘তোমার মায়ের মৃত্যুর রাত্রিতে সেই ভয়ংকর পাটিতে এক পার্লিক প্রসিকিউটরকে যে-ছাত্রীটি গুলি ছুঁড়েছিলো, তাকে মনে আছে তোমার? পরে মামলাও হয়েছিলো বোধ হয়। মনে আছে, তোমাকে বলেছিলাম যে একবার তোমার বাবার সঙ্গে এক নোংরা হোটলে গিয়ে মেয়েটিকে দেখেছিলাম—তখনো স্কুলের ছাত্রী সে। সেখানে কেন গিয়েছিলাম তা আর এখন মনে নেই, শুধু মনে আছে কনকনে ঠাণ্ডা এক রাত ছিল সেটা। যতোদূর মনে পড়ে প্রেসনিয়া বিদ্রোহের সময় ছিলো তখন। —সেই মেয়েটিই আন্টিপভ।

‘ফিরে যাবার চেষ্টা করেছি কয়েকবার— কিন্তু ব্যাপারটা ততো সহজ নয়। কাজের জন্য ততোটা নয়—তার ভার অনায়াসেই অন্য কারো হাতে দিয়ে যাওয়া যায়—মুশ্লিলাটা হ’লো যাওয়াব উপায় নিয়ে। হয় কোনো ট্রেনই মেলে না, নয়তো এতো ভিড় যে তাতে চড়ার আশা সদূরপরাহত।

‘এই অবস্থায় অবশ্য অনিশ্চিত কালের জন্য ব’সে থাকা যায় না, তাই আমরা যারা পদত্যাগ করেছি বা যাদের চাকরি গেছে (তাদের মধ্যে আন্টিপভা ও গালিউলিনও আছে), আমরা ঠিক করেছি যা থাকে কপালে সামনের সপ্তাহে রওনা হ’য়ে পড়বো। আলাদা-আলাদা যাবো আমরা—তাতে ট্রেনে ওঠার সুযোগ মিলবে বেশি।

‘অতএব— যে-কোনোদিন আকাশ থেকে গিয়ে পড়তে পারি—টেলিগ্রাম করার চেষ্টা করবো যদিও।’

রওনা হবার আগেই অবশ্য টোনিয়ার উত্তর এলো। ভাঙা-ভাঙা বাক্যে, —স্পষ্টতই কান্নায়— চোখের জলের দাগ আর বিরতিচিহ্নের জায়গায় কালির ফোঁটায় ভরা চিঠিতে সে অনুবোধ জানিয়েছে মস্কোতে না-ফিরে ইউরি যেন সেই আশ্চর্য নাসটির সঙ্গে সোজা উরালে চ’লে যায়, কেননা সেই নাসের জীবন এমনভাবে দৈবে আচ্ছন্ন আর অদ্ভুত সব ঘটনায় ভরা যে টোনিয়া তার সরল প্রকৃতি নিয়ে প্রতিযোগিতায় নামতে পারবে না।

‘শাশুর ভবিষ্যতের জন্য ভেবো না।’ টোনিয়া আরো লিখেছে। ‘তাকে নিয়ে কখনো লজ্জা পেতে হবে না তোমাকে। ঠিক সেই সব নীতি অনুসারেই আমি তাকে মানুষ করবো, যেগুলি তুমি ছেলেবেলায় আমাদের বাড়িতে পালন করতে দেখেছো সবাইকে। —তোমাকে কথা দিচ্ছি।’

ইউরি তক্ষুনি জবাব লিখলো। ‘তোমার নিশ্চয়ই মাথা-খারাপ হয়েছে, টোনিয়া। এমন একটা কথা তুমি কল্পনা করতে পারলে কী ক’রে? তুমি কি জানো না—তুমি কেন যথেষ্ট গভীরভাবে উপলব্ধি করো না—যে তোমার জন্য, তোমার প্রতি, আমাদের সংসারের প্রতি আমার নিয়ত সপ্তম চিন্তার জন্যই এই ভয়ংকর, সর্বগ্রাসী যুদ্ধে দুই বছর কাটাতে পারলাম আমি। কিন্তু কথা ব’লে কোনো লাভ হয় না। শিগগিরই আমরা মিলিত হবো, আবার নতুন ক’রে জীবন শুরু হবে আমাদের, তখনই সব পরিষ্কার হ’য়ে যাবে।

‘তোমার চিঠি প’ড়ে অবধি অন্য এক কারণে উদ্ভিগ্ন বোধ করছি। তোমাকে এমনভাবে লেখবার সুযোগ যদি সত্যি দিয়ে থাকি, তাহ’লে আমার ব্যবহার নিশ্চয়ই দ্ব্যর্থক হয়েছে—শুধুমাত্র তোমার কাছেই নয়, ভুল লেখার সুযোগ দিয়ে অন্যজনের কাছেও আমি অপরাধী। তিনি ফিরে এলেই আমি ক্ষমা চাইবো। গ্রামের দিকে গেছেন উনি। গ্রামে-গ্রামে স্থানীয় পরিষদ নির্বাচন করা হচ্ছে (জেলাগুলিতে যা আগে থেকে ছিলো তা ছাড়াও আরো)। ওঁর এক বন্ধু শাসনতন্ত্রের পরিবর্তনের ব্যাপারে উপদেষ্টার কাজ করছেন—উনি গেছেন তাঁকে সাহায্য করতে।

‘এ-খবরটা হয়তো তোমার কাছে দরকারি ব’লে মনে হ’তে পারে যে যদিও আমরা একই

বাড়িতে বাস করি, আজ পর্যন্ত আশ্চর্যের ঘর কোনটা তা আমি জানি না, জানবার কথা মনেও হয়নি কখনো।

৩

মেলিউজেইয়েভো থেকে দুটো বড়ো রাস্তা বেরিয়ে গেছে—একটা পূবে, আর একটা পশ্চিমে। একটা কাঁচা রাস্তা, বনের মধ্য দিয়ে জাবুশিনো পর্যন্ত চ'লে গেছে; জাবুশিনো নামে এই ছোটো শহরটি শস্যের ব্যবসা ক'রে, অনেক বিষয়ে উন্নত হ'য়েও মেলিউজেইয়েভোর শাসনাধীন। অন্যটি পাকা রাস্তা, মাঠের মধ্যে দিয়ে চ'লে গেছে সবচেয়ে কাছের রেল-জংশন বিরিউচি অবধি, শীতকালে জলে শপশপে, কিন্তু গ্রীষ্মে শুকনো।

জুন মাসে জাবুশিনো স্বাধীন প্রজাতন্ত্রে পরিণত হয়েছিলো। এই প্রজাতন্ত্র স্থাপন করেছিলেন স্থানীয় ময়দা-কলের মালিক ব্রাজেইকো, তাঁর সহায় হয়েছিলো ২১২ নম্বর পল্টনের সৈন্যরা, যারা বিপ্লবের সময় সশস্ত্রে যুদ্ধক্ষেত্রে পবিত্রাণ ক'রে বিরিউচির মধ্য দিয়ে জাবুশিনোতে চ'লে আসে।

এই প্রজাতন্ত্র অস্থায়ী সরকারকে স্বীকার না-ক'রে, সমস্ত রাশিয়া থেকে বিচ্ছিন্ন হ'য়ে আছে। ব্রাজেইকো ধর্মমতে ছিলেন স্বাধীনচেতা, এক সময়ে টলস্টয়ের সঙ্গে তাঁর পত্রালাপ ছিলো। স্থানীয় পরিষদের তিনি 'সং সংঘ' নাম দিলেন, এই বাষ্টিকে ঘোষণা করলেন নতুন এক রামরাজ্য ব'লে, যেখানে সমস্ত কাজ সকলে ভাগ ক'রে নেবে, আর যেখানে সম্পত্তিতে সকলের সমান অধিকার।

জাবুশিনোকে নিয়ে চিরকালই নানান কিংবদন্তী ও অতিরঞ্জিত গল্প চ'লে আসছে। 'দুঃসময়ের' ইতিহাসে উল্লেখ আছে জাবুশিনোর; ঘন বনে ঘেরা জাবুশিনো, কিছুকাল আগেও ডাকাতে ভরা ছিলো সেই বন। ব্যবসায়ীদের প্রাচুর্য আর মাটির অবিশ্বাস্য উর্বরতার জন্য জাবুশিনোর খ্যাতি বহুদূর বিস্তৃত; সেই প্রদেশের বহু লৌকিক বিশ্বাস, আচার এবং কথা বলার বিশিষ্ট ধরন জাবুশিনো থেকে এসেছে।

আজকাল কিন্তু সেই সব আশ্চর্য গল্প বলা হ'য়ে থাকে ব্রাজেইকোর প্রধান সহকারীটির বিষয়ে। শোনা যায় তিনি মুক এবং বধির, শুধু মাঝে-মাঝে দৈব অনুগ্রহের ফলে তাঁর বাকশৃঙ্খলিত হয়।

প্রজাতন্ত্রের আয়ু ছিলো পনেরো দিন; জুনের শেষাংশেই অস্থায়ী সরকারের বিদ্যমান একটি বাহিনী তার উচ্ছেদ করলে। পলাতক সৈন্যদল আবার বিরিউচিতে পশ্চাদপসরণ করলো। জংশনের দু'পাশে রেল-লাইনের ধারের কয়েক মাইল জঙ্গল এক সময় পরিষ্কার করা হয়েছিলো, বুনো ঝুঁকিরিতে আচ্ছাদিত পুরোনো গাছের গুড়ি, চূরির ফলে ক'মে-আসা কাঠের স্তূপ আর যারা বছরের বাঁধা সময়ে গাছ কেটে রেখে গেছে সেই সব মজুরদের নড়বড়ে ঝুঁড়ের মাঝখানে তারা তাঁবু গাডলো।

৪

যে-হাসপাতালে ইউরি এক সময় রোগী হিসেবে গিয়েছিলো, এখন সে সেখানকার ডাক্তার। বাড়িটা হ'লো কাউন্টের জার্নিনস্কায়ার পূর্ব-বাসস্থল। যুদ্ধের আরম্ভেই বাড়িটা তিনি রেড ক্রসকে দান করেছিলেন।

বাড়িটি শহরের সবচেয়ে ভালো পাভাগুলির একটিতে, বড়ো রাস্তা আর 'প্লাৎজ' নামে পরিচিত পার্কের কোণ ঘেঁষে; এই পার্কে আগে সৈন্যরা কৃচ্চাওয়াজ করতো, এখন সভাসমিতি হয়।

বাড়িটা যে-জায়গায় সেখান থেকে আশে-পাশের অনেকটা চোখে পড়ে: রাস্তা আর পার্ক ছাড়াও চোখে পড়ে পাশের বাড়ির উঠান (দবিত্র এক প্রাদেশিক পরিবারের বাড়ির উঠান, পরিবারটি প্রায় চাষাভুষ্যের মতো ভীষনযাপন করে), আর দেখা যায় পেছন দিকের জামতে কাউন্টসেবের পুরোনো বাগান।

এই রাজডলনয়ে জেলায় বিস্তর সম্পত্তি ছিলো কাউন্টসেব, এই বাড়িটি তিনি ব্যবহার করতেন শুধু মাঝে-মাঝে যখন শহরে আসতেন, বা যখন গ্রীষ্মকালে দূরে কাছে নানা জায়গা থেকে অতিথিরা রাজডলনয়েতে বেড়াতে আসতেন।

এখন বাড়িটি কপান্তরিত হয়েছে হাসপাতালে, আর বাড়ির মালিক প্রেন্ডার হ'য়ে পিটার্সবার্গে আছেন—তিনি আগে থেকেই ছিলেন সেখানে।

বিস্তর দাস-দাসীর মধ্যে মাত্র দুজন খ্রীলোক এখনো প'ড়ে আছে: কাউন্টসেবের প্রধান বাগনি উস্টিনিয়া, আর মাদমোয়াজেল ফ্লারি, যিনি কাউন্টস-কন্যাদের মানুষ করেছেন। সেই মেয়েরা এখন সবাই বিবাহিত।

শাদা চুল, গোলাপি গাল আর অগোছালো চেহারা মাদমোয়াজেল ফ্লারি; ঘরে পথের চাঁটি আর ঢলঢলে ছিড়ে-আসা হাউস-কোট গায়ে দিয়ে সারা হাসপাতাল ঘুরে বেড়ান; জার্মানকি পরিবারে যতোটা স্বাধীনভাবে ছিলেন হাসপাতালেও ঠিক ততটাই স্বাচ্ছন্দ্য আপাতত বজায় রাখার চেষ্টা করেন তিনি। শেষের কথাগুলো গিলে ফেলে, ভাঙা-ভাঙা কৃষিতে গালগল্প শোনান, অস্বস্তি করেন, নাটকে ভাব দেন আর ফেটে পড়েন কর্কশ হাসিতে। কাশির দমকে তার সেই হাসি শেষ হয়।

তার ধারণা হ'লো নার্স অ্যান্টিপডাকে খুব ভালো ক'রে বুঝে ফেলেছেন তিনি, এবং নার্স ও ডাক্তার, তার মতে, পরস্পরের প্রতি আকৃষ্ট হ'তে বাধ্য। লাতিন চিত্তের পরমপ্রিয় আবেগময় মডযন্ত্রের প্রেমে আচ্ছন্ন হ'য়ে তিনি তাদের দু'জনকে এক সঙ্গে দেখলে যতো খুশি হতেন তেমন বোধ হয় আর কখনো না। আঙুল নেড়ে চোখ টিপতেন তিনি, লাবা তাতে অবাক হ'তো, ইউবি বিবক্ল বোধ করতো, কিন্তু সব বাতিকগ্রস্ত লোকদের মতোই মাদমোয়াজেল ফ্লারিও তার নিজের ভ্রান্ত ধারণা আঁকড়ে থাকতেন, কোনোমতেই তাদের ছাড়বেন না তিনি।

উস্টিনিয়ার চরিত্রটি আরো অদ্ভুত। তার বেচপ শবীবের গডনটি যেন লাউয়ের মতো, দেখলে মনে হয় মুরগি ব'সে ডিয়ে তা দিচ্ছে। সাধারণত বেশ মেপে-মেপে শব্দ ব্যবহার করে সে, আর কথাও বলে চটপট আর লাগসই-মতো, কিন্তু কোনো কুসংস্কারের প্রসঙ্গ পেলে তার কল্পনা আর রাশ মানে না। জাবুশিনোতেই সে জন্মেছে। স্থানীয় এক জাদুকরের মেয়ে—অগুণতি তুকতাক জানতো সে; স্টোভের ওপরে চাষির ফুটোতে বিড়বিড় ক'রে মন্তব্য না-প'ড়ে বাইরে বেরুতো না—তার অনুপস্থিতিতেও বাড়ি যাতে আগুন ও শয়তানের হাত থেকে রক্ষা পায়। এমনতে দিবা চূপচাপ থাকে, কিন্তু একবার যদি তাতিয়ে দেওয়া যায় তাহ'লে আর তাকে থামানো যাবে না। তার বিশ্বাসের মূলে কোনো আঘাত পড়লে সত্যের পক্ষ নিয়ে উত্তেজিত যুদ্ধে নেমে পড়তে সে দেরি করে না।

জাবুশিনো প্রজাতন্ত্রের পতন সত্ত্বেও মেলিউজ্জৈয়েভের বিপ্লব-পরিষদ সেই জেলার ওপর জাবুশিনোর বিদ্রোহী প্রভাবকে ভয় পেতো, তাই প্রতিষেধক হিসেবে একটি জনশিক্ষা আন্দোলন শুরু করেছিলো। সে-কাজের সবচেয়ে উপযোগী সময় ছিলো সন্ধ্যায়, পার্কে শান্তিপূর্ণ এবং স্বতঃস্ফূর্ত সভা বসতো তখন। এই সভাগুলিতে ছাড়াছাড়িভাবে লোক জমে,

আসে সেই সব নাগরিকরা যাদের আব-কিছু করবার নেই, যারা আগে প্লাণ্ডজের অন্য প্রান্তে দমকলের আপিশের সামনে পরচর্চার আসরে জমায়েত হ'তো। পরিষদ উৎসাহ দেয় তাদের। স্থানীয় এবং বাইরের বক্তাদের ডেকে আনে আলোচনা চালিয়ে নেবার জন্য। সেই সবাব নক-বধিবেব গল্প গাঁজাখুরি ব'লে মনে করেন অতিথিরা, এবং উদগ্রীব হ'য়ে থাকেন সে-কথা শুনাব জন্য। কিন্তু মিস্ত্রি-মজুর ও সেপাইদের বৌয়েরা, বা মেলিউজেইয়েভোব এককান্টন পরিচালকেরা সে-সব গল্পকে মোটেও গাঁজাখুরি ব'লে মনে করে না, আর তা নিয়ে বাঁতিমণ্ডে তর্ক করে।

এদের অন্যতম হ'লো উস্টিনিয়া। প্রথম-প্রথম তার লজ্জাকরেছে, স্ত্রী-সুলভ সংযমবশত ক'রে থেকেছে, কিন্তু মেলিউজেইয়েভোভে যে-সব মত অপছন্দ করা হয় তাব প্রতিবাদ ক'রে-ক'রে ক্রমে সাহস বেড়েছে তাব, এখন সে নিজেই একজন বক্তা।

গলার সন্দের গুঞ্জন পার্ক থেকে ভেসে আসে হাসপাতালের খোলা জানলা দিয়ে, নিস্তরু সম্মুখি এমনকি শব্দগুলিও আলাদা-আলাদা ক'রে বোঝা যায়। উস্টিনিয়ার বক্তৃতা হ'লোই, যে-ঘরেই লোকজন থাকবে, সেখানেই ছুটে যাবেন মাদমোয়াজেল ফ্লোরি, তাদের অন্তর কববেন শোনার জন্য, তার ভাঙা-ভাঙা উচ্চারণে সবলভাবে নকল কববেন উস্টিনিয়ার 'হাসপটি...বাসু...জাবুশি... বোবা-কা...দেশদ্রোহী! দেশদ্রোহী!'

তার এই তেজস্বী, স্পষ্টভাষী বাক্যবীকে নিয়ে গোপন গর্ব ছিলো মাদমোয়াজেলের; যদিও সোকাটকির বিরাম ছিলো না, তবু তাঁরা দু'জনে দু'জনকে ভালোবাসতেন।

৫

মস্কোতে ফেব্রুয়ারি প্রয়োজনীয় যাবতীয় দলিলপত্র সংগ্রহ করতে ইউরি দপ্তরে-দপ্তরে ঘুরেছিলো; তাছাড়া বন্ধুবান্ধব ও অন্যান্য পবিচিতদের কাছে বিদায় নিতেও বেরিয়েছিলো সে।

সে-সময়ে যুদ্ধক্ষেত্রের আঞ্চলিক শাখার নতুন কমিসার যুদ্ধে যাবাব পথে মেলিউজেইয়েভোভে কয়েকদিন কাটিয়ে যাচ্ছিলেন। নিতান্তই নাকি বালক তিনি।

যুদ্ধক্ষেত্রে নতুন কার্যকলাপ শুরু হওয়াতে তাঁকে বহাল করা হয়েছে। আক্রমণ করার তোড়জোড় চলছে, যথাসাধ্য চেষ্টা চলছে সৈন্যদের উদাসীনতা ভেঙে তাদের মধ্যে শৃঙ্খলা আনবার জন্য। যুদ্ধবিরোধীদের জন্য সামরিক বিচারালয় খোলা হয়েছে, এবং সম্প্রতি যে-মৃত্যুদণ্ড উঠিয়ে দেওয়া হয়েছিলো তা পুনঃপ্রতিষ্ঠিত হয়েছে।

ইউরির কাগজপত্রে যাদের সেই লাগবে স্থানীয় শহরের মেয়র তাঁদের মধ্যে একজন। সাধারণত তাঁর আপিশের কাছে ঘেঁষা যায় না। লম্বা লাইন নেমে আসে রাস্তার অর্ধেক পর্যন্ত, আর ভেতরে এতো গোলমাল চলে যে কেউ কিছু শুনতে পায় না।

কিন্তু সে-দিনটাতে লোকজন আসা বারণ ছিলো। শান্তিপূর্ণ আপিশে ব'সে কোরানিরা চূপচাপ লিখে চলেছে, কাজের ক্রমবর্ধমান জটিলতায় তারা অসন্তুষ্ট, বিদ্বেষের দৃষ্টি বিনিময় করছে পরস্পরের মধ্যে। মেয়রের ঘর থেকে ভেসে আসছে ফুটিবাজ গলাব আওয়াজ। শুনে মনে হয় লোকেরা জামার বোতাম খুলে নিয়ে খাওয়া-দাওয়া করছে।

ভেতরের ঘর থেকে গালিউলিন বেরিয়ে এলো, ইউরিকে দেখে সারা শরীরে বিচিত্র ভঙ্গি ক'রে ডাকলো তাকে—প্রায় কুঁজো হ'য়ে ঠাড়িয়ে আছে গালিউলিন, যেন এক্ষুনি দৌড়ের প্রতিযোগিতায় নামবে।

ইউরিকে মেয়রের সঙ্গে দেখা করতেই হবে, অতএব সে ভেতরে গেলো। ঘরটিতে এক মনোবম বিশৃঙ্খলা বিরাজমান।

সারা শহরে যিনি উত্তেজনা সৃষ্টি করেছেন, হাল আমলের বীরপুরুষ সেই নতুন কমিসার রক্তমণ্ডের মাঝখানটিতে ব'সে আছেন। নিজের কর্মস্থলে না-থেকে এই কাগজ-রাজত্বের শাসকদের উদ্দেশ্যে লম্বা-চওড়া বক্তৃতা ঝাড়ছিলেন তিনি, যার সঙ্গে যুদ্ধ-সংক্রান্ত ব্যাপাবের কোনোই যোগ নেই।

‘আ—এই যে আমাদের আরেক তারকা,’ মেয়র ইউরিকে পরিচয় করিয়ে দিলেন। সম্পূর্ণ ভাবে আত্মমগ্ন কমিসার ফিরে তাকালেন না, আর মেয়র, তাঁর সামনে ইউরি যে-সব কাগজপত্র রাখলো সেগুলো সই করার জন্য সামান্য একটু ঘুবে বসলেন, একটা নিচু, নরম আসনের দিকে সর্বিনয়ে ইঙ্গিত ক’রে আবার তাঁর একান্ত নিবিষ্ট ভঙ্গিতে ফিরে গেলেন।

ইউবি ব’সে পড়লো। সে-ঘরে সেই একমাত্র ব্যক্তি যে মনুষ্যপদবাচ্য জীবের মতো বসেছে। অন্যেরা প্রত্যেকে আপাত-অন্যায়স ভঙ্গির বাড়াবাড়ি ক’রে এমনভাবে গভাগডি যাচ্ছে যেন দশায় পড়েছে। মেয়র তো তাঁর টেবিলের ওপর প্রায় শুয়েই পড়েছেন, হাতের মুঠোয় থুংনি রেখে চিন্তাশীল বায়রনি কায়দায় বসেছেন তিনি। তাঁব সহকারী, বিশালাকায় এক লম্বা-চওড়া ভদ্রলোক, চেয়ারের হাতলের ওপর ঝুলে আছেন, আসনের ওপর এমনভাবে তাঁব পা প’ড়ে আছে যেন একপাশে পা দিয়ে ঘোড়ায় চ’ড়ে চলেছেন তিনি। গালিউলিন একটা চেয়ারে বসেছে দুই পা ফাঁক ক’রে, চেয়ারের পিঠের ওপর ভাঁজ-ক’রে রাখা দুই হাতের ওপর মাথাটি হেলানো, আর কমিসার তো একবার দুই হাতের ওপর ভর দিয়ে জানলার তাকে উঠছেন, একবার নামছেন লাফ দিয়ে, ছোটো-ছোটো দ্রুত পদক্ষেপে ছুটোছুটি ক’রে বেড়াচ্ছেন সাবা ঘরময় লেভি-জডানো লাটুর মতো শব্দ ক’রে, একমুহূর্ত চুপ করছেন না স্থির হ’য়ে। অনর্গল কথা বলছেন ভদ্রলোক; কথা বলার বিষয় হ’লো বিরিউচির যুদ্ধক্ষেত্র থেকে পালিয়ে-যাওয়া সৈন্যদলের সমস্যা।

ইউরির কাছে কমিসারের যে-রকম বর্ণনা সবাই দিয়েছিলো, তিন ঠিক সেই বকম. রোগা, সন্ত্রাস্ত, যেন সবে স্কুল থেকে বেরিয়েছেন এমনি ছেলমানুষ, আদর্শের আগুনে মোমের মতো জ্বলছেন। খুব নাকি বড়ো ঘরের ছেলে (অনেকের খারণা তাঁর বাবা এক সেনেটর)। ফেব্রুয়ারি মাসে ডুমাতে^১ প্রথম যারা বাহিনী নিয়ে গিয়েছিলো ইনি নাকি তাদের মধ্যে একজন। তাঁব নাম গিস্তজ অথবা গিস্তজে—ইউরি নামটা ঠিক বুঝতে পারলো না—খুব স্পষ্ট, বিশুদ্ধ পিটার্সবার্গের উচ্চারণে, কিন্তু ঈষৎ বাপ্টিক ঢঙে তিনি কথা বলেন।

খুব আটো টিউনিক পরেছেন তিনি। বয়স অতো কম ব’লে বোধ হয় একটু অস্বস্তি বোধ করেন, তাই বয়স্ক দেখাবার জন্য মুখে একটা শ্লেষাত্মক ভাব এনে, শব্দ এপোলেৎ^২-আটা দুই কাঁধ গুটিয়ে ইচ্ছে ক’রে ঝুঁজো সাজেন, দুই হাত ঢোকানো থাকে পকেটের ভেতরে; আসলে এই চেহারায তাকে দেখাতো কোনো অস্বাভাবিক প্রথাসিদ্ধ ছায়ামূর্তির মতো—কাঁধের কোণ থেকে পা পর্যন্ত সোজা নেমে এসেছে, দুটিমাত্র সরল রেখায় ছবিটা ঐকে ফেলা যায়।

‘রেল-স্টেশনের কাছেই এক জায়গায় এক কসাক ফৌজের ঘাঁটি পড়েছে,’ মেয়র খবর দিলেন। ‘লাল ফৌজ, বিশ্বাসী। এদের ডেকে নেওয়া হবে, বিদ্রোহীদের ঘিরে ফেলে চুকিয়ে ফেলা হবে ব্যাপারটা। কমাণ্ডার ব্যস্ত হ’য়ে পড়েছেন চটপট ওদের নিরস্ত্র ক’রে দেবার জন্য।’

‘কসাক! কিছুতেই না,’ দপ ক’রে জ্ব’লে উঠলেন কমিসার। ‘এটা ১৯০৫ সাল নয়। ওঁ-সব ঐতিহাসিক স্মৃতিমহনের সময় আর নেই এখন। ওদের আর আমাদের মতামত একেবারে উল্টো। আপনাদের সেনাপতিরা বড় বেশি চালাক হবার চেষ্টা করছেন।’

১ Duma: রুশীয় পার্লামেন্ট। ১৯০৬ থেকে ১৯১৭ পর্যন্ত এর অস্তিত্ব ছিলো।—অনুবাদের টীকা।

২ Epaulette সৈনিকের সন্ধাননার চিহ্ন। ইউনিকর্নের কাঁধে ধারণ করা হয়।—অনুবাদের টীকা।

কতাই না তাঁর হ'তে পারে সেই আকাঙ্ক্ষা—মানুষের বাগানদ্বয়ের নীচস শূন্যতা থেকে পালিয়ে গিয়ে আপাত-অস্পষ্ট প্রকৃতির মধ্যে আশ্রয় নেবার ইচ্ছে, দীর্ঘ কঠিন পৰিশ্রমের ভাষাহীনভাবে জন্ম, সৃষ্টি বা সত্যকার সংগীতের জন্য, অথবা মানুষের যে বোঝাপড়া আরোগের চাপে ত্ত্ব হ'য়ে গেছে তাব জন্য আকাঙ্ক্ষা বা এপ্রই না হ'তে পারে।

নাম অস্টিপাতাব সঙ্গে বোঝাপড়া কবতে হবে—মান পড়লো ইউবিবি। নিশ্চয়ই দু'বেলা হবে না, কিন্তু তাব সঙ্গে দেখা কবাব প্রয়োজন আছে বলেই ইউবি বৃষ্টি—এমনকি, এই অস্টিপাতাব মনোভা। এখনও লোপ হয় ফেব্রেনি উনি। কিন্তু সুযোগ পাওয়া মাত্র ইউবি উঠে পড়লো, বৈদ্যে গেলো সকলের অলক্ষ্যে।

৬

নাম ফেব্রেনি। ইউবিকে এই খবর দিয়ে মাদমোয়াজেল আবে জানালেন যে উনি ক্রান্ত ছিলেন। হাড়াওড়ি খেয়ে নিয়ে নিজের ঘরে চ'লে গেছেন, ব'লে গেছেন তাকে যেন বিবস্ত্র না কবা হয়। 'কিন্তু উঠে গিয়ে দরজায় ঢোকা দিন না,' মাদমোয়াজেল পরামর্শ দিলেন। 'এখনো নিশ্চয়ই গ্লোমারনি উনি'—'ওঁব ঘব কোনটা'—বিশ্বয়ের ঘোর কাটিয়ে ওঠার পব মাদমোয়াজেল বললেন যে সবচেয়ে ওপরতলার সিঁড়ির চত্বর দিয়ে যে-গলি গেছে তার এক প্রান্তে, কাউন্টেসের সব জিনিসপত্র যে-সব ঘরে তালাবন্ধ করা আছে সেই ঘবগুলি ছাড়িয়ে নার্সের ঘব। ইউবি সেদিকে কখনো যায়নি।

অন্ধকার হ'য়ে আসছিলো। সন্ধ্যার ছায়ায় বাইরের বাড়ি আর বেড়াগুলি যেন অনেক কাছাকাছি চ'লে এসেছে। জানলা দিয়ে লণ্ঠনের আলো বাইবে গিয়ে পড়েছে, বাগানের কোন গভীর থেকে গাছগুলি উঠে এসে দাঁড়িয়েছে সেই আলোয়। আবহাওয়াটা গরম আর চিটচিটে। লণ্ঠনের আলো উঠানে প'ড়ে যেন গাছেব বাকল দিয়ে ফেটা-ফেটা বেয়ে পড়েছে।

সিঁড়ির মাধ্যম এসে ইউবি থেমে পড়লো। মনে হলো, লারা পথশ্রমে ক্রান্ত হ'য়ে ফিরে আসামাত্র তাব দরজায় ঢোকা দেওয়াটাও অভদ্রতা হবে, শুধু অভদ্রতা নয়, অস্বস্তিকর। ববং কালকের জন্য তাব বোঝাপড়া তোলা থাক। কোনো সিদ্ধান্ত বদলাবার পব মানুষ অনামনস্ক হ'য়ে ফয়। ইউবিও আনমনা-ভাবে গলিৰ অন্য প্রান্তে চ'লে গেলো, পাশের বাড়ির উঠানের দিকে একটা জানলা খোলা। সেই জানলা দিয়ে বাইরে তাকালো।

শান্ত ও গোপন শব্দে রাত্রিটি ভ'রে আছে। তার ঠিক পাশে, গলিতেই কোথাও একটা কল থেকে টিপটিপ একটানা জল প'ড়ে যাচ্ছে, ফেটাগুলি পূর্ণ ও মস্তব। জানলার বাইরে কোথায় যেন ফিসফিস কবছে কাবা। সজ্জি-ঝেঁতের কোনো অংশে শসার চাষায় জল দেওয়া হচ্ছে, কুয়ো থেকে বালতি-বালতি জল তোলার সময় কনকন আওয়াজ হচ্ছে কুয়ের শেকলে।

একসঙ্গে সব ফুলের গন্ধ ভেসে এলো, মাটি যেন সারাদিন চেতনহীন হ'য়ে থেকে এখন জেগে উঠেছে।

আব কাউন্টেসের সেই বহু শতাব্দীর পুরোনো বাগান—ঝ'রে-পড়া ডালপালায় এমন আচ্ছন্ন যে চলা যায় না—সেই বাগানে পুরোনো লেবু-গাছগুলিতে সদ্য ফুল ধরছে, আব তার ধুলোর মতো ঝাপসা গন্ধের বিশাল ঢেউ বাড়ির সমান উঁচু হ'য়ে ভেসে আসছে।

ডানদিকের বেড়ার ওপারের রাস্তা থেকে গোলমাল শোনা যাচ্ছে, টুকবো-টুকবো গানের কলি, একজন মাতাল সৈন্য, দরজায় ধাক্কা।

কাউন্টেসেব বাগানে পাঁখির বাসার পেছনে এক বিশাল লাল চাঁদ উঠলো। প্রথমে সেই চাঁদের ছিলো জাব্বিশিনোব নতুন ইটকালের মতো রং, আস্তে-আস্তে তাতে বিবিউচির জলের ঢাক্কের হলুদ রং ধরলো।

আর জানলার ঠিক তলায়, বিষাক্ত নাইটশেডের গন্ধের সঙ্গে মিশে গেছে চীনে-চায়ের মতো তাঁপ্র নতুন-তোলা খড়ের গন্ধ। ওখানে একটা গোরু বাধা; সুদূর গ্রাম থেকে আনা হয়েছে তাকে, সারাদিন সে হেঁটেছে, ক্লান্ত সে, নিজের পালের জন্য তার মন-কেমন করছে, নতুন কত্রীর দেওয়া খাদ্য সে এখনও খেতে নারাজ।

‘দাড়া, দাঁড়া, হচ্ছেটা কী, টু মারা বের করছি তোরা,’ কত্রীটি ফিসফিস ক’রে সাধাসাধি করছিলো, কিন্তু সে বেগে গিয়ে মাথা ঝাকাচ্ছে, গলা বাড়িয়ে দিয়ে ডেকে উঠছে কাতরস্বরে, আর মেলিউজ্জৈয়েভোর কালো রঙের গোলাবাড়ির পেছনে জ্বলছে তারাগুলি, গোরুটার সঙ্গে যেন এক অদৃশ্য সুতোয় বাঁধা, সমবেদনা আছে তাদের, অন্য এক জগতেও যেন গোয়াল-ঘর আছে, সেখানে সকলে এই গোরুটির সমব্যথী।

প্রাণের কিশ্বে সব-কিছুই ফেঁপে উঠছে, বাড়ছে, জাগছে। বেঁচে থাকাব আনন্দ, ঝিমঝবা বাতাসের মতো, মস্ত ঢেউ তুলে নির্বিচারে সব ভাসিয়ে নিয়ে গেলো—মাঠ আর শহর, দেয়াল আর বেড়া, কাঠ আর রক্তমাংসের শরীর। এই ছাপিয়ে-ওঠা বন্যার কাছ থেকে পালাবার জন্য ইউরি পার্কে চ’লে গেলো বক্তৃতা শুনতে।

৭

ততোক্ষণে চাদ উঠে গেছে উচুতে। চাদের আলো পার্কে পড়েছে চুনকামের মতো ঘন হ’য়ে, পাথরের বাড়িগুলোর থামওলা গাড়ি-বারান্ডার সামনে ছায়া যেন চওড়া কালো কাপেটি বিছিয়ে দিয়েছে।

সভা বসেছিলো পার্কের ওপারে, ইচ্ছে করলে ইউবি প্রত্যেকটি কথা শুনতে পারতো, কিন্তু সেই দূশের মহিমা তাকে এমনভাবে অভিভূত করলো যে বক্তৃতা শোনার বদলে দমকল-আপিশের সামনের বেঞ্চিতে ব’সে সে দেখতে লাগলো।

পার্ক থেকে সরু-সরু কানা গলি বেরিয়েছে—পাড়াগাঁয়ের পথের মতো কাদায় ডোবা, ভাঙাচোরা ছোটো-ছোটো বাড়ির সারি দুই দিকে। উইলো-পাতার বেড়া কাদার মধ্য থেকে উঠে আছে, দেখতে লাগছে চিংড়িমাছের পাত্রের ঢাকনার মতো। খোলা জানলাগুলোর একচোখো দ্যুতি দেখা যাচ্ছে। সামনের ছোটো-ছোটো বাগানে, তেলতেল জুলপি আর যেমো লাল টুকটুকে মাথা নিয়ে ভুট্টাগাছগুলি দাঁড়িয়ে আছে, উঁকি মারছে জানলা দিয়ে, আর বেড়ার ওপর দিয়ে সুদূরে চোখ পেতে রেখেছে একক ম্লান কয়েকটি শীর্ণ হলিহক গাছ, তারা যেন একদল রাত-মজুরনি, যারা ঘরের ভেতরের গরমে টিকতে না-পেরে খোলা বাতাসের জন্য বাইরে এসে দাঁড়িয়েছে।

এই চাঁদনি রাতটি যেন ঈশ্বরের করুণা অথবা দিব্যদৃষ্টির মতোই আশ্চর্য। হঠাৎ, সেই প্রদীপ্ত ও রূপকথার মতো স্তব্ধতা ভেদ ক’রে মাপা-মাপা, প্যাচালো, পরিচিত, সম্প্রতি-শোনা এক গলার স্বর ভেসে এলো। সুন্দর স্বর, আত্মবিশ্বাসে ভবা। শুনেই ইউরি চিনতে পারলো। কমিসার গিনৎজ বক্তৃতা করছেন।

স্পষ্টতই, পৌরবিভাগের আহ্বানে তাঁদের প্রচারকার্যে নিজের মর্যাদা দিয়ে সাহায্য করছেন কমিসার। আবেগের সঙ্গে কথা বলছেন তিনি, মেলিউজ্জৈয়েভো-বাসীদের তিরস্কার করছেন তাদের বিশৃঙ্খলার জন্য, বলশেভিকদের বিভেদ-সৃষ্টিকারী প্রভাবের কাছে নিজেদের ছেড়ে দেওয়ার জন্য, এই ব’লে বোঝাচ্ছেন যে বলশেভিকরাই হ’লো জ্বাবুশিনোর বিশৃঙ্খলার আসল হোতা। মেয়রের আপিশে যে-উদ্দীপনা নিয়ে বলছিলেন, এখানেও ঠিক তেমনিভাবেই তিনি সকলকে মনে করিয়ে দিচ্ছেন শত্রুর শক্তি ও নিষ্ঠুরতার কথা, দেশের সংকটের কথা। তাকে উগ্রাক্ত ক’রে তোলার জন্য জনতা নানা প্রশ্ন করতে লাগলো।

বক্তাকে বাধা না-দেবার অনুরোধের সঙ্গে পালা ক'রে শুরু হ'লো প্রতিবাদের চীৎকার। প্রতিবাদ ক্রমেই সজোর এবং ক্রততর হ'চ্ছিলো। একজন, যিনি গিন্জের সঙ্গে এসে সভাপতির আসন গ্রহণ করেছিলেন, চীৎকার ক'রে বললেন যে শ্রোতাদের বক্তৃতা করা রীতিবিরুদ্ধ এবং জনসাধারণকে তিনি শাস্তিরকার অনুরোধ জানাচ্ছেন। কয়েকজন জোর দিয়ে বললো যে একজন নাগরিকা বক্তৃতা দিতে ইচ্ছুক, তাকে বলতে দেওয়া হোক, অন্যেরা সবাইকে চুপ করতে বললো।

একজন খ্রীলোক ভিডের মধ্য দিয়ে পথ ক'রে যে-কাঠের পাটাতনটা মঞ্চের কাজ করছিলো তার দিকে এগিয়ে গেলো। মঞ্চে ওঠার চেষ্টা না-ক'রে এক পাশে দাঁড়ালো সে। খ্রীলোকটি সকলের পরিচিত। জনতা নীরব হ'য়ে গেলো। মনোযোগ নিবদ্ধ হ'লো তাদের। খ্রীলোকটি উস্টিনিয়া।

'আপনি জ্বাবুশিনো বিষয়ে বলছিলেন, কমরেড কমিসার,' সে শুরু করলো, 'আর বলছিলেন সাবধানতার কথা, আমাদের সাবধানে থাকতে বলছিলেন, বলছিলেন যেন আমাদের কেউ ঠকাতে না পারে, কিন্তু প্রকৃতপক্ষে, আপনি নিজে—আমি যা শুনলাম, আপনি জানেন শুধু "বলশেভিক-মেনশেভিক" এই সব শব্দ নিয়ে খেলা করতে, কেবল বলেন, বলশেভিক আর মেনশেভিক। এই যে আর যুদ্ধ না-করা আর ভাই-ভাই রব, একে আমি মেনশেভিক বলি না, বলি স্বর্গীয়, আর সমস্ত কল-কারখানা দরিরের হাতে যাওয়ার কথা—সেটাও বলশেভিক নয়, সেটা মনুষ্যত্ব, প্রেম, দয়া। আর সেই মুক-বধিরের কথা—তার বিষয়ে আপনার সাহায্য বিনাই আমরা অনেক শুনেছি। ঐ এক মুক-বধিরকে নিয়েই সবাই কথা ব'লে চলে। তার বিরুদ্ধে আপনারদের আপত্তিটা কী? সে চিরকাল বোবা থেকে হঠাৎ আপনারদের বিনা অনুমতিতেই কথা বলতে শুরু করলো—আপত্তিটা কি এই? কী হয়েছে কী তাতে? কী এমন আশ্চর্য ঘটনা এটা? এর চেয়ে ঢের বেশি বিস্ময়কর ঘটনা ঘটেছে ব'লে জানা যায়। সেই বিখ্যাত গর্দভীর কথাই ধরুন না কেন। সে বলে কিনা, "বালাম, বালাম, আমার কথা শোনো, আমি সোজাসুজি ব'লে দিচ্ছি, তুমি ও-পথে যেয়ো না, পরে পস্তাতে হবে।" তা—যার যা স্বভাব, তার কথা না-শুনে সে চলতেই থাকলো। আপনার মতোই সেও ভাবলে: "একটা বোবা-কালো।" "ওর কথা শুনে কী হবে? ও তো মাত্র একটা গর্দভী, বোবা জানোয়ার।" আর পরে কী দুঃখটাই না ভোগ করতে হ'লো সেজন্য। আপনারা সকলেই জানেন তার পরিণতির কথা।'

'কী?' কয়েকজন কৌতূহলী হ'য়ে জিজ্ঞেস করলো।

'ঐ যথেষ্ট,' উস্টিনিয়া ঝটকা মেরে ব'লে ওঠে, 'অতো বেশি প্রশ্ন করলে অকালে বুড়িয়ে যাবে তোমরা।'

'না, না, তা চলবে না। তুমি বলো আমাদের!' ভিডের মধ্য থেকে একজন জ্বরদন্তি করে।

'ঠিক আছে, ঠিক আছে—কী—কেন—কেমন ক'রে—যতো সব লেস্টে-থাকা ছুটো। লবণস্তম্ভে পরিণত হ'য়েছিলো সে।'

'ভুল করছো, সোনাগি, ভুল করছো, এ তো লট। এ তো লটের বৌ,' লোকেরা চীৎকার করতে লাগলো। প্রত্যেকে হেসে উঠলো। সভাপতি সভায় শৃঙ্খলারকার অনুরোধ জানালেন। শুতে গেলো ইউরি।

১ ওল্ড টেস্টামেন্টে কথিত আছে, এক গর্দভী তার প্রভু বালামকে পিঠে নিয়ে পথে যেতে-যেতে সামনে এক দেবদূতকে দেখতে পেয়ে চলা থামিয়ে দেয়, আর দিব্যদৃষ্টিহীন বালাম তার জন্য গর্দভীকে তিনবার প্রহার করে। সেই থেকে 'বালাম' শব্দটির অর্থ দাঁড়িয়ে গেছে অসাধু বক্তৃতা বা প্রবক্তা—অনুবাদের টীকা।

পরের দিন সন্ধ্যায় সে লারার সঙ্গে দেখা করলো। তাকে পেলো ভাঁড়ার ঘরে; কাপড় কাচার কল থেকে সদ্য-তোলা তুপীকৃত কাপড় তার সামনে প'ড়ে আছে; ইত্রি কমছিলো সে।

ওপর তলার পেছনদিকের যে-ঘরগুলি থেকে বাগান দেখা যায় তার একটাতে হ'লো ভাঁড়ার ঘর। সামোভার প্রস্তুত, খাবার-দাবার সাজানো, সর্বদা ব্যবহারের স্ট্রেটগুলি তুপ ক'রে রাখা—হাতে চালানো, চাকরদের লিফটে ক'রে সেগুলো বাসন মাজার লোকের কাছে যাবে। সেখানেও থাকে বাসনপত্র, স্ট্রেট আর গেলাশের ফর্দ দেখে-দেখে মিলিয়ে নেওয়া হয়, লোকেরা সেখানে অবসরযাপন করে আর পূর্বনির্ধারিত সময়ে পরস্পরের সঙ্গে মিলিত হয়।

জানলাগুলি খোলা ছিলো। ঘরে, পুরোনো বাগানে যেমন হ'য়ে থাকে, তেমন সেখানে মিশেছিলো লেবুফলের আর শুকনো কাকির জীরের মতো কড়া গন্ধ, আর তার সঙ্গে যুক্ত হয়েছিলো লারা যে-দুটো লোহার ইত্রি ব্যবহার করছিলো, তার কাঠকয়লার ধোয়ার গন্ধ—পালা ক'রে লারা ইত্রি দুটো আগুনের ওপব গরম হবার জন্য রাখছিলো।

‘এই যে, কাল রাতে দরজায় টোকা দিলেন না কেন? মাদমোয়াজেল আমাকে বললেন। অবশ্য সত্যি বলতে কী ঠিকই করেছিলেন। আপনাকে ঘরে ঢুকতে দিতে পারতাম না, আমি প্রায় তক্ষুনি শুয়ে পড়েছিলাম। যাক, আছেন কেমন? কাঠকয়লার দিকে নজর রাখবেন, জামায় দাগ না লাগে।’

‘আপনাকে দেখে মনে হচ্ছে সারা হাসপাতালের কাপড় ইত্রি করছেন।’

‘না, এর মধ্যে আমার নিজের অনেক আছে। দেখুন না, আপনি তো আমাকে মেলিউজ্জৈয়েভোতে আটকে গেছি ব'লে খাপান। এবার কিন্তু সত্যিই ঠিক ক'রে ফেলছি, আমি চলে যাচ্ছি। কাপড়-চোপড় কেচে নিয়েছি, জিনিসপত্র গুছিয়ে ফেলবো এবারে। সব শেষ হ'লেই রওনা হ'য়ে পড়বো। আমি থাকবো উরানে, আর আপনি মস্কোতে। কোনোদিন হয়তো কেউ জিজ্ঞেস করবে আপনাকে: “মেলিউজ্জৈয়েভো নামে একটা ছোট্টো শহরের কথা জানান?”—“না, আমার তো ঠিক মনে পড়ছে না।”—“আস্টিপভা কে?”—“জীবনেও নাম শুনিনি”।

‘তা হ'তে পারে। যাতায়াতে আপনার কোনো কষ্ট হয়নি তো? গ্রামের অবস্থা কেমন দেখলেন?’

‘সে অনেক কথা।—হা কপাল, কী ভাড়াভাড়ি ঠাণ্ডা হ'য়ে যায় ইত্রি। অন্যটা আমাকে একটু দিন না, কিছু যদি মনে না করেন। এ যে ওখানে, ঠিক উনুনের ওপর। আর এটা একটু বেখে দেবেন ওখানে? ধন্যবাদ।—প্রত্যেকটি গ্রামের ধরন-ধারণ আলাদা—লোকেরাও তো একরকম নয়। কোথাও-কোথাও লোকজন বেশ পরিশ্রমী, খুব খাটে, সেখানে অবস্থা ততো খারাপ নয়। অন্যান্য জায়গায় মনে হয় সবাই মাতাল, সে-সব জায়গা জনশূন্য এবং ভয়াবহ।’

‘যতো বাজে!—মাতাল হ'তে যাবে কেন? খুব বোঝেন আপনি! সে-সব জায়গায় কেউ নেই, সবাই যুদ্ধে গেছে। নতুন পরিষদের কী হ'লো, বিপ্লবী পরিষদ?’

‘মাতালদের বিষয়ে আপনি ভুল বললেন, তবে এ নিয়ে আমরা পরে তর্ক করবো। পরিষদ? তা নিয়ে অনেক কামেলা হবে। কোনো নির্দেশই কাজে খাটানো যায় না, কাজ করবার লোকই নেই কেউ। চাবিরা তো এখন শুধু বোকে জমিজমা। রাজডলনয়ে-তে গিয়েছিলাম। কী সুন্দর জায়গা! আপনার একবার গিয়ে দেখে আসা উচিত। গত বসন্তে জায়গাটা পোড়ানো হয়েছিলো, লুটতরাজও হয়েছে অকল্পিত, খামারটা পুড়ে গেছে, বলসে গেছে ফলের গাছগুলো, জমিদার-বাড়ির সামনের অংশটা নষ্ট হ'য়ে গেছে ধোয়ার। জাবুশিনো আমি দেখিনি, যাইনি

ওখানে। কিন্তু সবাই বলে যে ঐ মুক-বধিরের সত্যিই নাকি অস্তিত্ব আছে। সে কেমন দেখতে তা-ও বলে, বয়স নাকি অল্প, শিক্ষিত।’

‘কাল রাত্রে পার্কে উস্টিনিয়া ওর পক্ষ নিয়ে তর্ক করেছে।’

‘ফিবে এসেই দেখি রাজডলনয়ে থেকে আবার একগাদা জিনিস এসেছে। কতোবার যে এ-সব বাদ দিতে বলেছি তার ঠিক নেই। যেন আমাদের নিজেরের কিছু নেই। আর আজ সকালে মেয়রের আপিশ থেকে দরোয়ান এলো চিঠি নিয়ে—কপোব চায়ের সেট আর কাটা-কাচের গেলাশগুলো এক্ষুনি চাই, জীবন-মরণ সমস্যা নাকি—মাত্র এক রাত্রেব জন্য, তারপর ফেরৎ পাঠিয়ে দেবে। অর্থেক জিনিস আর জীবনেও চোখে দেখবো না। সব সময়েই বলে ধার—কেমন ধার তা আমি জানি। কোন এক অতিথি না কাব জন্য ওদের ওখানে পাঠি হচ্ছে।’

‘কার জন্য আন্দাজ করতে পারছি। আমাদের এখানকার যুদ্ধক্ষেত্রে আঞ্চলিক শাখার নতুন কমিসার এসে পৌঁচেছেন। যারা যুদ্ধ থেকে পালিয়েছে তাদের এবার ঘাঁটাতে চায় এরা, ওদের ঘিরে ফেলে নিরস্ত্র করবে। কমিসারটি একেবারে কোলের শিশু। এখানে সবাই চাচ্ছে কসাকদের ডাকতে, কিন্তু তিনি বলেন, না, উনি তাদের হৃদয়কে জাগিয়ে তুলবেন। জনসাধারণ নাকি শিশুর মতো—এই সব আরো কতো কী যে বলেন, মনে করেন এ-সব ছেলেখেলা। গালিউলিন ওর সঙ্গে তর্ক করার চেষ্টা করেছিলো। বলেছিলো, “আগুন হাত দিয়ে না। আমাদের নিজেরের ধরনে এ-সব ব্যাপারের মীমাংসা করতে দাও।” কিন্তু এ-সমস্ত লোকের মাথায় একটা কথা ঢুকলে আর কিছুতেই কিছু করা যায় না তো! —আমি চাই আপনি আমার কথায় একটু কান দেন। দয়া ক’রে ইত্বিটা থামান এক মিনিটের জন্য। শিগগির এখানে খুব বিস্ত্রী গোলমাল শুরু হবে, সেটা থামানো আমাদের ক্ষমতার বাইরে। আমার খুব হচ্ছে—আপনি তার আগেই এখান থেকে চ’লে যান।’

‘কিছুই হবে না, আপনি বাড়িয়ে বলছেন। আর তাছাড়া, আমি তো চ’লেই যাচ্ছি। কিন্তু আমি তো ভুড়ি মেরে চ’লে যেতে পারি না। কাজ বুঝিয়ে দিয়ে যেতে হবে ঠিকমতো, জিনিসপত্রের ফর্দ মিলিয়ে দিতে হবে। কিছু চুরি ক’রে যেন পালিয়ে যাচ্ছি এমনভাবে যেতে চাইনে। আর কাজের ভার নেবে কে? সেটাই তো সমস্যা। এই জঘন্য ফর্দ নিয়ে আমাকে যে কী করতে হয়েছে তা আপনাকে বোঝাতে পারবো না। আর তার জন্য ধন্যবাদ হিসেবে আমাকে বলা হয় যে আমি জোচ্ছোরি করেছি। জ্ঞাত্রিনস্কায়ার জিনিসপত্র সব আমি হাসপাতালের নামে রেজিস্ট্রি করিয়ে নিয়েছিলাম, কারণ ডিক্রির মানেই তা-ই। এখন ওরা বলছে যে সেটা জাল, আমি নাকি মালিকের জন্য সব জিনিসপত্র রেখে দিতে চাই। অসহ্য!’

‘দয়া ক’রে বাসন-কোসন আর ন্যাকড়া-কানির চিন্তা বন্ধ করুন। চুলোয় যাক ও-সব, এরকম একটা সময়ে মাথা ঘামাবার কী একটা বিষয়! ওঃ, কাল আপনার সঙ্গে দেখা হ’লো না কেন? এমন ভালো মেজাজ ছিলো কাল, পার্থিব এবং অপার্থিব যে কোনো বিষয় আমি বুঝিয়ে দিতে পারতাম, যে-কোনো প্রশ্নের আমার জবাব তৈরি ছিলো। সত্যি, ঠাট্টা করছি না, কথাগুলো বের ক’রে দেবার জন্য গলা চুলকোচ্ছিলো আমার। আপনাকে আমি আমার স্ত্রীর কথা, আমার ছেলের, আমার নিজের কথা বলতে চাইছিলাম...কোন পাপে একজন পরিণতবয়স্ক পুরুষ একজন পরিণতবয়স্ক মহিলার সঙ্গে কথা বললেই কোনো পরোক্ষ উদ্দেশ্য আছে বলে সন্দেহ করা হয়? গোপ্নায় যাক উদ্দেশ্য—পরোক্ষই হোক আর যা-ই হোক। আপনি ইত্বি ক’রে চলুন, আমার দিকে মনোযোগ দেবেন না, আমি কথা ব’লে যাবো। আমি এখন অনেকক্ষণ ধ’রে কথা বলবো ঠিক করেছি।

‘কী সব হচ্ছে আজকাল ভাবুন। আর আপনি আমি কিনা এই যুগেই ঝেঁচে আছি! কী

অশ্রুতপূর্ব সব ব্যাপার ঘটছে বুঝতে পারেন? অনন্তকালের মধ্যে মাত্র একবারই এমন ব্যাপার ঘটে। একবার ভাবুন, সারা রাশিয়ার মূল উপড়ে আসছে, আপনি আর আমি আর প্রত্যেকে খোলা আকাশের তলায় এসে দাঁড়িয়েছি। আমাদের ওপর গুপ্তচরবৃত্তি করার কেউ নেই।—মুক্ত আমরা—যুক্তিতে নয়, কথায় নয়—সত্যকার মুক্তি, এ-মুক্তি আকাশ থেকে ঝরে পড়েছে, এ-মুক্তি আমাদের আশার অতীত। কোনো আকস্মিক কারণে, কোনো ভুল-বোঝাবুঝির ফলে এই মুক্তি এসেছে।

‘কী প্রকাণ্ড হ’য়ে উঠেছে সকলে, আর নিজের আকার নিয়ে কী বিব্রত। লক্ষ্য করেছেন আপনি? যেন নিজেকে নিয়ে, নিজের মহত্বের উদ্ঘাটনে অভিভূত।

‘আপনি ইত্বি ক’রে চলুন না, কথা বলবেন না। আপনার খারাপ লাগছে না আমার কথা শুনতে। দিন, আপনার ইত্বিটা বদল ক’রে দিই।

‘কাল রাতে পার্কের সভা লক্ষ্য করছিলাম। বিস্ময়কর দৃশ্য। দেশমাতৃকা ন’ড়ে উঠেছেন, চূপ ক’রে দাঁড়াতে পারছেন না তিনি, তিনি অস্থির, তিনি বিশ্রাম পাচ্ছেন না, কথা বলছেন, থামতে পারছেন না। শুধু যে মানুষেরাই কথা বলছে এমন নয়। আকাশের তারা আর গাছ মিলিত হ’য়ে কথা বলে, ফুলেরা রাতে দর্শন আওড়ায়, পাথরের বাড়িরা সভা ডাকে। মনে হয় না যেন বাইবেলের পাতা থেকে উঠে এসেছে এ-সব? সেই সন্তদের কালের মতো। সন্ত পলের মতো—মনে পড়ে আপনার? “তোমার রসনা বাণী পাবে, তুমি হবে প্রবক্তা। উপলব্ধির শক্তির জন্য প্রার্থনা করো।”

‘আকাশের তারা আর গাছদের সভা ডাকার কথা ব’লে আপনি যা বলতে চাইছেন বুঝতে পারছি। আমারও হয়েছে ও-রকম।’

‘আংশিকভাবে যুদ্ধ এর জন্য দায়ী, বাকিটা করেছে বিপ্লব। যুদ্ধ এক কৃত্রিম ভাঙন আনলো জীবনে—মনে হ’লো জীবনকে যেন কিছু সময়ের জন্য ঠেকিয়ে রাখা যাবে। সেটা বড়ো বিত্বী। ইচ্ছেয় হোক অনিচ্ছায় হোক দীর্ঘকাল চেপে-রাখা নিষ্বাসের মতো বিদ্রোহ জেগে উঠলো, সবাই আবার সঞ্জীবিত হ’লো, নতুন জন্ম নিলো, বদলে গেলো, রূপান্তর এলো তাদের জীবনে। বলতে পারেন দু’বার বিপ্লবের মধ্য দিয়ে গেছে সকলে, যে যার ব্যক্তিগত বিপ্লব, আর সাধারণ বিপ্লব। সমাজতন্ত্রকে আমার মনে হয় সমুদ্রের মতো—জীবনের সমুদ্র, নিজের অধিকারে প্রতিষ্ঠিত জীবন, আর এই সব আলাদা-আলাদা, একান্ত আপন, ব্যক্তিগত বিদ্রোহের স্রোত গিয়ে সেই সমুদ্রে মিশেছে। জীবন বলতে আমি যে-জীবন বোঝাতে চাইছি তা পাওয়া যায় শিল্পে, প্রতিভার দ্বারা যা রূপান্তরিত, সৃষ্টিশীলতায় যা ঐশ্বর্যশালী। কেবল এখনই লোকেরা স্থির করেছে যে বইয়ে নয়, ছবিতে নয়, নিজেদের মধ্যে, কথায় নয়, কাজে—এই জীবনের অভিজ্ঞতা অর্জন করবে।’

তার গলা হঠাৎ কেঁপে উঠলো, বোঝা গেলো ক্রমশ উত্তেজিত হ’য়ে উঠছে সে। ইত্বি থামিয়ে লারা গস্তীর, বিস্মিত চোখে তার দিকে তাকালো। তাতে সব গোলমাল হ’য়ে গেলো ইউরির, ভুলে গেলো কী বলছিলো। এক মুহূর্তের অস্বস্তিকর নীরবতার পর সে আবার শুক, কবলো, যা মনে এলো, কিছু না-ভাবে তাই ব’লে গেলো।

‘সাধু ও সৃষ্টিশীল জীবনের জন্য আজকাল আমার এমন আকাঙ্ক্ষা জাগে যে কী বলবো। আমিও চাই এই পরিবর্তনের অংশ হ’তে। কিন্তু তারপর, এই সাধারণ আনন্দের মাঝখানে, আপনার রহস্যময়, বিচ্ছিন্ন, অনামনস্ক দৃষ্টির মুখোমুখি এসে দাঁড়াই, কে জানে কোন মন্ত্রমুগ্ধ ভগতে সে-দৃষ্টি ঘুরে বেড়াচ্ছে। এই দৃষ্টিকে বদলে দেবার জন্য আমি যথাসর্ব্ব দিয়ে দিতে পারি—আমি চাই আপনার মুখ আমাকে বলুক যে আপনি ভালো আছেন, আপনার জীবন নিয়ে আপনি সুখী, কারো কাছে কিছু চাইবার প্রয়োজন নেই আপনার। আপনার সত্যকার আপনজন

কেউ আসুক, আপনার বন্ধু অথবা স্বামী—সবচেয়ে ভালো হয় সে সৈনিক হ'লে—কেউ আসুক, আমার হাতে হাত রেখে বলুক যে আপনার ভাগ্য নিয়ে আমার বিব্রত হবার কোনো দরকার নেই—বলুক আমাকে আপনার ভাবনা ছেড়ে দিতে। তবে অবশ্য, আমি তাকে ঘৃণা মেরে কাৎ করে দিতাম। দুঃখিত, একথাটা আমি বলতে চাইনি।'

তার গলার স্বর আবার তাকে ধরিয়ে দিলে। মাথা ঝাঁকালো সে, নৈরাশ্য—ভরা অস্বস্তির অনুভূতি নিয়ে জানলার ধারে গিয়ে দাঁড়ালো। জানলার তাকে ভর দিয়ে, অন্যান্যনক্স, অস্থি, দৃষ্টিহীন চোখে অন্ধকারে আচ্ছন্ন বাগানের দিকে তাকিয়ে নিজেকে সংযত করার চেষ্টা করলো।

ইন্ডির তক্তার পাশ দিয়ে ঘুরে এলো লারা (টেবিলের ধারে আর অন্য জানলার তাকে সেটা দাঁড় করানো ছিলো), ইউরি সেখান থেকে একটু দূরে ঘরের মাঝখানে এসে দাঁড়ালো।

'এই ভয়ই আমি করছিলাম,' নরম গলায়, যেন নিজের মনে সে বললে। 'আমার উচিত হয়নি... না, ইউরি আন্দ্রেইয়েভিচ, আপনি এমন করবেন না। ওঃ, দেখুন একবার, আপনার জন্য আমি কী কাণ্ড বাধালাম!' তক্তার কাছে ছুটে গেলো সে, একটা ব্রাউজ পুড়ে গেছে, তীর্থ গন্ধ নিয়ে সর্ক ধোয়ার সুতো বেরিয়ে আসছে ইন্ডির তলা থেকে।

'ইউরি আন্দ্রেইয়েভিচ,' ইন্ডিকে কাঠের ওপর ঘষতে-ঘষতে ব'লে চললো সে, 'মাথা ঠাণ্ডা করুন, একবার মাদমোয়াজেলের কাছে গিয়ে একটু জল খেয়ে আসুন, লক্ষ্মীটি, আপনি সেই আপনি হোন থাকে আমি এতোদিন পর্যন্ত জেনে এসেছি, আমি আপনাকে যে-রকম চাই, তা-ই হোন। শুনছেন ইউরি আন্দ্রেইয়েভিচ? আমি জানি, আপনি তা পারেন। আমার কথা রাখুন, আমি মিনতি করছি।'

এখনের আলাপ আর হয়নি তাদের মধ্যে; এর এক সপ্তাহ পরে লারা রওনা হ'য়ে গেলো।

৯

জিভাগোও রওনা হ'লো,—আরো কিছুদিন পরে। তার যাবার আগের দিন রাতে ভীষণ ঝড় হ'লো। মিশে গেলো ঝড় আর জলধারার শব্দ; কখনো সোজা ছাদের ওপর ভেঙে পড়ছিলো বৃষ্টি, কখনো বা হাওয়ায় গতির বদলের সঙ্গে-সঙ্গে প্রতি পদক্ষেপে যেন চাবুক মারতে-মারতে দূরন্ত বেগে ছুটে যাচ্ছিলো রাস্তার ওপর দিয়ে।

বিরামহীনভাবে একের পর এক বজ্রনাদ হচ্ছিলো, মিশে গিয়েছিলো নিয়মিত এক গর্জনে। বিদ্যুতের আলোয় যেন দূরে ছিটকে পড়ছিলো পথঘাট তাদের ঝাঁকচোরা গাছগুলিকে বৃকে নিয়ে।

সদর দরজায় সজোর ধাক্কা শুনে ঘুম ভেঙে গিয়েছিলো মাদমোয়াজেল ফ্লোরির। ত্র্যস্ত হ'য়ে উঠে ব'সে তিনি কান পাতলেন। ধাক্কার আওয়াজ চলতেই লাগলো।

হাসপাতালে কি উঠে গিয়ে দরজা খুলে দেবার মতো একজন মানুষও নেই, মাদমোয়াজেল ভাবলেন। তাঁর স্বভাব সং কর্তব্যপরায়ণ ব'লে কি তাঁকেই সব করতে হবে, তাঁর মতো একজন বৃদ্ধাকে?

বৃদ্ধা, জীবনিকিরা ধনী এবং অভিজাত ছিলেন, বাড়িটাও তাঁদের, কিন্তু হাসপাতালেও বেলায় কী, সেটা কি জনসাধারণের নয়, একান্ত আপন নয় কি তাদের? কে এই হাসপাতাল? দেখবে ব'লে তাঁরা আশা করেন? পুরুষ নার্সরা সব কোথায় উধাও হ'লো শুনি? সবাই পালিয়েছে—আদালি নেই, নার্স নেই, ডাক্তার নেই, দায়িত্বসম্পন্ন কেউ নেই। অথচ আহতরা এখনো আছে বাড়িতে; সার্জিকাল ওয়ার্ডে, আগে যেখানে ড্রয়িংরুম ছিলো, প'ড়ে আছে দু'জন পা-কাটা লোক, আর নিচের তলায় ধোপাখানার পাশে ভাঁড়ার ঘরটা তো আমাশার রোগীও

ভঁরা। আর এই হতচ্ছাড়ি উস্টিনিয়া আবার পরিদর্শনে বেরিয়েছে। ঝড় যে হবে তা নিশ্চয় খুব ভালো ক'রেই জানতো সে, কিন্তু তাতে কি যাওয়া রদ হ'লো তার? অচেনা লোকদের সঙ্গে বাত কাটানোর জন্য একটা খুব ভালো অজুহাত জুটলো।

যাক, ভগবানকে অনেক ধন্যবাদ যে দরজার ধাক্কা থেমেছে, বুঝেছে কেউ জবাব দেবে না, তাই দ'মে গিয়ে চ'লে গেছে। এই ঝড়বৃষ্টিতে লোকে বেরোয় কেন...না কি উস্টিনিয়া? না, তাব তো নিজের চাবি আছে।—হা ভগবান, আবার শুরু করেছে, এ যে রীতিমতো ভয়ের ব্যাপার।

কিন্তু কী শৃঙ্গার সব ক'টা। অবশ্য জিভাগো কিছু শুনতে পাবে এমন আশা করা যায় না, কাল সে রওনা হবে, তাব মন এখন চ'লে গেছে মস্কোতে অথবা মস্কোর পথে। কিন্তু গালিউলিন তো আছে। এই গোলমালের মধ্যেও নাক ডাকতে পারছে কী ক'রে? না কি এই ভরসায় জেগে-জেগে শুয়ে আছে যে শেষ পর্যন্ত আমিই উঠে পড়বো? দুর্বল, সহায়হীন এক ক্রীলোকের ওপর ভরসা ক'রে আছে—তিনি উঠে নিচে গিয়ে এই ভীষণ রাত্রে, এই ভীষণ দেশে, কাকে না কাকে দবজা খুলে দেবেন।

গালিউলিন!—হঠাৎ তাঁর মনে প'ড়ে গেলো। আচ্ছা কাণ্ড—গালিউলিন! কী ভাবছিলেন তিনি, নিশ্চয়ই ঘুমের ঘোর কাটে নি তাঁর। গালিউলিন তো নেই, এতোকক্ষণে বছদরে চ'লে গেছে সে। বিরিউচি স্টেশনের সেই বীভৎস হত্যাকাণ্ডের পর—যখন কমিসার গিনৎজকে খুন করার পর গালিউলিনকে ওরা বিবিউচি থেকে মেলিউজ্জেইয়েভো পর্যন্ত সারা পথ তাড়া ক'রে এলো—গুলি ছুঁড়লো, তারপর অতিপাতি ক'বে ঝুজলো সারা শহর—সেই কাণ্ডটি ঘ'টে যাবার পব তিনি নিজেই তো জিভাগোর সঙ্গে মিলে গালিউলিনকে সিভিলিয়ানের ছদ্মবেশে সাজিয়ে সমস্ত অঞ্চলটার প্রত্যেকটি পথ আর গ্রামের ঠিকানা বাৎলে দিয়েছেন, যাতে পালাবার উপায় জানা থাকে তার।

মেলিউজ্জেইয়েভোতে ভাগ্যিস মোটরগাড়ি ছিলো, নয়তো একটা পাথরও আস্ত থাকতো না। একটা সশস্ত্র বাহিনী এই পথ দিয়ে যাচ্ছিলো, নগর-রক্ষার্থে থেমে পড়েছিলো এখানে—ঐ সব বদমাসগুলোকে শায়েস্তা করেছিলো।

ঝড়ের বেগ ক'মে এলো। অতো ঘন-ঘন আর বাজ পড়ছে না—অনেক দূর থেকে, অনেক দীর্ঘে ভেসে আসছে। মাঝে-মাঝে থেমে যাচ্ছে বৃষ্টি, গাছের পাতা আর নর্দমা বেয়ে জল ক'রে পড়ার শব্দ শোনা যাচ্ছে তখন। নিঃশব্দ বিদ্যুতের আলো ঢুকে পড়ছে মাদমোয়াজেলের ঘরে, যেন কিছু ঝুজছে ব'লে সেই আলো মিলিয়ে যেতে দেয়ি করছে।

হঠাৎ, সামনের দরজার ধাক্কা এতোকক্ষণ থেমে থাকার পর, আবার শুরু হ'লো। কারো ভয়ানক প্রয়োজন সাহায্যের, মরীয়া হ'য়ে ক্রমাগত ধাক্কা দিয়ে চলেছে। আবার বইছে ঝোড়ো বাতাস, বৃষ্টিও শুরু হ'য়ে গেলো।

'যাই!' যেই হোক না কেন, মাদমোয়াজেল চীৎকার ক'রে সাড়া দিলেন, তাঁর নিজের গলার আওয়াজে নিজেরই ভয় করলো তাঁর।

কে হ'তে পারে, হঠাৎ খেয়াল হ'লো। উঠে ব'সে পায়ে চাঁট গলিয়ে ড্রেসিং গাউনটা গায়ে জড়িয়ে নিয়ে তাড়াতাড়ি জিভাগোকে তোলবার জন্য এগিয়ে গেলেন; তার সঙ্গে গেলে ভয় কববে না। কিন্তু সেও শব্দ শুনতে পেয়ে মোমবাতি হাতে নেমে আসছিলো। তাদের দু'জনের একই কথা মনে হয়েছে।

'জিভাগো, জিভাগো, ওরা সামনেব দবজায় ধাক্কাচ্ছে, একা যেতে ভয় করছে আমার,' ফলসীতে চীৎকার কবলেন মাদমোয়াজেল, তারপব ক্রশ ভাষায় যোগ করলেন, 'দেখবেন, হয় লাবা কিংবা লেফটেনান্ট গাইউল।

শব্দ শুনে জেগে উঠে ইউরিরও মনে হয়েছিলো নিশ্চয়ই তার পরিচিত কেউ। হয় গালিউলিন পালাতে না-পেরে আশ্রয়ের জন্য ফিরে এসেছে, নম্রতো নার্স আন্টিপভা, যাওয়ার পথে বাধা পেয়ে আবার চ'লে এসেছে তার কাছে।

বারান্দায় পৌঁছে মাদমোয়াজেলকে মোমবাতিটা দিয়ে ইউরি ছিটকিনি নামিয়ে চাবি ঘোরালো। এক বলক বাতাসের ধাক্কা খেয়ে খুলে গেলো দরজা, মোমবাতিটা নিভে গেলো, ঠাণ্ডা বৃষ্টির ফোঁটা ঝ'রে পড়লো তাদের ওপর।

‘কে? কে? এখানে কেউ আছে? অঙ্ককারে মুখ বাড়িয়ে একবার মাদমোয়াজেল, একবার ডাক্তার চীৎকার করতে লাগলেন, কিন্তু কোনো উত্তর এলো না। হঠাৎ অন্য এক জায়গায় ধাক্কা শুরু হ'লো—পেছনের দরজায় না কি—তাদের এখন মনে হতে লাগলো—বাগানের ফরাসী জানলার দিকে?’

‘মনে হচ্ছে বাতাস,’ ডাক্তার বললেন। ‘কিন্তু তবু নিশ্চিত হবার জন্য একবার বরং পেছন দিকটা দেখে আসুন। আমি এখানে থাকি, যদিই বা কেউ আসে।’

মাদমোয়াজেল অদৃশ্য হলেন বাড়ির ভেতর। আর ডাক্তার বাইরে গিয়ে বারান্দার ছাদের তলায় দাঁড়ালেন। অঙ্ককারে অভ্যস্ত হ'য়ে গিয়েছিলো তাঁর চোখ, ভোরের প্রথম আভাস লক্ষ্য করলেন তিনি।

শহরের মাথার ওপর দিয়ে মেঘের দল উন্মত্তের মতো ছুটেছে, যেন কেউ তাড়া করেছে তাদের, এতো নিচু যে প্রায় ঝুঁয়ে যাচ্ছে গাছের পাতা, আর গাছগুলি সেই একই দিকে এমনভাবে বেকে আছে যে মনে হচ্ছে তারা যেন ঝাঁটা, আকাশ পরিষ্কার করছে তারা। বৃষ্টির চাবুক খেয়ে-খেয়ে বাড়ির কাঠের দেয়ালের ছাই রং কালো হ'য়ে গেলো।

মাদমোয়াজেল ফিরে এলেন। ‘কী?’ ইউরি জিজ্ঞেস করলো।

‘আপনি ঠিকই বলেছিলেন। কেউ নেই।’ সমস্ত বাড়ি ঘুরে দেখেছেন তিনি; একটা গাছের ডাল ভাঁড়ার ঘরের জানলায় বাড়ি মেরে-মেরে একটা কাঁচ ভেঙে ফেলেছে, ঘরের মেঝে জলে কাদায় একাকার, যেটা আগে লারার ঘর ছিলো সেখানে এখন এক সমুদ্র সৃষ্টি হয়েছে, সত্যি-সত্যি সমুদ্র, এক মহাসাগর বলা যায়। ‘আর এদিকটায় দেখুন, একটা ভাঙা খড়খড়ি কপাটের ওপর ধাক্কা মারছে, দেখছেন? ব্যাপারটা আসলে এই।’

দু'একটা কথাবার্তার পর তারা ঘরে ফিরে গেলো, আতঙ্কটা ভিত্তিহীন প্রমাণ হওয়াতে দু'জনেই আশাহত হয়েছে।

তারা একেবারে নিশ্চিত ছিলো যে দরজা খুললেই হিমে জ'মে, আপাদ মস্তক ভিজ্জে, লারা ভেতরে ঢুকবে, সে যখন তার জিনিসপত্র নামাবে, তখন একের পর এক প্রশ্ন করবে তারা, সে জামা-কাপড় বদলে এসে বসবে রান্নাঘরের আগুনের সামনে, কাল রাতে জ্বালানো হ'লেও আজ পর্যন্ত যা তপ্ত আছে, নিজের শরীর গরম ক'রে নিতে-নিতে, কপালের চুল সরিয়ে, হেসে-হেসে সে তাদের বলবে তার অভিযানের গল্প।

তারা এতো নিশ্চিত ছিলো যে দরজা বন্ধ ক'রে দেবার পরেও তাদের বন্ধমূল ধারণার ছাপ থেকে গেলো রাস্তায়, রাস্তার মোড়ে—লারার জলে-ভেজা অশরীরী ছায়ার মতো, তার প্রতিচ্ছবির মতো, যা তখনো হানা দিতে থাকলো তাদের।

অনেকে ভাবতো যে বিরিউচি স্টেশনে যে-সব গোলমাল হয় তার জন্য পরোক্ষভাবে দায়ী বিরিউচির তারাবাবু, কোলিয়ায় ফ্রোলেঙ্কো।

কোলিয়ার বাবা মেলিউজ্জৈয়েভোতে ঘড়ি তৈরি করতেন, তার অতি শিশুকাল থেকে মেলিউজ্জৈয়েভোর সকলেই তাকে চেনে। মাদমোয়াজেল তাকে ভালো ক'রেই চিনতেন। কেননা ছেলেবেলায় কোলিয়া যখন রাজডলনয়ের চাকরদের সঙ্গে কিছুকাল কাটায়, তখন মাদমোয়াজেলের তত্ত্বাবধানে তাঁর দুই ছাত্রী, কাউন্টেসের কন্যাদের সঙ্গে খেলা করতো সে (সেই সময়েই সে ফরাসী কথা বুঝতে শেখে।)

সাইকেলের ওপর, গায়ে কোট বা মাথায় টুপি নেই, ক্যানভাসের তৈরি গ্রীষ্মের জুতো পায়। যে-কোনো ঋতুতে তার এই চেহারাটি সকলেরই চেনা হ'য়ে গিয়েছিলো। বৃক্কের ওপর দুই হাত ভাঁজ ক'রে রেখে হাতল না-ধ'রে সাইকেল চালিয়ে বিরিউচির রাস্তা ধ'রে যেতে-যেতে টেলিগ্রাফের তার আর ঝুটির অবস্থা পর্যবেক্ষণ করা ছিলো তার কাজ।

মেলিউজ্জৈয়েভোর যে-ক'টা বাড়িতে টেলিফোন ছিলো, শাখা-লাইন মারফৎ তাদের যুক্ত করা হয়েছিলো বিরিউচি স্টেশনের এক্সচেঞ্জের সঙ্গে। স্টেশন-আপিশে এই লাইনের ভার ছিলো কোলিয়ার ওপর। সেখানে আকষ্ট কাজে ডুবে থাকতে হ'তো তাকে, কারণ স্টেশনমাস্টার অনুপস্থিত থাকলে শুধু টেলিফোন আর টেলিগ্রাফই নয়, রেল-সিগনালের দায়িত্বও তারই ওপর পড়তো—সিগনালের ব্যবস্থা ছিলো ঐ একই ঘরে।

একই সঙ্গে অনেকগুলো যন্ত্রের দিকে নজর রাখতে হয় ব'লে কোলিয়ার কথা বলার এক বিশেষ ধরন হ'য়ে গিয়েছিলো; অস্পষ্ট, অসম্পূর্ণ, দুর্বোধ্য ভাষায় কথা বলতো সে, তাই ইচ্ছামতো পারতো কোনো কথার জবাব এড়িয়ে যেতে বা কোনো কথোপকথনে অংশ গ্রহণ না-করতে। গোলমালের দিন সে নাকি তার এই সুবিধেটারই অপব্যবহার করে।

আর এও সত্যি যে কোলিয়ার এই এড়িয়ে-যাওয়া স্বভাবের ফলে গালিউলিনের সব সদুদ্দেশ্য ব্যর্থ হ'য়ে গিয়েছিলো, নিজে না-বুঝে সমস্ত ব্যাপারটাকে কালান্তক ক'রে তুলেছিলো কোলিয়া।

শহর থেকে ফোন ক'রে গালিউলিন কমিসার গিন্জকে ডেকেছিলো, স্টেশনে অথবা স্টেশনের ঠিক বাইরে কোথাও তিনি ছিলেন, তাঁকে বলবে যে এক্ষুনি সে তাঁর কাছে যাচ্ছে। তিনি যেন অপেক্ষা করেন তার জন্য এবং সে না-পৌছনো পর্যন্ত কিছু যেন না করেন। এক্ষুনি পৌছবে এমন একটা ট্রেনকে সিগনাল করতে হবে ব'লে ব্যস্ত আছে, এই অভ্যুহাতে কোলিয়া গিন্জকে ডেকে দিতে রাজি হ'লো না। আবার সেই সঙ্গেই সত্যি-মিথ্যে নানা অভ্যুহাত দেখিয়ে ট্রেনটার দেরি করিয়ে দিতে লাগলো, যে-কসাকদের বিরিউচিতে ডাকা হয়েছে তারা আসছে ঐ গাড়িতে।

তবু যখন পন্টনেরা এসে পৌছলো, তখন কোলিয়া তার অসন্তুষ্টি চাপতে পারলো না।

স্টেশনের ছায়ায় হামাগুড়ি দিয়ে ঢুকে পড়ে কন্টোল-ক্রমের বিশাল জানলার ঠিক সামনে এসে এগুজনটা থামলো। হলুদ সুতোয় কোম্পানির নাম লেখা সবুজ সার্জের পর্দাটা সরিয়ে দিলে কোলিয়া, জানলার পাথরের তাকের ওপরকার মস্ত বড়ো ট্রে থেকে বিরাট জলের জগটা তুলে নিয়ে মসৃণ, ভারি মাটির গেলাশে জল ঢেলে কয়েক চুমুক জল খেলো, তারপর তাকালো বাইরে।

এগুজন-ড্রাইভার তার ঘর থেকে তাকে দেখতে পেয়ে বঙ্কভাবে মাথা নাড়লো।

'দুর্গন্ধ উকুন কাঁহাকার,' ঘণার সঙ্গে ভাবলে কোলিয়া। জিভ বের ক'রে ঘুবি দেখালো সে।

ড্রাইভার শুধু যে তার মনোভাব বুঝলো তা-ই নয়, কাঁধ ঝাকিয়ে, ট্রেনটা লক্ষ্য ক'রে মাথা নোড়ে প্রায় বুঝিয়েও দিলো। 'আমি কী করতে পারি? আমার অবস্থায় তুমি কী করতে দেখা যেতো! উনি হলেন মালিক।' 'তবুও—তুমি একটা নোংরা জানোয়ার,' কোলিয়াও অঙ্গভঙ্গি ক'রে জবাব দিলে।

অনিচ্ছুক, পেছিয়ে-পড়া ঘোড়াগুলিকে গাড়ি থেকে বের ক'রে নেওয়া হচ্ছিলো। কাঠের পাটাতনের ওপর তাদের খুরের আওয়াজ বেজে উঠছে পাথরের প্ল্যাটফর্মে। কয়েকটা লাইনের ওপর দিয়ে তাড়াতৈ-তাড়াতৈ নিয়ে যাওয়া হ'লো তাদের।

রেল-লাইন যেখানে শেষ হয়েছে সেখানে দুই সারি পরিত্যক্ত কাঠের কামরা প'ড়ে ছিলো। বৃষ্টিতে ধুয়ে গেছে তাদের রং, পোকায় কেটেছে, স্যাংস্যাং করছে ভেতরটা—তারা ফিরে যাচ্ছে বনবৃক্ষের সঙ্গে তাদের আদিম আশ্রয়তায়। আর সেই বন শুরু হয়েছে কামরাগুলির ঠিক পেছনেই, সেখানে শ্যাওলা আর বার্চ গাছের বন মাথার ওপর মেঘের মিনার নিয়ে দাঁড়িয়ে আছে।

স্টেশনের বাইরে কসাকেরা ঘোড়ার জিনে চ'ড়ে বসেছে—যুদ্ধ-পরিত্যাগীদের শিবির যাচ্ছে তারা।

বিদ্রোহীদের ঘিরে ফেলা হ'লো অল্প কিছুক্ষণের মধ্যেই। তাদের কুঁড়েতে রাইফেল থাকা সত্ত্বেও, অস্বারোহীদের দেখে তারা সম্ভ্রান্ত হয়ে উঠলো, বন-বাদাড়ের মধ্যে সব সময়ই যা হয়, লোকদের খোলা জায়গার চাইতে অনেক বেশি লক্ষ্য দেখাচ্ছিলো। কসাকেরা বের করলো তলোয়ার।

সেই চক্রের মধ্যে ঢুকে গিয়ে গিনৎজ একতৃপ কাঠের ওপর লাফিয়ে উঠলেন, ঘিরে-ফেলা মানুষগুলির উদ্দেশ্যে বক্তৃতা শুরু করলেন তিনি।

সৈনিকের কর্তব্য, মাতৃভূমির অর্থ এবং আরো অনেক উচ্চাঙ্গের বিষয়ে তিনি কথা বললেন। কিন্তু এই সব ধ্যান-ধারণা তাঁর শ্রোতাদের মন টানতে পারলো না। বড়ো বেশি উচ্চ স্তরের এ-সব। তারা বড্ড বেশি যুদ্ধ দেখে ফেলেছে, তারা ক্রান্ত, যুদ্ধ তাদের স্থূল ক'রে দিয়েছে। সব কথাই আগে শুনেছে তারা, মাসের পর মাস দক্ষিণ এবং বামপন্থী, উভয় পক্ষেরই তোষামুদে বিজ্ঞাপন শুনে-শুনে তারা অবিশ্বাসী হ'য়ে গেছে। আর তাছাড়া তারা হ'লো সাধারণ লোক, গিনৎজের বিদেশী নাম আর বস্তুিক উচ্চারণ তাদের ভালো লাগলো না।

গিনৎজ বুঝতে পারছিলেন যে তাঁর বক্তৃতা বড়ো বেশি লক্ষ্য হ'য়ে যাচ্ছে, নিজের ওপর রাগ হচ্ছিল, কিন্তু ভাবলেন ওরা যাতে তাকে স্পষ্টভাবে বুঝতে পারে তাই বক্তৃতাটার পুনরাবৃত্তি করা দরকার; কিন্তু যাদের উচিত ছিলো কৃতজ্ঞ হওয়া তাদের মুখে ক্রান্তি, অমনোযোগিতা বা বিরুদ্ধতা ছাড়া অন্য কোনো চিহ্ন দেখা যাচ্ছিলো না। ক্রমে ধৈর্য হারিয়ে ফেলে গিনৎজ ঠিক করলেন সোজাসুজি স্পষ্টভাষায় কথা ব'লে, এতোকণ্ণ পর্যন্ত যা করেননি, সেই ভয় দেখাবেন ওদের। শ্রোতাদের দিক থেকে যে-সব গুঞ্জন উঠেছিলো তাতে কান না-দিয়ে তিনি যুদ্ধ-পরিত্যাগীদের মনে করিয়ে দিলেন যে যুদ্ধ-বিদ্রোহীদের জন্য ট্রিবিউনাল খোলা হয়েছে, তাদের ওপর এই হুকুম জারি হয়েছে যে যার কাছে যা অস্ত্রশস্ত্র আছে ছেড়ে দিতে হবে, ধরিয়ে দিতে হবে নেতাদের, নয়তো মৃত্যুদণ্ডের ব্যবস্থা হবে। যদি তারা রাজি না হয় তাহ'লে অল্প মানে এই যে তারা খল, বিশ্বাসঘাতক, রাজনৈতিক অর্থে অচেতন, অহমিকার দ্বারা আচ্ছন্ন কতোগুলো ইতর লোক ছাড়া আর-কিছু নয়। কিন্তু এই ধরনের কথা শোনার অভ্যাস লোকগুলোর আর ছিলো না।

কয়েক শো গলা চীৎকার ক'রে উঠলো একসঙ্গে। তার মধ্যে কয়েকটি গলা নিচু, এমন কি তাতে রাগও নেই। 'ঠিক আছে, ঠিক আছে। এবার থামুন। ঢের হয়েছে।' কিন্তু অন্য কয়েকটি

আওয়াজে ঘুগায় তাঁক্ষ হ'য়ে উঠলো, তার শ্রোতা জুটতে দেরি হ'লো না। জোরালো হ'য়ে উঠলো পাগলের মতো চীৎকার:

'শোনো কমাবেডরা, কেমন গুল চালাচ্ছে দ্যাখো না! ঠিক আগেকার দিনের মতো। এখনো এই সব অফিসারদের চালাকি শেষ হয়নি! আমরা তাহ'লে বিশ্বাঘাতক, কী বলো! আর তুমি কী হে নবাবপুত্র? ওকে নিয়ে মাথাই বা ঘামাচ্ছি কেন! আরে বুঝতে পারছে না, নিশ্চয়ই জার্মান গোয়েন্দা, আমাদের বাপারে নাক গলাতে এসেছে। ওহে কুলীনের ছা—তোমার দলিলপত্র দেখাও দেখি!—হা ক'রে আছো কেন?' কসাকদের দিকে ফিরলো ওরা: 'শৃঙ্খলা ফিরিয়ে আনার জন্য এসেছো তোমরা, তাই করো তাহ'লে, আমাদের বেধে ফ্যালো, ঝামেলা চুকে যাক।'

কিন্তু গিনজের এই ভাগ্যহীন বক্তৃতা কসাকদের আরো বেশি খারাপ লাগছিলো। 'ওর কাছে আমরা সবাই শুয়োর,' বিভবিড় করছিলো তারা। 'নিজেকে একেবারে সর্বেসর্বা মনে করে।' একে-একে তারা সবাই খাপে তলোয়ার ঢুকিয়ে ফেললো। একের পর এক নামতে থাকলো ঘোড়ার পিঠ থেকে। সবাই নেমে পড়লে পর বিক্ষিপ্ত দল বেধে বনের পরিকৃত অংশের দিকে এগিয়ে গেলো তারা, ২১২ নম্বর বাহিনীর সঙ্গে মিশে গিয়ে ভ্রাতৃত্বাবে মিলিত হ'লো।

'আপনি চ'লে যান,' উদ্বিগ্ন কসাক অফিসার গিনজকে বললেন। 'চুপে-চুপে পালান, ওরা যেন আপনাকে দেখতে না পায়। আপনার গাড়ি লেভেল-ক্রসিঙের ধারে দাঁড়িয়ে আছে—আপনাকে তুলে নেবার জন্য পাঠিয়ে দিচ্ছি শিগগির।'

গিনজ চ'লে গেলেন; তাঁর মনে হচ্ছিলো এ-ভাবে পালিয়ে গেলে তাঁর মর্যাদাহানি হয়, তাই প্রকাশ্যেই স্টেশনের দিকে রওনা হলেন তিনি। সাংঘাতিক উত্তেজিত ছিলেন, কিন্তু আত্মাভিমান বজায় রেখে জোর ক'রে শান্ত ধীর গতিতে হেঁটে চললেন।

স্টেশনের প্রায় কাছাকাছি পৌঁছে গেছেন তখন। বনের প্রান্তে, যেখান থেকে রেল-লাইন দেখা যায়, সেখানে দাঁড়িয়ে তিনি প্রথমবার ফিরে তাকালেন। রাইফেল নিয়ে সৈন্যরা তাঁকে অনুসরণ করেছে। 'কী চায় ওরা?' ভাবলেন তিনি। একটু দ্রুত গতিতে এগুলেন এবার।

অনুসরণকারীরাও তা-ই করলো। তাঁর সঙ্গে তাদের দূরত্বের কোনো বদল হ'লো না। ভাঙা কামরার দেয়ালগুলি চোখে পড়লো তাঁর, তার পেছনে লাফিয়ে প'ড়ে তিনি ছুটলেন। কসাকেরা যে-ট্রেনে এসেছে সেটা তখন সরিয়ে নেওয়া হয়েছে মেন-লাইন থেকে, রেল লাইন তাই ফাঁকা ছিলো। সেই লাইন ধ'রে ছুটে খাড়া প্র্যাটফর্মের ওপর তিনি লাফিয়ে পড়লেন। ঠিক তখনই সৈন্যরাও দৌড়ে এলো প'ড়ে-থাকা কামরাগুলির পেছন থেকে।

কোলিয়া আর স্টেশন-মাস্টার চীৎকার করতে-করতে তাঁকে ইঙ্গিত করছিলো স্টেশনের আপিংশে ঢুকে পড়তে, সেখানে তারা তাঁকে রক্ষা করতে পারবেন।

কিন্তু আবার তাঁর অনেক পুরুষের শিক্ষালব্ধ আত্মমর্যাদা, তাঁর নাগরিক সন্ত্রম, তাঁর আত্মরক্ষার পথে বাধা হ'য়ে দাঁড়ালো: এই মর্যাদা রক্ষার জন্য আত্মবলি দিতেও প্রস্তুত তিনি, কিন্তু এ-ক্ষেত্রে এটা বেদনাদায়কভাবে অকারণ ছিলো। উদ্দাম স্বংপিণ্ডের স্পন্দন নিয়ে গিনজ চরম চেষ্টা করলেন ভয় কাটিয়ে উঠতে। মনে-মনে বললেন: 'ওদের বলবো: "মাথা ঠিক করো, ভাই সব, তোমরা জানো যে আমি গুপ্তচর নই।" কোনোরকম একটা মানবিক বা শাস্তির বাণী, হয়তো ওদের থামাবে।'

গত কয়েকমাস ধ'রে তাঁর নিষ্ঠা ও বীরত্ব অচেতনভাবে জড়িয়ে গেছে বক্তৃতার মঞ্চ আর বিচারালয়ের সঙ্গে; চেয়ার চাই, তাতে লাফিয়ে উঠে শ্রোতাদের লক্ষ্য ক'রে ঝুঁড়ে দিতে হয় তোমার আত্মন, কর্মের ডাক। সম্ভেদ নেই, গিনজের একটা ট্রিবিউনালের দরকার।

স্টেশনের ঠিক দরজার মুখে, স্টেশনের ঘন্টার তলায়, আগুন লাগলে ব্যবহার করার জন্য

একটা জলের জালা ছিলো। ঢাকনা ছিলো জালাটায়, সেই ঢাকনার ওপর লাফিয়ে উঠলেন গিনৎজ, এগিয়ে-আসা মানুষগুলির উদ্দেশ্যে যে-ক'টি কথা বললেন তা মর্মবিদারকভাবে অসংলগ্ন, যেখানে তিনি অনায়াসে আশ্রয় নিতে পারতেন তা থেকে মাত্র দু'পা দূরে পৌঁছে তাঁর এই উদ্ভাদ সাহসের ভঙ্গি দেখে স্তম্ভিত হ'য়ে ওরা পথের মাঝখানে থেমে পড়লো, নামিয়ে নিলো বন্দুক।

কিন্তু গিনৎজ ঢাকনাটার ধারের দিকে এগিয়ে যেতেই সেটা উল্টে গেলো, জালার মধ্যে প'ড়ে গেলেন তিনি, এক পা জলে ডুবে গেলো, আর অন্য পা-টা ঝুলে রইলো জালার বাইরে।

জালাব ওপর দুই দিকে দুই পা ছড়িয়ে অদ্ভুত ভঙ্গিতে তাঁকে ব'সে থাকতে দেখে, লোকগুলি হাসিতে ফেটে পড়লো; সামনের লোকটি গিনৎজের গলায় গুলি ছুড়লো। অন্য সকলে ছুটে এসে যতক্ষণে তাঁর গায়ে তাদের সঙ্গিনের খোঁচা বসালো তাঁর আগেই গিনৎজ মারা গেছেন।

১১

কোলিয়াকে ফোন ক'রে মাদমোয়াজেল বললেন ডাক্তার জিভাগোর জন্য মস্তোর ট্রেনে একটা ভালো আসন ঠিক কবতে—ভয় দেখালেন যদি না করে তাহ'লে তার সব কথা ফাস ক'বে দেবেন।

কোলিয়া সদাসর্বদাই যেমন করে—আরো একটা কথোপকথন চালিয়ে যাচ্ছিলো সঙ্গে-সঙ্গে, তাব যে-সমস্ত বাক্যের ভগ্নাংশ তার কথাকে অলংকৃত করছিলো তা শুনে মনে হচ্ছিলো তৃতীয় এক যন্ত্রের সাহায্যে সাংকেতিক ভাষায় কোনো খবর পাঠাচ্ছে সে।

'পঙ্কভ, পঙ্কভ, শুনতে পাচ্ছো,—কোন বিদ্রোহীরা? কিসের সাহায্য? আপনি কী বলছেন মাদমোয়াজেল? দয়া ক'বে ছেড়ে দিন।—পঙ্কভ, পঙ্কভ, ছত্রিশ শূন্য এক পাচ।—ওং, থেৎ, লাইন কেটে দিলে।—হ্যালো, হ্যালো, আমি শুনতে পাচ্ছি না।—আবার আপনি নাকি, মাদমোয়াজেল? আমি তো বললামই, আমি পারবো না, স্টেশন-মাস্টারের সঙ্গে কথা বলুন। সব মাথো গল্পকথা ও-সব—ছত্রিশ...ওং থেৎ...লাইন ছেড়ে দিন, মাদমোয়াজেল।'

আর মাদমোয়াজেল বলছিলেন:

'আমার চোখে ধুলো দিতে যেয়ো না, পঙ্কভ, পঙ্কভ, মিথ্যাক কোথাকার! চিনতে আমার গাকি নেই; কাল তুমি ডাক্তারকে ট্রেনে তুলে দেবে, খুদে-খুদে খুনে জুডাসদের কাছ থেকে আর একটি কথাও শুনতে চাই না আমি।'

১২

ইউরি যেদিন রওনা হ'লো সেদিন খুব গুমোট করেছিলো। দু'দিন আগের মতো সেদিনও ঝড় আসছিলো ঠিক সেইভাবে। সূর্যমুখীর চারার খোসা-ছড়ানো স্টেশন-এলাকায় মাটির বাড়ি আর হাসগুলোকে কালো আকাশের তলায় দিন শাদা আর ভয়াত ব'লে মনে হচ্ছিলো।

স্টেশনের সামনে আর দুই পাশে বিস্তৃত চওড়া আড়িনায় ঘাস পিষে গেছে, একেবারে মুছে গেছে সেই সব অসংখ্য যাত্রীদের পায়ের তলায় যারা দিনের পর দিন অপেক্ষা করেছে ট্রেনের জন্য।

কর্কশ ছাইরঙা পশমের কোট গায়ে বুড়ো-বুড়ো লোকেরা খবর আর গুজবের খোঁজে এ-দল থেকে ও-দলে ঘুরে-ঘুরে বেড়াচ্ছে। নিশেধ চান্দ বছরের ছেলেরা কনুইয়ের ওপর ভর দিয়ে শুয়ে ছাল-ছাড়ানো গাছের ডাল ঘোরাচ্ছে, যেন ভেড়ার পালের ওপর নজর রাখছে তারা, তাদের ছোটো-ছোটো ভাইবোনগুলি উড়ন্ত জামা আর গোলাপি পাছা নিয়ে ছুটোছুটি করছে

লোকের পায়ের ঝাঁক দিয়ে, আর তাদের মায়েরা মাটির ওপর ব'সে সুশোভনভাবে সামনে দুই পা ছড়িয়ে দিয়েছে, আঁটো, কাটছাঁটছাঁত জ্যাকেটের বুকের মধ্যে খ'রে রেখেছে কোলের শিশুদের।

‘গুলিগোলা শুরু হওয়ার সঙ্গে-সঙ্গে গোল-ভেড়ার মতো ছড়িয়ে পড়েছিলো সব,’ স্টেশনে ঢোকার দরজার সামনে সারি-সারি লোক মাটিতে শুয়ে ছিলো; একে-বৈকে তাদের পাশ কাটিয়ে যেতে-যেতে স্টেশন-মাস্টার বিরক্তির সঙ্গে ইউরিকে বললেন। ‘দেখতে-না-দেখতে সব ঘাস পরিষ্কার হ'য়ে গেলো; আবার মাটি দেখতে পেলাম; এই সব বেদের দলের আনাগোনার ফলে আজ চারমাস মাটি দেখছি না; কেমন দেখতে তা পর্যন্ত ভুলে গেছি।—এই যে এখানে উনি পড়েছিলেন। মজার ব্যাপার কী জানেন, এই যুদ্ধে অনেক খারাপ জিনিস দেখলাম আমি, সব-কিছুই আমার স'য়ে গেছে বলা যায়। কিন্তু তবু কেন জানি দুঃখ হয়েছিলো। ব্যাপারটা এমন অর্থহীন যে বলবার নয়। ওদের কী করছিলেন উনি? কিন্তু ওরা তখন তো আর মানুষ ছিলো না। খুব আদুরে ছেলে ছিলেন নাকি।—এই যে এবার ডান দিকে; আমার আপিশে চলুন দয়া ক'রে। এই ট্রেনে যাওয়ার আশা নেই, আপনাকে পিষে মেরে ফেলবে। একটা লোকাল ট্রেনে তুলে দিচ্ছে আপনাকে। ওটা তৈরি হচ্ছে একুনি। কিন্তু ট্রেনটা আসবার আগে এ-বিষয়ে কোনো কথা না; বাবস্থা হবার আগেই গাড়ি ভেঙে-চুরে ফেলবে তাহ'লে। আজ রাতে সুখিনিচিতে গাড়ি বদল করবেন।’

১৩

রেল-গুদোমের পেছন থেকে বেরিয়ে সেই গোপন গাড়িটি স্টেশনে ঢোকার সঙ্গে-সঙ্গে জনতা ঝাঁপিয়ে পড়লো লাইনের ওপর। মার্বেলের গুলির মতো লাইনের পাড় দিয়ে গাড়িয়ে পড়লো লোকেরা। পাকা রাস্তার ওপর দুর্নিবার বেগে এসে পড়লো সকলে, এ ওর গায়ে ধাক্কা দিয়ে সিঁড়ির ওপর উঠে গদিতে লাফিয়ে পড়তে লাগলো, কিংবা উঠলো জানলা বেয়ে, গাড়ির ছাদে উঠে গেলো। ভালো ক'রে থামবার আগে নিমেষে ভ'রে গেলো ট্রেন, প্ল্যাটফর্মে যতোকক্ষণে এসে দাঁড়ালো ততোকক্ষণে শুধু ভিড়ে ঠাসাই নয়, গাড়ির বাইরে মাথা থেকে পা পর্যন্ত তখন লোক ঝুলছে। নেহাৎই দৈবের বশে, ইউরিও কী ক'রে যেন দুই কামরার মাঝখানের অংশটায় উঠে যেতে পেরেছিলো, আর তারপর সেখান থেকে আরো আশ্চর্যভাবে ঢুকে যেতে পেরেছিলো ট্রেনের বারান্দায়।

সেখানেই, মালের ওপর ব'সে সুখিনিচির পুরো পথটা তার কাটলো।

মেঘ স'রে গেছে, সূর্যের আলোয় মাঠগুলি জ্বলছে যেন, এক প্রান্ত থেকে অন্য প্রান্ত পর্যন্ত চাকার শব্দ ডুবিয়ে দিয়ে ঝিঝির ডাক প্রতিধ্বনি তুলছে।

জানলার কাছে যে-সব যাত্রী দাঁড়িয়েছিলো, অন্যদের তারা রোদ থেকে আড়াল করেছে। তাদের প্রত্যেকের একাধিক ছায়া লম্বা হ'য়ে এসে পড়েছে মেঝেতে, গদিতে, পাটিশনের ওপর। যেন ভিড়ের চাপে কামরা থেকে বেরিয়ে গিয়ে সেই ছায়াগুলি লাফিয়ে পড়েছে জানলা দিয়ে, উন্টো দিক দিয়ে লাফাতে-লাফাতে ছুটে চলেছে ট্রেনের চলমান ছায়ার সঙ্গে-সঙ্গে।

ইউরিকে ঘিরে চারপাশে লোকেরা চীৎকার করছে, গান গাইছে চড়া গলায়, গাল পাড়ছে, জুয়ো খেলছে। যখনই ট্রেন আসছে তখনই ভেতরকার গোলমালের সঙ্গে যোগ হচ্ছে বাইরের আক্রমণকারী ভিড়ের কলরোল। সমুদ্রের বৃকে যেমন ঝড় ওঠে তেমন তীব্র হ'য়ে উঠছে সেই শব্দ, আর তারপর, সমুদ্রের মতোই, হঠাৎ নেমে আসছে বিরতি। সেই দুর্বোধ্য স্তব্ধতার মধ্যে শোনা যাচ্ছে প্ল্যাটফর্মের ওপর ব্যস্ত পায়ের আওয়াজ, মাল-গাড়ির সামনেকার ব্যস্ততা ও

বাকবিতণ্ডা, দূরের যাত্রীদের বিদায়বার্তা, মুরগির শাস্ত ডাক আর স্টেশনের বাগানে গাছের পাতার খসখস শব্দ।

আর, পথে-পাওয়া বার্তার মতো, মেলিউজ্জেইয়েভোর অভিবাদনের মতো, কেবল ইউরির জন্যই যেন ব'য়ে এলো তার সেই পরিচিত সুবাস। কোনো-এক জানলাব দিক দিয়ে, বাগান আর বুনো ফুলের অনেক ওপরের স্তর থেকে সেই গন্ধ ভেসে এলো, অন্য সব-কিছু ছাপিয়ে সে প্রতিষ্ঠিত হ'লো আপন শ্রেষ্ঠত্বে। ভিড়ের জন্য জানলার কাছে যেতে-না-পেবে ইউবি গাছ দেখতে পাচ্ছিলো না; কল্পনায় দেখলে, খুব কাছেই কোথাও বেড়ে উঠছে তারা, রাত্রির মতো ঘন, ছোটো, ঝিকঝিকে মোমের ফুলেব গুচ্ছ-গুচ্ছ তারা-ছোটোনা খুলি-ধূসর পাতায় ভবা শাস্ত ডালপালা ছড়িয়ে দিয়েছে গাড়ির ছাদের ওপর দিয়ে।

পথে সর্বত্র ভিড়, কলবব, আর সর্বত্র পুষ্পিত লেবু গাছ।

তাদের গন্ধ যেন একসঙ্গে ছড়িয়ে আছে সব জায়গায়, এগিয়ে এসে এই উত্তরগামী যাত্রীদের ধ'রে ফেলছে, যেন গুজবের মতো ছড়িয়ে পড়ছে প্রতি সাইডিং, সিগনাল-বাক্স, আব ছোটো-ছোটো স্টেশনগুলিকে ঘিরে-ঘিবে, আব তাদের আগেই সব জায়গায় পৌছে গিয়ে নিশ্চিত হ'য়ে তাদের জন্য অপেক্ষা করছে।

১৪

সেই রাতে সুখিনিচিতে এক বাধ্য, সেকেলে ধরনের কুলি অনেকগুলো অঙ্ককাব লাইনেব ওপব দিয়ে ইউরিকে এক অনির্ধাবিত ট্রেনের সেকেণ্ড ক্লাশ কামরায় তুলে দিলো। তক্ষুনি এসে পৌছেছিলো ট্রেনটি।

গার্ডের চাবি দিয়ে কামরার দরজা খুলে কুলিটি সবে মাত্র ইউরির মাল ভেতরে ঢুকিয়েছে। এমন সময় গার্ড স্বয়ং এসে মালপত্র বাইরে ফেলে দেবার চেষ্টা করলে। কিন্তু ইউরি কোনোমতে শাস্ত করলে তাকে, তারপর আর গার্ড-সাহেবকে দেখা গেলো না।

এই রহস্যময় ট্রেনটির ওপর বিশেষ নির্দেশ ছিলো; খুব কম স্টেশনে থেমে বেশ জোরে চলছিলো ট্রেনটি, একজন অস্থধারী প্রহরীও ছিলো গাড়িতে। ট্রেনটি বলতে গেলে শূন্য।

ইউবির কামবায মোমের বাতি জ্বলছিলো; ছোটো টেবিলেব ওপর বসানো মোমবাতিটি ফোঁটায়-ফোঁটায় গ'লে পড়ছে, আধো-খোলা জানলা দিয়ে ব'য়ে-আসা হাওয়ার শ্রোতে কাপছে তার শিখা। সেই কামরায় ইউরি ছাড়া আর একজনমাত্র যাত্রী ছিলো, মোমবাতিটি তার। যাত্রীটি তরুণ, মাথাভরা চুল, হাত ও পায়ের আকার দেখে মনে হয় বেশ লম্বা। কেমন ঢিলেঢোলাভাবে তাব শরীরের অঙ্গপ্রত্যঙ্গ পরপম্পরের সঙ্গে জোড়া, যেন ঠিকমতো যুক্ত নয়। জানলার ধারে, কোণের দিকের আসনে চিং হ'য়ে শুয়ে ছিলো সে, কিন্তু ইউরি ঢুকতে ভবা ভঙ্গিতে উঠে বসলো।

তার আসনের তলায় একটা কাপড় পাতা, অনেকটা মেঝেতে পাতার কাপড়ের মতো দেখতে। তার একটা কোনা ন'ড়ে উঠলো, ঝোলা কান নিয়ে এক কুকুর বেরিয়ে এলো তার তলা থেকে। ইউরিকে পর্যবেক্ষণ করলো, আপাদমস্তক শুকলো, তারপর ছুটোছুটি করে বেড়াতে লাগলো সারা কামরায়; তার শীর্ণকায় প্রভুটি যেমন আলগা ভঙ্গিতে পায়ের ওপর পা রেখে ব'সে ছিলো ঠিক তেমনিভাবে থাবা ঝুঁড়তে লাগলো সে। একটু পরেই, প্রভুর নির্দেশে, আসনের তলায় ঢুকে গিয়ে আবার এক কঁচকোনো ঝাড়নের চেহারা নিয়ে নিলো কুকুরটা।

এতোকণে ইউরির চোখে পড়লো বন্দুকের খাপ, চামড়ার কার্তুজের কেণ্ট আর একটি ফুল-ওঠা থলি তাকের ওপর রাখা আছে।

যুবকটি শিকাবে গিয়েছিলো।

বড্ড বেশি কথা বলে সে, ইউবিব ঠিক ঠোটেব দিকে তাকিয়ে, অমায়িক হেসে, তক্ষুনি কথাবাতা শুক ক'বে দিলে।

তাব গলাব স্বব চডা, সূশ্রাব্য নয়, মাঝে-মাঝেই টিনেব মতো অস্বাভাবিক সুব বেবোচ্ছিলো। তাব কথা বলাব ধবনেব আবে একটা অদ্ভুত বিশেষত্ব হ'লো যে, স্পষ্টতই কশ হওয়া সত্ত্বেও দীর্ঘ উ-ব উচ্চারণটা সে একেবাবে বিজাতীয় ঢঙ কবে, ফরাসী 'উ' অথবা জার্মান 'উ'-ব মতো নবম ক'বে বলে। শব্দটা উচ্চারণ কবতে, বোঝাই যায়, তাকে বেশ চেষ্টা কবতে হয়, অসম্ভব কষ্ট হয় তাব—একটু কেমন চি-চি আওয়াজে অন্য সব শব্দ থেকে জোরে এই শব্দটি সে উচ্চারণ কবে। মাঝে-মাঝে, বোধহয় মনোযোগ দেবাব ফলে, এই দোষটা শুধবে ফেলে সে, কিন্তু তাব পবেই আবার ভুল হয়।

'এ কী অদ্ভুত,' ইউবিব ভাবলে। 'নিশ্চয়ই এ-বিষয়ে পড়েছি, ডাক্তার হিসেবেও আমাব জানা উচিত, কিন্তু ব্যাপারটা যে মী ভেবে পাচ্ছি না। মাথাব কোনেবকম গোলমালেব জন্যই নিশ্চয়ই কথা বলায় এই বকম দোষ হয়।' কাণটা যা-ই হোক, ইউবিব এতো মজা লাগছিলো যে কিছুতেই হাসি চাপতে পারছিলো না। 'ববং শুযে পডা যাক,' মনে-মনে বললে সে।

ইউবিব ওপবেব বান্ধে উঠে গেলো। যুবকটি মোমবাতি নিবিযে দেবাব প্রস্তাব কবলে, নয়তো ইউবিব ঘূমেব ব্যাঘাত হ'তে পারে। ইউবিব সম্মতি জানালো, সাবা কামবা ডুবে গেলো নিশ্চিন্ত অন্ধকাৰে।

'জানলাটা কি বন্ধ ক'বে দেবো?' ইউবিব জিজ্ঞেস কবলো। 'চোবেব ভয় নেই তো আপনাব?'

কোনো জবাব এলো না। আবে একটু জোবে প্রশ্নটাব পুনৰাবৃতি কবলো সে, কিন্তু জবাব নেই।

তাব সঙ্গী বাইবে গেছে কিনা দেখাব জন ইউবিব দেশলাই জ্বালিয়ে বান্ধেব ওপব দিয়ে ঝুকে পডলো। এইটুকু সমযেব মধ্যে সে ঘূমিয়ে পডবে সেটা অবিস্মাস।

সে কিন্তু সেখানেই ব'সে আছে, খোলা চোখে, তাব নিজেব জায়গায়। ইউবিব ঝুকে পডতে সে ইউবিব মুখেব দিকে তাকিয়ে একটু হাসলো।

দেশলাইযেব কাঠিটা নিভে গেলো, আবেকটা জ্বলে, সেটা নেভাবাব আগে ইউবিব তৃতীয়বাব তাব প্রশ্নটি জিজ্ঞেস কবলো।

'আপনাব যা ইচ্ছে,' যুবকটি তক্ষুনি জবাব দিলে। 'চোবে নিতে পারে এমন কিছুই আমাব নেই। ববং খোলাই বাখুন। বড্ড গুমোট কামবায়।'

'কী অসাধাবণ চবিত্র!' ইউবিব ভাবলে। 'বাতিকগ্রস্ত, সন্দেহ নেই। অন্ধকাৰে কথা বলে না। কী আশ্চর্য!'

৭৫ সপ্তাহেব ঘটনাগুলোব জন্যও বটে, তাডাতাড়ি বওনা হয়েছে ব'লেও বটে, ইউবিব ক্লান্ত ছিলো, আশা কবেছিলো আবাম ক'বে শোবাব সঙ্গে-সঙ্গেই ঘূমিয়ে পডবে, কিন্তু অতিবিক্ত প'বশ্রান্তিব জন্যই ভোব পর্যন্ত ঘুম এলো না।

অন্ধকাৰে পাক খেযে ঘূবতে লাগলো তাব ভাবনাগুলি। দুই প্রধান বৃত্তে তাবা ঘূৰছে, যেন সমানে জট পাকাচ্ছে আব জট খুলে চলেছে দুই গোছা সুগো।

এক বৃত্তে আছে টোনিযাব ভাবনা, তাদের বাড়ি, আব তাদের সেই আগেকাব স্থিতিশীল জীবন, যে-জীবনে সব-কিছুব, যে-কোনো সামান্যতম ঝুটিনাটিবও, আছে নিজস্ব ছন্দ,

আন্তরিকতা, উষ্ণতা। সেই জীবনের জন্য উদ্বিগ্ন হয়ে আছে ইউরি, সেই জীবনকে সে নিরাপদে, সম্পূর্ণভাবে ফিবে পেতে চায়, দুই বছরের বিচ্ছেদের পর, এক্সপ্রেস-গাড়িতে ছুটতে-ছুটতে এখনই সে সেখানে পৌঁছে যাবার জন্য ব্যাকুল বোধ করছে।

আর সেই সঙ্গে আছে বিপ্লবের প্রতি তার আনুগত্য ও শ্রদ্ধা—সেই বিপ্লব, মধ্যবিত্ত সমাজ যাকে গ্রহণ করেছিলো, ১৯০৫ সালে ব্লকের শিষ্য এবং ছাত্ররা বিপ্লব বলতে যা বুঝেছিল।

নতুনের পূর্বভাসও আছে এই অন্তরঙ্গ চিন্তার বৃত্তে। আছে সেই সব পূর্বলক্ষণ ও শপথ, কৃশ চিন্তা, শিল্প ও জীবন, সমগ্র রাশিয়ার, এবং তার, জিভাগোর ভাগ্যে যার আবির্ভাব হয়েছিলো যুদ্ধের আগে ১৯১২ থেকে ১৯১৪ সালের মধ্যে।

যুদ্ধ শেষ হ'য়ে গেছে,—এখন আবার সেই আবহাওয়ায় ফিরে গিয়ে তার পুনরুত্থান ও ধাবাবাহিকতা লক্ষ করা—তা এই বাড়ি ফেরার মতোই আনন্দের।

তার চিন্তাধারার অপর বৃত্তটিতেও নতুন বিষয়ের ভাবনা আছে—প্রথমটি থেকে তা কতো আলাদা, কতো অনারকম। এই নতুনেরা তার অন্তরঙ্গ নয়; পুরোনো জিনিস এগিয়ে নিয়ে আসেন নি তাদের; তাদের সে বেছে নেয়নি, বাস্তবের কাছ থেকে তাদের সে পেয়েছে, ভূমিকম্পের মতো তারা আকস্মিক।

এর মধ্যে আছে রক্তপাতে আর ভয়াবহতায় ভরা এই যুদ্ধ, তার ঘরছাড়া বন্য, একক রূপ। আছে তার ক্রেশ, আর আছে সাংসারিক বুদ্ধি, যা সে শিখিয়েছে। সেই ছোট নির্জন শহরগুলি, যেখানে যুদ্ধ তাকে ফেলে রেখে গিয়েছিলো, আব সেই সব লোকেরা, যাদের সঙ্গে সে প'ড়ে ছিলো সেখানে, তারাও আছে তার চিন্তায়।

আর বিপ্লব—তাও এমন এক ব্যাপার—১৯০৫ সালে ছাত্ররা যাকে আদর্শ ব'লে মেনেছিলো সে-বিপ্লব নয়,—এই নতুন আলোড়ন, আজকের এই নবজাত যুদ্ধ, রক্তাক্ত, নির্দয়, আদিম সৈন্যদলের বিদ্রোহ—পেশাদারেরা, বলশেভিকেরা যার অধিনায়ক।

আব তার নতুন ভাবনার মধ্যে, যুদ্ধের অস্পষ্ট পটভূমিকায়, তার সম্পূর্ণ অজ্ঞাত জীবন নিয়ে আছে নার্স আন্টিপভা। কাউকে কোনোদিন দোষারোপ করেনি সে, কিন্তু তার স্তব্ধতাই যেন তিরস্কার-স্বরূপ, রহস্যময় তার সংযম, রহস্যময় আর কঠিন। ইউরি আজীবন আন্তরিকভাবে কামনা করেছে, শুধুমাত্র তার নিজের পরিবার অথবা বন্ধুবর্গকেই নয়, অন্য সকলকেও যেন একই ভাবে ভালোবাসতে পারে; কিন্তু এখন সে আন্তরিকভাবে চেষ্টা করছে আন্টিপভাকে সেই সম্পর্কিতাব সঙ্গে ভালো না-বাসার জন্য।

পূর্বো দমে ছুটে চলেছে ট্রেন। মাথার দিকে খোলা জানলা দিয়ে বাতাস ব'য়ে এসে ইউরির মাথার চুল উড়িয়ে ধুলো ছিটিয়ে দিচ্ছে। রাত্রিও, দিনের বেলাকার মতো, প্রতি স্টেশনে জনতা আসছে এগিয়ে, আর মর্মরিত হচ্ছে লেবুগাছের পাতা।

মাঝে-মাঝে ঠালাগাড়ি কিংবা ঘোড়ার গাড়ি অন্ধকার ভেদ ক'রে গড়িয়ে আসছে স্টেশনের দিকে, গাছেব মর্মরধ্বনির সঙ্গে মিশে যাচ্ছে গলার স্বর আর চাকার ঘর্ষের শব্দ।

সেই সব মুহূর্তে ইউরির মনে হচ্ছিলো সে জানে কেন রাতেব ছায়াবা মর্মরিত হয়, কেন তারা কাছাকাছি মাথা এনে পরামর্শ করে; জানে—কী কথা তাবা কানে-কানে শলে পবম্পরকে, প্রায় তাদের পাতা না-কাঁপিয়ে, ঘুমে আচ্ছন্ন অবস্থায়, আধো-আধো অস্পষ্ট ভাষণের মতো আওয়াজে। বাঙ্কের ওপব শুয়ে এ-পাশ ওপাশ করতে-করতে ইউরি আরো ভাবছিলো—ভাবছিলো রাশিয়ায় অস্থিবিভা আর উদ্বেজনার ক্রমবর্ধমান বৃত্তের খবর, বিপ্লবের কথা, তার কঠিন, চবম সময়ের, আব তার ভবিষ্যৎ গৌববের সম্ভাবনার কথা।

পাবের দিন অনেক বেলা পর্যন্ত ঘুমোলো ইউরি; যখন উঠলো তখন এগারোটা বেজে গেছে 'প্রিন্স, প্রিন্স', তার সঙ্গীটি নরম গলায় তার অশুশি কুকুরটিকে ডাকছিলো। ইউরি দেখে অবাক হ'লো যে কামরায় এখনো তারা একা; অন্য কোনো যাত্রী গুঠেনি।

কালুগা জেলা ছাড়িয়ে এসে তারা মস্কোতে প্রবেশ করেছে। স্টেশনের নামগুলি ইউরির আশিষব চেনা।

যুদ্ধের আগেকার দিনের মতো আরামে দাড়ি কামিয়ে, হাত-মুখ ধুয়ে প্রাতঃরাশের সময় কামরায় ফিরে এলো সে—তার সঙ্গী তাকে প্রাতঃরাশের নিমন্ত্রণ জানিয়েছিলো। এবার ইউরি ভালো ক'বে তাকালো তাব দিকে।

সবচেয়ে লক্ষণীয় মনে হ'লো লোকটির অতিভাষণ, আর এক মুহূর্তও স্থির হ'য়ে ব'সে থাকার অক্ষমতা। কথা বলতে ভালোবাসে সে, আর সবচেয়ে বেশি যা ভালোবাসে তা আলাপ অথবা ভাবের আদানপ্রদান ততোটা নয় যতোটা কথা বলার ব্যাপারটা, অক্ষর আর শব্দের উচ্চারণ। কথা বলতে-বলতে এমন ভাবে লাফায় যেন সে স্প্রিঙের পুতুল; অকারণে এমন হাসতে থাকে যে কানে তালো লেগে যায়, দ্রুত হাত ঘষে, আর, অন্য কোনো উপায়ে মনের ভাব বোঝাতে না-পারলে সজোরে হাঁটু চাপড়ে দুলতে-দুলতে এমন হাসি হাসতে থাকে যে একেবারে কান্না এসে যায়।

তার কথাবার্তার ধরণ ঠিক গত রাত্রের মতোই। অদ্ভুত অসংলগ্ন লোকটি কখনো হয়তো কিছু না-বলতেই স্বীকারোক্তি শুরু ক'রে দেয়, আবার কখনো নির্দোষতম প্রশ্নেরও জবাব দেয় না। নিজের সম্বন্ধে সে অবিশ্বাস্য এবং ছাড়া-ছাড়া তথ্য উদ্গাব করলে। বোধহয় একটু মিথ্যাও বললে; সন্দেহ নেই, তার চরম মতবাদ দিয়ে, আর যে-কোনো সাধারণ মতামতকে অগ্রাহ্য ক'রে, ইউরিকে সে চমৎকৃত করতে চাইছিলো।

সবই ইউরিকে কী-একটা কথা মনে করিয়ে দিচ্ছিলো।—গত শতকের নিহিলিস্টদের ভাবখানা ছিলো এই রকম, কিছু পরে ডস্টয়েভস্কির কোনো কোনো চরিত্রের—আর, আরো সম্প্রতি, সেই সব মফস্বলের বুদ্ধিজীবীদের, যাদের বলা যায় ডস্টয়েভস্কিব চরিত্রের বংশধর, যাবা অনেক সময়ই রাজধানীর বুদ্ধিজীবীদের চাইতে অগ্রসর হ'তো—কেননা মফস্বলের আন্তরিকতা গুণটি রাজধানীতে সেকেলে ব'লে গণ্য ছিলো।

যুবকটি জানালো যে সে কোনো-এক বিখ্যাত বিশ্লেষক ভাইপো, কিন্তু তার মা-বাবা হলেন নিদারুণ প্রতিক্রিয়াশীল, যাকে বলে প্রাগৈতিহাসিক। বেশ বড়ো জমিদারি তাদের—এখন যুদ্ধক্ষেত্রের ধার ঘেঁষে পড়েছে। সেখানেই বড়ো হয়েছে সে। চিরকালই মা-বাবার সঙ্গে তার কাকার সম্বন্ধ একেবারে আদায়-কাঁচকলায়, কিন্তু কাকা তাঁদের বিরুদ্ধে কোনো কথাই মনে বাতেননি, আর এখন নিজের প্রভাব খাটিয়ে অনেক অপ্রিয় ব্যাপার থেকে তাঁদের রক্ষা করছেন।

তার নিজের মতামত তার কাকার মতো; জীবন, রাজনীতি বা শিল্প—সর্বক্ষেত্রেই চরমপন্থী সে। একথা শুনেও ইউরির মনে প'ড়ে গেলো পিটার ভের্ভেনস্কি^১-কে, বামপন্থী মতামতের জন্য ততোটা নয় যতোটা দুর্নীতি আর বড়ো-বড়ো বুলির জন্য। 'এর পরে বলবেন উনি একজন ফিউচারিস্ট', ইউরি ভাবলে; আর সত্যিই কথাবার্তার মোড় ফিউচারিজম-এব দিকেই ঘুরে গেলো। 'এবার খেলাধুলোর কথা আসবে, ঘোড়দৌড়, স্কেটিং, ফরাসী কৃষ্টি'; সত্যি-সত্যি শিকার বিষয়ে কথা উঠলো এর পরে।

যুবকটি তাব বাড়ির কাছেই শিকার করতে গিয়েছিলো। জাঁক ক'বে বললে যে সে গুলি ছোড়ায় ওস্তাদ, শারীরিক অক্ষমতার জন্য সৈন্যদলে যোগ দিতে পারেনি, নয়তো ভালো নিশানার জন্য নাম কিনতে পারতো। ইউরির কৌতূহলী দৃষ্টি লক্ষ্য ক'রে সে তীব্রস্ববে বলে উঠলো: 'সত্যি বলছেন কিছু লক্ষ্য করেননি আপনি? আমি ভেবেছিলাম আমার অসুবিধেটা কী তা আপনি আন্দাজ করতে পেরেছেন।'

পকেট থেকে দুটো কার্ড বের ক'রে সে ইউরির হাতে দিলে। একটা তাব ভিজিটিং কার্ড। মন্ত দোনলা নাম, মাক্সিম আরিস্টারখোভিচ ক্রিস্টসভপগরেভশিখ—ইউরিকে অবশ্য সোজাসুজি অনুরোধ জানালে তাকে পগরেভশিখ ব'লে ডাকতে—কেননা ঐ নাম তার কাকার, এইভাবে কাকার গৌরব সে বহন ক'বেছে।

অন্য কার্ডটি চোকো ধর কেটে ভাগ করা, প্রত্যেক চৌখুপিতে বিভিন্ন ভঙ্গিতে ভাঁজ-কবা আঙুল দিয়ে বিচিত্রভাবে যুক্ত দু'খানা হাতের ছবি আঁকা। মুক ও বধিরদের অক্ষর সেগুলো। এতেই সব স্পষ্ট হ'য়ে গেলো। পগরেভশিখ, হার্টম্যান অথবা অসট্রোগ্রাডভ স্কুলের এক অসাধারণ মেধাসম্পন্ন মুক-বধির ছাত্র, কান দিয়ে নয়, চোখ দিয়ে এক অবিশ্বাস্য নৈপুণ্যের সঙ্গে সে কথা বলে, লক্ষ্য ক'রে-ক'রে সে কথা বলতে শিখেছে—এই ভাবেই অন্য সকলে কী বলছে বুঝতে পারে সে।

যে-অঞ্চল থেকে সে এসেছে সে-বিষয়ে এবং শিকার-বিষয়ে সে যা বলেছিলো মনে-মনে তা যোগ ক'রে নিয়ে ইউরি বললে:

'বেয়াদপি মাপ করবেন, ইচ্ছে না-হ'লে জবাব দেবেন না—কিন্তু জাবুশিনো প্রজাতন্ত্র স্থাপনের সঙ্গে কি কোনো যোগ ছিলো আপনার?

'কী ক'রে বুঝলেন?...আপনি কি ব্রাজেইকোকে চিনতেন?...হ্যাঁ, হ্যাঁ! নিশ্চয়ই যোগ ছিলো।' সারা শরীর দুলিয়ে, হাঁটুতে চাপড় মেরে হাসতে-হাসতে দ্রুত, অস্পষ্টস্বরে সে বললে।

পগরেভশিখ বললে যে তার নিজের ধ্যান-ধারণা কাজে খাটাবার জন্য ব্রাজেইকো ওজুহাত মাত্র, আর জাবুশিনো দৈবে-পাওয়া সুযোগ। যুবকটির দার্শনিক ব্যাখ্যা ইউরি ঠিকমতো ধরতে পারছিলো না সব সময়; মনে হচ্ছিলো, সেটা অংশত অ্যানার্কিজম আর অংশত সোজাসুজি শিকারির মিথ্যাভাষণ।

দৈববাণীর মতো নিঃস্পন্দভাবে সে জানালো যে অদূর ভবিষ্যতে রাশিয়ায় এক সর্বনাশা আলোড়ন শুরু হবে। গোপনে-গোপনে ইউরিরও বিশ্বাস যে সেটা হওয়া নিতান্ত অসম্ভব নয়, কিন্তু যুবকের কথাবার্তায় যে-অগ্নীতিকর স্কুলের ছেলের মতো ঔদ্ধত্য ছিলো তাতে বীতিমতো ক্ষিপ্ত বোধ করছিলো ইউরি।

'এক মিনিট,' পরখ কবাব ধরেন সে বললে। 'এ সবই হয়তো ঠিক, আপনি যা বলছেন তা ঘটতেও পারে। কিন্তু আমার মনে হয় যে এখন যা চলছে—এই তাণ্ডব, অস্থিরতা, শত্রুপক্ষের চাপ—সাংঘাতিক কোনো পবীক্ষা শুরু করার পক্ষে এটা ঠিক উপযুক্ত সময় নয়। একটা আলোড়নে ঝাঁপ দেবার আগে আরেকটা আলোড়ন সামলে উঠতে হবে তো দেশকে। শান্তি আর শৃঙ্খলার মতো কিছু-একটা ব্যবস্থা আগে হওয়া চাই।'

'এটা নিতান্ত ছেলেমানুষি মনোভাব,' পগরেভশিখ বললে। 'যে-বিশৃঙ্খলা নিয়ে আপনি এতো ভাবিত সেটাও শৃঙ্খলার মতোই স্বাভাবিক ব্যাপার। এই যে ধ্বংস—এই তো হ'লো ব্যাপক সংগঠনকারী অভিপ্রায়ের উপযুক্ত প্রাথমিক অবস্থা। সমাজ এখনো যথেষ্ট ছত্রভঙ্গ হয়নি। সম্পূর্ণভাবে ভেঙে গড়তে হবে এই সমাজকে, আর তারপর সত্যিকার বিপ্লবী এক শাসনতন্ত্র সম্পূর্ণ নতুন ভিত্তিতে আবার জুড়ে দেবে সমাজের সেই ভাঙা টুকরোগুলিকে।

ইউরি অসুস্থ বোধ করলো। উঠে করিডোরে চ'লে গেলো সে।

সমস্ত বেগ সঞ্চয় ক'রে ট্রেন মস্কো'র দিকে এগোচ্ছে। গ্রীষ্মাবাসে ভরা বার্ট গাছের বনের মধ্য দিয়ে ছুটে চলেছে গাড়ি। দুই পাশের ছোটো-ছোটো, ছাদহীন প্রাচীরমণ্ডলি দাঁড়িয়ে-থাকা স্ত্রী পুরুষ নিয়ে দূবে-দূবে ধুলোর মেঘের মধ্যে দুলে উঠছে। বাব-বার ছইসিল বাজাচ্ছে ট্রেন, সঙ্গে-সঙ্গে বাঁশির মতো ফাপা আওয়াজে বনের মধ্যে বেজে উঠছে প্রতিধ্বনি।

হঠাৎ, এই ক'দিনের মধ্যে এই প্রথমবার ইউবি স্পষ্টভাবে উপলব্ধি কবলে সে কোথায়, তাব কী হচ্ছে, এবং আব কয়েক ঘণ্টার মধ্যেই কী প্রতীক্ষা ক'রে আছে তার জন্য।

তিন বছর ধ'বে পবিত্রতন, অস্থিরতা, অনিশ্চয়তা আর আলোড়ন; যুদ্ধ, বিপ্লব; ধ্বংসের দৃশ্য, মৃত্যুর দৃশ্য, গোলাবর্ষণ, পুল উড়ে যাওয়া, আগুন আর ধ্বংসাবশেষ—সব যেন হঠাৎ এক বিপুল, নিঃশব্দ, অর্থহীন শব্দের মধ্যে মিলিয়ে গেলো। সেই দীর্ঘ বাধার পর প্রথম সত্যিকার ঘটনা হ'লো এই যে তাব বাড়ি এখনো নিরাপদ আছে, তার প্রিয় ক্ষুদ্রতম পাথরটুকুও নিয়ে কোনো-এক জায়গায় অস্তিত্ব আছে তাব, এই কথা জেনে এই ঘৃণিত ট্রেনে ক'রে তার বাড়ি ফেবা। এই হ'লো জীবনের অর্থ, এই হ'লো অভিজ্ঞতা, দুঃসাহসীরা একেই অন্বেষণ করেছেন, হৃদয়ে স্থান দিয়েছেন শিক্কারা—এই নিজেব ঘরে, স্বজনের কাছে ফিরে আসা, নিজেব কাছে ফিরে আসা—এই হ'লো জীবনের নতুন জন্ম।

বনের পাতার জমাট ঘনতা ছাড়িয়ে ট্রেন খোলা জায়গায় এসে পড়লো। গর্ত থেকে বেরিয়ে একটা ঢালু জমি চওড়া ঢিবিতে উঠে গেছে, ঘন সবুজ আলুর খেতের সমান্তরাল রেখা টানা আছে সেখানে, তাব পেছনে, ঢিবিটার একেবারে মাথায়, কাচের ফ্রেম। মাঠের উষ্টো দিকে, ট্রেনের আকাবাকা লোজের পেছনে, আকাশের অর্ধেক জুড়ে আছে গভীর, লাল মেঘ তার ফাঁক দিয়ে চাকাব শলাব মতো সূর্যের আলোর রেখা উঁকি দিচ্ছে, ফ্রেমের কাচের ওপব প'ড়ে অসহ্য ঔজ্জ্বলা নিয়ে জ্বলছে সেই আলো।

হঠাৎ, উষ্ণ, ভারি বৃষ্টির ফোঁটা, সূর্যের আলোয় ঝকঝক করতে-করতে, মেঘের মধ্য থেকে বেবিযে এলো। পাছে পেছনে প'ড়ে থাকে তাই ধ'রে ফেলতে হবে, যেন এমনিভাবে লাইনের ওপর ধাক্কা দিয়ে গর্জন করতে-করতে ছুটে চলেছে যে-ট্রেন, বৃষ্টির গতিও ঠিক তারই মতো দ্রুত।

ইউবি ভালো ক'বে বৃষ্টি লক্ষ্য করার আগেই পাহাড়ের প্রান্তভাগে দেখা গেলো ত্রাতা খুট্টেব' গির্জা, আব তাব একটু পরেই ইউরি দেখতে পেলো গম্বুজ, চিমনি, ছাদ আর শহরের বাড়ি-ঘর।

'মস্কো,' কামরায় ফিরে এসে ইউবি বললে, 'তেরি হবার সময় হ'লো।'

পগরেভশিখ লাফিয়ে উঠলো, শিকারের থলি হাংড়ে একটা পুষ্ট হাঁস বের ক'রে আনলো সে। 'এটা আপনি নিন,' সে বললে, 'আমার স্মৃতি হিসেবে। এমন সুখসঙ্গে আমি খুব কম দিন কাটিয়েছি।'

জিভাগোব প্রতিবাদে কোনো ফল হ'লো না। অবশেষে সে বললে, 'ঠিক আছে, আপনার উপহাস হিসেবে এটা আমার স্ত্রীকে দেবো।'

'চমৎকার, চমৎকাব, আপনার স্ত্রী,' খুশিতে বার-বার বলতে লাগলো পগরেভশিখ, যেন শব্দটা এই প্রথম শুনলো সে, এমনিভাবে শরীর ঝাঁকোতে-ঝাঁকোতে হাসতে থাকলো, আর প্রিন্স লাফিয়ে বেরিয়ে এসে যোগ দিলো সেই আনন্দে।

ট্রেন ঢুকলো স্টেশনে। বাত্রির-মতো অন্ধকার নেমে এলো কামবায়। মুক-বধির এগিয়ে দিলে ছেঁড়া কাপড়ের ফালিতে জডানো বুনো হাঁসটা।

১. 'স্ব' • গবের মাসক্বেল ছিলা 'সাব্ব্রাত'ব (১৮ Saviour) গির্জা, নেপোলিয়নের সঙ্গে যুদ্ধে বাশিয়াব জয়েব স্ববপস্তুক্যপে
২. '১৫ ৫ ১২। বিপ্লবের কাল 'সোভিয়েট প্রাসাদ' (The Palace of Soviets) নির্মাণের জন্য সেই গির্জা ভেঙে ফেলা হয়
৩. ৫ প্রাসাদ টি এখনো ৭৮% পর্যন্ত রয়েছে।

পরিচ্ছেদ ৬

মস্কোতে রাত্রিবাস

১

যতোকক্ষণ ট্রেনে ব'সে ছিলো ততোকক্ষণ ইউরির মনে হয়েছে ট্রেনই ছুটে চলেছে, সময় থেমে আছে—বেলা মাত্র দুপুর।

কিন্তু আসলে স্মলেনস্ক স্কোয়ারের জমাট ভিড় কাটিয়ে তার ভাড়া-গাড়ি যতোকক্ষণে স্টেশন থেকে এগোলো তখন প্রায় সন্ধ্যা।

সতাই তা-ই কিনা কে জানে—হয়তো অন্যান্য বছরের অভিজ্ঞতার প্রলেপ পড়েছিলো ইউরির স্মৃতির ওপরে—পরে যতবার মনে করবার চেষ্টা কবেছে ততবারই মনে হয়েছে যে বাজারের চারপাশে লোকেরা ভিড় করেছিলো নেহাৎই অভ্যাসের বশে, যে তখনই এমন একটা অবস্থা হয়েছিলো যে কোথাও যাবার কোনো দরকারই আর নেই, দোকানের কপাট ভেজানো, এমনকি তালা পর্যন্ত লাগানো নয়, কেউ পরিষ্কার না-করায় নোংরা-ছড়ানো সেই পার্কে বেচাকেনা করার আর কিছুই নেই।

আরো মনে হয় যে তখনই সে দেখেছিলো তাদের—সেই রোগা, বুড়ো, ভদ্রবেশধারী স্ত্রী-পুরুষদের, দেয়ালের গায়ে মিশে গিয়ে পথিকদের জন্য নিঃশব্দ তিরস্কারের প্রতিমূর্তি হ'য়ে যারা দাঁড়িয়ে থাকে, কোনো কথা না-ব'লে এমন সব জিনিস বাড়িয়ে দেয় যা কারো কোনো কাজে লাগে না—নকল ফুল, বাঁশি আর কাচের ঢাকনা-বসানো কফির পাত্র, সান্ধ্য পোশাকের জন্য কালো নেট আর সেই সব সরকাবি পোশাক যার চল উঠে গেছে।

যারা আরো শাদাশিখে মানুষ, তারা আরো দরকারি জিনিসের ব্যাপারি: র‍্যাশনের বাসি কালো কটির শলার মতো পিঠ, স্যাংসেতে, নোংরা চিনিব টুকরো, লেবেলের ঠিক মাঝখান দিয়ে অর্ধেক ক'রে কাটা শস্তা তামাকের এক-এক আউন্স প্যাকেট।

এই সব অবিচ্ছাদ্য জঞ্জাল সারা বাজারে ঘুরে-ঘুরে হাত-বদল করে, আর হাতবদলের সঙ্গে-সঙ্গে দাম চ'ড়ে যায় তাদের।

গাড়িটা একটা গলিতে ঢুকলো। অন্তগামী সূর্য রইলো তাদের পেছনে। তাদের সামনে দিয়ে একটা ছাকরা গাড়ির ঘোড়া চলেছে একটা শূন্য কম্পমান গাড়ি টেনে-টেনে। ধুলোর স্তম্ভ তুলে চলেছে গাড়িটা, সূর্যাস্তের আলোয় সেই ব্রোঞ্জের মতো ধূলা যেন জ্বলছে।

অবশেষে সেটাকে ছাড়িয়ে তারা আরো দ্রুত এগোলো। দেয়াল আর পাঁচিল থেকে হেঁড়া পুরোনো খবরের কাগজ আর পোস্টারের পরিমাণ দেখে চমৎকৃত হ'লো ইউরি। হাওয়ার ঝাপটায় একদিকে উড়ছে কাগজগুলো, ঘোড়ার খুর, চাকা আর পায়ের চাপ তাদের আরেক দিকে ঠেলে দিচ্ছে।

কয়েকটা চৌরাস্তা পেরিয়ে গেলো তারা, এইবার ইউরির বাড়ি, দুই গলির কোণ ঘেঁষে গাড়ি থামলো।

ইউরির দম বন্ধ হ'য়ে এলো; গাড়ি থেকে নেমে সামনের দরজা পর্যন্ত হেঁটে গিয়ে দরজার একপাশের ঘণ্টাটা যখন বাজাতে শুরু করলো তখন তার বুকে হাতুড়ি পিটছে। কিছুই ঘটলো না। আবার বাজালো। তখনো কোনো উত্তর নেই, সামান্য উদ্বিগ্ন বিরতি দিয়ে-দিয়ে ইউরি ঘণ্টা বাজিয়ে চললো। দরজা খুলে, দুই পাট মেলে টোনিয়াকে যখন দাঁড়িয়ে থাকতে দেখলো তখনো সে বাজিয়েই চলেছে। ব্যাপারটা এমনই আশাভীত যে তারা দু'জনেই স্তম্ভিত হ'য়ে গিয়েছিলো, পরস্পরের চীৎকার তাদের কানে ঢোকেনি। কিন্তু টোনিয়া যে দরজা অমনভাবে খুলে রেখেছে সেটাই আহ্বান, প্রায় আলিঙ্গন, তারা দু'জনেই তাই সামলে উঠলো, ঝাপিয়ে পড়লো পরস্পরের বুকে। একটু পরে তাবা দু'জনে একসঙ্গে কথা বলতে শুরু ক'রে দিলে।

‘আগে বলো, সবাই কেমন আছে?’

‘হ্যাঁ, হ্যাঁ, কিছু ভেবো না। সব ঠিক আছে। বোকার মতো অনেক বাজে কথা লিখেছিলাম তোমাকে, মাপ করো। কিন্তু সে-বিষয়ে পরে কথা বলবো। টেলিগ্রাম করোনি কেন? মার্কেল ওপবে নিয়ে যাবে তোমার জিনিস-পত্র। ইয়েগোরোভনা দরজা না-খোলায় দৃষ্টিস্তা করছিলে বোধ হয়? ও গ্রামে গেছে।’

‘রোগা হ'য়ে গেছো তুমি। কিন্তু কী অল্পবয়সী দেখায় তোমাকে। কী সুন্দর তুমি! এক মিনিট দাঁড়াও, গাড়ি-ভাড়াটা চুকিয়ে দিই।’

‘ইয়েগোরোভনা গেছে চেষ্টাচরিত্র ক'রে যদি কিছু ময়দা জোগাড় করতে পারে সেই আশায়। অন্যান্য চাকর-বাকরদের ছাড়িয়ে দেওয়া হয়েছে। শুধু একটা মেয়ে আছে, ঐ নিউশা, তুমি চেনো না তাকে, সাশার দেখাশোনা করে। তা ছাড়া আর কেউ নেই। সবাইকে বলা হয়েছে যে তুমি আসছো, তোমাকে দেখার জন্য গর্ডন, ডুডোরভ, সবাই অধীর হ'য়ে আছে।’

‘বাবা বাড়ি আছেন?’

‘তোমাকে লেখেনি কেউ? —উনি তো সকাল থেকে রাত পর্যন্ত আঞ্চলিক পরিষদে থাকেন—উনিই সভাপতি হয়েছেন। হ্যাঁ, তুমি বিশ্বাস করবে না। গাড়ির ভাড়া মিটিয়েছো? মার্কেল! মার্কেল!’

ইউরির বুড়ি, ট্রাক আর স্যুটকেস সমেত রাস্তার মাঝখানে পথ আটকে দাঁড়িয়ে ছিলো তারা, পথচারীরা থেমে প'ড়ে তাদের মাথা থেকে পা পর্যন্ত তাকিয়ে-তাকিয়ে দেখছিলো; ফুটপাথের ধার থেকে গাড়িটা যখন স'রে এলো তখন হাঁ ক'রে চেয়ে রইলো সেদিকে, হাট ক'রে খোলা সদর দরজার দিকে তাকিয়ে এর পর কী ঘটে দেখার জন্য তারা অপেক্ষা ক'রে রইলো।

কিন্তু ইতিমধ্যেই গায়ে সুতির শার্ট আর দরোয়ানের টুপি মাথায় দিয়ে ছোটোবাবুকে স্বাগত জানাবার জন্য গেট থেকে ছুটতে-ছুটতে আসছে মার্কেল, দৌড়াতে-দৌড়াতে চীৎকার করছে সে:

‘হা আমার ভগবান, সত্যিই কি ইউরচকা! আবে বাবা, এ যে সত্যিই আমার লক্ষ্মীসোনা। ইউরি আশ্বেইয়েভিচ, আমার চোখের আলো, আমাদের তা হ'লে ভোলোনি, রোজ যে তোমার জন্য প্রার্থনা করেছি আমরা। আমাদের গরব যে আর ধরে না আজ—তুমি বাড়ি ফিরে এলে! —আর তোমরা কী চাও? দর্শকদের উদ্দেশে মুখ-ঝামটা দিলো সে। ‘কী এমন অদ্ভুত ব্যাপার এটা, অ্যা? ভাগো, ভাগো সব। অমন চোখ বড়ো-বড়ো ক'রে দেখার কী আছে?’

‘কেমন আছো, মার্কেল?’ ইউরি তাকে জড়িয়ে ধরলো। ‘আরে গর্দভচন্দ্র, টুপিটা প'রে নাও। তারপর, নতুন কী খবর, বলো। তোমার বৌ কেমন আছে? মেয়েরা কেমন?’

‘কেমন আব থাকবে? ঈশ্বরের দয়ায় বাড়-বাড়ন্ত হ'য়ে উঠছে। আর খবর—সে তুমি নিজেই দেখতে পারে—তুমি যতদিন ছিলে না, বড়ো-বড়ো কাজকর্ম করছিলে, আমরাও তখন ব্যস্ত ছিলাম। এমন গোলমালে ব্যাপার, এমন এক পাগলা-গারদ — শয়তানও এর কিনারা করতে

পারবে না—পথ-ঘাট অপরিষ্কার, ছাদ ফুটো, পেট শূন্য—ঠিক লেন্টের^১ মতো—আর এ-সবই হ'লো “সংযোজন বা কৃতিপূরণ ব্যতিরেকে”।^২

‘ইউরি আলেক্সেইয়েভিচের কাছে তোমার নামে আমি নালিশ করবো, মার্কেল। জানো ইউরচকা, ও সব সময় এই রকম করছে। এ-রকম বোকার মতো কথাবার্তা আমি সহ্য করতে পারি না। এ-সবই হ'লো তোমাকে খুশি করার জন্য, ও মনে করে তুমি এ-সব পছন্দ করছো, —ওরা যা বোঝায় ও তাই বোঝে। ঠিক আছে, ঠিক আছে, মার্কেল, আমার সঙ্গে তর্ক করতে এসো না, তোমাকে আমি চিনি। তুমি লোকটি বড়ো ছোড়েল, মার্কেল! তোমার একটু কাণ্ডজ্ঞান হওয়া উচিত ছিলো এতদিনে। আমরা কি দোকানদার যে এইভাবে আমাদের মন জোগাতে চাচ্ছে!’

তারা ভেতরে গেলো। মার্কেল ইউরির জিনিসপত্র ঘরে নিয়ে এসে দরজা বন্ধ ক'রে দিলো, তারপর, যেন কোনো গোপন কথা বলছে, এমনভাবে ব'লে চললো:

‘আণ্টনিয়া আলেকজান্দ্রোভনা যেনে আছে, কী বললো শুনলে তো? সব সময় এই হয়। বলে, তোমার ভেতরটা একেবারে কালো, মার্কেল, বলে, ঐ উন্ননের নলের মতো কালো। ও বলে কী জানো—আজকাল নাকি প্রত্যেক শিশু, এমনকি প্রতিটি ল্যাপডগও বোঝে যে কিসে থেকে কী হচ্ছে। সেটা অবশ্য ঠিকই, কিন্তু তবু ইউরচকা, বিশ্বাস করো আর না-ই কনো, যারা জানে তারা সবাই মেজনের বইটা দেখেছে^৩, একশো চল্লিশ বছর ধ'রে সে-বই প'ড়ে ছিলো পাথরের তলায়, এখন, আমি কথাটা ভেবে-চিন্তেই বলছি, ইউরচকা, এখন আমাদের গাড়ির জলে ভাসিয়ে দিচ্ছে। কিন্তু আমি একটা কথা বলতে পারি কি? ঐ যে—নিজেই দেখছো তো—আণ্টনিয়া আলেকজান্দ্রোভনা আমার দিকে মাথা ঝাঁকচ্ছে!’

‘অবাক হচ্ছে? অনেক হয়েছে মার্কেল, এবার মালপত্র নামাও, তাহ'লেই হবে। ইউরি আলেক্সেইয়েভিচের কিছু দরকার হ'লে তোমাকে ডাকবেন।’

২

‘ঈশ্বরকে ধন্যবাদ, ও গেছে! ঠিক আছে, ঠিক আছে, যদি চাও ওর কথা শুনতে পারো তুমি, কিন্তু আমি বলতে পারি যে এ-সব ওর ভান ছাড়া আর-কিছুই না। ওর সঙ্গে কথা ব'লে হয়তো ওকে তুমি গৈয়ো ভূত ব'লে ভাববে, কিন্তু সারাক্ষণ তলায়-তলায় ছুরিতে শান দিচ্ছে ও—শুধু কার গলায় বসাবে তা এখনো ঠিক করতে পারেনি, হতভাগা, বদ বুড়োটা।’

‘এটা একটু বাড়াবাড়ি হ'য়ে যাচ্ছে না কি? আমার মনে হয় ও মাতাল হয়েছে শুধু—তা ছাড়া আর কিছু নয়।’

‘প্রকৃতিস্থ থাকে কখন শুনি? সে যা-ই হোক, ওকে নিয়ে আমি তিতিবিরক্ত হ'য়ে গেছি। —আমার কী ভাবনা হচ্ছে জানো, তুমি সন্ধ্যাকে দেখবার আগেই হয়তো সে আবার ঘুমিয়ে পড়বে। ট্রেনে টাইফাসের উকুন থাকে ব'লে তোমার গায়ে কোনোরকম উকুন নেই তো?

‘মনে তো হয় না। খুব আরামে এসেছি... একেবারে যুদ্ধের আগেকার দিনের মতো। তবু, চট ক'রে একবার হাত-মুখটা ধুয়ে নিই। পরে ভালো ক'রে স্নান করা যাবে। কোর্নালিকে চলেছো? বসার ঘরের ভেতর দিয়ে যাওয়া হয় না বুঝি আজকাল?’

১ Lent-এর সময়ে খৃষ্টানদের উপবাস বিধের।

২ ‘সংযোজন বা কৃতিপূরণ ব্যতিরেকে শাস্তি’—বামপন্থী সোশ্যালিস্টদের স্লোগান ছিলো এই।

৩ Freemason সন্ত্রাসীদের পবিত্র গ্রন্থ, The Protocols of the Elders of Zion-কথা বলা হচ্ছে।

‘ওঃ হো, তাই তো, তুমি তো জানো না। বাবা আর আমি অনেক ভাবলাম, শেষটায় একতলার একটা অংশ কৃষি-কলেজকে ভাড়া দিয়ে দিয়েছি। শীতকালে গরম রাখা এতো মুশকিল, এখনো ওরা আসেনি, তবে লাইব্রেরি, হাবেরিয়াম আর বীজের সংগ্রহ এখানে ভুলে এনেছে। আশা করি ইদুর হবে না—সবই তো শস্য। তবে আপাতত ওরা খুব পরিষ্কার-পরিচ্ছন্ন রেখেছে ঘরটা। ও, ভালো কথা, আজকাল আবার ঘর বলে না, বলে থাকবার জায়গা। এই যে, এদিক দিয়ে এসো। অত আন্তে চলছে কেন? আমরা আজকাল পেছনের সিঁড়ি দিয়ে উঠি। চলে এসো, আমি দেখিয়ে নিয়ে যাচ্ছি।’

‘ঐ ঘরগুলি দিয়ে দিয়েছো শুনে খুব ভালো লাগছে। যে-হাসপাতালে আমি ছিলাম সেটাও একজনের বসতবাড়িতে ছিলো। অস্বহীন সারি-সারি ঘর, রঙিন কাঠের চিহ্ন এখনো মেঝেতে লেগে আছে। টবের পাম গাছগুলি থাবা বাড়িয়ে রেখেছে, যেন বিছানার শিয়রে ভূত ঝুঁকে আছে এমন দেখায় তাদের—ফ্রন্ট-লাইন থেকে নিয়ে-আসা আহতরা কেউ-কেউ চীৎকার করে জেগে উঠতো মাঝে-মাঝে— তারা অবশ্য সম্পূর্ণ প্রকৃতিস্থ নয় কেউ—শেল-শক হয়েছে তাদের— গাছগুলো আমাদের সরিয়ে দিতে হ’লো। মানে, আমি বলতে চাচ্ছি যে অর্থবান লোকেরা যে-ভাবে জীবন যাপন করতো সেটা কেমন যেন অস্বাস্থ্যকর। উদ্বৃত্ত জিনিসের ছড়াছড়ি। অতিরিক্ত আসবাব, অনেক বেশি ঘর, সূক্ষ্মতার বাড়াবাড়ি আর নিজেকে খুব বেশি জাহির করার চেষ্টা। আমরা যে আরো কম ঘর ব্যবহার করছি এতে আমি খুব সুখী হয়েছি। আরো ঘর ছেড়ে দেওয়া উচিত আমাদের।’

‘ঐ ঠুটলিটা কিসের? কী যেন বেরিয়ে আছে ওর ভেতর থেকে, পাখির ঠোঁটের মতো মনে হচ্ছে। আরে, হাঁস! কী মজা! বুনো হাঁস! কোথায় পেলো? নিজের চোখকে নিজে বিশ্বাস করতে পারছি না আমি। এ যে রাজ্যপাট পাওয়ার মতো ভাগ্যের ব্যাপার।’

‘ট্রেনে একজন এটা আমাকে দিলে। পরে বলবো তোমাকে, সে অনেক কথা। কী করবো? রান্নাঘরে রাখবো?’

‘হ্যাঁ, নিশ্চয়ই। নিউশাকে এক্ষুনি নিচে পাঠিয়ে দেবো, পালক ছাড়িয়ে পরিষ্কার করে রাখবে। সবাই বলছে এই শীতে নাকি ভয়াবহ সব ব্যাপার হবে—দুর্ভিক্ষ, ঠাণ্ডা।’

‘হ্যাঁ, এই একই কথা সবখানে। এইমাত্র ট্রেনের জানলা দিয়ে বাইরে তাকিয়ে থাকতে-থাকতে আমার মনে হ’লো সারা পৃথিবীতে এমন কী আছে যা কাজের চাইতে, পারিবারিক জীবনের শান্তির চাইতে মূল্যবান? বাকিটা তো আমাদের হাতে নেই। মনে তো হয় না খারাপ সময় আসছে। কিছু লোক বেরিয়ে পড়তে চাইছে— দক্ষিণে, ককেশাসে, নয়তো আরো দূরে কোথাও যাবার কথা ভাবছে তারা। আমি নিজে অবশ্য তা করবো না। বয়স্ক মানুষের উচিত দাঁত কামড়ে প’ড়ে থেকে দেশের ভাগ্যের অংশ গ্রহণ করা। তোমার কথা অবশ্য আলাদা। ঈশ্বরের কাছে প্রার্থনা করি তোমাকে যেন এ-সব সহ্য করতে না হয়। কোনো নিরাপদ জায়গায় তোমাকে পাঠিয়ে দেবো আমি—থরো, ফিনল্যান্ডে।—কিন্তু সিঁড়ির ধাপে-ধাপে দাঁড়িয়ে যদি আধ ঘণ্টা ধরে গল্প কবি আমরা, তাহলে আর কোনোদিনই ওপরতলায় পৌছতে হবে না।’

‘এক মিনিট দাঁড়াও। বলতে একেবারে ভুলে গিয়েছিলাম। তোমার জন্য একটা আশ্চর্য সুখের আছে। নিকোলে নিকোলেভিচ ফিরে এসেছেন।’

‘কে নিকোলে নিকোলেভিচ?’

‘কোলিয়া-মামা।’

‘টোনিয়া! সত্যি? হ’তেই পারে না। কী করে তা সম্ভব?’

‘সত্যি-তা-ই। উনি সুইজারল্যান্ডে ছিলেন। পণ্ডন ঘুরে ফিনল্যান্ড হ’য়ে এসেছেন।’

‘টোনিয়া! আমাকে খ্যাপাচ্ছে না তো! তোমার সঙ্গে দেখা হয়েছে ঠুর? কোথায় আছেন উনি? এখনই ঠুর দেখা পাওয়া যায় না, এই মুহূর্তে?’

‘অতো অধৈর্য হোয়ে না। গ্রামের দিকে কাদের সঙ্গে যেন আছেন উনি। পরশু ফিরে আসবেন কথা দিয়ে গেছেন। উনি অনেক বদলে গেছেন কিন্তু। তুমি নিরাশ হবে। পথে পিটার্সবার্গে থেমেছিলেন, বলশেভিক হ’য়ে গেছেন। ঠুর সঙ্গে তর্ক করতে-করতে বাবার গলা রীতিমতো চিরে যায়। সত্যি, প্রত্যেক ধাপেই থেমে পড়ছি আমরা। এসো। তুমিও তাহ’লে শুনছো যে খারাপ সময় আসছে—কী বলে লোকেরা? —পরিশ্রম, বিপদ, অনিশ্চয়তা?’

‘আমি নিজে তা-ই মনে করি। কিন্তু তাতেই বা কী? আমরা একটা ব্যবস্থা ক’বেই নেবো, এখানেই তো সব-কিছুর শেষ হ’তে পারে না। অপেক্ষা করবো আমরা, দেখবো কী হয়—অন্য সকলেও তা-ই করবে।’

‘জ্বালানি কাঠ, আলো—এ-সব কিছুই নাকি পাওয়া যাবে না। টাকা নাকি তুলে দেবে ওবা। কোনো কিছুই আমদানি হবে না। দ্যাখো, আমরা আবার দাঁড়িয়ে পড়েছি। চ’লে এসো। শোনো, সবাই বলে আর্বাটে নাকি আশ্চর্য সব লোহার স্টোভ পাওয়া যায়। ছোটো স্টোভ। একটা খবরের কাগজ পোড়ালে একবেলার রান্না হ’য়ে যায় নাকি। ঠিকানাটা আছে আমাব কাছে। সব ফুরিয়ে যাবার আগে আমাদের একটা কিনে ফেলতে হবে।’

‘ঠিক আছে। কিনবো। খুব ভালো ভেবেছো। কিন্তু ভাবো একবার, কোলিয়া-মামা! আমি ভাবতেই পারছি না।’

‘আমার কী মতলব শুনবে? ওপরতলার একটা দিক আলাদা ক’রে নেবো আমবা, ধরো দুটো কি তিনটে পাশাপাশি ঘর, সেগুলো আমরা রাখবো আমাদের জন্য, বাবার, সশার আর নিউশার জন্য, বাকি অংশটা সব ছেড়ে দেবো। একটা পাটিশন দিয়ে আলাদা দরজা ক’রে নেবো, ফ্ল্যাটের মতো আরকি। জানলা দিয়ে একটা পাইপের ব্যবস্থা ক’রে ঐ লোহার স্টোভটা রাখবো মাঝখানের ঘরে, কাপড় কাচা, রান্না, অতিথি আপ্যায়ন—সব ঐ এক ঘরে হবে। এইভাবে জ্বালানি ঝাটিয়ে ঈশ্বরের দয়ায় শীতকালটা হয়তো কাটিয়ে দিতে পারবো।’

‘নিশ্চয়ই পারবো। কোনো প্রশ্নই ওঠে না। এটা খুব চমৎকাব ভেবেছো। —আর-একটা কথা শুনবে? আমরা গৃহপ্রবেশের উৎসব কববো। হাঁসটা ঝাধবো, কোলিয়া-মামাকে নিমন্ত্রণ করা হবে।’

‘আঃ, চমৎকার হবে। গর্ডনকে বলবো কিছু অ্যালকহল নিয়ে আসতে। কোনো-একটা ল্যাবরেটরি থেকে জোগাড় করতে পারবে সে। দ্যাখো, এই ঘরটার কথাই ভাবছিলাম আমি। ঠিক আছে? স্যাটুকেসটা নামিয়ে রাখো, তারপর নিচে গিয়ে তোমার বুড়ি নিয়ে এসো। গৃহপ্রবেশে ডুডোরভ আর শুরা স্নেজিসেরকেও বলা যায়। তোমার মত আছে তো? বাথরুম কোথায় তা তো ভুলে যাওনি? গিয়ে একটু বীজাণুনাশক কিছু ঢেলে এসো গায়ে। তুমি যতোকণে ও-সব সারবে, আমি ততোকণে সশাকে নিয়ে আসছি আর নিউশাকে নিচে পাঠাছি, আমরা তৈরি হ’য়ে তোমাকে ডাকবো।’

৩

মস্কোতে ইউরির কাছে প্রধানতম অভিনব বস্তু হ’লো তার ক্ষুদ্র শিশুপুত্র। তার জন্মের প্রায় সঙ্গে-সঙ্গে ইউরির ডাক পড়েছিলো, কাজেই সে প্রায় চেনেই না তাকে।

টোনিয়া তখনও হাসপাতালে—একদিন ইউরি তাকে দেখতে গেছে, তখনই ইউনিফর্ম গায়ে চড়েছে তার, অল্প কয়েকদিনের মধ্যেই মস্কো ছাড়তে হবে। বাচ্চাদের খাওয়ার সময় হ’য়ে গিয়েছিলো ব’লে তাকে ভেতরে ঢুকতে দেওয়া হ’লো না।

বহিরের ঘরে বসেছিলো সে। প্রসূতিবিভাগের পেছনের গলির প্রান্তে নার্সারি থেকে দশ-বারোটি শিশুর তীক্ষ্ণ চীৎকার একসঙ্গে ভেসে এলো। সদ্যোজাত শিশুদের যাতে ঠাণ্ডা না লাগে সেজন্য করিডোর থেকে বেরিয়ে এসে কয়েকটি নার্স দ্রুত এগিয়ে গেলো, শূটলির মতো ক'রে দুই বগলে দু-জনকে নিয়ে তাদের নিয়ে চললো যার-যার মার কাছে।

‘ওয়া আ, ওয়া আ,’ নির্লিপ্ত অনুভূতিহীনভাবে কেঁদে চললো বাচ্চারা, যেন এটা তাদের প্রাত্যহিক কর্তব্য। কেবল একটা গলা অন্য সকলের স্বরকে ছাপিয়ে উঠেছিলো। সেই গলা থেকেও এই একই চীৎকার বেরুচ্ছে, ‘ওয়া আ, ওয়া আ,’ অন্যদের চাইতে সে-গলাতে এমনকি বেশি যন্ত্রণার চিহ্নও নেই, কিন্তু অন্যদের চাইতে এই শিশুর গলার স্বর আরো গভীর, কর্তব্য হিসেবে নয়, ইচ্ছে ক’রে, হিম শত্রুতা নিয়ে সে কাঁদছে।

ইউরি ইতিমধ্যেই ঠিক করেছিলো যে স্বশুরের সম্মানে তার ছেলের নাম রাখবে আলেকজান্ডার—ছোটো ক’রে ডাকা যাবে সাশা ব’লে। কী কারণে যেন সে ভাবলে ঐ বিশেষ গলাটি তারই ছেলের; তখনই সেই স্বরের ওপর চরিত্রের ছাপ পড়েছে, তার মধ্যে যেন নিহিত আছে বিশেষ একজন মানুষের ভবিষ্যৎ ব্যক্তিত্ব ও নিয়তি; নিজস্ব শব্দের রং ধরেছে সেই স্বরে, শিশুর ‘আলেকজান্ডার’ নামের আমেজ—ইউরির তা-ই মনে হ’লো।

ভুল করেনি সে। পরে দেখা গেলো সত্যিই সেই গলা সাশার। ছেলের বিষয়ে এই তথ্যটি সে প্রথম জেনেছিলো।

তারপর ছেলেকে দেখলো যুদ্ধক্ষেত্রে থাকতে টোনিয়া যে-ছবি পাঠিয়েছিলো তাতে, মোটাসোটা, হাসিখুশি, মদনের ধনুকের মতো ঝাঁক ঠোট, ঝাঁক পা দুটি কব্জলের ওপর রেখে দাঁড়িয়ে আছে, এমন ভঙ্গিতে মুঠি তুলে আছে যেন চাষিদের কোনো নাচ নাচছে সে। তখন এক বছর বয়স ছিলো তার, সবে ইটতে শিখেছে; এখন দু-বছর হয়েছে, শুরু করেছে কথা বলতে।

সুটকেসটা তুলে নিয়ে জানলার ধারের তাসখেলার টেবিলের ওপর রেখে সে খুলতে শুরু করলে। আগে এই ঘর কিসের জন্য ব্যবহার করা হ’তো কে জানে। এখন ঘরটা অচেনা লাগছিলো তার। টোনিয়া নিশ্চয়ই আসবাব বদলেছে, কিংবা দেয়ালের কাগজ, নয়তো অন্য কোনোভাবে সাজিয়েছে ঘরটা।

দাড়ি কামাবার বাস্‌টা বের করলে সে। জানলার ঠিক উষ্টো দিকে গির্জাতে ঘণ্টা বাঁধার থামের ঝাঁকে থমকে আছে পূর্ণিমার উজ্জ্বল চাঁদ। সুটকেসের ওপরের তাকে যে-সব কাপড়চোপড় আর বই ছিলো চাঁদের আলো যখন তার ওপর এসে প’ড়ে ঘরের আলো বদলে দিলো, তখন ইউরি বুঝতে পারলো এখন সে কোথায়।

আগে এ-ঘরে বাড়তি জিনিসপত্র রাখা হ’তো। গাদা করা হ’তো ভাঙা চেয়ার টেবিল, এখানেই আনা রাখতেন তাঁর সংসারের হিসেবের কাগজপত্র, আর গ্রীষ্মকালে শীতবস্ত্রে-ঠাসা ট্রাঙ্ক। তিনি যতোদিন বেঁচেছিলেন ততোদিন মেঝে থেকে ছাদ পর্যন্ত আজ-বাজে জিনিস বোঝাই থাকতো, বাচ্চারা এ-ঘরে ঢুকতে পেতো না। শুণ্ড ক্রিসমাস বা ইস্টারের সময়কার উৎসবে বাড়িতে যখন বাচ্চাদের বিরাট ভিড় হ’তো আর পুরো ওপরতলাটা ছেড়ে দেওয়া হ’তো তাদের, তখন খোলা হ’তো এই ঘর—তারা নানারকম সেজে, শোলা দিয়ে মুখে কালো রং ক’রে, টেবিলের তলায় লুকিয়ে ডাকাত-ডাকাত খেলতো।

দাঁড়িয়ে-দাঁড়িয়ে ইউরি সে-সব কথা ভাবলো, তারপর পেছনের সিঁড়ি দিয়ে নিচে নেমে গেলো হলঘর থেকে তার ঝড়িটা নিয়ে আসতে।

রান্নাঘরে স্টোভের সামনে উব-হাটু হ’য়ে বসে নিউশা একটা খবরের কাগজের ওপর হাঁসের পালক ছাড়াচ্ছে। ট্রাঙ্ক নিয়ে স্বাবার জন্য ইউরি ঘরে ঢুকতেই লাল হ’য়ে লজ্জিত সুন্দর ভঙ্গিতে অপ্রাণ থেকে পালক ঝাড়তে-ঝাড়তে উঠে দাঁড়ালো সে, ইউরিকে অভিবাদন ক’রে সাহস্যা

করতে এগিয়ে এলো। তাকে ধন্যবাদ জানিয়ে ইউরি বললে সে একাই পারবে, তারপর উঠে গেলো ওপরে। কয়েকটা ঘর ছাড়িয়ে একটু দূরের একটা ঘর থেকে তার স্ত্রী ডাকলে:

‘এবার চলে এসো, ইউরা।’

সে সাশাকে দেখতে গেলো।

নার্সারি হয়েছে টোনিয়ার পুরোনো স্কুল-ঘরে। খাটের বাচ্চাটি ফোটোগ্রাফের বাচ্চাটির মতো অতো সুন্দর নয়, কিন্তু ইউরির মা, স্বর্ণত মারিয়া নিকোলায়েভনা জিভাগোর জীবন্ত প্রতিমূর্তি সে, ইউরির কাছে তার মায়ের যতো ছবি আছে তাদের সকলের চাইতে তার ছেলের মুখের সঙ্গে তার মার মুখের মিল বেশি।

‘এই যে বাবা, এই যে তোমার বাবা, লক্ষ্মী ছেলের মতো হাত নাড়ো তো,’ টোনিয়া বলছিলো। খাটের একটা পাশ সে নিচু ক’রে দিলে যাতে ছেলেকে চুমু খেতে ইউরির অসুবিধে না হয়।

ছোট্ট সাশা অমসৃণ গালের এই আগন্তুকটিকে—যাকে দেখে শুধু ভয়ই নয়, বিতৃষ্ণাও বোধ করছিলো সে—কাছে এসে তার ওপর ঝুঁকে পড়তে দিলো, তারপর সারা শরীরে ঝাঁকুনি দিয়ে, মার জামার সামনেটা এক হাতে আঁকড়ে ধ’রে, সক্রোধে অন্য হাতটি তুলে তার মুখে চড় বসিয়ে দিলে। নিজের সাহসে নিজেই ভয় পেয়ে গেলো সে, টোনিয়ার কোলে ঝাঁপিয়ে প’ড়ে ব্যাকুলভাবে কেঁদে উঠলো।

‘দুষ্ট, দুষ্ট!’ টোনিয়া বকলো তাকে। ‘এ-রকম করতে হয় না, সাশেকা। বাবা কী ভাববেন? ভাববেন সাশা একটা দুষ্ট ছেলে। দেখি তো তুমি কেমন চুমু খেতে পারো, বাবাকে চুমু খেয়ে দাও তো। কেঁদো না, বোকা ছেলে, কিছু হয়নি!’

‘ওকে ছেড়ে দাও, টোনিয়া,’ ইউরি বললে। ‘ওকে ছাটিয়ে না, আর তুমি অতো বিচলিত হচ্ছে কেন? আমি জানি আজ্ঞে-বাজ্ঞে সব কথা ভাবছো তুমি—ভাবছো এর কোনো মানে আছে, খারাপ লক্ষণ এটা—কিন্তু ও-সব বাজ্ঞে কথা। এটা তো নিতান্ত স্বাভাবিক। সাশা তো কখনো দ্যাখেনি আমাকে। কাল ও ভালো ক’রে আমাকে দেখবে, তখন ভাব হবে আমাদের, তারপর দেখো কী চমৎকার জমিয়ে তুলবো ওর সঙ্গে।’

তবু, কেমন এক বিষণ্ণতা কেমন এক অশুভ লক্ষণের অনুভূতি নিয়ে ইউরি ঘর থেকে বেরোলো।

৪

এর পরের কয়েকদিনে ইউরি বুঝতে পারলে কতো একা সে। দোষ কারুর নয়, সে ভাবলে। যা চেয়েছিলো তা-ই তো সে পেয়েছে।

কেমন অদ্ভুত বিমর্ষ আর বিবর্ণ হ’য়ে গেছে তার বন্ধুবান্ধবেরা। তাদের মধ্যে এমন একজনও নেই নিজের দৃষ্টিভঙ্গি আর নিজের জগৎ যে অপরিবর্তিত রেখেছে। তার স্মৃতিতে আরো অনেক স্পষ্ট ছিলো তারা। অতীতে সে নিশ্চয়ই তাদের গুণাবলী অতিরঞ্জিত ক’রে দেখেছে।

সহজ ছিলো ও-ভাবে দেখা যতোদিন পর্যন্ত লোকে দরিদ্রকে শোষণ ক’রে নিজেদের দোষ ক্রটি আর বাতিলকে প্রশ্রয় দিতে পেরেছে। যখন মুষ্টিমেয় কয়েকজন মানুষ উপভোগ করেছে অকর্মণ্যতা আর আলস্যের অধিকার, আর অধিকাংশ মানুষ কষ্ট পেয়েছে, তখন সত্যিকার চরিত্র ও মৌলিকতার এক ভূয়ো আদর্শ সৃষ্টি হ’তে পারতো।

কিন্তু নিম্নশ্রেণীরা যেই জেগে উঠলো, আর ধনীরা বঞ্চিত হ’লো তাদের সুখ-সুবিধে থেকে, অমনি কী দ্রুত গতিতেই না মিশিয়ে গেলো সেই সব মানুষেরা। কী নিষ্ক্রিয়ভাবে, কী-রকম

সানন্দে, স্বাধীন চিন্তার অভ্যাসকে তারা বর্জন করলো—অবশ্য সেই অভ্যাস কখনোই হয়তো সত্যি-সত্যি ছিলো না তাদের।

মাত্র যে-ক'টি লোকের সঙ্গে ইউরি স্বচ্ছন্দ হ'তে পারলো তারা হ'লো টোনিয়া, টোনিয়ার বাবা, আর তাঁর দু-তিন জন সহকর্মী, যারা সহজ, সাধারণ কাজকর্ম করেন, বাড়াবাড়ি না-ক'রে, বড়ো-বড়ো কথা না-ব'লে বিনীত ও ভদ্র ব্যবহার করেন তাদের সঙ্গে।

ইউরি ফিরে আসার কয়েকদিন পরে, যেমন ঠিক করেছিলো তারা, হাঁস আর ভদকার সেই পাটি দেওয়া হ'লো। ততোদিনে, পাটিতে যারা-যারা এলেন তাদের সকলের সঙ্গেই দেখা হ'য়ে গেছে তার, তাই ভোজটা ঠিক পুনর্মিলনের হ'লো না।

এই দুর্ভিক্ষের সময় মস্ত বড়ো হাঁসটি এক অশ্রুতপূর্ব বিলাসিতা, কিন্তু সঙ্গে খাবার জন্য কোনো রুটি না-থাকায় তার রাজকীয়তা যেন অর্থহীন, এমনকি অগ্রীতিকর ব'লে মনে হ'লো।

কাচের ছিপিওলা ওষুধের বোতলে অ্যালকহল এনেছিলো গর্ডন—কালো বাজারে খুব চালু জিনিস সেটি। বোতলটাকে আঁকড়ে বইলো টোনিয়া, অল্প-অল্প অ্যালকহলের সঙ্গে ইচ্ছেমতো কম বেশি জল মেশালো। মিশোলটা হয় খুব জোলো, নয় খুব বেশি কড়া হ'য়ে যাচ্ছিলো, আর কোনো অজানা কারণে. সমানে কড়া হ'লে যা হ'তো তার চাইতে ঢের বেশি উত্তেজক ব'লে মনে হ'লো পানীয়টাকে—সেটাও বিরক্তিকর।

কিন্তু সবচেয়ে যেটা খাবাপ সেটা হ'লো এই যে বাইরের অবস্থার সঙ্গে তাদের উৎসবের সুরে কোনো মিল ছিলো না। রাস্তাব ওপারের কোনো বাড়িতে কেউ এই সময় এ-খরনের পানাহার করছে তা কল্পনা করাও অসম্ভব। বাইরে, জানলার ওপিঠে প'ড়ে আছে বোবা, অন্ধকার, ক্ষুধার্ত মস্তো: দোকানপাট সব বন্ধ, আর তার মধ্যে পাখির মাংস আর ভদকা!—লোকে সে-কথা এমনকি ভাবতেও ভুলে গেছে।

তাই মনে হ'লো অন্য সকলের মতো বেঁচে থাকাই বেঁচে থাকার সত্যিকার উপায়, নিজেকে নিশ্চিন্ত ক'রে মিশিয়ে দাও অন্য সকলের জীবনে, তোমার যে-সুখে সবাই অংশ নিতে পারে না সে-সুখ সুখ নয়, আর তাই হাঁস আর ভদকা, যদি তা শহরের একমাত্র হাঁস আর ভদকা হয়, তবে তারা এমনকি হাঁস আর ভদকাও থাকে না আর।

অতিথিদের কাছেও কোনো সাহুনা মিললো না। বেশ লাগতো গর্ডনকে, যখন সে ভারি-ভারি বিষয় নিয়ে চিন্তা করতো, আব চিন্তাগুলিকে প্রকাশ করতো বাধো-বাধো বিমর্ষ 'ভাষায়; তখন সে ছিলো ইউরির প্রাণের বন্ধু, আর স্কুলেও সবাই তাকে ভালবাসতো।

কিন্তু এখন গর্ডন তার নিজের সেই মানসচিহ্নকে আর পছন্দ করছে না। চেষ্টা করছে সেটাকে সংশোধন করাব, কিন্তু কিছুতেই কৃতকার্য হচ্ছে না। ফুর্তিবাজ হওয়ার জন্য বন্ধপরিকর হয়েছে সে, একটা পর একটা তথাকথিত মজার গল্প ব'লে চললো, আর কেবলই বলতে লাগলো 'কী মজা!' 'কী হাসির ব্যাপার!' আগে এ-সব ভাষা তার শব্দচয়নের অন্তর্ভুক্ত ছিলো না, কেননা গর্ডন কখনো জীবনটাকে একটা আমোদের ব্যাপার ব'লে দেখেনি।

যতক্ষণ তারা ডুডোরভের জন্য অপেক্ষা করছিলো, ততক্ষণে গর্ডন ডুডোরভের বিয়ের বিষয়ে চলতি গুজবটা আওড়ালে। ইউরি তখনো সেটা শোনেনি।

জানা গেলো, ডুডোরভ এক বছর বিবাহিত জীবন যাপন করার পর স্ত্রীর কাছ থেকে বিচ্ছিন্ন হ'য়ে গেছে। গল্পটির সুদূরপরাহত রসিকতা হ'লো এই যে ডুলক্রমে ডুডোরভের যখন যুদ্ধক্ষেত্রে ডাক পড়েছিলো তখনই সব-কিছুর শুরু। সে যখন আর্মিতে যোগ দিয়েছে আর এদিকে ক'র্তায়া খোজ খবর নিচ্ছেন তার বিষয়ে, তখন অন্যমনস্কতার জন্য, আর উর্ধ্বতন কর্মচারীদের সেলাম ঠেকতে ভুলে যাওয়ার জন্য অন্তহীন কামেলায় পড়তে হয়েছে তাকে।

ছুড়ো পাবার পর মাসকয়েক সে সর্বত্র শুধু এপোলেং দেখতে পেতো আর হাত ঝাঁকাতো;

অসম্ভব বিক্ষিপ্ত হ'য়ে গেলো তার মন, প্রায় স্নায়ুরোগে ধরলো তাকে। শোনা যায়, ঠিক সেইরকম সময় ভল্গা-তীরবর্তী এক স্টেশনে দুটি মেয়ের সঙ্গে তার দেখা হয়, দুই বোন তারা, সে যে-সিঁমারে যাবে তারাও সেটার জন্য অপেক্ষা করছিলো; চারপাশে ঘূর্ণমান ইউনিফর্ম দেখে-দেখে অন্যমনস্ক হ'য়ে পড়েছিলো সে, তার ওপর সৈনিক জীবনের খোয়ারি চলছিলো; তারই ফলে ডুডোরভ দু'জনের মধ্যে ছোটোটির প্রেমে প'ড়ে গেলো এবং অবিলম্বে বিবাহের প্রস্তাব করলো। 'মজার ব্যাপার, নয় কি?' গর্জন বললে, কিন্তু দরজার বাইরে নায়কের গলার আওয়াজ পাওয়া গেলো ব'লে গল্পের শেষটা ছাঁটতে হ'লো তাকে। ডুডোরভ ভেতরে এলো।

সেও বদলেছে— কিন্তু উল্টো দিক থেকে। বহুরূপীর মতো অস্থির আর খেয়ালি ছিলো সে, এখন সে রূপান্তরিত হয়েছে একাগ্রচিন্ত পণ্ডিতে।

বালক বয়সে, এক রাজনৈতিক বন্দীর পলায়নে সাহায্য করার অভিযোগে সে যখন স্কুল থেকে বিতাড়িত হ'লো, তখন এক আর্ট-স্কুল থেকে আরেক আর্ট-স্কুলে ঘুরে বেড়িয়েছিলো সে, শেষ পর্যন্ত প্রাচীন সাহিত্য ও সংস্কৃতিই তার বিষয় হ'লো। তার বন্ধুদের পরে, যুদ্ধের মধ্যে ডিগ্রি নিলে সে, তারপর রুশ ইতিহাস ও বিশ্ব ইতিহাসের লেকচাবারের পদ পেলো। সে এখন দুটি বই লিখতে ব্যস্ত—একটি 'ভীষণ ইভান'-এবং ভূস্বত্বনীতি বিষয়ে, আর একটি 'স্ট্রা-জুস্ত' সম্বন্ধে।

সবরকম বিষয় নিয়েই অমায়িকভাবে আলোচনা করলে সে, তার শাস্ত্র, একটু নাকি-গলার আওয়াজে একবারও ওঠানামা হ'লো না, যেন বস্তুত করছে এমনভাবে তার চোখের স্পন্দালু দৃষ্টি কোনো স্থির বিন্দুতে তাকিয়ে রইলো সারাক্ষণ।

সন্ধ্যার শেষের দিকে, পাটি যখন খুব জমে উঠেছে, সবাই চ্যাচাচ্ছে আর তর্ক করছে, তখন সবোগে ঘরে ঢুকলেন শুরা স্ট্রিজিঙ্গের; চিরাচরিতভাবে সকলকে খাপাতে শুরু ক'রে গোলমাল ও উত্তেজনার মাত্রা অনেক বাড়িয়ে দিলেন তিনি। ডুডোভ, যে ইউরিক ছেলেবেলার বন্ধু হওয়া সত্ত্বেও কখনো তাকে 'তুমি' ব'লে সম্বোধন করেনি, সে 'আপনি' ব্যবহার ক'রেই ইউরিকে অনেকবার জিজ্ঞেস করলে, 'যুদ্ধ ও শান্তি' ও 'আমার মেরুদণ্ড এক বাঁশি' মায়াকভস্কির^১ এই কবিতা দুটি সে পড়েছে কিনা।

এই সব গোলমালে ইউরির জবাব শুনতে না-পেয়ে একটু পরে সে আবার প্রশ্ন করলে: "আমার মেরুদণ্ড এক বাঁশি" আর "মানুষ", এই কবিতা দুটি পড়েছেন?"

'আমি তো একবার বললাম, আপনি শোনেন না কিছু। চিরকালই মায়াকভস্কি আমার ভালো লাগে। উনি হলেন ডস্টয়েভস্কির উত্তরাধিকারী। কিংবা মায়াকভস্কি যেন ডস্টয়েভস্কিরই কোনো চরিত্র, যে কবিতা লেখে— তাঁর তরুণ বিদ্রোহীদের মধ্যে কেউ, তাঁর "কাঁচা যুবক" বা ইপলিট বা রাস্কলনিকভ।^২ কী সর্বগ্রাসী কবিত্বশক্তি। আর কী অমোঘভাবে চিরকালের মতো তাঁর বাণী তিনি ঘোষণা করেন! আর সব-কিছুর ওপরে, কী অসম সাহসে তাঁর কথা তিনি ছুঁড়ে দেন সমাজের মুখের ওপর—সমাজ ছাড়িয়ে, আর-একটু দূরে কোনো মহাশূন্যে গিয়ে তারা পড়ে।'

১ Ivan the Terrible (১৫০০-৮৪) : মস্কোর গ্রাণ্ড ডিউক, প্রথম জার পদবীধারী রুশ সম্রাট। এর স্বভাবে ছিলো নিদারুণ নিষ্ঠুরতা ও মনজাপনয় ধর্মবোধের মিশ্রণ; রুশ ইতিহাসে ইনি 'ভীষণ' নামে প্রখ্যাত।—অনুবাদের টীকা।

২ Saint—Just—Louis de (১৭৬৭-৯৪) ফরাসী বিপ্লবের অন্যতম নেতা; রবস্পীয়ের সঙ্গে গিলোটিনে নিহত হন।—অনুবাদের টীকা।

৩ Vladimir Mayakovsky (১৮৯০-১৯৩০) : বিপ্লবোত্তর রাশিয়ায় ইনি ও এসেনিন (Essenin) ছিলেন প্রধান কবি; দু'জনেই আত্মহত্যা করেন। প্যাস্টেরনাক-এর 'Safe Conduct'-এ মায়াকভস্কির আত্মহত্যার মর্মস্পর্শী বিবরণ আছে।—অনুবাদের টীকা।

৪ 'কাঁচা যুবক' : 'A Raw Youth' উপন্যাসের প্রতি উল্লেখ; ইপলিট : 'Crime and Punishment'-এর নায়ক। তিনটি চরিত্রই তরুণবয়স্ক ও দ্রোহপ্রবণ।—অনুবাদের টীকা।

কিন্তু সে-সন্ধ্যার সবচেয়ে বড়ো আকর্ষণ অবশ্য কোলিয়া-মামা। টোনিয়া ডুল করেছিলো, উনি শহরের বাইরে ছিলেন না, ভাঙ্গের সঙ্গে একই দিনে ফিরে এসেছিলেন। ইতিমধ্যে বেশ কয়েকবার দেখা হয়েছে তাঁর সঙ্গে, প্রাথমিক 'ওঃ—আঃ'র পাট চুকেছে, তাঁর সঙ্গে সে প্রাণের সুখে কথা বলেছে, হেসেছে।

প্রথম দেখা হলো একঘেয়ে, ধূসর এক রাত্রে; ধুলোর মতো ঝিরঝিরি বৃষ্টি পড়ছিলো। ইউরি তাঁর হোটেল দেখা করতে গিয়েছিলো। তখন থেকেই হোটেলওলারা পৌব-কর্তৃপক্ষের সুপারিশ ভিন্ন কাউকে থাকতে দিচ্ছে না, কিন্তু নিকোলে নিকোলেভিচকে সবাই চেনে, পুরোনো সংযোগ এখনো তাঁর কিছু-কিছু বজায় আছে।

হোটেলটা দেখে মনে হয় এমন এক পাগলা-গারদ, যা রোগীদেরই তত্ত্বাবধানে ছেড়ে দেওয়া হয়েছে—এমন শূন্য, বিশৃঙ্খল, আর এমনভাবে আকস্মিকের হাতে সমর্পিত।

ঝাঁট না-দেওয়া ঘরের মতো বড়ো জানলা দিয়ে দেখা যায় পরিত্যক্ত, ভয়াবহ, বিশাল পার্ক তাকিয়ে আছে, হোটেলের সামনের সাধারণ এক পার্ক যেন নয় ওটা, যেন রাতে স্বপ্নের ঘোরে তার দেখা মেলে।

এই পুনর্মিলন ইউরির জীবনের এক দারুণ, অবিস্মরণীয় ঘটনা। তার শৈশবের দেবতাকে দেখেছিলো সে,—সেই শিক্ষক, যিনি বালক—ইউরির মনের ওপর প্রভুত্ব করেছেন।

পাকা চুলে মানিয়েছে কোলিয়া-মামাকে, তাঁর ডিলেটোলা বিদেশী পোশাক চমৎকার গায়ে বসেছে; বয়সেব পক্ষে তিনি খুবই তরুণ এবং সুপুরুষ আছেন।

কিন্তু ঘটনাচক্রে বিশালত্ব যে তাঁর ওপর ছায়া ফেলেছে তা অস্বীকার করার উপায় নেই; তার পাশে তাঁকে অনেক ছোটো ব'লে মনে হয় কিন্তু একবারের জন্যও এইভাবে তাঁকে মাপবার কথা ইউরির মনে হয়নি।

রাজনীতির কথা বলার সময় কোলিয়া-মামার শাস্ত, হালকা, নিরপেক্ষ ভঙ্গিতে ইউরি বিস্মিত হ'লো। এই সময়ে যে-কোনো ক্রশের চাইতে তিনি বেশি আশ্বস্ত আছেন। বোঝা গেলো নতুন আগন্তুক তিনি, সেটা কেমন যেন পুরাকালীন, আর একটু অস্বস্তিকরও।

কিন্তু তাদের পুনর্মিলনের প্রথম কয়েক ঘণ্টার উত্তেজনার মুহূর্তে ও-সব ব্যাপারে নিয়ে মাথা ঘামানোব অবকাশ ছিলো না। রাজনীতি থেকে খুবই ভিন্ন ধরনের কোনো-এক বস্তুর টানে তারা হাসলো আর কাঁদলো, পরস্পরের গলা জড়িয়ে ধরলো, দম বন্ধ ক'রে কথা ব'লে চললো, উত্তেজনায় নিশ্বাস আটকে এলো তাদের।

তারা যে পরস্পরের এতো কাছাকাছি আসতে পেরেছে তার প্রধান কাণ্ড তাদের দু'জনেরই মন সৃষ্টিশীল শিল্পীর। যদিও তারা আত্মীয়, যদিও আবার অতীত জেগে উঠলো তাদের মাঝখানে, স্মৃতিরা ভেসে এলো, পরস্পরের জীবনের নতুন ঘটনা আর পরিবেশের কথা বললো তারা, তবু যে-মুহূর্তে সবচেয়ে মূল্যবান বিষয়ের অবতারণা হ'লো, সেই বিষয়, যা শুধু তারাই জানে যাদের সৃষ্টির ক্ষমতা আছে, সে-মুহূর্তে মিলিয়ে গেলো সব পার্থক্য, আর সংযোগ—আর তারা মামা-ভায়ে নয়, বয়স্ক ও তরুণ দুই মানুষ নয়—তাদের মধ্যে এখন দুই শক্তির, দুই আদিম মূলনীতির আত্মীয়তা।

দশ বছরের মধ্যে নিকোলে নিকোলেভিচ লেখার সমস্যা এবং লেখকের কর্তব্যের অর্থ নিয়ে এতো যুক্তিযুক্তভাবে কথা বলেননি, এমন আর কারো সঙ্গে কথা বলেননি যার সঙ্গে তাঁর ধ্যানধারণার এতো বেশি সাদৃশ্য। আর ইউরিও এমন উপলব্ধি, এমন উদ্দীপনা আর উৎসাহের সান্নিধ্যের আসেনি।

পরস্পরের স্বতঃস্ফূর্ত অনুভূতিকে তাদের উচিত ব'লে মনে হলো আর তাতেই তারা জানলো পরস্পরকে কত গভীরভাবে বোঝে তারা—এবং একথা জেনে এতো বিচলিত ও উৎফুল্ল বোধ

করলো যে তারা চাঁচামেচি ক'রে ছুটোছুটি করলো ঘরের এ-মাথা থেকে ও-মাথা পর্যন্ত, চুল টানলো মাথার, গভীর নিঃশব্দতায় জানলার ধারে দাঁড়িয়ে-দাঁড়িয়ে টোকা মারলো কাচের ওপর।

এই হ'লো তাদের প্রথম দেখা; কিন্তু তারপর থেকে অন্যান্য লোকজনের মাঝখানে দেখা হয়েছে তাদের, আর অন্যদের মাঝখানে কোলিয়া-মামাকে চেনা যায় না।

তিনি যে মস্কোতে অতিথি সে-বিষয়ে পুরোমাত্রায় সচেতন ছিলেন তিনি, এবং সেটা বেশ উপভোগও করছিলেন, যদিও তাঁর দেশ ব'লে তিনি পিটার্সবার্গকেই মানেন, না কি অন্য কোনো শহরকে, তা ঠিক বোঝা গেলো না। ড্রয়িংরুম-রাজনৈতিক হিসেবে সম্মানিত হ'তে তার বেশ ভালোই লাগছিলো, হয়তো ভাবছিলেন ফরাসী বিপ্লবের পরবর্তী প্যারিসে মাদাম রল্লার সাল্লার মতো রাজনৈতিক আড্ডা এখন মস্কোতেও থাকা উচিত।

মস্কোর পেছনের অংশের শান্ত রাস্তার ওপারে তাঁর বান্ধবীদের অতিথি-বৎসল বাড়িতে গিয়ে তাদের এবং তাদের স্বামীদের তিনি খ্যাপাতেন তাদের সীমাবদ্ধ, প্রাদেশিক ও অপরিণত দৃষ্টিভঙ্গির জন্য। খবর-কাগজগুলির সঙ্গে তাঁর ঘনিষ্ঠ পরিচয় আছে ব'লে এখন তিনি তেমনি গর্বিত, যেমন এককালে তাঁর গর্ব ছিলো গ্রীক পুরাণ ও বাইবেল বিষয়ে জ্ঞান আছে ব'লে।

শোনা গেলো, সুইজারল্যান্ডে তিনি ফেলে এসেছেন এক নিম্পত্তিহীন প্রণয়লীলা, অনেক অসমাপ্ত কাজ, আর একটি অসমাপ্ত পুস্তক, এখানে এসেছেন একবার এই ঘূর্ণবর্তে ডুব দেবার জন্য—যদি নিরাপদে নিরুদ্বেগে বেরিয়ে যেতে পারেন তাহ'লে তাঁর ইচ্ছে হ'লো সোজা পথে তাঁর প্রিয় আলসেসের দিকে পাড়ি জমানো।

মতামত বলশেভিক-ঘেঁষা, প্রায়ই দু'জন বামপন্থী সমাজবিপ্লবীর নাম করেন, হাঁদের মতামত তাঁরই মতো, মিরশকা পমর আর সিলভিয়া কোটেরি, এই ছদ্মনামে যারা নানা পত্রিকায় লিখে থাকেন।

'আপনি যা হয়েছেন আজকাল—সত্যিই ভয়ানক, নিকোলে নিকোলেভিচ!' ইউরির স্বপ্নের অসন্তোষ প্রকাশ করলেন, 'ঐ আপনার মিরোশকার দল; একেবারে মলকুও যাকে বলে। আর আছে ঐ লিডিয়া পকরি।'

'কোটেরি', নিকোলে নিকোলেভিচ শুধরে দিলেন, 'আর সিলভিয়া।'

'পকরি হোক আর পপুরি হোক, ও একই ব্যাপার। গোলাপকে যে-নামে ডাকো সে গোলাপই থাকেবে।'

'তবু, নামটা হ'লো কোটেরি,' নিকোলে নিকোলেভিচ ধৈর্যসহকারে ব'লে দিলেন। এই ধরনের কথাপোকথন চলতো তাঁদের মধ্যে:

'আমাদের তর্কটা কী নিয়ে? এ তো স্পষ্টই বোঝা যাচ্ছে যে এক-কথা প্রমাণ করতে হচ্ছে ব'লে লজ্জায় লাল হ'য়ে যাচ্ছেন আপনি। সব ব্যাপারের এটাই হ'লো প্রথম কথা।—যুগ-যুগ ধ'রে লোকে অসম্ভব এক জীবনযাপন করেছে। যে-কোনো ইতিহাসের বই দেখুন। নাম যা-ই হোক—সামন্তপ্রথা, ক্রীতদাস-প্রথা, ধনতন্ত্র, বাণিজ্য—সব কিছুই অবস্থা ছিলো অস্বাভাবিক ও অন্যায্য। বহুদিন ধ'রেই এক-কথা জেনেছে সকলে পৃথিবী নিজেকে প্রস্তুত করেছে সেই আলোড়নের জন্য যা মানবের জীবনে আলো আনবে, প্রত্যেকটি বস্তুকে বসাবে তার উচিত জায়গায়।

'আপনি তো খুব ভালো ক'রেই জানেন যে পুরোনো গড়ন আঁকড়ে থেকে আর কোনো লাভ নেই, মূল ভিত্তি সুদৃঢ় উপড়ে ফেলাতে হবে।—তার ফলে পুরো মহলটাই হয়তো ভেঙে পড়তে পারে।—কিন্তু তাতে কী? সেটা ভয়াবহ ব'লেই যে সেটা ঘটবে না তা তো হ'তে পারে না। এ হ'লো সময়ের প্রশ্ন। অস্বীকার করবেন কী ক'রে?'

'সেটা কথা নয়, এ-বিষয়ে আমি কিছু বলছিলাম না।' আলেকজান্ডার আলেকজান্ড্রোভিচ

মেজাজ ঠিক রাখতে পারেন না, উত্তেজিত তর্ক শুরু হ'য়ে যায় এর পর।

'আপনার পপুরি আর মিরশকার মতো লোকদের বিবেক ব'লে কিছু নেই। তারা বলে এক কথা, করে আরেক কাজ। যা-ই হোক, আপনার যুক্তিটা কোথায়? এর মধ্যে তো কার্য-কারণ সম্বন্ধ কিছু নেই। না, এক মিনিট দাঁড়ান, আমি একটা জিনিস দেখাবো আপনাকে,' ব'লে তিনি একটা খবরে-কাগজ খুঁজতে শুরু করেন, তাতে নাকি একটা লেখা বেরিয়েছিলো, যার বক্তব্যগুলি পরস্পরবিরোধী—লেখার টেবিলের দেয়ালে বাড়ি মেরে, কলরব সৃষ্টি ক'রে, নিজের বাণিতাকে চেতিয়ে তোলেন তিনি।

আলেকজাণ্ডার আলেকজান্ড্রোভিচ চাইতেন যে তাঁর কথা বলার সময় কিছু-একটা বাধা পড়ুক, তাহ'লে তাঁর আমতা-আমতা ক'রে কথা বলবার একটা কৈফিয়ৎ হয়। এই কথা বলার বাতীক তাঁকে তখনই পেয়ে বসে যখন তিনি হারানো কিছু খুঁজছেন—হয়তো অল্প-আলোর ক্রোকরুমে তাঁর আরেক পাটি বরফের জুতো—কি হাতের ওপর তোয়ালে ফেলে বাথরুমের দরজার সামনে দাঁড়িয়ে আছেন, কি খেতে ব'সে একটা ভারি ডিশ অন্যদের দিকে এগিয়ে দিচ্ছেন, কি মদ ঢেলে দিচ্ছেন বন্ধুদের গ্লাসে।

তাঁর কথা শুনতে ভালোবাসে ইউরি। গ্রোমেকোদের এই পরিচিত, পুরোনো মস্কোর টানা সুর আব নরম, ঘর্ঘরে র-এর উচ্চারণ ভালো লাগে তার।

আলেকজাণ্ডার আলেকজান্ড্রোভিচের প্রজাপতি-টাই যে-ভাবে তাঁর গলার বাইরে ঝুলে থাকে, তাঁর নিচের ঠোঁটের ওপর, ছাঁটা গোঁফ নিয়ে ওপরের ঠোঁটটিও বেরিয়ে থাকে ঠিক সেইভাবে। এই দুটি বস্তুতে যেন কী এক মিল আছে, আর সেজন্যই কেন জানি তাঁর চেহারা য এক হৃদয়স্পর্শী, শিশুসুলভ, বিশ্বাসপরায়াণ সারলা আছে।

উৎসবের রাতে শুভ শ্লেজিসের খুব দেরি ক'রে এসেছিলেন: এক সভা থেকে সোজা এসেছেন, পরনে স্যুট এন্ড পুরুষের টুপি। লম্বা-লম্বা পা ফেলে ঘরে ঢুকলেন তিনি, এবং আসামাত্র অভিযোগ ও দোষারোপ করতে শুরু করলেন।

'কেমন আছো তুমি, টোনিয়া? কেমন আছো, আলেকজাণ্ডার? না ব'লে পারছি না এই ব্যাপারটা বড়ো বিস্তীর্ণ। সারা মস্কো জানে যে সে ফিরেছে, সবাই কথা বলছে এ নিয়ে, আর তুমি কিনা আমাকে জানাওনি এতোদিন!

বেশ, বেশ আমি যথেষ্ট যোগ্য নই বোধহয়। যা-ই হোক, কোথায় সে, আমাদের ইউরা কোথায়? তার কাছে যেতে দাও আমাকে।—এই যে, আছো কেমন? আমি পড়েছি, চমৎকার, এক বর্ণও বুঝতে পারিনি, কিন্তু সমস্তটা প্রতিভার স্বাক্ষর অস্বস্ত স্পষ্ট।—কেমন আছেন, নিকোলে নিকোলেভিচ?—একুনি আসছি তোমার কাছে, বাবা ইউরা, তোমার সঙ্গে আমার কথা বলা দরকার।—কী খবর, বাচ্চারা? আরে গোগোচকা, প্যাকপ্যাক-হাস—তুমিও এখানে? (কথাটা বলা হ'লো গ্রোমেকোদের এক দূর আত্মীয়কে, যে প্রত্যেক নতুন খ্যাতিমানের প্রতি ভক্তিতে বিহ্বল, যে বোকার মতো হাসে ব'লে প্যাকপ্যাক-হাস নাম পেয়েছে, আবার দেহের উচ্চতা ও কৃশতার জন্য যাকে ফিতে-কুমি ব'লেও ডাকে কেউ-কেউ) খুব খাওয়া-দাওয়া হচ্ছে—না? এইবার ধরবো তোমাকে। বুঝলে, তোমরা কী হারাচ্ছেো তা তোমরা জানো না! তোমরা কিছু জানো না, কিছু দ্যাখেনি। শুধু যদি জানতে কী ঘ'টে যাচ্ছে, কী হচ্ছে এই পৃথিবীতে! খাও, একটা সত্যিকার জনসভা দেখে এসো, বইয়ের নয় বাস্তবের শ্রমিক, আর সৈন্যদের সভা। "জয়ী না-হওয়া পর্যন্ত মহানভাবে আমরা যুদ্ধ করবো," একথা তাদের কাছে একবার ব'লেই দ্যাখো না! তোমারই মহান সমাপ্তি ঘটিয়ে দেবে ওরা! এইমাত্র এক নাবিকের বক্তৃতা শুনছিলেন—ইউরি, তুমি বাছা একেবারে পাগল হ'য়ে যেতে। কী আবেগ! কী একাগ্রতা!

শুভ্রা সামনে বাধা পাচ্ছিলেন। সবাই চ্যাচাচ্ছে। ইউরির কাছে চ'লে গেলেন তিনি, তাব হাত জড়িয়ে ধ'রে, মুখের খুব কাছে মুখ এনে চোঙের মধ্য দিয়ে কথা বলাব মতো কানে-তালা-ধরানো স্বরে বললেন, 'আমার সঙ্গে চ'লে এসো, ইউরা লক্ষ্মীটি, আমি তোমাকে দেখাবো প্রকৃত জনগণকে।

আস্টিউসের মতো তুমিও ধরিত্রীকে অনুভব করবে, এ যে তোমাকে করতেই হবে। ও-ভাবে তাকিয়ে আছো কেন আমার দিকে? আমি হচ্ছি বুড়ো যুদ্ধের ঘোড়া—জানতে না তুমি বেস্টজেন্ড-এর' পুরোনো ছাত্রী আমি। জেলে গিয়েছি, ব্যারিকেডে দাঙ্গা করেছি।—কী, ভাবছো কী? কিন্তু সত্যি, জনসাধারণকে আমরা একেবারেই চিনি না। আমি এই মাত্র সেখান থেকেই আসছি, ঠিক কথাই ভেবেছি আমি। ওদের জন্য একটা লাইব্রেরি ক'রে দিচ্ছি।'

পান করছিলেন তিনি এবং স্পষ্টতই একটু নেশা হচ্ছিলো তাঁর। কিন্তু এদিকে ইউরিব মাথাও ঘুরতে শুরু করেছে। সে এতোকক্ষ লক্ষাই করেনি কী ক'রে সে ও শুভ্রা স্প্রেজিসের, দু'জনে ঘরের দুই প্রান্তে চ'লে এলো; টেবিলের মাথায় দাঁড়িয়ে আছে সে, আব আপাতদৃষ্টিতে নিজেব কাছে সম্পূর্ণ আশাশীতভাবে সে বস্তুতা শুরু ক'রে দিয়েছে। সকলকে চুপ কবাতো বেশ সময় লাগলো তাঁর।

'ভদ্রমহিলা ও ভদ্রমহোদয়গণ,...আমার ইচ্ছে...মিশা! গোগোচকা! টোনিয়া, কী করি বলো তো, এরা তো শুনবে না। ভদ্রমহিলা ও ভদ্রমহোদয়গণ, দু'একটা কথা আমাকে বলতে দিন আপনারা। অশ্রুতপূর্ব, অবিশ্বাস্য এক ঘটনার মুখোমুখি দাঁড়িয়ে আছি আমবা। তাব তলায় অবলুপ্ত হবার আগে শুনুন আমি কী চাই। সেই ঘটনা যখন ঘটবে, ভগবান করুন তখন যেন পবস্পরকে না হারাই আমরা, আত্মাকে না হারাই। গোগোচকা, হাততালিটা বরং পরেই দিয়ে, আমি এখনো শেষ করিনি। ওখান থেকে চ'লে এসো, এসে মন দিয়ে শোনো।

'যুদ্ধের এই তিন বছরে লোকের মনে এই প্রতীতি জন্মেছে যে আজ হোক বা কাল হোক খাবা যুদ্ধের সঙ্গে প্রত্যক্ষভাবে যুক্ত এবং যারা তা নন—তাদের মধ্যে সব বিভেদ লুপ্ত হবে। উত্তাল হয়ে উঠবে রক্তের সমুদ্র, যুদ্ধের বাইরে যারা ছিলো তাদেরও রক্তে না-ডুবিয়ে ছাড়বে না। এই বন্যাই হ'লো বিপ্লব।

'সেটা যখন ঘটবে তখন যুদ্ধে গিয়ে আমাদের যেমন মনে হয়েছিলো তেমনি আপনাদেরও মনে হবে, জীবন থেমে গেছে, ব্যক্তিগত ব'লে আর কিছু নেই, ইত্যা আর মৃত্যু ছাড়া—জগতে আর কিছুই ঘটছে না। এই সময় নিয়ে যখন ইতিহাস আর স্মৃতিকথা লেখা হবে তখন যদি বেঁচে থাকি আমরা, তাহ'লে সেই স্মৃতিকথা পড়ে জানতে পারবো এক শতাব্দী ধ'রে মানুষ যে-অভিজ্ঞতা লাভ করে সেই অভিজ্ঞতা আমরা লাভ করেছি এই পাঁচ-দশ বছরে। জানি না, জনগণ নিজে থেকে জোয়ারের মতো জেগে উঠে স্বতঃস্ফূর্তভাবে এগিয়ে চলাবে, না কি সব-কিছু শুধু ক'রে দেয়া হবে তাদের নামে। এমন বিপুল এই ঘটনা যে তার কোনো পরিচয়পত্র চাওয়া যায় না, নিজের অস্তিত্বের কোনো নাটকীয় প্রমাণ দেবার দরকার নেই এর, এমনই একে মেনে নেবো আমরা। দানবীর ঘটনার কারণ খুঁজতে যাওয়াটা হীনতা ও ক্ষুদ্রতা। আর সত্যি-সত্যি, কারণ বলতে তো কিছু নেই। শুধুমাত্র পারিবারিক ঝগড়ার শুরু থাকে—পরস্পরের চুল ছিড়ে, বাসন ভেঙে, তারপর লোকেরা ভাবতে চেষ্টা করে গুরুত্ব কে করেছিলো। প্রকৃতই যা মহৎ, এই বিশ্বব্রহ্মাণ্ডের মতো তারও কোনো আরম্ভ নেই। তার আবির্ভাব অকস্মাৎ হয়, যেন চিরকালই সে আছে, কিংবা যেন আকাশ থেকে পড়লো।

'আমার আরো মনে হয় যে রাশিয়ার ভাগ্যালিপি হ'লো পৃথিবীর ইতিহাসে প্রথম সোশ্যালিস্ট

দেশ হওয়া। সেটা যখন হবে, দীর্ঘকাল স্তম্ভিত হ'য়ে থাকবো আমরা, সংবিৎ ফেরার পরও অর্ধচেতন হ'য়ে থাকবো, অর্ধেক স্মৃতি বিনষ্ট হ'য়ে যাবে। ভুলে যাবো ঘটনার পারস্পর্য, যা ব্যাখ্যাভীত তার কারণ খুঁজতে যাবো না। নতুন ব্যবস্থাপ্রণালি আমাদের চারপাশে ঘিরে থাকবে, দিগন্ত-পারের বন আর মাথার ওপরে মেঘের মতোই পরিচিত হবে তারা। তা ছাড়া আর কিছুই থাকবে না।'

আরো কিছু বললে সে, ততোক্ষণে সে সম্পূর্ণভাবে শান্ত হ'য়ে এসেছে, তবু ব'সে পড়ার পবও তাকে কে কী বলছে তা ঠিকমতো শুনতে পাচ্ছিলো না, যা হচ্ছে তাই জবাব দিচ্ছিলো। জানতো সকলেই প্রীতি জানাচ্ছে তাকে, কিন্তু যন্ত্রণাময় অস্বস্তির বোঝা চেপে বসেছিলো তার ওপর। বললে:

'ধন্যবাদ, ধন্যবাদ। আপনাদের এই অনুভূতিকে আমি শ্রদ্ধা করি। কিন্তু আমি তার যোগ্য নই। অমন না-ভেবেচিন্তে ভালোবাসবেন না। আমার মনে হচ্ছে আপনারা অনেক, অনেক প্রীতি সঞ্চয় ক'রে চলেছেন, পাছে ভবিষ্যতে এর চেয়ে আরো বেশি ভালোবাসতে হয়।'

এটাকে একটা সচেতন পরিহাস মনে ক'রে সবাই খুব হাসলো আর হাততালি দিলো, আর ইউরি ভালোর জন্য তার তৃষ্ণা, আর তার সুখী হবার ক্ষমতা যতোই বড়ো হোক না কেন, দুর্ভাগ্যের পূর্বসূচনার আশঙ্কা, আর ভবিষ্যতের ওপর কোনো হাত না থাকার জন্য অসহায়তাবোধ তার এতো তীব্র হ'য়ে উঠেছিলো যে কী বলছে সে-সম্বন্ধে কোনো ধারণা ছিলো না তার।

অতিথিরা বিদায় নিচ্ছিলেন। মলিন, ক্লান্ত মুখ তাঁদের। কেউ মুখ খুলে আর কেউ বা মুখ বুজে, তাঁরা যখন হাই তুলছিলেন তখন তাঁদের ঘোড়ার মতো দেখাচ্ছিলো।

বিদায় নিতে-নিতে পদা সরিয়ে জানলাগুলি খুলে দিলেন তাঁরা। নোংরা, মেটে-সবুজ মেঘে-ভরা ভেজা আকাশে হলুদ ভোরের আলো ফুটে আছে। 'মনে হচ্ছে আমরা যতোক্ষণ কথা বলেছি ততোক্ষণে ঝড় হ'য়ে গেছে,' একজন বললেন।—'পথে বৃষ্টি পেয়েছিলাম আমি, কোনোমতে এসে পৌঁছেছি,' সমর্থন করলেন স্ত্রী।

পরিত্যক্ত পথ তখনো অন্ধকার, পালা ক'রে শোনা যাচ্ছে গাছ থেকে ঝ'রে পড়া জলের ফোঁটার শব্দ আর বৃষ্টিতে ভেজা চড়ুইয়ের ক্রমাগত ডাক।

সারা আকাশটাকে চিরে যেন লাঙল চালিয়ে দেয়া হ'লো, এমনি ভাবে মেঘ ডেকে উঠলো। তারপর নিস্তব্ধতা। তারপর দেরি ক'রে-ক'রে চারবার সজোর গর্জন, যেন হেমন্তের নতুন-খোঁড়া খেত থেকে পচা আলু ঝুড়ে দিচ্ছে কেউ।

ধূলিমলিন, ধোয়ায় আচ্ছন্ন ঘরের এক অংশ ঝাঁক ক'রে দিলো এই গর্জন। হঠাৎ, বৈদ্যুতিক শক্তির মতো, পরিস্ফুট হ'য়ে উঠলো জীবনের উপাদানগুলি: হাওয়া আর জল, আনন্দের প্রয়োজন, মাটি, আকাশ।

অতিথিরা যারা বিদায় নিচ্ছিলেন তাঁদের গলার আওয়াজে ভ'রে উঠলো গলিটা। বাড়ির ভেতরে থাকতেই কী একটা তর্ক বেঁধেছিলো তাঁদের মধ্যে, রাস্তাতেও ঠিক সেই একভাবেই এখনো তর্ক চালিয়ে যাচ্ছেন তাঁরা। ক্রমে দূর থেকে নরম হ'য়ে ভেসে আসতে লাগলো তাঁদের গলা, তারপর এক সময় মিলিয়ে গেলো।

'কী দেরি হ'য়ে গেলো,' ইউরি বললে। 'চলো শুতে যাই। এ-জগতে তোমাকে আর বাবাকে ছাড়া আর কাউকে ভালোবাসি না।'

৫

অগস্ট চ'লে গেছে, সেপ্টেম্বরও শেষ হ'য়ে এলো। শীত এলো ব'লে; আর মানুষের জগতেও বাতাস ভারি হ'য়ে আছে এমন-কিছুতে, যা প্রকৃতির এই মৃত্যুর মতোই কঠিন। সকলের মুখে শুধু তারই কথা।

জোগাড় করতে হবে খাবার, আর জ্বালানি কাঠ, কিন্তু জড়বাদের সেই বিজয়ের দিনে জড় এক নির্বস্তক ধারণায় পরিণত হ'য়ে গেছে; কেউ আর 'খাবার' বা 'জ্বালানি' বলে না—বলে 'পুষ্টি' বলে 'ইন্ধন-সংগ্রহ'।

যে-অজানা, পরিচিত সমস্ত বস্তু ভাসিয়ে নিয়ে চলার পথে সকল জায়গা জনশূন্য ক'রে ফেলেছে, তা যদিও শহরের সন্তান ও সৃষ্টি, তবু তার সামনে শহরবাসীবা আজ শিশুর মতো অসহায়।

খোঁড়াতে-খোঁড়াতে, ঘটতে-ঘটতে মানুষের দৈনন্দিন জীবন যুদ্ধ করতে-করতে এগিয়ে চলেছে অজানা গন্তব্যের দিকে, কিন্তু তৎসত্ত্বেও এখনো কথা বলে লোকেরা, নিজেদের ঠকায়। কিন্তু ইউরি বুঝতে পেরেছিলো, জেনেছিলো, সব শেষ হ'তে চলেছে, সে আর তার মতো লোকদের ধ্বংসের আজ্ঞা ঘোষিত হ'য়ে গেছে। সামনে কঠোর পরীক্ষা, হয়তো মৃত্যু। তাদের সময় শেষ হ'য়ে এসেছে, দিনগুলি তার চোখের ওপর দিয়ে ছুটে চ'লে যাচ্ছে।

দৈনন্দিন জীবনের খুঁটিনাটি, তার কাজ, তার চিন্তা, এরাই ঝাঁচিয়ে রেখেছে তার বিচারবুদ্ধিকে। তার স্ত্রী, তার সন্তান, উপার্জনের প্রয়োজন, তার অভ্যাসেব বিন্দ্র নিতানৈমিত্তিকতা—এতেই তার মুক্তি নিহিত।

সে উপলব্ধি করলে ভবিষ্যতের দানবীয় যন্ত্রের কাছে সে এক বামন মাত্র। সেই ভবিষ্যৎকে সে ভয়ও পায়, ভালোও বাসে, গোপনে সেই ভবিষ্যতের জন্য সে গর্বিত, আর, যেন শেষবারের মতো, বিদায় জানাতে গিয়ে সে আগ্রহভরে লক্ষ্য করে গাছ আর মেঘ আর রাস্তার মানুষগুলিকে,—দুর্ভাগ্যের সঙ্গে সংগ্রামে নিযুক্ত এই রুশীয় মহানগরকে। যাতে অবস্থার উন্নতি হয় সেজন্য সে আত্মাহুতি দিতে প্রস্তুত, কিন্তু কিছু করার ক্ষমতা তার নেই।

আবার্টে, রুশ চিকিৎসক-সমাজের দাওয়াইখানার কাছে, যখন সে ওল্ড কোচইয়ার্ড স্ট্রীট পার হয়, ঠিক তখনই ঐ আকাশ আর রাস্তার লোকেরা তাকে তীব্রভাবে আকর্ষণ করে।

হাসপাতালের কাজে আবার যোগ দিয়েছে সে। হাসপাতালটার নাম এখনো হোলি ক্রস-ই আছে, যদিও ওই নামধারী গোষ্ঠীটার আর চিহ্ন নেই—এ পর্যন্ত এর চাইতে উপযোগী কোনো নামের কথা কেউ ভেবে উঠতে পারেনি।

কম্বীরা ইতিমধ্যেই বিভিন্ন দলে বিভক্ত হয়ে গেছেন। মধ্যপন্থীরা আছেন; তাঁদের স্থূলত ইউরির বিরক্তি উদ্বেক করে, আর তাঁরা ইউরিকে বিপজ্জনক বলে মনে করেন। আর আছেন তাঁরা, খারা রাজনীতিতে অনেকদূর এগিয়েছেন, তাকে যথেষ্ট লাল ব'লে মনে করেন না তাঁরা; ইউরি অতএব কাউকেই খুশি করতে পারে না।

সাধারণ কাজের ওপরে, পরিচালক তার ঘাড়ে স্ট্যাটিস্টিক্স-এর ভার চাপিয়েছেন। অস্তুহীন প্রশ্নমালা তার হাতে আসে, অসংখ্য ফর্ম লিখে ফেলতে হয়। মৃত্যুর হার, অসুস্থতার হার, কম্বীদের উপার্জন, তাদের রাজনৈতিক চিন্তার মান, নির্বাচনে তাদের অংশ, জ্বালানির, খাদ্যের, ওষুধের চিরন্তন অভাব, সব-কিছুর নিখুঁত হিসেব জানাতে হবে।

স্টায়ফ্রুমে জানলার ধারে তার পুরোনো টেবিলে ব'সে কাজ করে ইউরি; সব রকম আকারের আর আকৃতির ফর্ম আর চার্টে তার টেবিল স্তূপীকৃত হ'য়ে থাকে। একপাশে সেগুলো সরিয়ে রেখেছে সে; মাঝে-মাঝে কয়েক মুহূর্তের জন্য সে ছুটি নেয়, ডাস্তারি নোট নেবার জন্যই শুধু নয়, 'বামন ও মানব' নাম দিয়ে সেসময়কার বিবৃতিময় যে-বইটি সে রচনা করছে তার জন্যও।

বইটিতে গদ্য রচনা, কবিতা ও আরো নানা রকম লেখা থাকবে, সব লেখাতেই তার এই অনুভূতি ধরা পড়বে যে অর্ধেক পৃথিবী আজ নিজেকে ভুলে গিয়ে ঈশ্বর জানেন কোন ভূমিকায় অভিনয় করছে।

তার ঘরটি উজ্জ্বল; তার শাদা চুনকাম-করা দেয়ালের ওপর ক্রীম রঙের রোদুর মনে করিয়ে দেয় 'স্বর্গারোহণ'-পরবের পরবর্তী হেমন্তের সোনালি দিনগুলিকে, যখন ভোরবেলা শিশির পড়া শুরু হয়, আর পাংলা-হ'য়ে-আসা বনের উজ্জ্বল পাতার ঝাঁকে-ঝাঁকে লাফায় তিতির আর হরবোলা। অমন দিনে চরম দূরত্বে উঠে যায় আকাশ, আকাশ আর মাটির মাঝখানকার স্বচ্ছ বাতাসের মধ্যে উত্তরের তুহিন ঘন-নীল দীপ্তি লুকিয়ে-লুকিয়ে ঢুকে পড়ে। এই পৃথিবীর সব-কিছু আরো স্পষ্ট দেখা যায়, আরো স্পষ্ট শোনা যায়। যে-কোনো শব্দ জমে যায় বরফের মতো, ধ্বনি ভুলে-ভুলে বিপুল সুদূরে মিলিয়ে যায়। যেন আগামী অনেকগুলি বছর ভ'রে জীবনের বিস্তারকে প্রকাশ করবে, এমনভাবে প্রকৃতি নিজেকে মেলে ধরে। অসহনীয় হ'তো এই স্বচ্ছতা, যদি না তা এতো ক্ষণস্থায়ী হ'তো, যদি-না আসতো ত্বরান্বিত সন্ধ্যার ঠিক আগে হেমন্তের হ্রস্ব দিনের অবসনকালে।

সেই আলো এসে পড়েছে এখন স্টাফরুমে, প্রথম হেমন্তের সূর্যাস্তের আলো, কোনো পাকা ফলের মতো সরস, স্বচ্ছ ও সজল।

ইউরি টেবিলে ব'সে লিখছিলো, চিন্তা করার জন্য আর কালিতে কলম ডোবাবার জন্য থামছিলো মাঝে-মাঝে, এদিকে নিঃশব্দ পাখিরা স্টাফ-রুমের উঁচু জানলার পাশ দিয়ে উড়ে চ'লে যাচ্ছে— তাদের ছায়া পড়ছে কাগজের ওপর দিয়ে চলমান ইউরির হাতের ওপরে, পড়ছে ঘরের দেয়ালে, আর ফর্মে-বোঝাই টেবিলটার ওপর—আর অমনি ক'রে নিঃশব্দে মিলিয়ে যাচ্ছে।

কেমিস্ট্রির ডেমন্সট্রেশনের ঘরে এলেন। মোটা মানুষ, কিন্তু ওজনে এত কমে গেছেন যে ভাঁজে-ভাঁজে ঢিলে চামড়া ঝুলে আছে তাঁর। 'মেপল-পাতা সবই প্রায় ঝ'রে গেলো,' ভদ্রলোক বললেন। 'ঝড়-জল কীভাবে সহ্য করে অথচ এক সকালের হিমে সব শেষ।'

ইউরি চোখ তুলে তাকালো। যে-রহস্যময় পাখিরা জানলা দিয়ে উড়ে যাচ্ছিলো তারা আসলে মেপল-পাতা। গাছ থেকে উড়ে এসে উঁচু দিয়েই উড়ে যাচ্ছে তারা, তারপর ঝাঁকা কমলারঙের তারার চেহারা নিয়ে ঝ'রে পড়ছে দূরে ঘাসের ওপর।

'জানলায় পুডিং লাগানো হয়েছে?'

'এখনো হয়নি।' ইউরি লিখে চললো।

'লাগাবার সময় হয়েছে বোধ হয়?'

লেখায় ডুবে ছিলো ইউরি, কোনো জবাব দিলো না।

'ঈশ, টারাসিউক চ'লে গেলো,' রাসায়নিকটি ব'লে চললেন। 'সোনার টুকরো ছেলে, এই টারাসিউক। জুতো সেলাই থেকে চণ্ডীপাঠ—সব করতে পারে। যা কিছু চাও সব জোগাড় ক'রে আনবে সে। আর এখন জানলার কাচগুলো আমাদের নিজেদের ঠিক ক'রে নিতে হবে।'

'পুডিং নেই।'

'তা বানিয়ে নেওয়া যায়। আমি ব'লে দেবো কী-কী মাল-মশলা লাগবে।' রেডির তেলে আর খড়ি মিশিয়ে কী ক'রে কাচ আটকাবার পুডিং করতে হয়, তার ব্যাখ্যা করতে লাগলেন তিনি। 'আচ্ছা, আসি এবার। আপনি এখন কাজ করছেন মনে হচ্ছে।'

অন্য জানলার কাছে গিয়ে তাঁর বোতলের আর নমুনার সারির ওপর ঝুঁকে পড়লেন তিনি। 'চোখের মাথাটি খাবেন আপনি,' একটু পরে বললেন। 'অন্ধকাব হ'য়ে আসছে। আলো তো আর দেবে না এরা। চলুন, বাড়ি যাওয়া যাক।'

‘আর মিনিট কুড়ি আমি কাজ করবো।’

‘ওর স্ত্রী এখানে থিয়ের কাজ করতো।’

‘কার স্ত্রী?’

‘টারাসিউকের।’

‘জানি।’

‘টারাসিউক যে কোথায় তা কেউ জানে না। সারা দেশময় ডাকাতি ক’রে ঘুরে বেড়াচ্ছে। গত গ্রীষ্মে দুবার এসেছিলো বৌয়ের কাছে, এখন আবার গেছে। নতুন জীবন তৈরি করছে সে। ও হ’লো ঐসব সৈন্য-বলশেভিকদেরই একজন, রাস্তায়, ট্রেনে সর্বত্রই তো তাদের দেখা যায়। ওদের বিষয়ে একটা কথা শুনবেন? —ধরুন, টারাসিউক। যে কোনো ব্যাপারে ওব বুদ্ধি খেলে। যাই করুক না কেন ভালো ক’রে করে। যুদ্ধেও তাই হ’লো ওর—যেভাবে অন্য কোনো কাজ হ’লে শিখতো ঠিক সেভাবেই যুদ্ধ করতে শিখলে। পয়লা নম্বরের লক্ষ্যভেদকারী হ’লো ও। উদ্ভেজনায় চমৎকার ওর প্রতিক্রিয়া, চোখের আর হাতের সুন্দর সংযোগ। পূর্বস্কৃত করা হ’লো তাকে, সাহস বা বুদ্ধির জন্য নয়, সবসময় লক্ষ্যভেদ কবতে পারাব জন্য। যেটাই করতে যায় সেটাতেই নেশা ধ’রে যায় ওর, যুদ্ধটাকেও সেইভাবে নিলে। বন্দুক যে মানুষকে কী করতে পারে সেটা বুঝতে পারলে সে, —শক্তি দেয়, সম্মান আনে। নিজে ক্ষমতাশালী হ’তে চাইলে সে। যার হাতে বন্দুক আছে, সে তো অন্যসব মানুষের মতো নয়। আগেকার দিনে এ-সব লোক ডাকাতি হ’তো। টারাসিউকের কাছ থেকে বন্দুকটা নেবার চেষ্টা ক’রে দেখুন এখন। তাবপব এলো সেই বুলি, “মনিবের বিরুদ্ধে বন্দুক তোলো,” টারাসিউক তাই তুললে। আসল গল্পটা এই। এই হ’লো মার্ক্সবাদ।’

‘এটা সবচেয়ে ঝাটি—একেবারে সোজাসুজি জীবন থেকে তুলে আনা। আপনি জানতেন না?’

রাসায়নিক তাঁর টেস্টিউবের চোঙের কাছে ফিরে গেলেন।

‘স্টোভের বিশেষজ্ঞটিকে কেমন লাগলো আপনার?’ জিজ্ঞেস করলেন তিনি।

‘ওঁকে পাঠিয়ে দেবার জন্য আপনার কাছে আমি অত্যন্ত কৃতজ্ঞ। চমৎকার মানুষ। হেগেল আর ক্রোচেকে নিয়ে ঘন্টার পর ঘন্টা আমরা কথা বললাম।’

‘তা তো বটেই! হাইডেলবার্গে দর্শনের ডিগ্রী নিয়েছিলেন উনি। স্টোভের কথা বলুন।’

‘সেটা ততো ভালো নয়।’

‘এখনো ধোয়া বেরুচ্ছে।’

‘ধোয়া থামে কখন?’

‘নিশ্চয়ই চিমনি ভুল বসানো হয়েছে। শুধু যদি টারাসিউক থাকতো! কিন্তু শেষ পর্যন্ত ঠিক হ’য়ে যাবে। মস্তো তো একদিনে তৈরি হয়নি। স্টোভকে কাজে লাগানো তো আর পিয়ানো বাজানো নয়, ওতে নৈপুণ্যের দরকার করে। জ্বালানি কাঠ আছে?’

‘কোথায় পাবো?’

‘গির্জের দরোয়ানকে পাঠিয়ে দেবো। ও হ’লো এক জ্বালানি-চোর। বেড়া কুলে টুকরো-টুকরো ক’রে জ্বালানি তৈরি করে। তবে তার সঙ্গে আপনাকে দর-কষাকষি করতে হবে। —না থাক, বরং ইদুর-খরাটা ভালো।’

ক্লোক-রুমে গিয়ে ওভারকোট পরে তারা বেরিয়ে পড়লো।

‘ইদুর-খরা কেন? আমাদের বাড়িতে তো ইদুর নেই।’

‘আরে তার সঙ্গে কোনো সম্পর্ক নেই এর। আমি কাঠের কথা বলছি। ইদুর-খরা বড়ি কাঠের

খুব বড়ো ব্যবসা ফেঁদেছে। একেবারে রীতিমতো বাণিজ্য করছে সে—জ্বালানির জন্য পুরো বাড়ি কিনে নেয়। আ কপাল, অঙ্ককার হ'য়ে এলো, সাবধানে পা ফেলবেন। আগে হ'লে এ-পাড়ার যে-কোনো দিকে আপনাকে চোখ ঝুঁকে নিয়ে যেতে পারতাম, সব চেনা ছিলো, কাছেই জয়েছিলাম কিনা। কিন্তু বেড়া ভাঙা শুরু হওয়ার পর থেকে এমন কি দিনের বেলাতেও পথ ঝুঁজে পাই না। অচেনা শহরে আছি ব'লে মনে হয়। আবার দেখুন, অদ্ভুত সব জায়গার খুব নামডাক হচ্ছে। লক্ষ্য করেছেন আপনি? “লিটল এম্পায়ার” ধরনের ছোটো-ছোটো বাড়ি—বাগানে সবুজ গোল টেবিল আর চেয়ারগুলো প'চে-প'চে যাচ্ছে—সেই বাড়িগুলোর অস্তিত্ব এতদিন কে জানতো বলুন! সেদিন ও-রকম একটা জায়গার পাশ দিয়ে যাচ্ছিলাম, তিন রাস্তার মোড়ে ছোট্ট ফাঁকা জায়গা—দেখি কী, লাঠি ঠুকঠুকিয়ে এক বৃদ্ধা মহিলা চলেছেন—অদ্ভুত একশো বছর বয়স হবে তাঁর। “নমস্কার, ঠাকুমা,” বললাম আমি, “মাছ ধরাব জন্য পোকা ঝুঁজছেন নাকি?” আমি ঠাট্টা করে বলেছিলাম কথাটা, কিন্তু উনি বেশ গম্ভীরভাবে জবাব দিলেন আমার কথা। “না, খোকা না,” বললেন উনি, “ব্যাঙের ছাতা ঝুঁজছি।” আর জানেন, সত্যি কথা, শহরটা যেন জঙ্গলে পরিণত হচ্ছে। পচা পাতা আর ব্যাঙের ছাতার গন্ধ ছড়িয়ে আছে শহরে।’

“বোধহয় বুঝতে পেরেছি কোন জায়গাটার কথা বলছেন—‘রূপোলি পথ’ আর ‘নিঃশব্দ পথের’^১ মধ্যে নয় কি? ওই জায়গাটায় অদ্ভুত-অদ্ভুত সব ঘটনার মুখোমুখি হই আমি—হয় এমন কারো সঙ্গে দেখা হয় যাকে কুড়ি বছর দেখিনি, কিংবা কিছু একটা ঝুঁজে পাই। জায়গাটা নাকি ভয়ের—তা হওয়া আশ্চর্য নয়, পেছন দিকটায় তো রীতিমতো এক খরগোসের খাঁচা, ঘোরানো প্যাঁচানো রাস্তার পর রাস্তা স্মলেনস্কির কাছে দাগি চোরদের আস্তানার দিকে চ'লে গেছে। আপনি কোথায় আছেন তো বোঝার আগেই দেখবেন আপনাকে উলঙ্গ ক'রে রেখে তারা পালিয়েছে।’

‘আর ওখানে রাস্তার বাতিগুলো দেখেছেন—কিছুই আলো হয় না বলতে গেলে। ওদের যে কুস্তিগির বলা হয় সেটা নেহাৎ মিথো নয়। দেখবেন খাকা খাবেন না যেন।’

৬

‘রূপোলি পথের’ ধারের চৌমাথায় সত্যি অদ্ভুত সব ঘটনা ঘটেছে ইউবির জীবনে।

অক্টোবর-দাঙ্গার আগে, এক ঠাণ্ডা অঙ্ককার রাত্রে সে দেখেছিলো পথের ওপর অচেতন হ'য়ে একটি লোক প'ড়ে আছে। ফুটপাথের সিমেন্টের ধারে, হাত-পা ছড়িয়ে ল্যাম্পপোস্টের তলায় মাথা রেখে শুয়েছিলো সে। ইউবি তাকে জাগাবার চেষ্টা করতে, কাথরে উঠে বিড়বিড় ক'রে তার মনিবাগ বিষয়ে কী যেন বললে লোকটি। তাকে মেরে-ধ'বে সর্বশ্ব লুট ক'রে নিয়েছে, মাথায় মেরেছে, কিন্তু ইউবির দেখলে কোনো হাড় ভাঙেনি।

আর্বাটে ওষুধের সোকানে গিয়ে হাসপাতালে টেলিফোন করলো ইউবি, জরুরি কাজে ব্যবহৃত গাড়ি আনিয়ে এমার্জেন্সি-ওয়ার্ডে নিয়ে গেলো লোকটিকে।

দেখা গেলো আহত ব্যক্তিটি একজন নামজাদা রাজনৈতিক নেতা। ইউবি তাঁর চিকিৎসা করলে, এর পরে অনেক বছর পর্যন্ত তার রক্ষকের কাজ করেছেন উনি, যে-সময়ে সন্দেহে বাত^২ সর্বত্র ভারি, সে-সময়ে কয়েকবার ভুল বোঝাবুঝির হাত থেকে উনি তাকে ঝাঁচিয়েছেন।

৭

টোনিয়ার সংকল্প কাজে খাটানো হ'লো: সবচেয়ে ওপর তলার তিনখানা ঘরে শীতের বাসা বাঁধলো তারা।

ঠাণ্ডা, ঝোড়ো হাওয়ায় ভরা, ভারি বরফের মেঘে অঙ্ককার এক রবিবার। ইউরির সেদিন ছুটি ছিলো।

সকালে আগুন ধরানো হয়েছিলো, এখন স্টোভ থেকে ধোঁয়া বেরুচ্ছে। স্যাংসেঁতে কাঠ নিয়ে ধ্বস্তাধ্বস্তি করছে নিউশা। স্টোভের ব্যাপার টোনিয়া কিছুই বোঝে না, সে যা-কিছু নির্দেশ দেয় তারই ফল হয় উন্টে। ইউরি স্টোভ ব্যাপারটা বোঝে, কিন্তু সে নাক গলানোমাত্র, তার স্ত্রী তাকে কাঁধে ধ'রে আস্তে বাইবে ঠেলে পাঠিয়ে দেয় : 'তুমি আর ঝামেলা করতে এসো না তো। আগুনে তেল ঢালবার কোনো দরকার নেই।'

'তেল ঢাললে ভালোই হ'তো, কিন্তু মুষ্কিলটা এই যে তেলও নেই আগুনও নেই।'

'দ্যাখো, রসিকতা কোরো না। এটা মোটেও রসিকতার সময় নয়।'

স্টোভের গোলমালে সকলের সব পরিকল্পনাই ভঙুল হয়ে গেলো। সকলেই আশা করেছিলো অঙ্ককার হবার আগে যে যার কাজ সেরে ফেলবে, বিকেলটা ঝাঁকা রাখবে, কিন্তু এখন রাত্রের ঝাওয়া হতেই দেরি হয়ে যাবে, টোনিয়ার মাথা ঘষা হবে না, আরো অনেক কাজ বাতিল করতে হবে।

আগুন থেকে ক্রমশই আরো বেশি ক'রে ধোঁয়া বেরুতে লাগলো। বাতাসের বেগ যেই বাড়লো, অমনি চিমনি দিয়ে ঘরে ঢুকলো ধোঁয়া, মায়া-কাননে কালো দৈত্যের মতো ঝুল-পড়া মেঘ ঝুলে রইলো ঘরের মধ্যে।

শেষ পর্যন্ত সবাইকে ঘর থেকে বার ক'রে অন্য দুই ঘরে পাঠিয়ে দিলে ইউরি; জানলা খুলে দিলে, অর্ধেক কাঠ বের ক'রে নিয়ে বাতিটা সাজিয়ে রাখলে, টুকরো কাঠ আর বার্চগাছের ডাল ছড়িয়ে দিলে তাদের মাঝখানে।

দমকা হাওয়া ঢুকলো ঘরে, পর্দা উড়ে গেলো, কাগজ উড়ে গেলো টেবিলের ওপর থেকে, গলির একটা দরজা বাড়ি খেলো দড়াম ক'রে, আর বাকি ধোঁয়াটা নিয়ে বাতাস যেন লুকোচুরি শুরু করলো।

চিড়চিড় শব্দে আগুন ধ'রে উঠলো কাঠে। স্টোভে আগুনের শিখা গর্জন ক'রে উঠলো, বেরিয়ে এলো তপ্ত লাল ধাতুর গায়ে যক্ষ্মারোগীর মুখের লালচে ছিটের মতো। পরিকার হ'য়ে গেলো বাতাস।

ঘরটা এবার হালকা লাগছে। জানলার কাচ ঘেমে উঠছে; সেই রাসায়নিকের নির্দেশ অনুসারে পুডিং বানিয়ে জানলা আটকে দিয়েছিলো ইউরি, একটা উক্স আর তৈলাক্ত গন্ধ বেরুচ্ছে তা থেকে। ফার-গাছের বাকল পোড়ার কড়া গন্ধ, আর আশ্পেনের সাবান-জলের মতো টাটকা গন্ধ ভেসে আসছে, স্টোভে যে-সব কাঠ শুকোচ্ছে তাদের গা থেকে।

হাওয়ার মতোই ঝোড়ো বেগে নিকোলে নিকোলেভিচ ঘরে ঢুকলেন।

'দাদা হচ্ছে রাস্তায়। অস্থায়ী সরকারের পক্ষ নিয়ে লড়াই করছে ক্যাডেটরা, আর গার্বিন্সনের সেনাইরা বলশেভিকদের পক্ষ নিয়েছে। চারদিকেই লড়াই, এই বিদ্রোহের কোথায় আরম্ভ তার হিসেব মেলে না। এখানে আসার পথে মুষ্কিলে প'ড়ে গিয়েছিলাম, —একবার বড়ো দমিট্রোভকার মোড়ে আর একবার নিকিট্‌স্কি দরওয়াজায়। এখন ও-সব দিকে এগোবারই উপায় নেই, ঘুরে যেতে হবে তোমাকে। চ'লে এসো ইউরি, কোটটা চাপিয়ে নাও, বেরিয়ে পড়ো। কী হচ্ছে চোখে দেখবে না! এই তো ইতিহাস! জীবনে একবারের বেশি এমন ঘটনা ঘটে না।'

কিন্তু কথা ব'লেই ঘণ্টা দুয়েক কাটিয়ে দিলেন তিনি। ডিনার খাওয়া হ'লো, বাড়ি যাবার জন্য তৈরি হ'য়ে যখন তিনি ইউরিকে বাইরে বের করার জন্য টানাটানি করেছেন তখন ঠিক তাঁরই মতো ভঙ্গিতে, সেই এক খবর নিয়ে গর্ডনের প্রবেশ।

ব্যাপার অবশ্য অনেকদূর গড়িয়েছে। গর্ডন বললে গুলিবর্ষণ বেড়েই চলেছে, যে-সব গুলি লক্ষ্যে পৌঁছতে পারছে না সেগুলি এসে পথচারীদের গায়ে লাগছে। তার ধারণা, সব যানবাহন বন্ধ হ'য়ে গেছে। দেব আনুকুল্যে একটা গলিতে ঢুকে যেতে পেরেছিলো সে, কিন্তু সে-পথও এখন বন্ধ!

নিকোলে নিকোলেভিচ গর্ডনের কথা কিছুতেই বিশ্বাস করবেন না; বাইরে বেরিয়ে গেলেন তিনি, কিন্তু ফিরে এলেন এক মিনিট পরেই। বললেন দেয়ালের কোনা থেকে ইট আর প্লাস্টার খসিয়ে বন্দুকের গুলি অনবরত ছুটছে। বাইরে জনপ্রাণী নেই। যানবাহন বন্ধ হ'য়ে গেছে।

সেই সপ্তাহে ছোট্ট সাশার ঠাণ্ডা লাগলো।

‘একশোবাব বলেছি ও যেন স্টোভের কাছে না খেলে,’ ইউরি বকাবকি করলে। ‘অত্যন্ত গরমে যেতে দেওয়া অত্যন্ত ঠাণ্ডায় যেতে দেওয়ার চাইতে অনেক বেশি ঝারাপ।’

গলা বাথা হ'য়ে জ্বর হ'লো সাশার। অসুখ জিনিসটাকে নিদারুণ ভয় পায় সাশা, ইউরি গলা দেখতে চাইলে বাবাকে ঠেলে দিলো সে, দাঁতে দাঁত আটকে এমন চ্যাচাতে লাগলো যে দম বন্ধ হবার জোগাড়। বোঝানো হ'লো, ভয় দেখানো হ'লো, কিন্তু কিছুতেই কোনো কাজ হ'লো না। এক অসতর্ক মুহূর্তে হাই তুলতেই ইউরি তার অসাবধানতার সুযোগ নিলে; মুখের ভেতর চামচে ঢুকিয়ে তার লাল ল্যারিনক্স আর ফোলা টনসিলটা না দেখতে পাওয়া পর্যন্ত জিভটা চেপে বাখলো ইউরি, দেখলো শাদা-শাদা দাগ হয়েছে ওখানে। চিঙ্কিত বোধ করলো সে।

এই একই উপায়ে একটু কফের নমুনা তুলে নিলো কোনোমতে, বাড়িতেই মাইক্রোস্কোপ ছিলো তার, পরীক্ষা ক'রে দেখলো। ভাগ্য ভালো, ডিপথেরিয়া নয়।

কিন্তু তিন দিনের দিন রাত্রে প্রচণ্ড কাশি হ'লো সাশার। জ্বর খুব বেড়ে গেলো, কষ্টে নিঃশ্বাস পড়ছে। তার যন্ত্রণা লাঘব করার কোনো উপায় নেই ইউরির, তাকিয়ে-তাকিয়ে দেখাটাও অসহ্য। টোনিয়া ভাবলে তার ছেলে মারা যাচ্ছে। দু-জনে পালা ক'রে তাকে কোলে নিয়ে ঘরের মধ্যে ঘুরলো তারা, তাতে বোধহয় একটু আরাম হ'লো তার।

ওর জন্য দরকার দুধ, আর সোডার জল। কিন্তু দাঙ্গা এখন চরমে উঠেছে। কামান আর বন্দুকের গুলি একবারের জন্যও থামে না। নিজের প্রাণ বিপন্ন ক'রেও ইউরি যদি দাঙ্গার এলাকা পার হ'য়ে যায় তবুও তার ওদিকে রাস্তায় সে কাউকে পাবে না। কিছু-একটা নিষ্পত্তি না-হওয়া পর্যন্ত শহরটা মরে থাকবে।

শেষ পর্যন্ত অবস্থাটা যে কী দাঁড়াবে তা অবশ্য অত্যন্ত স্পষ্ট। চারদিক থেকেই এই ওজর কানে আসছে যে শ্রমিকরাই জিতছে। ক্যাডেটদের দল যথেষ্ট চলেছে অবশ্য, কিন্তু পরস্পরের সঙ্গে, তাদের পরিচালকের সঙ্গে তাদের সংযোগ বিচ্ছিন্ন ক'রে দেওয়া হয়েছে।

সিভৎসেভ অঞ্চলটায় সেপাইরা পাহারা দিচ্ছে, শহরের ঠিক মধ্যস্থলের দিকে এগুচ্ছে তারা। একটা গলিতে গর্ত খুঁড়ে জার্মান যুদ্ধক্ষেত্র থেকে আগত সৈন্যরা আর কমবয়সী শ্রমিক ছেলেরা ব'সে থাকে; সেই রাস্তায় যারা থাকে তাদের সঙ্গে ইতিমধ্যেই বেশ আলাপ হ'য়ে গেছে তাদের, দরজার বাইরে এসে যারা দাঁড়ায় তাদের সঙ্গে রসিকতাও করে। শহরের এই অংশে একটু চলাফেরা শুরু হয়েছে।

গর্ডন আর নিকোলে নিকোলেভিচ জিজিভাগোদের বাড়িতে আটকে গিয়েছিলেন, তিনদিন পর ছাড়া পেলেন তাঁরা। সাশার অসুখের সময় তাঁরা কাছে ছিলেন বলে ইউরির ভালোই লেগেছিলো, আর তাঁরা যে বাড়ির সাধারণ বিশৃঙ্খলা আরো বাড়িয়ে দিলেন, সেজন্য টোনিয়া

তাদের ওপর রাগ রাখলো না। কিন্তু তাদের ভদ্রতার প্রতিদান দিতে বাধ্য বোধ ক'রে তাঁরা অস্বহীনভাবে বকবক করেছেন তাদের সঙ্গে; ইউরির শ্রান্ত হ'য়ে উঠেছিলো, ওঁরা যাওয়াতে সুখী হ'লো সে।

৮

খবর পাওয়া গেলো তাদের অতিথিরা নিরাপদে বাড়ি পৌঁচেছেন, কিন্তু শহরে শান্তি নেমেছে এমন কথা এখনো বলা যায় না। এখনো দাঙ্গা চলছে কয়েক জায়গায়, কয়েকটা তল্লাটে যাতায়াত এখনো বন্ধ। হাসপাতালে যেতে পারে না ইউরি। তার কাজ, রিসার্চের নোট আর পাণ্ডুলিপি স্টাফ-রুমের টেবিলের দেয়ালে রেখে এসেছে—সেগুলোর অভাব বোধ করে সে।

যে যার ছোট্ট পাড়াটুকুর মধ্যে সকালের দিকে বেরোতে পারে লোকেরা, একটু পথ হেঁটে যায় রুটি কিনতে, কিংবা কোনো ভাগ্যবান ব্যক্তি, যে এক বোতল দুধের মালিক, তাকে ঘিরে ভিড় করে, জিজ্ঞেস করে দুধটা সে কোথায় পেলো।

থেকে-থেকে সারা শহরে আবার নতুন ক'রে গোলাগুলি বর্ষণ শুরু হ'য়ে যাচ্ছে। শোনা যাচ্ছিলো দুই পক্ষে সন্ধির কথাবার্তা চলছে, সেই আলাপের গতিক বুঝে গোলা-বারুদ ছোঁড়া ক'মে আসছে বা বেড়ে যাচ্ছে।

তখন পুরোনো পাজি অনুসারে অক্টোবরের শেষ: এক সন্ধ্যায় বিশেষ দরকাব ছাড়াই ইউরি তার এক সহকর্মীর বাড়ি গেলো। পথঘাট প্রায় জনশূন্য; রাস্তায় বলতে গেলে কারো সঙ্গেই দেখা হ'লো না। তাড়াতাড়ি হাঁটতে লাগলো সে। সব বরফ পড়তে শুরু করেছে, পাংলা ঠুড়ো-ঠুড়ো বরফ দমকা হাওয়ায় ছড়িয়ে পড়ছে চারদিকে।

এতো অলিগলি পার হ'তে হ'লো যে সেগুলোকে যেন গুনে আর শেষ করা যায় না, ভারি হ'য়ে নামলো বরফ, বাতাস হ'য়ে উঠলো ব্রিজার্ড—সেই রকম তুষার-ঝড়, যা মাঠের ওপর দিয়ে শিস দিয়ে ছুটতে-ছুটতে বরফের কবল বিছিয়ে দেয়, কিন্তু শহরে যেন ভ্যাবাচাকা খেয়ে অন্ধের মতো পথ হাথড়ে বেড়ায়।

নৈতিক ও নৈসর্গিক জগতে সাদৃশ্য ধরা পড়লো, সুদূর ও নিকটবর্তী এই দুই গোলযোগে, পৃথিবীর বৃকে আর আকাশে। মাঝে-মাঝে কোথাও কোথাও দল-ভাঙা প্রতিরোধ-ধাঁটি থেকে গুলির ঝাক উড়ে আসছে। নিভে-আসা আগুনের ফুলকি উঠে যাচ্ছে ওপরে, বিলীন হয়ে যাচ্ছে দিগন্তে। আর বরফও উড়ছে আর ফুলকি ছাড়াচ্ছে বাতাসে, ইউরির পায়ের তলায় ভেজা পাথর থেকে বরফের ধোঁয়া উঠছে।

এক খবর-কাগজওলা সদ্যছাপা কাগজের মোটা তাড়া বগলে নিয়ে ছুটতে-ছুটতে চেষ্টাচ্ছে: 'নতুন খবর, নতুন খবর!' এক রাস্তায় মোড়ে ইউরিকে ধরলে সে।

'রেজকিটা রাখো,' ইউরি বললে। ছেলটি তাড়ার মধ্যে থেকে একটা ভেজা কাগজ বের ক'রে তার হাতের ওপর ঝুঁড়ে দিয়ে বরফের ঝড়ে উধাও হ'য়ে গেলো।

হেডলাইনগুলি পড়ার জন্য রাস্তার আলোর তলায় দাঁড়ালো ইউরি। বিশেষ সংখ্যা এটা, দেরিতে বেরিয়েছে, ছাপা হয়েছে কাগজের শুধু এক পিঠে। পিটার্সবার্গের সরকারি ঘোষণা ছাপা হয়েছে এই কাগজে: জনগণের প্রতিনিধিদের নিয়ে সোভিয়েত-সংঘ রচিত হয়েছে, শ্রমিকশ্রেণীর একনায়কত্ব স্থাপিত হ'লো রাশিয়ায়। আর আছে নব্য সরকারের প্রথম কয়েকটি আদেশ, তা ছাড়া টেলিগ্রাফ ও টেলিফোনে পাওয়া কিছু খুচরো খবর।

ব্রিজার্ডের চাবুক এসে পড়লো ইউরির চোখে, ধূসর বরফ মৃদু শব্দে চুইয়ে চুইয়ে ছাপার অক্ষরে ঢেকে দিলো। কিন্তু যে-জন্য ইউরির পড়তে অসুবিধে হচ্ছিলো তা বরফ নয়, সেই

মুহুর্তটির মহিমা অনুভব করে কেঁপে উঠছিলো সে, আগ্নেয় হ'য়ে পড়ছিলো একথা ভেবে যে অনাগত শতাব্দীগুলির কাছে এই মুহুর্তটি কী-স্বকম অর্থপূর্ণ।

তবু কাগজটা যখন পড়তেই হবে, আরেকটু উজ্জ্বল ঢাকা কোনো জায়গার সন্ধানে সে চারপাশে তাকালো। দেখলো, আবার সে এসে দাঁড়িয়েছে 'রুপোলি' ও 'নিঃশব্দ' পথের সেই মায়াবী মোড়ে, এক লম্বা পাঁচতলা বাড়ির সামনে; বাড়িটির প্রবেশ-পথ কাচের, ভেতরে প্রশস্ত হলঘরে চমৎকার আলো জ্বলছে।

ভেতরে ঢুকলো সে, সীলিঙের আলোর তলায় দাঁড়িয়ে কাগজ পড়তে লাগলো।

ওপরে পায়ের শব্দ শোনা গেলো। ধীরে-ধীরে কে যেন সিঁড়ির অর্ধেক পর্যন্ত এলো, যেন ইতস্তত করছে এমনভাবে দাঁড়ালো, তারপর ঘুরে আবার ছুটে চলে গেলো দোতলার সিঁড়ির চাতালে। কোথায় যেন দরজা খুলে গেলো, দু'জনের গলা ভেসে এলো, তাদের প্রতিশব্দি এতো অন্যরকম যে তা থেকে স্ত্রী কি পুরুষের গলা বোঝা অসম্ভব। তারপর দরজাটা সশব্দে বন্ধ হ'য়ে গেলো, সেই একই পায়ের শব্দ নেমে আসতে লাগলো নিচে, এবার আগের চাইতে দৃঢ়ভাবে।

কাগজে ডুবে ছিলো ইউরি, চোখ তুলে তাকাবার ইচ্ছে ছিলো না, কিন্তু আগন্তুক এমন অকস্মাৎ সিঁড়ির তলায় থেমে পড়লো যে মাথা তুলতে বাধ্য হ'লো সে।

তার সামনে দাঁড়িয়ে আছে বছর আঠারোর একটি ছেলে, মাথায় হরিণের চামড়ার টুপি, আর গায়ে হরিণের চামড়ার কোট—তার বাইরের দিকটা পশমি—সাইবেরিয়ায় লোকেরা যেমন পরে ঠিক তেমন। শ্যামল তার গায়ের রং, কিরগিজ ছাঁদের সরু চোখ দুটি। মুখের মধ্যে কী যেন আছে যাতে তাকে অভিজ্ঞাত ব'লে মনে হয়, তার একাকীত্বের হোঁয়া, স্বল্পতার সূক্ষ্মতায় সুদূর ব'লে মনে হয় তাকে; এই ধরনটা অনেক সময় পাওয়া যায় তাদের মধ্যে, যাদের বংশে জটিলতা ও মিশ্রণ বেশি।

মনে হ'লো, ছেলেটি ইউরিকে অন্য কেউ ব'লে ভুল করেছে। কিংকর্তব্যবিমূঢ় হ'য়ে লজ্জিত ভঙ্গিতে ইউরির দিকে তাকালো সে, যেন সে তাকে চেনে, কিন্তু কথা বলবে কিনা ঠিক করতে পারছে না। এই ভুল বোঝার পালা শেষ ক'রে দেবার জন্য, ঠাণ্ডা, উৎসাহহীন দৃষ্টিতে ইউরি তার দিকে তাকালো।

অপ্রস্তুত হ'য়ে ঘুরে দাঁড়ালো ছেলেটি, ঢোকবার গলির কাছে এগিয়ে গেলো। সেখানে থেমে পড়লো সে, পেছনে কাচের দরজাটা বাড়ি মেরে বন্ধ ক'রে বেরিয়ে যাবার আগে আলো একবার পেছন ফিরে তাকালো।

সে চ'লে যাবার কয়েক মিনিট পরে ইউরিও বেরিয়ে পড়লো। নতুন খবরে ভরপুর হ'য়ে আছে তার মন; শুধু যে ছেলেটিকেই সে ভুলে গেলো তা নয়, যে-সহকর্মীর বাড়ির উদ্দেশ্যে বেরিয়েছিলো তাকেও ভুলে গিয়ে সোজা বাড়ির দিকে চললো। কিন্তু পথে আরেক ব্যাপারে তার মন বিক্লিপ হ'লো; সেটা প্রাত্যহিক জীবনের অনেক খুঁটিনাটির মধ্যে একটা, সেই সময়ে যার মূল্য অপরিসীম।

বাড়ির কাছেই অন্ধকারে এক কাঠের জুপের ওপর হুমড়ি খেয়ে পড়লো সে। সেই রাত্তায় কী-একটা সরকারি দপ্তর আছে যেন, শহরতলির ভাঙা বাড়ির মতো দেখতে ঐ কাঠের জুপ নিশ্চয়ই জ্বালানি কাঠ হিসেবে আনা হয়েছে। উঠানে সবটুকু জায়গা হয়নি, তাই বাড়তি অংশটা ফুটপাথের ধারে রাখা আছে। বন্দুক ঘাড়ে এক সাদ্ধী পাহারা দিচ্ছে এই কাঠের পাহাড়টিকে; উঠানে পায়চারি করতে-করতে সে বার-বার ফটকের বাইরে তাকাবে।

ইউরি দ্বিতীয়বার চিন্তা করলো না; পাহারাদার বেই পেছন ফিরলো, আর বাতাস শুন্যে তুললো বরফের মেঘ, অমনি সুযোগের সন্ধ্যাবহার ক'রে অন্ধকার দিকটার ঠুঁড়ি মেরে এগিয়ে

গেলো সে; রাস্তার বাতির আলো এড়িয়ে সযত্নে একেবারে তলা থেকে একটা তক্তা বেছে টেনে নিলো। সেটাকে পিঠে তুলতে বেশ কষ্ট হ'লো তার, কিন্তু পরমুহুর্তেই তারটাকে আর ভার ব'লে মনে হ'লো না (কেননা নিজের বোঝা ভার নয়); দেয়ালের ছায়া ধ'রে-ধ'রে গুঁড়ি মেরে এগোলো সে, তক্তাটা নিরাপদে বাড়ি নিয়ে এলো।

একেবারে ঠিক সময়ে কাঠ মিলেছে; তাদের জ্বালানি শেষ হ'য়ে গিয়েছিলো। টুকরো-টুকরো ক'রে কেটে কাঠের টুকরোগুলো জমা করা হ'লো, ইউরি স্টোভ ধরিয়ে চূপচাপ বসলো তার সামনে। আলেকজান্ডার আলেকজান্ড্রেভিচ আরাম-কেন্দরা টেনে নিয়ে আগুন পোহাতে লাগলেন।

কোটের পাশ-পকেট থেকে কাগজটা বের ক'রে ইউরি তাঁর সামনে মেলে ধরলে:
'এটা দেখেছেন? একটা কাণ্ড বটে। দেখুন একবার।'

উবু হ'য়ে ব'সে কাঠে খোঁচা দিতে-দিতে সে নিজের মনে কথা ব'লে চললো।

'কী আশ্চর্য অশ্রোপচার! ছুরির এক ঘায়ে সব পুরোনো পচা ঘা কেটে দেওয়া হ'লো। অতি সহজে, কোনো কামেলা না-ক'রে যুগ-যুগ ধ'রে যে-অবিচারের অসুরটা পেলাম পেয়ে-পেয়ে মোটা হ'চ্ছিলো—এক কথায় ঘোষিত হ'য়ে গেলো তার মৃত্যুদণ্ডজ্ঞা।

'এই নিভীকতা, কোনো-কিছুকে একেবারে শেষ পর্যন্ত চালিয়ে নিয়ে যাওয়ার এই শক্তি—এতে আছে জাতীয় চরিত্রের পরিচয়। পুশকিনের জ্বলন্ত স্পষ্টবাদিতার, টলস্টয়ের তথ্যের প্রতি নিভীক আসক্তির ছোঁয়া পাই এখানে।'

'কী বললে, পুশকিন? এক সেকেণ্ড দাঁড়াও। শেষ করতে দাও আমাকে। এক সঙ্গে পড়া এবং শোনা দুটো কাজ আমি করতে পারি না।' আলেকজান্ডার আলেকজান্ড্রেভিচ ভাবলেন ইউরি তাঁকে লক্ষ্য ক'রে কথা বলছে।

'প্রতিভার প্রকৃত স্বাক্ষর তো এখানেই। —মনে করুন আপনি কাউকে বললেন নতুন এক জগৎ সৃষ্টি করতে, আরম্ভ করতে নতুন এক যুগ—তাহ'লে তারা প্রথমে আপনাকে বলবে অল্প একটু জায়গা পরিষ্কার ক'রে দিতে। নতুন শতক গ'ড়ে তোলার কাজ শুরু করার আগে তারা অপেক্ষা করবে পুরোনো শতকের ধ্বংস হওয়া অবধি, জমা-খরচের হিসেব চাইবে তারা, চাইবে একটি পরিচ্ছন্ন যোগফল, খাতার একটি নতুন, পরিষ্কার পাতা।

'কিন্তু এখানে, ও-সব ব্যাপার নিয়ে কেউ মাথা ঘামায় না। —“এই রইলো। হয় নাও, নয় তো ছেড়ে দাও।” এই অভিনব ব্যাপার, ইতিহাসের এই বিস্ময়কর ঘটনা, এই আবির্ভাব—দৈনন্দিন জীবনের ঠিক মধ্যখানে এর বিস্তারণ হ'লো, এর পরে কী হবে তা একবারের জন্যও কেউ চিন্তা করলে না। এর আরম্ভ আদিতে নয়, ইঠাৎ মাঝখান থেকে এর আরম্ভ—নিয়মমাফিক কোনো দেরি নেই এতে, সপ্তাহের প্রথমতম কাজের দিনটিকে হুড়মুড় ক'রে এসে পড়ে, একেবারে দৈনন্দিন ব্যস্ততার মধ্যে। এই হ'লো সত্যিকার প্রতিভা। এমন অস্থানে, এমন অসময়ে এসে পড়তে পারে শুধু তা-ই, যা সত্যিকার মহৎ।

৯

শীত এলো—ঠিক সেই রকম শীত, যে-রকম আগেই ভাবা গিয়েছিলো।

এর পরের দুই বছরের শীতের মতো অতোটা ভীষণ না-হ'লেও এই শীতও তেমনি অন্ধকার, তেমনি ক্ষুধিত ও ঠাণ্ডা; এই শীত ভ'রেও দেখতে হ'লো পরিচিত সব-কিছুর ধ্বংস, জীবনের সব ভিত্তির পরিবর্তন, আর মুঠোর ফাঁক দিয়ে গ'লে চ'লে যাচ্ছে যে-জীবন, তাকে আঁকড়ে রাখার অমানবিক প্রয়াস।

এমনি এসেছিলো তিনটি শীত ঋতু, একের পর এক, এমনি ভীষণ হ'য়ে তিন-তিন বার; এখন ভাবলে যা মনে হয় ১৯১৭—১৯১৮র শীতকালের কথা, আসলে হয়তো তা ঘটেছিলো আরো পরে। এই তিন শীতের পারস্পর্য আজ মিলে-মিশে এক হ'য়ে গেছে, তাদের আলাদা ক'রে আর ভাবা যায় না।

পুরোনো জীবন আর নতুন নিয়মগুলি এখনো পরস্পরের সঙ্গে এক হ'য়ে যেতে পারেনি। এর এক বছর বাদে যখন গৃহযুদ্ধ বাধলো তখনকার মতো তীব্র বিরোধ না-থাকলেও, পরস্পরের মধ্যে কোনো বিশেষ সংযোগও দেখা দিলো না। একটা ধাঁধার দুই অংশ যেন তারা, পাশাপাশি রাখা আছে, খাপে-খাপে ব'সে গেলেও যেতে পারে।

সর্বত্র নতুন নির্বাচন হচ্ছে: বসবাসের ব্যবস্থা, ব্যবসা-বাণিজ্য, পৌর ব্যবস্থা—সব-কিছুর জন্য। প্রতিটি বিষয়ের জন্য কমিসার নিয়োগ করা হয়েছে; তাদের পরনে কালো চামড়ার জ্যাকেট, হাতে অসীম ক্ষমতা, লোহার মতো সুদৃঢ় মনের জোর, ভয়প্রদর্শনের বিভিন্ন উপায়ে ও রিভলভারে তারা সশস্ত্র, খুব কম দাড়ি কামায় তারা, তার চেয়েও কম ঘুমোয়।

ঐ চোরা বুর্জোয়া-গুপ্তিকে খুব চেনে তারা, বেশির ভাগ সরকারি ঋণপত্র তো ওদের দখলে; ওদের সঙ্গে ব্যবহারে একটুও করুণা দেখায় না তারা, হাসে শয়তানি ধরনে—যেন একদল ছিচকে চোরকে হাতে-নাতে ধ'রে ফেলেছে, তাদের ভাবখানা এইরকম।

এই বুর্জোয়ারাই এখন প্ল্যান-মফিক নতুন ক'রে গ'ড়ে তুলছে সব: কোম্পানির পর কোম্পানি, ব্যবসার পর ব্যবসা বলশেভিক হ'য়ে যাচ্ছে।

হোলি-ক্রস হাসপাতালের এখন নাম হয়েছে দ্বিতীয় নববিধান। অনেক বদলে গেছে সেটি; অনেকের চাকরি গেছে, আর কাজটা যথেষ্ট অর্থকরী নয় ব'লে অন্যেরা পদত্যাগ করেছেন। তাঁরা হলেন সব কেতাদুরস্ত ডাক্তার, লম্বা-চওড়া ফী ইঁাকেন, কথা বলেন বেশি, সমাজের আদুরে খোকা সব। তাঁরা কাজ ছেড়েছেন স্বার্থের খাতিরে, কিন্তু ব'লে বেড়ান তাঁরা নাগরিক হিসেবে প্রতিবাদ জানিয়েছে, আর যারা তা করেনি তাদের অবজ্ঞার চোখে দ্যাখেন। ইউরি চাকরি ছাড়েনি, থেকে গিয়েছে।

সন্কেবেলা তার সঙ্গে টোনিয়ার এই ধরনের কথাবার্তা হ'তো:

‘বুধবারের ব্যাপারটা ভুলো না কিন্তু, মেডিকেল ইউনিয়নের নিচের তলায় দু'বস্তা জমানো আলু ওরা আমাদের জন্য রেখে দেবে। কখন বেরুতে পারবো তোমাকে আগেই জানিয়ে দেবো আমি, এক সঙ্গে বেরিয়ে স্নেজ নিতে হবে আমাদের।’

‘ঠিক আছে, এখনো অনেক সময় আছে হাতে। শুতে যাও না এখন, অনেক রাত হলো। একটু বিশ্রাম করো তো! তুমি একাই সব কাজ করতে চাও নাকি?’

‘এদিকে মড়ক লেগেছে। অত্যন্ত শ্রান্ত হ'লে অসুখ ঠেকাবার শক্তি ক'মে যায়। তোমার আর বাবার কী ভীষণ চেহারা হয়েছে। কিছু-একটা করতেই হবে আমাদের। কী করা যায় তা যদি জানতাম।’ নিজেদের যথেষ্ট যত্ন নিই না আমরা। টোনিয়া, শোনো—ঘুমোলে নাকি?

‘না।’

‘নিজেকে নিয়ে ভাবনা নেই আমার, আমি ন'বার ম'রে গিয়ে বেঁচে উঠতে পারি—কিন্তু কোনো রকমে আমি যদি অসুস্থ হ'য়ে পড়ি তাহ'লে তুমি মাথা ঠিক রেখো—রাখবে তো?—আমাকে কিছুতেই বাড়িতে রেখো না। তবুনি হাসপাতালে পাঠাবার ব্যবস্থা কোরো।’

‘অমন কথা বোলো না, লম্বীটি। ডগবানের কাছে প্রার্থনা করো তোমাকে যেন ভালো রাখেন। যা-ই হোক, বিপদ যদি আসেই আমরা উৎরে যেতে পারবো।’

‘মনে রেখো, কেউ আর সৎ নেই আজকাল, বন্ধু ব'লে কিছু আর নেই। আর তার চেয়েও

কম আছে কাজের লোক। কিছু যদি হয়, পিচুজনির ছাড়া কাউকে বিশ্বাস কোরো না। অবশ্য এখনো যদি সে থেকে থাকে সেখানে। ঘুমোলে?’

‘না।’

‘মাইনে কম ব’লে সব চ’লে গেলো, আর এখন শোনা যাচ্ছে তারা নাকি তাদের নীতি আর নাগরিকের দায়িত্ব রক্ষা করেছে। রাস্তায় দেখা হ’লে হাতও ঝাঁকায় না ভালো ক’রে, ভুরু তুলে জিজ্ঞেস করে: “ও, আপনি বুঝি এখনো ওদের ওখানে কাজ করছেন?” —হ্যাঁ, করছি,” আমি জবাব দিয়েছি, ‘শুনে হয়তো অসুখী হবেন না যে আমাদের দুঃখকষ্ট নিয়ে আমি গর্বিত, আর সে-সব কষ্ট আমাদের ওপর চাপিয়ে যারা আমাদের সম্মান জানিয়েছে তাদের আমি শ্রদ্ধা করি।’

১০

বেশির ভাগ লোকের খাদ্য হ’লো সেদ্ধ জোয়ার, হেরিংমাছের মাথা দিয়ে রাধা স্যুপ, আর হেরিংমাছের বাকি অংশ দিয়ে একটা দ্বিতীয় পদ; ময়দা অথবা রাগি সেদ্ধ ক’রে মশুও হয়। এর পরে অনেকদিন ধ’রে এই মশুই লোকের প্রধান খাদ্য হয়েছিলো।

এক অধ্যাপিকা, টোনিয়ার বন্ধু, তাকে তাদের গুলন্দাজি স্টোভে রুটি তৈরি করতে শিখিয়ে দিলেন। মতলবটা হ’লো কিছু রুটি বিক্রি ক’রে, বড়ো স্টোভটা ব্যবহার করার খরচ তুলে আনা; কুকারটা থেকে এখনো ধোঁয়া বেরুচ্ছে আর তাপ জো হয়ই না বলতে গেলে।

টোনিয়ার রুটি ভালোই হ’লো, কিন্তু ব্যবসাবুদ্ধি কোনো কাজে লাগলো না। সেই বিশ্রী কুকারটাই আবার ব্যবহার করতে হ’লো তাদের। বড্ড খারাপ অবস্থায় পড়েছে তারা।

একদিন সকালে ইউরি কাজে যাবার পর টোনিয়া তার নোংরা গরম কোটটি গায়ে চাপালো—এতো খারাপ হ’য়ে গেছে তার শরীর যে গরমের দিনেও এই কোটের তলায় সে কাঁপে—তারপর বেরুলো ‘শিকারে’। আর মাত্র দু’খানা জ্বালানি কাঠ বাকি আছে।

আশে-পাশে গলিতে-গলিতে ঘুরতে লাগলো সে; মস্তোর বাইরে গ্রাম থেকে চাষিরা মাঝে-মাঝে এসে সেখানে তরকারি আর আলু বিক্রি করে, দেখা যায়। বড়ো রাস্তায় তাদের পুলিশ ধরবে।

যা চাইছিলো তা একটু পরেই জুটে গেলো। চাষিদের মতো জামা-পরা এক বিপুলকায় যুবক তার পেছন-পেছন একটা স্লেক্স টেনে নিয়ে এলো, সেটা দেখতে খেলনার মতো হালকা; অতি সাবধানে ওদের বাড়ির উঠানে ঢুকলো সে।

স্নেজের মধ্যে থলিতে ঢাকা আছে, উনিশ শতকের ফোটাগ্রাফে বাগান-বাড়িতে যেমন থাম থাকে, তেমনি মোটা-মোটা বার্চ কাঠের বোঝা। এর দাম জানে টোনিয়া: নামেই বার্চ, কাঠটা যথাসম্ভব খারাপ; আর এতো সদ্যকাটা যে জ্বালানি হিসেবে মোটেও উপযোগী হবে না। কিন্তু গতাস্তর যখন নেই, তখন তর্ক ক’রে লাভ কী?

যুবকটি পাঁজাকোলা ক’রে পাঁচ-ছয় বার কাঠের বোঝা টেনে নিয়ে ওপরের ঘরে পৌঁছে দিলে; তার বদলে সে নিলো টোনিয়ার আয়নার দরজাওলা ছোটো আলমারি। নিচে নিয়ে গিয়ে স্নেজের মধ্যে বোঝাই ক’রে স্ত্রীর জন্য উপহার নিয়ে চললো। ভবিষ্যতে আলু জোগান দেবার ইঙ্গিত দিয়ে সে পিয়ানোটার দাম জিজ্ঞেস করলে।

বাড়ি ফিরে ইউরি টোনিয়ার কাঠ কেনার বিষয়ে কোনো মন্তব্য করলে না। আলমারিটা কাটলে এর চাইতে বুদ্ধিমানের কাজ হ’তো, কিন্তু সেটা তারা প্রাণ ধ’রে কিছুতেই করতে পারতো না।

‘টেবিলের ওপর তোমার একটা চিঠি আছে, দ্যাখোনি?’ টোনিয়া জিজ্ঞেস করলো।

‘হাসপাতাল থেকে যেটা এসেছে? হ্যাঁ, আমি আগেই খবর পেয়েছি। রোগীর বাড়ি থেকে ডাক এসেছে। আমি নিশ্চয়ই যাবো। একটু বিশ্রাম ক’রেই যাচ্ছি। কিন্তু বেশ দূর জায়গাটা। জয়ন্তজের কাছে কোথায় যেন। ঠিকানাটা আছে আমার কাছে।’

‘কত ফী দিতে চেয়েছে, দেখেছো? সেটা বরং দেখে নাও। এক বোতল জার্মান কন্যাক অথবা এক জোড়া মোজা। কী রকম লোক ওরা, ভাবো তো একবার। আজকাল আমরা কী ভাবে দিন কাটাচ্ছি সে-বিষয়ে কোনো জ্ঞানই নেই মনে হচ্ছে। নতুন বড়োলোক বোধ হয়।’

‘হ্যাঁ, নিশ্চয়ই কোনো জোগানদারের বাড়ি?’

নানাবিধ জিনিসপত্র সরবরাহ করার জন্য যে সব উৎসাহী ব্যবসায়ী সরকারি কনট্রাক্ট পেয়েছিলো তাদের বলা হ’তো জোগানদার অথবা দালাল। নতুন সরকার ব্যক্তিগত ব্যবসার উচ্ছেদ করেছে, কিন্তু আর্থিক সংকটের সময় কিছু-কিছু সুবিধেও দেওয়া হচ্ছিলো।

আগেকার দিনের বিভবান লোক এরা, কোনো পুরোনো ফার্মের বরখাস্ত-হওয়া কর্তা নয়—সে-সব লোক অবশ্য এই আঘাত সামলে উঠতে পারেননি। এরা হ’লো এক নতুন জাতের ব্যবসাদার যাদের কোথাও কোনো শিকড় নেই, যুদ্ধ আর বিপ্লব যাদের সবচেয়ে নিচের শ্রেণী থেকে ওপরে টেনে তুলেছে।

দুধ দিয়ে শাদা-করা গরম জল আর স্যাকারিন পান ক’রে ইউরি তার রোগী দেখতে চ’লে গেলো।

দেয়াল থেকে দেয়াল পর্যন্ত গভীর বরফে রাস্তা ঢেকে আছে, কোথাও-কোথাও তা একতলার জানলার সমান উচু। এর ওপর দিয়ে ন’ড়ে-চ’ড়ে বেড়াচ্ছে নিঃশব্দ আধ-মরা ছায়ারা—অল্প কিছু খাবার হাতে চলেছে কেউ, কেউবা সেটা স্নেজে টেনে নিচ্ছে। এ ছাড়া বলতে গেলে অন্য যান-বাহন নেই।

পুরোনো দোকানের সাইনবোর্ডগুলি এখানে-সেখানে এখনো ঝুলে আছে। তলায় যে-সব ছোটো-ছোটো সমবায় সমিতির দোকান খোলা হয়েছে তার সঙ্গে তাদের কোনো যোগ নেই। এই দোকানগুলি শূন্য, তালাবদ্ধ, জানলা বন্ধ, অথবা তক্তা দিয়ে মুড়ে দেওয়া।

শূন্য ও তালাবদ্ধ হওয়ার কারণ শুধু মালের অভাব নয়; জীবনের সব ক্ষেত্রে, ব্যবসাতেও, নতুন ব্যবস্থা এখনো কাগজ-কলমের ব্যাপার হ’য়েই আছে, তত্ত্বামারা দোকানের মতো এমন একটা তৃচ্ছ ব্যাপারের সঙ্গে এখনো তার যোগসূত্র স্থাপিত হয়নি।

১১

ব্রেস্ট স্ট্রীটের শেষে, ৭৬তম দরওয়াজার কাছে বাড়িটা ঝুঁজে পেলো ইউরি।

বাড়িটা পুরোনো ইটের ভৈরি একটা ব্যারাক, মাঝখানে উঠোন, উঠোনের দেয়াল বেয়ে উঠে গেছে ঢাকা কাঠের সিঁড়ি।

ভাড়াটেকদের সাধারণ সভা ছিলো সেদিন; আগে থেকে দিন ঠিক ছিলো, স্থানীয় সোভিয়েট থেকে একজন মহিলা প্রতিনিধি এসেছেন, এমন সময় বন্দুকের, লাইসেন্স-ছুট অস্ত্রশস্ত্রের খোঁজে এক মিলিটারির কমিশন হানা দিলো সেখানে। ভাড়াটেরা ঘরে ফিরে অপেক্ষা করতে বাধ্য হ’লো, কেননা কার কখন ডাক পড়ে বলা যায় না, কিন্তু কমিশনের স্থানীয় নেতা সোভিয়েটের প্রতিনিধিকে চ’লে যেতে বারণ করলেন, তাদের খোঁজাখুঁজি বেশি সময় নেবে না, পরে সভা হ’তে পারবে।

ইউরি যখন পৌঁছলো তখন তাদের কাজ প্রায় হ’য়ে এসেছে, কিন্তু সে যে ফ্ল্যাটে যাচ্ছে সেটা তখনো সার্চ করা হয়নি। সিঁড়ির চাতালে এক রাইফেলধারী সৈন্য তাকে আটকেছিলো, কিন্তু

কমিশনের নেতা তাদের বাকবিতণ্ডা শুনে হুকুম দিলেন ডাক্তার তাঁর রোগী পরীক্ষা না-করা পর্যন্ত ওখানে সার্চ করা স্থগিত রাখা হবে।

দরজা খুলে দিলে গৃহস্থানী, অতি ভদ্র একটি যুবক, ম্লান জলপাই-রঙের চামড়া, আর বিষন্ন চোখ। স্ত্রীর অসুখ, এই সার্চের ব্যাপার, আর চিকিৎসা-বিজ্ঞান এবং তার প্রতিনিধির প্রতি তার সূগভীর শ্রদ্ধা, এমনি বহুবিধ ব্যাপারে উত্তেজিত আছে সে।

ডাক্তারের সময় ও অসুবিধে বাঁচানোর জন্য সে ছোটো ক'রে অসুখটা বোঝাতে গেলো, কিন্তু অতো তাড়াহড়োর জন্যই সে কথা বললো অসংলগ্নভাবে, আর অনেকক্ষণ ধ'রে।

ডাক্তার যা দেখলেন তা হ'লো এক বিলাসী ফ্ল্যাট আর শস্তা বেজমেটের' মিশ্রণ; আসবাবপত্র বেশির ভাগই তাড়াহড়ো ক'রে কেনা হয়েছে, পাছে পরে টাকার দাম দ্রুত নেমে যায়, সেই ভয়ে এই ভাবে টাকা খাটানো হয়েছে; আসবাবের মধ্যে আছে কিছু-কিছু অসম্পূর্ণ সেট আর যে-সব জিনিস জোড়ে ব্যবহার করতে হয় তার একটি-একটি নমুনা।

যুবকটির ধারণা তার স্ত্রীর অসুখটা স্নায়বিক কোনো উত্তেজনার ফলে ঘটেছে। অনেক অপ্রাসঙ্গিক কথা টেনে এনে সে বললে যে সম্প্রতি বিচিত্র আওয়াজের এক অদ্ভুত ঘড়ি কিনেছে সে। তার কলকজা যে-ভাবে বিগড়েছে তাতে মেরামত হবার আশা নেই, ঘড়ি তৈরি শিল্পের একটি (ডাক্তারকে পাশের ঘরে নিয়ে গিয়ে সে ঘড়িটা দেখিয়ে দিলে) উজ্জ্বল নমুনা হিসেবে জলের দবে ঐ ঘড়িটা কিনেছিলো। হঠাৎ, বছরের পর বছর যে-ঘড়িতে দম দেওয়া হয়নি, সে ঘড়ি নিজে থেকে চলতে শুরু করলো, জটিল সূরের ঘণ্টা বাজিয়ে থেমে গেলো। অসম্ভব ভয় পেয়ে গেলো তার স্ত্রী। যুবকটি বললে, তার স্ত্রীর একেবারে দৃঢ় বিশ্বাস হ'লো যে তার আয়ু ফুরিয়ে এসেছে, আর এখন তো ঐ প'ড়ে আছে বিকারের ঘোরে; তাকে চিনতে পারছে না, খাচ্ছে না, জলটুকু পর্যন্ত খাচ্ছে না।

‘ও, আপনি তাহ'লে এটাকে স্নায়বিক উত্তেজনার ফল ব'লে মনে করেছেন,’ ইউরিস সন্দেহের সুরে বললে। ‘আমি কি ঠুকে দেখতে পারি একবার?’

এবার যে-ঘরটায় তারা গেলো সে ঘরের ছাদ থেকে চীনেমাটির বাতি ঝুলছে, প্রশস্ত জোড়াখাট পাতা, দুইপাশে মেহগনির টেবিল। থুতনি পর্যন্ত পালকের লেপ টেনে খাটের এক প্রান্তে শুয়ে আছে কালো চোখের ছোটোখাটো একটি স্ত্রীলোক। তাদের দেখে বিছানার তলা থেকে একটি হাত বের ক'রে হাত নেড়ে তাদের চ'লে যেতে বললে, তার ড্রেসিং গাউনের ঢিলে হাতা খ'সে প'ড়ে গেলো বগলের কাছে। তারপর যেন ঘরে সে একা, এমনিভাবে নিচু গলায় করুণ সুরে গান গাইতে লাগলো, তাতে এতো বিচলিত হ'য়ে পড়লো যে কঁাদতে শুরু করে দিলো। বাচ্চার মতো ফুঁপিয়ে কঁাদতে-কঁাদতে ‘বাড়ি যাবার’ জন্য মিনতি করে লাগলো। ইউরিস তার বিছানার কাছে এসে দাঁড়াতেই তার দিকে পিঠ ফিরিয়ে শুলো, কিছুতেই তাকে ছুঁতে দেবে না।

‘আমার ঐকে পরীক্ষা করা উচিত,’ ইউরিস বললে, ‘অবশ্য বিশেষ কিছু এসে যায় না তাতে। স্পষ্টই বোঝা যাচ্ছে টাইফাস হয়েছে—খুব বেশি এগিয়ে গেছে অসুখটা; বেচারি খুব যত্ননা পাচ্ছেন নিশ্চয়ই। আমি বলি কী, হাসপাতালে পাঠিয়ে দিন। বাড়িতে যে আপনি ঠুঁক যখন যা দরকার তা-ই ব্যবস্থা করবেন তাতে সন্দেহ নেই, কিন্তু সবচেয়ে বেশি দরকার হ'লো প্রথম কয়েক সপ্তাহ সমানে ডাক্তারের তত্ত্বাবধানে থাকা। কোনোরকম একটা গাড়ির ব্যবস্থা কি করতে পারেন—গাড়ি, নিদেন ঠেলাগাড়ি হ'লেও হবে। খুব ভালো ক'রে ঢেকে-চুকে নিয়ে যেতে হবে। আমি হাসপাতালে ভর্তি করার জন্য চিঠি দিয়ে দিচ্ছি।’

১ Basement : ভোরোপে ও উত্তর আমেরিকায় অনেক বাড়িতেই মাটির তলার ঘর থাকে, সেগুলি শস্তায় ভাড়া পাওয়া যায়।—অনুবাদের টীকা।

চেষ্টা করছি, কিন্তু একটু শুনুন। যা বলছেন সে কি সত্যি? কী ভয়ানক কাণ্ড!

‘আমার তো তা-ই মনে হচ্ছে।’

‘দেখুন, আমি জানি ওকে যেতে দিলে ফিরে পাবো না—আপনি কি এখানেই ওর দেখাশোনা করতে পারেন না? যতোবার আপনার পক্ষে আসা সম্ভব হয় তা-ই আসবেন—আপনি যা চান সানন্দে আমি তা-ই দেবো আপনাকে।’

‘দুঃখিত, আমি তো বললাম আপনাকে, ওঁর যা দরকার তা হ’লো সারাক্ষণ ডাক্তারের তত্ত্বাবধানে থাকা। যা বলছি তাই করুন। ওঁর ভালোর জন্য বলছি আমি।—এবার আপনি গাড়ি জোগাড় করার জন্য মরীয়া হ’য়ে চেষ্টা ক’রে দেখুন, আমি ততোক্শণে চিঠিটা লিখে ফেলি। লেখার জন্য বরং আপনারদের কমিটি-রুমে যাচ্ছি। বাড়ির নাম-ঠিকানার ছাপ দিতে হবে চিঠিতে, তাছাড়াও আরো দু’একটা নিয়ম কানুন আছে।’

১২

শাল আর পশামের কোট জড়িয়ে ভাড়াটেরা একে-একে ফিরে আসছে বাড়ির নিচের তাপহীন জায়গাটায়, যেটা আগে ছিলো ডিমের গুদোম আর এখন হাউস-কমিটি তাদের দপ্তর হিসেবে ব্যবহার করছে।

একটি সেক্রেটারিয়েট-টেবিল আছে ঘরের একদিকে, আর গোটা কয়েক চেয়ার। চেয়ার কম থাকায়, ডিমের পুরোনো ফাঁকা কাঠের খাঁচাগুলো উল্টে এক পাশে সারি ক’রে বেশির মতো সাজানো আছে। দূরে, ঘরের অন্য কোণে এই রকম কাঠের খাঁচার স্তূপ ছাদ পর্যন্ত উঠে গেছে। এক দিকে খড়কুটো জমা করা, ভাঙা ডিম থেকে চুইয়ে পড়া ডিমের কুসুমে শক্ত হ’য়ে এঁটে জ’মে আছে। সেই স্তূপের মধ্যে কিচকিচ ক’রে ইদুর খেলে বেড়ায়, কখনো-কখনো দল বেঁধে নেমে আসে পাথরের মেঝের মধ্যখানে, আবার ছিটকে চ’লে যায়।

যতোবার ও-রকম হচ্ছিলো ততোবার একটি মোটা স্ত্রীলোক আর্তনাদ ক’রে উঠে দাঁড়াচ্ছিলো কোনো-একটা খাঁচার ওপর; সন্তর্পণে জামাটা তুলে ধ’রে, তার ফ্যানশানদুরন্ত জুতোর হিল ঠুকে, ইচ্ছে ক’রে কর্কশ নেশাখোরের মতো গলায় সে চিৎকার করছিলো:

‘ওলিয়া, ওলিয়া, এ যে ইদুরে ছেয়ে আছে দেখছি। যা ভাগ, নোংরা জানোয়ার কাঁহাকার। আই-আই-আই! দ্যাখো একবার, ভূতগুলো সব বোঝে, দ্যাখো না কেলো ভূতগুলো কেমন বিকট ক’রে দাঁতে দাঁত ঘষছে। আই-আই-আই! এ যে ওঠার চেষ্টা করে, আমার জামার তলায় ঢুকে যাবে যে, বড়ো ভয় করছে আমার। একটু মুখ ফেরান তো, মশাইরা। মাপ করবেন—দুঃখিত, ভুলে গিয়েছিলাম, আপনারা আজকাল কমরেড নাগরিক, ভদ্রলোক আর নন!’

তার লম্বা আঁকুখান জামাটা খুলে গিয়ে ঝুলে পড়েছে তার থুতনি, বুক, পেটের ওপর—তিন-ভাঁজ করা থুতনিটি কাঁপছে তার, রেশমে মোড়া বুক আর পেট জমকালো। খুদে ব্যবসাদার আর কেরানিদের মহলে এককালে সে ছিলো রূপসী, কিন্তু এখন তার ফোলা চোখের পাতার মাঝখানে শুয়োরের মতো ছোট-ছোট দুটি চোখ সক্র চিলতের মতো দেখায়। এক প্রতিদ্বন্দ্বী একবার তাকে অ্যাসিড ছুঁড়ে মেরেছিলো কিন্তু লাগাতে পারেনি, শুধু দু-এক ফোঁটা ছিটকে এসে তার গালে আর ঠোঁটের কোণে লাঙল চালিয়ে দিয়ে গেছে, তাও এতো হালকা যে তাকে মানিয়ে গেছে বললে ভুল হয় না।

‘চাঁচানি থামাও তো, প্রাপ্তগিনা। কাজ করবো কী ক’রে?’ ব’লে উঠলেন স্থানীয় সোভিয়েটের মহিলা প্রতিনিধি, তাঁকে সভাপতি করা হয়েছে, টেবিলের ধারে ব’সে আছেন তিনি।

এই বাড়িটা আর ভাড়াটীদের অনেকেই তার আঙ্গুরের চেনা। সভার আগে ফতিমা খুড়ির সঙ্গে বেসরকারিভাবে কথা বললেন তিনি; স্বামী-সন্তান নিয়ে কেয়ার-টেকার ফতিমা এককালে এই বাড়ির নোংরা বেজমেটেই এক কোনায় বাস করতো, কিন্তু এখন তার কাছে তার মেয়ে ছাড়া কেউ নেই, দোতলায় ভালো দুটো ঘর তাকে দেয়া হয়েছে।

‘কী, ফতিমা, গতিক কেমন বুঝছো?’

ফতিমা অভিযোগ করলে যে এতো বড়ো বাড়ি আর এতো ভাড়াটের দেখাশুনা একেবারে একা ক’রে উঠতে পারে না সে, কোনো সাহায্যই সে পায় না কারো কাছে,—কেননা যদিও প্রতিটি পরিবারের পালা ক’রে সিঁড়ি ও দরজার সামনের অংশটুকু পরিষ্কার করার কথা, কেউ তা করে না।

‘ভেবো না ফতিমা, ওদের মজা দেখিয়ে দেবো। কিন্তু এটা কী রকম হাউস-কমিটি বলো তো? নিষ্কর্মার টেকি সব! চোর-জোচ্চোরদের ঢোকানো হয় বাড়িতে। খারাপ লোকেরা নাম না-লিখিয়ে লুকিয়ে থাকে। এটাকে তুলে দিয়ে নতুন কাউন্সিল নির্বাচন করতে হবে। তোমাকে বাড়ির ম্যানেজার ক’রে দেবো, কিন্তু কোনো-কিছু নিয়েই অস্থির হ’তে পারবে না, ব’লে দিচ্ছি।’

ফতিমা মিনতি করলো তাকে ছেড়ে দেবার জন্য, কিন্তু প্রতিনিধি তার কথায় কান দিলেন না।

ঘরের চারপাশে তাকিয়ে, যথেষ্ট লোক আছে স্থির ক’রে, তিনি সবাইকে চূপ করতে বললেন, ছোটো প্রারম্ভিক বক্তৃতা দিয়ে সভার কাজ শুরু করলেন। হাউস-কমিটির মধ্যে শৈথিল্যের নিন্দে করলেন তিনি, প্রস্তাব করলেন নতুন কাউন্সিলে নির্বাচনপ্রার্থীদের নাম দেওয়া হোক, তারপর অন্যান্য বিষয়ে বললেন।

শেষ করলেন এই ব’লে:

‘কমরেডগণ, এই তো অবস্থা। খোলাখুলি বলতে গেলে, বাড়িটা বিরাট, ইস্টেল হবার উপযোগী। কনফারেন্সগুলোতে যোগ দেবার জন্য যারা শহরে আসেন, তাঁদের কোথায় রাখবো ভেবে পাই না আমরা। তাই স্থির করা হয়েছে এই বাড়িটাকে স্থানীয় সোভিয়েটের ইস্টেল ক’রে দেওয়া হবে, বাইরে থেকে যে সব প্রতিনিধি আসেন, তাঁরা থাকবেন এখানে। আপনারা সকলেই জানেন নির্বাসনের আগে পর্যন্ত কমরেড টিভেরজিন এখানে ছিলেন, তাঁর সম্মানার্থে এর নাম হবে টিভেরজিন ইস্টেল। কোনো আপত্তি নেই তো? কবে নেওয়া হবে? তার তাড়া নেই, পুরো এক বছর আপনারদের হাতে আছে। কর্মীরা সকলেই আবার বাড়ি পাবে, অন্যেরা নিজের চেষ্টায় জায়গা খুঁজে নেবে—এক বছরের নোটিস দেওয়া হ’লো।’

‘আমরা সবাই কর্মী! আমরা প্রত্যেকে! আমরা সবাই!’ চারদিকে থেকে চৈচিয়ে উঠলো লোকেরা। একজন হঠাৎ ঝুপিয়ে কঁদে উঠলো: ‘এ হ’লো গ্রেট-রাশিয়ান’ গৌয়ার্ভুমি। সব জাতি এখন সমকক্ষ! আপনি কী বলতে চাচ্ছেন তা বুঝিনি ভাববেন না!’

‘সবাই একসঙ্গে কথা বলবেন না! কার জবাব আগে দেবো? নাগরিক ভালডিরকিন, এর সঙ্গে জাতির কী সম্পর্ক? খ্রাপুগিনার কথা ভাবুন, ওর ব্যাপারে জাতীয়তার কোনো প্রশ্ন ওঠে না, কিন্তু ওকে আমরা নিশ্চয়ই উচ্ছেদ করছি।’

‘তাই নাকি? উচ্ছেদ করার চেষ্টা ক’রেই দেখো না, মজা টের পাবে। দুমড়োনো সোফী! কুঁচকোনো বিছানার চাদর কোথাকার,’ রাগের ঝোঁকে চিৎকার ক’রে প্রতিনিধিকে যতো সব বোকা-বোকা গাল পাড়তে লাগলো খ্রাপুগিনা।

‘শয়তানি!’ ফতিমা-খুড়ি বিরক্ত হ’লো। ‘লজ্জাও নেই?’

‘তুমি নাক গলাতে এসো না তো, থামো, আমার ব্যাপার আমিই ভালো বুঝবো।’ প্রতিনিধি বললেন, ‘চূপ করো, ভ্রাপুগিনা, তোমার কথা কিছুই আমার জানতে বাকি নেই, চূপ করো বলছি, নয়তো তোমাকে একুনি ধরিয়ে দেবো—তোমার ভদকা বানানো আর চোরের আড্ডা বসানোর ব্যাপার ওরা হাতে-নাতে ধ’রে ফেলার আগেই আমি ধরিয়ে দেবো তোমাকে।’

ইউরি যখন ঢুকলো গোলমাল তখন চরমে উঠেছে। যে-লোকটি প্রথম তার কথায় কান দিলো তাকে সে জিজ্ঞেস করলো হাউস-কমিটির কারো সঙ্গে দেখা হওয়া সম্ভব কিনা; লোকটি মুখের সামনে হাতটা চোঙের মতো ক’রে ধ’রে গোলমালের ওপরে গলা তুলে চিৎকার করলে:

‘গা-লি-উ-লি-না! তোমাকে ডাকছে।’

নিজের কানকে বিশ্বাস করতে পারলো না ইউবি। রোগা, বয়স্ক, একটু কুঁজো একটি স্ত্রীলোক—ফতিমা খুড়ি—এগিয়ে এলো তার দিকে; শুধু তার মুখ দেখেই ইউরি বলতে পারতো সে গালিউলিনের মা। তক্ষুনি অবশ্য নিজের পরিচয় দিলো না সে, বললে:

‘আপনার ভাড়াটেকদের মধ্যে একজনের টাইফাস হয়েছে’ (নামটাও বললে সে)। ‘রোগটা যাতে না ছড়ায় তার জন্য বিস্তর সাবধানতা অবলম্বন করতে হবে। আর এক কথা, রোগীকে হাসপাতালে নিতে হবে। আমি একটা ভর্তি করার জন্য চিঠি লিখবো, হাউস-কমিটির ছাপা চাই তাতে। কী ক’রে এবং কোথায় সেটা হতে পারে!’

ফতিমা ভাবলো ইউরি জিজ্ঞেস করছে, ‘রোগীকে হাসপাতালে নেবো কী করে?’ তাই জবাব দিলে: ‘স্থানীয় সোভিয়েট থেকে কমরেড ডেমিনার জন্য একটা গাড়ি আসছে, মানে এ প্রতিনিধির জন্য। খুব ভালো লোক উনি, কমরেড ডেমিনা আরকি, আমি ঠুকে বলবো, উনি নিশ্চয়ই আপনার রোগীকে গাড়িটা দেবেন। ভাববেন না, কমরেড ডাক্তার, ঠিক পৌছে দেবো আমরা।’

‘তা ভালো কথা। কিন্তু, আমি জিজ্ঞেস কবছিলাম কী, চিঠিটা কোথায় ব’সে লিখবো। কিন্তু যদি গাড়িও থাকে... আমি কি একটা কথা জিজ্ঞেস করতে পারি, আপনি কি লেফটেনাণ্ট গালিউলিনের মা? আমরা ফ্রন্টে একই রেজিমেন্টে ছিলাম।’

ভয়ানকভাবে চমকে উঠে গালিউলিনা ফ্যাকাশে হ’য়ে গেলো। ইউরির হাত চেপে ধরলো সে: ‘বাইরে চলো। উঠানে গিয়ে কথা বলবো আমরা।’

দরজার বাইরে এসেই দ্রুতবেগে সে বললে: ‘আন্তে কথা বলো, ঈশ্বরের দোহাই। আমার সর্বনাশ করো না। ইউসুপকা ভুল পথে গেছে। নিজেই ভেবে দ্যাখো—সে কী ছিলো? শিক্ষানবিশ, কর্মী। তার বোঝা উচিত ছিলো—সাধারণ লোকেরা যে আজকাল অনেক ভালো আছে অঙ্কেও তা দেখতে পায়, সে-কথার কেউ প্রতিবাদ করতে পারবে না। তুমি নিজে কী ভাবো তা আমি জানি না, তোমার পক্ষে সেটা ঠিক হ’তে পারে, কিন্তু ইউসুপকার পক্ষে সেটা পাপ। ভগবান তাকে ক্ষমা করুন। তার বাবা ছিলেন সাধারণ সৈন্য, মারা গিয়েছিলেন তিনি; তার মুখ নাকি উড়ে গিয়েছিলো গুলি লেগে, তার হাত—আর পা—’

তার গলা কঁপে উঠলো; শান্ত হবার জন্য একটু থেমে, সে ব’লে চললো:

‘এসো। আমি তোমাকে গাড়ি ডেকে দিচ্ছি। জানি, তুমি কে। কয়েকদিনের জন্য সে এসেছিলো এখানে। আমাকে বলেছে। বলেছিলো তুমি নাকি লারা গুইশারকে চেনো। খুব ভালো মেয়ে ছিলো সে, মনে আছে আমার, আমাদের দেখতে আসতো। এখন কেমন হয়েছে জানি না— তোমাদের ভদ্রলোকদের কথা কে বলতে পারে? ভদ্রলোকেরা সব দল বেঁধে থাকবে, সেটা স্বাভাবিক। কিন্তু ইউসুপকার পক্ষে সেটা পাপ। এসো, গাড়িটাকে চেয়ে নেওয়া যাক। কমরেড ডেমিনা যে গাড়িটা তোমাকে দেবেনই সে-বিষয়ে আমি নিশ্চিত। কমরেড ডেমিনা কে

জানো? ও হ'লো গুলিয়া ডেমিনা, লারার মার কাছে দরজির কাজ করতো, সেও এই এখান থেকেই বেরিয়েছে। এই—এই বাড়ি থেকে। চ'লে এসো।'

১৩

বেশ অঙ্ককার হ'য়ে এসেছে। তাদের ঘিরে আছে অঙ্ককার। শুধু ডেমিনার পকেট-টর্চের ছোট্ট গোল আলো ছুটে-ছুটে যাচ্ছে বরফের এক-একটা ঝাপটা থেকে আর-একটোতে, মাত্রই চার-পাঁচ হাত দূরে, তাতে পথে আলো না-ফেলে বরং গুলিয়ে দিচ্ছে বেশি। তাদের চারপাশে অঙ্ককার, আর তারা পেছনে ফেলে এসেছে সেই বাড়ি, যে-বাড়িতে অতো লোক লারাকে চেনে, যেখানে ছেলেবেলায় অতোবার সে এসেছে, আর যেখানে, সবাই বললে, তার স্বামী আন্টিপভ মানুষ হয়েছে।

'টর্চ ছাড়া ঠিক পথ চিনতে পারবেন তো, কমরেড ডাঙ্গার?' ডেমিনা বেশ পিঠ-চাপড়ে কথা বলছিলো—'যদি না পারেন, আমারটা ধার দিতে পারি। ছেলেবেলায় সত্যি আমি ওর প্রেমে প'ড়ে গিয়েছিলাম—লারার কথা বলছি। জানেন, ওদের একটা দরজির দোকান ছিলো, সেখানে আমি শিক্ষানবীশের কাজ করতাম। এ-বছর দেখা হয়েছে ওব সঙ্গে। ফেরার পথে মস্কোতে থেমেছিলো। আমি বললাম: "কোথায় যাচ্ছে, বোকারাম? এখানে থাকো। এসো আমাদের সঙ্গে থাকবে। তোমাকে কাজ খুঁজে দেবো আমরা।" কিন্তু কোনো লাভ হ'লো না, ও থাকবে না। যাকগে, তার ব্যাপার সে জানে। পাশাকে বিয়ে করলো বুদ্ধি দিয়ে, হৃদয় দিয়ে নয়; তখন থেকেই এ-রকম নির্বোধ ও। চ'লে গেলো।'

'ওঁকে কেমন লাগে আপনার—কী মনে হয়?'

'সাবধান—পেছল কিন্তু। কতোবার যে ময়লা জল দরজার বাইরে ফেলতে বারণ কবেছি তার ঠিক নেই—এর চেয়ে দেয়ালের সঙ্গে কথা বলা ভালো।—ওকে কী মনে হয়? কী ভাবি? কী আবার ভাববো—কিছু ভাববার সময় কোথায় আমার?—এই যে, এখানে আমি থাকি।—একটা কথা ওঁকে বলিনি—ওর ভাই, যুদ্ধে গিয়েছিলো সে, তাকে বোধ হয় ওরা গুলি ক'রে মেরেছে। আর তার মা, এক সময় আমার মালিক ছিলেন যখন, তখন তাঁর যাতে কোনো বিপদ না হয় সেদিকে লক্ষ্য রাখবো আমি। আচ্ছা, এবার ভেতরে যেতে হবে আমাকে—আসি।'

তারা বিদায় নিলো। ডেমিনার ছোট্ট টর্চের আলো সরু পাথরের প্রবেশ-পথের ওপর লাফিয়ে প'ড়ে, দাগ-ধরা দেয়াল আর নোংরা সিঁড়িতে আলো ছড়িয়ে এগিয়ে চললো, আর ইউরিকে ঘিরে ধরলো অঙ্ককার। ডানদিকে হ'লো 'কাননবিজয়' স্ট্রিট', বা দিকে 'গাড়ি-বাগান' স্ট্রিট'। কালের, বরফে ঢাকা দূরত্বে মিশে গিয়ে তারা আর রাস্তা নেই, পাথরের বাড়ির জঙ্গল থেকে কেটে-নোওয়া চিলতে যেন তারা, সাইবেরিয়া অথবা উরালের ঘন জঙ্গলের মধ্য দিয়ে যেমন পথ কাটা হয়, তেমনি।

বাড়িতে আলো জ্বলছে, ভেতরটা উষ্ণ।

'এতো দেরি হ'লো কেন?' টোনিয়া বললে। 'তুমি যখন বাইরে ছিলে তখন এক অস্বাভাবিক ঘটনা ঘটেছে', ইউরি কোনো জবাব দেবার সময় পাবার আগেই সে আবার শুরু করলো। 'সত্যি, একেবারে আশ্চর্য।—তোমাকে বলতে ভুলে গিয়েছিলাম যে গতকাল বাবা অ্যালাম ঘড়িটা ভেঙে ফেলেছেন—খুব বিচলিত হ'য়ে পড়েছিলেন তিনি, বাড়িতে ঐ একটা ঘড়িই চলে। সারাবার চেষ্টা করলেন, যন্ত্রপাতি নিয়ে নাড়াচাড়া করে চললেন, কিন্তু কোনো ফল হ'লো না।

ঐ যে ওখানে এক ঘড়িওলা আছে না, সে এক অদ্ভুত দর ইকলো—তিন পাউণ্ড রুটি। কী করবো ভেবে পেলাম না, বাবা তো একেবারে মন-মরা হ'য়ে আছেন। আর ঘণ্টাখানেক আগে—বিশ্বাস করবে না—হঠাৎ কী জোর বেজে উঠলো—এমন কানে-তালনা-ধরানো শব্দ যে ভয়ে হতভম্ব হ'য়ে গেলাম আমরা। ঐ এ্যালার্ম ঘড়ি! এমন কথা কল্পনাও করতে পারো? আবার চলতে শুরু করেছে, একেবারে নিজে-নিজে।

‘আমার টাইফাসের ঘণ্টা বাজলো,’ ইউরি হাসলো। তার টাইফাস রোগী আর সেই সুরেলা ঘড়ির কথা বললে সে।

১৪

কিন্তু ইউরির টাইফাস হ'লো অনেক পরে। ততোদিনে জিভাগোরা সহ্যের সীমা ছাড়িয়ে গেছে। আর কিছু তাদের অবশিষ্ট নেই, উপোস করছে তারা। যে-পাটি-সদস্যকে একবার ইউরি ঝাচিয়েছিলো, যিনি ডাকাতের হাতে পড়েছিলেন, তাঁর সঙ্গে সে দেখা করতে গেলো। এ-ভদ্রলোক যা পারলেন করলেন, কিন্তু গৃহযুদ্ধ শুরু হচ্ছে তখন, মস্তোতে প্রায় থাকেনই না বলতে গেলে; তাছাড়া, মানুষ সে-সময়ে যে-কষ্ট সহ্য করেছে সেটাকে স্বাভাবিক ব'লে ধ'রে নিয়েছিলেন তিনি, আব যদিও তা প্রকাশ করতেন না, তিনি নিজেও অনাহারে ছিলেন।

ব্রেস্ট স্ট্রিটের দম্পতির কাছে চেষ্টা করলো ইউরি—তার সেই প্রাক্তন টাইফাস রোগী ও তার ‘জোগানদার’ স্বামী—কিন্তু মাঝখানকার মাসগুলির মধ্যে সে কোথায় উধাও হ'লো, তার স্ত্রীরও পাত্তা মিললো না। ইউরি যখন গিয়েছিলো, গালিউলিনা বেরিয়ে গিয়েছিলো তখন, ভাড়াটেরাও অধিকাংশই নতুন, আর ডেমিনা যুদ্ধক্ষেত্রে।

একদিন তাকে জানানো হ'লো নির্ধারিত দামে সে কিছু জ্বালানি কাঠ পাবে। সেগুলো আনার জন্য ভিগুভা স্টেশনে গেলো। বুর্জোয়া স্ট্রিটের^১ অন্তহীন পথ ধ'রে, তার আশাতীত সম্পদ যে-গাড়িতে ক'রে নিয়ে আসছিলো তার কোচোয়ানের ওপর দৃষ্টি রাখতে-রাখতে সে যখন হাঁটছিলো, লক্ষ্য করলো রাস্তাটা একেবারে অন্যরকম দেখাচ্ছে; দেখলো এ-পাশ থেকে ও-পাশে হেলে প'ড়ে যাচ্ছে সে, তার পা আর তাকে টানতে চাইছে না। ‘এইবার,’ সে ভাবলে, ‘আমার হ'য়ে গেলো। টাইফাস!’ সে প'ড়ে যাবার পর কোচোয়ান তাকে তুলে কাঠের স্তুপের ওপর শুইয়ে দিলে। কী ক'রে বাড়ি পৌঁছেছিলো ইউরি জানে না।

১৫

প্রায় পনেরো দিন ধ'রে থেকে-থেকে বিকারের ঘোরে কাটালো সে। স্বপ্ন দেখলো তার লেখার টেবিলের ওপর টোনিয়া দুটো রাস্তা সাজিয়ে রেখেছে, গাড়ি-বাগান স্ট্রিট ঝাঁ দিকে, আর ডানদিকে কানন-বিজয় স্ট্রিট, তারপর টেবিল-ল্যাম্প জ্বালিয়ে দিয়েছে; তার উষ্ণ কমলা-রঙের আলো রাস্তা উজ্জ্বল করেছে, এখন সে লিখতে পারে, তাই লিখছে।

অনেকদিন আগেই যা তার লেখা উচিত ছিলো, যা সে চিরকাল লিখতে চেয়েছে কিন্তু কখনো পারেনি, তাই লিখছিলো সে। সেটা লেখা এখন সহজ হ'য়ে গেছে তার কাছে, সাগ্রহে লিখছে, ঠিক যা বলতে চায় তা-ই লিখছে। শুধু মাঝে-মাঝে একটি ছেলে তার বাধা সৃষ্টি করছিলো, সরু কিরখিজ চোখ তার, বোতাম-খোলা হরিণের চামড়ার কোটের ফার-এর দিক বাইরে দিয়ে পরা—যেমন পরে উরালে কি সাইবেরিয়ায়।

সে নিশ্চিত জানে এই ছেলোটাই হ'লো তার মৃত্যুর দূত, অথবা সোজা কথায় বলতে গেলে, এই তার মৃত্যু। কিন্তু সে যদি তাকে কবিতা লিখতে সাহায্য করে তাহ'লে কী ক'রে সে তার মৃত্যু হতে পারে? মৃত্যু কী ক'রে কাজে লাগবে, মৃত্যুর পক্ষে সাহায্য করা কী ক'রে সম্ভব?

তার কবিতার বিষয় সমাধিও নয় পুনরুত্থানও নয়, ও-দুয়ের মাঝের দিনগুলো; কবিতার নাম 'বিকোভ'।

সব সময় তার সেই তিন দিনের কথা বর্ণনা করতে ইচ্ছে করে, যে-তিনদিন ধ'রে কালো, ক্রুদ্ধ, কৃমি-কীট পরিপূর্ণ এই পৃথিবী প্রেমের মৃত্যুহীন অবতারকে যন্ত্রণা দিয়েছে, যেমনভাবে ঢেউ উচুতে উঠে সমুদ্রের তীরে লাফিয়ে পড়ে তাকে ঢেকে ডুবিয়ে দেয়, তেমনি ভাবে ঢেলা ঝুড়েছে তার গায়ে। —কেমন ক'রে তিনদিন ধ'রে পৃথিবীর বুকের ওপর দিয়ে ব'য়ে গেছে কালো ঝড়, কখনো এগিয়ে এসেছে, আবার হ'ঠে গেছে মাঝে-মাঝে।

দুটো লাইন ফিরে-ফিরে আসছিলো তার মাথার মধ্যে।

'তোমার সান্নিধ্যে আমরা আনন্দিত।'

আর

'জাগরণের লগ্ন আসন্ন।'

তার কাছে, তাকে স্পর্শ ক'রে ছিলো নরক, পুতি, অবক্ষয় ও মৃত্যু; অথচ তার একই রকম কাছাকাছি আছে বসন্ত ঋতু আর মেরী মাদলীন, আর জীবন। —এখন জাগরণের লগ্ন আসন্ন। জেগে ওঠার, উঠে পড়ার সময়। উত্থানের, পুনরুত্থানের সময়।

১৬

ইউরিস অবস্থা ভালোর দিকে ফিরলো। প্রথমে নির্বোধের মতো সব-কিছু ধরাধার্য ব'লে মেনে নিচ্ছিলো সে। কিছু মনে ছিলো না, একটা জিনিসের সঙ্গে অন্য আর-একটার যোগসূত্র দেখতে পেতো না সে, অবাক হ'তো না কিছুতেই। তার স্বী তাকে খেতে দিচ্ছিলো শাদা রুটি, মাখন, আর চিনি মেশানো চা, কফি দিচ্ছিলো। এ-সব জিনিসের অস্তিত্বই যে ছিলো না সেটা ভুলে গিয়ে কবিতার মতো, কিংবা রূপকথার মতো, এদের আবাদ সে উপভোগ করতো, রোগমুক্তির পর এই পথ্য ঠিক এবং যথাযথ ব'লে মেনে নিয়েছিলো সে। শিগগিরই অবশ্য ভাবনা ফিরে এলো তার, অবাক হ'লো।

'এ-সব কী ক'রে পেলো?' টোনিয়াকে সে জিজ্ঞেস করলো।

'তোমার গ্রানিয়া এ-সব জোগাড় ক'রে দিয়েছে।'

'কে গ্রানিয়া?'

'গ্রানিয়া জিভাগো।'

'গ্রানিয়া জিভাগো?'

'আরে হ্যাঁ, তোমার ভাই ইয়েভগ্রাফ, টম্‌স্‌ থেকে এসেছে। তোমার সৎ-ভাই। তোমার অসুখের সময় রোজ এসেছে।'

'তার গায়ে কি হরিণের চামড়ার কোট ছিলো?'

'ঠিক। তাকে দেখেছো তা হ'লে। এতদিন ধ'রে তো প্রায় অচৈতন্যই ছিলে। ও বলছিলো কোন বাড়িতে না কোথায় সিঁড়িতে তোমার সঙ্গে দেখা হয়েছে ওর, কিন্তু ভূমি নাকি ওকে অসম্ভব ভয় পাইয়ে দিয়েছিলে। তোমাকে পূজা করে প্রায়, তোমার সব লেখা ও পড়ে। কতো জিনিসই না এনে দিয়েছে আমাদের। চাল, কিসমিস, চিনি! এখন ফিরে গেছে ও। ওব ইচ্ছে আমরাও ওখানে যাই। অদ্ভুত চরিত্র ছেলোটাই, একটু রহস্যময়। সরকারের সঙ্গে কোনোরকম

একটা যোগ আছে ব'লে মনে হয়। ও বলে—বলে, দু-এক বছরের জন্য শহর ছেড়ে আমাদের “জমিতে ফেরা” উচিত। ক্রোকারদের জায়গাটার কথা ভাবলাম আমি। গরু কী মনে হয়, জিজ্ঞেস করেছিলাম। ও বললে খুব ভালো কথা। সেখানে সজ্জি-খেত করতে পারি আমরা, চারদিকেই তো বন। একেবারে কোনো লড়াই না-করে ভেড়ার মতো মরার কোনো অর্থ হয় না।’

সে-বছর এপ্রিল মাসে জিভাগো তার পুরো সংসার নিয়ে রওনা হ'লো প্রাকালীন ভারিকিনো জমিদারির দিকে, উরালের সুদূর কোণে, ইউরিয়াটিন শহরের কাছে।

পরিচ্ছেদ ৭

যাত্রা

১

মার্চের শেষ। অন্যান্য বছরের মতো এবারও মাসের শেষ কটা দিন প্রথম গরম পড়লো, কিন্তু তারপরে—এই নকল বসন্ত কেটে যাবার পরেই—আগের চেয়ে আরো বেশি ঠাণ্ডা ক’রে এলো।

যাবার জন্য তৈরি হচ্ছিলো জিভাগোরা। বাড়িটায় চড়ুইয়ের মতো ঝাঁক বেঁধে লোক এসে ঢুকেছে; এই তাড়াহুড়োর কারণ লুকোবার জন্য তারা ভাড়াটেকার বললে যে ঈস্টারের জন্য বাড়িটা পরিষ্কার করা হবে, তাই তারা চ’লে যাচ্ছে।

যাওয়াতে ইউরির মত ছিলো না। এতদিন সে ভেবেছে যে চ’লে যাওয়ার কোনো মানেই হয় না, তাই অশ্রুট আপত্তিমাত্র জানিয়েছে, কিন্তু এখন অবশ্য সেই সময় এসেছে যখন সে সত্যি যা ভাবছে তা তাকে বলতেই হবে।

টোনিয়া, টোনিয়ার বাবা, আর তাকে নিয়ে এ-বিষয়ে একটা পারিবারিক বৈঠক বসেছিলো; কথাটা সেখানেই পাড়লো সে। ‘তোমরা কি ভাবছো আমার ভুল হচ্ছে?’ শেষটায় সে জিজ্ঞেস করলো তাদের, ‘তোমরা কি যাবেই ঠিক করেছে?’

‘যতদিন না জমিজমার নতুন বাটোয়ারা হচ্ছে আর মস্তোর বাইরে শাক-সব্জি ফলাবার জন্য এক টুকরো জমি পাচ্ছি আমরা, অন্তত সেই কয়েকটা বছর যে-ভাবেই হোক আমাদের কাটিয়ে দিতে হবে—এ-কথা তো তুমিই বললে। কিন্তু ততদিন পর্যন্ত আমাদের বেঁচে থাকতে হবে তো। সেটা কী ভাবে হবে? এই আসল কথাটাই তুমি আমাদের কাছে এড়িয়ে গেছো।’

টোনিয়ার বাবা তার এই কথার সমর্থন ক’রে বললেন, ‘এটা পাগলামি ছাড়া আর-কিছুই না।’

‘বেশ,’ ইউরি হাল ছেড়ে দিলো। ‘কিন্তু যে-জিনিসটা আমাকে সবচেয়ে পীড়া দিচ্ছে, তা হ’লো অনিশ্চয়তার ভাবটা। অজ্ঞের মতো চলেছি আমরা, শূন্যে ঝাঁপ দিচ্ছি; যেখানে যাচ্ছি তার কথা কিছুই জানি না। আমাদের চেনা যে-তিনজন ভারিকিনোতে থাকতেন, তার মধ্যে মা আর দিদিমা তো মারাই গেছেন, আর দাদু যদি এখনো বেঁচে থাকেন তো তাঁকে নিশ্চয়ই বন্দী ক’রে রাখা হয়েছে।

‘তোমরা তো জানো, যুদ্ধের শেষ বছরে ব্যাবসাসংক্রান্ত কাজে তিনি বেশ ব্যতিব্যস্ত হ’য়ে উঠেছিলেন—কারখানা আর জঙ্গল সব বিক্রি ক’রে দিয়েছেন, আর নয়তো অন্য কারো নামে বলিল বানিয়ে রেখেছেন। কোনো মানুষ, না কোনো ব্যাক্তের নামে বেনামি আছে, তা আমার জানা নেই। সত্যি বলতে, আমরা তো কিছুই জানি না। জমিদারি এখন কার নামে? জমিদারির মালিক কে—সে-প্রশ্ন করছি না আমি, তাতে আমার কিছুই এসে যায় না, কিন্তু এর জন্য দায়ী কে—সমস্ত দায়িত্বটা এখন কার ঘাড়ে? তাছাড়া জমিদারির কাজকর্মই বা কে চালাচ্ছে এখন? এখনো কাঠ কাটা হয়? কারখানায় নিয়মিত কাজ চলছে তো? আর সবচেয়ে বড়ো কথা হ’লো,

দেশের ঐ অংশের হর্তাকর্তা এখন কে? কিংবা বলা যাক, আমরা যখন সেখানে গিয়ে পৌঁছবো, তখন সেখানকার মালিক কে হবে?

‘তোমরা ভাবছো বড়ো ম্যানেজার মিকুলিৎসিন আমাদের দেখাতনো করবে। তারই ওপর সম্পূর্ণ নির্ভর করে আছে তোমরা। কিন্তু সে কি এখনো আছে সেখানে? সে এখনো বেঁচে আছে কিনা, তাই বা কে জানে? তা ছাড়া, তার নাম ছাড়া, তার সম্বন্ধে কী জানো তোমরা? আর সেই নামটাও আমরা মনে রেখেছি এই কারণে যে তা উচ্চারণ করতে দাদুকে খুব বেগ পেতে হতো।

‘যাকগে। আমি কেবল একের পর এক অসুবিধেগুলোর কথাই মনে করিয়ে দিতে চাই না। তোমরাও মন স্থির করে ফেলেছো, আর আমিও রাজি হয়েছি। এখন এই প্রস্তাবটাকে বাতিল করে ফেলার কোনোই মানে হয় না। এক জায়গা থেকে আরেক জায়গায় যেতে হলে আজকাল কী করতে হয়, এখন সেই কথাটাই আমাদের জানা দরকার।’

২

কী করতে হয়, জানবার জন্য ইউরা ইয়ারোল্লাভস্কি স্টেশনে গেলো।

হলঘরগুলির মধ্য দিয়ে গলি চলে গেছে, দু-দিকে কাঠের হাত-রেলিং; যাত্রীরা লাইন দিয়ে দাঁড়িয়ে আছে বা আস্তে-আস্তে সরে যাচ্ছে, ইউরি তাকিয়ে তাদের শেষ দেখতে পেলে না। নিচে, পাথরের মেঝেয়, একগাদা লোক শুয়ে আছে; সৈন্যরা যে-ছাই রঙের কোট পরে, তাই তাদের পরনে, ক্রমাগত শোনা যাচ্ছে তাদের কাশির শব্দ, কেউ-কেউ আবার সেখানেই থুতু ফেলছে, গড়াচ্ছে এদিক-ওদিক, আর কথা বলতে গিয়ে আশাভীতভাবে চ্যাচাচ্ছে; কড়িকাঠে লেগে তার প্রতিধ্বনি কত জোরে আসবে, তা বোধহয় তারা নিজেরাও ঠিক বুঝতে পারছিলো না।

তাদের বেশির ভাগই টাইফাস-রোগী; হাসপাতালগুলিতে অভ্যস্ত ভিড় বলে সংকট কেটে যাবার পরদিনই তাদের ছেড়ে দেওয়া হচ্ছিলো। ডাক্তার হিসেবে ইউরি নিজেও মাঝে-মাঝে এরকম করতে বাধ্য হয়েছে; কিন্তু দুর্ভাগাদের সংখ্যা যে এত বেশি, কিংবা তারা যে শেষটায় রেল-স্টেশনে এসে আশ্রয় নিতে বাধ্য হয়, সে-বিষয়ে তার কোনোই ধারণা ছিলো না।

‘প্রথম সুযোগ আপনিই পাবেন,’ শাব্দা গ্রন-পরা পোর্টার তাকে বললো। ‘কিন্তু ট্রেন আছে কিনা জানবার জন্য রোজ আপনাকে এখানে এসে খোঁজ নিয়ে যেতে হবে। ট্রেন আজকাল সোনার মতোই দুল্ভ হয়ে উঠেছে, রীতিমতো ভাগ্য লাগে ট্রেনের দেখা পেতে হলে। আর বলাই বাহুল্য,’ (সে বড়ো আঙুল দিয়ে অন্য দুটি আঙুল ঘষতে লাগলো) ‘অল্প কিছু ময়দা কিংবা অন্য কিছু—আপনি তো জানেন তেল না-শেলে গাড়ির চাকা গড়িয়ে যেতে পারে না—তাছাড়া,’ (এবারে সে তার গলার কণ্ঠা স্পর্শ করলে) ‘সঙ্গে একটু ভদকা না থাকলে বেশি দূর আপনাকে এগোতে হবে না।’

৩

প্রায় সেই সময়ে আলেকজান্ডার আলেকজান্ড্রোভিচকে কয়েকবার ডেকে নিয়ে যাওয়া হয়েছিলো ‘উচ্চতর অর্থনৈতিক পরিষদের’ উপদেষ্টা হিসেবে কাজ করার জন্য; আর ইউরির ডাক পড়েছিলো কোনো এক সরকারি চাকুরের চিকিৎসা করার জন্য—গুরুতর পীড়িত হয়ে পড়েছিলেন তিনি। দু-জনেই পারিভ্রমিক হিসেবে পেরেছিলেন তখনকার কয়েকটিতে যা সবচেয়ে

মূল্যবান: অর্থাৎ, কতগুলো সই-করা চিরকুট, যা দেখিয়ে নতুন-খোলা সংরক্ষিত দোকানে জিনিস পাওয়া যাবে।

সস্তা সিমনের মঠের পাশে সৈন্য-বিভাগের পুরোনো যে গুদামঘর ছিলো, তা-ই হ'লো দোকান। মঠ আর ব্যারাকের সামনের মাঠ পেরিয়ে গেলেন ডাক্তার এবং অধ্যাপক; নিচু একটা পাথরের দরজার ভেতর দিয়ে সরাসরি গিয়ে হাজির হলেন একটি খিলানওয়া মণিকোঠায়। ঢালু ভাবে নিচের দিকে গড়িয়ে গেছে মণিকোঠা, অন্য প্রান্তে ক্রমশ চওড়া হয়ে গেছে, আর সেখানে আড়াআড়িভাবে দুই দেয়াল স্পর্শ করে আছে একটি কাউন্টার। কাউন্টারের পেছনে একজন কর্মচারী দাঁড়িয়ে; শান্ত সুস্থিরভাবে মাপজোক করে সে জিনিসপত্র হাতে তুলে দিচ্ছে, আর মোটা একটা শেল্লি দিয়ে তার তালিকা থেকে এক-একটা জিনিসের নাম কেটে ফেলছে, আবার মাঝে-মাঝে ভাঁড়ারের পেছন থেকে জিনিসপত্র এনে তার তহবিল ভরে তুলছে।

ক্রোতার সংখ্যা অল্প ছিলো বলে শিগগিরই তাদের পালা এলো। সই-করা চিরকুটের দিকে তাকিয়ে মালবাবু জিজ্ঞেস করলে, 'কিসে করে নেবেন?' ডাক্তারের সঙ্গে-সঙ্গে অধ্যাপক মশায়ও ছোটো-বড়ো কয়েকটা বাগিলের ওয়াড় বের করে দিলেন, আর সেগুলো যখন ময়দা, গম, চিনি, মাকারোনি, চর্বি, সাবান, দেশলাই আর কয়েকটা কাগজের প্যাকেট দিয়ে ভর্তি করে দেওয়া হ'তে লাগলো, বিস্ময়ে তাঁদের চোখ বড়ো-বড়ো হয়ে গেলো। পরে সেই কাগজের প্যাকেটগুলো খুলে দেখা গিয়েছিলো ভেতরে ককেশীয় পনির রয়েছে।

মালবাবুর বদান্যতায় দুজনে একেবারে অভিভূত হয়ে পড়লো। খামকা যাতে তার সময় নষ্ট না-হয়, সেই জন্য তাড়াতাড়ি বাগিলগুলো বড়ো থলিটায় ঠেসে রেখে কাঁধের ওপর বুলিয়ে নিলো।

দুজনে মণিকোঠা থেকে বেরিয়ে এলো ঠিক যেন নেশাখোরের মতো। —কেবলমাত্র খাবারের ভাবনাতেই না, তারাও যে পৃথিবীর কাজে লেগেছে, তাদের বৈধে থাকা যে অর্থহীন নয়, এবং বাড়ি ফিরলে টোনিয়া তাদের ওপর যে-প্রশংসা ও কৃতজ্ঞতা বর্ষণ করবে, তারা যে দতিই তার যোগ্য—এই কথা ভেবেই দু-জনে কী রকম যেন আচ্ছন্ন রইলো।

৪

সকালে ফিরে আসবার পর যাতে এই ফ্ল্যাটেই এসে ওঠা যায়, সে-জন্য নাম লিখিয়ে রাখতে হবে; তাছাড়া ভ্রমণের জন্য দলিলপত্রেরও ব্যবস্থা করতে হয়। এই সব কাজে বাড়ির পুরুষ দু-জন দিনের পর দিন সরকারি আপিশগুলোর মধ্যে অদৃশ্য হয়ে রইলো, এদিকে টোনিয়া গাছাতে বসলো বাড়ির সব জিনিসপত্র।

সরকারিভাবে জিভাগোদের দখলে এখন যে-তিনটে ঘর, সেগুলোর মধ্যে চলাফেরা করতে-করতে টোনিয়া সবচেয়ে ছোট জিনিসটাও বিশ্বাস করে হাতে নিয়ে বিবেচনা করে যাচ্ছে। নিয়ে যাবে বলে যে-সব জিনিস জুপ করে রাখা হয়েছে, এটাকেও সেখানে রাখবে কেনা—এই কথাই ভাবে কেবল। তাদের মালপত্রের সামান্য অংশই কেবল নিজেদের ব্যবহারে স্ন্য; বাকি সমস্ত কিছুই রান্নায়, ও গজবাহলে পৌছবার পর প্রথম কয়েক সপ্তাহ পরন্তু গাছাড়ির কাজ চালাবে।

খোলা জানলা দিয়ে বসন্তের হাওয়া আসে; নতুন কাটা শাদা রুটির স্বাদ তাতে মাখানো যেন। নিচে, উঠানে, ছোটোরা খেলাধুলো করে, তার চ্যাচামেচি ভেসে আসে, আর শোনা যায় গিরি ডাক। ঘরটায় বসে হাওয়া আসতে থাকে, ততই খোলা তোরঙ্গগুলোর ভেতরে গাঙিল-করা শীতের পোশাকগুলো থেকে নেপথলিনের গন্ধ তীব্র হয়ে ছড়িয়ে পড়ে।

সঙ্গে কী নিয়ে যাওয়া হবে, আর কী-কী ফেলে রেখে যাবে—অনেক ভেবে-চিন্তে সে-বিষয়ে একটা বিস্তারিত নিয়ম ঠিক করা হ'লো। আগেই যারা চ'লে গিয়েছিলো তারা স্বজন-বন্ধুদের সুবিধা-অসুবিধার কথা যা লিখেছিলো তা-ই এই নীতির ভিত্তি। কয়েকটা খুব সহজ আর জরুরি কথা মনে রেখে এই নীতি তৈরি হয়েছিলো, আর টোনিয়ার সমস্ত ক্রিয়াকলাপই তার দ্বারা পরিচালিত। যেন বাইরে থেকে ছোটোদের চ্যাচামেচি আর চড়ুইয়ের কিচিরমিচিরের সঙ্গে কারো গোপন গলার স্বর জানলা দিয়ে এসে ফিশফিশিয়ে তাকে নির্দেশ দিচ্ছে।

'পোশাক বানাবার জন্য কাপড় নেবার আগে এটা মনে রেখো,' গলার স্বর বললে, 'পাখে মালপত্র খুলে তন্নতন্ন ক'রে দ্যাখে, কাজেই এটা বিপজ্জনক; তবে তৈরি পোশাকের মতো দেখালে অন্য কথা। সব জিনিসপত্র কাপড়চোপড়ের বেলায় তাই। বেশি পুরোনো না-হ'লে কোট নেয়াই ভালো। কোনো তোরঙ্গ বা ঝুড়ি নেয়া চলবে না (কেননা পাখে কোনো কুলি পাওয়া যাবে না); অদরকারি কোনো কিছু যাতে চ'লে না-আসে, সেটা ভালো ক'রে দেখে নিতে হবে। কোনো মেয়ে বা ছোটো ছেলেও যাতে ব'য়ে নিয়ে যেতে পারে সেজন্য সব-কিছু ছোটো-ছোটো বাগ্গিল ক'রে বেঁধে নেয়া দরকার। নুন আর তামাক খুব দরকারি জিনিস ব'লে জানা গেছে, কিন্তু সে-সব সঙ্গে নেয়ার মানেই হ'লো ঝুঁকি নেয়া। টাকাকড়ি সব যেন কেরেক্সা' হয়। দলিলপত্র নিরাপদে নিয়ে যাওয়াই হ'লো সবচেয়ে কঠিন কাজ।' ইত্যাদি-ইত্যাদি আরো অনেক কিছু।

৫

যাবার আগের দিন-তুবার-ঝড় হয়েছিলো। ঘুরপাক খেয়ে রাশি-রাশি বরফ পড়েছিলো, দেখাচ্ছিলো উড়ে-চলা ধূসর মেঘের মতো; একবার উড়ছে, আবার শাদা ঘূর্ণি হাওয়ার মতো নেমে আসছে মাটিতে, প্রবল বেগে ব'য়ে যাচ্ছে রাস্তার দূর অন্ধকারে, আর সব-কিছু শাদা হ'য়ে গেছে।

মালপত্র বাধাছাঁদা শেষ। যে-সব জিনিস নিয়ে যাওয়া হ'লো না, সেগুলো সুদৃঢ় আস্ত ফ্র্যাটটা এক বয়স্ক দম্পতির হাতে তুলে দেয়া হ'লো। —তারাই দেখাশুনো করবে। বড়ো স্বামীটি এর আগে দোকানে কাজ করতো, সম্পর্কে তারা মস্কোর ইয়েগোরোভনার আত্মীয়। আলু আর জ্বালানির বদলে কী-ভাবে পোশাক আর আসবাবপত্র সওদা করতে হয়, সে-বিষয়ে এই ইয়েগোরোভনাই টোনিয়াকে গত বছর সাহায্য করেছিলো।

(মার্কেলকে বিশ্বাস করা যায় না। জঙ্গি ফাঁড়িতে দাঁড়িয়েও সেটাকে রাজনৈতিক ক্লাব হিসেবে বেছে নিয়েছিলো—সে অবশ্য এমন কথা বলেনি যে তার প্রাক্তন প্রভুর তার রক্ত শুষে নিয়েছে। কিন্তু একটা মস্ত অভিযোগ সে এনেছে তাদের বিরুদ্ধে: এই এতগুলি বছর ধ'রে তাকে নাকি কিছুই জানতে দেয়া হয়নি, আমরা যে বানর থেকে জন্মেছি—এই তথ্য নাকি তার প্রভুরা ইচ্ছে ক'রে তার কাছে গোপন রেখেছিলো।)

শেষবারের মতো ভালো ক'রে ঘরদোরগুলো দেখে আসার সময় দম্পতিকে সঙ্গে নিলো টোনিয়া। দেখলে, চাবিগুলো ঠিকমতো লাগে কিনা তালায়, দেয়ালগুলো খুলে দেখে আবার বন্ধ ক'রে রাখলো, বাসনপত্র রাখার আলমারিটা খুলে দেখলো, ভাবতে চেষ্টা করলো শেষ মুহূর্তে আর কী-কী নির্দেশ দেয়া যায়।

চেয়ার-টেবিলগুলো ঠেলে দেয়ালের গায়ে জড়ো ক'রে রাখা হয়েছে, পর্দা নামানো, কোণে

বাতিভুলো তুল করা। ঘরগুলি খালি, একেবারে শূন্য, শীতকালের স্বাচ্ছন্দ্য আর একটুও নেই, সবই অন্তর্ধান করেছে। খোলা জানালা দিয়ে বাইরের ঝড়ের দিকে তাকিয়ে থাকতে-থাকতে সকলের মনেই এক সময় অতীতের দুঃখ-বেদনা ভিড় করে এলো। মায়ের মৃত্যুর কথা মনে-মনে ভাবলো ইউরি; টোনিয়া আর আলেকজান্ডার আলেকজান্ড্রোভিচ ভাবলেন আনার মৃত্যু আর অন্ত্যেষ্টিক্রিয়ের কথা। কেন যেন তাদের মনে হ'লো এই বাড়িতে এই তাদের শেষ রাত্রি, আর তারা এখানে ফিরে আসবে না। এটা মনে হবার কোনোই কারণ ছিলো না, কিন্তু তবু এই কথাই মনে হ'লো প্রত্যেকের। পরস্পরকে এই ভাবনায় ভারাক্রান্ত করতে চাচ্ছিলো না ব'লে এই অমঙ্গলের কথা মুখ ফুটে অবশ্য কেউই বললো না, কিন্তু এই ভাবনায় সকলেই তারা বিষন্ন হ'য়ে থাকলো। এই বাড়িতে যে-জীবন তারা কাটিয়েছে তার কথা মনে হ'তেই অনেক কষ্টে তারা চোখের জল চাপলো।

টোনিয়া কিন্তু এত সব সঙ্কেতও মনোভাব গোপন রাখবার জন্য আশ্রয় চেষ্টা করে তত্ত্বাবধায়কের তীর সঙ্গে এক অন্তহীন আলাপ চালিয়ে গেলো। বাড়ির দেখাশোনার ভার নিয়ে এই দম্পতি তাদের প্রতি যে-অনুগ্রহ দেখাচ্ছে সেটাকে মনে-মনে অনেকখানি ফাঁপিয়ে তুললো টোনিয়া; যাতে তাকে কিছুতেই অকৃতজ্ঞ না-দেখায় সেইজন্য ভয়ানক উৎকণ্ঠিত হ'য়ে উঠলো, বারে-বারে ক্ষমাপ্রার্থনা করলো সে তাদের কাছে, বারে-বারে পাশের ঘরে গিয়ে ত্রীলোকটির জন্য নানারকম উপহার নিয়ে এলো—ব্লাউজ, রেশমি ছিটের কাপড় আর সূতির বড়ো-বড়ো টুকরো। পাংলা চৌখুপি-করা রঙিন ছিট কিংবা ফুটকি-বসানো রঙিন কাপড়ের থানগুলি ঘরের আবছায়ায় কালো দেখাচ্ছিলো; আর বিদায় নেবার আগের দিনের সন্ধ্যাবেলায় শূন্য খোলা জানালা দিয়ে রাস্তা যখন ঘরের মধ্যে উঁকি দিলো, তখন তাকেও অন্ধকার দেখালো কাঠকুটোর চৌখুপি আর বিন্দুর মতো বরফের ফুটকিতে।

৬

সকাল হ'তেই তারা বাড়ি ছেড়ে গেলো। অন্য ভাড়াটেদের তখন ঘুমিয়ে থাকার কথা; কিন্তু ভাড়াটের মধ্যে একজন ছিলো, যে সামাজিক ঘটনায় জটলা পাকাতে ভীষণ ভালোবাসতো; সেই জেকোবোরটিনাই চ্যাচামেচি করে সবাইকে জাগিয়ে দিলো: 'কমরেডগণ! সব্বাই এসো তোমরা, শিগগির। প্রাস্কন' গ্রামেকোদের বিদায় জানাতে হবে না?'

সবাই দলে-দলে পেছনের দেউড়িতে এসে ভিড় করে দাঁড়ালো (সামনের দরজা আজকাল তক্তা এঁটে বন্ধ করে রাখা হয়), এমনভাবে অর্ধ-বৃত্ত রচনা করে দাঁড়ালো যে মনে হ'লো তাদের একুনি কোটো তোলা হবে।

ঠাণ্ডায় কাপতে-কাপতে তারা হাই তুলতে লাগলো, কাঁধে-ফেলে-রাখা ছেঁড়াখোঁড়া পুরোনো কোট টেনে নিয়ে গায়ে জড়ালো; তাড়াতাড়িতে খালি পায়ে মস্ত মাপের ফেস্ট-এর জুতো চাপিয়েছে, তাই প'রে এক-একজন খপখপিয়ে বেরোতে লাগলো ঘর থেকে।

এই নিষিদ্ধ দিনের মধ্যেও মার্কেল কোনো-এক গোপন উপায়ে কোথেকে একরাশ চোলাই-করা বাজে জাতের ক্ষতিকর মদ জোগাড় করেছিলো; তাই গিলে-গিলে তার অরুচি তখন রীতিমতো মস্ত; দেউড়ির পুরোনো রেলিঙে হেলান দিয়ে মড়ার মতো নিঃশোড়ে দাঁড়িয়ে-রইলো সে; তার ডারে রেলিঙটা নানারকম বিস্ত্রী আওয়াজ করতে থাকলো, যেন একুনি ভেঙে পড়বে। সেই অবস্থাতেই সে মালপত্র ব'য়ে স্টেশনে শৌছে দিয়ে আসতে চাচ্ছিলো। ইউরির

তার প্রস্তাব প্রত্যাখান করায় সে ভীষণ চ'টে উঠলো। শেষটায় কোনোরকমে তার হাত এড়িয়ে তারা বেরিয়ে এলো পাশের গলিতে।

তখনো চারদিক রীতিমতো অন্ধকার। একটুও হাওয়া নেই, রাত্রে চেরেও ঘন হ'য়ে বরফ পড়ছে। বড়ো-বড়ো রোয়া-তোলা পালকের মতো পাংলা বরফের চাই অলস ভঙ্গিতে নেমে আসছে আকাশ থেকে, আর ঝুলে থাকছে অনেককণ— কোথায় যে আস্তানা নেবে তা যেন কিছুতেই ঠিক করতে পারছে না।

আবার্টে যখন এলো, তখন অন্ধ আলো ফুটেছে। মঞ্চের ওপর যেমনভাবে যবনিকা নেমে আসে, তেমনভাবে মন্ত রাস্তার মতো চওড়া একটি তুষার-পর্দা আস্তে-আস্তে নেমে আসছে এখানে, পথিকদের পা ছুঁয়ে ঝালর দেলাচ্ছে তার; এত আস্তে তার নামছে যে এসোচ্ছে ব'লেই মনে হচ্ছে না, বরং মনে হচ্ছে তার যেন পেণ্ডুলামের মতো দুলে-দুলে সময় মাপছে।

ভ্রমণকারীরা ছাড়া রাস্তায় আর-কোনো জনপ্রাণী ছিলো না। কিন্তু একটুকণের মধ্যেই বরফের মতো শাদা ঘোড়ায় চিনা একটি গাড়ি পেছন থেকে এসে তাদের ধ'রে ফেললো; কোচোয়ানকে দেখাছিলো ঠিক ভিজ়ে ময়দার তালের মতো। অভিকায় এক টাকর অঙ্ক পাবে জেনে (তখনকার দিনে তার দাম এক কোশেকেরও কম) সে তাদের মালপত্রসমেত স্টেশনে পৌছে দিলে। কেবল ইউরি হেঁটে যেতে চেয়েছিলো ব'লে গাড়ির পেছন-পেছন হেঁটে আসার অনুমতি পেলো।

৭

সে গিয়ে দেখলো টোনিয়া তার কবাকে নিয়ে অন্তহীন লাইনগুলোর একটাতে দাঁড়িয়ে আছে। নিউশা, শাশা বাইরে ইটতে-ইটতে মাঝে-মাঝে তাকিয়ে দেখছিলো বরফের সঙ্গে যোগ দেবার সময় হয়েছে কিনা। তাদের গা থেকে তীব্র কেরোসিনের গন্ধ বেরোচ্ছিলো: উকুনের হাত থেকে রেহাই পাবার জন্য ঘাড়ো কজিতে ইটুতে পুরু ক'রে কেরোসিনের প্রলেপ লাগিয়েছিলো তারা।

লাইনগুলো প্র্যাটফর্ম পর্যন্ত গিয়ে শেষ হয়েছে। আসলে কিন্তু লাইন থেকেও আরো আধ মাইল হেঁটে গিয়ে যাত্রীদের ট্রেনে উঠতে হবে। যথেষ্ট সংখ্যক ঝাড়ুদারের অভাবে স্টেশন নোংরা হ'য়ে আছে। প্র্যাটফর্মের সামনের রাস্তাগুলি জঞ্জাল আর বরফের জন্য তো ব্যবহার্যই করা যায় না। ট্রেনগুলি আজকাল দূরে থাকে।

ইউরিকে দেখে টোনিয়া হাত নাড়লো; একটু কাছে এগিয়ে এলে সে চেষ্টা করে ব'লে দিলে কোন জায়গায় গিয়ে ভ্রমণের ছাড়পত্রগুলি শীলমোহর করিয়ে আনতে হয়।

‘দেখি, কী লিখে দিলো?’ কিরে এসে সে জিজ্ঞেস করলো। হাত-রেঙিলের ওপর দিয়ে একরাশ কাগজ পত্র বাড়িয়ে দিলো ইউরি।

‘এটাতে বিশেষ একটা বগির কথা লেখা আছে,’ টোনিয়ার পেছনে যে-লোকটা লাইনে দাঁড়িয়েছিলো, সে তার কাঁধের ওপর দিয়ে পড়তে-পড়তে বললো।

টোনিয়ার সামনের লোকটি ব্যাপারটা আরো বিশদ ক'রে দিলে। এই লোকটি হচ্ছে সেই ধরনের, যারা সব রকম সম্ভাব্য পরিস্থিতিতেই আইনকানুন সম্পর্কে সবজান্ডা সাজে, নির্বিকারভাবে সে-সম্পর্কে আলোচনা করতে পারে এবং নির্বিচারে সেগুলি মেনেও নেয়।

‘এই যে ছাপটা দেখছেন,’ সে ব্যাখ্যা করলো, ‘এর জোরে আপনি ক্লাশ-ভাগ-করা যাত্রীবাহী বগিগাড়িতে বসতে পারবেন, অবশ্য গাড়িতে যদি কোনো যাত্রীবাহী বগি থাকে।’

সমস্ত দলের লোকেরা একসঙ্গে কথায় যোগ দিলো।

‘যাত্রীবাহী গাড়ি! তাই নাকি! আজকালকার দিনে গাড়ির পেছনে ঝুলে-ঝুলে যেতে পারলেও ভাগ্য ব'লে জানবেন।’

আইনবাগীশ বললেন, 'এদের কথায় কান দেবেন না। ব্যাপারটা খুবই সোজা, চট করে আপনাকে বুঝিয়ে দিচ্ছি। সমস্ত স্পেশাল গাড়িই আজকাল ভুলে দেওয়া হয়েছে: একই ধরনের ট্রেন চলাফেরা করে আজকাল। সেখানে সকলের জন্যেই সমান ব্যবস্থা; ফৌজের লোক, কয়েদি, গোরু-ভেড়া-মানুষ—সকলের জন্যেই এক এবং একমাত্র গাড়ির ব্যবস্থা আজকাল। কেন একে ভুল বোঝাচ্ছেন?' এবার সে ভিড়ের দিকে ফিরলো। 'কথা বলতে পরস্রা খরচ হয় না, কাজেই যা খুশি তাই করতে পারেন। কিন্তু যা বলবেন, দয়া করে স্পষ্ট করে বলবেন, যাতে ইনি বুঝতে পারেন।'

'কী বোঝানোটাই না বোঝালেন, মশাই।' চুপিয়ে আইনবাগীশকে ধামিয়ে দেওয়া হ'লো। 'স্পেশাল বগির জন্যে শীলমোহর করা কাগজ তাঁর কাছে আছে, এ-কথাটা যেই উচ্চারণ করলেন তত্বনি তো যথেষ্ট ব'লে ফেললেন। কাউকে কিছু বোঝাবার আগে তার মুখের দিকে একবার তাকিয়ে দেখবেন, মশাই, যার মুখের চেহারা এ-রকম, সে কী করে স্পেশাল গাড়িতে যাবে? আলাদা গাড়িটা শুধু নাবিকদেরই জন্যে, তাদের দিয়েই গাড়িটা ভর্তি হ'য়ে যায়। নাবিকদের অভিজ্ঞ চোখ, তাছাড়া তাদের সঙ্গে বন্দুক থাকে। ঐর দিকে তাকালে তারা কী দেখবে? দেখবে একজন সম্পত্তিগুলা লোক। কেবল তাই না, তার চেয়েও খারাপ—একজন ডাক্তার, আগেকার দিনে যাদের ভদ্রলোক বলতো। সে বন্দুক তুলে ধরবে, তারপর বিদায়।'

জনতার মনোযোগটা অন্য বিষয়ে চ'লে না-গেলে ডাক্তারের ব্যাপারটা আরো কতোকণ তাদের সহানুভূতি জাগাতো বলা মুশকিল।

কিছুক্ষণ ধ'রেই কৌতূহলী লোকজনেরা বড়ো-বড়ো কাচের জানলা দিয়ে রেল-লাইনের দিকে তাকাচ্ছিলো, যার কয়েকশো গজ ছিলো ছাদ দিয়ে ঢেকে রাখা। ছাদ যেখানে শেষ হয়েছে শুধু সেখান থেকেই বরফ পড়ার দৃশ্য দেখা যায়। এতদূর থেকে দেখা যাচ্ছিলো যে মনে হচ্ছিলো যেন স্থির: মাছের জন্যে জলে রুটির গুঁড়ো ছুঁড়ে ফেললে যেমন খুব আস্তে তা ডুবতে থাকে তেমনি আস্তে বরফ পড়ছিলো মাটিতে।

কতোগুলো অচেনা মূর্তি একা অথবা দল বেঁধে প্রায় আশ্বষটা ধ'রে সেখানটায় চলাফেরা করছিলো। প্রথমে মনে হয়েছিলো তারা বুঝি রেলের লোক, নিজেদের কাজকর্ম নিয়ে ব্যস্ত আছে; কিন্তু এখন দেখা গেলো রীতিমতো একটা জনতা ছুটে এলো, আর এই ছোটো-ছোটো দলগুলি যেদিকে দৌড়োচ্ছে, সেদিকে এবার ছোট্ট এক ধোয়ার রাশি দেখা গেলো।

'দরজা খুলে দে, জোচ্চোরের দল!' লাইনের মধ্য থেকে প্রচণ্ড সোরগোল উঠলো। ভিড় ন'ড়ে উঠলো, উত্তেজিত হ'য়ে আছড়ে পড়লো দরজায়; যারা পেছনে ছিলো, তারা সামনের লোককে টেনে নিয়ে চললো।

'দ্যাখো, কী কাণ্ড চলছে। এখানে কিনা আমাদের বন্ধু ক'রে রেখেছে, অথচ বাইরে থেকে কতগুলি বেজন্মা ভেতরে ঢোকবার একটা রাস্তা বের ক'রে লাফিয়ে এসে লাইনে দাঁড়াচ্ছে। এই শয়তান, খোল, দরজা খোল নইলে ভেঙে একেবারে চুরমার ক'রে ফেলবো। এসো স্যাঙাংরা, একটা ধাক্কা দেওয়া যাক।'

সবজাস্তা আইনবাগীশ মস্তব্য করলেন, 'এদের হিংসে করবার কিছু নেই। মজুর খাটানোর জন্যে এদের সবাইকে পেট্রোগ্রাড থেকে জোর ক'রে ধ'রে নিয়ে আসা হয়েছে। উত্তর দিকের আন্তানানা থেকে এদের ভোলোগডা পাঠানোর কথা, কিন্তু তাদের চালান করা হয়েছে পূর্ব-সীমান্তে। স্বৈচ্ছায় দেশভ্রমণে বেরোয়নি এরা, এদের সঙ্গে কড়া পাহারা আছে। শিগগিরই এদের মাটি কেটে ট্রেন বানাতে হবে।'

তিন দিন ধরে তাদের ট্রেন চলেছে, কিন্তু এখনো মন্ডো থেকে খুব বেশি দূরে যেতে পারেনি। আবহাওয়া তেমনি ঠাণ্ডা। জানলার ধারে পথঘাট, বনপ্রান্তর, গ্রামের বাড়িঘরের ছাদ—সব বরফে ঢাকা।

জিভাগোরা যে সবচেয়ে ওপরের বাস্কের এক কোণে জায়গা পেয়েছে—এটা রীতিমতো ভাগ্যের ব্যাপার; সীলিঙের তলায় ঝাপসা জানলার ঠিক মুখোমুখি জমিয়ে বসেছে তারা।

টোনিয়া আগে কখনো মালগাড়িতে চলাফেরা করেনি। এইসব গাড়ির বগিগুলি জমি থেকে বেশ খানিকটে উচুতে থাকে, আর দরজাগুলি সব ভারি, গড়ানো। প্রথমবার যখন ওঠে, ইউরি টোনিয়াকে দু'হাতে ধরে তুলেছিলো; কিন্তু পরে ওঠা-নামার কায়দাগুলি তারা নিজেরাই শিখে নিয়েছে।

চাকাওলা আস্তাবলের চেয়ে গাড়িটাকে টোনিয়ার কোনো অংশে ভালো ব'লে মনে হয়নি। প্রথম ঝাঁকুনিতেই সে ভেবেছিলো বুঝি কামরাটার জোড়া খুলে যাবে। কিন্তু তিনদিন ধরে সমানে সামনে পেছনে ডাইনে-বাইয়ে ঝাঁকুনি খেলো তারা, যখন যে-রকমভাবে ট্রেন চলে, গতি বাড়ায় কি দিক বদলায় তখনই ঝাঁকুনি লাগে প্রচণ্ড। তিনটে আস্ত দিন ধরে দ্রুত গাতব ঘর্ষর আওয়াজ ক'রে চাকাগুলি গড়িয়ে গেলো, অনেকটা যেন কলে-চালানো পুতুলের হাতের ঢাক, তবু তারা এখনো বহাল-তবীয়তেই আছে। আসলে টোনিয়ার আশঙ্কার কোনো ভিত্তিই ছিলো না।

ট্রেনে সব মিলিয়ে তেইশটা বগি (জিভাগোরা ছিলো চোদ্দ নম্বর বগিতে)। গ্রামের স্টেশনগুলিতে যখন ট্রেন থামছিলো, গাড়ির একটা অংশই কেবল দাঁড়াছিলো ছোট্ট প্ল্যাটফর্মে, কখনো সেটা সামনের অংশ, কখনো বা মধ্যভাগটাই শুধু, কখনো আবার পেছন দিকটা।

নাবিকেরা সব সামনের দিকে, সাধারণ যাত্রীরা মাঝখানে, আর পেছনের আটটা বগিতে সেই লোকগুলি, যাদের জোর ক'রে মজুর খাটতে ধরে নিয়ে যাওয়া হচ্ছে। সংখ্যায় তারা পাঁচশো, সব রকম বয়সের সব অবস্থার সব পেশারই লোক আছে তাদের মধ্যে।

দৃশ্যটা দেখবার মতো: পিটার্সবার্গের ধনী, চৌকশ উকিল আর শেয়ার-বাজারের দালালের পাশেই ঘোড়ার গাড়ির কোচোয়ান, মেঝের ঝাড়ুদার বাথরুমের জমাদার, কশ্বলমোড়া অস্থিসার তাতার সদাগর, গারদ থেকে পালিয়ে-আসা পাগল, দোকানি, সন্ন্যাসী—সবাই শোষক শ্রেণীব সঙ্গে তালগোল পাকিয়ে আছে।

গনগনে লাল লোহার চুমির চাবপাশে কোট খুলে রেখে ঘিরে বসেছে উকিল আর শেয়ার-বাজারের দালালরা; পরস্পরের সঙ্গে অবিরাম অকারণ গল্প ক'রে যাচ্ছে তারা, ঠাট্টা করছে, হাসছে। বহু শ্বাসালো আত্মীয়স্বজন আছে ব'লে তাদের কোনো উৎকণ্ঠাই নেই। প্রতিপত্তিশীল যে-আত্মীয়স্ব বাড়িতে আছে, তারাই তাদের জন্য তার টানবে; আর অবস্থা যদি একান্তই খারাপ হ'য়ে ওঠে তো এত টাকা তাদের আছে যে অনায়াসেই তারা নিজেদের মুক্তি কিনে নিতে পারবে।

অন্যেরা—পরনে বুটজুতো আর জোকা, কারো-কারো আবার খালি পা, গায়ের লম্বা জামা কি ঢিলে পাথলুনেব নানা জায়গায় ছেঁড়া, কারো-কারো জামায় তালি লাগানো, কারো-কারো আবার একমুখ দাড়ি গজিয়েছে—বাতাসহীন মালগাড়ির আধো-খোলা দরজার সামনে দাঁড়িয়ে আছে, ধরে আছে পাশে, নয়তো দরজার ওপর যে-তস্তাটা বসিয়ে পেরেক ঠুকে আটকানো হয়েছে, সেটাই ধরে আছে কোনোরকমে, চাষিদের দিকে যখন তাকাচ্ছে করুণ হ'য়ে আসছে তাদের চাউনি, বিবগ্ন মুখে চুপচাপ তাকিয়ে আছে পথের পাশের গ্রামের দিকে, একটা কথাও বলছে না কারো সঙ্গে। প্রতিষ্ঠাপন্ন কোনো বন্ধু নেই ব'লে আশা করবারও কিছু নেই তাদের।

মজুর খাটতে জোর করে ধরে-আনা এই লোকগুলোর সংখ্যা এত বেশি যে তাদের জন্য আলাদা-করে রাখা কামরাগুলোয় কুলোয়নি; সেজন্য তাদের অনেককেই সাধারণ যাত্রীদের কামরায় রাখা হয়েছিলো, এমনকি চোন্দ নম্বরও বাদ পড়েনি।

৯

যখনই ট্রেন থামে, টোনিয়া সাবধানে উঠে বসে, যাতে সীলিঙে মাথা ঠুকে না যায়, আর নিচে তাকিয়ে দরজার ফাটল দিয়ে দ্যাখে বাইরে বেরোবার পক্ষে এটা উপযুক্ত জায়গা কিনা। তার বাইরে বেরোনো নির্ভর করে প্রধানত তিনটে জিনিসের ওপর—স্টেশনের আকার, ট্রেন কতোক্ষণ থামবে, এবং বিনিময়ে লাভের সম্ভাবনা কতটুকু।

এবারেও তাই হ'লো। তার একটু তন্মামতো এসেছিলো, ট্রেনের গতি ক'মে যেতেই জেগে উঠলো। লাইন বদলের ঘটনাং-ঘটাং আওয়াজ, পয়েন্ট আর সুইচের সংখ্যা, প্রবল ঝাঁকুনি আর প্রচণ্ড আওয়াজ—সব মিলিয়ে মনে হ'লো স্টেশনটা বেশ বড়ো।

চোখ রগড়ে মাথার চুল ঠিক করে নিলো প্রথমে, তারপর একটা গুঁটলি ওলোটাপালোট করে তন্নতন্ন করে খুঁজে তলা থেকে একটা তোয়ালে টেনে বার করলো: তোয়ালেটায় চিকনের কাজে আঁকা আছে মুর্গির ছানা, ঘোড়ার মাথা আর গাড়ির চাকা।

ইউরিও জেগে উঠেছিলো। টোনিয়াকে বাঙ্ক থেকে নামতে সাহায্য করলে সে। সিগন্যাল-ঘর আর ল্যাম্পপোস্টগুলো দরজার পাশ দিয়ে পেছনে চ'লে গেলো, অনেক গাছপালা পেরিয়ে এলো ট্রেন, যে-গাছগুলি অতিথি-পরায়ণের মতো তোয়ালে-ভর্তি বরফ বাড়িয়ে দিয়েছে ট্রেনের দিকে। ট্রেন থামার অনেক আগেই নাবিকেরা একে-একে পদচিহ্নহীন বরফের ওপর লাফিয়ে নামলো, স্টেশনের কোনা দিয়ে ঘুরে দৌড়ে গেলো তারা, যেখানে চাষি-বউয়েরা বেআইনিভাবে খাবার-দাবার বেচবার জন্য ব'সে আছে।

নাবিকদের পরনে কালো উর্দি, পায়ের কাছে পাংলুনের ডগা ঢিলে হ'য়ে এসেছে। এগোবার সময় তাদের চুড়োহীনচুপির ফিতেগুলি চঞ্চল হ'য়ে উঠলো। তাদের পোশাক-আশাক আর এগোবার ভঙ্গির মধ্যে কেমন একটা বেহিসেবি আবহাওয়া ছিলো: যারা স্বী খেলে, তারা যখন ছুটে আসে, তখন যে-ভাবে লোকে তাদের পথ ছেড়ে দেয়, তারাও ঠিক সেইভাবে দৌড়ে এলো ভিড়ের মধ্য দিয়ে পথ করে।

স্টেশনের দেয়ালের আড়ালে মোড়ের কাছে এক সারিতে লাইন বেঁধে দাঁড়িয়ে ছিলো পাশের গ্রামের গিরিরা আর বৌ-ঝিরা। উত্তেজিত হ'য়ে এমনভাবে তারা একে অন্যের পিছে লুকোবার চেষ্টা করছিলো যে মনে হচ্ছিলো তারা যেন গণকের কাছে হাত দেখাতে এসেছে। আসলে তারা এসেছিলো নানারকম খাবার বেচতে: শসা, বাড়িতে বানানো পনির, বারকোশভর্তি সন্ধ গো-মাংস, যাতে উষ্ণ আর সুবাসু থাকে সেইজন্য তোয়ালে দিয়ে তালগোল পাকিয়ে-রাখা প্যানকেক। ভেড়ার লোমের জামার ভেতরে শাল জড়িয়ে সারা শরীর আগাগোড়া মুড়ে রেখেছিলো তারা, কিন্তু তবু নাবিকদের ঠাট্টা-ইয়ার্কিতে সবাই লজ্জায় টকটকে লাল হ'য়ে উঠলো। কিন্তু তাদের ভয়ও ছিল দারুণ। কেননা ফটকাবাজার আর নিষিদ্ধ 'খোলা ঝাঁজার' ঠেকাবার জন্য দলগুলো সাধারণত নাবিকদের দিয়েই তৈরি হ'তো।

অবশ্য এই বিব্রত অবস্থা থেকে একটু পরেই তারা রেহাই পেলো। ট্রেন থামতেই সাধারণ যাত্রীরা এসে যেই ভিড়ে যোগ দিলো, অমনি বেচাকেনার কাজ সতেজ হ'য়ে উঠলো।

কী সব জিনিস তারা বেচতে এনেছে, তাই দেখতে-দেখতে টোনিয়া লাইন ধরে এগিয়ে গেলো; তোয়ালেটা তার কাঁধে ফেলা, দেখে মনে হবে সে বুধি স্টেশনের পোছনদিকে বরফের মধ্যে হাত মুখ ধুতে যাচ্ছে। কয়েকটি চাষি-বউ চৌচিরে ডাকলো, 'ওনুন! তোয়ালেটার বদলে আপনি কী চান?' টোনিয়া কিন্তু ফিরেও তাকালো না, তার স্বামীর সঙ্গে আরো এগিয়ে চললো।

লাইনের একেবারে শেষপ্রান্তে দাঁড়িয়ে ছিলো লাল-কাজ-করা কালো শাল গায়ে একটি গ্রীলোক, চিকনের কাজ-করা তোয়ালেটা দেখেই তার বড়ো-বড়ো চোখ জ্বলজ্বল করে উঠলো। সাবধানে চারদিকে একবার চোখ বুলিয়ে সে সরাসরি টোনিয়ার পাশে এসে দাঁড়ালো, তারপর তার মালপত্রের ওপরকার ঢাকনা খুলে আগ্রহের সঙ্গে ফিসফিস করে বললো, 'একবার তাকিয়ে দেখুন এটার দিকে। আমি বাজি রাখতে পারি এমন জিনিস আপনি বহুকালের মধ্যে দ্যাখেননি। কেমন লাগছে? এ নিয়ে বেশি ভাবতে গেলে শেষে পণ্ডাতে হবে, দেরি করলে আর পাবেন না। এর অর্ধেকটার বদলে তোয়ালেটা দেবেন আপনি?'

শেষ কথাটা টোনিয়া ওনতে পারিনি। 'ভূমি কী বলতে চাচ্ছে, স্পষ্ট করে বলো।'

একটা খরগোশের অর্ধেক অংশের কথা বলছিলো গ্রীলোকটি—মাথা থেকে ল্যাজ পর্যন্ত তার ঝলসে ভাজা, দুটুকরো করা। তুলে ধরলো সেটাকে। 'আপনার তোয়ালের বদলে এর অর্ধেকটা আমি দিতে পারি—এই কথাই আমি বলতে চাচ্ছি। তাকিয়ে আছেন কেন? এটা কুকুরের মাংস নয়। আমার স্বামী শিকার করেন। এটা সত্যি খরগোশই।'

হাত বদল করলে জিনিস দুটো। দু'জনেই ভাবলো বেশ জেতা গেছে ব্যবসায়। টোনিয়া মনে মনে একটু লজ্জিত হয়ে পড়লো—চাষি-বউকে ঠকিয়েছে বলেই মনে হ'লো তার। ওদিকে চাষি-বউটি নিজের ভাগে যা পড়লো তাতেই খুশি হয়ে তার এক বন্ধুকে ডাক দিলে; সেই বন্ধুটিও তার পণ্য বেচে দিয়েছিলো; দু'জনে একসঙ্গে বাড়ির দিকে রওনা হ'লো—অনেক দূরে তাদের গ্রাম, অনেকটা পথ হেঁটে যেতে হয়; বরফ-পড়া রাস্তা ধরে দু'জনে আন্তে-আন্তে দূরে মিলিয়ে গেলো।

ঠিক এমন সময় ভিড়ের মধ্যে ভীষণ এক সোরগোল উঠলো। এক বৃড়ি গলা কাটিয়ে চ্যাচাচ্ছে: 'আরে! আরে! যাচ্ছেকোথায়? আমার টাকা কই? বেহায়া চোর কোথাকার, কখন তুই আমাকে দাম দিলি? দ্যাখো একবার গ্রীমানকে, পেট-মোটা শুয়োর। ডাকলে কিনা শেছন ফিরেও তাকায় না। আরে মশাই—লোকটাকে থামাও। আমার টাকা মেরেছে। থামাও না।—ব্যাটা চোর। ঐ যে যাচ্ছে, ঐ লোকটা, ধরো, ধরো ওকে!'

'কোন লোকটা?'

'ঐ লোকটা—ঐ যে পরিষ্কার করে কামানো, দাঁতগুলি বেরিয়ে আছে।'

'যে লোকটার আঙিনে একটা গর্ত, তার কথা বলছো?'

'হ্যাঁ, হ্যাঁ, ধরো ওটাকে, ব্যাটা তাভার!'

'যার কনুইয়ের কাছটায় তালি-মারা?'

'হ্যাঁ, হ্যাঁ!—হা ঈশ্বর! আমার সর্ব্ব চুরি করে নিলে!'

'এখানে এতো চ্যাচামেচি কিসের!'

'ঐ যে লোকটা যাচ্ছে, ও এসে কিছু দুধ মাংস কিনেছিলো; তারপর পেট পুরে খেয়ে দাম না-দিয়ে চলে গেছে বলে বৃড়ি চ্যাচাচ্ছে।'

'এ-সব হ'তে দেয়া তো ঠিক না! কেন তাকে ধরে আনছে না সবাই?'

'ওকে ধরে আনবে? সারা গায়ে তার কটা কার্ডুজ কেট আছে, দেখেছো? বেশি কথা বললে ও-ই এসে ধরবে তোমাকে!'

যাদের জোর করে মজুর খাটতে নিয়ে যাওয়া হচ্ছিলো, তাদের কয়েকজন ছিলো চোন্দ নম্বর বগিতে। সঙ্গে পাহারাদার ছিলো ভোরোনিউক। তিনজন কেবল অন্যদের চেয়ে আলাদা জায়গায় দাঁড়িয়েছিলো, একজন হ'লো গ্রোথোর প্রিটুলিয়েভ, পিটার্সবার্গের একটা সরকারি মদের দোকানে সে ছিলো খাজাকি, সবাই তাকে 'জাকি' ব'লেই ডাকতো। আরেকজন হ'লো ভাসিয়া ব্রিকিন, এক লৌহ-ব্যবসায়ীর কাছে শিক্ষানবিশি করতো, বছর যোলো বয়স; তৃতীয়জন কস্টারএড আমুরস্কি, শ্রমিক-সমবায় দলের একজন বিপ্লবী, মাথার চুল ধবধবে শাদা, পুরোনো শাসনব্যবস্থার কালে দণ্ডিত অপরাধীদের জন্য নির্দিষ্ট সবগুলি উপনিবেশ ঘুরে এসেছে, এবং নতুন আমলের নতুন উপনিবেশগুলি আবিষ্কার করে চলেছে।

প্রথম যখন তাদের ধরে নিয়ে আসা হয়, কেউ কাউকেই চিনতো না, এখন ক্রমশই আলাপ করতে-করতে পরস্পরের পরিচিত হ'য়ে উঠছে। 'জাকি' আর ভাসিয়া যে ভিয়াটকা প্রদেশের একই গ্রামের লোক, অল্পকণের মধ্যেই তা বেরিয়ে পড়লো; আরো জানা গেলো, ট্রেন নাকি ঐ জেলার মধ্য দিয়ে যাবে।

প্রিটুলিয়েভের বেশ মালমিশে। মাথার চুল ঘন, মুখে ব্রণের দাগ, বৈটে, মোটাসোটা, এক কথায় বিকট দেখতে। বগলের তলায় হামে কালো-হ'য়ে-থাকা তার ছাই রঙের জামাটি খলখলে জীলোকের বডিসের মতো তার শরীর জড়িয়ে আছে। পাথরের মূর্তির মতো চুপচাপ ঘণ্টার পর ঘণ্টা ব'সে থাকতে পারে সে, হাতের আঁব আঁচড়ায় নখ দিয়ে যতোকণ না রক্ত বেরিয়ে পেকে ওঠে।

কয়েকমাস আগে একদিন বিকেলবেলায় সে যখন নেভস্কি দিয়ে ইটছিলো, তখন লিটেইনি স্ট্রীটের এক সেনাবাহিনীর পাল্লায় পড়ে যায়। নিজের কাগজপত্র বের করে দেখাতে বাধ্য হয় সে; দেখা যায় তার র‍্যাশন-বই চতুর্থ শ্রেণীর, আর চতুর্থ শ্রেণীর র‍্যাশন-বই তাদেরই দেওয়া হয় যারা শ্রমিক নয়, তা দিয়ে কোনো-কিছুই কেনা যায় না। ফলে তাকে আটকে রাখা হয়; আরো অনেককেই একই কারণে গ্রেপ্তার করা হয়েছিলো; কড়া পাহারায় ব্যারাকে নিয়ে যাওয়া হয় তাদের। তার এবং তার পূর্ববর্তী দল আর্কেঞ্জেল সীমান্তে গিয়ে পরিখা খুঁড়বে—প্রথমে তাই ঠিক হয়েছিলো। কিন্তু মাকশাথে তাদের ফিরিয়ে মস্কোর মধ্য দিয়ে পূর্ব দিকে পাঠানো হচ্ছে।

প্রিটুলিয়েভের স্ত্রী ছিলো লুগায়, সেখানে সে যুদ্ধের আগে কাজ করতো। লোকের মুখে তার দুর্দশার কথা শুনে তার স্ত্রী তাড়াতাড়ি তার খোঁজে বেরোয়, যদি ছাড়িয়ে আনা যায় এই উদ্দেশ্যে ভোলোগডার দিকে আর্কেঞ্জেল জংশনে চ'লে যায়। প্রিটুলিয়েভদের ইউনিট কিন্তু সেখানে যায়নি; বাড়ি ব'সে থাকলেই সবচেয়ে ভালো করতো সে। আজকাল এমন হয়েছে যে কে কোথায় আছে সেটাই অনেক সময় সঠিক বুঝে ওঠা যায় না।

যুদ্ধের গোড়ার দিকে প্রিটুলিয়েভকে পিটার্সবার্গে বদলি করা হয়; সেখানে সে পেলাগিয়া টিয়াগুনোভা নামে এক স্ত্রীলোকের সঙ্গে বাস করতো। যেদিন তাকে গ্রেপ্তার করা হয়, তারা দু'জনে একসঙ্গে বেড়াতে বেরিয়েছিলো, একটু আগেই পরস্পরকে বিদায়-সম্ভাষণ জানিয়ে মেয়েটি বাড়ি ফেরে আর সে যায় অন্যত্র কাজে। লিটেইনি স্ট্রীট থেকে তাকিয়ে সে তখনো পেলাগিয়ার পেছন দিকটা দেখতে পাচ্ছিলো—আন্তে আন্তে সে ভিড়ে মিলিয়ে যাচ্ছে।

মোটাসোটা মধ্যবিস্তৃত স্ত্রীলোক; বনেনি স্বভাবের, সুন্দর হাত, ঘন চুল—মাঝে-মাঝে খোঁপা ঝাঞ্চে, কখনো বেগী দুলায়, কখনো বা এমনি কাঁধে ছড়িয়ে রাখে, আর নিখাসের সঙ্গে-সঙ্গে তা কঁপে-কঁপে ওঠে। পেলাগিয়া এই গাড়ির মধ্যেই আছে এখন: নিজে থেকেই সে ঠিক করেছে যে প্রিটুলিয়েভকে যেখানেই নিয়ে যাওয়া হোক না কেন, সেও সঙ্গে যাবে।

বোকা মুশকিল প্রিটুলিয়েভের মতো ভোঁতা, বিস্ত্রী চেহারার লোক কী করে স্ত্রীলোকদের

আকৃষ্ট করতো—কিন্তু মেয়েরা যে তার সঙ্গে লেপটে থাকতো তাতে সন্দেহ নেই। সামনেরই আরেকটা কামরায় তার আরেকজন মেয়ে-বন্ধু আছে; নাম ওগ্রিস্কাভা, অস্থিসার শাশা হু-ওলা এক তরুণী; নানারকম ফন্দিফিকির করে সে ট্রেনে এসে উঠেছে। ‘ঢলানি’, ‘বিকটী’ প্রভৃতি নানা অপ্রীতিকর সম্বোধনে প্রায়ই তাকে ভূষিত করে থাকে টিয়াগুনোভা।

প্রেমে প্রতিদ্বন্দ্বী বলে দু’জনেই দু’জনের ওপর ঝগড়াহস্ত, সাবধানে একে অন্যকে এড়িয়ে চলে। ওগ্রিস্কাভা এতোক্ষণের মধ্যে একবারও কিন্তু চোন্দ নম্বর কামরায় পদার্পণ করেনি; তার প্রণয়ের পাত্রটির সঙ্গে কী করে সে যে দেখাশোনা করতো সেটা একটা রহস্য। এমনও হ’তে পারে যে সমস্ত যাত্রীরা যখন নেমে গিয়ে এঞ্জিনে কয়লা ভরার কাজে ব্যস্ত হ’য়ে আছে, তখন সে দূর থেকেই তাকে দেখে খুশি হচ্ছিলো।

১১

ভাসিয়ার ব্যাপারটা কিন্তু একেবারে অন্যরকম। তার বাবা যুদ্ধে মারা গেছেন; মা তাকে পিটার্সবার্গে তার মামার কাছে পাঠিয়েছিলেন কাজকর্ম শেখবার জন্য।

আপ্রাক্সিন মার্কেটে তার মামার এক দোকান ছিলো। গত শীতের সময় একদিন কিছু জিজ্ঞাসাবাদের জন্য স্থানীয় সোভিয়েট থেকে তাঁকে তলব করা হ’লো। দরজা ভুল করে মামাটি শ্রমিক-সংগঠনের নির্বাচনী পরিষদের আপিশে ঢুকে পড়েছিলেন। জোর করে যাদের মজুর খাটতে নিয়ে যাওয়া হচ্ছিলো তাদের ভিড়ে ভর্তি ঘরটা। একটু পরেই সৈন্যরা এসে ঢুকলো; সবাইকে তারা সোজা সেমিয়নভস্কি ব্যারাকে রাত্রিবাসের জন্য নিয়ে গেলো, পরদিন সকালবেলায় ব্যারাক থেকে সোজা রেলস্টেশনে।

একসঙ্গে এতোজন লোকের গ্রেপ্তারের খবরটা চাপা থাকেনি, বন্দীদের পরিজনেরা বিদায় জানাতে স্টেশনে এসে ভিড় করলে। তাদের মধ্যে ছিলো ভাসিয়া আর তার মামী। এখন চোন্দ নম্বর কামরায় যে-পাহারাদারটি আছে, সেই ভোরোনিউক সেখানেও পাহারা দিচ্ছিলো। ভাসিয়ার মামা স্বীর কাছ থেকে বিদায় নিয়ে আসবার জন্য তাঁকে বেরোতে দেবার অনুমতি চাইলেন। কোনো জামিন না-পেয়ে পাহারাদার যখন তাঁকে ছাড়তে চাইলো না, তখন ভাসিয়াকে জামিন রেখে তার মামাকে বেরোতে দেয়া হ’লো। মামা-মামীর সঙ্গে সেই তার শেষ দেখা।

প্রথমটায় কোনো সন্দেহই করেনি ভাসিয়া। চালাকিটা ধরা পড়তেই কান্নায় সে ভেঙে পড়লো; ভোরোনিউকের পায়ে আছড়ে পড়লো, তার হাতে চুমো খেলো, ছেড়ে দেবার জন্য বার-বার অনুনয়-বিনয় করলো, কিন্তু কোনোই ফল হ’লো না। ভোরোনিউক মানুষ হিসেবে কঠিন প্রকৃতির নয়, কিন্তু এই গোলাযোগের দিনে নিয়মানুবর্তিতা বিষয়ে কঠোর না-হ’লে চলে না। যে-ক’জন লোকের ভার তার ওপর আছে, তাদের জন্য তাকে প্রাণ দিয়ে জবাবদিহি করতে হবে; আর, এই সংখ্যা রোজ নাম ডেকে মিলিয়ে নেয়া হয়। ভাসিয়া কী করে এই শ্রমিক-সংগঠনের অন্তর্ভুক্ত হ’য়ে পড়লো, সংক্ষেপে এই হ’লো তার ইতিহাস।

পাহারাদাররা সবাই সমবায়পন্থী কস্টয়এডকে একটু সন্ত্রাসের চোখে দেখতো। যে-সরকারের অধীনেই তারা কাজ করুক না কেন, কস্টয়এড অনায়াসেই খাতির জমিয়ে নিতো তাদের সঙ্গে। একাধিকবার কনভয়ের কর্তাকে ডেকে ভাসিয়ার এই অসহ্য পরিস্থিতির কথা সে বুঝিয়ে বলেছে। এটা যে একটা ভীষণরকম ভুল-বোকাখুঁটির ব্যাপার—এ-কথা কনভয়ের কর্তাও স্বীকার করেছেন; কিন্তু যতোকণ না গম্ভব্যস্থলে পৌঁচছেন, ততোকণ তিনি নাকি নিরুপায়; আইনগত কতগুলি বাধার জন্য কিছুই নাকি তার করার নেই। তবে পরে যথাসাধ্য করবেন বলে তিনি প্রতিশ্রুতি দিয়েছেন।

সুন্দর চেহারার ছেলে ভাসিয়া, সুঠাম শরীর; তাকে দেখতে অনেকটা রাজা-বাদশাদের ছোকরা চাকরের মতো অথবা ছবিতে দেখা দেবদূতের মতো। অত্যন্ত সরল সে; এতোটা সরল ও নির্দোষ ছেলে সাধারণত চোখে পড়ে না। বড়োদের পায়ের কাছে মেঝের ওপর ব'সে থাকে সে; হাঁটুতে হাত রেখে হাঁ করে বড়োদের মুখের দিকে তাকিয়ে তাদের জীবনের ঘটনাবলীর গল্প শোনা—এই হ'লো তার সবচেয়ে প্রিয় কাজ। কী ধরনের কথাবার্তা চলাছে কামরায়, তা জানতে হ'লে তার মুখের দিকে তাকালেই চলে; চুঁচিয়ে হেসে ওঠা কি শব্দ ক'রে কাঁদাটাকে সে সাবধানে সংযত করে রাখে, আর তার ফলে যে-ভাবে তার মুখের পেশী নড়ে ওঠে, তা থেকেই অনায়াসে বোঝা যায় কথাটা হাসির, না দুঃখের।

১২

সমবায়পন্থী কনস্টেবলকে জিজ্ঞাসা করলো ডিনারে আমন্ত্রণ জানিয়েছিলো। তাদের সেই কোনো ব'সে সে জোরে শব্দ ক'রে-ক'রে খরগোশের ঠ্যাং চুষতে লাগলো। সর্দি-কাশির ভয় তার সাংঘাতিক, তাই বার কয়েক সে তার বসার জায়গা বদল ক'রে মনের মতো এই জায়গায় এসে বসলো। 'এই জায়গাটা বরং ভালো,' সে বললে। হাড় চিবোনো শেষ ক'বে, চুষে-চুষে আঙুলগুলি সে পরিষ্কার ক'রে নিলো, তারপর রুমাল দিয়ে হাত মুছে নিমন্ত্রণকর্তাদের ধন্যবাদ জানিয়ে বললে, 'আপনাদের জানালাটা ঠিকমতো বন্ধ হয় না, পুটি দিয়ে এটাকে আটকে রাখা উচিত। তারপর, যে-কথা বলছিলাম। বলা বাহুল্য, খরগোশের রোস্ট একটা মহা উপাদেয় বস্তু, কিন্তু সেই থেকে আমরা যদি এমন কোনো সিদ্ধান্ত করি যে চাষিরা আস্তে-আস্তে মস্ত বড়োলোক হ'য়ে উঠছে, তাহ'লে ইচ্ছাক্তি করা হবে; এমন কথা বলার জন্য আপনারা আমাদের ক্ষমা করবেন, কিন্তু আমি অনেক কমিয়ে বললাম।'

'দেখুন এসে,' ইউরি বললে। 'যে-সব স্টেশনে ট্রেন থামছে একবার তাকিয়ে দেখুন। বাঁশের বেড়া, গাছপালা সবই অক্ষত দাঁড়িয়ে আছে, এখনো জ্বালানি হিসেবে ব্যবহার করা হয়নি। তারপর ঐ হাটবাজারগুলি, ঐ সব স্ত্রীলোকেরা, যাদের দেখা যাচ্ছে, সেই সব? জিনিসটা ভাবতেই কি চমৎকার লাগছে না আপনার? অন্তত এখনো কোথাও-কোথাও জীবনের ধারা সমানভাবেই ব'য়ে চলেছে, মানুষেরা তা নিয়ে বেশ খুশিও আছে, সকলেই দীনদুঃখী নয়। এটাই কি সমস্ত-কিছুর একটা সংগত ব্যাখ্যা নয়?'

'আপনি যা বলছেন তাহ'লে তো কথাই ছিলো না। কিন্তু ব্যাপারটা একেবারেই তা নয়। একথা আপনি ভাবলেনই বা কেমন ক'রে? কী চলেছে, সেটা একবার গ্রামের ভেতরে গিয়ে তাকিয়ে দেখুন, রেল-লাইন থেকে পঞ্চাশ বা একশো মাইল দূরে। চাষিরা তো বিদ্রোহ করেছে, একের পর এক অফুরন্ত হামলা করছে তারা। আপনি বলবেন যে কোনোরকম বিচার না ক'রে লড়াই ক'রে চলেছে লাল শাদা দুয়েরই সঙ্গে, হয়তো বলবেন যে যার হাতেই ক্ষমতা থাক না, তাকেই ওরা সরাতে চায়; কী তারা চায় তা জানে না ব'লেই যাদের হাতে শাসনভার থাকে তাদের সঙ্গেই ওদের বিরোধ। আমি কিন্তু এ-বিষয়ে আপনার সঙ্গে একমত হ'তে পারছি না। তারা কী চায়, চাষিরা আপনার-আমার চেয়ে অনেক ভালো ক'রেই জানে, কিন্তু তারা একেবারেই অন্য কিছু চাচ্ছে।'

'বিপ্লব এসে যখন তাদের জাগিয়ে দিলে, তারা মনে-মনে ঠিক ক'রে নিলো এই তাদের স্বপ্নের পূর্ণতা, তার সেই প্রাচীন স্বপ্ন—নিজের জমিতে নিজের হাতে কাজ করার অধিকার, কোনো রাজা থাকবে না, একেবারে সম্পূর্ণ ও পূর্ণাঙ্গ স্বাধীনতা; কারো ধার ধারতে হবে না—এমন একটা অবস্থা। কিন্তু তার বদলে কী দেখলো তারা? জার-সাম্রাজ্যের পুরোনো অত্যাচার সরিয়ে তারা ডেকে এনেছে আরো কঠিন এক বিপ্লবী মহারাষ্ট্রকে। গ্রামগুলি যে এখন

সব সময়েই ক্ষুব্ধ হ'য়ে আছে, কিছুতেই যে স্বস্তি পাচ্ছে না, এই ব্যাপারটাতে যে তারা সবাই সুখী! উই, এখনো অনেক ব্যাপার আছে যার কিছুই আপনি জানেন না মশাই, সন্দেহ হয় যে আপনি তা জানতেও চান না।'

'আচ্ছা, আচ্ছা, না-হয় আমি সব কিছু জানি না। কিন্তু সব কিছুই আমাকে জানতে হবে কেন, আর কেনই বা সব-কিছু নিয়ে মাথা ঘামিয়ে আমাকে অসুখ বাধাতে হবে? ইতিহাস আমার পরামর্শ চায়নি, যাই ঘটুক না কেন তাই আমাকে মেনে নিতে হবে, তাই এ-সব তথ্যকে আমি লক্ষ্য না করলে ক্ষতি কী? আপনি বললেন, এটাকে বাস্তবতা বলে না। কিন্তু রাশিয়াতে আজকে বাস্তবতা কোথায়? আমার বিশ্বাস সে ভয়েই ম'রে গিয়েছে। এ-কথা সত্যি যে আমি মনে করি চাষিরা সুখী আর গ্রামেরও উন্নতি হচ্ছে—তা যদি আমি বিশ্বাস করতে না পারি তো কী করাবো, বলুন? কাকেই বা বিশ্বাস করবো, বাচবোই বা কী নিয়ে? আমার স্ত্রী-পুত্র আছে, বাচতে আমাকে হবেই।'

হতাশার ভঙ্গি করলো সে; স্বপ্নের ওপর তর্কের ভার ছেড়ে দিয়ে একপাশে স'রে গিয়ে বাঙ্কের ওপর থেকে মাথা ঝুঁকে দেখতে লাগলো, নিচে কী হচ্ছে না হচ্ছে।

'জাঞ্চি' প্রিটলিয়েভ আর তার বন্ধু পেলাগিয়া—দুজনেই ভাসিয়া আর পাহারাদার ভোরেনিউকের সঙ্গে গভীর আলোচনায় মগ্ন হ'য়ে আছে। অল্পক্ষণের মধ্যেই ট্রেন পৌছবে ভাসিয়া আর প্রিটলিয়েভের গ্রামে। স্টেশন থেকে গ্রামে যেতে হ'লে যে-পথ ধরতে হয়, পায়ে-হাঁটা পথ কিন্তু সেটা নয়। আর সেই সব চেনাশোনা মায়াময় গ্রামগুলির নাম শুনতে-শুনতে ক্ললঙ্কলে চোখে অশ্রুট স্বরে ভাসিয়া সেগুলির পুনরাবৃত্তি করছিলো, যেন সে-সব কোনো জাদুমন্ত্র।

"শুকনো খালে" নামতে হয়—উত্তেজনায় তার গলা বুজ্ঞে এলো। তারপরে ব্যুয়িক্সির দিকে যাবেন।'

'ঠিক বলেছো। সেখান থেকে ব্যুয়িক্সি রোড ধরলে—'

'আমিও তাই বলি—ব্যুয়িক্সি, ব্যুয়িক্সি গ্রাম—হ্যাঁ, হ্যাঁ, আমি চিনি সেটা, ওখানেই আমরা মোড় ঘুরি, বারে-বারে কেবল ডান দিকে মোড় ঘুরতে হয়। তাহ'লেই আমাদের গ্রাম ভেরেটেরিকিতে পৌছবেন আপনি। আপনাদের গ্রামের রাস্তা নিশ্চয়ই ঠাঁ দিকে, নদী থেকে দূরে, তাই না? পের্গা নদী চেনেন তো? হ্যাঁ, চেনেন বইকি। সেটাই আমাদের নদী। কেবলই নদী ধ'রে এগোতে থাকুন, একেবারে নাক বরাবর, শেষে ডানদিকে খাড়া পাহাড় দেখতে পাবেন, ঐ পেল্গা নদীর ওপর ঝুলে আছে যেন, ঐখানেই আমাদের গ্রাম: ভেরেটেরিকি। পাহাড়টার গায়েই গ্রামটা, সোজা ওপরের দিকে উঠে গেছে। এত খাড়া যে মাথা ঘুরবে আপনার, সত্যি বলছি, রীতিমতো মাথা ঘুরে যায়। নিচের দিকে এক পাথুরে খাদ আছে, ওখানকার পাথর দিয়ে জাঁতা বানানো হয়। ঐ ভেরেটেরিকিতেই মা আছেন, আর আমার দুই বোন। আলিয়া-দিদি। আরিয়া-দিদি... মা অনেকটা আপনার মতো দেখতে, আর পলিয়া মাসি, অল্প বয়স, আর ফর্সা। ভোরেনিউক খুড়ো, দয়া করো, যীশুর দোহাই, ভোরেনিউক খুড়ো, দয়া করো, ভিক্ষে চাচ্ছি, ভগবানের দোহাই...ভোরেনিউক খুড়ো।'

'কী কেবল খুড়ো, খুড়ো, খুড়ো! আমাকে খুড়িমা পাওনি। কী করতে বলো আমাকে! আমি কি পাগল? তোমাকে যদি যেতে দিই তো আমাকেও সেই সঙ্গে খতম হ'য়ে যেতে হবে, আমেন। সোজা দেয়ালের গায়ে দাঁড় করিয়ে দেবে।'

ভাসিয়ার লাল চুলে আলতোভাবে টোকা দিতে-দিতে পেলাগিয়া টিয়াগুনোভা আনমনা হ'য়ে জানলার বাইরে তাকিয়ে থাকলো। মাঝে-মাঝে তার দিকে তাকিয়ে ঝুঁকে প'ড়ে অশ্রুটে হাসতে থাকলো। যেন সে তাকে বলতে চাচ্ছে: 'বোকামি কোরো না। এমনভাবে সকলের সামনে

ভোরেনিউকের সঙ্গে কথা ব'লে কোনো লাভ আছে! ভেবো না একটু ধৈর্য ধরো সব ঠিক হ'য়ে যাবে।'

১৩

মধ্য-রাশিয়া ফেলে ট্রেন যতই পূর্বমুখে এগোতে থাকলো, ততই অদ্ভুত সব ব্যাপার ঘটতে লাগলো। ট্রেন যেখান দিয়ে যাচ্ছে, উদ্ভেজনা আর বিশৃঙ্খলা সেখানটায় বেশ দানা বেঁধে উঠেছে; প্রত্যেকটা জেলার ভার সশস্ত্র বাহিনীর হাতে, গ্রামের হামলাগুলি দমিয়ে ফেলা হয়েছে সম্প্রতি।

হয়তো একেবারে ফাঁকা মাঠের মধ্যেই ট্রেন থেমে গেলো, আর নিরাপত্তা বাহিনীর টহলদারেরা যাত্রীদের সব কাগজ আর মালপত্র পরীক্ষা ক'রে দেখতে শুরু ক'রে দিলে।

একবার তারা রাতে থামলো, কিন্তু কেউ এলো না বা কাউকেই জাগানো হ'লো না।

কোনো দুর্ঘটনা ঘটেছে কিনা ভেবে ইউরি দেখবার জন্য কামরা থেকে নেমে এলো।

চারদিকে অন্ধকার। ফারগাছে ভর্তি ফাঁকা জায়গা প'ড়ে আছে রেল-লাইনের দু'পাশে; কেন যে ট্রেন থেমেছে, তার কোনো কারণ বের করা গেলো না। যাত্রীদের অনেকে বেরিয়ে এসেছিলো। পা ঠুকে বরফ ঝাড়তে-ঝাড়তে তাদের কেউ-কেউ ইউরিকে সংবাদ দিলে যে মুশকিল কিছুই নয়, কিন্তু ড্রাইভার আর এগোতে চাচ্ছে না, বলছে যে এই ফাঁকা জায়গাটা নাকি বিপজ্জনক এলাকা, আগে নাকি টুলি পাঠিয়ে খোজ-খবর নিয়ে আসা উচিত। যাত্রীদের মধ্য থেকে অনেকে তাকে বুঝিয়ে বলতে গেছে, দরকার হ'লে ঘুষ দিতেও রাজি, আর নাবিকেরাও এ-ব্যাপারে সাহায্য করতে এগিয়ে এসেছে, সুতরাং ট্রেন যে একটু পরেই ছাড়বে তাতে আর কোনো সন্দেহ নেই।

ট্রেনের এঞ্জিনের চারপাশে যে তুষার জ'মে গিয়েছিলো, একটু পরে-পরেই তা আলোকিত হ'য়ে উঠছিলো, যেন এঞ্জিনের ফুলকিতে বা জলন্ত কয়লায় কোনো অগ্নি-উৎসব শুরু হয়ে গেছে। এই আলোয় দেখা গেলো, কয়েকটা আবছা মূর্তি এঞ্জিনের সামনে ছুটোছুটি করছে।

সবচেয়ে আগে যে ছিলো—খুব সম্ভবত সেই ড্রাইভার—পাদানির শেষ প্রান্তে পৌঁছেই দুই বগির মাঝখানে লাফিয়ে প'ড়ে হাওয়া হ'য়ে গেলো, যেন মাটি তাকে গিলে ফেলেছে। নাবিকদের মধ্যে যারা তার পেছনে ধাওয়া করেছিলো তারাও তাই করলে: তারাও লাফ দিলে একের পর এক, তারপর অদৃশ্য হ'য়ে গেলো।

এই সব দেখে যাত্রীদের কয়েকজনের কৌতূহল জেগে উঠলো—এমন কি ইউরির পর্যন্ত। কী ব্যাপার, তারা সবাই মিলে দেখতে গেলো।

বগিগুলো পেরিয়ে খোলা রেল-লাইনের সামনে এসে দাঁড়িয়ে অদ্ভুত এক দৃশ্য দেখলো সবাই। রাস্তার পাশে বরফের ওপরে গিয়ে পড়েছিলো ড্রাইভার, দেখা গেলো ওপরের অর্ধেক কেবল বরফের বাইরে আছে, বাকি সমস্তই বরফের ভেতরে। তার অনুসরণকারীরা সবাই একটা অর্ধবৃত্ত রচনা ক'রে তার চারপাশে দাঁড়িয়ে আছে, ঠিক যেমনভাবে শিকারীরা তাদের শিকারকে ঘিরে দাঁড়ায়। তাদেরও কোমর পর্যন্ত বরফের ভেতর ঢুকে গিয়েছে।

'ধন্যবাদ, কমরেডগণ! খাসা ঝোড়ো পাখি' হয়েছে তোমরা,' ড্রাইভার গলা ফাটিয়ে চ্যাচাচ্ছিলো। 'কী চমৎকার দৃশ্য! নাবিকেরা কিনা বন্দুক উচিয়ে একজন সহকর্মীর পেছনে

১ ঝোড়ো পাখি বা 'স্টার্লিং পেট্রেল' : বিপ্লব শুরু হয়েছিলো বাস্টিক সাগরের এক নৌ-বাহিনীর বিদ্রোহ মোক্ষণায়; এখানে তার প্রতি আর ঐ নামের ম্যাক্সিম গান্ধী রচিত গল্পের প্রতি ইঙ্গিত করা হয়েছে।

ধাওয়া করেছে! কেন! না, আমি শুধু বলেছিলাম যে ট্রেন থামতেই হবে।—আপনারাই আমার সাক্ষী,—যাত্রীদের সম্বোধন করলে সে। জায়গাটা কী-রকম, সে তো আপনারাই দেখতে পাচ্ছেন। যে-কেউ এখানে লাইন থেকে বন্ট খুলে নিয়ে যাবার জন্য ঘুরে বেড়াতে পারে। জাহান্নমে যা, যত রাজ্যের বেজন্মা। তাদের চোদ্দগুটিকে খোড়াই কেয়ার করি! তাদের জনোই কিনা এই সব করছি আমি, যাতে কারো বিপদ-আপদ না হয়, আর এত সব ব্যক্তি পোয়াবার জন্য এই কিনা আমার পুরস্কার! চ'লে আয়, গুলি করবি! এই আমি দাঁড়িয়ে আছি—যাত্রীগণ, আপনারাই আমার সাক্ষী, দেখুন সবাই, মোটেই পালাচ্ছি না আমি।'

ভিড়ের মধ্য থেকে বিমূঢ় গলা শোনা গেলো। 'আরে মশাই, ঠাণ্ডা হোন, এত গরম কেন, ওরা তো আর মারতে আসছে না আপনাকে...কেউ দেবেও না মারতে....শুধু ভয় দেখাচ্ছে ওরা...।' অন্যেরা আবার উশকে দিতে শুরু করলে: 'ঠিক জ্যায় গাভরিলকা, এই তো চাই। বুক ফুলিয়ে দাঁড়াও, দেখি ব্যাটারা কী করে!'

নাবিকদের মধ্য থেকে প্রথম যে হামাগুড়ি দিয়ে বেরিয়ে এলো, সে হ'লো এক লালচুলো দানব, মাথাটা তার এত বড়ো যে মুখটা ভোঁতা দেখায়। যাত্রীদের দিকে ফিরে ঠাণ্ডা, স্থির, গাড় গলায় ইউক্রেনীয় টানে সে যখন কথা বলতে শুরু করলে, তার সমস্ত ভঙ্গিটাই সেই দৃশ্যের সঙ্গে বেমানান ঠেকলো।

'মাপ করবেন, এত থার্মিডর' কিসের এখানে? দেখবেন মশাইরা, ঠাণ্ডায় আবার সর্দি বাড়িয়ে বসবেন না। হাওয়াও দিচ্ছে। যে যার জায়গায় গিয়ে ব'সে আরাম করুন না কেন।'

আন্তে-আন্তে ভিড় ভেঙে গেলো। ড্রাইভার তখনও উত্তেজিত হ'য়ে ছিলো; দানবটি তার দিকে এগিয়ে এসে বলল:

'কমরেড ড্রাইভার, তোমার হিস্টরিয়া ডের সহ্য করছি। এবার বেরিয়ে এসো বরফ থেকে। এবার গাড়ি পুরো দমে চালাতে হবে, আর যেন দেরি না হয়।'

১৪

রেল-লাইনের ওপর ঠুড়ো-ঠুড়ো মতো বরফ ছড়িয়ে দিয়েছে হাওয়া। কেউ সেগুলো পবিত্র করেনি ব'লে ট্রেন চলছিলো শামকের মতো আন্তে-আন্তে, যাতে গাড়ি উল্টে না যায়। পরদিন একটা নিষ্প্রাণ, পুড়ে-যাওয়া ধ্বংসস্তূপের কাছে এসে গাড়ি থামলো। লোয়ার কেলমেসে স্টেশনের এই শুধু অবশিষ্ট আছে; সামনের দিকের কালো-হ'য়ে-যাওয়া দিকটায় ঝাপসা-ভাবে কেবল নামটা পড়া যাচ্ছে।

স্টেশন পরিণত যে-গ্রাম, সেটা বরফের চাদর মুড়ি দিয়ে প'ড়ে আছে। গ্রামটাও নষ্ট হয়েছে আশুনে। শেষ বাড়িটা পুড়ে গেছে, তার পাশের বাড়িটা বাঁকাচোরা ঝুলে-পড়া শরীর নিয়ে ঝড়িয়ে আছে, কোনো-কোনো ঝুঁটি মুখ খুবড়ে প'ড়ে গেছে। ভাঙা স্নেজগাড়ি, বাঁশের বেড়া, জং-খ'রে-যাওয়া ধাতুর টুকরো আর বিচূর্ণ আসবাবে সমস্ত রাস্তা এলোমেলো হ'য়ে আছে; ঝুল আর ভুসোয় বরফ নিয়েছে নোংরা চেহারা, আধো-জ্বলা কাঠের টুকরো ছড়ানো বরফের ফাঁক দিয়ে মাটির কালো-কালো দাগ দেখা যাচ্ছে: বোধহয় আশুন নেভাবার জন্য জল ঢালা হয়েছিলো, এ-সব হ'লো তারই চিহ্ন।

জঙ্গলটিকে যে-রকম মৃত দেখাচ্ছিলো, আসলে কিন্তু ততটা ম'রে যায়নি। তখনও কিছু-কিছু

১. Thermidon ফরাসী বিপ্লবের পরে ফ্রান্সে পশ্চিম প্রান্তে করা হয় তার একদশ অংশের নাম Thermidon (নাম)। জলটি-আগুন। ১৭৯৪ খ্রিষ্টাব্দের ২২ অক্টোবর বা ২৭শে জুলাই তারিখের বিপ্লবের ফলে বনসজ্জার ও ১৮০০ খ্রিষ্টাব্দের ১৪শে অক্টোবর-সংক্রান্ত নার্সিকটি এর রাস্তা প্রতিপাদন 'স্নেজগাড়ি' অর্থে বলাবলি করেছে।—অনুবাদের টীকা।

লোক থেকে গিয়েছিলো এদিক-ওদিক। ধ্বংসস্তূপের মধ্য থেকে স্টেশন-মাস্টার বেরিয়ে আসতেই গার্ড ট্রেন থেকে লাফিয়ে নেমে সহানুভূতি জানানেন। 'মনে হচ্ছে গ্রামে আগুন লেগেছিলো, আর স্টেশনটাও সেই সঙ্গে শেষ হ'য়ে গেছে?'

স্বাগত জানানেন স্টেশন-মাস্টার, 'আসতে আত্মা হোক।—হ্যাঁ, আগুন লেগেছিলো বটে, কিন্তু সেটাই সবচেয়ে মারাত্মক নয়।'

'মানে? ঠিক বুঝতে পারছি না কী বলতে চাচ্ছেন।'

'না-বোঝার চেষ্টা করাই ভালো।'

'আপনি নিশ্চয়ই স্ট্রেলনিকভের কথা বলছেন না!'

'তার কথাই তো বলছি।'

'কেন? কী করেছিলেন আপনারা?'

'আমরা কিছুই করিনি। যা করবার করেছিলো সব আশেপাশের লোকজন, কিন্তু আমরা সুকৃতির জন্য শাস্তি পেলাম। ঐ যে গ্রাম দেখতে পাচ্ছেন ওদিকে—ওটা হ'লো উস্ট-নেমডিন্স্ক জেলার লোয়ার কেলমেস—ওদের জন্যই এই সব ঝামেলা।'

'কী এমন অপরাধ করেছিলো ওরা?'

'মারাত্মক সপ্তপাপের কোনোটাই প্রায় বাকি ছিলো না। গরিব চাষীদের সমিতি বন্ধ ক'রে দিয়েছিলো, এই হ'লো এক নম্বর; লাল ফৌজকে ঘোড়া সরবরাহ করতে নারাজ হয়েছিল, এই হ'লো দুই (তারা আবার তাতার ঘোড়সোয়ার সব—ওটা মনে রাখবেন), সৈন্য-সমাবেশের হুকুম মানেনি—তাতে অন্ততপক্ষে তিনটে অপরাধ তো হ'লো।'

'হুঁ, এই ব্যাপার! বুঝতে পারছি সব। কাজে-কাজেই বারুদ ফাটলো তাই না?'

'স্বভাবতই।'

'সাঁজোয়া গাড়ি এসে আক্রমণ করেছিলো?'

'নিশ্চয়ই।'

'খুব দুঃখের কথা। যাক, এ আমাদের মাথা ঘামাবার ব্যাপার নয়।'

'যাই হোক, এখন সব চুকে গিয়েছে। কিন্তু আপনার জন্য যে-খবর রয়েছে, সেটাও বিশেষ সুবিধের নয়। মনে হচ্ছে আপনাদের এখানে কয়েকদিন অপেক্ষা করতে হবে।'

'আপনি ঠাট্টা করছেন। আমি ফ্রন্টে সৈন্য নিয়ে যাচ্ছি।'

'মোটাই ঠাট্টা না। সাতদিন ধ'রে অনবরত ব্রিজার্ড হয়েছে এখানে—বিরাট সব বরফের চাঁই প'ড়ে আছে লাইনের ওপর, অথচ সাফ করবার কেউ নেই। অর্ধেক গ্রামই ফাঁকা প'ড়ে আছে—সব পালিয়েছে। বাকি সবাইকে আমি কাজে লাগিয়ে দেবো—কিন্তু তাও যথেষ্ট নয়।'

'ধুন্তোর আপদ! আমি করি কী এখন।'

'সময় মতো সব সাফ করিয়ে দিচ্ছি।'

'বরফ কত গভীর বলুন তো?'

'মন্দ না, তবে সব জায়গায় সমান নয়। সবচেয়ে খারাপ হ'লো মাঝখানটায়। দু'মাইল লম্বা একটা খাল আছে ওখানে, সেখানেই সবচেয়ে ঝামেলায় পড়তে হবে। আরো দূরে, জঙ্গলের ধারে সবচেয়ে বেশি বরফ জমে আছে লাইনে। এখানে তো ফাঁকা গ্রাম, কাজেই হাওয়া কিছুটা উড়িয়ে নিয়েছে।'

'জাহান্নমের গুটি! কী জগাখিঁচুড়ি পাকালো এখন! সব যাত্রীদের দিয়ে পরিষ্কার করাবো।'

'আমিও ঠিক এই কথাই ভাবছিলাম।'

'নারিকদের ধারে-কাছেও মাড়াবো না। কিন্তু এক আস্ত মজুরবাহিনী চলেছে এই

ট্রেনে—জোর ক’রে ধ’রে নিয়ে বাওয়া হচ্ছে তাদের; তাছাড়া আবার স্বাধীন যাত্রীও আছে সব মিলিয়ে শো-সাতেক।’

‘এতে খুব হ’য়ে যাবে। শাবলগুলি এসে পৌঁছলেই কাজ শুরু ক’রে দেবো। এখনে আবার খুব বেশি শাবল নেই, কাজেই আশেপাশের গ্রামে আনতে পাঠিয়েছি। সেগুলি এসে পৌঁছলো ব’লে।’

‘হা পোড়াকপাল! আমরা পেরে উঠবো মনে হয় আপনার?’

‘নিশ্চয়ই পারবো। লোকে বলে শুধু সংখ্যার জোরেই বড়ো-বড়ো শহর দখল করা যায়—আর এ তো সামান্য রেল-লাইন। আপনি একটুও ভাববেন না।’

১৫

তিন দিন ধ’রে চলল লাইন পরিষ্কার করার কাজ। জিভাগোরা সকলেই এমন কি নিউশা পর্বত তাতে অংশ নিলে। রওনা হবার পর এই তিন দিনই তাদের সবচেয়ে ভালো কাটলো।

সমস্ত এলাকাটাই কেমন নির্জন, গোপন আর অস্বস্তিকর। কী যেন আছে এখানে, যাতে মনে প’ড়ে যায় পুগাচেভের বিদ্রোহ—‘পুশকিন যেমন ক’রে দেখেছিলেন—আর আত্মকভের’ লেখা বর্বর এশিয়ার বর্ণনা। সেই রহস্যময় আবহাওয়াকে আরো নিবিড় ক’রে তুলেছিলো ধ্বংসস্তুপগুলো আর প’ড়ে থাকা গ্রামবাসীদের সতর্কতা, গুলুচরের ভয়ে ট্রেনের যাত্রীদের এড়িয়ে চলছে তারা, নিজেদের মধ্যেও কথাবার্তা বলছে না।

মজুরদের দলে-দলে ভাগ ক’রে দেয়া হয়েছিলো। স্বাধীন যাত্রীদের কাছ থেকে ধ’রে আনা মজুরদের দূরে সরিয়ে রাখা হয়েছিলো আলাদা ক’রে। সমস্ত জায়গাটা নিরাপত্তা বাহিনী দিয়ে ঘেরাও ক’রে রাখা হয়েছে।

রেল-লাইনের এক-এক অংশের ভার পড়লো এক-এক দলের হাতে। সবাইকে যার-যার অংশে পাঠিয়ে দিয়ে একসঙ্গে কাজ শুরু ক’রে দেয়া হ’লো। এক-একটা অংশের মাঝখানে টিলার মতো উচু তুষারের ঢিবি দলগুলিকে একে অন্যের কাছে আড়াল ক’রে রেখেছিলো, একেবারে শেষ মুহূর্তে ছাড়া সেগুলোতে হাত দেওয়াই হয়নি।

কেবল ঘুমোবার সময় ছাড়া সাতা দিনই সেই খোলা জায়গায় কাটাতে হ’লো মজুরদের। হিমশীতল হ’লেও পরিষ্কার ছিলো দিনগুলি, তাছাড়া কাজের মেয়াদও লম্বা নয়, কেননা যথেষ্ট শাবল সংগ্রহ করা যায়নি। নিছক মজা হ’য়ে উঠলো ব্যাপারটা।

ইউরির দল যে-অংশে পড়েছিলো, সেখান থেকে দৃশ্য বড়ো সুন্দর। পূবদিকের গ্রামটা ক্রমশ ঢালু হ’য়ে উপত্যকার দিকে নেমে গেছে, তার পরেই ডেউয়ের মতো ধাপে-ধাপে উঠে গেছে

পাহাড়ের চূড়ায় হাওয়ার কাপটের মধ্যে একটা বাড়ি দাঁড়িয়ে; আশে-পাশের গাছগুলো গ্রীষ্মকালে নিশ্চয়ই ছায়া দিয়েছিলো, কিন্তু এখন তাদের গায়ে লেসের মতো বরফ এমনভাবে তাদের জড়িয়ে আছে যে তাদের পক্ষে কোনো আশ্রয় দেওয়া সম্ভব হচ্ছে না।

১ Pugachev, Yemelyan Ivanovich (১৭৪৪-৭৫): ইনি একজন ডন কসাক, সৈনিক জীবন ত্যাগ ক’রে এক কৃষক-বিপ্লবের নেতৃত্ব গ্রহণ করেন (১৭৭০-৭৫)। পালিয়ে-বাওয়া সার্ব আর তাতার ডাকাতির দল সংগ্রহ করে তিনি ভলগা-তীরবর্তী বহু দুর্গ ও ক্যাজান নগর দখল করে। অবশেষে তার অনুচরদের মধ্যেই একজন ঠাকে ধরিয়ে দেয়, সরকার ঠার মৃত্যুদণ্ড করেন। পুশকিনের লেখা ‘পুগাচেভ-বিপ্লবের ইতিহাস’ ১৮৪৪ সালে প্রকাশিত হয়।—অনুবাদের টীকা।

২ Aksakov, Sergey Timofeyevich (১৭৯১-১৮৫৯) : মধ্য-উলিশ শতকের অন্যতম গদ্য লেখক, গোসোলের বন্ধু। আত্মকভের দুই-পুত্র, Ivan Sergeevich ও Konstantin, ব্রাত্যফিল-দলভুক্ত শক্তিশালী লেখক ছিলেন।—অনুবাদের টীকা।

যা-কিছু বন্ধুর ছিলো সব বরফ মসৃণ করে ঢেকে রেখেছে। কিন্তু তবু সেই ঘুরে-ঘুরে নেমে-আসা ধারাটিকে একটু-একটু দেখা যাচ্ছিলো, বসন্তকালে যার জলস্রোত রেলের ত্রিভুজের তলা দিয়ে সোজা ছুটে যায় আর এখন যার সমস্ত জঙ্গমতাকে স্থাপু করে রেখেছে বরফ, ঠিক যেন কোনো শিশু তার ছোট্ট খাটে শুয়ে আছে, পালকের লেপের তলায় মাথা গুঁজে।

পাহাড়ের ওপরের ঐ বাড়িটায় কেউ থাকে কিনা, ইউরি সেই কথাই ভাবছিলো। না কি খালি পড়ে আছে বাড়িটা, ক্রমশ ধ্বংস হয়ে যাচ্ছে? হয়তো কোনো ভূমি-সমিতির ভাগে পড়েছে এখন। যারা এককালে ঐ বাড়িতে থাকতো, তাদের সকলের কী দশা হয়েছে? তারা কি বিদেশে পালিয়ে গেছে? না কি চাষিদের হাতেই মারা গেছে? না কি তারা জনপ্রিয় ছিলো বলে কোনো প্রয়োগশিল্পের বিশেষজ্ঞ হিসেবে সেই জেলাতেই থেকে যাবার অনুমতি পেয়েছে? আর যদি থেকেই গিয়ে থাকে তো স্টেলনিকভ কি তাদের রেয়াৎ করেছে, না কি কুলাকদের দশা হয়েছে তাদের?

বাড়িটা তার কৌতূহলকে উদ্দীপ্ত করে তেমনি বিষণ্ণ ও স্তব্ধ হয়ে দাঁড়িয়ে থাকলো। আজকাল কোনো প্রশ্ন করাটা বেয়াদপি, এবং করলে কেউ উত্তর দেবারও প্রয়োজন বোধ করে না।

চোখ-ধাধানো শুভ্রতার ওপর সূর্য ঝলমলে আভা ছড়িয়ে দিয়েছে, পরিষ্কার বরফের টুকরো কেটে-কেটে তুলতে লাগলো ইউরি; মনে হলো শুকনো হীরের আগুন লেগেছে। ছেলেবেলার দিনগুলি মনে পড়ে গেলো তার। সে যেন তার বাড়ির উঠানে দাঁড়িয়ে আছে, মোটা সুতোয় টুপি মাথায়, কালো ভেড়ার চামড়া হুক দিয়ে আটকানো, হকের ঘরগুলো কোঁকড়ানো লোমের মধ্যে সেলাই করা, ঠিক এমনিভাবে জ্বলজ্বলে বরফ কেটে-কেটে তৈরি করছে আকাধাকা সুড়ঙ্গ, উচু পিরামিড, বড়ো মাপের কেলা, গুহা-নগর কিংবা ক্রীমের মিষ্টি। সেই ফেলে-আসা সুন্দর দিনগুলি, জীবনের কী আশ্চর্য স্বাদই না ছিলো তখন, নয়ন আর জঠর তৃপ্ত হবার মতো ছিলো সব-কিছু।

কিন্তু এখন, এরকম অবস্থাতেও, খোলা হাওয়ায় তিন দিন ধরে কাজ করতে-করতে মজুররা সবাই ভরা পেটের সন্তোষ অনুভব করলে। তাতে অবশ্য অবাক হবারও কিছু নেই। রাত্রিবেলায় প্রত্যেককে পুষ্ক, উষ্ক, টাটকা বড়ো-বড়ো রুটি দেওয়া হ'তে লাগলো (কোথেকেই বা এ-সব আসছে, কার হুকুমে—এ-সব প্রশ্নের উত্তর কেউ জানে না); বেশ মুড়মুড়ে মুচমুচে রুটি, ওপরের অংশটা চকচকে, পাশের শক্ত অংশে চিড় খেয়ে গেছে, তলার দিকটায় কাঠকয়লার ঝলসানোর চিহ্ন সুস্পষ্ট।

১৬

ছুটির দিনে পাহাড়ে চড়তে গিয়ে লোকে যেমনভাবে পাহাড়ি আশ্রয়কে ভালোবেসে ফেলে, তেমনি সেই ধ্বংস-হ'য়ে-যাওয়া স্টেশনটাকে সবাই ভালোবেসে ফেললো। জায়গাটার আকার, আয়তন, ধ্বংসের ছোটোখাটো চিহ্ন—সব ইউরির স্মৃতিতে থেঁকে গেলো।

কোজ সন্ধ্যাবেলায় তারা ফিরে আসে সেখানে—সূর্য যখন পুরোনো অভ্যেসের প্রতি আনুগত্যবশত টেলিগ্রাফ-আগিশের জানলার পেছনে বাঁচ-গাছের আড়ালে ডুবে যায়। এমনি করে সূর্য ওখানে ডুবে গেছে চিরকাল।

বাইরের দেয়ালের এক অংশ ধ্বংস পড়ে গিয়েছিলো, ঘরের মধ্যে এলোমেলো তার তল্লাশশেষ জড়ো হ'য়ে আছে। জানলাটা কিন্তু এখনো আছে, উল্টো দিকের কোনাটা অক্ষত, এমনকি কফি-রঙের দেয়াল-কাগজ পর্বস্ত ঠিক জায়গায় থেকে গেছে। চুম্বি, তার গোল বিবর,

আর আমার ডালা, এমনকি কালো ফ্রেমেআটা আপিশের আসবাবপত্রের কর্দটাও ধ্বংসের কবলে পড়েনি। দুর্বিপাকের আগেকার দিনগুলোর মতোই অস্ত্রগাম্বী সূর্য ধীরে-ধীরে গড়িয়ে যায় চুল্লির ওপর, উষ্ণ বাদামি একটা আভা ছড়িয়ে দেয় কাগজের গায়ে, আর একটা ছকের ওপর বার্চগাছের ছায়া ঝুলে থাকে, যেন কোনো রমণীর গলবন্ধ।

ওয়েটিংরুম ছিলো দালানের পেছনে; সেটা ধ্বংস হ'য়ে গেছে, কিন্তু তার তাল-লাগানো দরজায় এখনো একটা বিজ্ঞপ্তি লটকে আছে, হয় ফেব্রুয়ারি-বিল্লবের গোড়ার দিকে অটিকানো হয়েছিলো, নয়তো সম্প্রতি লটকে দেওয়া হয়েছে। বিজ্ঞপ্তিটা এই রকম:

‘যে-সব যাত্রীর ওষুধ কিংবা ব্যাণ্ডেজ দরকার, তারা আপাতত ফেন উদ্বিগ্ন না হন, এই অনুরোধ করা হচ্ছে। কতগুলি অনিবার্য কারণে এই দরজা বন্ধ ক’রে দেওয়া হ’লো এবং এই বিজ্ঞপ্তির মধ্যে তা যাত্রীদের গোচরে আনা হচ্ছে।’

স্বাক্ষর : ভারপ্রাপ্ত চিকিৎসক

উস্ট-নামভিন্‌স জেলা,—অমুক তমুক।

যখন রেল-লাইনের ওপরকার বিভিন্ন অংশের তুষারকূপ পরিষ্কার হ’য়ে গেলো রেল-লাইন তীক্ষ্ণ সরল রেখায় তীরের মতো সমতলভূমির ওপর দিয়ে সুদূরে চ’লে গেছে। রেল-লাইনের দু-ধারে পর্বতপ্রমাণ জুপ-করা তুষার জলজ্বল করছে: যেন জঙ্গলের কালো দেয়ালের গায়ে কেউ শুভ্রতাকে জড়ো ক’রে দিলো।

রাস্তার ওপর একটু পরে-পরেই দল বেঁধে লোকজন দাঁড়িয়ে আছে, হাতে শাবল। এই প্রথম পরস্পরকে দেখে সবাই অবাক হ’য়ে গেলো: এতো লোক কাজে লেগেছিলো!

১৭

তখন বেলা শেষ, একটু পরেই অন্ধকার ক’রে আসবে। তবু আর কয়েক ঘণ্টার মধ্যেই ট্রেন ছাড়বে ব’লে মনে হ’লো। আর-একবার পরিষ্কার-করা রেল-লাইন দেখবার জন্য ইউরি আর টোনিয়া বেরিয়ে গেলো। কিন্তু তখন রেল-লাইনে আর কেউই নেই। দূরে, দিগন্তের দিকে তাকালো দুজনে, তারপর দু-একটা কথা ব’লেই ফিরে এলো।

গাড়িতে ফেরবার পথে তারা দুটি স্ত্রীলোকের ভীষণ ঝগড়ার আওয়াজ শুনতে পেলো। দুজনেই তাদের চেনা, ওগরিস্কেভা আর টিয়াগুনোভা। একদিকেই চলেছে দুজনে, কিন্তু ট্রেনের দুপাশে, শেষহীন বগির এক দিকে ওগরিস্কেভা, অন্যদিকে টিয়াগুনোভা—মাকখানের বগির জন্য কেউই কাউকে দেখতে পাচ্ছে না। ইউরি আর টোনিয়ার ঠিক পাশাপাশি কখনোই এলো না তারা, হয় তাদের একটু আগে চ’লে গেলো পাশ কাটিয়ে, নয়তো একটু পেছিয়ে এলো।

এতো উত্তেজিত হ’য়ে পড়েছিলো তারা যে একটু পরেই ক্লাস্ত হ’য়ে পড়লো, তাদের সব শক্তি যেন ফুরিয়ে গেছে। যেভাবে তাদের গলা সপ্তমে চড়েছিলো, এবং এখন যেমন ফিশফিশানি শুরু হয়েছে, তাই থেকেই এটা বোঝা গেলো, হয় তাদের পা আর চলছে না, নয়তো তারা ট’লে-ট’লে এগোচ্ছে কি বরফের ওপর থুবড় পড়ে যাচ্ছে। মনে হ’লো, টিয়াগুনোভা ওগরিস্কেভার পেছনে ধাওয়া করেছে, আর যখনই তাকে ধরতে পারছে, তখনই প্রচণ্ডভাবে ঘুবি মারছে তাকে। যতোরকম গালমন্দ আছে সমস্তই ব্যবহার করলো সে, আর তার ভদ্র, সুরেলা গলা সেই কটুক্তিগুলোর নির্লজ্জতাকে একেবারে অসীমে পৌঁছে দিলো; এত কর্কশ শোনালো সে-সব যে, কোনো পুরুষের কটুক্তি এতটা খারাপ লাগতো না।

‘নোংরা মেয়েমানুষ কাঁহাকার! নর্দমাঝ রাড়!’ টিয়াগুনোভা চীৎকার ক’রে উঠলো। ‘তোরা ছটফটানির ছালায় এক পা নড়তে পারি না আমি। কেন, আমার বুকের স্ববক্তৃতিকে নিয়ে কি তোর সাধ মিটলো না যে তারপরেও আমার একটা কোলের বাচ্চাকে জেপ মারলি?’

‘ভাসিয়াও কি তোর বিয়ে-করা ভাতার যে এ-কথা বলছিল! বাঃ, চমৎকার!’

‘ওরে আস্তাকুড়ের শানকি, দিচ্ছি, দিচ্ছি তোকে বিয়ে-করা ভাতার! ফের যদি ঐ নোংরা মুখ খুলেছিল তো তোকে কোতল করবো, এই ব’লে রাখলাম।’

‘বেশ, বাবা, বেশ, এত ঘুষোঘুবি কেন? কী তুই চাস, সেটাই পষ্ট করে বল!’

‘মর, মর তুই—জাহাজ মাগি, নষ্টামির ডিপো, বেহায়া কুন্ডি তুই, ফুশলানি, বেড়ালনি!’

‘আমি তা-ই, তাই না? ঠিক আমি একটা বেড়ালনি, নয়তো কুন্ডি—তোর মতো মহীয়সীর সঙ্গে তুলনা করলে তাই তো দাঁড়ায়! জন্মেছিল আস্তাকুড়ে, বিয়ে করেছিল নর্দমায়—ইদুরের বাচ্চা, আর তোর ছানাপোনা সব শজ্জাক।... বাঁচাও! বাঁচাও খুন করলে, খুন করলে আমাকে! আমার মা-বাবা নেই, আমাকে একলা পেয়ে মেরে ফেললে আমাকে—কে আছে, বাঁচাও।’

‘তাড়াতাড়ি চলো,’ টোনিয়া জোরে পা চালালো। ‘আমি আর শুনতে পারছি না এ-সব, একেবারে গা-ঘিনঘিন ক’রে উঠছে। শেষটায় ওরা ভীষণ কিছু বাধিয়ে বসবে দেখছি।’

১৮

মুহূর্তের মধ্যে আবহাওয়া আর দৃশ্য বদলে গেলো। সমতলভূমি শেষ হ’য়ে গেছে, এবার ঘুরে-ঘুরে পার্বত্য প্রদেশের ওপর দিয়ে রেল-লাইন এগিয়ে চললো। অবিশ্রাম উত্তরে বাতাস থেমে গেলো, দক্ষিণ থেকে উষ্ণ হাওয়া আসতে শুরু করলে, যেন কোন চুল্লির ঘুলঘুলি থেকে তাপ বেরোচ্ছে।

পাহাড়ের ঢালু গা থেকে হঠাৎ যেন বনের গাছপালা ছিটকে বেরিয়েছে, যখন রেল-লাইন তাদের অতিক্রম ক’রে গেলো, ট্রেনটিকে সোজা উঠতে হ’লো ওপরে, তারপর যেই বনের মাঝখানে পৌঁছলো, অমনি আবার নিচের দিকে গড়িয়ে নামা শুরু হ’লো। বনের মধ্য দিয়ে যাবার সময় ধোয়া ছেড়ে, নানা রকম খাতব চীৎকার ক’রে আস্তে-আস্তে যেতে থাকলো ট্রেন, যেন কিছুতেই বগিগুলোকে টেনে নিয়ে যেতে পারছে না, যেন এটা বনের কোনো থুথুরে বড়ো পাহারাদার আস্তে-আস্তে হেঁটে যাচ্ছে যাত্রীদের পথ দেখিয়ে, আর যাত্রীরা যেন চলতে-চলতে দু-পাশে মাথা বাড়িয়ে দ্রষ্টব্য সব-কিছু দেখে নিচ্ছে।

কিন্তু তখন পর্যন্ত দেখার মতো কিছুই সেখানে ছিলো না। বনের গাছপালা তখনও তাদের শীতকালের গভীর ঘুমে-ভরা শান্তিতে আচ্ছন্ন হ’য়ে আছে। কেবল মাঝে-মাঝে হঠাৎ হয়তো ন’ড়ে উঠলো কোনো ডাল,ঝেড়ে ফেলে দিলে তার ঘাড় থেকে বরফের বোঝা, যেন কেউ গলাবন্ধ খুলছে সন্তর্পণে।

বড্ড ঘুম পেয়েছিলো ইউরির। ক’টা দিন সে কেবল বাক্সে শুয়ে-শুয়ে ঘুমোলো, নয়তো জেগেই শুয়ে থাকলো, ভাবলো মনে-মনে কিংবা কান পেতে শোনবার চেষ্টা করলো সব-কিছু। কিন্তু শোনার মতো কিছুই ছিলো না তখনও।

১৯

ইউরি যতক্ষণ ভরপুর ঘুমোচ্ছে, ততক্ষণে রাশিয়ার সর্বত্র ঝ’রে পড়া বিপুল পুরিমাণ তুষারপঞ্জকে উষ্ণ ক’রে গলিয়ে দিচ্ছে বসন্ত ঋতু: যেদিন তারা মস্কো ছেড়েছিলো, সেদিন থেকে শুরু ক’রে ক্রমাগত যে তুষারপাত ঘটেছে, যা তারা পথে দেখতে-দেখতে এসেছে, সব গ’লে যেতে লাগলো; গ’লে গেলো সেই সব বরফও, যা তারা তিনদিন ধ’রে রেল-লাইন থেকে সরিয়েছে: পুরু, ঘন স্তরবিন্যাস ক’রে যতো বরফ পড়েছিলো—পার্বত্য অঞ্চল থেকে শুরু ক’রে সমতল এলাকা যদিকেই চোখ যাক কেবল বরফ, আর বরফ—সব গলাতে শুরু করলো এক্সার।

প্রথমে বরফ গলতে থাকলো গোপনে, সত্তর্পণে, ভেতর দিক থেকে। কিন্তু যখন সেই গলে-যাওয়ার বিরাট কাজ অর্ধেক হয়ে গেলো, তখন আর তা লুকিয়ে রাখা গেলো না। ক্রমশ স্পষ্ট হয়ে উঠতে লাগলো সেই অলৌকিক রূপান্তর। ভেতর থেকে কলধরে জলস্রোত বেরিয়ে এলো। দুর্ভেদ্য গভীরতা থেকে আড়মোড়া ভেঙে জাগলো অরণ্য, আর অরণ্যের সব-কিছু।

জলধারার চলাফেরার মতো জায়গার কোনো অভাব ছিলো না। নিজে থেকে সে ছুঁড়ে মারলো চূড়ো থেকে, কানায়-কানায় ভরে গেলো সব পুকুর, তারপর ছড়িয়ে পড়লো। গাঁর্জে উঠলো বনের মধ্যে, ধোয়া তুলে প্রবল বেগে ছুটে চললো। বনের ভেতর থেকে এলোমেলো ধারায় ছুটে এলো জল, যদি কোথাও জমাট তুষার তার গতিরোধ করে বসে তো তার মধ্যেই ডুবে যেতে থাকে; কখনো ছুটে আসে শো-শো করে, কখনো বা তোলপাড় তুলে ঘুরে গিয়ে পড়ে নিচে, পিচকির থেকে ছিটকে বেরোনো ধারার মতো। মাটি একেবারে ভিজে গেছে। স্যাৎসেতে ধোয়াটে উচ্চতায় মাথা-তোলা প্রাচীন পাইন-গাছগুলো প্রায় যেন মেঘের গা থেকে আর্দ্রতাকে পান করে নিলে, আর শাদা-শাদা ফেনা লেগে থাকলো তাদের শেকড়ে, শুকিয়ে গেলো তারপর, যেন কোনো গায়েফের গায়ে বিয়ারের ফেনা লেগে আছে।

আকাশ যেন বসন্তকে আকর্ষণ পান করে নিয়ে ধোয়ায় অস্থির হয়ে রইলো; মেঘের পর মেঘ জমলো ঘন হয়ে। বনের গা ঘেঁষে নিচু দিয়ে মেঘ ভেসে চললো; বৃষ্টি লাফিয়ে নামলো সেই ভাসমান পাল-তোলা মেঘ থেকে, উষ্ণ বৃষ্টি, সোদা বৃষ্টি, যেন তাতে মাটি আর ঘামের গন্ধ মাখানো আছে, আর এই বৃষ্টিই মাটির ওপর থেকে বরফের শেষ দুর্ভেদ্য বর্মের মতো স্তরকে ধুইয়ে দিয়ে গেলো।

আড়মোড়া ভেঙে ঘুম থেকে উঠলো ইউরি, তারপর কনুইয়ে ভর দিয়ে কান পেতে বাইরে তাকালো।

২০

খনি-অঞ্চল যতো কাছে এসে পড়ছে, ততোই বাড়ছে বসতির সংখ্যা। একটু পরে-পরেই থামতে হচ্ছে, গাড়ি একটানা বেশিক্ষণ চলে না। ছোটো-ছোটো স্টেশনগুলিতে বহু লোকজন ওঠানমা করতে শুরু করে দিলে। ভালো একটা জায়গা দেখে শুয়ে-পড়ার বদলে, যারা অল্প পথ যাবে, তারা যে-কোনোখানেই বসে পড়লো, দরজার কাছে বা বগির মধ্যখানে, আর বসে পড়েই নিচু গলায় স্থানীয় নানা বিষয় নিয়ে আলাপ শুরু করে দিলে, অন্য কেউ যার একটা বর্ণণ বুকতে পারে না।

এই সব স্থানীয় লোকজনদের কথাবার্তা তিনদিন ধরে শুনে-শুনে ইউরি যে-তথ্য সংগ্রহ করলো তা এই: এখানে শাদারাই যুদ্ধে জয়লাভ করছে, এবং হয় ইউরিয়্যাটিন দখল করে ফেলেছে, নয়তো করবার মুখে। যদি সে নামটা ভুল শুনে না থাকে বা তার বন্ধুর নামে আর-কেউ থেকে না-থাকে, তাহলে—ইউরি জানতে পারলো, শাদাদের দলের নেতৃত্ব নিয়েছে সেই গালিউলিন, যাকে সে শেষ দেখেছিলো মেলিউজ্জাইয়েভোতে।

এই অসমর্থিত জনরবে তার পরিবারের লোকেরা যাতে শঙ্কিত হয়ে না ওঠে, সেজন্য আপাতত সে খবরটা গোপন রাখলো।

২১

রাত্রি গভীর হবার আগেই ইউরির ঘুম ভেঙে গেলো। অস্পষ্ট এক সুখের আবেশে জেগে উঠলো সে। ট্রেন নিঃশব্দ দাঁড়িয়ে আছে। শাদা রাত্রির চকচকে অস্পষ্টতায় সারা স্টেশন স্নান করেছে যেন। এই উজ্জ্বল অন্ধকারের মধ্যে সূক্ষ্ম ও প্রবল কিছু-একটা ছিলো যা এক বিশাল, উন্মুক্ত

ভূদৃশ্যের ইঙ্গিত দেয়, যেন কোনো পাহাড়ের চূড়ায় এই স্টেশনটি দাঁড়িয়ে আছে।

প্ল্যাটফর্ম ধরে লোকজনেরা গাড়ির পাশ দিয়ে চলেছে, নরম গলায় কথা বলছে তারা, ছায়ার মতো নিঃশব্দ তাদের চলাফেরা। যুদ্ধের আগে ঘুমন্ত যাত্রীদের কথা মনে রেখে লোকেরা এমনভাবে চলাফেরা করতো; এখানে সেই ভাবের প্রকাশ দেখে ইউরি বিচলিত হ'লো।

আসলে কিন্তু সে ভুল বুঝেছিলো। চ্যাচামেচি, হৈ-ঠে তেমনি চলেছে; অন্যান্য প্ল্যাটফর্মে যেমন, এখানেও তেমনি চীৎকৃত কণ্ঠস্বর আর জুতোর প্রবল শব্দ। কিন্তু কাছেই একটা জলপ্রপাত ছিলো; যার সতেজ স্বাধীনতা রাত্রির পরিধিকে যেন বাড়িয়ে দিয়েছে; আসলে এর শব্দই ইউরিকে ঘুমের মধ্যে সুখে ভরে দিয়েছিলো। জল পড়ার বিরতিহীন ঝর্ঝর অন্য সব শব্দকে ঢুবিয়ে দিয়েছে, এই অলীক নীত্ৰবতা সেইজন্যেই।

ঝরনাটির অস্তিত্বের কথা ইউরি অবশ্য জানেই না, তবু তাই জুড়িয়ে দিলো তার মন, আর তারপর আবার সে একটু পরেই ঘুমিয়ে পড়লো।

তার বাঙ্কের ঠিক তলায় দুটি লোক কথা বলছে।

‘তা, এখনো কি ওরা কানমলা খায়নি, নাকি গোলমাল করছে এখনো?’

‘দোকানিদের কথা জিজ্ঞেস করছেন আপনি?’

‘হ্যাঁ, গমের কারবারিদের কথা জিজ্ঞেস করছি।’

‘হাতে ক’রে খাইয়ে দাও! যেই উদাহরণ হিসেবে কয়েকজনকে হাওয়ায় উড়িয়ে দেওয়া হ’লো, অমনি সবাই মাখনের মতো নরম হ’য়ে গেছে। জেলায় তো ফাইন বসানো হয়েছে।’

‘কত ক’রে?’

‘চল্লিশ হাজার পুড’।’

‘এ যে আজব গল্প!’

‘আপনাকে মিথ্যা ব’লে লাভ কি?’

‘চল্লিশ হাজার পুড শস্য।’

‘বাঃ, বেশ চৌকশ ব্যাপার!’

‘সবচেয়ে ভালো জাতের চল্লিশ হাজার পুড শস্য।’

‘তা, তাতে হয়েছে কী? এখানকার মাটি খুব ভালো। সোনা ফলে এখানে। শস্যের ব্যবসার একেবারে সেরা জায়গা। এখান থেকে, রিন্ভা হ’য়ে ইউরিয়ান্টিন পর্যন্ত, গ্রামের পর গ্রাম, জেটির পর জেটি, সব তো কেবল পাইকেরি ব্যবসাদার।’

‘চ্যাচাবেন না। সবাইকে জাগিয়ে তুলবেন দেখছি।’

‘বেশ।’ হাই তুললো সে।

‘ঘুমোলে কেমন হয়? ট্রেন চলতে শুরু করেছে মনে হচ্ছে।’

ট্রেন অবশ্য যেখানেই ছিলো সেখানেই দাঁড়িয়ে থাকলো। কিন্তু পেছন থেকে দ্রুত আরেকটা ট্রেনের চলার শব্দ এগিয়ে এলো, একটু পরেই কানে-তালা-দেয়া গর্জন শোনা গেলো, যেই পাশাপাশি এসে দাঁড়ালো, অমনি জলপ্রপাতের শব্দ চাপা প’ড়ে গেলো, তার পরেই একটা পুরোনো ধরনের এক্সপ্রেস গাড়ি সমান্তর রেললাইন দিয়ে গর্জন করতে-করতে চ’লে গেলো: প্রচণ্ড আগুয়াজ হ’লো, সিটি দিলো, পেছনের বাতিটা চোখ মারলো যেন, তারপরে অদৃশ্য হ’য়ে গেলো দূরে।

‘বিক্রী ব্যাপার! কে জানে কখন এই গাড়ি ছাড়বে।’

‘আর ছাড়বে! ডের দেরি ছাড়ার।’

‘একটা বিশেষ সাজোয়া গাড়ি, নির্বাং স্ট্রেলনিকভ।’

‘ও-ই হবে নির্বাং।’

‘প্রতিবিম্ববীদের সামনে এলেই ও একবারে বুন্দো জানোয়ার হ’য়ে পড়ে।’

‘গালেইয়েভেকে ধরতে যাচ্ছে।’

‘সে আবার কে?’

‘হেটমান গালেইয়েভ। লোকে বলে সে নাকি ইউরিয়্যাটিনের বাইরে একদল চেক সৈন্য নিয়ে আস্তানা গেড়েছে, কতগুলি বন্দর কেড়ে নিয়েছে সে, ব্যাটা পাচা শালগম; এখনো যুঝে চলেছে। এই হ’লো হেটমান গালেইয়েভ।’

‘কখনো নাম শুনিনি তো!’

‘প্রিন্স গালিলেইয়েভও হ’তে পারে। নামটা ঠিক আমার মনে নেই। ও নির্বাং আলি কুরবান। নিশ্চয়ই নামটা গুলিয়ে গেছে।’

‘তা কুরবানও হ’তে পারে।’

‘কুরবান হওয়াই সম্ভব।’

২২

সকালে দিকে ইউরি আবার জেগে গেলো। আবার মধুর একটা স্বপ্ন দেখেছে সে, তার আনন্দ আর মুক্তির রেশ র’য়ে গেছে তার ভেতর।

ট্রেনটা আবার স্থির দাঁড়িয়ে আছে; হয়তো আগের স্টেশনটাতেই, কিন্তু তা নাও হ’তে পারে। আবার জলপ্রপাতের শব্দ শোনা গেলো, হয়তো আলাদা কোনো জলপ্রপাত, কিন্তু আগেরটাই বোধ হয়।

প্রায় তক্ষুনি সে আবার ঘুমিয়ে পড়লো। কিন্তু ঘুমিয়ে পড়ার আগে অস্পষ্টভাবে কাদের ছুটোছুটি শব্দ শুনলো, বেশ উত্তেজিত শব্দ। কনভয়ের কর্তার সঙ্গে মন্ত ঝগড়া বাধিয়ে বসেছে কস্টায়এড, দুজনেই প্রচণ্ড চ্যাচাচ্ছে, গালাগাল দিচ্ছে। বাতাস আগের চেয়েও মনোরম। নতুন কোনো-কিছুর গন্ধ আছে যেন তাতে, এমন-কিছু যা আগে ছিলো না; সে গন্ধ এমন-কিছুর, যা অতিকায়, বসন্তের সঙ্গে সম্পৃক্ত, শাদা, কালচে, নির্বন্ধক, নির্ভার, ছড়িয়ে-পড়া, যেন মে মাসের চঞ্চল তুষাররাশি, যখন ভিজে গ’লে-বাওয়া তুষার-কণা মাটিতে পড়বার সময় তাকে শাদা না-ক’রে কালো ক’রে তোলে।—‘স্বচ্ছ, কালচে-শাদা, মধুগন্ধী, চেরি-পাখি’, ইউরি ঘুমের-মধ্যে আন্দাজ করলে।

২৩

পরদিন সকালে টোনিয়া বললে:

‘সভিা, ইউরা, তুমি অসাধারণ, স্ববিরোধের ছুপ একটা। কখনো একটা মাছি তোমার ঘুম ভাঙিয়ে দেয়, সকালের আগে কিছুতেই আর ঘুম আসে না, আর এখানে তুমি কিনা এই তুমুল ঝগড়ার মধ্যে প’ড়ে-প’ড়ে ঘুমালে, আমি কিছুতেই তোমার ঘুম ভাঙাতে পারলুম না! একবার ভেবে দ্যাখো দিকি, প্রিটিলিয়েভ আর ভাসিয়া পালিয়েছে! টিয়াগুনোভা আর ওগরিস্কেভাও তা-ই। এমন একটা ব্যাপার ভাবতে পারতে তুমি! দাঁড়াও, এই শেষ নয়। ভোরোনিউকও পালিয়েছে সেই সঙ্গে। ও যে পালিয়েছে তাতে আর কোনো ডুল নেই, এই আমি ব’লে দিলাম। এখন শোনো।—কী ক’রে তম্বা পালালো, এক সঙ্গে, না আলাদা-আলাদা, কার পরে কে

পালালো—এই সব এখনো বোঝা যাচ্ছে না। অবশ্য এটা বুঝি যে ভোরোনিউক—যখন সে দেখলে অন্যেরা পালিয়েছে তখন সে নিজের চামড়া বাঁচাবার চেষ্টা করতে বাধ্য। কিন্তু অন্যেরা? তারা কি স্বেচ্ছায় এইভাবে হাওয়া হ'য়ে গেলো, নাকি অন্য কারো হাত আছে এর ভেতর, কে জানে? যেমন, যদি ঐ মেয়েদুটিকে সন্দেহ করতে হয়, টিয়াগুনোভা কি ওগরিস্কোভাকে খুন করেছে, না ওগরিস্কোভা টিয়াগুনোভাকে? কেউ জানে না। মজুর-সমবায়ের কমাণ্ডার তো পাগলের মতো ছুটোছুটি করছে ট্রেনে। “কিছুতেই ট্রেন ছাড়তে পারবে না। আইনের নামে হুকুম দিচ্ছি আমি, যতক্ষণ না বন্দীদের ধরতে পারা যাচ্ছে ততক্ষণ এক পাও নড়তে পারবে না।” এদিকে ট্রেনের কর্তা আবার চ্যাচাচ্ছেন: “আমি ফ্রন্টে সৈন্য নিয়ে যাচ্ছি, আপনার ঐ সব নোংরা সঙ্গোপাঙ্গোর জন্য আমি কিছুতেই সময় নষ্ট করতে পারবো না। এমন কথা তো স্বপ্নেও ভাবতে পারবো না।” কাজেই শেষটায় দুজনে মিলে কস্টয়এডের কাছে গেলেন। “আপনি নিজে একজন সিভিক্যালিস্ট, শিক্ষিত লোক, অথচ আপনারই পাশে ব'সে একজন সাধারণ সৈন্য—যার পা থেকে মাথা পর্যন্ত অশিক্ষার ছাওয়া—এ-রকম মারাত্মক অসংযম ঘটিয়ে বসলো! অথচ আপনি নিজেকে পপুলিস্ট^১ বলেন!” কস্টয়এড ছেড়ে কথা কওয়ার লোক নয়, বেশ দু-কথা শুনিয়ে দিয়েছে। “বেশ আদার তো,” ও ব'লে দিয়েছে, “বন্দীকে কিনা তার পাহারাদারের খবরদারি করতে হবে! বাঃ, চমৎকার! শুনুন মশাই, যদিও ওসব হবে, মুর্গিরা সেদিন কাকের মতো কা-কা করবে।” আমি তো যত জোরে পারি তোমায় ধাক্কাছিলাম : “ইউরা! ওঠো! কে যেন পালিয়ে গেছে!” কিন্তু কে কার কথা শোনে! যদি তোমার কানের পাশ দিয়ে বন্দুকের গুলি চ'লে যেতো তো তাও বোধ করি তুমি শুনতে পেতে না।...পরে সব বিশদভাবে বলবো!...আরে, দ্যাখো-দ্যাখো! বাবা, ইউরা, দ্যাখো, কী সুন্দর।’

জানলার একটা পাল্লা কে খুলে নিয়েছে; সেখান দিয়ে দেখা বসন্ত-বন্যায় গ্রামের আগাগোড়া ছেয়ে গিয়েছে। কোথায় কোন নদী তার তীর ছাপিয়ে একেবারে রেল-লাইন পর্যন্ত এগিয়ে এসেছে, মনে হচ্ছে ট্রেন যেন তার ওপর দিয়েই আস্তে-আস্তে ভেসে চলেছে।

জলের সমতলের এখানে-ওখানে এক অদ্ভুত ধাতব নীল আভা; এছাড়া বাকি সমস্ত অংশের ওপর ভোরবেলার উষ্ণ মসৃণ রোদ ছড়িয়ে আছে, চকচকে আলোর আভা, যেমন মসৃণ তেমনি তেলতেলে, যেন কোনো খানসামা মাংসের পিঠের ওপর পালক দিয়ে গলানো মাখন মাখিয়ে দিয়েছে।

এই তীরহীন বন্যায় যেন শাদা মেঘের মিনার ডুবে আছে, মাঠে, ডোবা, ঝোপঝাড়ের সঙ্গে-সঙ্গে তাদেরও খিলান যেন ডুবে গিয়েছে জলের তলায়।

আর সেই বন্যার মাঝখানে কোথায় যেন সৰু এক টুকরো জমি তার গাছপালা নিয়ে দাঁড়িয়ে আছে, জলে ছায়া প'ড়ে দ্বিগুণ দেখাচ্ছে গাছের সংখ্যা, পৃথিবী আর আকাশ—এর মাঝখানে কে যেন তাদের বন্দী ক'রে রেখেছে।

‘ঐ দ্যাখো একদল হাঁস,’ আলেকজান্ডার আলেকজান্ড্রোভিচ বললেন।

‘কোনখানে?’

‘দ্বীপের কাছে, ডান দিকটায়। যাঃ, সব উড়ে গেলো। আমরা ওদের ভয় পাইয়ে দিয়েছি।’

‘ঐ তো, এবার আমি দেখতে পেয়েছি,’ ইউরি বললে। ‘পরে এক সময় আপনার সঙ্গে আলাপ করতে হবে, আলেকজান্ডার আলেকজান্ড্রোভিচ। এখন না, পরে কখনো...তবে, ঐ সব জোর ক'রে ধ'রে-আনা মজুররা এবং মেয়েদুটি শেষ পর্যন্ত একটা সিদ্ধান্ত নিতে পেরেছে

১ পপুলিস্ট : পপুলিস্টরা হ'লো বামপন্থী আদর্শবাদী, যারা ‘জনসাধারণের মধ্যে কাঙ্ক্ষিত কববার’ জন্য নিজের দ্বীপবাসকে উৎসর্গ ক'রে দিতো।

সেজন্য আমি বেশ খুশি হয়েছি। খুন-তুন কিছু হয়নি, এ আমি ঠিক জানি। তারা কেবল ছুটেছে—ঠিক জলের মতো।’

২৪

শাদা উল্লুরে রাত্রি শেষ হ’য়ে যাচ্ছে। স্পষ্ট দেখা যাচ্ছে সব-কিছু, ঐ যে পাহাড়, ঐ তো অরণ্যদেশ, আর গিরিসংকট; কিন্তু তা সত্ত্বেও তারা যেন কিছুতেই নিজেদের বিশ্বাস করতে পারছে না, যেন কেবলমাত্র রূপকথাতেই তাদের অস্তিত্ব আছে, বাস্তবে নয়।

নতুন পাতার শ্যামলতা আসছে বনের ডালপালায়, কোনো-কোনো স্থানে আবার ঢেরিফুলের পুষ্পিত লাবণ্য। যেখানে সত্র এক শৈলস্তবক ছোটো খাড়া পাহাড়ে গিয়ে শেষ হয়েছে, সেই ঝোলানো খাড়া পাহাড়ের তলায় বন।

ঝোপঝাড়ের পেছনে যেখানে গিরিসংকট, জলপ্রপাতটি সেখানে—খুব বেশি দূরে না, তবু ঝোপঝাড়ের জন্য অস্পষ্টভাবে চোখে পড়ে। পালিয়ে-যাওয়া সেই বাখ্যতামূলক মজুরটি, তার নাম ভাসিয়া ব্রিকিন, ওদিকে তাকিয়ে-তাকিয়ে সুখে আর ভয়ে একেবারে ক্লান্ত হ’য়ে পড়লো।

আশপাশে দ্বিতীয় আর-কিছুই নেই যার সঙ্গে এই জলপ্রপাতের তুলনা হ’তে পারে। আর দ্বিতীয়রহিত ব’লেই তার মধ্য থেকে এক অদ্ভুত ভয়ংকরতা লক্ষ্য করা গেলো; সেই জন্যেই বোধহয় জীবন আর সচেতনতায় এটা সজীব প্রাণীতে রূপান্তরিত হ’য়ে গেছে, যেন এটাই হ’লো এই অঞ্চলের ড্যাগন কিংবা পাখা-মেলা সাপ, যারা এই অঞ্চলে প্রভুত্ব আদায় ক’রে আসছে, এবং গ্রামে-গ্রামে শিকার ক’রে বেড়িয়েছে।

অর্ধেক নেমেই ধারালো একটা পাথরের ওপর আছড়ে প’ড়ে দু-ভাগে ভাগ হ’য়ে গেছে এই জলপ্রপাতটি। ওপরের ভাগটা যেন একেবারে নিশ্চল, কিন্তু নিচের দুটি স্তম্ভই অল্পস্বল্প দুলাচ্ছে আশেপাশে, যেন জলপ্রপাতটি অনবরত পিছলে যাচ্ছে নিজের জায়গা থেকে, ফিরে আসছে আবার আগের জায়গায়, কাঁপছে কেবল, কিন্তু পরক্ষণেই আবার ফিরে পাচ্ছে তার স্থৈর্য।

ভাসিয়া তার ভেড়ার চামড়া ঝোপের ধারে মাটিতে ছড়িয়ে দিয়ে তার ওপর শুয়েছিলো। আলো যখন আরো স্পষ্ট হ’য়ে উঠলো, ভারি পাখাওলা বড়ো এক পাখি উড়ে এসো পাহাড় থেকে, বন ঘিরে মসৃণ বৃন্তের আকারে উড়লো একটুকণ, তারপরে যেখানে শুয়েছিলো তার কাছেই একটা পাইনগাছে গিয়ে বসলো। মুগ্ধ হ’য়ে সে তাকালো তার ঘননীল গলা আর ধূসর-নীল বকের দিকে, ফিশফিশ ক’রে অশ্রুট স্বরে উচ্চারণ করলো তার ইউরাল নাম ‘রণজা’। তারপর উঠে ব’সে ভেড়ার চামড়াটা কুড়িয়ে নিয়ে কাঁধের ওপর ফেলে দিয়ে ফাঁকা জায়গাটা পেরিয়ে গেলো তার সঙ্গীর সঙ্গে কথা বলতে।

‘এসো, পলিয়া মাসি। মাগো, কী ঠাণ্ডা হ’য়ে গেছে তুমি! তোমার দাঁত চোকাঠুকির শব্দ পর্বস্ত শুনতে পাচ্ছি আমি! বারে, কিসের দিকে তাকিয়ে দেখছো তুমি, এতো ভয় পেয়েছো কেন? যেতেই হবে আমাদের, কোনো-একটা গ্রামে গিয়ে পৌছতে হবে, এই ব’লে রাখছি। নিজেই ভেবে দ্যাখো তুমি। গ্রামের লোকেরা আমাদের লুকিয়ে রাখবে, তাদের নিজেদের লোকের কোনো বিপদ হোক, এটা নিশ্চয়ই তারা চাইবে না। দু-দিন ধ’রে কিছুই খাইনি আমরা, এখানেই তো মরতে হবে শেষটায়। ভোরোনিউক খুড়ো নিশ্চয়ই ভীষণ সোয়গোল তুলেছে এতোক্ষণে, সবাই নিশ্চয়ই এখন আমাদের খোঁজ করছে। আমাদের যেতেই হবে, মাসি। সোজা ভাবায়, ছুটেতে হবে প্রাণপলে। তোমাকে নিয়ে যে কী করছে আমি তো কিছুই বুঝতে পারছি না, মাসি। গোটা দু-দুটো দিন একটা কথাও বলোনি। বড্ড বেশি ভাবো তুমি, সত্যি, এতো কী ভাবো? ঐর্ভো অসুখী হবার কী আছে? তুমি তো আর ইচ্ছে ক’রে কোটি মাসিকে ট্রেন থেকে

কেলে দাওনি। কেটি ওঙ্গরিছোতাকে থাকা দাওনি তুমি, তুমি কেবল তার পোশাকের এক অংশ হাতে ধরেছিলে, তাও সৈবাং—আমি স্বচক্ষে দেখেছি। ঘাসের ওপর থেকে উঠে দাঁড়িয়ে—স্পষ্ট দেখেছি আমি—ছুটতে আরম্ভ করে দিয়েছিলো। সে আর প্রিটলিয়েভ বুড়ো নিশ্চয়ই আমাদের ধরে ফেলবে। আবার আমরা সবই একজায়গায় থাকবো। আসল কথাটা হ'লো, এতো মুখড়ে পড়ো না, তাহ'লেই দেখবে আবার কথা বলতে পারবে।'

টিয়াত্তনোভা উঠে দাঁড়ালো। ভাসিয়ার হাত ধরে নরম স্বরে বললো, 'চলো, এগোই।'

২৫

খাড়া পাহাড় বেয়ে বগিগুলি যখন উঠছিলো, কাঠগুলি তখন কাঁচকাঁচ শুক করে দিলে। টিলার নিচেই ছিলো এক ঘন ঝোপ, তার আগা অবশ্য রেল-লাইন পর্যন্ত পুরোপুরি পৌছোয়নি। তারও নিচে মাঠ। বন্যার জল এইমাত্র সরে গিয়েছে, কেবল প'ড়ে আছে বালি আর কাঠের কঁকরো, অপরিষ্কার হ'য়ে আছে সব। পাহাড়ের কোনো উচু অংশে বোধহয় এই কাঠগুলি জড়ো করা ছিলো, সেখান থেকে জলে ভেসে এসেছে।

পাহাড়ের তলার সেই কচি ঝোপ তখনো যেন শীতের মতো রিক্ত হ'য়ে আছে। মোমবাতির চব্বির মতো ঝুঁড়িগুলো ছড়িয়ে আছে, আর তাদের মধ্যে এমন একটা কিছু ছিলো, যা বাকি দব-কিছুর সঙ্গে ঠিক-খাপ খাচ্ছিলো না, যেন তা অতিরিক্ত এবং অপরিচ্ছন্ন; হয়তো ময়লা কংবা কোনো প্রদাহ তাদের এভাবে ঈপ্সিয়েছে; আর এই অপরিচ্ছন্নতা, আতিশয্য আর ময়লা হ'লো জীবনের চিহ্ন, যা ইতিমধ্যেই এগিয়ে এসে গাছপালার সবুজ পাতার আশ্রয় ছালিয়ে দিয়েছে।

এখানে-সেখানে শহিদের মতো সোজা মাথা তুলে দাঁড়িয়ে আছে বার্চগাছ, তার যুগল ভাজ-খোলা পাতার দাঁত আর তীক্ষ্ণ তীর ছিন্নভিন্ন করেছে তাকে, আর কেবল তার দিকে তাকিয়েই তার গন্ধ পাবে যে-কেউ: গালা তৈরির জন্য যে চকচকে রজন ব্যবহার করা হয়, ঠিক তার গন্ধই ছড়িয়ে দিচ্ছে।

বন্যায় ভেসে-যাওয়া কাঠগুলো যেখানটায় জড়ো করা যেতে পারতো, ট্রেন অল্পক্ষণ পরেই সেখানে এসে দাঁড়ালো। রেল-লাইন যেখানে মোড় বেকেছে, সেখান থেকে বনের একটা কাটা মংশ চোখে পড়ে; কাঠকুটো আর গাছপালার ছাল-চামড়া সব সেখানটায় জুপ করা, তা ছাড়া মাঝখানে সব বড়ো মাপের কাঠ জড়ো করে রাখা। এঞ্জিন ব্রেক কবতেই ট্রেন কৈশে উঠে পাহাড়ের বাঁকের কাছে থেমে গেলো; পাহাড় সেখানটায় গোল হ'য়ে একটু ঝুঁকে আছে।

এঞ্জিন থেকে বেরিয়ে এলো ছোটো-ছোটো তীক্ষ্ণ আওয়াজ; ছালানি নেবার জন্যেই যে ট্রেন থেমেছে, এ-তথ্যটা যাত্রীদের জানাবার জন্য এত সব সংকেতের কিন্তু দরকার ছিলো না।

দরজাগুলি খুলে যেতেই গিলগিল করে বেরিয়ে এলো লোকেরা—প্রায় একটা ছোটো শহরের জনসংখ্যা; কেবলমাত্র নাবিকরাই তাদের কামরায় থেকে গেলো, বেসামরিক সকল চর্চব্য থেকে তাদের রেহাই দেওয়া হয়েছিলো।

কয়লা-ঘর ভরবার মতো যথেষ্ট ছালানি সেই ফাঁকা জায়গায় ছিলো না। বড়ো-কাঠগুলির কয়েকটাকে ঠিক মাপসই করে কেটে নেবার প্রয়োজন হ'লো। এঞ্জিন-ঘ লোকদের অন্যান্য যন্ত্রপাতির মধ্যে করাতও ছিলো; বেচ্ছাসেবকদের প্রতি দু'জনকে করাত দেওয়া হ'লো একটি করে, যাদের মধ্যে ইউরি আর তার স্বশ্রমশায়ীও ছিলেন।

কামরার দরজা দিয়ে মুখ বাড়িয়ে দাঁত বের করে হাসছিলো নাবিকেরা। রংকটদের মধ্যে এক অদ্ভুত জগাখিচুড়ি পাকিয়েছে: একদিকে আছে মধ্যবয়সী মজুর, যারা চটপট জরুরি ট্রেনিং

নিয়ে বেরিয়ে এসেছে, অন্য দিকে আছে নৌ-বাহিনীর কলেজ থেকে সদ্য পাশ-করা তরুণেরা, যাদের দেখে মনে হচ্ছিলো কেউ যেন ভুল ক'রে তাদের ভারিকিচালের বাবামশায়দের মধ্যে ঢুকিয়ে দিয়েছে। যাতে ভাবনার হাত থেকে রেহাই পায়, সেইজন্য বুড়ো নাবিকদের সঙ্গে ঠাট্টা-ইয়ার্কি ক'রে চলছিলো তারা। সবাই ভালো ক'রে জানে তাদের দুঃখের দিন আসন্ন।

ঠাট্টা আর অট্টহাসি কমীদলকেও অনুসরণ করলে।

‘ও দাদু! কাজে আমি মোটেই গাফিলতি করছি না, আসলে আমার বয়স এখনো কচি আছে, আমার নানি আমাকে কিছুতেই ছাড়তে চাচ্ছে না।’ ‘মার্থা! দেখো, তোমার ঘাগরায় যেন আবার করাত চালিয়ে না, শেষটায় ঠাণ্ডা লাগিয়ে বসবে!’ ‘এই ছুঁড়ি, বনে যাসনে, বরং আয়, আমার বৌ হবি।’

২৬

ফাঁকা জায়গায় কতগুলি গাছ ডালপালাসুঁজ প'ড়ে ছিলো; তারই একটার কাছে গিয়ে ইউরি আর আলেকজান্ডার আলেকজান্দ্রোভিচ করাত চালাতে শুরু ক'রে দিলেন।

তখন বসন্ত; ছ-মাস আগে বরফে চাপা পড়ার সময় যেমনটি ছিলো, তেমনি চেহারা নিয়ে তার তলা থেকে বেরিয়ে আসছে পৃথিবী। সোঁদা গন্ধ বনের মধ্যে, তাছাড়া গত বছরের পাতা জ'মে স্তূপ হ'য়ে আছে, ঠিক যেন একটা ঝাঁট-না-দেওয়া ঘর যেখানে লোকেরা বহু বছরের জ'মে থাকা চিঠি, রসিদপত্র আর নানারকম বিল ছিড়ে-ছিড়ে ফেলে দিয়েছে।

‘এতো তাড়াহুড়া করবেন না, ক্লান্ত হ'য়ে পড়বেন,’ ইউরি আন্তে কিন্তু শক্ত হাতে করাত চালাতে-চালাতে বললো। ‘এখন একটু জিরিয়ে নিলে কেমন হয়?’

করাত চালানোর কর্কশ আওয়াজে বন ভ'রে উঠলো। দূরে, অনেক দূরে, কোনখানে এক নাইটিঙ্গেল গলা সাধছে; অনেককণ বিরতি দিয়ে-দিয়ে, গ্রাশ উঠছে শিস দিয়ে, যেন কেউ ঝাশিতে হুঁ দিলো; এমন কি এঞ্জিনের বাষ্প পর্যন্ত তেমনি কৈপে-কৈপে আকাশে ফেনিয়ে উঠছে, কোনো নার্সারি ঘরের স্টোভে যেমন ক'রে দুধ টগবগিয়ে ওঠে।

‘তখন তুমি কী বলতে যাচ্ছিলে আমাকে?’ আলেকজান্ডার আলেকজান্দ্রোভিচ জিজ্ঞেস করলেন। ‘মনে নেই? সেই যখন ধূপের পাশ দিয়ে যাচ্ছিলাম, ‘যখন হাঁসেরা উড়ে গিয়েছিলো আর তুমি বললে পরে এক সময় আমাকে বলবে!’

‘ও, হ্যাঁ...কিন্তু আমি ঠিক বুঝতে পারছি না সংক্ষেপে কী ক'রে ব্যাপারটা বলি। আমার যেন কেবল তলিয়েই যাচ্ছি, আমি ভাবছিলাম। পুরো এলাকাটা দাঙ্গা-হাঙ্গামায় তালগোল পাকিয়ে আছে। সেখানে গিয়ে যে কী দেখবো তা আমরা কেউই জানি না। হয়তো এখনই আমাদের সব-কিছু খোলাখুলি ব'লে ফেলা উচিত, কারণ যদি কোনোরকম...। আমাদের মতামত বিষয়ে কিছুই বলতে চাচ্ছি না আমি—বসন্তকালে কোনো বনে দাঁড়িয়ে পাঁচ মিনিটে সে-কথা ব'লে ফেলা যায় না। তাছাড়া বড্ড বেশি জানি আমরা একে অন্যকে। আপনি, আমি, টোনিয়া এবং আমাদেরই মতো আরো অনেকে—এ-রকম সময়ে আমরাই আমাদের নিজেদের পৃথিবী গ'ড়ে তুলি, তফাৎ শুধু সে-বিষয়ে আমাদের সে-সম্পর্কে সচেতনতার মাত্রায়। আমি বলতে চাচ্ছি যে হয়তো এখনই, আগে থেকেই, আমাদের ঠিক ক'রে ফেলা উচিত কীভাবে আমরা চলাফেরা করবো, যাতে পরে পরস্পরকে লজ্জায় ফেলতে না-হয় বা কুণ্ঠিত হ'তে না হয়।’

‘তুমি কী বলতে চাচ্ছে, আমি ধরতে পেরেছি। যে-ভাবে তুমি কথাটা বললে তা আমার ভালো লাগেছে। সেই শীতের রাতিটা তোমার মনে আছে, যখন বরফের ঝড়ের মধ্যে তুমি কাগজ এনে আমাকে প্রথম সরকারি নির্দেশগুলো দেখিয়েছিলে? তোমার মনে আছে কী

অবিশ্বাস্যরকম ঋজু ও অনমনীয় মনোভাব প্রকাশ করা হয়েছিলো তাতে? সেই একাগ্রতাই আমাদের মুগ্ধ করেছিলো সেদিন। কিন্তু এ-সব জিনিসের আদি শুদ্ধতা থাকে শুধু সেই সব মনের মধ্যে, যেখানে তাদের প্রথম জন্ম হয়েছিলো, আর থাকে শুধু তাদের প্রথম প্রকাশের তারিখটিতেই। কিন্তু ঠিক পনের দিনই রাজনীতির কূটতর্ক তাদের উলটিয়ে ফেলে দেয়। তোমাকে আর কী বলতে পারি আমি? আমাদের ওপর খড়্গ হস্ত, এর দর্শন আমার বিরোধী, এই সব পরিবর্তনে আমার সম্মতি আছে কিনা, সে-কথাও আমাকে জিজ্ঞেস করা হয়নি। কিন্তু আমাকে তারা বিশ্বাস করেছে, এবং আমার নিজেরই কতগুলো কাজ—যদি তা আমি স্বৈচ্ছায় না-ও নিয়ে থাকি—আমাকে কতগুলি বাধ্যবাধকতার মধ্যে এনে ফেলেছে।

‘টোনিয়া কেবলই জিজ্ঞেস করছে আমরা সময়মতো পৌছবো কিনা যাতে শাকসজ্জি লাগাতে পারি। আমি তা জানি না। ইউরালের মাটি আমি জানি না, আবহাওয়াও জানি না; তাছাড়া এখানকার গ্রীষ্মকালও এত ছোটো যে আমি তো ভেবেই পাই না কী ক’রে সময়মতো সব কিছু পেকে উঠতে পারে।

‘কিন্তু আসলে তো আর শাকসজ্জি লাগাবার জন্য এতো দূর পথ যাচ্ছি না আমরা। না, বরং সোজাসজ্জি সমস্যাগুলির মুখোমুখি হওয়া ভালো। আমাদের উদ্দেশ্য একেবারে অন্য রকম। আমরা যাচ্ছি হালফাশন অনুসারে ঝাঁচার চেষ্টা করতে, বড়ো ক্রয়গেরের সম্পত্তি, তার কারখানা, যন্ত্রপাতি সব-কিছুর অপব্যয়ের অংশীদার হ’তে চলেছি আমরা। তার সম্পত্তির পুনরুদ্ধার আমাদের লক্ষ্য নয়, কিন্তু, অন্য সকলের মতোই, ঠিক তেমনি অবিশ্বাস্য বিশৃঙ্খলভাবে, ঐ সম্পত্তি উড়িয়ে দেবো আমরা, সাহায্য করবো সেই সমবেত অপব্যয়ে, যাতে হাজার-হাজার টাকার বিনিময়ে দু-চার পয়সায় দিন গুজরান হয়। উপহার পেলেও আগেকার শর্তে এ-সম্পত্তি ফিরিয়ে নেবো তা নয়, এমনও নয় আমার সমান ওজনের সোনা পেলেও নেবো না। তা হবে উলঙ্গ হ’য়ে পালানো কি বর্ণমালা ভুলে যাবার চেষ্টা করার মতো নিবৃদ্ধিতা। না, সম্পত্তি রক্ষার যুগ রাশিয়া থেকে উধাও হ’য়ে গেছে, আর তাছাড়া, আমরা গ্রোমেকোরা সম্পত্তি বাড়াবার আগ্রহ এক পুরুষ আগেই হারিয়ে ফেলেছি।’

২৭

গাড়ির ভেতর এত গুমোট আর ঠাণ্ডাঠাণ্ডি যে ঘুমোনো চলে না। ইউরির বালিস ঘামে ভিজ গেলো। যাতে অন্যদের ঘুম না ভাঙে, সেইজন্য সাবধানে সে তার বাল্ক থেকে নেমে এসে কামরার দরজা টেনে খুললে।

চটচটে ভিজ তাপ এসে আঘাত করলো তার মুখে, যেন সে ভাঁড়ারে চলতে-চলতে মাকড়শার জালে আটকে গেছে। ‘কুয়াশা,’ মনে মনে ভাবলো সে, ‘কাল তাহ’লে আগুনের মতো গরম পড়বে। সেইজন্যেই এখন একটুও হাওয়া নেই, এমন দম-আটকানো গুমোট হ’য়ে আছে।’

স্টেশনটা বেশ বড়ো, বোধহয় কোনো জংশন। কুয়াশা, শুষ্কতা—তার ওপর একটা শূন্যতার ভাব, কেমন অবহেলার অনুভূতি যেন ট্রেনটা পথ হারিয়েছে, সবাই ভুলে গেছে ট্রেনটাকে। নিশ্চয়ই ট্রেনটা স্টেশন-ইয়ার্ডের পেছনে দাঁড়িয়ে আছে, এতো পেছনে যে অপর প্রান্তে যেখানে লাইনগুলোর কাটাকুটি শেষ হয়েছে, সেখানে পৃথিবী হঠাৎ হাঁ ক’রে আস্ত স্টেশনটাকেই যদি গিলে ফ্যালে, তাহ’লেও ট্রেনের কোনো যাত্রী কিছুই জানতে পাবে না।

দূর থেকে ভেসে-আসা স্কীণ দুটি শব্দ শোনা গেলো।

পেছনে, যেখান থেকে আগুয়াজ এলো, সেখানে ছলছল ছন্দে শব্দ হচ্ছে, যেন কেউ কাপড়

নিংড়োচ্ছে অনেককণ ধ'রে, বা কোনো ভারি ভিজে নিশেনকে ঝুঁটির গায়ে আছড়ে মারছে হাওয়া।

সামনে থেকে একটানা একটা গমগমে আওয়াজ আসছে দেখে ইউরি, যুদ্ধের অভিজ্ঞতা ছিলো ব'লে, কান খাড়া করলে। শান্ত হ'য়ে সেই প্রতিধ্বনিময়, নিচু চাপা আওয়াজ শুনে গোলন্দাজ-বাহিনী ব'লেই সিদ্ধান্ত করলে।

'যা ভেবেছি, একেবারে ফ্রন্টে এসে পড়েছি আমরা,' গাড়ি থেকে নামতে-নামতে আপন মনেই সে ঘাড় নাড়লো। তারপর কয়েক পা এগিয়ে গেলো সামনের দিকে। দুটি বগির পরেই ট্রেন শেষ হ'য়ে গেছে; বাকি বগিগুলোকে খুলে নিয়ে এগিয়ে চ'লে গেছে।

'তাই ওরা এতো হৈ চৈ করছিলো কাল। নিশ্চয়ই বুঝতে পেরেছিলো এখানে আসা মাত্রই সোজা ফ্রন্টে নিয়ে যাওয়া হবে তাদের।'

সামনের বগির দিকে এগিয়ে গেলো সে; উদ্দেশ্য, রেললাইন পেরিয়ে গিয়ে স্টেশনটাকে ভালো ক'রে দেখবে, কিন্তু রাইফেল হাতে এক সাত্ত্বী তার গতিরোধ ক'রে দাঁড়ালো।

'এদিকে কোথায় যাচ্ছে? পাশ আছে?' নরম গলায় সে জিজ্ঞেস করলে।

'এটা কোন স্টেশন?'

'স্টেশন যাই হোক, তুমি কে?'

'আমি মস্তোর একজন ডাক্তার। সপরিবারে এই ট্রেনের যাত্রী। এই আমার সব কাগজপত্র।'

'ও-সব কাগজ ইয়েতে ঢুকিয়ে রাখো। আমি এতই বোকা যে অন্ধকারে ওগুলো পড়বার চেষ্টা করবো? কুয়াশা—সেখতে পাচ্ছে না? তুমি কী-সকম ডাক্তার, সেটা বোঝবার জন্য কাগজ-কাগজ লাগে না। কত ডাক্তারকে দেখলুম আমাদের তাক ক'রে ঐ বারো-ইঞ্চি বন্দুকগুলো ঝুঁড়তে। ইচ্ছে করলেই তোমার মাথা ভেঙে ফেলতে পারি, কিন্তু তার বিশেষ তাড়া নেই। বরং আস্ত থকতে-থকতে গাড়িতে ফিরে যাও, সেটাই ভালো হবে।'

'আমাকে নিশ্চয়ই আর কোনো লোক ব'লে ভুল করেছে,' ইউরি ভাবলো। তবে তর্ক ক'রে যে কোনো লাভ নেই, এটা স্পষ্ট। বরং একটা-কিছু ঘ'টে থাকার আগেই তার পরামর্শ শোনা ভালো। ইউরি ফিরে চললো।

তার পেছনে গোলাবাক্সের আওয়াজ থেমে গেলো। পেছন হ'লো পূর্বদিকে, যেখানে রাশি-রাশি কুয়াশার ভেতর সূর্য উঠেছে, মানভাবে উকি দিচ্ছে ভেসে-চলা ছায়ার মধ্য দিয়ে, ঠিক যেন স্নানের জায়গায় বাপে ঢাকা-পড়া কোনো উল্লস মানুষ^১।

ট্রেনের পুরো দৈর্ঘ্য হেঁটে এলো ইউরি, শেষ বগিটাকে পেরিয়ে গেলো। নরম বালির মধ্যে ক্রমশই তার পা ব'সে যাচ্ছে।

জলের সেই একটানা ছলছলানি ক্রমশ কাছে এগিয়ে এলো। জমি ঢালু হ'য়ে যাচ্ছে আস্তে-আস্তে। সামনের অস্পষ্ট ছায়াগুলি কিসের হ'তে পারে, থেমে দাঁড়িয়ে সেটা সে বুঝে নেবার চেষ্টা করলে। কুয়াশার জন্য সেই ছায়াগুলোকে অস্বাভাবিকরকম বড়ো দেখাচ্ছিলো। আর-এক পা এগোবার পরেই তীরে-আনা নীকোগুলির গলুই অন্ধকার ঝুঁড়ে বেরিয়ে এলো। চওড়া একট নদী তার সামনে, ছোটো-ছোটো অলস ঢেউ ছলছল ক'রে আছড়ে পড়ছে তীরের জেলে-নীকো আর তক্তার ওপর।

নদীর ধার থেকে একটি ছায়ামূর্তি উঠে এলো।

'এ-ভাবে যোরাঘুরি করার অনুমতি কে দিয়েছে তোমাকে?' আরেকটি রাইফেলধারী সাত্ত্বী তাকে জিজ্ঞেস করলো।

ইউরি ঠিক ক'রে রেখেছিলো আর কোনো প্রশ্ন জিজ্ঞেস করবে না, তবু তার মুখ দিয়ে বেরিয়ে গেলো, 'এটা কোন নদী?'

উত্তরে ঝাঁপিতে ঝুঁ দেবার উদ্যোগ করলো সাত্ত্বীটি, কিন্তু প্রথম সাত্ত্বীর জন্য সেই ঝাটুনিটা তার বঁচে গেলো। ঝাঁপি বাজিয়ে তাকেই সে ডাকতে চাচ্ছিলো, কিন্তু স্পষ্টই বোঝা গেলো প্রথম সাত্ত্বীটি এতোক্ষণ নিঃশব্দে ইউরিকে অনুসরণ করছিলো, এবার সরাসরি তার সহকর্মীর সঙ্গে যোগ দিলে। দাঁড়িয়ে-দাঁড়িয়ে কথা বলতে লাগলো দু'জনে।

'তাতে আর কোনো সন্দেহই নেই। দেখেই ব'লে দেওয়া যায় কোন ডালের পাখি। "এটা কোন স্টেশন?" "নদীর নাম কী?" চোখে ধুলো দেবার মতলব! তুমি কী বলো? সোজা জেটিতে নিয়ে যাবো, না প্রথমে ট্রেনে?'

'আমি বলি কী, ট্রেনেই নিয়ে যাওয়া যাক। কর্তা কী বলেন, দেখা যাক। তোমার কাগজপত্র?' ইউরির দিকে গর্জন ক'রে উঠলো লোকটা। কাগজের তাড়াটা একেবারে থাবা দিয়ে ছিনিয়ে নিলো সে, তারপর অন্য কাকে ডেকে বললো, 'চোখে রেখে লোকটাকে,' ব'লে প্রথম সাত্ত্বীর সঙ্গে স্টেশনমুখে পা চালালো।

স্পষ্টই বোঝা গেলো, তৃতীয় লোকটা—যাকে ইউরি এতোক্ষণ খেয়াল করেনি—সে একজন জেলে। এতোক্ষণ সে বালির ওপর শুয়েছিলো, এবার ঘোং-ঘোং আওয়াজ ক'রে আড়মোড়া ভাঙলো, তারপর উঠে ব'সে ইউরির অবস্থা সম্পর্কে আলোকপাত করতে শুরু ক'রে দিলো।

'তোমাকে যে কত্তার কাছে নিয়ে যাচ্ছে, এটাই তোমার ঢের বরাত। এ বরং তোমার মোক্ষলাভ হ'লো। কিন্তু এদের দোষ দেওয়া যায় না। এরা তাদের কাজ করছে মাত্র। জনগণ আজকাল ওপরে উঠে এসেছে, জানো তো। হয়তো শেষ পর্যন্ত এতেই ভালো হবে, কিন্তু এখন সপক্ষে বলার কিছুই নেই। একটা ভুল করেছে এরা। বিশেষ একটি লোকের জন্যে এরা হম্মে হ'য়ে আছে, কেবলই তাকে খুঁজছে। তোমাকে তারা সেই লোক ব'লে ভেবেছে। তারা ভেবেছে, এই সেই লোক, এই লোকটাই শ্রমিক-রাষ্ট্রের শত্রু, এবার আমরা তাকে বাগে পেয়েছি। একটা ভুল আর কি। যদি কিছু ঘটে তো শুধু কত্তার সঙ্গে দেখা করবার জেদ কোরো। ওরা দু'জনে যেন নিজেদের মর্জিমতোই তোমার গতি না করে। সবচেয়ে মুশ্কিল এই যে লোকগুলো রাজনীতি-সচেতন; ভয়ের কথা সেটা—তা ঈশ্বর যদি দয়া করেন। তোমাকে ছেড়ে দেবার কথা ভাববেই না তারা। কাজেই তারা যদি বলে, "চলো," কক্ষনো তাদের সঙ্গে যেয়ো না। বোলো যে তুমি কত্তার সঙ্গে দেখা করতে চাও।'

জেলেটির কাছ থেকে ইউরি জানতে পারলো যে এইটেই হ'লো সেই বিখ্যাত জলপথ, রিনভা আর নদীর ধারের স্টেশন থেকে যেকখনে যাওয়া যায় সেটা রাজভিলইয়ে, ইউরিয়্যাটিনের শিল্পপ্রধান শহরতলি। আরো জানতে পারলে যে ইউরিয়্যাটিন—যা আরো কয়েক মাইল উজানে অবস্থিত ব'লে মনে হচ্ছে—সেটা এখন আবার শাদাদের হাত থেকে কেড়ে নেওয়া হয়েছে। এবং এই রাজভিলইয়েতে নাকি নানারকম গোলযোগ হ'য়ে গিয়েছিলো, কিন্তু তাও এখন মোটামুটি আয়ত্তে আনা হয়েছে, আর চারদিককার এই বিপুল নিস্তব্ধতার কারণ হ'লো এই যে স্টেশন এলাকা থেকে সাধারণ নাগরিকদের সরিয়ে ফেলে কড়া পাহারার ব্যবস্থা করা হয়েছে। সবশেষে সে এও জানতে পারলো যে স্টেশনের কতগুলো ট্রেনের বগিকে সৈন্যবাহিনীর প্রধান আন্তানা হিসেবে ব্যবহার করা হচ্ছে আর তাদের মধ্যে একটা বিশেষ ট্রেন হলো আর্মি-কমিসার স্টেলনিকভের, সাত্ত্বী দু'জন গেছে তারই কাছে খবর দিতে।

সাত্ত্বীরা যদিও প্রস্থান করেছিলো, সেদিক থেকে তৃতীয় আর-একজন সাত্ত্বী এসে এবার হাজির হ'লো। সে যে আগের দু'জনের একজনও নয় এটা কেবল বোঝা গেলো তখন, যখন

সে চলার সময় তার রাইফেলটাকে মাটিতে হিচড়ে নিয়ে আসতে লাগলো, কিংবা যখন তার ওপর ভর দিয়ে চলতে শুরু করলো, যেন সে মাতাল হ'য়ে রাইফেলে ভর দিয়েই পথ ক'রে চলছে। এই সাস্ত্রীটি এবার ইউরিকে নিয়ে গেলো কমিসারের কাছে।

২৮

জোড়া বগির একটার মধ্য থেকে হাসি আর চলাফেরার শব্দ আসছিলো। সাস্ত্রীকে সংকেতবাক্য ব'লে সেই কামরাতেই ইউরিকে নিয়ে গেলো তার পাহারাদার, আর যেই তারা ঢুকলো, অমনি সব সাড়াশব্দ থেমে গেলো।

সকু একটা পথ দিয়ে মাঝখানের একটা বড়ো কামরায় ইউরিকে নিয়ে এলো সাস্ত্রীটি। পরিচ্ছন্ন ও আরামপ্রদ সেই ঘরটার ভেতর ফিটফাট পোশাক-পরা লোকেরা নিঃশব্দে কাজ ক'রে যাচ্ছিলো। স্টেলনিকভের শিক্ষা ও রুচি সম্বন্ধে ইউরি একটি অন্য রকম ধারণা ক'রেছিলো, যে-স্টেলনিকভ পাটির সদস্য না হ'য়েও সৈন্যবিভাগের একজন বড়ো কর্তা, একই সঙ্গে সেই অঞ্চলের গর্ব ও বিভীষিকা।

কিন্তু তার ক্রিয়াকর্মের আসল কেন্দ্র যে অন্যত্র, হেড-কোয়ার্টারের কর্মচারীদের কাছাকাছি এবং সশস্ত্র আক্রমণের মধ্যে, তাতে কোনোই সন্দেহ নেই। এটা নিশ্চয়ই তার ব্যক্তিগত ঘর, নিজস্ব দপ্তর ও ঘুমোবার জায়গা।

তাই এখানে এমন নিস্তব্ধতা, অনেকটা যেন জলীয় চিকিৎসার হাসপাতালে শোলার মেঝেতে নরম চটি-পরা পরিচারকদের মতো নিঃশব্দ।

আপিশটা আসলে পুরোনো একটা ডাইনিং-ক্লাব, মেঝেয় গালচে পাতা, কয়েকটা ডেস্কও আছে।

‘এক মিনিট,’ বললে এক ছোকরা অফিসার, ঠিক দরজার ধারেই বসেছে সে। অন্যমনস্কভাবে মাথা নেড়ে সে পাহারাদারকে বিদায় দিলে; মেঝেতে আঁটা ধাতুর পাতের ওপর রাইফেলের ঝুঁদোকে হিচড়ে নিয়ে চললো লোকটা। তারপরে কারো পক্ষেই ইউরির অস্তিত্ব ভুলে যাবার কোনো বাধা থাকলো না, তার দিকে আর ফিরেও তাকালো না কেউ।

দরজার কাছে যেখানে সে দাঁড়িয়েছিলো, সেখান থেকে ইউরি দেখতে পাচ্ছিলো যে ঘরের একেবারে শেষ প্রান্তের একটি ডেস্কে তার পাসপোর্ট ইত্যাদি প'ড়ে আছে। যে-ভদ্রলোক ডেস্কটাকে দখল ক'রে বসেছিলেন, অন্য সবার চাইতেই বয়সে বড়ো দেখালে তাঁকে, তাঁর ভাবভঙ্গির মধ্যে এমন সেকেলে একটা-কিছু ছিলো যার জন্য তাঁকে সেকেলে একজন কর্নেল ব'লে মনে হচ্ছিলো। সেনাবাহিনীর একজন পরিসংখ্যানবিদ তিনি। বিড়বিড় ক'রে আপন মনে কথা বলতে-বলতে নানারকম আকর-গ্রন্থ ঘাঁটছিলেন তিনি, নানা এলাকার মানচিত্র দেখছিলেন ভালো ক'রে, খুঁটিয়ে-খুঁটিয়ে, মিলিয়ে রাখছিলেন, আর মাঝে-মাঝে কাটাকুটি ক'রে কী সমস্ত আঠা দিয়ে লাগিয়ে নিচ্ছিলেন। ঘরের প্রত্যেকটা জানলার ওপর চোখ বুলিয়ে নিয়ে তিনি ঘোষণা করলেন, ‘গরম পড়বে নির্ধাৎ,’ যেন এই সমস্ত কাগজপত্র ঘাঁটবার পর তিনি বাধ্য হয়েছেন এই সিদ্ধান্তে পৌঁছতে।

ছিড়ে-যাওয়া তার জোড়া দেবার জন্য সেনাবাহিনীর একজন ইলেকট্রিক মিস্ত্রি মেঝেয় হামাগুড়ি দিচ্ছিলো। সে যখন দরজার ধারে ডেস্কটার কাছে এসেছে, তাকে জায়গা দেবার জন্য উঠে দাঁড়ালো ছোকরা অফিসারটি। পাশের টেবিলে আর্মির চামড়ার কোট গায়ে এক মেয়ে-টাইপিস্ট টাইপরাইটার নিয়ে লড়াই করছে; যন্ত্রটি বিস্তীর্ণকম বিগড়ে গেছে। ছোকরা অফিসারটি টাইপিস্ট মেয়েটির কাছে গিয়ে দাঁড়ালো, ঝুঁকি প'ড়ে দেখতে লাগলো দুখটনার

কারণ কী হ'তে পারে। এদিকে ইলেকট্রিক-মিস্ত্রিটি মেয়েটির ডেস্কের তলায় হামাগুড়ি দিয়ে ঢুকে নিচে থেকে পরীক্ষা করতে লাগলো। সেকেলে কর্নেল উঠে দাঁড়িয়ে তাদের সঙ্গে এসে যোগ দিলেন, চারজনই ব্যস্ত হয়ে পড়লেন টাইপরাইটার নিয়ে।

এ-সব দেখে ইউরি একটু স্বস্তি পেলো। তার কপালে কী আছে, তা তার চেয়ে তারাই ভালো জানে; তারা যদি মনে করতো যে লোকটা মরতে বসেছে, তাহ'লে তার সামনেই এ-রকম তুচ্ছ একটা ব্যাপার নিয়ে তারা মাথা ঘামাতো না, বা তাকে এতটা অবহেলা করতো না।

'কিন্তু তবু, কে জানে?' মনে-মনে ভাবলো সে, 'এতোটা অবহেলা করছে কেন আমাকে, যেন আমার অস্তিত্বই নেই? রোজই তো বন্দুক চলছে আর মানুষ মরছে, আর এরা কিনা ঠাণ্ডা গলায় গরম পড়ার কথা বলছে—যুদ্ধের নয়, আবহাওয়ার গরম। হয়তো এরা এতো বেশি দেখেছে যে একবিন্দু অনুভূতি আর অবশিষ্ট নেই।'

কোনো এক-দিকে তাকাতে হবে ব'লেই ঘরের উণ্টো দিকের জানলা দিয়ে বাইরে তাকালো ইউরি।

২৯

রেল-লাইনের এক প্রান্ত, টিলার ওপরকার স্টেশন, আর রাজ্‌ভিলইয়ের শহরতলি তার চোখে পড়লো।

প্ল্যাটফর্ম থেকে স্টেশন-ঘর পর্যন্ত তিন ধাপ রং-না-করা কাঠের সিঁড়ি আছে।

লাইনের এক প্রান্তে এঞ্জিনের কবরখানা। কয়লাঘর নেই, চোঙের চেহারা ইটু-ঢাকা জুতোর চূড়ো বা মদের গেলাশের মতো, এমন কতগুলো এঞ্জিন গায়ে-গা ঠেকিয়ে পুরোনো লোহালকড়ের মধ্যে দাঁড়িয়ে আছে।

নিচের এই এঞ্জিনের কবরখানা ওপরে ঐ মানুষদের গোরস্থান, রেল-লাইনের বাঁকাচোরা দুমড়ে-খাওয়া লোহা, জংধরা লোহার ছাত, শহরতলির দোকানপাটের বিবর্ণ সাইনবোর্ড—সব মিলিয়ে ছবিটা হ'লো জীর্ণতার, অবহেলার, যার ওপরে ভোরবেলার তাপে শাদা আকাশ বলসে যাচ্ছে।

মস্তোতে ব'সে ইউরি ভুলেই গিয়েছিলো অন্যান্য শহরে এখনো কত দোকানে সাইনবোর্ড ঝুলছে, আর সামনের দেয়ালের কতখানি অংশ তাতে ঢাকা পড়ে। এখন যে সাইনবোর্ড সে দেখতে পাচ্ছে, তার কয়েকটা এতো বড়ো যে সে ওখানে দাঁড়িয়েই পরিষ্কার পড়তে পারছে। জীর্ণ একতলা বাড়িগুলোর গড়ানো জানলার নিচে এতোদূর ঝুলে পড়েছে ওগুলো যে বাড়িগুলো প্রায় ঢাকা পড়ে গেছে, বাবার উচু টুপির তলায় গ্রামের ছেলের মুখের মতো।

পশ্চিম দিকের কুয়াশা স'রে গেছে ইতিমধ্যে; পূর্ব দিকে যেটুকু ছিলো তাও এবার নাট্যমঞ্চের যবনিকার মতো আড়মোড় ভেঙে হলে-দুলে স'রে গেলে।

আর ওদিকে, রাজ্‌ভিলইয়ের টিলার ওপর আরো দু-এক মাইল দূরে, কোনো প্রাদেশিক রাজধানীর মতো একটা বড়ো শহর ঝাপসা দেখা গেলো, রোদে যার রং জ্বলজ্বলে আর দূরত্ব যার রেখাকে সরল ক'রে এনেছে। চূড়োর গায়ে লেপ্টে বসেছে যেন শহরটা, তার সারি-সারি বাড়ি আর রাস্তা নিয়ে, মাঝখান থেকে মাথা তুলেছে বড়ো একটা গির্জার গম্বুজ, শস্তা রঙিন ছবিতে মাউন্ট আথস কি মরুভূমির কোনো মঠের মতো।

ইউরি উত্তেজিত হ'য়ে ভাবতে শুরু করলো, 'ইউরিয়ান, যার কথা প্রায়ই আনা আর নার্স অস্টিপভার কাছে শুনেছি। কী আশ্চর্য! একে যে এমনভাবে দেখতে হবে কে ভাবতে পেরেছিলো!'

ঠিক সেই মুহূর্তে সেনাবিভাগের মনোযোগ টাইপরাইটার থেকে সরে গিয়ে অন্য একটা জানলায় গিয়ে পড়লো। দেখে ইউরিও ফিরে তাকালো।

কড়া পাহারায় একদল বন্দীকে স্টেশনের সিঁড়ির দিকে নিয়ে যাওয়া হচ্ছে। তাদের মধ্যে স্কুলের পোশাক-পরা একটি বালকও আছে, রক্ত করছে তার মাথা থেকে। প্রাথমিক চিকিৎসা লাভের সুযোগ অবশ্য ঘটেছে তার, কিন্তু ব্যাণ্ডেজের ভেতর থেকে রক্তের একটি ধারা টুইয়ে পড়ছে ব'লে সে বারে-বারে তার কালো ঘামে-ভরা মুখে হাত বুলিয়ে মুছে ফেলার চেষ্টা করছে। শোভাযাত্রার শেষভাগে লাল ফৌজের দুটি লোকের মাঝখান দিয়ে হাঁটতে-হাঁটতে সে যে শুধু তার অটল ভঙ্গি, সুন্দর চেহারা, আর এতো অল্প বয়সেই বিপ্লবে নামার জন্য দৃষ্টি আকর্ষণ করেছে তা নয়, তার এবং তার দুই সঙ্গীর অঙ্গভঙ্গিগুলো অদ্ভুতরকম অসংগত হচ্ছিলো ব'লেই চোখে পড়ছিলো সে। তাদের যা করা উচিত, ঠিক তার উটেটাটা করছিলো তারা।

ছেলেটির মাথায় এখনো স্কুলের টুপি রয়েছে। তার ব্যাণ্ডেজ-করা মাথা থেকে এটা বারে বারে খসে পড়ছিলো, কিন্তু সেটাকে খুলে হাতে না-নিয়ে সে তার মাথার ক্ষত আর ব্যাণ্ডেজটাকে উদ্ভাস্ত ক'রে টুপিটা ঠিকভাবে বসিয়ে নিচ্ছিলো, আর এই কাজে তার দুই সঙ্গী তৎপর হয়ে সাহায্য করছিলো তাকে।

কাণ্ডজ্ঞান-বহির্ভূত এই অসংগত আচরণের একটা প্রতীকী অর্থ যেন দেখতে পেলো ইউরি। তার ইচ্ছে করলো ছুটে গিয়ে ছেলেটিকে সেই কথাগুলো বলে যা তার ভেতরে টগবগ করছিলো তখন। মুক্তি যে আদব-কায়দা ও উর্দির আনুগত্যের মধ্যে নিহিত নেই, বরং ও-সব ছুঁড়ে ফেলে দিলেই যে মুক্তি আসতে পারে, এ-কথা তার ইচ্ছে করলো চোঁচিয়ে বলে সবাইকে—ছেলেটি আর রেলগাড়ির ভেতরকার লোকজনদের।

সে ঘুরে দাঁড়ালো; দ্রুত ও লম্বা পা ফেলে ঘরের মধ্যখানে এসে দাঁড়ালো স্ট্রেলনিকভ।

ভাস্কর হিসেবে হাজার-হাজার লোকের সঙ্গে তার পরিচয় হয়েছে। অথচ এটা কী ক'রে সম্ভব যে এর আগে সে একদিনও এ-রকম সোচ্চার ব্যক্তিত্বের মুখোমুখি আসেনি? কেন এর আগে তারা মুখোমুখি হয়নি পরস্পরের? কী ক'রে এটা ঘটলো যে, আগে কখনো তাদের পাথে-ঘাটে দেখা হয়নি?

ঠিক কোনো কারণ না থাকলেও এটা তক্ষুনি স্পষ্ট বোঝা গেলো যে, এই লোকটি ইচ্ছাশক্তির এক পূর্ণ বিকাশ। তার ব্যক্তিত্ব স্বয়ংসম্পূর্ণ। তার সব-কিছুই এটা চট ক'রে বুঝিয়ে দেয় যে সে হচ্ছে তার ধরনের মধ্যে আদর্শ: তার সুবিন্যস্ত সুন্দর মাথা, আগ্রহী পদক্ষেপ, লম্বা পা, হাঁট-ঢাকা জুতো—যা কাদা-মাথা হ'তে পারতো, কিন্তু এখন পরিষ্কার দেখাচ্ছে—দূসর সার্জের উর্দি—বহু আগে ইত্রি-করা হ'লেও যাকে দেখাচ্ছে সেরা জাতের লিনেনের মতো এবং সদ্য-পাট করা—সব কিছু মিলিয়ে সে উজ্জ্বল ব্যক্তিত্বের এক নিদর্শন।

এই রকম হ'লো তার ব্যক্তিত্বের দীপ্তি, যা তাকে দিয়েছে নির্বিকার স্বাচ্ছন্দ্য, এবং পৃথিবীর যে-কোনো সম্ভাব্য পরিস্থিতিতে সহজ হবার ক্ষমতা।

নিঃসন্দেহে স্মরণীয় ক্ষমতার অধিকারী সে, ইউরি মনে-মনে ভাবলো, কিন্তু তাকে, মৌলিকতার ক্ষমতা বলা চলে না। তার প্রত্যেকটি ভঙ্গির মধ্য থেকে প্রতিভা ফুটে বেরোচ্ছে, কিন্তু তা আসলে হয়তো অনুকরণের মেধা।

তখনকার দিনে সকলে ইতিহাসের কোনো নায়কের প্রকরণে, কিংবা ফ্রন্টে, রাস্তায়-ঘাটে গেরিলা যুদ্ধে খ্যাত হ'য়ে যারা লোকের কল্পনাকে উদ্দীপ্ত করেছেন, শ্রদ্ধাভাজন কোনো ব্যক্তি অথবা কৃত্তী কোনো কমরেডের মতো, বা নিছকই একে অন্যকে অনুকরণ ক'রে, নিজেকে অন্য-কারো আদর্শে গড়ে তুলতো।

ইউরির উপস্থিতিতে বিস্মিত বা উদ্ভাস্ত বোধ করলেও স্ট্রেলনিকভ তা নম্রভাবে গোপন

ক'রে রাখলো। তাকে কর্মচারীদেরই একজন ব'লে ধ'রে নিয়ে সে সকলকে উদ্দেশ্য ক'রে কথা বলতে শুরু ক'রে দিলো।

'অভিনন্দন! আমরা তাদের হঠিয়ে দিয়েছি। যুদ্ধের গুরুত্ব ক'মে গিয়ে একে ছেলে-খেলার মতো মনে হচ্ছে, কেননা আমাদের মতো তারাও তো ক্রশ—কেবল নানারকম মূর্থতায় ঠাসা। ওরা কিছুতেই ছাড়বে না, তাই মেরে-ধ'রে আমাদেরই তাড়াতে হচ্ছে। ওদের যিনি কমাণ্ডার, তিনি আমার একজন বন্ধু। আমার চেয়েও প্রলেটারিয়েন ঘরে তাঁর জন্ম। একই বাড়িতে বড়ো হয়েছি আমরা। আমার জন্যে অনেক করেছেন তিনি, আমি গভীরভাবে ঋণী তাঁর কাছে। আর এখন কিনা আমি এই ব্যাপার নিয়ে আনন্দ-উচ্ছ্বাস করছি যে তাদের আমি নদী পেরিয়ে আরো দূরে তাড়িয়ে নিয়ে গেছি।—গুরিয়ান, তাড়াতাড়ি তার সারিয়ে ফ্যালো, আমাদের টেলিফোনের প্রয়োজন আছে, শুধু লোক পাঠিয়ে বা টেলিগ্রাফ ক'রেই কুলিয়ে নিতে পারবো না।—ইশ, কী ভয়ানক গরম পড়েছে, না! অবশ্য তাহ'লেও ঘটনাক্রমে ঘুমিয়ে নিয়েছি আমি! ও, হ্যাঁ!...' ইউরির দিকে ঘুরে দাঁড়ালো সে, যেন এক্ষুনি তার মনে পড়লো যে এই লোকটির সঙ্গে জড়িয়ে আরো একটি অকাজ প'ড়ে আছে।

'এই লোকটি?' তীক্ষ্ণ চোখে তার দিকে তাকিয়ে স্টেলনিকভ ভাবলো: 'কী বাজে! মোটেই তার মতো দেখতে নয়। গর্দভ কোথাকার!' হেসে উঠলো সে, ইউরিকে বললো, 'কমরেড, ক্ষমা করবেন। গাধাগুলো আপনাকে আরেকজন ব'লে ভেবেছিলো, তাই এই ভুল। আপনি যেতে পারেন। এই কমরেডের কাগজপত্রগুলি কোথায়?—হ্যাঁ, এই যে আপনার কাগজ। একবার চোখ বুলোতে পারি কি?...জিভাগো...জিভাগো...ডাক্তার জিভাগো...মস্কো!...যাই হোক, এক মিনিটের জন্য আমার ঘরে আসবেন? এটা হ'লো সেক্রেটারিয়েট, পাশের কামরাটা আমার। হ্যাঁ, এই পথে; বেশি দেরি হবে না এক্ষুনি ছেড়ে দেবো আপনাকে।'

৩০

স্টেলনিকভ আসলে কে?

সে যে এতো উঁচু পদ লাভ ক'রে বসেছে, এটা নিঃসন্দেহে উল্লেখযোগ্য, কারণ সে পাটির সভ্য নয়, এবং যদিও মস্কোতে তার জন্ম হয়েছিলো, কেউই তাকে চিনতো না; বিশ্ববিদ্যালয় থেকে বেরিয়ে মাস্টারি নিয়ে সে সোজা চ'লে গিয়েছিলো মফস্বল শহরে, যুদ্ধের সময় ধরা পড়েছিলো, আর নিখোঁজ হবার দরুন সবাই ভেবেছিলো সে নিহত হয়েছে। অল্প দিন হ'লো সে জার্মানির জেলখানা থেকে ফিরেছে। তাকে লোকসমক্ষে আনলো টিভেরজিন, সেই তার হ'য়ে জামিন দাঁড়ালো, কেননা এই অগ্রসর রাজনীতি-চেতনাসম্পন্ন রেলকর্মচারীর ঘরেই ছেলেবেলায় সে থেকেছিলো। নিয়োগকর্তাদের সে রীতিমতো মুগ্ধ ক'রে ফেললো: সেই আমলের বাগাড়ম্বর ও রাজনৈতিক চরমপন্থার সঙ্গে তার লাগাম-ছেঁড়া বিপ্লবী উচ্ছ্বাস খাপ খেয়ে গিয়েছিলো, আর তার আন্তরিকতা ও প্রবল গোঁড়ামি, যা কোনো ধার-করা বা উড়ে-এসে জুড়ে-বসা ব্যাপার নয়, তা ছিলো তার নিজস্ব, তা সে সচেতনভাবে নিজের মধ্যে গ'ড়ে তুলেছিলো, তা বিকাশ লাভ করেছিলো তার জীবনের নানা ঘটনাচক্রের মধ্য দিয়ে।

কতৃপক্ষের বিশ্বাস যে অপাত্রে ন্যস্ত হয়নি, তা সে অচিরেই প্রমাণ ক'রে দিচ্ছিল।

গত কয়েক মাসের মধ্যে সে যে-সব লড়াই করেছে, তার মধ্যে পড়ে লোয়ার-কেলমেসের অগ্রিকাণ্ড (যেখানে বরফের জন্য ইউরির ট্রেন আটকা পড়েছিলো), শস্যের ওপর কয় দেবে না ব'লে যে-সব গুবাসোভো চাষি সশস্ত্র বিদ্রোহ করেছিলো তাদের, এবং যে-চোদ্দ নম্বর পদাতিক বাহিনী রসদের কনভয় লুণ্ঠ করেছিলো তাদের অবদমন। টুর্কটুয়ি শহরে 'রাজিন'²

¹ স্টেলনিকভ বর্তমান 'ভিসেনা সেন্ট্রের' শওকের এক গণ-অভিযানের অধিনায়ক।

সৈন্যরা বিদ্রোহ ক'রে শাদাদের দলে যোগ দিয়েছিলো, এবং চিরকিন-উসের বিদ্রোহের দরুন একজন অনুগত কমান্ডার নিহত হয়েছিলেন; এই সব বিদ্রোহ দমন করার ব্যাপারেও হাত ছিলো তার।

সর্বত্রই সে একেবারে আচমকা গিয়ে ছৌ মেরেছিলো, আর সব অনুসন্ধান, বিচার, শাস্তির সিদ্ধান্ত ও তার প্রয়োগ, সব খুব দ্রুত, নির্বিকার এবং আশ্চর্য সুদৃঢ়ভাবে সম্পন্ন করেছিলো।

যে-সব এলাকায় দলত্যাগের হিড়িক পড়েছিলো, তাদের সে চটপট আয়ত্তে এনে রংকট বাহিনীকে নতুন ক'রে গড়ে তুলেছে, যার ফলে লাল ফৌজে নাম লেখাবার আপিশগুলিতে ভয়ানক কাজের চাপ পড়েছে।

অবশেষে, যখন উত্তর থেকে শাদাদের চাপ ক্রমশ বেড়ে চলেছে, এবং পরিস্থিতি মারাত্মক হ'য়ে উঠেছে, তখন স্টেলনিকভের হাতে নতুন দায়িত্ব অর্পণ করা হ'লো; সেনাবাহিনীর পরিচালনা থেকে শুরু ক'রে সমরনীতির পরিকল্পনা এবং তা কাজে ঝাটানো পর্যন্ত সব কাজের ভার তার একলার ওপর এসে পড়লো। এবং তার তৎপরতা ফলপ্রসূ হলো অচিরেই।

স্টেলনিকভ ('গোলন্দাজ') জানে যে জনরব তার নতুন নাম দিয়েছে রাজস্টেলনিকভ, যার মানে হ'লো 'জল্লাদ'। শাস্ত্যভাবে এই নাম সে গ্রহণ করেছে; কোনো কিছুতেই সে বিচলিত হয় না।

তার বাবা ছিলেন মজুর; ১৯০৫ সালের বিপ্লবে অংশ গ্রহণ ক'রে জেলে গিয়েছিলেন। সেই সময় সে নিজে বিপ্লবী ক্রিয়াকলাপে যোগ দেয়নি; প্রথমে তো, তার বয়স অল্প ছিলো ব'লে আর পরে এই কারণে যে বিশ্ববিদ্যালয়ে গরিব ঘরের ছেলেরা ধনীর দুলালদের চেয়ে শ্রমসাপেক্ষ উচ্চশিক্ষাকে বেশি মূল্য দিতো এবং বেশি খাটতো। অন্য ছাত্রদের উত্তেজনা তাকে একটুও বিচলিত করতে পারেনি। বিপুল পরিমাণ তথ্য সংগ্রহ করবার পর সে প্রথম কলাবিদ্যায় ডিগ্রি নিলে, তারপর বিজ্ঞান ও গণিতে শিক্ষিত ক'রে তুললো নিজেকে।

সেনাবাহিনী থেকে অব্যাহতি পেয়ে সে স্বৈচ্ছাসেবক হিসেবে নাম লিখিয়ে একেবারে যুদ্ধক্ষেত্রে চ'লে যায়, এবং বন্দী হয়; পরে যখন রাশিয়ার বিপ্লবের কথা শুনলো, ১৯১৭ সালে দেশে পালিয়ে এলো। স্বচ্ছ এবং সুশৃঙ্খলভাবে বিচার করবার অসাধারণ ক্ষমতা ছিলো তার, আর ছিলো সুবিচারবোধ ও উন্নত নৈতিক চরিত্র। উৎসাহী স্বভাব তার, তীক্ষ্ণ তার সম্মানবোধ।

কিন্তু বিজ্ঞান-সাধনায় নতুন আবিষ্কারের ক্ষেত্রে স্বজ্ঞা দিয়ে অনির্ণয়কে জানবার চেষ্টা তার ব্যর্থ হ'তো; ফাঁকা ভবিষ্যদ্বাণীর শূন্য সুবমাকে যা চুরমার ক'রে দেয় সেই সব অপ্রত্যাশিত আবিষ্কারের কথা ভাববার ক্ষমতা তার নেই।

অন্যের ভালো করবার জন্য তার মনোগত আদর্শ ছাড়াও প্রয়োজন ছিলো এমন এক নীতিগর্হিত হৃদয়ের, যা বিশেষের প্রতি আকর্ষণবশত সাধারণকে দেখতে পায় না, ক্ষুদ্র কাজের মহত্ব যার বৈশিষ্ট্য।

ছেলেবেলা থেকেই মহত্তম অতীন্দ্রিয় তার হৃদয় ভ'রে গিয়েছিলো, পৃথিবীকে এক বিশাল কর্মক্ষেত্র ব'লে ভেবেছিলো সে, যেখানে প্রত্যেকেই নিখুঁতভাবে নিয়ম মেনে সম্পূর্ণতার জন্য প্রতিদ্বন্দ্বিতা ক'রে চলেছে। যখন সে দেখতে পেলো তার এই ধারণা সত্য নয়, তখন সে, একবারও ভাবলে না যে পৃথিবী সম্পর্কে তার ধারণাটা হয়তো অতিরিক্ত সরলীকৃত। বরং তার অসম্ভাবকে সে লালন করলে ভেতরে-ভেতরে। এবং জীবন আর জীবনের বিকৃতিসাধক অশুভ শক্তিগুলিকে বিশ্লেষণ করার উচ্চাকাঙ্ক্ষা নিয়ে সে বিচারকের ভূমিকায় বসতে চাইলো, চাইলো জীবনের রক্ষক ও জীবনবৈরীর শাস্তিদাতা হ'য়ে উঠতে।

হতাশায় সব যখন তিস্ত হ'য়ে উঠেছে, তখন বিপ্লব এসে তার হাতে হাতিয়ার তুলে দিলে।

৩১

‘জিভাগো,’ নিজের কামরায় গিয়ে বসবার পর স্ট্রেলনিকভ আবার নামটা উচ্চারণ করলে, ‘জিভাগো...ব্যাবসা করেন বোধহয়। নয়তো ভদ্রলোকদের একজন....ও, ই্যা, এই তো লেখা আছে, মস্কোর ডাক্তার...ভারিকিনোতে যাচ্ছেন। এটা কিন্তু আশ্চর্য! মস্কো ছেড়ে ইঠাৎ এ-রকম অজ পাড়াগায় যাচ্ছেন?’

‘ঠিক সেইজন্যেই। একটু শান্তি, বিশ্রাম আর অস্বস্তিবাসের জন্য।’

‘বাঃ, বেশ রোমান্টিক তো! ভারিকিনো? এখানকার প্রায় সব জায়গাই আমি চিনি। ওটা হ’লো ক্র্যেগারের জমিদারি। তার সঙ্গে আপনার কোনো আত্মীয়তা নেই তো? আপনি তার উত্তরাধিকারী নন?’

‘ঠাট্টা করছেন কেন? “উত্তরাধিকারী” হওয়ার সঙ্গে এর কোনো সম্পর্ক নেই। যদিও এটা ঠিক যে আমার স্ত্রী...’

‘কাজেই, দেখলেন তো। কিন্তু আপনি যদি শাদাদের জন্য ব্যাকুলতা বোধ করেন, তাহ’লে আপনাকে কিন্তু হতাশ হ’তে হবে। গোটা জেলাটাই ঝেঁটিয়ে সাফ ক’রে ফেলেছি আমরা।’

‘আপনি কি এখনো ঠাট্টা করছেন আমাকে নিয়ে?’

‘আর তারপর, আপনি একজন ডাক্তার। সেনাবাহিনীর চিকিৎসা বিভাগের অফিসার। আর আমরা এখন লড়াই চালাচ্ছি। ঐ লড়াইটাই আমার আসল কাজ। আর আপনি একজন দলত্যাগী। সবুজরাও^১ বনে-জঙ্গলে আশ্রয় নিচ্ছে।—আপনার দলত্যাগ করার কারণ?’

‘দু’বার আহত হয়েছিলাম, তাই একেজো ব’লে বের ক’রে দেওয়া হয়েছে।’

‘এর পরেই নিশ্চয়ই আপনি শিক্ষা বা স্বাস্থ্য দপ্তরের শীলমোহর মারা একটি কাগজ বার ক’রে দেবেন, যাতে লেখা আছে আপনি একজন সোভিয়েট নাগরিক, কিংবা একজন “সহানুভূতিশীল” অথবা সম্পূর্ণ অনুগত। আপকালিপ্সের সময় মশাই এটা, শেষ বিচার^২ আসন্ন। আগুন-জ্বালা তলোয়ার হাতে দেবদূত নেমে আসবে, উঠে আসবে পাতাল থেকে পশুরা—তাদের দিন এটা—সহানুভূতিশীল বা অনুগত ডাক্তারদের নয়। তবু, যেহেতু আমি একবার বলেছি যে আপনি স্বাধীন, তাই আমার কথার খেলাপ করবো না, কিন্তু মনে রাখবেন এই আপনার প্রথম এবং শেষ সুযোগ। আবার আমাদের দেখা হবে ব’লে আমার মনে হচ্ছে, আর তখন কথাবার্তার ধরন হবে একেবারে অন্যরকম। সাবধান থাকবেন।’

এই যুদ্ধবোষণায় বা ভয়প্রদর্শনে ইউরি দ’মে গেলো না। বললে, ‘আমার বিষয়ে আপনি কী ভাবছেন, তা আমি জানি। আপনার দিক থেকে আপনার বিচার নির্ভুল। কিন্তু যে-বিষয়ে আপনি আমার সঙ্গে আলোচনা করতে চাচ্ছেন, ঠিক তা-ই নিয়ে সারাজীবন ধ’রে আমি আমার কাল্পনিক অভিযোক্তার সঙ্গে তর্ক ক’রে যাচ্ছি; এতোদিনেও যদি কোনো সিদ্ধান্তে না-পৌছতে পারতাম, তবে ব্যাপারটা অদ্ভুত হতো। কিন্তু মাত্র কয়েকটা কথায় তা আমি বোঝাতে পারবো না। কাজেই যদি আমি সত্যিই বন্দী না-হ’য়ে থাকি তো আমাকে যাবার অনুমতি দিন, আমার যুক্তিগুলো না-জেনেই যেতে দিন আমাকে। আর যদি বন্দী হ’য়ে থাকি তাহ’লে আমাকে নিয়ে কী করবেন সোঁটা আপনাকেই স্থির করতে হবে। কেননা আপনাকে দেবার মতো কোনো কৈফিয়ৎই আমার নেই।’

^১ এই শব্দটা ব্যবহার করা হ’তো সেই সব নৈরাজ্যবাদীদের সম্বন্ধে যারা লাল শালা উভয়দিকের সঙ্গেই যুদ্ধ করতো। এদের মধ্যে চাষীদের সংখ্যাই ছিলো সবচেয়ে বেশি।

^২ খ্রীষ্টীয় ধর্মতত্ত্বের apocalypsc ও last judgement-এর ধারণা স্ট্রেলনিকভ এখানে বিপ্লব বিষয়ে ব্যবহার করছে।—অনুবাদের টীকা।

টেলিফোন বেজে ওঠায় তাদের কথায় বাধা পড়লো। লাইন মেরামত করা হ'য়ে গেছে।
স্টেলনিকভ রিসিভার তুলে নিলে।

‘খনাবাদ, গুরিয়ান। কমরেড জিভাগোকে তাঁর ট্রেনে পৌঁছে দেবার জন্য একজন লোক পাঠিয়ে দাও। আর কোনো দুর্ঘটনা আমি চাই না। এবার রাজভিলইয়ে চেকা পরিবহণ আপিশে লাইনটা দাও।’

জিভাগো চ'লে গেলে স্টেলনিকভ রেল-স্টেশনে টেলিফোন করলো।

‘একটা স্কুলের ছেলেকে দেখলাম তাদের মধ্যে, ঐ যে ছেলেটা কেবল তার মাথার টুপি ঠিক করছে, হ্যাঁ, হ্যাঁ, যার মাথায় ব্যাণ্ডেজ বাঁধা। এটা রীতিমতো লজ্জার ব্যাপার।—হ্যাঁ হ্যাঁ, তাই ঠিক।—যদি দরকার হয় তো ডাক্তার দেখিয়ে নাও।—নিশ্চয়ই। তোমার চোখের মণির মতো দেখবে ওকে—আমার কাছে ব্যক্তিগতভাবে দায়ী থাকলে। হ্যাঁ, দরকার হ'লে তুমি র্যাশনও দিয়ে! হ্যাঁ, হ্যাঁ, ঠিক আছে। এবার কাজের কথা শোনো।... আমার কথা শেষ হয়নি, লাইন কেটে দিয়ে না। কী জ্বালা! আরেকজন কে জানি লাইনে আছে। গুরিয়ান! গুরিয়ান! ওরা লাইন কেটে দিয়েছে।’

তার কথা শেষ করার চেষ্টা সে খানিকক্ষণের জন্য স্থগিত রাখলো। ‘হয়তো আমার শ্রেপারেটির স্কুলের কোনো ছাত্র,’ সে মনে-মনে ভাবলো, ‘এখন বড়ো হ'য়ে আমাদের সঙ্গেই লড়াই করছে।’ এই ছেলেটি তার ছাত্র হ'তে পারে কিনা তা বোঝার জন্য কতো বছর হ'লো পড়ানো ছেড়ে দিয়েছে তার হিসেব করলো। তারপর জানলা দিয়ে তাকালো বাইরে, দিগন্তের দিকে যেখানে আকাশ নেমে এসেছে, সেদিকে তাকিয়ে ঝুঁজতে থাকলো ইউরিয়্যাটনের সেই এলাকাটা, যেখানে একদা সে সঙ্গীক বাস করেছিলো। যদি তার স্ত্রী ও কন্যা এখনো সেখানে থেকে থাকে? সে কি যেতে পারে না তাদের কাছে? এই মুহুর্তে গেলেও তো হয়। হয়, কিন্তু কী ক'রে যায়? তারা যে অন্য এক জীবনের অংশ। প্রথমে এই জীবন সে শেষ ক'রে নিক, এই নতুন জীবন, তারপর সে ফিরে যাবে সেই পুরনো জীবনে, যেটাতে বাধা পড়েছে হঠাৎ। কোনো একদিন তা-ই করবে সে। কোনো-একদিন, কিন্তু কবে? কোন দিন?

দ্বিতীয় খণ্ড

পরিলেখ ৮

আগমন

১

যে-ট্রেনটা জিভাগোদের নিয়ে এসেছিলো সেটা তখনো স্টেশনের সাইডিং-এ দাঁড়িয়ে আছে, অন্য অনেক ট্রেনের পেছনে ঢাকা প'ড়ে গেছে সেটি। কিন্তু সেদিন সকালে, এই প্রথমবার, তাদের মনে হ'লো যে মস্কোর সঙ্গে তাদের সম্বন্ধ ছিন্ন হ'য়ে গেছে।

এখন থেকে তারা এমন একটা অঞ্চলে এসে পড়লো, যা একেবারে আলাদা; নতুন এই জগৎ, ভিন্ন ধরনে প্রাদেশিক, তার ভারাকর্ষণ-কেন্দ্র তারই নিজের।

সঙ্গে-সঙ্গে স্পষ্ট বোঝা গেলো যে লোকেরা এখানে মস্কো বা পিটার্সবার্গের চেয়ে বেশি ঘনিষ্ঠভাবে বসবাস করে। যদিও স্টেশন-এলাকার চারদিক ঘিরে কড়া পাহারার ব্যবস্থা করা হয়েছে, এবং সরকারিভাবে জনসাধারণের সেখানে প্রবেশও নিষিদ্ধ, তবু লোকাল-ট্রেনের যাত্রীরা কোনো দুর্জয়ে উপায়ে 'পরিস্রুত' (আজকাল 'পরিস্রুত' বলা হয় না?) হ'য়ে সেখানে ঢুকে পড়েছে, ইতিমধ্যেই সবগুলি কামরায় ঠাসাঠাসি ক'রে উঠে পড়েছে তারা, দরজার সামনেও বিষম ভিড়, অনেকে আবার প্ল্যাটফর্মে দাঁড়িয়ে আছে, কেউ-কেউ বা হস্তদস্ত হ'য়ে ছুটোছুটি করছে।

সকলেই সকলকে চেনে, কেউ বাদ নেই। দেখা হ'তেই একে অন্যকে নাম ধ'রে ডাকলো বা হাত নাড়লো, আর পাশ কাটিয়ে যেতে-যেতে সকলেই সকলকে সম্ভাষণ ক'রে গেলো। তাদের পোশাক আর কথাবার্তা, খাওয়া আর চালচলন সব-কিছুই রাজধানীর লোকদের চেয়ে একটু আলাদা।

এরা জীবিকা নির্বাহ করে কী ক'রে? ইউরি অবাক হ'য়ে ভাবলো। কোন-কোন বিষয়ে তাদের কৌতুহল, তাদের সাংসারিক সম্বলই বা কী, কেমন ক'রে তারা সময়ের সঙ্গে মানিয়ে চলে আর আইনই বা বাঁচায় কী ক'রে?

উত্তর পেতে বেশি দেরি হ'লো না।

২

যে-সাত্ত্বিটি রাইফেলের কুঁদো মাটিতে হিচড়ে চলে, কিংবা বেড়াবার ছড়ি হিসেবে ব্যবহার করে, সে-ই ইউরিকে তার কামরায় পৌছে দিয়ে গেলো।

শুমোট করেছে সেদিন, গরম। ট্রেনের ছাত আর রেল-লাইন যেন গ'লে যাচ্ছে। মাটিতে লেগেছে তেলের কালো রং, তা থেকে গিল্টির মতো হলদে আভা ঝিলিক দিচ্ছে।

সাত্ত্বির রাইফেল ধুলোর ওপর দিয়ে রেখা একে চলেছে, মাঝে-মাঝে লাইনের গায়ে ঠোকাঠুকি লেগে ঠংঠং ক'রে বেজে উঠেছে।

'এবার ঠিক আবহাওয়া-বদল হ'লো,' বলছিলো সে, 'শিগগিরই বাসন্তী চাষ শুরু

হবে—ছোলা আর রাগি বোনার পক্ষে চমৎকার সময় হ'লো এই, তবে ভুট্টা বোনার সময় এখনো হয়নি। আমাদের এলাকায় আকুলিনার পরবের সময় ভুট্টা লাগানো হয়। আমি এখনকার লোক নই, টম্বুভেব কাছে, মর্জানস্ক থেকে এসেছি আমি। শুনুন, কমরেড ডাক্তার, যদি এই গৃহযুদ্ধ আর প্রাতিবিপ্লবের দুইদেব শুরু না-হতো, তাহ'লে আমি কি এই সময়ে এক অচেনা জায়গায় দিন কাটাতে ভেবেছেন? এই “শ্রেণী-সংগ্রাম” ব্যাপারটা যেন কালো বেড়াল’—আমাদের ফাঁক ক’রে দিয়ে চ’লে গেছে—দেখুন একবার, কী সর্বনাশটাই না ক’রে গেলো আমাদের।’

৩

তাকে ট্রেনে-ওঠার ব্যাপারে সাহায্য করার জন্য কামবা থেকে অনেকগুলি হাত এগিয়ে এলো।

‘ধন্যবাদ, আমি নিজেই উঠতে পারবো।’

ইউরি উঠে এসে তার স্ত্রীকে জড়িয়ে ধরলো।

‘যাক! শেষ পর্যন্ত এসেছো তাহ’লে। ঈশ্বরকে ধন্যবাদ দাও—সমস্ত ব্যাপারটা যে এইভাবে শেষ হ’লো সেজন্য ঈশ্বরকে ধন্যবাদ দেওয়া উচিত।’ টোনিয়া বার-বার এই কথাই বলতে লাগলো, ‘আমরা অবশ্য জানতুম তোমার সত্যি-সত্যি কোনো ভয়ের কারণ নেই।’

‘তোমরা জানতে আমার ভয়ের কোনো কারণ নেই? একথার মানে?’

‘কী হচ্ছে না-হচ্ছে সান্ত্বীরা এসে আমাদের ব’লে গিয়েছিলো। নইলে এতো উদ্বেগ হবে কেন আমাদের? সত্যি বলতে, আমি আব বাবা তো রীতিমতো; ঘাবড়ে গিয়েছিলাম। ঐ যে বাবা ঘুমোচ্ছেন, এখন আর ঠোঁক জাগাতে পারবে না। এতো উদ্বেজনার পর এখন গাছের ঠুঁড়ির মতো নিঃসোড়ে ঘুমিয়ে পড়ছেন। আরো কয়েকজন নতুন যাত্রী এসে উঠেছে এই গাড়িতে। একুনি তোমার সঙ্গে প’বচয় করিয়ে দিচ্ছি। কিন্তু লোকে কী বলছে, সেটা প্রথমে শুনে নাও—তোমার এই ফিরে-আসটা তাদের মতে তো রীতিমতো ভাগ্যের ব্যাপার—ঐ দ্যাখো, এজন্য তাবা তোমাকে অভিনন্দন জানাচ্ছে।—এই যে আমার স্বামী’, হঠাৎ সে ফিরে দাঁড়িয়ে তার পেছনের এক নতুন যাত্রীর সঙ্গে ইউরিব পরিচয় করিয়ে দিলে, লোকটি কামরার শেষ প্রান্তে ভিডের আড়ালে একেবারে ঢাকা প’ড়ে গিয়েছিলো।

‘সামডেভইয়াটভ,’ ভিড ঠেলে সামনে আসার চেষ্টা করতে-করতে আগন্তুক তার নরম টুপিটা অন্য লোকদের মাথার ওপর তুলে আত্মপরিচয় দিলো।

‘সামডেভইয়াটভ,’ ইউরি ভাবলো। ‘এ-রকম একটা নাম যখন তার, তখন সে নিশ্চয়ই সোজা এক পুরোনো রুশ-গাথা থেকে উঠে এসে হাজির হয়েছে, এমনকি ঠিক সেই রকম দাড়ি, ঢিলে আলখাল্লা, আর বোতাম-বসানো কোমরবন্ধ। কিন্তু এটা নিশ্চয়ই স্থানীয় আর্টস্-ক্লাব-এর নিদর্শন। কোঁকড়া চুল, ভারি গৌফ, আর এই ছাগল-দাড়ি...’

‘কী? স্টেলনিকভ ভয় পাইয়ে দিয়েছিলো তো?’ সামডেভইয়াটভ বললে, ‘সত্যি কথা বলবেন।’

‘না, কেন? বেশ ভালো কথাবার্তা হ’লো দু’জনে। মানুষটির ব্যক্তিত্ব জোরালো তা মানতেই হবে।’

‘আমারও তাই মনে হয়। লোকটি কী-রকম, সে-বিষয়ে আমার কিছু ধারণা আছে। আমাদের এদিককার লোক নয় সে। মস্কো থেকেই এসেছে—আমাদের এখানে যা-কিছু নতুন হচ্ছে সবই

তা-ই, সবই আপনাদের রাজধানী থেকে আমদানি করা। আমরা নিজেরা কি আর তাদের ডেকে আনি!’

‘ইউরি, জানো, আনফিম ইয়েফিমোভিচ সকলকে চেনেন,’ বললো টোনিয়া। ‘তোমার কথা, তোমার বাবার কথা—সব শুনেছেন তিনি, আমার দাদামশায়কেও চিনতেন—সবাইকে চেনেন তিনি—হয়তো শিক্ষয়িত্রী আন্টিপভার সঙ্গেও আপনার দেখা হয়েছে?’ খুব হালকাভাবে জিজ্ঞেস করলে টোনিয়া, আর উত্তর দেবার সময় সামডেভইয়াটভেব মুখের ভাব বদলালো না। ‘আন্টিপভার কথা উঠছে কিসে?’ ইউরি শুনলো কথাটা, কিন্তু কিছু বললো না, এদিকে টোনিয়া ব’লে চললো, ‘আনফিম ইয়েফিমোভিচ কিন্তু বলশেভিক, কাজেই তুমি সাবধানে থেকো, খুব ভালো ব্যবহার করতে হবে ওঁর সঙ্গে।’

‘সত্যি?’ ইউরি বললো, ‘আমি কিন্তু স্বপ্নেও ভাবতে পারতুম না। আমি ভেবেছিলাম আপনি একজন শিল্পী বা ঐ জাতীয় কিছু হবেন।’

‘আমার বাবার একটা ঘোড়ার গাড়ি ব আজ্ঞা ছিলো। সাতটা ট্রয়কা চলতো তাঁর। কিন্তু আমি বিশ্ববিদ্যালয়ে ভর্তি হয়েছিলাম, আর আমি যে একজন মার্ক্সবাদী, তাও সত্যি।’

‘ইউরি, শোনো, আনফিম ইয়েফিমোভিচ আমাকে কী বলছেন। সত্যি, আনফিম ইয়েফিমোভিচ, আপনি যদি কিছু মনে না করেন তো বলি, আপনার নাম আর পদবি উচ্চারণ করতে রীতিমতো জিভ জড়িয়ে যায়।—শোনো, উনি কী বলছেন—আমাদের নাকি বেজায় বরাত-জোর।—ইউরিয়্যাটিন সেন্ট্রাল স্টেশনে নাকি ট্রেন যেতে পারবে না—শহরের একদিকে আগুন লেগেছে, ব্রিজ উড়ে গিয়েছে, যাবার কোনো উপায়ই নেই। কাজেই আমাদের ট্রেন নাকি আরেকটা লাইন দিয়ে যাবে, আর কি ভাগ্য— সেই লাইনটাই আমাদের দরকার, আমাদের স্টেশন এই লাইনেই, টর্ফিয়ানায়্যা এদিকেই পড়ে। কেমন, ভালো হ’লো না?—ট্রেন বদলাতে হবে না, এক স্টেশন থেকে আরেক স্টেশনে মালপত্র ব’য়ে নিয়ে যেতে হবে না, এই গাড়িতে ব’সে থাকলেই চলবে। অবশ্য আরেক দিকে একটু মুশকিল আছে। আনফিম ইয়েফিমোভিচ বললেন যে ঠিক-ঠিক রঙনা হবার আগে এই গাড়ি নাকি বার কয়েক সামনে-পেছনে যাতায়াত করবে, তারপরে লাইন বদলাবে।’

8

টোনিয়া ঠিকই বলেছিলো। একবার যদি বগিগুলো জোড়া হয় তো খানিক পরেই আবার আলাদা ক’রে ফেলতে সময় লাগে না—এ-রকম চললো খানিকক্ষণ। আর সেই সঙ্গে বার-বার গাড়ি লাইন বদলায়, এ-লাইন থেকে ও-লাইনে যায়, আর সব লাইনেই অন্য গাড়ি ভিড় ক’রে আছে দেখে আবার কোনো নতুন লাইনে গিয়ে দাঁড়ায়, কিন্তু প্রত্যেক লাইনেই অন্য গাড়ি রাস্তা আটকে দাঁড়িয়ে আছে।

জমির আড়ালে শহরের খানিকটা দেখা যায়, অনেক দূরে। আর ঘাসে দিগন্তের গায়ে দেখা যায় বাড়ির ছাদ, কারখানার চিমনি বা গির্জের ওপরকার ঘড়ি-ঘর। শহরতলিতে কোথাও আগুন লেগেছে। রাশি-রাশি ধোঁয়া উড়ে যাচ্ছে আকাশে, দেখে মনে হয় যেন ঘোড়ার কেশর দুলছে হাওয়ায়।

ইউরি আর সামডেভইয়াটভ গাড়ির মেঝেতে ব’সে পাশে পা দোলাচ্ছে। সামডেভইয়াটভ দূরে আঙুল দিয়ে দেখিয়ে ইউরিকে সব বুঝিয়ে দিতে লাগলো। মাঝে-মাঝে ট্রেন যখন আচমকা জোরে ছুটতে শুরু করে, তখন তার গলা এঞ্জিনের শব্দে চাপা প’ড়ে যায়; কাজেই পাশে ঝুঁকে, ইউরির কানের কাছে মুখ এনে, ভাঙা গলায় চীৎকার ক’রে বলা কথার পুনরাবৃত্তি করতে থাকে।

‘ঐ-যে আগুন-লাগা বাড়িটা, ওটা হচ্ছে “দানব” সিনেমা। এখন ওটা ক্যাডেটদের হাতে,

অথচ আগে কিন্তু তারা আত্মসমর্পণ করেছিলো। আসলে যুদ্ধ শেষ হয়েছে, এমন কথা এখনো বলা যায় না। ঘণ্টা-ঘরের ওপরকার ঐ কালো ফুটকিগুলো লক্ষ্য করেছেন? ওরা আমাদেরই লোক, চেকদের' দিকে গুলি চালাচ্ছে।'

'আমি তো কিছুই দেখতে পাচ্ছি না।, আপনিই বা এতোদূর থেকে দেখতে পাচ্ছেন কী ক'রে?'

'ঐ যে-দিকটা জ্বলছে, ওটা হ'লো খোখরিকি, ওখানে সব কারিগরেরা থাকে। যে-অংশে দোকানপাট আছে, সেই খলোডেয়েভো আরো দূরে। আমাদের গাড়ির আড্ডাটা ওখানে ব'লেই আমাকে এতো খবর বাখতে হয়। ভালোর মধ্যে এই যে, আগুন কেবল শহরতলিতেই লেগেছে, শহরের মধ্যে ছড়িয়ে পড়বে ব'লে মনে হয় না।'

'কী বললেন?'

'বললাম যে শহরের মাঝখানটা এখনো অক্ষত আছে—গির্জা, লাইব্রেরি—ও-সব অংশে এখনো আগুন লাগেনি।...আমাদের নাম, মানে এই সামডেভইয়াটভ হ'লো আসলে সান ডোনাটো—আমরা অমনি ক'রে রুশ ক'বে নিয়েছি। লোকে বলে, আমরা নাকি ডেমিডভদের বংশধর'।'

'এখনো কিছুই শুনতে পাচ্ছি না।'

'বলছিলাম যে সামডেভইয়াটভ হ'লো সান ডোনাটোরই আরেক সংস্করণ। শুনছি, আমরা নাকি ডেমিডভ পরিবারের একটি শাখা, ঐ প্রিন্স ডেমিডভ সান ডোনাটো আরকি। কিন্তু এটাকে হয়তো নেহাৎই পারিবারিক উপকথা বলা যেতে পারে। এই জায়গাটাকে বলে স্পির্কা-র পাহাড়তলি, অনেক বাগানবাড়ি আছে এখানে, তাছাড়া বেড়াতে যাওয়া যায় এমন জায়গাও প্রচুর আছে; সেইজন্যই লোকে প্রায়ই এখানে খেলাধুলো হৈ-হল্লা করতে আসে। নামটা বেশ মজার, না?'

শাখা-রেলপথ দিয়ে কাটাকুটি-করা একটি উপত্যকা প'ড়ে আছে সামনে। সার বেঁধে টেলিগ্রাফের খুঁটি চ'লে গেছে দিগন্তের দিকে—তারা যেন মস্ত মোটা বুটজুতো-পায়ে রূপকথার দানব, আর এক রাস্তা গেছে ঘুরে-ঘুরে, দূর থেকে দেখায় ফিতের মতো, যেন রেল-লাইনের সঙ্গে তাব প্রতিদ্বন্দ্বিতা আছে, যেন তারা দু'জনেই অবতীর্ণ হয়েছে সৌন্দর্য-প্রতিযোগিতায়। দিগন্তরেখার কাছে গিয়ে অদৃশ্য হ'য়ে গেছে সেই পথ, তারপর চওড়া কোনো অর্ধবৃত্তের আকারে ফিরে এসেছে মোড় বেঁকে, এবং আবার মিলিয়ে গেছে দূরে।

'এটাই আমাদের বিখ্যাত হাই-ওয়ে। সাইবেরিয়ার ওপর দিয়ে সোজা চ'লে গেছে। আগেকার দিনের কয়েদিবা এই রাস্তাকে নিয়ে গান বেঁধেছিলো। এখন এটা পাটির লোকেদের সবচেয়ে বড়ো ঘাঁটি...আপনার ভালোই লাগবে এখানে, বুঝেছেন? এখানকার সব-কিছুই খাবাপ নয়, ভালো দিকও আছে। কয়েকদিনেই বেশ অভ্যাস হ'য়ে যাবে জায়গাটা, তারপর চ'লে যাবার সময় দেখবেন খুব খারাপ লাগছে। শহরটির আবার কতোগুলি অদ্ভুত বৈশিষ্ট্য আছে। যেমন আমাদের জলেব পাম্প। দেখবেন, চৌরাস্তার মোড়ে মেয়েরা সারি-সারি লাইন দিয়ে দাঁড়িয়ে আছে, সারাটা শীতকাল ধ'রে মনে হয় এটা যেন তাদের খোলা-হাওয়ার আড্ডাখানা'।

'আমরা শহরে থাকবো না। ভারিকিনোতে যাচ্ছি আমরা।'

'জানি। আপনার স্ত্রী আমাকে বলেছেন সে-কথা। কিন্তু তাহ'লেও তো ব্যাবসাসূত্রে মাঝে-মাঝে আপনাকে শহরে আসতে হবে। আপনার স্ত্রীকে দেখেই আমি আন্দাজ ক'রে নিয়েছিলাম: বুড়ো ক্রোয়াগারের জীবন্ত প্রতিমূর্তি যেন—হুবহু একরকম দেখতে, সেই চোখ,সেই

১ বহু চেক সৈন্য, ১৯১৮ থেকে ১৯২০ সাল পর্যন্ত, পূর্ব-রাশিয়া এবং সাইবেরিয়ায় ঘটনাবলিতে অংশগ্রহণ করেছিলেন।

২ পিটার দি গ্রোটের অনুগ্রহ লাভ ক'রে একজন ডেমিডভ ইউরাল এলাকায় প্রথম খনি খোলেন। উনিশ শতকে তাঁর পশাদেবাই ভার্টিকান থেকে প্রিন্স সান ডোনাটো উপাধি লাভ করেছিলেন।

নাক, সেই কপাল—হুবহু তাঁর দাদুর মতো। এখানে কিন্তু সকলেই তাঁকে মনে ক’রে রেখেছে।’

লাল, গোল তেলের ট্যাঙ্ক ভেসে উঠলো এবার দিগন্তের কাছে। মাঝে-মাঝে চোখে পড়ে কাঠের তক্তায় আঁটা বড়ো-বড়ো বিজ্ঞাপন। একটা বিজ্ঞাপনের ওপর ইউরির চোখ পড়লো, সেটা দু-জায়গায় ঝোলানো আছে; তাতে লেখা: ‘মরো অ্যাণ্ড ভেটচিনকিন। টেকি-কল। বীজবপন যন্ত্র’।

“মরো অ্যাণ্ড ভেটচিনকিন” খুব ভালো প্রতিষ্ঠান। তাদের কৃষিসংক্রান্ত যন্ত্রপাতিগুলো খুব উচু দরের।’

‘কিছু শুনতে পাচ্ছি না। কী বললেন, আবার বলুন।’

‘বললাম যে, ওটা একটা ভালো প্রতিষ্ঠান। শুনতে পাচ্ছেন?— একটা ভালো প্রতিষ্ঠান। তারা কৃষিকাজের যন্ত্রপাতি বানায়। লিমিটেড কোম্পানি ওটা। আমার বাবারও শেয়ার ছিলো।’

‘এই না বললেন তাঁর ঘোড়ার গাড়ির আড্ডা ছিলো?’

‘তা ছিলো বইকি, কিন্তু তাতে শেয়ার কেনার বাধা কোথায়? কোথায় টাকা খাটালে লাভ হ’তে পারে, সে-সব ব্যাপারে খুবই বিচক্ষণ ছিলেন তিনি। অনেক ব্যবসাতেই টাকা ঢেলেছেন। এ “দানব” সিনেমাতেও তাঁর টাকা খাটছে।’

‘আপনার কথা শুনে মনে হচ্ছে যে সেজন্য আপনি গর্ববোধ করছেন।’

‘বাবার বিচক্ষণতায়? নিশ্চয়ই, এটা তো গর্বেরই ব্যাপার।’

‘কিন্তু আপনার মার্ক্সবাদ?’

‘হা ঈশ্বর! মার্ক্সবাদের সঙ্গে তার সম্পর্ক কী? মার্ক্সবাদী ব’লেই কি আগাপাশতলা নির্বোধ হ’য়ে যেতে হবে? মার্ক্সবাদ হলো বিজ্ঞান। এ হ’লো বস্তুতাত্ত্বিক মতবাদ, ইতিহাস-দর্শনের তত্ত্ববিশেষ।’

‘মার্ক্সবাদ বিজ্ঞান? কোনো সদ্যপরিচিত লোকের সঙ্গে এ নিয়ে তর্ক করতে যাওয়া অবশ্য বিপজ্জনক, কিন্তু তবু... আমার মতে, মার্ক্সবাদ এখন পর্যন্ত তেমনভাবে নিজের পায়ে দাঁড়াতে পারেনি যাতে তা বিজ্ঞান হিসেবে পরিচিত হ’তে পারে। এর চেয়ে ঢের বেশি ভারসাম্য আছে বিজ্ঞানে। আপনারা বলেন মার্ক্সবাদ নৈর্ব্যক্তিক। কিন্তু আমি এমন কোনো তত্ত্বের কথা জানি না যা মার্ক্সবাদের চেয়েও বেশি আত্মকেন্দ্রিক, বেশি তথ্যবর্জিত। সাধারণত এটাই দেখা যায় যে লোকে তাদের তত্ত্বকে কাজে খাটিয়ে পরীক্ষা ক’রে দ্যাখে তা খোশে টেকে কিনা, তারা অভিজ্ঞতা থেকে শিখতে চায়, কিন্তু যারা কেবলমাত্র ক্ষমতালোভী, তারা নিজেদের মতবাদের অকাট্যতা নামক উপকথার প্রতিষ্ঠায় এতোটা ব্যস্ত থাকে যে, সত্যকে পৃষ্ঠপ্রদর্শন ক’রে যতোটা সম্ভব দূরে চ’লে যায়। আমার কাছে রাজনীতির কোনোই মূল্য নেই। যারা সত্যের প্রতি উদাসীন, আমি তাদের পছন্দ করি না।’

ইউরির কথাগুলিকে সামডেভইয়াটভ ভাবলে এক বেয়াড়াগোছের রসিক লোকের বাহাদুরি নেবার চেষ্টা, তাই তার কথা শুনে সে শুধু হাসলো একটু।

তখনও কিন্তু ট্রেনের এই লাইন-বদল আর এগোনো-পেছনো শেষ হয়নি। যতোবার গাড়ি শেষ সিগন্যালের কাছে গেলো, কোমরবন্ধে দুধের পাত্র-বাঁধা একটি স্ত্রীলোক—রেলপথের সেই ছুঁচোলো মুখটায় সে তখন তার ডিউটিতে ছিলো— তার পশম বোনার কাজ ফেলে রেখে, ঝুঁকে প’ড়ে সিগন্যালের হাতলে চাপ দিয়ে ট্রেনটাকে প্রত্যেকবার পেছনমুখো শহরের দিকে ফেরে পাঠিয়ে দিলে। গাড়ি যেই আস্তে-আস্তে পেছনে যেতে শুরু করে, অমনি সেও উঠে ব’সে গাড়ির দিকে তার ঘুঘি বাগিয়ে নাড়তে শুরু ক’রে দেয়।

ব্যাপারটাকে সামডেভইয়াটভ ব্যক্তিগতভাবে নিলে। ‘স্ত্রীলোকটি কেন এ-রকম করছে?’ সে অবাক হ’য়ে ভাবলে, ‘মুখটা তো বেশ চেনা ঠেকছে। গ্রাশা টুটসেভা নাকি? উহ, গ্রাশা ব’লে

তো মনে হচ্ছে না। এর বয়স আরো বেশি, রীতিমতো বুড়িই বলা যায়। কিন্তু যে-ই হোক না, আমার বিরুদ্ধে কী বলার আছে তার? জননী রাশিয়া এখন বিপ্লবে উত্তেজিত ব'লেই হোক, বা নবযুগের প্রসব-বেদনায় যন্ত্রণাকাতর ব'লেই হোক, এটা সত্যি যে রেলপথগুলো এখন এক জগাখিঁচুড়ি পাকিয়ে ব'সে আছে, তার ফলে এই বুড়ির বরাতে নিশ্চয়ই ছুটি জুটছে কম—কাজেই তার খরচা যতো গণ্ডগোলেব জন্য দায়ী আমি, তাই আমাকে লক্ষ্য ক'রেই ঘুরি দেখাচ্ছে। যাক গে, সব গোলায় যাক! আমার যেন আর-কিছু ভাববার নেই।'

শেষটায়, অনেকক্ষণ পরে, স্ত্রীলোকটি তাব নিশেন নাড়তে-নাড়তে এঞ্জিন-চালককে চিৎকার ক'রে কী যেন ব'লে দিলে, এবার আর ট্রেনটিকে সিগন্যাল পেরিয়ে খোলা রাস্তায় যেতে সে কোনো বাধা দিলে না। কিন্তু চোদ্দ নম্বর কামরা যখন তার আস্তানার পাশ দিয়ে গেলো, তখন মেঝেয় ব'সে-থাকা বাচাল দু'জনকে লক্ষ্য ক'রে জিভ দেখিয়ে ভেংচি কাটলো সে। তাদের দেখেই সে তিরিক্ষি হ'য়ে গিয়েছিলো। আবার সামডেভইয়াটভকে রীতিমতো চিন্তিত দেখা গেলো।

৫

গোল-গোল তেলের ট্যাঙ্ক, টেলিগ্রাফের খুঁটি আর বিজ্ঞাপনের হোর্ডিং নিয়ে জ্বলন্ত শহরগুলি দূরে মিলিয়ে গেলো, দেখা দিলো বন আর নিচু-নিচু পাহাড়ের দৃশ্য, আর ফাঁকে-ফাঁকে বড়ো রাস্তার ঝিলিক। তখন সামডেভইয়াটভ বললে:

'চলুন, আমাদের জায়গায় গিয়ে বসি। আমাকে তো একটু পরেই নেমে যেতে হবে, আর তার এক স্টেশন পরেই আপনাদেরটা। লক্ষ্য রাখবেন, যাতে ভুল ক'রে না বসেন।'

'এদিকটা আপনার খুব চেনা মনে হচ্ছে?'

'নিশ্চয়ই, একেবারে আমার খিড়কির উঠানের মতো। আশে-পাশের একশো মাইলের মধ্যে সব আমার চেনা। আমি ওকালতি করি তো, তাই জেনে নিতে হয়েছে। বিশ বছর ধ'রে প্র্যাগটিস করছি। প্রায়ই ব্যাবসাসূত্রে বেরোতে হয়।'

'এখনও?'

'নিশ্চয়ই।'

'কিন্তু এখন যে-অবস্থা, তাতে ব্যাবসা চলে কী ক'রে?'

'এস্তার চলে। পুরোনো মামলা, ব্যাবসাদারি, চুক্তি-ভঙ্গ। কাজ নেই মানে? কাজে ডুবে আছি, মাথার চুল খাড়া হ'য়ে যাবার জোগাড়।'

'কিন্তু এ-সব কি বন্ধ ক'রে দেওয়া হয়নি?'

'বন্ধ যা হয়েছে, সে তো নামে মাত্র। কিন্তু আসলে এমন সব দাবি-করা হচ্ছে যার একটার সঙ্গে আর-একটার কিছুই মেলে না। একদিকে জাতীয়করণের ধাক্কা, অন্যদিকে নগর-সোভিয়েটের জন্য তেল জোগানো চাই, তার ওপর প্রাদেশিক অর্থদপ্তরের জবরদস্তি আদায় রয়েছে। আর প্রত্যেকেই চায় বেঁচে থাকতে। তবু আর ব্যবহারের মধ্যে যখন অনেকটা তফাৎ থাকে, তখনকার সজ্জিকণে এ-সব অদ্ভুত অবস্থাটা ঘটবেই। ফলে এই সময়ে লোকে চায় আমার মতো মানুষকে, যে শুধু বিচক্ষণই নয়, অনেক ফাঁক-ফিকিরও জানে। ভাগ্যবান সে, যে বড্ড বেশি দেখতে পায় না। বাবা বলতেন যে মাঝে মাঝে নাকের ওপর এক-আধটা খুঁষি পড়লে কারো কোনো ক্ষতি হয় না। এই এলাকার প্রায় অর্ধেক লোকই জীবিকার জন্য আমার ওপর নির্ভর ক'রে আছে। এর মধ্যে আবার একদিন কাঠের জোগাড়ে ভারিকিনো যেতে হবে আমাকে। তাই ব'লে অবশ্য আজ-কালের মধ্যেই না। খোড়া ছাড়া যাওয়াই যায় না

সেখানে—এদিকে আমার ঘোড়াটা ঝোড়া হ'য়ে প'ড়ে আছে। তা যদি না হ'তো তাহ'লে কি আমাকে এই চেরা-কাঠের স্তূপের ওপর ব'সে থাক্কা খেতে-খেতে যেতে দেখতেন? কেমন ঠুড়ি মেদুর-মেদুরে যাচ্ছে দেখুন—জানোয়ার কাঁহাকার! একে আবার রেলগাড়ি বলে! ভারিকিনোতে আমি আপনাদের কাজে লাগতে পারি। আপনাদের ঐ মিকুলিংসিনদের আগাপাশতলার খবর আমার জানা আছে।'

'আমরা কেন ওখানে যাচ্ছি, গিয়ে কী করবো সে-সব আপনি শুনেছেন?'

'একটু-আধটু আঁচ করতে পারছি। মাতা প্রকৃতির সেই শাস্ত আদান: জমিতে ফেরো। মাথার ঘাম পায়ে ফেলে জীবিকা-নির্বাহের স্বপ্ন আরকি।'

'তাতে দোষের কী আছে? আপনার কথা শুনে মনে হচ্ছে, ব্যাপারটা আপনার পছন্দ নয়।'

'ছেলেমানুষি। একটা রাখালিয়া ভাব আছে অবশ্য। কিন্তু তা হ'লেই বা ক্ষতি কী?—আমার শুভেচ্ছা জানবেন। তবে কিনা আমার এতে বিশ্বাস নেই। রামরাজ্য। শিল্পকলা, কারিগরি। এই তো?'

'আপনার কী মনে হয়? মিকুলিংসিনের কাছ থেকে কী-রকম অভ্যর্থনা পাবো আমরা?'

'চৌকাঠ পর্যন্ত পেরোতে দেবে না, ঝাঁটা নিয়ে তাড়া করবে। অবশ্য এজন্য ওকে দোহও দেওয়া যায় না। যা ঝঞ্ঝাটের মধ্যে আছে! কারখানা বন্ধ, মজুররা ফেরার, জীবিকার কোনো উপায়ই নেই, এমনকি খাবার নেই পর্যন্ত—আর এমন সময় আপনাদের শুভাগমন! যদি আপনাদের খুনও করে, আমি অন্তত ওকে মোটেই দোষ দেবো না।'

'এই দেখুন। আপনি একজন বলশেভিক, অথচ আপনিও স্বীকার করলেন যে যা চলছে তাকে জীবন বলা চলে না—তা হ'লো উগ্রসত্তা, এক বিকট দুঃস্বপ্ন।'

'স্বীকার তো সব সময়েই করছি। কিন্তু এটা যে ঘটতোই, এটা যে ঐতিহাসিক কারণে অনিবার্য ছিলো, তা কি আপনি দেখতে পাচ্ছেন না? একে মেনে নিতেই হবে আমাদের।'

'অনিবার্যতাটা আপনি কোথায় দেখলেন?'

'আপনি কি শিশু, না কি নেহাতই ভাব করছেন? কথা শুনে তো মনে হচ্ছে যেন চাঁদ থেকে সদ্য খ'সে পড়লেন। যতো রাজ্যের পেটুক আর পরগাছা ক্ষুধিত মজুরদের পিঠে চেপে ব'সে তাদের মৃত্যুর দিকে ঠেলে নিয়ে যাচ্ছে, তবু আপনি ভাবছেন চিরকাল এমনি চ'লে যেতো? কতো ভাবে যে অত্যাচার আর শোষণ চলছিলো, সেটা ভেবেছেন একবার? জনসাধারণের এই রাগ, সুবিচারের জন্য তাদের এই আকাঙ্ক্ষা, এই সত্য্যস্বেষণ—এ-সবের যাথার্থ্য আপনি বুঝতে পারছেন না? না কি আপনি ভাবছেন এ-রকম মৌলিক পরিবর্তন কোনো ডুমা-র মধ্য দিয়ে, লোকসভার পদ্ধতিতে সম্ভব হ'তে পারতো? ভাবছেন কি, ডিস্ট্রিক্টরশিপ না-হ'লেও চলতে পারে আমাদের?'

'আমরা দু'জনেই দু'জনকে ভুল বুঝছি, আর সেই জন্যেই একশো বছর ধ'রে তর্ক করলেও আমাদের মতের মিল হবে না। আমারও বিপ্লবী মনোভাব খুবই ছিলো, কিন্তু এখন দেখছি হিংসার দ্বারা কিছুই পাওয়া যায় না। ভালো হ'তে হবে—তবেই লোকের ভালোর দিকে টানা যায়। কিন্তু এ-কথা থাক। তা মিকুলিংসিনরা—আপনি যা বললেন তা-ই যদি আশা করতে হয় আমাদের তাহ'লে আমরা যাচ্ছি কেন সেখানে? বরং ফিরে যাওয়া যাক।'

'পাগল হয়েছে! এটা তো ঠিক যে জগতে ওরাই একমাত্র লোক নয়। আর তারপর, মিকুলিংসিন বড্ড বেশি ভালোমানুষ, ভালোমানুষিটাই ওর পাপ। খুব হে-চে করবে, বাধা দেবে, কিছুতেই রাজি হবে না, তারপর এমন গ'লে যাবে যে গায়ের শাটটি স্ফুট খুলে দেবে আপনাকে, শেষ রুটির টুকরো ভাগ ক'রে খাবে আপনার সঙ্গে। আমার এই হাতটাকে যেমন চিনি আমি,

তেমনি কি ওকে 'চিনি না!' এই ব'লে ইউরিকে সামডেডইয়াটড মিকুলিৎসিনের সব কথা খুলে বললে।

৬

পঁচিশ বছর আগে মিকুলিৎসিন পিটার্সবার্গ থেকে এখানে এসেছিলো। টেকনিকাল স্কুলের ছাত্র ছিলো সে, কী এক গণ্ডগোলের মধ্যে প'ড়ে গিয়ে পুলিশের পাহারায় এখানে অন্তরীণ হ'লো। ফ্রোগারদের কারখানায় ম্যানেজারের চাকরি পেলো, তারপর বিয়ে করলো। তখন টুন্টসেভারা চার বোন ছিলো এখানে—চেখভের নাটকের চেয়ে একজন বেশি^১; আথ্রিমিনা, আভডটিয়া, গ্রাফিরা (গ্রাশা) আর সেরাফিমা (সিমা)। ছোকরারা সবাই ছুটেছিলো তাদের পেছনে। মিকুলিৎসিন বিয়ে করলো সবচেয়ে বড়ো বোনটিকে।

'কিছুদিন পরেই এক ছেলে হ'লো তাদের। স্বাধীনতা ভালোবাসে ব'লে নির্বোধ বাবা তার নাম দিলে লিবারিয়ুস—লিবি ব'লে ডাকে সবাই— ডানপিটে ছেলে, কিন্তু অসাধারণ কতোগুলো গুণ ছিলো তার। যুদ্ধ যখন বাধলো তখন তার বয়স মাত্র পনেরো। সার্টিকিকেটে তারিখ জাল ক'রে, স্বৈচ্ছাসেবক হিসেবে সোজা যুদ্ধক্ষেত্রে চ'লে গেলো সে। তার মা আবার ভারি দুর্বল মানুষ, এই আঘাত সহ্য হ'লো না তাঁর। সেই যে বিছানা নিলো, আর উঠতে পারলো না। মারা গেলো দু'বছর আগে, ঠিক বিপ্লবের পূর্বক্ষণটিতে।

'যুদ্ধের শেষে তিনটি মেডেল নিয়ে রীতিমতো বীরের মতো লিবারিয়ুস ফিরে এলো, আর না-বললেও চলে, যুদ্ধক্ষেত্রে থেকেই বিলকুল বলশেভিক হয়ে ফিরলো। আপনি "আরণ্যক ভ্রাতৃত্বের" কথা শুনেছেন কখনো?'

'কই? না তো।'

'তাহ'লে আপনাকে গল্প বলার কোনো মানেই হয় না, অর্থেক ব্যাপারই বুঝতে পারবেন না আপনি। আর জানলা দিয়ে ঐভাবে বাইরের ঐ রাস্তার দিকে আপনার তাকিয়ে থাকারও কোনো মানে হয় না। ঐ যে রাস্তা দেখছেন—ওগুলোর আজকাল প্রধান বৈশিষ্ট্য কী বলুন তো? পাটিজান—দলের লোক। আর দলের লোক কারা? গৃহযুদ্ধের সময় তারাই হ'লো বিপ্লবী পস্টনের মেরুদণ্ড। দুটি জিনিস একসঙ্গে মিলে এই শক্তির অভ্যাদয় ঘটিয়েছে: একদিকে রাজনৈতিক সংগঠন, যারা বিপ্লবের নেতৃত্ব নিজেদের কাঁধে তুলে নিয়েছে, অন্যদিকে সেনাবাহিনীর সাধারণ সৈন্য, যারা যুদ্ধে হেরে যাবার পর পুরোনো কর্তৃপক্ষের আদর্শ মানতে রাজি নয়। এই দুটো কারণেই এই দলের উদ্ভব। তাদের বেশির ভাগই হচ্ছে মাঝারি চাষি^২, তবে সব রকম লোকেরাই আছে এর মধ্যে—গরিব চাষি, আলখান্না-হাড়ানো পুরুষ, বাপেদের দিকেই বন্ধুক তুলেছে এমন সব কুলাকপুত্র। আনার্কিস্ট আদর্শবাদীরাও আছে, আছে এমন লোক পাসপোর্ট নেই ব'লে যারা পালিয়ে বেড়াচ্ছে; নারীঘটিত ব্যাপারে জড়িয়ে পড়েছিলো ব'লে তাড়িয়ে-দেওয়া স্কুলের ছেলেরাও কম নেই। স্বদেশে পুনর্বাসন আর স্বাধীনতা পাবার প্রতিশ্রুতি পেয়ে জার্মানি আর অস্ট্রিয়ান যুদ্ধের বন্দীরাও এসে যোগ দিয়েছে এদের সঙ্গে। জনসাধারণের এই বিপুল সৈন্যদলের একটি অংশের নাম হ'লো আরণ্যক ভ্রাতৃত্ব, আর এই ভ্রাতৃত্বের অধিনায়ক হলেন কমরেড ফরেষ্টার, আর কমরেড ফরেষ্টার হলেন লিবি, লিবারিয়ুস আভেরসিএভিচ, আভেরসিয়াস মিকুলিৎসিনের ছেলে।'

১ আশ্টন চেখভের একটি বিখ্যাত নাটকের নাম 'তিন বোন'।—অনুবাদের টীকা।

২ লেনিনের 'তত্ত্ব অনুসারে চাষিরা তিন দলের—ধনী চাষি (কুলাক), সাধারণ আভের চাষি (মাঝারি) আর গরিব চাষি, এদের কোনো জমিজমা নেই।

‘সত্যি বলছেন?’

‘নিশ্চয়ই। ঠিক তা-ই।—কিন্তু এবার আভেরসিয়াসের কথায় ফেরা যাক। জীবন মৃত্যুর পর সে আবার বিয়ে করেছে। তবে দ্বিতীয় জীবী, হেলেন, একেবারে শাদাশিখে সরল মানুষ—তার স্বভাবও তা-ই, ইচ্ছেটাও ঐরকম। স্কুল থেকেই সোজা গির্জায় চলে গিয়েছিলো বিয়ে করতে, এখনো রীতিমতো যুবতী, কিন্তু ভান করে যেন বয়স আরো কম। খামকা কথা বলে, কেবলই কিচিরমিচির করে চলেছে, যেন ভাজা মাছটি উটে খেতে জানে না। দেখামাত্র আপনার একটা পরীক্ষা নেবে সে: “সুভরত কবে জন্মেছিলেন? ত্রিভুজের দুই বাহু কখন তৃতীয় বাহুর সমান হয়?” যদি আপনাকে ঘায়েল করতে পারলো তো তার খুশি আর দেখে কে। কিন্তু সবুর করুন, কয়েক ঘণ্টার মধ্যেই নিজের চোখে সব দেখতে পাবেন।

‘বড়োর নিজের আবার কিছু-কিছু অদ্ভুত বৈশিষ্ট্য আছে। সে নাবিক হ’তে চেয়েছিলো ব’লে সামুদ্রিক যন্ত্রবিদ্যা শিখতে শুরু করেছিলো। পরিকার দাড়ি-গোফ কামানো, মুখে পাইপটি লেগেই আছে, আঙু-আঙু, বেশ সহৃদয়-ভাবে দাঁতের ফাঁক দিয়ে কথা বলে, পাইপ-খোরদের যেমন হয় তেমনি তার নিচের চোয়ালাটি উচোনো, চোখ দুটি ঠাণ্ডা, ছাইরঙের।—ও, বলতে প্রায় ভুলে যাচ্ছিলাম—সে আবার একজন সমাজতন্ত্রী বিপ্লববাদী, আঞ্চলিক প্রতিনিধি হিসেবে সংবিধানসভার সভ্য নির্বাচিত হয়েছিলো।’

‘এটা তো খুব জরুরি খবর! তাহ’লে বাপে-ব্যাটায় একেবারে আদায়-কাঁচকলায়। রাজনীতির ব্যাপারে উন্টোউন্টি।’

‘তত্ত্বের দিক দিয়ে বিরোধী বইকি, কিন্তু কাজের বেলায় অরণ্য আর ভারিকিনোর মধ্যে কোনোই বিরোধ নেই। কিন্তু সে-কথা থাক, আগে আমাদের গল্পটাই শেষ করি। টুন্সেভ-ভগ্নীদের বাকি তিনজন—মিকুলিংসিনের প্রথম বিবাহের শ্যালিকারা—এখনো ইউরিয়্যাটিনেই বাস করছে, কেউই বিয়ে করেনি, এখনো তারা কুমারীই আছে; কিন্তু দিনকাল বদলে গেছে এখন, এই মেয়েরাও বদলেছে।

‘সবচেয়ে বড়োটি, অর্থাৎ আভডোটিয়া, পাব্লিক লাইব্রেরির একজন সহকারী। রূপসী, শ্যামবর্ণা, অসম্ভব লাজুক, একটু কিছুতেই টুকটুকে লাল হ’য়ে ওঠে। লাইব্রেরিতে যা দুর্দশা ওর!—মারাত্মকরকম চূপচাপ জায়গাটা, এদিকে বেচারির আবার বারোমাস সর্দি—ইঁচি শুরু হ’লে এমন হয় যেন মাটির তলায় লুকোতে পারলে বাঁচে।—সব স্নায়ুর ব্যাপার আরকি।

‘তার পরের জন—গ্রাশা—সে হ’লো পরিবারের সম্পদ। দারুণ উৎসাহ, আশ্চর্য কাজের মেয়ে, যে-কোনো কাজ করতে রাজি আছে। কমরেড ফরেষ্টার, অর্থাৎ লিবি নাকি তার মাসির খাত পেয়েছে। গ্রাশা আজ হয়তো দরজির কাজ করছে, আবার পরের দিনই মোজার কারখানায় কাজ নিলো, তারপর আরেকদিন হয়তো দেখা গেলো সে নাপতেনি হয়েছে। রেল-লাইনের মোড়ে সেই মেয়েটাকে দেখেছিলেন, যে আমাদের দেখে ঘুমি বাগাচ্ছিলো?—আরে মশাই আমি তো ভেবেছিলাম, গ্রাশাই হয়তো রেল চাকরি নিয়েছে এখন। তবে গ্রাশা ব’লে মনে হয় না, কারণ ঐ মেয়েটিকে বড্ড বুড়ো দেখাচ্ছিলো।

‘আর তারপর সকলের ছোটটি, সিমা। সে হ’লো ওদের অভিষাপ। কতো যে গুণগোল হয় তার জন্য, তায় কোনো সীমা নেই। এমনিতে কিন্তু শিক্ষিত, বিস্তর পড়েছে, কবিতা স্মার দর্শনের দিকে ঝাঁক ছিলো। কিন্তু বিপ্লবের পর থেকে—উন্নতি, বহুতা আর হৈ-ঠে মিছিলের ফলেই হয়তো—কেমন একটু মাথা-খারাপ-মতো হয়েছে তার, এখন তার বাতিক হয়েছে ধর্ম।

১ ফেব্রুয়ারি-বিপ্লবের পরে অস্থায়ী সরকারের অধীনে সংবিধানসভা (Constituent Assembly) গঠিত হয়েছিলো।
বলশেভিকরা যখন তাৎ সংখ্যাধিকা পেলো না, তখন তারা তা ভেঙে দিল।

বোনেরা কাজে বেরোবার সময় তাকে ভালো বন্ধু ক'রে যায়, কিন্তু সে লাফিয়ে বেরিয়ে আসে জানলা দিয়ে, রাস্তায় গিয়ে ভিড় জমিয়ে “দ্বিতীয় আগমন” আর “সৃষ্টির অবসান” বিষয়ে বক্তৃতা শুরু ক'রে দেয়।—না, এবার আমার বন্ধুবান্ধব খামানো উচিত, প্রায় এসে পড়েছি বলতে গেলে। এই স্টেশনেই আমি নামবো, আপনার স্টেশন হ'লো এর ঠিক পরেরটা। এখন থেকেই বরং তৈরি হ'য়ে নিন।’

সে চ'লে যেতেই টোনিয়া ইউরিকে বললে, ‘জানি না তোমার কী মনে হচ্ছে, কিন্তু আমার মনে হয় ঈশ্বরই যেন লোকটিকে পাঠিয়েছেন আমাদের কাছে। মনে হচ্ছে আমাদের জীবনে সে কোনো অংশ নেবে, কোনো সাহায্য করবে।’

‘আমারও তাই মনে হচ্ছে। কিন্তু আমি চিন্তিত হচ্ছি কেবল এই ভেবে যে সবাই তোমাকে ক্রোগারের নাৎনি ব'লে চিনতে পারছে, আর ক্রোগার এতো পরিচিত ছিলেন এই এলাকায় যে তাও আমাকে ভাবিয়ে তুলছে। আমি ভারিকিনোর কথা বলতেই স্টেলনিকভও বিস্মিতভাবে জিজ্ঞেস ক'রে বসেছিলো যে আমরা ক্রোগারের উত্তরাধিকারী কিনা।

‘যাতে লোকের চোখে পড়তে না হয়, সেইজন্য আমরা মস্কো ছেড়েছি। এখন দেখছি এখানে আমরা আরো বেশি লোকের চোখে পড়বো। এমন নয় যে এ-বিষয়ে কিছু করা যাবে; তাছাড়া যা হ'য়ে গেছে তা নিয়ে বিলাপ করার মানে হয় না। কিন্তু বেশি জটিলমক না-দেখালেই আমরা ভালো করবো, চলন-বলনে যাতে দেমাকের ভাব না থাকে, সেদিকে নজর রাখতে হবে। সব মিলিয়ে কেন যেন একটা অমঙ্গলের আশঙ্কা মনে জাগছে...কিন্তু আমাদের নামবার সময় বোধ হয় হ'য়ে এলো। তোমার বাবাকে জাগানো যাক, তৈরি হ'তে হবে।’

৭

যাতে ট্রেনে কিছুই প'ড়ে না থাকে, সেজন্য টোরফিআনাইয়া স্টেশনের প্রাটফর্মে দাঁড়িয়ে টোনিয়া সঙ্গের মানুষ আর লটবহর গুনে দেখছিলো বারে-বারে। বহু লোকের পায়ে-মাড়ানো স্টেশনের বালি স্থির হ'য়েই ছিলো তার পায়ের তলায়, কিন্তু তবু স্টেশনটা যাতে কিছুতেই ফস্কে না যায় সেজন্য উদ্বেগে তার মন ভ'রে ছিলো। যদিও ট্রেন তার চোখের সামনে তখন নিশ্চল দাঁড়িয়ে আছে, তবুও সে যেন চাকার গমগমে আওয়াজ শুনতে পাচ্ছিলো। এই জন্যই সে কোনো-কিছুই ভালোভাবে দেখতে, শুনতে বা বুঝতে পারছিলো না।

যে-সব যাত্রী আরো দূরে যাবে, তারা গাড়ি থেকে ঠেচিয়ে বিদায়-সম্ভাষণ জানাচ্ছিলো তাকে, হাত নাড়ছিলো বারে-বারে, কিন্তু সে একটু লক্ষ্য পর্যন্ত করলে না তাদের। ট্রেন যখন ছেড়ে দিলো তখনও সে বুঝতে পারেনি যে ট্রেন চ'লে গেছে—এটা সে বুঝলো তখন, যখন সে আবিষ্কার করলো যে সে শূন্য রেল-লাইনের পাশের সবুজ মাঠ আর শূন্য আকাশের দিকে তাকিয়ে আছে।

স্টেশনটি পাথরে তৈরি; প্রবেশ-পথের দু'পাশে কতোগুলো বেঞ্চি প'ড়ে আছে। টোরফিআনাইয়ায় শুধু জিভাগোরাই নেমেছিলো। মাটিতে লটবহর রেখে একটা বেঞ্চিতে ব'সে পড়লো তারা।

স্টেশনের নীরবতা, শূন্যতা ও পরিচ্ছন্নতা তাদের অবাক ক'রে দিলে। ভিড়, ছুটোছুটি, গালি-গালাজ, এ-সব যে কিছুই নেই এটা ভারি আশ্চর্য লাগলো তাদের। এই সুন্দর নির্জন প্রদেশকে এখনো ইতিহাস গ্রন্থার করতে পারেনি, আর সেইজন্যই রাজধানীর মতো বন্য ও বর্বর হ'য়ে উঠতে আরো সময় লাগবে জীবনের।

একঝাঁক বার্চগাছের মধ্যে স্টেশনটি লুকোনো। (ট্রেন যখন এখানে এসে দাঁড়িয়েছিলো, তখন

কামরার ভেতর সন্ধেবেলার মতো অন্ধকার হ'য়ে গিয়েছিলো।) এবার সেই প্রায়-নিশ্চল গাছেদের ছায়া আলগোছে তাদের মুখ, চোখ, হাতের ওপর কাঁপতে থাকলো; ছায়া ঘনিয়ে এলো স্টেশনের দেয়াল, ছাত আর মাটির ওপর, ছায়া ঘনিয়ে এলো প্ল্যাটফর্মের পরিচ্ছন্ন, সৌন্দা-হলদে বালুর ওপর, তারপর তেমনি শিরশির ক'রে কাঁপতে শুরু ক'রে দিলে। গাছপালার ঘনতায় বেশ ঠাণ্ডা ক'রে এলো, আর তেমনি ঠাণ্ডা স্বর শোনা গেলো পাখির গানের। সততার মতো সরল আর নিরলংকার সেই স্বর বনের এক প্রান্ত যেন চিরে দিলে, তারপর হাওয়া তাদের ব'য়ে নিয়ে গেলো আরো দূরে। রেল-লাইন আর গ্রামের পথ দু'জায়গায় ভেদ করেছে সেই বার্চগাছের বনকে: তার ঝুঁকে-পড়া দোলায়িত ডালপালার ডিলে, লম্বা ছায়া দু'জায়গাতেই ঘন হ'য়ে জ'মে আছে।

হঠাৎ, একসঙ্গে, দেখবার আর শোনবার ক্ষমতা ফিরে এলো টোনিয়ার। সুরময় পাখির গলা, বনভূমির বিশুদ্ধ নির্জনতা, আর স্তব্ধতার প্রশান্ত শ্রোত—সব একসঙ্গে আঘাত দিলে তার সংবিতে। বলবে ব'লে কতোগুলি কথা সে ঠিক ক'রে রেখেছিলো: 'আমরা যে শেষ পর্যন্ত এখানে নিরাপদে পৌছতে পারবো, একথা আমি বিশ্বাসই করতে পারিনি, ডার্লিং; তোমার ঐ স্টেলনিকভ সামনাসামনি ভদ্র ব্যবহার করেছে বটে, কিন্তু হচ্ছে করলেই টেলিগ্রাম ক'রে জানিয়ে দিতে পারতো, ট্রেন থেকে নামার সঙ্গে-সঙ্গেই যেন আমাদের গ্রেপ্তার করা হয়। ওদের ভালোমানুষিকে মোটেই বিশ্বাস করা যায় না, সব ওদের ভান।' কিন্তু চোখের সামনে এই মায়াবী দৃশ্য দেখে একেবারে বিপরীত কথা তার মুখ দিয়ে বেরিয়ে এলো। 'বাঃ, কী সুন্দর,' কাঁপা গলায় চেঁচিয়ে উঠলো সে। আর-কিছুই সে বলতে পারলো না। চোখে তার জল এসে গেলো।

তার কান্নার আওয়াজ পেয়ে স্টেশন-মাস্টারের উর্দি-পরা ছোটোখাটো একজন বুড়োমানুষ থপথপ ক'রে এগিয়ে এলেন। লাল চূড়ো-বসানো টুপির ডগা ছুঁয়ে নরম গলায় বললেন:

'স্টেশনের দেরাজ থেকে কোনো ওষুধ এনে দিতে হবে কি মহিলাটিকে?'

'না, না, ও কিছু না। ধন্যবাদ আপনাকে। এঙ্কুনি সামলে নেবেন উনি।' আলেকজান্ডার আলেকজান্ড্রেভিচ বললেন।

'রাস্তার উদ্বেগ আর উৎকর্ষার জন্য এমন হয়—অনেক হয় এরকম। তার ওপর এই আফ্রিকার গরম, যা এ-দেশে প্রায় নেই। অবশ্য সবচেয়ে মারাত্মক হ'লো ইউরিয়্যাটিনের ঘটনাগুলি।'

'আসবার সময় আমরা ট্রেন থেকে আগুন দেখেছি।'

'যদি আমার ভুল না হয়, আপনারা তো রাশিয়া' থেকে আসছেন, তাই না?'

'একেবারে তার কেন্দ্র থেকে।'

'মস্কো থেকে! তাই ওর স্নায়ু এমন বিপর্যস্ত হয়েছে। এতে আর অবাক হবার কী আছে। লোকে বলে সেখানে নাকি একটা পাথরও আস্ত নেই।'

'এতোটা খারাপ অবস্থা নয় কিন্তু। লোকে একটু বাড়িয়েই বলে। তবে কিছুটা বিপদ যে গেছে, তা মিথ্যে নয়। এ আমার মেয়ে, ইনি তার স্বামী, আর এটি তাদের ছেলে। আর ঐ তার আয়া, নিউশা।'

'নমস্কার। নমস্কার। খুব সুখী হলাম। আপনাদের জন্যই অপেক্ষা করছিলাম আমি। আনকিম ইয়েফিমোভিচ সামডেভইয়াটভ সাকমা থেকে আমাকে ফোন করেছিলেন। বলেছিলেন, মস্কো থেকে ডাক্তার জিভাগো আসছেন সপরিবারে, আমি যেন যথাসাধ্য সাহায্য করি তাঁদের। তা, আপনি তো ডাক্তার জিভাগো?'

‘না, ডাক্তার জিভাগো হলেন আমার জামাই, ঐ যে উনি। আমি ডাক্তার নই, কৃষিতত্ত্বের অধ্যাপক; আমার নাম গ্রোমেকো।’

‘কসুর মাপ করবেন। আপনার সঙ্গে পরিচিত হ’য়ে খুব ভালো লাগলো।’

‘সামডেভইয়াটভকে তাহ’লে চেনেন আপনি?’

‘আশ্চর্য কর্মী পুরুষ, আনফিম ইয়েফিমোভিচকে কে না চেনে! আমাদের আশা-ভরসা বলতে যা-কিছু, সব হলেন উনি—আমাদের একমাত্র অবলম্বন। উনি যদি না থাকতেন, তাহ’লে অনেক আগেই মরতে হ’তো আমাদের। যথাসাধ্য সাহায্য করবেন তাঁদের, ফোনে বললেন আমাকে। আমি বললাম, ভালো কথা, তা-ই হবে। সাহায্য করবো ব’লে প্রতিশ্রুতি দিলাম। তা আপনারদের ঘোড়া লাগবে কি, বা অন্য কিছু? কোথায় যেতে চান আপনারা?’

‘ভারিকিনো। সেটা কি অনেক দূর এখন থেকে?’

‘ভারিকিনো! সেই জন্যেই আমি কেবল ভাবছিলাম আপনার মেয়েকে যেন চেনা-চেনা লাগছে! তাহ’লে আপনারা ভারিকিনো যেতে চান? এখন সব বুঝতে পারছি! আমি আর ইভান এর্নেস্টোভিচ ক্রোগারে, এই দু’জন মিলে এই রাস্তা বানিয়েছিলাম। এক্ষুনি ঘোড়ার ব্যবস্থা করছি। একটা লোক ডেকে দিচ্ছি গাড়ি পাওয়া যায় কিনা খোঁজ নিতে। —ডোনাট! ডোনাট! এ-সব মালপত্র এখনকার মতো ওয়েটিংরুমে নিয়ে যাও। ঘোড়া পাওয়া যাবে তো? দৌড়ে যাও চা-ঘরে; দ্যাখো, কী করা যায়। সকালবেলায় ব্যাকাস ঘোরাঘুরি করছিলো এদিকে। এখনো আছে কিনা দ্যাখো। বলো, যে ভারিকিনোয় যাবার চারজন যাত্রী আছে। নতুন এসেছে, সঙ্গে মালপত্র নেই বেশি—এ-কথাও বলো। আর একটু তাড়াতাড়ি করো।এবার যদি মহিলাটিকে এই বৃদ্ধ কোনো উপদেশ দেয় তো কিছু মনে করবেন না। ইভান এর্নেস্টোভিচ ক্রোগারের সঙ্গে আপনার কী সম্বন্ধ, সে-কথা আমি ইচ্ছে ক’রেই জিজ্ঞেস করিনি। এ-বিষয়ে খুব সাবধানে কথা বলবেন। যা দিনকাল—খুব একটা দিলখোলা হওয়া সম্ভব নয় আপনার পক্ষে।

ব্যাকাসের নাম শুনে যাত্রীরা বিস্মিত হ’য়ে একে-অন্যের মুখের দিকে তাকালে। নিজেদের যে এক দুর্ভাগ্য লৌহমানবে পরিণত করেছে, সেই অতিকায় কামার সম্পর্কে আনা যে-সব গল্প বলেছিলেন, সব তাদের মনে পড়লো; সেই সঙ্গে তাঁর বলা আরো বহু স্থানীয় উপকথাও একে-একে মনে পড়লো তাদের।

৮

যে-শাদা ঘোড়াটা এলো, সে আবার সদ্য বাচ্চা দিয়েছে, আর তার কোচোয়ান—ঝলঝলে কানওলা বুড়োমানুষ—চুলগুলি তার কায়দা ক’রে ফোলানো—সেও দেখতে ঠিক একটা শাদা প্যাচার মতো। কী-এক কারণে তার সব-কিছু শাদা দেখাচ্ছে: বটগাছের ছাল দিয়ে তৈরি নতুন জুতো জোড়া এখনো কালো হ’য়ে যায়নি, আর তার লিনেনের শাট আর প্যান্ট পুরোনো হ’তে হ’তে একেবারে ঝাপসা হ’য়ে গেছে।

ঘোড়ার সেই বাচ্চাটি—কোকড়ানো তার কেশর আর দেখতে রাত্রির মতো কালো—সে যেন ঠিক এক রং-করা পুতুল; নরম হাড়ওলা পা ঝুঁড়তে-ঝুঁড়তে সে তার মার পেছনে ছুটে এলো।

খাদ-ভর্তি এবড়ো-খেবড়ো রাস্তার ওপর দিয়ে যখন ঝাঁকুনি খেতে-খেতে গাড়ি চললো, যাত্রীরা সবাই গাড়ির গায়ে হেলান দিয়ে থাকলো। শান্তি নেমেছে তাদের হৃদয়ে। স্বপ্ন তাদের সত্যি হ’তে চলেছে এবার, পথ প্রায় শেষ হ’য়ে এলো। স্তব্ধ, স্বচ্ছ দিনের শেষ কণটুকু অনেকক্ষণ ধ’রে দরাজ আর উদার দীপ্তি ছড়িয়ে দিলে।

পথ তাদের কখনো নিয়ে গেলো বনের ছায়ায়, কখনো খোলা মাঠে। বনের ভেতর দিয়ে যাবার সময় যতোবার গাড়ির চাকার সঙ্গে গাছের শেকড়ের ধাক্কা লাগলো, ততোবার তারা একে অন্যের গায়ের ওপর কুপাকারে প'ড়ে গেলো, তারপর আবার উঠে বসলো ভুরু কঁচকে, কাঁধ ঝিকিয়ে জড়োসড়ো হ'য়ে বসলো একসঙ্গে। কিন্তু খোলা মাঠের ওপর যখন দিগন্ত তার হৃদয়ের পূর্ণতা থেকে তাদের অভিভাদন করলে, তখন তারা ভালো হ'য়ে বসলো, আরাম ক'রে, মাথা উচু ক'রে।

পাহাড়ি দেশ। আর পাহাড়দের, সব সময়েই দেখা যায়, আত্মপ্রকাশের ভঙ্গি একেবারে নিজস্ব। গর্বিত ছায়ামূর্তির মতো, বিশাল অঙ্ককার শরীর নিয়ে গা-ঝাড়া দিয়ে ওঠে তারা দূরে, দিগন্তের কাছে, নিঃশব্দ নজর রাখে যাত্রীদের চলাফেরার ওপর। কিন্তু স্নিগ্ধ গোলাপি আলো মাঠের ওপর দিয়ে তাদের অনুসরণ ক'রে যেতে-যেতে সাব্বনা দিলো তাদের, আশা জাগিয়ে রাখলো।

সব-কিছুই সুখে ভ'রে দিলো তাদের, অবাক ক'রে দিলো—সবচেয়ে বেশি পাগলাটে বুড়ো কোচোয়ানের অবিরাম বকুনি; সেকলে প্রবাদ, তাতারদের কথার ধরন, ভাষার স্থানীয় বৈশিষ্ট—এই সব-কিছুর সঙ্গে তার নিজেরও কিছু-কিছু সৃষ্টি যুক্ত হয়েছিলো, যার ফলে তার ভাষা কেবল নতুনই লাগছিলো না, অদ্ভুত ব'লেও বোধ হচ্ছিলো।

যখনই বাচ্চাটি পেছিয়ে পড়ে, ঘোড়াটি থেমে অপেক্ষা করে তার জন্যে। একটুক্কণের মধ্যেই বাচ্চাটি তার নরম ঢেউ-খেলানো লাফ দিয়ে মা-কে ধ'রে ফ্যালো; তারপর, কাছাকাছি-বসানো তার লম্বা পা ফেলে বেখান্নাভাবে হাঁটতে-হাঁটতে গাড়ি পর্যন্ত এসে, তার লম্বা গলা বাড়িয়ে, ছোট্ট মাথাটা গাড়ির জোয়ালের তলায় বাড়িয়ে দেয় তার মায়ের স্তন্যপান করবে ব'লে।

‘এটা কিন্তু আমি কিছুতেই বুঝতে পারছি না।’ ইউরিকে চেষ্টা করে বললো টোনিয়া; চ্যাচালেও, প্রত্যেকটি শব্দ সে আলাদা ক'রে উচ্চারণ করলে, কেননা গাড়ির ঝাঁকুনিতে এমনতেই দাঁতে-দাঁতে ঠোকাঠুকি লাগছে, তার ওপর হঠাৎ যদি একটু ধাক্কা খেয়ে বসে তো জিভে কামড় প'ড়ে যেতে পারে। ‘মা আমাদের যে ব্যাকাসের কথা বলতেন, সে কি এই বুড়ো? ঐ গল্পটা মনে আছে তোমার? সেই যে, সেই কামারের গল্প, একবার লড়াই করতে গিয়ে যার নাড়িভূঁড়ি ছিড়ে গিয়েছিলো ব'লে সে নিজেই লোহা দিয়ে সব বানিয়ে নিয়েছিলো নতুন ক'রে? —লৌহ-জঠর ব্যাকাস! ওটা যে নিছকই গল্প তা তো বোঝাই যাচ্ছে। কিন্তু এই সত্যিকার লোকটাকে নিয়েই কি এ-সব গল্প বানানো হয়েছিলো?’

‘না, না, তা নয়। প্রথমত, তোমার কথা মতোই, এটা নিছকই একটা গল্প, একটা উপকথা মাত্র, তার ওপর মা আমাদের বলেছিলেন যে তাঁর ছেলেবেলায় যখন এই উপকথা শোনে, তখনই সেই উপকথার বয়েস একশো বছর হ'য়ে গিয়েছিলো, কিন্তু এতো জোরে কথা বোলো না, তুমি নিশ্চয়ই বুড়োর মনে কষ্ট দিতে চাও না?’

‘ও-বুড়ো কিছুতেই শুনতে পাবে না, একেবারে বন্ধ কাল। আর তাছাড়া যদিই বা শোনে, কিছুই বুঝতে পারবে না—বুড়োর মাথার ঠিক নেই।’

‘ওহে, ফিয়োডর নেফিয়োভিচ!’ ঘোড়াকে লক্ষ্য ক'রে চ্যাচালো বুড়ো, যদিও সে ও তার যাত্রীরা ভালো ক'রেই জানে যে এটি মাদি ঘোড়া, তবু বোধহয় পুরুষের নাম এবং পদবী সন্মত তাকে সম্বোধন করার কোনো কারণ ছিলো। ‘ঈশ, কী মারাত্মক গরম! গোম্মায় যাক সব! ঠিক যেন পারস্যের চূর্ণিতে ঢুকে-পড়া আব্রাহামের ছেলেমেয়ের অবস্থা! জোরে চল, ব্যাটা আধপেটা শয়তান! ওরে মাজেপা’, তাকেই বলছি—শুনছিস?’

মাঝে-মাঝে আবার, একটুও ভূমিকা না-ক'রে, পুরোনো ছড়া আওড়াতে শুরু করে বুড়ো; শুনেই বোঝা গেলো আগেকার দিনে ক্রোয়াগারদের কারখানাতেই এ-সব তৈরি হয়েছিলো।

'বিদায়, কারখানার আঙিনা আর ফটক,
বিদায়, কাঁচা লোহা, ইস্পাত,
কর্তার রুটি বাসি ঠেকছে আমার,
যেমা ধ'রে গেছে জলে।
তীর পেরিয়ে সাতার কাটছে রাজহাঁস,
কাঁচা লোহা নেই তার, আছে পা।
না, আমি মদ খেয়ে টলছি না,
ভানিয়া চ'লে গেছে সেপাই হবে ব'লে।
মাশা, কাদিসনে, আমি তো হাবা নই,
হাবা নই, সংও নই আমি,
এই চললুম শহরে
সেস্টেটিউরিখাতে কাজ করতে।'

'ওরে শয়তানের ঘোড়া! দ্যাখো, দ্যাখো একবার পচা মড়াটাকে। চাবুক দিলাম ওকে, আর ও কিনা উল্টে কথা বলতে আসে! শোনো, ফেডিয়া নেফেডিয়া, একবার পষ্ট ক'রে বলো দিকিনি, তুমি যাবে কি যাবে না! —ঐ জঙ্গল? ওটাকে বলে 'টায়িগা', 'ওটার কোনো শেষ নেই। আর এর ভেতরে যতো চাষি রয়েছে তাদেরও কোনো সীমাসংখ্যা নেই, "আরণ্যক ভ্রাতৃত্ব" রয়েছে এর মধ্যে। আঃ, ফেডিয়া নেফেডিয়া, আবার তুই থেমেছিস, হতচ্ছাড়া কোথাকার!'

বলতে-বলতে হঠাৎ সে ফিরে 'তাকালো টোনিয়ার দিকে, সোজা চোখের ওপর চোখ রাখলো।

'ও ঠাকরুন, শুনছেন, আপনার কি বুদ্ধিসূক্তি আছে কিছু? ভেবেছিলেন আপনি কে, তা বুঝতে পারবো না। আপনি যে খুব সোজা মনের মানুষ তা তো দেখতেই পাচ্ছি! চিনতে পারবো না? না-পারলে মরণ হোক আমার। স্পষ্ট চিনতে পেরেছি! প্রথমটায় তো নিজের চোখকেই বিশ্বাস হচ্ছিলো না—একেবারে গ্রিগভের জ্যান্ত ছবি (ক্রোয়াগার নামটিকে বুড়ো বলে গ্রিগভ)। 'আপনি তার নাতনি তো, না অন্য কিছু? আমি না-পারলে একজন গ্রিগভকে আর কে চিনতে পারবে! তার কাজ ক'রেই আমার সারা জীবন কেটেছে—তার সব কথাই জানি আমি। তার জন্য সব ধরনের কাজই আমি করেছি—কাঠুরে হ'য়ে খনিতে কাজ করেছি, মাটির ওপরে কপিকলে, এমনকি আন্তাবলেও কাজ করতে হয়েছে আমাকে। —চল, চল, শরীরটাকে একটু নড়াবার চেষ্টা কর! এই দ্যাখো, আবার থামলো, যেন পা ব'লে কিছু নেই ওর! হা চীনদেশের দেবদূত! কেন, আমি তোকে যে কথা বলছি, তা কানে যাচ্ছে না বুঝি?

'হ্যাঁ, এইমাত্র আপনি জিজ্ঞেস করছিলেন যে আমি সেই একই কামার ব্যাকাস কিনা! আপনি একেবারেই সোজা মনের মানুষ—ডাগর চোখ আছে, কিন্তু মগজ নেই একটুও। আপনার ঐ ব্যাকাস—লোকে তাকে ডাকতো পোস্টানগভ ব'লে, লৌহ-জঠর পোস্টানগভ—প্রায় দু-কুড়ি বছর আগে তাকে কবর দেওয়া হয়েছে। কিন্তু আমার নাম হ'লো মেখনানি। আমাদের ডাকনাম এক, কিন্তু পদবী ভিন্ন।'

একটু-একটু ক'রে বুড়ো তাদের মিকুলিৎসিনের খবর দিলে, তারা অবশ্য আগেই সে-সব

সামডেভইয়াটভের কাছ থেকে শুনেছিলো। মিকুলিৎসিনের দ্বিতীয় স্ত্রীকে সে বললে ‘তার দুই নম্বর’, কিন্তু প্রথম জনের কথা উঠতে বললে, ‘লক্ষ্মী’, ‘স্বর্গের দেবদূত।’ দলের নেতা লিবেরিমুসের কথা বলতে গিয়ে সে যখন শুনলো যে তার খ্যাতি এখনো মস্কোতে পৌঁছয়নি, এবং যখন জানলো যে সেখানকার কেউ আরণ্যক ভ্রাতৃত্বের কথা জানে না, তখন সে কিছুতেই বিশ্বাস ক’রে উঠতে পারলো না সে-কথা:

‘তারা শোনেনি? কমরেড ফরেস্টারের কথা শোনেনি! চীনদেশের দেবদূত! তাহ’লে তাদের কান আছে কী করতে?’

সঙ্গে এগিয়ে আসছে। তাদের ছায়া ক্রমশ বড়ো থেকে আরো বড়ো হ’য়ে উঠে, তাদের আগে-আগে ছুটে চললো। তাদের গাড়ি চলছিলো সমতলের ওপর দিয়ে, একটি গাছপালাও নেই সেদিকে। মাঝে-মাঝে এদিকে-ওদিকে কেবল কতোগুলো একলা ঝোপ চোখে পড়ছে; কোনোটা লম্বা লতানো টেপারির ঝোপ, কোথাও ওষধি বা আর কাঁটাগাছের জটিলতা ভেদ ক’রে গোছা-গোছা ফুল ফুটে আছে। সূর্যাস্তের আলো প’ড়ে একেবারে মাটির সমতল থেকে আলো হ’য়ে উঠেছে ঝোপগুলো, আর যেন ভূতুড়ে উচ্চতায় উঠে দাঁড়িয়েছে তারা—ঘোড়ায় চড়া সাত্ত্বী যেন ফাঁক-ফাঁক হ’য়ে দাঁড়িয়ে নিশ্চলভাবে এই সমতলভূমি পাহারা দিচ্ছে।

উপত্যকা নিজেকে ছড়িয়ে দিয়েছে অনেক দূরে, দিগন্তে। শেষ হয়েছ উচু একসার পাহাড়ের তলায়। পাহাড়ের তলায় কোনো জলস্রোত কিংবা খাদ আছে ব’লে অনুমান করা যায়; পথের ওপর পাহাড় দাঁড়িয়ে আছে দেয়ালের মতো, যেন সেখানকার আকাশ দুর্গপ্রাচীর দিয়ে ঘিরে রাখা, আর এই পথ গিয়ে শেষ হবে কোনো তোরণের কাছে।

পাহাড়ের চূড়ায় লম্বা, নিচু শাদা একটি বাড়ি দাঁড়িয়ে আছে।

‘পাহাড়ের ওপরকার ঐ জায়গাটা দেখতে পাচ্ছেন?’ ব্যাকাস বললে, ‘আপনাদের মিকুলিৎসিন থাকে সেখানে। আর তার নিচে একটা খাদ আছে, তাকে বলে শুটমা।’

পাহাড় থেকে শোনা গেলো দুটো রাইফেলের আওয়াজ, একটানা ঢাক-পেটার আওয়াজের মতো তার প্রতিধ্বনি গড়িয়ে চললো।

‘এটা আবার কী? দাদু, পার্টিজানেরা আমাদের লক্ষ্য ক’রে গুলি চালাচ্ছে না তো?’

‘না, না! পার্টিজান হবে কেন? মিকুলিৎসিন গুলি ছুঁড়ে শুটমার নেকড়েদের ভয় দেখাচ্ছে।’

৯.

মিকুলিৎসিনের সঙ্গে তাদের প্রথম দেখা হ’লো ম্যানেজারের বাড়ির উঠানে। বেদনাদায়ক এই দৃশ্যটি শুরু হ’লো নীরবতায়, আর তার শেষ হ’লো গুণগোলে ভরা এমন এক বিশৃঙ্খলায় যার কোনো অর্থ হয় না।

বনের ভেতর থেকে সাক্ষ্যভ্রমণ সেরে উঠোন পেরিয়ে বাড়ির দিকে আসছিলো হেলেন, মিকুলিৎসিনের স্ত্রী। তার সোনালি চুলের মতো সোনালি রঙের সূর্যাস্তের রশ্মি বনের ভেতরে গাছের শাখা-প্রশাখায় ছড়িয়ে পড়ছে। তার পরনে পাতলা গ্রীষ্মের পোশাক। হেঁটে-হেঁটে লাল হ’য়ে গেছে তার মুখ, ক্রমশ দিয়ে বারে-বারে মুখ মুছে চলেছে। তার খড়ের টুপি ঘাড়ে ঝুলছে, খোলা গলার ওপর দিয়ে ফিতোটা আছে ছড়িয়ে।

খাদের দিক থেকে তার দিকে এগিয়ে আসছিলো তার স্বামী; বন্ধুক হাতে এইমাত্র খাদ থেকে উঠে এসেছে সে; বন্ধুকের ভেতরে কিছু-একটা দোষ ধরা পড়েছে সম্প্রতি, তাই সেটা পরিকার করার কথা ভাবছে এখন।

হঠাৎ, এই শান্ত দৃশ্যের মাঝখানে, ব্যাকাস সপ্রতিভভাবে তার গাড়ি নিয়ে নুড়ি-পাথরের ওপর দিয়ে সবাইকে চমকিয়ে হড়বড় ক’রে চলে এলো।

যাত্রীরা নেমে পড়লো। আলেকজান্ডার আলেকজান্ড্রোভিচ টুপি খুলে, টুপি প'রে নিয়ে, অনেক ভনিভা ক'রে বোঝাতে শুরু ক'রে দিলেন ব্যাপারটা।

বাড়ির যারা মালিক তারা বিস্ময়ে হতবাক হ'য়ে গেলো। বেশ কিছুক্ষণ পর্যন্ত সত্যিই তাদের মুখে কথা ফুটলো না, এদিকে দুর্ভাগা অতিথিদের বিমুঢ়তারও কোনো সীমা নেই—লজ্জায় ম'রে যাচ্ছে তারা। হাজার কথাতেও ব্যাপারটা এর চাইতে পরিষ্কার হ'তে পারতো না—যারা সরাসরি এর মধ্যে জড়িত শুধু তাদের কাছেই নয়, সাশা, নিউশা, ব্যাকাস এদেরও কাছে। সেই মাদি ঘোড়া, তার বাচ্চা, সূর্যাস্তের সোনালি রশ্মি, আর হেলেনের মুখ আর ঘাড় ঘিরে যে-পোকাগুলো গুনগুন করছিলো— এমনকি তাদের কাছেও সেই কষ্টকর বিড়ম্বনা গিয়ে পৌঁছলো।

অবশেষে মিকুলিৎসিনই কথা বললে। 'আমি কিছুই বুঝতে পারছি না—কিছুই না, কিছুতেই বুঝতে পারবো না কিছু! কী ভেবেছেন আপনারা এটাকে?—দক্ষিণ, যেখানে শাদারা আছে,'^১ যেখানে রুটির কোনো অভাব নেই? আমাদেরই বেছে নিলেন কেন আপনারা? এতো জায়গা থাকতে কী জন্যে আপনারা এখানে এলেন, কেন এলেন?'

'আমি শুধু অবাক হ'য়ে ভাবছি যে, আভেরসিয়াস স্টেপানোভিচের ঘাড়ে কী বিষম দায়িত্ব তুলে দিচ্ছেন, একথা কি আপনারা একবারও ভাবেননি?'

'আমাকে বলতে দাও হেলেন।—আমার স্ত্রী ঠিক কথা বলেছেন। আমাদের ঘাড়ে কী বোঝা চাপাতে যাচ্ছেন, সে-কথা কি একবারও ভেবেছিলেন আপনারা?'

'কিন্তু, হা ঈশ্বর! আমাদের ভুল বুঝেছো তোমরা। কী বলছি আমরা? তোমাদের মনের শান্তি নষ্ট ক'রে উড়ে-এসে-জুড়ে-বসার কোনো প্রশ্ন নয় এটা। আমরা অত্যন্ত ছোটোখাটো একটা জিনিস চাচ্ছি। কোনো পুরানো, খালি, ভাঙাচোরা একটা ঝুঁড়ের শুধু চাচ্ছি আমরা, আর সামান্য এক টুকরো পোড়ো জমি, যা কেউ চায় না বলে এমনি প'ড়ে আছে; এটুকুও চাচ্ছি শুধু আমাদের খাবার ফলাবার জন্য। আর—কেউ যখন দেখবে না আমাদের, এমনি সময়ে একগাড়ি বোঝাই কাঠ নিয়ে আসতে চাচ্ছি জঙ্গল থেকে। এটা কি সত্যিই বেশি কিছু চাওয়া হ'লো? একে কি চাপিয়ে দেওয়া বলে।'

'না, কিন্তু পৃথিবীতে কি জায়গার অভাব? আমাদের সঙ্গে এর সম্পর্ক কী? এতো বড়ো সম্মান অন্য কাউকে না দিয়ে আমাদেরই বা বেছে নেওয়া হ'লো কেন?'

'তার কারণ আমরা তোমার কথা অনেক শুনেছি, আমাদের আশা ছিলো যে তুমিও আমাদের কথা শুনেছো। কাজেই একেবারে অচেনা লোকদের মধ্যে গিয়ে পড়ছি না—এই ভরসাতেই এসেছি এখানে।'

'ওঃ! তাহ'লে এর কারণ হলেন ক্রোগার! যেহেতু তাঁর সঙ্গে আপনারদের আত্মীয়তা আছে! এরকম সময়ে এমন একটা কথা আপনারা তুলতেই বা পারলেন কী ক'রে?'

মিকুলিৎসিনের মুখের ছাঁদ ভালো। মাথা ঝেঁকে চুল পেছনে সরিয়ে দেয় সে, মাটির ওপর বেশ শক্ত ক'রে পা রেখে-রেখে লম্বা চালে হাঁটে; গরমের সময় গায়ে রেশমি কোমরবন্ধ ওলা রাশিয়ান শার্ট। আগেকার দিনে যারা ভল্লায় বোম্বটেগিরি করতো, অনেকটা সেই রকম দেখতে সে। সম্প্রতি এই ধরনের লোকেরা চিরন্তন শিক্ষার্থী নমুনা হ'য়ে উঠেছে, প্রথমে তারা থাকে স্বল্পদর্শী, পরে হয় স্কুলমাস্টার।

মিকুলিৎসিন তার যৌবন স্বাধীনতা আন্দোলনকে উৎসর্গ করেছিলো, বিপ্লবের জন্য কাজ করতো সে; তার একমাত্র ভয় ছিলো এই যে বিপ্লব যখন শুরু হবে, তখন সে হয়তো ঝেঁ

^১ White Russian-দের কথা এলা হচ্ছে।—অনুবাদের টীকা।

থাকবে না, বা সেই বিপ্লব হবে বড্ড নরম, হয়তো তার চরম স্বপ্নের মাপসইমতো রক্তাক্ত হবে না। এখন এলো সেই বিপ্লব, তার সবচেয়ে দুঃসাহসী আশাকে তা ছাড়িয়ে গেলো; কিন্তু জন্ম থেকে সর্বহারাদের বিশ্বস্ত মন্ত্র মিকুলিনসিন, যে কিনা প্রথম দলের সঙ্গে কর্মী-পরিষদ গ'ড়ে তুলেছিলো, আর কারখানার কর্তৃত্ব সাধারণের হাতে তুলে দেবার জন্য আন্দোলন করেছিলো, সেই মিকুলিনসিন কিনা দূরে প'ড়ে থাকলো হেলাফেলায়! কোথায় সে সমস্ত ঘটনাবলীর কেন্দ্রে থাকবে, না সে কিনা প'ড়ে আছে এক সুদূর পাড়াগায়ে, যেখান থেকে মজুররা সবাই পালিয়েছে, আর ঐ মজুরদের মধ্যে আবার কয়েকজন মেনশেভিকও^১ ছিলো! আর এ-সবের ওপরে কিনা আজকের এই বিতিকিছিরি কাণ্ড! ব্যাপারটা কী? ফ্র্যাগার-পরিবারের এই অনিমন্ত্রিত পরিশিষ্টকে তার মনে হ'লো ভাগ্যের চরম পরিহাস, যেন বেশ ভেবে-চিন্তে তাকে নাজেহাল করা হচ্ছে। তার দুঃস্বপ্নের পেয়ালা ছাপিয়ে গেলো এবার।

‘এর মধ্যে কোনো যুক্তি নেই। এটা একেবারেই ধারণার বাইরে। বুঝতে পারছেন, কী মারাত্মক বিপদের মধ্যে ফেলবেন আমাকে? আমি বোধহয় পাগল হ'য়ে গেছি। কিছুই বুঝতে পারছি না, কিছুই না; কিছু বুঝতে পারবো ব'লেও মনে হয় না।’

‘কোন আগ্নেয়গিরির ওপর আমরা ব'সে আছি, সেটা বুঝতে পারছেন আপনারা?’

‘হেলেন, তুমি থামো একটু। আমার জী ঠিকই বলেছেন। এমনভেই অবস্থা সন্নিহিত, তার ওপর আবার আপনারা এসে জুটলেন। কুকুরের মতো দিন কাটাচ্ছি আমরা, একেবারে যেন পাগলা-গারদে আছি। আমি তো ব'সে আছি দু'মুখো আগুনের মধ্যে: একদল আমাকে অতিষ্ঠ করে তুলছে যেহেতু আমার ছেলে একজন লাল, বলশেভিক, জনগণের প্রিয় নেতা, আর একদল জানতে চাচ্ছে কেন আমি সংবিধানসভার সভ্য নির্বাচিত হয়েছিলাম। কেউ আমার ওপর খুশি নয়, কারো কাছে গিয়ে দাঁড়াবার জায়গা নেই আমার। আর এখন কিনা আপনারা! বেশ চমৎকার ব্যাপার। এখন কিনা আপনারদের জন্য আমাকে বন্দুকের সামনে গিয়ে দাঁড়াতে হবে!

‘আঃ—কী বলছো! সত্যি! বড্ড বাড়াবাড়ি হ'য়ে যাচ্ছে! একটু মাথা ঠাণ্ডা করো না।’

একটু পরে সে অল্প নরম হ'য়ে বললে, ‘উঠানের মধ্যে এমনভাবে চ্যাচামিচি করে কোনো লাভ নেই। বরং ভেতরে যাওয়া যাক। এর কোনো সুফল আমি অবশ্য দেখতে পাচ্ছি না, তবে সবই তো আয়নায় বাপসা করে দেখছি। যাই হোক, আমরা তুর্কি সেপাইও নই, বিধর্মীও নই, আপনারদের বনে পাঠিয়ে ভালুক দিয়ে খাওয়াবো না। হেলেন, আমি বলি কী, পড়ার ঘরের পাশের ঘরটায় আপাতত ঐদের থাকবার জায়গা করে দেওয়া যাক। পরে দেখবো ঐদের কোথায় তোলা যায়; বাগানের মধ্যে একটা বাসাও ঠিক করে দেওয়া যেতে পারে। আসুন, ভেতরে আসুন। ব্যাকাস, ঐদের মালপত্র নিয়ে এসো, একটু সাহায্য করো অতিথিদের।’

কথামতো কাজ করতে-করতে ব্যাকাস বিড়বিড় করে বললে: ‘হা মাতা মেরী! ঐদের লটবহর দেখছি তীর্থযাত্রীদের মতো। ছোটো-ছোটো গুটলি ছাড়া কিছু নেই—একটা তোরঙ্গ পর্যন্ত না।’

^১ Menshevik : বলশেভিকদের মতোই রাশিয়ার একটি সমাজতন্ত্রী দল; বলশেভিকদের সঙ্গে তাদের তফাৎ কেবল উগ্রতায়, যার চরম সীমায় বলশেভিকবাদ প্রতিষ্ঠিত।—অনুবাদের টীকা।

সন্দের দিকে ঠাণ্ডা পড়লো। তারা হাত-মুখ ধুয়ে নিয়েছিলো, মেয়েরা রাত্রের জন্য ঘরটা শুষ্কিয়ে ফেলেছে। সাশার অচেতন আশা ছিলো যে তার আধো-আধো কথা শুনে সবাই উচ্ছ্বসিত হবে, আর তাই, যেন অনুরোধ-রক্ষার্থে, অনর্গল ব'কে যাচ্ছিলো—কিন্তু এই একবার তাকে ফেল হ'তে হ'লো, কেউ তাকে লক্ষ্যই করলে না। তাই তার মেজাজটিও বিগড়ে আছে। সে নিরাশ হয়েছিলো কালো রঙের বাচ্চা ঘোড়াটিকে ঘরে আনা হয়নি ব'লে, তার ওপর মা যখন তাকে ধমক দিয়ে চুপ করতে বললেন সে ফুলে-ফুলে কাঁদতে শুরু ক'রে দিলে। সে জানে তার মা-বাবা তাকে দোকান থেকে কিনে এনেছেন, এবার তার ভয় হ'লো যদি তাকে দোকানে ফেরৎ পাঠিয়ে দেওয়া হয়। তার এই ভয়টা একেবারে খাঁটি, সে চাইলো অন্যদের কাছে এই ভয়ের কথা বলতে, কিন্তু সবাই এটাকে বাজে বলে উড়িয়ে দিলে— কেউ এতে মুগ্ধ হলো না। অচেনা জায়গায় স্বভাবতই খারাপ লাগছিলো তার, তার ওপর বয়স্করা সবাই যেন বড্ড তাড়াহড়ো করছে, নিঃশব্দে যে যার কাজে মগ্ন হ'য়ে আছে। সাশা রীতিমতো অপমানিত বোধ করলে; নানিরা যাকে বলে 'দাঁতখিচুনি', তাই ফলাতে শুরু ক'রে দিলো। তাকে খাইয়ে দিতে হ'লো, তারপর অনেক টানা-হেঁচড়ার পর শোয়ানো গেলো বিছানায়। অবশেষে সে যখন ঘুমিয়ে পড়লো, মিকুলিৎসিনদের দাসী উস্টিনিয়া এসে নিউশাকে তার ঘরে নিয়ে গেলো খাবার জন্য, আর খেতে-খেতে তাকে বাড়ির সব গোপন খবর দিতে শুরু করলে। টোনিয়া আর অন্যদের মিকুলিৎসিন সাক্ষ্য চায়ে নিমন্ত্রণ করেছিলো।

প্রথমে ইউরি তার স্বপুত্রের সঙ্গে বারান্দার খোলা হাওয়ায় বেরিয়ে এলো।

'ঈশ! কতো তারা উঠেছে!' আলেকজান্ডার আলেকজান্ড্রোভিচ বললেন।

ঘুটঘুটে অন্ধকার চারদিক। মাত্র কয়েক হাত দূরে দাঁড়িয়েও পরস্পরকে দেখতে পাওয়া যাচ্ছিলো না। পেছনের একটি জানলা থেকে আলোর রেখা এসে খাদের দিকে চ'লে গেছে; ঠাণ্ডা স্যাৎসেতে হাওয়ায় অস্পষ্ট সব ছায়া দেখা গেলো ঢালুর কাছে—ঝোপঝাড় গাছপালা ও অন্য জিনিসের ঝাপসা অবয়ব মাথা চাড়া দিয়ে উঠেছে সেখানকার অন্ধকারে। কিন্তু ইউরি আর আলেকজান্ডার এই আলোর বাইরে ছিলেন, তাই তাতে আরো নিবিড় হ'য়ে উঠলো চারপাশের অন্ধকার।

'ইউরি, কাল আমাদের প্রথম কাজ হ'লো সেই কটেজটি দেখে আসা, যেখানে আমাদের তোলবার কথা ভাবছে সে। যদি সেটা কোনোরকমে বাসযোগ্য হয় তো সঙ্গে-সঙ্গে তার মেরামতে লেগে যাবো। তারপর, যতোদিনে সেটা বাসযোগ্য হ'য়ে উঠবে, ততোদিনে বরফ গলতে শুরু করবে, তখন একটুও সময় নষ্ট না-ক'রে আমরা জমি খোঁড়ার কাজে লেগে যেতে পারবো। আমাদের কিছু আলুর বীজ দেবে ব'লেই তো বললো, তা-ই না?'

'তা-ই তো বললো। অন্য আরো বীজ দেবে ব'লে কথা দিয়েছে। নিজের কানে একথা বলতে শুনেছি। আর কটেজ? সেটা তো আমরা পার্কের ওপর দিয়ে-আসবার সময়েই দেখেছি। কোনটা, বুঝতে পেরেছেন? পেছনদিকের ঐ কাঠের বাড়িটা, কাঁটাবনের জন্য প্রায়ই চোখে পড়ে না। আমি আপনাকে দেখিয়েছিলাম, মনে আছে? চাষের পক্ষে ভালো হবে ব'লে মনে হয়েছিলো আমার। তখন ভেবেছিলাম এককালে সেখানে ফুলের বাগান ছিলো, অজ্ঞত দূর থেকে তা-ই মনে হয়েছিলো। অবশ্য আমার ভুল হ'তেও পারে। ফুলগাছের জন্য জমিতে নিশ্চয়ই অনেক সার দিতে হয়েছিলো; মনে হচ্ছে জমির অবস্থা এখনো ভালো।'

'ঠিক বোঝা যাচ্ছে না। কাল গিয়ে একবার দেখে আসা যাবে। এখন বোধহয় আগাছার জঙ্গল হ'য়ে আছে, আর জমিও পাথরের মতো শক্ত। বাড়ির আশে-পাশে কোথাও একটা সজ্জিবাগান নিশ্চয়ই ছিলো। এখন হয়তো কাজে আসে না। কাল সেটা খুঁজে বের করতে হবে।

হয়তো সকালের দিকে এখনও বরফ জমে থাকে মাটিতে। রাত্রে তো নির্ধাৎ বরফ পড়বে। সে যাই হোক—এখানে যে পৌছতে পেরেছি এই ঢের, এইজন্যেই কতজ্ঞ থাকা উচিত। জায়গাটা বেশ ভালো। আমার বেশ লাগছে।’

‘এরা লোকও ভালো, বিশেষ করে মিকুলিৎসিন। তার বৌকে একটু ন্যাকা মনে হ’লো। তার নিজের মধ্যে কিছু-একটা আছে, যা সে পছন্দ করে না। সেজন্যই এতো বেশি কথা বলে, আর আসলে যতোটা বোকা তার চেয়েও ঢের বেশি বোকা বানিয়ে তোলে নিজেকে। বড্ড ব্যস্ত হ’য়ে থাকে যাতে তার চেহারা কেউ লক্ষ্য না করে—পাছে খারাপ কোনো ধারণা হয়। আর ঐ তার টুপি খুলতে ভুলে যাওয়া, আর গলায় সেটাকে ঝুলিয়ে রাখা—এটা কিন্তু অনামনস্কতা নয়, সে জানে যে ও-ভাবে তাকে ভালো দেখায়।

‘এবার আমাদের ভেতরে যাওয়া উচিত কিন্তু, নয়তো ওরা অভদ্র ভাবে।’

খাবার ঘরে টোনিয়া গৃহস্থামীদের সঙ্গে ঝোলানো আলোর তলায় গোল টেবিলে বসে চা খাচ্ছিলো। মিকুলিৎসিনের অঙ্ককার পড়ার ঘর পেরিয়ে তারা খাবার ঘরে গিয়ে ঢুকলো।

পাহাড়ী পথের দিকে একটা বিশাল জানলা ঘরের, প্রায় দেয়ালের মতো চওড়া। আগে, যখন আলো ছিলো, ইউরি সেখান থেকে খাদ আর তার ওপাশের সমতলের দৃশ্য দেখেছিলো, ব্যাকাসের সঙ্গে যে-সমতল তারা পেরিয়ে এসেছে। জানলার কাছে নকশা আঁকার একটা টেবিল, সেটাও দেয়ালের সমান চওড়া। লম্বা হ’য়ে একটা বন্দুক প’ড়ে আছে তার ওপর, তবু দু’পাশে প্রচুর ফাঁকা প’ড়ে আছে, তাইতে বোঝা যায় টেবিলটি কতো বড়ো।

ঘরটি পার হ’য়ে যেতে-যেতে ইউরি ভাবলে জানলাটির কথা, জানলার পাশে টেবিলটি কতো বড়ো, আর কী খোলামেলা সাজানো এই বাড়ি—ভেবে আর-একবার ঈর্ষা হ’লো তার। খাবার ঘরে ঢুকে প্রথমেই সে এই কথা বললে:

‘কী সুন্দর বাড়ি আপনাদের। কী চমৎকার ঐ পড়ার ঘরটা, বসে কাজ করার পক্ষে নিখুঁত, একেবারে সর্বাসুন্দর।’

‘গ্লাশে দেবো, না পেয়ালায়? কী পছন্দ করেন, কড়া? না পাতলা?’

‘ইউরি, দ্যাখো! একটা স্টেরিওস্কোপ। আভেরসিয়াস স্টেপানোভিচের ছেলে ছেলেবেলায় বানিয়েছিলো এটা।’

‘এখনো ও বড়ো হয়নি, মাথাও ঠাণ্ডা হয়নি—যতোই না সোভিয়েটের জন্য জেলার পর জেলা জিতে নিক কমুখ-এর কাছে থেকে।’

‘কমুখ কাকে বলে?’

‘কমুখ হ’লো সাইবেরীয় সরকারের সেনা-বাহিনী। সংবিধানসভার ক্ষমতা পুনরুদ্ধারের জন্য লড়াই করছে তারা।’

‘সারাদিন শুধু তোমার ছেলের প্রশংসাই শুনলাম। নিশ্চয়ই তার জন্য তোমাদের গর্বের সীমা নেই।’

‘স্টেরিওস্কোপের জন্য উরালের ঐ ছবিগুলিও তার তোলা—নিজের বানানো ক্যামেরা দিয়ে তুলেছিলো।’

‘কী ভালো বিস্কুট! স্যাকারিন দিয়ে তৈরি?’

‘সে কী! এই জঙ্গলে স্যাকারিন কোথায়? এ একেবারে নির্ভেজাল চিনি দিয়ে বানানো। আপনার চায়ে চিনি দিতে দেখলেন না আমাকে?’

‘ঠিক তো! ফোটোগুলো দেখছিলাম বলে লক্ষ্য করিনি। আর মনে হচ্ছে যেন চা-টাও খাঁটি চা!’

‘নিশ্চয়! জুইফুলের গন্ধ-মেশানো চা।’

‘কী আশ্চর্য! পেলেন কোথায়?’

‘এক উড়ন্ত গালিচা আছে আমাদের। আমাদের এক বন্ধু—নতুন ধরনের জননেতা, ভীষণ বামপন্থী। প্রাদেশিক অর্থনৈতিক পরিষদের সরকারি প্রতিনিধি। সে আমাদের কাঠ নিয়ে যায় শহরে, আর বন্ধুবান্ধবদের কাছ থেকে ময়দা আর মাখন এনে দেয় আমাদের। সিঁড়ি, চিনিটা এদিকে দাও তো,’ (হেলেন আদর ক’রে এই নামে ডাকে আন্ডারসিয়াসকে)। ‘আচ্ছা কেউ বলতে পারেন গ্রিবয়েডভ কোন সালে মারা যান?’

‘বোধহয় ১৭৯৫ সালে তাঁর জন্ম হয়েছিল। কিন্তু কবে নিহত হন, সেই তারিখটা ঠিক মনে পড়ছে না।’

‘আর চা দেবো?’

‘না, ধন্যবাদ।’

‘আচ্ছা, আপনি বলুন তো। নিমণ্ডয়েগেনের সন্ধি কবে স্বাক্ষরিত হয়, আর কোন-কোন দেশ তাতে স্বাক্ষর করে?’

‘এখন এঁদের বিরক্ত কোরো না, লক্ষীটি। এখনো রাস্তার ধকল এঁরা কাটিয়ে উঠতে পারেননি।’

‘আমি যেটা জানতে চাচ্ছি, এবার সেটা বলি। কতো ধরনের লেল আছে বলুন তো, আর প্রতিচ্ছায়াগুলি কখনই বা সত্যিকার হয়, কখন স্বাভাবিক থাকে, আর কখনই বা উন্টে যায়?’

‘পদার্থবিদ্যার এতো খবর কোথেকে পেলেন আপনি?’

‘ইউরিয়্যাটিনে আমাদের খুব ভালো একজন বিজ্ঞান-শিক্ষক ছিলেন। শুধু আমাদের না, ছেলেদের স্কুলেও পড়াতেন তিনি। এতো ভালো যে কী বলবো আপনাকে—একেবারে আশ্চর্য! যখন তিনি বুঝিয়ে বলতেন, সব জলের মতো সহজ হ’য়ে যেতো। তাঁর নাম ছিলো আন্টিপভ। তাঁর স্ত্রীও ছিলেন শিক্ষয়িত্রী, মেয়েরা সবাই তাঁর নামে পাগল—সবাই প্রেমে প’ড়ে গিয়েছিলো তাঁর। স্বেচ্ছাসেবক হ’য়ে যুদ্ধে গিয়েছিলেন আন্টিপভ—সেখানেই মারা যান। কেউ-কেউ অবশ্য বলে, আমাদের পক্ষে যিনি অভিশাপের মতো, সেই কমিসার স্ট্রেলনিকভই আসলে আন্টিপভ—ম’রে গিয়ে ফের বেঁচে উঠেছেন। অবশ্য এটা গুজবমাত্র; বোকাদের গুজব। এ-রকম কি হ’তে পারে কখনো? তা— কে জানে— হয়তো সবই সম্ভব। আরেকটু চা?’

পরিচ্ছেদ ৯

ভারিকিনো

১

শীতের সময়, হাতে অনেক সময় পেয়ে, ইউরি একটি দিনপঞ্জী লিখতে শুরু ক'রে দিলো।
টিয়ুৎচেভ-এর একটি উদ্ধৃতি দিয়ে সে সূচনা করলে:

‘কী এক গ্রীষ্ম! কী এক গ্রীষ্ম!

ঠিক যেন জাদুমন্ত্রে পাওয়া।

আমরা চাইনি একে, এর যোগ্য নই আমরা,

তবু কেমন ক'রে পেলাম, তা-ই প্রশ্ন।’

‘গত গ্রীষ্মের দিনগুলোয় প্রায়ই আমার এই রকম বোধ হ'তো। কী আনন্দ—নিজের আর পরিবারের জন্য সকাল থেকে সন্ধ্য পর্যন্ত কাজ ক'রে। তাদের মাথার ওপর ছাদ তৈরি ক'রে দেওয়া, তাদের আহারের জন্য লাঙল চালানো, নিজের একটি আলাদা পৃথিবী গ'ড়ে তোলা—ঠিক যেন রবিনসন ক্রুসো বিশ্বকোষের অনুকরণ করছে; আর এর ভেতর দিয়ে আসে জীবন, বারে-বারে আসে, আর নিজেকেই মনে হয় নিজের জন্মদাত্রী ব'লে।

‘যখন কঠিন শারীরিক কাজের মধ্যে হাত দুটো ব্যস্ত থাকে, যখন মনের প্ররোচনায় এমন একটি কাজে নিরত হ'য়ে আছি যা কেবল কায়িক শ্রমের মধ্য দিয়েই সফল হ'য়ে ওঠে আর এনে দেয় আনন্দ আর কৃতকার্যতার পুরস্কার, যখন ছ-ঘণ্টা ধ'রে ক্রমাগত মাটি কোপাচ্ছি কি হাতুড়ি চালাচ্ছি, আর আকাশের প্রাণদ নিঃশ্বাসে শরীর ঝলসে যাচ্ছে, তখন কতো যে নতুন চিন্তা মাথায় ঘোরাফেরা করে তার কোনো ইয়ত্তা নেই। আর এই ক্ষণিক ভাবনা, স্বপ্নের উন্মাদনা, উপমার গুঞ্জল লিখে না-রাখার ফলে একটু পরেই তা যে হারিয়ে যায়, এটাকে কোনো লোকসান না-ব'লে লাভ বলাই ভাল। শহরের যে-সম্মাসী তার স্নায়ু ও কল্পনাকে কড়া কালো কফি আর তামাকের চাবুক মেরে চেতিয়ে তোলার চেষ্টা করে, সে পৃথিবীর সবচেয়ে কড়া ভেষজের সন্ধান জানে না, যেটা হ'লো স্বাস্থ্য আর সত্যিকার অনটন।

‘এর চেয়ে বেশি আর-কিছু আমি বলবো না, কেননা টলস্টয়ী সরলতার মতবাদ এবং “মাটির কাছে ফিরে যাও” এমন কোনো নীতিপ্রচারের কোনো উদ্দেশ্য আমার নেই; ভূমি সমস্যার কোনো স্বকল্পিত সমাধান বা এ-সম্পর্কে সমাজতন্ত্রী দৃষ্টিভঙ্গির সংশোধন—এ-সব বিষয়েও চিন্তা করছি না আমি। আমি কেবল একটি তথ্যকে প্রতিষ্ঠিত করতে চাচ্ছি; আমাদের নিজেদের কথা মনে রেখে কোনো রীতিপদ্ধতি বানিয়ে তোলাও আমার উদ্দেশ্য নয়। আমাদের ব্যাপারটা বড় বেশি আকস্মিক, তাছাড়া আমাদের অর্থনীতিও বড়ো বেশিরকম মিশ্রিত; বস্তুত আমরা মোটেও স্বাবলম্বী নই; আলু আর শাকসব্জি—যা আমরা নিজেরা ফলাই, তা শুধু আমাদের চাহিদার একটা ছোট্ট অংশমাত্র; বাকি সব-কিছু অন্য কোনোখান থেকে আনতে হয়।

‘যে-ভাবে আমরা জমি ব্যবহার করছি, তা বেআইনি। আইন আমরা নিজেরাই তৈরি ক'রে

নিয়েছি, কী করছি না-করছি সমস্তই রাষ্ট্রের কাছ থেকে গোপন রাখছি। যে-কাঠ আমরা কেটে আনি, তা চুরি করা: সে-চুরি রাষ্ট্রের ভাণ্ডার থেকে করা হচ্ছে বা এটা জেগারদেরই সম্পত্তির অংশ—এ-সব কোনো অভ্যুত্থান নয়। মিকুলিৎসিন আমাদের ঝাঁচিয়েছে, সে সব-কিছু গোপন ক'রে রাখে (তাকেও তো আমাদেরই উপায়ে জীবিকা নির্বাহ করতে হয়), আর শহর থেকে এ-জায়গাটা অনেক দূর ব'লে—ঈশ্বরকে ধন্যবাদ আমরা কী করি না করি, তা এখনো তারা জানতে পারেনি।

‘আমি যে একজন ডাক্তার, এই তথ্যটা আমি সম্ভরণে চেপে রেখেছি, কেননা আমার স্বাধীনতা এতোটুকুও ক্ষুণ্ণ কবার ইচ্ছে আমার নেই। কিন্তু সর্বদাই আশে-পাশে এমন একজন ক'রে ভালোমানুষ থাকেন, যিনি কী ক'বে যেন জেনে ফেলেন যে ভারিকিনোতে একজন ডাক্তার থাকেন। কাজেই আমার সঙ্গে দেখা করবার জন্য লোকেরা কষ্ট ক'রে কুড়ি মাইল পথ হেঁটে আসে, দর্শনী হিসেবে সঙ্গে আনে একটি মুরগি কি গোটাকয়েক ডিম, নয়তো নিদেনপক্ষে একটু মাখন। আর শেষটায় আমাকে বাধ্য হ'য়েই ও-সব নিতে হয়, কারণ বিনি পয়সায় পাওয়া ওষুধে কোনো কাজ হয় না বলেই লোকের বিশ্বাস। সুতরাং আমার প্র্যাকটিস থেকে অল্প-স্বল্প রোজগারও হয়; কিন্তু মিকুলিৎসিনের আব আমার, দুজনেরই প্রধান অবলম্বন হ'লো সামাডেভইয়াডিভ।

‘অদ্ভুত তাব চরিত্র, জটিল। লোকটা যে কী, এখনো পুরোপুরি বুঝে উঠতে পারিনি। বিপ্লবের ঐকান্তিক সমর্থক সে, আর তাই ইউরিয়্যাটিন সোভিয়েটের সম্পূর্ণ আস্থার সে যোগ্য। সোভিয়েট তাকে যে-ক্ষমতা দিয়েছে তার সাহায্যে সে আমাকে বা মিকুলিৎসিনকে একবারও জিজ্ঞেস না-ক'রে ভারিকিনোর সমস্ত কাঠ নিয়ে যেতে পারে। আমরা যে এ-বিষয়ে কিছুই করতে পারবো না, এটা সে ভালো ক'রেই জানে। আবার, অপর পক্ষে, সে যদি সরকারি টাকা লুট করতে চায় তো অনায়াসেই দু-পকেট ভর্তি করতে পারে, তাতেও কেউ টু শব্দটি করবে না। এমন আব কোনো লোক নেই যাকে এ-জন্য ঘুষ দিতে হবে বা যে বখরা বসাতে পারে, কাজেই কেন যে সে আমাদের—মিকুলিৎসিন ও স্টেশন-মাস্টার থেকে শুরু ক'রে জেলার সকলের—সুখ-সুবিধের প্রতি এতোটা নজর রাখে ও সতর্ক থাকে, তা বুঝে ওঠা শক্ত। প্রতি মুহূর্তেই এ-জায়গা থেকে ও-জায়গায় ছুটোছুটি ক'রে বেড়াচ্ছে সে, আর এই ছুটোছুটি শুধু আমাদেরই জন্য কোনো-কিছু জোগাড় করবার উদ্দেশ্যে। ‘ডস্টয়েভস্কির ‘ভূতে-পাওয়া’ উপন্যাসের সঙ্গে তার যেমন অনায়াস পরিচয় আছে, ঠিক তেমনি আছে ‘কমিউনিস্ট ইস্তাহারের’ সঙ্গে; দুটো বই নিয়েই সে সমান দক্ষতার সঙ্গে আলোচনা করতে পারে। আমার মনে হয় সে যদি এমন উদার অশাস্তভাবে তার জীবনটাকে জটিল ক'রে না-তুলতো তাহ'লে বৈচিত্র্যহীনতার দূর্বিসহতার দরুন মৃত্যু ঘটতো তার।’

২

অল্প কিছুদিন পরে ইউরি লিখলো:

‘পুরোনো বাড়ির পেছন দিকের কাঠের তৈরি সংযোজিত অংশের দুটি ঘরে আমাদের বাসা। আনা ইভানোভনার ছেলেবেলায় জেগার এটাকে বাড়ির বিশেষ-বিশেষ কর্মচারীর জন্য ব্যবহার করতেন—তখন এখানে থাকতো মেয়ে-দরজি, ঘরকন্নার পরিচালিকা, আর অবসর-পাওয়া একজন নার্স।

‘আমরা এসে দেখেছিলাম জীর্ণ বাড়িটা প্রায় ধ্বংস হ'তে চলেছে, কিন্তু আমরা বেশ

তাড়াতাড়িই বাড়টা সারিয়ে নিলাম। যারা এ-সব বিষয়ের খবরাখবর রাখে তাদের সাহায্যে চুল্লিটা আবার তৈরি ক'রে নিলাম, ঐ একই চুল্লিতে দু-ঘরের কাজ চলে। চিমনিগুলোকে এমনভাবে নতুন ক'রে বসানো হ'লো যাতে আগের চেয়ে বেশি তাপ পাওয়া যায়।

'জমির এই অংশে পুরোনো বাগান অদৃশ্য হ'য়ে গেছে—নতুন আগাছা নিশ্চিহ্ন ক'রে দিয়েছে তাকে। কিন্তু এবার শীত এসে যখন সব শেষ ক'রে দিলে, জীবন্ত আর মৃতকে লুকিয়ে রাখতে পারলে না, তখন তুষারের রেখার ধারে-ধারে অতীতকে আরো স্পষ্ট দেখা যাচ্ছে।

'ভাগ্য ভালো ছিলো আমাদের। হেমন্ত এলো শুকনো আর উষ্ণ। তার ফলে বর্ষাবাদলের ঠাণ্ডা আবহাওয়া এসে পড়ার আগেই আলু খুঁড়ে তোলার সময় পাওয়া গেলো। মিকুলিৎসিনকে ফিরিয়ে-দেওয়া বস্তাগুলো হিসেবে না-খ'রেও আমরা কুড়ি বস্তা আলু পেয়েছিলাম। ভাঁড়ারের সবচেয়ে বড়ো পিপেয় সেগুলি বোঝাই ক'রে রেখে তার ওপর খড় আর পুরোনো কব্বল বিছিয়ে ঢেকে রাখলাম। দুটো পিপেয় রাখা হ'লো নুন-মাখানো শসা; আর টোনিয়া জার্মান কায়দায় বাধাকপি জারিয়েছিলো, তাও রাখা হ'লো দুই পিপে ভর্তি ক'রে। কয়েকজোড়া তাজা বাধাকপি কড়িকাঠ থেকে বুলিয়ে দেওয়া হ'লো। শুকনো বালিতে গুঁতে রাখা হ'লো গাজর, মুলো, বাঁট, শালগমও তাই, আর মটরগুটি আর শিম দিয়ে চিলেকোঠা ভর্তি ক'রে রাখলাম। এদিকে যাতে বসন্ত পর্যন্ত চ'লে যায়, সেই অনুপাতে প্রচুর পরিমাণে জ্বালানি কাঠ জমিয়ে রাখা হ'লো বাইরের চালায়।

'ভাঁড়ারের শুকনো উষ্ণ নিশ্বাস ভালোবাসি, ভালোবাসি মাটির আর শেকড়ের গন্ধ, আপনি ঝাঁপি তোলামাত্র বরফের যে-গন্ধ আঘাত করে আপনাকে—শীতের ভোরবেলার আগেকার সেই মুহূর্তে, একটি দুর্বল কম্পমান আলো হাতে নিয়ে আপনি দাঁড়িয়ে।

'আপনি বেরিয়ে এলেন, তখনো অন্ধকার। কঁকিয়ে উঠলো দরজা, কি হয়তো ইঁচি এলো আপনার, নয়তো পায়ের তলায় মচমচ করে উঠলো বরফ, দূরে বাধাকপির খেতে চমকে উঠলো খরগোসের দল, লাফিয়ে ছুটে পালালো তঙ্কুনি, বরফের ওপর র'য়ে গেলো শুধু কতোগুলো কাটাকুটির দাগ, তাদের চ'লে যাবার চিহ্ন। দূরে কুকুরেরা চ্যাচামেচি শুরু ক'রে দিয়েছে, অনেক দেরি না-ক'রে তারা থামবে না। মোরগেরা তাদের ডাক বন্ধ করেছে, আর-কিছু বোধহয় তাদের বলার নেই। তারপর ভোর।

'খরগোসদের মতোই বনবেড়ালের পায়ের ছাপে অন্তহীন তুষার-প্রান্তর নকশার মতো হ'য়ে আছে; গুঁতির মালার মতো ছড়িয়ে আছে অনেক আকাঁধাকা রেখা। বেড়ালের মতোই চলার ধরন বনবেড়ালের—একটির পর আর—একটি থাবা বাড়িয়ে দেয়; লোকে বলে, এক রাত্রে তারা অনেক মাইল চ'লে যায়।

'তাদের জন্য ফাঁদ পেতে রাখা হয়। কিন্তু এই সব সাবধানী বনবেড়ালের বদলে ধরা পড়ে বেচারি খরগোসেরা; বরফ প'ড়ে এমনিতেই অর্ধেক কবর হ'য়ে গেছে তাদের; ফাঁদ থেকে যখন তাদের বের ক'রে নেয়া হয়, তখন তারা জ'মে কাঠ হ'য়ে গেছে।

'প্রথমটায়, বসন্ত আর গ্রীষ্মের দিনগুলোতে, আমাদের ভারি কষ্ট কেটেছিলো। যুদ্ধ ক'রে-ক'রে কোনোরকমে শুধু টিকে থাকা। কিন্তু এখন, শীতের এই সম্মেলনোতে আমরা একটু এলিয়ে পড়তে পারি আরামে। শামডেভইয়াটভকে ধন্যবাদ, সে-ই আমাদের প্যারায়িন জ্বৈগাড ক'রে দিয়েছিলো। তাই তো বাতির চারপাশে বসতে পারছি আমরা। মেয়েরা কেউ শেলাই করে

১ Cellar : মাটির তলার ঘর, ভাঁড়ার হিসেবে ব্যবহার করা হয়।—অনুবাদের টীকা।

২ Lynx : মার্কাজাতীয় কুহু মাংসখী চতুষ্পদ, য়োরোপ ও আমেরিকায় পাওয়া যায়, তীক্ষ্ণ দৃষ্টিশক্তি জনা বিখ্যাত।—অনুবাদের টীকা।

বা পশম বোনে, আর আলেকজান্ডার আলেকজান্ডারভিচ কি আমি কিছু প'ড়ে শোনাই। চুল্লি বেশ গরম থাকে, আর আমার ওপরই ভার থাকে আগুন খোঁচাবার কি কাঠ দেবার, আর আমিই তৈরি থাকি সময়মতো লোহার পাত বন্ধ ক'রে দেবার জন্য, যাতে একটুও তাপ নষ্ট না হয়। যদি কখনো কোনো পোড়া কাঠের জন্য তাপ পোতে অসুবিধে হয়, আমি সেই ধোয়া-ওঠা কাঠ হাতে নিয়ে ছুটে বেরোই, তারপর যাতে দূরে সম্ভব ববফের ওপর ছুড়ে ফেলি। মশালের মতো উড়ে যায় কাঠটা, চারদিকে ফুলকি ছড়িয়ে পড়তে থাকে, পার্কের শাদা-শাদা চৌকো ফালিগুলো আলো হ'য়ে ওঠে, তাবপর শিস দেবার মতো আওয়াজ ক'রে সেটা ববফের ঝাপটার মধ্যে মিলিয়ে যায়।

“সংগ্রাম ও শান্তি”, “ইউজেনে ওনেগিন” ও পশকিনের অন্যান্য কবিতা বারে-বারে পড়লাম আমরা। স্তাদালের “লাল-কালো”, ডিকেন্সের “দুই নগরীর উপাখ্যান” আর ক্লাইস্টের ছোটগল্পের রুশ তর্জমাও একাধিকবার পড়া হ'লো।

৩

বসন্ত যখন আসয়, ইউরি লিখলো:

‘মনে হচ্ছে টোনিয়া অস্তঃসন্ধ্যা। এ-কথা তাকে বলেছি আমি, কিন্তু সে কিছুতেই বিশ্বাস করে না, অথচ এ-বিষয়ে আমার কোনো সন্দেহই নেই। প্রাথমিক লক্ষণগুলিতে কিছুই ভুল হবার নেই; পরবর্তী নিশ্চিত লক্ষণগুলির জন্য অপেক্ষা করা আমার পক্ষে নিশ্চয়োজন।

‘এ-রকম সময়ে মেয়েদের মুখের চেহারা বদলে যায়। এমন নয় যে দেখতে সে নিশ্চিহ্ন হ'য়ে যায়, কিন্তু তার চেহারার ওপর তার নিজের আর কর্তৃত্ব থাকে না। যে-ভবিষ্যৎকে সে বহন করছে, তা তাকে দখল ক'রে নিয়েছে, সে শুধুমাত্র সে আব নয়। নিজের চেহারার ওপর এই কর্তৃত্ব হারানোর ফলে তাকে শারীরিকভাবে কেমন বিমূঢ় দেখায়; তার মুখ স্নান হ'য়ে আসে, কর্কশ হ'য়ে যায় দেহের মসৃণতা, তখন চোখ জ্বলতে থাকে অন্য এক ভাবে, যে-ভাবে সে চায় তা আর নয়; মনে হয় যেন এ-সব ব্যাপারের সঙ্গে আর তাল রাখতে না-পেরে সে হাল ছেড়ে দিয়েছে।

‘টোনিয়া আর আমার মধ্যে কখনো বিচ্ছেদ আসেনি, আর এই কর্মবহুল বছরে আমরা পরস্পরের আরো কাছে চ'লে এসেছি। আমি লক্ষ্য করেছি সে কী-রকম চটপটে, শক্তসমর্থ আর ক্লাস্তিহীন; কেমন বুদ্ধি ক'রে সব কাজ গুছিয়ে করে, যাতে দুটো কাজের মধ্যখানে সবচেয়ে কম সময় নষ্ট হয়।

‘বরাবর আমার মনে হয়েছে যে সব গর্ভসঞ্চারই নিষ্ফলুষ, আর ঈশ্বর জননী-সংক্রান্ত এই মতবাদে নিখিলমাতৃত্বের ধারণাটিকে ব্যক্ত করা হয়েছে।

‘সন্তানের জন্ম দেবার সময় সব নারীকে একই নিঃসঙ্গতা ঘিরে থাকে, যেন সবাই তাকে ত্যাগ করেছে, যেন সে একেবারে একলা। সেই চরম মুহূর্তে পুরুষের ভূমিকা এমন অবান্তর হ'য়ে যায় যেন এই ব্যাপারের সঙ্গে তার কখনোই কোনো সম্পর্ক ছিলো না, যেন সম্পূর্ণ ব্যাপারটাই অকারণ ও অযাচিত।

‘নারী, একা নারী, সন্তানের জন্ম নিয়ে থাকে। তারাই তাকে নিয়ে যায় ওপরতলায়, জীবনের কোনো-এক উচুতলায় দোলাবার মতো কোনো শান্ত, নিরাপদ স্থানে। একা, স্তব্ধতা ও নশ্বতার মধ্যে, তারাই লালন করে শিশুকে।

“ঠাঁর পুত্র ও ঠাঁর ঈশ্বরের কাছে ঐকান্তিক প্রার্থনা” করতে বলা হয়েছিলো ঈশ্বরজননীকে, এই স্তবগান কসানো হয়েছিলো ঠাঁর মুখে: “আমার আত্মা প্রভুকে বৃহৎ করেছে, আমার প্রাণ

পুলকিত হয়েছে ঈশ্বরের মধ্যে, যিনি আমার মুক্তিদাতা। কেননা তিনি সম্মান দিয়েছেন তাঁর দাসীর দীনতাকে: তাই শোনো, এখন থেকে বংশপরম্পরায় মানুষ আমাকে পুণ্যময়ী বলবে।” তাঁর নবজাত শিশুর জন্যই এ-কথা বলেছেন তিনি, তিনি তাঁকে বহুৎ করবেন (“কেননা, সেই তিনি যিনি সর্বশক্তিমান, তিনিই আমাকে মহৎ করেছেন”); সেই শিশুই তাঁর গৌরব। যে-কোনো নারী বলতে পারে এ-কথা। কেননা, তাদের প্রত্যেকের কাছে ঈশ্বর তাদের শিশুর মধ্যে প্রকাশিত হয়েছেন। মহাপুরুষদের মাতারা নিশ্চয়ই এটি বিশেষভাবে অনুভব করেছেন। কিন্তু, সেই সূচনার সময়, সব নারীই তো মহাপুরুষের জননী—পরে যে জীবন তাদের হতাশ করে, সেটা তো তাদের দোষ নয়।’

৪

“ইউজেনে ওনেগিন” আর কবিতাগুলি আমরা অফুরন্তভাবে বারবার পড়ছি। কাল সামডেভইয়াটভ এসেছিলো, অনেক উপহারও এনেছিলো সঙ্গে—ভালো-ভালো খাবার, আর বাতির জন্য তেল। আট বিষয়ে অন্তহীন আলোচনা হ’লো।

‘আমার বরাবরই মনে হয়েছে যে আট এমন কোনো পদার্থ নয়, যার পরিধির মধ্যে অসংখ্য ধারণা আর বহু বিচিত্র প্রকাশের অবকাশ আছে। বরং আট ঠিক তার বিপরীত ব’লেই আমার মনে হয়: তা হ’লো এমন কোনো বস্তু যা নিবিড়ভাবে ঘনীভূত এবং কঠিনভাবে সীমায়িত। তাকে বলতে পারি একটি মূলনীতি, যা প্রত্যেক শিল্পকর্মে প্রবেশ করে, একটি ক্ষমতা, যা কাজ করে তার মধ্যে, একটি সত্য, যা তা থেকে বেরিয়ে আসে। একে বলা যায় না রূপকল্প, বরং এটাই হচ্ছে আধেয়বস্তুর সংগোপন রহস্য। আমার কাছে এ-সবই দিনের আলোর মতো স্পষ্ট। এ আমি হাড়ে-হাড়ে অনুভব করি, কিন্তু ভাষায় প্রকাশ করা বা বুঝিয়ে বলা ভারি শক্ত।

‘কোনো শিল্পকর্ম নানা দিক থেকে আমাদের কাছে আবেদন জানাতে পারে—শীম, বিষয়বস্তু, ঘটনাবলীর জটিলতা, চরিত্রায়ণ। কিন্তু সবার আগে যা আমাদের মনে দোলা দেয় তা হ’লো শিল্পের অস্তিত্ব। “দুষ্ক্রিয়া ও শান্তি”^১ পড়তে গিয়ে রাস্কলনিকভের দুষ্ক্রিয়ার চেয়ে বরং শিল্পের উপস্থিতির দরুনই আমরা অনেক বেশি বিচলিত হ’য়ে পড়ি।

‘শিল্পে কোনো বহুত্ব নেই। আদিবাসীর শিল্প, মিশরের শিল্প, গ্রীসের কি আমাদের নিজেদের—সব, আমার মনে হয়, আসলে একই, এক এবং অদ্বিতীয়, হাজার-হাজার বছর ধরে যা অবিকল থেকে যায়, এ হ’লো সেই। একে একটা ধারণা বলতে পারেন আপনি, কিংবা বলতে পারেন জীবন সম্বন্ধে কোনো বিবৃতি, এমন সর্বব্যাপী যে টুকরো-টুকরো কথায় একে বিভক্ত করা কিছুতেই সম্ভব হয় না। কোনো সৃষ্টিকর্মের মধ্যে যদি অন্য বহু উপাদানের সঙ্গে এর একটি কণামাত্র থাকে তো দেখা যাবে সেই এক কণা শিল্প এই অন্য সব উপকরণকে ছাপিয়ে তার সারাংশের হ’য়ে উঠেছে, হ’য়ে উঠেছে তার আত্মা আর মর্মস্থল।’

৫

‘ঈষৎ সর্দি, কাশি, হয়তো বা একটু জ্বর-জ্বর ভাব। নিশ্বাসের কষ্ট গেছে সারাদিন, বাগ্যন্ত্রের ঈষৎ সংকোচন, গলাটা আটকে আছে যেন। লক্ষণ ভালো নয়। নিশ্চয়ই আমার হৃৎপিণ্ডই এর কারণ। মায়ের দিকের বংশগতির প্রথম সতর্কবাণী—আজীবন মার হাটের অসুখ ছিলো। সত্যিই

কি তাই? এতো শিগগির? যদি তাই হয়, তবে তো আর দীর্ঘজীবনের ওপর ভরসা রাখা চলবে না।

‘ঘরের ভেতর একটা আবছা পোড়া গন্ধ। ইন্ড্রি করার গন্ধ। টোনিয়া ইন্ড্রি করছে; একটুক্কণ যেতে-না-যেতেই চুল্লি থেকে একটা ঝলসুত কয়লা এনে সে রাখছে ইন্ড্রির ভেতর, আর ইন্ড্রির ডালাটা এক পাটি দাঁতের মতো চট ক’রে কামড়ে ধরছে তাকে। দেখে আমার কী যেন মনে পড়তে চাচ্ছে, অথচ কিছুতেই মনে ক’রে উঠতে পারছি না। স্বাস্থ্য খারাপ হ’য়ে যাওয়ায় স্মৃতি শক্তিও নষ্ট হ’তে চলেছে।

‘সামডেভইয়াটভের উপহার-দেওয়া সাবানের আমরা সদগতি করলাম পুরো দু-দিন কাপড় কাচার ব্যবস্থা ক’রে। সাশা এই উপলক্ষে ইচ্ছেমতো ধুরন্তপনা ক’রে বেড়ালো। আমি এখন লিখছি, আর সে টেবিলের তলার তক্তার ওপর চেপে ব’সে সামডেভইয়াটভের ভঙ্গির নকল করছে। সামডেভইয়াটভ এখানে যখনই আসে তাকে একবার ক’রে স্নেজ চড়িয়ে আনে; এখন ঐভাবে ব’সে সে আমাকে স্নেজ-চড়াবার ভান করছে।

‘একটু ভালো বোধ করলেই জেলা লাইব্রেরিতে গিয়ে এই অঞ্চলের জাতিতত্ত্ব প’ড়ে আসবো। সবাই বলে লাইব্রেরিটা খুব ভালো, বিস্তর ভালো বই দান পেয়েছে। লিখতে ইচ্ছে করছে খুব। কিন্তু খুব তাড়াহুড়ো করতে হবে আমাকে, কেননা আমাদের বর্তমান অবস্থা অনুধাবন করতে-না-করতেই বসন্ত এসে পড়বে, আর তখন পড়া বা লেখার সময় পাবো না।

‘বিশ্বী মাথা-ধরা—দিনে-দিনে আরো খারাপ হচ্ছে। ভালো ঘুম হয় না। সেই ধরনের ঘোলাটে স্বপ্ন দেখলাম, জেগে উঠে যার একবিন্দুও মনে থাকে না। শুধু যে-অংশটা ঘুম ভাঙিয়ে দিলে, সেটুকুই মনে থেকে গেলো। এক নারীর কণ্ঠস্বর ঘুমের মধ্যে শুনতে পেলাম, এতো স্পষ্ট যেন চারদিকে প্রতিধ্বনি তুলছে। আমি মনে ক’রে বাখলাম সেই স্বর, মনের ভেতর একটানা গুনগুন করতে থাকলো, আর আমি মনে-মনে আমাদের যত মহিলাবন্ধু আছেন, তাদের তালিকা ব্যালিয়ে নিতে লাগলাম—মনে করতে চেষ্টা করলাম এমন গভীর, ভেজা, ভারি, নরম গলায় কথা বলতো কে। কিন্তু না, এই কণ্ঠস্বর তাদের কারো নয়। মনে হ’লো হয়তো টোনিয়ার, কিন্তু তার কথা শুনে-শুনে এতো অভ্যস্ত হ’য়ে গেছি যে এখন হয়তো তার গলার স্বর আর আমার কানে পৌঁছয় না। সে যে আমার স্ত্রী, এ-কথা ভুলে যাবার চেষ্টা করলাম। চেষ্টা করলাম তার থেকে যথেষ্ট পরিমাণে বিচ্ছিন্ন হ’তে, যাতে বুঝতে পারি এটা তার গলার স্বর কিনা। কিন্তু এটা তার কণ্ঠস্বরও নয়। রহস্যই থেকে গেলো।

‘স্বপ্নের কথা যখন উঠলেই, তখন বলি। সাধারণত এটা ধ’রে নেওয়া হয় যে লোকে তারই স্বপ্ন দেখে দিনে যা তার মনের ওপর বিশেষ গভীর দাগ কেটে যায়; আমার কিন্তু ঠিক এর উল্টোটাই মনে হয়।

‘প্রায়ই আমরা স্বপ্নে তা-ই দেখি, যা ঘটবার সময় আমরা কোনো মনোযোগ দিই নি—হয়তো সেই অস্পষ্ট ভাবনাই ঘুরে এলো স্বপ্নের ভেতর, যা শেষ পর্যন্ত ভেবে নেবার গরজ ছিলো না, হয়তো বেজে উঠলো সেই সব কথা, যা আবেগহীনভাবে বলা হয়েছিলো, যা কেউ লক্ষ্য করেনি তখন: এই সবই ফিরে আসে রাত্রি, স্বপ্নের ভেতরকার রক্তমাংসের জীবন্ত চরিত্র হ’য়ে ওঠে তারা তখন, যেন জাগ্রত মুহূর্তে তাদের অবহেলা করার জন্য ক্ষতিপূরণ আদায় ক’রে নেয় জোর ক’রে।

৬

‘পুশকিন সম্বন্ধে আলোচনা ক’রে চলেছি আমরা। সেদিন রাতে তাঁর সেই কবিতাগুলো নিয়ে আমরা কথা বলছিলাম, যেগুলি তিনি স্কুলে পড়ার সময় লিখেছিলেন। ছন্দ-নির্বাচনের ওপর কতো কিছু নির্ভর করে!

‘যতোদিন তিনি দীর্ঘ চরণ লিখেছিলেন ততোদিন তাঁর উচ্চাশার সীমা ছিলো আর্জামাস’-এর বন্ধুদের চমক লাগিয়ে দেওয়া। পুরাণ, বাগাডম্বর, সাংসারিক সুবুদ্ধি, ভোগবৃষ্টি, সারল্যবর্জন—সবই অভিনয় অবশ্য, কেননা বয়স্কদের ভারিকি চাল বজায় রাখতে হবে, আর কাকার^১ চোখে ধুলো দেওয়াও চাই।

‘কিন্তু যে-মুহুর্তে তিনি ওশন^২ ও পার্নির^৩ অনুকরণ করা ছেড়ে দিলেন, যে-মুহুর্তে তিনি “সারস্কোয়ে সেলোর স্মৃতিকথা”র বদলে লিখলেন “একটি ছোটো শহর” বা “আমার বোনের প্রতি—একটি চিঠি” বা “আমার দোয়াতের প্রতি” (এটি পরে কিশিনেভ-এ লেখা হয়েছিলো) অথবা “ইউডিন-কে”, তখনই পুশকিনের সম্পূর্ণতাকে আমরা পেয়ে গেলাম।

‘যেন মুহুর্তের মধ্যে খোলা জানলা দিয়ে রাস্তা থেকে ঘরে এসে ঢুকলো হাওয়া, আলো, জীবনের কলরোল, বস্তুর পর্যাপ্ত সম্ভাসার। বাস্তব, বাইরের জগতের জিনিসগুলো, নিত্য ব্যবহৃত জিনিস, তাদের নাম, সাধারণ বিশেষ্য-পদ—সব যেন ফেটে পড়লো তাঁর কবিতার মধ্যে, অধিকার ক’রে নিলো, দূর হ’লো শব্দব্যবহারের অস্পষ্টতা, নিয়ে এলো বস্তু—আরো বেশি বস্তু, সারি-সারি মিল বেঁধে দাঁড়িয়ে গেলো পৃষ্ঠার ওপর।

‘যা পরে এতো বিখ্যাত হয়েছিলো, সেই আট মাত্রার ছন্দ যেন রাশিয়ার জীবন মেপে নেবার কোনো মাপকাঠির মতো, যেন মাড়ভূমির সমগ্র অস্তিত্বের তিনি মাপজোক নিচ্ছেন—যেমন ক’রে আমরা পায়ের ছাপ বা হাতের মাপ নিয়ে থাকি—যাতে জুতো বা দস্তানাটি ঠিক মানানসই হয়।

‘পরে, অনেকটা একই ভাবে, কথ্য রাশিয়ানের স্পন্দন, সাধারণ ঘরোয়া ভাষার ধ্বনিস্পন্দ—সব প্রতিধ্বনিত হয়েছিলো নেক্রাসভের তিন মাত্রা ও ডাক্তিলিক ছন্দে।’

৭

‘ডাক্তার বা কৃষক হিসেবে কাজের লোক হ’য়ে উঠতে চাই আমি; কিন্তু সেই সঙ্গে এমন কাজে আত্মনিয়োগ করতে চাই যা স্থায়ী এবং মৌলিক ব’লে পরিগণিত হবে; চাই কোনো বৈজ্ঞানিক বই লিখতে, নয়তো কোনো শিল্পকর্ম সৃষ্টি করতে।

‘প্রত্যেক মানুষই এক-একজন ফাউস্ট হয়ে জন্মায়: পৃথিবীর সব-কিছু আলিঙ্গন করতে চায় সে, চায় তার অভিজ্ঞতায় সব কিছু ধরা পড়ুক, জগতের সব-কিছু তার মধ্য দিয়ে উন্মোচিত

১ Arzamas: উনিশ শতকের প্রথম ভাগে তরুণ রুশ কবিরের দ্বারা প্রতিষ্ঠিত একটি সাহিত্যিক গোষ্ঠী, পুশকিন ছাত্রাবস্থাতেই এর সদস্য হয়েছিলেন।—অনুবাদের টীকা।

২ ভাসিল লভ্জিচ পুশকিন (১৭৬৭-১৮৩০): কবি পুশকিনের পিতৃব্য। ইনি ছিলেন একজন গৌণ কবি, আর আর্জামাসের সভ্য।—অনুবাদের টীকা।

৩ Osson: গেলিক উপকণ্ঠ্য প্রখ্যাত প্রাচীন কবি। জেমস ম্যাকফারসন নামক এক স্কটিশ কবি ১৭৬০, ’৬১, ও ’৬৩ খ্রিষ্টাব্দে ইংরেজি ভাষায় তিনখানা কাব্যগ্রন্থ প্রকাশ করেন, সেগুলি ওশন-এর মূল রচনা থেকে অনুবাদ ব’লে বিজ্ঞাপিত হয়। কিন্তু ম্যাকফারসনের মৃত্যুর পরে জানা যায় সেগুলি তাঁরই মৌলিক রচনা। রোম্যান্টিক রোমান্টিকতায় এর প্রভাব উল্লেখযোগ্য।—অনুবাদের টীকা।

৪ Parny, Evariste-De'sire-de : (১৭৫৩-১৮১৪) : গ্রাফ-রোমান্টিক ফরাসী কবি, রিইউনিয়ন দ্বীপে জন্মেছিলেন। এর রচনায় লামার্তিনের পূর্ণাঙ্গ পাতলা যায়।—অনুবাদের টীকা।

হোক। ফাউস্ট যে একজন বৈজ্ঞানিক হ'য়ে উঠেছিলো, এজন্য তার পূর্ববর্তী ও সমকালীনদের ভ্রান্তিকে ধন্যবাদ। বৈজ্ঞানিক প্রগতি নামক জিনিসটা বিকর্ষণের নীতি মেনে চলে—সমসাময়িক-কালের বিভ্রান্তি ও অসত্য তত্ত্বের প্রতিক্রিয়ার ফলেই অগ্রগতি সম্ভব হ'তে পারে। ফাউস্ট যে শিল্পী হ'য়ে উঠেছিলো, তার কারণ তার পূর্বসূরীদের আদর্শ, আকৃষ্ট হ'লেই শিল্পের ক্ষেত্রে এগিয়ে যাওয়া যায়। পূর্বসূরীদের মধ্যে যাদের সে সবচেয়ে প্রশংসা করে তাঁদের অনুসরণ করবার আকাঙ্ক্ষা এবং তাঁদের প্রতি শ্রদ্ধা ও অনুরাগবশতই শিল্পের অগ্রগতি সম্ভব হ'য়ে থাকে।

‘কেন আমি ডাক্তার কিংবা লেখক হিসেবে কাজে লাগতে পারছি না? কী সেটা, যা আমাকে কিছু হ'য়ে উঠতে বাধা দিচ্ছে? কষ্টে আছি, জীবনে স্থিতি নেই, কেবলই ঘুরে বেড়াচ্ছি—এগুলিকে এর যথার্থ কারণ ব'লে আমার মনে হয় না। আসল কথা—আমাদের কালে অলংকৃত ভাবার বা বাঁধা-বুলির মোহে পড়ে গেছি আমরা—এই সব “আগামীর উষা” “নতুন পৃথিবীর নির্মাণ” “মানবজাতির মশালবাহীর দল”—প্রথম শুনলে মনে হয়, “কল্পনার কী ঐশ্বর্য!” কিন্তু আসলে শব্দগুলি যে এতো জঁকালো তার কারণই এই যে এদের পেছনে কল্পনা ব'লে কিছু নেই, চিন্তাটাই দ্বিতীয় শ্রেণীর।

‘যাকে আমরা অলৌকিক বলি, তা প্রতিভার স্পর্শ-পাওয়া সাধারণ ছাড়া আর-কিছুই নয়। পুশকিনই এর সবচেয়ে বড়ো উদাহরণ। শাদাশিষে খাটুনি, কর্তব্য ও দৈনন্দিন জীবনের স্তবগান—এই তো তাঁর রচনা। “বুর্জোয়া” ও “মধ্যবিত্ত”^১ এই শব্দ দুটি আজকাল গালাগাল হ'য়ে উঠেছে, কিন্তু পুশকিন তাঁর “বংশলিপি” কবিতায় এই সমালোচনার আভাস আগেই দিয়ে গিয়েছিলেন। “বুর্জোয়া—এক বুর্জোয়া—এই হলো আমি,” আর “ওনেগিনের যাত্রা”য় আবার বলেছিলেন।

“এখন আমার স্বপ্ন হলেন গৃহিণী,

শাস্ত্র জীবন উচ্চতম আকাঙ্ক্ষা,

মস্ত গামলাভরা বাঁধাকপির সুরুয়া।’

‘সমগ্র রুশ সাহিত্যের মধ্যে যেটা আমার সবচেয়ে ভালো লাগে, তা হ'লো পুশকিন আর চেখভের শিশুর মতো রুশীয় মানস। মানবজাতির চরম উদ্দেশ্য বা নিজেদের মোক্ষের উপায়, এ-সব গালভরা বিষয় সম্পর্কে তাঁদের যে সলজ্জ উদাস্য আছে, এটাই সবচেয়ে ভালো লাগে আমার। এমন নয় যে তাঁরা এ-সব বিষয়ে কিছুই ভাবেননি, বা এ-সব বিষয়ে কিছুই তাঁদের বলার ছিলো না, কিন্তু তবু তাঁরা সব সময়েই ভেতরে-ভেতরে অনুভব কবেছেন যে এ-সব বিষয় ঠিক তাঁদের জন্য নয়। অপর পক্ষে গোগোল, টলস্টয় ও ডস্টয়েভস্কি যে-কালে জীবনের অর্থ খোঁজবার চেষ্টা করছেন, ভাবছেন এ-বিষয়ে, প্রস্তুত হচ্ছেন মৃত্যুর জন্য, ঠিক সেই সময়েই ঐরা দু'জন আকৃষ্ট হয়েছেন তৎকালীন জীবনধারায়, একেবারে শেষ দিন পর্যন্ত লেখক হিসেবে সেই ব্যক্তিগত দায়িত্ব পালন ক'রে গেছেন, যা তাঁরা নিজেদের কাঁধে নিজেরা তুলে নিয়েছিলেন; আর এই দায়িত্ব সম্পূর্ণরূপে পালন করতে গিয়েই তাঁরা জীবন কাটিয়েছেন সংগোপনে, লোকচক্ষুর অস্তরালে; তাঁদের জীবন ও তাঁদের রচনা—দুটোকেই তাঁরা ভেবেছেন তাঁদের ব্যক্তিগত ব্যাপার ব'লে, একেবারেই নিজস্ব ব'লে ভেবেছেন, যেন তাতে অন্য কারো কিছুই এসে যায় না। আর তারপর থেকে তাঁদের এই ব্যক্তিগত ব্যাপারগুলিই সকলের অভিনিবেশের ব্যাপার হয়ে উঠেছে, নিজের ভেতরে সুপক্ক হ'য়ে উঠেছে তাঁদের রচনা, যেমন ক'রে পেকে ওঠে গাছ থেকে পেড়ে-আনা কাঁচা আপেল, অনুভূতি ও মাধুর্যে ক্রমশ পূর্ণ ও পরিণত।’

১ Obyvatel, Meshchanin এই দুটি শব্দের সঠিক প্রতিশব্দ অন্য ভাষায় নেই। ওবিভাটেল শব্দের আক্ষরিক অর্থ অকেজো বা নিম্নোন্নতজনীয় লোক, যেখানে সে থাকে সেখানকার কোনো ব্যাপারেই সে দায়িত্ব নেয় না। মেস্চানিন কথাটা ‘পাতি বুর্জোয়া’র কাছকাছি। রুশ সাহিত্যের বিখ্যাত ‘superfluous man’ এই ওবিভাটেলেরই প্রতিমূর্তি।

‘বসন্তের প্রথম আভাস: বরফ গলা। ঘুমেল হাওয়ায় শ্রোভ-পরবের মাখন-মাখানো প্যানকেক আর ভদকার গন্ধ। তেলতেলে ঘুমেল সূর্য বনের ওপর মিটমিটে চোখে তাকায়, ঘুমেল পাইনের ছুঁচোলো ডগাগুলো চোখের পলকের মতো পিটপিট করে নড়ে, তেলতেলে ডোবা চকচক করে দুপুরবেলায়। আর পল্লী-প্রান্তর হাই তোলে, আড়মোড়া ভাঙে, পাশ ফিরে ঘুমিয়ে পড়ে আবার।

‘বসন্ত, ওনেগিনের অনুপস্থিতিতে তার পরিত্যক্ত বাড়ি, আর পাহাড়ের তলায় ঝরনার ধারে লেন্সির কবর—“ইউজেনে ওনেগিনে”র সপ্তম সর্গে এই সবের বর্ণনা আছে।

“নাইটিঙ্গেল, বসন্তের প্রেমিক,

সারা রাত ধরে গান গায়। ফোটে বুনো গোলাপ।”

“প্রেমিক” কেন? কেন আবার, স্বাভাবিক ব’লে, মানিয়ে গেছে ব’লে। “প্রেমিক”ই ঠিক। তাছাড়া মিলের জন্যেও দরকার ছিলো। নাকি তিনি আসলে তখন লোকগাথার দস্যু-নাইটিঙ্গেলের কথা ভাবছিলেন? “ওডিমানটিয়-র পুত্র, দস্যু নাইটিঙ্গেল।”

তার নাইটিঙ্গেল-শিস শুনে,

তার বুনো আরণ্যক আহ্বানে,

থরথর করে কেঁপে ওঠে ঘাস,

আর ফুলেরা ঝরিয়ে দেয় পাপড়ি।

কালো বন আভূমি প্রণত হয়,

আর সব ভালো মানুষ ম’রে প’ড়ে যায়।”

‘আমরা ভারিকিনো এসেছিলাম প্রথম বসন্তে। দেখতে-দেখতে সবুজ হ’য়ে উঠেছিলো গাছেরা—বিশেষ করে মিকুলিংসিনের বাসার তলায় শুটমার খাদে—অন্ডার, হেজেল, বুনো চেরি—সর্ব সবুজ। আর তার একটু পরেই শুরু হ’য়ে গেলো নাইটিঙ্গেলের গান।

‘আর-একবার অন্য সব পাখিদের গানের সঙ্গে তাদের তফাৎ অনুভব করে আমি অবাক হ’য়ে গেলাম। বিরাট এই ব্যবধান, নাইটিঙ্গেলের অস্থিতীয় সম্পদের সঙ্গে অন্যদের গানের কোনো সেতুই প্রকৃতি রচনা করেনি। কী বৈচিত্র্য আর শক্তি আর অনুরণন! টুগেনিভ কোথায় যেন এর উল্লেখ করেছেন—এই গান, তাকে তিনি বলেছেন অরণ্যদানবের বাঁশির সুর। আবার দুটি স্বর অন্য অন্যগুলি থেকে স্বতন্ত্র। একটি বিলাসী, পর্যাণ্ড, এবং লোলুপভাবে পুনরাবৃত্ত: “টিঅখ, টিঅখ, টিঅখ” একটানা সুরের মতো বাজতে থাকে। এই স্বর শুনে শিশির-ঢাকা ঝোপঝাড় পুলকে যেন শিউরে ওঠে। অন্য স্বর গম্ভীর, একটানা আবেদন অথবা সতর্কবাণী উচ্চারণ করছে যেন, ‘জাগো! জাগো!’

৯

‘বসন্ত। বাসন্তী বীজ বোনার সময় হ’য়ে এলো। লেখার সময় একটুও নেই, এমন কি দিনপঞ্জী লেখার পর্যন্ত না। যতোদিন লিখেছি, বেশ ছিলো। আগামী শীত পর্যন্ত এটা মূলত্ববি রইলো।

‘সেদিন—আর সেটা ছিলো সত্যিই শ্রোভ-পরবের দিন, বসন্তকালীন বন্যা ভরপুর ফুলছে তখন, জল কাদা বরফগলার মধ্য দিয়ে স্নেজ চালিয়ে রুগ্ন এক চাষি এসে হাজির। আমি বললাম যে আমি আজকাল রোগী দেখা ছেড়ে দিয়েছি, তাছাড়া এখানে দরকারমতো ওষুধপত্র বা যন্ত্রপাতিও পাওয়া যাবে না। কিন্তু তাতে কোনো ফল হ’লো না, সে একই কথা ব’লে চললো।—“বাচান আমাকে, বাচান। আমার চামড়া খারাপ। আমার এই রোগা শরীরটাকে একটু

দয়া করুন।” কী আর করি, হৃদয়টা তো আর পাথর নয়। জামা খুলতে বললাম তাকে, দেখলাম তার লুপাস^১ হয়েছে। জানলার তাকের ওপর এক বোতল কার্বলিক ছিলো (ওটা আবার কোথেকে এলো—এমন প্রশ্ন আমাকে জিজ্ঞেস করবেন না; ওটা বা ঐ জাতীয়, এমন আরো দু-একটা জিনিস আছে, যা না-হলে আমার চলেই না, সেই সবই সামডেভইয়াটভের কৃপায় পেয়েছি), তাকে পরীক্ষা করতে-করতে একবার সেই বোতলটার দিকে তাকালাম। ঠিক তখনই আমার চোখে পড়লো, বাড়ির উঠানে আরেকটা স্নেজ এসে ঠাড়িয়েছে। প্রথমে ভাবলাম বুঝি আরেকজন রোগী এলো। কিন্তু দেখা গেলো, আমার ভাই ইয়েভগ্রাভ, সোজা যেন আকাশ থেকে পড়লো। বাসার সবাই ব্যতিব্যস্ত হ’য়ে পড়লো তাকে নিয়ে—টোনিয়া, শাশা, আলেকজান্ডার আলেকজান্ড্রোভিচ; পরে আমিও এসে যোগ দিলাম তাদের সঙ্গে। প্রথমেই তো এক পশলা প্রশ্ন বর্ষণ করা হ’লো তার ওপর। কোথেকে এলো সে? এলোই বা কী ক’রে? যথার্থিতি সব প্রশ্নই কৌশলে এড়িয়ে গেলো সে। একটু হাসলো, কাঁধ ঝাকালো, আর কথা বললো হেঁয়ালি ক’রে।

‘দিন পনেরো থেকে গেলো সে, প্রায়ই ইউরিয়্যাটিনে যাওয়া-আসা করলো, তারপর এমনভাবে অদৃশ্য হ’য়ে গেলো যেন পৃথিবী তাকে গিলে ফেলেছে। সে যে-কদিন এখানে থেকে গেলো, তারই মধ্যে আমি বুঝতে পারলাম যে সামডেভইয়াটভের চাইতেও অনেক বেশি প্রতিপত্তি তার, আর তার ক্রিয়াকলাপ, তার যোগাযোগ, সবই আরো বেশি রহস্যময়। সে কে? কী করে সে? কেন সে এত ক্ষমতাসালী? আমাদের সংসার যাতে স্বচ্ছন্দে চলে তার ব্যবস্থা করবে ব’লে প্রতিশ্রুতি দিয়ে গেলো; তাতে টোনিয়াও শাশার দেখাশোনা করার সময় পাবে, আমিও ডাক্তারি করা আর লেখার সময় পাবো। কী ক’রে সে এই ব্যবস্থা করবে—এ কথা আমরা তাকে জিজ্ঞেস করেছিলাম।—উত্তরে সে শুধু একটু হেসেছিলো। কিন্তু তার প্রতিশ্রুতি যে মিথ্যে নয়, অল্পদিনের মধ্যেই তার প্রমাণ পাওয়া গেলো। আমাদের অবস্থার মধ্যে কিছু-কিছু পরিবর্তনের চিহ্ন দেখতে পেলাম।

‘এটা কিন্তু সত্যিই আশ্চর্য। ও হ’লো আমার সংভাই, একই নাম বহন করছি আমরা, অথচ আমি কিনা ওর বিষয়ে বলতে গেলে কিছুই প্রায় জানি না।

‘দ্বিতীয় বারের মতো সে আচমকা আমার জীবনে এসে আবির্ভূত হ’লো, আমার শুভ সন্তা যেন সে, আমার ত্রাণকর্তা, আমার সমস্যার সমাধান ক’রে দিয়ে গেলো। অন্যান্য আনুষ্ঠানিক চরিত্র বাদে, হয়তো প্রত্যেকের জীবনেই এ-রকম থাকে—থাকতেই হয়—যারা প্রত্যক্ষভাবে যুক্ত তাদের বাইরেও এক গোপন, অজানা শক্তি, প্রায় প্রতীকী কোনো সন্তা, বিনা আদ্যানেই যে চ’লে আসে উদ্ধার করতে, আর আমার জীবনে বোধ হয় আমার ভাই ইয়েভগ্রাভ সেই গোপন উৎসের ভূমিকায় অভিনয় ক’রে চলেছে।’

ঠিক এখানটায় এসে ইউরির দিনলিপি বন্ধ হ’য়ে গেছে: আর কোনোদিন সে এতে হাত দেয়নি।

১০

ইউরিয়্যাটিন পার্লিক লাইব্রেরির রীডিংরুমে ব’সে-ব’সে বইগুলো উটে-পাটে দেখছিলো ইউরি। অনেকগুলি জানলা রীডিংরুমে, প্রায় শ’খানেক লোক বসতে পারে। লম্বা-লম্বা টেবিলের সারি চ’লে গেছে জানলার ধার পর্যন্ত। লাইব্রেরি বন্ধ হয় সন্ধ্যাবেলায়; বসন্তকালে শহরে আলোর কোনো ব্যবস্থা নেই। কিন্তু ইউরির তাতে কোনো অসুবিধাই হয় না, কেননা, কোনো কারণেই

•

সে ডিনারের সময় পেরিয়ে শহরে থাকে না। মিকুলিৎসিনের ধার-দেওয়া ঘোড়াটা সে সামডেভইয়াটভের সরাইখানায় রেখে আসে, তারপর সকালে পড়াশুনা করে বিকেলে ফেলায় ভারিকিনোর উদ্দেশে ঘোড়ায় চেপে রওনা হয়ে পড়ে।

লাইব্রেরিতে পড়াশুনা শুরু করার আগে ইউরি কচিং ইউরিয়্যাটনে আসতো। সেখানে তার করবারও কিছু ছিলো না, তার ওপর শহরটা তার অচেনা। স্থানীয় অধিবাসীরা যখন আস্তে-আস্তে রীডিংরুম ভরিয়ে তোলে—কেউ-কেউ তারই পাশে বসে, আবার কেউ বা ঘরের অন্য প্রান্তে—তখন তার মনে হয় সে যেন চৌরাস্তায় দাঁড়িয়ে শহরটাকে জেনে ফেলছে, যেন শুধু লোকজনেরাই এই রীডিংরুমে আসছে না, তাদের সঙ্গে-সঙ্গে ঘর-বাড়ি রাস্তাঘাটও এখানে এসে পরস্পরের সঙ্গে দেখা সাক্ষাৎ করছে।

আসল ইউরিয়্যাটনকে, যে ইউরিয়্যাটন বাস্তব, কল্পনার সামগ্রী নয়—জানলা দিয়ে দেখা যায়। ঠিক মাঝখানকার, ঘরের সবচেয়ে বড়ো জানলাটা, তার সামনেই ফোটা নো জলের একটা ট্যাক্স। পাঠকেরা যখন একটু বিশ্রাম নিতে চায়, তখন কেউ বারান্দায় গিয়ে দাঁড়ায় সিগারেট খেতে, নয়তো ট্যাক্সের চারপাশে ঘিরে দাঁড়ায়, জল খেয়ে পেয়ালার বাকি জলটুকু বেসিনে ঢেলে দেয়, জানলার কাছে ভিড় করে দাঁড়ায়, সপ্রশংস চোখে শহরের দৃশ্য দ্যাখে।

দু'জাতের পাঠক আছে; বেশির ভাগই হলো স্থানীয় বুদ্ধিজীবী সম্প্রদায়েব, অন্যেরা আর-একটু নিম্নশ্রেণীর।

দু'জাতের মধ্যে বেশির ভাগই ক্রীলোক; কাপড়-চোপড় ভালো না, চোখে অবহেলিত অন্ত্যজের ভঙ্গি, আর লম্বা রোগা মুখের ভাবটি ফোলা-ফোলা, যার কারণ হয় ক্ষুধা, নয়তো পাণ্ডুরোগ কি শোথ। পড়াশুনা নিয়েই চিরকাল কাটিয়েছে তারা, লাইব্রেরির কর্মচারীদেরও ব্যক্তিগতভাবে চেনে, তাই লাইব্রেরিতে তারা বাড়ির মতোই স্বচ্ছন্দ।

সাধারণ লোকেরা দেখতে ভালো, স্বাস্থ্যবান; সবচেয়ে ভালো পোশাক পরে পরিচ্ছন্ন হয়ে আসে তারা; একটু লাজুক সংকোচ মিশে থাকে চলনে-বলনে, এমন একটা ভঙ্গি থাকে যে মনে হয় তারা গির্জেয় ঢুকছে। অন্যদের চেয়ে তারা গোলমাল করে বেশি, নিয়মকানুন জানে না বলে নয়, বরং কারণটা ঠিক এর উল্টো; কোনো শব্দ করা ঠিক হবে না এই উৎকণ্ঠায় সর্বক্ষণ শঙ্কিত হয়ে থাকে বলেই তারা তাদের প্রাণবন্ত পদক্ষেপ ও কষ্টস্বর চাপা দিতে পারে না।

জানলাগুলির ঠিক উল্টো দিকে যে-খুপরিটা আছে, লাইব্রেরিয়ান ও তার দু'জন সহকারী সেখানে একটা পাটাতনেব ওপর বসে; তাদের এই বসবার জায়গাটিকে সারা ঘর থেকে আলাদা করে রাখা হয়েছে একটি কাউন্টার দিয়ে। সহকারীদের মধ্যে একজন হলো একটি খিটখিটে ধরনের ক্রীলোক, গায়ে পশমি শাল, প্রতি মুহূর্তেই সে কেবল তার প্যাঁশ-নে চোখে দিচ্ছে আর খুলে নিচ্ছে, আপাতদৃষ্টিতে তার এই সক্রিয়তার কারণ বলে যেটা মনে হয় তাকে প্রয়োজন না-বলে মেজাজ বলাই ভালো। অন্য সহকারীটির পরনে কালো রঙের রেশমি জামা; তার বোধ হয় ফুশফুশের অসুখ আছে, কেননা তাকে সব সময়েই রুমালের ভেতর দিয়ে কথা বলতে দেখা যায়, এক মুহূর্তের জন্যও ঐ রুমালটিকে সে মুখ আর নাকের ওপর থেকে সরায় না।

লাইব্রেরির কর্মচারীদের মুখ বুদ্ধিজীবীদের মতোই লম্বাটে গোছের, আর অমনি থলথলে ফোলা-ফোলা; তাদের গায়ের চামড়াও তেমনি শিথিল, কেমন একটা মেটে-ধূসর এবং সবুজের ছাপ আছে, যেন নোনা শসা বা ছাড়া-পড়ার রং। পালা করে প্রত্যেকেই তারা ফিশফিশ করে নতুন পাঠকদের নিয়ম-কানুন বলে দেয়, নিঃশব্দে বইয়ের স্লিপ বাছাই করে বই নিয়ে আসে ও ফিরিয়ে নিয়ে যায়, আর তারই ফাঁকে-ফাঁকে অবসর সময়ে কোনো রিপোর্ট বা সেই জাতীয় কোনো-কিছু লেখে।

জানলার বাইরে যখন সত্যিকার শহরের দৃশ্য দেখলো ইউরি, আর ঘরের ভেতর যখন সে কাল্পনিক শহরকে অনুভব করলে, যে-শহরের অধিবাসীদের প্রায় সকলের মুখ চোখ এমন

ফোলা-ফোলা যে মনে হয় যেন প্রত্যেকেরই গলগণ্ড আছে, এবং যারা কোনো কারণে তাকে ইউরিয়ান্টিন স্টেশনের সিগন্যাল-ঘরের সেই অশিষ্ট স্ত্রীলোকটির মুখ মনে করিয়ে দেয়, তখন, ভাবনার কোনো-এক অকারণ অনুব্রজে ইউরির মনে প'ড়ে গেলো সেই প্রথম সকালবেলাটি, যেদিন সে এসে পৌঁছলো এই শহরে, মনে পড়লো শহরের দুরাগত পরিদৃশ্য, গাড়ির মেঝেতে তার পাশে ব'সে-থাকা সামডেভইয়াটভকে, এবং তার মন্তব্য ও ব্যাখ্যাগুলি। শহরের অনেক দূরে থাকতেই যে-ব্যাখ্যাগুলি তাকে দেওয়া হয়েছিলো, তার সঙ্গে এই অব্যবহিত পারিপার্শ্বিকের কোনো সম্বন্ধ আবিষ্কার করার চেষ্টা করলো সে, মনে-মনে ভাবলো যে এখন তো সে এই শহরের মধ্যেই, তাই তখন এই মিলিয়ে দেখার চেষ্টা নেহাৎ নিরর্থক নয়, কিন্তু সামডেভইয়াটভ তাকে যা বলেছিলো তার বিশেষ-কিছু মনে করতে পারলো না।

১১

ইউরি বসেছিলো ঘরের এক প্রান্তে, দরজা থেকে সবচেয়ে দূরে, তার সামনে প'ড়ে আছে স্থানীয় জেলা-পরিষদের পরিসংখ্যান-সম্পর্কিত কতিপয় বিবরণ, আর এ-অঞ্চলের জাতিতত্ত্ব সম্পর্কিত কতোগুলো তথ্যনির্ভর বই। পুগাচেভ-বিদ্রোহের ইতিহাস-সম্পর্কিত দুটো বইয়ের জন্যও সে চেষ্টা করেছিলো, কিন্তু রেশমি জামা-পরা লাইব্রেরিয়ান তাকে ফিশফিশে গলায় জানিয়েছে যে কোনো পাঠক একসঙ্গে এতগুলো বই নিতে পারে না, যদি অন্য কোনো বইয়ে তার আগ্রহ থাকে তাহ'লে এ-সব পত্রিকা ও উল্লেখগ্রন্থ তাকে ফিরিয়ে দিতে হবে।

অতএব ও-সব বাছাই-না-করা বইয়ের স্তুপেই আগের চেয়ে আরো উদ্যম ও বেগ নিয়ে আত্মনিয়োগ করলে সে, যে-সব বই সত্যি তার কাজে লাগবে সেগুলি সে একপাশে সরিয়ে রাখতে লাগলো, যাতে বাকিগুলি ফিরিয়ে দিয়ে যেগুলি সে পড়তে চায়, সেই ইতিহাসের বইগুলো আনতে পারে। এ সারগ্রন্থগুলির ভেতর দিয়ে তাড়াতাড়ি চোখ বুলিয়ে পরিচ্ছেদগুলির নাম দেখে নিচ্ছিলো সে, এতো তন্ময় হ'য়ে সে তার কাজ ক'রে চললো যে একবারের জন্যও আশে-পাশে তাকালো না। তাকে অনামনস্ক করতে পারলো না পাঠকদের ভিড়, তার পাশের পাঠকদের সে আগেই ভালো ক'রে দেখে নিয়েছে। তার বাঁ ও ডানদিকের পাঠকদের সে মনে-মনে চিহ্নিত ক'রে নিয়েছে, চোখ না-তুলেই সে বুঝতে পারছে যে এখনো পাশে ব'সে আছে তারা, জানলার বাইরে যে-সব বাড়ি আর গির্জা দেখা যাচ্ছে, তারা যেমন তাদের জায়গা থেকে নড়বে না, তেমনি তার দু'পাশের পাঠকরাও যে স্বীড়িংক্রম থেকে তার আগে বেরোবে না, এটাও সে ভালো ক'রেই জানে।

ইতিমধ্যে সূর্য কিন্তু তার স্থান পরিবর্তন করলো, পূব কোণ থেকে শুরু ক'রে ঘরের সব দিকেই ঘুরে এলো, রোদের রেখা এখন দক্ষিণ দিকের জানলায় বলসে উঠছে, দেয়ালের পাশের পাঠকদের চোখে সোজা ছুঁড়ে মারছে তার তীক্ষ্ণ উজ্জ্বলতা।

বারোমাসে সর্দিওলা লাইব্রেরিয়ান তার পাটাতন থেকে নেমে জানলাগুলোর কাছে গিয়ে দাঁড়ালো। আলোকে নরম ক'রে আনার জন্য কুঁচকোনো শাদা পর্দার ব্যবস্থা করা ছিলো, একটি বাদে বাকি সবগুলি পর্দাই টেনে দিলে সে। শেষ জানলাটা ছায়ায় ছিলো তখনো, তার কাছে এসে খড়খড়ি খোলার জন্য ঝোলানো দড়ি ধ'রে টান দিলে, কিন্তু সেই মুহূর্তেই প্রচণ্ডভাবে হাঁচি শুরু হ'য়ে গেলো তার।

সে যে মিকুলিংসিনের অন্যতম শ্যালিকা, সামডেভইয়াটভ যাদের কথা বলেছিলো সেই টুন্সেভ বোনদের একজন, এটা ইউরি আন্দাজ করলে যখন সে দশ-বারোবার হেঁচে নিয়েছে। সে মাথা তুলে তার দিকে তাকালো, যে-কাজটা প্রায় সব পাঠকই আগে ক'রে নিয়েছিলো।

যন্ত্রের ভেতর একটি পরিবর্তন সে লক্ষ্য করলে এষাৎ। ঘরের ঠিক অন্য কোণে, দেয়ালের

কাছে, নতুন একজন পাঠিকা বসেছেন। আন্টিপভাকে তক্ষুনি চিনতে পারলো ইউরি। ইউরির দিকে পেছন ফিরে ব'সে আছে সে, নিচু গলায় কথা বলছে সদি-লাগা লাইব্রেরিয়ানের সঙ্গে, আর সেও তার টেবিলে ঝুঁকে প'ড়ে ফিশফিশিয়ে জবাব দিচ্ছে। মনে হ'লো এই কথাবার্তার ফল লাইব্রেরিয়ানের দিক থেকে ভালো হ'লো, কেননা সত্যিই দেখা গেলো যে সে যেন চোখের পলকে ভালো হ'য়ে উঠলো, শুধু যে তার ঠাণ্ডা, সদি এই সবই অন্তর্হিত হ'লো তা নয়, তার সেই উৎকণ্ঠিত ভিত্তি ভাবটাও কেটে গেলো। লারার দিকে একবার উষ্ণ ও কৃতজ্ঞ চোখে তাকালো সে, তারপর যে-কমালটায় সব সময় মুখ ঢেকে রাখে সেটা তুলে নিয়ে পকেটে ভ'রে রাখলো। এবার যখন সে কাউন্টারের পেছনে তার আসনে গিয়ে বসলো তখন তার সুখী চোখে-মুখে হাসি আর আত্মবিশ্বাসের চিহ্ন স্পষ্ট ফুটে উঠেছে।

ঘটনাটি তুচ্ছ হ'লেও মর্মস্পর্শী, ঘরের নানা অংশের অনেকেই এটা লক্ষ্য করলে; লারার দিকে সমর্থনের ভঙ্গিতে তারাও নিঃশব্দে হাসলো একটু। এই সব ছোটোখাটো লক্ষ্যগেই ইউরি বুঝতে পারলো যে আন্টিপভাকে শহরের প্রায় সকলেই চেনে, শুধু তাই নয়, পছন্দও করে।

১২

ইউরি প্রথমে ভাবলো তক্ষুনি গিয়ে ওর সঙ্গে কথা বলে। কিন্তু কেমন একটা লজ্জা এসে বাধা দিলে—হয়তো সরলতার অভাব—যা তার স্বভাবের বিরোধী, কিন্তু যা অতীতে লারার সঙ্গে যোগাযোগের সময় সে অনুভব করেছে। থাক, লারাকে বিরক্ত ক'রে কাজ নেই, নিজেও পড়া ছেড়ে উঠবে না। লারার দিকে তাকিয়ে থাকার লোভ এড়াবার জন্য তার চেয়ার সে এমনভাবে এক পাশে সরিয়ে নিলে যে তার পেছনটা পড়লো টেবিলের দিকে; বইয়ের দিকে মন দেবার চেষ্টা করলো সে, আর তাই একটা বই নিলে হাতে, আর-একটা রাখলো হাঁটুর ওপর।

কিন্তু যে-বিষয়ে পড়ছে তা থেকে হাজার মাইল দূরে প'ড়ে থাকলো তার মন। হঠাৎ সে বুঝতে পারলো ভাবিকিনোয় এক শীতের রাতে স্বপ্নে যে-গলার স্বর শুনেছিলো, সে আর কারো নয়, লারার। এই আবিষ্কার তাকে এতো অবাক ক'রে দিলে যে সে ঝাঁকুনি দিয়ে চেয়ার তেলে দিলে, আশে-পাশের লোকেরা চমকে উঠলো, কিন্তু ইউরি সেদিকে কোনো খেয়াল না-ক'রে একদৃষ্টে লারার দিকে তাকিয়ে থাকলো।

লারার আধখানা মুখ চোখে পড়লো তার, তাও প্রায় পেছন থেকে। ফিতে-লাগানো পাংলা একটা ডোরা-কাটা ব্লাউজ তার পরনে। বইয়ের মধ্যে তলিয়ে গেছে সে, ঠিক একেবারে বাচ্চা ছেলের মতো নিবিষ্ট হ'য়ে আছে বইয়ে; এমনভাবে ব'সে আছে যে তার মাথা ডান কাঁধের দিকে ঝুঁকে পড়েছে একটু। মাঝে-মাঝে চিন্তা করবার জন্য পড়া বন্ধ ক'রে কড়িকাঠ কিংবা সামনের দিকে একটুক্ষণ তাকিয়ে আবার হাতে গাল ঠেকিয়ে নোট-বইয়ে লিখছে—তার পেন্সিল যেন উড়ে চলেছে কাগজের ওপর।

অনেকদিন আগে মেলউজ্জেইয়েভোতে ইউরি যা লক্ষ্য করেছিলো, আবার এখানে তা লক্ষ্য করলো সে। 'একটা জিনিস ভারি আশ্চর্য,' সে মনে-মনে ভাবলো, 'ছলাকলা ও মোটেই জানে না। অন্যকে খুশি করতে বা নিজেকে সুন্দর দেখাতে চায় না। মেয়েদের জীবনের সেই দিকটাকে সে ঘূণা করে; যেন নিজের রূপের জন্য নিজেকে শাস্তি দিচ্ছে সে। কিন্তু নিজের প্রতি তখনই যে গর্বিত বিরুদ্ধতা, এটাই তার সব চেয়ে বড়ো আকর্ষণ।'

'তার সব কাজই কী নিপুণ! পড়াশুনো করা মানুষের সবচেয়ে উচু দরের কাজ—এ-কথা ভেবে যে সে পড়াশুনো করে তা নয়, বরং ঠিক যেন তার উষ্টো, তার পড়াশুনোর ভঙ্গিটা এ-রকম যেন এটা পৃথিবীর সবচেয়ে সহজ কাজ, যে-কোনো প্রাণীই যেন পড়াশুনো করতে পারে। তার কাছে পড়াশুনোটা কুয়ো থেকে জল তুলে আনা, কিংবা আলুর খোসা ছাড়ানোর মতো ব্যাপার।'

এ-সব চিন্তায় শাস্ত হ'লো তার মন। সত্যি বলতে ও-রকম শাস্তি সে কচিৎ পেয়েছে। এবার তার মনের লাফিয়ে-লাফিয়ে বিষয়াস্তরে যাওয়া বন্ধ হ'লো। একটু মৃদু না-হেসে পারলো না সে, লারার উপস্থিতি তাকে ঠিক সেই ভাবেই বদলে দিলে, যেমন দিয়েছে লাইব্রেরির অসুখ কর্মচারীটিকে।

চেয়ারটা ঠিকমতো বসেছে কি বসেনি, মন তার বিকিপ্ত হচ্ছে কিনা, এ-সব বিষয়ে আর একটুও চিন্তা করলো না ইউরি। বরং লারার আসার আগের চেয়েও আরো বেশি মন দিয়ে সে ঘণ্টাখানেক পড়াশুনো করলে। সামনেব ঐ স্তূপাকার বইগুলোর সব ক'টাই সে খুঁটিয়ে-খুঁটিয়ে দেখলো, যে-সব তার সবচেয়ে বেশি কাজে লাগবে, সেগুলো সরিয়ে রাখলো একপাশে, এমনকি একটা বই থেকে সম্পৃক্ত বিষয় নিয়ে লেখা একাটি প্রবন্ধ পর্যন্ত প'ড়ে নিলো। তারপর তার মনে হ'লো আজকের মতো যথেষ্ট কাজ করা হয়েছে। বইগুলো সব জড়ো ক'রে ডেস্কে ফিরিয়ে দিয়ে এলো। এখন তার বিবেক হালকা; কোনো গূঢ় উদ্দেশ্যের কথা আর ওঠে না; এবার, সকালবেলার এই খাটুনির পর, পুরোনো এক বন্ধুর সঙ্গে দেখা করার আর বাধা নেই, নিজেকে এটুকু সুখের স্বাদ সে সংগতভাবেই দিতে পারে। উঠে দাঁড়িয়ে ঘরের চারদিকে তাকালো সে, কিন্তু লারাকে আর দেখা গেলো না।

যে-কাউন্টারে সে তার নিজের বইগুলো ফেরত দেবে ব'লে রেখেছে, সেই একই কাউন্টারে তখনও লারার ফেরত-দেওয়া বইগুলো প'ড়ে আছে। মার্জ্ঞাবাদের পাঠ্যপুস্তক সেগুলো—আবার মাস্টারিতে যোগ দেবার আগে লারা নিশ্চয়ই রাজনীতি প'ড়ে নিচ্ছে।

বইয়ের পাতার ফাঁক দিয়ে যে অর্ডার-স্লিপের প্রান্ত দেখা যাচ্ছিলো, তাতে লারার ঠিকানা লেখা ছিলো। ঠিকানাটা অদ্ভুত মনে হ'লো বটে, কিন্তু তবু ইউরি একটা কাগজে সেটা টুকে নিলে: 'মার্চেন্ট স্ট্রীট, স্তম্ভ-ভবনের' উপরে দিকে।' এই অদ্ভুত ঠিকানার মানে সে আর-একজন পাঠককে জিজ্ঞেস ক'রে নিলে; মক্কোতে যেমন লোকজনেরা কোনো এলাকাকে সেই এলাকার গির্জার নামে ডেকে থাকে, তেমনি ইউরিয়্যাটিনের লোকজনেরাও স্তম্ভ-ভবনের কথা মনে রেখে কোনো বাড়ির ঠিকানা বলে।

এক অঙ্ককার অটালিকার নাম স্তম্ভ-ভবন, ইম্পাতের মতো ধূসর তার রং, সামনের দেয়াল শিল্প-দেবীদের মূর্তিতে অলংকৃত, মুখোস, বীণা আর করতাল নিয়ে তাঁরা দাঁড়িয়ে আছেন। গত শতকে একজন বণিক তার নাট্যাশালা হিসেবে বানিয়েছিলো এটা। তার উত্তরাধিকারীরা পরে এটা বেচে দিয়েছে বণিক-সংঘের কাছে, আর এই বণিক-সংঘের জন্যই এই রাস্তার নাম হয়েছে মার্চেন্ট স্ট্রীট, আর লোকে এই সারা এলাকাটাকেই চেনে এই বাড়ি নামের সূত্রে। পার্টির নগর-পরিষদ এখন এই বাড়িটা ব্যবহার করে, আর বাড়ির সামনের দিকের দেয়ালের তলায়, আগে যেখানে বুলতো থিয়েটারের পোস্টার আর প্রোগ্রাম, সেখানে এখন সরকারি ঘোষণা ও বিবিধ বিজ্ঞপ্তি লাগিয়ে রাখা হয়।

১৩

মে মাসের গোড়ার দিকের একটি ঠাণ্ডা বিকেল, জোর হাওয়া দিচ্ছে। ইউরি গিয়েছিলো লাইব্রেরিতে; সেখান থেকে বেরিয়ে শহরের সব কাজকর্ম সেরে বাড়ি ফেরার উদ্যোগ করছে, এমন সময় হঠাৎ সে অন্যরকম ভাবলে, চললো লারার সঙ্গে দেখা করতে।*

পথে কয়েকবার ধামতে হ'লো তাকে, হাওয়ার বেগ ধুলোবালির ঝড় তুলছে তার সামনে।

১ স্তম্ভ-ভবন (House of Caryatids) : করিয়ারিড শব্দটা গ্রীক; স্থাপত্যে ভারবাহী স্তম্ভরূপে ব্যবহৃত নারীমূর্তিকে করিয়ারিড বলে। এই ধরনের মূর্তি ব্যবহার প্রাচীন ভারতীয় স্থাপত্যেও বিদ্যমান।—অনুবাদের টীকা।

রাস্তার একপাশে স'রে এসে, মাথা নিচু ক'রে চোখ কুঁচকে, বাড়ি থামার অপেক্ষা করে, তারপর আবার চলতে শুরু করলে সে।

লারা থাকে মার্চেন্ট স্ট্রিটের কোনায় নীল-ধূসর অঙ্ককার স্তম্ভ ভবনের উষ্টো দিকের বাড়িটায়; এই বিখ্যাত বাড়িটাকে ইউরি এই প্রথম দেখলে। যেমন নাম, বাড়িটা যেন কাজেও তা-ই, ইউরির মনে তা অদ্ভুত একটা অস্বস্তিকর ছাপ ফেললো।

লম্বায় মানুষের দেড়গুণ হবে, এমনি সব পৌরাণিক নারীমূর্তি সব চেয়ে উঁচু তলার দেয়ালের গায়ে সারি-সারি দাঁড়িয়ে আছে। দুই দমক ধুলোর ঝড়ের মাঝখানে তার মনে হ'লো যেন বাড়ির সব মেয়েরা অলিন্দে এসে দাঁড়িয়ে রেলিং-বসানো পিল্লের মধ্য দিয়ে ঝুঁকে প'ড়ে তাকে দেখছে।

লারার বাড়িতে ঢোকার পথ দুটো; একটা দরজা মার্চেন্ট স্ট্রিটে, অন্যটা পেছন দিকের গলিতে। সামনের দিকে যে কোনো প্রবেশপথ আছে এটা জানতো না ব'লে পেছনের দরজা দিয়েই ইউরি ঢুকলো।

সে দরজা দিয়ে ঢুকতেই ঘূর্ণি হাওয়া পৌঁচিয়ে-পৌঁচিয়ে ধুলো আর জঞ্জাল তুললো আকাশে, উঠোনের রাস্তাটা ঢেকে গেলো ধুলোর পর্দায়। এই কালো পর্দার মধ্য দিয়েই কয়েকটা মুরগি ডাকতে-ডাকতে বেরিয়ে এলো, একটা মোরগ তাদের পেছনে তাড়া ক'রে এসেছে—তারা এসেই ইউরির পায়ের তলা দিয়ে কোঁ কোঁ করতে করতে পালিয়ে গেলো।

ঘূর্ণি বাতাস থেমে যেতেই লারাকে দেখতে পেলো সে। কুয়ার পাশে দাঁড়িয়ে আছে লারা, দুই বালতি জল তুলে একটা ঝাঁকে ঝুলিয়ে ঝাঁ কাঁধে রেখেছে। চুলগুলি হেলাফেলায় একটা রুমাল দিয়ে বাঁধা, যাতে ধুলো না লাগে। পরনের ডেউ-খেলানো ঘাগরাটা হাঁটুর কাছে নামিয়ে অন্য হাতে ধ'রে আছে। বাড়ির দিকে রওনা হ'তেই আবার এলো ঘূর্ণি হাওয়া, শুধু যে তাকে থানিয়ে দিলে তাই নয়, হাওয়ার বেগ তার মাথায় বেঁধে-রাখা রুমালটা উড়িয়ে নিয়ে গিয়ে বেড়ার ধারে ফেলে দিলো, তখনও সেখানটায় মুরগিরা প্রবল গলায় চ্যাচাচ্ছে।

ইউরি দৌড়ে গেলো রুমালটার পেছনে, তারপর সোঁটকে কুড়িয়ে এনে দিলে। নিদারুণভাবে অবাক হ'য়ে গেলো স্বাভাবিক থাকার চেষ্টা করলো লারা, এটাই তার ধরন, কখনো তার মনের ভাব সে প্রকাশ করতে চায় না, আর সেইজন্যেই কোনোরকম বিন্ময়সূচক নাটকীয় ভঙ্গি করলো না, শুধু একটা কথা বললো: 'জিভাগো!'

'লারিসা ফিয়োডোরোভনা!'

'আপনি এখানে!'

'বালতিগুলো নামিয়ে রাখুন। আমি নিয়ে যাচ্ছি।'

'আধখানা কাজ ভালোবাসি না আমি, কিছু শুরু করলে তার শেষও করা চাই। যদি আমার সঙ্গে দেখা করতে এসে থাকেন তাহ'লে চলুন।'

'আর কার সঙ্গে দেখা করতে আসবো?'

'তা কি আমি জানি?'

'সে যাই হোক, আমাকে ঐ বালতিগুলো নিতে দিন। আপনি কাজ করবেন আর আমি দাঁড়িয়ে-দাঁড়িয়ে দেখবো তা হ'তে পারে না।'

'একে আপনি কাজ বলেন? থাক, বালতিগুলো থাক। আপনি শুধু জল ছলকে সিঁড়ি ভেজাবেন। বরং বলুন কেন এসেছেন। আপনি এই জেলায় এসেছেন এক বছর হ'লো গেলো, অথচ এর আগে সময় পেলেন না দেখা করার!'

'কী ক'রে জানলেন?'

'গুজবের তো অভাব নেই। তাছাড়া আপনাকে আমি লাইব্রেরির রীডিংরুমে দেখেছি।'

'আমাকে ডাকেননি কেন?'

'আমাকে আপনি দেখতে পাননি, এমন কথা বলবেন না।'

একটু একটু দুলতে-থাকা বালতির ভারে লারাকেও খানিকটা আন্দোলিত হ'তে হচ্ছিলো। নিচু খিলানওলা প্রবেশ-পথ দিয়ে, ইউরির আগে-আগে চললো সে। এখানে এসে সে নিচু হ'য়ে বালতি দুটো মাটিতে রাখলো, তারপর কাঁধ থেকে ঝাঁক নামিয়ে, সোজা হ'য়ে দাঁড়িয়ে একটা ছোট্ট কুমাল দিয়ে হাত মুছতে-মুছতে বললো:

'চলুন, আপনাকে ভেতরের পথ দিয়ে সামনের হল-ঘরটার নিয়ে যাই। ঐ ঘরটায় আলো বেশি আসে। এক মিনিট দাঁড়াতে হবে কিন্তু। বালতিগুলোকে পেছনের সিঁড়ি দিয়ে ওপরে নিয়ে গিয়ে সব ঠিকঠাক ক'রে আসতে হবে। বেশি দেরি হবে না আমার। আমাদের সিঁড়িগুলো কেমন ছিমছাম দেখুন—লোহার সিঁড়ি, আর এমনভাবে বানানো হয়েছে যাতে খোলা হাওয়া পাওয়া যায় সব সময়। বাড়িটা পুরোনো তার ওপর গোলা-বারুদের সৌজন্যে একে কাঁপতেও হয়েছে মাঝে-মাঝে: কোথাও-কোথাও গাথুনি ঢিলে হ'য়ে এসেছে সেটা আপনি সহজেই লক্ষ্য করতে পারবেন। ইটের গাথুনির কাছে যে-ফাটলটা আছে, দেখছেন? ওখানটায় আমি আর কাটিয়া বাড়ি ছেড়ে বেরোবার সময় চাবি রেখে যাই। এই তথ্যটা মনে রাখবেন। একদিন হয়তো এমন সময়ে এসে পড়লেন যখন আমি বাড়ি নেই—তখন দরজা খুলে অনায়াসে বাড়ি দখল ক'রে ব'সে থাকতে পারবেন, যতোকণ আমি ফিরে না আসি। দেখলেন তো, এখানে থাকে চাবিটা কিন্তু এখন আর চাবির দরকার নেই। পেছন দিয়ে ঘরে ঢুকে ভেতর থেকে দরজাটা খুলবো এখন। এই বাড়িটার একমাত্র বিরক্তিকর ব্যাপার হ'লো মস্ত বড়ো-বড়ো ইদুর। পালে-পালে ইদুর এসে বাড়ি দখল ক'রে ব'সে আছে—কিছুতেই শ্রীমানদের হাত থেকে নিস্তার নেই। দেয়ালগুলি কী রকম পুরোনো, দেখেছেন? দেয়াল জুড়ে ফাটল আর ফোঁকর। যতোগুলো ইদুরের গর্ত পেয়েছি সবগুলো বুজিয়ে দিয়েছি, কিন্তু তাতে বিন্দুমাত্র লাভ হয়নি। হয়তো একদিন আপনি এসে আমাদের সাহায্য করতে পারবেন! মেঝে আর দেয়ালের জোড়ার জায়গাগুলিতে যতোগুলি ফোঁকর আছে সবগুলি বুজিয়ে দিতে হবে। তাহ'লেই বোধহয় ইদুরের উৎপাত কমবে, তাই না? আচ্ছা, আপনি এই চাতালে দাঁড়িয়ে অপেক্ষা করুন, যা খুশি তাই ভাবতে পারেন দাঁড়িয়ে-দাঁড়িয়ে। আমার বেশি দেরি হবে না—এক মিনিটের মধ্যেই আপনাকে ডাকবো ভেতরে।'

তার ডাকের অপেক্ষা করতে-করতে ইউরি ইট-বের-করা দেয়াল আর বোরানো লোহার সিঁড়ির দিকে তাকিয়ে দেখলো। আপন মনেই বললো: 'স্বীড়িংক্রমে ভেবেছিলাম সে তেমনভাবে পড়াশুনায় মগ্ন হয়ে আছে, যেমনভাবে কোনো কঠিন সত্যিকার শাস্ত্রিক কাজে সে আত্মনিয়োগ করে। কিন্তু এখন দেখছি তার উদ্দেশ্যটাও সত্য: এমন অনায়াস লঘুতার সঙ্গে সে কুয়ো থেকে জল তুলে আনলো যে মনে হ'লো এটা যেন বই-পড়ার মতোই কোনো ব্যাপার। যা-কিছু সে করে, তাতেই ঠিক একই ধরনের অনায়াস সুখ দেখা যায়, যেন ছেলেবেলায় সে একসঙ্গেই জীবনের সব-কিছু শুরু করেছিলো, তারপর থেকে নিজে-নিজেই সব কাজে তার অধিকার জন্মেছে, এমন তার স্বাভাবিকতা যে মনে হয় যেন কার্য-কারণ সম্বন্ধের মতোই তা অনিবার্য। এ সবই বোঝা যায় তার পিঠের রেখায়, সে যখন নিচু হয়, আর তার হাসিতে, যখন তা তার ঠোট দুটিকে ফাঁক ক'রে দিয়ে থুতনিকে গোল ক'রে তোলে, আর তার কথায়, তার ভাবনায়।

'জিভাগো!' সিঁড়ির মাথা থেকে ডাক দিলে লারা। ইউরি ওপরে উঠে এলো।

'আমার হাত ধরুন দিকি, আর যা বলি, তাই করবেন কিন্তু। দুটো আসবাবে ঠাসা অঙ্কার ঘরের মধ্য দিয়ে যেতে হবে—হাত না-ধরলে কোনো কিছুতে খাঁকা খেয়ে ছোট লাগতে পারে।'

'এ যে দেখছি গোলকধাঁধা। এর মধ্য দিয়ে কোনোকালে রাস্তা খুঁজে পেতাম না। তা এটা

এ-রকম হ'য়ে আছে কেন? ফ্ল্যাটটা কি আবার নতুন ক'রে সাজানো হবে নাকি?’

‘না, না, সে-সব কিছু না। আসলে ফ্ল্যাটটার মালিক অন্য কেউ, সে যে কে, আমি তা জানিও না। আমার নিজের ফ্ল্যাট স্থলবাড়িতে। স্থানীয় বসতি-বিভাগ যখন স্থল নিয়ে নিলে, তখন আমাকে আর কাটিয়াকে এ-বাড়ির একটা অংশ দেওয়া হ'লো। পুরোনো ভাড়াটেরা তাদের সব আসবাবপত্র ফেলে রেখে চ'লে গেছে। উঃ, কত আসবাব যে ছিলো তাদের! আমি অন্যের জিনিস ব্যবহার করতে চাই না, তাই এই ঘর দুটোয় সব আসবাব ভ'রে রেখেছি, আর জানলায় চুনকাম করেছি যাতে রোদ্দুর ঠেকানো যায়। —আমার হাত ছাড়বেন না, তাহ'লে কিন্তু হারিয়ে যাবেন। যাক, শেষ হ'য়ে এলো, এবার ডান দিকে যেতে হবে। বাঁচা গেলো—গোলকধাধা পেরিয়ে এসেছি—এই দরজা আমার। এক্ষুনি আলায় এসে পড়বো। সিঁড়ির দিকে লক্ষ্য রাখবেন।’

লারার পেছনে-পেছনে ঘরে ঢুকলো ইউরি, দরজার মুখোমুখি জানলা দিয়ে এক দৃশ্য চোখে পড়লো তার। প্রথমেই দেখা যায় বাড়ির উঠোন, তারপর উঠোনের ও-পাশে সারি-সারি যে-সব বাড়ি আছে, তাদের নিচু ছাদ পেরিয়ে নদীর ধারের খোলা জায়গাটায় গিয়ে চোখ পড়ে; ঐ খোলা জায়গাটার মালিক হ'লো মিউনিসিপ্যালিটি। ছাগল-ভেড়া চ'রে বেড়ায় সেখানে, তাদের লোম যেন পেছনে-লম্বা কোটের মতো জমিটাকে ঝাঁট দিচ্ছে। সেখানেও সেই চেনা হোডিং দেখা গেলো: ‘মরো অ্যাণ্ড ভেটচিনকিন: টেকি-কল। বীজ-বপণ যন্ত্র।’

এটা দেখেই ইউরির মনে প'ড়ে গেলো মস্কো থেকে যেদিন এখানে এসে পৌঁচেছিলো। তখন সেই দিনের কথা লারাকে বলতে শুরু ক'রে দিলে। লোকে যে স্টেলনিকভকে লারার স্বামী বলে, তা ভুলে গিয়ে ঐ সাক্ষাতেরও বিবরণ দিলে ইউরি। তার গল্পের এই অংশটা লারার মনে নাড়া দিলো।

‘আপনি দেখেছেন ওকে! আশ্চর্য। এখন আর-কিছু বলবো না, কিন্তু সত্যি এটা ভারি আশ্চর্য ব্যাপার। তার সঙ্গে যে আপনার দেখা হবে—এটা ভাগ্য যেন আগে থেকেই ঠিক ক'রে রেখেছিলো, কোনো একদিন এ-বিষয়ে সব কথা খুলে বলবো আপনাকে, শুনে অবাক হ'য়ে যাবেন। মনে হচ্ছে ওকে আপনার খরাপ লাগেনি, বরং বোধহয় ভালোই লেগেছে, তাই না?’

‘মোটের ওপর ভালোই লেগেছে বলা যায়। তার ওপর বিতৃষ্ণা জাগা উচিত ছিলো আমার। কেননা সে যেখানে-যেখানে মৃত্যু আর ধ্বংস ছড়িয়ে দিয়েছে, সে-সব এলাকা পেরিয়েই আসতে হয়েছে আমাদের। ভাড়াটে তুর্কি দস্যু, বা কোনো পাগলা খুনে বিপ্লবী—এই রকম ভেবেছিলাম স্টেলনিকভকে, কিন্তু দেখলাম সে তার কোনোটাই নয়। ভালোই—কেউ যখন আমাদের ধরণার সঙ্গে ঠিক মেলে না, তাতে বোঝা যায় সে ছকে-ফেলা মানুষ নয়। যদি তা হ'তো তাহ'লে সেখানেই তার মানবত্বের পরিসমাপ্তি ঘটতো। যাকে কোনো নিয়মের মধ্যে ফেলতে পারছি না তার অন্তত একটা অংশ সত্যিকার মানুষ—অর্থাৎ অমরত্বের একটি কণা আছে তার মধ্যে।’

‘লোকে বলে ও নাকি পার্টির সভ্য নয়।’

‘আমারও তা-ই মনে হয় কিন্তু। সেই থেকে প্রায়ই আমি ভেবেছি ওর আকর্ষণ-শক্তির উৎসটা কোথায়। ওর নিস্তার নেই, ও ধ্বংস হবে—সেইটাই কারণ। আধেরে দুঃখ পেতে হবে ওকে—করতে হবে পাপের প্রায়শ্চিত্ত। যে-বিপ্লবী নিজের হাতে আইন তুলে নেয়, সে সত্যিই ভয়াবহ—দুষ্কিয়দের মতো ভয়াবহ নয়, কিসের মতো জানেন? আয়ত্তের বাইরে চ'লে-যাওয়া যন্ত্রের মতো, কোনো চালকহীন রেলগাড়ির মতো। অন্য সকলের মতো স্টেলনিকভও উন্মাদ। কিন্তু তাকে উন্মাদ করেছে জীবন ও যন্ত্রণা, পুঁথি-পড়া বিদ্যে নয়। আমি তার গোপন কথা জানি না, কিন্তু তার যে এক যন্ত্রণা আছে সে-বিষয়ে আমার সন্দেহ নেই। বলশেভিকদের সঙ্গে তার যোগাযোগ নিতান্তই আকস্মিক। যতক্ষণ সে বলশেভিকদের পথে চলবে ততক্ষণ তাকে কাজে

লাগাবে তারা, কিন্তু তারপর আর সহ্য করবে না। যেই তার দরকার ফুরিয়ে যাবে তখনই তারা নির্দয়ভাবে মাড়িয়ে যাবে তাকে—যেমন আগেও অন্যান্য যুদ্ধবিশারদকে মাড়িয়ে গেছে।’

‘তাই মনে হয় আপনার?’

‘নিশ্চয়ই!’

‘কিন্তু নিস্তার পাবার কোনো উপায়ই কি ওর নেই? পালিয়ে যেতে পারে না?’

‘লারিসা ফিয়োডোরোভনা, আপনিই বলুন, পালিয়ে সে যাবে কোথায়? আগেকার দিনে পালিয়ে যাওয়া সম্ভব ছিলো, যখন ছিলো জারের আমল। কিন্তু আজকাল? একবার চেষ্টা ক’রেই দেখুন না।’

‘আপনার কথা শুনে ওর জন্য খুব কষ্ট হচ্ছে আমার। জানেন, আপনি অনেক বদলে গেছেন। কত শাস্ত্রভাবে বিপ্লবের কথা বলতেন আগে, এমন কঠোর ছিলেন না।’

‘লারিসা ফিয়োডোরোভনা, আসল কথাটা এই যে সব-কিছুই একটা সীমা আছে। এতোদিনের মধ্যে কিছু-একটা স্পষ্ট সাফল্য দেখা দেওয়া উচিত ছিলো। কিন্তু শেষ পর্যন্ত দেখা যাচ্ছে যে, যারা এই বিপ্লবের প্রেরণা জুগিয়েছেন, তাঁরা পরিবর্তন আর ভোলপাড় আর অশান্তি ছাড়া আর কিছুই চান না; বলা যায় যে অশান্তিতেই তাঁদের স্বাভাবিক নিবাস। ছোটোখাটো কিছুতে তৃপ্তি নেই তাঁদের, সবই বিশ্বব্যাপী হওয়া চাই। এই যুগসন্ধির সময়—যখন নতুন পৃথিবী আস্তে আস্তে গ’ড়ে উঠছে—এই সন্ধিক্ষণই তাঁদের কাছে সর্বস্ব, এটাই তাঁদের শেষ লক্ষ্য। আর কিছু করার উপযুক্ত নন তাঁরা, এই একটা বিশেষ দিকেই তাঁদের শিক্ষিত করা হয়েছে, এটা ছাড়া আর-কিছুই তাঁরা জানেন না। আর এই শেবহীন প্রস্তুতির অবিরাম ঘূর্ণি কেন, জানেন? তার কারণই এই যে তাঁদের সত্যিকার কোনো ক্ষমতা নেই, প্রতিভা নামক ব্যাপারটি তাঁদের নাগালের বাইরে। মানুষ জন্মায় ঝাঁচতে, ঝাঁচবার জন্য প্রস্তুত হ’তে নয়। জীবন—এই যে জীবন আমরা উপহার পেয়েছি—এটাই কি নয় সবচেয়ে বড়ো, সবচেয়ে আশ্চর্য ব্যাপার? এই জীবনের বদলে কেন ডেকে আনবো এ-সব ছেলেমানুষি নাটুকেপনা, বয়ঃসন্ধির অমূলককল্পনা, বাচ্চা ছেলের চ্যাচামেচি দুটুমি? কিন্তু থাক একথা। এবার আমার প্রশ্ন জিজ্ঞেস করার পালা। আমরা পৌঁছেছিলাম এখানকার গোলমালের দিনের সকালবেলায়। আপনি কি ছিলেন তার মধ্যে?’

‘মনে হচ্ছে তো ছিলাম। চারদিকেই দাউ-দাউ ক’রে আগুন জ্বলছিলো, এ-বাড়িটা যে পুড়ে যায়নি তা-ই আশ্চর্য। তবে খুব নাড়া খেয়েছিলো, তা তো আপনাকে আগেই বলেছি। এখনও উঠোনে একটা না-ফাটা বোমা প’ড়ে আছে। ঠিক গেটের কাছটায়। লুটপাট, গোলা-বারুদ। সব রকম ভীষণ কাণ্ড হ’য়ে গেছে—সরকার-বদলের সময় সর্বত্রই যা হ’য়ে থাকে। কিন্তু ততোদিনে আমরা এ সব ব্যাপারে রীতিমতো অভ্যস্ত হ’য়ে পড়েছিলাম, এমন নয় যে এ-সব প্রথম ঘটলো। শাদাদের সময় যা চলেছিলো তা আপনাকে ব’লে বোঝানো যাবে না। খুন, জখম, রাহাজানি, ভয়-দেখিয়ে জোর-জুলুম—তাওব বলতে যা বোঝা যায়, তাই। কিন্তু এখনো সবচেয়ে আশ্চর্য ব্যাপারটাই তো বলিনি। আমাদের গালিউলিন। চেকদের সঙ্গে সেও এসে হাজির হয়েছিলো—আর কী হ’য়ে জানেন? গবর্নর-জেনারেল না কী।’

‘জানি। একথা আমিও শুনেছি। আপনার সঙ্গে তার দেখা হয়েছিলো?’

‘প্রায়ই দেখা হ’তো। তাকে ধন্যবাদ—তার কৃপায় কত লোককে যে বাঁচিয়েছি আমি, আর কত লোককে যে এ-বাড়িতে লুকিয়ে রেখেছি—তা আপনি কল্পনাও করতে পারবেন না। তা ছাড়া, সে সত্যিকার ভদ্রলোকের মতো ব্যবহার করতো, চলাফেরার ভঙ্গিতে রীতিমতো আভিজাত্য প্রকাশ পেতো। ঐ ঝাঁকের কইয়ের সঙ্গে তার মোটেও মিল ছিলো না—অন্যরা তো হঠাৎ গজিয়েছে, মাটি ফুড়ে উঠেই কেউ হয়েছে কসাক কাপ্তান, কেউ-বা পুলিশ-সার্জেন্ট, আরো কত কী! গালিউলিন যে তাদের সকলের চেয়ে আলাদা—এ কথা বললে তাকে তার প্রাপ্য সম্মান দেওয়া হয়। কিন্তু দুঃখের কথা এই যে, ও-সব ব্যাঙাচিরাই মাতব্বরি করে, ভালো

লোকেরা কিছুই করতে পারে না। গালিউলিন আমাকে অনেক সাহায্য করেছিলো, সে-জন্য ঈশ্বর তাকে দয়া করবেন। জানেন তো, আমরা অনেকদিনের পুরোনো বন্ধু। আমি যখন খুব ছোটো, সে আমাদের বাড়ির পাশেই একটা শস্তা ভাড়ার মস্ত বাসা-বাড়িতে থাকতো—অনেক ভাড়াটে ছিলো সে-বাড়িতে, আমি সব সময়েই সেখানে যাওয়া-আসা করতুম। ভাড়াটীদের মধ্যে বেশির ভাগই ছিলো রেলের লোক। অনেক দারিদ্র্য সেই ছেলেবেলাতেই দেখেছিলাম আমি। আর তাই বিপ্লবের প্রতি আমার মনোভাব একটু ভিন্ন। এটা আমার অনেক কাছের জিনিস, এর অনেক কিছুই আমি ভিতর থেকে বুঝতে পারি। কিন্তু গালিউলিনের কথা ভাবলে সত্যি অবাক হ'তে হয়, একবার ভাবুন এক দরোয়ানের ছেলে কিনা শাদাদের কর্নেল হ'য়ে বসেছে!—কিংবা বোধ হয় জেনারেলই হবে। আমাদের বাড়িতে সৈন্য হয় নি কেউ, তাই ও-সব পদ-বিভাগ আমার ঠিক জানা নেই। জানেনই তো পেশায় আমি হলাম ইতিহাসের মাস্টার।... সে যাই হোক, ব্যাপারটা হ'লো এই যে গালিউলিন আর আমি মিলে অনেককেই বাঁচাতে পেরেছিলাম। প্রায়ই গিয়ে তার সঙ্গে দেখা করতুম আমি। আপনার কথাও বলাবলি করেছি আমরা। যখনই যাদের হাতে ক্ষমতা এসেছে আমি তাদেরই মধ্যে পেয়েছি বন্ধু, যোগাযোগের সূত্র—সেই সঙ্গে তাদের সবার কাছ থেকে অনেক দুঃখ ও নৈরাশ্য। শুধু শস্তা উপন্যাসেই দেখা যায় যে মানুষ দুই শিবিরে বিভক্ত হ'য়ে গেছে, একের সঙ্গে অন্যের কোনো যোগাযোগই নেই। কিন্তু বাস্তব জীবনে সব-কিছুই মিলে-মিশে থাকে। যদি জীবন ভ'রে একটি মাত্র ভূমিকা থাকতো আপনার, সমাজে একটিমাত্র স্থান, একটিমাত্র ধারণার প্রতিনিধি হ'তে হ'তো আপনাকে, তাহ'লে কি একেবারে শূন্য পরিণত হতেন না আপনি? এই যে, তুই এলি?’

বছর আটকের একটি বাচ্চা মেয়ে এসে ঘরে ঢুকলো। সুন্দরভাবে বিনুনি করা তার চুল। সরু চোখ দুটিতে দুটুবুদ্ধি জ্বলজ্বল করছে, আর হাসলে চোখ কোণের দিকে উঠে যায়। সে জানতো যে তার মার সঙ্গে এক ভদ্রলোক দেখা করতে এসেছেন, দরজার বাইরেই সে ইউরির গলা শুনেছে, কিন্তু সে ভাবলে যে একটু অবাক হবার ভান করা উচিত তার। নমস্কার ক'রে ইউরির দিকে অপলকে তাকিয়ে থাকলো সে নির্ভয়ে, তার দৃষ্টি থেকেই সেই একলা মেয়েটি প্রকাশিত হ'য়ে পড়লো, যে এইটুকু বয়সেই ভাবতে শিখেছে।

‘আমার মেয়ে, কাটিয়া। আশাকরি আপনার সঙ্গে বন্ধুত্ব হবে ওর।’

‘মেলিউজ্‌ইয়েভোতে ওর ছবি আমাকে দেখিয়েছিলেন। বেশ বড়ো হয়েছে তো। এতো বদলেছে যে চেনাই যায় না।’

‘তুই না বেরিয়েছিলি, কাটিয়া। কখন ফিরলি?’

‘ফাটলটার মধ্য থেকে চাবি বের ক'রে নিয়েছিলাম। জানো, কী মস্ত একটা ইদুর ছিলো ওর ভেতর—এই য্যাগ্তো বড়ো। আমার লাফ যদি তখন দেখতে! ভয়ে প্রায় ম'রেই যাচ্ছিলাম।’

চোখ বড়ো-বড়ো ক'রে মুখ গোল ক'রে এমন মজার ভঙ্গিতে সে তাকালো, যেন কোনো মাছকে জল থেকে ডাঙায় তুলে আনা হয়েছে।

‘এবার যাও তুমি। ইউরি-কাকাকে আমি এখানে খেয়ে যেতে বলবো, উনুন থেকে কাশা নামিয়ে তৈরি ক'রে ডাকবো তোমাকে।’

‘অনেক ধন্যবাদ, থাকতে পারলে আমি খুব খুশি হতাম। কিন্তু আমি শহরে আসা শুরু করার পর থেকে আমরা দু'টোর সময়-দিনার খাই, সব সময়েই চেষ্টা করি যাতে দেরি না হয়। বাড়ি দৌছতে তিন ঘণ্টার ওপর লাগে—প্রায় চার ঘণ্টা। সেইজন্যেই এতো তাড়াতাড়ি এসেছি আমি। শিগগিরই উঠতে হবে আমাকে।’

‘আর আধঘণ্টা থাকতে পারেন।’

‘থাকতে আমার ভালোই লাগবে।’

১৫

‘আপনি কিছুই গোপন করেননি আমার কাছ থেকে, আমিও করবো না। যে-স্টেলনিকভের সঙ্গে আপনার দেখা হয়েছিলো সে আমার স্বামী—পাশা আন্টিপভ। এই পাশাকে খুঁজতেই আমি যুদ্ধক্ষেত্রে চ’লে গিয়েছিলাম, আর এরই মৃত্যুসংবাদ আমি খুব সংগত কারণেই বিশ্বাস করতে চাইনি।’

‘আপনি যে স্টেলনিকভকে আপনার স্বামী ব’লে ভাবছেন, এতে আমি অবাক হচ্ছি না। ও-রকম একটা কথা আমিও অবশ্য শুনেছিলাম আগে, কিন্তু আমার তাতে একটুও বিশ্বাস হয়নি। সেইজন্যই এ-কথা আমার একটুও মনে ছিলো না, তাই এতো খোলাখুলিভাবে আপনাকে তার সঙ্গে দেখা হওয়ার কথা বলতে পেরেছি। এটা একটা নির্ভেজাল মিথ্যে কথা—একেবারে অর্থহীন। আমি তো দেখেছি তাকে। আপনার সঙ্গে তাকে জড়াবে কী ক’রে লোকে? তার সঙ্গে আপনার কী মিল আছে?’

‘তবু—এই কথাই সত্যি। স্টেলনিকভই হ’লো আমার স্বামী আন্টিপভ। সকলেরই এই ধারণা, আমিও তাদের সঙ্গে এ-বিষয়ে একমত। কাটিয়াও এ-কথা জানে, বাবার জন্য তার গর্বের শেষ নেই। স্টেলনিকভ হ’লো তার ছদ্মনাম—সব সক্রিয় বিপ্লবীর মতোই তাকেও একটা নাম বানিয়ে নিতে হয়েছে। বিশেষ কোনো কারণেই হয়তো সে তার নিজের নামে কাজ করতে কিংবা ষাচতে চায় না।

‘আর ইউরিয়ান্টিন দখল ক’রে আমাদের ওপর গোলা চালিয়েছে সে-ই। এটা সে স্পষ্ট জানতো যে আমরা এখানে আছি, কিন্তু যদি লোকে তার আসল পরিচয় জেনে ফ্যালে, এই ভয়ে আমরা বেঁচে আছি কিনা, এটা পর্যন্ত একবার সে জানবার চেষ্টা করেনি। অবশ্য ঐ গুলি চালানোই তার কর্তব্য। যদি সে আমাদের জিজ্ঞেস করতো তো আমি ঠিক এই তাকে করতে বলতাম। তাহ’লেও ... আপনি হয়তো বলবেন আমি যে নিবাপদ আছি এবং নগর-পরিষদ যে আমাকে একটা মোটামুটি ভদ্র জায়গায় থাকতে দিয়েছে, এ থেকেই প্রমাণ হয় যে সে গোপনে আমাদের দেখাশোনা করে। কিন্তু সে যে সত্যি সত্যি এখানে এসেও আমাদের সঙ্গে দেখা ক’রে যাবার লোভ সংবরণ ক’রে গেছে, এটা কল্পনাও করা যায় না! রোমক নাগরিকতার কোনো বিশেষ সদগুণ, আজকাল তো এইসব বানানো বুলি আউড়ে থাকে তারা,—কিন্তু এটা মনুষ্যত্ব নয়। ভাববেন না, আপনার মতের দ্বারা প্রভাবিত হচ্ছি। সত্যি বলতে, আপনার আমার চিন্তাধারায় কিছুই মিল নেই। তফাৎটা প্রান্তিক, ধরা-ছোঁয়ার বাইরে: আমরা অনুভব করি একভাবে, বুঝিও একভাবে, কিন্তু বড়ো-বড়ো ব্যাপারে—যাকে বলে জীবনদর্শন—সেখানে দু’জনের পক্ষে দু’দিকে থাকাই ভালো। কিন্তু স্টেলনিকভের কথায় ফিরে যাওয়া যাক।

‘এখন ও আছে সাইবেরিয়ায়। আপনি ঠিকই বলেছেন—লোকে ওর ওপর এমন সব অপরাধ চাপায়, যা শুনে রক্ত হিম হ’য়ে যায় আমার। আমাদের সবচেয়ে শিক্ষিত ও ভালো এক সেনাবাহিনীর অধিনায়ক হিসেবে এখন সাইবেরিয়ায় আছে সে—কার সঙ্গে লড়াই করছে, জানেন? বেচারা গালিউলিনের সঙ্গে, যে তার ছেলেবেলার বন্ধু, গত জার্মান যুদ্ধে ও যার পাশাপাশি দাঁড়িয়ে লড়েছিলো। ও কে, গালিউলিন তা জানে; আমি যে ওর স্ত্রী, এও তার অজানা নেই, কিন্তু সে যে এ-কথা জানে, সেটা কখনো আমাকে অনুভব করতে দেয়নি, সযত্নে সে এ ব্যাপারটা এড়িয়ে গেছে, কিন্তু তার এই কৌশলকে আমি খুব-একটা মূল্য দিই না। আর শুনলে আপনি অবাক হবেন, স্টেলনিকভের নাম শুনলেই সে একেবারে উন্মাদ হ’য়ে যায়।

‘হ্যাঁ—ওখানেই সে আছে এখন—মানে সাইবেরিয়ায়। কিন্তু এখানে অনেক দিন কাটিয়ে গেছে, রেলগাড়ির একটা বগিতে থাকতো, যে-জায়গায় আপনার সঙ্গে দেখা হয়েছিলো। মনে-মনে শেষ দিন পর্যন্ত এই আশা করেছিলাম আমি—বলা যায় না, হয়তো দৈবাৎ ওর সঙ্গে দেখা হ’য়ে যাবে। মাঝে-মাঝে সে আমার হেডকোয়ার্টারে যেতো; গণপরিষদের সৈন্যদের

হেডকোয়ার্টার যে বাড়িতে ছিলো, তাদেরটাও ছিলো সেখানেই। আর অদ্ভুতের এমনি পরিহাস যে তারই প্রবেশপথে গালিউলিনের সঙ্গে আমার দেখাশোনা হ'তো। প্রায়ই আমি যেতুম গালিউলিনের কাছে—কাউকে বাঁচাবার, কোনো ভীষণ কাণ্ড বন্ধ করার জন্য। যেমন ধরুন, মিলিটারি অ্যাকাডেমির সেই ব্যাপারটা; সে-সময়ে এটা তুমুল আলোড়ন তুলেছিলো—যদি মাস্টারমশাইকে ক্যাডেটরা অপছন্দ করতো তো অঙ্ককারে ঘাপটি মেরে ব'সে সোজা গুলি চালিয়ে দিয়ে পরে জানাতো সে একজন বলশেভিক, কিংবা সে বলশেভিকদের পছন্দ করে। আর তারপর সেই ব্যাপারটাই ধরুন, যখন তারা ইহুদিদের মারতে শুরু করলে। তা কথাটা হচ্ছে—সব সময় এটা মনে হয় আমার—আপনি যদি শহরে থাকেন, আর বুদ্ধির কোনোরকম চর্চা করেন, তাহ'লে আপনার অর্ধেক বন্ধুবান্ধব ইহুদি হতে বাধ্য। তবু, যখন ইহুদিদের ওপর পগরম চলে, জঘন্য ও ভীষণ কাণ্ড শুরু হ'য়ে যায়, তখন রাগ, লজ্জা, দুঃখ শুধু নয়—আরো কিছু অনুভব করি আমরা—নিজের মধ্যে দু' টুকরো হ'য়ে যাবার কষ্ট—যেন আমাদের সমবেদনা আসছে বুদ্ধি থেকে, হৃদয় থেকে নয়—তাই কপটতার স্বাদটুকু যেন ঠেকানো যায় না।

‘যারা একদিন পৌত্তলিকতার শৃঙ্খল থেকে মানবজাতিকে মুক্তি দিয়েছিলো, সব রকম অনায়াস ও অবিচারের বিরুদ্ধে এই মুহূর্তে যাদের অনেকেই নিজেদের উৎসর্গ করেছে, তারা যি নিজেদের কাছ থেকে মুক্তি অর্জন করতে পারে না, তারা যি এ-ক্ষেত্রে এতো নির্মমভাবে অসহায়, এটা আমার কাছে রীতিমতো বিস্ময়কর ব'লে বোধ হয়। এমন এক সেকেন্দ্রে ও আদিম প্রথার প্রতি আনুগত্যের সূত্রে তারা শৃঙ্খলিত হ'য়ে আছে যে কিছুতেই তারা নিজেদের ছাড়িয়ে ওপরে উঠতে পারে না, কিছুতেই পারে না সকলের মধ্যে নিজেদের মিশিয়ে দিতে, অথচ যাদের ধর্মের প্রতিষ্ঠা তারা করেছে, তাদের যদি ভালো ক'রে জানতো তো তারা দেখতে পেতো নিজেদের সঙ্গে তাদের অনেক সাদৃশ্যই র'য়ে গেছে।

‘সত্য, উৎপীড়নই তাদের ঠেলে নিয়ে যায় এই নিষ্ফল ও সর্বনেশে ভঙ্গির দিকে, এই লজ্জিত আত্মঘাতী বিচ্ছেদের দিকে—যা থেকে দুর্ভাগ্য ছাড়া আর কিছুই বেরিয়ে আসে না। কিন্তু আমার মনে হয়, এর অন্য একটা কারণ হচ্ছে এক ধরনের মানসিক জরা, এক শতাব্দী-সঞ্চিত অবসাদ যেন। অঙ্ককারে ঠাট্টা ক'রে শিস দিচ্ছে যেন, ভীক কল্পনা, দৃষ্টির এই আটপৌরে দারিদ্র্য—এ-সব আমার ভালো লাগে না। বুড়োরা যখন তাদের বার্ধক্য নিয়ে হা-হুতাশ করে, কিংবা অসুস্থ লোকেরা যখন তাদের রোগ নিয়ে বিষম বিলাপে মগ্ন হয়ে, তখন যেমন অস্বস্তি লাগে, তেমনি লাগে তাদের এই সব ভাবভঙ্গি দেখে। আপনার কি তা-ই মনে হয় না?’

‘আমি এ নিয়ে এতোটা ভাবিনি। তবে আমার এক বন্ধু আছে—মিশা গার্ডন। সেও ঠিক আপনার মতোই কথা বলে।’

‘সে যাই হোক, আমি সেখানে এইজন্য যেতুম, পাশাও তো সেখানে যাতায়াত করে, যদি দৈবাৎ আসা-যাওয়ার সময় দেখা হ'য়ে যায়। জ্বারের আমলে দালানের এই অংশেই গবর্নর-জেনারেল বসতেন। এখন সেখানে দরজার ওপর একটি বিজ্ঞপ্তি ঝুলছে: “অভিযোগ।” হয়তো আপনি সেটা দেখেছেন। দেখেছেন? শহরের সবচেয়ে সুন্দর জায়গা সেটা। তার সামনের চৌকো উঠানে বড়ো-বড়ো তক্তা পেতে রাখা হয়েছে, সেই উঠান পেরিয়ে গেলেই শহরের বাগান, অশুষ্টি মেপল, হর্শন আর হনিসাকল্—এর গাছ সেখানে। দরজার বাইরে, রাস্তার ওপর সব সময়েই লাইন দিয়ে দাঁড়িয়ে আছে লোকজনেরা। সেই লাইনে যোগ দিয়ে আমি অপেক্ষা করতুম। লাইন ডিঙেবার কোনো চেষ্টা করিনি আমি, আমি যে তার স্ত্রী, তা কখনোই প্রকাশ করিনি। কেননা, সব সত্ত্বেও, আমাদের নাম তো আলাদা। তাছাড়া হৃদয়বৃত্তির কাছে আবেদন ক'রে কোনোই ফল হ'তো না সেখানে। তাদের ধরন-ধারণ একেবারে আলাদা। আপনি

কি জানেন যে তার বাবা পাভেল ফেরাপটোভিচ আশ্টিপভ—তিনি একজন ভূতপূর্ব রাজবন্দী ও বুদ্ধ শ্রমিক—কাছেই থাকেন এখানকার; রাজপথের ওপরেই একটা উপনিবেশ আছে, এখানে তাঁকে নির্বাসিত হ'য়ে থাকতে হয়েছিলো। তাছাড়া তার বন্ধু টিভেরজিনও আছে সেখানে। তারা দু'জনেই আঞ্চলিক বিপ্লবী পরিষদের সভ্য। এখন আপনাকে যদি বলি যে পাশা একবারও তার বাবাকে দেখতে যায়নি, তার কাছেও নিজের পরিচয় খুলে বলেনি, তাহ'লে কি আপনি বিশ্বাস করবেন? আর তার বাবাও এটাকে মেনে নিয়েছেন, একটুও মন-খারাপ করেননি। যদি তাঁর ছেলে “ছদ্মবেশে” লুকিয়ে থাকতে চায়, তাহ'লে এটাই তো তার পক্ষে স্বাভাবিক, আর তাহ'লে তিনি যে তার সঙ্গে দেখা করতে পারবেন না, এ নিয়ে কোনো উচ্চবাচ্য করা চলবেই না। এরা সব পাথরে বানানো মানুষ, এতো সব আদর্শ আর নিয়মকানুন আছে এদের যে কিছুতেই এদের মানুষ বলা চলে না।

‘যদি প্রমাণ করতেও পারতুম যে আমি তার স্ত্রী, তাহ'লেও কোনো সুবিধে হ'তো না আমার। এ-রকম সময়ে, এই যুগসঙ্কীর সংকটমুহুর্তে, স্ত্রীকে দিয়ে কী হবে? কী এসে যায় স্ত্রীর অস্তিত্বে? গুনিয়ার মজদুর, নতুন পৃথিবী রচনা—এ-সব একটা কিছু তো বটে। কিন্তু স্ত্রী! কাকে বলে? নিছকই একটি দ্বিপদ জীব, উকুন বা যে-কোনো পোকারই সমতুল্য, তার চেয়ে এক কানাকড়িও তার দাম বেশি নয়!

‘তার সহকারী মাঝে-মাঝে বেরিয়ে এসে জিজ্ঞেস করতো তার সঙ্গে কেন দেখা করতে চায় তারা—উত্তর শুনে তুষ্ট হ'লে মাঝে-মাঝে দু-একজনকে ঢুকতে দিতো ভেতরে। আমি কিন্তু কখনো আমার নাম বলিনি, আর যখন সে জিজ্ঞেস করতো কেন দেখা করতে চাচ্ছি, আমি সব সময়ই বলতুম, ব্যক্তিগত কারণে। অবশ্য এটা যে নিছকই সময় নষ্ট করা, তা আমি জানতাম। সহকারীটি উত্তর শুনে কাঁধ ঝাঁকাতো, সন্দেহের চোখে তাকাতো আমার দিকে। কিন্তু ওর সঙ্গে একবারও আমার দেখা হয়নি।

‘আপনি হয়তো ভাবছেন সে আমাদের তোয়াক্কা রাখে না, বা মোটেও ভালোবাসে না আমাদের, বা হয়তো ভুলেই গেছে আমাদের কথা। এটা কিন্তু ভুল। ওকে খুব ভালো ক'রেই জানি আমি। আমি জানি ও কী চায়; জানি, আমাদের ভালোবাসে ব'লেই ও-রকম করে ও। খালি হাতে আমাদের কাছে ফিরে আসবার কথা কল্পনাও করতে পারে না। বিজয়ী বীরের বেশে আসতে চায়, গৌরবে উজ্জ্বল হ'য়ে—সে চায় তার সেই গৌরব আমাদের পায়ের কাছে সমর্পণ করতে। আস্ত ছেলেমানুষ একটি।’

আবার কাটিয়া ঘরে এলো। তাকে অবাক ক'রে লারা তাকে শূন্যে তুলে নিয়ে দোলাতে লাগলো, কাতুকুতু দিয়ে চেপে ধরলো বুকে।

১৬

ঘাড়ায় চ'ড়ে ইউরিয়ান্টিন থেকে ফিরছিলো ইউরি। অসংখ্যবার এই রাস্তা দিয়ে সে ফিরেছে। এতো অভ্যস্ত পথ যে এখন আর টেরই পায় না সেটা, বলতে গেলে চোখেও দেখতে পায় না।

একটু পরেই বনের ভেতরকার সেই চৌরাস্তায় এসে পড়বে যেখান থেকে একটা পথ সোজা হ'লে গেছে ভারিকিনোর দিকে, আর-একটা ঘুরে গেছে সাকমা নদীর তীরে এক জেলেদের ঘামে। এখানেও একটু ঝুটির গায়ে কাঠের তক্তা বসিয়ে কৃষিকাজের যন্ত্রপাতির বিজ্ঞাপন ঐটে দেওয়া হয়েছে। সাধারণত যখন সে এই মোড়ে পৌছয়, তখন সন্দের অস্পষ্টতা নেমে আসে। মাজও তা-ই হবে।

যেদিন সে প্রতিদিনের মতোই শহরে এসে বিকেলবেলায় বাড়ি ফেরার বদলে লারার গাড়িতে রাত কাটিয়ে গিয়েছিলো, তার পরে দু-মাসেরও বেশি কেটে গেছে। পরদিন বাড়ি ফিরে

গিয়ে সে বলেছিলো যে একটা বিশেষ কাজে আটকা পড়ে গিয়েছিলো শহরে, তাই সামডেভইয়াটভের সরাইতেই রাত কাটিয়েছে। বেশ কিছুদিন ধরে লারাকে সে নাম ধরে ডাকে, 'তুমি' বলে সম্বোধন করে, যদিও লারা তাকে এখনো ডাকে জিভাগো বলে। টোনিয়াকে ঝাঁকি দিচ্ছে ইউরি, প্রতারণা করছে তার সঙ্গে, যে-কথাটা সে টোনিয়ার কাছ থেকে গোপন করেছে ক্রমশই সেটা গভীর ও অবৈধ হ'য়ে উঠছে, অথচ এ-রকম কিছু যে কোনোদিন ঘটতে পারে, এটা একেবারে অচিন্তনীয় ছিলো।

টোনিয়াকে পূজো করে ইউরি। টোনিয়ার মনের শান্তি পৃথিবীর যে-কোনো জিনিসের চেয়ে তার কাছে বেশি মূল্যবান। তার সম্মানরক্ষার জন্য সে সব-কিছুই করতে পারে, এই সম্মানের ব্যাপারে সে টোনিয়া বা তার বাবার চেয়ে বেশি স্পর্শকাতর। টোনিয়ার সম্মান অক্ষুণ্ণ রাখার জন্য যে-কোনো মানুষকে টুকরো ক'রে সে ছিড়ে ফেলতে পারে, আর এখন কিনা সে নিজেই তাকে অপমান করছে।

বাড়িতে তার নিজেকে মনে হয় অপরাধী। বাড়ির কেউ সত্য কথা জানে না, তাকে আগের মতোই ভালোবাসে সবাই, সেজন্য তার নৈতিক যন্ত্রণার অন্ত নেই। কোনো কথাবার্তার মধ্যে হঠাৎ নিজের অপরাধের কথা তার মনে পড়ে যায়, তখন আর কোনো কথাই শুনতে পায় না।

অনেক সময় খেতে বসে এ-কথা তার মনে পড়ে, অমনি খাবার আটকে যায় তার গলায়, চামচে নামিয়ে রেখে প্লেট ঠেলে সরিয়ে দেয় তখন। টোনিয়া অস্বস্তি হ'য়ে জিজ্ঞেস করে, 'কী হ'লো তোমার? নিশ্চয়ই কোনো দুঃসংবাদ শুনে এসেছো শহর থেকে? গ্রেপ্তার করেছে কাউকে, না কি গুলি ক'রে মেরেছে? বলো। না, না, আমি ভয় পাবো না, কথাটা বলে ফেললেই ভালো লাগবে তোমার। বলো।'

সে যে আর-একজনকে ভালোবাসে, এইজন্য কি তাকে বলা যায় টোনিয়ার প্রতি বিশ্বাসঘাতক? না, কোনো তুলনাই সে করেনি দু'জনের মধ্যে, কোনো নির্বাচনও না। 'মুক্ত প্রেম' নামক ব্যাপারটিতে তার বিশ্বাস নেই, ইন্দ্রিয়ের দ্বারা চালিত হবার 'অধিকার'কে সে অপছন্দ করে। এমন কথা বলতে বা চিন্তা করতে গেলেও তার মনে হয় সে নেমে যাবে। তার জীবনে এমন কোনো সময় আসেনি যখন সে 'উড়েছে', অথবা সে নিজেকে বিশেষ অধিকারসম্পন্ন অতিমানব বলেও ভাবে না। এখন সে বিবেক-দংশনে ক্ষতবিক্ষত।

'এর পর কী?' মাঝে-মাঝে নিজেকে সে জিজ্ঞেস করে। অত্যন্ত দীনভাবে সে আশা করে যে কোনো-এক আশাতীত, অসম্ভব ঘটনা তার সমস্যার সমাধান ক'রে দিয়ে যাবে।

কিন্তু এবার সব বদলে গেছে। যে-গ্রন্থির সে সৃষ্টি করেছিলো, এবার তাকে ছিন্ন করবে, এই রকম মনস্থির ক'রেই সে আজ বাড়ি ফিরছে। টোনিয়ার কাছে সব-কিছু খুলে বলবে, ক্ষমা চাইবে তার কাছে, আর সে লারার সঙ্গে দেখা করবে না।

এ-রকম অবস্থায় সব যেমন হওয়া উচিত, ঠিক তেমনটি কিন্তু হয়নি। এখন সে মনে ক'রে দেখলো সে যে চিরকালের মতো লারার সঙ্গে সম্পর্ক ছেদ করতে যাচ্ছে, এটা তাকে স্পষ্ট ক'রে বুঝিয়ে দেওয়া হয়নি। আজ সকালে লারাকে তার সিদ্ধান্ত জানিয়েছে, বলেছে, টোনিয়াকে সে সব খুলে বলতে চায়, এ-কথাও বলেছে, তাদের দেখাশোনা হওয়াটা আর বাঞ্ছনীয় নয়; কিন্তু এখন তার মনে হ'তে লাগলো যে সবই বড়ো বেশি নরম ক'রে জানিয়েছে, বড়ো বেশি কোমলতা ছিলো তার ভেতর, যার ফলে সমস্ত ব্যাপারটা যথেষ্টরকম স্পষ্ট হ'য়ে উঠতে পারেনি।

ইউরি যে কতোদূর অসুখী হ'য়ে আছে লারা সেটা বুঝতে পেরেছে বলেই এমন কোনো বেদনাদায়ক দৃশ্যের অবতারণা করেনি, যাতে সে আরো বিপর্যস্ত হ'য়ে পড়ে। যথাসম্ভব শান্তভাবে ইউরির সব কথা শোনবার চেষ্টা করেছে লারা। সামনের দিককার একটা খালি ঘরে বসে তারা কথা বলছিলো; গাল বেয়ে চোখের জল গড়িয়ে পড়ছিলো লারার, কিন্তু এই

অশ্রুপাতের একতিল চেতনাও তার ছিলো না—যেন তার বাড়িটাউন্টে দিকের সেই দেবীমূর্তিগুলির গাল বেয়ে বৃষ্টির ফোঁটা গড়িয়ে পড়ছে, সমস্ত দৃশ্যটা তেমনি নিঃসাড় হয়ে গিয়েছিলো। নরম স্বরে একটি কথাই সে বারে-বারে বলছিলো: ‘আমার কথা ভেবো না, যা তুমি ভালো মনে করো, তা-ই করো। আমি শিগগিরই সামলে উঠতে পারবো।’ একথা সে প্রাণ দিয়েই বলেছিলো, কোনোরকম মেকি দাক্ষিণ্যের প্রভ্ন এখানে ওঠে না; সে যে কান্দছে এটা সে জানতে পারেনি ব’লেই তখন চোখের জল মুছে ফেলার কোনো চেষ্টা করেনি।

লারা হয়তো তাকে ভুল বুঝেছে, বোধহয় তাকে কোনো ভুল ধারণার বশবর্তী করে সে চ’লে এলো, এখনো হয়তো সব আশা সে বিসর্জন দেয়নি—একথা ইউরি যেই ভাবলো, অমনি সে ঘোড়া ফিরিয়ে আবার শহরে যাবার উদ্যোগ করলো; এবার তাকে সেই কথাগুলি ব’লে দিতেই হবে যা সে বলতে পারেনি তখন, আর, এই বিদায়টা আরো স্নেহভাবেই নেওয়া উচিত তার, আরো কোমলভাবে, লোকে যেমন ক’বে শেষ বিদায় নেয়, ঠিক তেমনি ক’রে তার বিদায় নেওয়া উচিত। কিন্তু নিজেকে সে সামলে নিলো কোনোরকমে, যেমন চলছিলো তেমনি চলতে লাগলো।

সূর্য ডুবে যেতেই অরণ্য ভ’রে গেলো ঠাণ্ডা আর অন্ধকারে। ভিজ়ে পাতার গন্ধ ছড়িয়ে পড়লো। অনেক পোকা ভাসছে হাওয়ায়, জলে ফাৎনার মতো স্থির, তীব্র বিষণ্ণ গলার একটানা গুনগুন আওয়াজ শোনা যাচ্ছে। কোনোটা এসে মুখে বসলো, কোনোটা তার ঘাড়ে, ইউরি চাপড় মেরে-মেরে তাড়িয়ে দিতে লাগলো তাদের, আর তার চাপড়ের শব্দ তাল রাখতে লাগলো ঘোড়ার চলার সঙ্গে—দোলায়িত জিনের ক্ষীণ আওয়াজ, ভিজ়ে কাদার ওপর ঘোড়ার খুরের ভারি ছপছপে শব্দ, আর ঘোড়ার পায়ের তলায় শুকনো কাঠকুটোর ফেটে যাওয়ার আওয়াজ—সব-কিছুর সঙ্গে এই পোকা তাড়ানোর চাপড়ের আওয়াজও মিশে গেলো। দূরে, সূর্য যেখানে এখনো ডুবেছে চাচ্ছে না, সেখানে এইমাত্র এক নাইটিঙ্গেল গান ধরলো।

‘জাগো, জাগো!’ অনুনয় ক’রে বলতে লাগলো নাইটিঙ্গেল; ঠিক যেন ইস্টার-রবিবারের আগে ডাক এলো দূর থেকে, ‘জাগো, আমার আত্মা, সৃষ্টি ভেদ করো।’

হঠাৎ অত্যন্ত সহজ ও সরল একটি কথা মনে প’ড়ে গেলো ইউরির। এতো তাড়াহুড়ো করার কী দরকার? নিজেকে সে যে-প্রতিশ্রুতি দিয়েছে, সেটা তার ভাঙা উচিত নয়, কিন্তু এই স্বীকারোক্তি যে আজকেই করতে হবে এমন কথা কে বললো? এখনো সে কোনো কথাই বলেনি টোনিয়াকে, সে যদি আরেকবার শহরে গিয়ে সেখান থেকে ফিরে আসার পর সব খুলে বলে, তাহ’লে এমন কী সর্বনাশ হবে? লারার সঙ্গে কথাটা ভালো ক’রে শেষ করবে সে, এমন স্নেহ, অনুভূতির এমন গভীরতা দিয়ে বলবে যে সব দুঃখের ক্ষতিপূরণ হ’য়ে যাবে। কী ভালো হবে, কী চমৎকার! আশ্চর্য, এই সহজ কথাটা কিনা তার আগে মনে পড়েনি।

লারার সঙ্গে আর-একবার দেখা করবার কথা ভাবতেই তার হৃৎপিণ্ড আনন্দে লাফিয়ে উঠলো। সেই প্রত্যাশার মধ্যেই সঙ্গলাভের আনন্দ পেলো সে।

কাঠের বাড়ি আর বাঁধানো রাস্তাওলা সেই শহরতলি—এটাই তো তার বাড়ির পথ। আর-একটু পরেই সে এই গলি পেরিয়ে পাথুরে রাস্তায় এসে পড়বে। শহরগুলির ছোটো-ছোটো বাসগুলো বইয়ের পাতার মতো ভেসে উঠলো তার চোখে, সব একসঙ্গে, না, আঙুল দিয়ে পাতা উলটিয়ে যখন এক-এক ক’রে দ্যাখে, তেমনভাবে নয়, বরং বইয়ের এক কোনায় ধ’রে সবগুলো পাতা একসঙ্গে খুলে দিলে যেমন হয়, তেমনভাবে সব মুহূর্তের মধ্যে বলসে উঠলো তার চোখে। এতো দ্রুত যে দম আটকে এলো। আর সব-কিছু পেরিয়ে তার বাড়ি, রাস্তার ঐ শেষ প্রান্তে, ঐ তো তার বাড়ি, বৃষ্টিভেজা মেঘ যখন সন্দের দিকে কেটে যেতে থাকে, তখন যে-শুভ্র শূন্যতা ধীরে-ধীরে বড়ো হ’য়ে ওঠে, ঠিক তারই তলায় সেই বাড়িটি যেন। ওখানে যাবার রাস্তার দু’পাশে যে-সব ছোটো-ছোটো বাড়ি আছে তাদের সে এত ভালোবাসে যে যদি

পারতো তো আলতো হাতে তাদের তুলে নিয়ে চুমো খেতো সে। ছাতের ওপরকার ঐ একচোখো চিলেকোঠাগুলো—তাদেরই কি কম ভালোবাসে? আর ঐ আলোগুলি, যার সোনালি রেখা নালার জলে ঝিকমিকিয়ে ওঠে টুশটুশে জামফলের মতো! আর তার সেই বাড়ি, আকাশ-চেরা শাদা মেঘের তলায় তার সেই সুন্দর বাড়িটা। সেখানে গিয়ে সে আবার গ্রহণ করবে তাকে, দেবতার নিজের হাতে গ'ড়ে-তোলা শুভ্র একমুঠো সৌন্দর্যকে, যা তার আত্মার উদ্ধার। মুড়ি-দেওয়া কোনো এক ছায়ামূর্তি এসে দরজা খুলে দেবে তাকে, আর তার ঘনিষ্ঠতার প্রতিশ্রুতি—পৃথিবীর অন্য কারো যাতে অধিকার নেই, উদ্ভূরে খেত আলোর মতোই যা শীতল ও সংযত—তাকে এসে স্পর্শ করবে, যেমনভাবে অঙ্ককার বেলাভূমিতে ঢেউ এসে আছড়ে প'ড়ে ছুঁয়ে যায়।

ইউরির লাগাম ছেড়ে দিয়ে ঝুঁকে পড়লো জিনের ওপর, তারপর ঘোড়ার গলা জড়িয়ে ধ'রে তার কঁকড়াডানো বালামচিতে মুখ ডুবিয়ে দিলো। আর এই আদরকে ঘোড়া ভাবলে তার শক্তির কাছে কাতর অনুনয় ব'লে, জোর কদমে ছুটে চলতে শুরু ক'রে দিলো অঙ্ককার অরণ্যপথে।

তার হালকা খুর মাটিতে প্রায় না-ছুঁইয়েই ঘোড়াটি যখন ছুটেতে শুরু করেছে, তখন ইউরির মনে হ'লো, তার হৃৎপিণ্ডের সানন্দ স্পন্দন ছাড়াও বহু লোকের চীৎকার শোনা যাচ্ছে অঙ্ককারের ভেতর। কিন্তু সে ভাবলে, এটা তার কল্পনা, নিছকই কল্পনা।

কাছে কোথাও কে যেন গুলি ছুঁড়লো, বন্দুকের আওয়াজ তাকে বধির ক'রে দিলো, তন্মুনি উঠে বসলো সে, দ্রুত হাতে ছিনিয়ে নিলো লাগাম, তারপর টান দিলো গায়ের জোরে। এ-রকম পূর্ণ বেগে চলবার সময় বাধা পেয়ে থমকে একপাশে দাঁড়িয়ে গেলো ঘোড়া, তারপর দু-পা পেছিয়ে ব'সে পড়লো মাটিতে।

সামনেই দুই রাস্তার মোড়। 'মরো অ্যাণ্ড ভেটচিনকিন: টেকি-কল। বীজ-বপন যন্ত্র'। এই বিজ্ঞপ্তির ওপর সূর্যাস্তের ঝাপসা লাল আলো এসে পড়েছে। আর ইউরির রাস্তা আটকে দাঁড়িয়ে আছে তিনজন ঘোড়সওয়ার—স্কুলের টুপি-মাথায়-একটি ছেলে, দুটো কার্তুজের বেষ্ট-আটা জোকা পরনে; আর একটি লোক অশ্ববাহিনীর অফিসার, তার মাথায় ফারের টুপি আর পরনে মিলিটারি ওভারকোট, আর তৃতীয় জনের পোশাক ভারি অদ্ভুত, যেন সে ফ্যান্সি-ড্রেস নাচে যোগ দিতে চলেছে, তার তুলো-ভরা মোটা পাংলুনের সঙ্গে তার কপাল-ঢাকা চওড়া পুরুষের টুপি মোটেই খাপ খাচ্ছিলো না।

'নড়বেন না, কমরেড ডাক্তার।' অফিসারের পোশাক-পরা লোকটি বললে, তিনজনের মধ্যে বয়সে সে-ই সবচেয়ে বড়ো। 'আমাদের ছকুম মেনে চললে আপনার কোনো ভয় নেই। কিন্তু অব্যাহতা করলে—বিনা অপরাধেই—আপনাকে গুলি ক'রে মারবো আমরা। আমাদের বাহিনীতে যে-ডাক্তার ছিলেন, তিনি নিহত হ'য়েছেন, অতএব চিকিৎসক হিসেবে আপনাকে আমরা জোর ক'রে ধ'রে নিয়ে যেতে বাধ্য হচ্ছি। নেমে এসে ঐ ঘোড়ার লাগাম এই যুবকটির হাতে দিয়ে দিন। আবার আপনাকে মনে করিয়ে দিচ্ছি: আপনি যদি পালাবার চেষ্টা করেন আমরাও এক মুহূর্ত দেরি করবো না।'

'আপনিই কি কমরেড ফরেস্টার? মিকুলিৎসিনের ছেলে লিবেরিয়ুস?'

'না, আমি তাঁর প্রধান যোগাযোগ-সচিব, কামেনডভর্স্কি।'

পরিচ্ছেদ ১০

রাজপথ

১

রাজপথ ধ'রে একের পর এক শহর, গ্রাম আর কসাক-উপনিবেশ চ'লে গেছে। বহুদিনের পুরোনো পথ এটা : সাইবেরিয়ার এই প্রাচীনতম রাজপথ দিয়ে আগেকার দিনে ডাক যেতো। ছুরি দিয়ে রুটিকে দুটুকরো ক'রে কেটে ফেললে যেমন দেখায়, তেমনিভাবে নানা শহরকে দ্বিখণ্ড ক'রে, তাদের বড়ো রাস্তার ওপর দিয়ে এই পথ চ'লে গেছে। আর, গ্রামের ওপর দিয়ে যাবার সময় সে গেছে উচ্ছ্বসিতের মতো রুদ্ধশ্বাসে, একবারও পেছন ফিরে তাকায়নি, দু'পাশে ইতস্তত ছড়িয়ে দিয়েছে বহু উপনিবেশ, পেছনে ফেলে গেছে সরলরেখার মতো সার-বাঁধা কুঁড়েঘর, কোথাও হয়তো তারা আকার নিয়েছে বাঁকা রেখার, কোথাও আবার হঠাৎ মোড় নিয়ে সোজা হ'য়ে গেছে।

অনেকদিন আগে—তখনো খোডাটস্কোয়েতে রেল আসেনি—এই রাজপথ দিয়েই ট্রয়কার ক'রে ডাক আনা-নেওয়া করা হ'তো। আর যেতো চা, রুটি, আর কাঁচা-লোহা নিয়ে সদাগরি বহর: কখনো আবার এই পথ দিয়ে, সতর্ক পাহারার ব্যবস্থা ক'রে, সার-বাঁধা কয়েদিদের সাইবেরিয়ায় নিয়ে আসা হ'তো। তালে-তালে পা ফেলে চলতো তারা, ঝমঝম করে বেজে উঠতো তাদের শেকল—তাদের বিনষ্ট, অসহায় আত্মা যেন আকাশের বিদ্যুতের মতো ভয়ংকর—আর তাদের চারপাশে মর্মর তুলতো দুর্ভেদ্য অজ্ঞকার অরণ্য।

এই রাজপথের ধারে যারা বসবাস করে তারা সবাই যেন একই পরিবারের অধিবাসী। বন্ধুত্ব আর বিবাহের সূত্রে গ্রামের সঙ্গে গ্রামের আর শহরের সঙ্গে শহরের সেতুবন্ধ রচিত হয়েছে। রাস্তা ও রেল-লাইনের সংযোগস্থলে খোডাটস্কোয়ে। এখানে আছে এঞ্জিন মেরামত আর লাইনটাকে চালু রাখার প্রয়োজনীয় অন্যান্য কল-কারখানা। সেখানে বস্তুগুলিতে গাদাগাদি ক'রে থাকে গরিবের চেয়েও অধম লোকেরা—তারা অসুখে ভোগে আর মরে। যন্ত্রবিদ্যায় পারদর্শী যে-সব রাজনৈতিক বন্দী নির্দিষ্টকাল সশ্রম কারাদণ্ড ভোগ করেছে, খোডাটস্কোয়েতে তাদের 'স্বাধীনভাবে' নির্বাসিত হিসেবে বসবাস ও দক্ষ কর্মী হিসেবে কাজ করার অনুমতি দেওয়া হয়।

বিপ্লবের গোড়ার দিকে এই রেলপথের ধারে ধারে যে-সব সোভিয়েট-বসানো হয়েছিলো, বহুকাল আগেই সে-সব হাওয়ায় মিলিয়ে গেছে। মাঝখানে কিছুকাল সাইবেরিয়ার প্রাদেশিক সরকার শাসনভার গ্রহণ করেছিলেন, কিন্তু এখন এই গোটা অঞ্চলের শাসনকার্য পরিচালনা করেন শাদাদের সর্বোচ্চ অধিনায়ক অ্যাডমিরাল কোলচাক।

ভ্রমণের একটা পর্যায়ে এসে পথ কেবলই ওপরে উঠছে ঘুরে-ঘুরে। যতোই তারা ওপরে উঠছে, ততোই গোটা এলাকার দৃশ্য তাদের চোখের সামনে আত্মপ্রকাশ করছে। এই ধীরে-ধীরে ওপরে ওঠা, যার ফলে দিগন্ত কেবলই বেড়ে যায়—মনে হয় তার যেন আর শেষ নেই। কিন্তু শেষটায় বিশ্বাসের জন্য যাত্রীরা যেখানটায় ঘোড়া থামালো, সেটাই পাহাড়ের চূড়ো। এবারে পথ গেছে একটি সেতুর ওপর দিয়ে, যার তলায় ঘূর্ণি তুলে কেজ্জমা নদী ছুটে চলেছে।

সেতু পেরিয়ে আবার এক মসৃণ খাড়াই। এখান থেকেই ‘ক্রুশোন্নয়ন’ নামে মঠের দেয়াল চোখে পড়ে। মঠের প্রাঙ্গণের চারদিক ঘিরে উঁচু-নিচু খাড়াইয়ের দিকে পথ ঘুরে-ঘুরে এগিয়ে গেছে পুণ্য ক্রুশ^১ শহরের প্রান্তরেখার ভেতর দিয়ে।

শহরের মাঝখানে পৌছে আবার একবার মঠের প্রাঙ্গণকে স্পর্শ ক’রে গেছে পথ, কেননা মঠের সবুজ-রং-করা লোহার দরজাই শহরের প্রধান পার্কে যাবার রাস্তা। খিলেনওলা তোরণের গায়ে যে-বিগ্রহ আঁকা রয়েছে, তার তলায় সোনালি অক্ষরে লেখা অনুশাসন: ‘হে তুমি, ভক্তির অজেয় জয়, হে সঞ্জীবনী ক্রুশ, আনন্দিত হও।’

লেণ্ট-এর শেষের পুণ্যসপ্তাহ। শীত প্রায় শেষ হ’য়ে গেছে। বরফ-গলার প্রথম চিহ্ন চোখে পড়ছে, কেননা রাস্তাঘাটগুলি কালো দেখাচ্ছে, কিন্তু বাড়ির ছাদ বা উঁচু খিলেনগুলো এখনো অবশ্য লম্বা, শাদা, ঝুলে-থাকা বরফের টুপি প’রে আছে।

যে-সব ছোটো ছেলে ঘণ্টাবাজিয়েদের দেখবার জন্য গির্জের ঘণ্টাঘরে উঠেছিলো, তাদের চোখে নিচের বাড়িগুলো দেখালো এলোমেলো জড়িয়ে-থাকা অনেকগুলি শাদা বাস্তুর মতো। ছোটো-ছোটো কালো মানুষ—প্রায় ফুটকির মতোই ছোট—বাড়িগুলোর মধ্য দিয়ে চলাফেরা করছে, কেউ-কেউ এসে দাঁড়িয়ে পড়ছে বাড়ির সামনে। আরো তিন শ্রেণীর ‘নির্দিষ্ট বয়সের ছেলেদের’ যুদ্ধে আহ্বান করা হয়েছে, দাঁড়িয়ে-দাঁড়িয়ে সেই হুকুম-নামা পড়ছে তারা; অ্যাডমিরাল কোলচাকের নির্দেশ অনুযায়ী এই বিজ্ঞাপ্তিগুলো দেয়ালে-দেয়ালে ঝুঁতে দেওয়া হয়েছে।

রাত্রি অনেক অপ্রত্যাশিত ব্যাপার ঘটে গেলো। অসময়ে অস্বাভাবিক গরম ক’রো এলো, সেই সঙ্গে আবার শুরু হ’লো ইলশেণ্ডি—সেই বৃষ্টিধারা এতো পাংলা আর মিহি যে মনে হয় মাটিতে পড়বার আগেই কুয়াশা হ’য়ে মিলিয়ে যাবে। এটা কিন্তু চোখের ভুল। আসলে বৃষ্টির জলে স্রোত ব’য়ে যাচ্ছে, উষ্ণ ও দ্রুত সেই স্রোত গড়িয়ে যাচ্ছে মাটির ওপর দিয়ে একেবারে কালো হ’য়ে গিয়ে চিকচিক করছে সেই মাটি—ঘামছে যেন—এবার এই জলধারা অবশিষ্ট বরফ ধুইয়ে দিয়ে মাটিকে পরিষ্কার ক’রে দেবে।

মুকুল-ধরা বৈটে আপেলগাছগুলি হঠাৎ বাগানের বেড়ার ওপর দিয়ে তাদের ডালপালা বাড়িয়ে দিয়েছে। জলের ফোঁটা চুইয়ে পড়ছে তাদের শাখা-প্রশাখা থেকে, আর কাঠের ফুটপাতের ওপর জল পড়ার একটানা আওয়াজ সারা শহরে শোনা যায়।

ফোটাগ্ৰাফারের বাড়ির উঠানে কুকুরছানা টোমিককে সারা রাত শেকল দিয়ে বৈধি রাখা হয়েছিলো, সারা রাত ধরে সে বিত্তী গলায় শুধু চ্যাচামেচি করলো। এদিকে তার এই যেউঘেউ আওয়াজে বোধহয় বিরক্ত হ’য়ে গালুজিনের বাগানের কাক তারস্বরে চেঁচিয়ে সমস্ত শহরটা মাং ক’রে দিলে।

পূণ্য ক্রুশ শহরের একপ্রান্তে লিয়ুবের্জনভ নামক এক ব্যবসাদারের কাছে তিন গাড়ি বোঝাই মাল এসেছিলো; লিয়ুবের্জনভ কিন্তু কিছুতেই মাল খালাস ক'রে নিতে রাজি হ'লো না, বললো নিশ্চয়ই কোথাও কোনো ভুল হয়েছে, কেননা এই সব মালের জন্য সে কখনোই অর্ডার দেয়নি। রাত অনেক হ'য়ে গিয়েছিলো ব'লে গাড়িওলারা তাকে অনেক অনুনয় ক'রে, অন্তত রাত্রির জন্য, মালটা জমা রাখতে বললো, কিন্তু লিয়ুবের্জনভ তাদের বার-বার গালাগাল দিয়ে ভূত ঝাড়িয়ে দিলে, কিছুতেই দরজা খুলতে রাজি হ'লো না। তাদের এই ঝগড়ার আওয়াজও শহরের এক প্রান্ত থেকে অন্য প্রান্ত পর্যন্ত শোনা যাচ্ছিলো।

গির্জের হিসেবে যখন তৃতীয় প্রহর আর ঘড়িতে যখন সকাল একটা, তখন মঠের ঘণ্টাগুলির মধ্যে সবচেয়ে গভীর যার আওয়াজ, সেটা থেকে এক চাপা নিচু মধুর গুঞ্জন বেরিয়ে এলো, অথচ ঘণ্টাটা বিশেষ নড়ছিলো না। অন্ধকার ইলশেউডির সঙ্গে এই আওয়াজও হাওয়ায় মিশে গেলো। ঘণ্টা থেকে বেরিয়ে এসে এই আওয়াজ প্রথমে হাওয়ায় ডুব দিলে, তারপর মিলিয়ে গেলো, যেন বসন্তের বন্যা নদীর তীর থেকে একটি মাটির ঢেলাকে ছিড়ে নিলে, আর সেটা জলে ডুবে গিয়ে আস্তে-আস্তে মিলিয়ে গেলো।

রাতটা ছিলো 'মণ্ডি' বৃহস্পতিবারের। বৃষ্টি পড়ছে সূক্ষ্ম জালির মতো; তারই পেছনে, মোমবাতির কম্পিত আলোয়, কোথাও উদ্ভাসিত হ'য়ে উঠেছে একটি মুখ, কোথাও বা আলো এসে পড়েছে কপালে, কারো বা নাকের ডগায়; দূরে ব'লে প্রায় বোঝাই যাচ্ছে না। উপবাস শেষ হ'লো, এবার গির্জের লোকেরা প্রভাতী প্রার্থনায় বসবে।

গির্জে থেকে যে-কাঠের ফুটপাথ বেরিয়ে এসেছে, মিনিট পনেরো পরে সেখানে পায়ের শব্দ শোনা গেলো। মুদির রৌ গালুজিনা বাড়ি ফিরে আসছে, যদিও এইমাত্র উপাসনা শুরু হ'লো। বেতলাভাবে হেঁটে আসতে সে, কখনো প্রায় দৌড়ছে যেন, আবার তারপরেই থির হ'য়ে এলো গতি, থামলো একটু; শাল জড়িয়ে নিয়েছে সে মাথায়, ফার-কোটের বোতামগুলো খোলা। গির্জের ভিড়ের মধ্যে দম মাটকে গিয়েছিলো তার, অনেকটা মূর্ছার মতো, আর তাই সে বেরিয়ে এসেছে একটু খোলা হাওয়ার জন্য। কিন্তু এখন তার সংকোচ হ'লো, দুঃখও হ'লো খুব, শেষ পর্যন্ত থাকলেই হ'তো; আর তা ছাড়া এবার নিয়ে দ্বিতীয় বছর হ'লো, সে লেণ্ট-এর সময় উপোস করেনি। তার উদ্বেগের এটাই প্রধান কারণ নয়। সেনাবাহিনীতে যোগ দেবার নির্দেশ দিয়ে আজ যে-বিজ্ঞপ্তি বেরিয়েছে, সেই বয়সের আওয়াজ তার গো-বেচারার ছেলে টেরিয়শকাও পড়ে। মাথা থেকে এই চিন্তাটাকে ঝেড়ে ফেলার চেষ্টা করলো সে; কিন্তু অন্ধকারের ভেতর সেই শাদা কাগজের বিজ্ঞপ্তিগুলো তাকে মনে করিয়ে দেবার জন্য প্রত্যেক মোড়ে ওৎ পেতে আছে।

মোড় বঁকলেই তার বাড়ি। কিন্তু বাইরেই তার বেশি ভালো লাগলো; গুমোট-করা সেই ঘরগুলোতে ফিরে যাবার তেমন গরজ তার হ'লো না।

তার ভাবনার ঝোড়ো বিষণ্ণতা তার বৃকের ওপর চেপে আছে। যদি তাকে চেষ্টা করে বলতে হয় এক-এক ক'রে, তাহ'লে সকাল হবার আগে কিছুতেই তার কথা ফুরবে না, আর তা ছাড়া সব কথা খুলে বলবার মতো ভাষাও নেই। কিন্তু এখানে, এই রাস্তায়, তার সব সাক্ষ্যনাহীন ভাবনা একসঙ্গে ভিড় ক'রে এলো; মঠের ফটক থেকে পার্কের কোণ পর্যন্ত কয়েকবার হাঁটাইটি করতে-করতে সবগুলো ভাবনার সঙ্গেই যেন যুঝে উঠতে পারলো সে।

ঈস্টারের পরব শুরু হবার সময় হ'য়ে এলো, অথচ জনপ্রাণী নেই বাড়িতে; তাকে একা ফেলে শবাই চ'লে গেছে। একাই তো, একা ছাড়া আর কী? যে-মেয়েটিকে সে মানুষ করছে

১ Maundy Thursday: এই দিনে একে অন্যের পা ধুয়ে দেয়। সন্ত যোহান-এ আছে : 'প্রভু ও গুরু হ'য়েও আমি যখন তোমাদের পা ধুয়ে দিলাম, তখন তোমরা যেন কখনো পরস্পরের পা ধুয়ে দিতে ভুলে যেয়ো না'—অনুবাদের টীকা

সেই কসিউশা তো ধর্তব্যের মধ্যে আসে না। তাছাড়া সে কে যে তার কথা ধরতে হবে? কথায় বলে ‘পরের মন, কালো বন’। হয়তো সে তার বন্ধু, হয়তো বা শত্রু কিংবা কোনো গোপন প্রতিদ্বন্দ্বী। তাকে এই হিসেবে জানি যে সে হ’লো তার স্বামীর প্রথম স্ত্রীর পূর্ব-বিবাহের সম্ভান—তার স্বামী ভ্লাস বলেছে যে সে তাকে দস্তক নিয়েছে। কিন্তু সে তো তার আত্মজ্ঞাও হতে পারে? বা হয়তো সে তার মেয়েই নয় মোটে, বরং অন্য কিছু? পুঙ্খবমানুষের মন কি কেউ কখনো দেখতে পায়? অবশ্য কসিউশাকে তার প্রাণ্য দিতেই হয়, তার মধ্যে দোষের কিছু নেই। বুদ্ধি আছে তার, চেহারা ভালো, আদব-কায়দা জানে—হাবা-গোবা টেরিয়শকা বা তার বাবা দু’জনের চেয়েই ঢের বেশি বুদ্ধি ধরে সে।

এই তো তার অবস্থা—পরিত্যক্ত, বিচ্ছিন্ন; এই পুণ্য সপ্তাহে তার সঙ্গী বলতে কেউ নেই। সবাই তারা ছড়িয়ে পড়েছে, যে যার নিজের কাজে বেরিয়ে গেছে প্রত্যেকেই।

কোথায় নিজের গোমুখ্য ছেলেটার দেখাশুনো করবে, তার প্রাণ বাঁচানোর চেষ্টা করবে, তা নয় তো দিবা মজা ক’রে ভ্লাস এদিক-ওদিক ঘুরে বেড়াচ্ছে রাজপথে, লম্বা-চওড়া বকৃত্য দিচ্ছে নতুন রংকটদের, চেতিয়ে তুলছে তাদের, ভীষণ সব হাতিয়ার ব্যবহার করতে উশকে তুলছে।

আর টেরিয়শকাও বড়ো পরবের ঠিক আগে বাড়ি থেকে ছুটে বেরিয়ে গেছে। কুটেইনি গ্রামে তাদের আত্মীয় আছে, সেখানে গেছে, যাতে হৈ-হুল্লোড় ক’রে কোনো রকমে উদ্বেগ ভুলে থাকা যায়। হতভাগা ছেলেটাকে আবার স্কুল থেকেও তাড়িয়ে দিয়েছে। প্রায় প্রত্যেক ক্লাশেই তো ওকে এক বছর ক’রে বাড়তি আটকে রেখেছিলো তারা, আর এখন যেই সে আটের-ক্লাশে উঠলো তখনই কিনা তাড়িয়ে দিলো একেবারে।

ওঃ কী যে খারাপ লাগে এ-সব ভাবতে! হা ঈশ্বর! কেন সব-কিছুই এমন বেঠিক হ’য়ে যাচ্ছে? এতো হতাশ ক’রে দেয় ব্যাপারগুলো যে তার ইচ্ছে করে সব-কিছু ছেড়ে-ছুড়ে দেয়, বেঁচে-থাকার আর-কোনো ইচ্ছেই নেই তার। এতো দুর্দশার কারণটা কী? বিপ্লব? না, না, যুদ্ধ—যুদ্ধটাই সর্বনেশে। রাশিয়ার সত্যিকার পুরুষ যারা, তাদের বধ করেছে এই যুদ্ধ, এখন কতগুলো অপদার্থ রাবিশের স্তূপ ছাড়া আর কিছুই নেই।

বাবা যখন বেঁচে ছিলেন, তখন সব-কিছুই অন্য রকম ছিলো। বাবা ছিলেন ঠিকোদার—ভদ্র, শিক্ষিত, মার্জিত। জমি থেকেই ভালোভাবে খাওয়া-পরা চ’লে গেছে। সে, তার দুই বোন—পোলিয়া আর ওলিয়া—যেমন তাদের নামে মিল, তেমনই চেহারা, অমন সুন্দরী দুটি মেয়ে সহজে চোখে পড়ে না। ওস্তাদ ছুতোরেরা বাবাব সঙ্গে দেখা করতে আসতো, প্রত্যেকেই কী সুন্দর দীর্ঘকায় পুরুষ। একবার সে আর তার বোনেরা—কী সব ভাবনাই যে তখন মাথায় আসতো!—ঠিক করেছিলো ছয় রঙের পশম দিয়ে গলাবন্ধ তৈরি করবে। আর, বিশ্বাস করো বা নাই করো, এতো ভালো তারা বুনতে পারতো যে তাদের বোনা গলাবন্ধ সারা এলাকায় রীতিমতো বিখ্যাত হ’য়ে উঠেছিলো। সেই তখন যেন সবই সুন্দর, সমৃদ্ধ, আর প্রায় সব-কিছুই কী যে ভালো লাগতো তার—গির্জের নানা উৎসব, নানা রকম নাচ, লোকজন, তাদের আদব-কায়দা—সবই যেন খুশিতে ভ’রে তুলতো তাকে—তাদের যে ঘর খুব নিচু, চাষি আর মজুর বংশে তার বাবা-মার জন্ম, তাতে কিছুই এসে যেতো না। আর রাশিয়াও তখন ছিলো বিবাহযোগ্য তরুণীর মতো, তার পাণিপ্রার্থীরাও ছিলো সত্যিকার পুরুষ, তারা রুশ্বেদাড়াতে পারতো তার জন্য, এখনকার এই ইতরগুলোর সঙ্গে তাদের কোনো তুলনাই হয় না। কিছুতেই আর সেই জৌলুশ এখন নেই, সাধারণ বেসামরিক লোক ছাড়া আর কারো দেখা পাওয়াই দায়। রাতদিন কেবল উকিল আর ইহুদিদেরই খিটিমিটি কানে আসে। বেচারী ভ্লাস আর তার বন্ধুরা ভাবে যে কেবল স্বাস্থ্য পান ক’রে, বকৃত্য দিয়ে আর শুভেচ্ছা জানিয়েই সেই সোনালি দিনগুলি

তারা ফিরিয়ে আনবে। কিন্তু বিগত প্রেমকে ফিরে পাবার এই কি উপায়? তার জন্যে তো পাহাড় নাড়াতে হয়!

৪

এর মধ্যে সে পার্ক পেরিয়ে বাজার পর্যন্ত ঘুরে এলো একাধিকবার। বাজার থেকে ঠা দিকের রাস্তার মাঝামাঝি গেলেই তার বাড়ি, কিন্তু যতবারই সে বাড়ির কাছে এলো, ভেতরে যাবার কোনো তাগিদই পেলো না সে, বরং ফিরে এসে মঠের লাগোয়া সরু গলিগুলোর দিকে এগিয়ে গেলো।

বাজার যেখনটায় বসে, সে-জায়গাটা একটা বড়ো মাঠের মতো। আগেকার দিনে হাটবারে চাষীদের টানাগাড়িতে ভরা থাকতো সেটা। তার একপ্রান্তে সেন্ট হেলেন স্ট্রীট^১: অন্যদিকে, আধো-চাদের মতো ঝাঁকানো ভাবে, সার-ঝাধা ছোটো-ছোটো দালান দাঁড়িয়ে আছে, একতলা আর দোতলা শুধু, —গুদাম, আপিশ-খর কি দোকান হিসেবে ব্যবহার করা হয় এদের।

তার মনে পড়লো, আগে, যখন শান্তি ছিলো, শৃঙ্খলা ছিলো, ব্রুথিয়ানভ নামে খিটখিটে, বদমেজাজি একটা লোক, বুড়ো, লম্বা ঝুল-কামিজ আর চশমা প'রে হামবড়া ভঙ্গিতে তার মস্ত চার ভাঁজওলা লোহার দরজার সামনে চেয়ারে ব'সে শস্তা কাগজ পড়তো। লোকটার ব্যাবসা ছিলো চামড়া, ওট, খড়, গাড়ির চাকা আর ঘোড়ার সাজোয়ার।

আর সেখানে ছোট্ট একটা ঝাপসা জানলায় কয়েক জোড়া ফিতেয় মোড়া বিয়ের দিনের মোমবাতি, আর কার্ডবোর্ডেব বাস্ত্বে ফুলের তোড়া দেখা যেতো, বছরের পর বছর ধ'রে তারা কেবল ধুলো জমিয়েছে গায়ে, আর তার পেছনে ছোট্ট ঘরটায়—যেখানে মস্ত গোলগাল মোমের তাল ছাড়া আর কোনো আসবাব বা মালপত্র থাকতো না—এক লক্ষপতি মোমবাতি-নির্মাতার হাজার-হাজার টাকার লেনদেন হ'তো। সেই মোমবাতি-নির্মাতা কোথায় থাকতো সেটা যেমন কেউ জানতো না, তেমনি যাদের সঙ্গে লেনদেন হ'তো, সেই লক্ষপতি ব্যবসায়ীর দালালদেরও চিনতো না কেউ।

ঐ দোকানের সারির ঠিক মাঝখানটায় গালুজিনের মস্ত মুদি-দোকান—তিনটে জানলা আছে দোকানঘরে। ঘরের ফাঁকা, ফাটল-ধরা মেঝেয় সকাল, দুপুর, রাত্রে স্থূপ হ'য়ে ব্যবহার-করা চা-পাতা জ'মে থাকতো; গালুজিন আর তার সহকারীরা সবাই সারাদিন ধ'রে চা খেতো অনবরত। গালুজিনার তখন নতুন বিয়ে হয়েছে, বয়সও কম ছিলো, মাঝে-মাঝে ইচ্ছে ক'রেই গিয়ে বসতো ক্যাশবাস্ত্বে। তার প্রিয় রং ছিলো বেগুনি। গির্জেষ্ট বিশেষ প্রার্থনা-সভায় পরিষেয় পোশাকের রংও ঠিক এই, কুঁড়ি-ধরা লাইলাকের মতো। তার সেরা মখমলের পোশাক আর ফটিক প্লানপাত্রগুলিও এই রঙের। এই রং তার সুখের চিহ্ন, তার স্মৃতির ভাবানুষ্ঙ্গ। তার মনে হয় প্রাক্‌বিপ্লবকালীন রাশিয়ার স্কৌমার্ঘেরও প্রতীক হ'লো এই লাইলাকের রং। ক্যাশবাস্ত্রের পেছনে বসতে তার এইজন্য ভালো লাগতো যে দোকান-ঘরের মধ্যে ছড়িয়ে থাকতো এক বেগুনি প্রদোষ,—স্বেতসার, চিনি আর কাচের বৈয়মের লাল-কালো নানা রকম মিষ্টির সুগন্ধ ঠিক মিলে-মিশে যেতো তার প্রিয় বেগুনি রঙের সঙ্গে।

এখানে এই মোড়ে, কাঠগোলায় উঠোনের পাশে দাঁড়িয়ে আছে পুনোনা, ধূসর, কার্নিশওলা জরাজীর্ণ বাড়ি, যাকে চারপাশ থেকেই দেখায় একটা ধ'সে-যাওয়া ঘোড়ার গাড়ির কোচবাস্ত্রের মতো। দোতলা বাড়ি, দু'পাশে দুটো দরজা আছে। প্রত্যেকটি তলা দু'ভাগে বিভক্ত, নিচের ওলায় ডানদিকের অংশটায় হ'লো জালকিশুর ওষুধের দোকান, আর বাঁদিকটাতে অ্যাটর্নির

^১ St. Helen's Street: ইয়েলেনিনস্ট্রায়া।

আপিশ। ওষুধের দোকানের ওপরে মস্ত পরিবার নিয়ে থাকে বুড়ো শমুলেভিচ, মেয়েদের পোশাক সেলাই করে সে। শমুলেভিচদের আস্তানার পর, অ্যাটর্নির আপিশের ওপরে থাকে নানা ধরনের ভাড়াটে, যাদের নাম ও পেশার সাইনবোর্ডে সামনের দরজাটা ভর্তি হ'য়ে আছে। এখানে ঘড়ি সারানো হয়, জুতো মেরামত করা হয়; কামিন্স্কির খোদাই-করার কারখানাও এখানে, আবার জুক আর ষ্টুডাথ এখানে অংশীদার হিসেবে ফোটা তোলার দোকান চালায়।

দোতলাটা ভিড়ে ঠাশাঠাশি ব'লে ফোটাগ্রাফারের তরুণ সহকারীরা উঠানের মস্ত কাঠের শেডে ডার্করুম বানিয়ে নিয়েছে। সহকারীদের একজন হ'লো ব্রাজিন, ফোটা তোলা শিখছে সে, আর অন্যজন হ'লো মাগিডসন, সে ছবিগুলো রিটাচ করে। ডার্করুমের জানলা দিয়ে বাতির রাগি লাল চোখের যে-ঝাপসা চাউনি দেখা গেলো, তাতে মনে হ'লো এখনো তারা কাজ করছে সেখানে। এই জানলার তলাতেই শেকল দিয়ে বেঁধে রাখা হয়েছে বাচ্চা কুকুরটাকে, যার নাম টোমিক, আর যার গলা-ফাটানো চীৎকার সেট হেলেন ষ্ট্রীটের পার্ক থেকেও শোনা যাচ্ছে।

‘এই তো এরা আছে, ঠাশাঠাশি ক'রে; যেন গোটা সানহেড্রিনকে কেউ বাজ্রে পুরে রেখেছে,’ ছাইরঙা বাড়িটার পাশ দিয়ে যেতে-যেতে গালুজিনা ভাবলে। ‘যতো নোংরা ভিখিরিদের ভিড়।’ অথচ তক্ষুনি তার মনে হ'লো তার স্বামী যে ইহুদিদের এতো ঘৃণা করে, সেটা মোটেই ভালো নয়। তারা যদি দেশের কর্তা হ'তো তাহ'লে না-হয় এক কথা ছিলো, কিন্তু রুশ দেশের ভাগ্যবিধাতা হবার মতো প্রতিপত্তি তাদের তো নেই। অবশ্য এটা ঠিক যে যদি কেউ গিয়ে বুড়ো শমুলেভিচকে দেশের এতো বিপুল আর্থিক হান্সামার কারণ জিজ্ঞেস করে তো সে তার কুৎসিত মুখটাকে দুমড়ে ঝাঁকিয়ে মুচড়ে ব'লে উঠবে, ‘এ-সবই নির্বাণ লিবোচ্কা’র শয়তানি।’

এই সব অর্থহীন ভাবনায় শুধু সময় নষ্ট, ওঃ! কী এসে যায় তাদের অন্তিহে? তারাই কি রাশিয়ার দুর্ভাগ্য? গোলযোগের আসল কারণ হ'লো শহরগুলো। এমন নয় যে সারাটা দেশ কয়েকটা শহরের ওপর নির্ভর ক'রে আছে, কিন্তু শহরের লোকেরা লেখাপড়া জানে, আর তাই দেখে গ্রামের লোকের মন মুগ্ধ ঘুরে গেছে; শহরের এই শিক্ষাকে হিংসে করে তারা, সব সময়েই চেষ্টা করে তাদের নকল ক'রে চলতে, কিন্তু কিছুতেই তাদের সঙ্গে পাল্লা দিতে পারে না, আর তার ফলে লাভ হয়েছে এই যে এখন তারা না ওদের মতো, না নিজেদের মতো।

অথবা উল্টোটাও হ'তে পারে, হয়তো সব গোলমালের মূল কারণই অজ্ঞতা।—শিক্ষিত লোক দেয়ালের ভেতর দিয়েও দেখতে পায়, কী-কী ঘটতে পারে সবটা সে আগেই আঁচ ক'রে নিতে পারে, আর আমরা অন্যরা যেন এক অন্ধকার জঙ্গলের মধ্যে প'ড়ে আছি। যখন আমাদের মূণ্ড কাটা যায় তখন আমরা শুধু এটুকু বুঝি যে টুপিটা খোঁওয়ান গেলো।—এমন নয় শিক্ষিত লোকেরাই আজকাল খুব সুখে আছে। দ্যাখো না, দুর্ভিক্ষ কী-ভাবে তাদের শহর থেকে তাড়িয়ে বেড়াচ্ছে! একবার শুধু চেষ্টা ক'রে দ্যাখো ব্যাপারটা বুঝতে! স্বয়ং শয়তানও এর মাথামুণ্ড বুঝে উঠতে পারবে না।

কিন্তু যাই হোক না কেন, এটা সত্যি যে কেবল গ্রামের লোকেরাই জানে কী ভাবে বাঁচতে হয়। তার আত্মীয়-স্বজনদের কথাই ভাবো না কেন—সেলিউভিনেরা, সেলাবুরিনেরা, পামফিল পালিখ, মোডিখ-ভাইয়েরা। তারা নিজেদের হাত-পায়ের ওপর নির্ভর ক'রে আছে, নিজেদের বুদ্ধি সম্পর্কে আস্থা আছে, তারা নিজেরাই নিজেদের মালিক। রাজপথ ধ'রে স্ট্রেনভুন গোলাবাড়িগুলো উঠেছে, দেখতে কী সুন্দর লাগে। পনেরো ডেসিয়াটিন^১ জোড়া চাষের জমি, ঘোড়া, ভেড়া, গরুর, গরু, আর গোলাভর্তি ফসল—তিন বছরের মতো কোনো ভাবনা নেই! তাছাড়া তাদের চাষের কলগুলি।—এমনকি ফসল কাটার কল পর্যন্ত আছে তাদের। কোলচাক

১ ইডিল ভাষায় লিওক লিবোচ্কা বলে; এখানে লিও টুটভির কথা বলা হচ্ছে, তিনি ইহুদি ছিলেন।

২ এক ডেসিয়াটিন : ২.৭ একর।

খুব তেল দিচ্ছে তাদের, খালি তাদের নিজের দলে টানতে চাচ্ছে, কমিসাররাও তইথবচ, তারাও চায় যে তারা আরণ্যক সেনাদলে যোগ দিক। তারা সবাই যুদ্ধ থেকে জর্জ ক্রস^১ নিয়ে ফিরেছে, তাই সবাই তাদের দলে টানতে চায়, সবাই চায়, ওদের তারা শিক্ষাগুরু হিসেবে নিযুক্ত করুক। কমিসন পাও বা না পাও, যদি তুমি নিজের কাজটি জানো তো তোমার চাহিদা হবেই।

কিন্তু এখন তার বাড়ি ফিরে যাওয়া উচিত। এত রাতে কোনো স্ট্রীলোকের পক্ষে রাস্তায় ঘুরে বেড়ানো ভালো দেখায় না। যদি সে তার নিজের বাগানে ঘুরে বেড়াত তো কিছু এসে যেতো না। কিন্তু বাগানটায় এত কাদা, ঠিক যেন একটা জলা জায়গা। যাই হোক—মনে-মনে ভাবলো সে—এখন আগের চেয়ে একটু ভালোই লাগছে।

আপন ভাবনায় দিশেহারা হইয়ে, সব চিন্তার খেই হারিয়ে ফেলে গালুজিনা এবার বাড়ি ফিরলো। কিন্তু ভেতরে ঢোকার আগে খানিকক্ষণ সে দাঁড়িয়ে রইলো দেউড়িতে; আরো কয়েকটা কথা তার মনে এলো আস্তে-আস্তে।

সেই সব লোকেদেব কথা ভাবলো সে, যারা আজকাল কর্তাগিরি ফলাচ্ছে খোডাটকোয়েতে; তারা কী-রকম লোক, তা সে অল্পবিস্তর জানে। রাজধানী থেকে বহুকাল আগে তারা রাজনৈতিক কারণে নির্বাসিত হয়েছিলো; টিভেরজিন, আশ্টিপভ, নৈরাজ্যবাদী ‘কালো নিশেন’ওলা ভুডোভিচেকো, এখানকার তালানির্মাভা ‘পাগলা কুকুর’ গরশেনি—এদেরই মতো লোক তারা সবাই। ধৃত তারা, তাছাড়া তারা জানে তারা কী চায়, এককালে তারা খুব গোলমাল পাকিয়ে তুলেছিলো, এখনো নিশ্চয়ই মনে-মনে যদি আঁটছে নতুন কিছু গুণগোল বাধাবার জন্য। কোনো-কিছু না-ক’রে থাকতে পারে না এরা। সারা জীবন তারা যন্ত্র নিয়ে কাটিয়েছে আর এখন তারা নিজেরাই হইয়ে উঠেছে যন্ত্রের মতো, তেমনি ঠাণ্ডা, আর তেমনি নির্দয়। পশমের জামা আর ফতুয়া প’রে তারা ঘুরে বেড়ায়, ধূমপানের সময় হাড়ের তৈরি সিগারেট-হোন্ডার ব্যবহার করে, আর অসুখ-বিসুখ যাতে না হয় এইজন্যে জল ফুটিয়ে নিয়ে খায়। ভ্লাস বেচারা খামকাই তার সময় নষ্ট করছে; এই লোকগুলো সব লণ্ডভণ্ড ক’রে যাবে, শেষ পর্যন্ত তারা নিজেদের মর্জি মেটাবেই।

তারপর সে ভাবলে তার নিজের কথা। সে জানে সে একজন শাদাসিধে স্ট্রীলোক, কিন্তু তার নিজের মন ব’লে একটা জিনিস আছে, বুদ্ধি আছে, আর বয়সের তুলনায় যুবতী আছে এখনো। সব মিলিয়ে দেখলে মানুষ হিসেবে সে মন্দ নয়। কিন্তু তার কোনো গুণই এই বিশ্বে সৃষ্টিছাড়া জায়গায় কাজে লাগে না—অন্য কোথাও যে লাগবে তাও নয়। সেই বোকা বুড়ি সেনটেটিউরিখার বিষয়ে যে-অস্ট্রীল গানটা আছে, সেটা তার মনে প’ড়ে গেলো; ইউরালের সর্বত্র গানটা খুব পরিচিত, কিন্তু প্রথম দুটো পঙ্ক্তিই শুধু মুখে আনা যায় :

‘সেনটেটিউরিখা, সে তার গাড়ি বেচে দিলে

আর কিনে নিলে এক বালালাইকা’^২...

এর পরে নিছক অস্ট্রীলতা ছাড়া আর-কিছু নেই। তারা পুণ্য ক্রুশে এই গানটা গাইতো; তার সন্দেহ হ’লো, বোধহয় তাকে লক্ষ্য ক’রেই।

শুকনো, তিস্ত একটি দীর্ঘশ্বাস ফেলে বাড়িতে ঢুকলো সে।

১ জার-শাসিত রাশিয়াতে সন্ত জর্জের ক্রুশটিক ছিলো সর্বোচ্চ সামরিক সম্মান।

২ Balalaika: রাশিয়ায় ব্যবহৃত এক ধরনের গীটার।—অনুবাদের টীকা

৫

সোজা সে চ'লে গেলো তার শোবার ঘরে, এমনকি কোট খুলে নেবার জন্য হলঘরেও থামলো না। ঘরটার মুখ বাগানের দিকে। ঘরের ভেতরকার আর বাগানের ছায়ামূর্তিগুলোকে রাত্রি প্রায় সেইরকমই দেখায়, যেন তারা একে অন্যের পুনরাবৃত্তি করছে। পর্দার শিথিল ঝুলে-পড়া ছায়াগুলোকে দেখায় যেন কালো, পাতা-ঝরা আবছা গাছগুলির শিথিল ঝুলে-পড়া ছায়ারই মতো। বাগানে, যেখানে শীত প্রায় শেষ হ'য়ে এলো, ভাবী বসন্তের গাঢ়-লাল দীপ্তি মাটি ফেটে বেরিয়ে এসে রাতের রেশমি অন্ধকারকে উজ্জ্বল দিচ্ছে। আর এই দুই উপাদানের কোনো অনুরূপ সংমিশ্রণের ফলে, খুলিধূসর পর্দা-ঝোলানো ঘরটার বাতাসহীন অন্ধকারও আগতপ্রায় উৎসবের গাঢ় বেগুনি আভায়ে কোমল হ'য়ে এলো।

কুমারী-মাতার বিগ্রহটি রূপোর উচু পাত থেকে তাঁর শ্যামল কৃশ হাত সরিয়ে নিয়ে তুলে দিয়েছেন ওপরে, মনে হয় যেন তাঁর গ্রীক নামের প্রথম আর শেষ অক্ষরগুলি ধ'রে আছেন, *Μητρηρ Θεοο*।^১ বিগ্রহের বাতির রং ডালিমদানার মতো, সোনার তাকে দোয়াতের মতো কালো দেখাচ্ছে তাকে—তা ছড়িয়ে দিয়েছে তার তারাজ্জ্বলা আলো, নকশা-আঁকা কাচের ভেতর ফুলঝুরির মতো ছড়িয়ে গিয়ে গালুজিনাকে একটু বেমোড়ে বৈকতে হ'লো, আর সঙ্গে-সঙ্গে কাঁধের তলায় পিঠের একপাশে সেই পুরোনো ব্যাথাটা চাড়া দিয়ে উঠলো। ভিত্তি গলায় চেঁচিয়ে উঠলো সে, তারপর বিড়বিড় ক'রে বলতে লাগলো : 'দুঃখীজনের রক্ষাকর্ত্রী, অসহায়ের সহায়, বিশ্বের আশ্রয়, পুণ্যময়ী ঈশ্বরজননী...' প্রার্থনার মাঝামাঝি জায়গায় এসে কান্নায় ভেঙে পড়লো সে।

ব্যাথাটা ক'মে যাওয়ার পর সে কাপড় ছাড়তে শুরু ক'রে দিলে, কিন্তু পেছনের হুকটা পিছলে গিয়ে জামার নরম কুচিগুলির মধ্যে মিশে গেলো। আবার নাগাল পেতে বেশ বেগ পেতে হ'চ্ছিলো তাকে।

কসিউশা, যে-মেয়েটি তাদের বাড়িতে থাকে, সে জেগে গিয়েছিলো, এবার ঘরে এলো।

'অন্ধকারে কেন, মা? আলো আনবো?'

'থাক। যথেষ্ট আলো আছে।'

'দেখি, আমাকে দাও, আমি খুলে দিচ্ছি। ক্লান্ত হ'য়ে যাচ্ছো।'

'আঙুলগুলো সব অকেজো হ'য়ে গেছে যেন, আমার কান্না পাচ্ছে। আর ঐ দরজিটা—লোকটা এটুকু বোঝে না কোথায় আংটাগুলো লাগালে হাতের নাগালে আসে। ব্যাটা কালা বাদুড়। আমার ইচ্ছে করছিলো সবগুলো ছক খুলে তার কুচ্ছিৎ মুখটার ওপর ছুঁড়ে দিই।'

'মঠে কী সুন্দর গান গাইছিলো ওরা! চারদিক এতো চূপচাপ যে বাড়ি থেকেও শোনা গেলো।'

'গান ভালোই গাইছিলো, কিন্তু আমার শরীরটা ভালো ঠেকছে না। আবার সেই ব্যাথাটা উঠেছে—এখানে, আর এখানটায়, সব জায়গায়... এমন একটা উৎপাত, কী যেন করবো ভেবে পাই না!'

'সেবারে কিন্তু স্ট্রিডব্লিয়ার হোমিওপ্যাথি ওষুধে কাজ দিয়েছিলো।'

'লোকটা এমন সব কাজ করতে বলে, যা অসম্ভব। তোমার ঐ হোমিওপ্যাথিটি হাতুড়ে, মোটেই কাজের না। এই তো গেলো প্রথম কথা। আর তাছাড়া সে এখান থেকে চলেও গেলো। চ'লে গেছে সে, তোমাকে ব'লে দিচ্ছি, শহর ছেড়ে চ'লে গিয়েছে। শুধু সে-ই না, আরো অনেকেই; তারা সকলেই—ঠিক ছুটির আগে জোট বেধে ছুটে পালিয়েছে—যেন শিগগিরই কোনো ভূমিকম্প শুরু হবে, বা ঐ গোছের কিছু।'

‘বেশ, তাহ’লে ঐ হাস্কেরিয়ানদের ডাক্তারকে ডাকলে কেমন হয়?—ঐ যে যুদ্ধের বন্দী লোকটা, তার চিকিৎসায় কিন্তু উপকার পেয়েছিলো।’

‘সেও কোনো কন্য়ের নয়। আর তাছাড়া, বললামই তো, একটি জনপ্রাণী বাকি নেই। কেৱেনি লাজোস অন্য হাস্কেরিয়ানদের সঙ্গে সীমান্ত-রেখার’ ওপারে চ’লে গেছে। লাল ফৌজের কাজ করার জন্য জোর ক’রে ধ’রে নিয়ে গেছে ওকে।’

‘মা, এর অনেক কিছুই কিন্তু মনে-মনে বানাচ্ছে তুমি। বড় উদ্বেজিত আছো। তোমার মতো অবস্থায় তুচ্ছতাকে খুব কাজ হয় কিন্তু; আর চাষিরা তো তা-ই ক’রে থাকে সচরাচর। তোমার মনে আছে সেই সেপাইয়ের বৌটির কথা, যে তোমার কানে-কানে কী যেন বলেছিলো, আর অমনি ব্যথা সেরে গিয়েছিলো? তার নামটা যেন কী?’

‘ও, তাই বুঝি! আমাকে এক ডাहा উজ্জ্বল ঠাউরে বসছে তুমি! এখন যদি তুমি আমার আড়ালে “সেনটেরিউরিখা” গাইতে শুরু ক’রে দাও, তাহ’লেও আমি অবাক হবো না।’

‘মা, এমন কথা কী ক’রে তুমি মুখে আনলে! ও-কথা মনে আনাও পাপ। তোমার লজ্জা পাওয়া উচিত। বরং সেই স্ত্রীলোকটির নামটা কী, তা আমাকে মনে করিয়ে দিলে অনেক ভালো করবে। নামটা আমার জিভের ডগায় এসে আটকে আছে। যতোকণ না নামটা মনে করতে পারছি, ততোকণ আমি শাস্তি পাবো না।’

‘সে-বৌটির যতো না শায়া-শেমিজ, নাম তার চেয়ে বেশি। কোন নামটার কথা ভাবছো? কুবারিখা, মেডভেডিখা আর জালিরিখা—এই সব নামে ওরা ডাকে তাকে। এ ছাড়া আরো যে কত আছে, তা আমি জানিও না। সেও এখন আর এখানে নেই। চ’লে গেছে কোথাও, উধাও হ’য়ে গেছে একেবারে।—কী সব বড়ি আর ঠুড়ো ওষুধ বানিয়েছিলো সে, যা গর্ভপাতে সাহায্য করতো, এইজন্য কেঁজমা জেলে তাকে আটকে রাখা হয়েছিলো। বুঝতেই পারছো যে জেলখানা তার অসহ্য ঠেকলো, চম্পট দিলে সেখান থেকে, বোধহয় পূবদেশের কোনোখানে আছে এখন। সবাই পালিয়েছে, এই তোমায় আমি ব’লে রাখলাম।—ভলাস, টেরিয়শকা আর তোমার পলিয়া মাসি—দয়ার শরীর পেলাগিয়া—সবাই, সবাই পালিয়েছে। আমরা দুই আকাট মুখ্য ছাড়া—শহরে আর একজন ভালো মেয়েমানুষ নেই। না, না, আমি ঠাট্টা করছি না। তাছাড়া কোনো ধরনের ডাক্তারি সাহায্যও পাবার উপায় নেই। যদি ভালো-মন্দ কিছু ঘ’টে যায়, তাহ’লে কোথাও একজন ডাক্তার পাওয়া যাবে না, টাকা বলো, দয়া বলো, কিছুর জন্যেই না। তারা বলছিলো ইউরিয়টিনে নাকি একজন ডাক্তার আছেন, মস্কোর নামজাদা প্রোফেসর, সাইবেরিয়ার এক ব্যবসাদারের ছেলে, সে-ভদ্রলোক আবার আত্মহত্যা করেন। কিন্তু ঠিক যখন আমি তাঁর কাছে খবর পাঠাবার কথা ভাবছিলাম, লাল ফৌজের লোকেরা নাকি রাস্তার বারো জায়গা দখল ক’রে ব’সে আছে।...যাও, এবার বিছানায় গিয়ে শুয়ে পড়ো, আমিও শুয়ে একটু ঘুমোবার চেষ্টা করি। হ্যা, ভালো কথা, ঐ যে তোমার বন্ধুটি, ঐ ছাত্র ব্রাজিন, ও-ই তোমার মাথাটি খেয়েছে।—“না” ব’লে আর লাভ কী? এদিকে তো গাজরের মতো লাল হ’য়ে উঠেছে!—বেচারি, তাকে আমি কতগুলো ফোটো দিয়েছিলাম ডেভেলপ করার জন্য, এখন সারারাত ধ’রে সেগুলো নিয়ে তাকে ঘামতে হবে। ঐ বাড়িতে ওরা নিজেরা তো ঘুমোয়ই না, সেই সঙ্গে অন্য কাউকেও ঘুমোতে দেয় না। ওদের টেমিক সেই থেকে খেউ-খেউ করছে, সারা শহরে তার ডাক শুনতে পাওয়া যায়। আর এদিকে আপেল-গাছে ব’সে আমাদের ঐ হতচ্ছাড়া কাকটা ডেকে-ডেকে পাগল হ’য়ে গেলো। মনে হচ্ছে আরেকটা রাত না-ঘুমিয়ে কাটাতে হবে আমাদের।...আরে, হঠাৎ এতো গোমড়া মুখো হ’য়ে পড়লে কেন? এতো অভিমাত্রী হোয়ো না। মেয়েরা যদি প্রেমেরই না পড়লো তো ছাত্রেরা আছে কী জন্যে!’

৬

‘কুস্তাটা চ্যাচাচ্ছে কেন? গিয়ে দেখে এসো তো কী ব্যাপার। খামাখা নিশ্চয়ই এ-রকম চ্যাচাচ্ছে না? এক মিনিট চুপ করো, লিডচকা একটু চুপ করো না—আঃ! কী ব্যাপার চলেছে আমায় জানতে হবে, আর নয়তো কিছু বুঝে ওঠার আগেই হয়তো পুলিশ এসে পড়বে। উষ্টিন, এখানে থাকো, আর তুমি, সিভোব্লুয়ি, তুমিও। তোমাদের ছাড়াই সব ঠিক ক’রে নিতে পারবো।’

লিডচকা কেন্দ্রীয় সমিতির প্রতিনিধি। দলের নেতা যে তাকে চুপ করতে বলেছে, এটা সে শোনেনি, তাই তার ক্লাস্তিকর বকবকানি থামালো না:

‘সাইবেরিয়ায় বুর্জোয়াদের সামরিক শাসন যে-ভাবে লুটপাট চালাচ্ছে, কেড়ে নিচ্ছে সব, জবরদস্তি করছে, আর যে-ভাবে অত্যাচার করছে আর গুলিগোলা চালাচ্ছে, তাতে এতোদিন যারা আত্মপ্রতারণা করেছিলো তাদেরও চোখ খুলে যাবে। শুধু যে মজুরদের বিরুদ্ধেই শত্রুতা করছে তা নয়, আসলে এটা তামাম মেহনতি চাষিসমাজেব বিরুদ্ধেই শত্রুতাচরণ। সাইবেরিয়া আর ইউরালের মেহনতি চাষিদের এটা বুঝতেই হবে যে সৈন্যদের সঙ্গে আর শহরের প্রলেটারিয়াটের সঙ্গে, গরিব কিরগিজ আর বুরিয়াট চাষিদের সঙ্গে মিত্রতা করলেই’

তাকে যে খামতে বলা হচ্ছে, লিডচকা এটা এতোক্ষণে খেয়াল করলে। কথা থামিয়ে ক্রমাল দিয়ে মুখের ঘাম মুছে নিলে, তারপর বন্ধ করলো তার ফোলা-ফোলা ক্লাস্ত চোখ।

‘একটু জিরিয়ে নিন। জল খেয়ে নিন বরং,’ তার কাছে যারা ভিড় ক’রে দাঁড়িয়েছিলো, তাদের একজন বললে।

উদ্বিগ্ন নেতাটি এবার আস্থা ফিরে পাচ্ছিলেন:

‘অনর্থক এতো হৈ-চৈ কী জন্যে? সব ঠিক আছে। জানলায় সংকেত-বাতি জ্বলছে, আর তাছাড়া, একটু শৌখিন ভাষায় বলা যায় যে, পাহারাওলা তার চোখ দুটিকে আঠা দিয়ে জুড়ে রেখেছে চারপাশে। আলোচনাটা কেন চলবে না, আমি বুঝতে পারছি না। চালিয়ে যান কমরেড লিডচকা।’

ফোটোগ্রাফারদের উঠানে মস্ত শেডটায় যে-জ্বালানি কাঠ ছিলো সব একপাশে সরিয়ে রেখে শেডের ঠিক মাঝখানকার ফাঁকা জায়গাটায় বেআইনি সভা বসেছে। ছাত পর্যন্ত উচু ক’রে তুপাকারে কাঠ রাখা হয়েছে, যাতে প্রবেশপথের ডার্করুম থেকে কিছুই দেখা না যায়। তেমন জরুরি অবস্থায় পড়লে যাতে পালানো যায়, সেইজন্যে ঠেলা দরজা দিয়ে একটা সুড়ঙ্গপথে যাবার ব্যবস্থা আছে; সেটা গেছে মঠের পেছনে একটা নির্জন গলি পর্যন্ত।

বক্তার গায়ের রং জলপাইয়ের মতো, কানের পাশ থেকে দাড়ি নেমে এসেছে; টেকো মাথায় একটা কালো রঙের সূতির টুপি প’রে আছে সে। এক ধরনের স্নায়বিক স্বেদস্রবণে ভোগে সে, সব সময় গলগল ক’রে ঘামছে কেবল। হাতের সিগারেটটা বারে-বারে নিভে যাচ্ছে, প্যারাফিনের বাতির গরম ধোয়ার মধ্যে সেটাকে লোভীর মতো ধ’রে বারে-বারে জ্বালিয়ে নিচ্ছে আবার। সামনে ছড়িয়ে-থাকা কাগজপত্রগুলির ওপর সে ঝুঁকে পড়লো, উদ্বিগ্নভাবে তাদের ওপর বুলিয়ে নিলে তার ক্ষীণদৃষ্টি চোখ, মনে হ’লো যেন তাদের গন্ধ শুকছে, তারপর আবার তার নিস্তরঙ্গ ক্লাস্ত গলায় শুরু করলে:

‘শুধুমাত্র সোভিয়েটগুলির মধ্য দিয়েই শহর ও গ্রামের গরিবদের মধ্যে মৈত্রীবন্ধন সম্ভব হ’তে পারে। যে-জন্যে সাইবেরিয়ার মজুররা বহুকাল আগেই লড়াই শুরু করেছে, ইচ্ছায় হোক, অনিচ্ছায় হোক, সাইবেরীয় চাষিদেরও এখন সেইজন্যেই লড়াই চালিয়ে যেতে হবে। এখন তাদের লক্ষ্য এক—এখন তারা দু’জনেই চায় অ্যাডমিরাল আর হেটমানদের স্বৈরাচারের অবসান। সশস্ত্র বিপ্লবের সাহায্যে সেনাবাহিনী ও কৃষকসমাজের সোভিয়েটের সক্ষম প্রতিষ্ঠাই এখন তাদের একমাত্র আকাঙ্ক্ষা—বুর্জোয়াসমাজের এই সব অফিসার আর ভাড়াটে কসাকদের

সঙ্গে লড়াই চালাতে গিয়ে বিদ্রোহীদের বীতিমতো মুখোমুখি যুদ্ধ চালাতে হবে, কেননা বুর্জোয়া সেনাবাহিনীর অস্ত্রশস্ত্রের কোনো অভাব নেই। যুদ্ধ চলবে বহুদিন ধ'রে, সহজে মিটবে না।'

আবার কথা থামিয়ে মুখ মুছে চোখ বুজলো সে। প্রচলিত নিয়ম না-মেনে শ্রোতাদের মধ্য থেকে একজন উঠে দাঁড়িয়ে হাত তুলে কথা বলবার অনুমতি চাইলো।

পাটিজান নেতাটি—সঠিক বলতে গেলে, ট্রান্স-ইউরালীয় দলশাখাব কেজ্জমা গোষ্ঠীর কমান্ডার, বস্তুর ঠিক নাকের তলায় এমন ঢিলেঢালা ভঙ্গিতে ব'সে ছিলো যে দেখলে রাগ হয়। মাঝে-মাঝে বক্তাকে রুঢ়ভাবে থামিয়ে দিচ্ছিলো সে, তার ব্যবহারের বিন্দুমাত্র শ্রদ্ধার লক্ষণ নেই। বিশ্বাস করা শক্ত যে এতো অল্প বয়সী একজন সৈন্য—প্রায় কিশোর বলা যায়, সে হ'লো কিনা আস্ত বাহিনীর নেতা স্মার সবাই তার কথা শোনে, মান্য করে। পল্টনের মস্ত কোটে হাত-পা ঢেকে সে ব'সে ছিলো: কোটের ওপরকার অংশটা তাব চেয়ারের ওপর ফেলে রাখা, তাব ফলে তাব ফোঁজি পোষাক দেখা যাচ্ছিলো—কাঁধের কাছে কালো দাগ, সেখান থেকে এপোলো খুলে ফেলা হয়েছে।

তার দু'পাশে একজন ক'বে নিঃশব্দ দেহবক্ষী দাঁড়িয়ে আছে; তারাও তারই সমবয়সী, পরনে ধারে-ধারে কৌকড়ানো শাদা মেঘচর্মের জামা, এখন একটু ধূসব হ'য়ে গেছে। তাদের পাথরের মতো কঠিন ও সুস্মী মুখে দলপতিব প্রতি অন্ধ আনুগত্য ছাড়া আর কোনো ভাব নেই; প্রাপণ ক'রেও আদেশপালনের জন্য উন্মুখ হ'য়ে আছে। আলোচনায় কোনো অংশ নিলে না তারা; কোনো কথাতেই একটু বিচলিত হ'লো না, না বললে কোনো কথা, না একটু হাসলো।

তারা ছাড়া আরো বাবো বা পনেরোজন লোক ছিলো ঘরে। কেউ-কেউ দাঁড়িয়ে আছে, অন্যরা মেঝেয় ব'সে; স্তূপ ক'বে বাখা জ্বালানি কাঠের দেয়ালে হেলান দিয়ে বসেছে তারা, কেউ বসেছে সামনে পা ছড়িয়ে, কেউ বা হাঁটুর ওপর থুথনি চেপে আছে।

তিন-চারজন ছিলেন মাননীয় অতিথি, তাঁরা বসেছেন চেয়ারে। তাঁরা সবাই পুরোনো কমী, ১৯০৫ সালের বিপ্লবের হোমবা-চোমরা। তাঁদের মধ্যে একজন হ'লো টিভেরজিন, কেমন যেন বিষন্ন হ'য়ে আছে, মস্তো ছাড়ার পব অনেক বদলে গেছে সে, আর তার সঙ্গে আছে তার বন্ধু বুড়ো আন্টিপভ, টিভেরজিন যা বলে তাতেই সায দেয় সে। বিপ্লব যাদের পায়ে তার দন্ধ উপচার নৈবেদ্য দিয়েছে, সেই স্বল্পসংখ্যক দেবতাদের অন্যতম ব'লে তারা গভীরভাবে নিঃশব্দে ব'সে আছে মূর্তির মতো। রাজনৈতিক অহমিকা তাদের সব সজীবতা ও মানবিক গুণ হরণ করেছে।

ঘরে এমন আরো অনেকে ছিলেন যারা বিশেষভাবে চোখে পড়ার মতো। তাদের মধ্যে একজন হ'লো রুশীয় নৈরাজ্যবাদের অন্যতম স্তম্ভ ভডোভচেন্সকো, 'কালো পতাকা' ব'লে সে পরিচিত। এক মুহূর্তের জন্যও শাস্ত থাকতে পারে না সে, একবার এসে বসেছে মেঝেতে, পরক্ষণেই উঠে দাঁড়াচ্ছে, পায়চারি করছে আগু-পিছু, মাঝে-মাঝে শেডের মাঝখানটায় এসে থেমে দাঁড়াচ্ছে। দেখতে মোটাসোটা এক দৈত্যের মতো, যেমন মস্ত তার মাথা, তেমন মুখটা, সিংহের কেশরের মতো চুল, তুর্কিযুদ্ধের সময় যদি নাও হয়, জাপানি যুদ্ধে সে একজন অফিসার ছিলো; ভাববিলাসী সে, মশগুল হ'য়ে থাকে তার অমূল কল্পনায়।

নিজে অসাধারণ ভালো আর অতিকায় ব'লে নিজের চেয়ে ছোটো মাপের কিছুই তার চোখে পড়ে না, সেইজন্যই আশে-পাশে কী চলেছে তাতে তার বিশেষ মনোযোগ ছিলো না। ফলে প্রত্যেকটি কথার সে ভুল অর্থ করলে, তার বিরোধী দলের মতামতকে সে নিজের ব'লে ভেবে নিলে, এবং সব কথাতেই তার সম্মতি জানিয়ে দিলে।

তার পাশেই মেঝেতে বসেছিলো স্ভিরিড, ফাদ-ধবিয়ে। যদিও কখনো জমিতে লাঙল চালায়নি, তবু স্ভিরিডের সঙ্গে যে মাটির যোগাযোগ আছে, আর সেটা যে চাষিদেরই মতো, তা প্রকাশ পাচ্ছিলো তার বুক-খোলা ময়লা সুতির শাট থেকে; বুকের কাছটা ধ'রে রেখেছে সে,

সেই সঙ্গে গলায় খোলানো ক্রুশটাও; মাঝে-মাঝে ক্রুশটা টানছে, কখনো সেটা দিয়ে আঁচড় কাটছে বুকে সে। জাতে সে আধা-বুরিয়াট^১, লেখাপড়া জানে না কিন্তু দিলখোলা; লম্বা চুলগুলি ঢেউ-খেলানো, পাংলা গোঁফ, তার চেয়েও পাংলা দাড়ি। মুখে তার সব সময়ই হাসির ভাঁজ, চেহারার মধ্যে মোস্কোলীয় ছাপের জন্যে তাকে বয়সের তুলনায় বড়ো দেখায়।

কেন্দ্রীয় সমিতির নির্দেশ অনুসারে এক সামরিক দৌত্যকার্যে সাইবেরিয়া সফরে বেরিয়েছে বক্তাটি। মনে-মনে সে একবার ভেবে নিলে এখনো কত বড়ো দেশ তাকে ভ্রমণ করতে হবে। অধিকাংশ শ্রোতা বিষয়েই তার কোনো কৌতূহল নেই। কিন্তু একজন পুরোনো বিপ্লবী ব'লে আর ছেলেবেলা থেকেই গণ-দরদী ব'লে, সে তার মুখোমুখি-ব'সে থাকা তরুণ দলপতির দিকে প্রায় সম্রমের চোখে তাকালো। তার বেয়াদবি শুধু মাপ করলো তাই নয়, তার মনে হ'লো এটাই যথার্থ বৈপ্লবিক মনোভাব। তার ঔদ্ধত্যে খুশিই হ'লো বরং, নির্লজ্জ প্রেমিকের স্থূল আচরণে মোহগ্রস্তা রমণী যে-রকম পুলকিত হয়।

দলপতিটি হ'লো মিকুলিনস্কিনের ছেলে লিওবেরিয়স। বক্তা আগে ছিলো সমবায়-শ্রমিক-সংস্থার একজন সভ্য, এককালে সমাজ-বিপ্লবী হিসেবে কাজ করেছিলো, নাম কস্টয়এড আমুরস্কি। এখন সে তাব মত বদলেছে, অতীতের ভুলগুলো স্বীকার করে বিস্তারিত জবানবন্দীতে বিবৃতি দিয়েছে। তার ফলে শুধু কমিউনিস্ট পার্টির সভ্যপদ লাভ করেছে তাই নয়, অল্পদিন পরেই তার হাতে এই দায়িত্বপূর্ণ কাজের ভার দেওয়া হয়েছে।

যদিও সে আর যাই হোক সৈনিক নয়, তাহ'লেও তাকে এই পদে মনোনীত করা হ'লো। তার কিছুটা কারণ বোধ হয় বৈপ্লবিক ক্রিয়াকলাপের সঙ্গে তার সুদীর্ঘ সম্বন্ধ ও জারের আমলের জেলখানায় তার কঠোর নিগ্রহভোগ। আর অন্য কারণ হয়তো এই যে সমবায়-সমিতির প্রাক্তন সভ্য হিসেবে সে নিশ্চয়ই সাইবেরিয়ার বিদ্রোহী অঞ্চলগুলির চাষিদের মেজাজ-মর্জি জানে। সে ও-সব বিষয়ে জানে ব'লে অন্যদের যে-ধারণা, এই কাজে সামরিক অভিজ্ঞতার চাইতে সেটাই বেশি জরুরি ব'লে ধরা হ'লো।

রাজনৈতিক বিশ্বাসের পরিবর্তনের সঙ্গে-সঙ্গে তার চেহারা ও স্বভাব এমনভাবে বদলে গিয়েছে যে দেখে চেনার উপায় নেই। আগে তার কখনো টাক বা দাড়ি ছিলো ব'লে কেউ মনে করতে পারে না—অবশ্য তখন এ-সমস্তই হয়তো ছদ্মবেশ ছিলো তার। পার্টির কড়াকড়কুম ছিলো তার ওপর, সে যেন আত্মপরিচয় গোপন রাখে। তার গুপ্ত নাম হ'লো বেরেণ্ড বা কমরেড লিডচকা।

ভডোভিচেকো যখন আগে-ভাগেই ব'লে দিলে যে কেন্দ্রীয় সমিতির যে-সব নির্দেশ এইমাত্র পড়া হ'লো সে তার সঙ্গে একমত, তখন একটুক্কণের জন্য সভায় একটা চাঞ্চল্যের সৃষ্টি হ'লো। উত্তেজনা থেমে গেলে, কস্টয়এড ফের বলতে শুরু করলো:

‘কৃষকসমাজের ক্রমবর্ধমান আন্দোলনকে যাতে যতদূর সম্ভব ব্যবহার করা যায়, সেইজন্যে অবিলম্বে দলের প্রাদেশিক সমিতির সীমার ভেতর যতোগুলি সক্রিয় সমবায় রয়েছে, তাদের মধ্যে যোগাযোগ স্থাপন করতে হবে।’

গোপন সাক্ষাতের জায়গা কোথায়-কোথায় আছে, সংকেতবাক্য কী, যোগাযোগের উপায় ও নানারকম সাংকেতিক ভাষা—এই সমস্ত বিষয় সে পুঙ্খানুপুঙ্খ ভাবে ব'লে দিলে।

‘শাদারা কোথায় তাদের অস্ত্রশস্ত্র, খাদ্য ও অন্যান্য যন্ত্রপাতি জমা ক'রে রেখেছে, আর কোন-কোন জায়গায় তারা বিপুল অর্থ জমিয়ে রেখেছে, নিরাপত্তার জন্য কী ব্যবস্থা অবলম্বন করেছে, এইসব খবর সমবায়গুলিকে জানিয়ে দিতে হবে।

‘দলের সব বিচ্ছিন্ন সেনাবাহিনীর সংগঠন, তাদের অধিনায়ক, যুদ্ধকালীন শৃঙ্খলা, বিভিন্ন

চক্রান্ত, বহির্জগতের সঙ্গে যোগাযোগ, আঞ্চলিক অধিবাসীদের প্রতি করণীয় আচরণ, যুদ্ধকালীন বিপ্লবী বিচারসভা, শত্রুশিবিরে অন্তর্ঘাতী কার্যসূচির কৌশল, অর্থাৎ কী ভাবে সেতু উড়িয়ে দিতে হবে, রেল-লাইন উপড়ে তুলতে হবে, নৌ-বহর ধ্বংস কবতে হবে, বিভিন্ন স্টেশন ও কারখানাকে সব যন্ত্রপাতি সমেত ধ্বংস ক'রে ফেলতে হবে, সব টেলিগ্রাফ-আপিস, খনি ও রসদ-সববরাহ বানচাল ক'রে দিতে হবে, এই সমস্ত বিষয়ে পুঙ্খানুপুঙ্খভাবে সব ভেবে রাখতে হবে।'

লিবারিয়ুস আর সহ্য করতে পারলো না। এতোক্ষণ ধ'রে যা বলা হ'লো, সবই তার মনে হয়েছে একজন অপেশাদারের প্রলাপ মাত্র, আসল কাজের সঙ্গে এর কোনোই সম্বন্ধ নেই।

'চমৎকার বক্তৃতা', বললে লিবারিয়ুস। 'আমার মনে থাকবে। মনে হচ্ছে যে-সবই আমাদের বিনা প্রতিবাদে মেনে নিতে হবে, যদি না আমরা লাল ফৌজের সাহায্য হারাতে চাই।'

'নিশ্চয়ই, তা-ই করতে হবে।'

'মাসের পর মাস ধ'রে আমার বাহিনী শত্রুদের অনুসরণ করছে, লড়াই চালাচ্ছে, তাও একটা দুটো নয়—তিন-তিনটে বাহিনী—তাদের মধ্যে আবার গোলন্দাজ বাহিনীও আছে, ঘোড়সওয়ার দলও আছে। এখন তাদের নিয়ে আমি কী করবো বলো তো? ওহে লিডচকা, তোমার এই ছেলেমানুষি বুলি নিয়ে আমি কী করবো, বলো তো?'

'কী চমৎকার! কী আশ্চর্য ক্ষমতা!' কস্টয়এড ভাবলে।

লিবারিয়ুসের রূঢ় স্বর টিভেরজিনের পছন্দ হয়নি, সে এবার আলোচনায় যোগ দিলে।

'মাপ করবেন, কমরেড স্পীকার, একটা জিনিস আমি ঠিক স্পষ্ট বুঝতে পারিনি। নির্দেশগুলির একটা বোধহয় আমি ভুল লিখেছি। আমি কি প'ড়ে শোনাতে পারি—নিঃসন্দেহ হ'য়ে নেওয়াই ভালো। "বিপ্লবের সময়ে ঋরা সামরিক সংগঠনের সঙ্গে যুক্ত ছিলেন এবং সৈন্য হিসেবে যুদ্ধক্ষেত্রে গিয়েছিলেন, তাঁরা সকলেই যাতে সমিতিতে যোগদান করেন, এটাই সবচেয়ে বাঞ্ছনীয়। এটা বাঞ্ছনীয় যে সমিতির সভ্যবৃন্দের মধ্যে যেন দু'একজন কমিশন-না-পাওয়া অফিসার থাকেন, আর একজন সামরিক টেকনিশিয়ান।" আমি কি শুদ্ধভাবে লিখে নিতে পেরেছি, কমরেড স্পীকার?'

'শুদ্ধভাবে। প্রত্যেকটা কথা ঠিক আছে।'

'তাহ'লে আমাকে একটা কথা বলার অনুমতি দিন। ঐ যে সামরিক টেকনিশিয়ানদের কথা বললেন, এটা আমার কাছে অস্বস্তিকর ঠেকেছে। আমরা যে-সব শ্রমিকেরা ১৯০৫ সালের বিপ্লবে অংশ নিয়েছিলাম, আমরা সৈন্যদের সহজে বিশ্বাস করতে পারি না। সব সময়েই তাদের মধ্য থেকে প্রতিবিপ্লবী গজিয়ে ওঠে।'

'ঢের হয়েছে, এবার একটা সিদ্ধান্ত নেওয়া হোক! একটা সিদ্ধান্ত গ্রহণ করা হোক এবার! অনেক দেবি হ'য়ে গেছে, বাড়ি ফেরার সময় হ'লো।' এই ধরনের নানা বব উঠলো সভায়।

'সংখ্যাগরিষ্ঠদের সঙ্গে আমিও একমত,' গুরুগম্ভীর গলায় ভডোভিচেকো ব'লে উঠলো। 'কাব্য ক'রে বলা যায়, চারাগাছ যেমন রোপিত হবার পর মাটির ভেতর শেকড় ছড়িয়ে দেয়, তেমনিভাবে সব সোসামরিক প্রতিষ্ঠানের গণভঙ্গ মেনে চলা উচিত, তারা যেন তলা থেকে গজিয়ে ওঠে। বেড়ার খুঁটির মতো তাদের হাতুড়ি দিয়ে ঠুকে-ঠুকে পুতে দেওয়া যায় না। জ্যাকোবিন ডিক্টেটরশিপের দোষ ছিলো এটাই, আর এই কারণেই থার্মিডোরিয়ান'রা গোটা কনভেনশনকে পিষে ফেলতে পেরেছিলো।'

‘এটা তো দিনের আলোর মতো স্পষ্ট,’ তার বন্ধু ও সহ-ভ্রাম্যমাণ স্ভিরিড তার কথায় সায় দিলে। ‘একটা বাচ্চা ছেলেও বুঝতে পারে এটা। আমাদের এ-কথা আগে ভাবা উচিত ছিলো, কিন্তু এখন বড্ড দেরি হ’য়ে গেছে। এখন আমাদের কাজ শুধু লড়াই চালিয়ে যাওয়া—শুধু ঠেলে এগোনো। একবার শুরু করার পর এখন আমরা ফিরে দাঁড়াই কী ক’রে? বিছানা যখন পেতেই ফেলেছি, তখন তাতেই শুয়ে থাকতে হবে।’

‘সিদ্ধান্ত! সিদ্ধান্ত!’ চারদিক থেকে লোকজনেরা বলতে থাকলো। আরো খানিকক্ষণ কথাবার্তা চালিয়ে গেলো তারা, কিন্তু ক্রমশই এমন সব কথা উঠতে লাগলো যার কোনো মানেই হয় না। অবশেষে ভোরবেলায় সভা ভাঙলো। যথাবিহিত সতর্কতার সঙ্গে একে-একে তারা বাড়ি চ’লে গেলো।

৭

রাজপথের ধারে সেই জায়গাটা ছবির মতো সুন্দর দেখায়। যেখানে কুটেইনি পোসাড আর মালি ইয়েরমোলে এই গ্রাম দুটিকে দ্বিখণ্ড ক’রে তরতরে ছোটো নদী পাক্জিঙ্কা ব’য়ে চলে গেছে, সেখানে গ্রাম দুটির একটি নেমে এসেছে এক খাড়া টিলার গা বেয়ে, অন্যটি ঠিক তার তলাকার উপত্যকায় ছড়িয়ে আছে। কোলচাক জোর ক’রে যে-সব নতুন রংরুট জোগাড় করেছেন, কুটেইনিতে তাদের বিদায়-সংবর্ধনা জানানো হচ্ছিলো। আব ইয়েরমোলে-তে কর্নেল স্ট্রেন্সের অধীনে এক চিকিৎসক-সমিতি ঈস্টারের ছুটির পর আবার নতুন ক’রে কাজ শুরু ক’রে দিয়েছে—কাকে-কাকে সেনাবাহিনীতে ভর্তি করা যায়, তাই পরীক্ষা ক’রে দেখা তাদের কাজ। এই উপলক্ষে গ্রামে একদল ঘোড়সওয়ার-বাহিনী আর কসাক সৈন্য ছাউনি ফেলেছে।

এবারকার ঈস্টার-সপ্তাহ অসাধারণ দেরিতে পড়েছে; আজ তার তৃতীয় দিন। এদিকে বসন্তও এবার যেন বড্ড তাড়াতাড়ি এসে পড়লো, গরম পড়েছে রীতিমতো, একটুও হাওয়া নেই। কুটেইনিতে খাদ্য আর পানীয় সাজানো অনেকগুলি টেবিল খোলা আকাশের তলায় ছড়িয়ে আছে রংরুটদের জন্য—রাজপথ থেকে একটু দূরে, যাতে যানবাহনের চলাচলে ব্যাঘাত না হয়। টেবিলগুলো একটার গায়ে একটা লাগানো, কিন্তু সরলরেখায় নয়; শাদা কাপড়ে ঢাকা, ঢাকনার প্রান্ত এমনভাবে মাটি ঝুঁয়েছে যে দেখতে হয়েছে লম্বা শাদা আকাবাকা সসেজের মতো।

সংবর্ধনা-সভার আমোদ-প্রমোদের খরচ জোগাবার জন্য গ্রামবাসীরা তাদের সব সংগতি ব্যয় করেছে। প্রধান খাবার হ’লো ঈস্টার-পরবের অবশিষ্টাংশ, দুটো শুয়োরের ঠ্যাঙের নোনা পোড়া মাংস, আর কয়েকটা কুলিখ আর পাসখা^১। টেবিল জুড়ে রয়েছে বাটি-ভর্তি জারানো ব্যাঙের ছাতা, শসা আর টক ঝাধাকপি, রেকাবিতে মোটা ক’রে কাটা বাড়িতে বানানো রুটির টুকরো, কোনো-কোনো পাত্রে আবার স্কুপ হ’য়ে আছে ঈস্টারের ডিম। বেশির ভাগ ডিমের রং হ’লো গোলাপি বা ফিকে নীল।

টেবিলের চারপাশ ঘিরে কচি ঘাসের ওপর ইতস্তত ছড়িয়ে আছে ডিমের ভাঙা খোলা, শাদা রেখার মধ্যে গোলাপি আর ফিকে-নীল তাদের রঙ। যুবকদের শার্ট আর তরুণীদের জামার রংও গোলাপি আর ফিকে-নীল। আর নীল আকাশে আন্তে-আন্তে ভেসে যাচ্ছে গোলাপি রঙের কমনিয় মেঘ, মনে হচ্ছে আকাশও যেন চলছে তাদের সঙ্গে।

রেশমি কোমরবন্ধের সঙ্গে গোলাপি রঙের শার্ট প’রে আছে ভ্লাস গালুজিন; রাজপথের

১ কুলিন হ’লো একবকম পিঠে। মস্ত বান-এর মতো দেখতে; পাসখা একরকম মিষ্টি, বাড়ির ভৈরি পনির, চিনি, আর কিশমিশ দিয়ে বানানো, আকাব অনেকটা পিরামিডের মতো, ডিমের শালা অংশের সঙ্গে চিনি মিশিয়ে তার ওপর অনেক কারিকুরি করা হয়। লেন্ট-এর উপবাস ভাঙার সূচনা হিসেবে ঈস্টারের রবিবারে প্রাতরাশের সময় এ-সব পরিবেশন করা হয়।

ওপরকার ঢালু জায়গাটায় পায়নুটকিনের বাড়ি, ডাইনে-বামে পায়ের পাতা ফেলে হড়বড় করে বাড়ির সিঁড়ি দিয়ে নেমে এলো সে, তারপর দৌড়ে এলো টেবিলগুলোর কাছে, আর তক্ষুনি শুরু করে দিলো তার বক্তৃতা:

‘বৎসগণ, শ্যাম্পেন নেই, অগত্যা আমাদের নিজেদের বাড়িতে তৈরি ভদকা দিয়েই তোমাদের স্বাস্থ্যপান করছি। যে-সব তরুণ আজকের দিনে সামনের দিকে পা বাড়িয়ে দিলে, কামনা করি তাদের জীবন সুখী হোক, দীর্ঘজীবী হোক তারা। আরো অনেক শুভেচ্ছা জানাবার আছে আমার। রংকট ভদ্রমহোদয়গণ! আমি আপনাদের মনোযোগ প্রার্থনা করি। আজকে যে বিপদসংকুল পথে আপনারা পা বাড়িয়েছেন, তার মূল কথাটা হ’লো এই যে মাতৃভূমির রক্ষার্থে আপনারা রুখে দাঁড়াচ্ছেন, যে-সব দস্যু ব্রাত্যরক্তে সমগ্র দেশ ভাসিয়ে দিতে চাচ্ছে, আপনারা তার বিরুদ্ধে প্রবল প্রতিরোধ হানতে চান। জনসাধারণ এতোকাল মনে-মনে এই আশাই পোষণ করেছে যে শান্তিপূর্ণভাবে আলোচনার দ্বারাই আমরা বিপ্লবের জয়প্রতিষ্ঠা করতে পারবো, কিন্তু বৈদেশিক মুদ্রার দাস ঐ বলশেভিকেরা জনসাধারণের সর্বোচ্চ ভরসা সংবিধান-সতাকে বেয়োনেটের পাশবিক শক্তি প্রয়োগ করে ভেঙে দিয়েছে, আর এখন অসহায় জনতার রক্তধারা ব’য়ে চলেছে নদীস্রোতের মতো। হে তরুণের দল, যারা আজকের দিনে এগিয়ে যাচ্ছেন, আপনাদেরই ওপর নির্ভর করেছে আমাদের উৎপীড়িত শক্তির আত্মমর্যাদা। লজ্জায় অধোবদন হ’য়ে মুখ ঢেকে আছি আমরা, আমাদের বীর সেনাবাহিনীর কাছে আমাদের ঋণের অন্ত নেই। কেননা শুধুমাত্র লাল ফৌজই নয়, এই সুযোগে জার্মানি ও অস্ট্রিয়াও তাদের নির্লজ্জ মস্তক উচু করে উঠে দাঁড়িয়েছে। বৎসগণ, ঈশ্বর আমাদের সঙ্গে আছেন...’ তার কথা তখনো শেষ হয়নি, কিন্তু প্রবল উল্লাসধ্বনির মধ্যে তার গলা চাপা পড়ে গেলো। নির্জলা ভদকা-ভর্তি গেলাশ তুলে চৌটের কাছে এনে সে চুমুক দিলে। কিন্তু স্বাদটা তার ভালো লাগলো না। তার চেয়ে মদ^১ তার বেশি ভালো লাগে, সেই সুগন্ধি স্বাদেই সে অভ্যস্ত। কিন্তু সে যে জনসাধারণের হিতার্থে আত্মত্যাগ করছে, এই চেতনায় আত্মতৃপ্তিতে ভ’রে গেলো তার মন।

‘খুব ভালো বক্তৃতা দিতে পারেন উনি, তোমার বাবার কথা বলছি। তার সঙ্গে মিলিউকভের তুলনাই হয় না। মাইরি বলছি!’ টেবিলের মাতাল গলার অসংলগ্ন কথাবার্তার ভেতর থেকে গশ্কা রিয়াবিখ তার বন্ধু টেরিয়শকাকে জড়ানো গলায় বললে। টেরিয়শকার পুরো নাম হ’লো টেরিওস্টি গালুজিন, রিয়াবিখ-এর পাশেই সে ব’সে ছিলো। ‘কী চমৎকার মানুষ উনি! কিন্তু উনি যে এতো খাটছেন, সবটা যে খামকাই, স্বাথহীনভাবে তা কিন্তু মনে হয় না। বোধহয় পুরস্কার হিসেবে তোমাকে সেনাবাহিনী থেকে ছাড়িয়ে নেবেন।’

‘তোমার লজ্জা পাওয়া উচিত, গশ্কা! এ-রকম একটা কথা তুমি ভাবতে পারলে কী করে! সেনাবাহিনী থেকে আমাকে ছাড়িয়ে নেবেন, তাই না! দেখুন না একবার চেষ্টা করে! যেদিন তুমি আসবে, আমিও সেদিন কাগজপত্র সব নিয়ে আসবো, এই তোমাকে ব’লে রাখলাম। একই ইউনিটে আমরা কাজ করবো। ... বেজম্মাগুলো আমাকে স্কুল থেকে তাড়িয়ে দিয়েছে। মাকে তো কুরে-কুরে খাচ্ছে এই ভাবনা। এখন আমি কোনো পরোয়ানা পাবো ব’লে মনে হয় না। ... তবে, হ্যাঁ—বাবা সত্যিই বক্তৃতা দেবার কায়দাগুলো জানেন। সব সময়ই ঠিক জুতসই কথাটা মুখে আসে তাঁর। আর সবচেয়ে অসাধারণ ব্যাপার হ’লো, এটা তাঁর সম্পূর্ণ স্বাভাবিক ক্ষমতা। কোনোদিন পড়াশুনো করেননি।’

‘সাক্ষা পায়নুটকিনের কথা শুনেছো?’

‘শুনেছি। কিন্তু সত্যিই কি রোগটা ভীষণ ছোঁয়াছে?’

‘দুরারোগ্য। ওকে একদম শেষ না-করা পর্যন্ত, এই রোগ ওকে কুরে-কুরে খাবে। ওর

নিজেরই দোষ; আমরা ওকে যেতে বারণ করেছিলাম। কার সঙ্গে মেশো, সে-বিষয়ে তো তোমাকে খুব সাবধান থাকা চাই।

‘গশকা, ওর এখন কী হবে?’

‘বড়ো ভয়ানক ব্যাপার। ও গুলি ক’রে মারতে চেয়েছিলো নিজেকে। বিচারের জন্য ওকে ডেকে পাঠানো হয়েছে, এখন ইয়েরমোলেতে চিকিৎসা হচ্ছে ওর। মনে হচ্ছে, ওকে নেবে তারা। ও বলেছিলো তার আগেই ও গিয়ে বিদ্রোহীদের সঙ্গে যোগ দেবে—“সমাজের পাপের ওপর প্রতিশোধ নেবার জন্য”।’

‘কিন্তু গশকা, এই যে ছোঁয়াচে রোগের কথা বললে, ওদের কাছে না-গেলেও তো অন্য রোগ হ’তে পারে।’

‘তুমি কী বলতে চাচ্ছে আমি বুঝতে পেরেছি। দেখে মনে হয় তোমারও ঐ রোগ আছে। কিন্তু ওটা তো সাধারণ রোগ নয়, ওটা একটা গোপন পাপ।’

‘ফের যদি এ-রকম কথা বলেছো তো আমি তোমার নাক ভোঁতা ক’রে দেবো, গশকা। বন্ধুর সঙ্গে কি এইভাবে কথা বলতে হয়? ঘিনঘিনে মিথ্যুক কাঁহাকার!’

‘একটু ঠাণ্ডা হ’য়ে নাও তো, আমি ঠাট্টা করছিলাম। তোমাকে যা বলতে চাচ্ছিলাম তা হ’লো এই। ইস্টারের পরবের সময় পাজিনস্কে গিয়েছিলাম আমি, বাইরে থেকে এক ভদ্রলোক এসেছিলেন বন্ধুতা দিতে; নৈরাজ্যবাদী, লোকটি চমৎকার। ব্যক্তিত্বের মুক্তিলাভ বিষয়ে বন্ধুতা করলেন। আমার বেশ ভালো লাগলো, খুব খাটি কথা বললেন উনি। হ্যাঁ, নৈরাজ্যবাদীদের দলেই ভিড়ে যাবো আমি, যদি না গিয়েছি তো তোর মাকে—থুড়ি! ভদ্রলোক বললেন আমাদের নাকি একটি ভেতরকার শক্তি আছে, তাকে একদিন জাগাতে হবে। তাঁর মতে যৌন ব্যাপার, চরিত্র, এই সব জিনিস নাকি জাস্তব বিদ্যুৎ-শক্তিরই প্রকাশ। কেমন লাগলো তোমার শুনে? লোকটা প্রতিভাবান। ... কিন্তু আমি দেখছি রীতিমতো চুর হ’য়ে গেছি। চারপাশে কী চ্যাচাচ্ছে লোকগুলো, কানে তাল লাগার দশা। আর সহ্য করতে পারছি না, কাজেই এবার চূপ করো তো, টেরেস্টি, চূপ করো বলছি।’

‘ঠিক আছে, কিন্তু আমাকে শুধু একটা কথা ব’লে দে গশকা। ঐ সব সোস্যালিস্ট বুলিগুলো এখনো ভালো বুঝে উঠতে পারিনি, যেমন ধর “সাবোটাজনিক”^১। কথাটা বলতে কী বোঝায়?’

‘এ-সব বিষয়ে আমাকে একজন ওস্তাদই বলা যায়, কিন্তু টেরেস্টি, আমার মাথায় মদ চ’ড়ে গেছে, কাজেই এখন আর ঘাটাস নে। যে একই দলে কাজ করে, তাকে বলে “সাবোটাজনিক”। “ভাটাগা” মানে তো দল, তাই না? কাজেই সাভোটাজনিক-এর মানে হ’লো একই ভাটাগার লোক। এবার বুঝেছো হাঁদারাম?’

‘আমিও তাই ভেবেছিলাম—কোনো-একটা খিস্তি হবে কথাটা ... তা ঐ যে বৈদ্যুতিক শক্তির কথা বলছিলে, আমিও তার কথা শুনেছি। ভাবছিলাম পিটার্সবার্গ থেকে একটা ইলেকট্রিক ল্যাণ্ডট আনতে দেবো—মাল পৌছলেই টাকা দিতে হবে—বিজ্ঞাপনে দেখেছিলাম—তাতে বলেছিলো এটা ব্যবহার করলে “বীর্ঘ বাড়ে”। কিন্তু ঠিক সেই সময় আর-একখানা বিপ্লব এসে হাজির, তাই অন্য সব বিষয় নিয়ে মাথা ঘামাতে হ’লো...’

টেরেস্টি তার কথা শেষ করলো না। টেবিলের চারপাশের মাতাল গলার চ্যাচামেচি ছাপিয়ে ভীষণ জোরে একটা বিস্ফোরণের আওয়াজ হ’লো কাছেই, একবার শব্দ ক’রেই থেমে গেলো প্রথমটা, তারপরে আবার আগের চেয়েও জোরে, আগের চেয়েও বিহুল-করা শব্দে ফেটে পড়লো। কেউ-কেউ চেয়ার ছেড়ে লাফিয়ে উঠলো, যারা সবচেয়ে কম টলছিলো এতোক্ষণ

১ Sabotrur. যে সাবোটাজ করে, বা ভেতর থেকে কারখানা, যানবাহন ইত্যাদি ধ্বংস ক’রে দেয়; আত্মবীভক। অজ্ঞাতবশত, বা নেশার ঝোঁকে, বস্তা অন্য শব্দের সঙ্গে গুলিয়ে ফেলে ভুল ব্যাখ্যা দিচ্ছে।—অনুবাদের টীকা

তারা রইলো দাঁড়িয়ে। অন্যেরা টলতে-টলতে উঠে দাঁড়বার চেষ্টা করলে, কিন্তু মুখ খুবড়ে প'ড়ে গেলো টেবিলের তলায়, সেখানেই নাক ডাকাতে শুরু ক'রে দিলে। মেয়েরা ভীত গলায় চৈচিয়ে উঠলো। এক হলুদুল ব্যাপার।

ভলাস দাঁড়িয়ে অপরাধীর সন্ধান চারপাশে তাকালো। প্রথমটায় তার মনে হয়েছিলো বোমা ফাটার আওয়াজ গ্রাম থেকে এসেছে, এমনকি হয়তো টেবিলের কাছাকাছি কোনো জায়গা থেকে। তার ঘাড়ের শিবা ফুলে উঠলো, মুখ লাল হ'য়ে গেলো, রাগি গলায় চ্যাচাতে থাকলো সে: 'আমাদের মধ্যে জুডাস কোন জন?' এই উপদ্রবটা ঘটালো কে? হাত-বোমা নিয়ে কে খেলা করছে? কেউটোকে ধরতে পাবলে নিজেব হাতে পিষে মারবো, সে যদি আমার ছেলেও হয়, তবু। নাগাবিকগণ, এ-রকম বিশ্রী ঠাট্টা আমরা সহিবো না। এক্ষুনি গ্রামের চারপাশ ঘিরে ফেলতে হবে। শয়তানটাকে খুঁজে বের করা চাই, তাকে পালাতে দেওয়া চলবে না।'

প্রথমে সবাই শুনছিলো তাব কথা, কিন্তু যখন মালি ইয়েরমোলের ডিস্টিক্ট হল থেকে কালো বগুবে ধোয়া স্তম্ভের মতো পৌঁচিয়ে আকাশে উঠতে লাগলো ধীরে-ধীরে, তাদের সকলের মনোযোগ সেদিকে আবদ্ধ হলো। সবাই একসঙ্গে দৌড়ে গেলো খাদের দিকে, কী হচ্ছে না হচ্ছে দেখবার জন্য, নদীবা ওপব দিয়ে তাকালে উপত্যকার দিকে।

হল-ঘরে আগুন লেগেছে। নির্বাচন-সভার কতিপয় কর্মচারী ও কর্নেল স্ট্রেসের সঙ্গে কয়েকজন বংকট দালান থেকে ছুটে বেরিয়ে এলো—তাদের একজনের খালি পা, আর পরনে শুধু একটা পাতলুন। অশ্বাবোহী কসাক আর অন্যান্য সামরিক কর্মচারীরা জিনের ওপর থেকে ঝুকে প'ড়ে চাবুক নাচাচ্ছে, সাপেব মতো একে-বৈকে ঘুরছে তাদের ঘোড়াগুলি, গ্রামের এ-প্রান্ত থেকে ও-প্রান্ত পর্যন্ত জোর কদমে ছুটছে তারা, কাউকে খুঁজে বেড়াচ্ছে। কুটেইনির বাস্তা ধ'রে দৌড়ে যাচ্ছে অনেকে, বিপদ সংকেত ক'রে জোরে বেজে উঠছে গির্জের ঘণ্টাগুলি।

দারুণ হুঃ হুঃবেগে পর্বিস্থিত ঘোরালো হ'য়ে উঠলো। সান্ধবেলায় কর্নেল স্ট্রেসে তাঁর কসাক অনুচরদের নিয়ে ঘোড়ায় চ'ড়ে কুটেইনিতে এলেন, যাকে খুঁজছিলেন, সে যে ইয়েরমোলেতে নেই, এ-বিষয়ে তাব যেন কোনো সন্দেহ ছিল না; কুটেইনিতে এসেই প্রথমে সৈন্যদের নিয়ে গ্রামটা ঘিরে ফেললেন, তারপর প্রত্যেকটা কুটির আর বাড়ি তন্নতন ক'রে খোঁজা হ'তে লাগলো।

রংকটদের অর্ধেকই এখন বলতে গেলে ম'রে গেছে। সংবর্ধনা-সভাতেই থেকে গিয়েছিলো তারা, এখন সবাই নাক ডাকাচ্ছে—কেউ কুকুড়ে শুয়ে আছে মাটিতে, কেউ বা টেবিলের ওপর এলিয়ে দিয়েছে মাথা। যখন জানা গেলো যে গ্রামের ভেতর সেনাবাহিনী ঢুকে পড়েছে, তখন বীতমতো অন্ধকাব হ'য়ে গেছে।

কয়েকটি ছোকরা দ্রুত পা চালিয়ে ছুটলো, তাদের মধ্যে টেরেণ্টি আর গশকাও আছে। প্রথমেই যে-গোলাবাড়িটা তাবা সামনে পেলো, তার খিড়কির উঠোন দিয়ে পথ ক'রে নিলো তারা, তাবপব এ ওব গায়ে দাফাদাফি ক'রে দেয়ালের তলার দিকের ছোট্ট ফোকরটাতে হামাগুড়ি দিয়ে ভেতরে ঢুকে গেলো। এমনিতেই অন্ধকার, তার ওপর যা হৈ-ঠে চারদিকে; গোলাবাড়িটা কার তা তারা প্রথমে খেয়াল করেনি। কিন্তু এখন মাছের আঁশটে আর প্যারাইফেনেব ভ্যাপসা গন্ধে তাবা বুঝতে পারলো যে, গ্রামের দোকানঘরের শুদোম হিসেবে যে-গোলাবাড়িটা ব্যবহার করা হয়, এটা সেটাই।

কেউ তারা কোনো দোষ করেনি, এ-ভাবে লুকিয়ে তারা বোকামি করলে; বেশিরভাগই ছুটে চ'লে এসেছে মহুর্ভেব উদ্বেজনায়, এতো ভদকা খেয়েছে যে মাথা ঠিক রাখতে পারেনি। আবার এমন কয়েকজন এদের সঙ্গে চ'লে এসেছে কর্তারা যাদের ভালো চোখে দ্যাশেন না—খরা পড়লে ওদেরই জনা দফা রফা হ'তে পারে। সেটা ভয়ের কথা। আসলে অবশ্য ঐ লোকগুলো গুণ্ডার চেয়ে খাবাপ কিছু নয়, কিন্তু বলা কি যায়: আজকাল তো সব-কিছুই রাজনৈতিক দিক

থেকে দেখা হচ্ছে। দেশের সোভিয়েট এলাকায় শুণামি হ'লো 'ক'লে' প্রতিক্রিয়া'ব লক্ষণ, আবার শাদাদেব এলাকায় ওরই নাম বলশেভিজম।

দেখা গেলো গোলাবাড়িতে শুধু তারাই আসেনি, অন্য অনেকে তাদের আগেই জুটেছে। উঠোন আর পাকা মেঝের মাঝখানের জায়গাটাতে দুই গ্রামের লোকেরাই ভিড় ক'রে আছে। কুটেইনি থেকে যারা এসেছে, তারা সবাই বন্ধ মাতাল। কেউ-কেউ নাক ডাকাচ্ছে, কেউ বা ঘুমের মধ্যে কাতরে উঠছে, কারো আবার দাঁত-দাঁত লেগে গেছে। অন্য অনেকে রীতিমতো অসুস্থ হ'য়ে পড়ছে। আলকাতরার মতো অন্ধকার, একটু হাওয়া নেই, তাব ওপর অসহ্য দুর্গন্ধ। তাদের গুপ্তস্থান যাতে বেরিয়ে না পড়ে, সেইজন্যে যাবা পাবে এসেছে তাবা আবার দেয়ালের ফাঁকটা আটকে দিয়েছে। খানিক পরে নাকডাকার আওয়াজ আর দাঁত-কপাটি থেমে গেলো, মাতালেরা শান্ত হ'য়ে ঘুমিয়ে পড়লো এবাব, সব নীরব হয়ে এলো। তাবই মাঝেই নীরবতা ভাঙলো এক কোনায় এক ফিশফিশে তীব্র স্বরে—টেবিলটি আব গশকা সেখানে ভয়ে জড়াডাডি ক'রে কঁকড়ে আছে, আর তাদের সঙ্গে আছে কসকা ব'লে বদমেজাজি ঝগড়াটে ছেলোটা, সে এসেছে ইয়েরমোলে থেকে।

‘এতো জ্বরে না,’ বলছিলো কসকা। ‘উজবুক শয়তান কাহাকাব, শেষটায় আমাদের ধবিযে দেবে দেখছি।’ স্ট্রেসেব লোকজনবো আশেপাশে ঘুরে বেড়াচ্ছে, কানে যাচ্ছে না? বাস্তাব একেবারে শেষ মাথায় গিয়েছিলো ওবা, এখন ফিবে আসছে। ই যে, এসে পড়লো। নিঃশ্বাস নিলে আমি গলা টিপে মারবো ব'লে বাখলাম। .. যাক, বেচে গেলি, ওবা চ'লে গেছে। ... এখানে আসতে কে তাদের মাথাব দিবা দিয়েছিলো শুনি? কেন তোবা লুকোতে চাচ্ছিল শুনি—উজবুক কাহাকাব। তাদের তো আঙুল দিয়েও ছোঁবে না।’

‘গশকা “লুকোও, লুকোও” ব'লে চ্যাচাচ্ছিলো, সেইজন্যেই আমি হামাগুড়ি দিয়ে এখানে ঢুকেছি।’

‘গশকার তবু লুকোবার কাবণ আছে। তাব সাবা বাড়ির লোক বিপদে পড়েছে, সন্দেহ করা হচ্ছে তাদের। খোডাটস্কোয়ের বেল-স্টেশনে তাদের আত্মীয়বা কাজ করছে, সেটা একটা জরুরি কাবণ ... এতো উশখুশনি কিসের—চুপ ক'রে বসো, উজবুক। লোকগুলো তো সব হেগে-মুতে বসি ক'রে একাকাব কাণ্ড ক'বে বসেছে—একটু নড়লেই সব নোংবা এসে আমাদের গায়ে লাগবে। ভেটকা গন্ধ নাকে আসছে না? জানো, কেন স্ট্রেসে গ্রামেব মধ্যে ছুটোছুটি করছে? বাইরেব লোক খুঁজে বেড়াচ্ছে সে। পাজিনস্ক থেকে কাবা যেন এসেছে, তাদের খুজছে।’

‘বাপারটা হ'লো কী ক'রে কসকা? এই হৈ চৈ শুরু হ'লো কী ভাবে?’

‘সান্ধাই আরম্ভ ক'রেছে—সান্ধা পায়নুটকিন। আমরা সবাই রংকট আপিশে দাঁড়িয়ে ছিলাম, উলঙ্গ দাঁড়িয়ে আছি সবাই লাইন দিয়ে, ডাক্তারের জন্য অপেক্ষা করছি। যখন সান্ধার পালা এলো, সে কিছুতেই পোশাক খুলবে না। আপিশে ঢোকাব সময়েই একটু মাতাল ছিলো। কেরানিটি নরম গলায় তাকে জামা খুলতে বললো, এমনিতেই “আপনি” বললে তাকে। সান্ধা খেঁকিয়ে উঠলো—“কিছুতেই আমি জামা খুলবো না, আমার শরীরের গোপনস্থান সবাইকে আমি দেখাতে রাজি নই।” এমন ভঙ্গি করলো যেন তার লজ্জার সীমা নেই। তারপরেই কেরানিটির কাছে গিয়ে দাঁড়ালো, সোজা চোয়ালে এক ঘৃষি বসিয়ে দিলে। আর তারপর—বললে বিশ্বাস করবে কিনা জানি না—চোখের পাতা ফেলতে-না-ফেলতে সান্ধা নুয়ে প'ড়ে পা দিয়ে আপিশের টেবিল হাঁকড়ে উন্টে ফেলে দিলে। দড়াম ক'রে টেবিলটা আছড়ে পড়লো মেঝেতে, যা-কিছু তার ওপর ছিলো—দোয়াতদান, সৈন্যদের লিস্টি সব লণ্ডভণ্ড হ'য়ে গেলো! তখন স্ট্রেসে চ্যাচাতে-চ্যাচাতে ছুটে এলো: “কোনো ষণ্ডাণ্ডগাকে আমি সহ্য করবো না।

ও-সব রক্তপাতহীন বিপ্লব চলবে না আমার সঙ্গে। সরকারি আপিশে অসম্মানকর ব্যবহার আর আইন ভাঙার মজা তোমাদের টের পাইয়ে দেবো। দলের চাই কোনটা?’

সাক্ষা গলা ফাটিয়ে চ্যাচালো: “কমরেডগণ, তোমাদের কাপড়চোপড় তুলে নাও—আমাদের হয়ে গেছে।” ব’লে জানলার কাছে গিয়ে ঘুষি মারলে। আমি আমার জামা-কাপড় তুলে নিয়ে তার পেছন-পেছন ছুটলাম, দৌড়োতে দৌড়োতেই প’রে নিলাম গায়ে। ছড়মুড় ক’রে ও নেমে এলো রাস্তায়, হাওয়ার মতো ছুটলো। আমি ছুটে গেলাম তার পেছন-পেছন, আরো দু-একজনও তাই করলে। প্রাণপণে ছুটলাম আমরা—ওরাও আমাদের পেছন-পেছন চ্যাচাতে-চ্যাচাতে ছুটে এলো। কিন্তু যদি আমাকে জিজ্ঞেস করো এতো সব গোলমাল কিসের জন্য—তাহ’লে আমি বলবো যে এর কোনো মাথামুণ্ড নেই।’

‘কিন্তু বোমার ব্যাপাবটা কী?’

‘কী মানে?’

‘মানে, বোমাটা ছুঁড়লো কে? —বোমাই তো, হাতবোমা বা ঐ জাতীয় কিছু-একটা হবে।’

‘হা-ঈশ্বর! তুমি নিশ্চয়ই বলতে চাচ্ছে না যে আমরা ঐ বোমা ছুঁড়েছি!’

‘তাহ’লে কে ছুঁড়লো?’

‘তা আমি কী ক’রে জানবো? নিশ্চয়ই অন্য কেউ ছুঁড়েছে। কেউ নিশ্চয়ই এ-সব হৈ-হৈ রৈ-রৈ দেখে মনে-মনে ভাবলে. “এই হৈ-চৈ-এর ফাঁকে আস্ত জায়গাটাকেই উড়িয়ে দেওয়া যাক—তারা হয়তো ভাববে অন্য কারো কাজ এটা।” এটা নিশ্চয়ই কোনো “রাজনৈতিক” লোকের কাজ, পাঞ্জিনিস্ক থেকে যে-সব “রাজনৈতিক” লোক এসেছে, নিশ্চয়ই তাদের কারো কাণ্ড—ও-সব লোকে তো থৈ-থৈ করছে জায়গাটা। —শ শ শ! চুপ, আর কথা না! কানে যাচ্ছে না? স্ট্রেসের লোকেরা আবার ফিরে আসছে। এবার আমরা মারা পড়লাম। চুপ করো বলছি!’

রাস্তা থেকে ক্রমশ গলার স্বর এগিয়ে এলো; জুতোর ভারি শব্দ, ঘোড়ার খুরের আওয়াজও শোনা গেলো।’

‘তর্ক কোবো না! আমাকে বোকা ঠাউরেছো নাকি?’ পিটার্সবার্গের কায়দায় নিখুঁতভাবে ধারালো, গম্ভীর গলায় কর্নেল বললেন। ‘নিশ্চয়ই কেউ কথা বলছিলো ওখানে।’

ইয়েরমোলে গ্রামের মেয়র ওটভিয়াজিস্টিন—এক বুড়ো জেলে সে—তবু তর্ক করলো:

‘আপনি ভুল শুনেছেন হুজুর। আব গ্রামের মধ্যে লোকেরা কি কথাও বলবে না? এটা তো আর কবরখানা নয়। হয়তো কথা বলছিলো কেউ, বাড়িটায় তো লোক অনেক। বাড়ি-ঘবগুলোয় তো লোকজন ঠাসা। আর মানুষ তো বোবা জানোয়ার নয়। আর নয়তো কারো ঘুমের মধ্যে শয়তান এসে ঝাঁকুনি দিচ্ছিলো।’

‘চুপ! গৈয়ো ভাঁডামি বন্ধ করো এবার! শয়তানই বটে! বারো হাত কঁাকরের তেরো হাত বাঁচি হয়ে উঠেছো তুমি, না? এমনি ঢালাক হ’তে-হ’তে বলশেভিস্কম-এর বুলি আওড়াতে শুরু করবে—এই তো?’

‘হা ভগবান! হুজুর, আপনি এ-কথা কী ক’রে বলতে পারলেন, কর্নেল সাহেব! গায়ের লোকেরা এতোই অশিক্ষিত ও নির্বোধ যে প্রার্থনা-পুস্তকও পড়তে পারে না! বলশেভিস্ক মতবাদ দিয়ে তারা করবে কী?’

‘যতোদিন না হাতে-কলমে ধরা পড়ছে, ততোদিন তোমরা সবাই তো মুখে তাই বলো। দোকানটার আগাপাশতলা খুঁজে দ্যাখো, সব জিনিসপত্র ছত্রখান, আর কাউন্টারের তলায় দেখতেও ভুলে যেয়ো না।’

‘তাই হবে, হুজুর।’

‘পাফনুটকিন, রিয়াবিখ আর নেখভালেনিখকে আমার চাই—তা সে জ্যাস্তই হোক আর

মড়াই হোক। যদি তাদের সমুদ্রের তলা থেকেও খুঁজে আনতে হয়; তবে ত্রাই করবে। সেই সঙ্গে গালুজিনের ছানাটাকেও চাই। তার বাবা যাতেই স্বদেশী বক্তৃতা দিক, তাতে আমি ভুলবো না। কথা ব'লে-ব'লে ঝাঁদরের ল্যাজ খসিয়ে দিক সে, কিন্তু না যেন ভাবে আমরা ততোক্শণ নাক ডাকাছি। কোনো দোকানদার বক্তৃতা দিয়ে ঘুরে বেড়াচ্ছে—তাব মানেই ঘোরালো কিছু আছে ভেতরে। স্বাভাবিক নয় ব্যাপারটা, তাই সন্দেহ হয়। আমরা খবর পেয়েছি যে গালুজিনেরা রাজনৈতিক অপরাধীদের লুকিয়ে রাখে, তাছাড়া পুণ্য ক্রুশে তাদের বাড়িতে বেআইনি সভাও নাকি বসে। ওর ঐ ছোঁড়াটাকে চাই আমার। ওকে নিয়ে কী কব'রা তা আমি এখনো ঠিক করিনি। কিন্তু ওর বিরুদ্ধে যদি কিছু শোনা যায় তাহ'লে আর দু-বাব না-ভেবে সোজা বুলিয়ে দেবো ওকে—অন্যদেরও তাতে শিক্ষা হবে।'

অন্বেষণকারীরা দূরে চ'লে গেলো। যখন তারা বেশ কিছুটা দূরে চ'লে গেছে, কসকা ফিশফিশ ক'রে বললে, 'শুনলে তো?'

টেরেগি তখন ভয়ে আধমরা হ'য়ে গেছে। খুব নিচু গলায় জবাব দিলো, 'শুনলাম।' তার গলা অন্য রকম শোনালো।

'এখন তাহ'লে সাক্ষা, গশকা, তোমার আর আমার জন্য শুধু একটা জায়গাই আছে, সেটা ঐ অরণ্য। বলছি না যে চিরকালই আমাদের থাকতে হবে সেখানে—তবে যতোক্শণ না ওদের মাথা ঠাণ্ডা হচ্ছে, ততোক্শণ তো বটেই। তারপরে ভেবে দেখা যাবে, হয়তো আমরা ফিরে আসতেও পাববো।'

পরিচ্ছেদ ১১

আরণ্যক ভ্রাতৃত্ব

১

ইউরি বন্দী হবার পর প্রায় দু'বছর কেটে গেছে। তার স্বাধীনতার সীমা কিছু নির্দিষ্ট নেই। কোনো দেয়াল-ঘেরা জায়গায় তাকে বন্দী ক'রে রাখা হয়নি, কেউ তাকে পাহারা দেয় না, তার চলাফেরার ওপর নজর রাখার জন্যও কোনো লোক নেই। পার্টিজানবাহিনী তো কেবলই ন'ড়ে বেড়ায়; যখন যেখান দিয়ে যায় সেখানকার স্থানীয় বাসিন্দাদের সঙ্গে কোনো দূরত্বই তারা বজায় রাখে না; বরং তাদের সঙ্গে মিশে গিয়ে নিজেদের যেন তাদের মধ্যে মিলিয়ে দেয়।

বাইরে থেকে তার এই বন্দীত্ব ও অধীনতাকে অনায়াসেই অলীক ব'লে মনে হ'তে পারে; দেখে মনে হয় আসলে সে যেন স্বাধীন মানুষ, শুধু কিছুতেই নিজের স্বাধীনতার সুযোগ নিতে পারছে না। জীবনে অনেকরকম বাধ্যবাধকতা থাকে যা স্পর্শাতীত, বাইরে থেকে দেখে যা ঠাहर করা যায় না; বরং মনে হয় এর বুঝি অস্তিত্বই নেই, এ যেন নিছক অমূল-কল্পনা, নিতান্তই মিথ্যে। কিন্তু আপাতদৃষ্টিতে যতোই কাল্পনিক মনে হোক না, হাতে-পায়ে বেড়ি না-পরালেও কিংবা কেউ তাকে পাহারা না-দিলেও ইউরিকে বাধ্য হয়েই এই পরাধীনতা মেনে নিতে হয়েছে।

তিনবার সে দল থেকে পালিয়ে যাবার চেষ্টা করেছে, কিন্তু প্রতিবারই তারা ধ'রে ফেলেছে তাকে। কোনো শাস্তি তাকে ভোগ করতে হয়নি, কিন্তু আসলে এটা যে আগুন নিয়ে খেলা এ-কথা বুঝেই আর পালাবার চেষ্টা করেনি সে।

এদিকে আবার সে দলপতির নেকনজরে পড়েছে: লিবেরিয়ুস মিকুলিংসিন তার সঙ্গ পছন্দ করে ব'লে নিজের ঠাবুতেই ঘুমোবার ব্যবস্থা করেছে তার। ইউরির মনে হয় এটা জবরদস্তি, ভারি বিরক্তিকর ঠেকে এই সঙ্গ।

২

এই সময়টুকুর মধ্যে সেনাবাহিনী কেবলই পূর্বদিকে স'রে-স'রে চলেছে। মাঝে-মাঝে এই স'রে আসাটা অগ্রগতির চেহারা নেয়, পশ্চিম সাইবেরিয়া থেকে কোলচাককে বিভাডিত করার জন্য যে-সাধারণ অভিযান চলেছিলো, এটা তখন তারই অংশ হ'য়ে ওঠে; কিন্তু অন্য সময়ে আবার শাদারা যখন দু'পাশ থেকে আক্রমণ ক'রে লাল পস্টনকে ঘিরে ফেলার ভয় দেখায়, সেই একই পূবমুখী চলা তখন পরিণত হয় পলায়নে। ইউরি দীর্ঘকাল এই ব্যাপারটার কোনো মাথামুণ্ড বুঝে উঠতে পারেনি।

যে-পথ দিয়ে তারা যাচ্ছিলো, সেটা কখনো রাজপথের সমান্তরভাবে এগিয়েছে, আবার কখনো বা তাকেই অনুসরণ করেছে। পথের দু'পাশে যে-সব গ্রাম আর ছোটো-ছোটো শহর ছিলো, তারা যুদ্ধের অবস্থা বুঝে 'শালা' কিংবা 'লাল' ব'নে যেতো। কোনো বিশেষ মুহূর্তে তারা কোন দলের অধীনে আছে, এটা তাদের চেহারা দেখে বলা খুব শক্ত ছিলো।

চাষিদের ফৌজ যখন কোনো বসতির মধ্য দিয়ে যায়, তখন সেখানকার অন্য সব-কিছুই মনে হয় অকিঞ্চিৎকর। রাস্তার দু'পাশের বাড়িগুলো যেন কুকড়ে মাটিতে নেমে আসে, আর ঘোড়া, ঘোড়সওয়ার, কামান, কাদার মধ্যে ছিটিয়ে-চলা মস্ত-মস্ত মানুষের ঠেলাঠেলি—এই সব-কিছুই বাড়িগুলোর চেয়ে লম্বা হয়ে ওঠে।

একদিন তারা যখন পাজিনস্ক ব'লে একটি ছোটো শহরে এসে তাঁবু ফেলেছে, ইউরিকে যেতে হ'লো এক ডাক্তারখানায়—সেখানে ইংলিশ থেকে আনানো ওষুধপত্র নিতে হবে; ওষুধগুলো আগে ছিলো শাদা অফিসারদের, জেনারেল কাপ্পেল ছিলেন তাদের নেতা; এখন কৃষকবাহিনী তা যুদ্ধজয়ের পুরস্কার হিসেবে কেড়ে নিয়েছে।

বিবর্ণ, বৃষ্টিমাখা এক বিকেলবেলা—মাত্র দুটি রঙের সমাবেশ ঘটেছে তাতে; যেখানে আলো পড়েছে, শুধু সেই জায়গাটুকু শাদা, বাকি সমস্ত অংশ কালো। ইউরির মেজাজও ছিলো তেমনি বিবর্ণ—একেবারে কঠিনরকম সরল, রঙের কোনো ক্ষতি তাকে কোমল ক'রে দিচ্ছে না।

সেনাবাহিনীর যাওয়া-আসার ফলে রাস্তাটা একেবারে নষ্ট হয়ে গেছে—কালো কাদার নদী হাড়া আর-কিছুই একে বলা যায় না এখন। মাত্র কয়েকটা জায়গায় হেঁটে পেরোনো যায়, আর স-সব জায়গায় পৌছতে হ'লে কয়েকশো গজ ধ'রে বাড়িগুলোর গায়ে গা লাগিয়ে চলতে হবে। ঠিক এমনি অবস্থাতেই পেলাগিয়া টিয়াগুনোভার সঙ্গে ইউরির দেখা হ'লো; তিন বছর আগে মস্কো থেকে আসার সময় ট্রেনে তার সঙ্গী ছিলো সে।

পেলাগিয়াই তাকে প্রথম চিনতে পারলে। রাস্তার ওপার থেকে—খালের ওপার থেকে বললেই ঠিক হয়—ঐ যে স্ত্রীলোকটি তার দিকে তাকিয়ে আছে, তাকে চিনে উঠতে বেশ কয়েক মিনিট সময় লাগলো ইউরির। স্ত্রীলোকটির মুখের ভাব এই বকম যে ইউরি তাকে চিনতে পারলেই আলাপ করবে, আর না হ'লে পরিচয় দেবে না।

অবশেষে তাকে মনে পড়লো ইউরির, সেই সঙ্গে তার মনে ভিড় ক'রে এলো ঠাশাঠাশি করা ট্রেনের মালগাড়ির ছবি, জোর ক'রে ধ'রে-আনা মজুর আর তাদের পাহারাগুলারা, আর সেই স্ত্রীলোকটি যার কাঁধের ওপর ছিলো ভাঁজ-করা চাদর—সঙ্গে-সঙ্গে নিজের স্ত্রী-পুত্রের চেহারাও ক্লিক দিয়ে গেলো তার মনের মধ্যে। সেই ভ্রমণের ঝুটিনাটি ঘটনা তীক্ষ্ণ হয়ে ফিরে এলো তার স্মৃতিতে, এলো তার প্রিয়জনদের মুখ, যাদের অভাব আর যেন সে সইতে পারছে না।

মাথা নেড়ে সে পেলাগিয়াকে ইঙ্গিত করলে রাস্তা ধ'রে এগিয়ে যেতে—সেই যেখানে পা ফেলার জন্য পাথর পাতা আছে; তারপর সেখানে হেঁটে গিয়ে, রাস্তা পেরিয়ে, তাকে সম্ভাষণ করলে।

গত দু'বছরের অনেক খবরই পেলাগিয়া বললো তাকে। সেই ভাসিয়া ব'লে ছেলোটা, সুন্দর সরল মুখ যার, যাকে অন্যায়ভাবে জোর ক'রে মজুরির জন্য ধ'রে আনা হয়েছিলো, ইউরিদের কামরাতেই যে উঠেছিলো, তার কথা পেলাগিয়া তাকে মনে করিয়ে দিলে। ছেলোটার গ্রামে, ভেরেটেন্সিকিতে, তার মায়ের সঙ্গে কিছুকাল থেকেছিলো পেলাগিয়া, কিন্তু বেশিদিন থাকতে পারেনি, গায়ের লোকেরা তাকে বাইরের লোক ব'লে ভাবতো। শেষটায় তার নামে মিথ্যে অভিযোগ আনলে তারা, সে নাকি ভাসিয়ার সঙ্গে প্রেম করছে, আর তার ফলে তাকে ঐ গ্রাম ছেড়ে চ'লে যেতে হ'লো, নয়তো তাকে হয়তো ঝুঁচিয়ে-ঝুঁচিয়ে মেরেই ফেলতো ওরা। তারপর সে গিয়ে আশ্রয় নেয় পুণ্য ক্রুশ শহরে, তার বিবাহিতা বোন অল্গা গালুজিনার কাছে। শেষে, পিটুলিয়েভকে নাকি আশেপাশে দেখা গেছে, এই গুজব শুনে সে পাজিনস্ক-এ চ'লে এলো। গুজবটা যে মিথ্যে তা প্রমাণ হ'তে দেরি হ'লো না, খুদে শহরে একেবারে অসহায় হয়ে পড়লো সে, কিন্তু পরে একটা কাজ জুটে গেলো।

ইতিমধ্যে দুর্ভাগ্য তার বন্ধুদেরও ধ'রে ফেলেছে। খাবার সরবরাহ বন্ধ করেছে ব'লে ভেরেটেন্সিকি গ্রামের ওপর জুলুম ক'রে শোধ তুললে ওরা। শোনা গেলো ভাসিয়াদের বাড়ি

পুড়ে গেছে, আর তার বাড়ির কে যেন মারাও গেছে তাতে। ওদিকে পুষ্ট ক্রুশে পেলাগিয়ার ভয়ীপতি ভ্লাস গালুজিনের কোনো খবর নেই—হয় তাকে জেলে পুরেছে, নয় মেরেছে গুলি করে—কোনটা যে ঠিক, তা কেউ নিশ্চিত জানে না, আর তার বোনপোটিও অদৃশ্য হয়েছে। তার বোনের কিছুকাল আহার জোটেনি, এখন এক চাষি পরিবারে ঝিয়ের কাজ নিয়েছে, ওরা আবার তাদের আত্মীয় হয়।

ঘটনাচক্রে পেলাগিয়া বাসন ধোয়ার কাজ করছে—সেই ওষুধের দোকানেই, যেখানে ইউরিকে এক্ষুনি মাল বুঝে নিতে হবে। দোকানের সব কর্মচারী, পেলাগিয়া নিজেও, এর ফলে বেকার হ'য়ে পড়বে, কিন্তু এটা ঠেকাবার কোনো ক্ষমতাই ইউরির ছিলো না। সে যখন ওষুধপত্রের দায়িত্ব বুঝে নিলো পেলাগিয়া তার পাশেই দাঁড়িয়ে ছিলো।

ইউরির জন্য ঠেলাগাড়ি এসেছিলো দোকানের পেছনে। বস্তা-বস্তা মাল, কাঠের বাস, শিশি-বোতল, বেতের বুড়িতে প্যাক করা ওষুধপত্র—সব নিয়ে আসা হ'লো বাইরে।

লোকজনদের সঙ্গে-সঙ্গে, দোকানির রোগা, ঘোয়া ঘোড়াটিও আস্তাবল থেকে কাতর চোখে এই মাল সরাবার দৃশ্যের দিকে তাকিয়ে রইলো। বৃষ্টিভেজা বেলা প'ড়ে এসেছে তখন, আকাশ একটু পরিষ্কার হয়েছে। মেঘের আড়াল থেকে অন্ত-সূর্য উকি দিলো, উঠোনের এদিকে-ওদিকে ছিটকে পড়লো তার গাঢ় ব্রোঞ্জ রঙের রশ্মি, ঘোড়ার তরল মলের ওপর দিয়ে পিছলে-পিছলে স'রে যেতে লাগলো। সেই তরল বিষ্ঠা এতো ভারি যে হাওয়া তাদের নড়াতে পারছে না। কিন্তু রাস্তায় বৃষ্টির জলে ঢেউ দিলো, জ্ব'লে উঠলো সিঁদুরের মতো।

সেনাবাহিনী রাস্তা দিয়ে চলাফেরা করছে, কেউ হেঁটে, কেউ বা ঘোড়ায় চ'ড়ে। যে-সব ওষুধপত্র জোর করে কেড়ে নেওয়া হ'লো তার মধ্যে পাওয়া গেলো এক বৈয়ম-ভর্তি কোকেন; এ নেশায় পার্টিজান-সর্দার সম্প্রতি আসক্ত হ'য়ে পড়েছিলেন।

৩

শীতের সময় টাইফাস, গ্রীষ্মকালে আমাশা, তার ওপর আবার পুরোদমে লড়াই চলছে ব'লে আহতের সংখ্যাও বেড়ে চলেছে; কাজের চাপে ইউরি হাঁপ ছাড়তে পারে না।

মাঝে-মাঝে পেছোতে হয়, নানা রকম ক্ষতি মেনে নিতে হয়, কিন্তু তা সত্ত্বেও পার্টিজানদের সৈন্যসংখ্যা ফেঁপেই চলেছে ক্রমশ, যখনই যে-বসতির মধ্য দিয়ে যায়, তখনই নতুন অনেক বিদ্রোহী দলে যোগ দেয়, তার ওপর শত্রু-শিবির পরিত্যাগ করে আসা সৈন্যেরা তো আছেই। এই বাহিনীর সঙ্গে ইউরি যে-আঠারো মাস কাটিয়েছে তার মধ্যেই তার আয়তন দশগুণ বেড়ে গিয়েছে, পুণ্য ক্রুশের সভায় লিবারিয়ুস একবার জাঁক করে যা বলেছিলো, সত্যিই এখন সৈন্যসংখ্যা সেখানেই পৌঁছেছে।

নতুন, কিন্তু অভিজ্ঞ, কয়েকজন আদালি নিযুক্ত হয়েছে ইউরির, তাছাড়া আছে দু'জন প্রধান সহকারী, দু'জনেই প্রাক্তন যুদ্ধবন্দী—একজনের নাম কেরেমি লায়েস, হাঙ্গেরীয় কম্যুনিষ্ট সে, অস্ট্রিয়ান সেনাবাহিনীতে ডাক্তার ছিলো, আরেকজন জাতিতে ক্রোয়াট, আঞ্জেলার তাঁর নাম, ডাক্তার হিসেবে কিছুটা হাতে-কলমে শিক্ষা করেছে। কেরেমি লায়েসের সঙ্গে ইউরি জার্মান ভাষায় কথা বলে; আঞ্জেলার কিছুটা রুশ বোঝে।

সেনাবাহিনীর কোনো ডাক্তার যুদ্ধক্ষেত্রের ক্রিয়াকলাপে অংশ নিতে পারবে না—এই হ'লো আন্তর্জাতিক রেডক্রসের নিয়ম। একবার কিন্তু, ইউরী এই নিয়ম ভাঙতে বাধ্য হয়েছিলো। সে তখন যুদ্ধক্ষেত্রে ছিলো, হঠাৎ আক্রমণ শুরু হ'য়ে যাওয়ায় তাকেও সৈন্যদের ভাগ্যের অংশ নিতে হয়।

সে ছিলো এক বনের ধারে ফ্রন্ট-লাইনে, শত্রুপক্ষের গুলিগোলা ঠিক সেখানে এসে পড়ছে। গুলি শুরু হ'তেই সে মাটিতে শুয়ে পড়লো, তার পাশে ছিলো বাহিনীর টেলিফোন-অপারেটর। তাদের পেছনে বন, সামনে মাঠ, আর এই খোলা, অরক্ষিত মাঠের ওপর দিয়েই শাদারা আক্রমণ চালাচ্ছে।

শাদারা এতো কাছে এসে পড়েছে যে ইউরী তাদের মুখ পর্যন্ত দেখতে পাচ্ছিলো। সবাই ছেলেমানুষ, রাজধানীর অসামরিক পরিবার থেকে স্বৈচ্ছাসেবক হিসেবে সদ্য এসে যোগ দিয়েছে; বয়সে যারা কিছু বড়ো তারা এর আগে রিজার্ভ-ফোর্সে ছিলো। যুদ্ধের ধরনটা ঠিক ক'রে দিচ্ছে ছোকরারাই—কেউ তারা বিশ্ববিদ্যালয়ের প্রথম বার্ষিক শ্রেণীর ছাত্র, কেউ বা স্কুলের সব চেয়ে উচু ক্লাশে পড়ছিলো।

ইউরীর চেনা কেউই ছিলো না, তবু তাদের অনেককেই তার চেনা মনে হ'লো। কয়েকজনকে দেখে মনে প'ড়ে গেলো তার স্কুলের সহপাঠীদের কথা—তাদেরই ছোটো ভাই নয় তো এরা? —অন্যদের তার মনে হ'লো যেন দেখেছে কোনো থিয়েটারে গিয়ে, বা বহুকাল আগে কোনোদিন কোনো রাস্তায়। তাদের মুখ-চোখের ভাষা তাকে আকর্ষণ করলো—আপন লোক ব'লে মনে হ'লো তাদের, স্বজন যেন, তারই মতো।

তারা ভাবছে যে তারা কর্তব্যের আহ্বানে সাড়া দিচ্ছে, তাই তাদের এই আনন্দময় দুঃসাহস, যেমন তা নিষ্প্রয়োজন, তেমনি তা বিপদে ভরা। অনেকখানি জায়গা জুড়ে ছড়িয়ে প'ড়ে এগিয়ে আসছিলো তারা, সেপাইরা যে-ভাবে কুচকাওয়াজের মাঠে তৎপরতা দেখায়, ঠিক তার চেয়েও সোজা একরোখা ভঙ্গি তাদের, মাথা তুলে হেঁটে আসছে, দৌড়োচ্ছে না, মাটিতেও শুয়ে পড়ছে না, অথচ মাঠটা অসমতল ছিলো ব'লে অনায়াসেই তারা সেখানে গা-ঢাকা দিতে পারতো। পাটিজ্ঞানদের গুলি তাদের একেবারে নিড়িয়ে দিচ্ছে।

খোলা, বিস্তৃত মাঠের মধ্যখানে একটা মরা গাছ দাঁড়িয়ে ছিলো, বাজ-পড়া পোড়া গাছ, অগুনে ঝলসানো, আর নয়তো এখানে যুদ্ধ হয়েছিলো, তার গোলার আগুন কি বোমার টুকরো গাছটাকে দখল করেছে। এগিয়ে-আসা শাদাদের মধ্যে প্রত্যেকেই গাছটার দিকে তাকাচ্ছিলো, প্রত্যেকেরই লোভ হচ্ছিলো ওটার পেছনে দাঁড়িয়ে ঠিকমতো তাক করে, কিন্তু সেই লোভ ঝেড়ে ফেলে দিয়ে তারপরেই আবার সামনে এগিয়ে আসছিলো তারা।

পাটিজ্ঞানদের গোলাবারুদ খুব বেশি ছিলো না, তার ওপর এক আঞ্চলিক চুক্তি অনুসারে স্পষ্ট নির্দেশ ছিলো যে কখনো কোনো বৃহৎ বাহিনীকে যেন আক্রমণ করা না হয়, গুলিতেও যেন দূরের পাল্লা চেঁটা না করে।

ইউরীর হাতে রাইফেল ছিলো না; ঘাসের ওপর শুয়ে-শুয়ে যুদ্ধের গতি লক্ষ্য করছিলো সে। তার সব সহানুভূতি ছিলো সেই দুঃসাহসী ছেলেমানুষদের দিকে, বীরের মতো প্রাণ দিচ্ছিলো যারা। সর্বান্তঃকরণে তাদেরই জয় কামনা করছিলো ইউরী। এরা তো সেই সব পরিবার থেকেই এসেছে, যারা হয়তো মনের দিক থেকে তারই আত্মীয়—শিক্ষা, নীতিচৈতন্য, মূল্যবোধ—সব দিক দিয়েই তারা হয়তো তার নিকটবর্তী।

মাঠের মধ্যে ছুটে গিয়ে তাদের হাতে আত্মসমর্পণ করলে কেমন হয়? একটা মুক্তির উপায় তো এটা। কিন্তু না—থাক, বহু বিপদ এতে।

দু'হাত মাথার ওপর দিয়ে তুলে সে যখন ছুটে থাকবে, তখন হয়তো দু'দিক থেকেই গুলি এসে লাগবে তার গায়ে, বুকে-পিঠে গুলি খেয়ে প'ড়ে যাবে সে, পাটিজানরা তাকে দেবে অব্যাহতার শাস্তি, আর শাদারা ভুল বুঝে তাকে মারবে। এই ধরনের পরিস্থিতি তার জানা আছে, আগেও সে এরকম অবস্থা পড়েছিলো, এই ভাবে পালিয়ে যাবার সম্ভাবনাই সে তমতম ক'রে তলিয়ে দেখে শেষটায় নিরর্থক ব'লে ত্যাগ করতে বাধ্য হয়েছে। কাজেই তার এই দ্বিধাবিভক্ত মনোভাব নিয়ে খোলা মাঠের দিকে মুখ ক'রে সে ঘাসের ওপর উপুড় হ'য়ে শুয়ে থাকলো, নিরস্ত্র অবস্থায় লক্ষ্য করতে লাগলো যুদ্ধের গতি কোনদিকে।

কিন্তু চারদিকে যখন মরণাঙ্কিত যুদ্ধ চলছে তখন নিষ্ক্রিয়ভাবে তাকিয়ে-তাকিয়ে দেখা অসম্ভব, তা মানুষের সহশক্তির বাইরে। যাদের হাতে সে বন্দী হ'য়ে আছে তাদের প্রতি আনুগত্যের প্রশ্ন নয়, নিজের প্রাণ বাঁচানোর কথাও নয়; কথটা হচ্ছে—এই ঘটনাগুলির বিধান সে মেনে নেবে কিনা, তার চোখের সামনে যা হ'য়ে যাচ্ছে তার রীতিনীতি এড়িয়ে চলতে কি পারে সে? না, বাইরে প'ড়ে থাকার নিয়ম নেই, সকলে যা করছে তোমাকেও তা-ই করতে হবে। গুলি করা হচ্ছে তাকে ও তার সহকর্মীদের লক্ষ্য ক'রে। তাকেও তাই গুলি করতে হবেই।

তাই তার পাশে টেলিফোন-অপারেটরটি যখন কাতরে কৈশে উঠে নিষ্পন্দ হ'লো, ইউরির গুডি মেরে তার কাছে গিয়ে খুঁজা নিলো কার্ভুজ-আঁটা কোমরবন্ধ আর রাইফেল, তারপর নিজের জায়গায় ফিরে গিয়ে গুলির পর গুলি চালাতে শুরু ক'রে দিলো।

কিন্তু ঐ ছোকরাদের দিকে তাক করতে করুণা তাকে বাধা দিলে। তাদের গুণে যে মুগ্ধ সে। অথচ ফাঁকা গুলি বড্ড বোকামি হবে: তাই সে পোড়া মরা গাছটাকে লক্ষ্য ক'রে গুলি ছুঁড়তে লাগলো—বেছে-বেছে শুধু সে-সব মুহূর্তেই, যখন তার তাকের সামনে মানুষগুলিকে দেখা গেলো না। এই রকমই সে করেছে বার-বার, এবারও তা-ই করলে।

ভালো ক'রে দেখে-শুনে, আস্তে-আস্তে লক্ষ্য স্থির ক'রে সে ধীরে চাপ দেয় বন্দুকের ঘোড়ায়, তাও পুরো চাপ দেয় না, যেন আসলে গুলি ছোঁড়ার ইচ্ছে নেই তার, যেন শেষটায় নিজে থেকেই আচমকা গুলি ছুটে যায়, আর এমনি ক'রেই তার পুরোনো অভ্যেস অনুযায়ী নির্ভুলভাবে মরা গাছের নিচের ডালপালাগুলো লক্ষ্য ক'রে গুলি চালাতে লাগলো সে, বন্দুকের গুলি দিয়েই ডালপালাগুলোকে ছিড়ে-ছিড়ে চারপাশে ছড়িয়ে দিতে লাগলো।

কিন্তু কী সর্বনাশ!—যতোই সে সাবধান হোক, কাউকে আঘাত করা যতোই অনভিপ্রেত হোক তার, মাঝে-মাঝেই সংকটের মুহূর্তে তার বন্দুকের সামনে কোনো না-কোনো ছোকরা এসে দাঁড়িয়ে যায়। দু'জন আহত হ'লো তার গুলিতে, আর - একজন গাছটার সামনে এমনভাবে প'ড়ে গেলো যে মনে হ'লো বেঁচে নেই।

অবশেষে শাদাদের কমাণ্ডার বুঝলেন যে আক্রমণ নিষ্ফল। তখন পশ্চাদপসরণের ছকুম হ'লো।

পাটিজানরা সংখ্যায় অল্প। মূল বাহিনীর এক অংশ অন্য দিকে কুচকাওয়াজ ক'রে চলে যাচ্ছিলো, আর-এক অংশ কিছু দূরেই শত্রুপক্ষের এক বৃহৎ দলকে আক্রমণ ক'রে বসেছে। নিজেদের দুর্বলতা ফাঁশ ক'রে দিতে চায় না তারা, তাই শাদাদের পেছন-পেছন আর ধাওয়া করলো না।

বনের মধ্যে, যেখানটায় ফাঁকা, সেখানে ইউরির সহকারী আঞ্জেলার তার সঙ্গে যোগ দিলে, দু'জন আদালি স্ট্রিচার ব'য়ে নিয়ে এলো। আঞ্জেলারকে আহতদের দেখাশোনা করতে ব'লে ইউরির ঝুঁকে পড়লো টেলিফোন-চালকের ওপব, ক্ষীণ আশা, হয়তো এখনো নিঃশ্বাস পড়ছে লোকটার, হয়তো এখনো তাকে বাঁচানো যাবে। কিন্তু জামা খুলে বুকে কান পেতে সে বুঝলো যে তার হৃৎপিণ্ড নিষ্পন্দ।

মতদেহের গলায় রেশমি সুতো দিয়ে একটি কবচ বাঁধা ছিলো। ইউরির খুলে নিলো সেটা।

জীর্ণ, ভাঁজে-ভাঁজে ছিঁড়ে-যাওয়া এক টুকরো কাগজ ছিলো কবচের মধ্যে, একটুখানি কাপড়ের সঙ্গে শেলাই-করা।

ভাঁজ খুললো ইউরি, তার আঙুলের চাপে কাগজটা প্রায় ছিঁড়ে গেলো; তাতে নবতিতম স্তোত্র^১ থেকে উদ্ধৃতি তোলা; কোনো-কোনো শব্দ মূল স্তোত্রে নেই—লোকের মুখে বহুবার আবৃত্ত হ'তে-হতে বদলে গেছে, সব জনপ্রিয় প্রার্থনারই এ-দশা হয়, ক্রমশ মূল থেকে স'রে আসতে থাকে। ধর্মীয় শ্লাঘা ভাষা রুশ অক্ষরে অনুলিখিত হয়েছে।

স্তোত্রের বাণী: 'বাচো, পরমের সহযোগিতায়'—তা পরিণত হয়েছে শিরোনামায়: 'জীবন সহযোগ'। 'এমন কিছু যেন না থাকে তোমার যাতে দিবালোকে ধাবমান বাণে ভীত হ'তে হয়'—এই শ্লোকের বদলে লেখা আছে উৎসাহের কথা, 'ধাবমান যুদ্ধের বাণে তোমার ভয় নেই'। স্তোত্র যেখানে বলছেন, 'আমার নাম তার অঙ্গীকৃত,' সেখানে কাগজটিতে লেখা আছে, 'আমার নাম পরিণাম,' আর—'দুর্দশায় তার পার্শ্বে আমি আছি, তাকে এনে দিতে...' এর বদলে আছে—'অচিরে রাত্রির অন্তরে তার সঙ্গে।'।

এই শ্লোকের অলৌকিক ক্ষমতা আছে ব'লে লোকের বিশ্বাস, এটা নাকি গুলির হাত থেকে বাঁচাতে পারে। শেষ সাম্রাজ্যবাদী যুদ্ধের সময় সৈন্যরা রক্ষাকবচ হিসেবে এটা গলায় প'রে নিতো। কয়েক দশক পরে বন্দীরা এটা তাদের পোশাকে সেলাই ক'রে নিয়েছে, রাত্রে যখন তাদের জেরা করার জন্য ডেকে নিয়ে যাওয়া হ'তো তখন জেলে ব'সে তারা এই কথাগুলোই আউড়ে যেতো বার-বার।

টেলিফোন-চালককে ত্যাগ করে ইউরি চ'লে এলো খোলা মাঠে, শাদা রক্ষীদলের যে-ছোকরাটিকে সে বধ করেছে, তাকে দেখতে। ছেলেটির সুন্দর মুখে সরলতা আর ক্ষমাসুন্দর বেদনার আভাস। 'কেন একে মারলাম আমি?' ভাবলো ইউরি।

ছেলেটির কোটের বোতাম খুলে ফেললো সে। কার সতর্ক হাত যেন—বোধ হয় তার মার—কোটের লাইনিং-এ টানা হাতে সুন্দরভাবে তার নাম আর পদবি সুতোয় তুলে দিয়েছে—সেরিওজ্জা রাষ্ট্রসেভিচ। সেরিওজ্জার শার্টের বুক খুলতেই চেনে ঝোলানো একটা ক্রশ বেরিয়ে এলো, সেই সঙ্গে পাওয়া গেলো একটি লকেট, আর ছোট্ট চ্যাপটা একটি সোনার বাস্ম, অনেকটা নসিাদানির মতো, এমনভাবে টোল-খাওয়া যেন কেউ পেরেক টুকেছে। ভেতর থেকে একটা কাগজ প'ড়ে গেলো। ইউরি ভাঁজ খুলে নিজের চোখকে যেন বিশ্বাস করতে পারলে না। সেই একই নবতিতম স্তোত্র, কিন্তু এবার তার পুরো এবং অবিকৃত শ্লাঘা উদ্ধৃতিই বজায় রাখা হয়েছে।

এমন সময়ে সেরিওজ্জা কঁকিয়ে ন'ড়ে উঠলো। সে বেঁচে আছে।

পরে জানা গিয়েছিলো যে ভেতরে সামান্য একটু আঘাত লাগায় সে অজ্ঞান হ'য়ে প'ড়ে গিয়েছিলো। তার মায়ের কবচে লেগে গুলি ফিরে গিয়েছিলো। এটাই তাকে বাঁচিয়েছে।—কিন্তু এখন এই অচেতন লোকটিকে নিয়ে কী করা যায়?

সময় এমন, যখন বর্বরতা চরমে উঠেছে, বন্দীরা কেউই জীবন্ত অবস্থায় শিবিরে ফিরে আসে না, আহত শত্রুদের তখন-তখনই ছুরি মেরে শেষ ক'রে দেওয়া হয়।

অবশ্য অবস্থাটা এখন অস্থির—শত্রুপক্ষের লোক অনবরত পার্টিজান-দলে যোগ দিচ্ছে, আবার অনেকে চ'লে যাচ্ছে দলত্যাগ ক'রে, তাই যদি নীরস্ত্র গোপনতা অবলম্বন করা যায়, তাহ'লে রাষ্ট্রসেভিচকে হয়তো সম্প্রতি-যোগ-দেওয়া কোনো সৈন্য হিসেবে চালিয়ে দেওয়া সম্ভব হতে পারে।

^১ বাইবেলের যেটা গ্রামাণ্য ইংরেজি সংস্করণ, তাতে এই স্তোত্র হ'লো একনবতিতম, উপরোক্ত উদ্ধৃতি দুয়াই (Douai) সংস্করণ থেকে গৃহীত হয়েছে, সেটা রুশ সংস্করণের নিকটতর।

আঞ্জেলারকে সব খুলে বললো ইউরি; তারপর তার সাহায্যে মৃত টেলিফোন-চালকের পোশাক খুলে এনে ছেলোটিকে পরিয়ে দিলে।

আঞ্জেলার আর সে—দু'জনে মিলে সেরিওজাকে শুশ্রূষা ক'রে বাঁচিয়ে তুললো। কোলচাকের বাহিনীতে ফিরে গিয়ে লালদের সঙ্গে লড়াই করতে চায় সে—এই তথ্য সেরিওজা যদিও তাদের কাছে গোপন রাখেনি, তবু সম্পূর্ণ সেরে উঠলে তাকে তারা ছেড়ে দিলে।

৫

হেমন্তকালে পাটিজানেরা 'শেয়াল ঝোপে' আশ্রয় নিলো। জঙ্গলে ভরা পাহাড়, তার তিন দিক দিয়ে ছুটে চলেছে এক প্রখর জলস্রোত—ফেনা তুলে তীরের মধ্যে কামড় দিচ্ছে।

গত শীতকালটা শাদারা কাটিয়েছিলো এখানে। আশেপাশের গ্রামবাসীদের সাহায্যে তারা এখানে গর্ত খুঁড়েছিলো। তাদের অস্থায়ী কেন্দ্রগুলোকে খবংস না-ক'রেই বসন্তকালে তারা চলে যায়। এখন তাদের তৈরি পরিখা আর যোগাযোগের খাত ব্যবহার করছে পাটিজানেরা।

লিবেরিয়ুস মিকুলিংসিনের সঙ্গে ইউরি একটা ট্রেন্স ভাগাভাগি ক'রে নিয়েছিলো; গত দু'রাত ধ'রে লিবেরিয়ুস একটানা বকবক ক'রে তাকে এতো জ্বালিয়েছে যে সে ঘুমোতে পর্যন্ত পারেনি।

'আমি শুধু অবাক হ'য়ে ভাবি আমার সম্মানিত বাবামশাই, আমার মহামান্য বাবামশাই এ-মুহুর্তে কী করছেন।'

'ঈশ্বর! এই কুৎসিত ভাঁড়ামো আর সহ্য হয় না!' মনে-মনে দীর্ঘশ্বাস ফেললো ইউরি। 'লোকটা ঠিক তার বাবার মতো—যেন তারই প্রতিমূর্তি।'

'আপনার সঙ্গে আগে যে-কথা হয়েছে তাতে বুঝছি আপনি তাঁকে ভালো ক'রে চেনেন। তাঁর সম্বন্ধে আপনার যে-ধারণা, তা প্রতিকূল নয় বলেই মনে হয়। আচ্ছা বলুন তো, এ-বিষয়ে আপনার বক্তব্য কী?'

'লিবেরিয়ুস আভেরসিএভিচ, কাল আমাদের প্রাক-নির্বাচনী সভা আছে। তারপরে আবার যে-সব আদালি ভদকা চোলাই করেছিলো তাদের বিচার শুরু হবে—লায়েসকে আর আমাকে তাদের জবানবন্দি খুঁটিয়ে দেখতে হবে—তাও এখনো বাকি রয়ে গেছে। আর পর-পর দু'রাত আমি একফোটা ঘুমোইনি। এই আলোচনা কি স্থগিত রাখা যায় না? আমি বড়ো ক্লান্ত।'

'তা হোক, শুধু এ-কথাটা বলুন আমার বড়ো বাবার বিষয়ে আপনার কী ধারণা।'

'প্রথম যে-কথা বলবো তা এই: আপনার বাবা এখনো রীতিমতো তরুণ আছেন। জানি না কেন সব সময়েই তার বিষয়ে এ-ভাবে কথা বলেন আপনি। আচ্ছা, ঠিক আছে, আমি খুলে বলছি আপনাকে। অনেকবার তো বলেছি যে আপনাদের এই সমাজতন্ত্রী মতবাদের বিভিন্ন মাত্রা আর ধরন বিষয়ে বিশেষ কিছু আমি জানি না। বলশেভিক আর অন্যান্য সমাজতন্ত্রীদের মধ্যে কতটা তফাৎ তা বুঝতে পারি না আমি। রাশিয়ার বর্তমান বিশৃঙ্খলা ও গোলযোগের জন্য যারা দায়ী, আপনার বাবা তাদেরই একজন। বিপ্লব, বিদ্রোহ—এই সব ব্যাপার তাঁর বেশ আসে, রীতিমতো বিপ্লবী চরিত্র বলা যায়। আপনার মতো তিনিও রুশ জীবনের উত্তেজনার প্রতিনিধি।'

'এটা কি প্রশংসা, না নিন্দা?'

'আর-একবার আমি আপনাকে অনুনয় করছি, এই আলোচনা আপাতত মূলত্ববিধা—পরে সুবিধেমতো কথা বলা যাবে। তাছাড়া অন্য একটা বিষয়ে আপনার দৃষ্টি আকর্ষণ করতে বাধ্য হচ্ছি: আপনি বড় বেশি কোকেন খাচ্ছেন।

আমার হাতে যে-জিনিস গচ্ছিত রয়েছে, আপনি তা নিঃশেষ ক'রে দিচ্ছেন সজ্ঞানে। জিনিসটা যে বিষ সে-কথা ছেড়েই দিন, আমি আপনার স্বাস্থ্যের জন্য দায়ী তাও না-হয় ভুলে

থাকা গেলো। কিন্তু আপনি তো ভালোই জানেন যে কোকেন অন্য অনেক কাজের জন্য প্রয়োজনীয়?’

‘আপনি কাল রাতে শিক্ষাচক্রে যাননি। আপনার সমাজচেতনা নিঃসাড় —ঠিক কোনো নিরঙ্কর চাষি-বৌ বা কোনো অচিকিৎসা বুর্জোয়ার মতো। অথচ আপনি একজন ডাক্তার, বিস্তর পড়াশুনো করেছেন, তার ওপর নাকি লেখেনও শুনেছি। এর ব্যাখ্যা আপনার মুখে শুনেতে চাই।’

‘ব্যাখ্যা কিছু নেই। আমি বড্ড বোকা বোধহয়, অন্তত তা-ই মনে হয় আমার। আমার আর কিছু হবে না। আমাকে আপনি করুণা করতে পারেন।’

‘রাখুন আপনার ছদ্মবিনয়। যদি এই ঠাট্টার সুর ছেড়ে দিয়ে আপনি একবার কষ্ট ক’রে জেনে নিতেন আমাদের শিক্ষাচক্রে আমরা কী করছি, তাহ’লে হয়তো আপনার এই দেমাক আর টিকতো না।’

‘হা ঈশ্বর। শুনুন, লিবারিয়স আভেরসিএভিচ, আমি একটুও জাঁক করছি না। শিক্ষার জন্য আপনারা যা করছেন তার প্রতি গভীরতম শ্রদ্ধা আছে আমার। আপনার ক্লাশের নোটগুলি আমি প’ড়ে দেখেছি। আমি জানি সৈন্যদের নৈতিক উন্নয়ন বিষয়ে আপনার কী ধারণা—চমৎকার সেগুলো। সহকর্মী, দুর্বল, অসহায়, স্ত্রীলোক, এবং আত্মসম্মান ও শুচিতার প্রতি সৈন্যদের মনোভাব কী হওয়া উচিত, সে-বিষয়ে আপনারা যা বলেন তা তো প্রায় ডুখোবরদের^১ উপদেশের মতো। ও-ধরনের টলস্টয়বাদ আমার মুখস্থ আছে। বয়ঃসন্ধির সময় আমারও আকাঙ্ক্ষা ছিলো সেই উন্নত জীবনের জন্য। এ নিয়ে আমি বিভ্রূণ করবো তা কি সম্ভব?’

‘কিন্তু, প্রথম কথা অক্টোবর-বিল্লবের পর থেকে সামাজিক উন্নয়ন বলতে যা বোঝায়, তাতে আমি ঠিক উৎসাহ পাই না। দ্বিতীয় কথা, তাকে কাজে খাটানো দূরে যাক তা নিয়ে নেহাৎ কথা বলতে গিয়েই যে-পরিমাণ রক্তের নদী ব’য়ে গেছে, তা দেখে আমার কিছুতেই বিশ্বাস হচ্ছে না যে উদ্দেশ্য সাধু হ’লেই যে-কোনো উপায় সমর্থনযোগ্য। আর শেষ কথা যেটা—আসলে এটাই সবচেয়ে জরুরি—যখনই আমি শুনি লোকেরা জীবনকে ভেঙে-চুরে নতুন ছাঁচে গ’ড়ে তোলার কথা বলছে, তখনই আর ধৈর্য থাকে না আমার, আমি হতাশায় তলিয়ে যাই।

‘ভেঙে-চুরে নতুন ছাঁচে জীবন গড়বে! যারা এমন কথা বলে, তারা জীবনের কিছুই বোঝেনি, কোনোদিন না—তারা হয়তো অনেক দেখেছে, অনেক কাজ করেছে, কিন্তু জীবনের স্পন্দন, তার নিঃশ্বাস তারা অনুভব করেনি কখনো। এমনভাবে তারা এরদিকে তাকায় যেন জীবন একতাল কাঁচামাল, যাকে তারা গ’ড়ে-পিটে বানিয়ে তুলবে, যা তাদের চেষ্টার ফলে মহৎ হয়ে উঠবে। কিন্তু জীবন কোনো উপাদান নয়,—জীবন এমন কোনো বস্তু নয়, যাকে ইচ্ছেমতো বানিয়ে তোলা যায়, যদি জানতে চান তো বলি, জীবন হ’লো নিজেকে নতুন ক’রে তোলার মূলসূত্র, তা অনবরত নতুন ক’রে সৃষ্টি করছে নিজেকে, বদলে যাচ্ছে, রূপান্তরিত হচ্ছে, আপনার বা আমার তত্ত্বকথার তা নাগালের বাইরে—ও-সবের সঙ্গে তার ব্যবধান অপরিমীম।’

‘তবু জানেন, যদি আমাদের সভা-সমিতিতে যোগ দেন আপনি, আমাদের এই সুন্দর, মহান, শক্তিশালী জনগণের সংস্পর্শে আসেন, তাহ’লে নিজেকে ও-রকম অক্ষম ব’লে আপনার মনে হবে না। তাহ’লে আর এই বিষাদ-রোগে ভুগবেন না আপনি। এই বিষাদের উৎস কী, শুধু আমি জানি। আপনি দেখছেন আমরা হেরে যাচ্ছি, সামনে তাকিয়ে আশার রেখাও দেখতে পাচ্ছেন না। কিন্তু ভয় পেতে নেই মশাই—কক্ষনো ভয় পেতে নেই। এর চেয়ে ঢের বেশি মন-খারাপ-করা কথা বলতে পারি আমি—ব্যক্তিগতভাবে আমারই কথা, যা এখনো সকলকে

বলা যায় না—কিন্তু তবু আমি মাথা-খারাপ ক’রে বিবেচনাশক্তি হারিয়ে বসিনি। আমরা যে হেরে যাচ্ছি সেটা বিশুদ্ধরকম অস্থায়ী ব্যাপার, শেষ পর্যন্ত কোলচাকের পরাজয় অবধারিত। আমার এই কথাগুলো ভালো ক’রে শুনে রাখুন। দেখবেন—শেষ পর্যন্ত আমরাই জিতে যাবো। অতএব মনে একটু ফুটি আনুন।’

‘অকথ্য!’ ইউরি মনে-মনে বললো, ‘কী ক’রে কোনো মানুষ এমন নির্বোধ হ’তে পারে, এমন ছেলেমানুষ! আমাদের মনের গতি যে একেবারে উন্টোউন্টি, এ-কথাটা এতো ক’রেও গুর মগজে ঢোকাতে পারলাম না, জোর ক’রে আমাকে ধরেছে লোকটা, আমার ইচ্ছার বিরুদ্ধে আমাকে আটকে রেখেছে, অথচ সে ভাবছে যে তার হার হ’লে আমার মন-খারাপ হয়, আর তার কোনো আশা দেখলে আমাকে উৎসাহিত হ’তে হবে। এ-রকম অন্ধ কী ক’রে হ’তে পারে মানুষ? তার তো দৃঢ় ধারণা যে অক্টোবর-বিপ্লবের জয়ের ওপরেই বিশ্বের ভাগ্য নির্ভর ক’রে আছে!’

ইউরি কোনো কথা না-ব’লে শুধু কাঁধ ঝাঁকালো; তাতেও বোঝা গেলো যে লিবেরিয়ুসের ছেলেমানুষি তাকে এতোদূর বিরক্ত করেছে যে তার পক্ষে আর ধৈর্যধারণ করা প্রায় অসম্ভব। এটা কিন্তু লিবেরিয়ুসের চোখ এড়ালো না।

‘“তুমি রেগে যাচ্ছে জুপিটার, তাতেই বোঝা যাচ্ছে তুমি ভুল করেছিলে,”’ লিবেরিয়ুস বচন আওড়ালো।

‘ঈশ্বরের দোহাই, শেষবারের মতো এটা বুঝে নিন যে আপনাদের এ-সব বুলির কোনো মানেই হয় না আমার কাছে। এই “জুপিটার”, আর “মাইভে” আর “একবার “ক” বললে “খ” বলতেই হবে” আর “কাফ্রি ব্যাটাকে খাটিয়ে নিয়েছি, কাফ্রি এবার বিদায় নিক”—এই সব বাঁধা বুলি আপনাদের, স্থূল রুচিহীন কথাবার্তা—এ-সবে কিছু এসে যায় না আমার। আমি “ক” বলবো কিন্তু “খ” মুখে আনবো না—যা-ই বলুন না আপনারা। আমি মানছি আপনারাই রাশিয়ার মুক্তিদাতা, তার জ্যোতি, আপনারা না-থাকলে রাশিয়া তলিয়ে যাবে দুর্দশায় আর অন্ধকারে—কিন্তু তবু আপনাদের জন্য আমার একফোঁটা মাথাব্যথা নাই, আমি আপনাদের পছন্দ করি না, আপনারা সবাই মিলে জাহান্নামে গেলে কিছুমাত্র আপত্তি নেই আমার।

‘আপনাদের হ’য়ে যারা মাথা ঘামান, তাঁরা সব প্রবচন কুড়িয়ে বেড়ান বটে, কিন্তু একটি প্রবাদ তাঁরা ভুলে গিয়েছেন—“ঘোড়াকে জলের ধারে নিয়ে যাওয়া যায়, কিন্তু জোর ক’রে জল খাওয়ানো যায় না।” এঁরা তাদেরই মুক্তি দিচ্ছেন, তাদেরই ওপর উপকার বর্ষণ করছেন—যাদের ও-সব ভালো-ভালো জিনিসের জন্য কিছুমাত্র ইচ্ছে নেই। আপনার এই ক্যাম্প আর আপনার এই সঙ্গ—এর চাইতে কোনো সুখের জায়গা আমি ভাবতে পারি না বোধহয়? তা-ই হয়তো মনে হয় আপনার? বোধ করি আমাকে বন্দী ক’রে রেখেছেন ব’লে আপনাকে আমার ধন্য-ধন্য বলা উচিত! যা-কিছু আমি ভালোবাসি, যার জন্য সার্থক মনে হয় আমার জীবন—আমার স্ত্রী-পুত্র, বাড়িঘর, কাজকর্ম,—সব-কিছু থেকে আমাকে মুক্তি দিয়েছেন ব’লে আপনাকে বোধহয় আমার ধন্যবাদ দেওয়া উচিত, তাই না?

‘চারপাশে রব উঠেছে যে কোনো-এক অজ্ঞাত বাহিনী—রুশ নয় তারা—ভারিকিনো আক্রমণ ক’রে লুটপাট, খুন-জখম চালাচ্ছে। কামেনোভভিন্জি এ-কথা অস্বীকার করেনি। লোকে বলে, আপনার ও আমার পরিবারবর্গ পালাতে পেরেছে। মনে হচ্ছে পুরাণকাহিনী থেকে উঠে এসেছে একদল যোদ্ধা—চোরা চোখ তাদের, তুলোর গদিওলা জামা গায়ে, মাথায় ফারের টুপি—তারা ভীষণ বরফের মধ্যে বিনভা পেরিয়ে ঠাণ্ডা মাথায় সঙ্কলকে গুলি ক’রে মেরে যেমনভাবে এসেছিলো তেমনি রহস্যময় ভাবে অন্তর্হিত হ’য়ে গেছে। আপনি কি এ-বিষয়ে জানান কিছ? এই বিবরণ কি সত্যি?’

‘বাজে, সব মিথো কথা। বাজে গুজব।’

‘সৈন্যদের নৈতিক উন্নয়ন বিষয়ে বক্তৃতা করার সময় আপনি তো নিজেকে দয়ার শরীর ব’লে ঘোষণা করেন—সত্যি যদি তা-ই হয় তো আমাকে ছেড়ে দিন। গিয়ে দেখি আমার স্ত্রী-পুত্রের অবস্থা কী।—তারা যে কোথায় আছে, তা পর্যন্ত জানি না। এখনো তারা বেঁচে আছে কিনা, তাই বা কে জানে। আর যদি তাতে রাজি না থাকেন, তাহ’লে ঈশ্বরের দোহাই একটু চূপ করুন, আমাকে একা থাকতে দিন। আর কোনো-কিছুতেই আমার বিন্দুমাত্র মাথাব্যথা নেই। যদি এর পরেও আপনি কথা বলতে থাকেন তো আমি কোনো জবাব দেবো না। কী ব্যাপার বলুন তো—আমার কি ঘুমোবারও অধিকার নেই?’

বাক্সের ওপর উপড় হ’য়ে বালিশে মুখ ঠুঁজে শুয়ে পড়লো ইউরি; বসন্তের আগেই শাদাদের তারা চূড়ান্তভাবে হারিয়ে দেবে, সেই সোনালি ভবিষ্যতের কথা ব’লে লিবারিয়ুস আবার তাকে সান্ত্বনা দিয়ে নিজেকে সমর্থন করার চেষ্টা করছে—ইউরি প্রাণপণে চেষ্টা করলো তার কথা যাতে কানে না আসে। গৃহযুদ্ধ শেষ হ’য়ে যাবে, শান্তি আসবে, আসবে স্বাধীনতা আর সমৃদ্ধি, আর তখন ইউরিকে এক মুহূর্তও আটকে রাখতে সাহস করবে না কোনো লোক। কিন্তু অস্তুত ততোক্ষণ পর্যন্ত ঐশ্বর্য ধ’রে থাকা উচিত তার। এটা তো ঠিক, যা-কিছু ভাগ্যস্বীকার, যা-কিছু প্রতীক্ষা, সব তারাই করেছে, আর কয়েকমাস দেরি করলে এমন আর কী এনে যাবে, আর ত্রাছাড়া এখন যাবেই বা কোথায়? তার ভালোর জন্যই তাকে এখন থেকে একলা কোথাও যেতে দেওয়া ঠিক নয়।

‘ঠিক একটা গ্রামোফোন রেকর্ডের মতো! চুলায় যাক লোকটা!’ তীব্র নিঃশব্দ রাগে ইউরি ভেতবে-ভেতরে ফুলতে লাগলো। ‘থামতে পারে না! বছরের পর বছর একই জাবর কাটতে এর লজ্জা হয় না কেন? কী ক’রে এই নোংরা কোকেনখোরটা নিজের গলায় আওয়াজ সহ্য করে? দিন নেই, রাত নেই—বকবক ক’রেই চলেছে। ঈশ্বর! বিত্তী লোকটা, কী জঘন্য! তুমি সাক্ষী বইলে ঈশ্বর, একদিন নির্যাত্ত ওকে খুন করবো আমি।

‘টোনিয়া, অভাগী টোনিয়া, আমার সোনামণি! কোথায় তুমি, কোনখানে? বেঁচে আছে তুমি? হা ভগবান—তখন তার সম্ভানসম্ভাবনা ছিলো! প্রসবের সময়টা কী-ভাবে কেটেছিলো? এবার কি ছেলে হয়েছে, না মেয়ে? তোমরা যারা আমার প্রিয়জন, তোমাদের কী হচ্ছে এখন? টোনিয়া, আমার চিরকালের তিরস্কার তুমি, সোনা আমার! লারা, লারা, তোমার নাম মুখে আনতে আমার সাহস হয় না, পাছে ফিনকি দিয়ে আমার প্রাণ বেরিয়ে যায়। ভগবান, ভগবান! আর ঐ নিঃসাড় জঘন্য পশুটা এখনো একটানা কথা ব’লে যাচ্ছে! একদিন ও আমার সহ্যের সীমা পেরিয়ে যাবে, আর সেদিন আমি ওকে খুন করবো, আমি ওকে খুন করবো।’

৬

ইন্ডিয়ান সামাব শেষ হ’লো— স্বচ্ছ, সোনালি হেমন্ত সেদিন। ‘শেয়াল ঘোপে’র পশ্চিমপ্রান্তে শাদাদের তৈরি নিশেন-ঘরের কাঠের চূড়োটা তখনো মাটির ওপর মাথা তুলে দাঁড়িয়ে আছে। বিভিন্ন কর্তব্য বিষয়ে তার হাস্কেরীয় সহকারী লায়োসের সঙ্গে আলোচনা করার জন্য ইউরি এই জায়গাটা ঠিক ক’রে নিয়েছে। নির্দিষ্ট সময়েই পৌঁছলো সে। শাদারা এখানে মাটির বাঁধ বানিয়েছিলো; বন্ধুর জন্য অপেক্ষা করতে-করতে ইউরি সেই ধ’সে পড়া বাধের ওপর দিয়ে পায়চারি করতে-করতে নিশেন-ঘরের চূড়ায় উঠে এলো। এককালে এখানে যে কামান বসানো হয়েছিলো, তার চিহ্নস্বরূপ কতগুলি শূন্য মঞ্চ প’ড়ে আছে, তাদের সামনে কাঠের দেয়ালে

গোল-গোল গর্ত—তাতে কামানের নল বসানো হ'তো। সেই গর্তগুলি দিয়ে ইউরি দূরে নদীর ওপারে বনভূমির দিকে তাকিয়ে রইলো।

দেবদারু, সরল আর পাতা-ঝরা গাছগুলির মধ্য দিয়ে স্পষ্ট রেখায় হেমন্ত আঁকা হয়ে রয়েছে। প্রায়-কালো, বিষন্ন, ঘন নিবিড় সরলগাছের দেয়ালগুলির ফাঁকে-ফাঁকে পাতাভরা ঝোপঝাড় ঝলসে উঠছে—আগুনের মতো, মদের মতো তাদের রং—যেন বনের ঘনতার মধ্যে কেউ কিছু-কিছু কাঠ কেটে নিয়ে তৈরি করেছে এক মধ্যযুগীয় প্রাসাদ, স্বর্ণখচিত তার ছাদ, সচিত্র।

বনভূমির পথের ওপর চাকার দাগ-আঁকা মাটি, পরিখার ভেতরকার, ইউরির পায়ের তলাকার মাটি—জমা বরফে কঠিন হ'য়ে আছে সব। শুকনো উইলোপাতার ছোটো-ছোটো আঁটোঁসটো স্থূপ জ'মে ছিলো, ধুলোর ঝড় তাদের ফালি-ফালি ক'রে উড়িয়ে ছিটিয়ে নিয়ে গেলো। ঐ কড়া ব্রাউন পাতার গন্ধ যেন হেমন্তের, আদার মতো ঝাঝালো সব মশলার গন্ধ; ইউরি তা স্ফুর্ষিতভাবে শুবে নিলো নিঃশ্বাসে। ঠাণ্ডা-করা আপেলের, শুকনো খড়কুটোর, স্যাংসেঁতে মাটির মিষ্টি-মিষ্টি ঘ্রাণ, আর ঐ সেন্টেম্বরের নীল কুয়াশা, যা সদ্য নিবে-যাওয়া আগুনের মতো ধুইয়ে উঠছে—এই সব-কিছু মিশে গেছে সেই গন্ধের মধ্যে।

ইউরি টের পেলো না, লায়োস কখন তার পেছনে এসে দাঁড়িয়েছে।

কেমন আছেন? জার্মান ভাষায় লায়োস জিজ্ঞেস করলে। কাজের কথা শুরু হ'য়ে গেলো।

ইউরি বললো, 'তিনটে কথা আছে। যে-সব আদালি ভদকা চোলাই করেছিলো, তাদের কোর্ট-মার্শাল হবে, এই হলো এক নম্বর। তারপর, আবার নতুন ক'রে যাবতীয় ওষুধপত্রের হিসেব নিতে হবে, ফিল্ড অ্যাম্বুলেন্স গ'ড়ে তুলতে হবে; আর তৃতীয়ত, মানসিক ব্যাধি সম্পর্কে যুদ্ধক্ষেত্রে কতদূর চিকিৎসা করা যায় সে-বিষয়ে আমার প্রস্তাবটা নিয়ে আলোচনা করা দরকার। জানি না আপনি আমার সঙ্গে একমত হবেন কিনা, কিন্তু আমার ধারণা আমরা পাগল হয়ে যাচ্ছি, আব আমাদের এই আধুনিক উন্মাদরোগ সংক্রামক।'

'কথটা খুব ভালো বলেছেন। এ নিয়ে আপনার সঙ্গে এক্ষুনি কথা বলবো। কিন্তু তার আগে আমি আব-একটা কথা বলতে চাই। ক্যাম্পে অসন্তোষ দেখা দিয়েছে। ভদকা যারা চোলাই করেছিলো, তাদের দিকেই সকলের সহানুভূতি। তাছাড়া শাদাদের এলাকা থেকে আত্মীয়স্বজন পালিয়ে যাচ্ছে ব'লে উদ্বেগ হ'য়ে আছে সবাই। আপনি তো জানেন নারী, শিশু ও বৃদ্ধদের নিয়ে একটি কনভয় আসছে; যতোকণ না সেটা এসে পৌঁছয়, ততোকণ পার্টিজানদের অনেকেই ক্যাম্প ছেড়ে যেতে রাজি হবে না।

'তা জানি। তাদের জন্য অপেক্ষা করতে হবে আমাদের।'

'আর এই সব ঘটছে কিনা ঠিক ইলেকশনের মুখে, যাতে অনেকগুলো স্বাধীন ইউনিট মিলে জয়েন্ট-কমান্ড নির্বাচন করতে হবে, তার মধ্যে আমরাও আছি। কমরেড লিবেরিয়ুস ছাড়া সম্ভবপর প্রার্থী তো আর দেখছি না। কিন্তু ছেলে-ছোকরাদের কেউ-কেউ আবার ভূভোভিচ্ছেদ্যের নামে ধুষো তুলেছে। যে-দল তাকে সমর্থন করছে, তাদের মনোভাব আমাদের বিরোধী—ভদকা চোলাইয়ের ব্যাপারে যারা জড়িত, তাদের সঙ্গে যোগাযোগ আছে এদের—কেউ দোকানদারের ছেলে, কেউ বা এসেছে কুলাক-পরিবার থেকে, কেউ আবার কোলচাকের বাহিনী ত্যাগ ক'রে এই দলে যোগ দিয়েছে। সব সোরগোলের পেছনে তাদেরই অবদান সব চেয়ে বেশি।'

'বিচারে কী হবে ব'লে আপনার মনে হয়?'

'আমার মনে হয় এদের প্রাণদণ্ড দেওয়া হবে, কিন্তু পরে সেটা স্থগিত রাখা হবে।'

'এবার তাইলে কাজের কথায় আসা যাক। প্রথমেই ফিল্ড-অ্যাম্বুলেন্সের কথা।'

'আচ্ছা। কিন্তু আগে একথা ব'লে নিই যে আপনি উন্মাদরোগ নিয়ন্ত্রণের যে-প্রস্তাব

তুলেছেন তাতে আমি একটুও অবাক হইনি। আমার নিজেরও ঐরকম বিশ্বাস। এমন এক ধরনের সংক্রামক মানসিক ব্যাধির মুখোমুখি আমরা দাঁড়িয়েছি, যা ঠিক এই যুগের বৈশিষ্ট্য—সরাসরি কতগুলি ঐতিহাসিক পরিস্থিতি থেকে এই ব্যাধির সৃষ্টি হয়েছে। ক্যাম্প এই রোগের একটি নমুনা আছে—পামফিল পালিখ, আগে জারের বাহিনীতে সাধারণ সৈন্য ছিলো; লোকটার বিপ্লবী চেতনা এক চরম তারে বাঁধা, সেই সঙ্গে আবার এক সহজাত শ্রেণীচেতনাও আছে। তার অসুখের কারণ হ'লো পরিবারের জন্য উদ্বেগ—সে যদি ম'রে যায়, তা'হলে তাদের কী হবে? কিংবা যদি এমন হয় যে শাদারা তাদের ধ'রে নিয়ে গিয়ে তার ক্রিয়াকলাপের জন্য তাদের শাস্তি দেয়? খুব জটিল এই মনোভাব। আমার বিশ্বাস কনভয়ে যে-সব লোকজন আসছে, তার ভেতর তার পরিবারও আছে। রুশ ভাষাটাও তেমন ভালো জানি না যে তাকে ভালো ক'রে প্রশ্ন করতে পারি। আঞ্জেলার বা কামেনোভভর্স্কির কাছ থেকে আপনি জেনে নিতে পারেন। তাকে পরীক্ষা ক'রে দেখা দরকার।

‘পালিখকে আমি ভালোই চিনি। বাহিনীর মন্ত্রণাসভায় এককালে প্রায়ই পরস্পরের মুখোমুখি হতাম আমরা। নিচু কপালওয়ালা, কালো, নিষ্ঠুর প্রকৃতির মানুষ।—তার ভেতরে এমন কী ভালো আপনি দেখলেন, আমি বুঝতে পারছি না। লোকটা সব সময়েই চরম উপায়ের পক্ষপাতী, কাউকে শাস্তি দিতে বা গুলি করতে তার উৎসাহের অন্ত নেই। আমার তো ওকে দেখলেই বিতৃষ্ণা জাগতো। তবু, পরীক্ষা ক'রে দেখবো'খন।

৭

পরিস্কার রোদ্দুরের দিন। সারা সপ্তাহ ধ'রে শান্ত ও শুকনো আবহাওয়া চলছে।

গুমগুম আওয়াজ ভেসে আছে মস্ত ক্যাম্পটার ওপর—অনেকটা দূর-থেকে-শোনা সমুদ্রগর্জনের মতো—প্রায়ই থাকে এ-রকম। পায়ের শব্দ, গলার আওয়াজ, কাঠের গায়ে কুড়োলের বাড়ি, কামারশালায় নেহাইয়ের ওপর হাতুড়ি পড়ছে, কুকুরের ডাক, ঘোড়ার চিহি শব্দ, মোরগের কোক্কোরোঙ্কা—সব মিশে আছে সেই শব্দে। রোদে-পোড়া শাদা দাঁত বের-করা হাসি-খুশি লোকদের ভিড় বনের মধ্যে চলাফেরা করছে। ডাক্তারকে যারা চিনতো তারা তাকে দেখে মাথা হেলিয়ে অভিবাদন করলে, অন্যরা কোনো দৃকপাত না-ক'রেই তার পাশ দিয়ে চ'লে গেলো।

যতোদিন না আত্মীয়স্বজনেরা এসে পৌছয়, ততোদিন কিছুতেই তারা ছাউনি তুলবে না ব'লে কর্তৃপক্ষকে জানিয়ে দিয়েছে; বাড়ি ছেড়ে পালিয়ে আসছে পরিজনেরা, তাদের সঙ্গে দেখা না-ক'রে তারা যাবে না। কিন্তু এখন যে-কোনো মুহূর্তেই তারা এসে পৌছতে পারে, তাই যাত্রার প্রস্তুতি শুরু হ'য়ে গেছে। জিনিসপত্র সব পরিষ্কার ক'রে মেরামত ক'রে রাখা হচ্ছে, বাসন-কোসনের বাস্র পেরেক ঠুকে ঠিকঠাক ক'রে নিচ্ছে ওরা, ক'টা গাড়ি আছে শুনে মিলিয়ে দেখা হ'লো।

বনের মাঝখানে মস্ত একটা ফাঁকা জায়গায় মাঝে-মাঝে সভা বসতো। জায়গাটা অনেকটা মাটির ঢিবি বা ছোটো টিলার মতো, পায়ের চাপে সব ঘাস ম'রে গেছে। এক জরুরি বিজ্ঞপ্তি ঘোষণা করার জন্য সেদিন একটা সাধারণ সভা ডাকা হয়েছে সেখানে।

বনের অনেক গাছ এখনো হলুদ হ'য়ে যায়নি, ভেতরের দিকে সতেজ ও সবুজ র'য়ে গেছে। বিকেলের সূর্য ডুবছে বনের মধ্যে, ফাঁকে-ফাঁকে ছড়িয়ে পড়ছে রশ্মি, পাতাগুলো কাচের মতো স্বচ্ছ হ'য়ে সবুজ আঙুনে জ্বলজ্বল করছে।

প্রধান জনসংযোগ-অধিকর্তা কামেনোভভর্স্কি তাঁর তাঁবুর বাইরে খোলা জায়গায় একরাশ কাগজপত্রে আঙুন ধরিয়ে দিয়েছেন; জেনারেল কাপ্পেলের অনেক নথিপত্র তাঁর হাতে এসে

পড়েছিলো, সেই সঙ্গে পাটিজ্ঞান-বাহিনীর অনেক দলিল জড়ো করে তিনি জঞ্জাল সাফ করছেন। পেছনে অস্ত-সূর্যের আভার জন্য গাছের পাতার মতো আগুনও স্বচ্ছ হ'য়ে উঠলো: ঝাঁকঝাঁক শিখাগুলোকে দেখাই যাচ্ছে না, শুধু কৈপে-ওঠা তাপের টেউ বুঝিয়ে দিচ্ছে যে এখানে কোনো-কিছু জ্বলছে।

মাঝে-মাঝে পাকা জামের গুচ্ছে উজ্জ্বল হ'য়ে আছে বন—গোছা-গোছা নানারকম জাম—কোনোটা ইটের মতো লাল, কোনোটার রং শাদা থেকে বেগনি হ'য়ে যাচ্ছে। হাওয়ায় আস্তে-আস্তে ভেসে বেড়াচ্ছে বড়ো-বড়ো ফড়িং—কাচের মতো পাখায় মৃদু আওয়াজ তুলছে, ঐ আগুন আর পাতাগুলোর মতোই স্বচ্ছ তারা।

ছেলেবেলা থেকেই সূর্যাস্তের পটভূমিতে অরণ্য দেখতে ভালো লাগে ইউরির। এ-রকম সময়ে তার মনে হয় আলোর রশ্মি যেন তাকেও বিদ্ধ করে দেবে। যেন সপ্রাণ আত্মার নৈবেদ্য ঝরনার মতো বুক থেকে বেরিয়ে এলো, যেন তার অন্তিত্বকে বিদীর্ণ করে কাঁধ ফুঁড়ে পাখার মতো বেরিয়ে আসবে। জীবনের যে-মৌলিক রূপ প্রত্যেক শিশুর মনে চিরকালের মতো গ'ড়ে ওঠে, যা তারপর চিরকাল ধ'রে তার অস্মিতার অন্তঃপ্রতিমা ব'লে প্রতিভাত হয়, এখন তার পূর্ণ প্রবল, আদি শক্তি ইউরির মনে জেগে উঠলো; এই প্রকৃতি, এই বন, এই বেলাশেষের উজ্জ্বলতা—যা-কিছু সে এই মুহূর্তে দেখতে পাচ্ছে, সব, সব এখন তেমনি আদিম প্রবলতায় এক তরুণীর প্রতিমায় রূপান্তরিত হ'য়ে গেলো। 'লারা।' চোখ বুজে নিঃশব্দে বললে সে, যেন ঐ নাম সে উচ্চারণ করছে নিখিল-জীবনকে, ঈশ্বরের সমস্ত পৃথিবীকে, আর তার সামনে ছড়িয়ে-পড়া এই সমগ্র রৌদ্রোজ্জ্বল ভূমিকে সম্বোধন করে।

কিন্তু এখনো আছে দৈনন্দিন সচল বাস্তব: রাশিয়া এখন অক্টোবর-বিপ্লবের কবলে, আর পাটিজ্ঞানদের হাতে ইউরি আছে বন্দী হ'য়ে। অনামনস্কভাবে সে কামেনোডভস্কির আগুনের কাছে গিয়ে দাঁড়ালো।

'নথিপত্র পোড়াচ্ছেন? এখনো শেষ হয়নি?'

'এতো আছে যে অনেকদিন ধ'রে পোড়ালেও ফুরাবে না।'

ইউরি জুতোর ডগা দিয়ে একটা কাগজের স্তূপে নাড়া দিলো। শাদাদের হেডকোয়ার্টারের চিঠিপত্র ওগুলো। হঠাৎ তার মনে হ'লো, এর মধ্যে রাষ্ট্রসেভিচের কোনো উল্লেখ কি পাওয়া যায় না? কিন্তু যা চোখে দেখা গেলো, তা ক্লাস্তিকর সাংকেতিক ভাষার পুরোনো চিঠিপত্র ছাড়া আর-কিছু না। আরেকটা স্তূপ সে লাথি মেরে ছড়িয়ে দিলে। সেটাও তেমনি বাজে লেখায় ভর্তি—পাটিজ্ঞানদের সভাগুলোর পুঙ্খানুপুঙ্খ বিবরণ শুধু।

কামেনোডভস্কি তাঁর পকেট থেকে একটা কাগজ বের করে ইউরির হাতে তুলে দিলেন:

'এই আপনার ডাক্তারি-বিভাগের রওনা হবার হুকুমনামা। পাটিজ্ঞানদের পরিজনদের নিয়ে যে-কনভয়টা আসছে, সেটা পৌছতে আর দেরি নেই; ক্যাম্পের মধ্যে যে-মতবিরোধ চলছে আজকেই সঙ্গেবেলায় তার নিষ্পত্তি হ'য়ে যাবে। কাজেই এখন যে-কোনো দিনে রওনা হবার জন্য প্রস্তুত থাকতে হবে আমাদের।' ১৫/৬

ইউরি হুকুমনামার দিকে তাকিয়ে ক্ষুব্ধ গলায় ব'লে উঠলো:

'আহতদের সংখ্যা গতবারের চেয়ে অনেক বেড়েছে, অথচ আমাকে যানবাহন দিচ্ছেন অনেক কম। যারা পারবে তাদের ইটতেই হবে, কিন্তু তারা আর ক'জন। আর যাদের জন্য স্ট্রেকার দরকার, তাদের কী ব্যবস্থা হবে? তার ওষুধ-বিশুধ, বিছানাপত্র, যন্ত্রপাতি—সব-কিছু তো প'ড়েই রইলো।'

'এতেই চালিয়ে নিতে হবে—উপায় কী। যেমন কাপড় তেমন তো জামাটা হবে। এবার আর-এক কথা। আমাদের সকলের একটা অনুরোধ আপনার কাছে। একজন কমরেডকে আপনি পরীক্ষা করে দেখবেন কি? লোকটাকে বার-বার পরীক্ষা করে দেখা গেছে, সে এই মতবাদের

অনুগত, যোদ্ধা হিসেবেও উচুদরের। কিন্তু কিছু-একটা গোলমালে ব্যাপার আছে তার।

‘কে, পালিখ? লায়োস বলেছে আমাকে।’

‘হ্যাঁ। যান না। গিয়ে দেখে আসুন। পরীক্ষা ক’রে দেখুন ভালো ক’রে?’

‘মানসিক অসুস্থতা?’

‘তাই তো মনে হয়। সে তো বলে প্রায়ই তার সর্বশরীরে কাঁটা দেয়। বোঝাই যাচ্ছে অলীক কল্পনা। অনিদ্রারোগ, মাথা ধরা—এই সব আরকি।’

‘বেশ, এক্ষুনি কোনো কাজ নেই আমার, গিয়ে দেখে আসতে পারি। সভা আরম্ভ কখন?’

‘এখনই এসে পড়বে ওরা। কিন্তু তা নিয়ে মাথাব্যথা কিসের? দেখবেন, আমিও যাবো না ওখানে। আমাদের ছাড়াই চালিয়ে নেবে ওরা।’

‘তাহ’লে আমি গিয়ে পামফিলকে দেখে আসি। অবশ্য এতো ঘুম পেয়েছে যে চোখের পাতা খুলে রাখতে পারছি না। লিবেরিয়ুস আভরসিএভিচের কাঁধে রোজ রাতে দর্শনের ভূত চাপে। বকবক ক’রে আমাকে প্রায় মেরে ফেলেছে। পামফিলকে কোথায় পাৰো?’

‘জঙ্গল ফেলার গর্তের পেছনে বাঁচগাছের ঝাড় আছে, চেনেন?’

‘চিনি ব’লেই মনে হচ্ছে।’

‘সেখানে খোলা জায়গায় কমাগারদের কতগুলো তাঁবু দেখতে পাবেন আপনি—তারই একটায় পামফিলকে থাকতে দেওয়া হয়েছে। তার আত্মীয়স্বজনেনা কনভয়ে আছে—শিগগিরই এসে পড়বে। ওখানেই আপনি পাবেন ওকে—কোনো-একটা তাঁবুতে—দলের এক অংশের নেতা সে, তার বিপ্লবী স্ফুতির পুরস্কাবস্বরূপ এই পদ তাকে দেওয়া হয়েছে।’

৮

পামফিলকে দেখতে যাবার পথে ইউরি যেন ক্লাস্তিতে ভেঙে পড়লো। গত কয়েকরাত একেবারেই ঘুমোতে পারেনি সে—এই ক্লাস্তিকে তারই যোগফল বলা যায়। অবশ্য এখনই পরিখায় ফিরে শুয়ে পড়ার কোনো বাধা নেই তার, কিন্তু ভয় হ’লো পাছে লিবেরিয়ুস যে-কোনো মুহূর্তে এসে প’ড়ে তাকে উত্ত্যক্ত করে। একটা ফাঁকা জায়গায় এসে দাঁড়ালো সে—আশে-পাশের বন থেকে বরা পাতা সেখানে ছড়ানো। চৌখুপি-কাটা দাবার ছকের মতো ছড়িয়ে আছে সেগুলো, সূর্যাস্তের ঝাঁক রশ্মিগুলোও তেমনিভাবে এই সোনালি কার্পেটের ওপর বিছিয়ে আছে। উজ্জ্বলতার এই কাটাকুটিতে যেন মাথা ঘুরে ওঠে, ঘুম পেয়ে যায়, যেমন হয় কানের কাছে একটানা একঘেয়ে কথায় বা খুদে অক্ষরের বই পড়লে।

রেশমি মর্মর-তোলা বরা পাতার ওপর ইউরি শুয়ে পড়লো, হাতের ওপর মাথা, আর গাছের তলায় জ’মে-থাকা শ্যাওলার বালিশে হাত রেখে শোয়া মাএ বিমুনি এলো তার। আলো-ছায়ার যে বলকানি তাকে ঘুম পাড়িয়ে দিলে এবার সেটা তার গায়ের ওপর জাফরি-ছবি ঐকে দিলো; ~~কয়ে~~ আছে সে মাটিতে, গায়ে আলো-ছায়ার বরফি নিয়ে, যেন রোদের রেখা আর বরা পাতার সঙ্গে তার কোনো তফাৎ নেই, যেন মাথায় কোনো জাদুকরের টুপি প’রে সে অদৃশ্য হ’য়ে গেছে।

কিন্তু একটু পরেই তার ঘুমোবার প্রয়োজন আর ইচ্ছেটাই তাকে জাগিয়ে দিলো—কোনো প্রত্যক্ষ কারণে প্রত্যক্ষ ফল পাওয়া যায় শুধু একটা নির্দিষ্ট সীমানার মধ্যে, মাত্রা পেরোলে সেই কারণই উষ্টো ফল ঘটিয়ে বসে। ইউরির জাগ্রত চেতনা কোনো বিশ্রাম না-পেয়ে শূন্যতার মধ্যে সক্রিয় হ’য়ে উঠলো, ভাবনাগুলো যেন জ্বরের ঘোরে তার মাথার মধ্যে ঘুরপাক খাচ্ছে, বিগড়ে-যাওয়া এঞ্জিনের মতো ধুকধুক করছে তার মন। এই মানসিক বিশৃঙ্খলায় অস্থির হ’য়ে উঠলো সে, কিছুতেই আর শান্তি পাচ্ছে না। ‘লিবেরিয়ুসটা একটা শুয়োর,’ রাগ হ’লো তার

কথাটা ভাবতে। ‘যেন এমনিতেই মানুষকে পাগল ক’রে দেবার মতো যথেষ্ট ব্যাপার ঘটছে না এই পৃথিবীতে, একটি সুস্থ লোককে ধরা চাই ওর, রীতিমতো ভেবে-চিন্তে তাকে বন্দী ক’রে রেখে, তার বন্ধু সেজে, বকবকানির ঠেলায় অস্থির ক’রে তুলে, তাকে পাগল ক’রে দেওয়াও চাই। ওকে একদিন খুন করবো আমি।’

রঙিন কাপড়ের টুকরোর মতো একটি বাদামি ছিট-আঁকা প্রজাপতি পাখা নেড়ে আলোর দিক থেকে উড়ে এলো। ঘুমভরা চোখে দেখতে লাগলো ইউরি। নিজের গায়ের রঙের সঙ্গে মিলিয়ে, প্রজাপতিটা বেছে নিলে পাইনের বাদামি ছিট-আঁকা বাকল, বসামাত্র একেবারে অদৃশ্য হ’য়ে গেলো, আলো-ছায়ার খেলার মধ্যে মিলিয়ে গেলো, ইউরিরই মতো।

ইউরির মন অভ্যস্ত চিন্তার দিকে ফিরলো: তাব অনেক ডাক্তারি গবেষণায় পরোক্ষভাবে ও-সবের সে উল্লেখ করেছে—অভিযোজনের উন্নত পদ্ধতির সঙ্গে উদ্দেশ্য ও ইচ্ছাশক্তির সম্বন্ধ; অনুকরণ, আত্মরক্ষায় উপায় হিসেবে বর্ণিততা; যোগ্যতমের উদ্ভর্তন, আর সত্যি কি পরিণতি ও চেতনার জন্ম প্রাকৃতিক নির্বাচনেরই ফল? আর অহং কাকে বলে? বিষয়ই বা কী? কী ক’রেই বা তাদের শনাক্ত করা যাবে? ডারউইন থেকে শেলিং পর্যন্ত ঘুরে বেড়ালো তার ভাবনা, প্রজাপতি থেকে আধুনিক চিত্রকলা ও ইমপ্রেশনিষ্ট ছবি পর্যন্ত। সৃষ্টি ও সৃষ্ট প্রাণীকুল, সৃষ্টিশীলতা, কৌশল, চাতুর্য—এই সব কথা ভাবতে-ভাবতে সে আবার ঘুমিয়ে পড়লো।

কিন্তু একটু পরেই জেগে উঠতে হ’লো। আবছা চাপা গলায় কারা যেন কথা বলছে, তাইতে তার ঘুম ভেঙেছে। যে-দু’একটা কথা তার কানে এলো, তা থেকে বুঝতে পারলে কেউ কোনো গোপন অবৈধ মড়যন্ত্র করছে। তাকে কেউ দেখতে পায়নি, চক্রান্তকারীরা সন্দেহ করেনি তার উপস্থিতি। একটু ন’ড়ে উঠলেই তাকে প্রাণ দিতে হ’তে পারে। মড়ার মতো নিঃসাড়ে প’ড়ে থেকে ইউরি শুনেতে লাগলো ওদের কথা।

কারো-কারো গলা তা? চেনা। তারা আর-কেউ নয়—গশকা, সান্ধা, কস্কা আর তাদের সাকরেদ টেরেস্টি গালুহিন; পাটিজানদের একেবারে তলানি এবা, কেউ-কেউ গলগ্রহ মাত্র; সবরকম বিশৃঙ্খলা আর গোলযোগের এরাই হ’লো মূল। এদের সঙ্গে আবার জাখারও জুটেছে, আরো ভয়াবহ ঐ লোকটা, বসমায়েসের ধাড়ি, ভদকার ব্যাপারে সে ধরা পড়েছিলো, কিন্তু দলের পাণ্ডাদের ধরিয়ে দিয়ে এখনকার মতো বেঁচে গেছে। কিন্তু ইউরি অবাক হ’লো সিভোভ্লয়িকের ওর মধ্যে দেখে; যাকে ‘রৌপ্য দল’ বলা হয়, তাদেরই অন্যতম পাটিজান সে, খোদ কম্যাণ্ডারের দেহরক্ষী। স্টেঙ্কা রাজিন’ আর পুগাচেভ—এর ঐতিহ্য অনুসরণ ক’রে সে হ’লো কর্তার পেয়ারের লোক, তাই সবাই তার নাম দিয়েছে ‘হেটমান-এর কান’^১। কিন্তু বোঝা যাচ্ছে সেও এই চক্রান্তে আছে।

শত্রুপক্ষের যে-অংশ এগিয়ে এসেছে, তাদের প্রতিনিধিদের সঙ্গে বোঝাপড়া চলছে, এদের বিশ্বাসহস্তাদের সঙ্গে শত্রুপক্ষের লোকেরা এতো আস্তে কথা বলছিলো যে কিছুই শোনা যাচ্ছিলো না। তারা যে-কথা বলছিলো ইউরি তা তখনই শুধু বুঝতে পারছে যখন মাঝে-মাঝে তারা চুপ ক’রে যাচ্ছিলো।

মাতাল জাখারটাই কথা বলছিলো বেশি, তার সর্দি-বসা ভাঙা গলায় কুকথাও কম আওড়াচ্ছিলো না। তাকেই দলের পাণ্ডা ব’লে মনে হ’লো।

১ স্টেঙ্কা রাজিন : কসাকবংশীয় বিদ্রোহী দস্যু, সতেরো শতকে অনেকগুলো বিদ্রোহে জয়লাভ করে অবশেষে বীর অনুচরদের বিশ্বাসঘাতকতায় ধরা পড়ে। এর কীর্তি ও কুকীর্তি রুশীয় কিংবদন্তীর অংশ। ডস্টয়েভস্কির ‘Notes from Underground’-এ-এর উল্লেখ আছে। অনুবাদকের টীকা।

২ হেটম্যানের কান : দলপতির গুপ্তচর।

‘এই, এবার শোন তোমরা। আসল কথা হচ্ছে, ব্যাপারটাকে চেপে রাখা চাই। যদি কেউ টু শব্দটি করেছে—দেখেছো এই ছুরি?—নাড়িভুড়ি ফাঁসিয়ে দেবো একবারে, বুঝেছো তো? আমরা যে আটকা পড়ে আছি তা তোমরাও জানো আমিও জানি। আর কোনো রাস্তা খোলা নেই আমাদের। যে-ক’রেই হোক, রেয়াৎ পেতে হবে এবার। এমন একটা ফন্দি খাটাতে হবে যেমনটি আগে কেউ দ্যাখেনি। তাকে তারা জ্যান্ত ধরতে চাচ্ছে। তাদের কর্তা গুলেভয় নাকি আসছেন।’ (অন্যেরা তাকে সংশোধন ক’রে দিলো, ‘গালিউলিন’,—কিন্তু নামটা সে ধরতে পারলো না, ‘জেনারেল গালেইলেভ’ ব’লেই চালিয়ে দিলো) ‘এই আমাদের সুযোগ। এ-রকম আর দ্বিতীয়বার আসবে না। এই তো তাদের লোকজনেরা। এঁরাই সব খুলে বলবেন তোমাদের। তাকে জ্যান্ত ধ’রে আনতে হবে—এই তো কথাটা? এখন বলুন আপনারা, বুঝিয়ে বলুন।’

এবার প্রতিনিধি-দলের কথা শুরু হলো। ইউরি কিছুই শুনতে পেলো না, কিন্তু নীরবতার পরিমাণ থেকে বুঝতে পারলো যে তারা খুঁটিনাটি সমেত প্রস্তাব পেশ করছে। আবার বললো জাখার:

‘শুনলে, স্যাঙাংরা? দেখেছো তো, ক্যায়সা একটি চীজ ইনি। ওর জন্যে আমাদের কী দায় পড়েছে বলো! আস্ত মানুষও নয় লোকটা—নিরেট বোকা, নয় তো সন্মেসি-টন্মেসি কিছু। দাঁত বের ক’রে হাসিস্নে টেরেণ্টি। তাকে দেখিয়ে দেবো দাঁত বের করা কাকে বলে, গাঁজেল কাঁহাকার। তাকে নিয়ে কথা হচ্ছে না তো! তাকে বলছি শোন—লোকটা নিশ্চয়ই সন্মেসি, শাছাড়া আর কী হবে! সুযোগ পেলে সবাইকে সাধু বানিয়ে ছাড়বে রে, একেবারে খাসি ক’রে দেবে। কী বলে সে? খিস্তি কোরো না, নেশা কোরো না, আর মেয়েমানুষ—আরে থুঃ! এমন ক’রে কী বাঁচা যায় বল তোরা! শোনো স্যাঙাংরা, আজ রাত্তিরে ওকে ধ’রে আমরা খালের ধারে নিয়ে যাবো। আমি ঠিক নিয়ে আসবো—ভেবো না। আসামাত্র সবাই একসঙ্গে ঝাঁপিয়ে পড়বো ওব ওপর। কাজটা শক্ত হবে না—এতে আর আছে কী বলো! মুশকিলটা এই যে ওরা তাকে জ্যান্ত ধরতে চায়। বলছে বেঁধে নিয়ে এসো। তা ঠিক আছে—আমি ভার নিচ্ছি, এই ফন্দিটা যদি ভেসে যায় আমি নিজেই দেখে নেবো তাকে—নিজের হাতে শেষ ক’রে দেবো। হাত লাগাবার জন্য ওদের কয়েকটা লোকও পাঠিয়ে দেবে বলছে।’

ফন্দিটা সে বোঝাতে থাকলো অন্যদের কাছে। কিন্তু আস্তে-আস্তে পুরো দলটি অনাদিকে চ’লে গেলো—ইউরি তাদের কথা আর শুনতে পেলো না।

‘লিবেরিয়ুসকে শাদাদের হাতে ধরিয়ে দেবার মতলব আঁটছে ওরা, আর নয়তো তাকে মেরে ফেলবে শুয়োরগুলো।’ এমন ঘোষা হ’লো ইউরির, এমন জঘন্য লাগলো যে ভুলেই গেলো তার নির্ঘাতক লিবেরিয়ুসের মৃত্যু কতবার সে নিজেই কামনা করেছে। কিন্তু এখন এটা ঠেকানো যায় কী ক’রে? কামেনোডভর্স্কির কাছে ফিরে গিয়ে, কোনো নাম না-ক’রে এই ষড়যন্ত্রের কথা খুলে বলবে, আর লিবেরিয়ুসকেও সাবধান ক’রে দেওয়া দরকার।

কিন্তু ইউরি ফিরে গিয়ে কামেনোডভর্স্কিকে দেখতে পেলো না, কাগজ পোড়াবার জায়গায় তার বদলে তার এক সহকারী ব’সে-ব’সে, আগুন যাতে ছড়িয়ে না পড়ে সেদিকে লক্ষ রাখছে।

দুজ্জিয়াটা ঘটতে পারেনি, আগেই ভেসে গিয়েছিলো। কে জানে কেমন ক’রে জানাজানি হ’য়ে গেলো সড়যন্ত্রটা, আর ফাঁস হওয়ামাত্র অপরাধীদের ত্রেপ্তার করা হ’লো। সরকারি পক্ষের গুপ্তচরের কাজ করলে—আর-কেউ না, সিভোভ্লুয়ি। ইউরির বিতৃষ্ণা সীমা ছাড়িয়ে গেলো।

কৃষক পরিবারেরা ক্যাম্প থেকে আর একদিনের পথ দূরে আছে ব'লে জানা গেলো। বাহিনীর সবাই তাদের স্বাগত জানাবার জন্য তৈরি হ'য়ে নিলে, তারা এসে পড়লেই রওনা হ'য়ে পড়বে তারা, তার জন্যও গোছগাছ চললো। পামফিল পালিথকে দেখতে গেলো ইউরি।

ঠাবুর সামনেই কুড়োল হাতে পাওয়া গেলো তাকে। কচি বার্চগাছের মস্ত এক স্থূপ তার সামনে, গাছগুলি সে কেটে এনেছে কিন্তু এখনো ফালি করেনি, কতগুলো গাছ আবার যেখানে দাঁড়িয়ে ছিলো, সেখানেই পড়েছে; ওজনের চাপে ঘুরে পড়েছে তারা, চোখা টুকরোগুলো ভিজে মাটিতে গৌথে গিয়েছে। অন্য গাছগুলিকে সে অল্প দূর থেকে টেনে নিয়ে এসে স্থূপের ওপর রেখে দিচ্ছে। গাছগুলি ঠিক মাটিতেও প'ড়ে নেই, বা কোনো জায়গায় জড়ো করাও নেই; নরম ডালে ভর দিয়ে তারা শুয়ে আছে, স্প্রিংয়ের মতো ন'ড়ে উঠছে সব ডাল, আর থেকে-থেকে শিউরে উঠছে তাদের শরীর। মনে হ'লো তারা যেন হাত বাড়িয়ে পামফিলকে বাধা দিতে চাচ্ছে; সে-ই কেটেছে তাদের, আর সেজন্যেই তাকে ঠাবুতে ঢুকতে দেবে না ব'লে তারা সবুজ পাতা আর ডালপালার জটিলতা মেলে দিয়ে তাকে আটকাতে চায়।

'আমার বৌ আসছে ছেলেপুলে নিয়ে,' পামফিল বুঝিয়ে বললো, 'তাদের জন্যই কাটতে হ'লো এগুলো। ঠাবুটা ভারি নিচু, বৃষ্টি হ'লে জল পড়ে। ছাতের বর্গা করার জন্যে কাঠ কেটে আনলাম।'

'তুমি তাদের ঠাবুতে নিয়ে যাবার অনুমতি পাবে ব'লে আমার মনে হয় না, পামফিল। কোনো ক্যাম্পের ভেতরে যে সাধারণ লোক বৌ-ছেলে নিয়ে থাকতে পারে, এমন কথা কে কবে শুনেছে? নিশ্চয়ই বাইরে কোথাও কোনো ওয়্যগনে থাকবে তারা; অবসর সময়ে যতো ইচ্ছে তাদের সঙ্গে তুমি দেখা করতে পারবে; কিন্তু আমার মনে হয় না তোমার ঠাবুতে তাদের থাকতে দেওয়া হবে—কিন্তু আমি একথা বলতে আসিনি। শুনলাম তুমি নাকি রোগা হয়ে যাচ্ছে, খেতে, ঘুমাতে পারো না! সতি নাকি? দেখে তো মনে হচ্ছে ভালোই আছে। তবে চুলটা একবার ছাঁটিয়ে নিলে পারো।'

দশসই শরীর পামফিলের; ঝাঁকড়া কালো চুল আর দাড়ি। তার দুই ভাঁজে বিভক্ত উচু কপাল; কপালের হাড়টা খুব পুরু, কপালের দু'পাশ আংটা বা লোহার বালার মতো ফুলে উঠেছে ব'লে চোখ ফোলা-ফোলা, যেন সব-সময়েই ভ্রুকুটি ক'রে আছে।

বিপ্লবের গোড়ার দিকে এই ভয় জেগে উঠেছিলো যে, ১৯০৫ সালের মতো এবারও বুঝি এই অভ্যুত্থান পর্যবসিত হবে গর্ভপাতে, যার সঙ্গে যোগ থাকবে শুধু মুষ্টিমেয় শিক্ষিত লোকের, সমাজের গভীরতর স্তরকে হয়তো তা ছুঁতেও পারবে না; এই জন্যেই তখন সাধারণ মানুষকে উদ্যুক্ত, চঞ্চল ও কোপান্বিত করে তোলার জন্য যতোভাবে সম্ভব বিপ্লবী প্রচারকার্য চালানো হয়েছিলো।

প্রথম দিকের সেই দিনগুলোয় অত্যাৎসাহী বামপন্থী বুদ্ধিজীবীরা পামফিলের মতো লোকেদের দুর্লভ আবিষ্কার ব'লে গণ্য করতো, কেননা কোনো উশকানি ছাড়াই বুদ্ধিজীবী, চাকুরীজীবী ও ভদ্রলোকদের প্রতি তাদের ছিলো উন্নত বিদ্বেষ। তাদের অমানুষিকতাকে ধরা হ'তো শ্রেণীচেতনার বিস্ময়কর নমুনা ব'লে; আর তাদের বর্বরতাকে বলা হ'তো সর্বহারাদের দৃঢ়তা ও বিপ্লবী মনোভাবের অনুকরণযোগ্য আদর্শ। এই সব গুণের জন্যেই পামফিলের খ্যাতি, দলের কর্তব্যাক্তি আর বাহিনীর নেতাদের সম্মতিও সে এ একই কারণে অর্জন করেছিলো।

এই বিমর্ষ ও অমিশুক দানব, যার আত্মা আছে ব'লে মনে হয় না, যার আগ্রহের সীমা তুচ্ছ ও সংকীর্ণ—ইউরির তাকে মনে হ'লো এক অপজাত মানুষ, ঠিক প্রকৃতিই নেই।

‘ঠাবুর ভেতর আসুন’, বললে পামফিল।

‘না—কেন? বাইরেই তো বেশ ভালো। তাছাড়া আমি ভেতরে যেতেও পারবো না।’
‘বেশ আপনার যা মজি। ঐ তক্তাটার ওপর বসতে পারি আমরা।’

স্প্রিঙের মতো কাঁপতে-থাকা বটগাছের ওপর বসলো তারা। পামফিল তার জীবনকাহিনী শোনালো ইউরিকে। ‘কথায় বলে, গল্প চটপট ফুরিয়ে যায়। কিন্তু আমার গল্প অনেক লম্বা। তিন বছর ধরে বললেও সব-কিছু বলে উঠতে পারবো না। কোনখান থেকে যে শুরু করি, তা-ই এখনো জানি না।

‘যাক, চেষ্টা তো করি। আমি, আমার বৌ। অল্প বয়সে ছিলো আমাদের। ও ঘরকন্না করে, আমি মাঠে খাটি। মন্দ ছিলো না জীবনটা। ছেলেপুলে হ’লো। ওরা আমাকে পশ্টনের সেপাই ক’রে নিয়ে গেলো। যুদ্ধে পাঠালে আমাকে। তা, এই যুদ্ধ। যুদ্ধের কথা কী-ই বা বলি আপনাকে? আপনি তো যুদ্ধ দেখেছেন, কমরেড ডাক্তার।—তারপর, বিপ্লব। আমি আলো দেখতে পেলাম। সৈন্যদের চোখ খুলে গেলো। শত্রু যে শুধু বিদেশীরাই, তা নয়—এই শুনলাম আমরা। ঘরেও আমাদের শত্রু আছে। “বিশ্ববিপ্লবের সৈনিক যারা, সবাই শোনো, রাইফেল নামিয়ে ফ্যালো, বাড়ি ফিরে যাও, রুখে দাঁড়াও বুর্জোয়াদের বিরুদ্ধে! ইত্যাদি, ইত্যাদি। আপনিও তো জানেন ওসব, কমরেড ডাক্তার। তা এই চললো কিছুকাল, তারপর গৃহযুদ্ধ এলো। পার্টিজান-দলে যোগ দিলাম আমি। এবার আমাকে অনেক কথা বাদ দিয়ে যেতে হবে, নয়তো কোনো কালে শেষ করতে পারবো না। এতো সবেের পর, এখন, এইমুহূর্তে আমি দেখতে কী পাচ্ছি? ব্যাটা বেজন্মা, সে পশ্চিমের ফ্রন্ট থেকে দুটো আস্ত স্টাভরোপলস্ক রেজিমেন্ট নিয়ে এসেছে, সেই সঙ্গে আবার প্রথম ওরেনবুর্গ কসাকবাহিনীকেও। আচ্ছা, আমি কি শিশু? আমি কি কিছুই বুঝি না? আমি কি পশ্টনে কাজ করিনি কোনোদিন? বড়ো খারাপ অবস্থা ডাক্তার, বড়ো খারাপ অবস্থা। সব শেষ হ’য়ে গেলো আমাদের। শুয়োরটা কী করতে চাচ্ছে জানেন—ঐ নোংরা লোকগুলোকে নিয়ে আমাদের ওপর ঝাঁপিয়ে পড়তে চাচ্ছে। আমাদের ঘিরে ফেলতে চায় সে।

‘কিন্তু আমার বৌ আছে, ছেলেপুলে আছে। যদি সে তেরিয়া হ’য়ে এসে চড়াও হয়, তাকে তারা ঠেকাবে কী ক’বে? তারা যে নির্দোষ, এটা তো ঠিক; তারা তো এ-সবেের মধ্যে নেই, কিন্তু তাতে ও-ব্যাটার কী এসে যায়। আমার বৌকে পাকড়াও করবে সে, তাকে বেঁধে, শেকল পরিয়ে যন্ত্রণা দেবে, সব আমার জন্য; আমার বৌ, ছেলেপুলে—বেধড়ক পেটাতে সবাইকে; সব ক’টা হাড় গুঁড়ো ক’রে দেবে তাদের, ছিড়ে ফেলবে সবাইকে এক-এক ক’রে। আর আপনি কিনা জিজ্ঞেস করছেন, কেন হে, রাতে ঘুমোও না কেন। ইম্পাত দিয়ে হয়তো একটা মানুষ তৈরি করা যায়, কিন্তু এ-রকম হ’লে পাগল না-হ’য়ে উপায় কী।’

‘কী অদ্ভুত লোক তুমি, পামফিল। আমি ঠিক বুঝতে পারছি না তোমাকে। বছরের পর বছর তুমি তাদের ছেড়ে আছো, কোথায় আছে, কেমন আছে, কী করে না করে—কিছুই তুমি জানতে না, আর সেজন্যে কোনো উদ্বেগও ছিলো না তোমার। আর এখন, যখন তাদের সঙ্গে তোমার দেখা হবে—কোথায় তুমি খুশি হবে, না তাদের শ্রাদ্ধের মন্ত্র আওড়াতে বসেছো।’

‘আগেকার কথা বাদ দিন, এখন সব বদলে গেছে। এখন ঐ শাদা বেজন্মাটা আমাদের পেটাচ্ছে যে। কিন্তু সে-কথা নয়, আমার কথা বলছি না—আমি তো শেষ হ’য়েই ক্ষেঁছি। দুম ক’রে ম’রে যাবো একদিন। কিন্তু আমি তো আমার কাছাকাছগুলোকে পরলোকে নিয়ে যেতে পারবো না—পারবো কি? তারা তো থেকে যাবে, আর ঐ জন্তুটার হাতে ধরা পড়বে। তাদের গা থেকে ফোঁটা-ফোঁটা ক’রে রক্ত নিংড়ে নেবে ও।’

‘এই জনোই কি তোমার “গায়ে কাঁটা” দিয়ে ওঠে? তুমি নাকি নানা রকম সব ব্যাপার দ্যাখো রোজ?’

‘শুনুন, ডাক্তার। আপনাকে সব কথা বলিনি। সবচেয়ে জরুরি কথাটাই চোপে গিয়েছি। যদি চান তো এবার আসল কথাটা বলতে পারি। আপনার মুখের ওপরই ব’লে দিতে পারি কথাটা, কিন্তু তাতে আপনি আমার ওপর রেগে যাবেন না কিন্তু।

‘আপনার মতো অনেক ডক্টরলোককে খুন করেছি আমি, এই হাতে অনেক অফিসারের রক্ত লেগে আছে। বড়ো চাকুরে, বনেদি বংশ—অনেক। তা নিয়ে এতোদিন কোনো উদ্বেগ ছিলো না আমার। জলের মতো রক্ত ছিটিয়েছি। তাদের নাম কী, সংখ্যায় ক’জন—কিছুই মনে নেই আমার। কিন্তু একটি ছেলের কথা আমি কিছুতেই মন থেকে তাড়াতে পারছি না। ছোড়াটাকে শেষ করেছি, আর এখন তা ভুলতে পারছি না কিছুতেই। তাকে মেরেছিলাম কেন? না, আমার হাসি পেয়েছিলো তাকে দেখে, তামাশা ক’রে মেরেছিলাম একেবারে খামোকা, উজবুকের মতো।

‘ফেব্রুয়ারি-বিলবের সময়ে সেটা, কেরেনস্কির আমল চলছে। বিদ্রোহ ক’রে বসে আছি আমরা। একটা রেল-স্টেশনেব কাছে; ফ্রন্ট ছেড়ে চ’লে এসেছি। এক অল্প-বয়সী ছোকরাকে ওরা পাঠিয়ে দিলে, আমাদের কাছে বক্তৃতা দেবার জন্য, যাতে তার কথায় আমরা ফিরে যাই। জয় না-হওয়া অবধি যাতে লড়াই চালাই, সেই কথা বলতে এসেছিলো সে। তা সেই ছোকরা এসে আমাদের সদুপদেশ দিতে লাগলো! একেবারে মুরগির ছানা একটা। “যবে জয় তবে যুদ্ধ শেষ”—এই ছিলো তার মুখের বুলি। এই বুলি আওড়াতে-আওড়াতে একটা জলের পিপের ওপর উঠেছিলো সে, জলের পিপেটা ছিলো রেলের প্ল্যাটফর্মে। সে গিয়ে উঠলো সেখানে, কেন জানেন? যাতে তার এই যুদ্ধের ডাক উচু থেকে এসে পৌঁছয়। এমন সময় হঠাৎ ডালাটা ডিগবাজি খেয়ে উল্টে গেলো, সেও সোজা প’ড়ে গেলো চিংপাত হ’য়ে। তাকে দেখতে যে কী মজা লাগছিলো তা আপনি ভাবতেও পারবেন না। হাসতে-হাসতে পেটে একেবারে খিল ধ’রে গিয়েছিলো। আমার হাতে ছিলো এক রাইফেল। হাসির চোটে ভির্মি লাগছিলো আমার। কিছুতেই থামতে পারছিলাম না। ছেলেটা যেন আমাকে শুড়শুড়ি দিচ্ছে! তারপর আমি রাইফেল তুলে ধরলাম, তাক ঠিক ক’রে দুম ক’রে গুলি ক’রে দিলাম। কী ক’রে যে কী হ’য়ে গেলো বোঝাই গেলো না। ঠিক যেন কেউ আমাকে ধাক্কা দিয়ে ফেলে দিলে।

‘এবার তো শুনলেন কেন আমার গায়ে কাঁটা দিয়ে ওঠে। স্বপ্নে সেই রাতের স্টেশনটা দেখতে পাই আমি। তখন সেটা ছিলো মজার ব্যাপার, কিন্তু এখন—এখন বড়ো খারাপ লাগে।’

‘কোথায় ঘটেছিলো এটা? মেলিউজ্জেইয়েভোর কাছে বিরিউচি স্টেশনে কি?’

‘মনে পড়ছে না।’

‘জিবুসিনো বিস্কোভের মধ্যে ছিলে নাকি তুমি?’

‘মনে পড়ছে না।’

‘কোন ফ্রন্টে ছিলে? পশ্চিম ফ্রন্টে? পশ্চিমে ছিলে কি তুমি?’

‘হবে হয়তো। ঐ রকমই কোনো এক জায়গায়। পশ্চিমেও হতে পারে। কিছুই মনে পড়ে না।’

পরিলেখ ১২

বরফ-দেওয়া জামফল

১

বাচ্চাকাচ্চা, মালপত্র, সব নিয়ে সৈন্যদের পরিবারের কনভয় চলেছে: অনেক দিন ধরেই মূল কৃষকবাহিনীর পেছনে আসছে তারা। তারপর ওয়াগনগুলির পেছন-পেছন, আসছে পোষা জন্তুর দল, গোরুই প্রধানত—কয়েক হাজার হবে সংখ্যায়।

শিবিরে নারীর আবির্ভাবের সঙ্গে-সঙ্গে একটি নতুন চরিত্রেরও উদয় হলো। সে হ'লো কুবারিখা, এক সৈন্যের বৌ, পশুর ব্যামো সারায়—সেই সঙ্গে, গোপনে-গোপনে, সে নাকি তুকতাকও করে—ডাইনি আর কি। ছোট্ট প্যানকেকের মতো একটা টুপি মাথার একপাশে চাপিয়ে ঘুরে বেড়ায় সে, পরনে থাকে কড়াইশুটির মতো সবুজ ওভারকেট। ও-রকম কোট পরে স্কটল্যান্ডের বন্দুকবাহিনীর সৈন্যরা, অ্যাডমিরাল কোলচাক ব্রিটিশদের কাছ থেকে কিছু জিনিসপত্র জোগাড় করছিলেন, তারই অংশ এটা। সে কিন্তু জোর গলায় সবাইকে জানায় যে এটা সে বার্নিয়ে নিয়েছে কয়েদিদের টুপি আর ঢিলে পাজামা কেটে। অ্যাডমিরাল কোলচাক তাকে কোনো অজ্ঞাত কারণে কেজ্জা-জেলে বন্দী ক'রে রেখেছিলেন, সেখান থেকে তাকে নাকি মুক্তি দিয়েছে লাল পশ্টন।

'শেখাল-বন' থেকে বেরিয়ে এক নতুন জায়গায় ছাউনি ফেলেছে তারা। কোনো সামরিক বাহিনীর আস্তানা পাতার পক্ষে আশেপাশের জায়গা কতটা উপযোগী, তা দেখা হ'লেই তারা নতুন জায়গায় গিয়ে শিবির ফেলবে।

শীতটা কাটাবার উপযুক্ত আশ্রয় চাই; যতোদিন তা না-পাওয়া যায় ততোদিন এখানে তাদের থাকার কথা ছিলো। কিন্তু পরিস্থিতি বদলে যাওয়ায় শীতটা তারা সেখানেই কাটাতে বাধ্য হ'লো।

এই নতুন শিবিরের সঙ্গে আগেরটার কোনো মিল নেই। চারপাশের বন খুব ঘন, কোথাও-কোথাও আবার দুর্ভেদ্য 'টায়িগা'^১। ক্যাম্প আর হাইওয়ের ওদিকে তো বন প্রায় সীমাহীন। এখানে ঠাঁবু খাটাতে যে-ক'দিন লেগেছিলে হাতে সময় পেয়েছিলো ইউরি; সেই সুযোগে বনের নানা দিকে কয়েকবার অভিযান চালিয়ে এটা সে স্পষ্টই বুঝে নিলে যে এই বনের ভেতর অনায়াসেই কেউ হারিয়ে যেতে পারে। এ-সব অভিযানের সময় দুটো জায়গা তার বিশেষ মনে ধরেছিলো, তার স্মৃতিতে র'য়ে গেলো তারা।

একটা জায়গা শিবিরের ঠিক বাইরে, 'টায়িগা'র গায়ে লাগানো। হেমন্তের বন একেবারে রিস্ত, তার ফলে যেন খোলা দরজা দিয়ে বনের ভেতরের সব-কিছু দেখে নেওয়া যায়। মস্ত এক জামগাছ আছে এখানে, জীর্ণ, সুন্দর আর একলা—শুধু সে-ই তার পাতা বারায়নি। নিচু, শুষ্ক-যাওয়া, ডিবি-ছাওয়া জলাভূমির ওপর টিলার মতো একটা জায়গা আছে; সেখানে দাঁড়িয়ে

আছে গাছটি, আকাশ ছুঁয়েছে তার শরীর, শীতের ভয়-ধরানো বিষণ্ণতার বিরুদ্ধে সে তার গাঢ় লাল কঠিন জামফলের মসৃণ গোল ঢাল বাড়িয়ে ধ'রে আছে। তুহিন উষার মতো উজ্জ্বল পালকওলা ছোটো-ছোটো শীতের পাখিরা তার গায়ে ব'সে বড়ো-বড়ো জামগুলিকে গলা বাড়িয়ে ঠুকরে নেয়, তারপর মাথা উচু ক'রে গিলে ফ্যালা।

পাখিদের সঙ্গে গাছটার যেন কোনো প্রাণের টান আছে; যেন এই জামগাছটি অনেকদিন নিঃশব্দে লক্ষ করেছে তাদের, প্রথমে কিছু করতে চায়নি, কিন্তু শেষ পর্যন্ত দয়া করতেই হ'লো: যেন বুকের বোতাম খুলে স্তন দেখিয়ে, দাই-মার মতো হেসে বললো, 'বেশ, মেনে নিলাম বাপু তোমাদের, নাও এবার—যত পারো, গেলো।'

অন্য জায়গাটা তার চেয়েও আশ্চর্য। একটু উচুতে, একদিকে খাড়া নেমে গিয়েছে জায়গাটা। খাদের দিকে তাকালে মনে হয় তলায় নিশ্চয়ই এমন কিছু আছে যা ওপরে নেই—কোনো জলস্রোত, বা কোনো গর্ত, আর নয়তো কোনো শুকনো, আঁচাটা ঘাসে-ছাওয়া বুনো মাঠ। আসলে কিন্তু সেখানেও একই জিনিসের পুনরাবৃত্তি ঘটেছে—শুধু অনেকটা নিচুতে, এই যা তফাৎ, যেন অরণ্য তার বৃক্ষচূড়াগুলিকে নামিয়ে দিয়েছে মানুষের পায়ের তলায়, ভুবিয় দিয়েছে অন্য এক স্তরে। কোনোকালে বোধহয় মাটি ধ'সে পড়েছিলো, তাই এইরকম।

যেন এই ভীষণ, অতিকায় অরণ্য মেঘের সঙ্গে পাল্লা দিতে গিয়ে হোঁচট খেয়েছে হঠাৎ, তাই ঢাল সামলাতে না-পেরে সব সমেত থুবড়ে প'ড়ে গেছে; নেহাৎই দৈবের দয়ায় যদি শেষ মুহূর্তে সামলে না নিতো তা'হলে একেবারে পাতালেই চ'লে যেতো হয়তো—আর তাই এখন সে নিচে দাঁড়িয়ে মর্মর তুলছে, বেশ ভালোই আছে নিরাপদে।

কিন্তু খাদের মুখটা যে শুধু এই কারণেই স্মরণীয়, তা নয়। তার ধার ঘেঁষে দাঁড়িয়ে আছে ধ'সে পড়া গ্রানাইট পাথরের মস্ত-মস্ত চাঁই, সেগুলোই আটকে রেখেছে খাদটাকে, যেন প্রাগৈতিহাসিক খাড়া পাথরের মাথায় চ্যাপ্টা প্রস্তবৎখণ্ড পড়ে আছে। এই পাথুরে মঞ্চের কাছে এসেই ইউরির দৃঢ় বিশ্বাস হ'লো যে, এটার পেছনে নিশ্চয়ই কোনো মানুষের হাত আছে, প্রকৃতির নয়,—অস্তুত তার চিহ্ন সুস্পষ্ট। হয়তো এটা কোনো প্রাচীন মন্দির, যেখানে অজ্ঞাত প্রতিমা-পূজকেরা তাদের দেবমূর্তির উপাসনা ক'রে অর্ঘ্য সাজিয়ে দিতো।

চক্রান্তকারীদের এগারোজন পাণ্ডা আর ভদকা-চোলাইকারী আদালি দু'জনকে মৃত্যুদণ্ড দেওয়া হয়েছিলো; একটি ঠাণ্ডা, ঝাপসা সকালবেলায় এখানেই সেই দণ্ডাজ্ঞা পালন করা হ'লো।

বাহিনীর সবচেয়ে অনুগত কুড়িজন রক্ষীর পাহারায় দণ্ডিত ব্যক্তিদের নিয়ে আসা হ'লো সেখানে। পাহারাওয়ালাদের মুখ-চোখ কঠিন হ'য়ে আছে, তাদের অনেকেই যে লিবেরিয়ুসের দেহরক্ষী, এটাই তার কারণ। রাইফেল হাতে অর্ধবৃত্তের আকারে তারা ঘিরে ছিলো তাদের। কনুই দিয়ে থাকা দিতে-দিতে বধ্যভূমির কিনারায় তাদের দ্রুত নিয়ে এলো, খাড়া পাহাড়ের তলদেশ ছাড়া সেখান থেকে বেরোবার আর পথ নেই।

যে-দীর্ঘ অবরোধ, অপমান আর সওয়াল-জবাব তাদের সহ্য করতে হয়েছে, তার ফলে বন্দীদের মুখ থেকে মনুষ্যত্বের সব চিহ্নই লুপ্ত হ'য়ে গিয়েছিলো। দাড়ি-গোঁফে ভরা কৃশ কালো চেহারা: প্রেতের মতো ভীষণ তারা দেখতে।

গ্রেপ্তার করার সময়েই তাদের কাছ থেকে সব অস্ত্রশস্ত্র কেড়ে নেওয়া হয়েছিলো; বধ্যক্রিয়ার আগে তাদের আবার খানাতল্লাসি করার কথা কারো মাথায় আসেনি। এই ধরনের কোনো খানাতল্লাসি যে শুধু বাহ্যিক হ'তো তা নয়, জঘন্য ব'লেও মনে হ'তো, মৃত্যুর এতো কাছে এসে যারা দাঁড়িয়েছে তাদের প্রতি এক গায়ে-পড়া বিদূপ হ'তো এটা।

কিন্তু এখন রজ্জিনিট্‌স্কি নামে ভডোভিচেকোর এক বন্ধু, হঠাৎ সিভোব্লয়িকে লক্ষ্য ক'রে রক্ষীদের দিকে পর-পর তিনটে গুলি ক'রে বসলো; ভডোভিচেকোর পাশে-পাশে হাঁটছিলো সে,

তার মতো সেও একজন পুরানো নৈরাজ্যবাদী। হাতের টিপ তার অব্যর্থ ব'লে খ্যাতি ছিলো, কিন্তু উদ্বেজনায হাত কঁপে ওঠায় ফস্কে গেলো এবার। যে-বিবেচনা ও করুণাবশত রক্ষীরা তাদের প্রাক্তন সঙ্গীদের খানাতল্লাসি করেনি, ঠিক সেই কারণেই এবারও তারা তার ওপর ঝাঁপিয়ে পড়লো না বা এলোপাথাড়ি গুলি চালিয়ে তাকে এই কাজের জন্য তক্ষুনি মেরে ফেললো না। রক্তানিউক্লিয়ার রিভলভারে তখনো তিনটে গুলি অটুট ছিলো, কিন্তু প্রথম চেষ্টায় ব্যর্থ হ'য়ে তার মাথার ঠিক রইলো না, উদ্বেজনায কাণ্ডজ্ঞান হারিয়ে রিভলভারটা পাথরের ওপর ছুড়ে ফেলে দিলে। চতুর্থবার গুলি বেরিয়ে এসে রিভলভার থেকে, পাচকোলিয়া নামে একজন দণ্ডিত আর্দালির পায়ে লেগে, তাকে জখম ক'রে গেলো।

আর্চনাদ ক'রে উঠলো পাচকোলিয়া; যন্ত্রণায় চ্যাচাতে-চ্যাচাতে পায়ে হাত চেপে প'ড়ে গেলো। তার সবচেয়ে কাছে ছিলো সাক্ষা পাকফুটকিন আর কসকা গোরাজ্জিখ, তারা টেনে তুললো তাকে; তাদের তখন কারোরই মাথার ঠিক নেই, পাচকোলিয়া যদি মাটিতে প'ড়ে থাকে তো বন্ধুরা হয়তো তাকে মাড়িয়েই চ'লে যাবে—সেটা যাতে না হয় সেজন্য তারা তাকে হাতে ধ'রে টেনে নিয়ে চললো। আহত পা-টা মাটিতে ফেলতে পারছিলো না পাচকোলিয়া; দণ্ডিতদের যে-দিকে তাড়িয়ে নিয়ে যাওয়া হচ্ছিলো, এক পায়ে লাফিয়ে ঝোঁড়াতে-ঝোঁড়াতে সেই টিলার দিকে চললো সে, তার চীৎকারের আর বিরাম নেই। সেই অমানুষিক আর্চনাদ অন্যদের ভেতরেও ভয় ছড়িয়ে দিলে, এবার আর কারো আত্মসংযম রইলো না। এর পরে যা হ'লো, তা কল্পনাও করা যায় না। তিরস্কার, বিলাপ, অনুনয়, প্রার্থনা আর অভিসম্পাতের এক ঝড় উঠলো সেখানে।

টেরেন্টি গালুজ্জিন তার স্কুলের হলদে টুপিটাকে তখনো ছাড়েনি। এবার সে মাথা থেকে খুলে নিলে সেটা, তারপর হাঁটু ঘ'ষে-ঘ'ষে বাকি সকলকে অনুসরণ ক'রে সেই ভীষণ পাথরগুলির দিকে পেছনমুখো চলতে থাকলো। রক্ষীদের সামনে বার-বার মাটিতে মাথা ঠেকিয়ে সে ঝুঁপিয়ে উঠলো, অর্ধচতন গুনগুনে সূরে তাদের অনুনয় ক'রে বলতে লাগলো, 'মাপ করো আমাকে, আমি মাপ চাইছি কমরেড, সত্যি আমি দোষ করেছিলাম, কিন্তু আর কখনো এমন করবো না, দয়া ক'রে আমাকে ছেড়ে দাও, মেরো না আমাকে। আমি তো এখনো ভালো ক'রে বাঁচিইনি। আরো কিছুদিন আমি বাঁচতে চাই, শুধু আর-একবার মাকে দেখতে চাই আমি। দয়া ক'রে ছেড়ে দাও আমাকে ভাই সব, দয়া ক'রে আমাকে মাপ ক'রে দাও। তোমরা যা বলবে তা-ই করবো আমি, সত্যি বলছি, তোমাদের পায়ের তলায় মাটিতে আমি চুমো খাবো। মা, মাগো। বাঁচাও আমাকে, এবারে আমি শেষ হ'য়ে গেলাম।'

ভিডের ভেতর থেকে আরেকজন কেউ জপ করছিলো: 'তোমরা খুব ভালো কমরেড, তোমাদের তো দয়ার শেষ নেই। এটা তাহ'লে কেমন ক'রে হয়? দু-দুটো যুদ্ধে আমরা পাশাপাশি দাঁড়িয়ে লড়াই করেছি, একই উদ্দেশ্য নিয়ে যুদ্ধ করেছি আমরা। আমাদের ছেড়ে দাও, ভাই সব। এই দয়ার প্রতিদান দেবো আমরা, আজীবন তোমাদের কেনা হ'য়ে থাকবো, আমাদের কাজেই তার প্রমাণ পাবে। তোমরা কি কালো, না আর-কিছু? উত্তর দিচ্ছে না কেন? না, তোমাদের মধ্যে খুঁট নেই!'

অন্যেরা সিভোব্লকে লক্ষ্য ক'রে চ্যাচাতে শুরু ক'রে দিলো:

'জুডাস কোথাকার! যীশুহুতা! আমরা যদি বেইমান হই তো তুই তার তিনগুন বেইমান! মর দম আটকে। তুই কুস্তা! যে-জ্বারের কাছে তুই শপথ নিয়েছিলি তাকে তুই মেরেছিস, শপথ নিয়েছিলি আমাদের কাছে, অথচ শেষে সবাইকে ধরিয়ে দিলি। তোর শয়তানকে চুমো খেতে ভুলিস না, তোর আরণ্যক নেতাকে তুই ধরিয়ে দেবার আগে তাকে চুমো খাবার কথা মনে রাখিস! তাকে তো তুই ধরিয়ে দিবিই—শুধু আগে আর পরে!'

সারা জীবন ধ'রে সে নিজের কাছে খাঁটি থেকেছে, এবার কবরের গা ঘেঁষে দাঁড়িয়েও

ভডোভিচেঙ্কো নিজেকে ভুললো না। মাথা উচু করে দাঁড়িয়ে রইলো সে, হাওয়ায় এলোমেলো উড়লো তার শাদা চুল; একজন কম্যুন্যার^১ যে-ভাবে অন্য একজনের সঙ্গে কথা বলে তেমনিভাবে সে রুজ্জানিটস্কিকে সম্বোধন করে, সবাই যাতে শুনতে পায় এমনি উচু গলায় বললে:

‘নিজেকে ছোটো কোরো না তোমরা। তোমাদের প্রতিবাদ পৌছাবে না ওদের কাছে। এই নতুন অপ্রিচিস্কি^২, নতুন ধরনের উৎপীড়নের এই সব ওস্তাদ কারিগর—এরা কিছুতেই তোমাদের কথা বুঝবে না! কিন্তু হতাশ হোয়ো না তাই বলে। ইতিহাস সত্য কথা বলবে একদিন। এই কমিসার-তন্ত্রের বৃষদের একদিন কলঙ্কস্তুম্ভে ঝুলিয়ে দেবে মহাকাল, এদের সব কুকীর্তিকে ছিন্নভিন্ন করে দেবে। বিশ্ববিপ্লবের সুপ্রভাতে শহীদের মতো প্রাণ দিচ্ছি আমরা। জয় হোক আত্মিক বিপ্লবের! জয় হোক সর্বজনীন নৈরাজ্যবাদের!’

রাইফেলধারীরা ছাড়া গুলি ছোঁড়ার আদেশটা কেউ বুঝতে পারলে না; এক সঙ্গে গর্জে উঠলো কুড়িটা বন্দুক, দণ্ডিতদের অর্ধেককে একেবারে কচুকাটা করলে, প্রায় সকলেই তৎক্ষণাৎ নিহত হ’লো। যারা বাকি রইলো, তারাও আরেক ঝাঁক গুলির সামনে প’ড়ে গেলো। সবচেয়ে বেশিক্ষণ দাপাদাপি করেছিলো টেরেস্টি গালুজিন, কিন্তু শেষটায় সেও প’ড়ে রইলো নিষ্পদভাবে।

২

শীতের জন্য আরো উত্তরে গিয়ে আশ্রয় নেবার পরিকল্পনাটা কিন্তু সহজেই ছেড়ে দেওয়া হয়নি। হাইওয়ে ছাড়িয়ে, ভিটস্ক-কেজ্জমা জলবিভাজিকার পাশে, সব দেখে-শুনে আসার জন্য লোক পাঠানো হয়েছিলো। ইউরিকে একা রেখে, লিবেরিয়ুসও মাঝে-মাঝে উধাও হ’য়ে যেতো।

কার্যত দেখা গেলো এখন আর পার্টিজানদের পক্ষে নতুন কোথাও গিয়ে আশ্রয় নেবার সময় নেই, যাবার মতো জায়গাও নেই কোনো। তাদের বাধাবিপত্তি তখন চরমে উঠেছে। ধ্বংস হ’য়ে যাবার ঠিক আগের মুহূর্তে শাদারা বিশৃঙ্খল আরণ্যক বাহিনীর ওপর একটা মারাত্মক আঘাত হেনে শেষবারের মতো বোঝাপড়া করার সংকল্প নিয়েছিলো; আরণ্যকদের চারপাশে ঘিরে ফেলে সবদিক থেকে চাপ দিতে লাগলো তারা। এই বেটনীর পরিধি একটু ছোটো হ’লে লাল ফৌজের সর্বনাশ হ’য়ে যেতো। শুধু তার মস্ত আয়তনের জন্যেই বেঁচে গেলো তারা; আসন্ন শীত ‘টায়িগা’কে অভেদ্য করে তুলেছিলো, সেইজন্যে পেছন থেকে সব সৈন্য নিয়ে এসে আরো কাছে থেকে কৃষকবাহিনীর ওপর শাদারা ঝাঁপিয়ে পড়তে পারেনি।

কিন্তু তাই বলে কৃষকবাহিনীর পক্ষে স্থান পরিবর্তন করাটা সম্ভব ছিলো না। সামরিক সুবিধে পাওয়া যায় এমন কোনো নির্দিষ্ট পরিকল্পনা থাকলে তারা হয়তো শাদাদের অগ্রাহ্য করেই কোনো নতুন জায়গায় গিয়ে আশ্রয় নিতো। কিন্তু এমন কোনো স্পষ্ট পরিকল্পনা ছিলো না তাদের। সহ্যের শেষ সীমায় তারা পৌঁছে গিয়েছে। কনিষ্ঠ কমাণ্ডারদের যতোই মন ভেঙে এলো ততোই নিষ্পদস্তুদের ওপর প্রভাব কমে এলো তাদের। জ্যেষ্ঠরা রোজ রাতে সভায় ব’সে পরস্পরবিরোধী সমাধান নিয়ে কথা-কাটাকাটি করতে লাগলেন। শিবির স্থানান্তরিত করার পরিকল্পনা শেষটায় বাদ দিতে হ’লো, তার বদলে স্থির হ’লো ‘টায়িগা’র ভেতরে বর্তমান আশ্রয়কেই সুরক্ষিত করা হবে। এখনকার ছাউনিগুলোর একটা সুবিধে এই যে গভীর

১ (Communard) (ফরাসি শব্দ) ‘প্যাবিস কমিউনে’ যারা অশেষক্লান্ত করেছিলো। অনুবাদকের টীকা।

২ Oprichniki. ‘ইভান দি টেবিলে’র ‘নিরাপত্তা বাহিনী’।

তুষারপাতের জন্য শীতকালে অগম্য হ'য়ে উঠবে, বিশেষ ক'রে শাদাদের আবার বেশি স্বী' নেই। সর্বাঙ্গে এখন মাটি খুঁড়ে বিপুল রসদ সঞ্চয় করা চাই।

ক্যাম্পের কোয়ার্টার-মাস্টার জানালে যে ময়দা আর আলুর বড়ো অভাব। পালিত জন্তুর সংখ্যা অবশ্য অনেক; তার মানে, শীতের সময় তাদের প্রধান খাদ্য দুধ আর মাংস।

গরম জামারও ঘাটতি ছিলো; পাটিজানদের কেউ-কেউ তো অর্ধেক কাপড়েই চলাফেরা করতে থাকলো। ক্যাম্পে যতো কুকুর ছিলো, সব ক'টাকে মেরে ফেলার সিদ্ধান্ত নেওয়া হ'লো, সৈন্যদের মধ্যে যারা পশম বানাতে শিখেছিলো, তাদের ওপর কুকুরের চামড়ার জ্যাকেট তৈরির ভার পড়লো, লোমের দিকটা বাইরে দিয়ে তা-ই পরা হবে।

আহতদের আনার জন্য ইউরিকে কোনো যানবাহনই দেওয়া হয়নি। অধিকতর জরুরি কাজের জন্য ব্যবহার করা হচ্ছিলো গোরুর গাড়িগুলোকে। শেষবার যখন কৃষকবাহিনী জায়গা বদলেছিলো, তখন আহতদের ব'য়ে আনতে হয়েছিলো তিরিশ মাইল পথ খাটিয়ায় ক'রে।

ইউরির হাতে তখনো যে-সব ওষুধ ছিলো, তা হ'লো কুইনিন, গ্লাউবার-লবন আর আইওডিন। কিন্তু আইওডিন ছিলো শর্করের আকারে, ব্যাণ্ডেজ বাঁধা বা অস্ত্রোপচারের সময় সেটাকে কোহলে গুলে নিতে হ'তো। ভদকা বানাবার বকযন্ত্র নষ্ট ক'রে ফেলা হয়েছিলো, এখন আপসোশ হচ্ছিলো সে-জন্য, চোলাইকারীদের মধ্যে যাদের অন্যদের চেয়ে কম দোষী ব'লে বিচারের সময় মাপ করা হয়েছিলো, এবার তাদের বকযন্ত্রটা সারিয়ে দিতে বলা হ'লো, আর তা যদি না পারে তো যেন নতুন ক'রে একটা বানিয়ে দেয়। এবার আবার সরকারি-ভাবে ডাক্তারি কাজের জন্য কোহল তৈরি শুরু হ'লো। খবরটা শুনে কেউ মাথা ঝাকালো, কেউ বা চোখ টিপলো। আবার মাতলামো শুরু হ'য়ে গেলো, এবং সাধারণ নীতিব্রষ্টতার পেছনে তার অবদান নেহাৎ কম হ'লো না।

যে-কোহল তৈরি হচ্ছিলো তার সবটাই বিশুদ্ধ। শতকরা একশোভাগ শুদ্ধ হ'লেই তাতে কেলাসিত আইওডিন গোলা যায়, কুইনিনের আরক তৈরি করতে হ'লেও এমনি বিশুদ্ধ কোহলের দরকার হয়। শীতের সময় শিবিরে টাইফাস লেগেই ছিলো, সেই সময় কাজে লাগলো এই ওষুধ।

৩

পামফিল আর তার পরিজনদের দেখতে গেলো ইউরি। পালাতে গিয়ে তার বৌ আর তিন ছেলেমেয়েকে (দুই মেয়ে আর এক ছেলে) সারা গ্রীষ্মকালটাই খোলা আকাশের তলায় খুলোভরা রাস্তায় কাটাতে হয়েছে। পথে সব দেখে-শুনে ভয়ে আধমরা হ'য়ে গিয়েছিলো তারা, এখন নতুন আশঙ্কায় তলিয়ে আছে। চারজনেরই চুল পাংলা, রোদে পুড়ে এখন শনের মতো হ'য়ে গেছে; রোদে-জলে তামাটে হ'য়ে-যাওয়া মুখের ওপর ঘন ভুরু শাদা দেখায়। ছোটোদের বয়স কম ব'লে মুখে-চোখে ভালো ক'রে দুর্দশার রেখা ফোটেনি, কিন্তু মার মুখ একেবারে নিস্ত্রাণ। ত্রাসে আর ক্রেশে সূতোর মতো হ'য়ে গেছে ঠোঁট; দুঃখকষ্টে ও আত্মরক্ষার চেষ্টায় তার শুকনো সুদ্রী চোখমুখ যেন কঠিন হ'য়ে জ'মে আছে।

পামফিল তাদের একান্ত ভক্ত, ছেলেমেয়েদের সে পাগলের মতো ভালোবাসে। শারালো কুড়ুলের কোনা দিয়ে কুঁদে-কুঁদে সে তাদের জন্য এতো সুন্দর সব খেলার খরগোশ, মোরগ আর ভালুক বানিয়েছে যে তার দক্ষতা দেখে ইউরি অবাক হ'য়ে গেলো।

পরিজনেরা আসতেই সে হাশিখুশি হ'য়ে উঠেছিলো, শুরু করেছিলো সুস্থ হ'তে। কিন্তু এখন

এই মর্মে খবর ছড়ালো যে কর্তৃপক্ষের মতে শিবিরে স্ত্রী-পুত্রাদির উপস্থিতি শৃঙ্খলার পক্ষে ক্ষতিকর, তাই উপযুক্ত প্রহরীর অধীনে কিছু দূরে এক জায়গায় তাদের শীত কাটাতে পাঠিয়ে দিয়ে কর্তৃপক্ষ বেসামরিক লোকজনের অপ্রয়োজনীয় বোঝা থেকে মুক্তি পেতে চান। এই পরিকল্পনাকে কাজে খাটাবার জন্য সত্যিকার চেষ্টা যতোটা হ'লো, তার চেয়ে ঢের বেশি হ'লো আলোচনা: আর তাই দেখে, এটা কখনো কাজে খাটানো হবে কিনা সে-বিষয়ে রীতিমতো সন্দেহ জাগলো ইউরির; কিন্তু এর ফলে, পামফিলের মেজাজ আবার খারাপ হ'য়ে গেলো, আবার আরম্ভ হ'লো তার গায়ে 'কাঁটা দিয়ে ওঠা'।

8

শীত এসে পাকাপাকি জুড়ে বসার আগে শিবিরে কিছুকাল একের পর এক গণ্ডগোল গেলো—উদ্বেগ, অনিশ্চয়তা, ভীতিকর বিশৃঙ্খলা আর অসম্ভব সব অযৌক্তিক ঘটনা।

পরিকল্পনা অনুযায়ী শাদারা তাদের সম্পূর্ণ ঘেরাও ক'রে ফেললে। ভিটসিন, কুয়াদ্রি আর বাসালিগো—এই তিনজন জেনারেল ছিলেন আক্রমণের পাণ্ডা, একরোখা জেদ আর নিষ্ঠুরতার জন্য তারা সর্বত্র পরিচিত ছিলেন, তাঁদের নাম শুনেই শিবিরের উদ্বাস্তরা ভয়ে কঁপে উঠলো; যে-সব শান্তিপ্রিয় লোক তখনো অংশপাশের গ্রামে ছিলো, তাদেরও এই তিনটে নাম শোনা অবধি শান্তি রইলো না।

খুব শক্ত হাতে চেপে ধরার কোনো উপায় ছিলো না শত্রুপক্ষের। তাই এই ব্যাপারে পাটিজ্ঞানদের উদ্বিগ্ন হওয়ার কিছু ছিলো না, আবার তাই ব'লে নিষ্ক্রিয় ব'সে থাকটাও অসম্ভব ছিলো তাদের পক্ষে। ব্যাপারটাকে চুপচাপ মেনে নিলে তা নির্খাৎ শত্রুপক্ষের মনের জোর বাড়িয়ে দেবে। এই বেঁটনীর ভেতর যতো নিরাপদেই তারা থাকুক না কেন, নিছকই সামরিক শক্তি-প্রদর্শনের জন্যও এই অবরোধ ভেঙে বেরিয়ে পড়ার চেষ্টা করাটা জরুরি হ'য়ে পড়েছিলো।

এই কাজের জন্য একটি শক্তিশালী বাহিনী নিয়োজিত হ'লো, সব শক্তি তারা সংহত করলে অবরোধের পশ্চিম প্রান্তে। কয়েকদিন তুমুল যুদ্ধের পর এই বাহিনী শাদাদের হারিয়ে অবরোধ ভেঙে একপাশে বেরিয়ে এলো।

এই ফাটলটা 'টায়িগা'র ভেতর শিবিরে আসার পথ ক'রে দিলে, আর এই পথ দিয়ে নতুন একদল উদ্বাস্ত হুড়মুড় ক'রে ঢুকে পড়লো এসে। এদের সঙ্গে কিন্তু পাটিজ্ঞানদের কোনোই সম্পর্ক ছিলো না। শাদাদের জ্বরদস্তিতে ভয় পেয়ে আশেপাশের পাড়াগাঁ থেকে সব চাষিকর বাড়িঘর ছেড়ে উর্ধ্বশ্বাসে পালিয়ে এসেছে; স্বভাবতই কৃষকবাহিনীকে তারা ভাবলে তাদের রক্ষক ব'লে, সেজন্যেই তাদের দলে যোগ দিতে চাইলো।

কিন্তু শিবির তখন তার নিজের আশ্রিতদের সরাতে পারলোই বাঁচে, নবগত আগন্তুকদের দায়িত্ব নতুন ক'রে কাঁধে নিতে রাজি হ'লো না। পল্লাতকদের সঙ্গে পষেই দেখা করার জন্য লোক পাঠানো হ'লো, তাদের বলা হ'লো যে তারা যেন উদ্বাস্তদের চিলিমকা নদীর ধারে এক গ্রামে পাঠিয়ে দেয়। একটি ময়দা-কলের চারপাশে অনেকগুলো গোলাবাড়ি আছে ব'লে গ্রামটাকে 'ড'ভোরি' বলা হ'য়ে থাকে। শীতকালটা যাতে সেখানেই কাটায়, এই প্রস্তাব করা হ'লো উদ্বাস্তদের, আরো বলা হ'লো তাদের জন্য রসদপত্র আলাদা ক'রে রাখা হয়েছে; যথাকালে পাঠিয়ে দেওয়া হবে।

এই পরিকল্পনাগুলি যখন কাজে খাটানো হচ্ছে, তখন পর-পর আপনা থেকেই এমন

কতগুলো ঘটনা ঘটলো, শিবিরের কর্তৃপক্ষ যার সঙ্গে একেবারেই তাল রাখতে পারলে না।

শত্রুর আবার সেই ফাটল বন্ধ ক'রে ফেললো, আর তার ফলে যে-বাহিনীটি আগে অবরোধ চুরমার ক'রে বেরিয়ে গিয়েছিলো, তাদের পক্ষে 'টায়িগা'য় ফেরা অসম্ভব হ'লো।

কৃষকবাহিনীর দুশ্চিন্তাকে বাড়িয়ে তোলার জন্যই যেন উদ্বাস্ত মেয়েরা ভারি অদ্ভুত ধরনের চলাফেরা শুরু ক'রে দিলে। ঘন বন তাদের খুঁজে বের করার কাজটা কঠিন ক'রে তুলেছিলো; চরেরা যখন তাদের খুঁজে বেড়াচ্ছে ততক্ষণে মেয়ের দল জঙ্গলে চড়াও হয়েছে: কেটে ফেলছে গাছ; রাস্তা আর সাঁকো তৈরি ক'রে আশ্চর্য উদ্ভাবনী-প্রতিভার পরিচয় দিচ্ছে।

কর্তৃপক্ষের পরিকল্পনার সঙ্গে কিন্তু এ-সবের কোনোই মিল হ'লো না; লিবেরিয়ুস দেখতে পেলো তার সব প্ল্যান উল্টেপাল্টে ভেসে যাচ্ছে।

৫

রাজপথ যেখানে 'টায়িগা'র পাশ ঘেঁষে গেছে, সেখানে দাঁড়িয়ে সে যখন কোচোয়ান স্ভিরিড-এর সঙ্গে কথা বলছিলো, তখন লিবেরিয়ুসের মেজাজ যে এতো খারাপ ছিলো তা এইজন্যেই। রাস্তার পাশ দিয়ে টেলিগ্রাফের তার গেছে; সেগুলো কাটা হবে কিনা, এই নিয়ে তার দলের কয়েকজন কর্মচারী রাজপথের ওপর দাঁড়িয়ে তর্ক করছে। শেষ সিদ্ধান্ত নেবার অধিকার শুধু লিবেরিয়ুসেরই আছে, কিন্তু, সেই মুহূর্তে, স্ভিরিড-এর সঙ্গে গভীর আলোচনায় ব্যস্ত ছিলো ব'লে ইশারায় সে বারে-বারে অন্যদের অপেক্ষা করতে বলছিলো।

স্ভিরিডের মতে ভডোভিচেকোর একমাত্র অপরাধ ছিলো এই যে প্রতিপত্তিতে সে লিবেরিয়ুসের প্রতিদ্বন্দ্বী হ'য়ে উঠে ক্যাম্পে মতভেদের সৃষ্টি করছিলো, আর এইজন্যেই মানুষটাকে গুলি ক'রে মারা হ'লো ব'লে মর্মান্বিত হয়েছিলো স্ভিরিড। সে যাতে পাটিজান দল ছেড়ে আবার তার পুরোনো, ব্যক্তিগত ও স্বাধীন জীবনে ফিরে যেতে পারে, শুধু এইটুকু চাচ্ছিলো সে। কিন্তু সে-প্রশ্ন আর ওঠে না। যা বেছে নেবার ছিলো তা সে বেছে নিয়েছে, এখন সে যদি আরণ্যক ভ্রাতৃবন্দকে ছেড়ে যেতে চায় তো তারও ভডোভিচেকোর দশা হবে।

বিশ্রী চলছে আবহাওয়া। তীক্ষ্ণ দামাল হাওয়া ছেঁড়া মেঘ উড়িয়ে নিচ্ছে, মিশকালো ঝুল-কালির মতো সেগুলো নিচু হ'য়ে নেমে আসছে মাটিতে। আবার সেই মেঘ থেকেই তুষার ঝরে পড়ছে পাগলের মতো শাদা ঝাপটায়; কিন্তু পরক্ষণেই মাটি গ্রাস ক'রে নিচ্ছে সেই শাদা চাদর, গ'লে গিয়ে পড়ে থাকছে শুধু ছাই, কয়লার মতো কালো মাটি জেগে উঠছে কালো আকাশের তলায়, যাকে শুধু দূরের দমকা বৃষ্টি তেরচা লম্বা নোংরা জলের ধারায় পিচকিরির মতো ভিজিয়ে দিয়ে যাচ্ছে। জল শুষে নেবার ক্ষমতা আর নেই মাটির; মেঘ যখন মাঝে-মাঝে স্ফটিকের মতো ঠাণ্ডা উজ্জ্বলতা নিয়ে জানলার মতো খুলে যায়, মাটির ওপরকার জ'মে-থাকা জল সাড়া দেয় তার ডাকে, তার খানাডোবার খোলা জানলাও একই উজ্জ্বলতা নিয়ে বিকমিক ক'রে ওঠে।

ধোয়ার মতো বৃষ্টি পড়ে পাইন বনের ওপর, তাকে ছুঁয়ে আস্তে চ'লে যায় ওপর দিয়ে; গাছগুলোর তেলতেলে ছুঁচের মতো মুখ অয়েলরুথের মতো জল আটকে দেয়। ঝালরের মতো ফোটা-ফোটা জল জ'মে আছে টেলিগ্রাফের তারে, পুঁতির মালার মতো জড়াজড়ি ক'রে আছে তারা, মনে হয় কখনো যেন ঝ'রে পড়ে না।

পালিয়ে যাওয়া জীলোকদের সঙ্গে যাদের দেখা করতে পাঠানো হয়েছিলো, স্ভিরিড তাদেরই একজন। গিয়ে সে কী দেখেছে, দলপতিকে তার কিছুটা আভাস দেওয়ার ইচ্ছে ছিলো তার; সব ক'টা নির্দেশই এই পরিস্থিতিতে প্রয়োগের অযোগ্য তার পরস্পরবিরোধী ব'লে যে-বিশৃঙ্খলা জেগেছে, ইচ্ছে ছিলো তার কথা কিছু বলে; ইচ্ছে ছিলো বলে, সব বিশ্বাস হারিয়ে

ব'সে হতাশায় তলিয়ে যেতে-যেতে কী ভীষণ সব কাজ করেছে দুর্বলতম মেয়েরা। ক্লান্ত পায়ে বস্তা, ঠুটলি ও সন্তানের দ্বারা ভারাক্রান্ত তরুণী মায়েরা—বুকের দুখ শুকিয়ে গেছে তাদের—পথ চলতে-চলতে রাস্তার নানা বিভীষিকার চাপে বিসর্জন দিলে সব চেতনা, সন্তানকে ত্যাগ করলে, বস্তা ঝেকে-ঝেকে মাটিতে ফেলে দিলে সব শস্য, তারপর ফিরতি পথ নিলো। ঢের ভালো—তারা বললো—এ-ভাবে বনের পশুদের হাতে ছিন্নভিন্ন হবার চাইতে ঢের ভালো শত্রুর হাতে পড়া।

অন্য দিকে আবার, অপেক্ষাকৃত শক্তপোক্ত মেয়েমানুষ যারা, তারা সাহস ও আত্মসংযমের এমন পরিচয় দিয়েছে, যা পুরুষদেরও ধারণার বাইরে।

এ ছাড়াও আরো অনেক কথা স্ভিরিডের বলার ছিলো দলপতিকে। যেটা দমন করা হয়েছে, তার ঢের বেশি বিপজ্জনক একটি বিস্ফোভের ভয় শিবিরের ওপর ঝুলে আছে, এই কথা ব'লে তাকে সাবধান ক'রে দেবার ইচ্ছে ছিলো তার। কিন্তু চেষ্টা ক'রেও সে কিছুতেই তাড়াতাড়ি বলতে পারছিলো না। তার ওপর তাড়া দিয়ে-দিয়ে লিবেরিয়ুস তার কথা বলার ক্ষমতা প্রায় কেড়ে নিচ্ছিলো। বন্ধুরা যে তাকে হাত নেড়ে রাজপথ থেকে ডাকছে, লিবেরিয়ুসের অধৈর্যের কারণ শুধু এটাই ছিলো না, গত পনেরো দিনে এই জাতীয় সতর্কবাণী এতোবার তার কানে এসেছে যে এখন তার মুখস্থ হ'য়ে গেছে সব।

‘আমাকে সময় দিন কমরেড চীফ। আমার আবার ঠিকমতো কথা আসে না। দাঁতে আটকে থাকে কথাগুলো, দম বন্ধ ক'রে দেয়। আমি বলি কী, একবার মেয়েদের ছাউনিতে গিয়ে ও-সব আজোবাজে ব্যাপার বন্ধ করার হুকুম দিন। নয়তো ব্যাপারটা কী দাঁড়াবে শুনি, “সবাই কোলচাকের বিরুদ্ধে এক হও”? না, মেয়েদের মধ্যে গৃহযুদ্ধ?’

‘কী বলতে চাচ্ছে, তাড়াতাড়ি বলো, স্ভিরিড। দেখছো তো, ওরা আমাকে ডাকছে। টেনে-বুনে আর কথা বাড়িয়ে না।’

‘আর তাছাড়া ঐ মাগিটা আছে, কুবারিখা—মেয়েটা আসলে কী, তা শয়তানই জানে। সে বলে কী: পোষা জন্তুগুলোর চিকিৎসার জন্য ভেণ্ডিলেটর আমি, বুঝেছো?...’

‘ভেণ্ডিলেটর? ও, ভেটেরেনারি—পশুর ডাক্তার।’

‘তাই তো বলছি—পোষা পশুদের বদহজম সারিয়ে দেবার জন্য এক মেয়ে-ভেণ্ডিলেটর ব'লে নিজেকে ভাবছে সে। কিন্তু এখন সে আর পশুদের দেখাশোনা করে না, বজ্জাত মাগি, শয়তানের মহামান্য জননী! গোরুদের কাছে গিয়ে “মাস্”—এব' মস্ত্র পড়ে সে, আর অল্পবয়সী উদ্বাস্ত বৌয়েদের কাজ করতে বারণ করে। “এতো দুঃখকষ্টের জন্য তোমরা নিজেরাই দায়ী。” এই কথা সে বলে তাদের। “ঘাঘরা তুলে লাল ঝাণ্ডার পেছনে ছোট্টার এই ফল। আর কখনো এমনটি কোরো না।”

‘কোন উদ্বাস্তদের কথা বলছে—আমাদের ক্যাম্পের, না অন্য কোনো দল?’

‘অন্যদের কথাই বলছি। ঐ নতুন এসেছে, আমাদের অচেনা।’

‘কিন্তু তাদের তো ডভোরিতে যাবার হুকুম দেওয়া হয়েছিলো। এখানে তারা এলো কী ক'রে?’

‘ডভোরি! হ্যাঁ, সেটা চমৎকার জায়গাই বটে! ডভোরি জ্ব'লে শেষ হ'য়ে গেছে, মিল-টিল যা ছিলো সব, ছাইভস্ম ছাড়া আর-কিছুই নেই। ওখান গিয়ে তাই দেখেছে তারা—একটাও জ্যাস্ত প্রাণী নেই, শুধু ছাই আর ধ্বংস, অর্ধেকের 'তো এই দেখেই মাথা খারাপ হ'য়ে

১ খ্রীস্টান ‘maw’ অনুষ্ঠানের কথা বলা হচ্ছে, যাতে রুটি ও সুরা যীশুর রক্তে ও মাংসে পরিণত হয় ব'লে বিশ্বাস করা হয়। এই অনুষ্ঠান বর্তমানে প্রটেষ্ট্যান্টরা পালন করেন না। রোমান ক্যাথলিক ও অর্থডক্স চার্চে প্রচলিত আছে।—অনুবাদের টীকা

গেলো—দাপাদাপি ক’রে কেঁদে-কেটে চুঁচিয়ে তক্ষুনি শাদাদের কাছে চ’লে গেলো, বাকি অর্ধেক ফিরে এলো এদিকে।’

‘কিন্তু “টায়িগা”র ভেতর দিয়ে তারা এলো কী ক’রে জলা পেরিয়ে?’

‘করাত, কুড়ুল, এ-সব আছে কী করতে? পাহারা দেবার জন্যে আমাদের এখান থেকে যে-সব ছেলেছোকরা গিয়েছিলো, তারা কেউ-কেউ অবশ্য কিছুটা সাহায্য করেছে তাদের। তারা নাকি কুড়ি মাইল রাস্তা বানিয়েছে, তাই তো বললো। সাঁকোটাকো সব স্ফুট। কী জাইবাজ ভাবুন! এদের আবার মেয়েমানুষ বলে! এমন সব কাজ তারা করেছে, যার জন্যে তিরিশটা রোববার লাগবে আমাদের।’

‘বাঃ চমৎকার—একেবারে কুড়ি মাইল রাস্তা। আর গর্দভচন্দ্র, এতে তোমার খুশি হওয়ার কী আছে? শাদারা তো ঠিক এটাই চাচ্ছিলো—“টায়িগা”র ভেতর দিয়ে একটা বড়ো রাস্তা। এখন শুধু গোলন্দাজদের পাঠালেই—বাস!’

‘একটা ফৌজ—একটা ফৌজ পাঠিয়ে দিন, তারাই শত্রুদের অন্য দিকে বাস্ত ক’রে রাখবে।’

দিন ক্রমেই ছোটো হ’য়ে আসছে, পাঁচটার সময়েই অন্ধকার ক’রে এলো। কয়েকদিন আগে রাজপথের যেখানটায় দাঁড়িয়ে স্ভিরিটের সঙ্গে লিবেরিয়ুস কথা বলছিলো, সন্ধ্যাবেলা ইউরি সে-জায়গাটা পেরিয়ে এলো। ক্যাম্পে ফিরছে সে। ছাউনির বাইরে খোলা জায়গায় যেখানে ছোটো টিলা আর জামগাছটা ক্যাম্পের সীমা নির্দেশ করছে, সেখানে এসে সে তার ‘প্রতিদ্বন্দ্বী’ কুবারিখার তীব্র চড়া গলা শুনতে পেলো; ঠাট্টা ক’রে সে পশুর ডাক্তারকে তার ‘প্রতিদ্বন্দ্বী’ ব’লে ডাকে। এক মেজাজি ফুর্তিবাজ ছড়া গেয়ে শোনাস্ছে কুবারিখা, তার গলা যেমন চড়া, তেমনি কর্কশ। সমর্থনসূচক হাসির দমকে যে-ভাবে বারে-বারে তার গান থামিয়ে দেওয়া হচ্ছে, তা থেকে বোঝা গেলো যে, একদল মেয়ে-পুরুষ তার গান শুনছে। তার পরেই হঠাৎ নীরব হ’য়ে গেলো সব। তার মানে—ভীড় ভেঙে গেলো।

একলাই আছে সে, এই ভেবে কুবারিখা এবার অন্য গান ধরলো, গলা এতো কোমল হ’য়ে এলো যেন শুধু নিজের জন্যই গাইছে। জামগাছের কাছে জলার গা ঘেঁষে পায়ে-চলা পথ গেছে; অন্ধকারে সাবধানে চলতে-চলতে এই গান শুনে ইউরি পথের ওপর দাঁড়িয়ে পড়লো। পুরোনো একটা লোকসংগীতের মতো শোনালেও গানটা ইউরি চিনতে পারলো না; হয়তো এটা মুখে-মুখেই বেঁধে নিচ্ছে কুবারিখা।

রুশ লোকসংগীত হচ্ছে নদীজলের মতো। এমনিতে দেখে মনে হয় শান্ত হ’য়ে আছে, জলে স্রোত নেই, অথচ গভীরে তার ক্ষান্তিহীন প্রবাহ বন্যার মতো ব’য়ে চলেছে জলদ্বার দিয়ে। আসলে তার নিশ্চলতা এক মায়া।

যতোরকম সম্ভবপর উপায় আছে, সব দিয়ে—পুনরাবৃত্তি, উপমা, উৎপ্রেক্ষা—সব দিয়ে তা তার ভাবনার ধারাবাহিক উন্মোচনে বাধা জন্মাতে চায়, স্নেহ করতে চায় গতি, আর এমনি ক’রেই তা পৌঁছয় এক রহস্যময় চূড়ায়, যেখানে তা হঠাৎ নিজেকে অনাবৃত ক’রে দেয়। সমস্ত স্রোতকে থামিয়ে দেবার এই পাগল চেষ্টার মধ্য দিয়েই এক দুঃখী, আত্মসমর্পণ প্রকাশের উপায় খুঁজে বের করে।

কিছু গান, কিছু কথা দিয়ে কুবারিখা বললে:

‘মস্ত পৃথিবীর ওপর দিয়ে ছুটছে এক খরগোশ,
শাদা বরফের ওপর দিয়ে, মস্ত পৃথিবীর ওপর দিয়ে,
ছুটছে এক কানঝোলা খরগোশ, জামগাছ পেরিয়ে,

দেখা
এটা কিনা

জামগাছ পেরিয়ে যেতে-যেতে বললে সেই গাছটিকে:

'আমি—এক কানঝোলা খরগোশ, নয় কি ভিত্তু আমার হৃদয়,

বুনো জন্তুর পায়ের ছাপে সম্ভ্রান্ত,

বুনো জন্তুর পায়ের ছাপ, বুনো নেকড়ের দাউ-দাউ পেট

ওগো জামগাছ, ওগো সুন্দরী গাছ, আমাকে দয়া করো।'

পাজি শত্রুরকে দিয়ে না তোমার রূপ,

পাজি শত্রুর, বদমাস দাঁড়কাক।

তোমার লাল-লাল জামগুলিকে ছিটিয়ে দাও হাওয়ায়,

দাও হাওয়ায় মুঠো-মুঠো ছিটিয়ে, উড়িয়ে নিক

মস্ত পৃথিবীর ওপর দিয়ে শাদা বরফের ওপর দিয়ে,

দাও ঝুঁড়ে, গড়িয়ে চ'লে যাক আমাব বাস্তভিটার শহরে,

রাস্তার শেষ প্রান্তে, শেষ বাড়িটি পর্যন্ত,

রাস্তাব শেষ বাড়ি, শেষ জানলা, সেই ঘর

যেখানে একান্তে নির্জনে সে লুকিয়ে আছে—

সে, আমার প্রেমসী, আমার কান্তা।

কানে-কানে বলো তাকে, আমার দুর্গমখনি বধুকে—

একটি ভালোবাসার কথা বলো।

সেপাই আমি, বন্দী হয়েছি, মনে আমার সুখ নেই,

বাড়ির জন্যে মন-কেমন করছে—সেপাই আমি, বিদেশে প'ড়ে আছি।

আমি পালাবো এই বন্দী দশা থেকে,

যাবো ফিরে আমার লাল জামফলের কাছে, আমার প্রেমসীর কাছে।'

৭

পাম্ফিলের স্ত্রী আগাথা তার অসুস্থ গোরুটি কুবারিখার কাছে নিয়ে এসেছে। পাল থেকে আলাদা ক'রে নেওয়া হয়েছে গোরুটিকে, শিঙে দড়ি বেঁধে আটকে রাখা হয়েছে গাছের সঙ্গে। আগাথা ব'সে আছে গোরুটার সামনের পায়ের কাছে, গাছের গুঁড়ির ওপর, আর পেছনের পায়ের কাছে, দোয়াবার টুলে ব'সে আছে কুবারিখা।

পালের অন্য অসংখ্য গোরুগুলো একটা খোলা জায়গায় ঠাশাঠাশি ক'রে আছে; তাদের ঘিরে আছে ত্রিকোণ ফার গাছের একটি কালো বন, পাহাড়ের মতো উঁচু গাছগুলি, ছড়িয়ে-দেওয়া তলার ডালপালা থেকে এমনভাবে উঠে এসেছে যে মনে হয় যেন পৃষ্ঠ পাছা মাটিতে ঠেকিয়ে উবু হ'য়ে ব'সে আছে।

প্রায় সব গোরুই শাদা আর কালো; সুইৎসারল্যান্ডের এক বিশেষ জাতের গোরু সাইবেরিয়ায় খুব জনপ্রিয়—এরা সে জাতের। নিস্তেজ হ'য়ে প'ড়ে আছে তারা—মালিকদের চেয়ে কোনো অংশেই কম নয় তাদের এই অবসাদ; অনাহার, অন্তহীন ভ্রমণ, অসহ্য ভীড়—সব তাদের অবসন্ন ক'রে রেখে গেছে। স্থানের অভাবে উন্মাদের মতো এ ওর গায়ে ঘেঁষাঘেঁষি ক'রে দাঁড়িয়ে থাকতে-থাকতে তারা যদি না মরত তাই ভুলে গেছে, একটার আর-একটাকে কোণঠাশা ক'রে রেখেছে, কোনোটা হয়তো অন্যটার ওপর চেপে ব'সে আছে, চেষ্টা ক'রে ভারি ঝাঁট তুলে চ্যাচাচ্ছে ঝাড়ের মতো। যে-সব বকনাবাহুর তাদের তলায় চাপা প'ড়ে গিয়েছিলো, কোনোরকমে ঠেলেঠেলে তলা থেকে উঠে আসছে তারা, শূন্যে ল্যাজ তুলে লতাপাতা ডালপালা

দুমড়ে ভেঙে বনের দিকে ছুটে যাচ্ছে। ছেলে-বড়ো যতো রাখাল ছিলো, সবাই চাঁৎকার করতে-করতে ছুটেছে তাদের পেছনে।

আর সেই ফাঁকা জায়গাব ওপরে শীতের আকাশের শাদা-কালো মেঘগুলোকেও যেন তাদেরই মতো গাছের ডগার কঠিন বেট্টনীর মধ্যে ঠেপে দেওয়া হয়েছে, তারাও তেমনি কোণঠাশা হ'য়ে স্থপ হ'য়ে আছে স্তরে-স্তরে, আব গোরুদের মতো তেমনি তুমুল বিশৃঙ্খলায় মাথা ঘুরে হুমড়ি খেয়ে প'ড়ে যাচ্ছে।

দূরে যারা মজা দেখার জন্য ভিড় করেছিলো, তারা এই তুকতাক-জানা মেয়েটিকে বিরক্ত ক'রে তুললো। কষ্ট চোখে তাকিয়ে সে আগাপাশতলা দেখে নিলো তাদের। কিন্তু তারা যে তাকে উদ্ভাস্ত করেছে, একথা বলতে তার শিল্পী-মর্যাদায় আঘাত লাগলো। তাই এমন ভঙ্গি ক'রে থাকবে ব'লে ঠিক করলে, যাতে মনে হয় সে তাদের দেখতেই পায়নি। ভিড়ের পেছন থেকে ইউরি তাকে লক্ষ করতে লাগলো: সে ইউরিকে দেখতে পেলো না।

এই প্রথম ইউরি তাকে ভালো ক'রে লক্ষ করার সুযোগ পেলো। সাধারণত সে যা প'বে থাকে—পদাতিক বাহিনীর খোলা টুপি আর ইংবেজ সেপাইয়ের কড়াইশুটির মতো সবুজ রঙের দুমড়োনো গলাবন্ধওলা ঢিলে কোট—তা-ই তার পরনে। কিন্তু তার মুখের আবেগে ভরা উদ্ভূত ভাবটি এই শ্রৌটার চোখে তারুণ্যের আলো-ছায়া ছেলে দিয়ে, স্পষ্ট বুঝিয়ে দিয়েছে যে সে কী কাপড় পরে বা পরে না সে-বিষয়ে সে সম্পূর্ণ নির্বিকার।

ইউরিকে যেটা অবাক ক'রে দিলে, তা হ'লো পামফিলের স্ত্রীর পরিবর্তন। তার চোখ দুটি কেটির থেকে প্রায় বেরিয়ে আসছে, গাড়ির হাতলের মতো লম্বা আর রোগা হ'য়ে গেছে তার গলা। তার সব গোপন আতঙ্ক তাকে গত কয়েক দিনের মধ্যে এতো বড়িয়ে দিয়েছে যে ইউরি প্রথমে তাকে চিনতেই পারেনি।

'গোরুটা মোটেই দুধ দেয় না গো,' সে বলছিলো। 'প্রথমে ভেবেছিলাম গাভিন হয়েছে, কিন্তু তাহ'লেও তো এতোদিনে তার দুধ এসে যাওয়ার কথা, অথচ একফোঁটা দুধ নেই।'

'গাভিন হয়েছে, কে বললে? ঐ তো স্পষ্টই দেখা যাচ্ছে ঝাঁটে মামড়ি হয়েছে। ওষুধ দেবো তোকে, গাছ-গাছড়ার রস, ওখানে মালিশ ক'রে দিস। আর তা ছাড়া মস্তুর দিয়েও ঝেড়ে দেবো।'

'আমার আর-এক অশান্তি আমার সোয়ামি।'

'ওকেও তুক ক'রে দেবো—আর চ'রে বেড়াবে না। সোজা ব্যাপার! শেষে দেখবি এমন লেপটে থাকবে তোর সঙ্গে যে ছাড়াতেই পারবি না। তিন নম্বর অশান্তিটা কী?'

'তুমি যে বললে চ'রে বেড়াচ্ছে তা কিন্তু নয়। তাহ'লে তো ভাবনাই ছিলো না। আসল মুশকিলটা এই যে সে আঁকড়ে থাকে আমাদের—আমাকে, কচিকাচাগুলোকে—আর তাই তো ওর কষ্টের শেষ নেই গো। ও কী ভাবছে আমি জানি তো। ভাবছে ওরা একটা ক্যাম্পো ভেঙে দ্রুটো করবে, আমাদের একদিকে পাঠিয়ে দেবে, আর ওকে অন্য দিকে। তারপর আমরা গিয়ে বাসালিগোর সাক্ষপাঙ্গদের হাতে পড়বো, আর ও তখন সেখানে থাকবে না, আমাদের রক্ষে করার মতো কেউ থাকবে না সেখানে। আর ওরা আমাদের তিলে-তিলে যাতনা দেবে, আমাদের যাতনা দেখে আত্মদে আটখানা হবে ওরা। এই সবই ভাবছে ও, আমি তো জানি ওকে। ভয় লাগে, কখন 'না আত্মহত্যা ক'রে বসে।'

'ভেবে দেখবো। যাতে তুই দুঃখ না পাস তার একটা উপায় আমি করবোই। কিন্তু তোর তিন নম্বর কষ্টের কথা বললি না?'

'আর কোনো কষ্ট নেই আমার। এই দুটোই—আমার গোরু, আর আমার সোয়ামি।'

'তোর কষ্ট বড়ো কম তো! ভেবে দ্যাখ, ঠাকুর কী দয়া করেছেন তোকে। কালেভদ্রে দেখা যায় তোর মতো, খড়ের গাদায় ছুঁচের মতো তুই। মাস্তুর দুটো অশান্তি, আর তার একটা কিনা

সোয়ামির সোহাগ! বেশ, বেশ। তা, এবার তবে শুরু করা যাক। গোরুটার বাবদ কী দিবি আমাকে?’

‘কী চাও?’

‘একটা আস্ত পাউরুটি আর তোর ভাতারটিকে।’

চারদিকে লোকেরা হেসে উঠলো।

‘ঠাট্টা করছো?’

‘বডু দর হৈকেছি, না? ঠিক আছে, পাউরুটিটা না-হয় ছেড়ে দিচ্ছি। শুধু সোয়ামিতেই রফা হয়ে যাক।’

হাসি আরো জোরালো হ’য়ে উঠলো।

‘নাম কী? তোর ভাতারের নয়, গোরুটার।’

‘রূপসী।’

‘পালের অর্ধেকেরই তো তা-ই নাম। ঠিক আছে। এবার ঠাকুরের নাম নিয়ে শুরু করি।’

মন্ত্র পড়লো সে গোরুর জন্য। প্রথমটায় সতিই সে গোরুটার দিকে মন দিয়েছিলো, কিন্তু একটু পরেই ঐ বিষয় থেকে স’রে এসে ঝাড়ফুক বিষয়ে আগাথাকে আস্ত এক বক্তৃতা শুনিতে দিলে। যোয়োরপীয রাশিয়া থেকে প্রথমবার সাইবেরিয়ায় এসে ইউরি যে-ভাবে কোচোয়ান ব্যাকাসের লম্বা-চওড়া কথা শুনেছিলো, তেমনি মন্ত্রমুগ্ধের মতো শুনতে লাগলো সে।

কুবাবিখা বলেছিলো:

‘মাগেস্টি-মাসি, এসো, পায়ের ধুলো দাও আমাদের বাড়িতে। বৃথবারে এসো তুমি, এসে বিদেয় কোরো আপদবালাই, বিদেয় করো শাপমনি, আর খোসপাচড়া আর মামড়ি। ওরে ব্যাটা দাদ, ঐ বাছুরটার বাঁট ছেড়ে পালা দেখি! রূপসী, ঠিক হ’য়ে দাঁড়া, কাজ কর ঠিকমতো, উল্টে দিসনে হাঁড়ি। টিলার মতো চুপচাপ দাঁড়িয়ে থাক, ঝরঝর দুধ আর ব’য়ে যাক ধারা। ভয়, ভয়, তোর তেজ কোথায়, নিয়ে যা সব ব্যামো, নিয়ে যা মামড়ি, ফণিমনসায় ফেলে দিয়ে আয়। তোকেই বলি ডাইনি-মন্তুর, যার রাজার মতো তেজ।

‘বুঝলে তো আগাথা, সব কিছুই জানতে হয়—ডাক দেওয়া, তাড়িয়ে দেওয়া, পালাবার মন্তুর আবার ভালো থাকার মন্তুর—সব। সব হালচাল জেনে নিতে হয় প্রথমে। যেমন তুই—তুই এখন ওদিকে তাকিয়ে বলবি: “ওখানে একটা বন আছে।” কিন্তু আসলে ওখানে কী আছে. না ওখানে এখন দেবদূতের সঙ্গে শয়তানের চেলাদের লড়াই চলছে—ঠিক যেমন তোদের মরদরা লড়াইে বাসালিগোর সঙ্গে।

‘নয়তো—আর-একটা নমুনা নে। যেদিকে বলছি, সেদিকে তাকা দিকি। তুমি বাছা ভুল দিকে তাকাচ্ছো—চোখ, চোখ দুটো লাগাও, মাথার পেছনে নয়, ঠিক আমার আঙুল বরাবর তাকাও। হ্যাঁ, এই তো ঠিক! এখন, বল দিকিনি, ওটা কী হ’তে পারে ব’লে তোর মনে হচ্ছে? হাওয়ায় দুটো গাছের কুরি জড়িয়ে গেছে, এই তো? আর নয়তো কোনো পাখি বাসা বাঁধছে—বড়ো জোর এই তুই ভাবতে পারিস। আসলে কিন্তু কোনোটাই না। আসলে ওটা হচ্ছে শয়তানের এক খাঁটি খেলনা, জলার পেড়ি তার মেয়ের জন্য মালা গাঁথছে। যেই শুনেছে লোকজনের পায়ের শব্দ, অমনি ভয়ের চোটে আধাখেঁচড়া রেখে চ’লে গেছে। কিন্তু দেখে নিস, কোনো-এক রাণিরে এসে শেষ ক’রে যাবে—ছাড়বে না।

‘নয় তো তোদের ঐ লাল ঝাণ্ডার কথাই ধর না। তোর তো এটাকে নিশেন ব’লেই জানিস, তাই না? কিন্তু জানিস, ওটা নিশেনই নয়। আসলে ‘ওটা হ’লো করালী দেবীর লাল রুমাল—ওটা দিয়েই লোভ দেখায় সে। কী ক’রে লোভ দেখায়? না, ওটা নাড়ে, মাথা দুলিয়ে ডাকে, চোখ টেপে, ছেলে-ছোকরাদের উলকে দেয় এগিয়ে আসতে, যাতে এসে ওরা ম’রে যায়, আর তারপর সে পাঠিয়ে দেয় দুর্ভিক্ষ আর মহামারী; আসলে ব্যাপারটা হ’লো এই। আর

তোরা কিনা তাকে বিশ্বেস করিস। তোরা কিনা ভাবিস এটা হ'লো নিশেন, তোরা ভাবিস এটা বলছে: “যতো গরিব-গরবা সর্বোহারা আছো, সবাই তোমরা আমার কাছে চ'লে এসো।”

‘আজকাল বাছা সব-কিছুই জানতে-শুনতে হয়, কিছুই বাদ দেওয়া যায় না, পাখি, নুড়ি, লতাপাতা—সব-কিছুকেই চিনতে হয়। যেমন ঐ পাখিটা—ওটা হ'লো কিচমিচে পাখি। আর ঐ জানোয়ারটা হ'লো ভাম।

‘তারপর ধর আরেকটা কথা। যদি কাউকে তোর মনে ধ'রে থাকে, একবার তার নামটা ব'লে ফ্যাল। তোর জন্য তাকে হা-পিতোশ করিয়ে ছাড়বো, তা সে যেই হোক না কেন। চাস তো এখানকার রাজা ঐ বনদেবতাকেই ধ'রে এনে দেবো, আর নয় তো কোলচাক, ‘ক রাজপুত্র ইভান’—যাকে খুশি। ভাবছিস, জাক করছি? মোটেই না! তবে শোন, সব খুলে বলি তোকে। পেছন-পেছন ঘূর্ণিহাওয়া তুষারঝড় আর বকবাকে বরফ ছুটিয়ে দিয়ে যখন শীত আসবে, ও-বকম একটা বরফেব থামে ছুরি বিধিয়ে দেবো আমি, একেবারে ঠোট পর্যন্ত, তারপর যখন সেটা বরফেব ভেতর থেকে বের ক'রে আনবো, দেখবি ওটা বজ্র একেবারে লাল হ'য়ে আছে। শুনেছিস কখনো এমন কথা? তবেই দাখ! আর তুই কিনা ভাবছিলি আমি খামকা জাক করছি! এখন বল দেখি, হাওয়া আর বরফ দিয়ে তুষার-স্তুভ তৈরি হয়, তার ভেতর থেকে রক্ত বেরোয় কী ক'রে? সেই কথাই তো তোকে বলছি, বাছা। ঐ ঘূর্ণিহাওয়া শুধু হাওয়া আর বরফই নয়, আসলে ও হ'লো এক ডাইনি-বাশ, পরির চোরাই মাল—তার একরঙি ছানাকে হারিয়েছে সে, খুজে বেড়াচ্ছে তাকে—তার খোঁজে সে মাঠে-ঘাটে কঁদে বেড়ায়। ঐ ছুরি দিয়ে যে-কোনো লোকের পায়ের ছাপ কেটে নিতে পারি আমি, তারপর রেশমি সুতো দিয়ে হেঁদেব ঘাগরায় শেলাই ক'রে দিতে পারি, আর ঐ লোকটা—কোলচাক কি স্টেলনিকভ কি নতুন কোনো জার, যে-ই হোক না কেন সে—তোর পায়ে-পায়ে ঘুরবে সে সব সময়। আর তুই কিনা ভাবছিলি আমি মিছে কথা বলছি! ভাবছিলি এটা হ'লো: “যতো গরিবগরবা আর সর্বোহারা আছো—সবাই চ'লে এসো আমার কাছে।”

‘আরো অনেক ব্যাপার আছে। যেমন স্বগগো থেকে পাথর বৃষ্টি, যেই কেউ ঘর ছেড়ে বেরোয়, অমনি তার ওপর বৃষ্টির মতো পাথর পড়তে থাকে। নয়তো ধর, আকাশ দিয়ে যে-ঘোড়সওয়ারের দল চ'লে যায় বাড়ির ছাতে খুর ঠেকিয়ে—অনেকেই তো দেখেছে তাদের। নয়তো যেমন আগেকার দিনের ডাইনিরা বচন দিতো: “এই মেয়েটার মধ্যে গম আছে, ওর মধ্যে মধু, আর ওটাব মধ্যে কাঠবেড়ালির লোম।” তারপর লোকে যেমন ক'রে গয়নার বাস্র খোলে, তেমনি ক'রে বীরপুরুষেরা ফেঁড়ে দিতো কাঁধ, জাব তলোয়ার দিয়ে কাঁধের হাড় থেকে বের ক'রে নিতো মধুর চাক, গমের কুনকে, কি আস্ত কাঠবেড়ালি।’

যতো বকম দৃঢ় অনুভূতি পৃথিবীতে এখানে-ওখানে আমরা দেখতে পাই, তাদের কোনোটাই করুণার স্পর্শরাহিত নয়। যতো বেশি আমরা ভালোবাসি, ততোই ভালোবাসার জনকে বলি দিচ্ছি ব'লে মনে হয়। মাঝে-মাঝে কোনো নারীর প্রতি কোনো পুরুষের করুণা সীমা ছাড়িয়ে যায়, তখন কল্পনায় সেই নারীকে সে সম্ভবপর সমস্ত ঘটনা থেকে সরিয়ে নিয়ে এমন অবস্থায় স্থাপন করে, যা বাস্তবে ঘটতেই পারে না। চারদিকের বাতাস, প্রকৃতির বিধান, আর অতীত সব শতাব্দী—এদের সকলের দয়ার ওপর সেই নারী নির্ভর করছে—এমনি তখন মনে হয় তার।

ইউরির অন্তত এটুকু পড়াশুনো ছিলো যা থেকে সে ধরতে পারলে যে, কুবারিয়ার শেষ কথাগুলো নভগোরড কি ইপাটিয়েভোর কোনো প্রাচীন বিবরণীর আরম্ভ, কিন্তু পৃথি লেখার ভুল আর ডাইনি-পুরুষ ও ওঁঝাদের পুনরাবৃত্তির ফলে তা এতোটা বিকৃত হয়েছে যে তার মূল অর্থ আর একটুও অবশিষ্ট নেই। কিন্তু তা-ই যদি হয়, তাহ'লে কেন এই আবোলতাবোল

চিত্রকল্পগুলি তার মনটাকে আকড়ে ধরে এমনভাবে নাড়া দিয়ে গেলো, যেন কোনো সত্য ঘটনার কথা বলা হচ্ছে?

....অর্ধেক অনাবৃত ছিলো লারার ঝাঁ কাঁধ। যেন কোনো গোপন সিন্দূকের চাবি ঘুরে গেলো, এমনভাবে তলোয়ার উঠে চিরে দিলে তাব কাঁধের হাড়, আর অমনি খুলে গেলো তার আত্মার দেবরাজ, গোপন ব'লে যা-কিছু তার ছিলো সব প্রকাশ ক'রে দিলো। আশ্চর্য সব শহরের স্মৃতি, গ্রাম, রাস্তা, ঘব-বাড়ি—সব স্মৃতি চলচ্চিত্রের মতো ভাঁজের পর ভাঁজ খুলে বেবিয়ে এলো, লটাই থেকে ফিতের মতো দ্রুত বেরিয়ে এলো তারা, এলোমেলো।

কী তাঁর সে তাকে ভালোবাসে, আর কী যোগ্য লারা তার ভালোবাসার—ঠিক তেমন সে চিরকাল ভেবেছে, ঠিক যেমন সে চেয়েছে, স্বপ্নে, চিন্তায়, জীবনে, অবিকল তা-ই, শুধু তা-ই। এতো লাভগা কে দিলে তাকে? তা কি এমন কিছু যার কোনো নাম দেওয়া যায়? তা কি কোনো বিশেষ গুণ, যাকে গুণের তালিকা থেকে আলাদা ক'রে নেওয়া যায়? না, না, হাজারবার না! তুলনাইন সেই সবল আর দ্রুত রেখা, যা দিয়ে এক টানে স্রষ্টা রচনা করলেন তাকে; আর তা-ই, একমাত্র তা-ই তার সৌন্দর্যের কারণ। স্নান করাবার সময় যে-ভাবে কোনো শিশুকে চাদরে জড়িয়ে নেওয়া হয়, ঠিক তেমনি সেই স্বর্গীয় রেখায় সম্পূর্ণ ক'রে, ইউরির আত্মার কাছে তাকে তুলে দেওয়া হলো।

আর এখন—এখন কী ঘটছে তার নিজের মধ্যে? কোথায় সে আছে এখন? না, সাইবেরিয়ার এক জঙ্গলে পাটিজানদের সঙ্গে, যাদের ঘিরে ফেলা হয়েছে চারদিক থেকে, যে-নিয়তির অংশ তাকেও নিতে হবে। কী অবিশ্বাস্য, কী অযৌক্তিক এই সংকট। মাথার ভেতর কুয়াশা নেমে এলো, কুয়াশা নামলো তার চোখে। সব ঝাপসা হ'য়ে গেলো। প্রত্যাশিত ঝুঝরপাতেব বদলে মুহূর্তে নেমে এলো গুঁড়ি-গুঁড়ি বৃষ্টি। শহরের রাস্তার এ-মাথা থেকে ও-মাথা পর্যন্ত কেউ মস্ত এক নিশ্চেষ্ট উড়িয়ে দিলে যেমন হয়, তেমনি বানের কাছে সেই খোলা জায়গার এ-প্রান্ত থেকে ও-প্রান্ত পর্যন্ত এক অতিকায়, বিশ্বয়কর, অদ্বিতীয় দেবী-প্রতিমাব মুখ শূন্যে ভেসে উঠলো। কানলো সেই মূর্তি, বৃষ্টি তাকে চুষন ক'রে তার ওপর জল ঝরিয়ে দিলো।

'এবার যা,' ডাইনি বললে আগাথাকে। 'মস্ত প'ড়ে দিয়েছি তোমার গোরুর জন্যে, আস্তে-আস্তে সেরে উঠবে। ঠাকুরের মায়ের পায়ে পেঁয়াম ঠুকিস, তাঁরই মধ্যে আলো, তাঁরই মধ্যে বাসা বেঁধে আছে জ্যাস্ত অক্ষরে লেখা বই।'

৮

লড়াই চলছিলো 'টায়িগা'র পশ্চিম কিনারে। কিন্তু 'টায়িগা'টি মস্ত ব'লে এই সংঘর্ষগুলিকে সব সময়েই সেই এলাকারই সীমান্তযুদ্ধ ব'লে মনে হয়; ক্যাম্পটা তার ঠিক মাঝখানে লুকোনো, তার জনসংখ্যা এতো যে যতোজনই লড়াই করতে যাক না, সর্বদাই মনে হয় আরো ঢের বেশি লোক র'য়ে গেছে।

সুদূর যুদ্ধের চ্যাচামেচি কচিৎ পৌছয় ক্যাম্পে। আচমকা একদিন জঙ্গলের ভেতর কয়েকটা গুলির শব্দ গ'র্জে উঠলো, তারপর চোখের পলকে তা ভরে গেলো অবিচ্ছিন্ন গুলিবর্ষণের দ্রুত ও কর্কশ শব্দে। লোকেরা চকিত হ'য়ে উঠে দাঁড়ালো, দ্রুত ছুটলো তাঁবু অথবা ওয়্যগনের দিকে; সবাই একসঙ্গে হাতিয়ার সংগ্রহের চেষ্টা করতে গিয়ে চারদিকেই বিশৃঙ্খলা জাগিয়ে তুললো।

পরে প্রমাণ হ'লো বিপদসংকেতটি মিথ্যে। কিন্তু ততোক্ক্ষেণে যেদিক থেকে গুলির শব্দ এসেছিলো, পাটিজানেরা দলে-দলে সেদিকে ছুটে গিয়েছে।

হাত-পা কাটা রক্তাক্ত একটা মানুষের খড় মাটিতে প'ড়ে আছে—সবাই তাকে ঘিরে

দাঁড়ালো। লোকটির ঝাঁপ আর ডান হাত উড়ে গিয়েছে। কী ক'রে যে সে তার ঐ বাকী শরীরটুকু টেনে হিচড়ে ক্যাম্প এসেছে তা কল্পনাই কবা গেলো না। তাব ছিন্ন হাত আর পায়ের একটু অংশ তখনো তাব পিঠে ঝাঁপা, ভীষণ রক্তপাতের চিহ্ন তাব সর্বত্র, সেই সঙ্গে জোট্ট একটা কাঠের তক্তাও দেখা গেলো; লম্বা এক বিজ্ঞপ্তি তাতে উৎকীর্ণ, এতদূর গালি-গালাজসমেত তাতে বলা হয়েছে যে লাল ফৌজের অমুক-অমুক বাহিনী ঠিক এই জাতীয় নৃশংসতা করেছে। ব'লে এইভাবে প্রতিশোধ নেওয়া হ'লো—যে-বাহিনীর কথা তাতে লেখা, আবগাক হাতদ্বয়ের সঙ্গে তার কোনোই সম্পর্ক নেই। তাতে আবার এটাও যোগ করা ছিলো যে অমুক তারিখের মধ্যে যদি পাটিজ্ঞানবো সবাই আত্মসমর্পণ ক'রে জেনারেল ভিটসিনের বাহিনীর হাতে সব অস্ত্রসম্পদ তুলে না দেয়, তাহ'লে তাদেরও এমন দশা হবে।

ভিটসিনের তদন্ত ও পিটুনি সেপাইরা নির্যাতন ও নরহত্যার কী-রকম তাণ্ডব চালিয়ে যাচ্ছে, অবিশ্রাম রক্তপাতে মুহূর্তের মতো প'ড়ে থাকলেও থেমে-থেমে ক্ষীণ গলায় মুমূর্ষু লোকটি তা এক-এক ক'রে ব'লে গেলো। তার নিজের প্রাণদণ্ডাজ্ঞা নাকি রদ করা হয়েছিলো; যাতে তাকে ক্যাম্প পাঠিয়ে পাটিজ্ঞানদের ভেতর ভয় ঢুকিয়ে দেওয়া যায়, সেইজন্য তাকে ফাঁসিকাঠে না-ঝুলিয়ে তারা তার হাত-পা কেটে নিয়েছে। পাটিজ্ঞানদের ঘাঁটির কাছাকাছি পর্যন্ত তারা ব'য়ে নিয়ে এসেছিলো তাকে। তারপর তাকে নামিয়ে দিয়ে বৃকে ছেঁটে যাবার হুকুম দিলে, বাবে-বাবে বন্দুকের ফাঁকা আওয়াজ ক'রে তাকে উশকে তুলতে লাগলো।

ঠোট প্রায় নাড়তেই পারছিলো না লোকটি। তার চারপাশের লোকেরা তার কথা শোনার জন্য তার ওপর ঝুঁকে পড়লো। বলছিলো সে:

‘শোনো, কমরেডরা। সে কিন্তু জোর ক'রে ঢুকে পড়েছে।’

‘দলে-দলে টহলদারী সেপাই বেরিয়ে পড়েছে। মস্ত লড়াই চলেছে এখন। ওকে আমরা ধরবো।’

‘একটা ফাঁকা জায়গা আছে ওদিকে। আচমকা তোমাদের ওপর ঝাঁপিয়ে পড়তে চায় সে। আমি জমি ... আর কথা কইতে পারছি না, বন্ধুরা। এবার গেল্যাম।’

‘একটু জিরিয়ে নাও। এই, চেষ্টা করো না।—দেখছো না ওর কষ্ট হচ্ছে—কসাই কোথাকার!’

আবার বলতে শুরু করলো লোকটি:

‘ভয় দেখাতে চাচ্ছিলো আমাকে, ব্যাটা শয়তান! বলেছিলো: “যদি না বলিস তুই কে, তাহলে ভোকে নিজের রক্তে নাইতে হবে।” কিন্তু কী ক'রে আমি তাকে বলি যে, আমি এক দলছুট সেপাই—সত্যি তাই? তার হাত থেকে পালিয়ে তোমাদের কাছে আসছিলাম আমি।’

‘শুধুই বলছো—সে, সে। কে সে, যে তোমাকে ভয় দেখাচ্ছিলো?’

‘একটু দম নিতে দাও ... সব বলছি একে-একে। কাপ্তানটি হ'লো বেকেশিন। আর স্ট্রেসে হলেন কর্নেল। ভিটসিনের লোক ওরা। ওরা যে কেমন, তা তোমরা এখানে জানো না। সারা শহর যন্ত্রণায় কাৎরাচ্ছে। জ্যান্ত সেক্স ক'রে ফ্যালাে সবাইকে। ফালি-ফালি ক'রে কেটে ফ্যালাে মানুষ। ঝুটি ধ'রে টেনে নিয়ে ভেতরে ঢোকায়ে, এতো অজ্ঞকার যে বোঝাই যায় না কোথায় আছি। অজ্ঞকারে হাৎড়ে হাৎড়ে শেষে বোঝা যায় যে একটা রেলের বগির ভেতর ঝাঁচায় পুরে দিয়েছে। চল্লিশজনেরও বেশি লোক হবে ঝাঁচাটায়, সবাই নেংটি প'রে আছে। একটু পরে-পরেই এসে দরজা খুলে যাকে সামনে পায় তাকেই পাকড়ে নিয়ে চ'লে যায়—আর যাওয়া মানেই যাওয়া। যেমনভাবে জবাই করার সময় মুর্গিকে ধ'রে নেয়, তেমনি এসে নিয়ে যায় টেনে-হিচড়ে। ঠাকুরের দিবা—সত্যি বলছি। কাউকে ফাঁসিকাঠে ঝোলায়, কাউকে পেটায় লোহার ডাণ্ডা দিয়ে, আর কাউকে বা জেরা করে। মেরে পাট ক'রে দেয়, ফালি-ফালি ক'রে কেটে নুন ছিটিয়ে দেয় কাটা ঘায়ে, টগবগে গরম জল ঢেলে দেয় গায়ে। বমি করলে কি

পায়খানা করলে জোর ক'রে তা খাইয়ে দেয়। আর বাচ্চাদের আর মেয়েদের যে কী করে—হা ঈশ্বর!'

নাভিস্বাস উঠলো বেচারার। একবার যন্ত্রণায় চীৎকার ক'রে উঠে, তার বিবৃতি শেষ না-করেই ম'রে গেলো। তক্ষুনি তা বুঝতে পারলো সবাই, মাথার টুপি খুলে ফেলে নিজেদের গায়ে ক্রুশচিহ্ন আঁকলো।

সেদিন সন্ধ্যে নাগাদ এর চেয়েও ভয়াবহ আর-একটি ঘটনার কথা ক্যাম্পে ছড়িয়ে গেলো।

মুম্বুর্ষ লোকটির চারপাশে যে-ভিড় জমেছিলো, তার মধ্যে পামফিলও ছিলো। স্বচক্ষে সে দেখেছিলো তাকে, স্বকর্ণে শুনেছিলো তার কথা, পড়েছিলো সেই ভয়-দেখানো বিজ্ঞপ্তি।

সে ম'রে গেলে তার পরিবারের কী দশা হবে, এই ভয় আবার নতুন ক'রে চরমে উঠলো পামফিলের। কল্পনায় সে স্পষ্ট দেখতে পেলো তিলে-তিলে যন্ত্রণা দেওয়া হচ্ছে তাদের, কষ্টে তাদের মুখ-চোখ দুমড়ে যাচ্ছে, কাংরে উঠছে তারা, প্রাণের ভয়ে চৈতন্যে উঠছে দয়ার জন্য। অসহ্য উৎকণ্ঠার চাপে সে চাইলো তাদের আর তার নিজের ভাবী যন্ত্রণা শেষ ক'রে দিতে। অগত্যা নিজের হাতেই তাদের বধ করলো সে—স্কুরের মতো ধারালো কুড়ুল দিয়ে কেটে ফেললো তার বৌকে, আর তিন-তিনটে ছেলেমেয়েকে। ঐ কুড়ুল দিয়েই সে কাঠের খেলনা তৈরি করেছে তার দুই মেয়ে আর অতি আদরের ছোটো ছেলেটির জন্য।

সবচেয়ে আশ্চর্যের কথা এই যে পামফিল নিজে আত্মহত্যা করলে না। সে কি অন্য উপায়ের কথা ভাবছে—ভেবে অবাক হ'লো ইউরি। আর কিসের প্রত্যাশা করছিলো সে? আর কোন উদ্দেশ্য ছিলো তার, কোন পরিকল্পনা, তার জীবন যে শেষ হ'য়ে গেছে, এটা তো স্পষ্ট। আর এটাও স্পষ্ট যে সে বদ্ধ উন্মাদ হ'য়ে গেছে।

লিবারিয়ুস, ইউরি আর সমর-পরিষদের অন্যান্য সভারা যখন তাকে নিয়ে কী করা যায় আলোচনা করতে বসলো, সে তখন স্বাধীনভাবে ক্যাম্পের চারপাশে ঘুরে বেড়াচ্ছে; মাথা ঝুঁকে পড়েছে বৃক্কের ওপর, ঘোলাটে হলদে চোখ দুটো জ্বলজ্বল করছে অস্বাভাবিকভাবে, আর অমানুষিক অপরাধের এক বেদনা যেন নিজীব ও অস্পষ্ট হাসির রেখা ফুটিয়ে তুলেছে তার মুখে—যা আর কখনো তাকে ছেড়ে যাবে না।

কেউ বেদনাবোধ করলে না তার জন্য। সবাই তাকে এড়িয়ে-এড়িয়ে চলতে লাগলো। কেউ কেউ বললো, কোনো বিচার না-ক'রেই ওকে সোজা মেরে ফেলা হোক, কিন্তু এই মতের সমর্থক পাওয়া গেলো না।

আর-কিছুই তার করার ছিলো না পৃথিবীতে। সকালবেলা সে ক্যাম্প ছেড়ে উধাও হ'য়ে গেলো, পাগলা কুকুরের মতো পালাতে চাইলো নিজের কাছ থেকে।

৯

কড়া শীত এলো ধারালো বরফ নিয়ে। আপাতবিচ্ছিন্ন ছেঁড়া-ছেঁড়া শব্দ আর ছায়ামূর্তি ভেসে উঠলো তুহিন কুমারায়—একটুক্কণ তারা স্থির হ'য়ে দাঁড়ায়, তারপর কঁপে ছড়িয়ে প'ড়ে মিলিয়ে যায়। যাকে দেখে পৃথিবী অভ্যস্ত, এ যেন সেই সূর্যই নয়, বরং যেন তার কোনো-এক নকল। গোল, লাল বলের মতো সে বুলে থাকে বনে, আর—যেন স্বপ্ন, যেন রূপকথা—এমনভাবে অনমনীয় ধীরতায় ছড়িয়ে পড়ে অশ্বর পাথরের মতো হলুদ আলোকরেখা, মধুর মতো পুরু সেই রশ্মিগুলো আটকে যায় গাছে-গাছে, তারপর তাদের সঙ্গেই জমাট বেধে যায় মধা-শূন্যে।

তলায় নরম প্যাড-লাগানো পশমি জুতোয় ঢাকা অদৃশ্য পা আস্তে আস্তে নরমভাবে মাটি হুয়ে সব দিকে ন'ড়ে বেড়ায়, অথচ প্রত্যেক পদক্ষেপে খচমচ ক'রে ওঠে রাগী বরফ; এই সব

পায়ের মালিক যারা, সেই কান-মাথা-ঢাকা লোমের জ্যাকেট পরা দেহগুলো আলাদাভাবে আকাশের প্রাণীর মতো যেন ভেসে বেড়ায় হাওয়ায়।

বন্ধু-বান্ধবেরা থেমে, মুখের কাছে মুখ এনে কথা বলে; স্নানের সময়কার মতো দগদগে লাল সেই মুখগুলো, গালের দাড়ি কাঁটাখোপের মতো দেখায়। ঘন চটচটে আঠার মতো ধোয়া বেরিয়ে আসে তাদের মুখ থেকে, শীতে ঝুকড়োনো কাটা-কাটা কথার তুলনায় মুখগুলোকে বড্ড বড়ো মনে হয়।

পায়ে চলার পথে চলতে-চলতে ইউরির সঙ্গে লিবেরিয়ুসের দেখা হ'লো। তাকে দেখামাত্র লিবেরিয়ুস তাকে ডাক দিলে।

‘এই যে, অতিথিবর! আমার গর্তে একবার আসবেন আজ সন্ধ্যাবেলায়। ওখানেই থাকবেন রাত্রিরে। অনেক কথা আছে। তা ছাড়া খবরও আছে কিছু।’

‘আর্দালি ফিরেছে নাকি? ভারিকিনোর কোনো খবর এলো?’

‘আপনার বা আমার আত্মীয়স্বজনের কোনো খবর নেই। তা থেকে অবশ্য আমি এই ভরসা পাচ্ছি যে তারা নিশ্চয়ই সময়মতো পালাতে পেরেছে, নয়তো কোনো-না-কোনো খবর পাওয়া যেতো। রাত্রে এ-বিষয়ে কথা বলবো। আপনার জন্য অপেক্ষা করবো কিন্তু।’

সন্ধ্যাবেলায় দেখা করতে এসে ইউরি আবার তার প্রশ্ন করলে:

‘কী খবর ওদের? কী শুনেছেন আপনি, শুধু এটুকু আমাকে ব'লে দিন।’

‘নিজেবটা নিয়েই ব্যস্ত আছেন দেখছি। যতোদূর জানি, তারা বেশ নিরাপদেই আছে, বহাল-তব্বিতে। কিন্তু আসল কথা হ'লো খুব ভালো-ভালো খবর পাওয়া যাচ্ছে। ঠাণ্ডা ভীল' আছে—খাবেন?’

‘না ধনাবাদ। এবার সব খুলে বলুন দেখি, অন্য কথা তুলবেন না যেন।’

‘একটুও খাবেন না? ঠিক? আমি কিন্তু এক কামড় খেয়ে নিচ্ছি। অবশ্য রুটি আর শাকসব্জি—এ-সবই আমাদের বেশি দরকার এখন। খুব বেরিবেরি হচ্ছে। শীতের আগে আরো বাদাম আর জাম জমিয়ে রাখা উচিত ছিলো—মেয়েরা ছিলো, ওরা তুলে দিতো। হ্যাঁ, যে-কথা বলছিলাম। আমাদের অবস্থা এখন চমৎকার! সব সময়েই যে-ভবিষ্যদ্বাণী করতাম, তা সত্যি হ'তে চলেছে এবার। ফাঁড়া কেটে গেছে। কোলচাকের বাহিনী পেছিয়ে যাচ্ছে সব দিক থেকে। ছত্রভঙ্গ হ'য়ে পড়ছে তারা। এবার দেখলেন তো? কী বলতাম আপনাকে সব সময়? মনে আছে কী-রকম বিলাপ করতেন আপনি?’

‘আমি আবার কখন বিলাপ করতাম?’

‘আগাগোড়াই তো তা-ই করেছেন। বিশেষত ভিটসিন যখন আমাদের চেপে ধরেছিলো, তখন।’

আবার সেই হেমন্তের স্মৃতি ফিরে এলো ইউরির মনে; বিদ্রোহীদের গুলি ক'রে মারা, পামফিলের স্ত্রী-পুত্র হত্যা, অথহীন খুনোখুনিতে ভরা বিরাট বিশৃঙ্খলা তার সীমাহীন ধারাবাহিকতা নিয়ে তার মনে ভিড় ক'রে এলো। শাদা আর লাল দুই দলের নৃশংসতা প্রতিযোগিতা করছে পরস্পরের সঙ্গে—বর্বরতা আরো বর্বরতার জন্ম দিচ্ছে। তার নাকে, তার গলায়—সর্বত্র রক্তের গন্ধ; এই গন্ধ তার দম বন্ধ ক'রে দিলো যেন; গা গুলিয়ে উঠলো বমির বেগে, মাথায় যেন ঘোর লাগলো, ঝাপসা দেখলো চোখে। না, না, বিলাপ নয়, একেবারে অন্য ব্যাপার, কিন্তু লিবেরিয়ুসকে তা সে বোঝায় কী ক'রে?

মশাল জ্বলছে গর্তটিতে, ধাতুর বাতিদানের ওপর বসানো জ্বলন্ত কাঠ আসলে। কাঠকয়লার

সুগন্ধ ছড়িয়ে পড়ছে তা থেকে। কাঠটা পুড়ে যেতেই তলার জলপাত্রে ছাই প'ড়ে গেলো; নতুন আর-একটা কাঠ জালিয়ে দিলো লিবেরিয়ুস।

'দেখলেন তো কী জ্বালাতে হয় আমাকে? তেল আর একটুও নেই। এদিকে কাঠ তো শুকিয়ে খটখটে হ'য়ে আছে, চটপট ছাই হ'য়ে যায়। সত্যি, একটুও মাংস খাবেন না? দিই একটু? হ্যাঁ, এঁ বেবিবেরির কথা। আপনি দেবি করছেন কেন বলুন তো? আপনি মিটিং ডেকে বেবিবেরির চিকিৎসা দিচ্ছে বড়ত্ব দিতে চান?'

'স্বপ্নেরেণ দোহাই, এভাবে কষ্ট দেবেন না আমাকে। বাড়িরলোকেরদের খবর ঠিক কী জানেন, তাই বলুন।'

'সে তো বললাম আপনাকে। নিশ্চিত কোনো খবর পাওয়া যায়নি। কিন্তু অবশেষে কী খবর এসেছে, তা এখনো বর্ণনা আপনাকে। গহযুদ্ধ শেষ হ'য়ে গেছে। একেবারে নিশ্চয় হ'য়ে গেছে কোলচাক। লাল ফৌজের প্রধান অংশ তার পেছনে ছুটেছে, পূবমুখো ধাওয়া ক'বে নিয়ে যাচ্ছে তাকে, রেল-লাইন ধরে সোজা সমুদ্রের দিকে। আরেক ভাগ এদিকে ছুটে আসছে, এবার আমরা সবাই এক ভেগটি হ'য়ে শাদাদের যে-অংশ নানাদিকে টুকরো-টুকরো হ'য়ে ছড়িয়ে আছে তাদের কোণঠাসা ক'বে চেপে ধরবো। দক্ষিণ বাশিয়ার কোথাও আব শত্রু নেই। কী আপদ, তবু আপনি খুশি নন? এ-খবর বুঝি যথেষ্ট বলে মনে হচ্ছে না!'

'খুব খুশি হয়েছি আমি, কিন্তু আমাদের স্ত্রী-পুত্রেরা কোথায়!'

'ভারিকিনোতে যে নেই, এটাই ভাগ্যের কথা। কামেনোডভর্স্ক আপনাকে যে-আজগুবি খবর দিয়েছিলো, সেটা বিশ্বাসযোগ্য বলে প্রমাণ পাওয়া যায়নি।—মনে আছে তো গত গ্রীষ্মের গুজব—ভারিকিনোর ওপর সেই রহস্যময় অজানাদের উৎপাত?—খবরটা যে বাজে, সে আমি আগেই জানতাম। কিন্তু তাহ'লেও গ্রামে আর লোক নেই। তাই মনে হয় হয়তো শেষ পর্যন্ত সত্যিই কিছু-একটা ঘটেছিলো; তারা যে সময়মতো পালাতে পেরেছে, এটা ভাগ্যের কথা—হ্যাঁ, তারা যে পালিয়ে গেছে, এটা তো স্পষ্ট। এখনো যে-কজন লোক সেখানে আছে, তাদের তা-ই ধারণা—অন্তত আমাব লোকেরা এসে তো এই কথাই বললে।'

'আর ইউরিয়্যাটিন? সেখানে কী হয়েছে? এখন সেটা কাব দখলে?'

'ওটাও আরেকটা গাঁজাখুরি গল্প। খবরটা গোপনীয় সত্যি নয়।'

'কী খবর?'

'তারা বলে যে শাদারা নাকি এখনো আছে সেখানে, কিন্তু তা একেবারেই অসম্ভব। দেখাচ্ছি আপনাকে, নিজেই আপনি দেখে নিন।'

আরেকটা কাঠ বাতিদানে বসালো সে, তারপর একটা ছেঁড়া মাপ বের ক'রে আলোচা জেলটাকে ওপরে ধ'রে পেঙ্গিল-হাতে বোঝাতে লাগলো ব্যাপারটা।

'এই দেখুন। এই যে-অংশগুলো দেখছেন, শাদাদের হঠিয়ে দেওয়া হয়েছে এ-সব জায়গা থেকে—এই—এই—এই—। সারা তল্লাটে ওরা নেই আর। বুঝেছেন?'

'বুঝেছি।'

'কাজেই আর যেখানেই তারা থাকুক ইউরিয়্যাটিনের ধারে-কাছে নেই। থাকলে—রাস্তাঘাট খবরাখবর যখন বন্ধ, ধরা না-প'ড়ে আব উপায় ছিলো! ছেলেমানুষেও বোঝে এটা—আর তাদের কমান্ডাররা কি এতো বোকা যে বুঝবে না? আবে! কোট চাপাচ্ছেন কেন? যাচ্ছেন কোথায়?'

'একুনি আসছি। বড্ড ধোয়া এখানে, মাথা ধ'রে গেছে। খোলা হাওয়ায় ঘুরে আসি একটু।'

গর্তের বাইরে একটা তক্তা প'ড়ে ছিলো, মাঝে-মাঝে সেটা আসনের কাজ করে। বাইরে এসে ইউরি সেটার ওপর থেকে ববফ ঝেড়ে ফেলে হাঁটুতে কনুই ঠেকিয়ে দু-হাতে মাথা চেপে ব'সে পড়লো।

এই ‘টায়িগা’, এই শিবির, কৃষকবাহিনীতে কাটানো এই দেড় বছর সময়—সব তাব মন থেকে মুহূর্তে অপসৃত হ’লো। এ-সব কথা নিশ্চিন্তে ভুলে গেলো সে। প্রিয়জনের স্মৃতি ভিড় ক’রে এলো তার মনে, অন্য সব-কিছুকে সরিয়ে দিলে। সে ভাবতে চেষ্টা করলো কী দশা হয়েছে তাদের; একের পর এক অনেক ছবি ভেসে উঠলো তার চোখের সামনে—প্রতিটি ছবি আগেরটির চাইতে আরো বেশি ভয়াবহ।

এই বুঝি সশাশকে কোলে নিয়ে বরফের ঝড় ঠেলে এক মাঠের মধ্য দিয়ে চলেছে টোনিয়া। গভীর তুষারে পা ডুবে গেছে তার, আর ঐভাবে দাঁড়িয়ে সে বারে-বারে কন্ডল দিয়ে ঢেকে রাখবার চেষ্টা করছে সশাশকে; গায়ের সবটুকু শক্তি প্রয়োগ ক’রে সে তুষারের ভেতর পা টেনে তুলতে চাইলো, কিন্তু ঝড় তাকে ধাক্কা দিয়ে ফেলে দিলে; টাল সামলাতে না-পেরে সে পড়ে গেলো। তারপর উঠে দাঁড়ালো আবার—দুর্বল তার পা, আব বুঝি দাঁড়াবার ক্ষমতা নেই। হাওয়া তাকে ক্রমাগত ঠেলেছে, ঘুষি মারছে, ধাক্কা দিচ্ছে, আর বরফ তাকে আচ্ছন্ন ক’রে ফেলছে। আরে, ভুলে যাচ্ছি তো—সঙ্গে তার দুটি বাচ্চা, সশা আর নতুন শিশুটি। তার দুটো হাতই বাস্তু তাদের নিয়ে—চিলিমকার সেই পলাতকদের মতো সেও দুঃখে উদ্বেগে উৎকণ্ঠায় ভেঙে পড়েছে, এবার সে পাগল হ’য়ে যাবে, আর সহ্য হয় না।

টোনিয়ার দুই হাতই জোড়া, অথচ কাছে-পিঠে এমন কেউ নেই যে তাকে সাহায্য করে। সশার বাবা তো অদৃশ্য হ’য়ে গেছেন—কেউ জানে না তিনি কোথায়। দুবে সে, চিরকালই সে দূরে রয়েছে, সারা জীবন সে তাদের কাছ থেকে দূরে স’রে আছে। কেমনতরো বাবা সে? আর টোনিয়ার নিজের বাবাবই বা কী হ’লো? আলেকজান্ডার আলেকজান্ড্রোভিচ কোথায়? আর নিউশা? অন্য যারা ছিলো, তারা? জিঙ্গেস না-করাই ভালো, না-ভাবাই ভালো এ-বিষয়ে।

ইউবি উঠে দাঁড়িয়ে গর্তে ঢোকাব জন্য দাঁড়ালো। হঠাৎ এমন সময় অন্য কথা মনে পড়লো তার, সে মনস্থির ক’রে নিলো, আব সে ফিরবে না লির্বেবিয়ুসের কাছে।

তার স্বী, এক বাগা বিস্কুট, এবং আরো কতগুলো জিনিস—সব সে অনেক দিন আগে লুকিয়ে রেখেছিলো এক গোপন জায়গায়, যদি কোনো দিন পালাবার সুযোগ আসে, তখন কাজে লাগবে। ক্যাম্পের ঠিক বাইরেই এক মস্ত পাইনগাছের তলায় বরফের ভেতরে সে পুঁতে রেখেছিলো ওগুলো। গাছটা খুঁজে বের করতে যাতে ভুল না-হয়, সেজন্য গাছের গায়ে দাগ কেটেও দিয়েছিলো। এবার সে ফিরে চললো সেদিকে; যেখানে সে পুঁতে রেখেছে তার সম্পত্তি, চললো সে সেদিকে পায়ে-চলার পথ ধ’রে।

পূর্ণিমাব চাঁদ উঠেছে আকাশে, রাতটি স্বচ্ছ। সাস্ত্রীরা কোথায় দাঁড়িয়ে পাহারা দেয়, তা সে জানতো। প্রথমে কিছুক্ষণ সে সহজেই এড়িয়ে গেলো তাদের। কিন্তু সেই টিলা আর জামগাছওলা খোলা জায়গাটার কাছে আসতেই একজন টহলদারি সাস্ত্রী তাকে চোঁচিয়ে ডাকলে, তারপর স্বীর ওপরে সোজা হ’য়ে দাঁড়িয়ে দ্রুত চ’লে এলো তার কাছে:

‘হুকুমদার! না থামো তো গুলি করবো। কে তুমি, ইশারা!’

‘তোমার আবার হ’লো কী হঠাৎ? চেনো না আমাকে? আমি ক্যাম্পের ডাক্তার, জিভাগো।’

‘দুঃখিত, কমরেড ডাক্তার। চিনতে পারিনি ব’লে দোষ নেবেন না। কিন্তু ডাক্তার হোন আর যা-ই হোন, আপনার এগোনো চলবে না। হুকুম হচ্ছে হুকুম।’

‘যা তুমি ভালো বোঝো, ইশারা হ’লো “লাল সাইবেরিয়া” আর জবাব— “দাঁল্লদের নিপাত হোক”।’

‘এই তো বেশ বলেছেন। আচ্ছা চ’লে যান তাহ’লে। কিন্তু এতো বাস্তবে কিসের পেছনে ছুটছেন? কারো অসুখ?’

‘বড্ড তেষ্ঠা পেয়েছে, ঘুমোতে পারছি না। তাই ভাবলাম বাইরে খোলা হাওয়ায় বেড়িয়ে

একটু বরফ খেয়ে আসি। তারপরেই হঠাৎ বরফ-ঢাকা জামগাছটা চোখে পড়লো। গিয়ে কয়েকটা জাম তুলে আনবো।’

‘ভদ্রলোকদের বোকামি তো একেই বলে! শীতের সময় জাম পেড়ে আনার কথা কে কবে শুনেছে! তিন বছর ধ’রে ভদ্রলোকদের মগজ থেকে এ-সব বাজে ব্যাপার ঝেঁটিয়ে তাড়াবার চেষ্টা করছি, কিন্তু ওদের আর বদল নেই। যাকগে, যান মশাই, গিয়ে আপনার জাম পেড়ে আনুন, ডাহা উন্মাদ। আমার কী?’

যেমন দ্রুত সে এগোচ্ছিলো, তেমনি দ্রুত চ’লে গেলো সাক্ষীটি— সোজা বুক টান ক’রে দাঁড়ালো সে তার লম্বা স্কীর ওপর, তারপর পায়ের ছাপ-না-পড়া তুষাররাশির ওপর দিয়ে মিলিয়ে গেলো দূরে, পেরিয়ে গেলো পাতলা চুলের চেয়েও সূক্ষ্ম শীতের ঝোপঝাড়।

এই মাত্র যে-জামগাছের সে নাম বললে, পায়ে-চলা পথ ধ’রে ইউরি সেই গাছের তলায় পৌঁছলো।

অর্ধেকটা তার বরফ-ঢাকা, বাকি অর্ধেকটা ছেয়ে আছে জ’মে-যাওয়া জামে আর পাতায়। দুই শাদা ডাল সে বাড়িয়ে দিয়েছে আমন্ত্রণের ভঙ্গিতে। লারার দৃশ্য দুই স্বেত বাছুর কথা তার মনে প’ড়ে গেলো, আঁকড়ে ধরলো সে ডাল দুটিকে, টেনে নিয়ে এলো তার কাছে। যেন তার ডাকে সাড়া দিয়ে গাছটি তুষার ঝরিয়ে দিলো তার গায়ে। অথহীনভাবে সে ফিশফিশ ক’রে ব’লে উঠলো:

‘পাবোই আমি তোমাকে, প্রিয়া আমার, আমার রূপসী, আমার জামগাছ, আমার প্রাণ।’

স্বচ্ছ রাত্রির আকাশে পূর্ণিমার চাঁদ জেগে আছে। ‘টায়িগা’র আরো ভেতরে গিয়ে ঢুকলো সে, চিহ্নিত গাছটার কাছে গিয়ে খুঁড়ে বার ক’রে নিলো তার সব জিনিস, তারপর ক্যাম্প ছেড়ে চ’লে গেলো।

পরিচ্ছেদ ১৩

স্তম্ভ-ভবনের উন্টোদিকে

১

ইউরিয়্যাটিন শহরের প্রধান অংশের বাড়ি আর গির্জাগুলির ধার দিয়ে একে-বৈকে ঢালু হ'য়ে যে-রাস্তাটি গড়িয়ে গেছে তার নাম মার্চেন্ট স্ট্রীট।

ভারবাহী নারীমূর্তি নিয়ে একটি ছাইরঙা বাড়ি দাঁড়িয়ে আছে। বাইরের দিকের মস্ত চৌকো পাথরগুলোর নিচের অংশ সদ্য-লাগানো সরকারি খবরের কাগজে আর ঘোষণাপত্রে কালা হ'য়ে আছে। লোকেরা ছোটো-ছোটো দল বেঁধে দাঁড়িয়ে আছে তার সামনে, নিঃশব্দে পড়ছে কাগজগুলো।

কিছুদিন আগে তুষারবৃষ্টি হ'য়ে গেছে, এখন আবহাওয়া শুকনো আর কুয়াশাচ্ছন্ন। আজ এখনো বেলা পড়েনি, অথচ কিছুদিন আগেও এমনি সময়ে অন্ধকার নেমে আসতো। শীত চ'লে গেছে; তার জায়গা নিয়েছে আলো—সঙ্গে পর্যন্ত রেশ থাকে তার। উদ্বেজক, আশঙ্কাজনক, ভীতিকর এই আলো।

শাদা পন্টন চ'লে গেছে, শহর দখল করেছে লালেরা। শেষ হয়েছে যুদ্ধের ভয়াবহতা, গোলাবর্ষণ আর রক্তপাত। শীতকালের সমাপ্তি ও বসন্তের দীর্ঘতার মতো সেটাও আশঙ্কাজনক।

দেয়ালে আটা একটি ইস্তাহার, দীর্ঘতর দিনের আলোয় যা এখন পড়া যাচ্ছে, তা ঘোষণা করছে:

‘ইউরিয়্যাটিন সোভিয়েটের খাদ্যদপ্তরে শ্রমিক-পত্র প্রাপ্তব্য; মূল্য ৫০ রুবল; ঠিকানা: ৫ নং অক্টোবর স্ট্রীট (পূর্বে গবর্নর-জেনারেল স্ট্রীট), ২৩৭ নং কামরা। শুধু যোগ্য ব্যক্তিদেরই এই পত্র দেওয়া হইবে।’

‘শ্রমিক-পত্র বাহার নাই, অথবা যে কেহ এই পত্রে সমস্ত জ্ঞাতব্য তথ্য লিপিবদ্ধ করে নাই অথবা ইহা হইতেও গুরু অপরাধ, যদি কেহ অসত্য তথ্য লিপিবদ্ধ করিয়া থাকে, তাহা হইলে সে-ব্যক্তি যুদ্ধকালীন বিধান অনুযায়ী কঠিনতম দণ্ডে দণ্ডিত হইবে। ইউরিয়্যাটিন কর্মসমিতির পত্রিকার এই বৎসরের (৮৬,৬০১৩) নং সংখ্যায় শ্রমিক-পত্র ব্যবহারের সঠিক নিয়মাবলী সবিস্তারে প্রকাশিত হইয়াছে এবং ইউরিয়্যাটিন খাদ্যদপ্তর, ১৩৭নং কামরায় জনসাধারণের জ্ঞাতার্থে বিজ্ঞাপিত হইয়াছে।’

আরেকটি ইস্তাহার ঘোষণা করেছে যে শহরে খাদ্য-সরবরাহ প্রচুর। বুর্জোয়াদের এই মর্মে অভিযোগ করা হয়েছে যে তাঁরাই এই খাদ্য মজুত রাখছে; উদ্দেশ্য, বন্টনের অব্যবহার করলে অরাজকতা সৃষ্টি করা। এইভাবে শেষ হয়েছে ঘোষণা পত্রটি: ‘বাহ্যকে মজুত করিতে দেখা যাইবে তাহাকে তৎক্ষণাৎ হত্যা করা হইবে।’ তৃতীয় ঘোষণাপত্রটি এই:

‘বাহারা শোষকশ্রেণীর অন্তর্ভুক্ত নহেন তাঁহাদের ক্ষেত্র-সমিতির সদস্য হইবার অধিকার দেওয়া হইল। এই বিষয়ে অপরাধের জ্ঞাতব্য খাদ্যদপ্তর, ইউরিয়্যাটিন সোভিয়েট, ৫ অক্টোবর স্ট্রীট (পূর্বে গবর্নর-জেনারেল স্ট্রীট) ১৩৭ নং কামরায় জানা যাইবে।’

সেনাবিভাগের সদস্যদের সাবধান ক'রে দেওয়া হয়েছে:

‘যে-কেহ তাহার অধিকারভুক্ত অস্ত্রশস্ত্র সরকারকে সমর্পণ করিতে অসমর্থ হইবে, অথবা নূতন অনুমতিপত্র ব্যতীত সশস্ত্র অবস্থায় অবস্থান করিবে, তাহাকে আইন অনুসারে কঠিনতম দণ্ড দেওয়া হইবে। নূতন অনুমতিপত্র ইউরিয়্যাটিন বিপ্লবী-সমর-সমিতি, ৬ অক্টোবর স্ট্রীট, ৬৩ নং কামরায় প্রাপ্তব্য।’

২

সেই বাড়িটির সামনের ভিড়ে এসে যোগ দিলে একজন হাভাতে বুনো চেহারার লোক, ধুলোবালিতে কালো হ'য়ে গেছে গায়ের রং, লাঠির আগায় একটি বার্চ-ছালের তৈরি থলে ঝোলানো। মাথাভরা লম্বা চুল তার, এখনো শাদার ছিটে লাগেনি, কিন্তু খোঁচা-খোঁচা লালচে দাড়ি ধূসর হ'য়ে আসছে। লোকটি ডাক্তার ইউরি জিভাগো। তার পশমি কোটটি নিশ্চয়ই রাস্তায় খুলে নেওয়া হয়েছিলো তার গা থেকে, বা খাবারের জন্য নিজেই বাঁধা দিয়েছে। গায়ের পাতলা, ছেঁড়া, হাতা-কাটা জামাটি নিশ্চয়ই অন্য কারো সঙ্গে বদল করেছিলো।

খলিতে প'ড়ে আছে শুধু কুটির টুকরো, যা শহরতলির এক গ্রামে কেউ ভিক্ষে দিয়েছিলো তাকে, আর এক টুকরো শুয়োরের মাংসের চর্বি। আরো আগেই ইউরিয়্যাটিনে পৌঁছেছে সে, কিন্তু শহরের উপকণ্ঠ থেকে মার্চেন্ট স্ট্রীটের এই কোনায় আসতে পুরো এক ঘণ্টা সময় লাগলো তার; এতো দুর্বল সে, গত কয়েকদিনের পথ চলা তাকে এমন ক্লান্ত ক'রে দিয়েছে। মাঝে-মাঝেই থেমে পড়ছে, যে-শহরকে আবার কখনো দেখতে পাবার আশা তার ছিলো না, ইটু ভেঙে ব'সে সেই শহরের পাথরকে চুম্বন করা থেকে নিজেকে জোর ক'রে বিরত করেছে; বন্ধুকে পাওয়ার মতো এই শহরকে দেখতে পেয়ে সুখে ভ'রে গেছে তার মন।

সাইবেরিয়ার মধ্য দিয়ে পায়ে হেঁটে যতোটা এসেছে, তার প্রায় অর্ধেকটা রাস্তাই রেলপথ অনুসরণ করেছে সে—সারা রেল-পথ এখন অকেজো, অবহেলিত ও তুষারচ্ছন্ন। শাদাদের দ্বারা পরিত্যক্ত ট্রেনগুলো একের পর এক দাঁড়িয়ে আছে অব্যবহৃত অবস্থায়, কোলচাকের পরাজয়, কয়লার অভাব আর তুষারস্তুপের ফলে তাদের চলাচল বন্ধ হয়েছে। মাইলের পর মাইল জুড়ে, নিরবচ্ছিন্ন বরফে ডুবে যেন চিরকালের মতো স্তব্ধ হ'য়ে আছে এই সব ট্রেন। এর মধ্যে কোনো-কোনোটা সশস্ত্র ডাকাতদলের দু'গের কাজ করেছে, লুকানোর জায়গা হয়েছে পালিয়ে-যাওয়া চোর, গুণ্ডা অথবা রাজনৈতিক আশ্রয়প্রার্থীদের; তখনকার দিনে এরাই ছিলো অনৈচ্ছিক বাউগুলের দল। কিন্তু বেশির ভাগ ট্রেনই পরিণত হয়েছে সমবায়-কবরখানায়। ঠাণ্ডায় ও টাইফাসে যারা ম'রে গেছে তাদের সর্বজনীন কবরের কাজ করেছে। রেল-পথের ধার জুড়ে তখন উদ্দাম হ'য়ে উঠেছে টাইফাস, উজাড় হ'য়ে যাচ্ছে আশেপাশের গ্রামের পর গ্রাম।

‘মানুষই মানুষের কাছে নেকড়ে বাঘ,’ একথা যদি কখনো সত্য হ'য়ে থাকে তাহ'লে সে-সময়েই হয়েছিলো। এক যাত্রী অপর যাত্রীকে দেখলে পালিয়ে গেছে, পাছে অচেনা লোকটি তাকে খুন করে সেই ভয়ে অনেকে আগেই খুন ক'রে বসেছে। নরমাংসভোজনের কথাও শোনা গেছে মাঝে-মাঝে। মানবিক সভ্যতার সব নিয়মই স্থগিত ছিলো, লোকেরা মানতো শুধু জঙ্গলের আইন, দেখতো গুহাবাসীর প্রাগৈতিহাসিক স্বপ্ন।

ইউরি মাঝে-মাঝেই দেখেছে, নিঃসঙ্গ সব ছায়া চোরের মতো উঠে আসছে ডোবার মধ্য থেকে, বা ছুটে চলেছে তার আগে-আগে। যতোটা সম্ভব তাদের এড়িয়ে যাবার চেষ্টা করেছে সে, কিন্তু অনেককে চেনা-চেনা ঠেকেছে। মনে হয়েছে এদের সবাইকে সে পাটিকানদের ক্যাম্পে দেখেছে। একবার তো সেটা সভ্যই প্রমাণিত হ'য়ে গেলো। ট্রেনের একটি বিদেশগামী ঘুমোবার কামরা বরফে চাপা প'ড়ে ছিলো; তার ভেতর থেকে ছুটে বেরিয়ে, মলত্যাগ ক'রে

যে-ছেলেটি আবার ভেতরে ঢুকে গেলো, সে সতি আরণ্যক ব্রাহ্মণের এক সদস্য। আর-কেউ নয়—টেরেসি গালুজিন—যাকে গুলি ক'রে মেরে ফেলা হয়েছে বলে সবাই জানতো। আসলে সে আহত হ'য়ে—জ্ঞান হারিয়ে ফেলে। চেতনা ফিরে এলে বহাভূমি থেকে ঠুঁড়ি মেরে পালিয়েছিলো সে, যা না শুকোনো পর্যন্ত লুকিয়ে ছিলো জঙ্গলে, এখন চাপা-পড়া গাড়িতে লুকিয়ে থেকে, মানুষামাত্রেরই ছায়াদর্শনে পালিয়ে গিয়ে, ছদ্মনামে তার দেশে, পূণ্য ক্রুশ গ্রামের দিকে এগোচ্ছে।

যাত্রাপথে ইউরির যে সব অভিজ্ঞতা হয়েছে, সে সবই অলৌকিকের মতো আশ্চর্য, যেন অন্য কোনো-এক গ্রহের জীবন থেকে উপড়ে-আনা টুকরো-টুকরো কতগুলো ঘটনা কী ক'রে পৃথিবীতে এসে ছিটকে পড়েছে। শুধু প্রকৃতি ছিলো মানুষের ইতিহাসের প্রতি একনিষ্ঠ। শুধু তাতে দেখা গেলো সেই রূপটি, সমকালীন শিল্পীরা যা চিত্রিত করেছেন।

কখনো-কখনো সন্ধ্যার রং হ'তো ফিকে-ধূসর, গভীর গোলাপি। সেই সব শান্ত সন্ধ্যায় অস্তরাগের আভায় বার্চগাছগুলিকে মনে হ'তো যেন কালো, সরু এক বর্ণলিপি। শাদা তুষারের শাদা বরফের খাড়াই দিয়ে বয়ে যেতো কালো বরনা, ওপরে ভাসতো বরফের মিহি সর। সেই খাড়াইয়ের চূড়োগুলি ক্ষ'য়ে গেছে বরনার জলে, ছোপ পড়েছে কালো রঙের। তেমনি, আর দু'এক ঘণ্টার মধ্যে, নেমে আসবে ইউরিয়ানটিনের এই সন্ধ্যাটি—স্বচ্ছ, ধূসর, তুষারস্পৃষ্ট, ইউলো-ঝোপের মতো কোমল।

স্তম্ভ-ভবনের গায়ে আঁটা বিজ্ঞপ্তিগুলো পড়ার জন্যই এসেছিলো ইউরি, কিন্তু রাস্তার ওপারের বাড়িটার চারতলার জানলার দিকে বারবার চোখ যাচ্ছিলো তার। এই ঘরেই পুরোনো ভাড়াটেনের পরিত্যক্ত আসবাবপত্র গুদাম করা আছে। এককালে চুনকাম করা হয়েছিলো; এখন ধারে ধারে বরফে ঢাকা প'ড়ে গেলেও ইউরি দেখতে পাচ্ছিলো যে কাচটা স্বচ্ছ; শাদা রঙটা বোঝাই যাচ্ছে ধুয়ে গেছে। এর মানে কী? পুরোনো ভাড়াটেরা কি ফিরে এসেছে? না কি লারা চলে গেছে, নতুন ভাড়াটে এসেছে ফ্ল্যাটে, সব-কিছু একেবারে বদলে গেছে?

অসহ্য মনে হ'লো এই অনিশ্চয়তা। রাস্তা পার হ'য়ে ইউরি সিঁড়ি বেয়ে ওপরে উঠলো, তার সেই চিরপরিচিত সিঁড়ি। ক্যাম্প থাকার সময় কঠোরবারই না এই সিঁড়ির প্রত্যেকটি ঝাঁক, ছাঁচে ঢালা লোহার তৈরি জালি-কাটা ধাপের প্রত্যেকটি পাক মনে পড়েছে তার। এক জায়গায় ফুটো দিয়ে একতলার গুদামঘরটা দেখা যায়, পুরোনো চেয়ার, ভাঙা বালতি আর টিনের টব জমা করা আছে সেখানে। সেখানে শৌছে ইউরি দেখলে সবই আগের মতো আছে। অতীতের প্রতি আনুগত্যের জন্য সেই সিঁড়িকে ধন্যবাদ দিতে ইচ্ছে করলো ইউরির।

এককালে ঘুটি ছিলো দরজায় কিন্তু ইউরি যাবার আগেই সেটা ভেঙে গিয়েছিলো, বাজতো না। দরজায় টোকা দিতে যাবে, এমন সময় চোখে পড়লো দুটো আংটাং আটকানো একটা তাল্লা বুলছে দরজায়; পুরোনো এক কাঠের কপাটের খোপে ইকুপ দিয়ে কোনোমতে আংটাগুলো লাগানো আছে, সেই খোপের দেয়ালের কারুকর্ম ধব'সে পড়েছে জায়গায়-জায়গায়। আগেকার দিনে এমন বর্বরতা সহ্য করতো না কেউ। ঠিক তালার ঠিক চাবি থাকতো, সেটা কাজও করতো, বা কোনো মিস্ত্রি ডাকিয়ে সারিয়ে নেওয়া হ'তো সেটা। এই তুচ্ছ লক্ষণটিও ব'লে দিচ্ছে যে সব-কিছুরই সাধারণভাবে অবনতি হয়েছে—ইউরির অনুপস্থিতিকালে দ্রুত এগিয়ে গেছে এই অবনতি।

ইউরির নিশ্চিত মনে হ'লো যে লারা কি কাটিয়া, যদি বেঁচেও থাকে, যদি এখনো ইউরিয়ানটিনেই থেকে থাকে, তবু ঐ-বাড়িতে কেউই থাকবে না। তিস্ততম হতাশার জন্য নিজেকে তৈরি ক'রে দেয়ালের ফোকরে চাবি আছে কিনা দেখবে স্থির করলো ইউরি, সেই ফোকর যেখানে একটা ইদুর কাটিয়াকে কী ভয়ই না পাইয়ে দিয়েছিলো। এবারেও কোনো

ইদুরের গায়ে হাত দিয়ে ফেলার ভয়ে দেয়ালে লাথি মেরে নিলো ইউরি। কিছু পাবার বিপ্শুমাত্র আশাও তার মনে ছিলো না। একটা ইট দিয়ে ফোকরের মুখটা বন্ধ করা। সেটা সরিয়ে হাত ঢোকালো সে। কী আশ্চর্য—একটা চাবি আর চিঠি আছে তার ভেতরে। বেশ বড়ো একটা কাগজে লেখা চিঠি। চিঠি নিয়ে সিঁড়ির বাতাসে জানলার কাছে চ'লে গেলো ইউরি। আরো আশ্চর্য, আরো অবিশ্বাস্য কথা—চিঠিটা তাকে উদ্দেশ্য ক'রে লেখা। অডাতাড়ি পড়লো:

'ভগবান! এত সুখও কপালে ছিলো। শুনছি তুমি ফিরে এসেছো। শহরের কাছে তোমাকে দেখে একজন ছুটে এসেছিলো আমাকে খবর দিতে। ধ'রে নিচ্ছি তুমি সোজা ভারিকিনোতে যাবে। তাই আমিও সেখানেই যাচ্ছি কাটিয়াকে নিয়ে। তবু, চাবিটা পুরোনো জায়গাতে রেখে দিয়ে যাচ্ছি। আমার জন্য অপেক্ষা কোরো, চ'লে যেয়ো না। দেখতেই পাবে সামনের দিকের ঘরগুলো ব্যবহার করছি আজকাল। ফ্ল্যাটটা বলতে গেলে ফাঁকাই, কিছু-কিছু আসবাব বিক্রি করতে হয়েছে আমাকে। সামান্য কিছু খাবার রেখে গেলাম, বেশির ভাগই আলুসেদ্ধ। সসপ্যানের মুখ ঢেকে কিছু-একটা চাপা দিয়ে দিয়ে, ইদুর না আসে। আনন্দে পাগল হ'য়ে আছি।'

কাগজটার শেষ প্রান্ত অবধি পড়লো সে, উল্টো পিঠের লেখাটা আর লক্ষ করলো না। চিঠিটা ঠোটে ছোঁয়ালো, ভাঁজ ক'রে চাবিটার সঙ্গে পকেটে পুরলো। বিরাট আনন্দের সঙ্গে-সঙ্গে তীব্র বেদনাও অনুভব করলো সে। লারা যখন ভারিকিনোতে গেছে, সে-বিষয়ে আর কিছু লেখারও প্রয়োজন বোধ করেনি, তখন নিশ্চয়ই ইউরির বাড়ির লোকেরা আর সেখানে নেই। এইজন্য উদ্বেগ শুধু নয়, অসহ্য মন-খারাপ লাগলো ইউরির, যেন আঁতে ঘা লাগলো ওদের কথা ভেবে। কেমন আছে ওরা, কোথায় আছে, সে বিষয়ে একটা কথাও লোক বলেনি কেন?—যেন ওদের কোনো অস্তিত্বই নেই।

কিন্তু অন্ধকার ক'রে আসছে, আলো থাকতে থাকতে অনেক কাজ সেরে নিতে হবে তাকে। সবচেয়ে জরুরি হ'লো স্তম্ভ-ভবনের দেয়ালে আঁটা আইন-কানুনগুলো পড়া। তখনকার দিনে আইন-কানুন না-জানাটা মুখের কথা ছিলো না, তার ফলে প্রাণসংশয় হ'তে পারতো। ফ্ল্যাটের ভেতরে না ঢুকে থলেটাও নামিয়ে না-রেখেই, সে নেমে গেলো নিচে, রাস্তা পার হ'য়ে বিভিন্ন ঘোষণাপত্রে ঢাকা দেয়ালের মস্ত অংশটায় চোখ বুলিয়ে গেলো।

৩

আছে সংবাদপত্রের প্রবন্ধ, সভার বক্তৃতার বিবরণ, আর আছে নতুন-জারি-করা আইন-কানুন। ইউরি শিরোনামগুলি দেখে নিলো। 'সম্পত্তির যাচাই, করদার্য, দাবিঘোষণা।' 'শ্রমিক-সংসদের প্রতিষ্ঠা।' 'কারখানা ও কর্মসমিতির প্রতিষ্ঠা।' আগে যে-সব আইন প্রচলিত ছিলো, তার বদলে নব্য কর্তৃপক্ষ এই শহরে এসেই নতুন আইন প্রণয়ন করেছেন। নিশ্চয়ই এগুলোর উদ্দেশ্য হ'লো সকলকে মনে করিয়ে দেওয়া যে বর্তমান শাসকরা কিছুতেই আপস করবে না—যদি বা শাদাদের অধীনে থাকার সময় লোকেরা তা ভুলে গিয়ে থাকে। কিন্তু এ-সবের অন্তর্হীন এক্ষেয়েমি আর অন্তর্হীন পুনরাবৃত্তি ইউরির মাথা ঘুরিয়ে দিলে। কোন্ যুগে ঘোষিত হয়েছিলো এগুলো? প্রথম বিপ্লবের যুগে? না কি শাদাদের কোনো বিদ্রোহের পরে শাসনপ্রণালীর পুনঃপ্রতিষ্ঠার কালে? এগুলো কি গতবছর লেখা হয়েছিলো? না কি তার আগের বছর? জীবনে শুধু একবার এই ঐকান্তিকতা ও আপসহীন ভাষা তাকে উদ্দীপিত করেছিলো। এও কি সম্ভব যে সেই এক মুহূর্তের চিন্তাহীন উদ্দীপনার ফল সারাজীবন ধ'রে ভুগতে হবে তাকে? অপরিবর্তনীয়, কর্কশ, বিকৃত-বুদ্ধি চীৎকার আর দাবি, যা ক্রমেই আরো প্রাণহীন, অর্থহীন আর অসম্ভব হ'য়ে উঠছে, বছরের পর বছর কি এ ছাড়া অন্য সে কিছু শুনবে না? এ কি সম্ভব যে মুহূর্তের অতি

সংবেদনশীল উদারতার ফলে চিরকালের জন্য নিজেকে দাসে পরিণত ক'রে ফেলেছে সে?

একটা খবরের উপর চোখ পড়লো তার:

‘দুর্ভিক্ষের সংবাদ স্থানীয় সমিতিগুলির অবিস্থাস্য অকর্মণ্যতারই প্রমাণ দেয়। সর্বত্র চুরি, জুয়াচুরি ও টাকা লইয়া জুয়াখেলা বিপুল বেগে চলিতেছে।—আমাদের কারখানা ও কর্মসমিতিগুলি করিতেছে কী? ইউরিয়্যাটিন ও রাজ্জভিলইয়ের ব্যবসায়িক অঞ্চলগুলিতে পাইকারি খানাতল্লাসি, কঠোরতম উপায়ে ভীতি প্রদর্শন, এবং প্রত্যেকটি দালালের তৎক্ষণাৎ হত্যাসাধন দ্বারাই আমরা দুর্ভিক্ষের হাত হইতে রক্ষা পাইতে পারি।’

‘এ—রকম অন্ধ হওয়াটা ভাগ্যের কথা বইকি!’ ইউরি ভাবলে। ‘পৃথিবী থেকে বছকাল আগেই রুটি অদৃশ্য হ’য়ে যাওয়া সম্ভবেও রুটির কথা বলতে পারা! আইনের ফলে সব পুঞ্জিবাদী আর ব্যবসায়ীরা নিঃশেষ হ’য়ে যাওয়ার এতো পরেও তাদের কথা বলা! কোনো চাষি অথবা গ্রামের অস্তিত্ব না-থাকা সম্ভবেও তাদের বিষয়ে কথা বলা! ওদের কি স্মৃতি ব’লে কিছু নেই, নিজেদের পরিকল্পনা আর কর্মপদ্ধতির কথা মনে নেই কি? ওরা কি ভুলে গেছে যে সেই কর্মপদ্ধতি কাজে লাগিয়ে একটা পাথরও আর আস্ত রাখিনি ওরা! কী অদ্ভুত লোক সব—বছরের পর বছর ছোঁরো প্রলাপ ব’কে যাচ্ছে—কখনো মাথা ঠাণ্ডা হ’লো না—বকছে এমন সব ব্যাপার নিয়ে, যার অস্তিত্ব নেই, এমন সব বিষয় নিয়ে যা বহু আগেই নিশ্চিহ্ন হ’য়ে গেছে। যে-সত্য তাদের চারদিকে ছড়িয়ে আছে তার বিষয়ে এই অদ্ভুত মানুষগুলো কিছুই জানে না, কিছুই দেখতে পায় না।’

মাথা ঘুরছিলো ইউরির। হঠাৎ অজ্ঞান হ’য়ে রাস্তার ওপর প’ড়ে গেলো সে। যখন জ্ঞান ফিরে এলো, লোকেরা তাকে ধরাধরি ক’রে সে যেখানে যেতে চায় সেখানে নিয়ে যেতে চাইলো, ইউরি সকলকে ধন্যবাদ দিয়ে জানালো যে সে উপ্টোদিকেই থাকে, তাকে শুধু রাস্তাটা পার হ’তে হবে।

৪

আবার সিড়ি বেয়ে উঠলো ইউরি, এবারে লারার ফ্ল্যাটের দরজাটা খুললো। সিড়ির চাতালে তখনো আলো, সে বেরিয়ে যাবার সময় যা ছিলো তার চাইতে খুব বেশি অন্ধকার করেনি। সূর্যদেব সময় দিচ্ছিলো তাকে—এতে মন ভালো লাগলো তার।

তালায় চাষি ঘোরানোর শব্দ হ’তেই ভেতরে গোলমাল শুরু হ’য়ে গেলো। বসতিহীন ফ্ল্যাটটি তাকে অভ্যর্থনা জানালো টিনের বাসনের উপ্টে পড়ার ঠনঠন শব্দ ক’রে। তাক থেকে মেঝের ওপর লাফিয়ে চারপাশে ছড়িয়ে পড়লো ইদুরের দল। ওরা হাজার হাজার জন্মেছে নিশ্চয়ই। এই কদর্যতার সামনে অসুস্থ আর অসহায় লাগলো ইউরির, ঠিক করলো রাতটুকুর জন্য এমন একটা ঘরে আশ্রয় নেবে যেখানে ভাঙা কাচ দিয়ে ইদুরের গর্ত বন্ধ করা যায় আর দরজাগুলোও ভালোভাবে বন্ধ হয়।

ফ্ল্যাটের ঝাঁক দিকে—যে-দিকটা তার অজানা—একটা অন্ধকার গলি ঘুরে পার হ’য়ে যে ঘরটায় গিয়ে পৌঁছলো সেটা স্পষ্টতই লারার; বেশ আলো ঘরটায়; রাস্তার দিকে খোলা দুটো জানলার উপ্টোদিকে সারি-সারি নারীমূর্তির ওপর গেঁথে তোলা স্তম্ভ-ভবন; সে-দিক পিঠ ফিরিয়ে ছোটো-ছোটো দল দাঁড়িয়ে-দাঁড়িয়ে ঘোষণাগুলো পড়ছে।

ঘরের ভেতরকার আলোও ঠিক বাইরের আলোর মতো, প্রথম বসন্তের সেই স্নিগ্ধ, নতুন সন্ধ্যার আলো, সেই আলোয় ভরা ঘর যেন রাস্তারই এক অংশ: তফাৎ এইটুকু যে ভেতরটা আর একটু বেশি ঠাণ্ডা।

সেদিন বিকেলে শহরের দিকে আসতে-আসতে ইউরি হঠাৎ কেমন দুর্বল বোধ করেছিলো,

আর সেই অবস্থাতেই যে-ভাবে দু'এক ঘণ্টা আগেও হেঁটেছে, তাতে ইউরির মনে হয়েছিলো তার অসুখ করেছে। এখন এই বাড়ির মধ্যে আর রাস্তায় একই রকম আলো সমান আকস্মিকতার সঙ্গে নতুনভাবে উদ্দীপিত করলো তাকে। পথিকদের সঙ্গে একই হিমেল হাওয়ায় স্নান করে তাদের আত্মীয় বলে মনে হ'লো তার, মনে হ'লো শহরের মেজাজের সঙ্গে, পৃথিবীর জীবনের সঙ্গে এক সুরে বাঁধা তার মন। এতে তার ভয় দূর হ'য়ে গেলো। অসুস্থ হয়ে পড়ার আশঙ্কা আর হানা দিলো না। বসন্ত-সন্ধ্যার এই স্বচ্ছতা, এই সর্বব্যাপি আলো যেন এক মঙ্গল-চিহ্ন, সুদূর ও সুদূর পরাহত সব আশার সার্থকতার অঙ্গীকার। সব ঠিক হ'য়ে যাবে, জীবনে সে যা চেয়েছিলো তা-ই পাবে, সবাইকে খুঁজে বের করে সকলকে একত্র করবে সে, ঘটবে পুনর্মিলন, ভেবে-চিন্তে সব ঠিক করে ফেলবে সে, ঠিক-ঠিক কথা ভেবে বের করবে। এখনো যা-কিছু অনাগত, হাতে-হাতে তার প্রাণ পাবার জন্য তার লারাকে দেখার আনন্দের আশায় অপেক্ষা করে বসে রইলো সে।

আগেকার অবসাদের জায়গা নিলো এক বন্য উত্তেজনা আর দুর্বীর অস্থিরতা। আসলে তার সাম্প্রতিক দুর্বলতার চাইতেও এই উদ্দীপনা তার আসন্ন অসুস্থতার বেশি নিশ্চিত লক্ষণ। বাসা বাধার আগে চুল ছাঁটা, দাড়ি কামানো দরকার। শহরে আসার পথে নাপিতের খোঁজ সে আগেই করেছিলো। কিন্তু আগে যে-সব নাপিতের দোকান চিনতো তার মধ্যে কয়েকটা খালি পড়ে আছে, কয়েকটাতে হাত-বদল হ'য়ে অন্য ব্যাবসা চলছে আর বাদবাকি সব বন্ধ। নিজেব কোনো ক্ষুর নেই তার। কাঁচিতেও কাজ চলতো, কিন্তু লারার ড্রেসিংটেবিলের সব কিছু ওলোট-পালোট করে তাড়াহুড়োয় কোনো কাঁচি সে খুঁজে পেলো না।

এবারে মনে পড়লো স্পাসকি স্ট্রীটে একটি দরজির দোকান ছিলো: যদি এখনো সেটার অস্তিত্ব থাকে আর দোকান বন্ধ হবার আগে গিয়ে পৌঁছতে পারে তাহ'লে একটা কাঁচি ধার নেওয়া যায়।

৫

স্মৃতি ভুল করেনি তার। দোকানটা আছে এখনো, রাস্তার ওপরে প্রবেশ-পথ আর পুরো সামনের অংশটা জুড়ে একটি জানলা দেখা যাচ্ছে। রাস্তার লোকদের দৃষ্টির সামনে বসে শেলাই করে দরজি-মেয়েরা। একেবারে ঘরের ভেতর অবধি সোজা দেখা যায়।

ঘরটি ত্রীলোকে ভর্তি—সবাই শেলাই করছে। নিয়মিত কর্মী ছাড়াও বোধহয় স্থানীয় বয়স্ক মহিলারা অনেকে আছেন, যাঁরা শেলাই করতে জানেন; সেই ছাইরঙা বাড়ির দেয়ালের ঘোষণাপত্রে যে-শ্রমিকপত্রের উল্লেখ আছে তার যোগ্যতা অর্জন করবার জন্য চাকরি নিয়েছেন।

পেশাদারদের থেকে সহজেই পৃথক করা যায় তাঁদের। দরজির দোকানটা আর্মির পোষাক ছাড়া কিছু বানায় না: তুলো-পোরা ট্রাউজার আর জ্যাকেট, আর ইউরি পাটিজানদের যেমন পরতে দেখেছে তেমনি নানা জাতের কুকুরের চামড়ার তৈরি নানা-রঙা ফারের কোট। এই কাজ ফার-বিক্রেতাদেরই সাজে, অ-পেশাদারদের পক্ষে তা বিশেষ কষ্টকর; শেলাইয়ের কলের ভেতর দিয়ে শক্ত করে ভাঁজ করা কাপড়ের ধারগুলি যখন ঠেলে দেয় তারা, তখন তাদের সব ক'টা আঙুল বড়ো আঙুলের মতো দেখায়।

জানলায় টোকা দিয়ে ইউরি ইঙ্গিতে বললে যে সে ভেতরে যেতে চায়। ওরাও ইঙ্গিতে জানালে যে কোনো ব্যক্তিগত অর্ডার নেওয়া হয় না। ইউরি চেষ্টা ছাড়লো না। মেয়েরা হাত নেড়ে চ'লে যেতে বললো তাকে, এখন থেকে সে চ'লে যাক এখন, জরুরি কাজ আছে তাদের। একজন মুখে বিষ্ময়ের ভাব ফুটিয়ে, হাতের পাতা সোজা করে দুটি হাত নৌকোর মতো করে বিরক্ত ভঙ্গিতে ভুরু তুলে জিজ্ঞেস করলো, কী চায় সে, কী! ইউরি আঙুল নেড়ে কাঁচি দিয়ে

কাটার ভঙ্গি করলো। কেউ কিছু বুঝতে পারলো না। ওরা স্থির করলে যে অসভ্যতা করছে লোকটা, তাদের নকল করছে, মজা করছে তাদের নিয়ে। সেই জানলার বাইরে অমন ছিন্ন, জীর্ণ অবস্থায় দাঁড়িয়ে, এই অদ্ভুত ব্যবহারে তাকে পাগলের মতো দেখাচ্ছিলো। মেয়েগুলো হাসতে-হাসতে তাকে হাত নেড়ে বলছিলো। অবশেষে সে ঠিক করলো বাড়িটা ঘুরে উঠানের মধ্য দিয়ে গিয়ে পেছনের দরজায় টোকা দেবে।

৬

দরজা খুলে দিলো কালো বয়স্ক, কঠোর চেহারার একটি স্ত্রীলোক, যার ঘন রঙের পোশাক দেখে মনে হয় সে-ই প্রধান দরজি।

‘আচ্ছা ছিনে জৌক তো তুমি! আমরা ব্যস্ত আছি দেখতে পাচ্ছো না! আচ্ছা বাপু, বলো, কী চাও তুমি, ব’লে ফ্যালো সেটা।’

‘কাঁচি চাই একটা, আপনি অবাক হবেন না। আমার চুল-দাড়ি ছাঁটার জন্য একটা কাঁচি ধার পেলো ভালো হয়। এখানে ব’সেই ছেঁটে নিয়ে তক্ষুনি ফিরায়ে দিতে পারি। এক মিনিটও সময় লাগবে না। দয়া ক’রে দেন যদি।’

স্ত্রীলোকটি অবাক হ’লো; দেখে মনে হ’লো ঠিক বিশ্বাসও ক’বতে পারছে না। লোকটা আদৌ প্রকৃতিস্থ কিনা স্পষ্টতই তাতে সন্দেহ হচ্ছিলো তার।

‘অনেক দূর থেকে এইমাত্র এসে পৌঁছেছি। চুল ছাঁটতে চাই, কিন্তু একটাও নাপিতের দোকান খোলা নেই। তাই ভাললাম নিজেই ছাঁটি, কিন্তু কাঁচি নেই আমার। একটা কাঁচি ধার দিতে পারেন?’

‘ঠিক আছে। আপনার চুল ছেঁটে দিচ্ছি, কিন্তু সাবধান! অন্য কোনো মতলব যদি থাকে—কোনো রাজনৈতিক কারণে যদি চেহারা বদলে ছদ্মবেশ নিতে চান—আপনার নামে নালিশ করলে তখন দোষ দেবেন না। আপনার জন্য তো আর নিজেদের প্রাণ বিপন্ন করতে পারি না আমরা।’

‘হা ভগবান! বলছেন কী আপনি?’

ভেতরে ঢুকিয়ে যে-ঘরটায় তাকে নিয়ে যাওয়া হ’লো সেটা সিঁদুকের চাইতে বড়ো নয়; পরমুহূর্তেই নিজেকে দেখলো ঠিক নাপিতের দোকানের মতোই চেয়ারে ব’সে আছে, গায়ে জড়ানো চাদর খুতনির তলায় আটকানো। ঘরের বাইরে গিয়ে একটা কাঁচি, চিক্কনি, ক্লিপ, চামাটি আর ক্ষুর নিয়ে ফিরে এলো স্ত্রীলোকটি।

‘আমার বয়সে সব রকম কাজ করেছি,’ খদ্দেরের বিষয় লক্ষ্য ক’রে সে বললে। ‘একসময় চুল ছাঁটতাম আমি। যুদ্ধে যখন নার্স ছিলাম, তখন চুল ছাঁটতে আর দাড়ি কামাতে শিখেছিলাম। আচ্ছা, এবার প্রথমে দাড়িটা কেটে ফেলা যাক, তারপর কামানো যাবে।’

‘আমার চুলটা খুব ছোটো ক’রে ছেঁটে দেবেন।’

‘যা পারি করবো। আচ্ছা, আপনি একজন শিক্ষিত লোক হ’য়ে এমন ভান করছেন কেন বলুন তো? যেন জানেন না যে আজকাল আমাদের দশ দিনে হপ্তা হয়, আর আজ হ’লো মাসের সতেরো তারিখ, আর নাপিতেরা যে-সব দিনে ছুটি পায় যাতে সাত সংখ্যাটি আছে।’

‘সত্যি বলছি আমি জানতাম না কিছুই। আমি তো আপনাকে বললাম, অনেক দূর থেকে এইমাত্র এসে পৌঁছিলাম। ভান করবো কেন বলুন?’

‘নড়বেন না, কেটে যাবে। ও, এই এসে পৌঁছেন? কিসে এলেন?’

‘আমার দুই পায়ে চ’ড়ে।’

‘হাইওয়ে ধ’রে?’

‘খানিকটা তা-ই, আর খানিকটা এসেছি রেল-লাইন ধ’রে। কতো ট্রেনই যে দেখলাম—সব বরফ-চাপা প’ড়ে আছে। নবাবি ট্রেন, স্পেশাল ট্রেন—যতো রকম ট্রেনের কথা ভাবতে পারেন।’

‘এই যে, আর একটু ছাঁটলেই—বাস, শেষ হ’য়ে যাবে। পারিবারিক কাজে এলেন?’

‘না, না, তা নয়! আগেকার ঋণ-সমবায়-সমিতির ইন্সপেক্টর ছিলাম আমি—ট্যুর করতে হ’তো। আমাকে কাজে পাঠালে পূর্ব-সাইবেরিয়ায়—বাস, সেখানেই অটিকে গেলাম। জানেনই তো, ট্রেন পাওয়ার কোনো আশাই তখন ছিলো না। হাঁটা ছাড়া গতি নেই। ছয় সপ্তাহ লাগলো। পথে যে কী দেখেছি আর কী দেখিনি, তা আপনাকে এখন বলতে পারবো না।’

‘আমি যদি আপনি হতাম তা’হলে কিন্তু কিছুই বলতাম না। দু’একটা জিনিস আপনাকে শিখিয়ে দিতে হবে দেখছি। আগে নিজের চেহারাটা দেখে নিন একবার। এই যে আয়না। চাদরের ভেতর থেকে হাতটা বের ক’রে ধরুন এটা। ঠিক আছে?’

‘আরো ছোটো চেয়েছিলাম। আর-একটু ছাঁটা যায় না?’

‘আরো ছোটো করলে ভালো থাকবে না। যা বলছিলাম, কিছু যেন বলতে শুরু করবেন না। মুখ বন্ধ রাখা অনেক ভালো। ঋণ-সমবায়-সমিতি, নবাবি ট্রেন, ইন্সপেক্টরগিরি—ও-সব ভুলে যান। এখন ও-সবের সময় নয়। কতো ঝামেলাই যে পোহাতে হ’তে পারে আপনাকে, তার ঠিক নেই। বরং এমন ভাব দেখাবেন যেন আপনি একজন ডাক্তার কি ফুল-মাস্টার। এই নিন—এবারে দাড়ি ছাঁটা হ’য়ে গেলো। এবার ভালো ক’রে কামাতে হবে। একবার সাবান বুলোলেই দশ বছর বয়স ক’মে যাবে আপনার। কেবলির জলটা ফুটিয়ে আনি।’

‘এ কে?’ ইউরি ভাবলে। কেমন যেন মনে হচ্ছিলো যে স্ত্রীলোকটির সঙ্গে একটা যোগ আছে তার—কী যেন দেখেছে, কি শুনেছে, কার কথা যেন মনে করিয়ে দিচ্ছে—কিন্তু কার কথা তা কিছুতেই মনে করতে পা-লো না।

গরম জল নিয়ে এসে স্ত্রীলোকটি।

‘এইবার কামানো যাক। যা বলছিলাম, একটা কথাও মুখে না-আনা ভালো। কথা যদি রূপো হয়, তা’হলে নীরবতা হ’লো সোনা। এ একেবারে চিরকালের সত্য। আর আপনার ঐ স্পেশাল ট্রেন আর ঋণ-সমবায়-সমিতি—বরং অন্য কোনো কথা ভাবুন, বলুন আপনি একজন ডাক্তার কি একজন শিক্ষক। যা-কিছু দেখেছেন নিজের মনে চেপে রাখুন। কাকে চমক লাগাবেন আজকাল? লাগছে না তো?’

‘একটু লাগছে।’

‘হ্যাঁ, একটু লাগে তা জানি—কিন্তু উপায় কী? একটু ধৈর্য চাই, বুঝলেন? আপনার চামড়ার ক্ষুরে অভোস নেই, আর আপনার দাড়িটাও বড়ো শক্ত। এক মিনিটও সময় লাগবে না। হ্যাঁ। লোকেরা দ্যাখেনি এমন কিছুই নেই। সব সহ্য করতে হয়েছে তাদের। আমাদেরও অনেক কষ্ট গেছে। শাদাদের আমলে কি সব কাণ্ডই না হয়েছে! খুন, নারীধর্ষণ, ভ্রূণহত্যা, নরহত্যা। এক খুদে কর্তা একজন আদালির ওপর অপ্রসন্ন হ’লেন। শহরের বাইরে, ক্রাপুলস্কিদের জায়গাটার কাছে, এক বন থেকে তাকে ফাঁদ পেতে টেনে বের ক’রে আনার জন্য পল্টন পাঠালেন তিনি। তাকে ধরলো তারা, নিরস্ত্র ক’রে পাহারা দিতে-দিতে নিয়ে গেলো রাজ্জভিলিয়েতে। তখনকার দিনে রাজ্জভিলিয়ে এখনকার আঞ্চলিক চেকা-র মতোই ছিলো—খাঁটি একটি হত্যাভূমি। অমন মাথা ঝাঁকানো কেন? একটু লাগছে, তাই না? জানি বাবা, জানি। কিন্তু উপায় কী? আপনার দাড়ি নয়তো কাঁটার ঝোপ। এই এটুকু হ’লেই হ’য়ে যায়। যাক, সেই আদালির বৌয়ের একেবারে পাগলের মতো দশা। কোলিয়া! কোলিয়া! আমার কোলিয়ার কী হবে! সোজা চলে গেলো জেনারেল গালিউলিনের কাছে। মানে—এই কথার কথা বলছি অবশ্য। সোজা তাঁর কাছে যেতে পারেনি। অনেক ধরাধরি হয় তো। ঐ পাশের রাস্তায় একজন ছিলেন, যিনি

জানতেন কীভাবে তাঁর সঙ্গে দেখা করা যাবে, অসাধারণ দয়াবতী তিনি, অত্যন্ত কোমলপ্রাণ, অন্য কারো মতো নয়, সব সময় লোকের উপকার করতেন। এখানে যে কী হ'য়ে গেছে ভাবতেও পারবেন না, গালের ছাল ছাড়িয়ে নেওয়া, নির্মাতন, নাটুকেপনা, মেয়েমানুষ নিয়ে খুন-জখম। ঠিক স্প্যানিশ উপন্যাসে যেমন থাকে।'

'লারার কথা বলছে,' ইউরি মনে-মনে বললে। কিন্তু বুদ্ধিমানের মতো চুপ ক'রে বইলো সে। খুটিয়ে কিছু জানতে চাইলে না। স্প্যানিশ উপন্যাস বিষয়ে তার আজগুবি মন্তব্যও যেন কী মনে করিয়ে দিলো তাকে—বিশেষত আজগুবি আর অপ্রাসঙ্গিক ব'লেই—কিন্তু কী, তা কিছুতেই ভেবে পেলো না।

'এখন অবশ্য সবই বদলে গেছে। মানতেই হবে যে এন্ডার খানাতল্লাসি চলছে, গোয়েন্দাগিরি, গুলি ক'রে মেরে ফেলাও হচ্ছে বিস্তার। কিন্তু ভেতরকার কথাটা অন্য। প্রথমত, নতুন সরকার এই সবে ক্ষমতা পেয়েছে, এখনো তো ঠিকমতো গুছিয়ে বসেনি। তারপরে, যা-ই বলুন না কেন, এরা সাধারণ লোকের সপক্ষে, আব সেখানেই তাদের জোর। আমরা হলুম চার বোন, সবাই খেটে খাই; বলশেভিকদের দিকে আমাদের টান থাকাই তো স্বাভাবিক। এক বোন মারা গেছে। তার স্বামী ছিলো রাজনৈতিক পলাতক, স্থানীয় কোন কারখানায় যেন' ম্যানেজারের কাজ করতো। ওদের ছেলে—আমার বোনপোঁ আরকি—কৃষক-বাহিনীর সেনাপতি সে—রীতিমতো নামজাদা আজকাল।

'ও—ইনি তাহ'লে লিবেরিয়ুসের মাসি,' ইউরি বুঝতে পারলো এবার। 'লিবেরিয়ুসের মাসি, মিকুলিৎসিনের শালি,' সেই যাকে নিয়ে এতে' গল্প, যে নাপতেনি, দরাজ, সিগনালওয়ালি—জুতো শেলাই থেকে চণ্ডীপাট পর্যন্ত ঘিনি করতে পারেন। কিন্তু কিছু না-বলাই স্থির করলে সে, যাতে নিজের পরিচয়টা দিতে না হয়।

'চিরকালটাই জনসাধারণের ওপর টান আমার বোনপোর—সেই ছেলেবেলা থেকে। কারখানার মজুরদের মধ্যেই মানুষ হয়েছে। ভারিকিনোর কারখানার কথা শুনেছেন বোধহয়? —এই দ্যাখো, কী ক'রে ফেললাম গাধার মতো! আপনার খুতনিব অর্ধেকটা মোলায়েম হয়েছে, বাকি অর্ধেকটা ডাড়ি। কথা বললে এই হয়। আমাকে থামিয়ে দিলেন না কেন? এখন সাবানের ফেনাও শুকিয়ে গেছে, জলটাও ঠাণ্ডা হ'য়ে গেলো। যাই, আবার গরম ক'রে আনি।'

সে ফিরে এলে ইউরি জিজ্ঞেস করলে:

'ভারিকিনো তো কয়েক মাইল দূরে গ্রামের মধ্যে, না? এ-সব গোলমাল বোধহয় পৌছয়নি ওখানে?'

'ঠিক পৌছয়নি বলা যায় না। কোনো-কোনো বিষয়ে এখানকার চেয়েও খারাপ অবস্থা হয়েছিলো ওখানে। ওখানে এক সশস্ত্র বাহিনী হানা দিয়েছিলো, তারা যে কে বা কী তা কেউ জানে না। আমাদের ভাষায় কথাও বলে না তারা। তন্ন-তন্ন ক'রে খুঁজেছে সারা গ্রাম—প্রত্যেক বাড়িতে ঢুকে যাকে পেয়েছে তাকেই গুলি ক'রে চ'লে গেছে, একটু আসুন-বসুনের সবুর সয়নি। বরফের ওপর প'ড়ে রইলো লাশগুলো। তখন শীতকাল। মাথা ঝাকানোটা থামান তো একটু, প্রায় কেটে ফেলছিলাম আপনাকে।'

'আপনি বলছিলেন আপনার ভগ্নীপতি ভারিকিনোতে থাকতেন। এ-সব হাঙ্গামার সময় ছিলেন উনি?'

'না, ঈশ্বরের দয়ায় সে আর তার স্ত্রী ঠিক সময়ে চ'লে এসেছিলো—মানে, ওর দ্বিতীয় স্ত্রী। কিছু নতুন লোকও ছিলো ওখানে, মস্কো থেকে কয়েকজন এসেছিলেন। তাঁরা আরো আগে চ'লে গিয়েছিলেন। পুরুষ দু'জনের মধ্যে যার বয়স কম, একজন ডাক্তার, বাড়ির কর্তা ছিলো সে-ই—তাকে পাওয়া যাচ্ছিলো না। অবশ্য ওটা বলার জন্যই বলা, "পাওয়া যাচ্ছে না" বলা হয়েছে, ওদের মনে যাতে কষ্ট না হয় সেজন্য। আসলে নিকচরই মারা গেছেন

ভদ্রলোক—নিশ্চয়ই তাঁকে মেরে ফেলা হয়েছে, সমানে খুঁজেছেন ওঁরা, কিন্তু সে আর ফিরে আসেনি। ইতিমধ্যে অন্যজন, দু'জনের মধ্যে যিনি বয়স্ক, তাঁকে ফিরে যেতে বলা হলো। ভদ্রলোক প্রোফেসর, একজন কৃষিবিদ। শুনেছি সরকারই তাঁকে ফিরিয়ে নিয়ে গেছেন। শাদারা ফিরে আসার ঠিক আগে মস্কো যাবার পথে ইউরিয়্যাটনে থেমেছিলেন ওঁরা। আবার শুরু করলেন—কেবল মাথা নাড়ানো আর মাথা ঝাঁকানো। সত্যি, আপনি দেখছি আমাকে দিয়ে আপনার গলাটা না-কাট্টিয়ে ছাড়বেন না। একেবারে পুরো পয়সাটা উশুল ক'রে নেবেন নাপিতের কাছ থেকে!'

তাহ'লে ওঁরা মস্কোতে!

৭

'মস্কোতে! মস্কোতে!' তৃতীয়বার সেই লোহার জালি-কাটা সিঁড়ি বেয়ে উঠতে-উঠতে প্রতি পদক্ষেপে এই কথাই তাব বৃকে বাজছিলো। শূন্য ফ্ল্যাট আবার অভ্যর্থনা জানালো তাকে, ইদুরের পালের ছটোপুটি, লুটোপুটি আর ছুটোছুটির সেই নারকীয় শব্দ দিয়ে। ইউরি পরিষ্কার বুঝলে যে এই আবর্জনা সরাতে না-পারলে, যতো ক্লান্তই হোক, সে ঘুমোতে পারবে না। রাতের মতো শুয়ে পড়ার আগে প্রথম কর্তব্য ইদুরের গর্তের মুখ বন্ধ করা। ভাগ্য বলতে হবে যে শোবার ঘরে বাড়ির অন্যান্য অংশের চাইতে ইদুর কম; সেখানে মেঝের ধারগুলো ফেটে গিয়ে পাটাতনেব আরো দুর্দশা হয়েছে। তাহ'লে তাড়া করতে হয়—এদিকে অন্ধকার হ'য়ে এলো। রান্নাঘরের টেবিলে একটা বাতি আছে ঠিকই—বোধহয় সে আসবে ব'লেই কুলুঙ্গি থেকে নামিয়ে রাখা হয়েছে—অর্ধেকটা-মতো তেলে ভরা, দু'একটা কাঠি পোরা একটা দেশলাইয়ের বাস্ক ও কাছে আছে। কিন্তু দেশলাই আর তেল দুটোই বাঁচাতে পারলে ভালো। শোবার ঘরে ছোটো একটা বাতি খুঁজে পেলো; তাতে যা তেল ছিলো ইদুরে তার বেশির ভাগটাই শেষ করেছে, অল্প একটু প'ড়ে আছে শুধু।

কোথাও-কোথাও মেঝের ধারগুলি ক্ষয়ে গেছে। ভাঙা কাচ দিয়ে সে-সব ফাটল ভরাতে এক ঘণ্টার বেশি সময় লাগলো তার। দরজাটা মুখে-মুখে বন্ধ হয়, একবার বন্ধ ক'রে দিলে শোবার ঘরটা ইদুরের হাত থেকে রেহাই পাবে।

ঘরের এক কোণে আছে একটা ওলন্দাজি স্টোভ, তার টালির কার্নিশ প্রায় ছাদে ঠেকেছে। রান্নাঘরে এক বাণ্ডুল কাঠ ছিলো। ইউরি স্থির করলো লারার কিছু কাঠ অপহরণ করবে; ইটু ভেঙ্গে ব'সে কাঠ বেছে নিয়ে ঝাঁ হাতে তাদের সামলাতে-সামলাতে উঠে এলো ইউরি। শোবার ঘরে গিয়ে স্টোভের কাছে স্থপ করলো সেগুলোকে, তারপর ভেতরটায় উকি মেরে দেখলো, স্টোভটা কেমন চলে বা কী অবস্থায় আছে। দরজায় চাবি লাগাবার ইচ্ছে ছিলো, কিন্তু তালাটা গেছে ভেঙে; কাগজ গুঁজে শক্ত ক'রে এঁটে দিলো; তারপর ধীরে-সুস্থে সাজিয়ে নিয়ে আঁচ দিলো চুল্লিতে।

চুল্লিতে কাঠ দিতে দিতে হঠাৎ লক্ষ করলো একটা কাঠের চেরা অংশে 'কু. উ'. এই দুটি আদ্যক্ষর খোদাই করা। চিনতে পেরে বিস্মিত বোধ করলো সে। সেই ক্রোগারদের আমলে কারখানা থেকে যে-সব কাঠ ফেলা যেতো সেগুলো বিক্রি হ'তো জ্বালানি হিসেবে, টুকরো করার আগে ছাপ দিয়ে দেওয়া হ'তো, কোথা থেকে এসেছে, সেটা বোঝানোর জন্য। 'কু. উ'. মানে ভারিকিনোর কুলাবিশ উপত্যকা।

মনটা খারাপ হ'য়ে গেলো তার। এই জ্বালানিগুলো প্রমাণ করছে সে সামডেভইয়াটভের সঙ্গে যোগাযোগ আছে লারার, সে-ই তাকে কাঠ জুগিয়েছে, যেমন এককালে ইউরির সংসারে যান্ধিক দরকার সে-ই মেটাতো। কিন্তু ওর কাছে ঋণী আছে ভাবতে তার অস্বস্তি হয়, এবং তার

সঙ্গে আরো অনেক অনুভূতি মিশে তার মনের ভাবটিকে জটিল ক'রে তুললো।

শুধু সহানুভূতির বশবর্তী হ'য়ে সামডেভইয়াটভ লারাকে সাহায্য করেছে, এমন মনে হয় না। লোকটির ব্যবহার যেমন দিলেঢালা, তেমনি লারাও ঝোঁকের মাথায় চলে—তার নারীত্বের ওটাই একটা লক্ষণ। ওদের মধ্যে কিছু ব্যাপার হয়নি তো?

শুকনো কুলাবিশ কাঠ ফুর্তিতে পুড়তে লাগলো, শো-শো শব্দে জ্বলে উঠলো আগুন আর সঙ্গে-সঙ্গে ইউরির অঙ্ক ঈর্ষা, ক্ষীণ সন্দেহ থেকে নিশ্চিতির রূপ নিলো।

কিন্তু সব দিক দিয়েই এতো যত্নগা ইউরির যে এক উদ্বেগকে হটিয়ে দিয়ে আর-এক উদ্বেগ তার স্থান ক'রে নিচ্ছিলো। সন্দেহ নিরসন করার কোনো প্রয়োজন ছিলো না তার; তার মন এক বিষয় থেকে বিষয়াঙ্করে লাফিয়ে-লাফিয়ে চলছিলো; পরমুহূর্তেই তার স্ত্রী-পুত্রের ভাবনা বন্য়ার মতো ডুবিয়ে দিলে তার ঈর্ষাপ্রসূত কল্পনাকে।

‘তাহ'লে তোমরা মস্কোতে, আমার সোনা মগিরা?’ এখন তার মনে হচ্ছিলো যে দরজি-মেয়েটি বুঝি এমন আশ্বাস দিয়েছে যে ওরা নিরাপদে মস্কো পৌঁছেছে। ‘আরো একবার সেই লম্বা পথ তোমরা পাড়ি দিলে, এবারে আমাকে ছাড়া। পথে কী ক'রে কী করলে? আলেকজাণ্ডার আলেকজান্ড্রোভিচকে ডেকে পাঠালো কেন? আকাদেমির চেয়ারে আবার বহাল করবে? বাড়ি খুঁজে পেলে কী ক'রে? কী বোকা আমি! বাড়িটা এখনো আছে কিনা তা পর্যন্ত জানি না। ঈশ্বর, কী কঠিন, কী কষ্টের এই জীবন। শুধু যদি চিন্তা না-ক'রে থাকতে পারতাম! কেমন যেন জট পাকিয়ে যাচ্ছে ভাবনাগুলো। কী হ'লো আমার, টোনিয়া? আমার কি অসুখ করলো? কী হবে আমাদের? কী হবে তোমার, টোনিয়া। টোনিয়া, সোনা মগি? আর সাশা? আর আলেকজাণ্ডার আলেকজান্ড্রোভিচ? আর আমি? হে শাশ্বত জ্যোতি, আমাকে কেন তুমি পরিত্যাগ করলে? আমার সোনারা, কেন সব সময় আমাদের পরস্পরের কাছ থেকে দূরে স'রে থাকতে হয়? কেন তোমাদের ছিনিয়ে নেওয়া হয় আমার কাছ থেকে—সব সময়? কিন্তু আমি খুঁজে পাবো তোমাকে—যদি সারাটা পথ হেঁটে যেতে হয়, তবু। আবার দেখা হবে আমাদের, আবার একত্র হবো আমরা—সব ঠিক হ'য়ে যাবে—হবে না?

‘ধরনী দ্বিধা হ'য়ে আমাকে কেন গ্রাস করেন না—যে-আমি এমনই পিশাচ যে সর্বদা ভুলে যাই যে টোনিয়া সন্তানসম্ভবা ছিলো, নিশ্চয়ই এতোদিন তার জন্ম হ'য়ে গেছে। একথাটা এই প্রথমবার ভুললাম না। প্রসবের সময় ও কী অবস্থায় কাটিয়েছে? ভাবো একবার, মস্কো যাবার পথে ইউরিয়াটিনে থেমেছিলো ওরা সবাই! একথা সত্যি যে লারা ওদের চিনতো না, কিন্তু একজন নিতান্ত বাইরের লোক, এক মেয়ে-দরজি, এক নাপতেনি তাদের সব খবর শুনছে, আর লারা তার চিঠিতে ওদের বিষয়ে কিছুই লিখলে না? কী ক'রে এতো অবহেলা করতে পারলে, এমন নির্লিপ্ত হ'লো কী ক'রে? সামডেভইয়াটভের বিষয়ে কিছু না-বলার মতোই এটা আশ্চর্য।’

ঘরের চারপাশে এবার এক নতুন দৃষ্টিতে তাকালো ইউরি। সব আসবাবই সেই নাম-না-জানা ভাড়াটের যিনি বহুদিন ধ'রে অনুপস্থিত ও পলাতক। এমন কিছুই নেই যা লারার রুচির পরিচয় দিতে পারে। দেয়ালের ফোটোগুলি সবই অচেনা লোকের। তবু, হঠাৎ সেই সব স্ত্রী-পুরুষের চোখের সামনে অস্বস্তি বোধ করলো ইউরি। জবড়জং আসবাবগুলির নিশ্বাসে যেন শত্রুতা। এই শোবার ঘরে ব'সে নিজেকে পরদেশী আর অযাচিত ব'লে মনে হ'তে লাগলো তার।

কী বোকা সে! এই বাড়িটাকে সে মনে ক'রে রেখেছিলো, এর জন্য সে কষ্ট শ্লেষেছে মনে-মনে! কী বোকা, এমনভাবে এই ঘরে ঢুকেছে যেন এটা একটা সাধারণ ঘর নয়, লারার জন্য তার বাসনার অন্তঃপুর! বাইরের কারো কাছে এ-রকম মনোভাব কী বোকার মতোই না মনে হবে। শক্তিশালী, সুপুরুষ, সংসারী আর সক্ষম লোকেরা, যেমন সামডেভইয়াটভ, কতো ভিন্নভাবেই তারা দিন কাটায়, কথা বলে, কাজ করে! আমার দুর্বলতাকে কেন লারা পছন্দ করবে, কেন চাইবে আমার গোপন, অবাস্তব, রহস্যময় প্রেমের ভাষা শুনতে? লারার কি

কোনো প্রয়োজন আছে তার এই অস্থিরতায়? আমি যে-ভাবে লারাকে দেখি, সেইভাবে কি সে তার নিজেকে চায়?

আমার কাছে লারা কী? আ, সে তো সোজা কথা! সে তো খুব ভালো ক'রেই জানি।

বসন্তের সন্ধ্যা... ইতস্তত শব্দ ভাসে বাতাসে। রাস্তায় ছেলেমেয়েরা খেলা করছে, কাছে থেকে, দূর থেকে ভেসে আসছে তাদের গলার আওয়াজ, যেন বোঝাতে চাইছে আদিগন্ত এখন জীবন্ত। এই বিস্তার—এ-ই তো রাশিয়া, এ-ই আমার তুলনাহীনা জননী, সারা জগতে খ্যাতি ছড়িয়েছে তাঁর, শহীদ তিনি, একশুয়ে, বেহিসেবি, পাগলাটে, দায়িত্বজ্ঞানহীন, আরাধ্যা—রাশিয়া, কী দুগ্ধ তাঁর ভঙ্গিমা, কী সর্বনেশে, মুহূর্তে-মুহূর্তে কী অপ্রত্যাশিত! আ, বেঁচে থাকতে এতো ভালো লাগে, এতো ভালবাসি এই জীবনকে! এই জীবনকে, তার নিছক অস্তিত্বটাকে, কৃতজ্ঞতা জানাতে ইচ্ছে করলো ইউরির। —মুখোমুখি দাঁড়িয়ে, প্রত্যক্ষভাবে ধন্যবাদ জানাতে ইচ্ছে করলো।

লারা ঠিক এ-ই। জীবনের সঙ্গে কথা বলা যায় না, কিন্তু লারা তার প্রতিনিধি, তার ব্যক্তনা, লারা তা-ই, যা মুক প্রাণীকে উপহার দেয় বাক ও শ্রবণশক্তি।

সব, সব মিথ্যে, লারার বিষয়ে একটু আগে সে যা-কিছু ভেবেছে! তার মাথার ঠিক ছিলো না তখন। লারা একেবারে নিখুঁত, সব অভিযোগের অতীত সে।

সশ্রদ্ধ অনুতাপের অশ্রুতে তার চোখ ভ'রে এলো। উনুনের মুখটা খুলে আগুনে খোঁচা দিলো সে; যে-সব জ্বলন্ত কাঠ বিশুদ্ধ তাপের রূপ নিয়েছে সেগুলোকে পেছনের দিকে ঠেলে দিয়ে, যেগুলোতে ভালো ক'রে আগুন ধরেনি সেগুলো হাওয়ার দিকে সামনে টেনে নিয়ে এলো। মুখটা খোলা রেখেই আগুনের সামনে ব'সে রইলো, ভালো লাগলো আলোর খেলা, মুখে আর হাতে উষ্ণ আরাম। এই উত্তাপে আর আলোয় মাথা ঠাণ্ডা হ'লো তার। অসহ্যভাবে লারার অভাব অনুভব করতে লাগলো সে, সেই মুহূর্তেই তাকে লারার সান্নিধ্য এনে দিতে পারে এমন কিছুর জন্য সে আর্ত হ'য়ে উঠলো।

পকেট থেকে দুমড়োনো চিঠিটা বের করলে। যে-পাতাটা সে আগে পড়েছিলো, তার উশ্টো পিঠে ভাঁজ পড়েছে এবার—হঠাৎ দেখলো সে-দিকেও কিছু লেখা আছে। কাগজটাকে টান ক'রে নিয়ে আগুনের কাঁপা আলোয় সে পড়লো:

'জানো, তোমার বাড়ির সবাই মস্কোতে আছে। একটি ছোট্টো মেয়ে হয়েছে টোনিয়ার।' তারপর কয়েকটা লাইন কাটা, তারপর: 'কেটে দিলাম কারণ ও-বিষয়ে কিছু লেখাটাই বোকামি। দেখা হ'লে প্রাণের সুখে কথা বলা যাবে। এক্ষুনি বেরোতে হচ্ছে, একটা ঘোড়া জোগাড় করতেই হবে। না-পেলে কী করবো জানি না। কাটিয়াকে নিয়ে এমন মুশকিল....' বাকিটা কালিতে মুছে গেছে, পড়া যাচ্ছে না।

'ঘোড়াটা পেয়েছে সামডেভইয়াটভের কাছ থেকে,' ইউরি শান্ত মনে ভাবলো। 'যদি ওর কিছু লুকোবার থাকতো তাহ'লে এ-কথাটার উল্লেখ করতো না।'

৮

আগুন নিবে গেলে ইউরি চুল্লির নল বন্ধ ক'রে দিয়ে কিছু খেয়ে নিলে। তারপর এতো ঘুম পেয়ে গেলো যে জামা-কাপড় না-ছেড়েই সোফার ওপর শুয়ে পড়লো, আর শোয়ামাত্র ঘুম। দেয়াল আর দরজার পেছনে ইদুর-বাহিনীর সশব্দ অভব্য গোলমাল তার কানে ঢুকলো না। পর-পর দুটো দুঃস্বপ্ন দেখলো সে।

সে যেন মস্কোতে, এমন একটা ঘরে যার দরজাটা কাচের। দরজায় চাবি লাগানো আছে। আরো বেশি নিরাপত্তার জন্য সে দরজার হাতলটা ধ'রে নিজের দিকে টেনে রাখছে। ছোট্ট

সাশা, তার পরনে টুপিসুদ্ধ সেইলস্ সুট, বাইরে থেকে ধাক্কা দিচ্ছে দরজায়, ভেতরে আসবে বলে কেঁদে-কেঁদে ম'রে যাচ্ছে সে। তার পেছনে একটি জলপ্রপাত, জলকণায় দরজাটা আঁবেছা হ'য়ে গেছে, ভিজিয়ে দিচ্ছে সাশাকে। দারুণ গর্জন ঐ জলপ্রপাতের। হয় কোনো ফাটা পাইপ থেকে জল গড়াচ্ছে—যা তখনকার দিনে হামেশাই হ'তো, নয় ঐ কাচের দরজাটা আঁড়াল ক'রে রেখেছে এক আরণ্যক প্রদেশকে, সেখানে এক পাহাড়ি নদী প্রচণ্ডবেগে গর্জন করতে-কবড়ে চলেছে অযুত বছরের হিম আব অন্ধকার ভরা গুহার মধ্য দিয়ে।

সেই উচ্চল জলের শব্দে সাশা ভয়ে কাঁটা হ'য়ে যেতে লাগলো। তার গলার আওয়াজ ডুবিয়ে দিলো সেই শব্দ, কিন্তু ইউরি দেখতে পাচ্ছিলো কেমন ক'রে সে বাব-বাব, বাব-বাব চেঁচা করছে 'বাবা' বলে ডেকে উঠতে।

কষ্টে বুক ফেটে যাচ্ছিলো ইউরির। কায়মনোবাক্যে সে চাইলো ছেলটাকে কোলে তুলে নিতে, তাকে বুকের মধ্যে লুকিয়ে যতো নিয়ে তাড়াতাড়ি পারে ছুটে পালিয়ে যেতে চাইছিলো।

চোখের জলে ভেসে যাচ্ছে ইউরি, তবু সে ছেলেকে বাইরে ফেলে রাখছে, তাকে ঠেকিয়ে দরজাটাকে চেপে রাখছে নিজের দিকে—কেন? অন্য এক রমণীর প্রতি এক মিথ্যা সদাচারের ইচ্ছায়—যে-নারী তার সন্তানের মা পর্যন্ত নয়, আর যে-কোনো মুহূর্তে অন্য দরজা দিয়ে এই ঘরে যে চ'লে আসতে পারে।

ঘামে আর চোখের জলে ভেসে জেগে উঠলো সে। 'আমার জ্বর হয়েছে, আমি অসুস্থ,' সে ভাবলো। 'টাইফস নয় এটা। এটা হ'লো এক ধরনের অবসাদ যা এক মারাত্মক রোগের আকার নিচ্ছে, এমন কোনো রোগ যাতে প্রাণসংশয় হ'তে পারে; যে-কোনো কঠিন, ছোঁয়াচে ব্যামোর মতোই হবে এটা; শুধু দেখা যাক কে জেতে, জীবন না মৃত্যু। কিন্তু বড়ো ঘুম পেয়েছে, কিছু ভাবতে পারছি না।' আবার ঘুমে ঢ'লে পড়লো সে।

এবার স্বপ্ন দেখলো এক অন্ধকার শীতের সকালের; রাস্তায় আলো জ্বলছে, নিজেকে দেখলো মস্তকের কোনো-এক ভিড়ে ভরা রাস্তায়। যানবাহন, ট্রামের ঘৃষ্টি আর আলো-ফোটা রাস্তায় ধূসর বরফের ওপর ল্যাম্পপোস্টের হলদে আভার স্রোতগুলো—এ-সব দেখে মনে হয় যে বিপ্লবের আগেকার সময় এটা। স্বপ্নে দেখলো একটা বড়ো ম্যাট, অনেক জানলা, কিন্তু সবই এক দিকে, বাড়িটা খুব সম্ভব তেতলার চাইতে উচু নয়, জানলা ঢেকে পর্দাগুলো ঘরের মেঝেতে লুটিয়ে পড়েছে।

ভেতরে জামা-কাপড় প'রে লোকেরা সব ঘুমিয়ে আছে—যেন রেলের কামরায়—আর ঘরগুলোও রেল-কামরার মতোই অপরিচ্ছন্ন, আধো-খাওয়া মাংসের ঠ্যাং, রোস্ট মুর্গির ডানা, আর পিকনিকের অন্য সব খাবারদাবারের উদ্ভৃষ্ট, তেল-চিটিচিটে কাগজের টুকরোর ওপর ছড়িয়ে আছে। যে-সব বন্ধু, আত্মীয়, আগন্তুক আর গৃহহীনরা এই ম্যাটে আশ্রয় নিয়েছে, রাস্তার জুতো খুলে রেখেছে তারা, মেঝের ওপর জোড়ায়-জোড়ায় সে-সব জুতো শোভা পাচ্ছে। বাড়ির কব্বী, লারা; কোনোমতে সে কোমরে একটা ড্রেসিংগাউন জড়িয়ে দ্রুত ও নিঃশব্দে ঘরে-ঘরে ঘুরে তাড়াতাড়ি কাজকর্ম সেরে নিচ্ছে, আর ইউরি ঘুরছে তার পায়ে-পায়ে, নিরানন্দ এবং অপ্রয়োজনীয় কী সব কৈফিয়ৎ বিড়বিড় ক'রে আউড়ে যাচ্ছে সে, আর মিছিমিছি ব্যামেলা বাড়াচ্ছে। কিন্তু তার দিকে মন দেবার মতো মুহূর্ত সময়ও লারার নেই, তার বিড়বিড়ানি লক্ষ্য করছে না সে, শুধু মাঝে-মাঝে শান্ত, কৌতূহলী দৃষ্টি মেলে তাকাচ্ছে তার দিকে, হেসে উঠছে ফোঁটা-ফোঁটা রূপোর মতো অননুकरণীয় সরল ভঙ্গিতে। তাদের মধ্যে শুধু এই এক ধরনের সংযোগ অবশিষ্ট আছে। কিন্তু কী সুদূর, কী ঠাণ্ডা আর কী অনিবার্যরূপে আকর্ষণযোগ্য এই নারী, যার জন্য সে তার সর্বস্ব ত্যাগ করেছে, অন্য সব-কিছুর চাইতে আরো বেশি ক'রে সে যাকে চায়, আর যার তুলনায় অন্য কিছুই কোনো মূল্য নেই।

৯

সে নয়, অথচ তারই মধ্যে যেন অন্য কেউ বিলাপ ক'রে-ক'রে কাঁদছে, অন্ধকারে মৃদু ভাষায় জ্বলজ্বল করছে যেন। তার জন্য খিন্ন হ'লো তার আত্মা, সে নিজেও শোকার্ত হ'লো নিজের জন্য।

‘আমি অসুস্থ’, ঘুম, বিকার আর অচেতন্যের মাঝখানকার ফাঁকা সময়টুকুতে সে ভাবলে। ‘আমার শেষ পর্যন্ত টাইফাসই হ'লো। নিশ্চয়ই কোনো বিশেষ ধরনের টাইফাস, পাঠ্য বইয়ে যার উল্লেখ নেই। কিছু খাওয়া উচিত আমার, নয়তো অনাহারে মারা যাবো।’

কিন্তু যখনই কনুইয়ের ওপর ভর দিয়ে নিজেকে তোলবার চেষ্টা করেছে, দেখেছে তার নড়বার ক্ষমতা নেই, হয় অজ্ঞান হ'য়ে পড়েছে, নয়তো ঘুম এসে গেছে আবার।

‘কতক্ষণ এখানে শুয়ে আছি?’ একবার নিজেকে জিজ্ঞেস করলো সে। ‘এই সোফায় যখন প্রথম শুতে যাই তখন ছিলো প্রথম বসন্ত, কিন্তু এখন জানলাগুলো এমন ঘন বরফে ঢাকা যে ঘরটা একেবারে অন্ধকার হ'য়ে গেছে।’

রামাঘরে ইদুরের পাল গোলমাল করছে, শব্দ করছে প্লেটের ওপর বনবন, ছুটছে দেয়াল বেয়ে, লাফিয়ে নামছে, তাদের করুণ, কুৎসিত চি-চি গলার আওয়াজের আর বিরাম নেই।

যখন আবার ঘুম ভাঙলো তখন বরফে ঢাকা জানলায় ভোরের অথবা সূর্যাস্তের আলো এসে পড়েছে, ফটিক-পাত্রে লাল মদের মতো জ্বলছে সেই আলো।

একবার মনে হ'লো যেন কাছে কোথায় গলার স্বর শুনলো, পাগল হ'য়ে যাচ্ছে ভেবে ভয় পেয়ে গেলো সে। নিজের দুঃখে কেঁদে সে ঈশ্বরকে অভিযোগ করলে যে তিনি তাকে বর্জন করেছেন। ‘হে শাস্ত্র জ্যোতি, তুমি কেন আমাকে পরিত্যাগ করলে, নরকের অন্ধকারে কেন ঠেলে দিলে আমাকে?’

হঠাৎ সে উপলব্ধি করলো যে সে স্বপ্নও দেখছে না, বিকারের ঘোরও আচ্ছন্ন হ'য়ে নেই, কিন্তু সত্যি-সত্যি, স্নাত পরিক্ষার জামা গায়ে, সে শুয়ে আছে, সোফায় নয়, এইমাত্র পাতা বিছানায়; আর তার পাশে ব'সে, তার ওপর ঝুঁকে প'ড়ে, নিজের চুল আর ইউরির চুলে মিশিয়ে দিয়ে, নিজের চোখের জল ইউরির চোখের জলে এক ক'রে দিয়ে, যে কাঁদছে সে লারা। আনন্দে ইউরি সংবিৎ হারালো।

১০

স্বর্গ তাকে বর্জন করেছে ব'লে অভিযোগ করেছিলো সে, কিন্তু এখন দুটি সক্ষম শুভ্র রমণীর হাত তার বিছানার ওপর সমস্ত স্বর্গের সুখ নামিয়ে আনলো। আনন্দে মাথা ঘুরতে লাগলো তার, সুখে ভেসে গেলো সে, যেন চেতনা হারিয়ে ফেললো।

সারা জীবন ভ'রে সে খেটেছে, বাড়ির কাজ করেছে, রোগীর পরিচর্যা করেছে, ভেবেছে, পড়েছে, লিখেছে। কী ভালো লাগে সব কাজ, সব যুদ্ধ, সব চিন্তার অবসান ক'রে দিতে! —একবারের জন্য প্রকৃতির হ'তে, তার হাতে ছেড়ে দিতে—যেন আমার দায় সে-ই তুলে নিয়েছে—তার আশ্চর্য, সকল, সৌন্দর্যসম্ভারী দুটি হাতের সৃষ্টি হ'তে।

ইউরির সেরে উঠতে দেরি হ'লো না। লারা খাওয়ালে তাকে, তার সেবা করলে, তাকে পুনরুজ্জীবিত ক'রে তুললো তার যত্নে, তার তুষারশুভ্র সৌন্দর্যে, তার নিচু গলায় বলা কথাবার্তার উষ্ণ, জীবন্ত নিশ্বাসে।

তাদের সেই নিচু-গলার কথাবার্তা যতো তুচ্ছই হোক, প্লেটের কথোপকথনের মতোই তা অর্থপূর্ণ।

অনেক মিল দু'জনের মধ্যে, কিন্তু বাইরের জগৎ থেকে যা তাদের বিচ্ছিন্ন করেছে, তা-ই তাদের পরস্পরের আরো বেশি অন্তরঙ্গ ক'রে তুললো। দু'জনেই ঘৃণা করে সেটাকে, যেটা আধুনিক মানুষের সবচেয়ে শোচনীয় লক্ষণ—তার চীৎকৃত পাঠ্যকেতাঁবি ভক্তি, তার ইচ্চিয়ে-তোলা উৎসাহ, আর সেই মারাত্মক নিজীবতা—যা শিল্পে বিজ্ঞানে অসংখ্য কর্মীরা বহুযত্নে প্রচার করছে ও কাজে খাটাচ্ছে, যাতে প্রতিভার আবির্ভাব অতাত্ত্বি বিরল হ'তে পারে।

পরস্পরকে খুব ভালোবাসে তারা। প্রেমের অভিজ্ঞতা অনেকের জীবনেই আসে, কিন্তু তারা বুঝতে পারে না তার মধ্যে অসাধারণ কিছু আছে।

তাদের ধ্বংসোন্মুখ মানুষী অস্তিত্বের ওপর, চিরন্তনের নিশ্বাসের মতো, আবেগের মুহূর্তগুলো যখন নেমে আসতো, তাদের তা মনে হ'তো যেন দিব্য উজ্জ্বলের জন্মক্ষণ—তখন আরো গভীর ক'রে তারা উপলব্ধি করতো নিজেদের, এবং এই জীবনকে। আর এখানেই তাদের অসাধারণত্ব।

১১

'নিশ্চয়ই তুমি বাড়ি ফিরে যাবে। প্রয়োজনের অতিরিক্ত একদিনও তোমাকে আটকে রাখতে চাইনে আমি। কিন্তু একবার দ্যাখো তো কী হচ্ছে। তুমি জানোও না যে তুমি যখন অসুস্থ ছিলে তার মধ্যে কতো পরিবর্তন হয়েছে। যে-মুহূর্তে আমরা সোভিয়েত রাশিয়ার অন্তর্গত ইলাম, সে-মুহূর্তেই তার ভাঙন আমাদের গ্রাস ক'রে নিলো। এখানকার খাদ্য পাঠানো হচ্ছে মস্কোতে—আর সেখানে এ হ'লো সমুদ্রের বুকে একবিন্দু জলের সমান—এই সব ট্রাক-বোঝাই মাল একেবারে ডুবে যাচ্ছে এক অতল গহ্বরে—আর এদিকে আমাদের জন্য কিছুই নেই। ডাক বন্ধ, যাত্রীবাহী কোনো গাড়ি নেই, সব ট্রেনেই শস্য যাচ্ছে। শহরে তো দারুণ অসন্তোষ, ঠিক গারিডা-বিদ্রোহের সময় যেমন হয়েছিলো, আর যেন এই প্রকাশ্য অসন্তোষের জবাব হিসেবেই চেকা' আবার একেবারে খেপে গেছে।

'কিন্তু কী ক'রে যাবে—এতো দুর্বল হয়ে আছে! হাড়মাস এক হ'য়ে গেছে যে! সত্যি-সত্যি কি পায়ে হেঁটে যাবে ভাবছো? কোনোদিন পৌছতে পারবে না। আর-একটু সুস্থ হ'য়ে নাও, তখন ভেবে দেখা যাবে।

'আমার মত হ'লো আপাতত একটা চাকরি নাও তুমি। নিজের যা পেশা তাই করো না—ওরা সেটা পছন্দই করবে। আঞ্চলিক স্বাস্থ্যবিভাগে কিছু-একটা পেয়ে যাবে।

'কিছু-একটা করতেই হবে তোমাকে। এমনিতেই তো নানানরকম মুশ্কিল আছে। —তোমার বাবা ছিলেন একজন সাইবেরীয় কোটিপতি, তিনি আত্মহত্যা করেছিলেন, তোমার স্ত্রী একজন স্থানীয় জমিদারের কন্যা, আর তুমি নিজে তো পাটিকানদের ক্যাম্প থেকে পালিয়েছিলে। এতো সব কি এড়াতে পারবে ভেবেছো? বিপ্লবী সেনাবাহিনী ছেড়ে তুমি চ'লে এসেছিলে—তার মানে তো দেশদ্রোহ। বেকার থাকা তোমার পক্ষে বিপজ্জনক হবে। আমার নিজের অবস্থা তার চেয়ে কিছু ভালো নয় অবশ্য। আমাকেও কোনো-একটা কাজ জুটিয়ে নিতে হবে। এমনিই তো এক আয়েগিরির মুখের ওপর ব'সে আছি আমি।

'তার মানে? স্ট্রেলনিকভের খবর কী?'

'তার জন্যই তো! তোমাকে তো বলছি কতো শত্রু ওর। এখন যখন লাল ফৌজ জয়ী হয়েছে

১ চেকা / Чекка : রাশ ভাষার সম্পূর্ণ নামের আদ্যাক্ষরের সংযোগে রচিত) : ১৯১৭ সালের ডিসেম্বর মাসে প্রতিষ্ঠিত রাশীয় গুপ্ত পুলিশবাহিনী। প্রতিবিপ্লবী প্রচেষ্টা আবিষ্কৃত হবার পর এই বাহিনী বহু সহস্র নয়-নারীকে সম্মুখবশত বিনা বিচারে গুলি করে মারে। ১৯২১ সালে লেলিন চেকা-র বদলে বলভেশিক পুলিশের অন্য একটি বাহিনী স্থাপন করেন, তার নাম ОГПУ—অনুবাসকের টীকা।

তখন দলভুক্ত না-হ'য়েও যে-সব সৈন্যরা অনেক ওপরে উঠোছলো, আর জেনেও ফেলোছলো অনেক কিছু, তাদের আর-কোনো আশা নেই। — শুধু যদি বের ক'রে দেয়, নিশ্চিহ্ন না-ক'রে ফেলে, তাহ'লেই ভাগ্য মানবো। বিশেষ ক'রে পাশার খুব বিপদ—ওকে ধ'রে ফেলা সহজ মনে হয়। সে পূর্ব-রাশিয়ায় ছিলো, জানো তো—এখন শুনছি ও লুকিয়ে আছে, পালিয়ে বেড়াচ্ছে। ওকে খুঁজছে ওরা। কিন্তু এ-বিষয়ে আর কথা না। কঁাদতে ঘেন্না করে আমার, আর একটা কথাও যদি মুখে আনি তাহ'লেই চীৎকার শুরু ক'রে দেবো।'

‘ওকে খুব ভালোবাসতে তুমি? এখনো কি বাসো?’

‘দ্যাখো, আমি বিয়ে করেছিলাম ওকে, ও আমার স্বামী। আশ্চর্য সং, উজ্জ্বল ওর ব্যক্তিত্ব। আমাদের বিয়ে যে সার্থক হ'লো না সেটা অনেকটা আমারই দোষে। ওর যে কখনো কোনো ক্ষতি করেছি আমি তা নয়, তা বললে মিথ্যা বলা হবে। কিন্তু ও ছিলো অনন্যসাধারণ, অনেক বড়ো, আর—আর আমি তো নেহাৎ নিষ্কর্মা, ওর তুলনায় আমি কিছুই নই। সেটাই আমার দোষ। কিন্তু এ-বিষয়ে দয়া ক'রে কোনো কথা আর বোলো না এখন। পরে কোনো সময়ে তোমাকে আরো অনেক কথা বলবো, কথা দিচ্ছি।

‘কী সুন্দর তোমার টোনিয়া। ঠিক বতিচেলির ছবি। ওর প্রসবের সময় আমি ছিলাম ওখানে। খুব ভাব হয়েছিলো আমাদের। কিন্তু ও-বিষয়েও কোনো কথা এখন থাক।

‘যা বলছিলাম, এসো আমরা দুজনেই চাকরি নিই। রোজ সকালে কাজে বেরিয়ে যাবো, আর মাসের শেষে কোটি-কোটি রুবলে আমাদের মাইনে আনবো। জানো তো, কিছুদিন আগে পর্যন্তও সাইবেরিয়ার নোট চলতো। তারপর বন্ধ ক'রে দেওয়া হয়েছে—সেও আজ অনেকদিন হ'য়ে গেলো—তুমি তখন অসুস্থ, দেশে টাকা বলতে কিছুই ছিলো না, সত্যি ছিলো না—ভাবো একবার! কোনোরকমে চালাতাম, আর এখন শুনছি এক ট্রেন বোঝাই নোট নাকি এসেছে, অন্তত চল্লিশ ট্রাক হবে। বড়ো কার্গজে লাল আর নীল রঙে ছাপা, ছোটো-ছোটো চৌখুপি কাটা আছে। প্রত্যেকটি নীল চৌখুপির মূল্য হ'লো পঞ্চাশ হাজার আর লাল চৌখুপির মূল্য এক লাখ রুবল। বিক্রী ছাপা, ফ্যাকাশে রংগুলোও নোংরা।’

‘হ্যাঁ, ও-রকম টাকা আমি দেখেছি। আমরা মস্কো ছাড়ার ঠিক আগেই তার প্রচলন হয়েছিলো।’

১২

‘ভারিকিনোতে এতোদিন ছিলে কেন? কেউ আছে নাকি ওখানে? আমি তো ভেবেছিলাম কাকপক্ষীও ওখানে নেই, একেবারে ফাঁকা। এতোদিন ধ'রে করলে কী?’

‘কাটিয়া আর আমি মিলে তোমার বাড়ি পরিষ্কার করছিলাম। ভেবেছিলাম ফিরে এসেই তুমি ওখানে যাবে, আর বাড়িটার যা হাল হয়েছে, আমি চাইনি তা তোমার চোখে পড়ে।’

‘কেন. কী হয়েছে? খুব খারাপ?’

‘নোংরা, অগোছালো—আমরা সব ঠিক করলাম।’

‘কেমন সংক্ষেপে জবাব দিচ্ছে—কিছু এড়িয়ে যাচ্ছে যেন। মনে হচ্ছে কিছু গোপন করছে তুমি। তা বেশ— তোমার যা খুশি, আমি জোর করবো না। টোনিয়ার কথা কিছু বলো। বাচ্চা মেয়েটার নাম কী দিলে ওরা?’

‘মাশা—তোমার মায়ের নাম।’

‘আরো বলো ওদের কথা। সব বলো।’

‘লক্ষ্মীটি, এখন না। আমি তো বলেছি তোমাকে, এখনো চোখের জল না-ফেলে এ-সব কথা বলতে পারি না আমি।’

‘ঐ সামডেভইয়াটভ—যে তোমাকে ঘোড়া ধার দিয়েছিলো, খুব মজার মানুষ, নয় কি?’
‘খুব।’

‘জানো তো, ওর সঙ্গে বেশ চেনা আছে আমার। আমরা যখন ওখানে ছিলাম, সব সময় আসা-যাওয়া করতো সে। সব অচেনা চারদিকে, গুছিয়ে বসতে খুব সাহায্য করেছিলো সে।’

‘জানি, আমাকে বলেছেন উনি।’

‘তোমারও অনেক কাজে লেগেছে নিশ্চয়ই? প্রায়ই দেখা হয় তোমার সঙ্গে?’

‘এতো উপকার করেন ভদ্রলোক—একেবারে অভিভূত হ’য়ে আছি। ঠুকে ছাড়া কী ক’রে চলতো জানি না।’

‘বুঝতেই পারছি। বেশ বন্ধুত্ব হয়েছে বোধহয় তোমার সঙ্গে ওর। যখন ইচ্ছে চ’লে আসে হয়তো।’

‘সর্বদাই আসে। আসবে না কেন?’

‘তুমি পছন্দ করো ওকে? দুঃখিত। ও—কথাটা জিজ্ঞেস করা উচিত হয়নি; তোমাকে প্রশ্ন করার দরকার কী আমার। এটা একটু বাড়াবাড়ি হ’য়ে গেছে। আমি মাণ চাইছি।’

‘আঃ, ঠিক আছে। আমার মনে হচ্ছে তুমি যা জানতে চাও তা হ’লো আমাদের মধ্যে সত্যিকার সম্পর্কটা কী? বন্ধুত্ব ছাড়া অন্য কিছু কি আছে? নিশ্চয়ই নেই। আমার প্রভূত উপকার করেছেন উনি, আর আমি ঠুর কাছে বিশেষভাবে ঋণগ্রস্ত, কিন্তু আমাব ওজনের সমান-সমান সোনাও যদি আমাকে দেন উনি, আমার জন্য নিজের প্রাণ দেন যদি, তাহ’লেও এর চাইতে বেশি কাছে তিনি পাবেন না আমাকে। ঠুর ধরনের মানুষ চিরকালই আমি অপছন্দ কবেছি, এদের সঙ্গে কোনো মিল নেই আমার। এই করিৎকর্মা, আত্মবিশ্বাসী, জ্বরদন্ত মানুষ—সাংসারিক ব্যাপারে মহামূল্য এরা, কিন্তু হৃদয়ের বেলায়? সেখানে ওদের স্পর্ধিত, আত্মতৃপ্ত পুরুষালির মতো ভয়াবহ আর-কিছু ভাবতে পারি না। জীবন, প্রেম ও-সব বিষয়ে আমার ধারণা একেবারে আলাদা। সত্যি বলতে, মানুষ হিসেবে আনফিম আমাকে আরেকজনের কথা মনে করিয়ে দেয়, যে ঠুর চেয়েও অপরিসীমরূপে বেশি ঘৃণ্য। আজ আমি যা হয়েছি, তার জন্য ঐ লোকটাই দায়ী।’

‘বুঝতে পারছি না। কী হয়েছে তুমি? কী ভাবছো তুমি? আমাকে বুঝিয়ে বলো। এ-জগতে তোমার চাইতে ভালো আর কেউ নেই।’

‘ইউরা, আমার প্রাণ, কেমন ক’রে ও-কথাটা বলতে পারলে! আমি ঠাট্টা করছি না, অথচ তুমি এমনভাবে আমার স্তুতি করছো যেন ড্রয়িংরুমে ব’সে প্রশস্তি-বিনিময় করছি আমরা। আমি কী-রকম বলো তো? আমার মধ্যে কিছু-একটা ভেঙে গেছে, আমার সারা জীবনের মধ্যেই কিছু-একটা বিকল হ’য়ে গেছে। অল্প বয়সে জীবনকে আমি আবিষ্কার ক’রে ফেলেছিলাম, আবিষ্কার করতে বাধ্য করা হয়েছিলো আমাকে—জীবনের সবচেয়ে কুৎসিত দিকটাতে আমার চোখ খুলে দেওয়া হয়েছিলো—এক শ্রৌট লম্পটের চোখ দিয়ে দেখা জীবনের এক শস্তা, বিকৃত সংস্করণ। তখনকার দিনে যাদের দেখা যেতো—সেই নিষ্কর্মা আত্মসুখী স্বার্থপরের দল, যারা সব-কিছুরই সুবিধে নিয়ে নিজেদের যে-কোনো খেয়াল চরিতার্থ করেছে—লোকটা ছিলো তাদেরই একজন।’

‘এবার বোধহয় বুঝতে পারছি। আমারও মনে হ’তো কিছু-একটা ব্যাপার আছে। কিন্তু একটু দাঁড়াও। ছেলেবেলায় তুমি কতো কষ্ট পেয়েছো তা সহজেই কল্পনা করতে পারি, সে-কষ্ট তোমার বয়সের পক্ষে অনেক বেশি, অনুমান করতে পারি তোমার নিষ্পাপ মন কী-রকম আহত হয়েছিলো, একটি খুব অল্পবয়সী মেয়ের প্রানিবোধ কী ভীষণ হবে, তাও বুঝি। কিন্তু এ-সবই তো এখন অতীতের কথা। আমি যা বলতে চাচ্ছি তা এই যে এ নিয়ে তুমি আর কেন দুঃখ পাবে—দুঃখ পাবে অন্যেরা—যারা তোমাকে ভালোবাসে, এই যেমন আমি। যদি সত্যি ও-কথা

ভেবে এখনো তুমি কষ্ট পাও, তাহ'লে মাথার চুল ছেঁড়া উচিত আমারই—কেন আমি সে-সময়ে বাধা দিতে পারিনি, কেন তোমার কাছে ছিলাম না! ব্যাপারটা ভারি অদ্ভুত কিন্তু। আমি পারি শুধু ঈর্ষা করতে—তীব্র ঈর্ষা, মারাত্মক—আর ঈর্ষা কাকে? এমন একজনকে যাকে আমি ঘৃণা করি, যার সঙ্গে আমার কোনো মিল নেই। আমি শ্রদ্ধা করতে পারি এমন প্রতিদ্বন্দ্বীর কাছে নিজেকেই অন্য রকম মনে হবে আমার। আমার মনে হয় কী জানো? এমন একজন লোক, যাকে আমি বুঝতে পারি, পছন্দ করি—আমি যে-মেয়েটিকে ভালোবাসি সেও যদি তাকেই ভালোবাসে, তাহ'লে আমার কোনো অভিযোগ থাকবে না, তার সঙ্গে ঝগড়া করবো না আমি। বরং বেদনাময় এক ভ্রাতৃত্ব অনুভব করবো তার সঙ্গে। অবশ্য আমার প্রেমিকাকে আমি অন্য কারো সঙ্গে ভাগ ক'রে নিতে চাইবো না। কিন্তু তাকে ছেড়ে দেবো আমি, ভোগ করবো দুঃখ—ঈর্ষা নয়, ঈর্ষার মতো কড়া আর রাগি নয় সেই ভাবটা। ঠিক এই একই ব্যাপার হবে যদি এমন কোনো শিল্পীর সঙ্গে আমার দেখা হয় যিনি, আমি যা করছি তা-ই করছেন, কিন্তু আরো ভালো ক'রে। হয়তো আমার নিজের চেষ্টা বন্ধ ক'রে দেবো তখন, তাঁরটা যখন আরো ভালো হচ্ছে, তখন আর ও-রকমই আর-একটার দরকার কী!

‘কিন্তু আমরা অন্য কথা বলছিলাম। অভিযোগ বা অনুতাপ করার মতো তোমার যদি কিছু না-থাকতো তাহ'লে বোধহয় এতো ভালো তোমাকে বাসতে পারতাম না। যারা কখনো হোটেল খাননি, চলতে-চলতে একবারও প'ড়ে যায়নি, নিশ্চয় তাদের পুণ্য, বেশি কিন্তু মূল্য নেই তার। তাদের কাছে জীবন তার সৌন্দর্যকে প্রকাশ করেনি।’

‘এই সৌন্দর্যের কথাই আমি ভাবছিলাম। সুন্দরকে দেখতে হ'লে—আমার মনে হয়—অটুট কল্পনাশক্তি চাই। দৃষ্টি চাই শিশুর মতো সরল। ঠিক তা-ই থেকে আমি বঞ্চিত হয়েছিলাম। যদি একেবারে প্রথম থেকেই অন্য একজনের শব্দা চোখ দিয়ে দেখতে না-হ'তো, তাহ'লে হয়তো জীবন বিষয়ে আমারও একটা দৃষ্টি গ'ড়ে উঠতো এতোদিনে। কিন্তু এখানেই শেষ নয় ব্যাপারটার। যেহেতু, একেবারে আরম্ভেই, আমার জীবনের মধ্যে জোর ক'রে ঢুকে পড়েছিলো ঐ লম্পট স্বার্থপর লোকটা—আসলে যে একটা মানুষই নয়—সেইজন্যই পরে যখন আমি বিয়ে করলাম সত্যিকার বড়ো একজন মানুষকে, তখন যদিও আমরা দু'জনেই দু'জনকে ভালোবেসেছিলাম, সেই বিয়ে ধ্বংস হ'য়ে গেলো।’

‘একটু দাঁড়াও—তোমার স্বামীর কথা এখনই আমাকে বলো না। না, তাকে হিংসে করছি না আমি। বলেছি তো তোমাকে, শুধু তাদেরই ওপর আমার হিংসে হয়, যারা আমার চেয়ে নিকৃষ্ট। আগে সেই অন্য লোকটির কথা বলো।’

‘কোন লোকটি?’

‘ঐ পিশাচটা। যে তোমার জীবনটাকে নষ্ট করেছে। কে সে?’

‘মস্কোর এক উকিল—বেশ নামজাদা। আমার বাবার বন্ধু। বাবা মারা যাবার পর আমরা যখন খুব দুরবস্থায় পড়েছিলাম তখন সে আমার মায়ের সহায় হয়েছিলো। অবিবাহিত ধনী। সে আসলে যেমনটি, তার চেয়ে তাকে হয়তো অনেক বেশি আলোচনার যোগ্য মনে হচ্ছে—এতো কালো ক'রে আঁকছি ওকে। কিন্তু ওর চেয়ে সাধারণ আর হ'তে পারে না। চাও তো ওর নামও বলতে পারি তোমাকে।’

‘দরকার নেই। আমি জানি। একবার তাকে দেখেছিলাম।’

‘সত্যি?’

‘একদিন সন্ধ্যাবেলা—তোমাদের হোটেলে—যে-রাতে তোমার মা বিষ খেয়েছিলেন। অনেক রাত তখন। তুমি আমি দু'জনেই তখন স্কুলে পড়ি।’

‘ও, মনে পড়েছে। অন্য একজনের সঙ্গে তুমি এসেছিলে। লবির অঙ্ককারে দাঁড়িয়ে ছিলে

তোমরা। আমার নিজের কখনো মনে পড়তো কিনা জানি না, কিন্তু তুমি বোধহয় আগে একবার মনে করিয়ে দিয়েছিলে, নিশ্চয়ই মেলিউজ্জাইয়েভোতে।’

‘কমারোভস্কি ছিলো সেখানে।’

‘ছিলো বুঝি? তা হবে। ওর সঙ্গে আমাকে দেখাটা আর আশ্চর্য কী। প্রায়ই তো একসঙ্গে থাকতাম।’

‘লাল হচ্ছে কেন?’

‘তোমার মুখে কমারোভস্কির নাম শুনে। ওর নাম না শুনে-শুনে এমন অভোস হ’য়ে গেছে যে চমকে উঠেছিলাম।’

‘সেই রাতে আমার সঙ্গে গিয়েছিলো আমার এক স্কুলের বন্ধু, সে আমাকে যা বলেছিলো তা এই। এর আগে অত্যন্ত এক অদ্ভুত জায়গায় কমারোভস্কিকে সে দেখেছিলো। সে ভোলেনি কথাটা, যদিও তখন সে খুব ছোটো—আমার ঐ বন্ধু—মিশা গর্ডন তার নাম—ট্রেনে যেতে-যেতে আমার কোটিপতি বাবার আত্মহত্যার দৃশ্য দেখেছিলো সে। একই ট্রেনে যাচ্ছিলো ওরা। জীবনটাকে শেষ ক’রে দেবার জন্য চলন্ত ট্রেন থেকে লাফিয়ে পড়েন আমার বাবা, প’ড়ে মারা যান। তার সঙ্গে চলেছিলো তাঁর উকিল—এই কমারোভস্কি। বাবাকে নেশা ধরিয়ে ব্যাবসায় গোলমাল বাধিয়ে লাল বাতি জ্বালার প্রাস্তে নিয়ে এসে, তাঁকে শেষ পর্যন্ত আত্মহত্যার মুখে ঠেলে দিলে লোকটা। ওর জন্যই বাবা প্রাণ হারালেন নিজের, আর আমি অনাথ হলাম।’

‘সত্যি? কী বলছো তুমি? কী অদ্ভুত কথা। এ কি সত্যি হ’তে পারে? তাহ’লে তোমার জীবনেও ও দুঃখের ছায়া ফেলেছে! এতে আমরা দু’জনে আরো আপন হলাম, তাই নয়কি, যেন সবই আগে থেকেই ঠিক হ’য়ে ছিলো।’

‘এই সেই লোক যাকে আমি চিরকাল, অচিকিৎসারূপে, উদ্ভাদের মতো ঈর্ষা করবো।’

‘এ-কথা কী ক’রে বলতে পারলে? বুঝতে পারো না, ওকে আমি ভালোবাসিনি, ওকে ঘেন্না করে আমার।’

‘নিজেকে কি অতো ভালো ক’রে জানা যায়? মানুষের চরিত্র এতো রহস্যময়, এমন আত্মবিরোধে ভরা! এই যে তোমার দৃশ্য—হয়তো এরই মধ্যে এমন কিছু আছে যা তোমাকে বেঁধে রাখবে তার সঙ্গে—যাকে তুমি স্বাধীনভাবে বাধ্য হ’য়ে ভালোবাসলে, তার সঙ্গেও অতো দৃঢ় হবে না তোমার বন্ধন।’

‘এ কী ভীষণ কথা বলছো তুমি! আর এমন ক’রে বলছো যে মনে হচ্ছে এই পাশবিক, অস্বাভাবিক কথাটাও সত্যি হ’তেও পারে বা। তুমি বললে ঐ রকমই মনে হয় আমার। কিন্তু কী জঘন্য!’

‘ভয় পেয়ো না তুমি, কান দিয়েো না আমার কথায়। আমি শুধু বলতে চেয়েছিলাম যে যা-কিছু অজ্ঞকার, অচেতন, যার সঙ্গে কথা বলা যায় না, যার বিষয়ে কোনো ধারণা করা যায় না, সেগুলোকে ঈর্ষা না-ক’রে আমি পারি না। আমার হিংসে হয় তোমার চুলের বুরুশটিকে, তোমার গায়ের ঘামের বিন্দুটিকে, যে-বাতাসে তুমি নিশ্বাস নাও তার বীজাণুগুলো, যা তোমার রক্তে মিশে তাকে বিবাক্ত ক’রে ভুলতে পারে—সেগুলোকেও হিংসে হয় আমার। আর ঠিক এই একই ভাবে আমি ঈর্ষা করি কমারোভস্কিকে, কোনো ছোঁয়াচে রোগের মতো ওকে। আমার মনে হয়, মৃত্যু যেমন নিশ্চিতভাবে একদিন আমাদের বিচ্ছেদ ঘটাবে, ঠিক তেমনিভাবেই ও যেন তোমাকে নিয়ে যাবে আমার কাছ থেকে। তোমার মনে হ’তে পারে যে রাশি-রাশি বাজে বকছি। কিন্তু এর চেয়ে ভালোভাবে আমি বলতে পারি না। আমি ভালোবাসি তোমাকে—সেই ভালোবাসা স্মৃতিকে ছাড়িয়ে যায়, মনকে ছাড়িয়ে যায়, তার কোনো পরিমাণ নেই।’

১৩

‘তোমার স্বামীর কথা আরো বলো। সে হ’লো—“দুর্গতির অন্নগ্রহে লিপিবদ্ধ সে আমার পাশে—” শেস্তপীর থেকে বলছি।’

‘কোথায় আছে একথাটা।’

‘রোমিও জুলিয়েটে।’

‘অনেক তো বলেছি তোমাকে—সেই যখন মেলিউজেইয়েভোতে ওকে খুঁজে বেড়াচ্ছি—তখন শুনলাম যে পাশার চরেরা তোমাকে গ্রেপ্তার ক’রে ওর ট্রেনের কামরায় তোমাকে নিয়ে গিয়েছিলো। হয়তো বলেছি তোমাকে, কিংবা হয়তো বলেছি ব’লে ভাবছি—একবার ও যখন গাড়িতে উঠছিলো তখন ওকে দূর থেকে আমি দেখেছিলাম—যদিও ওকে ঘিরে কতো যে পাহারাদার ছিলো তা বুঝতেই পারো! দেখলাম ও একটুও বদলান্ন। সেই সুন্দর, সৎ, দৃঢ়প্রতিজ্ঞ মুখশ্রী, মুখের ভাবে, ও-রকম সততা আমি জীবনে আর দেখিনি। সেই পুরুষোচিত, সরল চরিত্র, কোনোরকম ন্যাকামি বা ভানের ছায়ামাত্র নেই। কিন্তু একটা তফাৎ তবু লক্ষ করলাম, তাতে উদ্ভিন্ন না-হ’য়ে পারিনি।

‘কী যেন একটা দেখেছিলাম তার মুখের ভাবে—তা এমন নির্বিকৃত যেন তার স্বভাবের সব রং ধুয়ে গেছে। একটা জীবন্ত মানুষের মুখ যেন নয় আর, হ’য়ে উঠেছে কোনো নীতি বা ধারণার প্রতিরূপ। এটা লক্ষ ক’রে ভীষণ বিচলিত হয়েছিলাম। বুঝেছিলাম যে যার কাছে নিজেকে সে সমর্পণ করেছে তা মহৎ ও করুণাধীন, মানুষকে তা তিলে-তিলে মেরে ফ্যালে—আর ওকেও তা শেষ পর্যন্ত নিকৃতি দেবে না। মনে হয়েছিলো ও যেন চিহ্নিত, আর সেই চিহ্নটি হ’লো এই। কিন্তু বোধহয় আমি গুলিয়ে ফেলেছি সব। বোধহয় ওর সঙ্গে তোমার দেখা হবার কথা তুমি যা বলেছো তারই প্রভাব পড়েছে আমার ওপর। মানতেই হবে তুমি আমাকে নানাভাবে আচ্ছন্ন করেছে—পরস্পরকে ভালোবাসার কথা বাদ দিয়েই বলছি।’

‘বিপ্লবের আগে থেকেই তো তুমি ওর সঙ্গী। সে-কথা কিছু বলো।

‘অনেকদিন আগে, তখনো আমি ছেলেমানুষ, আমার খুব ঝোঁক ছিলো পবিত্রের দিকে। পাশার মধ্যে আমার সেই আকাঙ্ক্ষার পূর্ণতা পেলাম। জানো, বলতে গেলে একই বাড়িতে বড়ো হয়েছি আমরা—পাশা, গালিউলিন আর আমি। পাশা যখন খুব ছোটো, তখন থেকেই ও আমাকে নিয়ে মোহিত। আমাকে দেখলেই লাল হ’য়ে উঠতো কি হ’য়ে যেতো ফ্যাকাশে। এ-ভাবে বলাটা ঠিক হচ্ছে না, কিন্তু আমি বুঝিনি বললেও মিথ্যে বলা হবে। ওর ছিলো এক সর্বগ্রাসী ছেলেমানুষি আবেগ, যা ছেলেমানুষেই লুকিয়ে রাখে—আত্মসম্মানে আঘাত লাগার ভয়ে। কিন্তু তার মুখের দিকে এক পলক তাকিয়েই সব বোঝা যেতো। —ঘন-ঘন দেখাশোনা হ’তো আমাদের। তোমার আর আমার মধ্যে যতোটা মিল, ওর সঙ্গে আমার ছিলো ততোটাই তফাৎ। সেখানেই—তখনই—আমি মনে-মনে তাকে বরণ করেছিলাম। স্থির করেছিলাম বড়ো হ’য়েই এই মনোমুগ্ধকারী ছেলেটিকে আমি বিয়ে করবো। মনে-মনে ওর বাগদস্তা হ’য়ে গেলাম আমি।

‘অসাধারণ ওর প্রতিভা, তা তো জানো। ওর বাবা ছিলেন একজন সাধারণ সিগন্যালমান, না কি রেলের গার্ড, ঠিক জানি না কী। কিন্তু পাশা—নিছক বুদ্ধির জোরে, খাটুনির জোরে আজকালকার কলেজি শিক্ষার—বলতে যাচ্ছিলাম উচুতে, কিন্তু সত্যি বলতে শীর্ষস্থলে উঠলো—তাও দু-দুটো বিষয়ে, গণিত ও প্রাচীন সাহিত্য। হাজার হোক, এ তো একটা সোজা কথা নয়!’

‘কিন্তু—যদি পরস্পরকে এতোই ভালোবাসতে তোমরা—তাহ’লে তোমাদের বিবাহিত জীবন নষ্ট হ’লো কেন?’

‘এ-কথার জবাব দেওয়া বড় শক্ত। তবু তোমাকে বলার চেষ্টা করি। কিন্তু তুমি এতো

বোঝো যে তোমার কাছে কিছু ব্যাখ্যা করাটা নিতান্ত হাস্যকর। তুমি তো জানোই মানুষের জীবনে, রাশিয়ার জীবনে, কী ওলোট-পালোট শুরু হয়েছে, কেন ভেঙে যাচ্ছে তোমার আমার মতো অসংখ্য সংসার। হায় অদৃষ্ট, এর কি আর কোনো ব্যক্তিগত কারণ থাকে, এ কি আর মিল, অমিল, স্বভাবের পার্থক্য, প্রেম কি অপ্রেমের প্রশ্ন! যা-কিছু স্থির, স্থাপিত, ঘর, সংসার, শৃঙ্খলা, দৈনন্দিন জীবন—এ-সব বলতে যা-কিছু বোঝায়, সব ধুলোর মধ্যে গুঁড়িয়ে গেলো। সারা দেশে তোলপাড়, সমাজকে পুরোপুরি ঢেলে সাজানো হচ্ছে—তার খাঙ্কা কেমন ক’রে সামলানো যাবে? যা-কিছু মানুষের মতো ঝাঁচার উপায়, সব বিধবস্ত, সব বিচূর্ণ। প’ড়ে আছে মানুষের নগ্ন আত্মটুকু, কাপছে, শেষ আবরণটুকু ছিন্ন তার। মানুষের আত্মার এই উলঙ্গ তেজ—তা তো কোনো বদলের ধার ধারে না, কেননা চিরকাল তা হিম, কম্পিত, তা পৌছতে চায় নিকটতম প্রতিবেশীর দিকে, যে তারই মতো হিম আর নিঃসঙ্গ। তুমি আর আমি পৃথিবীর আরম্ভে সেই আদিম দুই মানুষের মতো, যাদের কোনো আবরণ ছিলো না—তুমি আর আমি তাদেরই মতো নগ্ন, তাদেরই মতো গৃহহীন। সেই দুই আদিম মানুষের কতো হাজার বছর কেটে গেলো! এর মধ্যে যে-অপরিমাণ মহিমার সৃষ্টি হয়েছে জগতে, তুমি আর আমি তারই সর্বশেষ স্মৃতি, সেই হারিয়ে-যাওয়া ঐশ্বর্যের স্মৃতি নিয়ে বৈচে আছি আমরা, ভালোবাসছি, কাঁদছি, আঁকড়ে ধরছি পরস্পরকে।’

১৪

লারা একটু চুপ ক’রে থাকলো, তারপর আরো শান্ত হ’য়ে বলতে শুরু করলো:

‘বলছি তোমাকে, শোনো। স্ট্রেলনিকভ যদি আবার পাশা আক্টিপভ হয়, যদি এই বিস্ফোভ আর বিদ্রোহ সে ত্যাগ করে, যদি সময়ের গতি উল্টো দিকে ফিরে যায়, দৈবের দয়ায় কোথাও যদি দেখতে পাই আমাদের বাড়ির জানলায় আলো জ্বলছে, পাশার টেবিলে বইপত্রের ওপরে আলো—আর তা যদি হয় পৃথিবীর শেষতম সীমায় তাহ’লে—তাহ’লেও বুকে হেঁটে হামাগুড়ি দিয়ে আমি যাবো সেখানে। যা-কিছু আমার আছে সব ছুটে যাবে তার দিকে। অতীত, অতীতের প্রতি নিষ্ঠা—এরা এসে ডাক দিলে কিছুতেই আমি নিঃসাড় থাকতে পারবো না। তার জন্য সব ছাড়তে পারি আমি—যতো দামিই তা হোক না কেন। এমনকি তোমাকে পর্যন্ত। এমনকি আমাদের এই ভালোবাসা—এতো স্বাভাবিক, এতো ভালো, যা এমনভাবে আমার অংশ হ’য়ে গেছে—তাও ছাড়তে পারি। আ—ক্ষমা করো আমাকে, ঠিক এ-কথা আমি কিন্তু বলতে চাইনি। না, এটা সত্যি নয়।’

ইউরির বুকে ঝাঁপিয়ে পড়লো লারা, তার চোখে জল, কিন্তু তক্ষুনি সামলে নিলে নিজেকে, কান্না মুছে ফেলে বললে:

‘টোনিয়ার কাছে তুমি যে ফিরে যেতে চাও, তাও কি ঠিক এমনি কর্তব্যের তাগিদে নয়? হা ভগবান, কী দুঃখী আমরা! কী হবে আমাদের? কী করা উচিত এখন?’

আবার, একটু শান্ত হ’য়ে নিয়ে বললে:

‘কিসে আমাদের সুখ-শান্তি নষ্ট হ’য়ে গেলো, তা কিন্তু এখনো বলা হয়নি তোমাকে। পরে আমি সব স্পষ্ট বুঝতে পেরেছিলাম। সব বলছি তোমাকে। এ-গল্প শুধু আমাদেরই নয়, এমনি দুর্ভাগা যে কতো আছে, তার অন্তও নেই।’

‘বলো, লারা! কতো জানো তুমি, কতো বোঝো। সব কথা বলো।’

‘যুদ্ধের দু’বছর আগে আমাদের বিয়ে হ’লো। ঠিক যখন আমরা গুছিয়ে বসবো, ঘর বাধবো, তখন শুরু হ’লো যুদ্ধ। এখন মনে হয় সব-কিছুর জন্য যুদ্ধই দায়ী—যতো দুঃখ কুকুরের পালের মতো আজও আমাদের তাড়া ক’রে ফিরছে। আমার ছেলেবেলার দিনগুলো কেমন ছিলো, তা

স্পষ্ট মনে আছে আমার। ছিলো এমন সময়, যখন গত শতাব্দীর শাস্তি ছিলো আমাদের চোখে—সেটাই ছিলো সকলের স্বীকৃত। আমরা ধরেই নিয়েছিলাম যে বুদ্ধির পরামর্শই মান্য, আর বিবেক যা বলে সেটাই ঠিক—স্বাভাবিক। মানুষের হাতে মানুষ মরেছে—এটা ছিলো তখন ব্যতিক্রম, সাধারণ নিয়মের বহির্ভূত, কচিং তা ঘটতো। শুধু নাটক, খবরের কাগজ আর গোয়েন্দা-কাহিনীতেই হত্যাকাণ্ড ঘটতো, দৈনন্দিন জীবনে নয়।

‘আর তারপরেই সেই শাস্ত, সুরেলা, নির্দোষ জীবন থেকে এক লাফে এই খুনোখুনি, আর এই কান্না, সকলেই যেন একসঙ্গে খেপে গেলো, বর্বরের মতো, রক্তপাত হ’লো নিয়ম, প্রতিদিনের, প্রতি মুহূর্তের নিয়ম—সেটাই আইনসংগত, সেটাই পুরস্কৃত।

‘কিন্তু এ-রকমভাবে চললে কোনো-একদিন শাস্তি পেতেই হবে। তোমার নিশ্চয়ই মনে আছে, আমার চেয়েও ভালো মনে আছে—কেমন ক’রে ক্ষ’য়ে যেতে লাগলো সব, সব-কিছু ভেঙে পড়তে লাগলো একসঙ্গে—খাবার জিনিসের সরবরাহ, ট্রেনের চলাচল, গার্হস্থ্য জীবনের ভিত্তি, সচেতন নীতিবোধ—সব।’

‘থেনো না। এর পরে তুমি কী বলবে আমি জানি। এ-সবের মধ্য থেকে কী সুন্দর অর্থ তুমি নিংড়ে বের করেছে! তোমার কথা শুনে আনন্দ হয়।’

এই সময়েই মিথ্যা এলো রাশিয়াতে—আমাদের রুশভূমিতে। যা সবচেয়ে দুঃখের, সমস্ত পাপের যা মূল, তা হ’লো এই যে ব্যক্তিগত মতামতের ওপর আর আস্থা রইলো না। আপন নীতিবোধকে মেনে চলা—তা লোকের চোখে সেকলে হ’য়ে গেলো; তারা ভাবলে যে এখন তাদের একই সুরে কোরাস গাওয়া উচিত, অন্যোরা যা ভাবছে সেইটাই তাদের বাচবার উপায়। এ-সব মতবাদ জোর ক’রে ঠেসে দেওয়া হ’লো সকলের গলার মধ্যে। দেখা দিলো চকচকে বুলির জবরদস্তি—প্রথমে জারিস্ট, তারপর বিপ্লবী বুলির।

‘মড়কের মতো ছড়িয়ে পড়লো এই পাপ। সকলের ছোঁয়াচ লাগছে। তা পচিয়ে দিলে সব—কিছুই রইলো না যার ওপর তার ছাপ না পড়লো। আর আমাদের সংসারেও তাকে ঠেকাতে পারলাম কই। কিছু-একটা বিকল হ’য়ে গেলো। কোথায় আগের মতো স্বাভাবিক সহজ থাকবো, তা নয়—মুখের মতো জাঁকালো হ’য়ে উঠলাম পরস্পরের সঙ্গে ব্যবহারে। কথাবার্তায় মেকি সুর লাগলো, বিস্ত্রী চোঁটা, বিস্ত্রী দেখানোপনা। জগতের সব বড়ো-বড়ো ব্যাপারে চালাক-চতুর কথা না-বললে কী চলে? কেমন ক’রে এটা হ’লো যে পাশার চোখে এই মিথোটা ধরা পড়লো না—যে-পাশা সমস্ত বিষয়ে এতো বুদ্ধিমান, নিজের ওপর প্রচণ্ড দাবি করতে যাব ভয় নেই, এমন নির্ভুলভাবে যে বুঝতে পারে কোনটা সত্য আর কোনটা ছলনামাত্র?

‘কিন্তু ঠিক এখানেই সে ভীষণ ভুল করলো, মারাম্বক ভুল। যুগধর্মকে ভুল বুঝলো সে, এই সর্বস্বপাশী সামাজিক পাপকে ব্যক্তিগত ও ঘরোয়া ক’রে নিল। আমাদের বাঁধা বুলি, আমাদের অস্বাভাবিক সরকারি কঠন্বব শুনে সে ভাবলো যে আসলে সে নিজেই খুব সাধারণ বলতে গেলে কিছুই না—তাকে বোঝাবার জন্যেই ও-রকম কথা বলছে সবাই। তুমি অবাক হবে, ইউরি, তোমার কাছে অবিচ্ছিন্ন ঠেকবে যে এ-রকম তুচ্ছ, বাজে একটা ব্যাপার আমাদের বিবাহিত জীবনের ভিত টলিয়ে দিলে। তুমি ভাবতে পারবে না এগুলো কী সাংঘাতিক হয়ে উঠলো, এই ছেলেমানুষিতে বিশ্বাস ক’রে কী-রকম মূঢ়ের মতো কাজ করতে লাগলো পাশা।

‘কেউ বলেনি তাকে যুদ্ধে যেতে। কেন গেলো, জানো? সে ভাবলে সে আমাদের ভার হ’য়ে উঠছে, চাইলো আমাদের নিকৃতি দিতে। সেই হ’লো তার সব পাগলামির আরম্ভ। যাতে রাগের কোনো কথাই নেই তাতেও সে রেগে উঠতে লাগলো, কোনো দাঙ্গিক, বিগড়ে-বাওয়া সদাযুবকের মতো। ঘটনার গতি দেখে তার মুখ কালো হয়, ঝগড়া করে সে ইতিহাসের সঙ্গে। আজ পর্যন্ত সেই ঝগড়া মেটেনি তার। সেইজন্যেই এমন উদ্ভাসের মতো তার উদ্ভেজনা। আর

এই মুঢ় উচ্চাশাই মৃত্যুর দিকে ঠেলে দিচ্ছে তাকে। হা ঈশ্বর—যদি আমি তাকে বাঁচাতে পারতাম!’

‘লারা—তোমার ভালোবাসায় এতো জোর, এতো পবিত্রতা! ভালোবাসো, আরো ভালোবাসো তুমি ওকে, আমি একটুও ঈর্ষা করবো না। কখনোই তোমার পথে বাধা হ’য়ে দাঁড়াবো না আমি।’

১৫

প্রায় অলক্ষিতেই যেন গ্রীষ্ম এলো সেবার, এসে চ’লে গেলো। ইউরি সেরে উঠলো। মস্কো যাবার মৎলব এঁটে—একটি নয়, তিন-তিনটে অস্থায়ী চাকরি নিলে সে। টাকার দাম দ্রুত ক’মে যাচ্ছে, কোনোমতেই আর কুলোতে চায় না।

কাক-ভোরে ঘুম থেকে ওঠে ইউরি, তারপর বাড়ি থেকে বেরিয়ে, মার্চেন্ট স্ট্রীট ধ’রে ‘দানব’ সিনেমার পাশ দিয়ে উরালের কসাকবাহিনীর প্রাক্তন ছাপাখানা—এখন যার নতুন নামকরণ হয়েছে ‘লোহিত মুদ্রণালয়’—সে-পর্যন্ত চ’লে যায়। গোরোডক্কাইয়া স্ট্রীটের মোড়ে টাউন-হলের দরজায় বিজ্ঞপ্তি ঝুলছে ‘অভিযোগ’। পার্ক পেরিয়ে বুইয়ানোভকা স্ট্রীটে ঢুকে পড়ে সে, হাসপাতালে পৌঁছে সেনাবাহিনীর বহির্বিভাগের পেছনের দরজা দিয়ে তার কর্মস্থলে প্রবেশ করে। এটাই তার আসল চাকরি।

লারার বাসা থেকে হাসপাতাল পর্যন্ত রাস্তাটা প্রায় আগাগোড়াই বড়ো-বড়ো ঝুঁকে-পড়া গাছের ছায়ায় ঢাকা, খাড়া ছাদওলা অঙ্কুত ধরনের ছোটো-ছোটো কাঠের বাড়ি পেরিয়ে যেতে হয়, তাদের দরজাগুলোতে নানারকম কাজ করা, আর জানলার চারপাশ ঘিরে খোদাই-করা ছবি দেখা যায়। হাসপাতালের ঠিক পাশের বাড়িটা একটি বাগানের মধ্যখানে, বাড়িটারই বাগান; গোরেগ্নিয়াডভ নামে এক ব্যাবসাদারের বিধবা স্ত্রীর বাস্তুভিটে এটি। মস্কোর পুরোনো জমিদার-বাড়ির মতো তার দেয়ালগুলি রুহিতনের ছাঁচে চকচকে চৌকো টালি দিয়ে ঢাকা।

সপ্তাহ হয় দশদিনে। তারই মধ্যে তিন-চারবার ক’রে মিয়াক্সি স্ট্রীটে ইউরিয়ান্টন স্বাস্থ্যদপ্তরের বোর্ডের সভায় ইউরিকে হাজিরা দিতে হয়।

শহরের অন্য প্রান্তে আগে জীৱোগ-বিজ্ঞানের একটি প্রতিষ্ঠান ছিলো, সামডেভইয়াটভের বাবা তাঁর জীবন স্মৃতিরক্ষার জন্য এটি প্রতিষ্ঠা করেছিলেন, শিশুর জন্ম দিতে গিয়ে মারা গিয়েছিলেন সেই মহিলা। এখন তার নতুন নাম হয়েছে রোজালুস্কেমবুগ^১ ইনস্টিটিউট। সেখানে অল্প সময়ে নতুন ধরনে ব্যবচ্ছেদ ও চিকিৎসাসাশ্ত্র পড়াবার ব্যবস্থা হয়েছে, ইউরি সেখানে রোগ-নির্ণয়ের লক্ষণ ও অন্য নানা ঐচ্ছিক বিষয়ে বক্তৃতা দেয়।

ক্লান্ত, ক্ষুধিত হ’য়ে রাত্রে বাড়ি ফিরে সে দেখতে পায় লারা তার ঘরের কাজ নিয়ে হাবুডুবু খাচ্ছে—কখনো দ্যাখে রান্নায় ব্যস্ত, কখনো বা কাপড় কাচায়। ঘাগরা উঁচু ক’রে জামার হাতা গুটিয়ে নিয়ে, আলুথালু চেহারায়, এই কেজো জীবনযাত্রার গদ্যময়তায় তার যে-রূপ উন্মোচিত হয়, তা দেখে ইউরির তাকে মনে হয় রানীর মতো রূপসী, প্রায় ভীত হ’য়ে পড়ে সেই সুগভীর রূপের সামনে। বল-নাচে যাবার সময়, উঁচু হিলের জুতোয় আরো লম্বা হ’য়ে, লুটিয়ে-পড়া বুক-পিঠ-খোলা গাউন পরলে যা হয় তার চেয়ে আরো তীব্র এই রূপ—যেন দম আটকে আসে।

১ Rosa Luxemburg (১৮৭০-১৯১৯) : অন্যতম জার্মান বিপ্লবী নেতা, ১৯০৫-এর রুশ বিপ্লবে অংশ গ্রহণ করেন। ঐর জন্ম পোলিশ রাশিয়ান, জার্মান বিলাহ ক’রে জার্মান নাগরিক হন, খর্বাকৃতি ও খল্ল হওয়া সত্ত্বেও—কিবা সেইজনেই—ঐর মার্ক্সীয় বিপ্লববাদে অসাধারণ উজ্জতা ছিলো। বার্লিনের এক বিপ্লবের সময় গ্রেপ্তার হ’য়ে ইনি সৈন্যদেব হাতে নিহত হতেছিলেন।

হয় সে রাঁধে, নয় কাপড় কাচে, আর সেই সাবান-গোলা জল দিয়েই মেঝে ঘষে আর নয়তো আরো শাস্তভাবে তাদের তিনজনের জন্য জামা-কাপড় শেলাই করে বা ইস্ত্রি করে—তখন আর অতো লাল হ'য়ে ওঠে না তার মুখ। কিংবা যখন রাঁধাবাড়া, কাপড় কাচা কি মেঝে নিকানো শেষ হ'য়ে গেছে, তখন সে কাটিয়াকে পড়াতে বসে। আর নয়তো পুনর্গঠিত নতুন স্কুলে যাতে আবার পড়বার কাজ পায়, সেইজন্য নতুন ক'রে রাজনৈতিক শিক্ষা অর্জন করার জন্য পাঠ্য বইয়ে মুখ ডুবিয়ে ব'সে থাকে।

ইউরির যতোই মনে হয় লারা আর কাটিয়া তার আপন জন, ততোই সে চেষ্টা করে যাতে এই পারিবারিক জীবনকে সে তার প্রাপ্য ব'লে না ভাবে, নিজের স্ত্রী-পুত্রের প্রতি কর্তব্যের কথা ভেবে ততোই কঠিনভাবে নিজেকে সংবৃত করে, তার বিশ্বাসভঙ্গের বেদনাকে জাগিয়ে রাখে। এই যে তার সংযম, এতে লারা কিংবা কাটিয়ার প্রতি অসম্মানজনক কিছু ছিল না; বরং তাতে ধরা পড়লো এমন একটি শ্রদ্ধা, কোনো অশিষ্ট ঘনিষ্ঠতা যার ধারে-কাছে আসতে পারে না।

কিন্তু তার এই আত্মবিরোধের বেদনা ও যন্ত্রণা তাকে মেনে নিতে হ'লো; কোনো ক্ষত যদি কখনো না শুকোয় আর মাসে-মাসেই উগ্র হ'য়ে ওঠে, সেটাকে যেমন মেনে নেয় মানুষ, তেমনি এটাতেও তার অভ্যাস হ'য়ে গেলো।

১৬

এমনি ক'রে কাটলো দু'তিন মাস। তারপর অক্টোবর মাসে ইউরি একদিন লারাকে বললো:

‘জানো? মনে হচ্ছে আমাকে জোর ক'রে কাজ থেকে ইস্তফা দেওয়ানো হবে। চিরদিন একই ব্যাপার—বারে-বারে এই রকম হচ্ছে। প্রথমে সবকিছুই চমৎকার।—“এসো, চ'লে এসো। ঋটি কাজের লোক চাই আমরা, চাই চিন্তাশক্তি, নতুন চিন্তা বিশেষ পছন্দ করি। তার চেয়ে ভালো আর কী হ'তে পারে? এসো, তোমরা কাজ করবে এসো, গবেষণা করো, সংগ্রাম চালিয়ে যাও।”

‘তারপর কাজ করতে গিয়ে তুমি দেখলে, চিন্তা বলতে ওরা বোঝে শুধু বাগাড়ম্বর—বিপ্লবের আর এই রাজত্বের গালভরা পচা প্রশংসা। আমি ক্লান্ত হ'য়ে গেছি, আর সহ্য হয় না। ও-সব আমার আসেও না ঠিক—একেবারেই আসে না।

‘হয়তো তাদের দিক থেকে তাদের মতটাই ঠিক। বলা বাহুল্য, তাদের সপক্ষে আমি নই। তবে, ওরা এক-একটি উজ্জ্বল নায়ক, আর আমি অত্যাচার ও কুসংস্কারের পক্ষপাতী এক ইতরজন—এই কথাটা আমি মেনে নিতে পারি না। নিকোলাই ভেডেনিয়াপিনের কথা তুমি শুনেছো কখনো?’

‘বাঃ নিশ্চয়ই। তুমি আসার আগেই তাঁর কথা শুনেছি, তাছাড়া তুমি নিজেই অনেক বলেছো। সিমা টুন্টসেভা শ্রায়ই বলে তাঁর কথা, সে আবার তাঁর মস্ত ভক্ত। লজ্জার কথা, আমি তাঁর বই একটিও পড়িনি। দার্শনিক প্রবন্ধ আমার তেমন ভালো লাগে না। আমার মতে আর্ট আর জীবন হ'লো আসল, মাঝে-মাঝে দর্শনের ফোড়ন দেওয়া যেতে পারে, কিন্তু দর্শনেই বিশেষজ্ঞ হওয়া! যদি কেউ মশলা চাটনি ছাড়া আর-কিছু না খায়, এ যেন সেই রকম। এই দ্যাখো, আমার আজ-বাজে কথায় তোমার কথা হয়তো গুলিয়ে গেলো, দুঃখিত।’

‘না, তা নয়, আমারও ঠিক তা-ই মনে হয়। তা আমার সেই মামার কথা—তাঁর প্রভাবে আমার নষ্ট হ'য়ে যাবার কথা ছিলো। আমি যে স্বজ্ঞায় বিশ্বাস করি, ওটা আমার অন্যতম পাপ। অথচ কী হাস্যকর দ্যাখো—রোগনির্ণয়ের ব্যাপারে আমি নাকি আশ্চর্য—এই ব'লে ওরাই চ্যাচামেচি করে—আর সত্যি বলতে অসুখ ধ'রে ফেলতে সাধারণত আমার ভুল হয় না। তুমিই বলো, সমস্ত ব্যাপারটা এক পলকে বুঝে ফেলার এই যে ক্ষমতা, এ যদি স্বজ্ঞা না হয় তাহ'লে আর কী? অথচ স্বজ্ঞাকে ওরা ধুণ করে।

‘আর-একটা ব্যাপার নিয়ে সম্প্রতি আমি ভাবছি খুব—সে হ’লো জীবজগতে অনুকৃতি, যাকে বলে মাইমিসিস। পারিপার্শ্বিকের, বর্ণের সঙ্গে জীবজন্তু কী ক’রে তাদের বহির্ব্যবকে মিলিয়ে নেয়। এই অনুকরণের তত্ত্ব আমাকে মুগ্ধ করে। অন্তর ও বহির্জগতের সহজের ওপর আশ্চর্য আলো ফ্যালে এই অনুকরণ—আমার তা-ই ধারণা।

‘তা, আমি তো পড়াতে গিয়ে সাহস ক’রে এ-সব কথা ব’লে ফেলেছিলাম। সঙ্গে-সঙ্গে ঐকতান উঠলো: “আদর্শবাদ, অতীন্দ্রিয়বাদ, গ্যোটের প্রাকৃত দর্শন, নব্য শোলংবাদ”।’

‘এখন আমার বেরিয়ে আসা উচিত। যতোদিন না তাড়িয়ে দিচ্ছে হাসপাতালে থাকবো অবশ্য, কিন্তু ঐ ইনস্টিটিউট ও স্বাস্থ্যদপ্তরের কাজে ইস্তফা দেবো ভাবছি। তুমি উদ্বিগ্ন হোয়ো না, কিন্তু মাঝে-মাঝে আমার মনে হয়, যে-কোনোদিন এরা এসে আমাকে গ্রেপ্তার ক’রে নিয়ে যেতে পারে।’

‘ভগবান না করুন! এখনো ব্যাপার ততোদূর গড়ায়নি ভাগ্যি। কিন্তু তুমি ঠিকই বলেছো। সাবধানের মাংব নাই। আমি লক্ষ্য করেছি, এই নতুন সরকারের হাতে ক্ষমতা এলেই পর-পর কতোগুলো অবস্থার মধ্য দিয়ে যেতে হয়। প্রথম অবস্থায় যুক্তির জয়—সমালোচনা, কুসংস্কারের উচ্ছেদ—ইত্যাদি।’

‘তারপর দ্বিতীয় পর্যায়। তখন শুরু হয় বিরোধীদের নিয়ে মাথাব্যথা। কোন শত্রু বন্ধুতার ভেদ ধরেছে, কে গলগ্রহ—এই সব আরকি। বেড়ে ওঠে সন্দেহ—তারপর স্পাই, যডযন্ত্র, বিদ্রোহ। ঠিক বলেছো তুমি, এই দ্বিতীয় পর্যায় শুক হচ্ছে।

‘একটা দৃষ্টান্ত দিই তোমাকে। স্থানীয় বিপ্লবী বিচারসভা খোডাটস্কোয়ে থেকে দু’জন নতুন সভাকে বদলি করিয়ে এনেছে—তারা মজুর শ্রেণীর, আগে রাজনৈতিক বন্দী ছিলো, টিভেরজিন আর আশ্চিপভ।

‘দু’জনেই খুব ভালো ক’রে চেনে আমাকে, একজন তো শাদা কথায় আমার স্বশুর। অথচ তারা আসার পর থেকেই, এই সম্প্রতি, আমি সত্যি-সত্যি কাটিয়ার আর নিজের জন্য প্রাণের ভয়ে কাঁপছি। আশ্চিপভ অপছন্দ করে আমাকে, তারা দু’জনেই যা-গুণি তা-ই করতে পারে। বিপ্লবের উচ্চতর ন্যায়নিষ্ঠার প্রমাণ দেবার জন্য তারা যদি একদিন আমাকে বধ করে তাতে অবাধ হবো না। এমনকি পাশাকে মেরে ফেলতেই বা কতক্ষণ।’

অল্প দিনের মধ্যেই এই আলোচনার পরিশিষ্টি ঘ’টে গেলো। হাসপাতালের পাশেই, ৪৮ নম্বর বুইয়ানোভকা স্ট্রীটে, বিধবা গোবেল্লিয়াডোভার বাড়িতে একদিন রাতে খানাতল্লাসি হ’য়ে গেলো। বেরিয়ে পড়লো অস্ত্রশস্ত্রের এক চোরাই মালখানা, ধরা পড়লো এক প্রতিবিপ্লবী চক্রান্ত। অনেককে গ্রেপ্তার করা হ’লো, গ্রেপ্তার আর খানাতল্লাসির ঢেউ ব’য়ে গেলো একেবারে। চাপা গলার গুজব রটলো যে সন্দেহভাজন ব্যক্তিদের মধ্যে কেউ-কেউ নদী পেরিয়ে পালিয়ে গেছে। ‘তাতে তাদের লাভটা কী হবে?’ লোকে বলাবলি করলো। নদী তো কতোই আছে, অসংখ্য; ধরো, তা যদি ব্লাগোভেশচেন্স্ক-এর আমুর নদী হয়, তাহ’লে অন্য কথা—তুমি ঝাঁপিয়ে পড়লে আমুরে, সাংরে নদী পেরোলে, দেখলে একেবারে চীনদেশে পৌছে গেছো! —নদী’ব মতো নদী হ’লো সে-ই। তার কথা একেবারে অলাদা।’

‘হাওয়া ক্রমশ ঘোরেল হ’য়ে উঠছে,’ বললো লারা। ‘নিশ্চিত থাকার দিন আমাদের ফুরোলো। নির্মাণ আমাদের গ্রেপ্তার করবে ওরা—তোমাকে, আর আমাকে। আর তখন কাটিয়ার কী হবে? আমি মা, সেই দুঃখ আমি সইতে পারবো না, কিছু-একটা উপায় আমাকে করতেই হবে। কিন্তু কী করা যায়? ভেবে-ভেবে মাথা-ঝরাপ হ’য়ে গেলো।’

‘দেখি ভেবে-চিন্তে, কী করা যায়। অবশ্য এ-রকম অবস্থায় কী-ই বা করার আছে আমাদের? এই কষ্ট এড়ানো আমাদের শাখ্যের বাইরে, তাই নয় কি? অদৃষ্টের হাতেই কি সব নির্ভর করছে না?’

‘রেহাই আমরা কিছুতেই পাবো না, পালাবার কোনো জায়গা নেই। কিন্তু পাদপ্রদীপের এই জোরালো আলোর বাইরে আমরা চলে যেতে পারি অন্তত। যেমন ধরো ভারিকিনো—সেখানে যাওয়া যায় না? সেখানকার বাসটার কথা ভাবছি। খুব নির্জন অবশ্য, বহুদিন অযত্নে প’ড়ে আছে, কিন্তু এখানকার তুলনায় লোকচক্ষুর বাইরে তো। এদিকে শীতও এসে পড়লো। এই শীতটা ওখানে কাটালে তো ভালোই হয়। যতোদিনে ওরা আমাদের ধ’রে ফেলবে, ততোদিনে আরো এক বছর ঝাঁচতে পারবো: সেটা কি কম কথা! সামডেভইয়াটভ নিয়মিত আমাদের শহরের খবর দেবে। এমনকি, কখনো যদি লুকোতে হয়, সে হয়তো সাহায্যও করতে পারে আমাদের। তোমার কী মনে হয়? জনপ্রাণী বলতে সেখানে কিছু নেই অবশ্য, ফাঁকা একটা দুঃস্থ জায়গা, অন্তত আমি যখন মার্চ মাসে সেখানে ছিলাম, তখন তা-ই ছিলো। তার ওপর লোকে বলে নেকড়েও নাকি আছে। এটা অবশ্য ভয়ের কথা। তা মানুষ তো আজকাল—অন্তত টিভেরজিন আর আন্টিপভের মতো মানুষ—নেকড়ের চেয়েও ঢের বেশি ভয়াবহ হ’য়ে উঠেছে।’

‘কী বলবো, বুঝতে পারছি না। এতোকাল তুমিই কি আমাকে মস্কো যাবার জন্য পিড়াপিড়ি করোনি, তুমিই কি বলোনি আর যেন দেরি না করি? এখন তো সহজ হ’তো মস্কো যাওয়া। আমি স্টেশনে খবর নিয়েছিলাম। কথা শুনে মনে হ’লো আজকাল ওরা আর চোরাবাজারিদের নিয়ে মাথা ঘামায় না। কাগজপত্র ঠিক না-থাকলেই যে ট্রেন থেকে নামিয়ে দেওয়া হয়, তাও নয়। ক্লাস্ত হ’য়ে পড়েছে, আগের চেয়ে অনেক কম বন্দুক ছোঁড়ে।

‘আমি ভাবছি মস্কো থেকে আমার চিঠিপত্রের জবাব আসছে না কেন। সেখানে যাওয়া উচিত আমার, গিয়ে দেখা উচিত ওরা কেমন আছে—এ-কথা তুমিই এতোকাল ব’লে এসেছো। কিন্তু তাহ’লে এখন যে ভারিকিনোর কথা বললে, তার কী অর্থ করবো? তুমি নিশ্চয়ই এ-রকম কোনো অজ্ঞ পাড়াগায় একা যাবে না?’

‘না, তা যাবো না। তোমাকে ছাড়া অসম্ভব।’

‘আর তবু তুমি আমাকে মস্কো যেতে বলছো।’

‘হ্যাঁ, তোমাকে মস্কোতে যেতেই হবে।’

‘শোনো। চমৎকার একটা প্ল্যান এসেছে মাথায়—এসো, আমরা তিনজনেই মস্কো চ’লে যাই।’

‘মস্কো? তুমি কি উদ্ভাদ? মস্কোতে গিয়ে আমি কী করবো? না, আমাকে থাকতেই হবে, এখানেই ধারে কাছে কোথাও থাকতে হবে আমাকে। পাশার ভাগ্য নির্ধারিত হবে এখানেই। তারই জন্য এখানে আমাকে থাকতে হবে, যদি পাশা আমাকে ফিরে চায় কখনো, তার কাছাকাছি না-থাকলে আমার চলবে না।’

‘বেশ। তাহ’লে কাটিয়ার কথা ভেবে দেখা যাক।’

‘কাটিয়াকে নিয়ে সিমার সঙ্গে কথা বলেছি—সিমা টুন্টসেভা, সে মাঝে-মাঝে আমার সঙ্গে দেখা করতে আসে জানো তো।’

‘হ্যাঁ, জানি, মাঝে-মাঝে দেখছি তাকে।’

‘আমি যদি তুমি হতাম আমি কিন্তু তৎক্ষণাৎ ওর প্রেমে প’ড়ে যেতাম। তোমাদের পুরুষদের চোখ যে কোথায় থাকে বুঝি না। এমন মিষ্টি মেয়েটা! —দেখতে ভালো, লাবণ্য আছে, বুদ্ধিমতী, শিক্ষিত, আর স্বভাবও ভালো, বোঝে-সোঝে।’

‘আমি যেদিন এলাম, সিমার বোন আমার চুল ছেঁটে দিয়েছিলো—গাফিরা, যে দরজির কাজ করে।’

‘জানি। ওরা দু’জনেই বড়ো বোন আভডোটিয়ার সঙ্গে থাকে, সেই যে লাইব্রেরিতে কাজ করে। বেশ ভালো ওরা, সবাই খেটে খায়। আমি ভাবছিলাম কী—যদি তেমন খারাপ অবস্থায় পড়ি, ধরো তুমি আমি দু’জনেই গ্রেপ্তার হ’য়ে গেলাম—তখন কি ওদের কাছে কাটিয়াকে রাখা যাবে না?’

‘তা—একেবারেই যদি আর কোনো উপায় না থাকে, তাহ’লে তাই হবে। কিন্তু দিখর করুন, সে-অবস্থা কখনো না আসুক।’

‘লোকে বলে সিমা যেন কেমনতরো—তার নাকি মাথার ঠিক নেই। পুরোপুরি স্বাভাবিক তাকে মনে হয় না অবশ্য, কিন্তু তার কারণ তার গভীরতা, তার মৌলিকতা। মতামতে ওর তোমার সঙ্গে আশ্চর্য মিল। সিমা যদি কাটিয়াকে তার কাছে রেখে মানুষ করতে রাজি হয় তাহ’লে আমার আর ভাবনা থাকে না।’

১৭

আর-একবার ইউরি স্টেশনে গেলো, আর-একবার শূন্য হাতে তাকে ফিরে আসতে হ’লো। এখনো সব-কিছুই অনিশ্চিত। সে আর লারা এবার একেবারেই অজানার মুখোমুখি দাঁড়িয়েছে। আবহাওয়া অন্ধকার, ঠাণ্ডা, বরফ পড়ার আগে যেমন হয়। শুধু চৌমাথাগুলোতেই অনেকটা আকাশ দেখা যায়—শীতের চেহারা নিয়ে আছে সেই আকাশ।

লারার কাছে বেড়াতে এসেছিলো সিমা। দু’জনে গল্প করছিলো, কিন্তু তাকে গল্প না-ব’লে বক্তৃতা বলাই ভালো, গৃহকত্রীর কাছে সিমা বক্তৃতা ইচ্ছাছিলো, সত্যি বলতে। তাদের কথার মাঝখানে ব্যাঘাত ঘটতে চাইলো না ইউরি। একটু একলা থাকতেও ইচ্ছে করছিলো তার। পাশের ঘরে সোফায় শুয়ে পড়লো সে। দুই ঘরের মধ্যকার দরজাটা খোলা; দরজায় মেঝে পর্যন্ত পর্দা ঝুললেও তাদের কথাবার্তা সে স্পষ্ট শুনতে পাচ্ছিলো।

‘আমি অবশ্য শেলাই করা থামাবো না, কিন্তু সেদিকে তুমি নজর দিয়ে না, সিমা। আমি সব শুনছি, উৎকর্ষ হ’য়ে শুনছি। কলেজে আমি ইতিহাস আর দর্শন পড়েছিলাম। তোমার দৃষ্টিভঙ্গি আমার খুব ভালো লাগে। তাছাড়া তোমার কথা শুনলেও স্বস্তির নিঃশ্বাস ফেলা যায়। গত কয়েক রাত কাটিয়ার কথা ভেবে-ভেবে আমরা ঘুমোতে পারিনি। আমি ওর মা, আমাদের ভালো-মন্দ কিছু ঘটলেও ওর মঙ্গলের ব্যবস্থা করা তো আমার কর্তব্য। আমার অবশ্য শাস্তভাবে ব’সে সব দিক বিবেচনা ক’রে দেখা উচিত, কিন্তু বিবেচনা আমার তেমন আসে না। তা বুঝে, আরো বেশি খারাপ লাগে আমার। বড়ো ক্লান্ত আমি, ঘুমোতে পারি না, তাই এতো মন-খারাপ আমার। তোমার কথা শুনলে মনে শান্তি পাই। এই দ্যাখো না, এখনি হয়তো বরফ পড়বে। যখন বরফ পড়ে, তখন ব’সে-ব’সে অনেকক্ষণ ধ’রে জ্ঞানের কথা শুনতে ভালো লাগে আমার। তখন জানলার দিকে তাকালেই মনে হয় কে যেন বাগান পেরিয়ে বাড়ির দিকে আসছে। তুমি তা লক্ষ করেছো কখনো? তারপর, এবার তোমার কথা বলো। আমি শুনছি।’

‘কী যেন বলছিলাম আগের বারে?’

লারা কী জবাব দিলে, ইউরি ধরতে পারলো না। সিমা বলতে শুরু করলো:

‘সংস্কৃতি,’ ‘স্মরণীয় যুগ’—এ-সব কথা আমি পছন্দ করি না। শান্তির সৃষ্টি হয় ওতে। আমি অন্যভাবে বলতে চাই কথাটা। আমি তো দেখি, মানুষের মধ্যে দুই অংশ—তার কাজ, আর ভগবান। এই দুই যোগ করলেই মানুষ হয়। মানবাত্মার বিকাশের কথা যদি ভাবো, তার প্রতিটি পর্যায়ের পেছনে কতো যুগের কীর্তি জমে আছে—কী দীর্ঘ, কী মহুর সেই কাজ। এমন এক কর্ম হ’লো মিশর। আর-একটি গ্রীস। ইহুদি প্রবক্তাদের ধর্মতত্ত্ব হ’লো তৃতীয়। সব শেষে এলো

খৃষ্টধর্ম—তার স্থান নিতে পারে এমন কিছু এখনো দেখা দেয়নি; আমাদের যুগে এখনো যা-কিছু সত্য সব তারই সাধনা করে চলেছে।

‘তোমাকে আমি দেখাতে চাই, কোন সতেজ ও নতুন জিনিস খৃষ্টধর্ম নিয়ে এলো জগতে—যে-ধর্মে তুমি অভ্যস্ত হয়েছে তা নয়—কিন্তু একেবারে সরল, আশীত, প্রত্যক্ষ। শোনো, আমাদের যজ্ঞবিধির কয়েকটি মন্ত্র প’ড়ে শোনাই তোমাকে—অল্প কয়েকটা, খুব সংক্ষেপে।

‘অনেক মন্ত্র আছে, যা ইহুদি ও খৃষ্টান, সনাতন ও নববিধানের তত্ত্বকে পাশাপাশি এনে মিশিয়ে দিয়েছে। ধরো যেমন জ্বলন্ত গুল্ম, ইহুদিদের মিশরত্যাগ, অগ্নিকুণ্ডে শিশুগণ, জোনাল এবং তিমি—এই সবের সঙ্গে অক্ষতযোনি মাতার ও যীশুর পুনরুত্থানের তুলনা করা চলে।

‘পুরাতন শাস্ত্র কেন পুরোনো আর নতুন শাস্ত্র কেন নতুন—তা, আমার মনে হয়, এই সব তুলনার মধ্যে থেকে চমকপ্রদভাবে বেরিয়ে আসে। শাস্ত্রের বহু অংশে মারিয়ার অমল মাতৃহের সঙ্গে ইহুদিগণের লোহিতসাগরে উত্তরণের তুলনা করা হয়েছে। যেমন এই শ্লোকটি, তার আরম্ভ এই রকম: “একদিন লোহিতসাগরে এসেছিলো কুমারী-বধুর সাদৃশ্য,” তারপরে আছে: “ইজরায়েলীয়রা পেরিয়ে যাবার পব সমুদ্র যেমন অনতিক্রম্য হয়ে উঠেছিলো, তেমন এমানুয়েলের জন্মের পর অপাপবিন্ধ অমল রইলেন।” অর্থাৎ, ইহুদিদের উত্তরণের পর সমুদ্র যেমন আবার স্থলপথে অনতিক্রম্য হয়ে উঠলো, ঠিক তেমনি আমাদের সদাপ্রভুর জন্মের পর মারিয়ার কৌমার্য অক্ষুণ্ণ থেকে গেলো। একটি তুলনা টানা হ’লো দুয়ের মধ্যে।—ঘটনা হিসেবে তারা কী-রকম? দুটিই অতিপ্রাকৃত, দুটিকেই মেনে নেওয়া হয়েছে অলৌকিক ব’লে। কিন্তু এই দুই অলৌকিকের মধ্যে আবার তফাৎ আছে—দুটি যুগের ভাবনা কী-রকম বদলে গেছে, তা স্পষ্ট বুঝতে পারা যায়—কোন যুগে কোন ঘটনাকে লোকে অলৌকিক ভাবতো, তা-ই থেকেই দুটি যুগ স্পষ্ট হ’য়ে ওঠে, একটি প্রাচীন ও আদিম. অন্যটি নতুন, রোমকদের পরবর্তী, আরো অগ্রসর।

‘একদিকে আমরা পাচ্ছি এক জাতীয় নেতাকে, কুলপতি মুশা সমুদ্রকে পথ করে দিতে আদেশ দিলেন, আর তাঁর জাদুদণ্ডের আঘাতে সমুদ্র বিভক্ত হ’য়ে গিয়ে সমগ্র একটি জাতিকে—গগনায় অসংখ্য, লক্ষ-লক্ষ লোক তারা—তার মধ্য দিয়ে পার হ’তে দিলে, তারপর যেই শেষ লোকটি পেরিয়ে গেলো, অমনি আবার মিলে গেলো জলরাশি, ডুবিয়ে দিলো অনুসরণকারী মিশরীদের, তাদের তলিয়ে দিলো অতলে। পুরো ছবিটাই প্রাচীনপন্থী—জাদুকরের আদেশ মেনে নিচ্ছে আদিভূত, রোমক সেনাবাহিনীর মতো অসংখ্য উদ্বেল মানুষের শোভাযাত্রা, এক নেতা, নেতার পেছনে সম্পূর্ণ এক জাতি। সব চোখে দেখা যায়, শোনা যায়, কানে তাল লাগায় প্রচণ্ড।

‘অন্যদিকে একটি তরুণী—অতি সাধারণ একটি মানুষ, প্রাচীনকালে তাকে হয়তো চোখেই পড়তো না। গোপনে, শাস্ত্রভাবে, নিঃশব্দে সে জন্ম দিচ্ছে একটি শিশুর, প্রাণকে জন্ম দিচ্ছে, তিল-তিল করে গ’ড়ে তুলছে প্রাণের বিস্ময়, “নিখিলের প্রাণ”—পরবর্তী কালে তা-ই তাঁকে বলা হয়েছে। তার সন্তানের জন্ম শুধু যে মুশার বিধান অনুসারেই অবৈধ তা নয়, তা আবার প্রকৃতির বিধানেরও বিরুদ্ধে। প্রয়োজনবশত জন্ম দেয়নি সে, সে জন্ম দিয়েছে অলৌকিক উপায়ে, প্রেরণার দ্বারা। আর এখন থেকে জীবনের মূলে আর বাধ্যতা ব’লে কিছু রইলো না, এখন থেকে প্রাণের মূল হ’লো সেই একই প্রেরণা—আর নতুন শাস্ত্র যা উপহার দিলে তা তো এই—সাধারণের বদলে অসাধারণ, প্রাত্যহিকের বদলে উৎসব, বাধ্যতার বদলে প্রেরণা।

‘এই পরিবর্তনের অর্থ যে কী বিরাট, তা নিশ্চয়ই বুঝতে পারছো। প্রাচীন মূল্যবোধের কাছে যা কিছুই নয়, এমনি এক ব্যক্তিগত মানবিক ঘটনাকে একটি সমগ্র জাতির অভিপ্রাণের সঙ্গে তুলনা করা হ’লো কেন? কেন তা এই মূল্য পেলো স্বর্গের কাছে?—তা যদি বুঝতে হয় তো

স্বর্গের চোখ দিয়েই দেখতে হবে একে, কেননা অনন্যতার পুণ্য বিভায় এই ঘটনাটি ঘটেছিলো।

‘কী যেন বদলে গেলো পৃথিবীর। রোমের অবসান হ’লো। শেষ হ’লো সংখ্যার রাজত্ব। সার্বিকভাবে, জাতি হিসেবে ঝাটো—এই যে কর্তব্য সাজোয়া বাহিনী চাপিয়ে দিয়েছিলো, তার চিহ্ন আর রইলো না; নেতৃত্ব, জাতি—এ-সব প’ড়ে রইলো অতীতে।

‘ও-সবের বদলে? বদলে এক মুক্তিতত্ত্ব ব্যক্তিবাদ। একজন মানুষের জীবনী হ’য়ে গেলো ঈশ্বর-চরিত, আর তা পূর্ণ ক’রে দিলো বিশ্বকে। দূতোৎসবের’ মন্ত্রে বলা হয়েছে: দেবতা হবার চেষ্টা ক’রে আদম ব্যর্থ হয়েছিলো, কিছু আদম যাতে দেবতা হ’তে পারে, সেইজনা ঈশ্বর এখন মানবজন্ম নিলেন।’

‘এস্কুনি আবার এ-কথায় ফিরে আসবো,’ বললো সিমা, ‘এক ফাঁকে অন্য একটা কথা ব’লে নিই। —মজুরদের অবস্থার উন্নতি, মায়েদের ভরণপোষণ, অর্থবলের সঙ্গে লড়াই—এ-সব বিষয়ে আমাদের এই বিপ্লবী যুগ যে-কৃতিত্ব দেখিয়েছে, তা যেমন আশ্চর্য, তেমনি আধুনিক, আর তেমনি স্থায়ী। কিন্তু জীবনের যে-ব্যাখ্যা আর যে-সুখতত্ত্ব এখন প্রচারিত হচ্ছে তা অতীতের এমন হাস্যকর ধ্বংসাবশেষ যে বিশ্বাস করাই সত্য এ-সব কথা কেউ ঠাট্টা না-ক’রে বলতে পারে। নেতা নিয়ে, জনগণ নিয়ে এই যে বাগাড়ম্বর, সত্যি যদি তার ইতিহাসের গতি উল্টে দেবার ক্ষমতা থাকতো, তাহলে তো আবার হাজার-হাজার বছর আগেকার সেই বাইবেলের রাখাল আর মহাঈশ্বাদের আমলে গিয়ে পড়তুম। কিন্তু ভাগ্যিস তা নেই।

‘এবার যীশু আর মারিয়া মাদলীনীর বিষয়ে কয়েকটা কথা—এটা কিন্তু সুসমাচার থেকে নয়, পুণ্য সপ্তাহের একদিনের একটি প্রার্থনা থেকে নেওয়া, মঙ্গলবার কি বুধবার হবে ব’লেই মনে হয়। তুমি তো সবই জানো, লারিসা ফিয়োডোরোভনা, আমি শুধু তোমাকে একটা কথা মনে করিয়ে দিচ্ছি।

‘জানো তো ধর্মীয় শ্লাভনী ভাষায় “সংরাগ”^১ শব্দের প্রথম অর্থ যাতনাভোগ, যীশুর যাতনাভোগ। রুশভাষায় কথাটার অর্থ দাঁড়িয়েছিলো কাম ও কদাচার, শাস্ত্রে সেই অর্থেও ব্যবহার করা হয়েছে। —“আমার আত্মা সংরাগের কৃতদাস, আমি যেন বন্য পশুতে পরিণত,” —“আমরা তো স্বর্গচ্যুত, এসো, সংরাগ বর্জন ক’রে স্বর্গে পুনঃপ্রবেশের যোগ্যতা অর্জন করি,” ইত্যাদি, ইত্যাদি। ইন্ড্রিয়দমন ও শরীর-নিগ্রহ বিষয়ে লেটের মন্ত্রগুলো আমার ভালো লাগে না; হয়তো আমারই ভুল, কিন্তু লাগে না। অদ্ভুত নীরস ঐ কথাগুলো, নীরব আর অসুন্দর, অন্য সব আধ্যাত্মিক রচনায় যে-কবিতা আছে, তার কিছুই নেই এতে। স্থূলকায় সব সম্যাসী, যারা নিজেরা নিয়ম মেনে চলতে পারেনি, ওগুলো তাদেরই লেখা ব’লে আমার মনে হয়। অবশ্য তারা যদি নিয়ম না-মেনে থাকে, যদি লোক ঠকিয়ে থাকে, কিংবা যদি বিবেক-মতোই চ’লে থাকে—তাতে আমার কিছুই এসে যাচ্ছে না, আমার ভাবনা ও-সব মন্ত্রের তাৎপর্য নিয়ে। কী মনস্তাপ—যেন ইন্ড্রিয়ের দুর্বলতাটাই মস্ত কথা, শরীরটা মোটা না হ্যাংলা তাতে মস্ত কিছু এসে যায়—জঘন্য! এতে ক’রে মস্ত আসন দেওয়া হয় তাকেই, যার নিজের কোনো মর্যাদা নেই—যা গৌণ, কলুষিত, দ্বিতীয় শ্রেণীর। —কিছু মনে কোরো না, অনেক অবাস্তুর বকলাম।

‘আশ্চর্য নয় কি—ঠিক ঈস্টারের আগে, যীশুর মৃত্যু আর পুনরুত্থানের সন্ধিক্ষণে, মারিয়া মাদলীনাকে স্মরণ করা হয়? এর কারণ কী, আমি জানি না, কিন্তু তাঁর প্রাণত্যাগের মুহূর্তে, পুনর্জন্মের প্রাক্কালে এই যে মাদলীনাকে মনে করিয়ে দেওয়া হ’লো, এটা আমার মর্মে হয়

১ Feast of Annunciation মারিয়া যে যীশুজন্মী হবেন এই সংবাদ যেদিন দেবদূত তাকে জানিয়েছিলেন, সেই দিনের স্মরণে প্রতি বছর ২৪শে মার্চ এই উৎসব পালন করা হয়।—অনুবাদের টীকা

২ সংরাগ=Passion।—অনুবাদের টীকা

একেবারে যথাযথ। কীভাবে মনে করানো হ'লো তা একবার লক্ষ করো—কী বিস্ময়কর সংরাগ তার মধ্যে, কী নির্মম প্রত্যক্ষতা।

‘ঠিক মাদলীনীর কথাই বলা হ'লো, না অন্য কোনো মারিয়ার কথা, তা নিয়ে কিছুটা সংশয় আছে, কিন্তু সে যা-ই হোক, সদাপ্রভুর কাছে সে প্রার্থনা করলে :

“যেমন আমি আমার কেশগুচ্ছ মুক্ত ক'রে দিলাম, তেমনি আমাকে ঋণমুক্ত করো।”—অর্থাৎ “যেমন ক'রে আমি আমার চুল খুলে দিলাম, তেমনি আমাকে নিষ্কৃতি দাও আমার পাপ থেকে।” এর চেয়ে স্পষ্ট, এর চেয়ে স্পর্শসহ আর কী উপায় ছিলো ক্ষমার তৃষ্ণা ও মনস্তাপের তীব্রতাকে প্রকাশ করার?

‘সেই তিথির যজ্ঞবিধিতে আরো বিস্তারিত একটি অংশ আছে—সেখানে যে মারিয়া মাদলীনীর কথা বলা হচ্ছে তাতে সন্দেহ নেই।

‘আবার তার বিলাপ তার অতীতকে নিয়ে—যে-অতীতের জন্য তার মধ্যে কলুষ যেন বদ্ধমূল—কী ভীষণ সেই বিলাপ, যেন ছোঁয়া যায়। প্রতি রাতে পাপ ফিরে আসে তার জীবনে। “কামের প্রজ্বলন আমার অমানিশা—চাঁদ নেই, শুধু অন্ধকারে পাপের অধ্যবসায়।” মিনতি করলে সে যীশুকে, যেন তিনি গ্রহণ করেন তার অশ্রুভরা অনুতাপ, যেন তাঁকে ব্যাকুল করে তার দীর্ঘশ্বাসের আন্তরিকতা। তাহ'লেই সে তার চুল দিয়ে মুছিয়ে দিতে পারবে দিব্যতম তাঁর চরণকে। স্বর্গে যখন ঈভা ভয়ে লজ্জায় ব্যাকুল হ'য়ে উঠেছিলো, তখন সে আশ্রয় নিয়েছিলো তার চুলের প্রাবনে—মাদলীনীর ইচ্ছা সেই ঈভাকে যেন প্রভুর মনে পড়ে। “আমাকে চুষন করতে দাও তোমার চরণে, আমার চোখের জলে ভিজিয়ে দিতে দাও তোমার চরণ, আমার কেশগুচ্ছ তা মুছিয়ে দিতে দাও। এই কেশগুচ্ছই একদিন আবৃত করেছিলো ঈভাকে, আশ্রয় দিয়েছিলো তাকে—নানা গুণ্ডনে তখন ভ'রে উঠেছে তার কান, স্বর্গের সুশীতল দিনেও যখন সে ভয় পেয়ে গেছে।” আর তার চুল নিয়ে এতো কথার পরেই সে ব'লে উঠলো: “কে নিরূপণ করতে পারে আমার পাপের অজস্রতা আর তোমার বিচারের গভীরতাকে!” কী ঘনিষ্ঠতা, কী আত্মীয়তা—ভগবানের সঙ্গে জীবনের, ভগবানের সঙ্গে মানুষের, ভগবানের সঙ্গে নারীর!’

১৮

স্টেশন থেকে ক্লাস্ত হ'য়ে বাড়ি ফিরেছিলো ইউরি। সেদিন তার ছুটি ছিলো; দশদিনে তো সপ্তাহ, বাকি ন-দিন যাতে বেঁচে থাকা যায়, এই জন্যে ছুটির দিনে সে প্রচুর ঘুমিয়ে নেয়। সোফায় এলিয়ে শুয়েছিলো সে, মাঝে-মাঝে হাত-পা ছড়িয়ে দিচ্ছিলো। কথাগুলো তার কানে যাচ্ছিলো আসন্ন তন্দ্রার অস্পষ্টতার মধ্য দিয়ে, তবু ভারি ভালো লাগলো তার কথাগুলো। ‘সবই অবশ্য কোলিয়া মামার বই থেকে নিয়েছে, তবু—কী বুদ্ধি, সত্যিকার গুণী মেয়ে।’

ইউরি উঠে জানলার কাছে দাঁড়ালো। জানলা দিয়ে উঠান দেখা যায়, পাশের যে-ঘরে লারা আর সিমা এখন আর শুনতে-না-পাওয়া কথাবার্তা বলছে, তার জানলাও এই রকম।

অন্ধকার হয়ে এলো, মনে হচ্ছে বরফ পড়বে। দুটো ম্যাগপাই পাখি রাস্তা থেকে উড়ে এলো, ডানা ঝাপটে-ঝাপটে দেখতে লাগলো কোথাও বসা যায় কি না, হাওয়ায় তাদের পালকগুলো ফুলে উঠলো। উড়ে এলো তারা বেড়ার গায়ে, একবার ময়লা ফেলার টিনের ওপর বসলো, তারপর মাটিতে নেমে, উঠানের চারপাশে লাফাতে লাগলো।

‘ম্যাগপাই মানে বরফ,’ ভাবলো ইউরি। ঠিক সেই মুহূর্তে পাশের ঘরে সিমা ঠেচিয়ে ব'লে উঠলো:

‘ম্যাগপাই মানে খবর। হয় অতিথি, নয়তো চিঠি আসবে তোমাদের।’

দরজার ঘন্টার হাতলটা ইউরি সারিয়ে দিয়েছিলো, একটু পরেই কে যেন সেটা ধ'রে টানলে।

পর্দার পেছন থেকে বেরিয়ে এসে লারা তাড়াতাড়ি হুলঘর দিয়ে এগিয়ে গেলো দরজা খুলতে।
সিমার বোন গ্রাফিয়ার সঙ্গে তাকে কথা বলতে শুনলো ইউরি।

‘বোনের খোঁজে এসেছো? হ্যাঁ, এখানেই আছে।’

‘না, আমি ওর জন্য আসিনি। অবশ্য সিম্মা যেতে চাইলে আমরা একসঙ্গেই বাড়ি ফিরতে পারি। আমি এসেছি তোমার বন্ধুর নামে এক চিঠি নিয়ে। আমি যে এককালে ডাকঘরে কাজ করতুম, তা তার ভাগ্য বলতে হবে। চিঠিটা কতো হাত ঘুরেছে জানি না; মস্কো থেকে পাঠানো, পাঁচ মাস লেগেছে রাস্তায়। ওরা নাকি চিঠির মালিককে খুঁজেই পায়নি। শেষটায় আমাকে জিজ্ঞেস করার কথা মনে হ’লো ওদের—আমি চিনতে পারলাম—আমার কাছে একবার চুল ছাঁটতে গিয়েছিলেন উনি।’

অনেকগুলো পাতা জোড়া মস্ত চিঠি, লেফাফাটাব জীর্ণ দশা, ডাকঘরে খুলেছিলো, পাতাগুলোও ভাঁজ প’ড়ে-প’ড়ে নষ্ট হ’তে বসেছে; চিঠি টোনিয়ার। হাতে পেয়ে ইউরি বুঝতে পারলো না চিঠিটা কেমন ক’রে তার হাতে এলো; তা যে লারা তাকে এগিয়ে দিয়েছে সেটা লক্ষ করেনি। পড়তে যখন শুরু করলো, তার এটুকু বোধ ছিলো যে সে ইউরিয়্যাটিনে আছে, আছে লারার বাসায়। কিন্তু পড়তে-পড়তে সব চেতনা লুপ্ত হ’লো তার। সিম্মা বেরিয়ে এসে তাকে নমস্কার জানিয়ে বিদায় নিলে, সে কলের মতো ঠিক জবাবটি দিলো বটে, কিন্তু সে-দিকে কোনো মনই দিলে না, লক্ষ করলে না কখন সিম্মা বেরিয়ে গেলো। একটু পরে সে একেবারেই ভুলে গেলো সে কোথায় আছে।

‘ইউরা,’ টোনিয়া লিখেছে, ‘আমাদের যে মেয়ে হয়েছে, তা কি তুমি জানো? তোমার মায়ের নাম দিয়েছি তাকে—মাশা।’

‘এখন আর-একটা কথা ব’লে নিই।—যে-সব বিখ্যাত ব্যক্তি ও অধ্যাপক ক্যাডেট-দলভূক্ত বা দক্ষিণপন্থী সমাজতন্ত্রী ছিলেন—যেমন মিলিউকভ, কিজেহুটের, কুস্কোভা, আরো অনেকে—তাদের মধ্যে তোমার কোলিয়া-মামা, আমার বাবা আর আমরাও আছি—আমাদের রাশিয়া থেকে বের ক’রে দেওয়া হচ্ছে।’

‘এটা দুঃখের কথা—বিশেষ ক’রে তুমি যখন কাছে নেই, কিন্তু মেনে না-নিয়ে উপায় কী। কী ভীষণ দিনকাল—আরো অনেক খারাপ হ’তে পারতো আমাদের, এই নির্বাসন তো লঘুদণ্ড। সেজন্যে ধন্যবাদ ঈশ্বরকে। তুমি এখানে থাকলে তুমিও আমাদের সঙ্গে আসতে। ইউরা, তুমি কোথায়? এই চিঠি আশ্চিপন্ডের ঠিকানায় পাঠাচ্ছি আমি, তোমাকে খুঁজে পেলে তিনিই পৌছে দেবেন। আমাদের বাড়ির সবাইকে দেশত্যাগের ছাড়পত্র দেওয়া হয়েছে, কিন্তু পরে—ঈশ্বরের দয়ায়—তোমাকে যদি খুঁজে পাওয়া যায়, তাহ’লে তোমার ওটা কাজে লাগবে কিনা, তা জানি না ব’লে আমার যন্ত্রণার অবধি নেই। তুমি যে বেঁচে আছো, আর একদিন তোমাকে ফিরে পাওয়া যাবেই—এই বিশ্বাস আমি এখনো ত্যাগ করিনি। আমার হৃদয় তা-ই বলে, আর হৃদয়ের কথায় আস্থা রাখি আমি। যখন তোমাকে পাওয়া যাবে, তখন রাশিয়ার অবস্থা হয়তো এখনকার চেয়ে শান্ত, হয়তো তুমি তোমার জন্য আলাদা একটা ভিসা জোগাড় ক’রে নিতে পারবে, আবার আমরা একসঙ্গে এক জায়গায় থাকতে পারবো। কিন্তু এতো সুখ আমার ভাগ্যে আছে, এ-মুহূর্তে তা বিশ্বাস করতে পারছি না।’

‘আসল মুশকিলটা এইখানে যে আমি তোমাকে ভালবাসি আর তুমি আমাকে ভালোবাসো না। কেন এই শাস্তি হ’লো আমার, কী তার কারণ, তা বুঝতে, তার অর্থ আবিষ্কার করতে কেবলই চেষ্টা করি। নিজের দিকে তাকাই আমি, যতোদিন আমরা একসঙ্গে ছিলাম সব তন্ন-তন্ন ক’রে খুঁজে দেখি, নিজের বিষয়ে যা-কিছু আমি জানি, সব—সব দেখতে চেষ্টা করি, কিন্তু কেন যে আমার এই দশা হ’লো তা কিছুতেই বুঝে উঠতে পারি না। খুঁজে পাই না এর আরম্ভ, মনে আনতে পারি না এই দুর্ভাগ্য কেমন ক’রে নিজের ওপর ডেকে আনলাম। আমার সম্বন্ধে একটা

মিথ্যে ধারণা গ'ড়ে উঠেছে তোমার, তাতে স্নেহ নেই, কোনো আয়নার মধ্যে বিকৃত ক'রে দেখেছো আমাকে।

‘কিন্তু আমার কথা শোনো, আমি তোমাকে ভালোবাসি। যদি শুধু জানতে কতো আমি ভালোবাসি তোমাকে! যা-কিছু অসাধারণ আছে তোমার মধ্যে তা সুবিধের হোক কি অসুবিধের হোক, সব, সব আমি ভালোবাসি। যা-কিছু সাধারণ আছে তোমার মধ্যে তা অসাধারণভাবে সম্পৃক্ত হ'য়ে আছে ব'লে আমার কাছে তাও মূল্যবান। আমি ভালোবাসি তোমার মুখ, যা ভাবে-ভঙ্গিতে সুন্দর হ'য়ে ওঠে, যদিও সেই ভাবভঙ্গি বাদ দিলে হয়তো তা সাধারণই। ভালোবাসি তোমার বুদ্ধি, তোমার প্রতিভা—ইচ্ছাশক্তির বিনিময়ে যা তুমি পেয়েছো—তোমার তো ইচ্ছাশক্তি নেই। তোমার সব-কিছু ভালোবাসি আমি, আর তোমার চেয়ে ভালো এই জগতে আর কাউকে জানি না।

‘কিন্তু শোনো: তোমাকে যা বলতে চাচ্ছি তা এই। যদি তোমাকে এতো ভালো নাও বাসতুম, যদি ধরো, অপছন্দই করতুম তোমাকে, তবু আমি ভাবতুম যে তোমাকে ভালোবাসি। আমি তোমার প্রতি উদাসীন, এই দারুণ কথাটা তখনো আমার কাছে গোপন থাকতো। যে-শাস্তিতে চরম অপমান, যা প্রায় মৃত্যুর মতো, শুধু সেই শাস্তি তোমার ওপর চাপিয়ে দেবার ভয়েই—আমি যে তোমাকে ভালোবাসি না, তা অচেতনভাবে না-বোঝার চেষ্টা করতুম। দু'জনের একজনও তা টের পেতো না—কখনোই না। আমার আপন হৃদয় তা গোপন রাখতো আমার কাছ থেকে, কারণ ভালো না-বাসা তো হত্যার মতো; এ-রকম কোনো আঘাত কাউকেই দেবার মতো শক্তি আমার কখনোই হ'তো না।

‘এখনো কিছুই ঠিক নেই, কিন্তু আমরা বোধহয় প্যারিস যাবো। ছেলেবেলায় তোমাকে সেখানে নিয়ে যাওয়া হয়েছিলো, যেখানে বাবা আর কাকা বড়ো হ'য়ে উঠেছিলেন, সেই দূর দেশে গিয়ে থাকবো আমি। বাবা তোমাকে তাঁব সন্তোষ জানাচ্ছেন। সাশা বেশ বড়ো হ'য়ে উঠেছে; দেখতে তেমন ভালো হয়নি, কিন্তু বড়োসড়ো জোয়ান হয়েছে। তোমার কথা উঠলেই ও কাঁদতে থাকে, কোনো সান্ত্বনাই মানতে চায় না। আর পারছি না আমি, কিছুতেই কান্না চাপতে পারছি না। চলি, কেমন? তোমায় গায়ে ক্রুশচিহ্ন ঐকে দিচ্ছি; যে-অসংখ্য দিন প'ড়ে আছে সামনে, অন্তহীন যতো বিদায়ের বেলা, যতো ক্রেশ, অনিশ্চয়তা, দুঃখ, তোমার সামনে দীর্ঘ, দীর্ঘ অন্ধকার পথ—সব-কিছুর জন্য প্রার্থনা থাকলো। কোনো-কিছুর জন্যই দোষ দিচ্ছি না তোমাকে, আমার কোনো নালিশ নেই, তোমার ইচ্ছেমতো জীবন গ'ড়ে তোলা তুমি—শুধু ভালো থেকে, ভালো থেকে।

‘উরাল ছেড়ে আসার আগে—ঐ জায়গাটায় কী ভীষণ ভবিতব্য ছিলো আমাদের!—আমার সঙ্গে লারিসা ফিয়োডোরোভনার বেশ আলাপ হয়েছিলো। সব সময় তাঁকে পাশে পেয়েছিলাম আমার দুঃখের দিনে, সন্তানের জন্মের সময় তিনি আমার দেখাশোনা করেছিলেন, এ-জন্যে তাঁব কাছে আমি কৃতজ্ঞ। সত্যি কথা বলবো, মানুষ খুব ভালো, কিন্তু—ভগ্নামি করবো না—তাঁর স্বভাব আমার ঠিক উল্টো। জীবনকে সরল ক'রে তোলার জন্য সংগত সমাধান খোঁজার জন্যই আমার জন্ম হয়েছিলো, আর তিনি—জন্মেছেন জীবনকে জটিল ক'রে তুলতে, বিশৃঙ্খল ক'রে দিতে।

‘ভগবান রক্ষা করুন তোমাকে, এবার চিঠি শেষ করি। চিঠি নিতে এসেছে ওরা, আর ঝাঝাড়া এখনো বাকি। ইউরা, ইউরা, আমার স্বামী, আমার প্রিয়তম, আমার সন্তানের পিতা, এ কী হ'ল যাচ্ছে আমাদের? আর যে কোনোদিন, কোনোদিন আমরা পরস্পরকে দেখতে পাবো না, তা কি বুঝতে পারছো তুমি?—এই তো—লিখেই ফেললাম কথাটা, তুমি কি বুঝতে পারছো তার মানে কী? বোঝো কি তুমি, বুঝতে কি পারো? তাড়া দিচ্ছে ওরা, মনে হচ্ছে ওরা যেন আমাকে মৃত্যুদণ্ড দিতে এলো। ইউরা! ইউরা!’

পড়া শেষ করে ইউরি চোখ তুলে তাকালো। শূন্য হ'য়ে আছে দৃষ্টি, চোখে একফোঁটা জল নেই, সব শুকিয়ে গেছে দুঃখে, শূন্য হ'য়ে গেছে বেদনায়। কিছুই দেখতে পেলো না সে, চারপাশে কী আছে না আছে, তার কোনো বোধ থাকলো না তার।

বরফ পড়ছে বাইরে। হাওয়া তাড়িয়ে নিচ্ছে বরফগুলোকে, ক্রমশ পুক হ'য়ে পড়ছে, আরো দ্রুতবেগে, যেন ধরে ফেলতে চাচ্ছে। ইউরি তাকিয়ে রইলো এমনভাবে যেন সে বরফ পড়া দেখতে পাচ্ছে না, যেন এখনো টোনিয়ার চিঠি পড়ছে। আর এই যে শুভ্রতা, ঝিকমিক করে উড়ে যাচ্ছে তার সামনে দিয়ে, তা যেন তুষারের ছোটো-ছোটো শুকনো নক্ষত্র নয়, যেন আসলে ছোটো-ছোটো কালো অক্ষরের ফাঁকে-ফাঁকে শূন্যতা—শাদা, আর নিঃসীম।

অজান্তে কৈদে উঠে বুক চেপে ধরলো সে। মনে হ'লো অজ্ঞান হ'য়ে পড়বে। টলতে-টলতে এগিয়ে গেলো সোফার দিকে, অচেতন হ'য়ে সেটার ওপর পড়ে গেলো।

পরিচ্ছেদ ১৪

আবার ভারিকিনো

১

পুরোপুরি শীত চলছে। বরফ পড়ছে অঝোরে, তার মধ্য দিয়ে ইউরি হাসপাতাল থেকে হেঁটে ফিরলো। হলঘরেই লারার সঙ্গে দেখা হ'লো তার।

‘কমরোভস্কি এসেছে,’ লারার গলা ব্যাকুল শোনালো, আর যেন কোনো আশা নেই। যেন কেউ মেরেছে তাকে, এমনি উদ্ভ্রান্তভাবে দাঁড়িয়ে রইলো।

‘কোথায় সে? এখানে? এই ফ্ল্যাটে?’

‘না, না, এখানে কেন থাকবে? সকালে এসেছিলো, ব'লে গেছে রাত্রে আসবে। এক্ষুনি এসে পড়বে হয়তো। তোমার সঙ্গে কথা বলতে চায়।’

‘কিন্তু এসেছে কেন?’

‘কী জানি, কিছুই বুঝলাম না ওর কথা। বললো যে শিগগিরই ও দূর এশিয়ায় চ'লে যাচ্ছে, যাবার আগে দেখা করতে এলো। বিশেষ ক'রে তোমার আর পাশার সঙ্গে দেখা করতে চায়। বললো যে আমরা নাকি মারাত্মক বিপদের মধ্যে আছি, তুমি, আমি, পাশা—আমরা তিনজনেই। সে-ই শুধু বাঁচাতে পারে আমাদের—যদি তার পরামর্শমতো চলি।’

‘আমি এক্ষুনি বেরিয়ে যাচ্ছি। আমি চাই না ওর সঙ্গে আমার দেখা হোক।’

লারা ভেঙে পড়লো কান্নায়। ইউরির পায়ে প'ড়ে তার হাঁটু জড়িয়ে ধরলো, কিন্তু ইউরি তাকে টেনে তুললো জোর ক'রে।

‘লক্ষ্মীটি, বেরিয়ে যেয়ো না। অন্তত আমার জন্য থাকো,’ মিনতি করলো লারা। ‘এমন নয় যে ওর সঙ্গে একলা হ'তে আমি ভয় পাই, কিন্তু—ভাবতেও ঘেন্না করে ও—কথা। নিভৃত দেখা হবে ওর সঙ্গে—এই জঘন্যতা থেকে বাঁচাও তুমি আমাকে। আর তাছাড়া, খুব কাজের লোক কমরোভস্কি, কতো কিছু জানে—সত্যিই হয়তো আমাদের কোনো সুপরামর্শ দেবার আছে ওর। আমি বুঝতে পারছি অসহ্য লাগবে তোমার ওকে, কিন্তু অন্তত খানিকক্ষণের জন্য ও-সব ভুলে যাও লক্ষ্মীটি, এখন বেরিয়ে না। যেয়ো না।’

‘কী হয়েছে তোমার, বলো তো? এতো অধীর কেন? বলো, কী করতে চাচ্ছে তুমি? অমনভাবে লুটিয়ে পোড়ো না তো বার-বার, এই অভ্যেসটা ছাড়ো তুমি। ওঠো, অমন মনমরা হ'য়ে থাকে না। সত্যি, এই জুজুর ভয় তোমার ছাড়া উচিত—লোকটা তোমাকে সাংঘাতিক ভয় পাইয়ে দিয়েছে তো! আমি যে তোমার সঙ্গে আছি, তা তো জানো। কথা দিলাম, আমি থাকবো। বলো তো তোমার জন্য ওকে অল্লানবদনে খুনও ক'রে বসতে পারি।’

রাত নামলো আধ ঘণ্টার মধ্যেই। মিশকালো রাত। ছ'মাস আগে ইদুরের গর্ভের সবগুলো মুখ বন্ধ ক'রে দেওয়া হয়েছিলো, আজকাল রোজই ইউরি ভালো ক'রে খুঁজে দ্যাখে নতুন কোনো গর্ত দেখা যায় কিনা, চোখে পড়লে সময় থাকতেই বন্ধ ক'রে দেয়। একটা মস্ত লোমওলা ছলোবেড়ালকেও এই উদ্দেশ্যে বাড়িতে রেখে দেওয়া হয়েছে—কিন্তু সেটা প্রায় সব

সময়েই রহস্যময় চেহারা ক'রে ধ্যানমগ্নের মতো থিমোয় শুধু। বাড়িতে ইদুর এখনো আছে, তবে আগের চেয়ে ঢের বেশি সাবধানে থাকে, এই আরকি।

কমারোভস্কির জন্য অপেক্ষা করতে-করতে লারা র্যাশন হিসেবে পাওয়া একটা কালো রুটিকে কয়েকটি টুকরোয় ভাগ ক'রে ফেললো, তারপর রেকাবিতে কয়েকটি সেজ-করা আলু সাজিয়ে টেবিলে রেখে দিলে। দু'জনে মিলে ঠিক করেছে যে পুরোনো খাবার ঘরটায় বসতে দেবে কমারোভস্কিকে—সেটাকে তারা এখনো খাওয়ার সময় ব্যবহার করে। সেই মস্ত ভারি, কালো ওককাঠের টেবিল আর আলমারিটা এই ঘরের আদি আসবাবের অংশ। টেবিলের ওপর ক্যান্স্টর-অয়েলের একটি বোতলে সলতে লাগানো: হাতে নিয়ে চলাফেরার সুবিধে হয় ব'লে এটাকে তারা বাতি হিসেবে ব্যবহার করে।

ডিসেম্বরের কালো রাত্রি ফুঁড়ে কমারোভস্কি এসে হাজির হ'লো, সারা গায়ে তার বরফ কুচি লেগে আছে। তার টুপি, কোট আর জুতো থেকে বরফ ঝ'রে পড়লো মেঝেতে, তারপর, গ'লে গিয়ে, মেঝের ওপর ছোটো-ছোটো জলাশয় সৃষ্টি ক'রে দিলে। তার দাড়ি-গোঁফে এমনভাবে বরফের কুচি আটকে আছে যে তাকে দেখালো ঠিক একটি ভাঁড়ের মতো (আগেকার দিনে দাড়ি-গোঁফ-কামানো চেহারা ছিলো তার)। কড়া ইস্ত্রি-করা ডোরাকাটা পাংলুন তার পরনে, পুরোনো হ'লেও দেখতে ভালো। 'নমস্কার', বা 'কেমন ভালো তো?' এই ধরনের কোনো সম্ভাষণ করার আগে সে পকেট থেকে চিরুনি বের ক'রে অনেকক্ষণ ধ'রে ভেজা চুল আঁচড়ে নিলো, তারপর রুমাল বের ক'রে মুছে নিলো গোঁফ আর ভুরু। কোনো কথা না-বলেই তারপরে সে বাড়িয়ে দিলে তার দুই হাত, ডানহাত ইউরির দিকে, লারার দিকে বা হাত, আর এই ভঙ্গি থেকেই যেন ফুটে বেরোলো ভাবী অমঙ্গলের আশঙ্কা।

'ধ'রে নেওয়া যাক আমরা পূর্বপরিচিত,' ইউরির দিকে ফিরে তাকালো সে। 'আমি যে তোমার বাবার অন্তরঙ্গ বন্ধু ছিলাম, তা হয়তো জানো তুমি। আমার কোলে মাথা রেখেই তিনি মারা যান। তাঁর সঙ্গে তোমার কোনো মিল আছে কিনা দেখছিলাম—কিন্তু না, কোনো মিল নেই, বাবার মতো হওনি তুমি। তিনি ছিলেন দিলদরিয়া মানুষ, মেজাজে চলতেন। তোমাকে তোমার মায়ের মতো মনে হচ্ছে—মৃদু, যাকে বলে ভাবুক।'

'লারিসা ফিয়োডোরোভনা আপনার সঙ্গে দেখা করতে বলেছেন আমাকে। আমার সঙ্গে আপনার নাকি জরুরি কথা আছে? তাঁর কথামতোই দেখা করতে রাজি হয়েছি আমি, এই সাক্ষাৎকারটা আমার ইচ্ছের ওপর নির্ভর করেনি, আর তাছাড়া, মনে তো হয় না আমরা পূর্বপরিচিত। তাহ'লে আমরা কি এবার কাজের কথায় আসবো? কী চান আপনি?'

'কী যে ভালো লাগছে আমার তোমাদের দু'জনকে একসঙ্গে দেখে! সব এখন বুঝতে পারছি, সব। চমৎকার জোড় মিলেছে তোমরা, একেবারে রাজযোটক যাকে বলে—কথাটা বললাম ব'লে কিছু মনে করছো না তো?'

'দয়া ক'রে থামুন। নিজের চরকায় তেল দেন তো বাধিত হবো। আমরা আপনার সহানুভূতি চাচ্ছি না। আপনি বারে-বারে সীমা ছাড়িয়ে যাচ্ছেন।'

'অমন দপ ক'রে জ্ব'লে উঠো না হে, যুবক। হয়তো শেষ পর্যন্ত সত্যিই তুমি বাবার খাত পেয়েছো। ঠিক এমনকি ক'রে তিনি রেগে উঠতেন, একটুতেই মাথা গরম হ'য়ে যেতো। তোমরা আমার ছেলেমেয়ের মতো—আমার শুভেচ্ছা জানাচ্ছি। দুঃখের বিষয়, তোমরা সত্যি-সত্যি শিশুই আছে এখনো—এটা কিন্তু উপমা হিসেবে বলছি না—একেবারেই অজ্ঞ তাবোধ আর নিষ্ঠুরতা আছে। তোমরা ঠিক শিশুর মতো। এখানে এসে দিন দুয়েকের মধ্যেই তোমাদের বিষয়ে আমি যতো কথা শুনেছি, তা তোমরা নিজেরাও জানো না, এমনকি হয়তো আশ্রাজ করতেও পারবে না। অজ্ঞান্সে এমন এক পাহাড়ের ওপর দিয়ে তোমরা চলেছো, আর এক পা

বাড়ালেই অতল খান্দু, কোনো একটা ব্যবস্থা যদি না করো তোমাদের স্বাধীনতা তো যাবেই, এমনকি প্রাণ নিয়েও টানাটানি হ'তে পারে।

‘কমিউনিস্ট রীতি ব'লে একটা ব্যাপার আছে, ইউরি আন্দ্রেইয়েভিচ, খুব কম লোকই তাব সঙ্গে তাল রেখে চলতে পারে। কিন্তু তাদের ধ্যান-ধারণাগুলোকে তোমার মতো এমন প্রকাশ্যে কেউ অস্বীকার করে না। আগুন নিয়ে খেলা করা কেন? তাদের জগৎটাকে বিদ্রূপ করছো তুমি, তোমার অস্তিত্ব তাদের পক্ষে এক মূর্ত অপমান। অস্তিত্ব তোমার অতীতের কথা যদি গোপন থাকতো, তাই'লেও না-হয় কথা ছিলো। কিন্তু মস্কো থেকে এমন অনেক লোক এসেছে যারা তোমার হাঁড়ির খবর সব রাখে। থেমিস'-এর পুরুষ-ঠাকুররা আছেন তো এখানে—তোমরা একজনও তাঁদের মনোমতো নও। কমরেড আন্টিপভ আর টিভেরজিন তাঁদের নথ শানাতে লেগে গেছেন।

‘তা' হোক, তুমি তো পুরুষ, ইউরি আন্দ্রেইয়েভিচ, কারো অধীনও নও, মূর্খের মতো বিপদ যদি ডেকে আনতে চাও আনবে। কিন্তু লারিসা ফিয়োডোরোভনা তো স্বাধীন নন, একটি শিশু আছে তাঁর, তিনি তো আর আকাশে মাথা ঠেকিয়ে চলতে পারেন না।

‘অবস্থা যে কী সাংঘাতিক তা ঠুকে বোঝাবার চেষ্টায় সারা সকালটা আমি নষ্ট করেছি। আমার কথায় কানই দেন না উনি। তুমি বললে কাজ হ'তে পারে—বলবে? সম্ভানের জীবন নিয়ে ছিনিমিনি খেলার অধিকার তাঁর নেই। আমার যুক্তিগুলো শুনতেই হবে ঠুকে, মানতেই হবে।’

‘জীবনে আমি কখনো কারো ওপর নিজের মত চাপিয়ে দিইনি। যারা আমার ঘনিষ্ঠ, তাদের ওপর তো নয়ই। আপনার কথা শোনা বা না-শোনা লারিসা ফিয়োডোরোভনার ইচ্ছের ওপর নির্ভর করে—তা তাঁর ব্যক্তিগত ব্যাপার। তাছাড়া আপনি কী বলতে চাচ্ছেন, তাও আমি ঠিক বুঝতে পারছি না। আপনার তথাকথিত যুক্তিগুলো কিন্তু শুনিনি এখনো।’

‘আবার তোমার বাবার কথা মনে করিয়ে দিচ্ছো তুমি—ঠিক তেমনি একরোখা। বেশ, তাই'লে সব খুলে বলছি। কিন্তু ব্যাপারটা বেশ ঘোরালো, ধৈর্য ধ'রে সব শুনতে হবে, বাধা দিলে চলবে না।

‘পাটির হর্তাকর্তারা মস্ত বড়ো বদলের প্ল্যান আটছেন—হ্যাঁ, সত্যি, কথাটা অত্যন্ত বিশ্বস্তসূত্রে আমি জানতে পেয়েছি, তুমি নির্ভুল ব'লে ধ'রে নিতে পারো। ওরা এখন গণতান্ত্রিক হ'তে চাচ্ছে, চাচ্ছে আইনকানুনকে কিছুটা খাতির দেখাতে—আর এই বদলটা শিগগিরই ঘ'টে যাবে, দেখো।

‘কিন্তু ঠিক সেইজন্যই খেপে উঠেছে পিটুনি পুলিশের দল—তাদের চাকরি চ'লে যাবে তো শিগগিরই। তা যাবার আগে চটপট হিসেব মিলিয়ে নিতে চাচ্ছে তারা, তাই গণতন্ত্র আসবার আগে এমন এক বীভৎসতার ঢেউ ব'য়ে যাবে, যে-রকমটি আমরাও আর আগে দেখিনি। ইউরি আন্দ্রেইয়েভিচ, তোমাকে শেষ করবে ওরা, দাগি তুমি, ওদের লিস্টিতে নাম আছে তোমার। সত্যি বলছি—বিশ্বাস করো—এ আমার স্বচক্ষে দেখা। সময় থাকতে প্রাণ নিয়ে পালাও।

‘কিন্তু এ পর্যন্ত শুধু ভূমিকা। এবার আসল কথায় আসি।

‘যে-রাজনৈতিক দলগুলি এখনো অস্থায়ী সরকারকে মেনে চলছে, আর ভূতপূর্ব সংবিধানসভার সদস্যরা—এরা জোট বেঁধে প্যাসিফিক উপকূলে গিয়ে জড়ো হচ্ছে। নানা ধরনের নামজাদা জমায়েৎ হচ্ছেন—ডুমার সভা, পুরানো জেমস্টভোর পাণ্ডারা, আরো অনেক বিখ্যাত ব্যক্তি, ব্যাবসাদার, কারখানার মালিক, সেই সঙ্গে স্বৈচ্ছাসেবক বাহিনীর ধ্বংসাবশেষ সবাই গিয়ে সেখানে মিলছে।

‘দূরপ্রাচ্যে একটি প্রজাতন্ত্র স্থাপন করার মংলব আছে এদের, সোভিয়েট সরকার তা দেখেও না-দেখার ভান করছে, কেননা লাল সাইবেরিয়া আর বাইরের জগতের মধ্যখানে একটা ফালতু রাষ্ট্র থাকলে তাদের সুবিধেই। সব পার্টির লোক থাকবে সেই রিপাব্লিক সরকারে—মস্কোর জেদের জন্য অর্ধেকেরও বেশি অবশ্য কমিউনিস্ট। সুবিধে পেলেই একটা হাঙ্গামা বাধিয়ে রিপাব্লিককে কুপোকাৎ করবে তারা। খুব পরিষ্কার প্ল্যান, কিন্তু অদ্ভুতপক্ষে নিশ্চাস নেবার একটু সময় পাওয়া যাচ্ছে—এই সময়টুকুর পূর্ণ সদ্ব্যবহার করা চাই।

‘বিপ্লবের আগে কোনো সময়ে আমি ভ্লাডিভস্টকের কয়েকটি ব্যান্ড ও বাবসায়ীর কাজের তদারক করতাম—মের্কুলভ, আর্থারভ ব্রাদার্স—আরো অনেকে। সেই সূত্রেই তারা চেনে আমাকে, মন্ত্রীসভায় যারা যাবে বা যেতে পারে তাদের তরফ থেকে আমার কাছে লোক এসেছিলো, আমাকে বিচারমন্ত্রীর পদ দিতে চাচ্ছে ওরা। কাজটা তারা গোপনেই করেছে, কিন্তু সোভিয়েটের বেসরকারি সম্মতি আছে। আমি তাদের আমন্ত্রণ গ্রহণ করেছি, সেখানেই চলেছি আমি এখন। যা-কিছু বললাম, সবই কিন্তু সোভিয়েট সরকারের মৌন সম্মতি নিয়ে করা হচ্ছে, কিন্তু ব্যাপারটা খুব খোলাখুলি নয় ব’লেই তা নিয়ে বেশি কথা বলা বুদ্ধিমানের কাজ হবে না।

‘লারিসা ফিয়োডোরোভনাকে আর তোমাকে আমি সঙ্গে নিয়ে যেতে পারি। সেখানে তুমি সহজেই জাহাজ পাবে, বিদেশে তোমার আত্মীয়দের কাছেও চ’লে যেতে পারো। তারা যে দেশ থেকে বিতাড়িত হয়েছে, তা জানো নিশ্চয়? খুব হৈ-চৈ হয়েছিলো সেই ব্যাপারে, সারা মস্কো এখনো তা নিয়ে কথা বলছে।

‘স্টেলনিকভকে আমি বাঁচাবো, এই প্রতিশ্রুতি আমি দিয়েছি লারিসা ফিয়োডোরোভনাকে। মস্কো যাকে স্বাধীন সরকার ব’লে মেনে নিয়েছে, তার সভ্য হিসেবে আমি পূর্ব সাইবেরিয়ায় খোঁজ নিতে পারি স্টেলনিকভের—ঐ স্বাধীন রাজ্যে তার আসার সুবিধেও ক’রে দিতে পারি। নেহাৎই যদি সে পালাতে না পারে, তাহ’লে আমি প্রস্তাব করবো যে মস্কো সরকার তাকে ছেড়ে দিন, তার বদলে ওদিক থেকে কাউকে ধরিয়ে দেবো ওঁদের কাছে—এমন কেউ, মস্কো যাকে খুঁজে বেড়াচ্ছে।’

কমারোভস্কির এই ব্যাখ্যা দুর্বোধ্য লাগছিল লারার, কিন্তু যখন ইউরির আর স্টেলনিকভকে বাঁচাবার কথা সে বলতে লাগলো, তখন উৎকর্ণ হয়ে উঠলো। লারা একটু লাল হ’য়ে উঠে, ইউরিকে বললো:

‘শুনছো তো—তোমার পক্ষে, পাশার পক্ষে, খুব জরুরি কথা এ-সব।’

‘কিন্তু এ-সবে বিশ্বাস কী, লারা? এ তো একটা পরিকল্পনা শুধু, তাও অর্ধসমাপ্ত, একে তুমি তথ্য ব’লে ধ’রে নিতে পারো না। আমি বলছি না যে, ভিক্টর ইগলিটোভিচ আমাদের ভুল পথে নিয়ে যেতে চাচ্ছেন, কিন্তু এতোক্ষণ তিনি যা বললেন তা আকাশকসুম ছাড়া আর কী। আমার দিক থেকে ধন্যবাদ দিছি আপনাকে,’ কমারোভস্কির দিকে মুখ ফেবালো সে—‘এতো ভেবেছেন আপনি আমার কথা! কিন্তু আপনি নিশ্চয়ই ভাবছেন না যে আপনি ওদের সরিয়ে ফেলার চেষ্টা করলে আমি তা সহ্য করবো? আপনাকে ওদের নিয়ে যেতে দেবো আমি? আর স্টেলনিকভের কথা—লারাকেই তা ভেবে দেখতে হবে।’

‘আসল কথাটা দাঁড়ালো এই,’ বললো লারা, ‘যে ওঁর সঙ্গে আমরা যাবো কি যাবো না। তোমাকে ফেলে আমি’ যে যাবো না, তা তো তুমি জানো, ইউরি।’

হাসপাতাল থেকে জল-মেশানো কোহল এনেছিলো ইউরি; কমারোভস্কি আলুসেক্চ চিবোতে-চিবোতে তাতে চুমুক দিচ্ছে, ক্রমেই নেশা চ’ড়ে যাচ্ছে তার।

২

রাত ভারি হ'লো। যতোবারই সলতে সাফ ক'রে দেওয়া হলো, ততোবারই দপ্ ক'রে জ্বলে ওঠে বাতিটা, ঘর উজ্জ্বল দেখায়, আর তারপরেই আগুন ম'রে আসে, ফের ছায়া আসে ঘনিয়ে। ইউরির আর লারার ঘুম পাচ্ছে; তাদের ইচ্ছে করছে নিজেদের মধ্যে কথাবার্তা ব'লে নিয়ে শুয়ে পড়ে, কিন্তু কমারোভস্কি আর ওঠার নাম করে না। জানলার বাইরে ডিসেম্বরের কালো অন্ধকার আর ঘরের ভেতরকার ওককাঠের ভারি আলমারিটা যেমন তাদের ক্লান্ত ক'রে তুলছিলো, কমারোভস্কির উপস্থিতিটাও ঠিক তেমনি বিরক্তিকর।

তাদের লক্ষ্য না-ক'রে তাদের মাথার ওপর দিয়ে তাকিয়ে আছে কমারোভস্কি; দূরের দিকে নিবন্ধ তার চকচকে ভিজে চোখ, নেশা-লাগা আবছা গলা কখন থেকে শুধু জাবর কেটে চলেছে—অন্তহীন, ক্লাস্তিকর। এখন তার বাতিক হয়েছে দূর-এশিয়া, ইউরিকে আর লারাকে মঙ্গোলিয়ার রাজনৈতিক গুরুত্ব বোঝাচ্ছে সে; দু'জনের একজনেরও কোনো কৌতূহল নেই এ-বিষয়ে, কোন ফাঁকে কমারোভস্কি সেটা টেনে এনেছে তাও টের পায়নি তারা—আর সেইজন্যই আরো অর্থহীন মনে হচ্ছে সব কথা। কমারোভস্কি বলছিলো:

'সাইবেরিয়ায় যে কতো কিছু হ'তে পারে তার অন্ত নেই—সাথে কি নতুন আমেরিকা বলা হয়। রাশিয়ার ভাবী গৌরবের আতুড়ঘর হবে সেখানেই, তা-ই হবে আমাদের প্রগতির মাপকাঠি, ওতেই বোঝা যাবে কতোটা আমরা এগিয়েছি গণতন্ত্রের দিকে, পেয়েছি রাজনৈতিক ও অর্থনৈতিক স্বাধীন্য। আরো বিরাট সম্ভাবনা আছে বহির্মঙ্গোলিয়ার—আমাদের দূর-প্রাচীর প্রতিবেশী। কী জানো তোমরা তার কথা? নির্লঙ্কের মতো হাই তুলছো তোমরা, চোখ ঢুলে আসছে, কিন্তু তবু বলি—মঙ্গোলিয়া মানে হ'লো প্রায় দশ লক্ষ বর্গমাইল জোড়া জমি, আর অগণ্য খনিজ সম্পদ; একেবারে টাটকা সব জমি, তার দিকে লোভীর মতো তাকিয়ে আছে চীন, জাপান, আমেরিকা। রাশিয়ার স্বার্থকে জখম ক'রে সবাই চায় ওটা ছিনিয়ে নিতে—কিন্তু যখনই কথা উঠেছে ঐ সুদূর দেশ কোন প্রভাবমণ্ডলের অন্তর্ভূত, তখনই আমাদের প্রতিদ্বন্দ্বীরাও রাশিয়ার দাবি স্বীকার ক'রে নিয়েছে।

'মঙ্গোলিয়া পেছিয়ে আছে ধর্মের শাসনে, সামন্ততন্ত্রে; তার লামা আর "খুটখুট"দের ওপর প্রভাব খাটিয়ে তাকে শোষণ ক'রে নিচ্ছে চীন। জাপান মিতালি করেছে স্থানীয় যুবরাজদের সঙ্গে, যাদের বলা হয় "হোশুন"। লাল রাশিয়া আবার "হামজিল"দের মধ্যে বন্ধু পেয়েছে—বিস্কুদ্ধ মঙ্গোলীয় মেষপালকদের বিপ্লবী সংঘ সেটা। আর আমি খুশি হবে যদি স্বাধীন নির্বাচনে "ছকুলটায়ি"রা জিতে যায়। মঙ্গোলিয়ার সত্যি উন্নতি হবে তাহ'লে। আর তোমাদের পক্ষে আসল কথা এই যে সীমান্ত পেরিয়ে একবার মঙ্গোলিয়াতে পা দিলেই দেখতে পাবে সারা পৃথিবী তোমাদের পায়ের তলায় প'ড়ে আছে—একেবারে বাতাসের মতো স্বাধীন তোমরা।'

তার বাগবহুল বক্তৃতা লারার আর সহ্য হ'লো না। ক্লাস্তিতে, বিরক্তিতে প্রায় কান্না পেয়ে গেলো। শেষটায় তার দিকে হাত বাড়িয়ে দিয়ে, বিরুদ্ধভাব লুকোবার কোনো চেষ্টা না-ক'রে হঠাৎ ব'লে উঠলো:

'রাত অনেক হ'লো, আপনার যাবার সময় হয়েছে। ঘুম পেয়েছে আমার।'

'নিশ্চয়ই এতো রাত্রে আমাকে বাড়ি থেকে বের ক'রে দেবে না তোমরা? আতিথেয়তা আছে তো! পথ চিনে যেতে পারবো কিনা তা-ই বা কে জানে—একে অচেনা শহর, তার ওপর এই ঘুটঘুটে অন্ধকার।'

'এ-ভাবে ঠায় ব'সে না-থেকে আগেই তা ভাষা উচিত ছিলো আপনার। কেউ আপনাকে এতো রাত অবধি থাকতে বলেনি তো।'

‘অমন চোখা-চোখা কথা বলছে কেন আমাকে? আমার থাকার কোনো জায়গা আছে কিনা, তা পর্যন্ত তোমরা একবার জিজ্ঞেস করোনি।’

‘তা নিয়ে মোটেও মাথাব্যথা নেই আমার। নিজের দেখাশোনা নিজে আপনি ভালোই করতে পারেন। এখানে রাত কাটাবার নিয়ন্ত্রণ বাগাতে চেষ্টা করছেন তো? তাহলে জেনে রাখুন, আমরা কাটিয়াকে নিয়ে যে-ঘরে শুই, সেখানে কিছুতেই থাকতে দেবো না আপনাকে, আর অন্য ঘরগুলো সব ইদুরে ভর্তি।’

‘আমার তাতে অসুবিধে হবে না।’

‘সে আপনার অভিকৃতি।’

৩

‘তোমার হ’লো কী, লারা? রাতের পর রাত ঘুমোচ্ছে না, খাচ্ছে না কিছু, সারাদিন কেমন ভূতের মতো চেহারা করে ঘুরে বেড়াও। এতো কী ভাবো সব সময় বলো তো? যতো উদ্বেগই তোমার থাক না কেন, তাদের অমনভাবে মাথায় চ’ড়ে বসতে দিতে নেই।’

‘হাসপাতালের দরোয়ান ইজট আবার এসেছিলো জানো? একতলার খোপানির কাছে আসে সে, প্রেম করছে ওরা। একদিন আমার কাছে এসে এক খুশির খবর দিয়ে গেলো। “আপনার মিসেসটির তো হয়ে এলো এবার—একেবারে এখন-তখন অবস্থা।” আমি জিজ্ঞেস করলাম, “কী করে জানলে।”—“ঠিক জানি, ঠিক শুনেছি আমি, পেলিকান-এ বলাবলি হচ্ছে এ নিয়ে।” পেলিকান মানে যে ইসপলকোম’, তা বোধহয় ধরতে পেরেছে তুমি?’ দু’জনে একসঙ্গে হেসে উঠলো।

ইউবি বললে, ‘ঠিক বলেছে লোকটা, এখন-তখন অবস্থার মধ্যে আছি, এই বেলা অন্তর্ধান করা উচিত আমাদের। কিন্তু প্রশ্নটা হ’লো—যাই কোথায়? চুপি-চুপি স’রে পড়তে হবে আমাদের, তাই মস্কো যাবার কোনো কথাই ওঠে না—লোকের চোখে না-প’ড়ে তো আর মস্কোতে যাওয়ার ব্যবস্থা করা যাবে না। শোনো, লারা—তুমি প্রথমে যা বলেছিলে তা-ই করা যাক না। ভারিকিনোতেই যাই চলো, কিছুদিন গা-ঢাকা দিয়ে থাকি—অন্তত হস্তাখানেক বা দু’এক মাস। কী বলো।’

‘ভালো, খুব ভালো, অনেক ধন্যবাদ তোমাকে। ঈশ, কী যে ভালো লাগছে আমার। ভারিকিনোর কথা ভাবতে তোমার বিজ্ঞী লাগে, তা বুঝি। কিন্তু সেখানে তোমার বাড়িতে না-ই বা থাকলাম—ঐ সব শূন্য ঘর, মনের কষ্ট, অতীতের সঙ্গে তুলনা—এ তুমি সহিতে পারবে না, জানি। যা ভালোবাসি, যাকে পবিত্র ব’লে ভাবি, তার ওপর দিয়ে মড়িয়ে যাওয়ার মানে কী, তা কি আমি জানি না? অন্যের দুঃখের ওপর নিজের সুখ কি গ’ড়ে তোলা যায় কখনো? অতো বড়ো ত্যাগ আমার জন্য তোমাকে করতে দেবো না আমি—কিছুতেই না। কিন্তু যাকগে, সে-কথা উঠছে না আপাতত। তোমার বাড়িটার দশা এতো খারাপ যে, ঘরগুলোকে বাসযোগ্য করে তোলাই মুশকিল। আমি ভাবছিলাম মিকুলিৎসিনদের বাসার কথা।’

‘তোমার সব কথাই সত্যি। এতো বুদ্ধি-বিবেচনা তোমার—কতো আর ঋণী করবে আমাকে। কিন্তু রোসো, রোজ তোমাকে জিজ্ঞেস করবো ভাবি, রোজ ভুলে যাই। কমারোভস্কির খবর কী? সে কী এখনো আছে এখানে, না চ’লে গেছে? সেবার ঝগড়া করে তাকে বাড়ি থেকে বের করে দেওয়ার পর থেকে আর তার কোনো খবরই পাইনি।’

‘আমিও কিছু জানি না, চাইও না জানতে। ওকে দিয়ে তোমার আবার কী দরকার?’

‘এখন আমার মনে হচ্ছে যে আমরা দু’জনে একসঙ্গে ওর প্রস্তাবকে উড়িয়ে দিয়ে ভালো করিনি। আমাদের দু’জনের অবস্থা তো এক নয়। তোমার মেয়ে আছে, তার কথা ভাবতে হবে তোমাকে। আমার বিপদের অংশ নিতে তুমি চাইতে পারো, কিন্তু তা নেবার তোমার অধিকার নেই।

‘কিন্তু শোনো—ঐ ভারিকিনোর কথা। না আছে খাবার, না কোনো আশা-ভরসা—এই অবস্থায় শীতের মধ্যে ঐ জঙ্গলে যাওয়াকে পাগলামি ছাড়া আর কী বলে! কিন্তু তা-ই না-হয় হ’লো, পাগলামি ছাড়া আর-কোনো পথ যদি আমাদের না থাকে, তবে তা-ই হোক। আবার না-হয় দর্পচূর্ণ হবে আমাদের। সামডেভইয়াটভের কাছে ঘোড়া চেয়ে নেবো। বলবো ওকে—না, ওকে না, ওর অধীনে যে-সব লোক চোরাবাজারি কারবার চালায়, তাদের কাছে ধারে চেয়ে নেবো আলু আর ময়দা—এখনো হয়তো আমাদের বিশ্বাস ক’রে কিছু দেবে ওরা। বুঝিয়ে বলবো সামডেভইয়াটভকে—উপকার করার সুযোগ নিয়ে সে যেন এক্ষুনি দেখাশুনা করতে না আসে আমাদের সঙ্গে—অন্তত ততোদিন যেন অপেক্ষা করে, যতদিন ঘোড়াটা তার সত্যি দরকার না হয়। একটু একা থাকবো আমরা কয়েকটি দিন। চলো আমার প্রাণ, চলো। ভালো সময়ে ভালো গৃহিণী এক বছরে যতো জ্বালানি পোড়ায় তার চেয়েও বেশি আমরা এক সপ্তাহে উড়িয়ে দেবো!

‘পারি না, শান্তভাবে কথা বলতে পারছি না এখন—আমাকে তুমি ক্ষমা করো, লারা, আমি চাই না তোমার সঙ্গে আড়ম্বর ক’রে কথা বলতে, কিন্তু সত্যি তো আমাদের সামনে একটার বেশি দুটো রাস্তা আর খোলা নেই। যেমন ক’রেই বলো না কথাটা, দরজার বাইরে দাঁড়িয়ে আছে মৃত্যু, আঙুলে গোনা যায় যে-কটা দিন আর হাতে আছে। তা-ই যদি, তবে এসো, এরই মধ্য থেকে নিংড়ে নিই আমাদের সুখ, সার্থকতা। কোন কাজে লাগাবো এই দিনগুলিকে? জীবনকে বিদায় বলি এতে’, শেষবারের মতো একা থাকি দু’জনে—এর পরে তো আছে বিচ্ছেদ। বিদায়—যা-কিছু ভবেছি, ভালোবেসেছি, যে-স্বপ্ন ছিলো মনের মধ্যে এই জীবনের, যা আশা করেছি, শিক্ষা পেয়েছি বিবেকের কাছে—সেই সব-কিছুকে বিদায় বলবো এবার, বিদায় বলবো পরস্পরকে। যে-গোপন কথা শুধু রাগেই বলা যায়, আবার তা বলবো আমরা পরস্পরকে, পূর্বসাগরের নামের মতো বড়ো আর শাস্তিতে ভরা সেই কথা। এর কি কোনো মানে নেই যে তুমি আমার জীবনের শেষ প্রান্তে দাঁড়িয়ে আছো—লারা, আমার সর্বস্ব গোপন তুমি, আমার নিষিদ্ধ দেবদূত—যুদ্ধে বিপ্লবে ছিন্নভিন্ন এই আকাশের তলায়—সেই তুমি, যে প্রথম আমার ছেলেবেলার শান্তির আকাশে দেখা দিয়েছিলে।

‘সেই রাতে—তোমার পরনে ছিলো কফিরঙের স্কুলের ইউনিফর্ম—হোটেলের ঘরে দরজার ছায়ায় তুমি দাঁড়িয়ে ছিলে—আজ তুমি যা হয়েছো সেদিনও ঠিক তা-ই ছিলে তুমি—এমনি তোলপাড়-তোলা লাভগ্যময়ী।

‘সেই সম্মোহন, যার বীজ সেদিন তুমি বপন করেছিলে আমার মনে, পরে তাকে কোনো নাম দিতে আমি চেষ্টা করেছি। সেই ধীরে-ধীরে নিবে-যাওয়া আলো, মিলিয়ে-যাওয়া শব্দ—তা ছড়িয়ে পড়েছিলো আমার সারা সত্তায়। তার পর থেকে তোমার মধ্য দিয়েই আমি জগৎটাকে দেখেছি, বুঝেছি।

‘যখন তুমি—স্কুলের পোশাক পরা এক ছায়ার মতো সেই ঘরের অন্য সব ছায়ার মধ্য থেকে উঠে এলে, আমি—ছেলেমানুষ, তোমার কথা কিছুই জানি না—আমি তক্ষুনি সব বুঝে নিলাম, সাড়া দিয়ে উঠলাম প্রচণ্ড যত্ননায়; এই ছোট রোগা মেয়েটির মধ্যে—বিদ্যুতের তরঙ্গের মতো—যেন নিখিলনারীড় প্রবিল্ট হ’য়ে আছে। যদি শুধুমাত্র আঙুলের ডগা দিয়েও তোমাকে স্পর্শ করতাম তখন, তাহ’লে এক ফুলকি জ্বলে উঠে সারা ঘর আলো ক’রে দিতো—হয় আমার মৃত্যু হতো তখনই, নয়তো চুষকের স্রোতের মতো, আমার সমস্ত জীবন ভ’রে দিতো

এক বেদনাময় দুঃখে আর আকাঙ্ক্ষায়। কেঁদেও ছিলাম, জ্ব'লে উঠেছিলাম আগুনের মতো, তারই মতো। মারাত্মক দুঃখ হয়েছিলো আমার নিজের জন্য—ছেলেমানুষ আমি!—আরো বেশি তোমার জন্য—তুমি বালিকা মাত্র! আমার সমস্ত বিস্মিত সত্তা প্রস্তুত করেছিলাম : যদি ভালোবাসার শক্তি জেগে উঠলেই এই যন্ত্রণা, তাহ'লে নারী হবার যন্ত্রণা না জানি আরো কতো বেশি—কেননা নারী এই শক্তি, এই শক্তির উৎসস্থল!

‘এই তো। এতোদিনে বললাম তোমাকে। আমি যে পাগল হ'য়ে যাইনি, এই যথেষ্ট। এরই মধ্যে আমি আছি—সর্বস্ব আছে আমার।’

রাত-কাপড় না প'রেই, বিছানার ধার ঘেঁসে লারা শুয়ে ছিলো। অসুস্থ বোধ করছিলো সে, কুকড়ে শুয়ে ছিলো গায়ে শাল জড়িয়ে। ইউরি ব'সে ছিলো চেয়ারে তার পাশে, অনেক থেমে-থেমে আস্তে-আস্তে কথা বলছিলো। মাঝে-মাঝে কনুইয়ে ভর দিয়ে উঠে বসছিলো লারা, খুৎনিতে হাত ঠেকিয়ে হাঁ ক'রে দেখছিলো ইউরিকে, আবার কখনো ইউরির কাঁধে মাথা গুঁজে নিঃশব্দে কাঁদছিলো আনন্দে, তার চোখ দিয়ে যে জল পড়ছে তা টেরও পাচ্ছিলো না। শেষ পর্যন্ত শুয়ে-শুয়েই হাত বাড়িয়ে দিলো সে, ইউরিকে জড়িয়ে ধ'রে ভরপুর সুখে নিচু গলায় ব'লে উঠলো:

‘ইউরি, মগি আমার, কী বুদ্ধি তোমার, সব জানো তুমি! ইউরি, আমার সোনামগি, আমার সম্বল, আমার আশ্রয়—সবই তো তুমি;—ভগবান আমার এই পাপবাকা ক্ষমা করুন! কী ভালো লাগছে, কী আনন্দ আমার! তা-ই চলো, আমার প্রাণ, চলো ভারিকিনোতে। সেখানে গিয়ে অন্য একটা কথা বলবো তোমাকে।’

লারা ভাবছে সে গর্ভিণী হয়েছে, কিন্তু ইউরির মতে তার এই ধারণা খুব সম্ভব ভুল। ‘আমি জানি, কী কথা,’ বললো ইউরি।

৪

শীতের এক ধূসর ভাৱে শহর ছাড়লো তারা। ছুটির দিন ছিলো না সেটা, লোকেরা কাজকর্মে বেরিয়েছে। চেনাশোনা অনেককেই তারা রাস্তায় দেখতে পেলো পাহাড়ি চৌমাথা গুলোরমোড়ে; অনেক বাড়িতে কুয়ো নেই; কতোগুলো পুরোনো কল আছে শুধু, মেয়েরা সেখানে জল নিতে এসে পাশে মাটিতে বাক আর বালতি রেখে লাইন দিয়ে দাঁড়িয়ে আছে। ইউরি সাবধানে তাদের পাশ কাটিয়ে গেলো, সামলে নিতে হ'লো সামডেভইয়াটভের টগবগে ধোয়াটে-হলুদ রঙের ঘোড়াটাকে। চড়াইয়ের পথে জল জ'মে বরফ হয়েছে, তার ওপর দিয়ে চলতে-চলতে বার-বার হড়কে যাচ্ছে স্নেজগাড়িটা, মাঝে-মাঝে ল্যাম্পপোস্টে ঠোঁকর খাচ্ছে।

সামডেভইয়াটভ হেঁটে আসছিলো উল্টো দিক থেকে; পুরো কদমে ঘোড়া ছুটিয়ে তাকে পাশ কাটিয়ে চ'লে গেলো তারা—একবার পেছন ফিরে তাকিয়ে দেখলো না, সামডেভইয়াটভ তাদের বা তার ঘোড়াটাকে চিনতে পারলো কিনা, বা তাদের কিছু বলতে চায় কিনা সে। একটু পরে তারা কমারোভস্কিকে পাশ কাটিয়ে গেলো—এবারেও কোনো সম্ভাষণ করলে না।

প্রাশা টুটসেভা রাস্তার ওপার থেকে চেঁচিয়ে বললে:

‘কতো মিথোই না বলে লোকে! শুনলাম তোমরা কাল চ'লে গেছো। কী? আঙ্গুর গোঁজে চলেছো?’ উত্তরে তারা যা বললে তা সে শুনতে পাচ্ছে না, ইঙ্গিতে এই কথা জানিয়ে হাত নেড়ে বিদায় জানালো সে।

শুধু সিমার জন্যই একবার আস্তে চলতে হ'লো তাদের; জায়গাটা বেখান্নারকম ঢালু ব'লে থামতে অসুবিধে হ'লো, ঘোড়াটা অস্থির হ'য়ে উঠলো লাগাম টেনে-টেনে। আপাদমস্তক অনেকগুলো শাল জড়িয়ে নিয়েছিলো ব'লে সিমাকে দেখাচ্ছিলো তক্তার মতো শক্ত; থপথপ

ক'রে রাস্তার মাঝখানে এসে তাদের বিদায় জানালো সে, শুভকামনা জানালো।

‘ফিরে এলে অনেক কথা হবে,’ সিমা বললো ইউরিকে।

অবশেষে শহরের সীমা ছাড়ালো তারা। যদিও ইউরি আগেও শীতকালে গেছে এই পথ দিয়ে, তবু শুধু গ্রীষ্মের ছবিটাই মনে ছিলো তার—এখন প্রায় চিনতেই পারলো না।

স্নেজের সামনের দিকে খড়ের গাদার মধ্যে তারা ঢুকিয়ে দিয়েছে খাবারের থলে আর অন্য সব পোটিলা-পুটলি, দড়ি দিয়ে বাঁধা আছে সেগুলো। ইউরি স্নেজ চালাচ্ছিলো গাড়ির মেঝেতে হাঁটু ভেঙে টান হ'য়ে ব'সে—যেমন ক'রে এখানকার চাবিরা চালায়—আর নয়তো সামভেডইয়াটভের পশমি জুতোয় ঢোকানো পা দুটোকে সামনে ঝুলিয়ে নিয়ে ব'সে।

বিকলে, সূর্যাস্তের অনেক আগেই ফুরিয়ে এলো দিন—শীতকালে যেমনটা হ'য়ে থাকে। ইউরির হাতে নির্দয় চাবুক খেয়ে, ঘোড়া ছুটে চললো তীরের বেগে। খড়ে-পড়া জাহাজের মতো স্নেজগাড়িটা ঝাঁকুনি খেতে লাগলো অসমতল রাস্তায়। ফার কোটের মধ্যে এমনভাবে কঁকড়ে আছে লারা আর কাটিয়া যে তারা প্রায় নড়তে পারছে না। মোড় নেবার দু'লুনিতে, খানা-খন্দের ঠোঁকরে তারা এদিক-ওদিক গড়াতে-গড়াতে বস্তার মতো খড়ের গাদায় ঢুকে যাচ্ছে; চেষ্টা নিয়ে হেসে উঠছে তারা ফুর্তিতে। একবার ইউরি মজা ক'রে গাড়িটাকে একেবারে বরফ-জমা প্রান্তে নিয়ে কাৎ ক'রে উশ্টিয়ে ফেলে দিলে ওদের দু'জনকে। ঘোড়াটা কয়েক গজ টেনে নিয়ে গেলো গাড়িটাকে, লাগাম টেনে থামিয়ে গাড়ি সোজা করলো ইউরি; তক্ষুনি লারা আর কাটিয়া গাড়িতে উঠে ব'সে খুব ধমক দিলে তাকে, পিঠে খোঁচা দিয়ে হেসে উঠলো।

‘পাটিজানরা আমাকে কোনখানে ধরেছিলো, দেখাবো তোমাদের,’ শহর অনেক পেছনে ফেলে আসার পর ইউরি বললে তাদের। কিন্তু এ-কথাটা সে রাখতে পারলো না। শীতে রিস্ত হ'য়ে গেছে বন, চাবদিককার স্তব্ধতা আর শূন্যতা জায়গাটাকে এমন বদলে দিয়েছে যে চেনা যায় না। ‘এই যে, এখানে,’ মরো আর ভেটচিনকনের প্রথম সাইনবোর্ডটার কাছে এসে ভুল ক'রে চেষ্টা করে উঠলো সে। এই প্রথম সাইনবোর্ডটা ছিলো মাঠের মধ্যে; ইউরি ভুল ক'রে সোঁটাকে বনের ভেতরকার সাইনবোর্ড ব'লে ভাবলে—তারই কাছে বন্দী হয়েছিলো সে। রাস্তা যেখানে সাকমার দিকে বেকে গেছে, সেই মোড়ে ঝোপের ধারে আগের জায়গাতেই দ্বিতীয় সাইনবোর্ডটি দাঁড়িয়ে ছিলো; তার পাশ দিয়েই টগবগিয়ে ছুটে গেলো তাদের ঘোড়া, কিন্তু ফোঁটা-ফোঁটা বরফের জন্য কালো আর রূপালি হ'য়ে আছে অরণ্য, বলমলে ঝালরের মতো চোখ-ধাধানো—তাব মধ্যে ঐ সাইনবোর্ডটাকে চেনাই গেলো না।

ভারিকিনোতে যখন পৌঁছলো তখন সন্ধ্যা। পথে প্রথমেই জিভাগোদের বাড়ি পড়ে, তার সামনে এসে থামলো তারা; ডাকাতির মতো দ্রুত ঢুকে পড়লো ভেতরে, এখনই অন্ধকার হ'য়ে যাবে, তাই এতো তাড়া। কিন্তু ঘরে এব মধোই অন্ধকার হ'য়ে গেছে, যতো ভাঙচুরের চিহ্ন আর যতো ন্যাকারজনক নোংরা সেখানে ছড়িয়ে আছে, ইউরি তার অর্ধেকও তাই দেখতে পেলো না। যে-সব আসবাবের কথা তার মনে ছিলো, তার কিছুকিছু চোখে পড়লো অবশ্য, ধ্বংসক্রিয়া সম্পূর্ণ করতে পারে এমন কেউ ছিলো না ভারিকিনোতে, কোনো ব্যবহার-করা কাপড়-চোপড় বা অন্য কিছু চোখে পড়লো না তার, কিন্তু টোনিয়ারা যখন এখান থেকে চ'লে যায়, তখন তো সে ছিলো না এখানে, কেমন ক'রে জানবে তারা কতোটুকু সন্ধ্যা নিয়ে গেছে। এদিকে লারা বলছিলো:

‘চটপট গুছিয়ে নিতে হবে আমাদের। এক্ষুনি অন্ধকার হয়ে যাবে। মোটে সময় নেই দাঁড়িয়ে-দাঁড়িয়ে ভাববার। এখানেই যদি আমাদের থাকতে হয় তো ঘোড়াটাকে গোলাঘরে নিয়ে যেতে হবে, খাবারগুলো পোটিকোতে থাক, আমি ততক্ষণে ঘরটা ঠিকঠাক ক'রে নিচ্ছি। তবে আমার কিন্তু এখানে থাকার মত নেই। আগেই এ নিয়ে কথা হয়েছে আমাদের। তোমার কষ্ট হবে, আর সেইজন্যে আমারও। ঘরটা কী ছিলো আগে? তোমার শোবার ঘর? না, বাচ্চাদের?

ঐ তো তোমার ছেলের খাট। কাটিয়ার পক্ষে বড্ড ছোটো হবে এটা। ওদিকে আবার জানলাগুলো সব আশ্তই আছে, দেয়ালে সীলিঙেও কোনো ফাটল নেই, আর চুল্লিটাও দেখছি আশ্চর্যরকম আশ্ত আছে। গেলো বার এসেও চুল্লিটার আমি তারিফ করেছিলাম। কী বলো, থাকবে এখানে? তুমি চাইলে আমার অমতে এসে যায় না—কোট খুলে একুনি কাজে লেগে যাচ্ছি। চুল্লিটাতে আগুন ধরানো হ'লো এক নম্বর কাজ, জ্বালানি, আরো জ্বালানি—অন্তত তিন দিন ধ'রে সারা দিনরাত জ্বালিয়ে রাখতে হবে তো। কিন্তু তোমার হ'লো কী, ইউরি? একটাও কথা বলছো না?

‘এই—না কিছু হয়নি, ঠিক আছি আমি।...না, সত্যি, মিকুলিৎসিনদের বাসাটাই বোধহয় ভালো হবে এর চাইতে।’

আবার গাড়িতে উঠলো তারা।

৫

মিকুলিৎসিনদের দরজা তালাবদ্ধ। মুচড়ে-মুচড়ে দরজা খুললো ইউরি, তালার স্প্রিং ভেঙে কাঠের টুকরো ছিটকে পড়লো। এখানেও তেমনি ব্যস্তসমস্ত হ'য়ে ঢুকে পড়লো তারা, জামাকাপড় না-খুলেই, টুপি, কোট আর পশমের জুতো প'রেই সোজা গিয়ে ঢুকলো অন্দরে।

বাড়ির কোনো-কোনো অংশের পরিচ্ছন্নতা দেখে প্রথমেই তাদের তাক লেগে গেলো—বিশেষ ক'রে মিকুলিৎসিনের পড়ার ঘরটা। নিশ্চয়ই সেদিন পর্যন্ত এখানে কেউ থেকে গেছে, কিন্তু কে সে? মিকুলিৎসিনরা? কিন্তু তাই যদি হয় তারা গেলো কোথায়, আর কেনই বা চাষি না-দিয়ে দরজায় তালাবদ্ধ ক'রে গেলো? তাছাড়া, মিকুলিৎসিনরা যদি অনেকদিন ধ'রে এখানেই থাকে, তাহ'লে—শুধু কয়েকটা কেন, সবগুলো ঘরই কি পরিষ্কার থাকতো না? অবস্থাটা এক অজ্ঞাত আগন্তকের আভাস দিচ্ছে, কিন্তু কে হ'তে পারে? ইউরি বা লারা কেউই এই রহস্য নিয়ে উদ্বিগ্ন হ'লো না, তার সমাধানের জন্যও মাথা ঘামালো না তারা। অর্ধেক-লুট-করা বাড়ি অনেক দেখা যায় আজকাল আর পলাতকদের সংখ্যাও প্রচুর। ‘কোনো শাদা অফিসার পালিয়ে বেড়াচ্ছে আরকি,’ পরস্পরকে বললো তারা। ‘যদি সে ফিরে আসে তো তার সঙ্গে একটা বোঝাপড়া ক'রে নেওয়া যাবে। এতো বড়ো বাড়ি—কারোরই অকুলান হবে না।’

যেমন আগে একবার দাঁড়িয়েছিলো, তেমনি এবারেও পড়ার ঘরটির সামনে মস্তমুঞ্ছের মতো দাঁড়ালো ইউরি—এমন প্রশস্ত সেই ঘর, এমন সংবৃত আরামের ব্যবস্থা সেই জানলার ধারের টেবিলটাতে—কতো স্বাচ্ছন্দ্য এখানে, ধৈর্যময় ফলগ্রসূ কোনো কাজের পক্ষে কী গভীরভাবে অনুকূল।

উঠানে অনেকগুলো আলাদা ঘর, গোলাঘরেব গায়ে লাগানো আস্তাবল, কিন্তু সেগুলো সবই তালাবদ্ধ। ইউরি আর তালাভাঙার চেষ্টা করলে না—হয়তো সেগুলো ব্যবহারযোগ্য নেই আর। ঘোড়াটা গোলাঘরেই রাত কাটাতে পারবে, সেটার দরজা খোলা কঠিন হ'লো না। ঘোড়াটার জিন-লাগাম খুলে ফেলা হ'লো—জিরিয়ে নিক বেচারি—ইউরি তাকে কুয়ো থেকে জল এনে দিলে। স্নেজ-গাড়িতে খড় ছিলো ঘোড়ার জন্য, কিন্তু দেখা গেলো তাদের পায়ের চাপে তা নষ্ট হ'য়ে গেছে। কিন্তু ভাগ্য ভালো—গোলাঘরের চিলেকোঠায় খড় পাওল গেলো খানিকটা।

জামাকাপড় না-খুলেই শুয়ে পড়লো তারা, ফার-কোটগুলোকে কম্বলের মতো জড়িয়ে নিলে, বাইরে সারাদিন ছুটোছুটি খেলাধুলোর পরে ছোটোরা যেমন ঘুমোয়, তেমনি গ্যাৎ গভীর, উপভোগ্য ঘুমের মধ্যে তারা তলিয়ে গেলো।

জঙ্গে ওঠার মূর্ত থেকেই ইউরি টেবিলটার দিকে তাকাতে লাগলো ঘন-ঘন—জানলার ধার থেকে তাকে লুক্ক করছে টেবিলটা। কাগজ-কলমের জন্য তার আঙুল যেন চুলবুল করছে। কিন্তু সজ্জের আগে লিখতে বসবে না সে, লারা কাটিয়া শুয়ে না-পড়া পর্যন্ত অপেক্ষা করবে। ততোকণ তার হাতেও কাজ থাকবে, অন্ততপক্ষে দুটো ঘর বাসযোগ্য ক'রে তুলতে হ'লে তাও তো কম কথা নয়।

সন্ধ্যার জন্য কেন এই অধীর প্রতীক্ষা ইউরির? না, জরুরি কোনো কাজ নেই; শুধু লেখার ইচ্ছে তাকে পেয়ে বসেছে।

কিছু তাকে লিখতেই হবে। কয়েকটা পুরোনো ভাবনা লেখা হয়নি—সেগুলোকে গুছিয়ে নিয়েই আরম্ভ করা যাক। পরে হয়তো নতুন কিছু হবে—আরো সার্থক কিছু—যদি অবশ্য লারাকে নিয়ে থেকে যেতে পারে এখানে।

‘ব্যস্ত? কী করছো?’

‘কাঠ দিচ্ছি চুল্লিতে। কী চাই?’

‘কাপড় ধোবার জন্য একটা টব দরকার।’

‘এ-ভাবে যদি ঘর গরম করি তাহ'লে কাঠ কিন্তু শিগগিরই ফুরোবে। পুরোনো কাঠ রাখার ঘরে দেখে আসবো একবার, কিছু হয়তো থেকেও যেতে পারে সেখানে। যদি থাকে তো নিয়ে আসবো। কাল করবো এটা। টব চাই? কোথায় যেন দেখেছি একটা, নিশ্চয়ই দেখেছি, কিন্তু কোথায় তা কিছুতেই মনে করতে পারছি না।’

‘দেখেছি আমিও, কিন্তু আমারও মনে পড়ছে না কোথায়। নিশ্চয়ই এমন কোথাও, যেখানে টব থাকার কথা নয়, সেইজন্যেই মনে পড়ছে না কারো। তা যাকগে, ভেবো না। ঘর ধোয়ার জন্য জল গরম করছি আমি। ঘর ধুয়ে যা বাকি থাকবে তা দিয়ে আমার আর কাটিয়ার কাপড়-চোপড় কেচে নেবো। তোমারগুলোও দিয়ে দিতে পারো। সঙ্গেবেলা মোটামুটি গোছগাছ ক'রে নিয়ে শোবার আগে স্নান করা যাবে।’

‘ভালো বলেছো। এনে দিচ্ছি আমার কাপড়-চোপড়। তোমার কথামতো ভারি আসবাবগুলো দেয়াল থেকে সরিয়ে নিয়েছি।’

‘ঠিক আছে। টব যখন পাওয়াই গেলো না, তখন বেসিনেই কাপড় কেচে নেবো। বেসিনটাও চিটচিটে হ'য়ে আছে, গামলাটা মেজে নিতে হবে।’

‘আলমারিগুলো ঝুঞ্জে দেখতে হবে—আগে চুল্লিটা ভালো ক'রে ধরুক। দেরাজে ডেস্কে আরো অনেক জিনিস পাচ্ছি আমি—সাবান, দেশলাই, কাগজ, পেন্সিল, কালি, কলম। টেবিলের বাতিটায় অর্ধেক-মতো প্যারافিন আছে। মিকুলিংসিনদের প্যারافিন ছিলো না কিন্তু—ঠিক জানি আমি—অন্য কেউ এনেছে।’

‘কী ভাগ্য! সেই রহস্যময় লোকটির কাজ আরকি। ঠিক যেন জুল ভের্নের বই থেকে উঠে এসেছে। এই দ্যাখো, আবার আমরা গল্প করতে লেগেছি, এদিকে জল ফুটে গেছে।’

হুড়োহুড়ি ক'রে এ-ঘর থেকে ও-ঘরে ছুটোছুটি করতে লাগলো দু'জনে—হাত কখনো খালি নেই, চলতে-চলতে কখনো ঠুকে যাচ্ছে এ ওর গায়ে, কখনো বা কাটিয়ার ওপর ছমড়ি খেয়ে পড়ছে। কাটিয়াও যেন তাদের পায়ে-পায়ে আছে সব সময়, কিছু করার নেই বেচারার, ধমক খেয়ে হাঁড়িমুখ ক'রে ব'সে আছে। ঠাণ্ডায় কাঁপছে কাটিয়া, বিব্রী শীত তার ভালো লাগছে না।

‘হতভাগ্য এই শিশুরা আজকাল,’ মনে-মনে ভাবলো ইউরি, ‘এই বেদের মতো জীবনে কষ্ট তো ওদেরই, আমাদের সঙ্গে-সঙ্গে ওরাও বাউণ্ডলে হ'লো।’

মুখে বললো:

‘কী? হয়েছে কী? শীত করছে? বাজে কথা!—চুল্লিতে গনগনে আগুন!’

‘চুল্লিটার হয়তো শীত করছে না, কিন্তু আমার করছে।’

‘তাই’লে আর কী করা যায়? সঙ্গে অবধি সবুর করো, বিরাট আশুন ছেলে দেবো তখন, আর শুনলে তো, মা তোমাকে গরম জলে নাইয়েও দেবেন! এখন একটু খেলা করো তো লক্ষ্মী—এই নাও, ধরো।’ ঠাণ্ডা ডাঁড়ার ঘর থেকে লিভেরিয়ুসের সব পুরোনো খেলনা বের করে এনে, ইউরি সেগুলো নামিয়ে দিলো মেঝেতে—কোনোটা আস্ত, কোনোটা ভাঙা, রেলগাড়ি, এঞ্জিন, খেলনা-বাড়ির সরঞ্জাম, গুটিখেলার চৌখুপি-কাটা ছক—তার খোপে-খোপে ছবি, সংখ্যা, আরো কত কী।

‘আপনি ভেবেছেন কী, ইউরি আন্দ্রেইয়েভিচ!’ বড়োদের ধরনে প্রতিবাদ জানালো কাটিয়া। ‘এগুলো যে আমার নয়। তাছাড়া আমি ছোটো আছি নাকি যে বাচ্চাদের খেলা খেলবো!’

কিন্তু পরমুহুর্তেই কাটিয়া আরাম করে বসে পড়লো কার্পেটের মধ্যখানে, সবগুলো খেলনা মিলিয়ে বাড়ি তৈরি করে ফেললো নিনার জন্য। নিনা তার পুতুল, শহর থেকে সঙ্গে করে সে নিয়ে এসেছে। যে-সব বাড়িতে কাটিয়া তার জীবনের অধিকাংশ কাটিয়েছে—অস্থায়ী, অন্যদের বাড়ি—তার চেয়ে এই খেলনা-বাড়ি অনেক ভালো হ’লো, ঢের বেশি গোছালো।

রান্নাঘর থেকে কাটিয়াকে লক্ষ্য করলো লারা। ‘দ্যাখো একবার, জন্ম থেকেই মেয়েদের মন ঘর বাঁধার দিকে! বাড়ি, শৃঙ্খলা—এ-সবের জন্য মানুষের ইচ্ছেটাকে কিছুতেই মেয়ে ফেলা যায় না। শিশুরাই ভালো, সত্যকে তারা ভয় করে না—কিন্তু আমাদের শুধু ভয় পাচ্ছে কেউ আমাদের সেকলে ভাবে—আর সেই ভয়ে তা-ই আমরা নষ্ট করি যা আমাদের সবচেয়ে শ্রিয়, প্রশংসা করি জঘন্যের, আর যার কিছুই বুঝি না তাতেও মাথা নেড়ে সায় দিই।’

‘এই নাও টব,’ অঙ্ককার পোটকো থেকে আসতে-আসতে ইউরি বললো, ‘ঠিক বলেছিলে—একেকবারে বেজায়গার ছিলো, সীলিঙের কাটলের তলায় রাখা ছিলো এটা। বোধহয় শীতের আগে থেকেই ছিলো ওখানে।’

৭

সঙ্গে যে রসদ নিয়ে এসেছিলো, তাই দিয়েই ডিনার তৈরি করলো লারা, যা রাখলো তা তিনদিনের পক্ষেও যথেষ্ট—আলুর সুপ, রোস্ট-মটনের সঙ্গে আলু—অকল্পনীয় ভোজ একেবারে। কাটিয়া বুক ছাড়িয়ে গলা পর্যন্ত খেলো, খিলখিল করে হাসলো থেকে-থেকে, দুটুমি ক্রমেই বেড়ে চললো তার, তারপর টাইটবুর ভরা পেট নিয়ে মার শাল জড়িয়ে কঁকড়ে ঘুমিয়ে পড়লো সোফায়।

উনুনের ঠাণ্ডে তেতে উঠেছে লারা, ক্লান্তও খুব, প্রায় মেয়ের মতোই ঘুম পেয়েছে তার। রান্না ভালো হওয়ায় খুব খুশি সে। বাসন ধোবার জন্য তাড়া না-করে বসে একটু জিরিয়ে নিতে লাগলো। যখন বুঝলো কাটিয়া ঠিকই ঘুমিয়ে পড়েছে, তখন হাতে মাথা রেখে এলিয়ে বসলো লারা; বললো:

‘এ-সব ঘরকন্নার খাটুনি খাটতে খুবই ভালো লাগতো আমার, যদি জানতাম এর কোনো মূল্য আছে, এ-সবের মধ্য দিয়ে পৌঁছনো যাবে কোনোখানে। আমরা দু’জনে একসঙ্গে থাকবো ব’লেই এখানে এসেছি—এই কথাটা বার-বার আমাদের মনে করিয়ে দিয়ে, ইউরি। মম্বতো—এই আমরা যা করছি—সত্যি যদি ভেবে দেখা যায়—এর কী অর্থ বলো তো, কী করছি আমরা? পরের বাড়িতে চড়াও হয়েছি আমরা, তালা ভেঙে ঢুকে দিব্যি আরাম করছি, আর এখন এই পাগলের মতো আমাদের ছটফটানি—যাতে ভুলে থাকতে পারি যে একে বাঁচা বলে না—এটা বাস্তব নয়, নাটক মাত্র, বাচ্চাদের মতো “মনে করো” খেলা। বেড়ালেরও হাসি পাবে আমাদের কাণ্ড দেখে।’

‘কিন্তু মণি, তুমিই তো জেদ করেছিলে আসার জন্য। আমি যে সহজে রাজি হইনি তা তো মনে আছে।’

‘ঠিক কথা, আমিই জেদ করেছিলাম। তা আমি অস্বীকার করছি না। তাই এখন আমারই দোষ বুঝি। ভাবনা-চিন্তা দ্বিধা—ও-সব তোমাকেই মানায়, আমাকে সোজা পথে চলতে হয়, অবিচল থাকতে হয় সব অবস্থায়। ঘরে এলে তুমি, তোমার ছেলের দোলনা দেখে প্রায় মুহূর্ত গলে। ও-সব তোমারই অধিকার, কিন্তু আমার কোনো উদ্বেগ থাকতে নেই, কাটিয়ার কথা ভাবতে নেই, ভবিষ্যৎ বিষয়ে চিন্তাও আমাকে মানায় না। যেহেতু তোমাকে ভালোবাসি, তাই অন্য সব আমাকে ত্যাগ করতে হবে।’

‘লারা লক্ষ্মী মেয়ে, তুমি অমন ভেঙে পোড়ো না। মনে জোর আনো। ভাববার চেষ্টা করো একবার। এখনো সময় নেই তা নয়, এখনো তোমার ফিরে যাবার সময় আছে। আরো ভালোভাবে কমারোভস্কির প্রস্তাবটা ভেবে দেখতে আমিই তোমাকে বলেছিলাম। ঘোড়া আছে আমাদের, কালই আমরা ইউরিয়্যাটিনে ফিরে যেতে পারি। এখনো কমারোভস্কি আছে সেখানে—দেখলাম তো তাকে—যদিও সে আমাদের দেখেছিলো ব’লে মনে হয় না। আমি জানি, এখনো তাকে খুঁজে বের করতে পারবো আমরা।’

‘আমি কিছু বলবার আগেই তুমি রেগে উঠেছো। কিন্তু বলো তো, কী এমন দোষ করলাম আমি? গা-ঢাকা দেবার জন্যই তো এখানে আসা—নয়তো ইউরিয়্যাটিনে থাকলেই হ’তো। যদি সত্যি বাচতে হয় তো ভেবে-চিন্তে একটা উপায় বের করতে হবে, আর কমারোভস্কি—যা-ই বলো না, সেই রকমই একটা উপায়ের কথা বলছিলো। মানুষটা জঘন্য—কিন্তু কাজের লোক, বিস্তর ঝোঁজ-খবর রাখে। বোকা নয় লোকটা। অন্য যে-কোনো জায়গার চাইতে এখানে আমাদের বিপদ বরং বেশি—ঢের বেশি। ভাবো একবার।—মস্ত ধু-ধু হাওয়ায় ওড়ানো মাঠের মধ্যে একেবারে একা। রাত্রে বরফ-চাপা পড়লে সকালে বরফ খুঁড়ে বেরিয়ে আসতেও পারবো না আমরা। বা ধরো, এই যে পরি-মা আছেন আমাদের—রহস্যময় এই আগন্তুকটি, যদি শেষ পর্যন্ত তিনি দস্যু হ’য়ে দেখা দিয়ে আমাদের গলা কাটেন! নিদেন একটা বন্দুকও কি আছে তোমার? আছে ব’লে তো মনে হয় না। নেই তো? তবেই দ্যাখো! আমার সব ভয় শুধু তোমার এই নির্ভাবনার জন্য, আর তোমার সঙ্গে থেকে-থেকে আমিও কেমন নিশ্চিন্ত হ’য়ে যাচ্ছি। সোজা পথে আর ভাবতেই পারি না।’

‘কিন্তু কী চাও তুমি? কী করতে বলো আমাকে?’

‘কী যে বলি তা কি নিজেই জানি। আমাকে তুমি সব সময় শাসন করো, ইউরি। বার-বার শুধু এটাই আমাকে মনে করিয়ে দিয়ে যে আমি ভালোবেসে তোমার দাসী হয়েছি— চিন্তা করা, তর্ক করা, ও-সব আর আমার জন্য নয়। তাহ’লে তোমায় খুলে বলি আমি কী ভাবছি। তোমার টোনিয়া আর আমার পাশা—ওরা দু’জনেই আমাদের চেয়ে হাজারগুণ ভালো, কিন্তু সেটা কোনো কথা নয় এখন। কথাটা হচ্ছে যে ভালোবাসার দানও অন্য যে-কোনো দানেরই মতো; তা যতো বড়োই হোক, তার প্রকাশের জন্য বিশেষ একটি আদর্শবাদের প্রয়োজন হয়। তুমি আর আমি—আমরা যেন স্বর্গে ভালোবাসতে শিখে পৃথিবীতে নেমে এসেছি—যেন কতোটুকু আমরা শিখতে পেরেছি, এখন তারই পরীক্ষা চলছে। ইউরি, এক পরম মিলনের মধ্যে এক হয়েছি আমরা—তার সীমা নেই, পরিমাণ নেই, সব সমান দামি সেখানে, সব আনন্দময়, সব আশ্চর্য পরিণত হয়েছে। কিন্তু এই উদ্দাম ভালোবাসা—যা প্রতি মুহূর্তে প্রতীক্ষা করছে আমাদের—তার মধ্যে একটা আছে নিবিড় অংশ, অব্যর্থ শিশুর মতো বর্বর। এক স্বচ্ছাচারী ধ্বংসের শক্তি যেন তা, সাসোরিক শক্তির শত্রু। যদি তাকে ভয় না করি, অবিশ্বাস না করি, তাহ’লে আমার কর্তব্যে ক্রটি হবে।’

চোখের জল চাপতে-চাপতে ইউরির গলা জড়িয়ে ধরলো লারা।

‘বুঝছো তো,’ আবার বলতে লাগলো লারা, ‘দু’জনের এক অবস্থা নয় আমাদের। তোমাকে পাখা দেওয়া হয়েছে মেঘের ওপর দিয়ে উড়ে চলার জন্য, কিন্তু আমি মেয়ে, মাটির কাছাকাছি থেকে সম্ভানকে আশ্রয় দেবো আমি—আমার ডানার তা ছাড়া আর কাজ নেই।’

লারার কথা শুনে খুব ভালো লাগলো ইউরির, কিন্তু সেই ভাবটি সে প্রকাশ করলো না, পাছে লারা তাকে সেন্টিমেন্টাল ভাবে।

‘ঠিক বলেছো, লারা—এই যে আমরা যাযাবর জীবন কাটাচ্ছি এটা অবাস্তব, যেন জোর করে বানিয়ে তোলা। খাঁটি সত্য এই কথাটা। কিন্তু এই জীবনটাকে আমরা তো উদ্ভাবন করিনি। সকলেরই এই দশা আজকাল—সকলেই পাগলের মতো ঠোঁড়র খেতে-খেতে ছুটেছে—এটাকেই এখন বলতে পারো যুগধর্ম।’

‘আমিও এই নিয়ে ভাবছি সারাদিন। আমাকে যা বলবে তা-ই করবো—যদি কিছুদিন থাকতে পারি এখানে। আমি আবার চাই কাজ করতে—ইচ্ছেয় ম’রে যাচ্ছি আমি। না, চাষবাসের কথা বলছি না, সে-কাজ আগে একবার ক’রে গেছি এখানে; বাড়ির সবাই মিলে সেই কাজে লেগেছিলাম, ফল পাইনি বলতে পারবো না। কিন্তু এখন আর তেমন শক্তি নেই আমার যে আবার তার চেষ্টা করি। আমার মাথায় অন্য একটা কথা ঘুরে বেড়াচ্ছে।’

‘আন্তে-আন্তে যেন শান্ত হ’য়ে আসছে দেশ। হয়তো একদিন আবার বই ছাপাও শুরু হ’য়ে যাবে।’

‘এই কথাটাই ভাবছিলাম আমি। সামডেভইয়াটভের সঙ্গে কোনো-একটা বন্দোবস্ত কি করতে পারি না আমরা—তার জন্য ভালোরকম দাম দিতে হবে অবশ্য—ছ’মাস এখানে থাকার খরচ সে যদি দেয় আমাদের, আর আমি যদি ধীরে-সুস্থে একটা বই লিখে উঠি—পাঠ্য বই, ডাক্তারি বই, নয়তো সাহিত্যিক কিছু, কবিতার বই হ’তে পারে হয়তো? কিংবা কোনো বিখ্যাত বিদেশী বইয়ের অনুবাদ—কয়েকটা ভাষা জানা আছে তো আমার। সেদিন বিজ্ঞাপন দেখছিলাম পিটার্সবার্গে এক প্রকাশক শুধু অনুবাদ ছাপাতে চাচ্ছে এখন। টাকা আছে এ-সব কাজে—ঠিক জানি আমি—আর এ-ধরনের কাজে হাত দিতে পারলে এখন খুব ভালো লাগবে আমার।’

‘আমাকে মনে করিয়ে দিয়ে ভালো করলে; আমিও আজ ঐ গোছেরই কিছু ভাবছিলাম। কিন্তু এখানে আমাদের ভবিষ্যৎ বিষয়ে কোনো ভরসা নেই আমার। বরং আমার কেবলই মনে হচ্ছে যে এখান থেকে আমাদের উড়িয়ে নিয়ে যাবে শিগগিরই—আরো দূরে অন্য কোথাও। কিন্তু যতোদিন এই অবসাদটুকু আছে আমাদের, ততোদিনের জন্য—একটা কথা রাখবে আমার? মনে আছে নানা সময়ে তোমার যে-সব কবিতা আমাকে শুনিয়েছিলে? রোজ রাতে খানিকটা সময় ক’রে নিয়ে লিখে ফেলবে সেগুলো? ওর অর্ধেক তো হারিয়েই ফেলেছো, অন্যগুলো লেখা হয়নি—হয়তো এগুলোও ভুলে যাবে একদিন, আর ফিরে পাওয়া যাবে না। এ-রকম নাকি আগেও হয়েছে তোমার?’

৮

দিনের শেষে প্রচুর গরম জলে স্নান ক’রে নিলো তারা, লারা কাটিয়াকে নাইয়ে দিলে। এক স্বপ্নীয় নির্মলতার অনুভূতি নিয়ে ইউরি জানলার ধারে টেবিলে বসলো, তার পিঠ ফেঁসানো সেই ঘরের দিকে, যেখানে লারা—সাবানগছী শরীরে বড়ো তোয়ালে জড়িয়ে, আর-একটা তুর্কি তোয়ালে দিয়ে মাথার চুল পাগড়ির মতো বিড়ে ক’রে বেঁধে—কাটিয়াকে বিছানায় শুইয়ে কসলে ঢেকে দিচ্ছিলো। ইউরি তখন তন্ময় কাজের পূর্বস্বাদ উপভোগ করছে, আর সেই সঙ্গে সুখী, শিথিল মনোযোগের সঙ্গে লক্ষ্য করছে যা-কিছু তার আশেপাশে ঘটে যাচ্ছে।

লারা এতোক্ষণ ঘুমের ভান করছিলো শুধু, যখন সত্যিই ঘুমিয়ে পড়লো তখন রাত একটা

বেজেছে। যে-রাতকাপড় প'রে সে আর কাটিয়া শুয়েছে, তাও—ধবধবে সদ্য-ইঞ্জি-করা বিছানার চাদরের মতোই—লেসে ও পরিচ্ছন্নতায় যেন ঝলমল করছে। সেই দুদিনেও লারা কলপ জোগাড় করতো—কে জানে কেমন ক'রে।

প্রাণের ও আনন্দের আশ্বাদে ইউরির চারপাশের স্তব্ধতা নিশ্চিস্ত হ'য়ে উঠলো। বাতির আলো পড়েছে শাদা কাগজের ওপর কোমল আর হলদে হ'য়ে, পিছলে পড়ছে দোয়াতের কালিতে। বাইরে ছড়িয়ে আছে তুহিন রাত্রির স্নান নীলিমা। রাত্রিটিকে ভালো ক'রে দেখবে ব'লে ইউরি উঠে এলো পাশের ঠান্ডা, অন্ধকার ঘরটায়, জানলা দিয়ে তাকিয়ে রইলো। প্রান্তর-জোড়া তুষারের ওপর পূর্ণচাদের আলো পড়েছে—ডিমের শাদা অংশ বা শুকিয়ে-যাওয়া চুনকামের মতো রং তার। এই তুহিন যামিনীর রূপ যেন অনির্বচনীয়। শান্ত মন নিয়ে ফিরে এলো উষ্ণ আলো-জ্বলা ঘরে, লিখতে আরম্ভ করলো।

যে-ক'টি কবিতা তার সবচেয়ে বেশি মনে আছে যাদের আকার তার স্মৃতিতে সবচেয়ে স্পষ্ট—‘ক্রিসমাসের তারা,’ ‘শীতের রাত্রি,’ আর ঐ ধরনের আরো কয়েকটি, এগুলোর প্রতিলিপির পর প্রতিলিপি লিখে চললো ইউরি; যতোবার লেখে ততো ভালো হয় কবিতা, মূল থেকে আরো দূরে স'রে আসে। যত্নে সে বসালো অক্ষরগুলো, যাতে তার হাতের লেখার টানা ভঙ্গিতেও সপ্রাণ মুহূর্তটি ধরা পড়ে, যাতে বাইরের চেহারা দেখেও তাকে না মনে হয় নিজীব, ব্যঞ্জনাহীন, অনাখিক। এ-সব কবিতা হারিয়ে যাবে পরে, ভুলে যাবে সবাই, কেউ খুঁজে পাবে না।

এই পুরোনো, শেষ-করা কবিতাগুলো থেকে সে চ'লে এলো আরম্ভ-করা অসমাপ্ত কবিতায়, তাদের গলার আওয়াজে আয়ত্ত ক'রে নিলে সে, পরিপূরক আর-একটি কবিতার খসড়া করলে—যদিও তা শেষ করতে পারবে এমন কোনো আশাই রাখলো না। অবশেষে পুরোপুরি তেতে উঠলো তার মন, একটি নতুন কবিতা আরম্ভ করলো।

দুটি-তিনটি স্তবক রচনা করলে সে, তার কয়েকটা চিত্রকল্প তাকেই বিম্মিত ক'রে দিলো। এবার আবেশের মতো হ'য়ে উঠলো তার কাজ, সে অনুভব করলো তার আবির্ভাব, লোকে যাকে বলে প্রেরণা। যে-সব ক্ষমতার অনুবন্ধের দ্বারা শিল্পী নিয়ন্ত্রিত, এ-রকম মুহূর্তে তার সংস্থান উটে যায়—মাথার ওপর দাঁড়িয়ে যায় যেন; তখন আর কর্তৃত্ব থাকে না শিল্পীর, তাঁর প্রকাশোন্মুখ মানসিক অবস্থারও না; সব দখল ক'রে নেয় ভাষা, যা তাঁর আত্মপ্রকাশের উপায়। ভাষা—রূপ ও অর্থের বাস্তবতা যিনি—তিনিই মানুষের হ'য়ে চিন্তা ও উচ্চারণ করেন; সব হ'য়ে ওঠে সম্পূর্ণরূপে গান, বাহ্য ও ঐতিগম্য অর্থে গান নয়, তাঁর আন্তরপ্রবাহের বেগ ও ক্ষমতার বলেই সব সুরময়। তারপর, যেমন কোনো পরাক্রান্ত নদীর স্রোতে ঘূর্ণিত হয় ঢাকা, মসৃণ হ'য়ে ক্ষ'য়ে যায় প্রস্তর, তেমনি এই চলমান বাকপ্রবাহ, তার নিজেরই বিধানের বলে, সৃষ্টি করে ছন্দ ও মিল, আরো অসংখ্য রূপকল্প, গঠনশিল্প—যা এখনো অচিহ্নিত, অনাবিষ্কৃত, নামহীন, আর সেইজন্যই আরো বেশি জরুরি।

এ-রকম মুহূর্তে ইউরির মনে হয় যে তার সৃষ্টির প্রধান অংশটা সম্পন্ন হচ্ছে তার দ্বারা নয়, তার উর্ধ্বতন অন্য কোনো শক্তি কর্তৃক—সেই শক্তি তার নিয়ন্তা, সেই মুহূর্তে জগতের চিন্তা ও কবিতা বলতে যা বোঝায়, আর ভবিষ্যতে যা-কিছু বোঝাবে—সবই সেই শক্তি ছাড়া আর-কিছু নয়। তারই ঐতিহাসিক পরিণতির পর্যায় ইউরির পরের পদক্ষেপটিকে নির্ধারিত করছে; তাকে সচল ক'রে তোলার একটী অছিলামাত্র সে, একটি কেন্দ্রবিন্দু—এই রকম মনে হয় তার।

আত্মনিগ্রহ, নিজের বিষয়ে নাস্তিবোধ-জনিত অতৃপ্তি,—এ-সব থেকে এই অনুভূতি কিছুক্ষণের জন্য তাকে নিষ্কৃতি দিলো। কাগজের ওপর থেকে মুখ তুলে তাকালো সে, তাকিয়ে দেখলো নিজের চারপাশে।

তুষার-শুভ্র বালিশের ওপর ঘুমন্ত দুটি মাথা তার চোখে পড়লো। বালিশে মাথা রেখে ওরা

দু'জনে ঘুমিয়ে আছে। পরিচ্ছন্ন ঘর, পরিষ্কার চাদর, এই রাত্রি, ওদের চোখ-মুখ—সব তার বিশুদ্ধ মনে হ'লো; বিশুদ্ধ ঐ তুষার, আর চাঁদ, আর নক্ষত্র—সব মিলিয়ে একটি অনন্য অর্থপূর্ণ ঢেউ ব'য়ে গেলো তার বুকের মধ্য দিয়ে, জাগিয়ে তুললো সত্তার এক বিজয়ী ও আনন্দময় শুদ্ধতাবোধ।

‘ভগবান! ভগবান!’ চুপি-চুপি ব'লে উঠলো সে, ‘সত্যি কি এই সব আমারই জন্য? কেন তুমি এতো দিলে আমাকে? কেন তুমি আমাকে অধিকার দিলে তোমার আসনের সামনে গিয়ে দাঁড়াবার? কেন অনুমতি দিলে তোমার আমাকে এই জগতের মধ্যে ভ্রমণ করতে, তোমার রত্নরাজি আর নক্ষত্রপঞ্জের মধ্যে, কেন যেতে দিলে আমার উন্মাদ, নিরতিমান, হতভাগ্য প্রেমের চরণপ্রান্তে?’

রাত তিনটের সময় কাগজ থেকে চোখ তুললো ইউরি। তার সুদূর নিরহং তন্ময়তা থেকে ফিরে এলো সে, যেন ফিরে এলো নিজের কাছে, বাড়ির বাস্তবে, সূখী, সমর্থ, শান্ত সে এখন। আর হঠাৎ, জানলার বাইরে দূরান্তরিত মুক্ত মাঠের শুদ্ধতাকে বিদীর্ণ ক'রে এক শব্দ উঠলো—এক শোকার্ত নিরানন্দ চীৎকার।

পাশের আলো-না-জ্বলা ঘরটায় উঠে গেলো ইউরি, কিন্তু যতোক্ষণ ধ'রে সে লিখছিলো, ততোক্ষণেই জানলার কাচ বরফে জ'মে শাদা হ'য়ে গেছে। হাওয়া ঠেকাবার জন্য একটি কাপেটি ভাঁজ করা ছিলো দরজার গায়ে, সেটা ঠেলে সরিয়ে, কোট কাঁধে ফেলে সে বেরিয়ে গেলো।

চাঁদের আলোয় জ্বলজ্বল করছে তুষার, ছায়া নেই; সেই শুভ্র আশুনে তার চোখ এমন ঝাধিয়ে গেলো যে প্রথমে সে কিছুই দেখতে পেলো না। তারপর আবার উঠলো সেই দীর্ঘ, গাঢ়, একটানা কান্নার মতো আওয়াজ, দূর থেকে অস্পষ্ট হ'য়ে যেন, আর তখন ইউরির চোখে পড়লো চারটে লম্বা-লম্বা ছায়া, পেলিলের আঁচড়ের মতো সরু, খাদের ঠিক পাশেই তুষারে ঢাকা মাঠের প্রান্তে চারটে সরু-সরু ছায়া।

সার বেঁধে দাঁড়িয়ে ছিলো নেকড়েয়া, মাথা তুলে বাসাটার দিকে মুখ উচু ক'রে, চাঁদের দিকে, বা জানলার কাচের ওপর ঝাল-তোলা রূপোলি জ্যোছনার দিকে তাকিয়ে আর্তস্বরে কাঁদছিলো তারা। কিন্তু যে-মুহুর্তে ইউরি ওদের নেকড়ে ব'লে চিনতে পারলো, তক্ষুনি কুকুরের মতো মুখ ফিরিয়ে দৌড়ে পালালো ওরা—যেন ইউরির মনের কথা বুঝতে পেরে। কোনদিকে গেলো ইউরি তা ঠাহর করতেও পারলো না, এতো দ্রুত অদৃশ্য হ'লো ওরা।

‘যাকে বলে উটের পিঠে শেষ কুটোটি!’ মনে-মনে ভাবলো ইউরি। ‘ওদের আস্তানা কি কাছেই? হয়তো ঐ খাদের ভেতর। এদিকে সামডেভইয়াটভের ঘোড়াটা আস্তাবলে রয়েছে। নিশ্চয় তারই গজ্জে-গজ্জে এসেছে।’

নেকড়ের কথা ব'লে লারাকে এখনই ব্যস্ত করাটা ঠিক হবে না। যে-ঘরগুলো ঠাণ্ডা আর যেগুলো চুল্লির তাপে গরম, তাদের মাঝখানকার সবগুলো দরজা ইউরি ফিরে এসে বন্ধ ক'রে দিলো, কব্বল আর কাপড় ঝুঞ্জে-ঝুঞ্জে ফাটলগুলি এমনভাবে বুজিয়ে দিলো যাতে হাওয়া না আসে, তারপরে ফিরে গেলো টেবিলের ধারে। বাতির আলোয় আগের মতোই উজ্জ্বলতা ও আমন্ত্রণ। কিন্তু তার লেখার ঝোঁক কেটে গেছে; কিছুতেই স্থির হ'তে পারছে না। নেকড়ে, নানারকম আসন্ন বিপদ, আর অনেক রকম জটিল সমস্যা—এ-সব ছাড়া আর কোনো কথাই সে ভাবতে পারলো না। ক্লান্ত লাগছে, বড়ো ক্লান্ত।

লারার ঘুম ভেঙে গেলো। ‘মণি, এখনো লিখছো?’ ঘুমে ভারি গলায় চুপি-চুপি বললে সে। জ্বলছে তুমি, ঝলমল করছে—রাশিরে মোমবাতির মতো। এসো, আমার কাছে বোসো একটু। কী স্বপ্ন দেখলাম, বলি তোমাকে।’

ইউরি আলো নিভিয়ে দিলে।

শাস্ত উন্মাদনার আরেকটি দিন কেটে গেলো। বাসায় একটি টবোগ্যান^১ আবিষ্কার করেছিলো তারা, কোটে গা জড়িয়ে নিয়ে সেটাকে চালাতে লাগলো কাটিয়া; যতো নামে ততো হেসে ওঠে খিলখিল ক'রে চুঁচিয়ে। কোদাল দিয়ে তুষারের চাঁই তুলে-তুলে ইউরি একটি ঢালু পথ তৈরি ক'রে দিয়েছিলো তাকে, বরফ জমাবার জন্য জল ছিটিয়ে দিয়েছিলো ওপরে—সেই ঢালু বেয়ে কাটিয়ার খেলা চলছে তো চলছেই। টবোগ্যানটা দড়িতে বেঁধে অফুরন্তবার সে উঠে আসে ওপরে—আবার গড়িয়ে নেমে যায়—তার মুখের হাসি কিছুতেই মিলোয় না।

জ'মে যাচ্ছে জল, কঠিন হ'য়ে আসছে তুষার, অথচ রোদও আছে। দুপুরবেলায় তুষার ছিলো হলদে, তার ভেতরকার কমলারঙের আভাসে যেন সূর্যাস্তবেলার মধু-রঙের স্বাদ লেগে আছে।

লারার আগের দিনের কাপড় কাচা আর স্নানের ধুমে বাড়িটা আজ স্যাঁতসেঁতে হ'য়ে আছে। শার্সিগুলোকে কালো ক'রে দিয়ে গরম জলের বাষ্প এখন বরফের কুচি হ'য়ে জ'মে আছে, ময়লা দাগ দেয়াল-কাগজেও দেখা যায়। ইউরি ঘুরে-ঘুরে দেখছে বাড়িটা, নিয়ে আসছে জল আর জ্বালানি, আরো নতুন-নতুন জিনিস আবিষ্কার করছে, সাহায্য করছে লারাকে তার অফুরন্ত ঘরকন্মায়।

হয়তো ছুটছে কোনো কাজে, হঠাৎ দু'জনের হাতে হাত ঠেকে গেলো, অমনি হাতের জিনিস নমিয়ে রেখে একে অন্যের হাত চেপে ধরে, দুর্বল মনে হয় নিজেদের, মাথা ঝিমঝিম করে, অন্য কোনো ভাবনা আর থাকে না। এমনি কেটে যায় মুহূর্তের পর মুহূর্ত। তারপর আঁৎকে উঠে ওরা হঠাৎ বোঝে যে অনেক সময় নষ্ট হ'য়ে গেলো, বড্ড অনেকক্ষণ একা আছে কাটিয়া, ঘোড়াকে দানাপানি কিছুই দেওয়া হয়নি—আর তক্ষুনি বিবেকের তাড়ায় দু'জনে ছুটে যায় আবার, নষ্ট কাজের, নষ্ট সময়ের ক্ষতিপূরণের জন্য।

ইউরির ভালো ঘুম হয়নি, মৃদু ক্লাস্তি তার শরীরে, মাথার মধ্যে কেমন মধুর ঝিমধরা ভাব—যেমন হয় অল্প নেশা হ'লে। অধীর অপেক্ষা তার রাত্রির জন্য—যে-লেখা ফেলে উঠে আসতে হ'লো তাতে ফিরে যাবার জন্য ব্যাকুল তার মন।

তার চিন্তা আর পরিবেশের ওপর ঘোমটা টেনে দিয়েছে তার তন্দ্রালুতা—অর্ধেক কাজ সেই নেপথ্যেই হ'য়ে যাচ্ছে। সব এখন অস্পষ্টতায় স্নাত; এই অস্পষ্টতাই চরম সার্থক রূপকল্পের দিকে নিয়ে যাচ্ছে তাকে। দিনের এই টেনে-চলা শূন্যতা—তা যেন রাত্রির প্রস্তুতির জন্যই প্রয়োজনীয়; যেমন কবিতার প্রথম খসডার বিশৃঙ্খলাও কাজে লেগে যায়। এও তেমনি।

কিছুই বাকি রইলো না, তার শ্রান্ত আলস্য সব-কিছুকেই ছুঁয়ে, বদলে দিয়ে চ'লে গেলো; আর সব-কিছু রূপান্তরিত হ'য়ে দেখা দিলো এক অভিনব রূপে।

ভারিকিনোতে বসবাস করার যে-স্বপ্ন সে দেখেছিলো, তা বৃষ্টি আর সফল হয় না; ইউরি বৃষ্টিতে পারছিলো যে লারার সঙ্গে বিচ্ছেদের মুহূর্ত আসন্ন। তাকে হারাতে হবে লারাকে, সেই সঙ্গে ম'রে যাবে তার ঝাঁচার ইচ্ছা, এমনকি হয়তো অবসান হবে জীবনের। ক্লিষ্ট তার হৃদয়, তবু তীব্রতম যন্ত্রণা ঐ রাত্রির জন্য তার অধীরতায়; বেদনাকে প্রকাশ করবে ব'লে ব্যাকুল সে, নয়তো অন্যরা কেমন ক'রে কাঁদবে?

সারাদিন ধ'রে বারে-বারে ঐ নেকড়েগুলোকে তার মনে পড়লো। এখন আর চাঁদের আলোয় তুষার-প্রান্তরে নেকড়ে নেই ওরা, তারা হ'য়ে উঠেছে কবিতার বিষয়; যে-বৈরী শক্তি পণ করেছে ভারিকিনো থেকে তাড়াতে তাদের, ধ্বংস করবে তাকে আর লারাকেও—সেই শক্তিশ্রয়ী প্রতীক এখন নেকড়েগুলো।

^১ Toboggan: বরফের ওপর দিয়ে গড়িয়ে নামার জন্য ঢাকাহীন গাড়ি।—অনুবাদের টীকা।

ঐ বৈরিতার কথা ভাবতে-ভাবতে ইউরি তাকে নিজের মনে রচনা ক'রে নিতে লাগলো। সঙ্গে নাগাদ এক প্রাগৈতিহাসিক জন্তু অথবা ড্রাগনের মতো বিরাট হ'য়ে উঠলো তার অবয়ব—শুটমার জঙ্গলে সেই জন্তুর পায়ের ছাপ দেখা গেছে; লারার জন্য সে কামাতুর, আর ইউরির শোণিতের জন্য তৃষিত।

এলো রাত্রি, ইউরি টেবিলে আলো ছেলে নিলো। লারা আর কাটিয়া শুয়ে পড়লো তাড়াতাড়ি।

কাল রাতে ইউরি যা লিখেছিলো, তা দুটো অংশে ভাগ করা যায়। পাণ্ডুলিপির কতোগুলো পাতা খুব পরিচ্ছন্ন—আগেকার কবিতার পরিণত ও মার্জিত সংস্করণ—একেবারে ছাপার মতো অক্ষরে সে লিখেছে। আর যে-সব কবিতা নতুন আরম্ভ করেছে, তা এলোমেলোভাবে লেখা, হাতের লেখা পড়াই যায় না, অনেক কথা বাদ প'ড়ে গেছে, অনেক কথার অংশমাত্র বসানো।

এই হিজিবিজির পাঠোদ্ধার করতে গিয়ে নিরাশ হ'লো ইউরি, যেমন সে সাধারণত হ'য়ে থাকে। এই খসড়াগুলোই কাল রাতে তাকে চমকে দিয়েছিলো, কয়েকটি পঙক্তি এমন আশাতীতভাবে সার্থক মনে হয়েছিলো যে প্রায় জল এসে গিয়েছিলো তার চোখে। কিন্তু এখন সেই পঙক্তিগুলোই আবার পড়তে গিয়ে সে দেখতে পেলো তার মধ্যে চেষ্টার লক্ষণ, কষ্টকল্পনার উগ্রতা—বড়ো মন-খারাপ হ'য়ে গেলো তার।

সর্তক, প্রচ্ছন্ন, বাইরে থেকে প্রায় চেনাই যায় না, সাধারণ কথাভাষার ছদ্মবেশে লুকিয়ে-থাকা—এমনি এক মৌলিকতার সে ধ্যান করেছে সারা জীবন। সারা জীবন সংগ্রাম করেছে এক ভাষার জন্য, যা এমন নির্ভান ও সংবৃত যে পাঠক বা শ্রোতার কাছে বস্তুব্যাটিকে সরাসরি পৌঁছিয়ে দেবে, কী উপায়ে তা সম্ভব হচ্ছে তা বুঝতেই দেবে না। সারা জীবন সেই অলক্ষ্য রীতির জন্য তার পরিশ্রম, আর সেই আদর্শ থেকে এখনো কতো দূরে আছে, তা উপলব্ধির বেদনাও তার নিত্যসঙ্গী।

যুগপৎ যন্ত্রণা ও প্রেম, আশঙ্কা ও নির্ভয়—এই ভাবটিকে সে মূর্ত করতে চেয়েছিলো কাল; চেয়েছিলো এমনভাবে লিখতে যাতে, ভাষার সাহায্য না-নিয়েই, ভাবটি যেন নিজেই কথা ক'য়ে ওঠে; চেয়েছিলো ভাষাকে এতোদূর পর্যন্ত সরল ক'রে তুলতে যেখানে তা অর্ধোচ্চারিত এক শুঙ্খনমাত্র, ঘুম-পাড়ানি গানের মতো অন্তরঙ্গ।

এখন সে-সব খসড়ার দিকে তাকিয়ে তার মনে হ'লো যে পঙক্তিগুলোর মধ্যে ঐক্যসাধনের জন্য একটি ভাবসূত্র চাই, তা নেই ব'লেই এদের অসংলগ্ন ঠেকছে। যা লিখেছিলো, সব সে কেটে বাতিল ক'রে দিলে। সেই একই লিরিকের ধরনের এবার সে নতুন ক'রে লিখতে শুরু করলে সমস্ত জর্জ ও ড্রাগনের কিংবদন্তী^১। চওড়া, খোলামেলা পাঁচ মাত্রার ছন্দে আরম্ভ করলো, কিন্তু সেই ছন্দের যেন নিজের মধ্যেই সুর আছে, অর্থের সঙ্গে যোগ নেই তার; সেই মোলায়েম, একঘেয়ে তালে একটু পরেই ক্রান্তি এলো ইউরির। ছেড়ে দিলে সেই জাঁকালো ছন্দের যতিপাত; যেমন ক'রে গদ্য রচনায় অনাবশ্যক শব্দ ছেঁটে ফেলতে হয় তেমনি ক'রে চার মাত্রায় বাঁধলে কবিতাটিকে। আরো শব্দ হ'লো লেখা, কিন্তু বেশি উপভোগ্য হ'লো কাজটি! লেখা আরো প্রাণবন্ত হ'লো, কিন্তু এখনো যেন বাগাড়ম্বর কমলো না। আরো ছোটো পঙক্তির মধ্যে নিজেকে এবার বাঁধলে ইউরি। তিন মাত্রার স্বল্প পরিসরে আটোঁসাঁটো হ'য়ে বসলো কথাগুলো; এতজাঁকশব্দে যেন পুরোপুরি জেগে উঠলো ইউরি, তার মনের মধ্যে উৎসাহ, উত্তেজনা; পঙক্তি ভরাতে সঠিক শব্দ চ'লে এলো পর-পর, সেই ছন্দেরই প্ররোচনায়। যা উক্ত হ'লো না তাও সংকেতে

১ সমস্ত জর্জ ও মোরোশীয় পুরাবৃত্তে প্রখ্যাত ড্রাগন-নিহন্তা; ভক্ত খৃষ্টান সৈনিকের আদর্শ রূপে চিত্রিত। ইংল্যান্ডের প্রতিপালক ইনি, রাশিয়াতেও ঐর অগাধ প্রতিপত্তি।—অনুবাদের টীকা।

বলা হ'য়ে গেলো। যেমন শপ্পার^১ কোনো বালাদ-গীতিকায় ঘোড়ার পায়ের শব্দ শোনা যায়, তেমনি কবিতার পাতার ওপরে ইউরি যেন অশ্বখুরধ্বনি শুনতে পেলো। স্টেপির অন্তহীনতা পেরিয়ে সস্ত্র জর্জ ঘোড়া ছুটিয়ে চলেছেন। দূরে, আরো দূরে—ক্রমশ ছোটো হ'য়ে যাচ্ছেন তিনি—ইউরি যেন চোখের সামনে দেখতে পেলো। যেন জ্বরের ঘোরে দ্রুত লিখে চললো ইউরি; কথাগুলো এমন বেগে আসছে যে সে যেন তাল রাখতে পারছে না—প্রতিটি শব্দ অমোঘভাবে ঠিক জায়গায় ব'সে যাচ্ছে।

লারা যে কখন বিছানা ছেড়ে উঠে টেবিলের কাছে এসে দাঁড়িয়েছিলো, ইউরি তা দেখতে পায়নি। ডিলে রাত-কাপড়ে বড্ড রোগা দেখালো লারাকে, বেশি লম্বা মনে হ'লো। ইউরি চমকে উঠলো লারা আরো কাছে এলো যখন, বিবর্ণ তার মুখ, ভয় পেয়েছে; হাত বাড়িয়ে চুপি-চুপি সে বললে:

'শুনছো? কুকুর ডাকছে। একটা নয়, দুটো মনে হচ্ছে। উঃ, কী ভীষণ। কী অলঙ্কুণে ডাক। আজ রাতটা কোনোরকমে কেটে যাক; কাল সকালেই আমরা চ'লে যাবো এখন থেকে, যাবোই। আর এক মুহূর্তও থাকবো না এখানে, কিছুতেই না।'

অনেক বোঝানোর পর ঘটনাক্রমে পরে লারা শান্ত হ'য়ে ঘুমিয়ে পড়লো। ইউরি দাঁড়ালো বাইরে এসে। নেকডেরা আজ আরো কাছে এসে দাঁড়িয়েছে, কাল রাতের চেয়েও আরো কাছে। আগের চেয়েও ঢের বেশি দ্রুত বেগে উধাও হ'য়ে গেলো তারা, গেলো যে কোনদিকে, তা ইউরি ঠাহর করতে পারলো না। গায়ে-গায়ে ঘেঁষাঘেঁষি ক'রে দাঁড়িয়েছিলো ওরা, ইউরি তাদের গোনার সময় পায়নি, কিন্তু মনে হ'লো এবার ওদের সংখ্যা আরো বেড়ে গিয়েছে।

১০

আজ তেরোদিন হ'লো ওরা ভারিকিনোতে এসেছে। এর মধ্যে উল্লেখযোগ্য কিছুই ঘটেনি, একই রকম আছে সব। নেকডেরা আবার এসে চৌচিয়েছিলো রাস্তিরে—সপ্তাহের মাঝামাঝি সময় অদৃশ্য হ'য়ে গিয়েছিলো, কিন্তু আবার ফিরে এসেছে শেষের দিকে। লারা এখনো তাদের কুকুর ব'লেই ভুল করলে, অলঙ্কুণে ডাক শুনে আবার মনস্থির করলো চ'লে যাবে। কাজের মেয়ে সে, সারাদিন ধ'রে ভাবের উচ্ছ্বাসে ভেসে চলা তার অভ্যাস নেই, হৃদয়বেগের বিলাসিতাও তাকে পোষায় না, সাধারণত শান্ত ও সংবৃত থাকে সে। আর মাঝে-মাঝে উদ্বেগে অস্থির হ'য়ে ওঠে।

একদিন ধ'রে অনবরত একই দৃশ্য দেখছে তারা; তাই সেদিন সকালে লারা যখন ফিরে যাবার জন্য বাঁধাছাঁদা শুরু ক'রে দিলে, তখন তাদের মনে হ'লো যে এখানে আসার পর এই দেড় সপ্তাহ সময় যেন কখনোই ছিলো না।

ঘরগুলি আবার স্নাতস্নেতে আর অন্ধকার হ'য়ে আছে, এবার অবশ্য আবহাওয়া মেঘলা ব'লে। শিশির তেমন শব্দ হ'য়ে জমে যাচ্ছে না; নেমে-আসা কালো মেঘের দিকে তাকিয়ে মনে হয় যে-কোনো মুহূর্তে বরফ পড়া শুরু হ'তে পারে। দেহের শ্রম, মনের শ্রম, নিদ্রাহীন রাতের পর রাত—এর ফলে ইউরি একেবারে অবসন্ন এখন। পায়ে জোর নেই, গুছিয়ে কিছু ভাবতে পারে না। শীতে কাঁপতে-কাঁপতে এ-ঘর ও-ঘর ঘুরে বেড়াচ্ছে সে, হাতে হাত ঘষছে—লারা কী ঠিক করে দেখা যাক, তখন সে সেইমতো কাজে লেগে যাবে।

নিজেকে লারা নিজেই বোঝে না। এই বিশৃঙ্খল স্বাধীনতার বদলে সে এখন চায় যে-কোনো এক দৈনিক রুটিন, চায় কাজ, বাধ্যতা—যে-কোনো মূল্য দিতে পারে তার জন্য; তা যতো

^১ Chopin, Frederic Francois: (ফ্রেডেরিক ফ্রানসোয়া শপ্পা) . ১৮১০-১৮৪৯; বিখ্যাত সুরশ্রষ্টা ও শিল্পী, জাতিতে অর্ধ-পোলিশ অর্ধ-ফরাসী, ফ্রান্সে অধিকাংশ জীবন কাটিয়েছেন।—অনুবাদের টীকা।

কষ্টের হোক তাতে আপত্তি নেই, শুধু সারা জীবনের মতো নির্দিষ্ট হ'লেই হ'লো। শুধু এইভাবেই এক ভদ্র, শোভন, অর্থময় জীবন পেতে পারে সে।

অভোসমতো সেদিনও লারা সকালে উঠে বিছানা তুলেছে, ঝাঁটপাট করেছে, তৈরি করেছে ব্রেকফাস্ট। তারপর বাধাছাঁদা শুরু ক'রে ইউরিকে বললে ঘোড়ার সাজ পরাতে; আজ সে যাবেই।

তর্ক করলো না ইউরি। শহরে ফেরা বাতুলতা মাত্র, সেখানে নিশ্চয়ই পুরোদমে ধর-পাকড চলেছে এখন, কিন্তু এখানে থাকাও তেমনি পাগলামি—শীতে মরুভূমি হ'য়ে গেছে জায়গাটা, কতো বিপদ চারদিকে, তারা একা, একটা অস্ত্র পর্যন্ত নেই।

আস্তাবলে বা গোলাঘরে আর একমুঠো খড় আছে কিনা সন্দেহ। অনেকদিন থাকা সম্ভব হ'লে অন্য কথা ছিলো—ইউরি তাহ'লে আশেপাশে ঘুরে-ঘুরে জোগাড় করতে পারতো নিজেদের খাদ্য আর ঘোড়ার জাবনা—কিন্তু মাত্র কয়েকটা অনিশ্চিত দিনের জন্য অতো খাটুনি পোষায় না। জাবনা ঠেলে ফেলে সে গেলো ঘোড়াকে তৈরি করতে।

এ-সব কাজ ভালো আসে না তার। সামডেভইয়াট তাকে শিখিয়ে দিয়েছিলো কী ক'রে ঘোড়ার সাজ পরাতে হয়, কিন্তু কেবলই ভুলে যায়। যা-ই হোক, কোনোরকমে ক'রে উঠলো কাজটি; জুড়ে নিলো জোয়াল, পেতলে-আঁটা চামড়ার রশটিকে গাড়ির ডাণ্ডায় জড়িয়ে নিলো, তারপর ঘোড়ার পেটের ওপর হাঁটুর চাপ দিয়ে তাকে পরিয়ে দিলো বকলশে আঁটা লাগাম। তারপর পোটিকোতে ঘোড়া দাঁড় করিয়ে লারাকে ডাকতে ভেতরে গেলো ইউরি।

কোট প'রে নিয়ে লারা আর কাটিয়া তৈরি হ'য়ে আছে, বাধাছাঁদাও শেষ, কিন্তু লারার অবস্থা শোচনীয়। হাত মুচড়ে-মুচড়ে কাঁদছে সে; ইউরিকে বললে একটু ব'সে যেতে; তারপর নিজেই একটা চেয়ারে ব'সে প'ড়ে তক্ষুনি আবার উঠে দাঁড়ালো; কান্নাভরা গলায় এলোমেলো কথা বলতে লাগলো গুনগুন ক'রে—যেন হেঁচট খাচ্ছে কথাগুলোর ওপর, বাধা দিচ্ছে নিজেই নিজেকে; বার-বার জেনে নিতে চাচ্ছে ইউরি তার সঙ্গে একমত কিনা।

‘আমার কোনো দোষ নেই, কিছুতেই পারলাম না; জানি না, এটা কেমন ক'রে হ'লো, কিন্তু তুমিই বলো এতো দেরি ক'রে ফেলে এখন কি আর যাওয়া সম্ভব! একটু পরেই তো সঙ্গে হ'য়ে যাবে, তারপর ঐ ভীষণ বনের মধ্য নিয়ে অঙ্ককারে যেতে হবে তো! ঠিক না! বলো! তুমি যা বলবে তা-ই করবো আমি, কিন্তু আমার মন কিছুতেই আর সায় দিচ্ছে না এখন—আমার মন বলছে এখন যাওয়া ঠিক হবে না, কিন্তু তুমি যা ভালো বোঝো তা-ই হবে; কিছু বলছো না কেন? কে জানে কেমন ক'রে অর্ধেক দিন আমরা নষ্ট করলাম। কাল আবার ভেবে দেখা যাবে। আর একটা রাত থেকে গেলে কেমন হয়? কাল রাত থাকতে উঠবো, বেরিয়ে পড়বো ভোরের আলো ফোটারাত্র—ছটা বা সাতটায়। কী বলো? তুমি চুল্লি জ্বেলে আরো এক রাত লিখবে—আরো একটা রাত এখানে থাকবো আমরা—খুব ভালো হবে না? চমৎকার হবে না? হা ঈশ্বর, আমি কি আবার কোনো দোষ ক'রে ফেললাম?’

‘তুমি কিন্তু বাড়িয়ে বলছো লারা, সঙ্গে হ'তে ঢের দেরি এখনো, এখনো বেশ বেলা আছে। তবে তোমার কথাই থাক, এসো থেকে যাই। তুমি শান্ত হও, অমন অস্থির হোয়ো না। এসো, কোট ছেড়ে নিয়ে পোঁটলা-পুঁটলি খুলে ফেলা যাক। কাটিয়া বলছিলো ওর খিদে পেয়েছে, কিছু খেয়ে নিলে হয় এবার। ঠিক বলেছো তুমি, কোথাও কোনো ব্যবস্থা নেই, দুম ক'রে হঠাৎ চ'লে যাবার কোনো মানে হয় না। কিন্তু আর কেঁদো না, অমন ব্যাকুল হ'তে নেই। চুল্লিটা ধরিয়ে দিচ্ছি এখনই; কিন্তু না, স্নেজটা যখন তৈরিই আছে তখন আমাদের পুরোনো কাঠগোলা থেকে কিছু জ্বালানি নিয়ে আসি আগে— যা ছিলো সব ফুরিয়েছে। আর কেঁদো না, লারা। এক্ষুনি ফিরে আসছি আমি।’

জিজাগোদের কাঠগোলা পর্যন্ত স্নেজগাড়ির চলার দাগ অনেকগুলো পড়েছে। ইউরির আগেকার আসা-যাওয়ারই চিহ্ন এগুলো; দু'দিন আগে যখন এসেছিলো তখন থেকে চৌকাঠের ওপর ছড়িয়ে-ছিটিয়ে মাদানো বরফ জ'মে আছে।

সকাল থেকে মেঘলা ক'রে-ক'রে এখন আকাশ পরিষ্কার হয়েছে। ঠাণ্ডাও আগের চেয়ে বেশি। বাড়ি আর আঙিনা ঘিরে দূর পর্যন্ত ছড়িয়ে আছে পুরোনো বাগান, একেবারে কাঠগোলার ধার পর্যন্ত চলে এসেছে, যেন ইউরিকে একবার ভালো ক'রে দেখে নিয়ে তাকে কোনো কথা মনে করিয়ে দিতে পারে। ঘন তুষার পড়ছে এ-বছর। চৌকাঠ পর্যন্ত বরফে ঢাকা, দরজাটাকে তাই নিচু মনে হচ্ছে, বাড়িটাকে কুঁজো। মস্ত ব্যাঙের ছাতার মতো বরফ ঝুলছে ছাত থেকে, ইউরির মাথা প্রায় ছোঁয় আরকি। ঠিক তার ওপরেই উঠেছে প্রতিপদের চাঁদ, যেন কেউ তাকে পেরেক ঠুকে বরফের গায়ে আটকে দিয়েছে। ঝাঁক চাঁদ, তীক্ষ্ণ তার ফলা, জ্বলন্ত শিখাটি যেন ধূসর। এমন কালো হ'য়ে বিষাদ নামলো ইউরির মনে যে তখন যদিও সবোমাত্র বিকেল, রোদ্দুরও মলিন হয়নি, তবু তার মনে হ'লো যেন তার জীবনের কোনো অন্ধকার অরণ্যের মধ্যে যোর নিশীথে সে দাঁড়িয়ে আছে—আর এই নতুন চাঁদ, ঠিক তার চোখের সামনে উজ্জ্বল, তা যেন কোনো বিচ্ছেদের পূর্বাভাস, নিঃসঙ্গতার প্রতীক।

এতো ক্লান্ত সে যে দাঁড়াতে পর্যন্ত পারছে না। আগের চেয়ে অনেক কম-কম ক'রে কাঠ তুলে নিয়ে সে দরজা থেকে স্নেজে হুঁড়ে দিতে লাগলো। হিম কাঠে আঠার মতো বরফ লেগে আছে, দস্তানা ফুঁড়ে ঐ ঠাণ্ডা যেন বিধলো তার হাতে। কাজ ক'রেও গরম হচ্ছে না তার শরীর; কিছু যেন ভেঙে গেছে তার মধ্যে, কোনো অংশ অচল হ'য়ে গেছে। তার ভাগ্যহীন নিয়তিকে সে অভিশাপ দিলো, আর প্রার্থনা করলো লারার জন্য—বিষাদময়ী রূপসী কান্তা তার—সেই নম্র ও সরল হৃদয়টিকে ভগবান যেন রক্ষা করেন। আর নতুন চাঁদ শুদ্ধ হ'য়ে রইলো ছাদের ওপর, দীপ্ত কিন্তু নিস্তাপ, উদ্ভাসিত হ'লেও তার আলো নেই।

মিকুলিৎসিনদের বাড়ির দিকে মুখ ফিরিয়ে ঘোড়াটা চিহ্নি শব্দে ডেকে উঠলো, প্রথমে আস্তে, ভীক্ গলায়, তারপর আরো জোরে, যেন নিশ্চিত হ'য়ে।

‘হাঠাৎ ডাকছে?’ অবাক হলো ইউরি। ‘খুশিতে, না ভয় পেয়েছে? ভয়ে নয় নিশ্চয়ই, ঘোড়ারা ভয় পেলে ডাকে না, আর নেকড়ের গন্ধ যদি পেয়ে থাকে তাহলে ও তো এতো বোকা নয় যে চোঁচিয়ে শত্রু ডেকে আনবে। বাড়ি যেতে চাচ্ছে আরকি। রোসো, রোসো এক্সুনি যাচ্ছি আমরা!’

বড়ো-বড়ো লকড়ির সঙ্গে কিছু কুটোকাটাও নিলো সে, আর নিলো জুতোর চামড়ার মতো কুঁচকোনো গাছের ছাল, তা-ই বিছিয়ে দিলো কাঠের ওপর, স্নেজে বেঁধে নিলো দড়ি দিয়ে, তারপর ঘোড়ার লাগাম ধ'রে হেঁটে-হেঁটে বাড়ির দিকে চললো।

আবার ডেকে উঠলো ঘোড়াটা, এবার দূরে অন্য একটা ঘোড়ার উত্তরে। ‘এর মানে? তবে কি ভারিকিনো যতোটা ভেবেছিলাম, ততোটা জনশূন্য নয়?’ ইউরির মাথায় এটা এলো না যে তাদের বাড়িতেই কোনো অতিথি আসতে পারে, আসতে পারে অন্য ঘোড়ার ডাক মিকুলিৎসিনের বাড়ি থেকেই। গোলাবাড়িগুলোর পেছন দিয়ে ঘুরে আসছিলো সে, বরফে-ঢাকা জমির ঝঞ্জে ঢাকা প'ড়ে গিয়েছিলো বাড়িটা।

ধীরে-সুস্থে—তাড়াহুড়োর কী আছে?—কাঠগুলো নামিয়ে রাখলো ইউরি, স্নেজটাকে গোলাঘরে রাখলো, তারপর ঘোড়ার সাজ খুলে তাকে আশ্রয়স্থলে নিয়ে দূরের একটা কোণে রেখে দিলো—ঠাণ্ডা হাওয়া কম আসে সেখানে—অল্প যে-কয়েক মুঠো খড ছিলো তা-ই রাখলো জাবনার গামলায় ওর সামনে।

বাড়ির দিকে হাঁটতে-হাঁটতে কেমন অস্বস্তি হ'লো তার! পোড়াকোতে বড়োসড়ো একটা স্লেক দাঁড়িয়ে আছে—চাষীদের স্লেক মনে হয়—চিকচিকে কালো একটা বাচ্চা ঘোড়া জোতা আছে তাতে, আর তার সামনে পায়চারি ক'রে বেড়াচ্ছে তেমন চিকচিকে ও নধর একটা অচেনা লোক, মাঝে-মাঝে সে চাপড় দিচ্ছে ঘোড়াটাকে, তার পায়ের দিকে তাকিয়ে দেখছে।

বাড়ির ভেতর থেকে একাধিক গলার আওয়াজ এলো। আড়ি পাতার কোনো ইচ্ছে ছিলো না ইউরির, আর এতো কাছেও ছিলো না যে এক-আধটার বেশি কথা শোনা যায়—তবু, নিজের অনিচ্ছাসত্ত্বেও, স্তব্ধ হ'য়ে দাঁড়িয়ে সে উৎকর্ষ হ'লো। চিনতে পারলো কমারোভস্কির গলা, লারা আর কাটিয়ার সঙ্গে সে কথা বলছে, মনে হ'লো দরজার পাশে প্রথম ঘরটিতে আছে তারা। তর্ক চলেছে; গলার আওয়াজেই বোঝা যায় লারা অস্থির হ'য়ে কাঁদছে; এই সে সায় দিচ্ছে কমারোভস্কির কথায়, আবার পর মুহূর্তে সজোরে প্রতিবাদ করছে।

কোনো কারণে ইউরির মনে হ'লো যে সেই মুহূর্তে তাকে নিয়েই কথা বলছে কমারোভস্কি, ইউরিকে বিশ্বাস করা যায় না—এই ধরনের কোনো কিছু তার বক্তব্য ('দু-নৌকোয় পা দিয়ে চলেছে'—এ-কথাটা স্পষ্ট শোনা গেলো যেন), লারা, না তা নিজের পরিবার—কার দিকে ইউরির টান বেশি তা বলা অসম্ভব, তার ওপর নির্ভর করা কোনোমতেই উচিত হবে না লারার, যদি না লারা 'চোরকে বোচকা বাঁধতে ও গৃহস্থকে সজাগ থাকতে' বলতে চায়, যদি না 'দুই দিকের চাপনে বুড়ি মরে আপনে'—এই দশা সে করতে চায় নিজের। ইউরি ভেতরে ঢুক পড়লো।

যা ভেবেছিলো তা-ই—ডান দিকের প্রথম ঘরটিতেই ব'সে আছে তিনজনে। কমারোভস্কির ফার-কোট তার পায়ের গোড়ালি পর্যন্ত ঠেকেছে, আর কাটিয়ার কোটের কলার ঝাঁকড়ে ধ'রে লারা সেটা আটকাবার চেষ্টা করছে, কিন্তু ছক খুঁজে না-পেয়ে তাকে ধমক দিয়ে বারণ করছে নড়তে, আর কাটিয়া বলছে, 'মা, একটু আস্তে, আমাকে দম আটকে মারবে তুমি।' বেরোবার জন্যে তৈরি হ'য়ে দাঁড়িয়ে আছে তিনজনে, গায়ে বাইরের পোষাক। ইউরি ঘরে ঢুকতেই লারা আর কমারোভস্কি একসঙ্গে কথা বলতে-বলতে তার দিকে ছুটে এলো:

'ছিলে কোথায় এতক্ষণ? এদিকে তোমার জন্যে আমরা ব'সে আছি—ভীষণ জরুরি দরকার।'

'কেমন আছে, ইউরি আন্দ্রেইয়েভিচ। দেখতেই পাচ্ছে, গত বারের কড় কথা কাটাকাটির পরেও আবার এলাম তোমাদের কাছে, তোমরা আমাকে ডেকে আনোনি যদিও।'

'কেমন আছেন' গোছের কিছু-একটা আওড়ালো ইউরি।

'তুমি গিয়েছিলে কোথায়?' আবার জিজ্ঞেস করলো লারা। উনি কী বলতে চাচ্ছেন শুনে নাও, তারপর কী করবো না করবো চটপট স্থির ক'রে ফ্যালো। একটুও সময় নেই জানো তো। খুব শিগগির মনস্থির করা চাই।'

'কিন্তু আমরা সবাই দাঁড়িয়ে আছি কেন? বসুন, ভিস্টার ইম্পলিটোভিচ। কোথায় ছিলাম, তা তুমি জিজ্ঞেস করছো, মনি? জানো তো কাঠ আনতে গিয়েছিলাম, পরে ঘোড়াটার দেখাশুনো করতে হ'লো। বসুন, ভিস্টার ইম্পলিটোভিচ, বসুন দয়া ক'রে।'

'তোমার অবাক লাগছে না ওঁকে দেখে? তোমাকে দেখে কিন্তু মনে হয় না একটুও অবাক হয়ছো। অথচ উনি চ'লে গেছেন শুনে, তাঁর প্রস্তাবে রাজি না-হওয়ার জন্য, আপশোস করছিলাম আমরা, আর এখন তিনি এসে ঠিক তোমার চোখের সামনে ব'সে আছেন, আর তুমি কিনা অবাকও হচ্ছে না একটু—তা শোনো এবারে উনি যে-কথা বলতে এসেছেন তা আরো বেশি আশ্চর্য।—ওকে সব খুলে বলুন, ভিস্টার ইম্পলিটোভিচ।'

'লারিসা ফিয়োডোরোভনা মনে-মনে কী ভাবছেন, জানি না। তবে একটা কথা আমার বুঝিয়ে বলা উচিত: আমি চ'লে গেছি—এই গুজবটা কিন্তু আমিই ইচ্ছে ক'রে রটিয়েছিলাম।

আমি যাইনি, আমার উদ্দেশ্য ছিলো, আগের বারে যে-কথা নিয়ে আমরা আলোচনা করেছিলাম, তুমি আর লারিসা ফিয়োডোরোভনা আবার তা ভালো করে ভেবে দ্যাখো, ঠাণ্ডা মাথায় স্থির করো কী করবে। তোমাদের সুযোগ দেবার জন্যই থেকে গিয়েছি আমি।’

‘কিন্তু আর তো দেরি করা যায় না,’ কথার মাঝখানে বলে উঠলো লারা। ‘যাবার পক্ষে এই হচ্ছে চমৎকার সময়। কাল সকালে...কিন্তু ভিক্টর ইগ্নলিটোভিচ নিজেই সে-কথা বলবেন তোমাকে।’

‘একটু রোসো, লারা। কোট গায়ে দাঁড়িয়ে-দাঁড়িয়ে কী করবো আমরা? বরং খুলে নিয়ে বসি একটু। হাজার হোক, কথাগুলো জরুরি, এক মিনিটে তার সমাধান হয় না। ভিক্টর ইগ্নলিটোভিচ, আমার আশঙ্কা হচ্ছে আমাদের আলোচনার মধ্যে কোনো ব্যক্তিগত প্রসঙ্গ এসে পড়ছে, তা নিয়ে কিছু বলটা কিন্তু হাস্যকর হবে, হয়তো একটু লজ্জারও ব্যাপার। কথাটা হচ্ছে যে আমি কখনো কল্পনাও করিনি আপনার সঙ্গে চলে যাবো—কিন্তু লারার কথা আলাদা। কচিং কখনো এমন মুহূর্ত এসেছে যখন লারার আর আমার দৃষ্টিস্তা আলাদা হয়ে গেছে, তখন আমাদের মনে পড়ে গেছে যে আমরা এক নই, দু’জন মানুষ। সেই রকম সময়ে লারাকে আমি বার-বার বলেছি যে আপনার প্রস্তাব আরো ভালো করে ওর ভেবে দেখা উচিত। আর সত্যি বলতে প্রায় সব সময়ই সে ভেবেছে সে-কথা, ঘুরে-ফিরে বার-বার এই কথাই তুলেছে।’

‘কিন্তু শুধু একটি শর্তে—তোমাকেও আসতে হবে আমাদের সঙ্গে’, লারা বাধা দিয়ে বললো।

‘আমরা আলাদা হয়ে গেছি, এই চিন্তা তোমার পক্ষে যতো কষ্টের, আমার পক্ষেও তা-ই। কিন্তু আমাদের হৃদয়াবেগকে সরিয়ে রেখে এই তাগ স্বীকার করে নেয়াই হয়তো ভালো। আমার যাওয়ার কোনো প্রশ্নই ওঠে না।’

‘কিন্তু এখনো তুমি কোনো কথাই শোনোনি, তুমি জানো না... ভিক্টর ইগ্নলিটোভিচ কী বলছেন, শোনো... কাল সকালে—ভিক্টর ইগ্নলিটোভিচ।’

‘লারিসা ফিয়োডোরোভনাকে আগে যে-খবরটা আমি দিয়েছিলাম, উনি তার কথাই ভাবছেন। ইউরিয়ান্টিন রেল-স্টেশনের এক সাইডিঙে দূর প্রাচ্য রাষ্ট্রের একটি সরকারি ট্রেন যাবার জন্য তৈরি হয়ে দাঁড়িয়ে আছে। গতকাল মস্কো থেকে এসে পৌঁছেছে ট্রেনটা, আগামী কাল পূর্বের দিকে যাত্রা করবে। ট্রেনটা আমাদের যোগাযোগ মন্ত্রী-দপ্তরের। গাড়ির অর্ধেক কামরাই হাগন-লী’। এই ট্রেনেই যেতে হবে আমাকে। আমার সহকারীদের জন্য কয়েকটা বার্থ আমাকে আলাদা করে দেওয়া হয়েছে। বিশেষ আরামে যেতে পারবো আমরা। এমন সুযোগ আর আসবে না। আমি জানি, তুমি ফাঁকা কথা বলো না, একবার মনস্থির করে তার বদল করাও তোমার খাতে নেই; এও স্থির করছো যে আমাদের সঙ্গে যাবে না। কিন্তু তবু লারিসা ফিয়োডোরোভনার কথা ভেবে তুমি কি আর-একবার চিন্তা করে দেখবে না? ঠুকে তো বলতেই শুনলে যে তোমাকে ফেলে কোথাও যাবেন না উনি। এসো না তুমি আমাদের সঙ্গে, ভ্লাডিভস্টক পর্যন্ত না হোক, অন্তত ইউরিয়ান্টিন পর্যন্ত, সেখানে গিয়ে আবার ভেবে দেখা যাবে।—সত্যি কিন্তু খুব তাড়া করতে হবে এখন—এক মিনিটও আর নষ্ট করা যায় না। আমার সঙ্গে কোচোয়ান আছে—আমি নিজে কখনো গাড়ি চালাই না—আর স্নেজটায় আবার পাঁচজনের মতো জায়গা নেই। কিন্তু সামডেভইয়াটভের ঘোড়াটা তোমার হাতে আছে বোধহয়—সেটা নিয়ে কাঠ আনতে গিয়েছিলে বললে না? সাজ পরানো আছে তো এখনো?’

‘না, খুলে এসেছি।’

‘তা চটপট আবার পরিয়ে নাও তাহ’লে। আমার কোচোয়ান তোমার সঙ্গে হাত লাগাবে’খন...রোসো একটু, থাক—কী দরকার—থাক তোমার স্নেজগাড়ি, আমারটাতেই কুলিয়ে যাবে, চোপে-চুপে কোনোমতে বসাবো’খন। শুধু শিগগির—শিগগির করো—ঈশ্বরের দোহাই! পথে যা নেহাৎই লাগবে শুধু সেইরকম কয়েকটা জিনিস নিয়ে নাও সঙ্গে—যা প্রথম হাতে ঠেকে তা-ই নিয়ে নাও। একটি শিশুর জীবন-মরণ নিয়ে যখন কথা তখন মালপত্র নিয়ে হেঁচো করার মানে হয় না।’

‘আপনার কথা আমি বুঝতে পারছি না, ভিক্টর ইয়লিটোভিচ। আপনি এমনভাবে কথা বলছেন যেন আমি যেতে রাজি হয়েছি। আপনি যান, আমার শুভেচ্ছা রইলো আপনার জন্য, আর লারা যদি চায় তো সঙ্গে যাক। এই বাড়ির জন্য আপনাকে উদ্বিগ্ন হ’তে হবে না। আপনারা চলে গেলে পর সব পরিষ্কার ক’রে তাল্লা লাগিয়ে দেবো আমি।’

‘কী বলছে তুমি, ইউরি, কী আবোল-তাবোল বকছে! তুমিও তো বিশ্বাস করো না এ-সব কথায়। “লারা যদি চায়”—কী চমৎকার কথা একখানা! যেন তুমি জানো না যে তুমি না-গেলে কিছুতেই যাবো না আমি, তোমাকে বাদ দিয়ে আমি একা কিছুই করবো না? তুমি বাড়িতে তাল্লা দেবে—এ-সব লম্বা-চওড়া বুলি আসে কোথেকে বলো তো!’

‘তুমি দেখছি কঠিন পণ করেছো?’ কমারোভস্কি বললো ইউরিকে। ‘তাহ’লে, লারিসা ফিয়োডোরোভনার যদি আপত্তি না থাকে, নিভুতে দু’একটা কথা বলতে চাই তোমার সঙ্গে।’

‘নিশ্চয়ই। জরুরি কথা হ’লে রান্নাঘরেও যেতে পারি আমরা। তুমি রাগ করবে না তো, মণি?’

১২

‘স্ট্রেলনিকভ ধরা পড়ছিলো, বিচারের পর গুলি ক’রে মারা হয়েছে তাকে।’

‘কী ভীষণ কথা! আপনি ঠিক জানেন?’

‘তাই তো শুনলাম। কথাটা সত্য বলেই আমার বিশ্বাস।’

‘লারাকে বলবেন না কিন্তু। ও পাগল হ’য়ে যাবে।’

‘না, না, তা বলবো না। সেইজন্যই তো তোমার সঙ্গে একা কথা বলতে চাইলাম। এ-রকম যখন অবস্থা, তখন ওর আর কাটিয়ার তো সমূহ বিপদ। ওদের বাচাতে চাই আমি, আর সেইজন্যই তোমার সাহায্য চাচ্ছি। আমাদের সঙ্গে কিছুতেই যাবে না তুমি? কিছুতেই না?’

‘কিছুতেই না। আমি তো বলেছি আপনাকে।’

‘কিন্তু লারা যে যেতে চাচ্ছে না তোমাকে ফেলে। কী যে করবো বুঝতে পারছি না। তাহ’লে অন্য-এক উপায় করা যাক—একবার যদি ভান করো তুমি যে হয়তো শেষ পর্যন্ত রাজি হ’তেও পারো—অন্তত তা-ই যদি বুঝতে দাও ওকে, তাহ’লে সমস্যার সমাধান হয়। তোমার কাছে বিদায় নিয়ে সে চলে যাচ্ছে—তা এখানেই হোক আর ইউরিয়্যাটিন স্টেশনেই হোক—এ আমি ভাবতেই পারি না। তুমি ওকে বোঝাবে যে তুমি শেষ পর্যন্ত আসবেই, এখন না হোক পরে, যখন অন্য সুযোগে তোমার যাবার ব্যবস্থা আমি ক’রে দেবো। তোমাকে ভান করতে হবে যেন এতে তুমি অনিচ্ছুক নও। যদি মিথ্যে শপথও করতে হয়, তবু তোমাকে বিশ্বাস জাগাতে হবে ওর মনে। অবশ্য আমার দিক থেকে ফাঁকা কথা নয় এটা—আমি শপথ ক’রে বলছি যে যখনই তুমি ইচ্ছেটি শুধু প্রকাশ করবে, তখনই তোমার এশিয়াতে যাবার সুবিধে ক’রে দেবো আমি, সেখান থেকে যেখানে যেতে চাও যেতে পারবে। কিন্তু লারিসা ফিয়োডোরোভনার মনে এটুকু বিশ্বাস জাগাতে হবে যে তুমি অন্তত আমাদের স্টেশনে তুলে দিতে আসছো। এটুকু করলেই হবে তোমাকে—যে ক’রে হোক করতেই হবে। ধরো, তুমি যদি বলো তোমার স্নেজ-গাড়িটা

তৈরি ক'রে নিতে চলেছো, আর আমাদের যদি বলো আগেই বেরিয়ে পড়তে—তোমার জন্য অপেক্ষা না-ক'রে এগিয়ে যেতে—যদি বলো তৈরি হ'য়ে নিয়েই তুমি ধ'রে ফেলবে আমাদের—তাহ'লে কেমন হয়?’

‘স্টেলনিকভের খবরটা এতো ভীষণ, সত্যি বলতে কী আপনার সব কথা ঠিক ধরতে পারিনি। কিন্তু আপনি ঠিকই বলেছেন। এ-কালের যুক্তি অনুসারে, স্টেলনিকভের সঙ্গে বোঝাপড়া হ'য়ে যাবার সঙ্গে-সঙ্গে লারা আর কাটিয়ার জীবনও বিপন্ন হ'লো। আমাদের মধ্যে কেউ-না-কেউ গ্রেপ্তার হবেই, তাই যে-ভাবে হোক বিচ্ছেদ অনিবার্য। সেই বিচ্ছেদ যদি আপনি ঘটান, যথাসম্ভব দূরে নিয়ে যান ওদের, তাহ'লেই হয়তো সবচেয়ে ভালো হয়। বলছি বটে, কিন্তু আসলে বোধহয় ব্যাপার একই, যা-কিছু ঘটছে সবই আপনার অনুকূল। হয়তো শেষ পর্যন্ত আমিই ভেঙে পড়বো, আপনার পায়ে প'ড়ে বলবো—বাঁচান লারাকে, বিপদের বাইরে নিয়ে যান, আমাকে জোগাড় ক'রে দিন স্ত্রী-পুত্রের কাছে যাবার জন্য জাহাজের টিকিট—আর আপনার হাত থেকে এ-সব নিয়ে হয়তো কৃতার্থ বোধ করবো। কিন্তু একটু চিন্তা করার সময় দিন আমাকে। আপনার কথা শুনে একেবারে অভিভূত হ'য়ে আছি আমি। ভেঙে পড়েছি, হতভম্ব হ'য়ে গেছি, ঠিকমতো ভাবতে বা কথা বলতে পারছি না। এমনও হ'তে পারে আপনার কথায় রাজি হ'য়ে আমি এমন এক সর্বনাশা ভুল করছি যার প্রতিকার আর সম্ভব নয়, যা পরে সারাজীবন বিতীষিকার মতো মনে হবে আমার। কিন্তু এখন আমি আর-কিছুই পারি না, শুধু পারি অন্ধভাবে কথায় রাজি হ'য়ে সেইমতো চলতে, যেন আমার নিজের ইচ্ছে ব'লে কিছু নেই।...ঠিক, ঠিক আছে, লারার ভালোর জন্যে তা-ই করবো আমি। এখনই যাচ্ছি ওর কাছে, বলছি যে স্নেজে ক'রে শিগগিরই ধ'রে ফেলবো আপনাদের—আসলে অবশ্য, থেকেই যাবো।...কিন্তু একটা মুশকিল আছে। যাবেন কী ক'রে আপনারা, এখনই তো অন্ধকার ক'রে আসবে? বনের মধ্য দিয়ে পথ, নেকড়ে আছে, সাবধানে যাবেন...’

‘তা জানি আমি। কিঃ ভেবো না। বন্দুক আছে আমার কাছে, রিভলভারও আছে। দু'এক ফাঁটা স্পিরিটও এনেছি, ঠাণ্ডা ঠেকাবার জন্য। একটু চাই?—এস্তার আছে আমার।’

১৩

‘কী করলাম? কী করলাম? ওকে ছেড়ে দিলাম, ত্যাগ করলাম, দিয়ে দিলাম। আমাকে এখন ছুটতেই হবে ওদের পেছনে। লারা! লারা!’

‘ওরা শুনতে পাচ্ছে না। বাতাস উল্টোদিকে বইছে, আর ওরা বোধহয় কথা বলছে চোঁচিয়ে। লারা এখন সুখী, নিশ্চিন্ত, ওর পক্ষে যথেষ্ট কারণ আছে তার। ও তো জানে না আমি তাকে কী বকম ঠকিয়েছি।

‘ও ভাবছে, ভালো হ'লো, খুব ভালো হ'লো—এর চেয়ে ভালো আর কী হ'তে পারে ওর? ইউরা, ওর অদ্ভুত জেদি ইউরা, অবশেষে নরম হয়েছে—ঈশ্বরকে ধন্যবাদ। ভালো, নিরাপদ এক জায়গায় যাচ্ছি আমরা, সেখানকার লোকদের মেজাজ আমাদের চেয়ে ঠাণ্ডা, সেখানকার আইনকানুন শৃঙ্খলার ওপর ভরসা রাখা যায়। ধরো, এমনি কথার কথা বলছি, কালকের ট্রেনে ইউরি যদি নাও আসে তাহ'লে কমারোভস্কি ওকে আনাবার জন্য আরেকটা ট্রেন পাঠাবে, দেখতে-না-দেখতে ও এসে পড়বে আমাদের কাছে। এ-মুহুর্ত ও অবশ্য আছে আস্তাবলে, তাড়াহুড়া করছে, বাস্তব হ'য়ে গাড়ি জুড়ে নিচ্ছে, পুরো দমে গাড়ি ছুটিয়ে আমাদের ধ'রে ফেলবে।

‘সে তো এমনি সব ভাবছে এখন। বিদায়টাও ভালো ক'রে নেওয়া হ'লো না। শুধু একটু

হাত নেড়ে পেছন ফিরে দাঁড়িলাম আমি, আপেলের টুকরোর মতো কষ্ট বিধে ছিলো আমার গলায়, দম আটকে দিচ্ছিলো—সেটাকে গিলে ফেলার চেষ্টা কবলাম।’

পোর্টিকোতে দাঁড়িয়ে রইলো সে, পিঠের একদিকে কোট ফেলা। অন্য হাত দিয়ে ছাদের ঠিক তলাকার সরু কাঠের থামটাকে এমনভাবে আঁকড়ে ধরলো যেন পিসে ফেলবে সেটাকে। সুদূরে সংহত হ’লো তার সমস্ত মনোযোগ। পথের একটি অংশ দেখা যাচ্ছে সেখানে, উঠে পাহাড়ের গা বেয়ে, ছাড়া-ছাড়া বার্চগাছের পাড়-বসানো ফাঁকা জায়গাটুকুতে আড হ’য়ে সূর্যাস্তের রশ্মি পড়েছে; সেখানেই যে-কোনো মুহূর্তে দেখা যাবে স্নেজ-গাড়িটাকে, যা অপাতত খাদের আড়ালে ঢাকা প’ড়ে গেছে।

‘বিদায়, বিদায়.’ সেই স্নেজের জন্য অপেক্ষা করতে-করতে মনোহীনভাবে বার-বার বলতে লাগলো ইউরির, সন্ধ্যার হিমেল বাতাসে বের ক’রে দিলো তার বুক-ছেঁড়া নিস্তব্ধ কথাগুলি। ‘বিদায়, আমার অনন্যা প্রিয়া, আমার চিরকালের মতো হারিয়ে-যাওয়া প্রেয়সী!’

‘আসছে, আসছে ওরা,’ শুকনো ফ্যাকাশে ঠোটে ফিশফিশ ক’বে সে উচ্চারণ করলে, খাদ থেকে তীরের বেগে ছুটে এলো স্নেজ, একের পর এক বার্চ গাছ ছাড়িয়ে ছুটেতে লাগলো, গতি ক’মে এলো আস্তে-আস্তে, আর—কী আনন্দ!—শেষ গাছটির কাছে এসে হঠাৎ থেমে গেলো।

লাফিয়ে উঠলো ইউরির হৃৎপিণ্ড, এমন উন্মাদ উত্তেজনায় চিপচিপ করতে লাগলো যে তার মনে হ’লো আর দাঁড়িয়ে থাকতে পারছে না, দুর্বল লাগছে, অবসন্ন, তার কাঁধের ওপর থেকে খসে-পড়া কোটটির মতোই সারা শরীর যেন নেতিয়ে গেছে তার। ‘হে প্রভু, ভগবান, তুমি তাকে আমার কাছে ফিরিয়ে দেবে, এই কি তোমার ইচ্ছা? কী, ব্যাপার কী? ওখানে, ঐ সূর্যাস্তের কাছে, কী হচ্ছে এখন? এর অর্থ কী? ওরা দাঁড়িয়ে আছে কেন? না। সব শেষ। ওরা চলতে শুরু করেছে। ওরা চ’লে গেলো। শেষবারের মতো বাড়িটা দেখার জন্যই নেমেছিলো সে। না কি দেখতে চাইছিলো আমি রওনা হয়েছি কিনা? আমি আসছি কিনা ওদের পেছনে-পেছনে? ওরা চ’লে গেলো।’

বরাতজের থাকলে, সূর্য যদি খুব তাড়াতাড়ি ডুবে না যায় (অঙ্ককারে ওদের সে দেখতে পাবে না), তাহ’লে আবার চকিতে দেখা যাবে ওদের, শেষবারের মতো, খাদের ওপারে, দুই রাত্রি আগে যেখানে নেকড়ে ডেকেছিলো সেই মাঠের ওপরে।

সেই মুহূর্তটুকুও এসে চ’লে গেলো। দিগন্তের নীল তুষার-রেখার ওপরে এখনো বুলে আছে ঘন-লাল বলের মতো সূর্য, বরফে ঢাকা জমি লোভীর মতো শুবে নিচ্ছে সেই রসালো আনারসি আলো, এমনি সময়ে পলকে দেখা দিয়ে মিলিয়ে গেলো ওদের স্নেজ। ‘বিদায়, লারা, যতোদিন না স্বর্গে গিয়ে আবার তোমার দেখা পাই, ততোদিনের জন্য বিদায়, প্রিয়া আমার, আমার অফুরন্ত, চিরন্তন আনন্দ। আর কখনো তোমাকে আমি দেখবো না, আর কখনো, কখনো দেখবো না আমি তোমাকে।’

অঙ্ককার হ’য়ে এলো। দেখতে-দেখতে স্নান হ’য়ে এলো বরফের ওপরে ব্রোঞ্জ-লাল সূর্যাস্তের আলো, হঠাৎ মিলিয়ে গেলো। বেগনি-হ’য়ে-আসা লাইলাক-রঙের সন্ধ্যালগ্নে পূর্ণ হ’য়ে উঠলো কোমল, ছাইরঙা সুদূর, তার ধোয়াটে কুয়াশায় মলিন হ’য়ে গেলো পথের ধারে বার্চগাছগুলি—যেন হালকা হাতে আঁকা হ’য়ে আছে গোলাপি আকাশের গায়ে—এমন স্নান সেই আকাশ, যেন হঠাৎ অগভীর হ’য়ে গেছে।

শোকে দৃষ্টিশক্তি তীব্র হয়েছে ইউরির, লক্ষ্য করার ক্ষমতা শতগুণে বৃদ্ধি পেয়েছে। তার চারদিককার হাওয়াটুকুও অনন্য মনে হচ্ছে তার। তার জীবনে যা-কিছু ঘটলো তার সাক্ষী ও বন্ধু হিসেবে অনুকম্পার নিশ্বাস ফেলছে এই সন্ধ্যা। এমন গোখলি যেন আগে কখনো আসেনি, সন্ধ্যা যেন এই প্রথম নেমে এলো তার শোকে, তার নিঃসঙ্গতায় সান্ত্বনা দিতে। যেন ঐ উপত্যকা ঘিরে চিরকাল এমন বন ছিলো না, দিগন্তের দিকে পিঠ ফিরিয়ে ঐ যে পাহাড়গুলো

দাঁড়িয়ে আছে, তার ওপর আগে জন্মায়নি গাছপালা, এইমাত্র মাটি ফুড়ে উঠে দাঁড়ালো ঐ তরুশ্রেণী, তাকে সান্ত্বনা দেবার উদ্দেশ্য নিয়ে উঠে এলো।

সেই প্রহরের স্পর্শণীয় সৌন্দর্যকে ইউরির মনে হ'লো বন্ধুর ভিড়ের মতো, প্রায় যেন হাত নেড়ে সে সরিয়ে দিতে চাইলো তাদের. প্রায় কথা ব'লে উঠলো দীর্ঘায়িত অন্তরাগের উদ্দেশে: 'ঠিক আছে—ঠিক আছি আমি—ধন্যবাদ।'

বারান্দায় দাঁড়িয়েই বন্ধ দরজার দিকে মুখ ফেরালো সে, পৃথিবীর দিকে পিঠ ফিরিয়ে দিলে। 'সূর্য অন্ত গেলো। আমার আলো—আমার সূর্য—অন্ত গেলো।' কে যেন তার মনের মধ্যে বার-বার আউড়ে যাচ্ছিলো, যেন মুখস্থ ক'রে রাখতে চায় কথাটাকে। মুখ ফুটে উচ্চারণ করবে এমন শক্তি নেই তার।

বাড়ির ভেতরে গেলো সে। তার মনের মধ্যে দুটো আলাপ যুগপৎ চলছে, একটা শুকনো ব্যাবসম্বাধি, অন্যটা লারার উদ্দেশে বন্যার নদীর মতো।

'এবার আমি মন্সো যাবো,' ইউরি ভাবতে লাগলো। 'প্রথম কাজ হ'লো প্রাণে বাঁচা। অনিদ্রারোগকে প্রশয় দিলে চলবে না। শুতেই যাবো না একেবারে। সারারাত কাজ, যতোক্ষণ না ঘুমে ঢ'লে পড়ি। হ্যাঁ, আর-এক কথা, শোবার ঘরের চুল্লিটা এখনই জ্বালাতে হবে, রাত্রে যেন জ'মে না যাই।'

কিন্তু ভেতরে-ভেতরে অন্য এক আলাপ চলছিলো। 'আর-একটুক্ষণ থাকবো আমি তোমার সঙ্গে, আমার অবিস্মরণীয় আনন্দ তুমি, যতোক্ষণ আমার বাছ, আমার হাত, আমার ঠোঁট তোমাকে ভুলে না যায়। কঁাদবো আমি তোমার জন্য, আমার শোক যেন অনন্ত হয়, তোমার যোগ্য হয় যেন। অন্তহীন আর্তি আর বেদনার ছবিতে তোমার স্মৃতি আমি লিখে রাখবো। তা লেখা না-হওয়া পর্যন্ত আমি থাকবো এখানেই, তারপর চ'লে যাবো। এইভাবে রচনা করবো তোমার মূর্তিকে। কেমন ক'রে আঁকবো তোমাকে কংগজে? যেমন, কোনো ভীষণ ঝড় সমুদ্রের তলদেশ পর্যন্ত তোলপাড় তুলে ব'য়ে গেলে, সমুদ্রের বড়ো-বড়ো প্রবলতম ঢেউগুলো তীরের ওপর চিহ্ন রেখে যায়—তেমনি ক'রে আঁকবো আমি তোমাকে। বামা, বিনুক, জলজ উদ্ভিদ, হালকা সব জঞ্জাল, অতি লঘু সেই সব জিনিস যা তলা থেকে উপড়ে এনেছে ঝড়, বালুর ওপর আঁকাবাঁকা রেখায় ছিটিয়ে দিয়েছে। দূরে মিলিয়ে যায় এই রেখা, বুঝিয়ে দেয় জোয়ারের জল কতোদূর উঠেছিলো। এমনি ক'রে তোমাকে তুলে এনেছিলো আমার জীবনের মধ্যে—আমার প্রেম, আমার গৌরব তুমি, আর এমনি ক'রেই আমি তোমার কথা লিখবো।'

ভেতরে এসে দরজা বন্ধ ক'রে কোট খুলে ফেললো সে। সেদিনই সকালে লারা খুব ভালো ক'রে গুছিয়েছিলো শোবার ঘরটি, কিন্তু যাবার আগে বাঁধাছাঁদার তাড়াছড়োয় আবার সব ওলোটপালোট হ'য়ে গেছে। সেই ঘরে এসে ইউরি যখন দেখলো বিছানা অগোছালো হ'য়ে আছে, চেয়ারে মেঝেতে বিশৃঙ্খল হ'য়ে ছড়িয়ে আছে জিনিসপত্র, তখন শিশুর মতো হাঁটু ভেঙে ব'সে পড়লো সে, খাটের শক্ত ধারটাতে বুক চেপে ধ'রে, বিছানার মধ্যে মুখ ঝুঁজে, ফুঁপিয়ে কঁদে উঠলো নির্বীণ বুক-ভাঙা উচ্চাসে। কিন্তু বেশিক্ষণ কঁাদলো না। একটু পরেই উঠে বসলো, তাড়াতাড়ি মুখ মুছে নিয়ে ক্লাস্ত, অন্যমনস্ক বিস্ময়ে তাকালো চারদিকে, তারপর কমারোভস্কির রেখে-যাওয়া ভদকার বোতল বের ক'রে, ছিপি খুলে একসঙ্গে আধ গেলাশ ঢেলে নিলে, তাতে বরফ আর জল মিশিয়ে নিয়ে লম্বা চুমুকে লোভীর মতো খেতে লাগলো; যেমন নিদারুণ ছিলো তার কামার হতাশা, প্রায় তেমনি তীব্র হ'লো এই আশ্বাদন।

ইউরির মনে কী যেন একটা হ'য়ে যাচ্ছে, যার কোনো মানে হয় না। পাগল হ'য়ে যাচ্ছে সে। এমন অদ্ভুতভাবে জীবনযাপন সে করেনি কখনো। বাড়ির দিকে তার মন নেই, নিজের দেখাশোনা করা সে বন্ধ ক'রে দিয়েছে, রাতকে পরিণত করেছে দিনে, আর লারা চ'লে যাওয়ার পর থেকে কতোদিন কাটলো তা আর মনে আনতে পারছে না।

ভদকা খাচ্ছে আর লারাকে নিয়ে লিখে চলেছে। কিন্তু যতো কেটে দিচ্ছে লেখা, যতো নতুন ক'রে লিখছে, ততোই তার কবিতার লারা দূরে স'রে যাচ্ছে লারার জীবন্ত প্রতিক্রিয়া থেকে, যে-লারা কাটিয়ার মা, যে-লারা কন্যাকে নিয়ে দূরের পথে পাড়ি দিয়েছে, তার কাছ থেকে দূরে স'রে যাচ্ছে।

এই সংশোধন ও পুনর্লিখনের একটি কারণ এই যে ইউরি খোজে জোরালো ও যথার্থ ভাষা। অন্য কারণ তার আন্তর সংযমের পরামর্শ, যা তার ব্যক্তিগত অভিজ্ঞতা ও অতীতের সত্য ঘটনার স্বাধীন প্রকাশের প্রতিবন্ধক; সে-সব ঘটনায় যারা লিপ্ত ছিলো তারা পাছে দুঃখিত বা আহত হয়, এই ভাবনা সে কাটাতে পারে না। সেইজন্যই বাস্তবের তপ্ত বাষ্পকে সে বের ক'রে দেয় তার কবিতা থেকে, কিন্তু তার ফলে রুগ্ন অথবা নিজীব হওয়া দূরে থাক, তার কবিতায় দেখা দেয় এক পুনর্মিলনের বিস্তীর্ণ শান্তি, যা বিশেষের গণ্ডি ছাড়িয়ে তাকে উর্ধ্বে তুলে নেয় সার্বভৌমে, সর্বজনের অধিগম্য ক'রে তোলে। এখানে শৌছবার জন্য সচেতনভাবে চেষ্টা করেনি সে; তা এসেছে স্বতঃপ্রবৃত্ত সাস্তুনার বাণীর মতো, যেন লারা তাকে বার্তা পাঠিয়েছে চলতে-চলতে, দূর থেকে সম্ভাষণ জানিয়েছে। যেমন হয় স্বপ্নে তাকে দেখলে বা কপালে তার স্পর্শ পাওয়া গেলে—এও তেমনি। ইউরি আনন্দিত হ'লো নিজের কবিতার এই উন্নয়ন দেখে।

বছ বছর ধ'রে ফাঁকে-ফাঁকে সে প্রকৃতি, দৈনন্দিন জীবন ও অন্য নানা বিষয়ে যে-সব মস্তব্য লিখে রাখছিলো—এখন লারার জন্য শোকসংগীত রচনা করতে-করতেই, সেইগুলিতেই সে নতুন সংযোজন করতে লাগলো। বরাবর যেমন হয়েছে, এবারেও তেমনি লিখতে বসামাত্র ব্যক্তি ও সমাজের জীবন বিষয়ে চিন্তার ঢেউ উঠলো তার মনে।

আবার সে ভেবে দেখলে যে ইতিহাস সন্ধক্ষে, যাকে বলা হয় ইতিহাসের ধারা, সে-সম্বন্ধে প্রচলিত রীতি অনুসারে সে চিন্তা করে না, উদ্ভিদজগতে সে ইতিহাসের উপমা খুঁজে পায়। শীতকালে, বরফের তলায় বনের পাতা-ঝরা গাছের শুকনো ডাল বুড়োমানুষের আঁচিলের চুলের মতোই রোগা আর দীন হ'য়ে থাকে। কিন্তু বসন্ত এলে কয়েকদিনের মধ্যেই বদলে যায় বনের চেহারা, আকাশের মেঘে মাথা ঠেকে তার, পাতার জালে লুকিয়ে থাকা বা হারিয়ে যাওয়া আমাদের পক্ষে খুবই সহজ তখন। এই রূপান্তরের সময়ে জন্তুর চাইতেও দ্রুতগতিতে এগিয়ে চলে বন, কারণ জন্তুর উদ্ভিদের গতিতে বৃদ্ধি পায় না; অথচ এই গতি চোখে দেখতে পাওয়া অসম্ভব। বন তার জায়গা বদলায় না, যদি অপেক্ষাও ক'রে থাকি তাকে নড়তে দেখবো না আমরা। যতোই না তাকিয়ে থাকি আমরা, দেখবো বন স্থবির। সমাজ-জীবনের চিরন্তন বৃদ্ধি ও অস্তুহীন পরিবর্তনও আমাদের চোখে এইরকম নিশ্চল ব'লে মনে হয়, ইতিহাস তার বিরামহীন রূপান্তরের দ্বারা এইভাবেই এগিয়ে চলে। এই বসন্তের বনের মতো।

টলস্টয়ও ঠিক এইভাবেই ভাবতেন; কিন্তু তাঁর চিন্তা স্পষ্ট ক'রে প্রকাশ করেননি তিনি। নেপোলিয়ন অথবা অন্য কোনো শাসক বা সেনাধ্যক্ষ ইতিহাসকে গতিশীল করেন, এ-কথা অস্বীকার করেছিলেন তিনি, কিন্তু তাঁর চিন্তাধারাকে শেষ পর্যন্ত টেনে নিয়ে যাননি। ইতিহাসের স্রষ্টা ব'লে কেউ নেই। ইতিহাস কেউ সৃষ্টি করতে পারে না; ইতিহাস কেউ দেখতেও পায় না, যেমন দেখতে পায় না ঘাস কি ক'রে বেড়ে ওঠে। যুদ্ধ ও বিপ্লব, রাজা ও রবস্পীরের দল হ'লো ইতিহাসের কিঞ্চিৎ তার জৈবঘটক। কিন্তু বিপ্লব যারা রচনা করে, তারা হ'লো ধর্মোন্মাদ কন্নী পুরুষ, মন তাদের একটিমাত্র পথে চলতে পারে, তাদের চিন্তের সংকীর্ণতাই প্রায় প্রতিভার

পর্যায় গিয়ে পৌছোয়। কয়েক ঘণ্টা কি কয়েক দিনের মধ্যে পুরোনো ব্যবস্থাকে উল্টে দেন তারা; পুরোপুরি প্রলয় ঘটে মাত্র কয়েকটা সপ্তাহ, অথবা বড়ো জোর কয়েকটা বছরের মধ্যে, কিন্তু তারপর যুগের পর যুগ, শতাব্দীর পর শতাব্দী ধ'রে পবিত্রজ্ঞানে পূজো করা হয় সেই সংকীর্ণতাকে, যা সেই প্রলয় ঘটিয়েছিলো।

লারায় জন্য বিলাপ করতে-করতে মেলিউজ্জাইয়েভোর সেই সুন্দর গ্রীষ্মের জন্য সে শোকাকর্ষ হ'লো। যখন বিপ্লব স্বর্গ থেকে দেবতার মতো নেমে এসেছিলো মাটিতে, সেই গ্রীষ্মের দেবতার মতো, যে-গ্রীষ্মে প্রত্যেকেই তার নিজের মতো ক'রে পাগল হ'য়ে গিয়েছিলো, যখন প্রত্যেকের জীবন প্রতিষ্ঠিত ছিলো স্বাধিকারে, কোনো উন্নত নীতির সমর্থনসূচক শাস্ত্রের দৃষ্টান্ত-রূপে নয়।

টুকরো লেখার আঁকিঁকির এক ফাঁকে সে তার একটা পুরোনো মতের আবার উল্লেখ করলে। শিল্পকলার ধর্মই হ'লো সৌন্দর্যের সেবা, আর সৌন্দর্য মানে রূপপরিগ্রহের আনন্দ, আর রূপ হ'লো প্রাণীজীবনের মূলসূত্র। কেননা কোনো জীবিত প্রাণী তা ভিন্ন অস্তিত্ব পেতে পারে না। অতএব প্রতিটি শিল্পপদ, তার মধ্যে ট্রাজেডিও পড়ে, অস্তিত্বের আনন্দে অংশ নেয়। আর তার নিজের চিন্তা ও রচনাও আনন্দ দিলো তাকে, এমন বেদনাময় অশ্রুতে তা আশ্রিত যে তার মাথার মধ্যে টনটন করে, তাকে অবসাদে জীর্ণ ক'রে দেয়।

সামডেভইয়াউভ তার সঙ্গে দেখা করতে এসেছিলো। সেও ভদকা এনেছিলো, আর গল্প শুনিয়েছিলো আশ্চর্য্য তার মেয়েকে নিয়ে কেমন ক'রে কমারোভস্কির সঙ্গে চ'লে গেছে। রেল-পথ ধ'রে ট্রলি ক'রে এসেছে সে, ইউরিকে বকাবকি করেছে ঘোড়াটার ঠিকমতো যত্ন নেয়নি ব'লে, তারপর ঘোড়া নিয়ে চ'লে গেছে—'আরো তিন-চারদিনের জন্য ওটা রেখে যান,' ইউরির এই অনুরোধ উপেক্ষা ক'রে। তবে এও ব'লে গেছে যে এই সপ্তাহের মধ্যেই আবার এসে ইউরিকে চিরকালের মতো ভারিকিনো থেকে নিয়ে যাবে।

মাঝে-মাঝে নিজেকে কাজে ডুবিয়ে দেবার পর, ইউরির হঠাৎ লারাকে মনে প'ড়ে যায়, এতো স্পষ্ট যেন সে তার সামনে দাঁড়িয়ে আছে, তার এই সর্বনাশের তীব্রতা ও ম্লানতার চাপে ভেঙে পড়ে ইউরি। ছেলেবেলায় মায়ের মৃত্যুর পর কলোগ্রিভভদের বাগানের গ্রীষ্মকালীন সম্ভারের মধ্যে পাখির ডাকে সে যেমন তার মায়ের গলা শুনতে পেয়েছিলো, এখনো তেমনি লারার অভ্যস্ত কণ্ঠস্ব, যা তারই জীবনের এক অবিচ্ছিন্ন অংশ, তা যেন খেলা করতে লাগলো তার সঙ্গে, সে যেন শুনলে অন্য ঘর থেকে লারা ডাকছে, 'ইউরা।'

সেই সপ্তাহের মধ্যে এই রকম বিব্রম আরো অনেক হ'লো তার। শেষের দিকে একদিন রাতে তার ঘুম ভেঙে গেলো এক অদ্ভুত দুঃস্বপ্ন দেখে। দেখলে তার বাড়ির তলায় এক ড্যাগন বাসা বেঁধেছে। ইউরি চোখ খুলে দেখলো, পাঁহাড়ের খাড়াই থেকে একটা আলো এসে পড়েছে—রাইফেলের গুলির শব্দ ও প্রতিধ্বনি তার কানে এলো। আশ্চর্যের বিষয়, এই অস্বাভাবিক অভিজ্ঞতার কয়েক মুহূর্ত পরেই আবার ঘুমিয়ে পড়লো সে, আর সকালে উঠে মনে হ'লো ওটা নিছক স্বপ্ন।

১৫

আরো দু'একদিন পরে যা ঘটলো তা এই:

ইউরি শেষ পর্যন্ত স্থির করলে যে বুদ্ধি হারালে চলবে না, যদি আত্মহত্যা করতেই হয় তাহ'লে এর চাইতে দ্রুত ও কম যন্ত্রণাদায়ক কোনো উপায় বের করতে হবে। প্রতিজ্ঞা করলে, সামডেভইয়াউভ এলেই ব'লো হ'য়ে পড়বে।

সন্ধ্যা নামার একটু আগে, তখনো আলো আছে, বরফের ওপর সে পায়ের শব্দ শুনতে পেলো। দৃঢ়, সহজ পদক্ষেপে কে যেন বাড়ির দিকে এগিয়ে আসছে।

কী অদ্ভুত। কে হ'তে পারে? সামডেভইয়াটভের তো ঘোড়া আছে, পায়ে হেঁটে আসবে না সে। আর ভারিকিনো তো শূন্য পুরী। 'আমার কাছে আসছে,' ইউরি ভাবলে: 'শহরে যাবার ডাক অথবা হুকুম এসেছে। কিংবা আমাকে গ্রেপ্তার করতে আসছে।—না, তাহ'লে দু'জন থাকতো, সঙ্গে গাড়িও থাকতো আমাকে নিয়ে যাবার জন্য। মিকুলিংসিন বোধহয়,' এ-কথা মনে ক'রে খুশি হ'লো সে, পায়ের শব্দও চেনা ব'লে কল্পনা করলো। তখনো সেই অজানা অতিথি দরজার ভাঙা হাতল হাৎড়াচ্ছে, যেন সেখানে তালা খুলবে ব'লে আশা করেছিলো সে; দুই ঘরেব মাঝখানকার দরজা খুলে সম্পূর্ণ আত্মস্থভাবে ভেতরে ঢুকে সময়ে দরজা আবার ভেজিয়ে দিলে, সব যেন তার পরিচিত।

দরজার দিকে পেছন দিয়ে টেবিলে ব'সে ছিলো ইউরি। উঠে দাঁড়িয়ে যখন মুখ ফেরালো 'আগন্তুকটি ততোক্ষণে ঘরের প্রান্তে এসে দাঁড়িয়েছে, মুতের মতো স্তব্ধ হ'য়ে দাঁড়িয়ে আছে সেখানে।

'কী চান?' সর্বপ্রথম যে-নিরপেক্ষ শব্দগুলি ইউরির মনে এলো তাই উচ্চারণ করলে সে, কোনো জবাব না-পেয়ে বিস্মিত হ'লো না।

আগন্তুকের দেহ শক্তিশালী ও সূঠাম, মুখ সুস্রী। পরনে প্যাণ্ট আর ফার-এর জ্যাকেট, পায়ে ভেড়ার চামড়ার জুতো, কাঁধে রাইফেল ঝুলছে।

লোকটির আসাতে নয়, আসার সময়টার জন্যই ইউরির অবাক লাগলো। বাড়িটায় বসবাসের চিহ্ন ছিলো ব'লে এর জন্য প্রস্তুত হ'য়েই ছিলো সে। বলা বাহুল্য, বাড়ির ভাঁড়ারে যে-সব জিনিস সে দেখেছিলো এই লোকটি তার মালিক, মিকুলিংসিনরা যে ও-সব ফেলে রেখে যায়নি তা তো সে জানেই। লোকটির চেহারায় কিছু-একটা যেন চেনা-চেনা মনে হ'লো ইউরির, মনে হ'লো আগে সে একে দেখেছে।

ইউরি আশা করতে পারতো যে অতিথিটি তাকে দেখে অবাক হবে, কিন্তু তা হ'লো না। হয়তো আগেই শুনেছে যে বাড়িতে কেউ আছে, তার নামও জানে হয়তো। হয়তো সে এমনকি ইউরিকে চিনতেও পেরেছে।

'ও কে?' ও কে?' ইউরি মনে করার জন্য প্রাণপাত করলে। 'কী মুশকিল, কোথায় খেঁখছি একে? সেই যে...মে মাসের সকালবেলা, বেজায় গরম, কোন বছরে তা ঈশ্বর জানেন। রাজ্‌ভিলইয়ে রেল-স্টেশন। কমিসারের গাড়ি...কোনো কিছু ভালো হবার আশা নেই। কাটিখোট্টা মতামত, এক-তরফা মন, কঠোর নীতি আর নিজের সাধুতায় অপরিসীম পরিতৃপ্তি।...স্টেলনিকভ!'

১৬

ঘণ্টার পর ঘণ্টা তারা কথা ব'লে চলেছে। ঠিক তেমনি মরীয়া হ'য়ে পাগলের মতো কথা বলছে তারা, যে-ভাবে রুশবাসী রাশিয়ানরাই শুধু বলতে পারে—বিশেষত সেই উদ্বেগে আর আতঙ্কে ভরা দিনগুলিতে যে-ভাবে কথা বলতো তারা।

বিচলিত অবস্থায় সব মানুষই কথা বলে, কিন্তু ক্রমাগত কথা ব'লে চলার অন্য কারণও ছিলো স্টেলনিকভের।

অনবরত কথা বললো স্টেলনিকভ, অবিরাম চেষ্টা করলো কথার বিষয় যাতে ফুরিয়ে না যায়: কিছুতেই একা হ'তে সে চায় না। কিসের ভয় তার? নিজের বিবেকের, না তাকে ঘিরে-খাকা বেদনাময় স্মৃতির, না কি তার যন্ত্রণার কারণ সেই আত্ম-অতৃপ্তি যা মানুষকে তার নিজের কাছেই এতো ঘৃণ্য আর অসহ্য ক'রে তোলে যে লজ্জায় আত্মহত্যা করতে পারে সে? না কি কোনো ভীষণ ও চরম সিদ্ধান্ত সে নিয়েছে, তা মনের মধ্যে পোষণ ক'রে একা থাকতে ইচ্ছে করছে না

তার, সেই সিদ্ধান্ত পালন করতে দেরি করছে ইউরির কাছাকাছি থেকে, তার সঙ্গে কথাবার্তা ব'লে?

তা যা-ই হোক, এটা স্পষ্ট যে কোনো বিশেষ কথা সে গোপন ক'রে রেখেছে, তা ভার হ'য়ে চেপে আছে তার মনের ওপর, তাই আরো বেশি উচ্ছ্বসিত হ'য়ে প্রাণ ঢেলে কথা বলছে অন্য সমস্ত বিষয় নিয়ে।

এই যুগের এটাই ব্যাধি, এই বিপ্লবী অপ্রকৃতিস্থতা: মুখে যা বলে, বাইরে থেকে যেমনটি দেখায়, প্রত্যেকের ভেতরটা তা থেকে একেবারে আলাদা। কারো বিবেক আর নির্মল নেই। প্রত্যেকেরই একথা ভাবার কারণ আছে যে সে সব-কিছুর জন্য অপরাধী, সে জোচ্চোর, ধরা পড়েনি এমন কোনো বদমাস। তুচ্ছতম ওজুহাত পেলেই প্রত্যেকে আত্ম-নির্যাতনের উৎসব-চিন্তায় ভেসে যেতে পারে। নিজেদের অসম্মান করছে লোকেরা, দোষী ব'লে নিজেদেরই ধরিয়ে দিচ্ছে—তা শুধু ভয়েই নয়, স্বেচ্ছাতেও, অসুস্থ এক ধ্বংসোন্মুখ বাসনার ঝোঁকে, যেন এক অলৌকিক মূর্খার ঘোরে ধরা দিচ্ছে আত্ম-নিপীড়নের সেই দুরন্ত আবেগে, একবার রাশ ছেড়ে দিলে আর যাকে থামানো যায় না।

উচ্চপদস্থ সৈনিক সে, প্রায়ই নিশ্চয় সামরিক আদালতে তাকে বিচারক হ'তে হয়েছে, আর সেই হিসেবে নিশ্চয়ই অনেক দণ্ডিত ব্যক্তির স্বীকারোক্তি পড়েছে সে, তাকে শুনতে হয়েছে অনেক এজাহার। আর এখন তার ঝোঁক হয়েছে নিজের মুখোশ ছিঁড়ে ফেলে তার সারা জীবনকে যাচাই ক'রে দেখবে, হিসেব মেলাবে জমা-খরচের—আর সেই জোঁরো উত্তেজনার ঘোরে সব-কিছু বীভৎসভাবে বিকৃত ক'রে দেখছে সে।

অসংলগ্নভাবে সে কথা বলছিলো, লাফিয়ে চলছিলো এক স্বীকারোক্তি থেকে আর এক স্বীকারোক্তিতে।

‘এই সবই ঘটেছিলো চিটা-র কাছে...দেৱাজে আলমারিতে অদ্ভুত সব জিনিস দেখে আপনি কি অবাক হয়েছিলেন? লাল পশ্টন যখন পূর্ব সাইবেরিয়া দখল করলো তখন আমরা জোর ক'রে যে-সব মালপত্র কেড়ে নিয়েছিলাম, ওগুলো তারই অংশ। আমি নিজে ওগুলো ব'য়ে আনি নি এখানে, তা বোধহয় না-বললেও চলে। বিশ্বাসী অনুচর আমি পেয়েছি সব সময়, সেদিক থেকে আমার ভাগ্য ভালো বলতে হবে। এই সব মোমবাতি, দেশলাই, কফি, চা, লেখার সরঞ্জাম—সবই হ'লো যুদ্ধের কেড়ে-নেওয়া মাল—কিছু চেক, কিছু ইংরেজ ও জাপানি। অদ্ভুত, নয় কি? “নয় কি” আমার স্ত্রী একথাটা খুব বলতেন, নিশ্চয়ই লক্ষ্য করেছেন? এখানে এসে প্রথমে আপনাকে বলবো কিনা ঠিক করতে পারছিলাম না, কিন্তু এখন স্বীকার করতে বাধ্য নেই—আমি ওকে দেখতেই এসেছিলাম, আর আমার মেয়েকে। ওরা এখানে আছে এ-স্বরটা খুব দেরিতে শৌচেছিলো আমার কাছে। তাই দেখা হ'লো না। কানাঘুষোয় যখন শুনলাম যে আপনি ওর কাছে আছেন, আর যখন আমার কাছে আপনার নাম করা হ'লো, তখন —কেমন ক'রে তা হ'লো বলতে পারবো না কিন্তু এই ক'বছরে যে হাজার-হাজার মুখ আমি দেখেছি তার মধ্য থেকে এক ডাক্তার জিভাগোকে তৎক্ষণাৎ মনে পড়লো আমার, সওয়াল-জবাবের জন্য যাকে একবার আমার কাছে নিয়ে আসা হয়েছিলো।’

‘তখন আমাকে গুলি ক'রে মারার হুকুম দেননি কেন, তা ভেবে কি অনুতপ্ত হয়েছিলেন?’ প্রশ্নটাকে গ্রাহ্য করলো না স্ট্রেলনিকভ। হয়তো শুনতেও পেলো না। নিজের ভাবনায় মগ্ন হ'য়ে সে তার স্বগতোক্তি চালিয়ে যেতে লাগলো।

‘ঋণবতই—ঈর্ষান্বিত হয়েছিলাম—অবশ্য এখনো ঈর্ষান্বিত হ'য়েই আছি। তাছাড়া আর কী আশা করেন?...মাত্র কয়েকমাস আগে এই অঞ্চলে এসেছি আরো পূর্বের দিকে আমার পালাবার জায়গাগুলির খোঁজ তখন ওরা পেয়ে গেছে; মিথ্যা অভিযোগে সামরিক দণ্ড পেতে হবে আমাকে। এর কী ফল বোঝা কঠিন নয়। আমি দোষী নই। ভেবেছিলাম অবস্থাগতিক একটু

ভালো হ'লে নিজের সপক্ষে যুক্তি দেখিয়ে আবার সুনাম ফিরে পাবার আশা আছে, তাই সুযোগ থাকতে-থাকতে, আমাকে গ্রেপ্তার করার আগেই, পালানো ঠিক কবলাম। ভেবেছিলাম, আপাতত লুকিয়ে থাকবো, সম্মাসীর জীবন যাপন করবো, ঘুরে বেড়াবো। হয়তো সফলও হতাম যদি না এক বাচ্চা শয়তান ন্যাকামি ক'রে আমার সব কথা জেনে ফেলে তারপর বিশ্বাসঘাতকতা করতো।

‘তখন শীতকাল, সাইবেরিয়ার মধ্য দিয়ে পায়ে হেঁটে, অনাহারে, লোকচক্ষুর আড়ালে থেকে পশ্চিম দিকে পালচ্ছিলাম। জমিট বরফের মধ্যে অথবা ট্রেনের, কামরায় আমি ঘুমোতাম—সাইবেরিয়ার মেন লাইন জুড়ে বরফে চাপা-পড়া অন্তহীন ট্রেনের সারি দাঁড়িয়ে থাকতো।

‘যাই হোক, এই ছেলেটার সঙ্গে দেখা হয়েছিলো, একেবারে রাস্তার ভিখিরির হাল, বললে, পাটিজানরা তাকে মৃত্যুদণ্ড দিয়েছিলো, কিন্তু বন্দুকের সামনে থেকে সে পালিয়েছে—অন্যান্য কয়েদিদের সঙ্গে তাকেও লাইনে দাঁড় করিয়ে দিয়েছিলো, কিন্তু ও শুধু আহত হ'লো একটি, তারপর মৃতদেহের স্তূপের মধ্য থেকে হামাগুড়ি দিয়ে বেরিয়ে এসে জঙ্গলে পালিয়ে গেলো, সেখানে সেরে ওঠার পর অনবরত এখান থেকে ওখানে সে পালিয়ে বেড়াচ্ছে, ঠিক আমারই মতো। এটা অবশ্য ওর গল্প। খারাপ ছিলো ছেলেটা, মুর্থ, স্বভাবও বিস্ত্রী; কুড়েমির জন্য স্কুল থেকে ওকে তাড়িয়ে দেওয়া হয়েছিলো।’

স্টেলনিকভ যতোই খুঁটিয়ে বর্ণনা দিতে লাগলো, ইউরির ততোই মনে হ'তে লাগলো যে ছেলেটি তার চেনা।

‘তার নাম কি টেরেস্টি গালুজিন?’

‘হ্যাঁ, তা-ই।’

‘তাই’লে পাটিজানদের হাতে মৃত্যুদণ্ডের বিষয়ে ও যা বলেছে সব সত্যি। একটা কথাও ওর বানানো নয়।’

‘ছেলেটার একটিমাত্র গুণ তার মাতৃভক্তি। জামিন হিসেবে গুলি ক'রে মারা হয়েছিলো তার বাবাকে, মা হাজতে, আর মায়েরও খুব সম্ভব ঐ দশাই ঘটবে এ-কথা শুনে, ছেলেটা ঠিক করলে যে মাকে উদ্ধার করার জন্য যথাসাধ্য চেষ্টা করবে। স্থানীয় থানায় চ'লে গেলো সে, ধরা দিলো, বললো তাদের জন্য কাজ করতে রাজি আছে। তারা ওকে মাপ করতে রাজি হ'লো এই শর্তে যে কোনো মূল্যবান তথ্য সে ফাঁস ক'রে দেবে। আমার লুকোবার জায়গাটির খবর সে ব'লে দিলে ওদের। কিন্তু ভাগ্যক্রমে আমি ঠিক সময়ে পালিয়ে গিয়েছিলাম।

‘প্রভূত চেষ্টার দ্বারা, অন্তহীন ঘটনাজালের মধ্য দিয়ে আমি সাইবেরিয়া পেরিয়ে রাশিয়ার এই অঞ্চলে পৌঁছেছিলাম। এখানে সকলেই আমাকে এতো ভালো ক'রে চেনে যে আমাকে এখানে খুঁজে পাবার আশা কখনোই তারা করবে না—তা-ই ভেবেছিলাম আমি। হাবা কি আর এতোদূর ভাববে যে এখানে আসার মতো কলজে আছে আমার! আর সত্যিও অনেকদিন পর্যন্ত ওরা চিটা-র আশেপাশে আমাকে খুঁজে বেড়িয়েছে, আর আমি এই বাড়িতে বা এরই কাছাকাছি কোথাও—নিরাপদ ব'লে জানি এমন দু'একটি বাড়িতে লুকিয়ে থেকেছি। কিন্তু সে-সব এখন শেষ হ'য়ে গেছে। ওরা খোঁজ পেয়ে গেছে আমার। এই দেখুন না, এক্ষুনি রাত হ'য়ে যাবে, আর রাত আমার ভালো লাগে না—বহুকাল ধ'রে রাতে আমি ঘুমোয়নি তো। কী বিস্ত্রী ঘুমোতে না পারা, তা তো জানেন। যদি আমার মোমবাতি এখনো দু'একটা থেকে থাকে—এই তো, ভালো না এগুলো? খাঁটি চর্বির মোমবাতি! এবার কি আরো খানিকক্ষণ কথাবার্তা বলা যায় না? আসুন—আরো বলা যাক—যতোক্ষণ আপনার অসহ্য না লাগে, সারা রাত ধ'রে, বিনাসের মতো, মোমের আলোয় কথা বলি আসুন।’

‘আপনার মোমবাতি সবই আছে। মাত্র এক বাণিল খুলেছিলাম আমি। এখানে প্যারায়িন খুঁজে পেয়ে তা-ই ব্যবহার করছি।’

‘রুটি আছে?’

‘না।’

‘কী খেয়ে বেঁচে আছেন তাহ’লে? কী বোকার মতো প্রশ্ন। নিশ্চয়ই আলু?’

‘ঠিক। যতো ইচ্ছে আলু। যারা আগে এখানে ছিলেন, তাঁদের ছিলো গোছালো সংসার। আলু মজুত রাখার কায়দাটা খুব ভালো জানতেন; চমৎকার আছে সব ভাঁড়ারে—প’ড়েও যায়নি, জ’মেও যায়নি।’

হঠাৎ স্টেলনিকভ বিপ্লবের কথা তুললো।

১৭

‘এর কিছুই কোনো অর্থ নেই আপনার কাছে, আপনি বুঝতে পারেননি ব্যাপারটা। একেবারে অন্য ভাবে মানুষ হয়েছেন। ছিলো অন্য এক জগৎ—সেখানে বস্তি, ভাড়াটে বাড়ি, রেলের লাইন, শহরতলি। সেখানে ক্রন্দ, ক্ষুধা, ঘেঁষাঘেঁষি ভিড়, শ্রমিকের মনুষ্যত্বের অবমাননা, নারীর অপমান। আর তারই পাশে ছিলো আদুরে খোকাদের জগৎ, ঝকঝকে ছাত্র তার বাসিন্দা, আর ধনী ব্যবসায়ীর ছেলেরা; সেখানে শাস্তি পাবার ভয় নেই, পাপ সেখানে উদ্ধৃত ও নির্লজ্জ; যারা দরিদ্র, অপহৃত, অপমানিত, আর যে-সব মেয়েদের ভুলিয়ে নিয়ে পথে বসিয়ে ছেড়েছে, তাদের চোখের জলকে কাঁধ নেড়ে বা হেসে উড়িয়ে দেয় ধনীরা; সেই পরজীবীদের রাজত্ব, যাদের একমাত্র বৈশিষ্ট্য এই যে তারা কখনো কোনো বিষয়ে চিন্তা করেনি, কখনো কিছু দেয়নি পৃথিবীকে, কোনো স্মৃতি তাদের অস্তিত্বের পেছনে রেখে যায়নি।

‘কিন্তু আমাদের কাছে জীবন মানেই অভিযান। যাদের ভালোবেসেছি তাদের জন্য অসাধ্যসাধন করেছি, আর যদি দুঃখ ছাড়া আর-কিছু তাদের না-দিয়ে থাকি, তাহ’লেও এ-কথা সত্য যে তাদের কেশাগ্রভাগেও আঘাত করতে চাইনি আমরা, আর তাদের চেয়ে নিজেরাই বেশি দুঃখ পেয়েছি।’

‘কিন্তু আগে একটা কথা আপনাকে বলা আমার কর্তব্য। ভারিকিনো ছেড়ে চ’লে যেতেই হবে আপনাকে; আপনার কাছে প্রাণের কোনো মূল্য যদি থাকে তাহ’লে আর দেরি করবেন না। ওরা আমার পেছন-পেছন এসে পড়লো ব’লে, আর আমার ভাগ্যে যা-ই থাক, তার মধ্যে আপনিও জড়িয়ে পড়বেন তখন। ইতিমধ্যেই জড়িত হয়েছেন আপনি, এই যে এখন আমার সঙ্গে কথা বলছেন, তাতেই। অন্য সব না-হয় বাদই দিলাম, এখানে নেকড়ে প্রচুর; সেদিন রাত্রে জঙ্গল থেকে বেরোবার সময় আমাকে গুলি ক’রে-ক’রে পথ চলতে হয়েছিলো।’

‘আপনিই গুলি ছুঁড়ছিলেন তাহ’লে?’

‘হ্যাঁ, আমিই তো। আপনি নিশ্চয় শুনেছিলেন গুলির শব্দ? আর-একটা লুকোনো জায়গার দিকে চলেছিলাম, কিন্তু সেখানে পৌছোবার আগেই এমন অনেক লক্ষণ দেখতে পেলাম যাতে মনে হ’লো সে-জায়গাটার খোঁজ ওরা পেয়ে গেছে। যারা সেখানে ছিলো তাদের বোধহয় গুলি করা হয়েছে। বেশিক্ষণ আপনার কাছে থাকবো না। রাতটুকু কাটিয়ে সকালবেলাই চ’লে যাবো...যাই হোক, আমি পুরোনো কথায় ফিরে যাই, কী বলেন?’

‘এমন নয় যে শুধু মস্কোতে বা রাশিয়াতেই ছিলো এইসব তেভেরস্কায়া-ইয়ামস্কায়া স্ট্রীট’, যেখানে শৌখিন টুপি আর মোজা পরা লম্পট যুবকের দল ভাড়াটে গাড়িতে ভাড়াটে ছুঁড়িদের

নিয়ে ঘুরে বেড়ায়। সেই রাস্তা, রাস্তার সেই নৈশ জীবন, গত শতকের নৈশ জীবন, সেই ঘোড়দৌড়ের ক্ষোড়া অমর লম্পটের দল—পৃথিবীর সব শহরেই তাদের অস্তিত্ব ছিলো।

‘ঠিক—তা-ই ছিলো। কিন্তু উনিশ শতকে যা একা দিয়েছে, ক’রে তুলেছে একটি স্বতন্ত্র ঐতিহাসিক যুগ, তা হ’লো সোশ্যালিজম। বিপ্লব, সেই সব আত্মত্যাগী যুবক, যারা ব্যারিকেডে প্রাণ দিয়েছে, সেই সব প্রচারক, খাঁরা মাথা ঝুঁড়ে-ঝুঁড়ে বেব করতে চেয়েছেন কেমন ক’রে ধনের পাশবিক দস্তকে দমন ক’রে দরিদ্রকে মানুষের মর্যাদা ফিরিয়ে দেওয়া যায়। এমনি ক’বে মার্ক্সবাদের অভ্যুত্থান হ’লো। তা এসে উদযাটিত ক’রে দিলে পাপের মূল, আবিষ্কার করলো তার চিকিৎসা, হ’য়ে উঠলো বৃহত্তম যুগশক্তি।

‘ভেবরস্কায়-ইয়ামস্কায় স্ট্রীটে সব ছিলো—এই বীরত্ব ও কদর্যতা, বস্তি ও পাপাচার, ছিলো ঐতিহাসিক ঘোষণা আর ব্যারিকেডে মৃত্যু।

‘আপনি ভাবতে পারবেন না কী সুন্দর ছিলো সে, যখন ছেলেবেলায় স্কুলে পড়তো।’ তার কোনো ধারণা নেই আপনার। ওর স্কুলের এক বন্ধু থাকতো আমাদের পাশের বাড়িতে; ভাড়াটেরা বেশির ভাগ ছিলো ব্রেস্ট রেল-লাইনের কর্মচারী—তখনকার দিনে ব্রেস্ট লাইন বলা হ’তো—তারপর অবশ্য অনেকবার নাম বদল হ’লো।—আমার বাবা—এখন তিনি ইউরিয়্যাটিন বিপ্লবী বিচারালয়ের সদস্য—বাবা ছিলেন স্টেশনের ফোরম্যান। সেই বাড়িতে যেতাম আমি, সেখানে ওকে দেখতে পেতাম। ছেলেমানুষ ছিলো তখন, কিন্তু তখনই সব-কিছু ছিলো তার মধ্যে—সেই যুগের ত্রস্ততা, সাবধানতা, অশান্তি—সব যেন পড়া যেতো তার মুখে, তার দৃষ্টিতে। যা-কিছু সেই সময়কে তার চরিত্র দিয়েছিলো—কাল্পনা, আশা, অপমান, গর্ব ও প্রতিহিংসার সবটুকু সঞ্চয়—তা যেন নিঃশেষে রূপ নিয়েছিলো ওর মধ্যে, ওর মুখের ভাবে, চলার ধরনে, সেই লজ্জা, লাবণ্য ও সাহসের কৈশোর মিশ্রণে। ওর নাম ক’রে, ওরই মুখ থেকে, সেই শতাব্দীকে যেন অভিযুক্ত করা যেতো—আপনি তো মানবেন সেটা সোজা কথা নয়। কোনো দৈব লক্ষণের মতো, নিয়তির মতো ওর চরিত্র। সেটাই ওর জন্মগত অধিকার। যাকে বলে প্রকৃতির দান, ঠিক তা-ই।’

‘কী সুন্দর ক’রে আপনি বলেন ওর কথা। সেই সময়ে আমিও দেখেছিলাম ওকে, আপনি যেমন বলছেন আমিও ঠিক তেমনভাবেই দেখেছিলাম। স্কুলের মেয়ে, আবার সেই সঙ্গেই এক গোপন নায়িকা। দেয়ালের গায়ে ওর ছায়া পড়লে মনে হ’তো সে-ছায়া এক অসহায়, সতর্ক আত্মরক্ষার। এই রূপই আমি দেখেছিলাম, এখনো ওর সেই রূপটি মনে পড়ে। আপনি একেবারে ঠিক বলেছেন।’

‘দেখছেন আপনি, মনে আছে আপনার? কী করলেন সেই স্মৃতি নিয়ে?’

‘সেটা আবার অন্য এক গল্প।’

‘তা-ই তো। তা যাক। বুঝতে পারছেন, এই সমগ্র উনিশ শতক—প্যারিসে বিপ্লব, হেরজেন থেকে শুরু ক’রে দলে-দলে দেশত্যাগী, জারদের প্রাণসংহার—কোনোটা শুধু পরিকল্পিত, কোনোটা কার্যে পরিণত—পৃথিবী জুড়ে শ্রমিক-আন্দোলন, য়োরোপের পার্লামেন্ট আর বিশ্ববিদ্যালয়গুলিতে মার্ক্সবাদের প্রচার, চিন্তার এই নতুন গতি, তার অভিনবত্ব, তার দ্রুত সমাধান, তার ব্যঙ্গ, করুণার নামে উদ্ভাবিত করুণাহীন প্রতিকার—সব-কিছুই অদ্ভুত করেছিলেন লেনিন, তিনিই এর অবতারণা ও অভিব্যক্তি, তাঁরই মধ্য দিয়ে এই নতুন চিন্তা পুরোনো পৃথিবীর দুষ্কৃতির ওপর প্রতিশোধ নিলো।

‘আর তাঁরই সঙ্গে-সঙ্গে সারা জগতের চোখের সামনে উদ্ভিত হ’লো রাশিয়ার অপরিমেয় বিশাল মূর্তি, মানবজাতির সমস্ত দুঃখ-দুর্দশার পরিব্রাজকের মতো অগ্নিশিখায় প্রজ্জ্বলিত হ’লো রাশিয়া। কিন্তু এ-সব বলছি কেন আপনাকে? আপনার কাছে এ-সবের তো কোনো অর্থ নেই।

‘এই মেয়েরই জন্য পড়াশুনো ক’রে স্কুলের শিক্ষক হলাম আমি, চ’লে গেলাম অজ্ঞাতবাসে,

ইউরিয়টিনে। ওরই কথা ভেবে রাশি-রাশি বই গিলেছি, পুঞ্জিত করেছি জ্ঞানের বোঝা—যদি কখনো ওর প্রয়োজন হয়, কখনো ওর কাজে লাগতে পারি। বিয়ের তিন বছর পরে, ওকে নতুন ক'রে জয় করার জন্য, আমি যুদ্ধে চ'লে গেলাম, আর যুদ্ধের পরে আমি যখন বন্দীদশা থেকে মুক্তি পেলাম, আর সবাই জানলো আমি মারা গেছি, তখন সেই সুযোগে আমি ঝাপ দিলাম বিপ্লবে, যতো অন্যায় ওর ওপর করা হয়েছে, সব যাতে শোধ ক'রে দিতে পারি, ধুয়ে দিতে পারি সব দুঃখের স্মৃতি, আর কখনো যাতে অতীতে ফিরে যেতে না হয়, কোনো ৎভেরস্কায়া-ইয়ামস্কায়ার আর অস্তিত্ব না থাকে। আর সমস্তটা সময় ওরা কাছেই ছিলো আমার—ও, আমার মেয়ে—এই এখানেই ছিলো! ছুটে চ'লে যেতে চেয়েছি ওদের কাছে, কতোটা কষ্টে সেই ইচ্ছে চেপে রাখতে হয়েছে! না, আগে আমার জীবনের ব্রত উদযাপন করা চাই। আর এখন—ওদের একবার শুধু চোখে দেখার জন্য কী না দিতে পারি আমি! ও ঘরে এলে মনে হ'তো সব কটা জানলা খুলে গেলো, ঘর ভ'রে গেলো বাতাসে আর আলোতে।

‘আমি জানি ওকে আপনি কতো ভালোবেসেছিলেন। কিন্তু—ক্ষমা করবেন, সে আপনাকে কতোটা ভালোবেসেছিলো তা কি আপনি জানেন?’

‘শুনতে পাইনি। কী বললেন?’

‘আমি জিজ্ঞেস করছিলাম, সে আপনাকে কতো ভালোবাসতো তা কি জানেন আপনি?—জগতে আর কাউকে অতো ভালোবাসতো না।’

‘ও-কথা কেন বলছেন?’

‘সে নিজেই আমাকে বলেছিলো একদিন।’

‘বলেছিলো? আপনাকে?’

‘হ্যাঁ, বলেছিলো।’

‘ক্ষমা করবেন, আমি বুঝতে পারছি যে নিবোধের মতো কথা বলছি, কিন্তু—যদি পারেন—যদি অসম্ভব না হয়—দয়া ক'রে বলবেন কি সে আপনাকে ঠিক কী বলেছিলো?’

‘সানন্দে বলছি। বলেছিলো—মানুষের যা হওয়া উচিত আপনি ঠিক তা-ই, আপনার সমকক্ষ সে কোথাও দ্যাখেনি, যে আপনি আন্তরিকতার গুণে অতুলনীয়, আপনার সঙ্গে যে-বাসা সে বেঁধেছিলো তাতে ফিরে যেতে পারলে সে পৃথিবীর শেষ প্রান্ত থেকে বৃকে হেঁটে-হেঁটে সেখানে চ'লে যায়।’

‘ক্ষমা করবেন, আপনার অন্তরঙ্গ জীবনে উকি দিতে চাচ্ছি না, কিন্তু ঠিক কী-রকম অবস্থার মধ্যে ও-কথা সে বলেছিলো তা আপনার মনে আছি কি?’

‘এই ঘরটা গুছোচ্ছিলো সে, কার্পেট ঝাড়ার জন্য একবার বাইরে গেলো।’

‘দুঃখিত, কোন কার্পেট? দুটো তো আছে।’

‘ঐ যে—ঐ বড়োটা।’

‘ওর পক্ষে বড্ড ভারি তো ওটা—আপনি কি সাহায্য করেছিলেন?’

‘করেছিলাম।’

‘দু'জনে দু'দিক থেকে ধরলেন কার্পেটটা, পেছন দিকে অনেকখানি গা এলিয়ে সে দুই হাত উচু ক'রে দাঁড়ালো, ধূলো ঝাড়াবার জন্য মুখ ফিরিয়ে চোখ ঝুঁচকে হেসেছিলো তারপর—তা-ই না? তেমনি কি হয়নি সব? আমি কি চিনি না ওর ধরন-ধারন। তারপর আপনারা পরস্পরের দিকে হেঁটে এগিয়ে এলেন, কার্পেটটাকে প্রথমে দু'ভাঁজ, তারপর চার ভাঁজ ক'রে—ঠাট্টা ক'রে মুখভঙ্গি করলে সে। করলে না? তা-ই করলে না?’

উঠে দাঁড়ালো তারা দু'জনে, দুই জানলার সামনে গিয়ে দুই ভিন্ন দিকে তাকিয়ে রইলো। একটু পরে স্টেলনিকভ এগিয়ে এলো ইউরির কাছে, তার দুই হাত নিজের হাতে তুলে নিয়ে চেপে ধরলো বৃকের ওপর, তারপর আগের মতো দ্রুতবেগে ব'লে যেতে লাগলো:

‘ক্ষমা করবেন। বুঝতে পারছি আপনার প্রিয় এবং পবিত্র স্মৃতিগুলিকে নাড়া দিচ্ছি। কিন্তু যদি অনুমতি করেন, আরো কিছু জিজ্ঞেস করতে চাই আপনাকে। দয়া ক’রে চ’লে যাবেন না। আমাকে একা ফেলে যাবেন না। একটু পরে আমি নিজেই চ’লে যাবো। ভাবুন একবার, ছ’বছরের বিচ্ছেদ, ছ’বছর ধ’রে অমানুষিক আত্মসংযম। কিন্তু আমি সারাক্ষণ ভেবেছি যে এখনো আমরা পূর্ণ স্বাধীনতা লাভ করিনি। ভেবেছিলাম, যখন তা লাভ করবো তখন আমার হাত বন্ধনমুক্ত হবে, আবার আমি ওদের হবো। আর এখন, আমার সব পরিকল্পনা ব্যর্থ হ’য়ে গেলো। কাল ওরা আমাকে গ্রেপ্তার করবে। আপনি ওর আপন, ওর প্রিয়। হয়তো কোনোদিন ওর সঙ্গে দেখা হবে আপনার...কিন্তু কী সব বলছি!...পাগল হ’য়ে গেছি আমি। ওরা আমাকে গ্রেপ্তার করবে, আমাকে আমার নিজের সপক্ষে একটা কথাও বলতে দেবে না। চীৎকার করতে-করতে, গাল পাড়তে-পাড়তে ওরা আসবে আমার দিকে এগিয়ে, চেপে ধরবে আমাকে। আমি কি জানি না কী-ভাবে এ-সব করা হয়!’

১৮

অবশেষে এক সময়ে ইউরি ঘুমোতে পারলো। অনেকদিন পরে রাত্রে শোয়ামাত্র ঘুমিয়ে পড়লো সে। স্টেলনিকভ সে-রাটো থেকে গেলো; তাকে পাশের ঘরে থাকতে দিলো ইউরি। অল্প কয়েকবার ইউরি জেগে উঠে পাশ ফিরছে কি খুৎনি পর্যন্ত টেনে নিয়েছে কখন, কিন্তু তখনো সে অনুভব করেছে ঘুমের পুনরুজ্জীবনী শক্তি, তক্ষুনি আবার আরামে তলিয়ে গেছে সে। ভোরের দিকে ইউরি কয়েকটি ছোটো-ছোটো ছায়াছবির মতো স্বপ্ন দেখলো, তার ছেলেবেলার স্বপ্ন, এমন স্পষ্ট ও যুক্তিযুক্ত যে তার মনে হ’লো যেন সত্যি। স্বপ্ন দেখলো, তার মায়ের আঁকা একটি জলরঙা ছবি—ইটালিয়ন রিভিয়েরার একটি স্থানের দৃশ্য—সেটি দেয়াল থেকে খ’সে প’ড়ে গেলো। চোখ খুললো ইউরি। ‘না, তা তো হ’তে পারে না,’ সে ভাবলে। ‘এ হ’লো আন্টিপভ, লারার স্বামী, স্টেলনিকভ, ব্যাকাসের ভাষায় শুটমার নেকড়েদের ভয় দেখাচ্ছে। কিন্তু না, কী বাজে কথা। ও তো ছবিই। ঐ তো ওখানে, মেঝের ওপর প’ড়ে আছে।’ ইউরি নিশ্চিত হ’য়ে আবার স্বপ্ন দেখতে লাগলো।

খুব দেরিতে ঘুম ভাঙলো তার, বেশি ঘুমিয়ে মাথা ধ’রে গেছে। প্রথমটায় ভেবে পেলো না সে কে, বা কোথায় আছে।

তারপর মনে পড়লো: ‘স্টেলনিকভ আছে এখানে। বেলা হ’য়ে গেছে, এবার উঠে কাপড় প’রে নিতে হবে। সে নিশ্চয়ই উঠে পড়েছে এতোক্ষণে। যদি না উঠে থাকে, তাহ’লে ডেকে দেবো, কফি তৈরি করবো, দু’জনে খাবো একসঙ্গে ব’সে।

‘পাভেল পাভেলোভিচ!’ ডাকলো ইউরি।

উত্তর এলো না। ‘এখনো ঘুমিয়ে আছে। খুব গভীর ঘুম বলতে হবে।’ তাড়াহড়ো না-ক’রে সে জামা-কাপড় প’রে নিলো, তারপর গেলো পাশের ঘরে। স্টেলনিকভের ফার-এর টুপিটা প’ড়ে আছে টেবিলের ওপর, কিন্তু বাড়ির মধ্যে কোথাও সে নেই। ‘ইটতে বেরিয়েছে নিশ্চয়ই। কিন্তু টুপি নেয়নি। ও-রকমই অভ্যাস ক’রে নিচ্ছে। আজই ভারিকিনো ছেড়ে যাওয়া উচিত আমার, কিন্তু এখন বড্ড দেরি হ’য়ে গেছে। আবার বড্ড দেরি ক’রে উঠছি, রোজই হচ্ছে এই রকম।’

রান্নাঘরে উনুন ধরিয়ে একটা বালতি নিয়ে সে কুয়ার দিকে চললো। দরজা থেকে কয়েক গজ দূরে, পথ জুড়ে প’ড়ে আছে স্টেলনিকভ, একটা বরফের ক্তৃপের মধ্যে তার মাথা গাঁজা। নিজেকে গুলি করেছে সে। তার বাঁ দিকে কপালের তলায়, যেখান থেকে রক্ত গড়াচ্ছে, লাল খণ্ড হ’য়ে জ’মে আছে বরফ। রক্তের ফোঁটা ছিটকে গিয়ে গড়িয়ে পড়েছে বরফের ওপর, দেখাচ্ছে জমানো জামফলের দানাপ মতো।

পরিচ্ছেদ ১৫

উপসংহার

১

শুধু বাকি রইলো জিভাগোর জীবনের শেষ আট কি দশ বছরের সংক্ষিপ্ত কাহিনী। এই কয় বছরে আরো রুট্ট হ'য়ে গেছে সে, ক্রমশ হারিয়ে ফেলেছে ডাক্তার ও লেখক হিসাবে তার জ্ঞান ও প্রতিভা: কচিং কখনো লিখতে শুরু করে বটে, কিন্তু সেই ক্ষণিকের উদ্দীপনা জ্ব'লে উঠেই নিবে যায়, নিঃশেষ হ'য়ে যায় নিজের প্রতি ও জগতের সব-কিছুর প্রতি তার দীর্ঘায়িত উদাসীনতার মধ্যে। নিজের যে-হৃদরোগ সে আগেই নির্ণয় করেছিলো, কিন্তু সাংঘাতিক ব'লে বোঝেনি, এই কয় বছরে সেই রোগ আরো অগ্রসর হ'লো।

মস্কোতে যখন এলো, নতুন অর্থনৈতিক বিধান^১ তখন সবেমাত্র জারি হয়েছে। সোভিয়েট রাজত্বের সবচেয়ে কৃত্রিম ও অনিশ্চিত অবস্থা সেটা। পার্টিজানদের হাত থেকে পালিয়ে সে যখন ইউরিয়াটনে এসেছিলো, তখনকার চেয়েও শীর্ণ, অবহেলিত ও অপরিচ্ছন্ন তার এখনকার চেহারা। তার যে-সব পোষাকের কিছুমাত্রও মূল্য ছিলো, যাত্রাপথে একে-একে সেগুলোকেও খুলে দিতে হয়েছে, তার বদলে চেয়ে নিতে হয়েছে রুটির টুকরো বা লজ্জানিবারণের জন্য ছেঁড়া, পুরোনো দু'একটা কাপড়। এমনি ক'রে তার অবশিষ্ট সুট আর ফারের কোটটি থেকে কোনমতে পেট চালিয়ে সে মস্কোতে পৌঁছেছে ছাইরঙা ভেড়ার চামড়ার টুপি, পট্টি, আর একটি জীর্ণ আর্মি-ওভারকোট প'রে। কোটের একটিও বোতাম না-থাকায় দেখতে হয়েছে কয়েদির ওভারঅলের মতো। এই পোষাকে ইউরি সেইসব অসংখ্য সেপাইদের মধ্যে একেবারে মিশে গিয়েছিলো, শহরের পার্ক, রাস্তা আর স্টেশন তারা আচ্ছন্ন ক'রে ফেলেছে।

সে একা আসেনি। তার মতোই সেপাইদের পরিত্যক্ত পোষাক-পরা একটি সুদ্রী তরুণ কৃষক সর্বত্র তাকে অনুসরণ করছিলো। তখনো মস্কোতে এমন দু'একটি ড্রয়িংরুম ছিলো, যেখানে সবাই তাকে মনে রেখেছে, অভ্যর্থনাও জানিয়েছে (অবশ্য তারা স্নান ক'রে নিয়েছে কিনা সে-খবরটা কৌশলে জেনে নিতে কেউ ভোলেনি। টাইফাসের মড়ক চলছে তখনো), তার সঙ্গীকে নিয়ে ইউরি সে-সব বাড়িতে এই অবস্থাতেই উপস্থিত হ'লো। সেখানেই জানতে পারলো কী-অবস্থায় প'ড়ে তার স্ত্রী-পুত্রদের রাশিয়া ত্যাগ করতে হয়েছে।

ইউরি আর সেই ছেলেটি দু'জনেই লাজুক; এতো বেশি লাজুক যে তারা একা কোথাও যায় না, পাছে অন্যদের সঙ্গে কথা বলতে হয়। ইউরির কোনো বন্ধুবান্ধবের আড্ডায় গেলেও এই দুই শীর্ণকায় মানুষ আশ্রয় নিতো এক কোনায়, যাতে সাধারণ কথাবার্তায় অংশ না-নিয়ে সঙ্কেটা চূপচাপ কাটাতে পারে। সর্বত্র ঐ ছেলেটি তার সঙ্গী ছিলো। দীর্ঘ, শীর্ণ দেহ আর জীর্ণ বস্ত্রে

ডাক্তারকে মনে হ'তো যেন কোনো 'সত্যাশ্রমী' কৃষক, আর এই সঙ্গীটি যেন ধৈর্যশীল ও অন্ধভাবে অনুগত এক শিষ্য।

কে এই সঙ্গীটি?

২

ভ্রমণের শেষ পর্যায়ে ট্রেনে চড়লেও আগের দীর্ঘতর অংশ ইউরি হেটেই এসেছে।

পার্টিজানদের পরিত্যাগ করার পর যে-সব গ্রাম সে দেখেছিলো, প্রায় তেমনি বিধ্বস্ত সব গ্রামের মধ্য দিয়ে এবারেও তাকে চলতে হ'লো। তফাৎ শুধু এই যে তখন ছিলো শীতকাল, আর এখন গ্রীষ্মের শেষ, শুকনো উষ্ণ হেমন্তের আরম্ভ; ঋতুর জন্যই সব একটু সহজ হ'য়ে গেছে।

অর্ধেক গ্রামই জনশূন্য, খেতগুলো পরিত্যক্ত প'ড়ে আছে, ফসল ফেটে নেবার কেউ নেই, ঠিক যেন শত্রুপক্ষের আক্রমণে বিধ্বস্ত।

এই হ'লো ফলাফল—গৃহযুদ্ধের।

সেপ্টেম্বরের শেষের দিকে তিন দিন ধ'রে তাকে এক নদীর খাড়া পাড় ধ'রে হাটতে হয়েছিলো। নদী ছিলো তার ডানদিকে আর বাঁ দিকে বিস্তীর্ণ অনাবাদি জমি পান্ডা থেকে দিগন্তের মেঘপুঞ্জ পর্যন্ত ছড়িয়ে ছিলো। অনেকদিন পরে-পরে অবগা তাদের পথ আটকেছে। বেশির ভাগই গুচ্, মেপল আর এলমের বন। গভীর খাদ বেয়ে অরণ্য মাঝে-মাঝে নেমে গেছে, নদীতে খাড়া হ'য়ে নেমে এসে পথ বন্ধ ক'রে দিয়েছে।

পরিত্যক্ত খেতগুলিতে পাকা শস্য ফেটে গিয়ে ছড়িয়ে পড়েছে মাটিতে। মুঠো ধ'রে তাই কুড়িয়ে নিয়েছে ইউরি, সৈদ্ধ করার কি মশু বাধার উপায় না-পেয়ে কাচাই মুঠে পুরেছে, কষ্ট ক'রে ঠুঁড়ো করেছে দাঁত দিয়ে। তার চেয়েও অবশ্য বেশি কষ্ট হয়েছে সেই কাচা আধো-চিবানো অখাদ্য হজম করতে।

রাগি শস্যের এমন অলঙ্কনে চেহারা সে জীবনে দ্যাখেনি—মবচে-পড়া ব্রাউন রং, মলিন-হ'য়ে-যাওয়া পুরানো সোনার মতো। সাধারণত, ঠিক সময়ে কাটা হ'লে, আরো অনেক হালকা হয় রংটা।

বিনা আগুনে জ্বলতে-জ্বলতে এই আগুন-রঙা খেতগুলি নিঃশব্দে তাদের দুঃখের কথা প্রচলন করছিলো; তাদের গ্রাহ্য না-ক'রে বিশাল, শাস্ত্র আকাশ ধার ঘেষে চ'লে গেছে; ইতিমধ্যেই শীতার্ভ সেই আকাশ-তার গায়ে ছায়া ফেলেছে লম্বা-লম্বা ফেনা-তোলা বরফের মেঘ, শাদা শরীরে কালো-কালো বিন্দু নিয়ে অন্তহীনভাবে ভেসে চলেছে।

অনন্ত, ধীর, সমতাল গতি সব-কিছুর: নদীব ব'য়ে চলা, সেই নদীর সঙ্গে মিলিত হ'বার জন্য পথের ঝাঁক নেওয়া, আর মেঘের সঙ্গে-সঙ্গে একই দিক ধ'রে হেঁটে চলা ইউরির। রাগির খেতগুলিও স্থবির নয়, কী বেশ চঞ্চল ক'রে তুলেছে তাদের, মৃদু অথচ অন্তহীন অনুসন্ধান চলছে এ-প্রান্ত থেকে ও-প্রান্ত পর্যন্ত। ইউরির যেন বর্ম পোলা তাতে।

ইদুরের এমন উপদ্রব আর হয়নি। অবিশ্বাস্যভাবে তাদের বংশবৃদ্ধি হয়েছে, আগে কখনো এমন দেখা যায়নি। রাষ্ট্রে অন্ধকারে ঘিরে ধরে ইউরিকে, যখন খোলা আকাশের তলায় তাকে রাত কাটাতে হয়, তখন তার মুখ আর হাতের ওপর, তাব জামার হাতা আর প্যাণ্টের ক্ষেত্রে ছুটোছুটি ক'রে বেড়ায়। তাদের অতিভুক্ত ও অতিপ্রজ বাহিনী দিনের আলোয় ছুটোছুটি করে রাস্তার ওপর দিয়ে, কেউ মাড়িয়ে দিলে ধুকপুক বৃকে চি-চি আওয়াজ করত-করতে কাদার তালে পরিণত হ'য়ে যায়।

গ্রামের দোআঁশলা লোমশ কুকুরগুলো হিংস্র হ'য়ে উঠেছে, ভদ্রগোছের দূরত্ব বজায় রেখে ইউরিকে অনুসরণ করছিলো তারা, পরস্পরের সঙ্গে দৃষ্টিবিনিময় করছিলো, যেন তার ওপর

ঝাপিয়ে প'ড়ে তাকে টুকরো-টুকরো ক'রে ফেলার সবচেয়ে ভালো সুযোগের বিষয়ে মনস্থির করতে পারছে না। মৃত প্রাণীর গলিত শব খেয়ে তারা বেঁচে আছে, ইদুর-ভোজন থেকেও বিরত হয় না। দূর থেকে তারা চোখ রাখছিলো ইউরির ওপর, তাদের চলার ভঙ্গিতে বেশ আত্মবিশ্বাস, যেন কিছু-একটার অপেক্ষা করছে। কে জানে কেন, কুকুরগুলো কখনোই কোনো বনের ভেতরে ঢুকছিলো না। ইউরি যতবার কোনো বনের কাছে এসেছে, আস্তে-আস্তে কেটে পড়েছে তারা, ল্যাজ গুটিয়ে হাওয়া হ'য়ে গেছে।

অরণ্য ও প্রান্তরের একেবারে বিপরীত চেহারা ছিলো তখন। মানুষের দ্বারা পরিত্যক্ত হওয়ায় প্রান্তরকে মনে হ'তো অনাথ, যেন মানুষের অনুপস্থিতিতে অভিশপ্ত; কিন্তু মানুষের হাত থেকে নিষ্কৃতি পেয়ে অরণ্যের বন্দীদশা যেন ঘুচে গেছে, স্বাধীনতা পেয়ে সর্গের বিকশিত হ'য়ে উঠেছে।

বাদাম সাধারণত পাকতে পারে না; লোকেরা, বিশেষত গ্রামের ছেলেমেয়েরা, কাঁচা বাদামই পেড়ে নেয়, আস্ত-আস্ত ডাল ভেঙে ফালে। কিন্তু এখন হেমন্তের অরণ্যে ছাওয়া খাদ আর পাহাড়গুলিতে ঘন হ'য়ে আছে খশখশে সোনালি পাতা, ধুলো পড়েছে গায়ে, রোদ্দুরে মোটা হ'য়ে উঠেছে পাতাগুলো, আর তাদের মধ্যে, যেন ফিতে দিয়ে বাঁধা, ফুর্তিতে ফুলে-ফুলে আছে গোছা-গোছা বাদাম, একসঙ্গে তিন-চারটে ক'রে, সুপক্ক, খোসা থেকে বেরোবার জন্য প্রস্তুত। পকেট আর বাকলের থলে ভর্তি ক'রে নিয়ে ইউরি সেই বাদাম ভেঙে চিবোতে-চিবোতে পথ চলেছে। পুরো এক সপ্তাহ ধ'রে এ ছাড়া আর কিছু সে খায়নি।

তার মনে হ'তো সাংযাতিক জ্বরের ঘোরে প্রান্তরগুলি পুড়ে যাচ্ছে, আর অরণ্যে আছে রোগমুক্তির আরাম—যেন অরণ্যে ঈশ্বরের আবাস, আর খেতে ওৎ পেতে আছে শয়তান।

৩

তার ভ্রমণের এইরকম সময়ে এক পরিত্যক্ত পুড়ে-যাওয়া গ্রামে গিয়ে পড়েছিলো সে। যে-দিকটা নদীর উপ্টো দিকে, তাতে বাড়িগুলো সার বেঁধে দাঁড়িয়ে আছে। সেই বাড়ির সারি আর নদীর খাড়াই পাড়ের মাঝখানকার জমির ফালিটুকুতে বাড়ি-ঘর তোলা হয়নি।

পুড়ে কালো-হ'য়ে-যাওয়া দু-একটা বাড়ি তখনো দাঁড়িয়ে আছে, কিন্তু সেগুলিরও বাসিন্দা নেই। ভস্মীভূত ইট-সুরকির স্তূপ ছাড়া অন্যগুলির কিছুই অবশিষ্ট নেই, চুল্লির কালো-কালো নলগুলি তাদের মধ্যে থেকে উঁকি দিচ্ছে।

নদীর সামনেকার পাহাড়গুলিতে এতো গর্ত যে দেখতে হয়েছে মৌচাকের মতো। জাঁতার পাথরের জন্য পাহাড় কেটেছে গ্রামবাসীরা, এই ছিলো তাদের জীবিকা। যে-সামান্য কয়েকটি বাড়ি তখনো দাঁড়িয়ে ছিলো তাদের মধ্যে একেবারে শেষ বাড়িটির সামনে এইরকম একটা অসমাপ্ত পাথর প'ড়ে ছিলো। অন্য বাড়িগুলির মতো এই বাড়িটিও জনহীন।

ইউরি ভেতরে গেলো। শাস্ত সন্ধ্যা; কিন্তু দোরগোড়ায় পা রাখতেই মনে হ'লো দমকা হাওয়া ঢুকলো বাড়ির ভেতরে। মেঝেতে গড়াচ্ছে ঘাসের চাপড়া আর ঝড়ের গাদা, দেয়ালে বাড়ি খাচ্ছে কাগজের টুকরো; সমস্ত বাড়িটা যেন চঞ্চল হ'য়ে আছে, বেড়াচ্ছে ন'ড়ে-চ'ড়ে। সারা গ্রামটার মতো এই বাড়িটিও ইদুরে ভর্তি, চারিদিকে ছুটোছুটি ক'রে বেড়াচ্ছে কিচমচি করতে করতে।

ইউরি বেরিয়ে এলো। গ্রামের পেছনে, মাঠের প্রান্তে সূর্য অস্ত যাচ্ছে, উষ্ণ সোনায় ভেসে গেছে উট্টোদিকের পারে ঝোপঝাড়। নদীর নালা, তার ম্লান-হ'য়ে-আসা ছায়া নদীর মধ্যভাগ পর্যন্ত পৌঁচেছে। ঘাসের ওপর একটা জাঁতাকলের পাথর প'ড়ে ছিলো, রাস্তা পার হ'য়ে এসে সেটার ওপর ব'সে পড়লো।

নদীর ধার থেকে উঠে এলো একটি হালকা রঙের চুলে ভর্তি মাথা, তারপর কাধ দেখা গেলো, তারপর হাত। এক বালতি জল নিয়ে একজন খাড়া পথ বেয়ে ওপরে উঠছে। ইউরিকে দেখে থেমে পড়লো, তখনো মাত্র কোমর অবধি দেখা যাচ্ছে তার।

‘জল খাবেন? আমাকে যদি না মারেন, আমিও আপনাকে মারবো না।’

‘ধন্যবাদ। হ্যাঁ, একটু জল পেলে ভালো হয়। কিন্তু এখানে এসো না! ভয় কী? তোমাকে আমি মারতে যাবো কেন?’

ছেলেটি বয়সে কিশোর—খালি পা, পরনে ছেঁড়া কাপড়, উল্কাখুল্কো চেহারা।

ইউরির সহৃদয় কথা শুনেও উদ্বিগ্ন এবং সন্দ্বিগ্নভাবে তার দিকে তাকিয়ে রইলো ছেলেটি। যে-কোনো কারণেই হোক, মনে হ’লো যে ক্রমশই যেন আরো বেশি উত্তেজিত হ’য়ে উঠাছিলো সে। অবশেষে বালতিটা নামিয়ে রেখে ছুটে এলো ইউরির দিকে, কিন্তু মাঝপথে থেমে গিয়ে বিড়বিড় করলো:

‘না, তা নয়... তা হ’তে পারে না... আমি নিশ্চয়ই স্বপ্ন দেখছি। মাপ করুন কমরেড, একটা কথা বলি। আমার মনে হচ্ছে আপনাকে আমি চিনি। হ্যাঁ! হ্যাঁ! ঠিক তা-ই! আপনি সেই ডাক্তার না?’

‘আর তুমি?’

‘আমাকে চেনেন না?’

‘না তো।’

‘মস্কো থেকে আসার সময় এক ট্রেনে ছিলাম আমরা, একই কামরায়। আমাকে মজুরির জন্য জোর ক’রে ধ’রে নিয়ে গিয়েছিলো।’

ছেলেটি হ’লো ভাসিয়া ব্রিকিন। ইউরির সামনে মাটির ওপর প’ড়ে গেলো সে, তার হাতে চুমু খেতে-খেতে কাঁদতে লাগলো।

এই দক্ষ ধ্বংসাবশেষ তার নিজের গ্রাম ভেরেটের্নিকি। তার মা মারা গেছেন। গ্রাম ধ্বংস হবার সময় সে পাহাড়ের গুহায় আত্মগোপন ক’রে ছিলো, কিন্তু তার মা ভেবেছিলেন তাকে বুঝি শহরে নিয়ে গেছে, শোকে পাগল হ’য়ে নদীতে ঝাপ দেন তিনি, তারা এখন যে-উঁচু পাথরটার ওপর ব’সে কথা বলছে, ঠিক তারই তলা দিয়ে ব’য়ে চলেছে যে পেলগা নদী। তার দুই বোন, অলিয়া আর আরিয়া নাকি অন্য কোন জেলায় এক অনাথ আশ্রমে আছে, কিন্তু তাদের বিষয়ে সঠিকভাবে সে কিছুই জানে না। ইউরির সঙ্গে মস্কোর দিকে রওনা হ’লো সে, পথে যেতে-যেতে অনেক ঘটনার কথা বললে।

৪

‘ও হ’লো গত শীতের ফসল, নষ্ট হ’য়ে যাচ্ছে। বীজ পোঁতা সব শেষ হয়েছে, এমন সময় গোলমাল শুরু হ’লো। পোলিয়া মাসি তখন চ’লে গেছে। পোলিয়া মাসিকে মনে আছে আপনার?’

‘না কখনো চিনতামও না তাঁকে। কে তিনি?’

‘পোলিয়া মাসিকে চিনতেন না! আমাদের সঙ্গে এক ট্রেনেই তো ছিলেন! ঐ যে, খুব লম্বা-চওড়া ফর্সাপানা চেহারা, সোজা চোখের দিকে তাকিয়ে কথা বলে।’

‘ঐ যিনি শুধু চুল ঝাঁকতেন আর চুল খুলতেন?’

‘হ্যাঁ, হ্যাঁ! ঐ যার চুল বিনুনি করা ছিলো—সেই।’

‘হ্যাঁ, মনে আছে। দাঁড়াও, এবার মনে পড়ছে, পরে সাইবেরিয়ার এক শহরে তাঁর সঙ্গে দেখা হয়েছিলো। পথের মধ্যে দেখা হ’লো আমাদের।’

‘সত্যি বলছেন! পোলিয়া মাসির সঙ্গে দেখা হয়েছিলো!’

‘আরে হ’লো কী তোমার? ও-রকম ক’রে আমার হাত ঝাঁকানো কেন? দেখো, দেখো, আমার হাত দুটোকে ছিঁড়ে ফেলো না। মেয়েদের মতো গাল লাল হ’লো কেন তোমার!’

‘বলুন, শিগগির বলুন, কেমন আছেন উনি? বলুন!’

‘আমি যখন দেখেছিলাম তখন তো ভালোই ছিলেন। তোমার কথা, তোমার আত্মীয়-স্বজনের কথা বললেন। তোমাদের সঙ্গে থাকতেন বলেছিলেন—না কি আমি ভুল করছি?’

‘থাকতেন বইকি, নিশ্চয়ই থাকতেন। আমাদের সঙ্গে থাকতেন উনি। মা ওঁকে নিজের বোনের মতো ভালোবেসেছিলেন। খুব শাস্ত আর খুব কাজের মানুষ। ছুঁচের কাজ কি ভালোই না করতেন। উনি যতোদিন আমাদের সঙ্গে ছিলেন, ততোদিন আমাদের কিছুই অভাব ছিলো না। কিন্তু যতো বাজে কথা ব’লে ভেরেটেনিকিতে ওঁর জীবন ওরা অতিষ্ঠ ক’রে তুললো।

‘পচা খার্লাম নামে একটা লোক আছে গ্রামে। পোলিয়াকে বাগাবার তালে ছিলো সে। মহা নিম্দ্ক, তার নাকটা প’চে-প’চে খ’সে গেছে। পোলিয়া মাসি তো ওর দিকে ফিরেও তাকাতে না। ঐ জন্য আমার ওপর রাগ ছিলো তার। তাই পোলিয়ার সঙ্গে আমার নাম জড়িয়ে যা-তা বলতে শুরু করলো। এই ভাবেই শুরু হ’লো ব্যাপারটা। শেষ পর্যন্ত এখান থেকে চ’লে যেতে হ’লো পোলিয়াকে, আর সহ্য করতে পারছিলো না সে। আমাদের সব দুঃখের সেই হ’লো সুত্রপাত।

‘কাছেই এক জায়গায় একটা ভয়ানক খুন হ’লো। বুয়িস্কোয়ের কাছে। যে খুন হ’লো সে এক বিধবা। এ জঙ্গলের মধ্যে একলা একটা বাড়িতে থাকতো সে। একেবারে একা। জঙ্গলের ধার ঘেঁসে তার খেত-খামার ছিলো। ইলাস্টিক স্ট্রাপে আটকানো পুরুষের বুটজুতো প’রে সে ঘুরে বেড়াতো; শেকলে বেঁধে হিংস্র একটা কুকুর পুষতো বাড়িতে। শেকলটা এতো লম্বা যে চারদিকে ছুটে বেড়াতে পারতো কুকুরটা—ওটাকে ডাকতো গার্লান ব’লে। গেরস্তালি আর চাষবাসের কাজ একাই চালাতো বুড়ি, চাকর মজুর কিছুই ছিলো না। তারপর গত বছর শীত এসে পড়লো একেবারে আশাতীত রকম অসময়ে। খুব শিগগির বরফ পড়তে শুরু করলো, বুড়ির তখনো আলু তোলা হয়নি। তাই ভেরেটেনিকিতে এসে বললো, “আমার লোক চাই। টাকা চাও তো তা-ই দেবো, নয়তো আলুর ভাগও নিতে পারো।”

‘আমি ওর মজুর খাটতে রাজি হলাম, কিন্তু ওর খেতে পৌঁছে দেখি খার্লাম সেখানে হাজির, আমার আগেই কাজটা সে নিয়ে নিয়েছে, আর বুড়িও আমাকে তা জানাবার দরকার বোধ করেনি। যাক, এ নিয়ে খার্লামের সঙ্গে ঝগড়া করতে ইচ্ছে হ’লো না, দু’জনে মিলেই ক’রে দিলাম কাজটা। বিতর্কিচ্ছিরি দিন—বাষ্টি, বরফ, কাদায় থৈ-থৈ; আমরা মাটি খুঁড়ে-খুঁড়ে আলু তুলছি, আর আগাগুলো জড়ো ক’রে পোড়াছি ধোয়ায় আলু শুকোবার জন্য। কাজ শেষ হ’লে বুড়ি আমাদের পাওনা-গুণা ঠিক-ঠিক চুকিয়ে দিলে। খার্লামকে বিদেয় দেওয়া হ’লো, কিন্তু আমার দিকে চোখ টিপে বুড়ি আমাকে থেকে যেতে বললে, নয়তো পরে ঘুরে আসতে।

‘আমি তো আবার ফিরে গেলাম, তখন বুড়ি বললে, “আমার বাড়তি ফসল আমি সরকারকে” দেবো না, বুঝেছো? লক্ষ্মী ছেলে তুমি। আমি জানি তুমি আমাকে ধরিয়ে দেবে না। তোমার কাছে আমি কিছুই লুকোচ্ছি না, দেখছো তো। আমি নিজেই গর্ত খুঁড়তাম, কিন্তু

১ “সামরিক সাম্যবাদ”র সময় (মোটামুটি ১৯১৭ থেকে ১৯২১ খৃঃ পর্বন্ত) কৃষকদের ওপর হুকুম ছিলো, জঙ্গলের সবটুকু উদ্ধৃত্তই, অর্থাৎ, যা তাদের নিজেদের খাদ্য হিসেবে বা বীজ হিসেবে ব্যবহৃত হবে না, সরকারের হাতে তুলে দিতে হবে। অনিয়মিতভাবে সেনাবাহিনী এসে জলুম ক’রে ছিনিয়ে নিয়ে যেত ফসল, অনেক সময় তাদের প্রবল প্রতিরোধের সন্মুখীন হ’তে হ’তো। ১৯২১ সালের পর থেকে এ-অবস্থার পরিবর্তন হয়। NEP (নতুন অর্থনৈতিক বিধান—New Economic Policy) প্রবর্তিত ব্যবস্থায় চাষিদের উৎসাহের নিমিত্ত একটি অংশ শুধু কর হিসেবে দেয় ছিলো, কিন্তু বাকি অংশ তারা ইচ্ছে করলে বিক্রি করতে পারতো।

কী-রকম বিতী দিন বলো দিকি! এমনতেই বড্ড দেরি ক'রে ফেলেছি আমি—শীত এসে গেলো, আমি একা পেয়ে উঠবো না। আমার এই গর্তটা যদি খুঁড়ে দাও ভাই, আমি তোমাকে বেশ ভালো হাতেই পুষিয়ে দেবো।”

‘তা আমি তো বেশ ক'রে গর্ত খুঁড়লাম, চমৎকার একটি লুকোবার জায়গা তৈরি হ'লো, পেট চওড়া, মুখ সরু কলসির মতো—আগুনের ধোঁয়ায় আলুগুলোকে তাতিয়ে-তাতিয়ে শুকিয়েও নিলাম—এদিকে বরফের ঝড়ের ফোসফোশানির বিরাম নেই। তারপর গর্তের মধ্যে আলু ঢেলে দিয়ে মুখটাকে মাটি দিয়ে বন্ধ ক'রে দিলাম। ছিমছাম নিখুঁত হ'লো কাজটি। আমি অবিশ্যি কাউকেই বলিনি কথটা—আমার মাকে বা বোনেরদেরও না। ঈশ্বর না করুন।’

‘তা একমাসও কাটলো না। ডাকাতি হ'লো বুড়ির খামারে। বুয়িস্কোয়ের পথ পেরিয়ে যারা এলো, তারা বললে বুড়ির দরজা হাট ক'রে খোলা, যা-কিছু ছিলো কুড়িয়ে-কাচিয়ে সাফ ক'রে নিয়ে গেছে। বিধবা বুড়ির কোনো চিহ্নই নেই, আর গল্লান শেকল ছিড়ে পালিয়েছে।

‘আরো কিছুদিন পরে, নববর্ষের ঠিক আগে বরফ গলতে শুরু করলে; সস্তা বাসিলের পরবের দিন খুব বৃষ্টি হ'লো, উচু জমির বরফ ধুয়ে গেলো তাতে; ফাঁকা মাটি বেরিয়ে এলো। তখন গল্লান হঠাৎ ফিরে এলো বুড়ির বাড়িতে। যেখানে আলু পোতা ছিলো, খুঁজে বের করলো সেই জায়গাটা; বরফ আর নেই, মাটি খুঁড়তে শুরু করলো সে। খুঁড়ছে তো খুঁড়ছেই, চারদিকে মাটি ছিটিয়ে চলেছে, এমন সময় দেখা গেলো গর্ত থেকে বেরিয়ে আছে বুড়ির দুই পা, সেই ইলাস্টিকের ফিতে-বাঁধা বুটজুতো—যেমনটি সে পরতো, বীভৎস!

‘ভেরেটেন্নিকিতে সকলেই বুড়ির জন্য দুঃখ করলো। খার্লামকে কেউ সন্দেহ করলো না। কী ক'রে করবে? এমন একটা কথা ভাবাও তো যায় না। সে যদিও একাজ করতো তাহ'লে কি তার সাহস হ'তো তারপরেও ভেরেটেন্নিকিতে থাকার, না কি বুক ফুলিয়ে গ্রামের মধ্যে ঘুরে বেড়াতেই পারতো? সবাই ভাবলে ও তাহ'লে নিশ্চয়ই পালিয়ে যেতো, ভেরেটেন্নিকি থেকে যতো দূরে সম্ভব স'রে পড়তো।

‘এই খুনটা হওয়াতে গ্রামের কুলাকরা কিন্তু খুশি হ'লো।

‘তার ভাবলে গ্রামে একটা গুণগোল পাকিয়ে তোলার এই হ'লো একটা সুযোগ। “দেখলে তো,” বলাবলি করলে ওরা, “শহরের লোকেরা কী করলো তোমাদের! তোমাদের শিক্ষা দেবার জন্য ওরাই করেছে এটা, সাবধান ক'রে দিতে চায় যাতে তোমাদের ফসল বা আলু-টালু আর লুকিয়ে না রাখো। আর তোমরা হাবার দল ভাবছো কিনা জঙ্গলের ডাকাত এসে খুন করেছে! ঐ শহরেগুলোর কথামতো চলতে গেলেই হয়েছে আরকি! আরো অনেক মৎলব আছে ওদের, তোমাদের সর্ব্ব্ব কেড়ে নেবে, অনাহারে মারবে তোমাদের। কিসে তোমাদের ভালো তা যদি জানতে চাও তাহ'লে আমাদের কথা শোনো, আমরা তোমাদের ভালো বুদ্ধি দেবো। মাথার ঘাম পায়ে ফেলে তোমরা যা উপার্জন করেছো, তা যখন ওরা নিতে আসবে তখন বোলা খুদকুঁড়ো সুদ্ধ নেই, বাড়তির কথা ছেড়েই দাও, আর গোলমাল বাধলে কান্টে-শাবল কাজে লাগাবে। আর সাবধান—সারা গাঁয়ের ইস্কের বিরুদ্ধে যদি কেউ যেতে চায়—সে যেন সাবধানে পথ চ'লে।” তা এরা তো এই সব বলাবলি করছে। মিটিঙের পর মিটিং ডাকছে গাঁয়ের মধ্যে—আর খার্লামও ঠিক এই চেয়েছিলো। এক বুড়ি গল্প নিয়ে সে চ'লে গেলো শহরে। বলে কী, “তোফা! সব ব্যাপার চলেছে গাঁয়ে—সে-বিষয়ে কোনো হুঁস আছে কি আপনাদের? একটু দরিত্র-সমিতি’ না হ'লে তো আমাদের চলছে না। মুখের কথাটি একবার খসান—দেখুন কেমন ওদের দিয়েই পরস্পরের গলা কাটাবার বন্দোবস্ত করি।” তারপর কে জানে কোথায় কেটে পড়লো খার্লাম, আমাদের এদিকে আর কোনোদিন তাকে দেখা যায়নি।

‘তারপরে সব নিজে-নিজেই ঘটলো। কারো তাতে কোনো হাত ছিলো না। দোষ দেওয়া যায় না কাউকেই। শহর থেকে লাল পণ্টন পাঠানো হ’লো, এখানে এসে এক বিচারালয় খুললো তারা। ওরা পড়লো আমাকে নিয়ে, ঐ খালীম ব্যাটা আমার নামে লাগিয়েছিলো তো। জুলুম-মজুরি ফাঁকি দিয়েছি আমি; পালিয়ে গিয়েছি। আর কথা কী—আমিই খুন করেছি বাড়িকে, গ্রামে ঘোঁট পাকিয়েছি—তাই ঠিক ক’রে নিলো ওরা। আমাকে ওরা কয়েদ করলে, কিন্তু কী ভাগ্যে জেলের একটা তক্তা টেনে তুলে পালিয়ে যাবার মতো বুদ্ধি এলো আমার মাথায়। পাহাড়ের গুহায় লুকিয়ে রইলাম। আমার মাথার ওপরে সারাটা গ্রাম পু’ড়ে গেলো—আমি কিছুই দেখলাম না। আমার নিজের মা বরফের গর্তে ডুবে মরলেন, আমি জানতেও পারলাম না। আপনা-আপনি ঘ’টে গেলো সব। লাল পণ্টনের লোকেরা ছিলো আলাদা একটা বাড়িতে, এস্তার ভদকা দিয়েছিলো ওদের, সব ব্যাটা বেইঁস মাতাল হ’লো। বাড়িটায় আগুন লাগলো রাত্তিরে—নেহাংই অসাবধানতার জন্য—সেই আগুন সারা গাঁয়ে ছড়িয়ে পড়লো। টের পেয়ে লোকেরা লাফিয়ে উঠে যে যার বাড়ি ছেড়ে পালিয়ে গেলো। কিন্তু শহুরেগুলো—কেউ অবশ্য আগুন ধরিয়ে দেয়ান ওদের গায়ে—নিজে-নিজেই পুড়ে মরলো ওরা। গাঁয়ের লোকের কেউ পালাতে বলেনি, আগুন দেখে উধাও হ’তেও বলেনি, কিন্তু তাদের ভয় হ’লো কী জানি যদি অংরা কিছু ঘটে। কুলাকরা গুজব রটালো যে প্রতি দশজনের মধ্যে একজনকে নির্ধাত গুলি ক’রে মারা হবে। আমি যখন গুহা থেকে বেরোলাম, তখন সবাই হাওয়া হ’য়ে গেছে। কাকপক্ষীরও দেখা পেলাম না। কে জানে তারা সব কোথায় ঘুরে বেড়াচ্ছে এখন।’

৫

১৯২২-এর বসন্তকালে ইউরি ও ভাসিয়া মস্কোতে পৌঁছলো—নতুন অর্থনৈতিক বিধান তখন সবে জারি হয়েছে। সুন্দর, উষ্ণ আবহাওয়া চলছে। মুক্তিদাতা গির্জের সোনালি চূড়া থেকে ছিটকে প’ড়ে সূর্যের আলো নিচের চত্বরটাকে মাঝে-মাঝে ছুপিয়ে দিয়েছে। সেখানে ফুটপাথের পাথরের ফাঁকে-ফাঁকে গজিয়ে উঠেছে ঘাস।

স্বাধীন বাণিজ্যের ওপর থেকে নিষেধাজ্ঞা তুলে নেওয়া হয়েছে, একটি নির্দিষ্ট গণ্ডি পর্যন্ত ব্যাবসার অধিকার পেয়েছে সবাই। আদার ব্যাপারীরা খুচরো বেচাকেনা করে ভাঙা হাটে, এইটুকুর মধ্যেই চলে মুনাফা আর ফটকাবাজি। এ-সব কারবারের ফলে নতুন কোনো সম্পদের সৃষ্টি হয় না, একটুও লঘু হয় না শহরের মালিন্য, শুধু একশোবার হাত-বদল-হওয়া মালপত্র অর্থহীনভাবে আবার বিক্রি ক’রে অনেকের কপাল ফিরে যাচ্ছে।

যাদের বাড়িতে ছোটোখাটো লাইব্রেরি ছিলো, তারা অনেকে তাক থেকে বই পেড়ে সব একত্র ক’রে গুছিয়ে রেখেছিলেন। নগর-সমিতির কাছে তারা এই মর্মে বিজ্ঞাপ্তি দিলে যে তারা একটি সমবায়-পুস্তকালয় খুলতে চায়। জায়গার জন্য আবেদন করলো তারা; বিপ্লবের আরম্ভের সময় থেকে মালিকের দোকান উঠে যাবার জন্য খালি প’ড়ে আছে, এমন কোনো গুদামঘর ছেড়ে দেওয়া হ’লো তাদের। মাটির তলার মস্ত ঘরগুলিতে এলোমেলো স্বল্পসংখ্যক বইয়ের সংগ্রহ তারা বিক্রি করছে।

অধ্যাপকদের স্ত্রীরা, যারা আগেকার দুঃসময়ে লুকিয়ে-লুকিয়ে শাদা রুটি তৈরি ক’রে বেআইনিভাবে বিক্রি করতেন, তারা আজকাল আর লুকোচুরি করেন না। সরকার জোর-দখল নেবার পরেও এতোকাল অব্যবহৃত হ’য়ে প’ড়ে ছিলো এমন কোনো-একটা দোকান-ঘরে প্রকাশ্যে ব্যাবসা চালান তারা। তারা মত বদলেছেন, বিপ্লবকে মেনে নিয়েছেন, এখন আর ‘হ্যাঁ’ কি. ‘আচ্ছা’ বলেন না—বলেন ‘নিশ্চয়ই।’

মস্কোতে পৌছে ইউরি বললে:

‘তোমাকে কোনো-একটা কাজে লাগতে হয়, ভাসিয়া।’

‘আমার পড়ার ইচ্ছে।’

‘হ্যাঁ, সে তো বটেই।’

‘আমার আর-একটা স্বপ্ন হ’লো স্মৃতি থেকে মায়ের ছবি আঁকা।’

‘সে তো খুব ভালো কথা। কিন্তু তাহ’লে তো তোমাকে আঁকা শিখতে হবে। কখনো সেটা করেছে?’

‘যখন কাকার শিক্ষানবিশ, ছিলাম তখন ঠুর চোখের আড়ালে কাঠকয়লা দিয়ে আঁকিঁকি কেটেছি।’

‘তাহ’লে বাধা কী? দেখি, কী করা যায়।’

চিত্রকর হিসেবে ভাসিয়া তেমন গুণপনার পরিচয় না-দিলেও কারিগর হবার মতো মোটামুটি ক্ষমতা ছিলো তার। বন্ধুবান্ধবকে ধ’রে ইউরি ষ্ট্রুগানভ ইনস্টিটিউটে ঢুকিয়ে দিলো তাকে; সেখানে প্রথমে সাধারণ বিষয়ে পড়াশুনা করে, তারপর ছাপা, বাঁধাই আর বইয়ের ডিজাইন বিষয়ে বিশেষ শিক্ষা গ্রহণ করলো সে।

ইউরি আর ভাসিয়া কাজে সহযোগী হ’লো। চব্বিশ পৃষ্ঠার ছোটো-ছোটো পুস্তিকা লেখে ইউরি, আর ভাসিয়া টাইপ সাজিয়ে অল্প সংখ্যায় ছাপে সেগুলো, তার ইনস্টিটিউটের হাতে-কলমে কাজের মধ্যে এটাকেও ধরা হয়। তারপর তাদের বন্ধুবান্ধবেরা যে-সব পুরোনো বইয়ের দোকান খুলেছিলো, সেখানে সেগুলো দেওয়া হ’লো বিক্রির জন্য।

এই পুস্তিকাগুলিতে থাকে ইউরির জীবনদর্শন, ভেবজ বিষয়ে তার মতামত, রোগ ও স্বাস্থ্য সম্পর্কে তার নিজস্ব সংজ্ঞা, বিবর্তন ও প্রাণীকুলের গোত্রবদল বিষয়ে তার ধারণা; থাকে তার এই অভিমত যে ব্যক্তিত্বই প্রাণীজীবনের ভিত্তিস্বরূপ, থাকে ধর্ম ও ইতিহাস বিষয়ে চিন্তা (তার মামা ও সিমার মতের সঙ্গে তার অনেক মিল ছিলো) আর থাকে তার কবিতা, ছোটো গল্প, পুণাচ্ছেভ-প্রদেশে তার ভ্রমণের বিবরণ।

বইগুলি যতোই সহজ এবং কথা ভাষার ভঙ্গিতে লেখা হোক না কেন, এগুলিকে কিছুতেই লোকেরঞ্জন গ্রন্থমালা বলা চলে না। কেননা তার অগ্রসর চিন্তাধারার অনেক মতামতই তর্কসাপেক্ষ, আনুমানিক এবং অপ্রমাণিত। তবু, তার সব রচনাই মৌলিক ও সপ্রাণ; সহজে বিক্রি হয় বইগুলো, পাঠকদের প্রশংসাও পায়।

সেই সময়ে সমস্ত বিষয়েই—এমন কি কবিতা লেখা ও সাহিত্যের অনুবাদশিল্পেও—ঝুড়ি-ঝুড়ি বিশেষজ্ঞ গজিয়ে উঠছেন, সারগর্ভ প্রবন্ধ লেখা হচ্ছে, জগতের সমস্ত বিষয়ে তাত্ত্বিক আলোচনার জন্য তৈরি হচ্ছে বিবিধ প্রতিষ্ঠান, তখন নানারকম “জ্ঞানমন্দির” “শিক্ষা-আকাদেমি” ও “চিন্তানিকেতন” চারদিকে স্থাপিত হচ্ছিলো। এই সব ভূয়ো প্রতিষ্ঠানের শতকরা পঞ্চাশটাতেই ইউরি ছিলো চিকিৎসক-উপদেষ্টা।

মস্কোতে পৌছনো মাত্রই সিভৎসেভ স্ট্রীটে তার পুরোনো বাসাটা দেখতে গিয়েছিলো ইউরি। শুনেছিলো মস্কো হ’য়ে যাবার পথে তার আত্মীয়রা সে-বাড়িতে ওঠেনি। নির্বাসনের ফলে তাদের পদমর্যাদার বদল ঘটেছে। তাদের নামে লেখা বাড়ি দেওয়া হয়েছে নতুন ভাড়াটেকে, আর তাদের জিনিসপত্রের কোনো চিহ্ন কোথাও নেই। এমনকি ইউরির সঙ্গে পরিচয়-থাকাটাও বিপজ্জনক ব’লে মনে করা হচ্ছে, ভীষণ ব্যামোর মতো তাকে এড়িয়ে চলেছে সর্বাই।

মার্কেলও নেই সেখানে। সাংসারিক ব্যাপারে বেশ উন্নতি হয়েছে তার, সে এখন মূচনয় গরডের ম্যানেজার (যে-বাড়িতে একসময় স্ভেনটিটস্কার থাকতেন)। ম্যানেজারের ফ্ল্যাটটাই দেওয়া হয়েছিলো তাকে, কিন্তু পুরোনো দরওয়ানের ঘরটাই তার বেশি পছন্দ হ’লো; সেটার মেঝে পিটোনো মাটির হ’লেও আলাদা জলের পাইপ আছে, আর আছে একটি বিশাল রাশিয়ান

চুল্লি। ফ্ল্যাটগুলোতে শীত পড়লে জলের পাইপ আর তাপের যন্ত্র সব ফেটে যায়, কিন্তু দরোয়ানের বাড়িটি সব সময় উষ্ণ ও শুকনো, তাছাড়া সেখানে চকিশ ঘণ্টাই জল পাওয়া যায়।

কোনো-এক সময়ে ইউরি ও ভাসিয়ার বন্ধুতার তাপ জুড়িয়ে এলো। ভাসিয়ার পরিণতি লক্ষ্য করার মতো। ভেরেটেনিকির সেই হেঁড়া-কাপড়-পরা, খোলা-পায়ের উশকো-খুশকো ছেলেটির মতো সে আর চিন্তা করে না বা কথা বলে না। বিপ্লব যে-সত্যকে প্রচার করছে, তার স্পষ্টতা ও স্বতঃসিদ্ধতা ক্রমেই আরো বেশি ভালো লাগছিলো তার। আর ইউরির রহস্যাবৃত, চিত্রকল্পবহুল কথাবার্তা তার মনে হ'তে লাগলো শ্রান্তির কণ্ঠস্বর, যার ধ্বংস অনিবার্য, আর যা আপন দুর্বলতা বিষয়ে সচেতন ব'লেই অসরল।

বিভিন্ন সরকারি বিভাগে যাতায়াত করছিলো ইউরি। দুটো উদ্দেশ্য নিয়ে চেষ্টা করছিলো সে: তার পরিবারের রাজনৈতিক পুনর্বাসন, তাদের রাশিয়ায় ফিরে আসবার অনুমতিপত্র, আর সেই সঙ্গে প্যারিস থেকে তাদের নিয়ে আসবে ব'লে তার নিজের জন্য একটি পাসপোর্ট।

কিন্তু তার এই সব চেষ্টা কেমন অধর্মনস্ক, উদাসীন। ভাসিয়া তা লক্ষ্য ক'রে অবাক হ'তো। বড্ড ভাড়াটাড়ি বিশ্বাস ক'রে ফেলছে যে তার চেষ্টা ব্যর্থ হয়েছে, এর পরে আরো প্রয়াস কতো অনর্থক হবে তা বলার সময় বড়ো বেশি বিশ্বাস ফুটতো তার গলায়, প্রায় যেন তৃপ্তি।

ইউরির ছিদ্রাশ্বেষণে ভাসিয়া ক্রমেই বেশি তৎপর হ'য়ে উঠলো, আর ইউরি যদিও উচিত সমালোচনা বিষয়ে সহনশীল, তবু তাদের সঙ্ঘাবে ক্রমশ ভাঙন ধরলো। অবশেষে পরস্পরের সঙ্গ ত্যাগ করলো তারা। যে-ঘরে তারা একসঙ্গে ছিলো সেটা ছেড়ে দিয়ে ইউরি চ'লে গেলো মুচনয় গরডে। মার্কেল সেখানে সর্বেসর্বা। যেটা এককালে সুভেনটিট্‌স্কিদের ফ্ল্যাট ছিলো, তারই পেছনদিকে এক কোনায় সে ইউরির জন্য একটু জায়গা ঠিক ক'রে দিলে। একটি ভাঙাচোরা বাথরুম আছে সেই ফ্ল্যাটে, তার লাগোয়া একটিমাত্র জানলাওলা একটি ঘর। একেবারে ধ্বংসে পড়া রান্নাঘরটি, ঢুকতে হয় খিড়কির দোর দিয়ে। সেখানে উঠে যাবার পর থেকে ইউরি ডাক্তারি ছেড়ে দিলে, নিজের বিষয়ে কোনোরকম যত্ন আর নেয় না, নিদারুণ দারিদ্র্যে দিন কাটাতে লাগলো, ত্যাগ করলে বন্ধুবান্ধবের সংসর্গ।

৬

শীতের এক ধূসর রবিবার সেদিন। ছাদ থেকে ধোয়ার স্তম্ভ উঠছে, জানলা দিয়ে সন্ধ্যা কালো গোছার মতো পঁচিয়ে-পঁচিয়ে বেরিয়ে যাচ্ছে। যদিও বেআইনি হ'য়ে গেছে, তবু রান্নার চুল্লির লোহার নল দিয়ে ধোয়া বেরোবার রাস্তা এখনো বাড়ির জানলাই। নাগরিক জীবনের সুখ-স্বাচ্ছন্দ্য এখনো ফিরে আসেনি। মুচনয় গরডের ভাড়াটেরা স্নান না-ক'রে ঘুরে বেড়ায়, ফোড়ায় কষ্ট পায়, শীতে কাঁপে, ঘন-ঘন সর্দিতে ভোগে।

রবিবার ব'লে মার্কেল স্চাপভ আর তার পরিবারবর্গ সকলেই সেদিন বাড়িতে ছিলো।

রান্নাঘরের বড়ো টেবিলে খেতে বসেছে তারা। আগেকার দিনে যখন রুটির র্যাশন হয়েছিলো, তখন এই টেবিলেই ভাড়াটেরদের কুপন জমা হ'তো, ভোরবেলা রুটিওলার কাছে নিয়ে যাবার আগে সেগুলিকে ছিড়ে, কেটে, শুনে, বাছাই ক'রে, শ্রেণী-অনুযায়ী জড়িয়ে নেওয়া হ'তো, কাগজে বাঁধা হ'তো বাণ্ডিল ক'রে; আর এখানেই সম্ভলে একটু বেলা ক'রে, রুটিওলার ঘর থেকে রুটি এলে পর, রুটি কাটা হ'তো টুকরো-টুকরো ক'রে, তারপর ওজন ক'রে নিয়ে বিলি করা হ'তো নির্ধারিত বরাদ্দ অনুসারে। কিন্তু সে-সব এখন স্মৃতিমাত্র। অন্য ধরনের খাদ্য-নিয়ন্ত্রণ র্যাশনের স্থান নিয়েছে, স্চাপভরা বেশ ভরাপেট মধ্যাহ্নভোজনে নিযুক্ত আছে, আরাম ক'রে খাচ্ছে সশল্যে চিবিয়ে-চিবিয়ে।

ঘরের অর্ধেকটা জুড়ে আছে সেই চ্যাপ্টা রাশিয়ান চুল্লি; ঠিক মধ্যখানে জুড়ে আছে সেটা। তার ওপরে বিহানা পাতা, চারপাশে তোষক ঝুলছে।

দরজার ধারে বেসিনের ওপরে দেয়াল থেকে একটা কল বেরিয়ে আছে, সেটা দিয়ে সত্যা-সত্যি জল পড়ে। ঘরের দু'পাশে বেঞ্চি পাতা; তার তলায় ট্রাক-বাক্স, পোটলা-পুটলি, বাড়ির সব সম্পত্তি। টেবিলটা ঘরের ঠাঁ দিকে, তার ওপরে একটা বাসনের তাক আটকানো।

ঘরটা খুব গরম। গনগন ক'রে চুল্লি জ্বলছে। তার সামনে দাঁড়িয়ে আছে মার্কেলের স্ত্রী আগাথা, জামার হাতা কনুইয়ের ওপর গুটিয়ে নিয়ে লম্বা সাঁড়াশি দিয়ে সে উনুনের ভেতরকার হাঁড়িকুড়িগুলোকে নাড়াচাড়া করছে, দরকারমতো কোনোটাকে কাছে আনছে, আবার কোনোটাকে সরিয়ে দিচ্ছে দূরে। তার ঘর্মাক্ত মুখ কখনো লাল হ'য়ে উঠছে উনুনের আচে, কখনো বা রান্নার ভাপে ঝাপসা দেখাচ্ছে। হাঁড়িকুড়ি একপাশে সরিয়ে দিয়ে পেছন থেকে একটা লোহার থালায় একটা “পাই”^১ বের ক'রে আনলে সে, উল্টিয়ে আবার উনুনে ঠেলে দিলে আরেকটু কড়া হবার জন্য। দুটো বালতি হাতে নিয়ে ইউরি ঘরে ঢুকলো।

‘ভালো খিদে হোক।’

‘আরাম ক'রে বোসো। আমাদের সঙ্গে খেয়ে যাও।’

‘ধন্যবাদ, আমার খাওয়া হ'য়ে গেছে।’

‘তোমার খাওয়া মানে কী, তা তো আমরা ভালোই জানি। আমাদের সঙ্গে গরম কিছু খেয়ে যাও না। নাক শিটকোবার মতো কিছু নয়—ভালো খাবার, সৈকা আলু, মাংসের “পাই,” “কাশা”।’

‘ধন্যবাদ, কিন্তু সত্যি...দুঃখিত, দরজাটা খোলা রেখেছি, ঘরে ঠাণ্ডা ঢুকছে। যতোটা পারি জল নিয়ে যেতে চাই। স্নানের টবটা সাফ ক'রে নিয়েছি, এখন সেটাতে আর গামলাগুলোতে জল-তুলে রাখতে হবে। আরো বার ছ'য়েক আমাকে আসতে হবে এ-ঘরে, কিন্তু তারপর অনেকক্ষণ আর বিরক্ত করবো না তোমাদের। এ-ভাবে ঢুকে পড়ার জন্য মাপ চাইছি, কিন্তু অন্য কোথাও তো জল পাবো না।’

‘ঠিক আছে, তুমি নাও না জল। সিরাপ চাইলে তা দিতে পারতাম না, তবে জলের অভাব নেই। যতো ইচ্ছে নাও—এর জন্য আমরা এমনকি দামও নেবো না।’

সবাই হেসে উঠলো।

যতোকণ ইউরি তার তৃতীয় ও চতুর্থ ঝাঁক জল ভরছে, ততোকণে অন্য রকম হ'য়ে গেছে তাদের গলার স্বর।

‘আমার জামাইরা জিজ্ঞেস করছিলো তুমি কে? আমি বললাম, কিন্তু ওরা তো বিশ্বাসই করে না—তুমি নাও না জল, আমাদের অসুবিধে নেই। তবে মেঝেতে ও-রকম ছিটোচ্ছে কেন বলো তো! কী নোংরা! জ'মে বরফ হ'য়ে গেলে তুমি কি আর শাবল নিয়ে এসে খোঁচাবে! আঃ—দরজাটা ঠিকমতো বন্ধ করো না—হাবা কোথাকার!—ঠাণ্ডা আসে না ঘরে! কতো টাকাই না ঢালা হয়েছিলো তোমার পেছনে! ও-সব বিদ্যে এখন কোন কাজে লাগছে শুনতে পাই?’

পাঁচ অথবা ছ'বারের বার ইউরি যখন জল নিতে এলো, তখন মার্কেল ত্রুটি না-ক'রে পারলো না।

‘আর ঠিক একবার, তারপর কিন্তু আর না। আরে বাবা, সব-কিছুরই একটা সীমা আছে তো। আমাদের ছোট্টো মারিনা যদি তোমার পক্ষ নিয়ে না দাঁড়াতো, তাহ'লে কবে দিতাম দরজা বন্ধ ক'রে। মারিনাকে মনে আছে তোমার? ঐ যে, টেবিলের ওদিকে শামলা-রঙের মেয়েটি ব'সে

১ Pic : মাংস বা ফলের সঙ্গে ময়লা ও মিষ্টি মিশিয়ে কেকের আকারে “পাই” তৈরি করা হয়।—অনুবাদের টীকা।

আছে। “ওর মনে কষ্ট দিয়ো না বাবা,” সব সময় ও বলে আমাদের। যেন তোমার মনে কষ্ট দিতে কারো ব’য়ে গেছে। বড়ো ডাকঘরে টেলিগ্রাফ-অপারেটরের কাজ করে ও। বিদেশী ভাষা জানেন দু’একটা। ও বলে, “উনি দুর্ভাগা”, তোমার জন্য বড়োদুঃখ ওর, তোমার জন্য ও ডুবতে পারে জলে, ঝাঁপ দিতে পারে আগুনে। তুমি যে চুনোপুটি হ’য়ে রইলে, সে যেন আমারই দোষ। দোষ তো তোমারই বাপু। বিপদের সময় বাড়িঘরদোর ফেলে সাইবেরিয়ায় পালিয়ে যাওয়া উচিত হয়নি তোমার। এই আমাদের দ্যাখো তো—দুর্ভিক্ষের সময়, তারপর শাদারা যখন অস্তিত্ব ক’রে তুললো—এখানেই মাটি কামড়ে প’ড়েছিলাম আমরা—আর তাইতেই তো বহাল-তব্বিয়েতে আছি। তোমারই দোষ। টোনিয়ার দিকে ঠিকমতো মন দিতে যদি, তাহ’লে কি আজ তাকে বিদেশ-বিড়ুয়ে পথে-পথে ঘুরে মরতে হয়। তা যাক, ও-সব তোমার ব্যাপার, আমার কিছু এসে যায় না। শুধু যদি মাপ করো তো জিজ্ঞেস করতে চাই—এতো জল দিয়ে করবে কী? স্কেটিং-ফেটিং-এর’ আড্ডা খুলবে নাকি কোথাও? ওঃ, জলে-জলে পাগল ক’রে দিলে তুমি। অথচ তোমার মতো একটা মুরগির ছাঁর ওপর ঠিকমতো রাগ করতেও পারি না।’

আবার হেসে উঠলো সবাই, শুধু মারিনা চারদিকে তাকিয়ে দপ ক’রে জ্বলে উঠলো। তার গলার স্বর অবাক ক’রে দিলো ইউরিকে, যদিও কেন যে সে তার গলা শুনে বিচলিত হ’লো, তা ইউরি তখনো বোঝেনি।

‘বাড়িটা বড়ো নোংরা হ’য়ে আছে, মার্কেল। মেঝে ঘষতে হবে। আর আমার কিছু কাপড়চোপড় না-কাচলে আর চলে না।’

শুনে শ্যাপভরা স্তম্ভিত।

‘ও-সব ধোয়া-মোছা কেউ করে না আজকাল, মুখে আনাও অন্যায়। তুমি তো দেখছি এর পর চীনে লন্ড্রি খুলে বসবে।’

আগাথা বললো, ‘তা আমার মেয়েটাকে বরং পাঠিয়ে দিচ্ছি। ও তোমার কাপড় কাচা ঘর মোছা সব ক’রে দেবে, শেলাই-টেলাইও পারবে দরকার হ’লে। ওকে ভয় পাবার কিছু নেই রে, মারিনা। দেখতেই পাচ্ছিস, কী রকম সভ্যভব্য, একটা পোকার গায়েও টোকা দেবে না।’

‘কী যে বলো, আগাথা মিখাইলোভনা! আমার ধোয়ামোছার কাজ মারিনা কেন করবে? আমার জন্য ও ময়লা ঘাঁটবে তা হ’তে পারে না, আমিই সব ক’রে নিতে পারবো।’

‘আপনি ময়লা ঘাঁটতে পারেন, আর আমি পারি না, এই বলতে চান?’ মারিনা ব’লে উঠলো, ‘আর বোকামি করবেন না, ইউরি আন্দ্রেইয়েভিচ। আপনার সঙ্গে দেখা করতে গেলে তাড়িয়ে দেবেন না আশা করি।’

শিক্ষা পেলে গায়িকা হ’তে পারতো মারিনা। তার নির্মল কণ্ঠস্বরের ওঠা-নামায় অনেকখানি ব্যাপ্তি ও শক্তি রয়েছে। বেশি চড়ে না, তবু মনে হয় সাধারণ কথাবার্তার পক্ষে একটু কড়া। এটা যেন তার সত্তার কোনো অংশ নয়, তার কণ্ঠস্বর স্বতন্ত্রভাবে জীবন্ত ব’লে কল্পনা করা যায়। যেন তার পেছন দিক থেকে আসছে—এই স্বর, বা পাশের ঘর থেকে ভেসে আসছে। তার কণ্ঠস্বর তার আশ্রয়—তার অঙ্গরা অভিভাবিকা। যে-নারীর এমন কণ্ঠ, তাকে কোনো দুঃখ বা অঘাত দিতে কেউ চাইবে না।

আর এমনি ক’রেই রোববারে-রোববারে এই জল ব’য়ে নেওয়া থেকেই মারিনা ও ইউরির মধ্যে বন্ধুত্বের সূত্রপাত হ’লো। প্রায়ই মারিনা এসে ইউরিকে ঘরের কাজে সাহায্য করে। একদিন সে থেকে গেলো, বাড়িতে আর ফিরলো না। এইভাবে ইউরির তৃতীয় স্ত্রী হ’লো সে, যদিও প্রথমজনের সঙ্গে ইউরির বিবাহবিচ্ছেদ হয়নি, আর এই বিয়েতেও আইনমণ্ডিক কিছু করা

১ স্কেটিং-এর আড্ডা (skating rink) : এক প্রকার ক্রীড়ার জন্য নির্মিত বরফে-ঢাকা মেঝে অথবা প্রান্তর।—অনুবাদের টীকা।

হ'লো না। সম্ভান হ'লো তাদের, মার্কেল আর আগাথা বেশ গর্বের সঙ্গেই ডাক্তারের স্ত্রী ব'লে মেয়ের পরিচয় দেয়। তার বাবা গজগজ করে গির্জাতে গিয়ে কি রেজিস্ট্রি ক'রে ঠিকমতো বিয়ে হ'লো না ব'লে, কিন্তু আগাথা বলে, 'তোমার কি মাথা খারাপ হ'লো? টোনিয়া এখনও বেঁচে আছে—এ তো দুই বিয়ে' ছাড়া কিছু নয়।'—'মাথা তোমারই খারাপ হয়েছে,' জবাব দেয় মার্কেল। 'এর মধ্যে টোনিয়া আসছে কোথেকে? ও তো ম'রে গেছে ব'লেই ধ'রে নিতে পারো। কোনো আইন আর সহায় হবে না টোনিয়ার।'

ইউরি মাঝে-মাঝে ঠাট্টা ক'রে বলে যে তাদের হ'লো কুড়ি বালতির রোমান্স—ঠিক যেন কুড়িটি পরিচ্ছেদে বিভক্ত একটি উপন্যাস।

ইউরির ব্যবহার ক্রমেই অদ্ভুত হ'য়ে উঠছে, এলোমেলো নোংরা ক'রে রাখে ঘরবাড়ি, মেজাজ মর্জি খামখেয়ালের অন্ত নেই—সব ক্ষমা করে মারিনা। সে বোঝে ইউরি এখন স্বেচ্ছায় ও সম্ভানে ব'য়ে যেতে দিচ্ছে নিজেকে, তার আবদার, নালিশ, মেজাজ—সবই মেনে নিতে হবে।

মারিনার আনুগত্যের ওখানেই শেষ নয়। ইউরিরই দোষে একবার তারা দারুণ অভাবে পড়লো। যাতে এই দুঃসময়ে ইউরিকে একা থাকতে না হয়, সেজন্য মারিনা ডাকঘরে তার নিজের কাজটিও ছেড়ে দিলে। কিন্তু ভাগ্যক্রমে তার কাজে সকলেই এতোদূর পর্যন্ত খুশি ছিলো যে এই অনিচ্ছাকৃত কামাইয়ের পরে প্রতিবারেই ফের কাজে নেওয়া হ'তো তাকে। ইউরির মর্জি মেনে নিয়ে সে বাড়ি-বাড়ি ঘুরে ইউরির সঙ্গে গভর খাটে। কাঠ কেটে দেয় নানান তলার বাসিন্দাদের জন্য। তারা অনেকে এখন বেশ সচ্ছলভাবে সংসার পাতছে—তাদের মধ্যে আছে নতুন অর্থনৈতিক বিধানের আরম্ভকালীন কালোবাজারি জোচ্চোর, আর সেই সব শিল্পী আর বিদ্বজ্জন, যারা সরকারের সঙ্গে ঘনিষ্ঠ। একদিন ইউরি আর মারিনা, কার্পেটের ওপর যাতে কাঠের ঠুড়ো না পড়ে, সেজন্য অতি সাবধানে তাদের ফেস্ট বুট-পরা পা ফেলে-ফেলে এক ভাড়াটের ঘরে কাঠ নিয়ে যাচ্ছিলো, ভদ্রলোকটি কী-যেন একটা পড়ছিলেন—এমনই নিমগ্ন হ'য়ে ছিলেন তাতে যে একটু চোখ তুলে তাকাবার মতো ভদ্রতাটুকুও রক্ষা করলেন না। তাদের ছকুম করা, টাকাকড়ি দেওয়া,—সবই করছিলেন তাঁর স্ত্রী।

'শুয়ারটা কিসে নাক ডুবিয়ে ব'সে আছে', ইউরি ভাবলে। বইয়ের মার্জিনে নিদারুণ বেগে লিখে চলছিলেন বিদ্বান ব্যক্তিটি। কাঠের বোঝা নিয়ে তাঁর পাশ দিয়ে যেতে-যেতে ইউরি তাঁর কাঁধের ওপর দিয়ে উকি দিলো। টেবিলের ওপর প'ড়ে আছে ইউরির লেখা এক পুস্তিকার পুরোনো সংস্করণ। ভাসিয়া সেটা ছাপিয়েছিলো।

৭

ইউরি আর মারিনা স্পিরিডোনোভকা স্ট্রীটে বাসা নিয়েছিলো। কাছেই ব্রিসি স্ট্রীটে গর্ডন একটা ঘর নিয়ে থাকে। মারিনা আর ইউরির এখন দুই মেয়ে, কাপকা-র (কাপিটোলিনা) বয়স ছয়, আর ছোটো ক্লাজকা-র (ক্লোডিয়া) মাত্র ছ'মাস।

১৯২৯-এর গ্রীষ্মের প্রথম দিকটায় খুব গরম পড়েছিলো। কাছাকাছি যারা থাকতো, টুপি না-প'রে, শুধু শার্ট গায়েই পরস্পরের সঙ্গে দেখা করতে যেতো তারা।

যে-বাড়িতে গর্ডনের ঘর, তাঁর গর্ডন অদ্ভুত, এক সময়ে কেতাদুরস্ত এক দরজির দোকান ছিলো সেটা। দুই তলা জুড়ে ছিলো দোকান, বোরানো সিঁড়ি দিয়ে ওপরে-নিচে সংযোগ রক্ষা হ'তো; আর ওপর থেকে নিচে পর্যন্ত বিশাল এক ঘষা কাঠের জানলা ছিলো, তার ওপর সোনালি অক্ষরে লেখা সেই দরজির নাম, পেশা স্থলস্থল করতো।

এখন বাড়িটা তিন অংশে বিভক্ত হয়েছে। কাঠের মেঝে বসিয়ে দুই তলার মাঝখানে আর-একটা ঘর তৈরি হয়েছে। তার জানলাটা বসবাসের ঘরের পক্ষে অন্ধুত, মেঝে থেকে শুরু হ'য়ে তিন ফুট মতো উচু সেই জানলা অংশত সোনালি অক্ষরের অবশিষ্টে ঢাকা প'ড়ে গেছে। বাইরে থেকে, অক্ষরগুলির ফাঁক দিয়ে যে-কোনো লোকের হাঁটু পর্যন্ত দেখা যায়। এটাই গর্ডনের ঘর। সেই মুহূর্তে তার সঙ্গে ছিলো জিভাগো, ডুডোরভ, ছেলেপুলে নিয়ে মারিনা। বাচ্চাদের অবশ্য কাঠের মধ্য দিয়ে পুরোপুরি দেখা যাচ্ছে, বড়োদের মতো অংশত নয়। পুরুষ তিনজনকে একা রেখে মারিনা তার মেয়েদের নিয়ে একটু পরেই উঠে চ'লে গেলো।

যে-সব পুরুষ একসঙ্গে স্কুলে পড়েছে, কাটিয়ে এসেছে বহু বছরের বন্ধুতা, তারা যেমন ক'রে গল্প করে; তেমনি এক অত্বর অলস গ্রীষ্মকালীন আলাপ চলছিলো তিনজনের।

নিজের পক্ষে তুণ্ডিকর যথেষ্ট শব্দ যাদের দখলে আছে, শুধু তারাই পারে সহজ ও সুসংবদ্ধ কথা বলতে। একমাত্র ইউরিরই সেই ক্ষমতা ছিলো।

আত্মপ্রকাশে অক্ষমতাবশত তার দুই বন্ধু কী করবে ভেবে পাচ্ছিলো না। শব্দের অভাব পূরণ করার জন্য ক্রমাগত পায়চারি করছিলো তারা, সিগারেট টানছিলো, অঙ্গভঙ্গি করছিলো আর পুনরাবৃত্তি করছিলো নিজেদের কথার, ('ওটা—সোজা কথায় বলছি—ওটা অসৎ; হ্যাঁ ভাই, অসৎ, অসৎ, মানে অসৎ আরকি!')

তারা বুঝতে পারছিলো না যে এই অতি-অভিনয় তাদের আবেগ অথবা আগ্রহের প্রমাণ নয়, বরং উন্মোচন, তাদের দৈন্য আর সীমাবদ্ধতার ফল।

গর্ডন আর ডুডোরভ দু'জনেই বিশ্ববিদ্যালয় মহলে আনাগোনা করে। তাদের সংসর্গ হ'লো মনীষী আর ভালো-ভালো বই, সাংগীতিক ও ভালো-ভালো গীতরচনা, এমন রচনা যা আজ যতো ভালো, কালকেও ততোটাই (কিন্তু সব সময়ই ভালো!); তারা জানতো না যে রুচির দিক থেকে সাধারণ হওয়া এতো বড়ো দুর্ভাগ্য যে তার চেয়ে একেবারে রুচি না-থাকা বরং ভালো।

ডুডোরভ কি গর্ডন কেউই বুঝছিলো না যে ইউরিকে তারা যে উপদেশ দিচ্ছে তা তার ব্যবহারকে প্রভাবিত করার সহদয় ইচ্ছা থেকে ততোটা নয়, যতোটা স্বাধীন চিন্তাশক্তি ও সহজভাবে কথাবার্তা চালিয়ে নিয়ে যাবার অক্ষমতা থেকে। আয়ত্তের বাইরে চ'লে-যাওয়া গাড়ির মতো, সেই আলাপ কখনোই গম্ভ্যে পৌঁচছিলো না। কথা চালাতে না পেরে বার-বার হ্রোচট খাচ্ছিলো তারা, তাই এখন ইউরিকে নিয়ে পড়েছে, নির্দেশ-উপদেশ বর্ষণ করছে তার ওপর।

ইউরির কাছে তাদের যুক্তি, আবেগ, সহানুভূতি, অস্থিরতা—এ-সবের উৎস দিনের আলোর মতো স্পষ্ট। কিন্তু সে তো বলতে পারে না, 'বন্ধুগণ, কী অসহায়রকম সাধারণ তোমরা—তোমরা, তোমাদের গোষ্ঠী, তোমাদের আওড়ানো মাউন্টব্লবন্ডের নাম, তোমাদের উচ্চপ্রশংসিত আর্টের ঝকঝকানি—সবই কি অসহায়-রকম সাধারণ? আমার সঙ্গে একই সময়ে তোমরা বেঁচে আছো, আমার বন্ধু তোমরা—এছাড়া তোমাদের আর-কিছুই নেই যা সজীব ও উজ্জ্বল।' কিন্তু এমন কথা মুখে আনা যায় কী ক'রে? তাই ওদের মনে যাতে আঘাত না লাগে, ইউরি সবিনয়ে ওদের কথা শুনে যেতে লাগলো।

ডুডোরভ সম্প্রতি নির্বাসন থেকে ফিরেছে; নাগরিকের সব অধিকার ফিরে পেয়েছে সে, গবেষণা ও বিশ্ববিদ্যালয়ে শিক্ষকতা করার নতুন ক'রে অনুমতি পেয়েছে।

তার নির্বাসনকালীন মানসিক অবস্থার কথা বন্ধুদের কাছে খুলে বলছিলো ডুডোরভ। ভয়ে, বা বাইরের অবস্থা বিবেচনা ক'রে, রেখে-ঢেকে বলছিলো না।

তার বিরুদ্ধে সরকারি পক্ষের যুক্তিসমূহ, জেলখানা ও জেল থেকে বেরোবার পর তার প্রতি ব্যবহার, আর বিশেষত প্রতিকর্তার সঙ্গে তার প্রাণখোলা আলোচনা—এ-সবের

ফলে—ডুডোরভ বলছিলো—‘তার মাথা সাফ হ’য়ে গেছে’, ‘নতুন রাজনৈতিক শিক্ষা’ পেয়েছে সে, তার চোখ খুলে গেছে, এমন অনেক জিনিস সে আজকাল দেখতে শিখেছে যা আগে লক্ষ্য করেনি, মোটের ওপর হ’য়ে উঠেছে ‘ব্যক্তি হিসেবে অনেক বেশি সাবালক’।

এ-সব কথা বস্তাধচা বলেই গর্ডনকে মুগ্ধ করলো। মাথা নেড়ে-নেড়ে সহানুভূতি জানালো সে, ডুডোরভের সঙ্গে প্রতিটি বিষয়ে একমত হ’লো। গর্ডনকে যা সবচেয়ে নাড়া দিলে তা ডুডোরভের অনুভূতি ও ভাষার তুচ্ছতা; পাঠ্যকেতাবি গোড়ামিভরা ভাবগুলিতে সে দেখতে পেলো সার্বিক মানবতার লক্ষণ।

ডুডোরভের ধর্মধ্বজ মামুলি বুলিগুলো সেই যুগেরই লক্ষণমাত্র। কিন্তু সেগুলো যে অমন নির্ভুল, অমন স্বচ্ছভাবে ধর্মের ছদ্মবেশী, ঠিক সেইজন্যই ইউরির তা অসহ্য লাগলো। সে মনে-মনে ভাবলে যে যারা মুক্ত নয়, তারা বন্ধনকেই আদর্শ ক’রে তোলে। তা-ই ছিলো মধ্যযুগে, জেসুইটরা চিরকাল এর সুযোগ নিয়েছে। শোভিয়েট বুদ্ধিজীবীদের রাজনৈতিক অতীন্দ্রিয়বাদ ইউরি সহ্য করতে পারে না, যদিও সেটাকেই ধ’রে নেওয়া হয় চরম আদর্শ ব’লে, তখনকার ভাষায় বলা হয় “সর্বোচ্চ আত্মিক অভিযান” ব’লে। কিন্তু বন্ধুদের মনে আঘাত দেবার ভয়ে এ-বিষয়েও সে নীরব রইলো।

ডুডোরভের গল্পে তার কৌতূহল উদ্রেক করলো ডুডোরভের এক নির্বাসন-সঙ্গীর কথা—একই কুঠুরিতে থাকতো তারা—বনিফাসে আর্লেন্ডসভ নামে টিখনোভ’ সম্প্রদায়ের পুরোহিত। ক্রিস্টিনা নামে একটি ছয় বছরের কন্যা ছিলো আর্লেন্ডসভের, পিতার একান্ত অনুগত সে। পিতার গ্রেপ্তার ও তার পরবর্তী ঘটনাগুলো মেয়েটির মনে সাংঘাতিক আঘাত দিয়েছিলো। ‘ধর্মযাজক’, ‘নাগরিকের অধিকারচ্যুত’, এই লেবেলগুলোকে তার মনে হ’লো কলঙ্কচিহ্ন—যা তার বাবার নাম থেকে কোনো-একদিন মুছে ফেলার জন্য সে হয়তো তার বালিকা-হৃদয়ে বন্ধপরিকর হয়। সুদূর এই উদ্দেশ্যটি অতি অল্প বয়স থেকেই আগুনের মতো জ্বলছিলো তার মনে; আর তারই ফলে সাম্যবাদের মধ্যে, যা তার মনে হ’লো তর্কাতীত, তার বয়সের সীমাতীক্রান্ত উদ্বাদনা নিয়ে তারই শিষ্যত্ব গ্রহণ করলো সে।

‘আমাকে যেতে হয় এবার,’ ইউরি বললো। ‘আমার ওপর রাগ কোরো না, মিশা। বড্ড গুমোট এখানে, আর বাইরে কী তাপ! আমার দম আটকে আসছে।’

‘কিন্তু জানলা তো খোলা আছে, দ্যাখো, মেঝের দিকে তাকিয়ে দ্যাখো... অত্যন্ত দুঃখিত, আমরা বড্ড বেশি সিগারেট খাচ্ছিলাম। ভুলেই যাই যে তুমি থাকলে আমাদের ধূমপান করা অন্যায়। এই গুমোট তো আর আমার দোষে হয়নি, জানলাটাই মুর্খের মতো বানিয়েছে। আমাকে আর-একটা ঘর খুঁজে দিলে তো পারো।’

‘আমাকে যেতেই হবে, মিশা। অনেক বকবক করা গেলো। আমাকে নিয়ে দূর্শিক্ষা করছো তোমরা—দু’জনকেই ধন্যবাদ জনাই। না, সত্যি বানিয়ে বলছি না। আমার এক হৃদরোগ হয়েছে, স্ক্রেকরসিস তার নাম। হার্টের পেশীগুলো ক’য়ে-ক’য়ে পাংলা হ’য়ে যায়—একদিন ফেটে যাবে আরকি। আর আমার এখনো চল্লিশ হয়নি, আর এমনও নয় যে পাড় মাতাল ছিলুম বা জীবন ভ’রে যথেষ্টাচার করেছি।’

‘যতো বাজে! তোমার জন্য শোকসংগীত গাইবার সময় হয়নি এখনো। আমাদের চাইতে ঢের বেশিদিন বাঁচবে তুমি।’

‘হার্ট থেকে অল্পসল্প রক্তক্ষরণের অসুখ খুব বেশি হচ্ছে আজকাল। তাতে যে সব সময়ই

১ এই সজ্ঞাদানের পুরোহিতদের গুরু হলেন পিতামহ টিখন, রুশীয় চার্চের এক প্রধান পুঙ্খ, বিনি রাষ্ট্র কর্তৃক বহীষ সম্পত্তি বাজেয়াপ্ত করার প্রচেষ্টায় বাধ্য দিতে নিঃস্বহযোগ করেন। ‘জীবিত চার্চ’—যা সেই সময়ে রাষ্ট্রের পৃষ্ঠপোষকতা কিছু পরিমাণে লাভ করেছিলো, এই সজ্ঞাদার তখন বিরোধী।

মৃত্যু হয় তা নয়। কেউ-কেউ টিকেও যায়। আমাদের এই যুগের একটা সাধারণ অসুখ এটা। এর কারণ, আমার মনে হয়, প্রধানত নৈতিক। আমাদের মধ্যে অধিকাংশকেই ক্রমাগত ও নিয়মিত কপটতার মধ্যে জীবনযাপন করতে হচ্ছে। যদি দিনের পর দিন যা তুমি মনে ভাবো মুখে তার উল্টোটা বলো, যা তুমি পছন্দ করো না, তারই পায়ে পেলাম ঠোকো, আর যা তোমার জীবনে অভিশাপের মতো তাই নিয়ে উল্লসিত হয়ে ওঠো—তাহলে তোমার স্বাস্থ্য ভেঙে পড়তে বাধ্য। তোমার স্নায়ুতন্ত্র তো গল্পকথা নয়, তোমার দেহেরই অংশ, আর তোমার মুখের মধ্যে যেমন দাঁত, তেমনি নির্দিষ্ট স্থানে, তোমার অভ্যন্তরেই তোমার আত্মার বসতি। তাকে অমান্য করলে শাস্তি পেতেই হবে। তোমার কথা শুনেতে বড়ো কষ্ট হচ্ছিলো নিকি, যখন তুমি বলছিলে জেলের ভেতরে কী ভাবে তুমি নতুন শিক্ষালাভ করলে, সাবালক হয়ে উঠলে। ঠিক যেন সার্কাসের ঘোড়া, নিজেই গল্প করছে, কী ভাবে সে শিক্ষিত হ'লো।'

'আমি ডুডোরভের পক্ষ', বললো গর্ডন। 'মানুষের কথাবার্তা শোনা তোমার আর অভ্যাস নেই বোঝা যাচ্ছে, কোনো কথাই তোমার কাছে ঠিক পৌঁছয় না।'

'তা হ'তে পারে, মিশা। কিন্তু যাই হোক, আমাকে এবার যেতেই হচ্ছে। নিশ্বাসের কষ্ট হচ্ছে আমার। সত্যি বলছি, একটুও বাড়িয়ে বলছি না।'

'একটু দাঁড়াও, তুমি পালাতে চাইছো। যতোক্ষণ না মন থেকে সোজাসুজি সাফ একটা জবাব দিচ্ছে, ততোক্ষণ আমরা তোমাকে যেতে দেবো না। তুমি মানো—না কি মানো না—যে এবার তোমার হালচাল বদলানো উচিত, শোধরানো উচিত নিজেকে? সে-বিষয়ে কী করছো তুমি? প্রথমত টোনিয়া আর মারিনার ব্যাপারটার একটা মিটমিট করতে হবে তোমাকে। ওরাও তো মানুষ, ওরা মেয়ে—ওদের কষ্ট আছে, অনুভূতি আছে—তোমার ভাবনাগুলোর মতো অশরীরী নয় তো যে মগজে গিয়ে ভেঙি দেখাবে। আর তারপর, তোমার মতো একজন মানুষ একেবারে গোপনীয় যাবে, এও বড়ো লজ্জার কথা। গা ঝাড়া দিয়ে উঠতে হবে তোমাকে, নিজেকে গুছিয়ে নিয়ে শাদা চোখে তাকাতে হবে, ছাড়তে হবে এই অথহীন ঔজ্জ্বল্য। ঠিক, ঠিক—তোমার এই দেমাকি ভাব, সকলের প্রতি তাজিল্য, —ও-সব ছাড়ো তো এবার। তার কোনো ক্ষমা নেই কিন্তু। আবার কাজ হাতে নাও, ডাক্তারি শুরু করো।'

'আচ্ছা বেশ, জবাব দিচ্ছি কল্পার। সম্প্রতি আমি নিজেও এই ধরনের কথা ভাবছিলাম, তাই সত্যিই কথা দিতে পারি যে বদল একটা হবে। আমার মনে হয় সবই ঠিক হ'য়ে যাবে, খুব শিগগিরই হবে। দেখো তোমরা। না, সত্যি বলছি। সব-কিছুই ভালোর দিকে এখন। আমি বেঁচে থাকতে চাই—অনির্বাচনীয়, উদ্দাম সেই হচ্ছে—আর অবশ্য বেঁচে থাকা মানেই আরো সংগ্রাম, আরো এগিয়ে যাওয়া, আরো, আরো সম্পূর্ণতার জন্য চেষ্টা ও তাতে সিদ্ধি।

'মিশা, আগে তুমি যেমন বরাবর টোনিয়ার পক্ষ নিয়েছো, তেমনি এখন মারিনার পক্ষ নিয়ে কথা বলছো—তাতে আমি খুশি হয়েছি। কিন্তু জানো, ওদের একজনের সঙ্গেও ঝগড়া হয়নি আমার, ওদের সঙ্গে আমার কোনো লড়াই চলছে না—এই ব্যাপার নিয়ে কারো সঙ্গেই আমার লড়াই নেই। প্রথম-প্রথম তোমরা আমাকে এই ব'লে গল্পনা দিতে যে মারিনা আমাকে "আপনি" বলে, "ইউরি আন্দ্রেইয়েভিচ" ব'লে সম্বোধন করে, আর আমি তাকে "তুমি" বলি, ডাকি "মারিনা" ব'লে—যেন সেটা আমারও খারাপ লাগতো না। কিন্তু জানো, এই অস্বাভাবিক অবস্থার পেছনে যে-সব কারণ ছিলো তা অনেক আগেই দূর হ'য়ে গেছে: সব কিছু মল্লং হ'য়ে গেছে এখন, সাম্য স্থাপিত হয়েছে।

'এবার একটা ভালো খবর দিচ্ছি। প্যারিস থেকে আবার চিঠি পাচ্ছি আমি। বাচ্চারা বড়ো হচ্ছে, অনেক সমবয়সী কন্যাসী বন্ধু পেয়েছে তারা; শাশা প্রাইমারি স্কুলের গতি ক্লাসে উঠলো, আর মাশা শিগগিরই ডক্টর হচ্ছে। জানো তো, মাশাকে আমি কখনো চোখে দেখিনি, ওরা ফরাসী নাগরিক হ'য়ে গেছে—তবু, সব-কিছু সত্ত্বেও, আমার কেন জানি মনে হয় যে ওরা

শিগগিরই ফিরে আসবে, কোনো-না-কোনো উপায়ে সব ঠিক হ'য়ে যাবে আবার।

‘মনে হ’লো টোনিয়া আর আমার স্বপ্নরমশাই মারিনার কথা, বাচ্চা দুটির কথাও জেনে গেছেন। আমি কিছু লিখিনি চিঠিতে, পাঁচ মুখ ঘুরে পৌঁচেছে আরকি খবরটা। আলেকজান্ডার আলেকজান্ড্রোভিচ ভয়ানক রেগে গেছেন—বাবা তো উনি। টোনিয়ার কথা ভেবে খুবই আঘাত পেয়েছেন নিশ্চয়ই। প্রায় পাঁচ বছর ধ’রে এ-জন্যই আমাদের কোনো চিঠিপত্রের বিনিময় হয়নি। মস্কোতে ফেরার পর আমি ওদের চিঠি লিখতাম, তারপর হঠাৎ ওরা জবাব দেওয়া বন্ধ ক’রে দিলেন।

‘এখন, এই মাত্র ক’দিন হ’লো, ওরা আবার লিখতে শুরু করেছেন, ওরা সবাই। এমনকি বাচ্চারাও। স্নেহে ভালোবাসায় ভরা চিঠিগুলি। কোনো কারণে ব্যাপারটা মেনে নিয়েছেন ওরা। হয়তো অন্য কাউকে খুঁজে পেয়েছে টোনিয়া; ঈশ্বরের কাছে আমি সেই প্রার্থনাই করি। কিন্তু জানি না, আমিও লিখি মাঝে-মাঝে...কিন্তু সত্যিই আর থাকতে পারছি না আমি। চলি, নয়তো হাঁপানির টান উঠবে। চলি।’

পরদিন সকালে ভীষণ উদ্ভ্রান্ত অবস্থায় মারিনা গার্ডনের কাছে ছুটে এলো। বাচ্চাদের রেখে আসতে পারে এমন কেউ না থাকায় কবলে জড়িয়ে ছোটো বাচ্চাটাকে কোলে ক’রে নিয়ে এসেছে সে, আর অন্য হাতে টানতে-টানতে এনেছে কাপকাকে, পেছন-পেছন মায়ের পায়ে-পায়ে ছুটে আসছে মেয়েটা।

‘মিশা, ইউরির কি এখানে?’ ভয়ার্ড স্বরে মারিনা জিজ্ঞেস করলো।

‘কাল রাতে ও বাড়ি ফেরেনি?’

‘না তো।’

‘তাহ’লে নিকির ওখানে রাত কাটিয়েছে নিশ্চয়ই।’

‘আমি ওখান থেকেই আসছি, নিকি কলেজে গেছে, কিন্তু পড়শিরা ইউরিকে চেনে, ওরা বললো উনি ওখানে যাননি।’

‘তাহ’লে গেলো কোথায়?’

মারিনা ক্লাজকাকে সোফার ওপর নামিয়ে রেখে চীৎকার ক’রে ফিট হ’য়ে পড়লো।

৮

এর পরের দু’দিন গার্ডন আর ডুডোরভের মারিনাকে একা রেখে যেতে সাহস হ’লো না। পালা ক’রে পাহারা দিলে ওরা, আর ইউরিকে খুঁজে বেড়াতে লাগলো। ইউরির পক্ষে যাওয়া সম্ভব এমন সমস্ত জায়গায় খোঁজ করলো তারা—মুচনয় গরড, সিভৎসেভ স্ট্রীট, যতো ‘জ্ঞানমন্দির’ আর ‘চিন্তানিকেতনে’ সে কাজ করেছে, তার সব বন্ধু, যাদের শুধু নামটুকুও শুনেছে, ঠিকানা জোগাড় করতে পারলেই দেখা করেছে তাদের সঙ্গে—কিন্তু কিছুতেই কোনো ফল হ’লো না।

ইউরি যে নিখোঁজ, সেনাবাহিনীকে এ-খবর তারা দিলে না। সে অবশ্য নাম রেজিস্ট্রি করেছিলো, পুলিশের খাতায় কোনো অভিযোগও ছিলো না তার বিরুদ্ধে। কিন্তু তবু, যে-মানুষ তৎকালীন ধারণা অনুযায়ী একেবারেই আদর্শ জীবন যাপন করছে না, তার সন্ধান, একেবারে নিরুপায় না হ’লে, সেপাই লাগানো তারা সমীচীন মনে করলে না।

গার্ডন, ডুডোরভ আর মারিনা, এই তিনজনের কাছেই তৃতীয় দিনে ভিন্ন-ভিন্ন ডাকে ইউরির চিঠি এলো। তাদের এই কষ্ট আর উদ্বেগের কারণ হয়েছে ব’লে ইউরি অনুতপ্ত; ঈশ্বরের দোহাই, তাকে খুঁজে বের করার চেষ্টা যেন আর না করে তারা—কিন্তুতেই কোনো ফল হবে না, তাদের সব চেষ্টা ব্যর্থ হবে।

সে লিখেছে যে কিছুদিনের মতো সে একেবারে একা থাকতে চায়। মনকে নিবিষ্ট করতে চায়

নিজের ব্যাপারে—যাতে যথাসম্ভব দ্রুত ও সম্পূর্ণভাবে নিজের জীবনটাকে নতুন করে গড়ে তুলতে পারে। যে-মুহূর্তে একটা পাকাপাকি কাজ পাবে, মোটামুটি নিশ্চিত হবে যে তার আগেকার বদভাসগুলোকে পুরোপুরি কাটিয়ে উঠতে পারবে, সে-মুহূর্তেই সে গুপ্তবাস ছেড়ে মারিনা ও তার সন্তানদের কাছে ফিরে যাবে।

গর্ডনকে লিখেছে মারিনার জন্য কিছু টাকা পাঠাচ্ছি। সে যেন একটি নার্স ঠিক করে বাচ্চাদের জন্য, যাতে মারিনা আবার চাকরিতে বেরোতে পারে। সোজা মারিনার কাছে টাকা না-পাঠাবার কারণ এই যে কেউ হয়তো রশিদটা দেখে ফেলবে, ডাকাতির ভয় থাকবে মারিনার।

শিগগিরই টাকা এলো, সেই টাকার অঙ্ক এমন যা ইউরি বা তার বন্ধুরা কখনো একসঙ্গে চোখে দ্যাখেনি। নানি ভাড়া করা হ'লো, মারিনা তার ডাকঘরের কাজে যোগ দিলে আবার। তখনো খুব বিচলিত ছিলো সে। কিন্তু ইউরির খামখেয়ালের সঙ্গে পরিচয় ছিলো তার, তাই শেষ পর্যন্ত তার এই সর্বশেষ উচ্ছ্বলতাও মেনে নিলে। তারা তিনজনেই খোজ-খবর চালাতে লাগলো, কিন্তু শেষ পর্যন্ত এই সমাধানে আসতে হ'লো যে ইউরির কথাই ঠিক; তাকে খোজা একেবারে অর্থহীন। তার চিহ্নমাত্র খুঁজে পেলো না তারা।

৯

অথচ সারা সময় সে ছিলো বলতে গেলে পাশের বাড়িতে, তাদের চোখের তলায়, যে-পাড়ায় তারা তাকে খুঁজে মরছে, তাবই ঠিক মধিখানে।

যেদিন সে উধাও হ'লো, সেদিন গর্ডনের কাছে বিদায় নিয়ে সন্দের একটু আগে সে ব্রন্স স্ট্রীটে পৌঁছেছিলো। সোজা চলছিলো বাড়ির দিকে। কিন্তু প্রায় তক্ষুনি, বাড়ির মাত্র একশো গজের মধ্যে, তার ভাই ইয়েভগ্রাফের সঙ্গে দেখা হ'য়ে গেলো। তিন বছরেরও বেশি হ'য়ে গেছে সে তাকে দ্যাখে নি, তার কোনো খবরও রাখে না। শুনলো ইয়েভগ্রাফ তক্ষুনি মস্কোতে পৌঁছেছে, চিরাচরিতভাবে আকাশ থেকে এসে পড়েছে সে, একটু হেসে, ঠাট্টা করে ইউরির সব প্রশ্ন সে এড়িয়ে গেলো। আর এদিকে যে-অল্প কয়েকটি প্রশ্ন সে ইউরিকে করলো তা থেকে ইউরির তখনকার সব অসুবিধের সারাংশটুকু জেনে নিলো সে, আর তৎক্ষণাৎ, সরু, আকাঁকা, ভিড়ে ভর্তি রাস্তার মোড়গুলি পার হ'তে-হ'তে সে একটা সত্যিকার কাজের বৃদ্ধি বাংলা দিলে তার উদ্ধারের উপায় হিসেবে। ইউরির এখন কিছুদিনের মতো গুপ্তবাস করা উচিত, এই বুদ্ধিটা তারই মাথায় খেললো।

কামেরগেব স্ট্রীটে—এখনো সেই নামই আছে—আর্টস থিয়েটারের কাছে ইউরির জন্য একটা ঘর নিলো সে। চেষ্টা করতে লাগলো যাতে ইউরি এমন কোনো হাসপাতালে ভালো কাজ পায়, যেখানে গবেষণার সুযোগ প্রচুর। দিয়ে চললো টাকা, সর্বতোভাবে সাহায্য করলো ইউরিকে। কথা দিলে যে ইউরির এই পারিবারিক দ্বিরাচারের সে সমাধান করে দেবে। হয় ইউরি যাবে প্যারিসে, নয়তো ওরাই তার কাছে আসবে। নিজে দমিয়ত্ব নিলো এই সব-কিছুর ব্যবস্থা করার। আগেকার মতোই, ইয়েভগ্রাফের সাহায্য পেয়ে ইউরির যেন প্রাণসঞ্চার হ'লো, বরাবরকার মতো, ভাইয়ের এই ক্ষমতার রহস্য অজানা রইলো তার কাছে; তা আন্দাজ করারও সে চেষ্টা করলে না।

দক্ষিণমুখে ঘৰ ইউৱিৰ। থিয়েটাৱেৰ প্ৰায় লাগোয়া বাড়িটা, উপ্টো দিক্ৰে ছাদেৰ সাৰি ছাড়িয়ে দৃষ্টি চ'লে যায়; তাৰেৰ ওদিকে ওখোটনি ৰিয়াডেৰ ওপৰ সূৰ্য জ্বলজ্বল কৰে, কিন্তু নিচেৰ ৰাস্তায় ছায়া প'ড়ে যায়।

ইউৱিৰ কাছে ঘৰটা শুধুমাত্ৰ কাজ কৰাৰ, লেখাপড়ার জায়গাই নয়, তা ছাড়াও অন্য কিছু। সেই সময়ে, যখন তাৰ কমশীলতা তাকে ভেতৰে-ভেতৰে ক্ষইয়ে দিছে, যখন ডেস্কেৰ ওপৰ তৃপীকৃত খাতাগুলোতে তাৰ পৰিকল্পনাগুলিকে কিছুতেই ধৰানো যাচ্ছে না, আৰ তাৰ ভেৰে-ৰাখা বইগুলেৰ আকৃতি, স্টুডিওৰ দেয়ালেৰ দিকে মুখ-ফেৰানো চিত্ৰকৰেৰ অসমাপ্ত ছবিৰ মতো, তাকে চাৰদিক থেকে ঘিৰে ৰয়েছে, তখন ঐ ঘৰটি তাৰ কাছে হ'য়ে উঠেছিলো আত্মাৰ ভোজনশালা, অযুক্তিৰ সঞ্চয়নকক্ষ, আবিষ্কাৰেৰ অফুৰন্ত ভাণ্ডাৰ।

তাৰ ভাগ্য ভালো; হাসপাতালেৰ সঙ্গে ইয়েভগ্ৰাফেৰ কথাবাতা চিমে লয়ে চলছে—ইউৱিৰ চাকৰিৰ ব্যাপাৰটা যেন অনিৰ্দিষ্ট ভাবে স্থগিত ৰইলো। ঐ দেৱিৰ জন্য লেখাৰ অবকাশ জুটলো তাৰ।

তাৰ পুৰোনো কবিতাগুলিকে বাছাই কৰাৰ চেষ্টা কৰছে সে; কোনোটাৰ টুকৰো-টুকৰো অংশ মনে আছে তাৰ, কোনো-কোনোটাৰ পাণ্ডুলিপি ইয়েভগ্ৰাফ কী ক'ৰে যেন জোগাড় কৰেছে (কিছু-কিছু ইউৱিৰ নিজেৰ হস্তাক্ষৰে, কিছু বা অন্যদেৰ কৰা প্ৰতিলিপি)। ইউৱি স্বভাবতই উদ্যমেৰ অপচয় কৰে। কিন্তু ঐ অসংবদ্ধ ৰচনাগুলিৰ সামনে সে যেন অসহায় হ'য়ে পড়লো। সেগুলোকে ঠেলে রেখে নতুন লেখা শুৰু ক'ৰে দিলে।

একটা প্ৰবন্ধেৰ খসড়া কৰবে সে। প্ৰথম ভাৱিকিনোতে গিয়ে যে-ৰকমেৰ নোট লিখতো অনেকটা সেই ধৰনেৰ, বা লিখবে কোনো কবিতাৰ আৰম্ভ বা শেষ বা মাঝামাঝি অংশ—ঠিক যেমন মনে আসে তেমন। কখনো-কখনো এমন হয় যে আদ্যক্ষৰ ও সংক্ষেপীকৰণে ৰচিত শৰ্টহ্যাণ্ড ব্যবহাৰ ক'ৰেও নিজেৰ চিন্তাৰ দ্ৰুতগতিৰ সঙ্গে সে তাল ৰাখতে পাৰে না।

তাড়া আছে তাৰ। কল্পনা যখন ক্লান্ত হ'য়ে পড়ে, তখন খাতাৰ ধাৰে-ধাৰে ছবি ঐকে সে মনকে চেতিয়ে তোলাৰ চেষ্টা কৰে। ছবিতে ঐকে বাৰে-বাৰেই কাঁটাবন আৰ শহৰেৰ চৌৱাস্তা, তাতে ঐ বিজ্ঞপ্তি দেখা যাচ্ছে, 'মৰো আঁণ্ড ডেটচিনকিন। টেকি কল। বীজ-বপনযন্ত্ৰ।'

তাৰ প্ৰবন্ধ আৰ কবিতাৰ ঐ একই বিষয়: শহৰ।

পৰে তাৰ কাগজপত্ৰেৰ মধ্যে ঐ খুচৰো লেখাগুলি পাওয়া গিয়েছিলো:

'বাইশ সালে যখন ফিৰে এলাম, মস্কো তখন জনশূন্য ও বিধবস্ত। বিপ্লবোন্তৰ প্ৰথম কয়েক বছৰেৰ দুঃখকষ্ট সবেমাত্ৰ কাটিয়ে উঠেছে সে, আজো তাকে প্ৰায় সেইৰকমই দেখছি। কিন্তু এখনো, ঐ অবস্থাতেও, বিৰাট এক আধুনিক নগৰ ঐ মস্কো, আৰ নগৰই হ'লো সত্যিকাৰ আধুনিক ও সমকালীন শিল্পেৰ প্ৰেৰণাৰ উৎসস্থল।

'প্ৰতীকী কবিদেৰ ৰচনায় ব্লেক, ভেৰহাৰেন, হুইটম্যান) যে স্বেচ্ছাচাৰী ও অসংবদ্ধ বস্তুসমাবেশ দেখা যায়, সেটা কোনো ৰীতিগত কৌশলমাত্ৰ নয়। অনুভূতিৰ ঐ নতুন সমাবেশ প্ৰত্যক্ষভাবে জীবন থেকেই আহৰণ কৰা হয়েছে।

'ঐদেৰ কবিতায় ছত্ৰে-ছত্ৰে যেমন চিত্ৰকল্পেৰ পাৰস্পৰ্য দ্ৰুতবেগে এসে পড়ছে, ঠিক তেমনি ভাবেই ব্যস্ত শহৰেৰ পথ দ্ৰুত ছুটে চলে আমাদেৰ সামনে দিয়ে, সঙ্গে নিয়ে চলে বিগত শতকান্তেৰ ভিড় আৰ ব্ৰহ্ম-গাড়ি. আৰ আমাদেৰ শতকেৰ আৰম্ভকালে, ট্ৰাম, বাস আৰ বৈদ্যুতিক ট্ৰেন।

‘এই জীবনে রাখালিয়া-গানের সারল্য কোথায় পাওয়া যাবে? যখন সে-রকম চেষ্টা করা হয়, সেই নকল-সারল্যকে মনে হয় সাহিত্যিক জালিয়াতি, তার উৎস নয় গ্রামীণ প্রকৃতি, কালেক্জি কেতাব থেকে তা টুকে নেওয়া হয়েছে। এ-যুগের জীবন্ত ভাষা হ’লো নাগরিক।

‘এক ব্যস্ত চৌরীস্তার ঝোড়ে আমার বাসা। রৌদ্রালোকে আর অ্যাসকণ্টের শ্বেত উদ্ভাশে অঙ্ক মস্কো, উচু বাড়ির জানলা থেকে রোদ ছিটিয়ে, রাস্তা আর মেঘের রঙে বুক ভ’রে নিশ্বাস নিয়ে, ফুলের মতো ফুটে উঠতে-উঠতে মস্কো আমার চতুর্দিকে ঘূর্ণিত হচ্ছে, আমার মাথা ঘুরিয়ে দিচ্ছে সে, আর সেই সঙ্গে আমাকেও বাধ্য করছে তার প্রশস্তি রচনা ক’রে অন্যদের মাথা ঘুরিয়ে দিতে।

‘কোনো অপেরার পরদা ওঠার আগে উদ্বোধনী যন্ত্রসংগীতের মতো—যে-পরদা এখনো অঙ্ককার ও গোপন, কিন্তু পাদপ্রদীপের আলোয় ইতিমধ্যেই লাল হ’য়ে উঠছে—তেমনিভাবে আমাদের দরজা-জানলার বাইরে আমাদের ভাবনার সঙ্গে যুক্ত হ’য়ে আছে এই অফুরান শব্দ যা আমাদের দেয়ালের বাইরে রাস্তায় ধ্বনিত হচ্ছে দিন-রাত। আমাদের দরজা-জানলার বাইরে এই শেষহীন, বিরামহীন গতি ও মর্মরধ্বনি রচনা করছে আমাদের প্রত্যেকের জন্য জীবনের উদ্দেশ্যে এক বিরাট অপরিমেয় স্তবগান। এই দিক থেকেই নগরের বিষয়ে আমি লিখতে চাই।’

জিভাগোর রচনাবলীর যে-অংশ রক্ষিত হয়েছে, তার মধ্যে কিন্তু এই ধরনের কোনো কবিতা নেই। হয়তো ‘হ্যামলেট’ এই পর্যায়ের অন্তর্ভুক্ত ছিলো।

১২

আগস্টের শেষের দিকে একদিন সকালে বটকিন হাসপাতালে (তখন সলডাটেক্সো হাসপাতাল নামে পরিচিত) যাবার জন্য গাঞ্চেটনি স্ট্রীটে ট্রামে উঠলো ইউরি; সেদিন তার নতুন কাজে যোগ দেবার কথা।

ট্রামের বিষয়ে কপাল ভালো ছিলো না তার; এই চলে তো এই থামে, থামেলার অন্ত নেই। কখনো-কখনো ঠেলাগাড়ির চাকা লাইনের ওপর উঠে এসে ট্রামের পথ আটকে দিচ্ছে, কখনো বা ছাদে বা মেঝের তলায় ঝলক দিয়ে আওয়াজ তুলে কারেন্ট যাচ্ছে বন্ধ হ’য়ে।

সামনের পাটাতন থেকে ড্রাইভার নেমে প’ড়ে যন্ত্রপাতি হাতে ট্রামের চারিদিকে ঘোরে মাটিতে ব’সে প’ড়ে চেষ্টা করে পেছনের পাটাতন আর চাকার মাঝখানকার যন্ত্রপাতি সারাতে।

এই বিচ্ছিন্ন ট্রামের জন্য সারা লাইনে ট্র্যাফিক আটকে আছে। পুরো রাস্তাটা থেমে-যাওয়া অন্যান্য ট্রামে বন্ধ হ’য়ে গেলো। পেছনে আরো এসে লাইনে দাঁড়াচ্ছে—মানেজ স্কোয়ার ছাড়িয়ে ট্রামের সারি দাঁড়ালো। পেছন দিক থেকে যাত্রীরা সময় বাঁচানোর আশায় এগিয়ে আসছে সামনের দিকে, আর যে-গাড়িটা সব ঝঞ্ঝাটের মূল, তাতেই চেপে বসছে। সকালবেলাটা গরম, গাড়িতে ভিড়, বাতাস নেই। রাস্তায় যারা ভিড় ক’রে এক ট্রাম থেকে আরেক ট্রামে ছুটোছুটি করছে, তাদের মাথার ওপরে, আকাশের অনেক উচুতে, শুড়ি মেরে-মেরে এগোচ্ছে গাড়ি লাইলাক রঙের মেঘ। এখনই বড় উঠবে।

ঐ দিকে একটা একলা আসনে জানলা ঘেঁষে ব’সে ছিলো ইউরি। নিকিটা স্ট্রীটের ঐ দিকে সংগীত-ভবনের একটা অংশ দেখতে পাচ্ছিলো সে। মনে-মনে অন্য কিছু ভাবছে, আর সেই সঙ্গে ঝাপসা মনোযোগ দিয়ে লক্ষ্য করছে রাস্তায় যারা হেঁটে বা গাড়িতে চলেছে—কাউকে বদ দিচ্ছে না।

এক বৃদ্ধা ফুটপাথ ধ’রে চলেছেন, তাঁর চুল ধূসর, হালকা খড়ের টুপিতে সুতো দিয়ে ডেইজি আর হাসফুল তোলা, পরনে সেকোলে ধরনের আটো লাইলাক রঙের পোষাক। একটা চামুন্টা পোঁটলা হাতে নিয়ে হাঁপাচ্ছেন তিনি, চলতে-চলতে পাখা নাড়ছেন। আটো কাঁচুলি ও পরনের

চাপে অবসন্ন হ'য়ে ঘামছেন দরদর ক'রে, একটি ছোট্ট লেসের রুমাল দিয়ে বার-বার ঠোট আর ভুরু মুছলেন।

ট্রাম-লাইনের সঙ্গে সমান্তর তাঁর পথ। ইতিমধ্যে কয়েকবার ইউরির দৃষ্টির বাইরে চ'লে গেছেন উনি, কেননা সারাবার জন্য কিছুক্ষণ থেমে থেকে ট্রামটা আবার চলতে শুরু ক'রে ঠেকে ছাড়িয়ে গেছে, কিন্তু আবার যখন নষ্ট হ'লো তখন ট্রামটাকে ছাড়িয়ে গেছেন ভদ্রমহিলা, ইউরি আবার তাঁকে দেখতে পেলো।

ইউরির মনে পড়লো স্কুলে পড়ার সময় যে-সব পাটিগণিতের প্রহেলিকা জিজ্ঞেস করা হ'তো: বিভিন্ন সময়ে, বিভিন্ন গতিতে যদি অনেকগুলো ট্রেন চলতে শুরু করে, তাহ'লে কখন এবং কী পর্যায়ে গন্তব্যে পৌছবে তারা, এ-সব সমস্যা সমাধানের সাধারণ নিয়মটা মনে করার চেষ্টা করলে, কিন্তু কিছুতেই মনে এলো না, আর এই স্কুলের স্মৃতি থেকে অন্য আরো স্মৃতি জেগে উঠলো, আরো জটিল দূরকল্পনা।

এমন কয়েকজনের কথা মনে পড়লো ঘনিষ্ঠ ও সমান্তর ধারায় চলেছে যাদের জীবন, কিন্তু বিভিন্ন গতিতে: সে ভাবলে কী-রকম ঘটনাচক্রে এদের মধ্যে কেউ-কেউ অন্যদের ছাড়িয়ে যাবে, বেঁচে থাকবে তাদের চাইতে বেশিদিন। মানুষের আয়ুর দৌড়ের পেছনে কোনো-এক আপেক্ষিক তত্ত্ব কাজ করছে ব'লে তার মনে হ'লো, কিন্তু এবারে একেবারে মাথা গুলিয়ে গেলো তার, ভাবনা ছেড়ে ছিলো।

চমকে উঠলো বিদ্যুৎ, মেঘ ডাকলো গুরুগুরু। হতভাগা ট্রামটা আবার থেমেছে, এই নিয়ে কুড়িবার থামলো। কুড়িনক্ষি স্ট্রীটের চড়াই থেকে চিড়িয়াখানায় যাবার মাঝখানে থেমেছে এবার। লাইলাক-রঙের পোষাক পরা সেই ভদ্রমহিলাকে জানলার ফ্রেমে দেখা গেলো একবার, ট্রাম ছাড়িয়ে তিনি এগিয়ে গেলেন। বৃষ্টির প্রথম মোটা ফোঁটা পড়লো রাস্তায়, ফুটপাথে আর মহিলাটির গায়ে। গাছের গায়ে চাবুক মেরে, পাতায় বাড়ি দিয়ে, ভদ্রমহিলার টুপি টেনে, স্কাট উড়িয়ে ব'য়ে গেলো একটা দমকা বাতাস, তারপর হঠাৎ থেমে গেলো।

অসুস্থ বোধ করছিলো ইউরি, যেন অজ্ঞান হ'য়ে যাবে। দুর্বলতা কাটিয়ে উঠে দাঁড়ালো সে, জানলার স্ট্যাপটা নিয়ে টানটানি করতে লাগলো জানলাটা খোলার জন্য। কিন্তু নাড়াতে পারলো না।

সবাই চেষ্টায়ে বলতে লাগলো যে জানলাটা একেবারে আটকানো, ঐ একই জায়গায় পেরেক দিয়ে পোতা, কিন্তু তার মুছার ভাব কাটাবার চেষ্টায় ইউরি যেন আতঙ্কে ব্যাকুল হ'য়ে উঠলো, বুঝতে পারলো না যে সবাই চ্যাচাচ্ছে, আর চ্যাচাচ্ছে তাকে লক্ষ্য ক'রেই। তখনো জানলা খোলার চেষ্টা ক'রে চলেছে সে, স্ট্যাপটা ধরে নিচের দিকে এবং নিজের দিকে আরো তিনবার সে টানলে, আর তখনই হঠাৎ এক নতুন ও মর্মান্তিক যন্ত্রণা অনুভব করলো, বুঝতে পারলো দেহের অভ্যন্তরে কিছু-একটা ভেঙে গেছে, সে এমন কিছু-একটা ক'রে ফেলেছে, যার কোনো প্রতিকার নেই, বুঝতে পারলো যে এই শেষ। সেই মুহূর্তে চলতে শুরু করলো ট্রামটা, কিন্তু প্রেসনিয়া স্ট্রীটের কাছাকাছি অল্প একটু পথ গিয়েই আবার থেমে গেলো।

অমানুষিক মনের জোর খাটিয়ে ইউরি উঠলো, ট্রামের গলির জমট ভিড় ঠেলে টলতে-টলতে ছোট্ট খেতে-খেতে বেরিয়ে এলো পেছন দিকের পাটাতনে; তার পথ আটকে দাঁড়ালো লোকেরা, তাকে গাল পাড়লো, কিন্তু বাইরের হাওয়ায় যেন প্রাণ ফিরে পেলো সে, মনে হ'লো হয়তো এখনো সর্বনাশ হয়নি, হয়তো সে সেরে উঠছে।

পাটাতনের ভিড় ঠেলে বেরিয়ে আসতে চেষ্টা করলো সে, আবার নতুন ক'রে খেকিয়ে উঠলো লোকেরা, গালি-গালাজ, লাথি, রাগি আওয়াজ, সব অগ্রাহ্য ক'রে সে ভিড়ের বাইরে ছিনিয়ে আনলো নিজেকে। থেমে-পড়া ট্রাম থেকে নেমে পড়লো রাস্তায়, এক পা এগোলো, আর-এক পা, আরো এক পা চলতে গিয়ে প'ড়ে গেলো পাথরের ওপরে, আর উঠলো না।

উঠলো কথার গুঞ্জন, যুক্তিতর্ক, উপদেশ। ট্রাম থেকে নেমে পড়ে তাকে ঘিরে দাঁড়ালো অনেকে। একটু পরেই বোঝা গেলো নিশ্বাস পড়ছে না, হৃৎস্পন্দন বন্ধ হ'য়ে গেছে। যারা তাকে ঘিরে দাঁড়িয়েছিলো তাদের সঙ্গে আরো একদল যোগ দিলো ফুটপাথ থেকে নেমে এসে, মৃত লোকটি চাপা পড়েনি এবং ট্রামের সঙ্গে তার মৃত্যুর কোনো যোগ নেই, এ-কথা জেনে কেউ-কেউ স্বস্তি পেলো আর কেউ-কেউ নিরাশ হ'লো। ভিড় বাড়লো: লাইলাক রঙের পোশাক-পরা মহিলাও এলেন, দাঁড়ালেন একটু, মৃতদেহের দিকে তাকালেন, কথাবার্তা শুনলেন, তারপর চলে গেলেন এগিয়ে। ভদ্রমহিলা বিদেশী, কিন্তু বৃদ্ধিতে পারলেন যে কিছু লোকের ইচ্ছে মৃতদেহটিকে ট্রামে তুলে হাসপাতালে নিয়ে যাওয়া হোক আর অন্যেরা বলছে এফুনি ডাক। হোক সেনাবাহিনীকে। শেষপর্যন্ত কী স্থির হয় দেখার জন্য তিনি অপেক্ষা করলেন না।

লাইলাক-রঙের পোশাক পরা ভদ্রমহিলাটি সুইস নাগরিক; ইনি মেলিউজ্‌ইয়েভোর মাদমোয়াজেল ফ্ল্যারি, এখন অনেক, অনেক বয়েস হ'য়ে গেছে। বারো বছর ধ'রে মস্কোর কর্তৃপক্ষের কাছে দেশে ফেরবার অনুমতির জন্য আবেদন ক'রে চলেছেন, সম্প্রতি তাঁর আবেদন মঞ্জুর করা হয়েছে। মস্কোতে এসেছেন ভিসার জন্য, ফিতে দিয়ে বাঁধা দলিলপত্রের পুঁটলি দিয়ে নিজেকে হাওয়া করতে-করতে এখন দূতাবাসের দিকে চলেছেন সেটা সংগ্রহ করতে। তিনি হেঁটে চললেন—দশবারের বার ছাড়িয়ে গেলেন ট্রামটাকে, জানতে পারলেন না যে জিতাগোকে ছাড়িয়ে গেলেন তিনি, তার পরেও বেঁচে রইলেন।

গলির খোলা দরজা দিয়ে দেখা যাচ্ছিলো ঘরের একটি কোনা, দেয়াল ঘেষে কোনাকুনিভাবে টেবিল পাতা। টেবিলে ওপর কফিন—যেন অনিপুণ-হাতে তৈরি করা ডিঙি নৌকো—সরু দিকটা, যেদিকে মৃতের পা থাকে, দরজা দিয়ে ঢুকলেই সেটা চোখে পড়ে। আগে এই টেবিলে ব'সেই ইউরি লিখতো; ঘরে আর কোনো টেবিল নেই। পাণ্ডুলিপিগুলো দেয়ালে ঢোকানো, আর টেবিলের ওপর কফিন। বালিশ দিয়ে উঁচু ক'রে দেওয়া হয়েছে ইউরির মাথা, দেখে মনে হয় যেন পাহাড়ের ঢালতে কাৎ হ'য়ে আছে দেহটি।

রাশি-রাশি ফুলে সে পরিবৃত : শাদা লাইলাকের আন্ত-আন্ত গুচ্ছ (যা এই ঋতুতে দূর্লভ), পাত্রে ও ঝুড়িতে রাখা সাইক্লোমেন ও সিনেরারিয়া। জানলাব আলোকে যেন পরদার মতো আড়াল ক'রে দিচ্ছে ফুলগুলো। কফিনের কাঠের আন্তরণের ওপর, পুষ্পস্তূপের ফাঁকে-ফাঁকে সুতোর মতো আলো এসে পড়ছে। টেবিলের ওপরকার ছায়া যেন ডালপাতার নকশা, যেন এইমাত্র তাদের কাঁপুনি ঘামলো।

ততোদিনে মৃতদেহ দাহ করার প্রথাটা প্রচলিত হয়েছে। বাচ্চাদের জন্য সরকারি মাসোহারার আশায় এবং ডাকঘরে মারিনার চাকরির কথা ভেবে স্থির করা হয়েছে যে মৃতের আত্মার জন্য কোনো মঙ্গলপ্রার্থনা করানো হবে না; শুধু আইন-সম্মতভাবে দাহ করা হবে। যথোচিত কর্তৃপক্ষকে খবর দেওয়া হয়েছে। তাঁদের প্রতিনিধিদের যে-কোনো সময়ে আশা করা যাচ্ছে।

ইতিমধ্যে শূন্য মনে হচ্ছে ঘরটাকে, যেমন শূন্য মনে হয় কোনো ফ্ল্যাট, যখন এক ভাড়াটে চ'লে গিয়েছে, অন্য ভাড়াটেও আসেনি। সেই স্তব্ধতা ব্যাহত হচ্ছিলো শুধু তখনই, যখন শোকার্তেরা পা টিপে-টিপে মৃতের কাছে বিদায় নিতে এসে অসাবধানে পায়ের শব্দ ক'রে ফেলছিলো। সংখ্যায় তারা বেশি নয়, তবে যতোটা আশা করা গিয়েছিলো তার চেয়ে বেশি বইকি। এই প্রায় অজ্ঞাত মানুষটির মৃত্যুসংবাদ বিদ্যুৎবেগে ছড়িয়ে পড়েছে জানাশোনা মহলে। তার জীবনের বিভিন্ন সময়ে এরা অনেকেই চিনতো তাকে, যদিও পরে সকলের সঙ্গেই সংযোগ

হারিয়ে ইউরি তাদের ভুলে গিয়েছিলো। তার কবিতা ও বৈজ্ঞানিক প্রবন্ধের আকর্ষণে আরো অনেক বন্ধু এসেছে যাদের সঙ্গে মানুষটির কখনো পরিচয় হয়নি। তারা এই প্রথম ও শেষবারের মতো তাকে দেখে যাচ্ছে।

ঘণ্টাগুলো স্বত্বতায় কেটে যাচ্ছে, কোনো অনুষ্ঠান নেই, শুধু এক অনুপস্থিতির চেতনায় প্রায় স্পর্শনীয়ভাবে ভারতুর। স্তোত্রপাঠ ও সংগীতের স্থান নিয়েছে ফুল—শুধু ফুল।

এমন নয় যে ফুলগুলো শুধু বিকশিত হ'য়ে সৌরভ ছড়িয়ে দিচ্ছে। একেবারে নিঃশব্দ হ'য়ে ঢেলে দিচ্ছে সুবাস, যৌথসংগীতের মতো ঐকতানে—তাতে দ্রুত ক'রে তুলছে পচনক্রিয়া, কিন্তু এমনি ক'রে সকলকেই যেন তাদের সুবাসিত ক্ষমতার অংশ দিচ্ছে, কোনো অনুষ্ঠান সম্পন্ন করছে যেন।

মরণলোকের নিকটতম প্রতিবেশী ব'লে উদ্ভিদজগৎকে ভাবা যায়। হয়তো, জীবনের যে-সব রূপান্তরে ও প্রহেলিকায় আমরা যন্ত্রণা পাই, তা সংহত হ'য়ে আছে মাটির সবুজে, কবরখানার তরুপল্লবে, আর কবরের মাটির ওপর উদ্ভিন্ন ফুলে ও গাছপালায়। যীশু যখন কবর থেকে উঠলেন, মারিয়া মাদলীনা তাঁকে তখনই চিনতে পারেননি, বাগানের মালি ব'লে ভুল করেছিলেন।

১৪

কামেরগের স্ট্রীটের ফ্ল্যাটে (এটাই ছিলো তার শেষ রেজিস্ট্রি-করা ঠিকানা) যখন ইউরির মৃতদেহ নিয়ে আসা হ'লো, তখন তার মৃত্যুর খবর পেয়ে উদভ্রান্ত বন্ধুরা মারিনাকে সঙ্গে নিয়ে ছুটতে-ছুটতে সিঁড়ির চাতাল থেকে খোলা দরজা দিয়ে ভেতরে ঢুকলো। আকস্মিক আঘাতে ও শোকে অর্ধোন্মাদ মারিনা মেঝের ওপর লুটিয়ে প'ড়ে গেলো। মাথা ঠুকতে লাগলো গলিতে বাখা লম্বা কাঠের সিঁদুকটার গায়ে। ঐ সিঁদুকটার ওপরেই তখনকার মতো মৃতদেহ রাখা হয়েছিলো, কফিনের অর্ডার গেছে সেটা যতোকক্ষে এসে পৌঁছবে, ততোকক্ষে ঝাঁটপাট দিয়ে পরিষ্কার ক'রে রাখা হচ্ছে থাকার ঘরটা। চোখের জলে ভাসছে মারিনা, ফুঁপিয়ে-ফুঁপিয়ে বিড়বিড় করছে, কথা বলতে গিয়ে বিষম খাচ্ছে, হঠাৎ এক-একবার ডুকরে কেঁদে উঠছে চিংকার ক'রে। চাষিঘরের বৌ-বিদের মতো কথা ব'লে-ব'লে কাঁদছে সে—অচেনা লোক দেখে লজ্জা পাচ্ছে না, থমকেও যাচ্ছে না। মৃতদেহ আঁকড়ে প'ড়ে রইলো সে, যখন ঘরে নিয়ে স্নান করিয়ে কফিনে তোলার সময় হ'লো তখন তার কাছ থেকে সেই দেহ ছিনিয়ে নেওয়া সহজ হ'লো না।—এই সবই গতকালের কথা। আজ তার শোকের উন্মাদনা প্রশমিত হয়েছে, ক্রান্ত এক নিঃশব্দতায় আচ্ছন্ন হ'য়ে আছে সে; নিঃশব্দে ব'সে আছে, যদিও নিজের বা নিজের পারিপার্শ্বিক বিষয়ে এখনো সে সম্পূর্ণ সচেতন নয়।

আগেকার দিন-রাত্রি সারাক্ষণ সে ওখানেই ছিলো, একবারও নড়েনি। এখানেই বাচ্চাটিকে নিয়ে আসা হ'লো খাওয়ানোর জন্য, অল্পবয়সী নানির সঙ্গে কাপকাও সেখানে এলো মা-র সঙ্গে দেখা করতে।

তাকে ঘিরে রইলো বন্ধুরা। গর্ডন আর ডুডোরভের শোক তারই সমান। মারিনার বাবা মার্কেল, তারই পাশে বেঞ্চির ওপর ব'সে সজোরে কাঁদলো আর অদ্ভুত আওয়াজ ক'রে নাক ঝাড়লো মাঝে-মাঝে। মারিনার মা-বোনেরা কাঁদতে-কাঁদতে বারবার আসা-যাওয়া করছে।

কিন্তু ঐ জনতার মধ্যে দু'জন, একটি পুরুষ ও একজন মহিলা যেন সকলের চেয়ে স্বতন্ত্র। মৃতের সঙ্গে অন্য কারো চাইতে বেশি অন্তরঙ্গতার দাবি তারা করছে না। মারিনার, তার মেয়েদের বা ইউরির বন্ধুদের শোকের সঙ্গে তাদের কোনো প্রতিযোগিতাও নেই। কিন্তু তারা কোনো দাবি না-জানালেও স্পষ্ট বোঝা যাচ্ছিলো যে ইউরির ওপর তাদের বিশেষ কোনো

অধিকার আছে, তাদের সেই অনুচরিত ক্ষমতা আশ্চর্যভাবে সকলেই মেনে নিয়েছিলো, কেউ কোনো প্রশ্ন বা তর্ক তোলেনি। আপাত-দৃষ্টিতে এরাই অস্ত্রোষ্টির সমস্ত ভার নিজেদের ওপর তুলে নিয়েছে, আর প্রথম থেকে প্রতিটি কাজ এমন শান্ত ও সক্ষমভাবে ক'রে যাচ্ছে যে মনে হচ্ছে এতে যেন তৃপ্তি পাচ্ছে তারা। তাদের এই আশ্চর্যতা সকলেই লক্ষ্য করলো, সকলেরই ভারি অভূত লাগলো সেটা—যেন ঐ দু'জন শুধু অস্ত্রোষ্টির সঙ্গে নয়, মৃত্যুর সঙ্গেও জড়িত; প্রত্যক্ষ বা পরোক্ষভাবে মৃত্যুর জন্য দায়ী নয় অবশ্য, কিন্তু মৃত্যুর সঙ্গে এদের যেন বোঝাপড়া হ'য়ে গেছে, যেন সম্মতি দিয়েছে মৃত্যুকে, তাকে মেনে নিয়েছে মনের মধ্যে—ইউরির সম্পর্কে সেটাকে তারা প্রধানতম ঘটনা ব'লে ভাবছে না। শোকার্দ্দের মধ্যে অল্প দু'চারজন এদের চিনলো, অন্য কেউ-কেউ অনুমান ক'রে নিলো এরা কারা—কিন্তু অধিকাংশের পক্ষেই তারা একেবারেই অচেনা।

তবু সেই পুরুষটি—যার সরু কৌতূহলী কিরগিজ-হাঁদের চোখ দেখে অন্যদের কৌতূহল জাগছে—সে যখনই সহজভাবে সুন্দরী মহিলাটি নিয়ে ঘরে আসছে, তখনই সবাই, মারিনা সূদ্ধ, যেন সর্বসম্মতিক্রমে ও বিনা প্রতিবাদে, চকিত হ'য়ে দেয়াল ঘেঁষে সাজানো চেয়ার অথবা বেঞ্চ থেকে উঠে দাঁড়াচ্ছে। বেরিয়ে গিয়ে ঘেঁষাঘেঁষি ক'রে অপেক্ষা করছে গলিতে বারান্দায়, অর্ধেক ভেজালো দরজার আড়ালে, ঐ দু'জনকে থাকতে দিয়েছে নিভৃত। এ-বিষয়ে যেন সকলেই একমত যে এ-দু'জনের শান্তভাবে ও নিরুদ্বেগে পরামর্শ করা দরকার—অন্ত্যক্রিয়ার সঙ্গে প্রত্যক্ষভাবে যা যুক্ত, তেমনি কোনো জরুরি কাজ আছে এদের।

এবারেও তাই হ'লো। একা হ'লো দু'জনে। দেয়ালের ধারে দুটো চেয়ারে ব'সে কাজের কথা বলতে লাগলো।

‘কী খবর পেলেন, ইয়েভগ্রাফ আশ্বেইয়েভিচ?’

‘আজ রাট্রেই সংকার হবে। আধ ঘণ্টার মধ্যেই লোক আসবে মৃতদেহ তাদের সংস্থায় নিয়ে যাবার জন্য। চারটেতে আইনমাসিক দাহক্রিয়া। ওর কাগজপত্র কিছুই ঠিকঠাক ছিলো না; লেবর-কার্ডের মেয়াদ ফুরিয়ে গেছে ট্রেড ইউনিয়ন কার্ড পুরোনো—বদলে নতুন কার্ড নেয়নি আর চাঁদাও দেয়নি অনেক বছর। সেই সবেরই ব্যবস্থা করতে হ'লো; তাই তো দেরি হ'লো এতো। ওরা এসে নিয়ে যাবার আগে—বেশি দেরি নেই তার—আমাদেরও তৈরি হ'য়ে নিতে হবে; আপনার ইচ্ছেমতো আপনাকে এখন একা রেখে যাচ্ছি... দুঃখিত। ফোন এসেছে। আমি একুনি আসছি।’

গলিতে বেরিয়ে এলো ইয়েভগ্রাফ। অনেক অচেনা লোক ভিড় করেছে সেখানে—ইউরির সহকর্মীরা, বন্ধুরা সহপাঠীরা, হাসপাতালের ছোকরা চাকুরের দল, মুদ্রাকর, পুস্তক-প্রকাশক—মারিনাকেও দেখলো সেখানে। ঠাণ্ডা ছিলো দিনটা, পিঠের ওপর কোটি ফেলে নিয়েছে মারিনা, তারই মধ্যে মেয়ে দুটিকে ঢেকে দুই হাতে জড়িয়ে আছে তাদের। একটা কাঠের বেঞ্চির ধার ঘেঁষে ব'সে ভেতরে যাবার জন্য অপেক্ষা করছে, ঠিক যেন কোনো কয়েদির সঙ্গে দেখা করতে এসে পাহারাওলার অনুমতির জন্য ব'সে আছে। সামনের দরজাটা খোলা, সিঁড়ির চাতালে অনেক লোক, কেউ দাঁড়িয়ে কেউ পায়চারি করতে-করতে সিগারেট ফুকছে। ধাপে-ধাপে দাঁড়িয়ে কথা বলছে অন্য অনেকে। যতো নিচের দিকে, রাস্তার যতো বেশি কাছে, গলার স্বর ততোই দরজা তাদের।

সেই বিরামহীন গুঞ্জন ছাপিয়ে কথা শোনার জন্য বেশ চেষ্টা করতে হ'লো ইয়েভগ্রাফকে, রিসিভারে হাত চাপা দিয়ে বেশ সুশোভনরকম গলায় ইউরির মৃত্যু ও অস্ত্রোষ্টির ব্যবস্থার বিষয়ে প্রশ্নর জবাব দিলে সে, তারপর ভেতরে ফিরে গেলো, আবার তাদের কথাবার্তা শুরু হ'লো।

‘সংকারের পরেই যেন উধাও হ'য়ে যাবেন না, লারিসা ফিয়োডোভোভনা। আপনি কোথায় উঠেছেন আমি জানি না। আমাকে না-জানিয়ে চ'লে যাবেন না কিন্তু। আমার একটি প্রার্থনা

আছে আপনার কাছে, যতো শিগগির সম্ভব—কাল কি পরশু—আমার ভায়ের কাগজপত্রগুলি গোছানোর কাজ শুরু করতে চাই। আপনার সাহায্য চাই আমি। ওর কথা অনেক জানেন আপনি—বোধহয় সকলের চাইতে বেশি জানেন। বলছিলেন, মাত্র কয়েকদিন আগে ইকুৎস্ক থেকে এসেছেন আপনি। এখানে আপনার এসে পড়াটা নিতান্তই কাকতালীয়, অন্য কাজে এসেছিলেন, ইউরি যে এই ক্ল্যাটেই সম্প্রতি কয়েকমাস ধরে ছিলো, ওর মৃত্যুর খবর, কোনোটা আপনার জানা ছিলো না। আপনার সব কথা বুঝতে পারিনি। কিন্তু বুঝিয়ে বলতে অনুরোধ করবো না। তবে দয়া করে যাবার আগে আপনার ঠিকানাটা আমাকে দিয়ে যাবেন। যে-ক’দিন লাগবে পাণ্ডুলিপি বাছাই করতে সে-ক’দিন যদি আমরা এই বাড়িতেই কি অন্তত কাছাকাছি থাকতে পারি, তাহ’লেই সবচেয়ে ভালো হয়। এই বাড়িরই অন্য দুটো ঘরে ব্যবস্থা করা যায় না কি? তা যায় কিন্তু—ম্যানেজার আমার চেনা।’

‘আপনি বললেন, আমার সব কথা বুঝতে পারেননি।—না-বোঝার মতো কী আছে? মস্কোতে শৌছলাম, মালপত্র স্টেশনে রেখে পুরোনো মস্কোর কয়েকটি রাস্তায় পায়ে হাঁটার জন্য বেরিয়ে পড়লাম। অর্ধেক রাস্তা তো চিনতেই পারি না, বহুকাল বাইরে থেকে ভুলে গেছি। তা যাই হোক, হাঁটছি তো হাঁটছি, কুজনেটস্কি ব্রিজ ধরে কুজনেটস্কি লেনে পড়লাম, তারপর হঠাৎ এমন একটা জায়গায় এসে পড়লাম যা ভীষণভাবে, অসাধারণভাবে আমার চেনা—কামেরগের স্ট্রিট। এই সেই রাস্তা যেখানে আমার স্বামী, আন্টিপভ, থাকে গুলি করে মারা হয়েছে, হাতাবস্থায় থাকতেন—এই বাড়িতে, এই ঘরে। যে-ঘরে আপনি আর আমি এখন বসে আছি। ভেতরে যাই না, আমি ভাবলাম, কে জানে, পুরোনো ভাড়াটেরা হয়তো থাকতে পারে এখনো, তাদের সঙ্গে দেখা করে যাই। বুঝতেই পারছেন, সবই যে এমনভাবে বদলে গেছে আমি তার কিছুই জানতাম না—লোকেরা এমনকি ওদের নাম পর্যন্ত ভুলে গেছে—অবশ্য সেটা বুঝেছি আরো পরে, তার পরের দিন আর আজ, ক্রমে-ক্রমে লোকদের জিজ্ঞেস করে-ক’রে। কিন্তু আপনি ছিলেন সেখানে। জানি না আপনাকে কেন বলছি এ-সব কথা। একেবারে বজ্রাহত হলাম আমি—দরজাটা হট করে খোলা, লোকজন গিশগিশ করছে। ঘরে একটি কফিন, এক মৃত মানুষ। কে? ভেতরে ঢুকে পড়লাম, ওপরে উঠে এসে দেখলাম। মনে হ’লো আমি পাগল হয়ে গেছি, প্রলাপ বকছি। কিন্তু আপনি সেখানে ছিলেন, আপনি দেখেছিলেন আমাকে, দ্যাখেননি? কে জানে এ-সব কথা আপনাকে বলছি কেন?’

‘দাঁড়ান লারিসা ফিয়োডোরোভনা, একটু দাঁড়ান। আপনাকে তো বলেইছি যে আমি বা ইউরি, কেউই ঘৃণাকরেও জানতাম না যে এই ঘরের এমন আশ্চর্য একটি অনুষ্ণ আছে, জানতাম না যে আন্টিপভ থাকতেন এখানে। কিন্তু আপনি এইমাত্র একটা কথা বললেন—তাতে আরো বেশি অবাধ লাগছে আমার। বলছি এক্ষুনি। আন্টিপভ, স্টেলনিকভ—যুদ্ধের গোড়ার দিকে একটা সময়ে ওঁর কথা খুব শুনতাম। প্রায় রোজই শুনতাম বলা যায়। দু’তিনবার দেখাও হয়েছে ওঁর সঙ্গে, তখন অবশ্য ভাবতেও পারিনি যে ওঁর নাম পারিবারিক কারণে এতো অর্থপূর্ণ হবে আমার কাছে। কিন্তু মাপ করবেন, আমি হয়তো আপনার কথা ভুল শুনেছি, মনে হ’লো আপনি বললেন, ভুল করে বলেছেন হয়তো—যে ওঁকে গুলি করে মারা হয়েছিলো। আপনি নিশ্চয়ই জানেন যে উনি আত্মহত্যা করেছিলেন?’

‘হ্যাঁ, ও-সকল একটা কথা আমিও শুনেছি, কিন্তু বিশ্বাস করি না। পাভেল পাভলোভিচ গ্রীমন মানুষ ছিলেন না যিনি আত্মহত্যা করবেন।’

‘কিন্তু জানেন, এটা সত্যি কিন্তু, একেবারেই নিশ্চিত। ভ্লাডিভিস্টকে যাবার আগে আপনি যে-বাড়িতে ছিলেন সেই বাড়িতেই উনি গুলি করেন নিজেকে। ইউরি বলেছিলো আমায়। আপনি চ’লে যাবার অল্প পরেই ঘটেছিলো এটা। ইউরি ওঁর মৃতদেহ খুঁজে পায়। সে-ই করবার দেয় ওঁকে। কী করে হ’লো যে আপনি এটা জানতেন না?’

‘আমি অন্য কথা শুনেছিলাম। তাহ’লে...সত্যি ও নিজেকে নিজে গুলি করেছিলো? লোকেরা বলতো বটে, আমি বিশ্বাস করিনি। আর সেই এক বাড়িতে? অবিশ্বাস্য মনে হয়। আমার কাছে এই তথ্যটা নিতান্ত জরুরি। আপনি বোধ হয় জানেন না জিভাগোর সঙ্গে ওর দেখা হয়েছিলো কিনা? পরস্পরকে চেনার সুযোগ পেয়েছিলো কি ওরা?’

‘ইউরি আমাকে বলেছিলো যে একবার গুঁদের বহুক্ষণ ধ’রে কথাবার্তা হয়।’

‘এ কি সত্যি? তাহ’লে ভালো ভালো, —ধন্যবাদ, ঈশ্বরকে ধন্যবাদ।’ ধীরে-ধীরে নিজের বুকে ক্রুশচিহ্ন আঁকলো আশ্চিভা। ‘কী আশ্চর্য! কী-রকম মিলে গেলো বলুন তা—যেন আগে থেকেই সব ঠিক হ’য়ে ছিলো! আপনি কি কিছু মনে করবেন যদি পরে এ-বিষয়ে আরো দু’একটা কথা জিজ্ঞেস করি? প্রতিটি ঝুঁটিনাটি আমার আদরের সামগ্রী। কিন্তু এখন না—এখন বড়ো অস্থির লাগছে আমার—একটু চূপচাপ থেকে নিজেকে সামলে নিতে চাই। আমাকে মাপ করবেন তো?’

‘নিশ্চয়ই, নিশ্চয়ই।’

‘কিছু মনে করছেন না নিশ্চয়ই?’

‘নিশ্চয়ই না।’

‘ও, ইয়া। প্রায় ভুলে যাচ্ছিলাম। সৎকারের পর আমাকে চ’লে যেতে বারণ করেছিলেন আপনি। ঠিক আছে। আমি কথা দিলাম, যাবো না। আপনার সঙ্গে ফিরে আসবো এখানে। যেখানে থাকতে বলবেন, যতোদিন থাকতে বলবেন, থাকবো। ইউরির পাণ্ডুলিপি বাছাই করবো আমরা। আমি সাহায্য করবো আপনাকে। সত্যি, তাতে আপনার কিছু সুবিধে হ’তে পারে। ওর লেখা এতো ভালো ক’রে চিনি আমি, প্রতিটি টান আমার জানা, হৃদয়ের মধ্যে, বকের রক্তের মধ্যে জেনেছি আমি, আর তারপর আপনাকে একটা অনুরোধ জানানো, আমিও আপনার সাহায্য চাই। আপনি তো উকিল? তা-ই শুনেছিলাম না? আর না-হ’লেও এখনকার সব আইন-কানুন নিয়ম আপনার জানা আছে তো? আর-এক কথা, আমি জানতে চাই খবরাখবরের জন্য কোন সরকারি বিভাগে আবেদন জানাতে হয়। এ-সব বিষয়ে ঠিক খবর দিতে পারে এমন লোক এতো কম—তা-ই নয় কি? আমি আপনার পরামর্শ চাই—একটা ভীষণ বিষয়ে সত্যিকার ভীষণ এক ব্যাপারে। একটি শিশুর কথা বলবো আপনাকে। কিন্তু পরে, সৎকার শেষ ক’রে ফিরে এসে বলবো। জীবন ভ’রে আমাকে যেন মানুষ খুঁজে বেড়াতে হ’লো। বলতে পারেন, একটা কাল্পনিক ব্যাপারই ধরা যাক—একটি শিশুকে যদি খুঁজে বের করতে হয়, এমন একটি শিশু যার লালন-পালনের ভার অন্যদের হাতে তুলে দেওয়া হয়েছে, সারা দেশে যতে অনাথ-আশ্রম আছে, তাদের বিষয়ে সব রকম খবর পাওয়া যায় এমন কোনো জায়গা আছে কি? যে-সব শিশু হারিয়ে গেছে, বা ছিটকে পড়েছে দৈবাৎ, তাদের কোনো তালিকা কি রাখা হয় কোথাও—ও-রকম কোনো চেষ্টা কি করা হয়েছে কখনো? না—এখন কিছু বলবেন না এখন না। পরে, পরে কথা হবে। এমন ভয় করছে আমার! এই জীবনটা এমন ভীষণ—তাই মনে হয় না আপনার? পরে যখন আমার মেয়ে এসে আমার সঙ্গে থাকবে তখনকার কথা আলাদা, কিন্তু এখন এই ফ্ল্যাটে আমি থাকতে পারবো না কেন? গান-বাজনা অভিনয়ে দক্ষত আছে কাটিয়ার; চমৎকার নকল করতে পারে, আর শুধু কানে শুনে পুরোপুরি অপেরার সুর তুলতে পারে গলায়। অসাধারণ শিশু—আপনার মনে হয় না? কোনো নাটকের বি গান-বাজনার স্থলে নিচের ক্লাশে ভর্তি করতে চাই ওকে। যেখানে ওকে নিতে চাইবে সেখানেই দেবো, বোর্ডিঙে রাখতে চাই। সত্যি বলতে সেইজন্যই আমি এসেছি, তারই ব্যবস্থা করতে; সব ঠিকঠাক হ’লেই ফিরে যাবো। এমন গোলমালে সব ব্যাপার, তা-ই নয় কি? বুঝিয়ে বলা যায় না। কিন্তু এ-বিষয়ে পরে কথা হবে। এখন একটু চূপ করি, সামলে নিই নিজেকে, চেষ্টা করি ভয় না-পাবার। তাছাড়া ইউরির বন্ধুদের অনেকক্ষণ বাইরে দাঁড় করিয়ে রেখেছি। দুবার মনে হ’লে

যেন দরজায় টোকা শুনলাম। আর বাইরেও কী যেন হচ্ছে—সংকার সমিতির লোক এসেছে মনে হচ্ছে। একটু থাকি এখানে চুপচাপ বসে, কিন্তু আপনি বরং দরজা খুলে দিন, ভেতরে আসতে দিন ওদের। সময় হ'য়ে এলো বোধহয়? দাঁড়ান, দাঁড়ান। কক্ষিনের পাশে একটা পা-দানি থাকা উচিত, নয়তো ইউরির নাগাল পাবে না কেউ। আমি পায়ের আঙুলে ভর দিয়ে চেষ্টা করেছিলাম—পারা যায় না। আর মারিনা মার্কেলোভনা আর বাচ্চারা—ওদের তো দরকার হবে পা-দানির। তাছাড়া সেটাই তো নিয়ম, শাস্ত্রেও আছে: “তোমার শেষ চূষন দিয়ে আমাকে।” ওঃ, পারি না আর পারি না। সাংঘাতিক, সাংঘাতিক সব-কিছু। তা-ই মনে হয় না আপনার?’

‘সবাইকে ভেতরে আসতে বলি তাহ'লে। কিন্তু তার আগে একটা কথা। এতো রহস্যময় সব কথা আপনি বলেছেন, এমন সব প্রশ্ন তুলেছেন যা স্পষ্টতই আপনার পক্ষে বেদনাদায়ক। যে আপনাকে কী বলবো আমি জানি না। কিন্তু একটা কথা আপনাকে জানাতে চাই। আপনার সব দুশ্চিন্তার সময় আমার সাহায্যের ওপর ভরসা রাখবেন। স্বেচ্ছায়, মনে-প্রাণে আমি আপনার সহায়তা করতে চাইছি। আর মনে রাখবেন, কখনো হতাশ হ'তে নেই, কখনো না, কখনো না—যে-অবস্থাতেই পড়ুন না কেন। আশা করা, কাজ ক'রে যাওয়া, দুর্ভাগ্যের কালে এই শে আমাদের কর্তব্য। কিছু না-ক'রে হতাশায় মগ্ন হওয়া মানেই কর্তব্যে অবহেলা করা। এবার শোকার্তদের ভেতরে ঢুকতে দিই। পা-দানির কথাটা ঠিক বলেছেন, একটা জোগাড় করছি।’

কিন্তু লারা আর শুনছিলো না। দরজা খুলে দেওয়ার শব্দ, গলি দিয়ে জনশ্রোতের ভেতরে ঢোকার আওয়াজ, ব্যবস্থাপক আর প্রধান শোকার্তদের প্রতি ইয়েভগ্রাফের নির্দেশ—কিছুই তার কানে গেলো না; ভিড়ের পা ফেলা, মারিনার কান্না, পুরুষদের কাশি আর মেয়েদের অশ্রু অথবা আর্তস্বর—কিছুই শুনলো না সে।

ভিড় তাকে ঘিরে আছে, সেই একঘেষে শব্দে লারার যেন বমি এলো, মাথা ঘুরে উঠলো। যাতে অজ্ঞান হ'য়ে না পড়ে, সেজন্য সবটুকু শক্তি প্রয়োগ করতে হ'লো তাকে; হৃদপিণ্ড যেন ফেটে যাচ্ছিলো তার, মাথা ধ'রে উঠলো। চোখ বন্ধ ক'রে, স্মৃতি, ভাবনা ও অনুমানের জগতে নিজেকে সরিয়ে নিলে সে। পালিয়ে গেলো তাদের কাছে, যেন ডুবে গেলো তাদের মধ্যে কিছুক্ষণের জন্য, কয়েক ঘণ্টার জন্য সে-সব ভাবনা তাকে ভাসিয়ে নিয়ে গেলো এক ভবিষ্যতে, যে-ভবিষ্যৎ দেখার জন্য সে হয়তো বেঁচে থাকবে না, সেই অনাগত কাল, যখন তার কয়েক যুগ বয়স বেড়ে গেছে, যখন বার্ষিক্য তাকে ধ'রে ফেলেছে।

কেউ রইলো না। একজন মৃত, অন্যজন আত্মঘাতী হয়েছে। বেঁচে আছে শুধু সেই, যার নিহত হওয়া উচিত ছিলো, যাকে হত্যা করার চেষ্টা ক'রে সে ব্যর্থ হয়েছে, সেই আগন্তুক, যার সঙ্গে তার কোনোই মিল নেই, সেই অর্থহীন অস্তিত্বহীন লোকটা, যে তার অজ্ঞাতে তার জীবনটাকে এক পাপের শৃঙ্খল ক'রে তুলেছিলো। মাধ্যমিকতার সেই বিকট নমুনাটি এখন ছোটোছুটি ক'রে বেড়াচ্ছে এশিয়ার এমন এক পৌরাণিক অলিতে-গলিতে, যার খোঁজ রাখে শুধু ডাকটিকিট-সংগ্রাহকের দল। কাছের মানুষ, জরুরি মানুষ কেউ আর রইলো না।

ভাবো একবার! তখন ক্রিসমাসের সময়, অল্লীল কাকতালুয়াটাকে গুলি করবে ব'লে সে বেরিয়েছিলো, সেদিন এই ঘরেই অন্ধকারে বসে কথা বলছিলো পাশার সঙ্গে, তখনো, সে নিতান্ত বালক, আর তখনো ইউরি, যার মৃতদেহের কাছ থেকে সবাই এখন বিদায় নিচ্ছে, তার জীবনে প্রবেশ করেনি।

পাশার সঙ্গে সেই ক্রিসমাসের দিনে তার কী-কথা হয়েছিলো তা মনে করার জন্য প্রাণপণ চেষ্টা করলো লারা, কিন্তু তার মনে পড়লো শুধু সেই জানলাটি, যার তাকে জ্বলছিলো মোমবাতি আর শার্বিতে জমাট বরফের একটা অংশ গ'লে গিয়ে গোল গর্তের মতো দেখাচ্ছিলো।

কী ক'রে সে এখন জানবে যে যার মৃতদেহ এখন টেবিলের ওপর শুয়ে আছে, সেই ইউরি কিনা গাড়িতে যেতে-যেতে দেখেছিলো ঐ মোমবাতি, আর সেই আলো দেখার মুহূর্ত থেকেই ('টেবিলে জ্ব'লে যায় মোমের বাতি, টেবিলে জ্ব'লে যায়') তার ভবিষ্য হাতে নিয়েছিলো তার জীবনের ভার?

বিক্ষিপ্ত হ'লো লারার মন। একবার ভাবলো, 'যাই হোক, গির্জাতে অস্ত্রোষ্টি হচ্ছে না এটা বড়ো দুঃখের কথা। অস্ত্রোষ্টির প্রার্থনাটি এমন সুন্দর, এমন নিদারুণ। অধিকাংশ মানুষই ম'রে গিয়ে তার যোগ্য হয় না, কিন্তু ইউরি, আমার ইউরি তো পারতো তার এক মহৎ উপলক্ষ হ'তে। 'যে-ক্রন্দন বন্দনায় রূপান্তরিত হয়' সত্যি তো সে তারই যোগ্য ছিলো।'

এ-কথা ভেবে গর্ব আর সান্ত্বনার ঢেউ লারার মনের ওপর দিয়ে ব'য়ে গেলো—ঠিক এমন হ'তো তার জীবনের সেই সব ক্ষণিক অবকাশে, যখন সে ইউরির কাছাকাছি ছিলো। যে-মুক্তি ও নির্লিপ্ততা ইউরিকে ঘিরে থাকতো, তারই একটি বাতাসে যেন লারার নিশ্বাস ভ'রে উঠলো। চেয়ার থেকে তক্ষুনি উঠে পড়লো সে। অভাবনীয় কিছু-একটা ঘটছে তার মধ্যে। তাকে পালাতে হবে ইউরির সাহায্য নিয়ে—অস্তুত কিছুক্ষণের জন্য—খোলা হাওয়ায়, মুক্তিতে, তার দুঃখের অবরোধের বাইরে, আবার স্বাধীনতার আনন্দ-শিহরণে। তার মনে হ'লো সেই আনন্দ আসবে ইউরির কাছে বিদায় নিয়ে আনন্দিত হ'তে পারলে—যদি শুধু কান্নার এই উপলক্ষ ও অধিকার সে অব্যাহতভাবে ব্যবহার করতে পারে। ব্যাকুল ব্যস্ততায় চারদিকের ভিড়ের দিকে তাকালো সে, দৃষ্টিহীন অশ্রুপূর্ণ তার চোখ, যেন ডাক্তারের ওষুধ লাগিয়ে জলে ভ'রে-ভ'রে উঠছে। লোকেরা নড়াচড়া শুরু করলো, এলোমেলো হেঁটে বেরিয়ে গেলো ঘর থেকে, আশে-ভেজানো দরজার আড়ালে অবশেষে একা নিভৃত হ'লো সে; এগিয়ে গেলো কফিনের টেবিলের কাছে। ক্রুশচিহ্ন ঐকে, ইয়েভগ্রাফের আনা পা-দানির ওপর উঠে দাঁড়ালো, মৃতদেহের ওপর তিনবার বড়ো ক'রে ক্রুশচিহ্ন ঐকে ঠোট রাখলো শীতল কপাল আর হাতের ওপর। সেই হিম কপাল একটু কেমন ছোটো মনে হ'লো তার, যেন মুঠো-করা হাত, কিন্তু সেই অনুভূতিকে সে ঠেলে সরিয়ে দিলে মন থেকে; চেষ্টা ক'রে তা লক্ষ্য করলো না। এক মুহূর্ত স্তব্ধ হ'য়ে নিঃশব্দে দাঁড়িয়ে রইলো, কিছু না-ভেবে, না-কৈদে, ঝুঁকে পড়লো কফিনের ওপর, ফুল আর মৃতদেহের ওপর, তার সমস্ত সন্তা দিয়ে, মাথা, বুক, হৃদয় আর তার হৃদয়ের মতোই শক্তিশালী দুই হাত দিয়ে তাদের আড়াল ক'রে রাখলো নিজের মধ্যে।

১৫

চেপে-রাখা কান্নার আঘাতে ফুলে-ফুলে উঠলো তার সমস্ত শরীর। যতোক্ষণ পারলো চোখের জল ঠেকিয়ে রাখলো, কিন্তু কখনো-কখনো তার সামর্থ্যে আর কুলোলো না, তার ভেতর থেকে ফেটে বেরোলো কান্না, বেরিয়ে এলো, গাল বেয়ে নামলো তার জামায়, হাতে আর তার আঁকাডে-ধ'রে-থাকা কফিনটার ওপর।

কথা বললো না সে, ভাবলো না কিছু। অনেক চিন্তা, সাধারণীকরণ, অনেক তথ্য ও প্রমিতি স্বেচ্ছাচারী বেগে ছুটে চললো তার মনের ওপর দিয়ে, যেন আকাশের মেঘ, বা অতীতে তাদের নৈশ কথোপকথন। সেই সব দিনে এতেই তারা আনন্দ ও মুক্তি পেয়েছিলো, এই জ্ঞান, যা মস্তিষ্কজাত নয়, স্বজ্ঞাপ্রসূত, যা অব্যবহিতভাবে পরস্পরে সঞ্চালিত হয়।

এমন এক জ্ঞান এখন ভ'রে তুললো লারাকে—অন্ধকার, অস্পষ্ট, মৃত্যুর অভিজ্ঞতা, মৃত্যুর জন্য সেই প্রস্তুতি যার সামনে বর্তমানের সব অশক্তি দূর হ'য়ে যায়। সে যেন স্কুড়ি বার বেঁচেছে এই পৃথিবীতে, অসংখ্যবার তার ইউরিকে হারিয়েছে, সঞ্চয় করেছে এই বিষয়ে এমন হৃদয় অভিজ্ঞতা যে এখন এই কফিনের পাশে দাঁড়িয়ে সে যা-কিছু করেছে, তা-ই একেবারে সঠিক, একেবারে যথাযথ।

‘আ, সেই প্রেম, সেই স্বাধীন, সেই নতুন প্রেম, এই পৃথিবীর কোনো-কিছুর সঙ্গেই যার তুলনা চলে না।’ অন্যেরা যা গান গেয়ে বলে তা-ই ছিলো তাদের চিন্তায়।

বাধ্য হ’য়ে পরস্পরকে তারা ভালোবাসেনি, তারা ছিলো না ‘সংরাগের দাস’—যা প্রেমিক-প্রেমিকাদের বিষয়ে বলা হ’য়ে থাকে। তারা পরস্পরকে ভালোবেসেছিলো, যেহেতু তা-ই ইচ্ছা করেছিলো তাদের আশেপাশের সমস্ত কিছু—গাছ, আকাশ, আকাশের মেঘ, আর তাদের পায়ের তলাকার মৃত্তিকা। এই প্রেমে যেন তাদের চেয়েও বেশি প্রীত হয়েছিলো পারিপার্শ্বিক জগৎ—রাস্তায় দেখতে-পাওয়া অচেনা লোক, তারা রাস্তায় বেরিয়ে দেখবে ব’লে রচিত দৃশ্যচিত্র, যে-সব ঘরে তারা থেকেছে বা দেখা করেছে—এই সব-কিছুই তাদের চেয়েও বেশি প্রীত হয়েছিলো।

এই, শুধু এই মিলিয়ে দিয়েছিলো তাদের দু’জনকে, অমন একাক্ষ ক’রে দিয়েছিলো তাদের। কখনো, তাদের মিলনের পূর্ণতম ও উদ্দামতম মুহূর্তেও কখনো তারা ভোলেনি সেই উচ্চতম ও তীব্রতমের চেতনা—বিশ্বনিখিলে আনন্দবোধ, তার রূপ, তার গড়ন, তারই অংশ ও অঙ্গীভূত হবার অনুভূতি।

পূর্ণতার মধ্যে এই সংগতি—এই ছিলো তাদের নিশ্বাসের বাতাস। আর তারই ফলে সেই আধুনিক ফ্যাশনে ধরা দেয়নি তারা, যা মানুষকে বড্ড বেশি আদর দেয়, প্রকৃতির উর্ধ্বে তুলে ধ’রে পূজো করে তাকে। এই প্রমাদের ওপর স্থাপিত সমাজবিজ্ঞানকে আবার রাজনীতি নামে চালানো হয়—তাদের তা মনে হয়েছে অত্যন্ত করুণ এক ছেলমানুষি, এমন এক ধরনের অক্ষম বাবুগিরি যার অর্থ তারা বুঝতে পারে না।

১৬

এবারে সে ইউরির কাছে বিদায় নিতে আরম্ভ করলো। সহজ তার ভাষা, সবল, প্রচলিত ও অভ্যস্ত—সেই রকম ভাষা, যা বাস্তবের বেড়া ডিঙিয়ে ফেটে পড়ে, যার কোনো অর্থ হয় না—কিংবা যা ট্র্যাজেডির কোরাস বা স্বগতোক্তি মতো, বা কবিতা অথবা সংগীতের ভাষার মতোই অর্থহীন ও অর্থপূর্ণ, শুধু হৃদয়াবেগের তীব্রতার প্রভাবেই সার্থক। এ-ক্ষেত্রে এই ভাষাকে যা অর্থ দিচ্ছে, যা নিংড়ে বের ক’রে আনছে লারার চিন্তাহীন, সাধারণ, লঘু শব্দগুলিকে, তা হ’লো তার চোখের জল; চোখের জলে ভেসে-ভেসে, সাতার কেটে-কেটে তারা বেরিয়ে আসছে।

যেমন বাতাসের গায়ে জড়িয়ে-জড়িয়ে ভেজা-ভেজা রেশমি পল্লব মর্মর তোলে, তেমনি তার অশ্রুসিক্ত শব্দগুলো পরস্পরে সংলগ্ন হ’য়ে একটি মৃদু, দ্রুত ও কোমল স্বরে গুঞ্জিত হ’তে লাগলো।

‘এই যে, আবার আমাদের দেখা হ’লো ইউরচকা, ভগবান আমাদের মিলিয়ে দিলেন। ভাবো একবার! কী ভীষণ! কী ভীষণ! পারি না, আর পারি না আমি! হে ভগবান! আমার কান্না কি ফুরোবে না! ভাবো একবার! আবার এলো ক্ষমা, এলো ধর্ম—একবারে আমাদের রাস্তার ওপর! তুমি চ’লে যাচ্ছে, আমার সব শেষ হ’য়ে গেলো। আবার এক মন্ত বড়ো কিছু, যা থেকে নিস্তার নেই। জীবনের রহস্য, মৃত্যুর রহস্য, প্রতিভার সৌন্দর্য, প্রেমের সৌন্দর্য—এ-সবই ইয়া, এই সব আমরা বুঝেছিলাম। আর যে-সব বাজে ব্যাপার—জগৎকে নতুন ক’রে গড়া—না, মাপ করো, ও-সব আমাদের জন্য নয়।

‘বিদায়, আমার বড়ো, আমার প্রিয়, আমার আপন, আমার গর্ব। বিদায়, আমার দ্রুত, গভীর নদী, কী ভালোবেসেছিলাম সারাদিন ধ’রে তোমার জলোচ্ছ্বাস। তোমার শীতল, গভীর ঢেউয়ে-ঢেউয়ে স্নান করতে কতো যে ভালোবেসেছিলাম আমি।

‘মনে আছে সেদিন আমরা কী-ভাবে বিদায় নিয়েছিলাম, সেই বরফ-পড়া সন্ধ্যায়? কী ভীষণ ঠিকালে আমাকে বলো তো! তোমাকে ছেড়ে কখনো কি যেতাম আমি! হ্যাঁ, জানি, সব জানি আমি, নিজের ওপর জুলুম করেছিলে তুমি—ভেবেছিলে ওতে আমার ভালো হবে। তোমার সব ভণ্ডুল হ’য়ে গেলো। কী না আমাকে সহ্য করতে হয়েছে—ভগবান! কতো না আমাকে শান্তি পেতে হয়েছে। তুমি তার কিছুই জানো না ইউরি—কেমন ক’রেই বা জানবে। ওঃ, কী করেছি আমি, ইউরা, আমি কী করেছি! আমি যে কতো বড়ো অপরাধী তুমি জানো না। কিন্তু আমার কোনো দোষ ছিলো না। অসুখে তিন মাস আমি হাসপাতালে প’ড়ে ছিলাম, অজ্ঞান হ’য়ে ছিলাম পুরো একমাস। আর তারপর থেকে মনে হচ্ছে—কী হবে আর বৈচে থেকে। ইউরা, আমার মনে শান্তি নেই—শুধু দুঃখ আর দয়া নিয়ে বৈচে থাকতে চাই না। কিন্তু সবচেয়ে জরুরি কথাটাই এখনো বলছি না তোমাকে। পারি না বলতে, বলবার সাধ্য নেই আমার। আমার জীবনের সেই সময়কার কথা ভাবতে গেলেই মুখের কথা থেমে যায়, গায়ে কাঁটা দিয়ে ওঠে, এমনি ভীষণ সেই কথাটা। আর জানো তো, আমি হয়তো ঠিক প্রকৃতিস্থও নেই আর। কিন্তু আমি মদ ধরিনি—অনেকে তা-ই ধরে এ-অবস্থায়—সেটা আমি ঠেকিয়ে রাখছি কোনোরকমে—কেমনা মেয়েরা যদি মাংসামি শুরু করে, সেটা কি অসম্ভব কথা নয়, একেবারে সমস্ত কিছুই অবসান কি নয় সেটা?’

এমনি বিলাপ ক’রে চললো লারা, কেঁদে-কেঁদে কষ্ট দিতে লাগলো নিজেকে, কিন্তু হঠাৎ চোখ তুলে অবাক হ’য়ে দেখলো অনেক আগেই ঘর ভ’রে গেছে লোকজনে, ব্যস্ততা শুরু হ’য়ে গেছে। পা-দানি থেকে নেমে টলতে-টলতে কফিনের কাছ থেকে সে স’রে এলো, হাতের পাতা দিয়ে ঢেকে রাখলো চোখ, যে-কালো এখনো সে কাঁদেনি, সেটুকু যেন শেষ ক’রে দিতে চাচ্ছে, আঙুল দিয়ে ঝেড়ে ফেলতে চাচ্ছে মেঝের ওপর।

ছ’জন লোক এগিয়ে এলো কফিনের কাছে, সেটা তুলে নিয়ে বেরিয়ে গেলো।

১৭

লারা কামেরগের স্ট্রীটে আরো কয়েকদিন রইলো, তার সহায়তায় ইউরির কাগজপত্রের বাছাই শুরু হ’লো, কিন্তু শেষ হ’লো তাকে ছাড়া। ইয়েভগ্রাফের সঙ্গে তার যা কথা ছিলো ব’লে নিলো সে, একটা জরুরি তথ্য তাকে জানালো।

একদিন লারা বেরিয়ে গিয়ে আর ফিরে এলো না। রাস্তায় নিশ্চয়ই গ্রেপ্তার করা হয়েছিলো তাকে, তখনকার দিনে প্রায়ই হ’তো ও-রকম, তারপর সে হয় ম’রে গেলো, নয়তো উধাও হ’য়ে গেলো, নয়তো এক তালিকার মধ্যে বিস্মৃত একটি সংখ্যামাত্র অবশিষ্ট রইলো তার, উত্তর রাশিয়ায় যতো অসংখ্য মেয়েদের বা মেয়ে-পুরুষে মেশানো কনসেন্ট্রেশন ক্যাম্প ছিলো, তারই একটাতে। সেই তালিকাও অসাধবানে হারিয়ে গেলো একদিন।

পরিচ্ছেদ ১৬

পরিশিষ্ট

১

গার্ডন, সম্প্রতি লেফটেন্যান্টের পদে উন্নীত, ও মেজব ডুডোরভ একসঙ্গে চাকরিতে ফিরছে, একজন সরকারি কাজ সেরে মস্কো থেকে, আর-একজন তিনদিনের ছুটির পর। এখন ১৯৪৩-এর গ্রীষ্ম, কুর্ক্স বাহ ডেড কবা হ'য়ে গেছে, ওরেল শহর শত্রুর হাত থেকে মুক্তি পেয়েছে।

তাদের দেখা হয়েছে পথে, চের্নি নামে এক ছোটো শহরে তাদের রাত কাটলো। শত্রুবাহিনীর অপসারণের পথে এমন দু'একটা জায়গা থেকে গেছে যা সম্পূর্ণ ধ্বংস হয়নি, চের্নি তাবই একটা, এই তথাকথিত 'মরুপ্রদেশ' অংশত বসতিপূর্ণ।

ভাঙা ইটের পাজা প'ড়ে আছে, ধুলো হ'য়ে ঠুঁড়িয়ে গেছে পাথর—তারই মধ্যে একটি অক্ষত গোলাঘর পেয়ে সেখানেই সে-রাতের মতো আশ্রয় নিলে তারা। ভোব হবার একটু আগে, রাত তিনটে নাগাদ চোখ লেগে এসেছিলো ডুডোরভের, কিন্তু একটু পরেই গার্ডনের নড়া-চড়ার শব্দে তার ঘুম ভেঙে গেলো। ঐ খড়ের গাদা যেন জল, এমনি এলোমেলো ভঙ্গিতে নরম খড়ের গাদার ওপর দিয়ে নেমে এসে গড়াগড়ি দিচ্ছে গার্ডন। কিছু কাপড়চোপড় একটা পুঁটলিতে গুছিয়ে নিয়ে টলতে-টলতে খড়ের স্তূপের ওপর থেকে নেমে দরজার দিকে চললো সে।

‘এই সাত-সকালে যাচ্ছে কোথায়?’

‘আমি নদীতে চললাম। কাপড়চোপড় কেচে আনি।’

‘পাগল নাকি? আজ সন্দের মধ্যেই তো ক্যাম্পে ফিরছি। ধোপানি টানিয়ার কাছে সাফ জামা-কাপড় পাবে। তাড়া কিসের?’

‘অতোক্ষণ আমার সবুর সইবে না। ঘামে চিটচিটে সব কাপড়, নোংরা। চট ক'রে একটু আছড়ে ভালো ক'রে নিংড়ে নিয়ে আসি। এই गरমে দেখতে-না দেখতে শুকিয়ে যাবে। স্নান ক'রে জামা কাপড় বদলে নেবো।’

‘খারাপ দেখায়। হাজার হোক, তুমি একজন অফিসার।

‘এই ভোরে আর কে আছে, সবাই তো ঘুমিয়ে। সে যা-ই হোক, আমি একটু ঝোপঝাড় খুঁজে নেবো। কেউ দেখতে পাবে না আমাকে। কথা না-ব'লে ঘুমোও তো, নয়তো আর ঘুম আসবে না।’

‘এমনিতে আর ঘুমোবো না আমি। তোমার সঙ্গেই যাই, চলো।’

শাদা পাথরের ধ্বংসস্তূপের পাশ দিয়ে তারা নদীর দিকে এগোলো, সূর্য সবেমাত্র উঠেছে, কিন্তু এরই মধ্যে তেতে উঠেছে জায়গাটা। এক কালে যা রাস্তা ছিলো সেখানে মাটির ওপর শুয়ে লোকেরা নাক ডাকাচ্ছে, রোদে ঘেমে লাল হ'য়ে গেছে তাদের মুখ। বেশির ভাগই স্থানীয় উষ্মন্ত, বৃদ্ধ, ত্রীলোক আর শিশু, মাঝে-মাঝে দু'একজন দলছুট লাল সেপাই দেখা যাচ্ছে,

বাহিনীর সঙ্গে যোগ দেবার চেষ্টায় এগোচ্ছে তারা। তাদের ঘূমের যাতে ব্যাঘাত না হয়, সেজন্য গার্ডন আর ডুডোরভ সাবধানে পা ফেলে-ফেলে চললো।

‘আস্তে কথা বলো, নয়তো শহর সুদ্ধ লোক জেগে উঠবে, আমার কাপড় কাচার আর কোনো আশা থাকবে না।’

গত রাত্রের আলোচনাই একটু নিচু গলায় চালাতে লাগলো তারা।

২

‘কী নদী এটা?’

‘জানি না। বোধহয় জুশা।’

‘না এটা জুশা নয়।’

‘তাহ’লে কী জানি না।’

‘জুশার ধারেই ও-সব ঘটেছিলো, জানো তো—ক্রিস্টিনার কথা বলছি।’

‘হ্যাঁ, তবে বোধহয় আরো নিচের দিকে। শোনা যায় চার্চ নাকি তাকে সম্ভের পদবী দিয়েছিলো। খবরের কাগজে যা বেরিয়েছিলো তার বাইরে অন্য কোনো খবর জানতে পেরেছিলে কখনো?’

‘ঠিক যে জানতে পেরেছি তা নয়। একটা পুরোনো পাথরের বাড়ি ছিলো, আস্তাবল বলতো সবাই। একটা অশ্ব-প্রজনন কেন্দ্র ছিলো সেটা—এখন ঐতিহাসিক ব্যাপার হ’য়ে যাবে—খুব পুরোনো জায়গা, বিশাল, পুরু দেয়াল ছিলো। জার্মানরা সেটাকে পরিণত করেছিলো দুর্ভেদ্য দুর্গে; বাড়িটা ছিলো একটা পাহাড়ের মাথায়, সারা এলাকার ওপর গোলা চালিয়ে আমাদের এগোবার পথ আটকে রেখেছিলো ওরা। ঐ কেব্লা ধ্বংস না-করলে চলছিলো না আমাদের। তখন ক্রিস্টিনা—অলৌকিক তার সাহস, তার বুদ্ধি—জার্মান ব্যূহ ভেদ ক’রে কেব্লা উড়িয়ে দিলে। তারপরে ধরা প’ড়ে গেলো জার্মানদের হাতে, ওকে ফাঁসিকাঠে বুলিয়ে দিলে ওরা।’

‘ওকে ক্রিস্টিনা অর্লেৎসোভা বলে কেন সবাই, ডুডোরভা বলে না কেন?’

‘আমাদের বিয়ে হয়নি তো—শুধু বাগদত্তা হয়েছিলাম। একচল্লিশের গ্রীষ্মকালে আমবা স্থির করেছিলাম যুদ্ধ শেষ হ’লে বিয়ে করবো। তারপর আর্মির অন্য সকলের মতো আমিও নানা জায়গায় ঘুরে বেড়াতে লাগলাম। অসংখ্যবার জায়গা-বদল হয়েছে আমার বাহিনীর, তার ফলে ওর সঙ্গে যোগাযোগ রাখতে পারিনি। আর কখনো চোখে দেখিনি ওকে। ওর আশ্চর্য বীরত্ব, ওর মহান মৃত্যু—অন্যদের মতো আমিও ও-সবের খবর পেয়েছি আর্মির বুলেটিন আর খবরের কাগজ থেকে। সবাই বলছে এখানেই কোথায় যেন ওর একটা স্মৃতিস্তম্ভ নির্মাণ করা হবে। শুনছি জিভাগো—জেনারেল যিনি, ইউরির ভাই—এই অঞ্চলে ঘুরে-ঘুরে ওর বিষয়ে তথ্য সংগ্রহ করছেন।’

‘দুঃখিত—এ-বিষয়ে কথা তোলা আমার উচিত হয়নি। তোমাকে কষ্ট দিলাম।’

‘না ঠিক তা নয়। কিন্তু তোমাকে আর আটকে রাখতে চাই না। তুমি জামা ছেড়ে জলে নেমে গিয়ে কাজ শুরু করো। আমি এখানে শুয়ে ঘাস চিবোতে-চিবোতে একটু ভাবি। হয়তো একটু ঘুমিয়েও নিতে পারি।’

একটু পরেই আবার কথাবার্তা আরম্ভ হ’লো।

‘এমন কাপড় কাচতে শিখলে কোথায়?’

‘বিপদে পড়লে বুদ্ধি বেগ্নোয়। আমাদের ভাগা ভাগা ছিলো না। শান্তি-শিবিরগুলির মধ্যে যেটা প্রায় নিকট, সেটাতেই পাঠানো হয়েছিলো আমাদের। শেষ পর্যন্ত বেশি লোক ট্রেনে। আমাদের পৌছনো থেকেই শুরু করা যাক। ট্রেন থেকে নামলাম। বন্যাস্রের মক্কাডুমি একেবারে।’

সারি-সারি সেপাই তাদের রাইফেলগুলো আমাদের দিকে উচোনো, নেকড়ে-জাতের কুকুরের পাল। দূরে জঙ্গল। সেই সময়েই অন্য কয়েকটা দলকেও নিয়ে আসা হচ্ছিলো। ছড়িয়ে দেওয়া হ'লো মস্ত মাঠের মধ্যে আমাদের, এক বৃহৎ বহুভূজের আকৃতিতে দাঁড়ালাম আমরা, সকলের মুখ বাইরের দিকে যাতে কেউ কাউকে দেখতে না পায়। তারপর হুকুম হ'লো হাঁটু ভেঙে ব'সে সোজা সামনের দিকে তাকিয়ে থাকার—একটু চোখ সরেছে কি মরেছে। তারপর ঘণ্টার পর ঘণ্টা ধ'রে নাম-ডাকা; অন্তহীন, অপমানজনক একটা ব্যাপার, আর সারাটা সময় আমরা হাঁটু ভেঙে ব'সেই আছি। তারপর উঠে দাঁড়ালাম আমরা, আমাদের ছাড়া অন্য সবগুলি দলকে ভিন্ন-ভিন্ন দিকে নিয়ে যাওয়া হ'লো। আমাদের বলা হ'লো: 'এই যে। এই তোমাদের ক্যাম্প।'—একটা শূন্য তুষারাক্ষয় প্রান্তর, শুধু মধ্যখানে একটা খুঁটিতে এই নোটিশ ঝুলছে: "গুলাগ ৯২ ওআই. এন. ৯০"^১—এছাড়া আর কিছুই নেই সেখানে।

'আমাদের কিন্তু অতোটা কষ্ট পেতে হয়নি, বরাত কিছুটা ভালো ছিলো আমাদের। আমার ছিলো দ্বিতীয়বারের শাস্তিভোগ, একবার হ'লে দ্বিতীয়বারও আপনিই হ'য়ে যায়। আর সেবারে আমি অন্য এক ধারায়^২ শাস্তি পেয়েছিলাম, তাই ব্যবস্থাও আলাদা হয়েছিলো। ছাড়া পাবার পব আমি আবার কাজে নিযুক্ত হলাম—অধ্যাপনাতেও বাধা হ'লো না—প্রথম-বারেও তা হয়নি। আমার শাস্তিটাও ছিলো সাধারণরকম—তোমার মতো দণ্ডবাহিনীতে ঠেসে দেয়নি।'

'তা শোনো... শুধু ঐ তো ছিলো সেখানে, একটা খুঁটি আর একটা নোটিশ—"গুলাগ ৯২ ওয়াই. এন. ৯০।" খালি হাতে, বরফের মধ্যে আমরা চারাগাছ ভাঙতে লাগলাম, তা দিয়ে বাড়ি তৈরি করবো ব'লে। সেই আমাদের প্রথম কাজ। আর শেষ পর্যন্ত, বিশ্বাস করবে কিনা জানি না, নিজেদের ক্যাম্প নিজেরাই তৈরি ক'রে ফেললাম আমরা। নিজেদের কয়েদখানা নিজেরাই বানিয়ে নিলাম, বেড়া, পাহারাগুলার ঘর, শাস্তি-কুঠরি—কিছুই বাদ গেলো না। তারপর শুরু করলাম কাঠরের কাজ, গাছ কাটতে লাগলাম। এবং একটা স্নেজে অটজন ক'রে আমাদের জোতা হ'লো, গলা পর্যন্ত বরফে ডুবে কাঠ টানছি আমরা। অনেকদিন পর্যন্ত জানতে পারিনি যে যুদ্ধ বেধেছে। আমাদের কাছ থেকে গোপন করা হয়েছিলো খবরটা। আর তারপর হঠাৎ ডাক পড়লো। ইচ্ছে করলে দণ্ডপ্রাপ্ত বাহিনীতে যোগ দিয়ে ফ্রন্ট-লাইনে যেতে পারি, প্রাণ নিয়ে ফিরে এলে ছাড়া পাবো। তারপর? আক্রমণের পর আক্রমণ, মাইলের পর মাইল জুড়ে বৈদ্যুতিক কাঁটাতার, মাইন, কামান, মাসের পর মাস অফুরন্ত গোলাগুলি। মৃত্যু-বাহিনী নাম হয়েছিলো আমাদের, বলতে গেলে নিশ্চিহ্ন হ'য়ে গেলো পুরো দলটি—আমি কেমন ক'রে বেঁচে গেলাম তা জানি না। আর তবু—ভেবে দ্যাখো—সেই নরকও কিছু না, কনসেন্ট্রেশন-ক্যাম্পের ভয়াবহতার তুলনায় তাও স্বর্গ, আর তার কারণ শারীরিক দুঃখকষ্ট ছাড়াও আরো অনেক কিছু।'

'হ্যাঁ, অনেক, অনেক কষ্ট পেয়েছো তুমি!'

'শুধু কাপড় কাচাই নয়, যা-কিছু শেখার আছে সব সেখানে শেখা হ'য়ে যায়।'

'অসাধারণ ব্যাপার, জানো। তোমার বন্দী-জীবনের তুলনাতেই শুধু নয়—তিরিশের যুগের সব-কিছু, এমনকি বই, টাকা, আরামের মধ্যে আমার বিশ্ববিদ্যালয়ের সুখের দিনগুলির তুলনাতেও, এমনকি তারও তুলনায় যুদ্ধ মনে হয়েছিলো টাটকা বাতাসের মতো, যেন পরিত্রাণের বার্তা, যেন আমাদের নির্মল ক'রে দেবার জন্য ঝড় উঠলো।'

GULAG 92 Y.N. 90): শাস্তি-শিবিরের সাংকেতিক চিহ্ন: গুপ্ত পুলিশবাহিনীর দ্বারা এই শিবিরগুলি পরিচালিত হ'তো।

২ বোঝা যাচ্ছে গার্ডন ও ডুডোরভ দু'জনেই রাজনৈতিক অপরাধে দণ্ডিত হয়েছিলেন। অপরাধ দণ্ডবিধির কোন ধারায় পড়ে, সেই অনুসারে শাস্তির তারতম্য হ'তো। কঠিনতম শাস্তি পেতো তারা, যারা ৭৮ ধারা অনুযায়ী দণ্ডিত হ'তো—যাদের প্রাপ্য সরকারের বিরুদ্ধে প্রচারকার্য বা ধ্বংসক্রিয়া।

‘আমার মনে হয় “সংঘক্রিয়াটাই” ভুল হয়েছিলো, সফলও হয়নি। সেই ভুল স্বীকার করা হ’লো না, তাই যে-কোনো রকম ভয় দেখিয়ে মানুষকে ভুলিয়ে দেওয়া হ’লো স্বাধীনভাবে ভাবতে বা বিচার করতে, আর যার অস্তিত্ব নেই তা-ই দেখতে হবে সকলকে, চোখ যা বলছে তার উল্টোটা বিশ্বাস করতে হবে। আর সেইজন্যেই ঘটলো ইয়েজুভ সন্ত্রাসের তুলনাহীন নিষ্ঠুরতা, জারি হ’লো এমন এক সংবিধান, যা কখনোই কাজে খাটানো হবে না, আর এমন সব নির্বাচন হ’লো যাতে স্বাধীন ভোটের অধিকার নেই।

‘তাই, যখন যুদ্ধ বাধলো তার সত্যিকার বিপদ, সত্যিকার মৃত্যুভয়, সেই মিথ্যার অমানুষিক শক্তির তুলনায় আশীর্বাদের মতো মনে হ’লো, মৃত অক্ষরের মায়াজাল ছিন্ন ক’রে তা যেন স্বস্তি দিলো মানুষকে।

‘তোমার মতো যারা কনসেনট্রেশন ক্যাম্পে ছিলো শুধু তারাই নয়, নির্বিশেষে প্রত্যেক মানুষ এই স্বস্তি অনুভব করেছে, এই যুদ্ধ যেন মুক্তিদাতা—গভীর নিশ্বাস টেনে তার মর্মান্তিক অয়িকুণ্ডে ঝাপিয়ে পড়েছে সবাই—তাতেই সত্যিকার আনন্দ, সত্যিকার উদ্দীপনা।

‘বৈশ্বিক দশকগুলো যেন একটি শৃঙ্খল রচনা করে, যুদ্ধ তার যোগসূত্র। বিপ্লবের অন্তর্নিহিত কারণগুলি যুদ্ধ বাধলে আর প্রত্যক্ষভাবে কাজ করে না—তাদের সমাপ্তি ঘটে। কিন্তু ততোদিন পরোক্ষ কারণগুলির ক্রিয়াকলাপ শুরু হ’য়ে গেছে; আমরা দেখছি ফলের ফল, জাতকেব উপজাতক—সব দুঃখের দ্বারা শোধিত, নির্মল, বীরত্বে ভরপুর—মহান, চরম অশ্রুতপূর্ব কর্মের জন্য প্রস্তুত। এই বিস্ময়কর অবিশ্বাস্য গুণগুলিতেই আমাদের সময়কার নীতিধর্ম বিকশিত হয়েছে।

‘আর আমি যখন এ-সবের দিকে তাকাই, তখন খ্রিস্টিনার শহীদ-যজ্ঞ, আমাদের ক্ষতি আর আমার নিজের ক্ষতযন্ত্রণা সত্ত্বেও, যুদ্ধের বিপুল রক্তপাত সত্ত্বেও, আমার মন আনন্দে ভ’রে যায়। সেই আশ্ববলির আলো—যাতে অলংসোভার মৃত্যু ও আমাদের সকলের জীবন উদ্ভাসিত—তাতে আমি বল পাই তার মৃত্যুকে সহ্য ক’রে নিতে।

‘বেচারি তুমি যখন ঐ সব যন্ত্রণা ভোগ করছো, আমি তখন ছাড়া পেয়েছি। অল্পদিন পরে ইতিহাসের ছাত্রী হ’য়ে খ্রিস্টিনা বিশ্ববিদ্যালয়ে এলো। আমি ওকে পড়াতাম। তার আগেই, প্রথমবার জেল থেকে বেরিয়েই, ও যখন বালিকামাত্র, তখনই ওকে লক্ষণীয় ব’লে মনে হয়েছে আমার।—তোমার মনে আছে, ইউরি তখনো বেঁচে ছিলো, আমি তোমাদের দুজনকেই বলেছিলাম ওর কথা।—সেবারে ও আমার ছাত্রী হ’লো।

‘এটা সেই সময় যখন ছাত্রমহলে শিক্ষকদের সমালোচনা করার রীতিটা সবেমাত্র প্রচলিত হয়েছে। আমার প্রধান নিন্দুক হ’য়ে উঠলো খ্রিস্টিনা। ওর মধ্যে অতোখানি হিংস্রতা জাগিয়ে তোলার মতো আমি কী করেছিলাম জানি না। মাঝে-মাঝে সে এমন উদ্ধত আর অন্যায ব্যবহার করতো যে অন্যান্য ছাত্ররা প্রতিবাদ ক’রে আমার পক্ষ নিতো। রসিক ছিলো খুব, “দেয়াল-পত্রিকা”য় মনের সুখে ঠাট্টা করতো আমাকে, এমন সব কাল্পনিক নাম দিতো আমাকে যার অর্থ কারোরই বুঝতে দেরি হ’তো না। আর তারপর হঠাৎ, একেবারে আকস্মিকভাবে, আমি বুঝতে পারলাম যে এই গভীর শত্রুতা আসলে ওর প্রেমেরই ছদ্মবেশ—আমাকে ভালোবাসে ও—প্রবল ও দুর্মর সেই প্রেম, বহুদিন ধ’রেই ভালোবেসেছে, আর আমিও, ওর মনের কথা কিছুই না-জেনে, সেই ভালোবাসার প্রতিদান দিয়েছি।

‘যুদ্ধের ঠিক আগে, আর যুদ্ধ যখন সবেমাত্র শুরু হয়েছে, তখন একচল্লিশ সালে আশ্চর্য এক গ্রীষ্ম আমরা কাটিয়েছিলাম। একদল ছাত্র-ছাত্রীর ওপর হুকুম হয়েছিলো মস্কোর এক শহরতলিতে যাবার জন্য—খ্রিস্টিনা ছিলো তার মধ্যে—আমার বাহিনীরও তখন সেখানেই

ছিলো আস্তানা। ওদের সামরিক শিক্ষার পটভূমিকায় গ'ড়ে উঠলো বঙ্কুতা। শহরতলির গৃহরক্ষীদের বাহিনী তৈরি হচ্ছিলো, ক্রিস্টিনা প্যারাসুটের ব্যবহার শিখছে—মস্কোয় বাড়ির ছাদ থেকেই প্রথম জার্মান বোমারু-প্লেনের সংকেত বাজলো, হ'ঠে ফিরে গেলো সেগুলো। তোমাকে বলেছি তো, এই সময়েই আমরা বাগদত্তা হয়েছিলাম, কিন্তু বলতে গেলে সঙ্গে-সঙ্গেই বিচ্ছিন্ন হ'তে হ'লো আমাদের, আমার বাহিনীর বদলির ছকুম এলো। আর কখনো ওকে দেখিনি।

'পরে, যখন যুদ্ধের অবস্থা একটু ভালো, জার্মানরা হাজারে-হাজারে ধরা দিচ্ছে, তখন দু'দুবার আহত হবার পর আমাকে বিমান-ধ্বংসী বাহিনী থেকে বদলি করা হ'লো সাত নম্বর স্টাফ-ডিভিশনে, সেখানে ওদের ভাষাবিদদের দরকার ছিলো। তখনই তোমাকে পাতাল থেকে উদ্ধার ক'রে আবার বহাল করার ব্যবস্থা করতে পারলাম।

'ধোপানি টানিয়া ছিলো ক্রিস্টিনার বন্ধু। ফ্রন্ট-লাইনে আলাপ হয়েছিলো ওদের। ওর কথা খুব বলে টানিয়া। টানিয়ার হাসি লক্ষ্য করেছেো তুমি? সারা মুখ ভ'রে হাসে, ঠিক ইউরির মতো। একবার ভুলে যাও যে ওর নাক চ্যাপ্টা, গালের হাড় উচু—তখনই দেখবে ও রীতিমতো সুশ্রী। ইউরির মতোই রুশ ধরনের চেহারা। দেশ ভ'রে এ-ই দেখা যায়।'

'তুমি কী বলতে চাচ্ছে আমি বুঝেছি। কিন্তু না—আমি কিছু লক্ষ্য করিনি।'

'কী কুৎসিত, বর্বর ওর ডাকনামটা—টানিয়া ফালতু। এটা নিশ্চয়ই ওর পদবী হ'তে পারে না। ওর নামের সঙ্গে এটা জুড়ে গেলো কেমন ক'রে কে জানে।'

'তোমার মনে নেই ও বলেছিলো আমাদের—অজানা মা-বাবার সন্তান ও, যাকে বলে বেজপ্রিজোর্নয়া'। "বেজাচেরেডনয়া"—"ফালতু"—কথাটা হয়তো "বেজোটচায়া" বা "পিতৃহীনে"র একটা অপভ্রংশ; দূর গ্রামে, সেখানে ভাষার শুদ্ধরূপ এখনো পাওয়া যায়, সেখানে বোধহয় ঐ নামেই ডাকা হ'তো টানিয়াকে—ছেলেবেলায় সেখানেই তো ছিলো সে। তারপর যখন শহরে এলো—সেখানে কথাটার মানে কেউ বুঝলো না, সবই তো সেখানে বিকৃত হ'য়ে যায়--তাই দেখেছো লোকের মুখে-মুখে কথাটা কেমন শহুরে আর একেলে হ'য়ে উঠেছে।'

৩

এই কথাবার্তা হবার কিছুদিন পরে গার্ডন আর ডুডোরভ কারাচেভ শহরে এসে পৌঁছলো; একেবারে ধূলিসাৎ ক'রে দেওয়া হয়েছে শহরটিকে। এখনো তাদের বাহিনীর পেছনে ছুটছে তারা, কারাচেভে এসে বাহিনীর ল্যাজের দিকের দু'একটা ছুটকো দলের সঙ্গে দেখা হ'য়ে গেলো তাদের, তারাও প্রধান অংশের সঙ্গে যোগ দেবার জন্য এগোচ্ছে।

বড্ড গরম পড়েছে এ-বছর; প্রায় একমাস ধ'রে আবহাওয়া শান্ত, একটানা রোদ্দুর চলছে। নীল, নির্মল আকাশের তলায় ঘামতে-ঘামতে ওবেল আর ব্রিয়ানস্কের মধ্যবর্তী ব্রিয়ানস্কিনার উর্বর মাটি রোদে পুড়ে কফি-চকোলেটের মতো বাদামি হ'য়ে গিয়েছে।

শহরের মধ্য দিয়ে সোজা বেরিয়ে বড়ো রাস্তাটি হাই-ওয়েতে পড়েছে। তার একদিকের সবগুলি বাড়ি বাকুদে উড়ে গেছে—প'ড়ে আছে ইট-সুরকির স্তূপ; যে-সব বাগিচা মাটির মধ্যে মিশে গেছে তাদের উপড়ে-তোলা, পুড়ে যাওয়া, টুকরো-হ'য়ে-যাওয়া গাছগুলো এই ধ্বংসস্তুপকে ঘিরে ধরেছে। অন্যদিকের পোড়ো জমিতে বোধহয় কখনোই বাড়ি তোলা হয়নি; আগুন আর ধ্বংসের হাত থেকে অনেকটাই রেহাই পেয়েছে তারা। কেননা ধ্বংস করার মতো কিছুই ছিলো না।

১ Bezprizornaya=অনাথ। নানা সময়ে, বিশেষত ১৯২২ থেকে ১৯২৫ পর্যন্ত, আবার ১৯৩২-এর সংঘাতের যুগে, রাশিয়ার অসংখ্য অনাথ শিশু দেখা গিয়েছিলো: তাদের মা-বাবারা হয় গৃহযুদ্ধে নিহত, নয়তো শত্রুনির্বাশ (purge) বা অন্যান্য কারণে অস্বস্থিত। দলে-দলে দেশ ভ'রে ঘুরে বেড়াতো এরা, শাসনব্যবস্থার পক্ষে এটি মন্দ সমস্যা হ'য়ে উঠেছিলো।

যে-দিকটায় এক সময়ে বাড়িঘর ছিলো সেখানে গৃহহীন অধিবাসীরা তখনো ঝিকিঝিকি জ্বলন্ত ছাইয়ের মধ্যে ধ্বংসবৃত্তের এখানে-ওখানে আতিপীতি ক'রে খুঁজে যা পাচ্ছে তাই বের ক'রে এক জায়গায় জড়ো ক'রে রাখছে। অন্যেরা চটপট তখনকার জন্য থাকবার মতো ট্রেক খুঁড়ছে, ঘাসের চাপড়া কেটে নিচ্ছে তার ছাউনি করবে ব'লে।

রাস্তার ওপারের পোড়ো জমি শাদা হ'য়ে আছে তাঁবুতে, ভিড় ক'রে আছে সাহায্যকারী বাহিনীর লরি আর খোড়ায় টানা গাড়ি—মূল ইউনিট থেকে বিচ্ছিন্ন-হওয়া ফীল্ড-অ্যান্ডুলেন্স, দপ্তর ও ডিপোর ছোটো-ছোটো শাখা—সব হারিয়ে গিয়ে, মিশে গিয়ে যেন নিজেদেরই খুঁজে নেবার চেষ্টা করছে। আর এখানেও সংযোজক বাহিনীর রোগা পলকা ছেলেগুলো—আমাশায় রক্তহীন মেটে রঙের মুখ তাদের, মাথায় ছাইরঙা টুপি, ভারি গুটোনো কোট পিঠে ফেলে, আবার পশ্চিম দিকে হাঁটতে শুরু করার আগে অল্প কিছু খেয়ে ঘুমিয়ে নিচ্ছে।

ধ'সে-পড়া, উড়ে-যাওয়া এই শহরের অর্ধেকটাই পুড়ছে তখনো, দূরে-দূরে বিস্ফোরণ হচ্ছে, যে-সব মাইন দেহিতে কাজ করে সেগুলো ফাটছে এখনও পর্যন্ত। জমি খুঁড়তে-খুঁড়তে লোকেরা মাঝে-মাঝেই চমকে উঠছে, পায়ের তলায় মাটি কৈপে উঠছে তাদের; পিঠ সোজা ক'রে কোদাল ভর দিয়ে দেখছে সেই দিকটাতে, যেখানে বিস্ফোরণ ঘটলো।

ধূসর, কালো আর ইটের মতো লাল হ'য়ে সেখানে উঠছে ধোয়া, আগুন আর কুচি-কুচি পাথরের মেঘ, প্রথমে ফোয়ারার মতো আকৃতি নিয়ে, তারপর অলসভাবে, যেন ভারি হ'য়ে জঞ্জাল উঠছে নিচে থেকে, তারপর পাথার মতো ছড়িয়ে প'ড়ে অবশেষে মাটির ওপরে প'ড়ে গেলো। এর পরে আবার লোকেরা মাটি খুঁড়তে লেগে যাচ্ছে।

এই ধ্বংসাবশেষের উদ্ভেদে দিকে পোড়ো জমিগুলোর মধ্যে একটা মাঠ দেখা যাচ্ছে, ঘোপের বেড়া ঘিরে আছে সেটিকে, মস্ত একটা ডালপালা-ছড়ানো গাছের ছায়া পড়েছে সেখানে। গাছের ছায়ায়, বেড়ার বেষ্টিত, মাঠটিকে মনে হচ্ছে যেন অবশিষ্ট পৃথিবী থেকে বিচ্ছিন্ন, শীতল, গোপন, আচ্ছাদিত, সাক্ষ্য একটি উঠোন।

এখানে টানিয়া, সেই ধোপানি, গর্ডন, ডুডোরড ও তার রেজিমেন্টের আরো কয়েকজন লোকের সঙ্গে সকাল থেকে অপেক্ষা করছে—তাকে নিতে যে-লরিটি পাঠানো হয়েছে, তার জন্য। মাঠের ওপর প'ড়ে আছে অনেকগুলো ঝুড়ি-ভর্তি কাচা কাপড়—টানিয়ার ওপর ভার সেগুলোর—একটার মাথায় আর-একটাকে চাপিয়ে দেওয়া হয়েছে। টানিয়া যথোচিত লক্ষ্য রাখছে তাদের ওপর, এক পা-ও নড়ছে না, অন্য সকলেও সেই স্থূপের দিকে নজর রাখছে—পাছে লরিতে যাবার সুযোগ হারায়, সেই ভয়ে।

বহুকণ অপেক্ষা করছে তারা, পাঁচ ঘণ্টা হ'য়ে গেলো। আর-কিছু করার নেই ব'লে তারা ধোপানির কথাই মন দিয়ে শুনছে; জীবনে অনেক দেখেছে সে, আর কথাও বলতে পারে অনর্গল। সে-মুহুর্তে সে বলেছিলো কী-ভাবে মেজর-জেনারেল জিভাগোর সঙ্গে দেখা হয়েছিলো তার।

‘সত্যিই দেখেছি আমি, গতকাল দেখেছি তাঁকে। আমাকে ওরা ধ'রে নিয়ে গেলো জেনারেলের কাছে, স্বয়ং মেজর-জেনারেল জিভাগো। উনি এখান দিয়ে যাচ্ছিলেন, ক্রিস্টিনার কথা জানতে চান তিনি, ওর বিষয়ে অনেক-কিছু জিজ্ঞেস করছিলেন। যারা ওকে স্বচক্ষে দেখেছে তাদের দেখতে চাইলেন উনি। সবাই তাই আমার কথা বললো ওঁকে। বললো, আমরা বন্ধু ছিলাম। উনি ওদের বললেন আমাকে ওঁর কাছে নিয়ে যেতে। তাই ওরা ধ'রে নিয়ে গেলো আমায়। ওঁকে দেখে তো কিছু ভয়-ভর লাগলো না আমার, আলাদা কিছু তো নন, আর পাঁচজনের মতো। চোখ দুটো চেরা, চুল কালো। যাক, আমি যা জানি তা বললাম ওঁকে। আমার সব কথা শুনে ধন্যবাদ জানালেন। “আর তুমি কে?” জিজ্ঞেস করলেন আমাকে। “কোথেকে আসছো?” আমি তো আর ওঁকে সব কথা বলতে পারি না। জীক করার মতো কী-ই বা আছে

আমার। আমি হলাম এক বেজুপ্রিজোনারী—জানেনই তো তার ব্যাপার কী-রকম, বাচ্চাদের এক জেল থেকে আর-এক জেলখানায় ঘুরে বেড়িয়েছি—কোথাও স্থিতি নেই। কিন্তু উনি আমাকে ছাড়বেন না। “বলো না। লজ্জা করো না, লজ্জার কী আছে?” প্রথমে দু’একটা কথা বললাম, লজ্জা করছিলো, তারপর আর-একটু বেশি বললাম, আর উনি সমানে এমনভাবে মাথা নাড়তে লাগলেন যেন বলছেন, “বলো, বলো,” আমারও তাই সাহস বেড়ে গেলো। আর এও সত্যি যে অনেক কথা বলবার আছে আমার। আপনাদের বললে হয়তো বিশ্বাস করবেন না, বলবেন, “গুল চালাচ্ছে।” ওর বেলাতেও তা-ই হ’লো। আমার কথা শেষ হ’লে উনি উঠে দাঁড়িয়ে ঘরটার এ-মাথা থেকে ও-মাথা পর্যন্ত পাইচারি করতে লাগলেন। “হা ঈশ্বর,” বললেন উনি। “কী অদ্ভুত ব্যাপার। শোনো, টানিয়া,” উনি বললেন, “এখন আমার সময় নেই, কিন্তু তোমাকে আবার ঝুঁজে বের করবো আমি, সে-বিষয়ে তুমি নিশ্চিত থেকে, তোমাকে আবার ডেকে পাঠাবো। কখনো ভাবিনি এমন কথা শুনবো। যেয়ো না, আরো কথা আছে,” বললেন উনি, “দু’একটা কথা পরিষ্কার ক’রে নিতে চাই। আর তারপর, কে জানে, আমি হয়তো তোমার কাকা হ’য়ে বসতে পারি, আর তুমি ব’নে যেতে পারো জেনারেলের ভাইঝি।” “তোমাকে কলেজে পড়াবো আমি,” উনি বললেন, “তোমাকে লেখাপড়া শেখাবো। যেখানে ইচ্ছে তোমার, সেখানেই পড়বে।” ঠাকুরের দিবা, ঠিক এই কথাই বললেন উনি। এমন হাসাতে আর খাপাতে পারেন।

সেই মুহূর্তে একটি লম্বা খালি গাড়ি মাঠে এসে ঢুকলো, গাড়িটার দুই ধার উচু—খড় নেবার জন্য যেমন গাড়ি ব্যবহৃত হয় পোল্যান্ডে আর পশ্চিম রাশিয়ায়। গাড়ির ঘোড়া দুটোকে চালিয়ে আসছে অশ্বযান-বাহিনীর একজন সৈন্য, আগেকার দিনে তাকে হয়তো ঘেসেড়ে গাড়োয়ান বলা হ’তো। ঘোড়ার রাশ টেনে আসন থেকে লাফিয়ে পড়লো সে, তারপর গাড়ি খুলতে শুরু করলো। টানিয়া আর দু’একজন সৈন্য বাদে অন্য সকলে তাকে ঘিরে ধরলো, মিনতি করতে লাগলো তাদের যার-যার গন্তব্যস্থানে পৌঁছিয়ে দেবার জন্য, সঙ্গে-সঙ্গে অবশ্য এও জানিয়ে দিলে যে তাতে তার লাভ বই লোকসান হবে না। কিন্তু গাড়োয়ান রাজি হ’লো না, বললো যে হুকুমের বাইরে গাড়ি চালাবার কোনো ক্ষমতাই তার নেই। ঘোড়া দুটোকে এগিয়ে নিয়ে গেলো সে, তাকে আর দেখা গেলো না।

টানিয়া, আর অন্য যারা এতক্ষণ মাটিতে ব’সে ছিলো, এবারে মাঠের মধ্যে ফেলে-রাখা শূন্য গাড়িটায় উঠে বসলো তারা। গাড়ি আসাতে, আর গাড়োয়ানের সঙ্গে বচসার ফলে যে-আলাপে বাধা পড়েছিলো, তা আবার শুরু হ’লো তাদের। “তুমি কী বলেছিলে জেনারেলকে?” জিজ্ঞেস করলো গর্ডন। ‘পারো তো আমাদেরও বলো না।’

তখন টানিয়া তার ভীষণ কাহিনী তাদের শোনালো।

‘হ্যাঁ, সত্যি অনেক-কিছু বলবার আছে আমার। সবাই বলে আমার নাকি বড়ো ঘরে জন্ম। আমি জানি না কথাটা কেউ আমাকে বলেছে কিনা, নাকি আমি নিজের মনেই ভেবে নিয়েছি। কিন্তু শুনেছি আমার মা ছিলেন রায়িসা কমারোভা, রুশ মন্ত্রী কমরেড কমারোভের স্ত্রী; কমরেড কমারোভ—যিনি শাদা মস্কোলিয়ায় লুকিয়ে ছিলেন। কিন্তু ইনি নাকি আসলে আমার বাবা নন। অবশ্য আমি লেখাপড়া শিখিনি, মা-বাবাকে দেখিনি কখনো, অনাথ আশ্রমে বড়ো হয়েছি। আমার কথা শুনে হয়তো হাসি পাবে আপনাদের, কিন্তু যা আমি জানি তা-ই তো আমি বলবো, আমার জায়গায় নিজেদের বসালে হয়তো বুঝতে পারবেন।

‘কুশিৎসি ছাড়িয়ে, কসাক-দেশের ওপারে, যেখানে সাইবেরিয়ার শেষ, সেই চীন সীমান্তের

কাছাকাছি এ-সব ঘটেছিলো। যখন আমরা, মানে লালেরা, শাদাদের বড়ো ঘাঁটির শহরে গিয়ে পৌঁছলাম, তখন ঐ মন্ত্রী কমারোভ, উনি আমার মা-কে একটা স্পেশাল ট্রেনে তুলে দিলেন—সারা সংসার চাপিয়ে দিলেন তাঁর ওপর—হুকুম দিলেন চ'লে যাবার। ভীষণ ভয় পেয়ে গিয়েছিলেন আমার মা, ঠুকে ছাড়া এক পা নড়ারও সাহস ছিলো না তাঁর।

‘কিন্তু আমার কথা উনি জানতেন না, কমারোভ জানতেন না আরকি। আমি যে আছি তাই জানেন না তিনি। একবার যখন অনেকদিনের জন্য ঠুকের ছাড়াছাড়ি হয়, তখন জন্মেছিলো আমি, মা ভয়ে ম'রে যাচ্ছিলেন পাছে কেউ কমারোভকে বলে দেয়। ছেলেপুলে ঘেন্না করে কমারোভ—চোখে দেখলে চীৎকার ক'রে মেঝেতে পা ঠোকে। নোংরা, বিচ্ছিরি, ঝামেলা সহ হয় না আমার—এই ব'লে চ্যাচাতেন উনি।

‘যাই হোক, যা বলছিলাম, লালেরা যখন শহরে ঢুকতে লাগলো মা তখন নার্নানয়া স্টেশনে লোক পাঠালো মাঝফাকে ডেকে আনতে—সিগনালওয়ালি মারফা। শহর থেকে তিন স্টেশন দূরে জায়গাটা। ব্যাপারটা বুঝিয়ে বলি আপনাদের। প্রথমে হ'লো নিজোভায়া—একেকবারে নিচের দিকে ঢালুতে। তারপর নার্নানয়া, একেকবারে পাহাড়ের মাথায়, আর তারপর পাহাড়ের মধ্যে স্যামসন-পথ। এখন বুঝতে পারছি মা কী ক'বে ঐ সিগনালওয়ালিকে চিনতেন। মনে হয় ঐ সিগনালওয়ালি মাঝফা, শহরে দুধ সজ্জি বেচতে আসতো। ইঁা, ঐ ভাবেই চেনাশুনে হয়েছিলো।

‘আমার মনে হয় কিছু-একটা আছে যা আমি জানি না। ওরা বোধ হয় মাকে ঠকিয়েছিলো সত্যি কথা বলেনি। ভগবান জানেন কী বলেছিলো আমার মাকে, বোধহয় বলেছিলো অল্প দিনের জন্য, মাত্র একদিন কি দু'দিনের জন্য, যতোদিন না গোলমাল মিটে সব ঠাণ্ডা হয়। জন্মের মতো যে আমাকে পরের বাড়িতে চ'লে যেতে হবে সে-কথা নিশ্চয়ই বলেনি। পরের বাড়িতে মানুষ হ'তে হবে আমাকে। মা কি আর আপন সন্তানকে ঐ ভাবে বিসর্জন দিতে পারতেন!

‘যাক, জানেনই তো বাচ্চাদের কেমন ক'রে ভোলানো হয়। “মাসিমার কাছে যাও তো মণি, মণ্ডা দেবে তোমাকে, ভালো মাসি, মাসিকে কি ভয় পেতে আছে!” পরে কেমন চোখের জলে ভেসে গিয়েছিলাম, সেই বাচ্চা বয়সে কী-রকম কষ্ট আমাকে কুরে-কুরে খেয়েছে—সে-সব কথা বলতে শুরু না-করাই ভালো। গলায় দড়ি দিতে ইচ্ছে করতো, সেই বাচ্চা বয়সে আমি যেন পাগল হ'য়ে যাচ্ছিলাম, সেই সময়ে ঐ অবস্থা ছিলো আমার। মারফা-মাসি বোধহয় আমাকে রাখার জন্য টাকা পেয়েছিলো, অনেক টাকা।

‘সিগনাল-খামের লাগোয়া খেত-খামার ওদের—একটা গোরু, একটা ঘোড়া, নানা জাতের মুরগি, তাছাড়া মস্ত সজ্জি-খেত—সেখানে যতো ইচ্ছে জমি পাওয়া যায়, কোনো খাজনাও লাগে না—আর রেল-লাইনের ধার ঘেঁষে একটা সরকারি বাড়ি। দেশ থেকে যখন ট্রেন আসে, তখন পাহাড়ে প্রায় উঠতেই পারে না, এতো খাড়াই সেখানটা, কিন্তু যখন আপনাদের দিকে থেকে, রাশিয়া থেকে আসে তখন এতো জোরে নামে যে ব্রেক কষতে হয়। হেমন্তকালে বন যখন পাংলা হ'য়ে আসে, তখন অনেক নিচে নিজোভায়া স্টেশনটিকে খালার মতো দেখা যায়।

‘মারফা-মাসির স্বামী ভাসিয়া-মেসোকেই আমি বাপি ডাকতাম—চাষার ঘরে ঐ রকম ডাকে, জানেন তো। ভালো মানুষ ছিলেন, দিব্যি হাসিখুশি, কিন্তু বড়ো বেশি বিশ্বাস করতেন অন্যদের—নেশা করলে তো কথাই নেই। তাঁর ইন্ডির খবর সব না জানতো এমন কেউ ছিলো না। চেনা-অচেনা যার সঙ্গেই দেখা হয় তার কাছেই প্রাণের সব কথা খুলে বলে সে।

‘কিন্তু ঐ সিগনালওয়ালিকে আমি কখনো মা ব'লে ডাকিনি। নিজের মাকে ভুলতে পারিনি ব'লেই, না কি অন্য কোনো কারণে তা জানি না; সে কিন্তু সত্যিই বড়ো সাংঘাতিক লোক ছিলো সত্যি সাংঘাতিক। তাই আমি ওকে মারফা-মাসি ব'লে ডাকতাম।

‘দিন কাটে, বছর কেটে যায়, কতো বছর কেটে গেলো তার হিসেব জানি না। ততোদিনে

ছুটে-ছুটে ট্রেনের নিশেন দেখাতে শিখেছি আমি, শিখেছি গোরু ঘরে আনতে, ঘোড়ার জোয়াল খুলে দিতে। মারফা-মাসি আমায় সুতো কাটতে শিখিয়েছে—আর ঘরের কাজ যে সবই করি তা না-বললেও চলে। ঝাঁটপাট করা, ঘর শুছোনো, অল্পস্বল্প রান্না—এ-সব আমার কাছে কিছুই না, সবই করি আমি। ও হ্যাঁ, বলতে ভুলে গিয়েছিলাম পেটিয়ার দেখাশোনার ভারও আমার ওপর। আমাদের পেটিয়ার পা দুটো শুকিয়ে গিয়েছিলো, তার বয়স তিন, কিন্তু একেবারেই হাঁটতে পারে না, আমিই তাকে কোলে-কাঁখে নিয়ে ব'য়ে বেড়াই। কতোদিন আগেকার কথা, কিন্তু এখনো আমার মনে পড়ে আমার মজবুত পা দুটোর দিকে মারফা-মাসি কেমন ট্যারা চোখে তাকাতো—আমার গা শিউরে ওঠে সে-কথা ভাবলে—যেন বলতে চায়, “আমার পেটিয়ার বদলে তোর পা দুটো শুকিয়ে গেলো না, আবাবিগি”—যেন আমিই ছেলেটাকে ডাইনি-মস্তুর দিয়েছি! ভাবতে পারেন যে পৃথিবীতে এমন হিংসুক আর অশিক্ষিত লোকও হয়?

‘কিন্তু এখন যা বলি শুনুন। পরে যা ঘটলো তার তুলনায় এ-সব কিছুই না। আপনারা অবাক হ'য়ে যাবেন।

‘নেপ-এর’ সময়ে এক হাজার রুবলের দাম হলো এক কোপেকের সমান। ভাসিয়া-মেসো নিজোভায়াতে গিয়ে একটা গোরু বিক্রি ক'রে দুই বস্তা বোঝাই টাকা পেলো।—কেরেস্কি বলা হ'তো—না, ভুল বলেছি—পাতিলেবু^১—এ টাকাকে তা-ই বলা হচ্ছে ততোদিনে। খুব মদ খেয়ে চুর হ'লো ভাসিয়া-মেসো, নাগর্নয়াতে সকলকে ব'লে বেড়াতে লাগলো সে কতো বড়োলোক হয়েছে।

‘মনে পড়ছে, সেটা ছিলো হেমন্তকাল, সেদিন খুব হাওয়া দিচ্ছে। বাড়ির ছাদ যেন ছিড়ে ফেলছে বাতাস, টাল সামলানো যাচ্ছে না, আর উল্টো দিকে হাওয়া বইছিলো ব'লে পাহাড়ের ওপর এঞ্জিন তোলা যাচ্ছে না। হঠাৎ আমি দেখলাম পাহাড়ের ওপর থেকে নেমে আসছে এক ভিখিরি বুড়ি, বাতাসে তার জামা টেনে ধরেছে, উড়িয়ে নিচ্ছে তার মাথার রুমাল।

‘হাঁটতে-হাঁটতে সে গোঙাচ্ছে আর পেট চেপে ধরছে মাঝে-মাঝে। তাকে ভেতরে নিয়ে যাবার জন্য কাকুতি করলো সে; আমরা তাকে বোধির ওপর শুইয়ে দিলাম। ‘ওঃ, পারি না,’ সে চ্যাঁচাতে লাগলো, “আর সইতে পারি না, আর পারি না, পেটে আমার আগুন জ্বলছে, মরণ ডাক দিয়েছে আমাকে। যীশুর দোহাই,” সে বললে, “আমাকে হাসপাতালে নিয়ে যাও তোমরা, যতো টাকা চাও দেখো।” তা বাপি তখন উডালয়কে গাড়িতে জুতে নিলো—ঘোড়াটার নাম উডালয়—বুড়িকে গাড়িতে তুলে পনেরো ভেস্ট^২ দূরে হাসপাতালে নিয়ে গেলো।

‘খানিকক্ষণ পরে আমরা শুতে গেছি, আমি আর মারফা-মাসি, এমন সময় বাইরে উডালয়ের ডাক আর উঠোনে গাড়ির শব্দ শুনতে পেলাম। বাপির ফেরার পক্ষে একটু শিগগির ব'লে মনে হ'লো। যাই হোক, মারফা-মাসি আলো জ্বাললো, জামা প'রে নিয়ে বাপি ধাক্কা দেবার আগেই দরজা খুলে দিলো।

‘দিলো বটে, কিন্তু দরজার বাইরে যে দাঁড়িয়েছিলো সে বাপি নয়, ভীষণ কালো, অচেনা এক মানুষ। “দেখাও,” তক্ষুনি কথা বললো লোকটা, “গোরু বেচে যা পেয়েছো সেই টাকা কোথায় দেখাও। তোমার বড়োটাকে বনের মধ্যে খুন করেছি আমি,” সে বললে, “কিন্তু তুমি মেয়েমানুষ, তোমাকে প্রাণে মারবো না, যদি টাকা কোথায় আছে তা ব'লে দাও। যদি না বলো তাহ'লে কী হবে তা তো বুঝতেই পারছো। যা হবে তোমার দোষেই হবে, মনে রেখো। দেরি করো না—সব্ব করার মতো সময় নেই আমার—শিগগির!”

১ NEP নতুন অর্থনৈতিক বিপ্লব:—অনুবাদের টীকা।

২ ১৯২১-২২ সালের চরম মুদ্রাস্ফীতির সময় দশ লক্ষ রুবলের মোটকে চন্দ্রিত বৃদ্ধিতে ‘পাতিলেবু’ বলা হ'তো।

৩ ‘verst’ (রুশ versta)=৩.৫০০ ফুট।—অনুবাদের টীকা।

‘হা ভগবান, সে কী অবস্থা আমাদের—কমরেড, ঐ অবস্থায় নিজেদের একবার বসিয়ে দেখুন। সর্বান্তে থরথর করে কাঁপছি আমরা, ভয়ে আধ-মরা হ’য়ে গেছি, একটা আওয়াজ বেরোয় না গলা দিয়ে—কী সব ভয়ংকর কাণ্ড! ভাসিয়া-মেসো খুন হয়েছে—লোকটা নিজেই বলছে যে কুড়ুল দিয়ে শেষ করেছে তাকে—সেই লোকটার সঙ্গেই এখন একা আছি আমরা—ডাকাত পড়েছে বাড়িতে—খুনে ডাকাত—হ্যাঁ, লোকটা যে খুনে তা তো দেখতেই পাচ্ছি।

‘আমার মনে হয় ঠিক তখনই মারফা-মাসি পাগল হ’য়ে গিয়েছিলো, স্বামীর শোকে কী-রকম কাতর, অথচ কিছুই বলতে পারছে না—তাইতেই বোধহয় পাগল হ’য়ে গেলো।

‘তা মারফা-মাসি প্রথম তো লোকটার পায়ে পড়লো। “দয়া করো আমাকে,” বলতে লাগলো সে “আমাকে মেরো না, আমি কিছুই জানি না, কোনো টাকার কথা আমি কখনো শুনিনি, কোন টাকার কথা তুমি বলছো তা আমি কিছুই বুঝতে পারছি না!” কিন্তু ও-কথায় ভোলবার পাত্র সে নয়, শয়তানটা কি অতোই বোকা! “ঠিক আছে,” মারফা মাসি বললে, “টাকাটা আছে ঘরের তলার ভাঁড়ারে। আমি ঝাঁপ খুলে দিচ্ছি।” কিন্তু লোকটা চালাকি ধ’রে ফেললো। “না, তুমি নিচে নামো, তুমি পথ চেনো, তুমি নিয়ে এসো। তুমি ভাঁড়ারেই নামো আর ছাদেই চড়ে তাতে আমার কিছু এসে যায় না, আমার টাকা পেলেই হ’লো। শুধু মনে রেখো, ফাঁকি দেবার চেষ্টা করেছে কি মরেছো, বোকা বনবার পান্ডর আমি নই।”

‘তখন মারফা-মাসি তাকে বললে: “হা ঈশ্বর, এ-রকম সন্দেহ তোমার কেন হচ্ছে জানি না। নিচে গিয়ে আমিই টাকা নিয়ে আসতাম—নিশ্চয়ই আনতাম—কিন্তু আমার পায়ে বাত, সিঁড়ি বেয়ে নামতে পারি না ঠিকমতো। আমি সিঁড়ির মাথায় দাঁড়িয়ে তোমার জন্য আলো ধরছি। ভেবো না, আমার মেয়েকেও আমি তোমার সঙ্গে নিচে পাঠাবো,” বললে মারফা-মাসি। “মেয়ে” মানে আমি।

‘শুনুন কমরেডরা, ও-কথা শুনে আমার অবস্থাটা যে কী হ’লো তা কি ভাবতে পারেন আপনারা? এই আমার শেষ, আমি ভাবলাম, চোখের সামনে সব অন্ধকার হ’য়ে গেলো, পায়ে ওপর আর দাঁড়িয়ে থাকতে পারছিলাম না যেন, মনে হচ্ছিলো প’ড়ে যাবো।

‘কিন্তু ঐ শয়তানটা, ওর নজর কিছুই এড়ায় না—একবার মাসির দিকে, একবার আমার দিকে তাকিয়ে বিকট ঝাঁক করে হাসলো—যেন বলতে চাচ্ছে, “সব বুঝি আমি, আমাকে ঠকাতে পারবে না।” ও বুঝে নিলো যে মারফা-মাসির পেটের সন্তান নই আমি, তার কাছে আমার দাম কানাকড়িও নয়—তাই লোকটা করলে কী—ছোঁ মেরে পেটিয়াকে এক হাতে ধ’রে অন্য হাতে ঝাঁপ খুললো ভাঁড়ারের। “আলো দেখাও আমাদের,” এই ব’লে সে নেমে গেলো নিচে—সিঁড়ি বেয়ে মাটির তলায় চ’লে গেলো পেটিয়াকে নিয়ে।

‘তার আগেই পাগল হ’য়ে গেছে মারফা-মাসি, কিছু বুঝতে পারছিলো না—একবারে বদ্ধ পাগল। ছোট্টা পেটিয়াকে নিয়ে লোকটা যেই নিচে নেমে গেলো অমনি দুম করে ঝাঁপ বন্ধ করে চাবি লাগিয়ে তার ওপর একটা ভারি ট্রাক টেনে আনতে লাগলো আর মাথা ঝেঁকে-ঝেঁকে আমাকে ডাকতে লাগলো ঐ বিষম ভারি ট্রাকটা ধরার জন্য! ঠিক জায়গামতো ট্রাকটা বসিয়ে তার ওপর চেপে বসে আহ্লাদে গ’লে যেতে লাগলো সে, একেবারে বদ্ধ পাগল। সেখানে ও বসতে-না-বসতেই ডাকাতটা চীৎকার করে মেঝের ওপর ধাক্কাতে শুরু করলো; কী বলছিলো বোঝা যাচ্ছিলো না, পুরু কাঠ ছিলো মেঝেতে, কিন্তু তার গলার আওয়াজে বোঝা যাচ্ছিলো যে তাকে বেরিয়ে আসতে না-দিলে সে পেটিয়াকে খুন করবে। আমাদের ভয় দেখাবার জন্য বুনো জানোয়ারের চাইতেও ভীষণ গলায় চীৎকার করছিলো লোকটা। “এবার তোমার পেটিয়াও গেলো,” লোকটা চ্যাচালো, কিন্তু মারফা-মাসি কিছুই বুঝতে পারছিলো না, হাসছিলো, আর চোখ টিপছিলো আমার দিকে চেয়ে: যেন বলতে চায়: “প্রাণের সুখে চ্যাচাক, আমি ট্রাকের

ওপর গ্যাট হ'য়ে ব'সে আছি. আর চাবিও আমার হাতেই।" আমি যা পারি করলাম, মাসির কানের কাছে চীৎকার ক'রে বললাম যে ভাঁড়ারের ঝাপ খুলে দিতেই হবে, পেটিয়াকে বাঁচানো চাই, ট্রাকের ওপর থেকে তাকে ঠেলে ফেলে দেবার চেষ্টা করলাম, কিন্তু পারলাম না, আমার চাইতে মাসির গায়ের জোর অনেক বেশি, আর কোনো কথাই সে কানে নিচ্ছে না।

‘এদিকে লোকটা তো ধাক্কার পর ধাক্কা দিয়ে চলেছে মেঝের ওপর, সময় কেটে যাচ্ছে, আর মারফা-মাসি সেখানেই ব'সে-ব'সে চোখ মটকাচ্ছে, কোনো আওয়াজই কানে যাচ্ছে না তার।

‘তা খানিকক্ষণ পরে—ঈশ্বর, হা ঈশ্বর, কী যে আমি না দেখেছি এ-জীবনে, কী না সহ্য করেছি—কিন্তু ও-রকম বিভীষিকা আর দেখবো না। যতোদিন বেঁচে আছি শুনতে পাবো পেটিয়ার সেই ছোট্টো গলা—ছোট্টো পেটিয়া মাটির তলায় কী তার আর্তনাদ, সেই নিষ্পাপ শিশুকে যমদূতটা দাঁতে কামড়ে-কামড়ে মেরে ফেললো।

‘এখন আমি কী করি, এখন আমি কী করি এই পাগলি বুড়ি আর খুনেটাকে নিয়ে—কী করি আমি! এদিকে সময় কেটে যাচ্ছে, একথা ভাবার সঙ্গে-সঙ্গেই বাইরে উডালয়ের ডাক শুনলাম; উঠানে অতোক্ক্ষণ গাড়িতে জোতা অবস্থায় দাঁড়িয়ে ছিলো সে। হ্যাঁ, এই তো ঠিক হয়েছে। উডালয় ডেকে-ডেকে যেন এই কথা বলতে চাইছিলো: “চলো আমরা তাড়াতাড়ি পালিয়ে যাই টানিয়া, লোকজন ডেকে আনি।” জানলার বাইরে তাকিয়ে দেখলাম ভোর হ'য়ে আসছে। “ঠিক আছে,” আমি ভাবলাম, “তুমি কী ভালো, উডালয়, এই কথাটা মনে করিয়ে দিলে আমাকে। তা-ই হোক। চলো যাই আমরা।” কিন্তু একথা ভাবতে-না-ভাবতে আবার ডাক শুনলাম যেন বনের মধ্যে থেকে: দাঁড়াও, তাড়াহুড়ো করো না, টানিয়া, আমরা অন্য উপায়ে কাজ হাসিল করবো।” আবার বুঝতে পারলাম বনে আমি একা নই। নিচে একটা এঞ্জিনের বাঁশি বাজলো, ঠিক আমাদের বাড়ির উঠানে মোরগের ডাকের মতো। বাঁশির শব্দে এঞ্জিনটাকে চিনতে পারলাম, নাগর্নায়ার কাছে এসে দাঁড়ায় একটু—লোকেরা ওর নাম দিয়েছে মহাজন—পাহাড়ের ওপর দিয়ে মালগাড়িগুলোকে টেনে তোলে। যে-ট্রেনটা যাচ্ছে তাতে মালগাড়ি যাত্রি-গাড়ি দুই আছে, রোজ রাতে ও-রকম সময়ে যায় ওটা। আমার এই চেনা এঞ্জিনের আওয়াজ শুনলাম আমি; নিচে থেকে ডাকছে আমাকে। শুনতে-শুনতে বৃকের ভেতরটা লাফিয়ে উঠলো। মারফা-মাসির মতো আমারও কি মাথা খরাপ হ'য়ে গেলো, নয়তো সব পশু আর বোবা এঞ্জিন সোজা রুশিতে আমার সঙ্গে কথা বলছে কেমন ক'রে?

‘যাক, ভেবে লাভ নেই, ট্রেন এগিয়ে আসছে, ভাববার আর সময় কোথায়? লঠনটা আঁকড়ে ধ'রে—তখনো ভালো ক'রে আলো ফোটেনি—পাগলের মতো ছুটলাম রেল-লাইনের দিকে, লাইনের ঠিক মধ্যখানে দাঁড়িয়ে ওপরে-নিচে আলো দোলাতে লাগলাম।

‘আর বেশি কী বলবার আছে? ট্রেন থামলাম; বাতাসের জন্য আন্তে-আন্তে যাচ্ছিলো ট্রেনটা, ভগবানকে ধন্যবাদ সেজন্য, পায়ে হেঁটে চলছিলো বলা যায়। থামলাম, ড্রাইভার আমাকে চিনতো, তার কামরার জানলা দিয়ে গলা বাড়িয়ে কী যেন বললো; বাতাসের জন্য শুনতে পেলাম না। চেষ্টা করে বললাম যে সিগনাল-ঘরে ডাকাত পড়েছে, খুন হয়েছে, লুট হয়েছে, বাড়িতে ডাকাত, সাহায্য চাই কমরেড খুড়ো, একুনি সাহায্য চাই। আর আমি যতোক্ক্ষণে এ-সব বলছি ততোক্ক্ষণে লাল ফৌজের দল ট্রেন থেকে লাফিয়ে পড়েছে একের পর এক—ওটা ছিলো পন্টনের ট্রেন—হ্যাঁ তা-ই—একে-একে সব লাফিয়ে পড়ল লাইনের ওপর। “কী হয়েছে?” জিজ্ঞেস করলো ওরা; নিশ্চিতি রাতে বনের মধ্যে খাড়া পাহাড়ের গায়ে হঠাৎ গাড়ি দাঁড়ালোই বা কেন আর থেমেই বা আছে কেন, কিছুই তারা বুঝতে পারছিলো না। সব ঘটনা শুনে ভাঁড়ারের ভেতর থেকে ডাকাতটাকে ওরা টেনে বের করলে; পেটিয়ার চাইতেও সুরু গলায় তখন টি-টি করছে লোকটা: ‘দয়া করো, দোহাই তোমাদের,’ বলছিলো সে, “আমাকে প্রাণে মেরো না ভাই সব, আর কখনো এমন কাজ করবো না!” কিন্তু আইনের

দায়িত্বটা ওরা নিজের হাতেই নিয়ে নিলে। টানতে-টানতে লোকটাকে লাইনের ওপর এনে ফেললো, হাত-পাগুলো ক'ষে বেঁধে নিলো লাইনের সঙ্গে, তারপর ট্রেনটাকে তার ওপর দিয়ে চালিয়ে নিয়ে গেলো।

‘জামা-কাপড় আনার জন্যও আর বাড়ি ফিরলাম না আমি, এমন ভয় পেয়েছিলাম। আমাকে ট্রেনে ক’রে নিয়ে যেতে বললাম ওদের, ওরা তুলে নিলো আমাকে, ব্যস, চললাম। এর পরে আমি শুধু ঘুরে বেড়িয়েছি বেঙ্গপ্রিজেনিদের সঙ্গে—রাশিয়ার অর্ধেক ভ’রে, আর অন্যান্য দেশেও—কোথায় না গিয়েছি জানি না। বাড়িয়ে বলছি না একটুও। ছেলেবেলায় সেই রাশিরাশি দুঃখের পর কী সুখ, কী মুক্তিই না পেলাম! তবে এও বলবো যে সেখানেও অনেক পাপ দেখেছি, দুঃখও কম পাইনি। কিন্তু সে-সব পরের কথা, অন্য এক সময়ে বলবো।...যে রাস্তার কথা বলছিলাম—একজন রেল-কর্মচারী ট্রেন থেকে নেমে ঐ বাড়িটাতে গেলেন সরকারি সম্পত্তি বুঝে নেবার জন্য, আর মারফা-মাসির কী ব্যবস্থা করা যায়, তাও তাঁকে ঠিক ক’রে দিতে হবে। কেউ-কেউ বলে মাসি আর ভালো হয়নি, পাগলা-গারদেই মারা গেছে, আবার এও শুনেছি যে সে সেরে উঠে গারদ থেকে ছাড়া পেয়েছে।’

টানিয়ার গল্প শোনার পর অনেকক্ষণ গর্জন আর ডুডোরভ নিঃশব্দে গাছের তলায় পাইচারি করলে। তারপর লবি এলো। ঘড়ঘড় করতে-করতে রাস্তা থেকে মোড়ে গিয়ে মাঠের মধ্যে দাডালো লরিটা, কাচা কাপড়ের বস্তাগুলো তুলে দেওয়া হ’লো। গর্জন বললে:

‘ও কে তা বুঝলে তো?—টানিয়া খোপানির কথা বলছি।’

‘হ্যাঁ, বুঝছি বইকি।’

‘ইয়েভগ্রাফ ওর দেখাশোনা করবে।’ একটু চুপ করে থেকে আবার বললে, ‘ইতিহাসে এ-রকম ঘটনার আরো অনেক নজির আছে। চিস্তার স্তরে যা মহৎ, সেই আদর্শ বাস্তবে নেমেই স্থূল হয়ে যায়। দ্যাখো না, গ্রীস জন্ম দিয়েছিলো বোমকে, আর রুশীয় আলোকপ্রাপ্তির সম্ভান হ’লো রুশ বিপ্লব। ব্লকের সেই লাইনটা মনে আছে?—“আমরা, যারা রাশিয়ার ভীষণ যুগের সম্ভান”—যুগের তফাৎটা এই একটি কথাতেই বোঝা যায়। ব্লকের সময়ে, যখন উনি একথা বলেছিলেন, তখন এটা ছিলো রূপক, উৎপ্রেক্ষা। সম্ভান মানে সম্ভান নয়, মনীষীদের বংশধর তারা; ভীষণ মানে ভীষণ নয়, দিব্যদর্শন। সেই রূপক এখন আক্ষরিক অর্থে সত্য, সম্ভানেরা বাস্তব সম্ভান, আর ভীষণ মানে সত্যিই বিভীষিকা। তফাৎটা এখানেই।’

৫

এর পরে পাঁচ অথবা দশ বছর কেটে গেছে। গ্রীষ্মের এক শান্ত সন্ধ্যায় আবার মিলিত হয়েছে গর্জন আর ডুডোরভ; মস্ত উচু এক জানলার ধারে ব’সে আছে তারা, নিচে ছড়িয়ে আছে বিশাল শহর সন্ধ্যায় অস্পষ্ট হ’য়ে। ইউরির লেখা একটি বইয়ের পাতা ওন্টাচ্ছে তারা, ইয়েভগ্রাফ সেটি সংকলন করেছে। অনেকবার পড়েছে, বইটা প্রায় মুখস্থ তাদের। পড়ার ফাঁকে-ফাঁকে মাঝে-মাঝে ভাবনার বিনিময় করছে বা ডুবে যাচ্ছে নিজ-নিজ চিন্তায়। অক্ষকার ক’রে এলো, ছাপার অক্ষর আর পড়া যায় না, আলো জ্বালতে হ’লো।

ঐ নিচে মস্কো, আদিগন্ত ছড়ানো—মস্কো, গ্রন্থকারের মাতৃভূমি, তার জীবনে যা কিছু ঘটেছিলো তার অর্ধাংশ—সেই মস্কো এখন তাদের দু’জনের কাছে অন্য এক রূপে দেখা দিলো। তারা যা পড়ছিলো তার ঘটনাস্থল নয় শুধু, মস্কো নিজেই এক দীর্ঘ কাহিনীর নায়িকা, এই সন্ধ্যায়, বই হাতে নিয়ে, তারা যেন সেই কাহিনীর অঙ্কে পৌঁছলো।

যুদ্ধের শেষে যে-আলোক ও মুক্তি আসন্ন ব’লে আশা করা গিয়েছিলো, জয়লাভের পরে তা

আসেনি, কিন্তু অন্ততপক্ষে যুদ্ধোত্তর বছরগুলিতে স্বাধীনতার প্রতিশ্রুতি যেন ছড়িয়ে আছে বাতাসে—এ ছাড়া যুদ্ধের কোনো ঐতিহাসিক অর্থ আর নেই।

জানলার ধারে বসে এই দুই প্রৌঢ় বন্ধুর মনে হ'তে লাগলো যে স্বাধীনতার আত্মা যেন স্পর্শ ক'রে যাচ্ছে তাদের, নিচে, রাস্তায়, তা যেন প্রায় স্পৃশ্য হ'য়ে উঠেছে, আর তারা নিজেরাই প্রবেশ ক'রে যাচ্ছে ভবিষ্যতের মধ্যে, তার অংশ হ'য়ে যাচ্ছে। মনের মধ্যে একটি শান্ত আনন্দ নামলো তাদের, তার লক্ষ্য এই পুণ্যময় নগর, এই সমগ্র দেশ, এই কাহিনীতে যারা অংশ নিয়েছিলো তাদের মধ্যে এখনো যারা বেঁচে আছে, তারা, তাদের সম্মানরাও—সকলেই এই আনন্দের লক্ষ্য। আনন্দের সেই অরব সংগীত তাদের পূর্ণ ক'রে তুলে দিকে-দিকে ব্যাপ্ত হ'য়ে পড়লো। তারা এখন যা অনুভব করছে তাদের হাতের বইটির তা অজানা নেই, তার সর্মথন ও সম্মতি আছে সেখানে—এই রকম মনে হ'লো তাদের।

ଝିଭାଗୋର କବିତା

ଅନୁବାଦ : ବୁଦ୍ଧଦେବ ବସୁ

হ্যামলেট

ক্ষান্ত কলরোল। আমি বেরিয়ে আসি রঙ্গমঞ্চে।
দরজার খুঁটিতে হেলান দিয়ে
দূর প্রতিধ্বনি থেকে আন্দাজ ক'রে নিতে চাই
আমার আয়ুষ্কালের আসন্ন ঘটনাগুলিকে

হাজার দূরবীনের দৃষ্টির ধারে-ধারে
আমাকে তাক ক'রে আছে রাতের অন্ধকার।
আব্বা, পিতা, যদি সম্ভব হয়,
আমার এই পাত্র হোক হস্তান্তরিত।

তোমার কঠিন পণ ভালোবাসি আমি,
আমার ভূমিকার অভিনয়ে আছি সম্মত।
কিন্তু এবার এক ভিন্ন পালা শুরু হ'লো;
এই একবারের মতো দাও আমাকে নিষ্কৃতি।

কিন্তু অঙ্কগুলির পারস্পর্য অনড়
আর পথের শেষ আমাকে মুক্তি দেবে না:
নিঃসঙ্গ আমি; সব ডুবে গেলো ধর্মাক্ষের শঠতায়।
মাঠ পেরোনোর মতো সহজ নয় বেঁচে থাকা।^১

মার্চ

রৌদ্রে ঘর্মাক্ত পৃথিবী,
বনের খাদ উন্মাদ প্রাণে ফেটে পড়ে,
বসন্ত—ঐ সোমন্ত গয়লানি—
তার দুই হাতে ফেনিয়ে ওঠে কাজ।

রোগা নীল শিরার মতো ছোটো-ছোটো ধারায়
তুষার যাচ্ছে ক্ষ'য়ে,
এদিকে গোয়াল-ঘরে বাড়ন্ত প্রাণ ধুইয়ে ওঠে,
শাবলের দাঁত স্বাস্থ্যে আরো ধারালো।

এই সব রাত, এই সব রাত্রি আর দিন:
দুপুরবেলা জানালায় বৃষ্টির বাজনা,
ছাদে বরফ-গলার হালকা টুপটাপ,
নির্ঘুম ঝর্ণাগুলির বকুনি;

সব কিছু উন্মুক্ত—আস্তাবল, গোয়াল।
 পায়রাগুলো ছোলা খুঁটছে বরফে।
 এই যে টাটকা হাওয়ার গন্ধমাখা গোবর-
 সে-ই অপরাধী, সেই প্রাণদাতা।

পুণ্য সপ্তাহে

এখনো রাত, অন্ধকার নিবিড়,
 পৃথিবীর সবেমাত্র সূচনা হ'লো :
 আকাশে তাই নক্ষত্র অফুরন্ত,
 প্রতিটি তারা দিনের মতো ভাস্বর,
 আর পৃথিবী—মনে হয়—পারতো যদি
 ঈস্টার ভ'রে ঘুমিয়ে-ঘুমিয়ে শুনতো
 স্তোত্রপাঠের গুঞ্জন।

এখনো রাত, অন্ধকার নিবিড়,
 পৃথিবীর সবেমাত্র সূচনা হ'লো;
 দ্যাখে—ঐ পার্ক, মোড় থেকে চৌরাস্তা পর্যন্ত
 উষ্ণতা, উষা,
 সব যেন হাজার বছর দূরে এখনো।

একেবারে নগ্ন এখনো পৃথিবী,
 কোনো আবরণ নেই রাত্রে,
 শুধু, স্তোত্রপাঠের প্রত্যুত্তরে
 ঘণ্টা বাজিয়ে চলেছে অবিরাম।

নদীর পাড় বেয়ে ঝ'রে-ঝ'রে গড়ে জল,
 ফেনিয়ে তোলে ঘূর্ণিগুলোকে
 শুচি-বৃহস্পতিবার^১ থেকে
 পুণ্য-শনিবার পর্যন্ত।

অরণ্যের বসন হ'লো ছিন্ন;
 আরতির সময় ভক্তদের মতো,
 ভিড় ক'রে দেবদারু আছে দাঁড়িয়ে
 খুঁটের যাতনাভোগের^২ এই ঋতুতে।

১ Maundy Thursday. পুণ্য সপ্তাহের অষ্টম তৃতীয়া বৃহস্পতিবার। — অনুবাদকের টীকা।

২ যীশুর ক্রশধারণকে তাঁর 'passion' বা 'যাতনাভোগ' বলা হয়। এক সপ্তাহের তিনি ক্রশবিদ্ধ হন পরবর্তী সোমবারে তাঁর পুনরুত্থান ঘটে। বাৎসরিক ঈস্টার-পর্বের এই ঘটনার স্মারক বলেই সেই সপ্তাহটি 'পুণ্য'। — অনুবাদকের টীকা।

এদিকে শহরে
জনসভার মতো দল বেঁধে-বেঁধে
নগ্ন সব গাছ
গির্জের রেলিঙের ফাঁক দিয়ে

তাকিয়ে আছে সভয়ে। কেন ভয়?
বেড়া ভেঙে লাফিয়ে ওঠে বাগান,
পৃথিবীর ভিৎ উঠলো ট'লে :
ভগবানকে কবর দেয়া হচ্ছে।

ওরা দেখতে পায় সিংহদুয়ারে^১ আলো,
কালো কাফুন, সারি-সারি মোমবাতি,
আর অনেক মুখ, কান্নায় কলঙ্কিত :
হঠাৎ সেই মিছিল
মৃতের আবরণ বহন ক'রে এগিয়ে আসে,
দুটো বাঁচ গাছকে
পথ ছেড়ে স'রে দাঁড়াতে হ'লো।

গির্জের প্রাঙ্গণ প্রদক্ষিণ ক'রে
মিছিল ফিরে যায় শানের ধার দিয়ে-দিয়ে;
রাস্তা থেকে বারান্দায় নিয়ে আসে
বসন্ত, বাসন্তী কথাবার্তা,
আর সেই হাওয়া—যাতে খৃষ্টপ্রসাদের^২ স্বাদ লেগে আছে,
আর কাঠকয়লার বাসন্তী আত্মাণ।

আর বারান্দায় জড়ো-হওয়া খঞ্জদের দিকে
মার্চ দেয় ছড়িয়ে তার তুবার,
যেন কেউ সিন্দুকটাকে বের ক'রে এনে
খুলে; বিলিয়ে দিচ্ছে সব—
একেবারে শেষ টুকরোটি সুদ্ধ।

ভোর পর্যন্ত গান থামে না।
বুক ভ'রে কৈদে নেবার পর
স্তোত্রপাঠ, শিষ্যচরিত
আরো মৃদু হ'য়ে নেমে আসে
শূন্য, আলো-জ্বলা রাস্তায়।

১ রুশীয় গির্জাতে বেলীর অংশকে পৃথক ক'রে দিয়ে একটি অস্ত্রশাল থাকে, তার দ্বারকে সিংহদ্বার বলা হয়।

২ খৃষ্টপ্রসাদ : communion বা eucharist। এই অনুষ্ঠানে পরিবেশিত ক্রটি ও সুরা খুট্টের মাংসে ও রক্তে কপাত্তরিত হয়
য'সে ভক্তেরা বিশ্বাস ক'রে থাকেন।—অনুবাদের টীকা।

কিন্তু মাঝরাতে মানুষের আর সাড়া নেই, পশুরাও নিস্তব্ধ।
 কেননা বসন্তের রব তারা শুনেছে—
 ঋতুবদলের লগ্ন আসামাত্র
 পুনরুত্থানের যন্ত্রণার মধ্য দিয়ে
 উৎপাটিত হবে মৃত্যু।

শাদা রাত্রি

দেখছি দূর অতীত
 পিটার্সবার্গে নদীর ধারে একটি বাড়ি।
 স্টেপির এক তালুকদারের কন্যা
 তোমাকে আসতে হ'লো কুর্স্ক থেকে ছাত্রী হ'তে।

সুন্দরী ছিলে, যুবকদের প্রিয়
 সেই শাদা রাত্রি ভ'রে আমরা দু-জন
 ব'সে ছিলাম তোমার জানলার পাটাতনে
 ঝাইক্রেপারের চুড়ো থেকে তাকিয়ে-তাকিয়ে।

গ্যাসের প্রজাপতির মতো রাস্তার বাতিগুলো
 উষায় স্পৃষ্ট, কেঁপে উঠলো।
 ঐ ঘুমন্ত দূরেব মতো মৃদু
 আমার কথা, তোমাকে।

আর আমরা, ভীকু নির্ভায়,
 বাঁধা ছিলাম এক রহস্যে,
 তীরহীন নেভা ছাড়িয়ে বিস্তীর্ণ
 পিটার্সবার্গ শহরটার মতো।

বাইরে, বহু দূরে, ঘন অরণ্যে,
 বসন্তের সেই শাদা রাত্রিটিতে
 নাইটিঙ্গেলরা পূর্ণ ক'রে দিলো কানন
 তাদের বন্দনার বজ্রনাদে।

পাগল তান গড়িয়ে চলে অবিরাম,
 ছোটো, নগণ্য সেই পাখির কণ্ঠ
 জাগিয়ে দিলে পুলকের চঞ্চলতা
 মন্ত্রমুগ্ধ অরণ্যের গভীরে।

শুড়ি মেরে সেখানে এলো রাত্রি,
খোলা-পায়ের বাউগুলের মতো জড়িয়ে ধরলো বেড়াগুলোকে,
তার পিছনে, জানলার পাটাতন থেকে,
ঝুলে রইলো ধোয়ার মতো আমাদের কথাবার্তা।

প্রতিধ্বনির নাগালের মধ্যে
বেড়া-দেয়া বাগানে
আপেলের ডাল, চেরিগাছের ডাল
সাজ প'রে নিলো শুভ্র মঞ্জরী।

আর প্রেতের মতো শাদা, গাছগুলি
ভিড় ক'রে রইলো রাস্তায়
যেন হাত নেড়ে বিদায় দিচ্ছে
সেই শাদা রাত্রিকে, যে বড্ড বেশি দেখে ফেলেছিলো।

বসন্তের বন্যা

বসন্তের বরফ-গলা প্লাবিতপথ অরণ্যের
মধ্য দিয়ে ক্লাস্ত এক ঘোড়সওয়ার
উরালে কোন বিজন চষা খেতের দিকে চলছে—
অস্তুরাগের আগুন তখন মরন্ত।

অধীর ঘোড়া লাগামে করে দংশন;
পিছনে তার ঝর্ণাগুলো অনেক নালায় ছড়িয়ে গিয়ে
কলস্বরে ফেনিয়ে তোলে
অশ্বখুরের প্রতিধ্বনি।

কিন্তু যখন অম্বারোহী লাগাম ছেড়ে
মন্দগতি,
বসন্তের বন্যাধারা গড়িয়ে চলে
বজ্রনাদে।

উঠলো হেসে কে যেন, ঐ কান্না কার?
পাষাণ-তলে পাষাণ হ'লো চূর্ণ।
কম্প তুলে, ঘূর্ণিজলে এলিয়ে পড়ে
ছিন্নমূল বৃক্ষ।

অস্তুরাগের আগুন-জ্বালায়
ডালেপালায় কয়লা-রঙা দিগন্তরে
উঠছে বেজে পাগল নাইটিঙ্গেলের
কণ্ঠ, যেন উচ্চকিত ঘণ্টা।

ঐ যেখানে অশ্রুমতী লতা
এলিয়ে বৈধব্য-বাস খাদের ধারে নুয়ে পড়ে,
সেখানে তার কণ্ঠে ফোটে সাতটি বাঁশি
গল্পে যেমন ডাকাত-নাইটিঙ্গেলের^১।

বলাৎকার? তবে কি দূরদৃষ্ট কোনো,
দুঃখ, জ্বর আসন্ন?
অরণ্যের ঝোপের ফাঁকে তীক্ষ্ণ এই ছররা-গোলা
ছুটছে কাকে হানতে, কেউ জানবে না?

আসামিদের গুপ্ত বাসার বিবর থেকে বেরিয়ে এসে
অরণ্যের দেবতা ঐ গানের পাখি
দিক না দেখা কৃষক-সেনার^২ পায়ে-চলা, ঘোড়ায়-চড়া
সাত্ত্বীদলের মুখোমুখি।

আকাশ, মাঠ, ধরিত্রী ও অরণ্য
স্পৃষ্ট এই যাতনা, সুখ, বেদনাময় উন্মাদনায়;
বিরল ঐ শব্দ তারই সম্মিপাত—
আনন্দ, আর বেদনাময় উন্মাদনা।

জবাবদিহি

যেমন একদিন অজ্ঞতভাবে বাধা পেয়েছিলো
তেমনি অকারণে ফিরে এলো জীবন।
আমি আছি সেই পুরোনো চালের রাস্তাতেই,
যেমন ছিলুম সেই গ্রীষ্মের দিনে, সেই মুহূর্তে।

একই লোকেরা, একই দুশ্চিন্তা।
সেই যেদিন মরণসঙ্ক্যা ব্যস্ত হ'য়ে
সূর্যাস্তকে পেরেক ঠুকে খুলিয়ে দিলে পার্কের^৩ দেয়ালে
তারপর থেকে সূর্যাস্তের তাপও তো জুড়োলো না।

১ কলীয়ায় রূপকথাব প্রতি উল্লেখ।

২ কলীয়ায় গৃহযুদ্ধকালীন প্যাটিজান-বাহিনীর কথা বলা হচ্ছে। তাদের মধ্যে অধিকাংশ ছিলো চাষি; বনে-জঙ্গলে লুকিয়ে যুদ্ধ চালাতো তারা।—অনুবাদের টীকা।

৩ Man'ege Square - বিপ্লবকালে খণ্ডযুদ্ধের ঘটনাস্থল।

শস্তা জোরা-কাটা সুতির কম্পাড়ে
মেয়েরা এখনো জুতো ঝইয়ে ফ্যালে রাখে,
চিলেকোঠায়, লোহার ছাত্তের উপর
ক্রুশবিদ্ধ হয় ভেমনি।

এখানে একজন ক্রান্ত পা ফ্যালে
টোকাঠে, বাইরে;
আসে সিঁড়ি বেয়ে উঠে আসে
তয়খানা থেকে, উঠোন পেরিয়ে।

আবার আমি ছুতোনাতা তৈরি রাখি,
আবার উদাসীন হ'য়ে যাই সব-কিছুতে।
আরো একবার আমাদের প্রতিবেশিনী
রাস্তায় ঘুরে, একা থাকতে দেয় আমাদের।

কৈদো না, ফোলা ঠোট দুটি উন্টিয়ে
গুটিয়ে নিয়ো না ভাঁজ ফেলে;
জানো না, বসন্তের জ্বর জন্ম দিয়েছে এই শুষ্কতাকে,
তুমি কাঁদলে তা ফেটে যাবে।

হাত সরিয়ে নাও আমার বুক থেকে।
আমরা যে অতিবৈদ্যুতিক তার।
সাবধান, নয়তো আচমক।
আবার দু-জনে জড়িয়ে যাবো একসঙ্গে।

কাটবে বছরের পর বছর, তুমি বিয়ে করবে।
ভুলে যাবে এই অস্থির অবস্থা।
নারী হওয়া মস্ত বড়ো ব্যাপার,
অন্যদের পাগল করে দেবার নামই বীরত্ব।

ভার আমি—আমার জন্য রইলো
প্রজ্ঞা, এক আজীবন সেবকের ভক্তি,
যার লক্ষ্য সেই মহাবিশ্বয়, নারীর হাত দু-খানি,
তার পিঠ, কাঁধ, গ্রীবা।

এই রাত্রি আমাকে ঐটে দিক
যতো না দুঃখের বলয়ের পর বলয়ে,
উল্টো দিকের টান আরো জোরালো
ভেঙে বেরোবার ইচ্ছেটাই আসল।

শহরে গ্রীষ্ম

আধো গলায় কথাবার্তা।
সম্পূর্ণ চুলের গুচ্ছটি
ঘাড়ের উপর থেকে তুলে নেয়া হ'লো
ক্ষিপ্ত ভঙ্গির চমকে!

ভারি চিরুনির তলা থেকে
এক হেলমেট-পরা নারী সতর্ক চোখে তাকায়,
বিনুনি-করা চুলের বোঝা সুদৃঢ়
মাথাটি তার পিছনে হেলানো।

বাইরে, তপ্ত রাত
ঝড়ের দেয় সংকেত,
রাস্তায় ছড়িয়ে পড়ে লোকেরা
ব্রহ্ম পায়ে বাড়ির দিকে।

মেঘের গুরুগুরু ডাক
ছোটো, প্রতিধ্বনিতে তীক্ষ্ণ;
জনলার পর্দাটাকে
দুলিয়ে দেয় হাওয়া।

শব্দ নেই,
গুমোট।
আকাশটাকে তন্ময় ক'রে ফেরে
বিদ্যুতের আঙুল।

আর, যখন উষায় ভবপূব হ'য়ে
উত্তপ্ত সকাল
রাত্রির বর্ষণের পর
রাস্তার খোদলের জল নিয়েছে শুকিয়ে,

তখন, আদ্যিকালের সুগন্ধি,
ফুলন্ত লেবুগাছগুলো
ভুকুটি করে
রাত্রে তাদের ঘুম হয়নি ব'লে।

হাওয়া

এই আমার অবসান, কিন্তু তোমাকে আরো বাঁচতে হবে।
 হাওয়া, কান্নায় আর নালিশে নিরস্তর
 কাঁপায় বাড়ি, দুলিয়ে দেয় অরণ্য—
 প্রত্যেকটা পাইনগাছকে আলাদা ক'রে নয়,
 সব গাছ একসঙ্গে
 ঐ সম্পূর্ণ সীমাহীন সুদূর সুদূর দুলিয়ে দেয়
 যেন সারি-সারি পালের জাহাজ
 উপসাগরের তূফান পেরিয়ে নোঙর ফেললো বন্দরে।
 কেন কাঁপায়? লক্ষ্যহীন আক্রোশে?
 না কি কোনো ক্ষতি করার জন্য?
 না—ও যে নিজেই সম্ভ্রান্ত, তাই ঝুঁজে বেড়াচ্ছে
 তোমার জন্য এক ঘুম-পাড়ানি গান।

নেশা

উইলো গাছ, আইভিলতায় ঘেরা,
 ঝড়ের দিনে লুকিয়েছি তার তলায়,
 এক চাদরেই দু-জনে রই ঢাকা।
 আমার বাহুবন্ধে বাঁধা তুমি।

ভুল হ'লো যে। ঝোপের গাছগুলো
 আইভিতে নয়, কড়া নেশায় ঘেরা।
 তাহ'লে, বেশ, চাদরটাকে টেনে
 নাও মাটিতে পেতে।

ইণ্ডিয়ান সামার

ক্যান্সিসের মতো মোটা হ'য়ে উঠলো কালো আঙুরের পল্লব।
 বাড়ির মধ্যে হাসি, কাচের রিনিঠিনি আওয়াজ।
 কুটনো কুটছে ওরা, মেশাচ্ছে ঝাল, তৈরি করছে আচার,
 লবঙ্গ তোলা হচ্ছে বৈয়মে।

অরণ্যের খুনসুটি এই সব আওয়াজ দিচ্ছে ছড়িয়ে,
 গড়িয়ে চলে ঝাড়াই বেয়ে আস্তে—
 ক্যাম্পে জ্বলা আগুনের মতো সূর্য
 হেজেলের ঝোপগুলোকে ঝলসে দিয়েছে সেখানে।

পথ সেখানে খাদের দিকে নেমে গেছে;
কষ্ট হয় বিশ্বস্ত গাছগুলোর জন্য,
আর হেমন্ত—ঐ বুড়ো হেঁড়া-ন্যাকড়ার ব্যাপারি
সব-কিছু ঝেঁটিয়ে নিয়ে যে নালায় ফেলছে—
তার জন্যেও কষ্ট লাগে মনে :

কষ্ট হয়, পৃথিবীটা সরল ব'লে
(যা-ই বলুক না চালাক লোকেরা),
নুয়ে-পড়া ঝোপের জন্যেও কষ্ট
আর যেহেতু কিছু নেই যার শেষ নেই।

যখন চোখের সামনে সব যাচ্ছে ছ'লে
আর হেমন্তের শাদা ঝুলকালি
মাকড়শার জালের মতো জ্ঞানলা দিয়ে নেমে আসে
তখন কষ্ট, কেন তাকিয়ে থাকার কোনো অর্থ নেই?

বাগানের বেড়া ডিঙিয়ে একটি পথ
বার্চবনের মধ্যে হারিয়ে গেলো।
বাড়ির মধ্যে জটলা আর হাসির শব্দ,
আর দূরে সেই একই হাসি, একই জটলা।

বিয়েরবাড়ি

আঙিনার প্রান্ত পেরিয়ে
এসেছে দলে-দলে অতিথি,
কনের বাড়িতে ভোর অবধি
ফুটি করবে ব'লে।

বাড়িওলার কনাতে ছাওয়া দরজার পিছনে
গালগল্পের টুকরো
একটা থেকে সাতটা পর্যন্ত
শান্ত।

কিন্তু ভোরবেলা
যখন মনে হয় অনন্তকাল ঘুমোনো যায়,
তখন, বিয়ের আসর থেকে বেরিয়ে,
হার্মোনিয়ম বেজে ওঠে আবার।

গাইয়েটি আবার দেয় ছিটিয়ে
হাততালির ফোয়ারা,
পাথরের মালার ঝলমলানি;
আন্ত দলটির হুল্লোড়।

যারা ঘুমিয়ে আছে তাদের বিছানায়
উৎসব থেকে ছিটকে
ফেটে পড়ে নাচের সুর, কথার বকবকি—
আবার, বার-বার।

তুষারের মতো শাদা একটি মেয়ে
ময়ূরের মতো নরম চ'লে আসে
সারি-সারি ভিড়ে, শিশু দেবার আওয়াজের মধ্যে,
আসে নিতম্ব দুলিয়ে।

মাথা ঝেকে,
ভঙ্গি তুলে ডান হাতটিতে,
নাচতে শুরু ক'রে দেয় শানের উপর
ময়ূরের মতো।

হল্লা, খেলা, ফুর্তি, থেমে যায় হঠাৎ;
নাচের টিপ-টিপ তাল
যেন তলিয়ে যায় পাতালে,
যেন জলের মধ্যে ডুবে যায়।

উঠোনে গোলমাল উঠছে জেগে;
কথাবার্তায়,
হাসির দমকের মধ্যে,
মিশে যাচ্ছে কেজো শব্দের প্রতিধ্বনি।

ধূসর-নীল ঘূর্ণিহাওয়া উঠলো;
এক ঝাঁক পায়রা
খোপ থেকে উড়াল দিয়ে
উঠে গেলো সীমান্তহীন আকাশের উচুতে।

যেন কেউ, ঘুম থেকে উঠে,
ওদের পাঠিয়ে দিলে
বর-কনের পিছন-পিছন
অনেক, অনেক বছরের আয়ু কামনা ক'রে।

ডাঃ জিভাগো

আর জীবন মানে তো একটি মুহূর্ত শুধু,
শুধু অন্যদের মধ্যে
নিজের এই গ'লে যাওয়া,
যেন উপহার দিচ্ছি ওদের কাছে—নিজেকে;

শুধু এই বিয়ের রাত্রি
সব ক-টা জানলার মধ্য দিয়ে রাস্তা থেকে বিক্ষোভিত,
শুধু এক গান, এক স্বপ্ন,
এক ধূসর-নীল পায়রা।

হেমন্ত

আমার স্ত্রীপুত্রকে ছাড়িয়ে যেতে দিয়েছি আমি,
প্রিয়জন সব বিচ্ছিন্ন।
এক জীবনব্যাপী নিঃসঙ্গতায়
ভ'রে আছে প্রকৃতি আর আমার হৃদয়।

আর এখানে আমি তোমার সঙ্গে, ছোট্ট কুঠুরিতে
বাইরে, মরুর মতো জনহীন অরণ্য।
যেমন সেই গানে, তেমন সব রাস্তাঘাট
আগাছায় প্রায় ছেয়ে গেলো।

দেয়ালের তক্তাগুলি বিষণ্ণ
আমাদের দু-জনকে ছাড়া আর-কিছুই দেখতে পায় না ব'লে।
কিন্তু আমরা তো কখনো ভাবিনি যে উপকে যাবো বাধা।
সাধু হবে আমাদের মৃত্যু।

একটায় টেবিলে খেতে বসবো দু-জনে, উঠবে তিনটে বাজলে,
আমার হাতে বই, তুমি তুলে নেবে শেলাই।
ভোরবেলা মনে আনতে পারবে না
কখন আমরা চুমো খাওয়া থামিয়েছিলুম।

পল্লব, তোলো মর্মরধ্বনি, ছিটিয়ে দাও নিজেদের
আরো, আরো বেপরোয়া, আরো, আরো উজ্জ্বল,
গত কালের তিক্ত পেয়ালা ভ'রে দাও
আপো আরো ভ'রে দাও আজকের বেদনায়।

বাসনা, আনন্দ, ভক্তি,
ছড়িয়ে পড়ুক সেন্টেম্বরের কলরোল :

আর তুমি যাও, এই ফাটা গলার হেমস্তের মধ্যে লুকিয়ে থাকো,
হয় উদ্ভাদ হ'য়ে যাও, নয় শান্ত।

বন যেমন পাতাগুলিকে
তেমনি তুমি ছুঁড়ে ফ্যালো তোমার জামা-কাপড়।
রেশমি ফিতেওলা ড্রেসিংগাউন জড়িয়ে
তুমি ঝ'রে পড়ো আমার বাহুবন্ধে।

জীবন যখন রোগের চেয়েও বমি-পাওয়া
আর সৌন্দর্যের শিকড় শুধু সাহস,
যখন ধ্বংসের পথে তোমাকে পেয়েছি এক ভালো উপহার।
এই আমাদের পরস্পরের টান।

একটি রূপকথা

একদা রূপকথার দেশে
ঘোড়সওয়ার
টগবগিয়ে মাড়িয়ে চলে
স্টেপির পাড়।

সামনে তার যুদ্ধ। দূরে
আধার এক অরণ্য
ঝাপসা ধুলোর পর্দা ছিঁড়ে
আসন্ন।

হৃদয়ে অস্বস্তি, বলে
আচড় কেটে :
'জলের ধারে শঙ্কা, নাও
কোমর ঐটে।'

শুনলে না সে। মানলে শুধু
নিজের মন,
গাছে নিবিড় পাহাড় বেয়ে
চললো ছুটে জোর কদম;

পাহাড় পার, মস্ত মাঠ
রইলো পিছে,
শুকিয়ে-যাওয়া ঝর্নারেখার
চিহ্ন ধ'রে নামলো নিচে।

উপত্যকায় পায়ের ছাপে
জানতে
পেলো এ-পথ গেছে জলের
প্রান্তে ।

সাবধানের শব্দ ওঠে
বারে-বারে;
বধির, নিলো চালিয়ে তার
অশ্বটিকে জলের ধারে ।

ঝর্না যেথায়
আকাবাকা অল্প জলে,
গুহার মুখে
গন্ধকেব আগুন জ্বলে ।

উগ্র লাল ধোয়ায় চোখ
মেঘলা হ'লো। অকস্মাৎ
অরণ্যের দীর্ঘ ক'রে
উঠলো দূর আর্তনাদ ।

চমকে ওঠে অস্বারোহী :
'আমায় ডাকে!'
জবাব দিতে কঠিন হাতে
আকড়ে ধরে বর্শটিকে;

মিটিমিটি চক্রে পড়ে
এবার তাব
মুণ্ড, ধড়, লম্বা ল্যাজ
জন্তুটার ।

একটি মেয়ে
বন্দী হ'য়ে প'ড়ে আছে
শঙ্কময় বপুর তিন-
ফেরতা প্যাচে ।

হাঁ থেকে লাল ফুলকি ওড়ে;
দুলছে গলা,
যেন মেয়ের কাঁধের উপর
চাবুক তোলা ।

রূপসীকে, রাজ্যে এক
নিয়ম আছে,

বলি দিতে হবে বিকট
আরণ্যক পশুর কাছে।

প্রজারা এই অর্ঘ্য দেয়
অজগরে,
বিনিময়ে দখল রাখে
বস্তিঘরে।

অবাধ সাপ বন্য সাধ
মিটিয়ে নিতে
রূপবতীর কণ্ঠ, বাহ
বাঁধে কঠিন কুণ্ডলীতে।

অশ্বারোহী প্রার্থনায়
পাঠালে চোখ উর্ধ্বে;
বর্ষা উচু করো এবার
যুদ্ধে।

রুদ্ধ চোখ।
পাহাড়। মেঘ। জলের স্বর।
পাথর। নদী।
বছর। যুগ। যুগান্তর।

রক্তমাখা; লোহার টুপি
লুটোয় দূরে;
ধেঁৎলে যায় সর্প, তার
ঘোড়ার খুরে।

ছড়িয়ে আছে বর্ষা আর
অশ্ব, নাগ, বালুর 'পরে;
মূর্ছিত সে; সংজ্ঞাহীন
কন্যা প'ড়ে।

স্নিগ্ধ নীল ঝামরে নামে,
দুপুর ভ'রে গুনগুনানি।
এই মেয়ে কে? কিবানী? রাজ-
কন্যা? রানী?

কখনো ঘোর পুলকে নামে
বিরামহীন অশ্রুধারা,
কখনো তারা মরণঘুমে
আত্মহারা।

কখনো তার স্বাস্থ্য ফেরে,
তাকায় চোখ একবার;
কখনো ফের রক্তপাতে
নিঃসাড়।

কিন্তু হৃৎপিণ্ড বাজে।
কন্যা, বীর, জাগবে ব'লে
বারেক কৈপে, নিদ্রাবেশে
আবার ঢলে।

রুদ্ধ চোখ।
পাহাড়। মেঘ। জলের স্বর।
পাথর। নদী।
বহর। যুগ। যুগান্তর।

অগস্ট

ঠিক তার প্রতিশ্রুতি-মতো
পরদার ফাঁক দিয়ে ভোরের আলো ঘরে এলো,
বাঁকা একটি জাফরান-রঙের রেখা
ঠেকলো এসে সোফায়।

সূর্যের উত্তপ্ত হলুদে
ছেয়ে গেলো পাশের বন, পাড়াগাঁর বাড়ি,
আমার বিছানা, ভেজা বালিশ,
বইয়ের শেলফের পিছনে দেয়াল।

মনে পড়ছে বালিশ কেন ভেজা।
স্বপ্নে দেখলুম তোমরা আসছো,
একের পর এক, বনের মধ্য দিয়ে,
বিদায় দিতে আমাকে।

শিথিল ভিড় ক'রে হাঁটছিলে তোমরা।
কিন্তু একজনের মনে পড়লো
যে পুরোনো পাঁজির^১ মতে
আজ, ছুটুই অগস্ট, খুঁটের রূপান্তরের^২ দিন।

১ জুলিয়াস সীজার প্রবর্তিত সংশোধিত পঞ্জিকা য়োরোপে বহুকাল প্রচলিত ছিলো; কিন্তু ষোলো শতকে তাতে গুরুতর তুল দান পড়ে: ৩৬কালীন পোপ ত্রয়োদশ শ্রেণি তার সংস্কারসাধন করেন। রোমান ক্যাথলিক দেশগুলি এই নতুন শ্রেণীয় পঞ্জিকা গ্রহণ কবতে দেরি করেনি, কিন্তু ইংলণ্ডে ১৭৫২-র আগে তা স্বীকৃত হয়নি। আর রাশিয়া ও পূর্ব-য়োরোপের দেশগুলিতে তা প্রচলিত হয়েছে মাত্র বিশ শতকে। জুলিয়ান পঞ্জিকে বলে 'পুরোনো', আর শ্রেণীয় পঞ্জিকে 'নতুন'।—অনুবাদের টীকা।

২ যীশু একবার তাঁর শিষ্যদের সামনে ঐশীরাণে আবিস্কৃত হয়েছিলেন; একে বলে তাঁর রূপান্তর। এর ঘটনাস্থল টাখর পর্বত।—অনুবাদের টীকা।

সাধারণত, এই ভিথিতে, এক দহনহীন দীপ্তি
টাবর-গিরির চূড়া থেকে ছড়িয়ে পড়ে,
আর হেমন্ত, কোনো চিহ্নের মতো স্পষ্ট,
সব দৃষ্টি নিজের দিকে টেনে নেয়।

তোমরা চলছিলে ছোটো, কম্পমান,
ভিখিরি-নগ্ন অভ্যাস-ঝোপের মধ্য দিয়ে,
চলছিলে কবরখানার দিকে, যেখানে আদার মতো লালচে গাছপালা,
মধুতে তৈরি পিঠের মতো জ্বলজ্বল করছে।

গাছগুলির শব্দহীন উচুতে
আকাশ তাদের মহান প্রতিবেশী;
আর, মোরগের লম্বা টানা কণ্ঠনাদে
দূর ডাক দিয়ে যায় দূবতরকে।

গাছগুলোর ফাঁকে-ফাঁকে কবরখানার মধ্যখানে দাঁড়িয়ে
সরকাবি গোমস্তার মতো মৃত্যু
আমার মৃত মুখের দিকে তাকিয়ে-তাকিয়ে
মেপে নিলে—কতো বড়ো কবর চাই আমার জন্য।

স্পষ্ট শুনতে পেলো সবাই
কাছাকাছি, মৃদু একটি গলা;—
ওটা আমার অতীত স্বর, প্রবক্তার,
ধ্বংস তখনো স্পর্শ করেনি তাকে:

‘বিদায়, ঐ রূপান্তরের
নীল আর সোনালি;
নারীর একটি অস্তিম আদরে কোমল ক’রে তোলে।
আমার মরণলগ্নের সব তিস্ততা।

‘বিদায়, আমার কালোস্তর আয়ুষ্কাল,
বিদায়, নারী, যে-তুমি যুদ্ধে আহ্বান করেছিলে
অবমাননার পাতালকে।
আমি—আমি তোমার যুদ্ধক্ষেত্র।

‘বিদায় আমার উন্মুক্ত পাখার বিস্তারকে,
উড়ে চলার স্বাধীন প্রতিজ্ঞাকে বিদায়!
বিদায়, সৃষ্টিশীলতা, অলৌকিক শক্তি,
বাণীর মধ্যে উন্মোচিত বিশ্বরূপ!’

শীতের রাত্রি

তুমার ছেয়ে দেয় পৃথিবী
সকল সীমা তার ছেয়ে দেয়;
টেবিলে জ্ব'লে যায় মোমের বাতি,
টেবিলে জ্ব'লে যায়।

যেমন ঝাঁকে-ঝাঁকে গ্রীষ্মে
আলোর দিকে ছোট্ট কীটেরা,
তেমনি জানালায় নিবিড় ভিড়ে
জন্মেছে তুমারের পাপড়ি।

হাওয়ার তাড়া খেয়ে ঝাঁকছে
বৃন্ত, তীর ওরা জানালায়।
টেবিলে জ্ব'লে যায় মোমের বাতি
টেবিলে জ্ব'লে যায়।

আলোর উদ্ভাস সীলিঙে;
পরস্পরে সংবিদ্ধ—
হস্ত, পদতল সেখানে ছায়া ফেলে,
এবং নিয়তির দ্বন্দ্ব।

শব্দ ক'রে দুটো জুতো
চমকে প'ড়ে যায় মেঝেতে।
মোমের ফোঁটা-ফোঁটা অশ্রু ঝ'রে পড়ে
রাতের বাতি থেকে ঘাঘরায়।

ধবলকেশ ঐ ধবল তুমারের
আধারে সব গেলো হারিয়ে।
টেবিলে জ্ব'লে যায় মোমের বাতি,
টেবিলে জ্ব'লে যায়।

হঠাৎ কোণ থেকে ঝাপট হাওয়া
ফুঁ দিলো বাতিটার আগুনে;
তপ্ত প্রলোভন জাগলো দেবদূত,
পাখার ধৃত ক্রুশটিহু।

ফেব্রুয়ারি ভ'রে বিরতিহীন
তুমার পৃথিবীকে ছেয়ে দেয়,
টেবিলে মাঝে-মাঝে মোমের বাতি জ্বলে
টেবিলে জ্ব'লে যায়।

বিচ্ছেদ

চৌকাঠ থেকে সে উকি দিলে ভিতরে,
চিনতে পারলে না নিজের বাড়ি।
সেই মেয়েটির বিদায় ছিলো উড়ে যাওয়ার মতো।
চারদিকে ধ্বংসের চিহ্ন ছড়ানো।

সব ঘর লণ্ডভণ্ড;
চোখের জল আর মাথা ধরায় মিলে
তাকে দেখতে দেয় না
নিজের সর্বনাশের পরিমাণ।

সকাল থেকে একটা গর্জন চলেছে তার কানের মধ্যে।
জেগে আছে? না, স্বপ্ন দেখছে?
কেন বার-বার সমুদ্র
ঠেলে চ'লে আসে তার মনের ভাবনায়?

মেয়েটি তার প্রিয় ছিলো, আপন ছিলো
অঙ্গে-অঙ্গে।
যেমন তটরেখা সমুদ্রের ঘনিষ্ঠ
তরঙ্গে-তরঙ্গে।

যেমন ঝড়ের পরে
ঢেউ উঠে প্লাবিত করে বেণুবন
তেমনি তার হৃদয়ে
মগ্ন সেই নারীর প্রতিমা

সংকটময় কালে
জীবন যখন অচিন্ত্য,
সমুদ্রের তলদেশ থেকে নিয়তির জোয়ারে
ভেসে এসেছিলো তার কাছে এই নারী।

অসংখ্য ছিলো বাধা।
কিন্তু, জোয়ারের টানে
কোনোমতে ফাঁড়া কাটিয়ে
সে ভীরে এসে ঠেকেছিলো।

এখন সে চ'লে গেছে;
হয়তো যেতে চায়নি।
এই বিচ্ছেদ গ্রাস ক'রে নেবে তাদের,
কষ্ট করে-করে খাবে, হাড়গোড়সুজ্জ।

লোকটি তাকালো তার চারদিকে।
 যাবার মুখে
 সব উন্টে-পাল্টে দিয়েছিলো সে,
 দেরাজ টেনে ছুঁড়ে ফেলেছিলো সব।

সন্ধ্যা অবধি ঘুরে-ঘুরে
 দেরাজগুলোয় তুলে রাখে
 ছিটিয়ে-পড়া কাটা কাপড়
 আর ছিটের নকশা,

তারপর, এক টুকরো শেলাইয়ে বেঁধা ছুঁচ
 তার আঙুলে যখন ফুটে গেলো,
 হঠাৎ তাকে দেখতে পেয়ে
 কাদতে লাগলো নিঃশব্দে।

মিলন

যখন ভারি হ'য়ে তুষার পড়ে ছাতের উপর
 আর রাস্তাগুলিকে ঢেকে দেয়,
 আমি বেরিয়ে পড়ি পা দুটোকে টান করতে, আর তোমাকে
 একবার দেখবো ব'লে।

দরজার ধারে দাঁড়িয়ে আছো, একা,
 গায়ে পাংলা কোট, টুপি নেই, রবারের জুতোটাও নেই,
 চিবোচ্ছে এক মুঠো তুষার
 শান্ত হবার চেষ্টায়।

গাছগুলি, বেড়াগুলি
 মিলিয়ে যায় অন্ধকার দূরে।
 বরফের বৃষ্টির মধ্যে, একা,
 তুমি এক কোণে দাঁড়িয়ে আছো।

মাথার রুমাল থেকে জল নেমে আসে,
 চুইয়ে পড়ে জামার হাতায়,
 চিকচিক করে তোমার চুলে
 শিশিরের মতো।

একটি উজ্জ্বল অলকে
আলো হ'য়ে ওঠে
তোমার মুখ, মাথার রুমাল,
তোমার হেঁড়া কোট আর তোমার দেহের গড়ন।

চোখের পলক বরফে ভিজে গেলো,
আছে দুঃখ তোমার দৃষ্টিতে।
অ্যাসিডে ডোবানো ছেনিতে
তুমি আছো আমার হৃদয়ে খোদিত।

আর তোমার মুখশ্রীর অঙ্কুর বিনয়
রইবে আমার হৃদয়ে চিরকাল,
এই পৃথিবীর হৃদয়হীনতায়
আর আমার এসে যায় না।

আর এইজন্যেই তুষারময় রাত্রি
মিলিয়ে দিলো নিজের দুই প্রান্ত,
তোমার আর আমার মধ্যে সীমান্তরেখা
আমি টানতে পারি না।

কিস্তি আমরা কে? কোথা থেকে এলাম?
—দেখছো না, এই সব বছরগুলির
বাকি আছে শুধু বাজে গুজব,
আর আমরা এই পৃথিবীর কোনোখানেই নেই।

ক্রিসমাসের তারা

কনকনে শীত।
হাওয়া দিচ্ছে স্টেপির দিক থেকে।
পাহাড়ের গায়ে, গুহার মধ্যে,
নবজাতক, তুমি কি শীতে কাতর?

তাকে উকি রাখছে ঝাড়ের নিশ্বাস।
ঐ গুহাতেই
পোষা প্রাণীগুলোর গোয়াল;
তাই কেমন ভাপ বুলে আছে জাবভাণ্ডটির উপর।

তোশকের ঘাসের কুচি, ঝড়ের বীচি
গায়ের মেঘচর্ম থেকে ঝেড়ে ফেলে
আধো ঘুমের মধ্যে, শিলাখণ্ডের প্রান্ত থেকে,
মাকরাভের দূরত্বের দিকে রাখালেরা তাকিয়ে রইলো।

বহু দূরে বেড়া, কবরখানা, মৃতের সমাধিস্তম্ভ,
তুষারাচ্ছন্ন প্রান্তর;
বরফের মধ্যে একটা গাড়ির জোয়াল আছে প'ড়ে,
আর কবরখানার উপরকার আকাশ তারায়-তারায় আচ্ছন্ন।

কখনো, কখনো তাকে দেখা যায়নি এর আগে—
পাহারাগুলার ঝুঁড়েঘরের জানলায়
আলোর আভাসটিও লাজুক নয় এর মতো;—
সেই তারাটি বেথলেহেমের পথ দেখিয়ে চললো।

আকাশ থেকে, ঈশ্বর থেকে
এক পাশে স'রে দাঁড়িয়ে,
খড়ের ঝাঁটির মতো জ্বলতে লাগলো তারাটি,
আগুন-লাগা বাগিচার মতো উজ্জ্বল।

উঠলো উচুতে
বিচারির স্তূপ থেকে দপদপে শিখার মতো;
ঐ নতুন তারা দেখতে পেয়ে
বিশ্ব হলো চকিত।

তার আ ভা রঞ্জিম,
একটি সংকেত যেন; ঐ অপূর্ব আলোর আহ্বানে
ব্যস্ত হ'য়ে এগিয়ে এলেন
তিন জ্যোতির্বিদ।

বোঝাই-করা উপটোকন পিঠে নিয়ে
উটেরা তাদের পিছু-পিছু চললো;
পাহাড়ের ঢালু বেয়ে
গাড়ি টেনে নিলে দুটো গাধা, একটা অন্যটার চেয়ে ছোটো।

দূরে ভেসে উঠলো সমস্ত অনাগত কাল
এক আশ্চর্য স্বপ্নাবিষ্ট মুহূর্তে :
সব আশা, ভাবনা, জগতের পর জগৎ, শতাব্দীর পর শতাব্দী,
ভাবীকালের সব চিত্রশালা, কলাভবন,
সব ভোজবাজি, জাদুকরের কীর্তি, পিশাচের লক্ষ্যম্প,
সব ক্রিসমাস-গাছ, স্বপ্ন ছেলেবেলার :

মোমবাতির দ্যুতি, রঙিন কাগজে তৈরি শেকল
ঝলমলে রাংতার উজ্জ্বলতা...

...আরো রেগে উঠলো স্টেপির হাওয়া, দুশমনের মতো ব'য়ে গেল
...সব আপেল, সব সোনালি বৃদ্ধ।

পুকুরটার এক দিক ঢাকা পড়েছে অন্ডার-থোপে;
কিন্তু বেখানে রাখালেরা দাঁড়িয়ে
সেখান থেকে একটা অংশ যাচ্ছে দেখা,
দাঁড়াকার বাসা আর গাছগুলোর উচু মাথার ফাঁকে-ফাঁকে।

মেঘচর্মে গা ঢেকে নিয়ে তারা বললে,
'চলো আমরাও যাই ওদের সঙ্গে,
প্রণত হই এই অলৌকিকের সামনে।'

বরফ ভেঙে চলতে-চলতে তারা গরম হ'য়ে উঠলো।
সেই উদ্ভাসিত প্রান্তরের উপর, কুটিরটিকে ঘিরে-ঘিরে
দেখা দিলো খোলা পায়ের ছাপ, কাচের মতো ঝকঝকে।
তারার আলোয় চৈচিয়ে উঠলো পাহারাদার কুকুরের পাল।
যেন ঐ পায়ের ছাপগুলো মোমবাতির টুকরোর মতো জ্বলন্ত।

তুহিন রাত্রিটি যেন রূপকথা।
বরফের পাড়ি থেকে, সেই ভিড়ের মধ্যে
অদৃশ্য কারা যেন নেমে-নেমে আসে।
কুকুরগুলো পিছু নেয়, ব্রহ্মে তাকায় চারদিকে,
গা ঘেঁষে থাকে সবচেয়ে ছোকরা রাখালটির, যেন কোনো
বিপদের আশঙ্কা ক'রে।

সেই একই পল্লীতে, একই পথ ধ'রে
কয়েকটি দেবদূত ভিড়ের মধ্যে হেঁটে চললেন:
দেহ নেই তাঁদের, কেউ দেখতে পেলো না,
শুধু পায়ের চিহ্ন র'য়ে গেলো।

ভিড় জমলো দরজার ধারে পাথরটির সামনে।
ভোর হ'য়ে আসে। কেশবগাছের ডালগুলোকে স্পষ্ট দেখা যায়।
মারিয়া শুধোলেন, 'কে তোমরা?'
'আমরা একদল রাখাল, আর স্বর্গের দূত।
তোমাদের দু-জনকেই স্তুতি করতে এসেছি।'
'সবাইকে ধরবে না ঘরে। দরজার ধারে দাঁড়াও একটু।'

ভোরের আগে সেই ছাইরঙা প্রদোষে
কাঠের জলপাত্রের পাশে দাঁড়িয়ে
রাখাল আর গোলপালেরা পা ঠুকতে লাগলো মাটিতে।
যারা এসেছে পায়ে হেঁটে, আর যারা ঘোড়ায় চ'ড়ে, তারা
পরস্পরকে গাল পাড়তে লাগলো,
উটগুলো উঠলো গ'র্জে, গাধারা পা ছুঁড়ছে জোরে।

ভোর হ'য়ে আসে। আকাশ থেকে, কয়লার ঢুকরোর মতো,
শেষ ক-টা তারাকে ঝেঁটিয়ে নিয়ে গেলো দিন।
অতো বড়ো জনতার মধ্য থেকে শুধু ঐ তিন জ্ঞানীকে
পাথরের ফাটলের পথে মারিয়া ঘরে নিয়ে এলেন।

তিনি ঘুমিয়ে আছেন কাঠের জাবভাণ্ডে,
গাছের গর্তে জ্যোৎস্নার মতো উজ্জ্বল।
মেঘচর্মের আচ্ছাদন নেই—
তাকে উষ্ণ রাখছে গাধার ওষ্ঠ, ঝাড়ের নাসারজ্জ।

তিন জ্ঞানী আবছায়ায় দাঁড়িয়ে
ফিশফিশ করলেন, কথা খুঁজে পান না সহজে
আর হঠাৎ, অন্ধকার থেকে একটি হাত বেরিয়ে এসে
তাদের একজনকে জাবভাণ্ডের ঝাঁ দিকে ঠেলে দিলে।
ফিরে তাকালেন তিনি। দরজার ধার থেকে, পুণ্যকুমারীর দিকে অনিমেঘ,
অতিথির মতো,
ক্রিসমাসের তারাটি আছে তাকিয়ে।

প্রত্যুষ

আমার নিয়তির সর্বস্ব ছিলে তুমি।
তারপর এলো যুদ্ধ, সর্বনাশ।
অনেক, অনেক দিন হ'য়ে গেলো
কোনো চিহ্ন নেই, খবর নেই তোমার।

এতকাল পরে,
আবার তোমার কণ্ঠস্বরে আমি চঞ্চল।
সারা রাত ধরে পড়েছি আমি তোমাকে।
এ যেন এক মূর্ছা থেকে জেগে ওঠা।

লোকজনের সংসর্গ চাই আমি,
যেতে চাই ভিড়ের মধ্যে, সকালের ব্যস্ততায়।
মনে হয়, টুকরো ক'রে ভেঙে দিতে পারি সব-কিছু,
পারি ওদের ক্ষমা চাওয়াতে।

দৌড়ে নামি সিঁড়ি দিয়ে
এই ঘেন প্রথম
বেরোচ্ছি ভুবারে ঢাকা রাস্তায়
যার দুই দিকে হুটপাত জনশূন্য।

চারদিকে আলো, গার্মহু, লোকেরা উঠে পড়ছে,
চা খাচ্ছে, ছুটছে ট্রাম ধরতে।
কয়েকটি মিনিটের ব্যবধানে
শহরকে আর চেনা যায় না।

ফটকে ঘন হ'য়ে তুষার জমলো
আর তার উপর ব্লিজড বুনে চলেছে জাল।
ওদের সবারই তাড়াহুড়ো সময়মতো পৌছবে ব'লে,
অর্ধেক খাবার রইলে প'ড়ে, চা শেষ হ'লো না।

ওদের প্রত্যেকের জন্য আমার দরদ
যেন ওদের চামড়া আমারও,
গলমান বরফের সঙ্গে আমিও গ'লে যাই,
ভোরের সঙ্গে ঝুঁচকে তুলি ভুরু।

আছে আমার মধ্যে নামহীন লোকেরা,
শিশুরা, কুনোরা, গাছপালা।
ওরা সবাই জয় ক'রে নিয়েছে আমাকে,
আর এই আমার একমাত্র বিজয়।

অলৌকিক ঘটনা

বেথানি থেকে জেরুসালেমে চলেছেন তিনি
বিষাদে আর আশঙ্কায় অবসন্ন।
পাহাড়ের গায়ে-গায়ে চোরকাটাগুলো ঝলসে যাচ্ছে রোদ্দুরে,
কাছাকাছি কোনো কুটির থেকে ধোয়া উঠছে না,
বাতাস তাপিত, বাঁশবন নিষ্পন্দ,
আর নিষ্পন্দ লবণসিঁদুর নিশ্চলতা।

সমুদ্রের তিস্ততার সঙ্গে
তঁার আর্তির যেন প্রতিযোগিতা;
হেঁটে চলেছেন তিনি; ছোটো একদল মেঘ মাত্র তঁার অনুচর;
পথের ধুলো এগিয়ে চলে শহরের দিকে,
সেখানে, কোনো এক সরাইখানায়, শিষ্যদের সঙ্গে দেখা হবে।

চিন্তার এমন গভীরে তিনি তলিয়ে গেলেন
যে বিমর্ষ মাঠ থেকে চিরতার গন্ধ বেরোতে লাগলো।
সব স্তব্ধ, মধ্যখানে তিনি দাঁড়িয়ে, একা।
জ্বোরো প্রান্তর চাদরের মতো টান হ'য়ে প'ড়ে আছে।

ঐ তাপ, মরুভূমি, গিরগিটিগুলো,
কর্ণা আর জলশ্রোত—
সব যেন মিলে গেলো পরস্পরের মধ্যে।

কাছেই একটি ডুমুর গাছ দাঁড়িয়ে;
কল ধরেনি, ডালপালা পল্লব ছাড়া কিছু নেই।
তাকে তিনি শুধোলেন : ‘তোমাকে দিয়ে কোন সুখ হবে আমার ?
কী সার্থকতা তোমার—থামের মতো দাঁড়িয়ে আছো ওখানে !

‘আমি কুৎসিপাসায় কাতর, আর তুমি নিষ্ফলা,
শিলাখণ্ডের মতো সান্ন্যাসীন তোমার সত্তা।
কী অপ্রতিভ তুমি ! কী নৈরাশ্যজনক !
আর এমনি—এমনি তুমি থাকবে অনন্তকাল।’

বজ্রাহত বিদ্যুৎবাহিকার মতো
শিউরে উঠলো অভিশপ্ত তরু,
মুহূর্তে ভস্মীভূত হ’লো।

শাখা, মূল, বাণ, পল্লব
যদি আর এক মুহূর্ত সময় পেতো,
তাহ’লে তাকে বাচাতে পারতো প্রকৃতির বিধান।
—কিন্তু অলৌকিক মানে অলৌকিক, তারই নাম ঈশ্বর।
যখন আমরা অন্ধকারে দিশেহারা
ঠিক সেই মুহূর্তেই তা ঝুঁজে বেব করে আমাদের।

পৃথিবী

মস্কোর বাড়িগুলোর মধ্যে
ফেটে পড়ে অবাস্তবভাবে বসন্ত।
কাপড়ের আলমারির পিছনে পাখা ঝাপটায় পোকারা,
চলে গুঁড়ি মেবে গর্মিকালের টুপিগুলোর উপর।
লোমশ কোটগুলোকে ট্রান্সে তুলে রাখা হ’লো।

কাঠে তৈরি^১ দোতলা-তেতলার জানলায়
টবে ফুটলো লবঙ্গ-ফুল, দেয়াল-ফুল,
ঘরে যেন নিশ্বাস ফেলছে মস্ত খোলা হাওয়ার মাঠ,
চিলেকোঠায় ধুলোর মতো গন্ধ।

১ মস্কোব অনেক বসন্তবাড়িতে একতলাটা পাথরে, আর উপরের তলাগুলো কাঠে তৈরি হ’তো।

ঝাপসাচোখ জানলাগুলোর সঙ্গে
মিঠালি পাতায় রাস্তা,
শাদা রাত্রি আর সূর্যাস্তকে
নদী বেঁধে দেয় অবিচ্ছেদ বন্ধনে।

শোনা যাচ্ছে বাড়ির মধ্যে গলিতে
বাইরের কথাবার্তা, ব্যস্ততা,
আর গলমান বরফের ফোঁটা-ফোঁটা জলের সঙ্গে
এপ্রিলের গল্প আর মস্করা।
মানুষের দুঃখের হাজার বার্তা জানে এপ্রিল,
বেড়ার গায়ে-গায়ে ঠাণ্ডা হ'য়ে নেমে
সঙ্কেবেলাটা রটিয়ে দেয় সেই কাহিনী।

খোলা হাওয়ায়, ঘরোয়া আরামে
আগুন আর অস্বস্তির মিশ্রণ চলছে একই রকম;
সবখানেই বাতাস যেন অস্থির।
চৌবাস্তায়, জানলার তাকে,
ফুটপাতে, কবরখানায়,
সেই একই উইলো-ডালের কঞ্চি,
একই ফুলে-ওঠা শাদা কুঁড়ির প্রাচুর্য।

তাহ'লে দিগন্তে কেন কুয়াশার কান্না?
গোববের গন্ধ কেন থারালো?
এ কাজে কি ডাক আসেনি আমার
সুদূর যাতে হতাশ হ'য়ে না পড়ে,
যাতে, শহরের সীমার বাইরে, পৃথিবীর
না মনে হয় নিজেকে, নিসঙ্গ?

আর তাই এই প্রথম বসন্তে
একত্র হই আমি—আমার বন্ধুরা,
আমাদের মিলন যেন এক ইষ্টিপত্র,
আর সন্ধ্যা মানেই বিদায়—
যাতে, দুঃখের গারা গোপনে
তাপ দিতে পারে জীবনের ঠাণ্ডায়।

দুঃসময়

যখন শেষ সপ্তাহে
তিনি জেরুসালেমে প্রবেশ করলেন,
বজ্রনাদে জয়ধ্বনি এগিয়ে এলো,
ডাল হাতে নিয়ে ছুটলো তাঁর পিছনে জনতা।

দিনগুলি কর্কশ হ'য়ে উঠছে ক্রমশ, হানছে ত্রাস,
প্রেমে দ্রব হয় না কোনো হৃদয়,
অবজ্ঞায় কুঁচকে থাকে ভুরু;
এবার সমাপ্তি, এবার পরিশিষ্ট।

আকাশ, যেন শিষ্যের মতো ভারি হ'য়ে,
এলিয়ে আছে ছাদগুলোর উপর।
ফারিসীরা' খুঁজে বেড়ায় প্রমাণ,
শেয়ালের মতো চাটু করছে তাঁকে।

মন্দিরের মধ্যে, তামসী শক্তি
তাঁকে তুলে দিলে উচ্ছ্বল ইন্তরের হাতে—বিচারের জন্য।
যেমন সোচ্ছাসে তাঁর বন্দনা করেছিলো ওরা,
তেমনি এবার তাঁকে শাপাস্ত করলে।

ভিড় জমলো বাইরে,
ফটকের ফাঁকে-ফাঁকে উকি দিতে লাগলো;
কী হয়, তা জানবার জন্য ঠেলাঠেলি,
এই, এগিয়ে আসে ধাক্কা, এই যায় পেছিয়ে।

ছোট্ট ফিশফিশে একটি আওয়াজ, পোকার মতো সারা পাড়ায় ঘুরছে,
নানা দিক থেকে উড়ে এলো গুজব।
তাঁর মনে পড়লো, স্বপ্নের মতো,
তাঁর শৈশব, মিশরদেশে পলায়ন।

মনে পড়লো শূন্য প্রান্তরের মধ্যে
রাজার মতো পাহাড়, আর সেই চূড়া
যেখান থেকে, শয়তান
জগতের প্রভুত্ব দেখিয়ে তাঁকে লুক করেছিলো :

১ Pharisee : প্রাচীন একটি ইহুদি সম্প্রদায়ের নাম। ইরা ধর্মের লিখিত বিধান অক্ষতভাবে পালন করতেন, আর সেইজন্যই এদের মধ্যে অহমিকা ও শাঠ্য বেশি দেখা যেতো। আধুনিক য়োরোসেীয় কাব্য এই শব্দের এক স্বার্থ দাঁড়িয়েছে 'বকখার্মিক'। 'হ্যামলেট' কবিতায় যেখানে 'ধর্মাত্মের শঠতা'র উল্লেখ আছে, সেখানেও ধর্মাত্ম মানে ফারিসী।—অনুবাদের টীকা।

আর কানায় সেই বিবাহ-ভোজ^১,
অলৌকিক দেখে মোহিত অতিথিরা,
আর সেই সমুদ্র, যার উপর দিয়ে কুয়াশার মধ্যে,
তিনি হেঁটে গিয়ে নৌকো ধরেছিলেন—শুকনো ডাঙার মতো
তাঁর কাছে সমুদ্র।

মনে পড়লো বস্তুতে জড়ো-হওয়া গরিবদের,
কেমন মোমবাতি হাতে ভাঁড়ারে নেমেছিলেন,
আর কেমন ক'রে, পুনরুত্থিত মানবকে উঠে দাঁড়াতে দেখে
মোমবাতিটা ভয় পেয়ে নিবে গিয়েছিলো।

মারিয়া মাদলীনা^২

১

যখনই রাত নামে আমার প্রলোভক পাশে এসে দাঁড়ায়।
সে আমার ঋণ, আমার অতীতকে শোধ ক'রে দিচ্ছি।
ঝাঁকে-ঝাঁকে লাম্পটোর স্মৃতি
শোষণ ক'রে নেয় আমার হৃৎপিণ্ড—
সেই যখন পুরুষের মর্জির ঝাঁদি ছিলুম আমি,
নির্বোধ—ঠিক ছিলো না মাথার—
যখন রাস্তাটাই আমার আশ্রয় ছিলো।

সময় নেই, শুধু কয়েক মুহূর্ত অবশিষ্ট,
তারপরেই সমাপ্তিস্তরের মৌনতা।
পৃথিবীর অন্তিম এই প্রান্তে দাঁড়িয়ে, তোমার সামনে,
আমার জীবনটাকে ভেঙে আমি উজোড় ক'রে দিলাম,
কোনো-এক মর্মরপেটিকার মতো।

আমার গুরু, আমার ত্রাতা,
কোথায় আজ থাকতো আমার অস্তিত্ব—
যদি না, আমার ছলনার জালে আটকে-যাওয়া
এক নতুন মক্কেলের মতো,

১ সন্ত ইয়নের সুসমাচার কথিত আছে, কানা নামক জনপদে এক বিবাহসভায় বীণা জ্বলকে সুগায় পরিণত করেছিলেন।—অনুবাদের টীকা।

২ মারিয়া মাদলীনা মারিয়া নামী যে-তিন নারী বীণের পুনরুত্থানের সাক্ষী, ইনি তাঁদেরই একজন। পূর্বজীবনে ইনি ছিলেন গণিকা, বীণের যাতনাতোগের পূর্বদিনে ইনি এর মর্মরপেটিকা ভেঙে সজ্জিত মৃত্যুবান সামগ্রী ছায়া বীণকে অভিসিক্ত করেন তাঁর চরণ হোঁত ক'রে আপন কেশগুলো তা মুছিয়ে দেন।—অনুবাদের টীকা।

আমার টেবিলে ব'সে, রায়ে
আমার জন্য অপেক্ষা করতো অনন্তকাল ?

কিন্তু বলো আমাকে, এই আমি যখন
আমার নিঃসীম মনস্তাপে তোমার সঙ্গে এক হ'য়ে গিয়েছি—
যেমন গাছের সঙ্গে কলমের চারা একাত্ম—
তখন আর পাপের কী অর্থ,

কী অর্থ মৃত্যুর, নরকের, গন্ধকাগির ?
আর হয়তো, তোমার পা দুটি আমার কোলে তুলে নিয়ে,
যীশু, আমি ক্রমশ শিখে নিচ্ছি
কেমন ক'রে, তোমার অস্ত্যেষ্টির জন্য প্রস্তুতির সময়,
তোমার দেহটিকে নিজের মধ্যে মিলিয়ে নিতে-নিতে
ক্রুশকাঠের ফলকটিকে আলিঙ্গনে বাধতে হয়।

মারিয়া মাদলীনা

২

উৎসবের আগে বাসন্তী ধোয়া-মোছার পালা;
ভিড় থেকে দূরে স'রে গিয়ে
আমার ছোট্ট বাটি থেকে লোবান ঢেলে
তোমার পরম পুণ্যময় চরণের আমি সেবা করি।

কোথায় তোমার পাদুকা—খুঁজে পাই না।
আমার চোখের জল কিছু দেখতে দেয় না আমাকে;
আমার চুলের গুচ্ছ ব'রে পড়ে
ঘোমটার মতো ঢেকে দেয় আমার দৃষ্টি।

যীশু, তোমার পা দুটি আমার আঁচলে আছে বিন্যস্ত;
আমার চোখের জলে ধুয়ে দিয়েছি তাদের, আমার গলার মালা খুলে
নিয়েছি তাদের জড়িয়ে,
আমার খোলা চুল তোমার চরণের আবরণ।

স্পষ্ট দেখতে পাচ্ছি সমস্ত ভাবীকাল
যেন তুমি কালের গতি রুদ্ধ করেছো।
এ-মুহূর্তে আমার ভাবীকথনে পটুত্ব
দূরদর্শিনী ডাকিনীর মতো নির্ভুল।

আগামী কাল মন্দিরের গুঠন ছিল হবে,
আমরা কাছাকাছি থাকবো ছোট্ট দল বেধে, স্বতন্ত্র,
আমাদের পায়ের তলায় ট'লে উঠবে মাটি
হয়তো আমাকেই করুণা ক'রে।

গ্রহরীর দল নতুন ব্যূহ রচনা কববে,
ফিরে যাবে অশ্বারোহীরা।
আমার মাখার উপরে ক্রুশকাঠ, ঘূর্ণিবাত্যার মতো,
ঠেলে উঠবে আকাশের দিকে।

আমি পতিত হবো ওর পায়ের তলায়,
ঠোট কামড়ে, মূড়ের মতো, নির্বাক,
ক্রুশের শেষ প্রান্তে বিস্তীর্ণ হবে তোমার বাহু—
তুমি কি আলিঙ্গন করবে সকলকেই?

কার জন্য, এই নিখিলসংসারে কার জন্য,
এমন উদার তোমার আলিঙ্গন?
কার জন্য এতো শক্তি,
এতো যজ্ঞগা?

এই নিখিলসংসারে
এতো প্রাণী কোথায়?
কোথায় এতো জীবন,
এতো পল্লী, নদী, অরণ্য?

অতিবাহিত হবে ঐ ত্রিরাত্রি;
কিন্তু এমন শূণ্যতার দিকে তারা ঠেলে দেবে আমাকে
যে সেই ভীষণ অবকাশে
আমি বেড়ে উঠবো পুনরুত্থান পর্যন্ত।

গেথসেমানে^১

দূর নক্ষত্রের উদাসীন উদ্ভাসে
পথের মোড় আলো হ'য়ে আছে।
জলপাই-পাহাড়টিকে ঘিরে-ঘিরে উঠেছে পথ,
নিচে ব'য়ে চলে কেন্দ্রন।

প্রান্তর মিলিয়ে গেলো
ছায়াপথে।
ধূসরকেশ জলপাইগাছগুলোর চেষ্টা, যেন বাতাসের উপর দিয়ে
হেঁটে-হেঁটে দিগন্তে গিয়ে পৌছবে।

পথের ওপারে এক সজ্জিখेत।
বেড়ার বাইরে শিষ্যদের তিনি দাঁড়াতে বললেন।
'আমৃত্যু দুঃখময় আমার আত্মা,
তোমরা থামো এখানে, আমার সঙ্গে প্রহর জাগো।'


যেন ওগুলো সব ঋণের সামগ্রী
এমনি অবোধে তিনি ত্যাগ করলেন
তার নিখিলক্ষ্মতা, অলৌকিক পটুত্ব;
এখন আমাদেরই মতো মরণশীল মানব তিনি।

প্রলয়ের রাজত্ব সেই রজনী,
নাস্তিময়,
সমস্ত জগৎ জনহীন হ'য়ে গেছে,
শুধু এই উদ্যান এখনো জীবনের যোগ্য।

তিনি তাকিয়ে দেখলেন শূন্য, কালো,
অনাদ্যন্ত পাতালের দিকে।
তার স্বেদে রক্ত হ'লো ক্ষরিত, যখন তার পিতার কাছে
প্রার্থনা করলেন,
'এই মৃত্যুর পাত্র আমাকে উপেক্ষা করুক।'

প্রার্থনার বলে মৃত্যুযাতনাকে শমিত ক'রে
উদ্যানের দ্বার পেরিয়ে তিনি বাইরে এলেন।
সেখানে, তন্মায় অভিভূত,
শিষ্যেরা স্তূপের মতো প'ড়ে আছে ঘাসের উপর।

^১ গেথসেমানে এক উদ্যানের নাম : সেখানে বীত তার যাতনাস্বপ্নের পূর্বাভাস পেয়ে, শিষ্যদের কাছে তার আসন্ন মৃত্যুর
জ্ঞা পোনান। পরের দিন প্রান্তরফালেই তিনি গৃহীত ও ক্রুশবিদ্ধ হন।



কৈশোরে বরিস পাস্তেরনাক : লিওনিদ পাস্তেরনাক অঙ্কিত

তাদের ঘুম ভাঙালেন তিনি : 'ঈশ্বরের বরে আমার সমকালীন তোমরা,
আর তোমরা কিনা এলিয়ে আছো আরামে...
মানবপুত্রের সন্ধিক্ষণ আগত হ'লো
পাপীদের হাতে নিজেকে তিনি অর্পণ করবেন।'

বলামাত্র, কে জানে কোথা থেকে,
বেরিয়ে এলো এক ইতর ভিড় — চোব, ক্রীতদাস,
হাতে ছোরা, হাতে মশাল,
আর পুরোভাগে জুডাস, তার চুষনের প্রতারণা নিয়ে।

পিটার বাধা দিলেন ঘাতকদের,
তার তলোয়ারে একটি কান হ'লো ছিন্ন।
শুনলেন বাণী : 'কলহের নিষ্পত্তি হয় না ইস্পাতে,
রাখো তুলে খাপের মধ্যে তোমার তলোয়ার।

'আমাকে বাঁচাবার জন্য, আমাব পিতা
পারতেন না কি অশ্বৌহিনী বাহিনী পাঠাতে?
তাহ'লে কার সাধ্য আমার কেশস্পর্শ করে!
ছত্রখান হ'তো শত্রুরা, কোনো চিহ্ন থাকতো না।

'কিন্তু জীবনগ্রন্থ সেই পাতাটিতে পৌঁছলো
যেখানে আছে পুণ্যের পূর্ণতা।
সেই লিপিকে হ'তেই হবে সার্থক,
তবে তা-ই হোক। আমেন।

'বুঝে নাও, কালের যাত্রা একটি রূপকমাত্র,
পথে-পথে শতাব্দীগুলোতে আগুন ধরবে।
মহাকালের দারুণ মহিমার মন্ত্র জপ ক'রে
আমি, অপ্রতিহত, যজ্ঞগা পেরিয়ে নেমে যাবো কবরে।

'আর তৃতীয় দিনে আমার হবে পুনরুত্থান।
নদীর শ্রোতে সারি-সারি ভেলার মতো, দলবদ্ধ অসংখ্য
নৌকোর মতো,
অজ্ঞকার থেকে আমার দিকে ভেসে আসবে শতাব্দীগুলো,
আর আমি তাদের বিচার করবো।'

বরিস পাস্টেরনাক

মস্কো নগরে, ১৮৯০ খ্রিস্টাব্দে, বরিস পাস্টেরনাক জন্মগ্রহণ করেন। পিতা লিওনিদ পাস্টেরনাক। চিত্রকর ও টলস্টয়ের বন্ধু; মাতা, রোজা কাউফমান-পাস্টেরনাক সুরশিল্পী। পিতামাতার প্রথম সন্তান বরিস প্রথম যৌবনে স্থির করতে পারেননি তাঁর জীবনের বৃত্তি কোনটি হবে। ঝোঁক ছিলো সংগীতের দিকে, কিছুকাল তার চর্চাও করলেন, এদিকে মস্কো বিশ্ববিদ্যালয়ে আইনবিষয়ক পড়াশুনো চলছে। ছোলেবেলায় ট্রেনে একবার একটি ক্ষীণকায় লাজুক বিদেশীকে দেখেছিলেন; পবে জানতে পারেন তিনি রাইনের মারিয়া রিলকে। বাড়িতে একদিন আবিষ্কার কবলেন বিলকের কবিতাব বই, কবি নিজেই লিওনিদ পাস্টেরনাককে উপহার দিয়েছিলেন। বরিস আইন ছেড়ে ভর্তি হলেন দর্শনে, তারপর হঠাৎ একদিন মা-র সঙ্কীর্ণ অর্থ সম্বল করে চলে এলেন জার্মানির মারবুর্গ শহরে দর্শন পড়তে। কিন্তু সেখানেও ডিগ্রি নেওয়া হ'লো না; কিশোর প্রেমের নায়িকার সঙ্গে সম্বন্ধ ছিন্ন হ'লো; অবশিষ্ট অত্যন্ত অর্থ নিয়ে ইটালিতে ভ্রমণ করে স্বদেশে ফিরে এলেন। প্রথম মহাযুদ্ধ শেষ হবার পরে আর-একবার জার্মানিতে যান, তারপর অবশিষ্ট জীবন জন্মভূমিতেই অতিবাহিত করেন।

তাঁর প্রথম কাব্যগ্রন্থ 'মেঘের মধ্যে যমজ' ১৯১৫ সালে প্রকাশিত হয়; দ্বিতীয়, 'আমার বোন, জীবন' ১৯১৭-তে বচিত হ'য়ে প্রকাশিত হয় ১৯২২ সালে। সঙ্গে-সঙ্গে রাশিয়ার অন্যতম প্রধান তরুণ কবিরাপে স্বীকৃত হলেন তিনি; তাঁর সমবয়সী কিউবিস্ট ও ফিউচারিস্ট কবিদের সঙ্গে তাঁর যোগাযোগ ও সৌহার্দ্য ঘটলো, কিন্তু তিনি নিজে কোনো গোষ্ঠীর অন্তর্ভুক্ত হলেন না। ইংরেজিতে 'Safe Conduct' নামে অনূদিত আত্মজীবনীতে তাঁর জীবনের এই অধ্যায়ের সুন্দর বর্ণনা আছে। তাঁর এই সময়কাল সাহিত্যিক সতীর্থরা—এসেনিন, মায়াকভস্কি, মারিয়া ৎসভেটাইয়েভা, বরিস পিলনিয়াক, ইউজেনে জামিয়াস্টিন—১৯২৫ থেকে ১৯৪১-এর মধ্যে এঁরা সকলেই আত্মহত্যা করেন বা রহস্যময়ভাবে অবলুপ্ত হন; কিন্তু বরিস পাস্টেরনাকের নিয়তি তাঁকে সত্তর বছর পর্যন্ত জীবিত ও সৃষ্টিশীল রেখেছিলো।

যদিও কবি হিসেবে খ্যাতিনামা, সোভিয়েট সমালোচকদের দক্ষিণ্য তিনি কখনোই লাভ করেননি। 'দুরোধ', 'স্বাতিপ্রধান', 'ব্যক্তিগত', 'জনগণের সংযোগরহিত'—এই সব বিশেষণ তাঁকে দিনে-দিনে নিন্দনীয় করে তুলেছিলো। তবু, ১৯৪৫ পর্যন্ত তাঁর নতুন-নতুন কাব্য ও গদ্যগ্রন্থ রচিত ও প্রকাশিত হবার বাধা ঘটেনি; কিন্তু এর পরেই তাঁর বিষয়ে বিরুদ্ধতা এমন উদগ্র হ'য়ে উঠলো যে পাস্টেরনাক প্রায় একান্তরূপে অনুবাদ-কর্মে আত্মনিয়োগ করলেন। বহু ভাষায় অভিজ্ঞ তিনি শেক্সপীয়র, গোট্টে, শিলার, ভেরলেন, শেলি প্রভৃতি পশ্চাত্য কবিদের রচনার, এবং আর্মিন ও জর্জীয় ভাষার কবিতার বহু উত্তম অনুবাদ এগয়ন করে কোনোরকমে স্বীয় জীবিকার সংস্থান ও মাতৃভাষার সাহিত্যকে অনবরত সমৃদ্ধ করে চললেন; আধুনিক রুশীয় রঙ্গমঞ্চে তাঁরই অনুবাদে শেক্সপীয়র ও শিলারের নাটক অভিনীত হ'য়ে থাকে; তাঁর 'ফাউন্টেন'র অনুবাদ একটি স্মরণীয় কীর্তি।

দ্বিতীয় মহাযুদ্ধের পরবর্তী স্টালিন আমলে পাস্টেরনাক একটিও মৌলিক রচনা প্রকাশ করেননি বা করতে পারেননি। তাঁর পূর্বপ্রকাশিত পুস্তকসমূহ অপ্রকাশে প্রচ্ছন্ন হ'য়ে আছে; তাঁর

নাম উঠলে নব্য সাহিত্যিকেরা বলাবলি করেন, ‘কে পাস্টেরনাক? ও, সেই অনুবাদক।’ তাঁর জীবন হ’য়ে উঠলো স্বদেশেই নির্বাসিতের মতো : মস্কোর উপকণ্ঠে এক গ্রামে তাঁর বাসা, দেশবিদেশের পুস্তকে পরিবৃত হ’য়ে তাঁর দিন কাটে; যে-‘পাশ্চাত্য সংস্কৃতি’ নিখিলরাশিয়ায় নিয়তধিকৃত, তার সঙ্গে আশ্চর্যভাবে মানস সংযোগ রক্ষা ক’রে চলেছেন তিনি। দ্বিতীয় মহাযুদ্ধের আরম্ভকালে, যখন রুশ মনীষীরা একটি মুক্তির হাওয়া অনুভব করেছিলেন, তখনই ‘ডাক্তার জিভাগো’ উপন্যাসের পরিকল্পনা তাঁর মনে আসে; হয়তো, পরবর্তী দারুণতর দুঃসময়ে, প্রকাশের আশা প্রায় না-রেখে নিজের নির্জনের মধ্যে উপন্যাসটি তিনি লিখতে আরম্ভ করেন।

“ডাক্তার জিভাগো”-র বৈদেশিক প্রকাশ, তার নোবেল পুরস্কারপ্রাপ্তি, এবং পরবর্তী বিক্ষোভ ও আন্দোলন—এ-সব আজ কোনো পাঠকেরই অজানা নেই। অবজ্ঞার অপমানের চেয়েও পাস্টেরনাকের মনে অনেক বেশি কঠিন হ’য়ে বাজলো এই অনভিপ্রেত তর্কদীর্ঘ প্রকাশ্যাতা। ‘নোবেল প্রাইজ’ নামক কবিতায় এই সময়কার বেদনা স্ফুরিত করলেন :

‘আমি যেন এক খাঁচায় বদ্ধ জন্তু।
স্বস্থ, স্বাধীন আলোকে আনন্দিত
আজো কোনোখানে রয়েছে মানুষ—কিন্তু
আমি পরিবৃত শিকারির পদশব্দে।

কিন্তু বলো তো কী আমার দুষ্কৃতি?
আমি কি দস্যু? অথবা পিশুন ধূর্ত?
মাতৃভূমির রূপের পুণ্যস্মৃতি
জাগিয়ে, যে-আমি জগতে করেছি আর্ত?’

(বৃদ্ধদের বসু-কৃত অনুবাদ)

পুরস্কার প্রত্যাখ্যান করলেন, তিস্ততম মুহূর্তে দেশত্যাগী হবার কল্পনা করলেন না; তবু সোভিয়েটতন্ত্রের বিরুদ্ধতাকে প্রশমিত করা অসম্ভব হ’লো। সোভিয়েট লেখক-সংঘ থেকে বিতাড়িত হলেন তিনি; তাঁর সমগ্র সাহিত্যকৃতিকে দুয়ো সেবার জন্য বহু লেখনী ও রসনা উদ্ধৃত হ’য়ে উঠলো; যে-উপন্যাস রাশিয়ার মধ্যে প্রায় কেউই পড়তে পেলো না সেটিই হ’য়ে উঠলো তাঁর কলঙ্কচিহ্ন, তাঁর নিন্দনীয়তার নিদর্শন। এই দুঃশীলতার প্রতিবাদে বহু কণ্ঠ ধ্বনিত হ’লো অন্যান্য দেশে ও মহাদেশে; বহু প্রখ্যাত সাহিত্যিক ও মনীষী তাঁর প্রতি শ্রদ্ধা ও সমবেদনা জানালেন; এবং বাদানুবাদ এমনভাবে স্ফীত হ’তে লাগলো যেন তাঁকে নিয়ে লৌহ যবনিকার এপারে-ওপারে রাজনৈতিক মল্লযুদ্ধ চলছে। পাস্টেরনাকের কবিস্বভাবের পক্ষে এ যে কতো বড়ো বেদনা তা বলার কোনো দরকার করে না।

এই অদ্ভুত সংকট থেকে মৃত্যুর করুণা তাঁকে উদ্ধার করলো। ৩০শে মে, ১৯৬০, রাত্রিকালে, স্বল্পস্থায়ী রোগভোগের পর এমন একটি জীবনের অবসান হ’লো, যার সাধুতা, সৃষ্টিশীলতা ও অবৈকল্য এই সম্ভ্রুত মধ্য-শতকে মনুষ্যত্বের একটি উদাহরণ ব’লে গণ্য হ’তে পারে। পেরেডেলকিনো গ্রামে, যেখানে জীবনের শেষ কুড়ি বছর তিনি কাটিয়েছিলেন, সেখানেই পাস্টেরনাক শেষ নিশ্বাস ত্যাগ করলেন। জানলা দিয়ে দেখা যেতো একটি গ্রাম্য কবরখানা, তার মধ্যে অবস্থিত একটি নীলবর্ণ গির্জের ক্রুশচিহ্ন অনবরত তাঁর চোখে পড়তো; সেখানেই ধর্মীয় অনুষ্ঠানসমেত, তাঁর দেহকে যেন সমাধিস্থ করা হয়, এই ইচ্ছা বহুবার প্রকাশ করেছিলেন। ভাবতে ভালো লাগে যে কবির এই অন্তিম আকাজক্ষাটি অপূর্ণ থাকেনি, এবং যদিও মস্কো রেডিও ও তাস সংবাদসংঘ তাঁর মৃত্যুর বিষয়ে সচেতনভাবেই নীরব ছিলো, তবু

তার অন্ত্যক্রিয়ায় বহু লেখক ও শিল্পী অনুগমন করেছিলেন, পাশ্চাত্য প্রথামতো মৃতের স্মরণে প্রশস্তি-ভাষণও উচ্চারিত হয়েছিলো। পিতামাতা ছিলেন ইহুদি ধর্মাবলম্বী, কিন্তু পাস্টেরনাক পরিণত বয়সে যীশুকে আবিষ্কার করেন; ‘খৃষ্ট এসেছিলেন আমার কাছে, তাঁকে না-পেলে এই যুগের যন্ত্রণা আমি সহ্য করতে পারতাম না,’ তাঁর মুখের এই কথাটি সম্প্রতি একটি পত্রিকায় প্রকাশিত হয়েছে। “ডাক্তার জিভাগো” উপন্যাস, ও জিভাগোর কবিতাশুদ্ধ, তাঁর খ্রিস্টীয় প্রেরণায় প্রোজ্জ্বল।

